


Tnúhu ní cáháⁿ yă
ndiõxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	69
SAN LUCAS	111
SAN JUAN	177
LOS HECHOS	222
ROMANOS	282
1 CORINTIOS	310
2 CORINTIOS	338
GÁLATAS	356
EFESIOS	366
FILIPENSES	376
COLOSENSES	383
1 TESALONICENSES	390
2 TESALONICENSES	396
1 TIMOTEO	399
2 TIMOTEO	407
TITO	412
FILEMÓN	416
HEBREOS	418
SANTIAGO	440
1 PEDRO	446
2 PEDRO	454
1 JUAN	459
2 JUAN	465
3 JUAN	466
JUDAS	467
APOCALIPSIS	470

TNÚHU NÍ CHÍDÓ TNÙNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gã Xítohó Jesucristú (Lc. 3:23-38)

¹ Te ñaní tnàhá Xítohó Jesucristú ní cuu ndíi Dàvíí ndíi ndíi Àbrahám, cue téé ní xíndecu ndéé sanaha vîhi-gá ñuyíú-a. Te duha ndúu cuendá dava-gá cue téé ní cuu ñaní tnàhá-gã ní xíndecu ndéé sanaha.

² Ndíi Àbrahám ní xóo ìíⁿ déhe ndíi, te ndíi-áⁿ ní xínani ndíi Isàác. Te déhe ndíi Isàác-áⁿ ní cuu ndíi Jàcób, te déhe ndíi Jàcób-áⁿ ní cuu ndíi Jùdá, te diu-ni ndíi Jàcób-áⁿ ní cuu tâtá dava-gá cue ñaní ndíi Jùdá-áⁿ.

³ Te déhe ndíi Jùdá-áⁿ ndíi ñadìhí ndíi, ndíi Tàmár ní cuu ndíi Fàrés ndíi ndíi Zàrà. Te déhe ndíi Fàrés-áⁿ ní cuu ndíi Èsróm, te déhe ndíi Èsróm-áⁿ ní cuu ndíi Àrám.

⁴ Te déhe ndíi Àrám-áⁿ ní cuu ndíi Aminàdáb, te déhe ndíi Aminàdáb-áⁿ ní cuu ndíi Nàsón, te déhe ndíi Nàsón-áⁿ ní cuu ndíi Sàlmón.

⁵ Te ñadìhí ndíi Sàlmón-áⁿ ní xínani-aⁿ Ràháb, te ní xóo ìíⁿ déhe-yu ní xínani-dě Bòóz. Te ñadìhí ndíi Bòóz-áⁿ ní xínani-aⁿ Rùt, te ní xóo ìíⁿ déhe-yu ní xínani-dě Òbéd, te déhe ndíi Òbéd-áⁿ ní cuu ndíi Isàí.

⁶ Te déhe ndíi Isàí-áⁿ ní cuu ndíi Dàvíí téé ní xíndaha ñàha xii cue ñáyiú isràél. Te déhe ndíi Dàvíí-áⁿ ndíi ñadìhí ndíi ní cuu ndíi Salòmón. Te díhna-gá ndíi Ùriás ní cándeca ndíi ñadìhí-áⁿ te dătnùní ní naqueheⁿ ñaha ndíi Dàvíí-áⁿ.

⁷ Te déhe ndíi Salòmón ní cuu ndíi Ròboám, te déhe ndíi Ròboám-áⁿ ní cuu ndíi Àbíás, te déhe ndíi Àbíás-áⁿ ní cuu ndíi Àsá.

⁸ Te déhe ndíi Àsá-áⁿ ní cuu ndíi Josàfát, te déhe ndíi Josàfát-áⁿ ní cuu ndíi Jòrám, te déhe ndíi Jòrám-áⁿ ní cuu ndíi Ùziás.

⁹ Te déhe ndíi Ùziás-áⁿ ní cuu ndíi Jòtám, te déhe ndíi Jòtám-áⁿ ní cuu ndíi Àcáz, te déhe ndíi Àcáz-áⁿ ní cuu ndíi Ezèquiás.

¹⁰ Te déhe ndíi Ezèquiás-áⁿ ní cuu ndíi Manàsés, te déhe ndíi Manàsés-áⁿ ní cuu

ndíi Àmón, te déhe ndíi Àmón-áⁿ ní cuu ndíi Jòsiás.

¹¹ Te déhe ndíi Jòsiás-áⁿ ní cuu ndíi Jecòniás. Te diu-ni ndíi Jòsiás-áⁿ ní cuu tâtá nchaa dava-gá cue ñaní ndíi Jecòniás-áⁿ. Te dàvá-áⁿ ní quide yica cuè téé ñuú Babiloniá ndécá-güedě ñáyiú isràél cuáháⁿ ñuú-güedě cuendá yàcáⁿ cundecú-yu.

¹² Te sátá ní yáha ducaⁿ ní cuu, te ndíi Jecòniás ní xóo ìíⁿ déhe ndíi ndíi ñadìhí ndíi, te téé-áⁿ ní xínani-dě Salàtiél. Te déhe ndíi Salàtiél-áⁿ ní cuu ndíi Zorobàbél.

¹³ Te déhe ndíi Zorobàbél-áⁿ ní cuu ndíi Àbíúd, te déhe ndíi Àbíúd-áⁿ ní cuu ndíi Eliàquím, te déhe ndíi Eliàquím-áⁿ ní cuu ndíi Àzór.

¹⁴ Te déhe ndíi Àzór-áⁿ ní cuu ndíi Sàdóc, te déhe ndíi Sàdóc-áⁿ ní cuu ndíi Àquím, te déhe ndíi Àquím-áⁿ ní cuu ndíi Èliúd.

¹⁵ Te déhe ndíi Èliúd-áⁿ ní cuu ndíi Eleàzár, te déhe ndíi Eleàzár-áⁿ ní cuu ndíi Mátán, te déhe ndíi Mátán-áⁿ ní cuu ndíi Jàcób.

¹⁶ Te déhe ndíi Jàcób-áⁿ ní cuu ndíi Chèé téé ní cuu yî tá Màriá xíchí ní cuu năná Jèsús Yaá ní tendaha Dütú Ndiöxí ní quixi ñuyíú-a.

¹⁷ Te sa ní cuu úxúú tnàhá cue téé cùu ñaní tnàhá ndíi Àbrahám ndécú dàvá-áⁿ, te dătnùní ní cacu ndíi Dàvíí diu-ni ñaní tnàhá ndíi. Te núú tnàhá méé ndíi Àbrahám ndíi ndíi Dàvíí ní cuu úxícúmí tnàhá-güedě. Te ducaⁿ te sa ní xínu úxícúmí-gã tucu-güedě ní cacu, te dătnùní ní tñî ñaha cuè téé ñuú Babiloniá xii ñáyiú isràél ndécá ñàha-güedě xii-yu cuáháⁿ ñuú-güedě cuendá yàcáⁿ cundecú-yu. Te sátá ní yáha sá dúcáⁿ ní cuu, te ní cacu úxúní tucu cue téé ní cuu ñaní tnàhá ndíi Àbrahám ndíi ndíi Dàvíí, te dătnùní ní cacu Xítohó Jesucristú ñuyíú-a. Te núú tnàhá méé-gã ní cuu úxícúmí tnàhá-güedě.

Ní cacu Jèsús (Lc. 2:1-7)

¹⁸ Te duha ní cuu cùtnàhá ní cacu Xítohó Jesucristú, chí dàvá-áⁿ ní xíndecu ìíⁿ xíchí cuéchí ní xínani Màriá. Te xíchí-áⁿ sa ní cundáá tnúhu sá tnândaha-xi ndíi ìíⁿ téé nàni Cheé. Te cùmání-gã tnândaha-xi ndíi téé-áⁿ te Espíritú Yă Ndiöxí ní quide ní ngúhuⁿ déhe-xi.

¹⁹ Te té Chèé téé cùní candeca ñaha xii xíchí-áⁿ ní cutnùní iní-dé sá ñúhú dēhe-xi.

Te cùu-dé ìⁿ téé quède ndáá, núu xiǎⁿ duuⁿ duuⁿ ní sani iní-dé sá vǎ tnǎndaha-gá-dé ndìhi-xi, te dicó-ni sá ñà túú ní cǎháⁿ-dé chi ní cuini-dé sá vǎ cǎháⁿ cuèhé cǎháⁿ duha ñáyiú cuèndá-xi.

²⁰ Te sátá dúcáⁿ ñí sani iní-dé te ní ngáva-dé ní xídí-dé, te núú sàní-dé ní sáháⁿ ìⁿ espíritú xínú cuèchi núú Yǎ Ndiǒxí ní xáhaⁿ-xi xii-dé:

—Yòhó té Chèé téé cùu ñaní tnáhá ndǐ Dàvíí, yúhú cǎchí tnúhu-í xii-n sǎ ñà túú nǎ cani iní-n, tnǎndaha nahi-ni-n ndìhi tá Màriá cuèi ñúhu déhe-xi, chi mee Espíritú Yǎ Ndiǒxí ní quide-xi ducaⁿ ñí ngúhuⁿ déhe-xi.

²¹ Te na càcu déhe-xi-áⁿ te danàni-n-dé Jèsús. Te ducaⁿ cùnani-dé, chi téé-áⁿ cada-dé cuèndá sá vǎ cùndecu-gá cue ñaní tnáhá-dé ñáyiú isràél ichi cuèhé ichi duha —duha ní xáhaⁿ espíritú-áⁿ xii té Chèé-áⁿ núú sàní-dé.

²² Te ducaⁿ ñí cuu chi ní quee ndáá-xi nàcuáa ní xáhaⁿ Yǎ Ndiǒxí xii ìⁿ téé ní cǎháⁿ tnúhu-gá ndéé sanaha. Te téé-áⁿ ñí chídó tnùní-dé núú tütú-gá nàcuáa ní xáhaⁿ-gǎ xii-dé, te duha ní xáhaⁿ-gǎ:

²³ Cundecu ìⁿ xíchí cuéchí ndéé cuèé-gá.

Te òré ndécú íí-xi vátá nihí-gá yíi-xi te ngúhuⁿ déhe-xi.

Te òré ná cǎcú dèhe-xi te danàni ñahá-yu Emànuél.

Duha ní xáhaⁿ-gǎ xii téé-áⁿ ñí chídó tnùní-dé núú tütú-gá. Te tnúhu Emànuél-áⁿ quèé-xí: Yǎ Ndiǒxí ndécú ndìhi-o. Núu xiǎⁿ ducaⁿ ñí cuu vitna.

²⁴ Te òré ní ndiquíú iní té Chèé-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tnándaha-dé ndìhi tá Màriá.

²⁵ Dico ndi dííⁿ ñí xíndecú-yu ndéé ní sáá nduu ñí cacu déhe-xi. Te òré ní cacu déhe-xi-áⁿ te ní dánání ñàha-dé Jèsús.

2

Cue téé cuángoto ñaha xii Jesús

¹ Te Jèsús ní cacu-gá ìⁿ ñúú nání Bèlén, te ñúú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndàha-dé ñáyiú. Te ñúú Jerusalén ní quexìo cue téé véxi ndàa xio nacuáa quène nchíanchii, cue téé túha dàcuaha cuèndá nchaa sá ndéé andiú.

² Te ndùcu tnúhu-güedé núú ñáyiú ñúú-áⁿ, te xáhaⁿ-güedé:

—¿Vá cùndèe iní-ndó cǎchí tnúhu-ndo ndéé ndécú téé quíndaha ñàha xii ñáyiú isràél-ǎⁿ? Chi ní xiní-ndí ní quene chódíní-dé ndàa xio nacuáa quène nchíanchii, núu xiǎⁿ véxi-ndí chi cuini-ndí quini-ndí-dé te chiñuhu-ndí-dé —cǎchí-güedé xáhaⁿ-güedé xii-yu.

³ Te òré ní nihí téé cùnùu nani Herodés tnúhu sá ndúcú tnúhu cue téé-áⁿ ndéé ndécú téé quíndaha ñàha xii ñáyiú isràél, te ñá túú tnáhí ní cùu váha iní-dé, te diu-ni ducaⁿ ñà túú ní cùu váha iní tnáhá nchaa ñáyiú ñúú-áⁿ.

⁴ Te ní cana-dé cue téé cùu dútú cùnùu, ndìhi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, te ní xicáⁿ tnúhú-dé núú-güedé ñúu xíní-güedé ndéé cacu Crístú téé tendaha Yǎ Ndiǒxí quixi ñuyíú-a.

⁵ Te ní xáhaⁿ-güedé xii-dé:

—Íⁿ ñúú yíndèhu distritú Jùdeá cacu-dé, te ñúú-áⁿ nání-xí Bèlén, chi quee ndáá-xi nàcuáa ní xáhaⁿ Yǎ Ndiǒxí xii ìⁿ téé ní xóo cǎháⁿ tnúhu-gá ndéé sanaha. Te duha nduu tnúhu ní chídó tnùní-dé núú tütú-gá:

⁶ Ñúú Bèlén cúú-xí ìⁿ ñúú líhli yíndèhu distritú Jùdeá, te ío-gá cùnùu-xi dacúxí dàva-gá ñúú cùnùu yíndèhu distritú-áⁿ,

chi diu ñúú-áⁿ quee ìⁿ téé ío cùnùu.

Te téé cunuu-ǎⁿ quíndaha-dé ñáyiú cùu cuèndá-í ñáyiú isràél.

Duha ní xáhaⁿ-gǎ xii téé ní xóo cǎháⁿ tnúhu-gá, te ducaⁿ ñí chídó tnùní-dé núú tütú-gá —cǎchí-güedé xáhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu ñí cana-dé cue téé ndùcu tnúhu núu ndéé ní cacu téé quíndaha ñàha xii ñáyiú isràél, te ní xicáⁿ tnúhú-dé núú-güedé ná nduu cùu-xi nduu díhna nuu ñí xiní-güedé chódíní.

⁸ Te sátá dúcáⁿ te ní xáhaⁿ-dè xii-güedé:

—Chí cuáháⁿ ñúú Bèlén te nducu tnúhu váha-ndo ñúu ndéé ní cacu téé ducaⁿ quíndaha ñaha xii ñáyiú isràél. Te òré ná náníhí-ndó-dé te quixi-ndo cǎchí tnúhu-ndo cuèndá quíhíⁿ-í tnáhá-í chiñuhu-í-dé —cǎchí-dé xáhaⁿ-dè xii-güedé.

⁹ Te sátá dúcáⁿ ñí xáhaⁿ té Hèrodés-áⁿ te ní xica-güedé cuáháⁿ-güedé. Te chódíní ñí

xiní-güedé ní quene ndàa xio nacuáa quène nchícanchii-áⁿ yòdo nuu-di núú-güedé cuáháⁿ. Te ní ngüíñí chódíní-áⁿ, te núú ní ngüíñí-di-áⁿ yíndáa núú ndécú Jèsús.

10 Te òré ní xiní cue téé-áⁿ ní ngüíñí chódíní-áⁿ núú yíndáa ndécú-gã, te ní cudíí víhí ínì-güedé.

11 Te ducaⁿ te ní quexìo-güedé ndéé núú cáa vèhe ndecu Jèsús. Te òré cuánguihu-güedé xití vehe te ní xiní-güedé Jèsús ndécú-gã ndìhi náná-gã Màriá. Te ní ngüíñí xití-güedé, te ní ngüíta-güedé ní cachí-güedé sá ìo càhnu cuu Jèsús. Te dàtnùnì ní nacaáⁿ-güedé càjà xínehe-güedé, te ní tava-güedé díhúⁿ cuáaⁿ, ndìhi dúsa sá ìo váha sàháⁿ tnámí nàni insiensú, ndìhi yúcú sá nánì mìrrá ní taxi ndecu-güedé núú Jèsús cuèndá cuu-xi ìⁿ táhú sá cúú-xí-gã.

12 Te Yá Ndiöxí ní cáháⁿ-gã núú sàní-güedé, te xãháⁿ-gã xii-güedé sá vã náyáha-gã-güedé cáháⁿ ndìhi-güedé té Hèrodés. Núú xíãⁿ cue téé-áⁿ cuãnuhú-güedé ingá ichi, te ñá túú-gã ní náyáha-güedé núú ndécú tã Hèrodés.

Cuáháⁿ-yu ndìhi Jèsús nàcióⁿ Ègiptú

13 Te sáta ní yáha cuãnuhú cue téé ní sãngoto ñaha xii Jèsús, te ní quexìo ìⁿ espíritú xínú cuèchi núú Yá Ndiöxí núú sàní té Chèé, te xãháⁿ-xi xii-dé:

—Véxi-í càchí tnúhu-í xii-n sã ndácóo-n, te ndee-n ñuú-a ndìhi Jèsús, ndìhi náná-gã cunu-ndo quíhíⁿ-ndó nàcióⁿ Ègiptú, chi té Hèrodés tendaha-dé cue téé quixi nanducu ñaha xii Jèsús cuèndá cahni ñaha-güedé. Te yàcáⁿ cundecu-ndo ndéé cachí tnúhu-í xii-n ndùu ndixi-ndo —cachí espíritú-áⁿ xãháⁿ-xi xii té Chèé núú sàní-dé.

14 Te té Chèé-áⁿ ní ndacóo-dé, te niú ní xica-dé ndìhi tá Màriá ndécã-yu Jèsús cuáháⁿ nàcióⁿ Ègiptú.

15 Te nàcióⁿ Ègiptú-áⁿ ndécũ-yu ní xihí té Hèrodés. Te ducaⁿ ní cuu chi ní quee ndáa-xi nàcuáa ní cachí ìⁿ téé ní xóo cáháⁿ tnúhu Yá Ndiöxí ndéé sanaha ní quide-dé núú-gã ní cáháⁿ-dé yuhu-gã, te duha ní xãháⁿ-gã ní cáháⁿ-dé: “Nàcióⁿ Ègiptú ndécú Dèhe-í ní cùu, te ní xãháⁿ-í xii-dé sá ndéé-dé ñuú-áⁿ vã cùndècu-gã-dé”,

duha ní xãháⁿ-gã xii téé ní cáháⁿ tnúhu-gã ní quide-dé núú-gã.

Té Hèrodés ní táuchúⁿ-dë cahni-güedé cue landú

16 Te cue téé ní sãngoto ñaha xii Jèsús ní dándàhú-güedé té Hèrodés, chi ñá túú ní náyáha-güedé cúñaha-güedé sá ní naníhí-güedé Jèsús. Te sáta ní cutnùnì iní té Hèrodés sá ní dándàhú ñáhá-güedé xii-dé te ní cudééⁿ víhí-dë, te ní tendaha-dë cue téé cuáháⁿ ñuú Bèlén, ndìhi nchaa dava-gã ñuú cáa yàtni xíáⁿ cuèndá cahni-güedé mee-ni cuè landú téé. Te ndéé cue landú íchí ní cacu, ndìhi ndéé cue landú sa ní nútahá úú cuíá-xi nchaa-güexi cahni-güedé ní xãháⁿ-dë. Te ducaⁿ ní quide-dé chi ní quide cuèndá-dé nàcuáa ndùu tnúhu ní xãháⁿ cuè téé ní sãngoto ñaha xii Jèsús nduu ní xiní-güedé chódínì, núu xíãⁿ ducaⁿ ní táuchúⁿ-dë ní quide cue téé-áⁿ.

17 Te ducaⁿ ní cuu chi ní quee ndáa-xi nàcuáa ní cachí ndíi Jeremiás téé ní xóo cáháⁿ tnúhu Yá Ndiöxí ndéé sanaha, te duha ní cachí ndíi:

18 Ní tecú ndàhí víhí ñáyiu ñuú Ràmá sá ndìhú iní-yu,

te ñáyiu xíndáhyú-áⁿ cúũ-yu ñaní tnáhá tã Ràquél, te ndàhyú-yu cuèndá sá ní xihí déhe-yu.

Te ñáyiu-áⁿ ñá túú ní cuínì-yu dàñá-yu sá ndìhú iní-yu cuèndá sá ní xihí déhe-yu.

Duha ní cachí ndíi Jeremiás.

19 Te sáta ní xihí té Hèrodés te ní sáháⁿ tucu espíritú xínú cuèchi núú Yá Ndiöxí núú sàní té Chèé òré ndécú-dë nàcióⁿ Ègiptú, te ní xãháⁿ-xi xii-dé:

20 —Véxi tucu-í càchí tnúhu-í xii-n sã ndácóo-n, te núhú-n ndìhi Jèsús ndìhi náná-gã ñuú cue ñaní tnáhá-n ñáyiu isràél cundecu-ndo, chi sa ní xihí cue téé cuínì cahni ñaha xii Jèsús ní cùu —cachí espíritú-áⁿ xãháⁿ-xi xii té Chèé núú sàní-dé.

21 Te té Chèé-áⁿ ní ndacóo-dé, te ní ndee-dé ndìhi Jèsús ndìhi náná-gã cuãnuhú-yu ñuú cue ñáyiu isràél ñáyiu cùu ñaní tnáhã-yu.

22 Te té Chèé ní níhí-dë tnúhu sá tã Arquèlaú ní nucúnutnì-dé núú tãtã-dë té Hèrodés distrítú Jùdeá yíndàha-dé ñáyiu. Te

ní yùhú té Chèé-án, te ñá túú ní cuìní-dé quíhíⁿ-dé cundecu-dé distritú-án. Te Yá Ndiòxí ní cáháⁿ-gá núú sàní-dé, te ní xáhaⁿ-gã xii-dé sá quíhíⁿ-dé distritú Galileá, núú xiáⁿ yàcáⁿ cuáháⁿ-yu.

²³ Te òré ní quexiò-yu distritú Galileá, te ní sáháⁿ-yu ìⁿ ñúú nání Nàzarét ní xíndecú-yu. Te ducaⁿ ñí cuu chi ní quee ndáá-xi nàcuáa ní cachí cue téé ní xóo cáháⁿ tnúhu Yá Ndiòxí ndéé sanaha sá Jèsús cuu-gá téé ñúú Nazàrét.

3

Té Juàá téé dàcuandute ñaha xii ñáyíu càháⁿ-dé tnúhu Yá Ndiòxí xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ñí cuu, te téé nàni Juàá téé dacuandute ñaha xii ñáyíu ní quexiò-dé yucu distritú Jùdeá càháⁿ-dé tnúhu Yá Ndiòxí núú ñáyíu xití yucu-án.

² Te xáhaⁿ-dè xií-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha, chi sa ní cuyatni nduu ndíhu ndaha ñàha Yá Ndiòxí xii-ndo —càhí-dé xáhaⁿ-dè xií-yu.

³ Te diu cuendá té Juàá-án ñí chídó tnùnì ndíi Chàiaá téé ní xóo cáháⁿ tnúhu Yá Ndiòxí ndéé sanaha, te duha ndùu tnúhu ní chídó tnùnì ndíi cuendá-dé:

Tècú càháⁿ níhi ìⁿ téé yìhi xití yucu, te càhí-dé:

“Chí dáñá nchàa ichi cuehé ichi duha ndècu-ndo, te tñi-ndo ichi váha,

Te ducaⁿ càda-ndo cuendá cundecu túha-ndo chi véxi Yaá ío cùnùu”, duha quesaha tée-án.

Duha ndùu tnúhu ní chídó tnùnì ndíi Chàiaá-án cuendá té Juàá.

⁴ Te té Juàá-án ñí xóo cuihnu-dé dóó idi caméyu, te ìⁿ ñí ní cuu pañú xití-dé, te ní xóo caxi-dé tíca làngóstá ndíhi ndudí ñúñú cuéchi.

⁵ Te ñáyíu ñúú Jerusàlén, ndíhi ñáyíu nchaa ñúú yíndèhu distritú Jùdeá, ndíhi ñáyíu nchaa ñúú cáá yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juàá.

⁶ Te ní ngúita-yu ní náhmá-yu nchaa cuéchi-yu núú Yá Ndiòxí. Te òré ducaⁿ ñí

náhmá-yu te ní dácuañdute ñaha té Juàá xií-yu yúte Jòrdán.

⁷ Te vai cue téé cùu fariséu ndíhi cue téé cùu saducéu cuáháⁿ-güedé núú ndécú tè Juàá cuìní-güedé dacuandute ñaha-dé xii-güedé. Te òré ní quexiò-güedé núú ndécú-dè, te ní xáhaⁿ-dè xii-güedé:

—ìNchaa nchòhó cúu-ndó dàtná ìⁿ cóo dèéⁿ chi ío cuihna iní-ndó! ¿Te nása ní cuu núu tnàhá nchòhó ndúcú-ndó nàcuáa cada-ndo càcu nihnu-ndo núú tnùndòho cahnu vihi ta cuyatni ñaha xii-ndo véxi-i?

⁸ Te chí cádá vaha vitna cundecu-ndo cuendá ducaⁿ cùnùnì sá ñí dáñá-ndó nchàa ichi cuehé ichi duha ndècu-ndo.

⁹ Te vá càhí-ndó sá ío cahnu cuu-ndo cuendá sá cúu-ndó ñàní tnàhá ndíi Abrahám. Chi cuéi ndéé yúu te ndacu Yá Ndiòxí ndada-gá ñáyíu te cuú-yu ñàní tnàhá ndíi Abrahám.

¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávídí-xi-án, chi nchaa yutnu-án tèhndé-xi te cuáñge-xi núú ñuhú càyú-xi. Te duha sàtnàhá-xi ndoho nchaa ñáyíu ñà túú quide váha-án chi nchaa ñáyíu ñà túú quide váha cùu-yu dàtná nchaa yutnu sá ñà túú càváha sávídí-xi.

¹¹ Te na càhí tnúhu ndáá-í xii-ndo sá yùhú dácuañdute-í mee-ni ñáyíu ní dáñá nchàa ichi cuehé ichi duha. Dico nchícúⁿ tucu ingá téé véxi, te tée-án taxi-dé Espiritú Yá Ndiòxí cundecu ndíhi-ndo. Te cùu-xi datná ìⁿ ñuhú, chi ndada ndoo ndada nine-xi iní-ndó. Te tée-án ío-gá cùnùu-dé dàcúxí yùhú, chi yùhú cúu-í ìⁿ téé duuⁿ duuⁿ ñà túú tàù cuita nehe ni chàu-dé dico quide-í chùu-dé.

¹² Te tée-án sa véxi túha-dé sá cádá dèⁿ ñaha-dé xii-o dàtná quide ñáyíu ndàda ndoo triú, chi ñáyíu-án sa nèhe túha-ná-yu yaxíⁿ-yu òré náñani cuendá ndada ndoo-yu. Te òré ndádá ndòó-yu triú-án te dàquee dèⁿ-yu mihi-xi, te tàxúha-yu mee-nà triú-án te sàhmí-yu mihi-xi-án. Te dàtná quide-yu mihi triú-án ducaⁿ sàtnàhá-xi cada ñaha tée-án xii nchaa ñáyíu ñà túú quide váha, chi daquihíⁿ ñàhá-dè xií-yu núú ñuhú núú càyú, te ñuhú-án ñà túú tnàhí ndàhvá —càhí-dé xáhaⁿ-dè xii-güedé.

Sàndute Jèsús

(Mr. 1:9-11; Lc. 3:21-22)

13 Te Jèsús ní quee-gá distrítú Galileá cuáháⁿ-gá yúte Jòrdán núú ndécú tẽ Juàá cuèndá dacuàndute ñaha-dé xii-gá.

14 Te òré ní quexìo Jesús núú ndécú tẽ Juàá, te ñá cuíni-dé dacuàndute ñaha-dé xii-gá ní cùu, te ní xáhaⁿ-dẽ xii-gá:

—Yúhú tàù-í sá dacuàndute ñaha-n xii-í, te ñá díú dà yúhú dacuàndute ñaha-í xii-n —càchí-dé xáhaⁿ-dẽ xii-gá.

15 Te Jèsús ní xáhaⁿ-gã xii-dé:

—Queheⁿ dañá, chi dacuítí xini ñuhu-xi ducaⁿ cada-o nacuáa cundáá-ó núú Yá Ndiõxí —càchí-gá xáhaⁿ-gã xii-dé.

Te té Juàá-áⁿ ñí sáháⁿ uuⁿ-dé tnúhu ní xáhaⁿ Jèsús xii-dé.

16 Te ní dacuàndute-dé Jèsús. Te òré ní nene-gá xití ndute te ní xiní-gá nchí andi, te ní quee Espíritú Yá Ndiõxí véxi cuuⁿ-xi ngúndecu ndíhi ñaha-xi xii-gá, te dàtná cáá ñí lómá cáá Espíritú-áⁿ véxi cuuⁿ-xi.

17 Te òré-áⁿ ñí tecú ní cáháⁿ Yá Ndiõxí ndéé andi, te xáhaⁿ-gã xii Jèsús:

—Yòhó cúu-n Dẽhe-í tée ío cùu iní-í te ío cùdí iní ñáhà-í xii-n —càchí-gá xáhaⁿ-gã xii Jèsús.

4

Sácuíhná quidé yíca-xi cada Jesús sá ñà túú tãù-gá cada-gá ní cùu

(Mr. 1:12-13; Lc. 4:1-13)

1 Te Espíritú Yá Ndiõxí ndécá-xí Jèsús cuáháⁿ ñí xití yucu cuèndá yàcáⁿ cundecu tnaa-gá, te yàcáⁿ quexìo sácuíhná coto ndéé ñáhá-xí xii-gá te núu ndisa sá vã cádá-gã ñí sá ñà túú tàù-gá cada-gá.

2 Te Jèsús ñá ní xèxi-gá údico nduu údico niú, te ducaⁿ te dàtnùní ní xícáⁿ iní-gá caxi-gá.

3 Te sátá dúcáⁿ te ní quexìo sácuíhná quidé yíca-xi cada Jesús ñí sá ñà túú tàù-gá cada-gá, te xáhaⁿ-xi xii-gá:

—Te núu ndisa sá cúu-n Dẽhe Yá Ndiõxí te cúñaha xii yúu-a na ndùu-xi paá —càchí-xi xáhaⁿ-xi xii-gá.

4 Te Jèsús ní xáhaⁿ-gã xii-xi:

—Núú tütú Yá Ndiõxí càchí-xi: “Ñá díú mèe-ni paá candeca-xi iní ñáyíu ñuyíú, chi tnàhá nchaa tnúhu càháⁿ Yá Ndiõxí candeca-xi iní-yu”, duha càchí-xi núú tütú-gá —càchí-gá xáhaⁿ-gã xii-xi.

5 Te dàtnùní sácuíhná-ãⁿ ndécá ñàha-xi xii-gá cuáháⁿ ñuú Jerusalén, te yàcáⁿ ní xáhaⁿ-xi xii-gá cuásaá-gá díquí véñúhu càhnu sá ío cùnuu núú ñáyíu isràél,

6 te dàtnùní ní xáhaⁿ tucu-xi xii-gá:

—Te núu ndisa cùu-ñ Dẽhe Yá Ndiõxí te cuandèe ndava núú ñúhú cuèndá quee ndáá-xi nàcuáa càháⁿ-xi núú tütú-gá núú càchí-xi: “Yá Ndiõxí tendaha-gã cue espíritú xínú cuèchi núú-gã quixi-xi cuèndá coto ñaha-xi xii-n, te núú ndáhá-xí càundodo-n cuèndá sá vã dánicuèhé yúú sáháⁿ”, duha càchí-xi núú tütú-gá —càchí sácuíhná-ãⁿ xáhaⁿ-xi xii Jesús.

7 Te Jèsús ní xáhaⁿ-gã xii-xi:

—Te càchí tucu-xi núú tütú Yá Ndiõxí: “Vã cání iní-n còto ndéé-n Dütú Ndiõxí Yá cúú Ndiõxí-n cuèndá-ni sá cuíni-n sá dácacu nihnu ñaha-gã xii-n ñí sá sání iní-n càda-n”, duha càchí-xi núú tütú-gá —càchí-gá xáhaⁿ-gã xii-xi.

8 Te sácuíhná ndécá tucu-xi Jesús cuáháⁿ ñí núú tìndúú dùcúⁿ, te uuⁿni ní dánèhé núú ñáhá-xí xii-gá nchaa tühú nacióⁿ cáá ñùyíú, ndíhi nchaa sá vãha ío ñí ñí nacióⁿ-áⁿ.

9 Te ní xáhaⁿ-xi xii-gá:

—Te núu yòhó ngüíñí xití-n núu-í chiñuhu ñaha-n xii-í ñá, te taxi cuèndá-í nchaa sá ñí dánèhé ñáhà-í-a cuu cuèndá-n —càchí-xi xáhaⁿ-xi xii-gá.

10 Te Jèsús ní xáhaⁿ-gã xii-xi:

—Xocuíñí yòhó sácuíhná núú ndécú-í-a, chi vá cúú càda-í nàcuáa càchí-n, chi núú tütú Yá Ndiõxí càchí-xi: “Chiñuhu-ndo Dütú Ndiõxí Yá cúú Ndiõxí-ndó, te ñíu-ni-gá cada-ndo nchaa nacuáa càháⁿ-gã”, duha càchí-xi núú tütú-gá —càchí-gá xáhaⁿ-gã xii-xi.

11 Te dàtnùní sácuíhná ñí dáñá-xí Jèsús ní xica-xi cuáháⁿ-xi. Te sátá dúcáⁿ te ní quexìo cue espíritú xínú cuèchi núú Yá Ndiõxí ní xinu cuechi-xi núú Jèsús.

Distrítú Galileá ní chisaha Jèsús chiùⁿ ní tãhú Tãtã-gã Dütú Ndiõxí cada-gá

(Mr. 1:14-15; Lc. 4:14-15)

12 Te òré ní níhí Jèsús tnúhu sá ñí ngava té Juàá tée dacuandute ñaha xii ñáyíu vecaá, te ní xica-gá cuáháⁿ-gã distrítú Galileá.

13 Te ní ñà túú ní xíndecu-gá ñuú Nazàrét, chi ní yáha-gá cuáháⁿ-gã ndéé ñuú

Capèrnaúm yàcáⁿ ní xíndecu-gá, te ñuú-áⁿ cáá yàtni yuhu lagúná, te yatni xiáⁿ cáá ñuhu nani Zabulón, ndihi ñuhu nani Neftalí.

14 Te ducaⁿ ní cuu chi ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yá Ndiöxí ndéé sanaha núú tütú-gá núú cächí-xi:

15 Ñuhu nani Zabulón, ndihi ñuhu nani Neftalí, ñuhu-áⁿ yíndèhu-xi distritú Galileá,

te xiáⁿ xíndecu cue ñáiyu ñá túú cùu ñáiyu isràél,

te càa-xi yatni yuhu lagúná te ndàa ìngá xio yúte Jòrdán cúú-xí.

16 Te cue ñáiyu-áⁿ ndécü-yu ñⁿ núú néé chi ndécü-yu ichi cuèhé ichi duha, te sáá nduu te cada iní-ndó sã ñáiyu-áⁿ queé-yu núú dìtó chi vá cùndècu-gá-yu ichi cuèhé ichi duha.

Te ñu-ñi ñáiyu-áⁿ cúú-yu ñáiyu ta xíta ni-hnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tnùní ndíi núú tütú-gá.

17 Te dàvá-áⁿ ñí ngúíta Jèsús ní dánèhé-gá ñáiyu, te ní xáhaⁿ-gã xií-yu:

—Chí dándixi túu iní sá ñà túú quide váha-ndo ndècu-ndo te dañá-ndo ncháa ichi cuèhé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo —cächí-gá xãhaⁿ-gã xií-yu.

Jèsús càháⁿ-gá cúmí tnàhá cue téé tnè chácá

(Mr. 1:16-20; Lc. 5:1-11)

18 Te Jèsús ñúhú-gã ichi cuáháⁿ-gá tá yãha-gá yuhu lagúná Galileá, te ní xiní-gá úú tnàhá cue téé xídáquëe-güedé ñunu-güedé xití ndute tnè-güedé chácá, chi quiti tnàhí-áⁿ cúú chiúⁿ-güedé tní-güedé-dí. Te ñⁿ-dé nání-dě Xímú, àdi Pelú chi úú diù-dé, te ñaní-dé cúú ìngá téé ndihi-dé te téé-áⁿ nání-dě Ndríxí.

19 Te Jèsús ní xáhaⁿ-gã xii-güedé:

—Chí dáñá chiúⁿ quide-ndo-áⁿ te quixi-ndo chitnahá ñáhá-ndó xii-í, te taxi-í ìngá núú chiúⁿ cada-ndo chi quíhíⁿ-ndó dàcaháⁿ-ndó ñáiyu cuendá tuha ñáhá-yu xii-í —cächí-gá xãhaⁿ-gã xii-güedé.

20 Te òré-ni-áⁿ ñí dáñá cuè téé-áⁿ ñunu-güedé, te ní tuha-güedé Jèsús.

21 Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnàhá cue téé tnè chácá. Te ñⁿ téé-áⁿ nání-dě Jàcobó, te ñaní-dé cúú ìngá téé ndihi-dé te téé-áⁿ nání-dě Juáá, te ndi ndúú-güedé cúú-güedé déhe té Zebèdeú. Te xíxínucóo-güedé ndihi tãtã-güedé xití bàrcú xínatícu-güedé ñunu-güedé, te Jèsús ní cana ñaha-gã xii-güedé.

22 Te òré-ni-áⁿ ñí dándöo-güedé bàrcú-güedé, ndihi tãtã-güedé, te ní tuha ñaha-güedé xii-gá.

Jèsús dánèhé-gá cuèhé víhí ñáiyu

(Lc. 6:17-19)

23 Te Jèsús tá xica ndodo-gá nihíi distritú Galileá cuáháⁿ tá dánèhé-gá ñáiyu tnúhu váha tnúhu sá sánú ichi ñaha xií-yu nàcuáa ndíhu ndaha ñaha Yá Ndiöxí xií-yu. Te ndi tnàhá ñⁿ ñⁿ ñuú sáa-gá te ducaⁿ cuãnguihu-gá xití veñúhu dánèhé-gá ñáiyu tnúhu-áⁿ. Te ndi dííⁿ ndi dííⁿ núú cuèhé tnàhá ñⁿ ñⁿ ñáiyu dico nchaa-ní-yu ta quide tátna-gá cuáháⁿ.

24 Te ndéé nchaa ñáiyu yíndèhu distritú Siríá ní nihí-yu tnúhu nchaa nàcuáa quide Jesús. Te ní queé-yu ñuú-yu te ndécá-yu nchaa ñáiyu tnàhá ndi dííⁿ núú cuèhé cuáháⁿ núú ndécú Jèsús. Te cuèi ñáiyu xiyíhí, ndihi ñáiyu ñá túú-gã càndá nihnu, ndihi ñáiyu yíhí ñaha espíritú cùndíhi yucu ñávãha ndécá-yu cuáháⁿ núú-gã, te ncháa-yu ní quide tátna ñaha-gã xií-yu.

25 Te ío vãi ñáiyu ní chinchícúⁿ ñáhá xii Jesús, chi ní chinchícúⁿ ñáhá ñáiyu distritú Galileá, ndihi ñáiyu nchaa ñuú xíndáa Dècápolis, ndihi ñáiyu ñuú Jerusalén, ndihi cue ñáiyu nchaa ñuú yíndèhu distritú Jùdeá, ndihi ñáiyu xíndecu yatni yúte Jòrdán ndàa xio quene nchícanhii.

5

Jèsús núcöo-gá ñⁿ núú tìndúú dánèhé-gá ñáiyu

1 Te sátá ñí xiní Jèsús sá cuèhé víhí ñáiyu nchícúⁿ ñáhá xii-gá, te ní xica-gá cuásaá-gá ñⁿ núú tìndúú te xiáⁿ ñí ngóo-gá, te cue téé xica cuu ndihi-gá ní nadúcúⁿ ndéé ñáhá-güedé xii-gá.

2 Te ní ngüíta-gá dánèhé ñáhá-gă xii-güedé ndihi cue ñáyiu-án, te xáhaⁿ-gă:

*Cuendá ñáyiu ío váha táhú-xi
(Lc. 6:20-23)*

3 –Váha táhú nchaa ñáyiu cùtnuní iní-xi sá ïo-gá cúmăñi-yu cudíu-yu núú Yă Ndiöxí, chi ñáyiu-án nduu táhú-yu ndíhu ndaha ñàha-gá xii-yu.

4 Váha táhú nchaa ñáyiu ndàhyú sá ndíhú iní-yu, chi Yá Ndiöxí cuañaha-gă tnúhu ndee iní cundecu ndihí-yu.

5 Váha táhú nchaa ñáyiu ndàhú iní-xi, chi ñáyiu-án nduu táhú-yu cundecú-yu ñⁿ xichi núú cuañaha Yă Ndiöxí xii-yu.

6 Váha táhú nchaa ñáyiu ío cuní cada nchaa năcuáa cáhán Yă Ndiöxí, chi ñáyiu-án ïo nduu vétú iní-yu.

7 Váha táhú nchaa ñáyiu cùndahú iní tnàha ñáyiu-xi, chi ñáyiu-án ñⁿ ducaⁿ càda ñaha Yá Ndiöxí xii-yu cundahú iní ñáhá-gă.

8 Váha táhú nchaa ñáyiu ní nduu ndoo ní nduu nine iní-xi, chi cue ñáyiu-án nduu táhú-yu cundecú-yu ndihi Yá Ndiöxí.

9 Váha táhú nchaa ñáyiu cáhán dóho tnàha ñáyiu-xi năcuáa cundecu ndihi váha tnàhá-yu, chi cùtnuní sá ñáyiu-án cuú-yu déhe Yá Ndiöxí.

10 Váha táhú nchaa ñáyiu ío ndòho ndecu ñuyíú-a sá cuendá sá quidě-yu năcuáa cáhán Yă Ndiöxí, chi ñáyiu-án nduu táhú-yu ndíhu ndaha ñàha-gá xii-yu.

11 Te cùu-ndo ñáyiu ío váha táhú-xi te núu na cūcuèhé ñáhá ñáyiu, àdi cada úhú ñáhă-yu xii-ndo, àdi dăcaa díquí ñáhă-yu nándi cuéchi neñúú xii-ndo sá cuendá-í.

12 Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi ío váha cāa sá ndécú àndiu nduu táhú-ndó cùndecu ndihi-ndo nduu na saá-ndó yàcán cundecu-ndo, chi ñⁿ ducaⁿ ní xóo cada ñaha cuè ñaní tnáhă-yu xii cue téé ní xóo cáhán tnúhu Yá Ndiöxí ní xíndecu ndéé sanaha.

*Cuendá ñíí ndihi cuendá ñuhú
(Mr. 9:50; Lc. 14:34-35)*

13 Te nchòhó cada iní-ndó sá cúu-ndó dàtná ñíí cuendá ñuyíú-a. Te ñíí chi nándíhi-xi dico núu na ndùu víxiⁿ-xi, te ñá

túu-gă nándíhi-xi chi dăngoyo-ná-ó, te yăha ñáyiu xënihnú-yu. Te ducaⁿ sätnahá-xi cùu nchohó chi cùu-ndo datná ñíí văha te núu na càda váha-ndo, te núu vá cādá váha-ndo te quee tíhú-ndó.

14 Te nchòhó cada iní-ndó sá cúu-ndó dàtná ñⁿ sá dáyèhé ndécú ñùyíú-a, chi sànu ichi-ndo ñáyiu ichi váha. Te nchòhó xini-ndó sá ñⁿ ñⁿ cáá ñⁿ núú tìndúú te vá cúu cāchí-ó sá nguivăha-xi.

15 Te ñá túú xini-ó ñⁿ ñáyiu teñuhú-yu ñⁿ lìntérná te chiváha-yu xití ñⁿ cājá, chi tàxi ndecú-yu núú ñⁿ cuendá cutnùní núú nchàa ñáyiu ndècu vehe.

16 Te ducaⁿ càda nchohó cada váha-ndo dàtná quidé ñⁿ ñⁿ hú dayèhe-xi núú ñáyiu, te ducaⁿ quini ñáyiu năcuáa quide-ndo ndecu-ndo, te tnàhá-yu cachí-yu sá ïo cāhnu cuú Dútú Ndiöxí Yá cúú Tătá-ndó ndècu àndiu chi quini-yu sá quidé váha-ndo ndècu-ndo.

Cuendá tnúhu ní chídó tnùní ndíi Moisés

17 Te vá cání iní-ndó sá yǔhú véxi-í xocàni-í tnúhu ní chídó tnùní ndíi Moisés, te ní vă cání iní-ndó sá vëxi-í xocàni-í tnúhu ní chídó tnùní cue téé ní xóo cáhán tnúhu Yá Ndiöxí ndéé sanaha, chi yúhú véxi-í sá càdà-í năcuáa cáhán nchaa tnúhu-án.

18 Te na cāchí tnúhu ndáá-í xii-ndo sá tnúhu ní chídó tnùní ndíi Moisés ío ndáá cáhán-xi, chi dacuití cùu nchaa năcuáa cáhán-xi. Te yáchí-gá naa àndiu ndihi ñuyíú dācúxí sá quēe cāva ñⁿ tnúhu-án.

19 Núu xíáⁿ nchaa ñáyiu na cāchí sá dāvá tnúhu ní chídó tnùní ndíi Moisés ñá túú xini ñⁿ hu-xi chi ñá túú cūnuu-xi, te ñáyiu-án ñⁿ ducaⁿ dānehé-yu nchaa dāva-gá tnàha ñáyíu-yu, te sá dúcán quidé-yu te vá cúnūu víhí-yu núú ndécú Yă Ndiöxí táxí tnùní-gá, chi cuú-yu dàtná ñⁿ ñáyiu nchícúⁿ cuí-nă. Dico nchaa ñáyiu nchícúⁿ nihnu quide nchaa năcuáa cáhán nchaa tnúhu-án, te ñⁿ ducaⁿ dānehé-yu nchaa dāva-gá tnàha ñáyíu-yu, te ñáyiu-án ïo cunúu-yu núú ndécú Yă Ndiöxí táxí tnùní-gá.

20 Te na cāchí tnúhu-í xii-ndo sá ïo xini ñⁿ hu-xi cada-ndo nchaa năcuáa cáhán Yă Ndiöxí, te vá cādá-ndó dàtná xiquide cue téé dānehé ñáhá xii ñáyiu nchaa tnúhu ní chídó tnùní ndíi Moisés, ndihi dàtná xiquide cue téé cùu fariséu, chi núu na càda-ndo datná

xĩquide cue tée-áⁿ ñá, te vá ndúú tǎhú-ndó ndĩhu ndaha ñaha Yá Ndiõxí xii-ndo.

Jèsús càháⁿ-gá cuèndá ñáyiú cùdééⁿ
(Lc. 12:57-59)

21 "Te nchòhó sa xìní-ndó sǎ ncháá ñáyiú ní cuu ñaní tnáhá-ndó ñí xĩndecu ndéé sanaha ñí ñihĩ-yu tnúhu sá vǎ cúú càhní-yu tnàha ñáyiú-yu, chi núu ducaⁿ na càdá-yu te nacháhu-yu cuéchi-yu.

22 Dico vitna na càchí tnúhu-í xii-ndo sǎ nũu ndédani càa-ndo na cudééⁿ-ndó nũú tnàha ñáyiú-ndo, te nacháhu-ndo sǎ dúcáⁿ quide-ndo, àdi núu na cǔcuèhé-ndó-yu te núú chítú nũú tàcá cundáá cuéchi-ndo te núu ducaⁿ na càda-ndo, àdi núu nà cúu-ndo tnàha ñáyiú-ndo ìⁿ tnúhu vée v̄ihí, te cu-cuéchi v̄ihí xii-ndo chi quĩhĩⁿ-ndó nũú ùhú núú ndàhú.

23 "Te xǎⁿ nũu nchòhó òré ndécú ndĩhi-ndo ìⁿ sá cuìní-ndó cuǎha-ndo Yá Ndiõxí nduu tǎhú-gǎ, te òré cuáháⁿ-ndó cuǎñaha-ndo xii-gǎ, te òré ní quexiò-ndo núú dúcáⁿ cuǎñaha-ndo xii-gǎ sá ndúú tǎhú-gǎ, te ní ndacu iní-ndó sǎ ndécú ñáyiú ñá túú cùu váha iní ñáhá xii-ndo cuèndá ìⁿ sá ñí cumání nũú tnáhá-ndó.

24 Te dándóo-ndo sǎ dúcáⁿ nèhe-ndo cuáháⁿ nduu tǎhú Yá Ndiõxí, te díhna-gǎ quĩhĩⁿ-ndó nàcaháⁿ cáhnú iní tnáhá-ndó ndĩhi ñáyiú ñá túú cùu váha iní ñáhá xii-ndo-áⁿ, te dàtnùní ducaⁿ te quĩhĩⁿ-ndó cuǎha-ndo Yá Ndiõxí sá ndúú tǎhú-gǎ.

25 "Te núu ió ìⁿ-ndo ñí sáháⁿ ñáyiú núú tée cùchiuⁿ ní sacáⁿ cuéchi-yu cuèndá-ndó cuèndá ìⁿ sá ñí quide-ndo, te òré ní naníhí tnáhá-ndó ndĩhĩ-yu cuáháⁿ-ndó nũú tée cùchiuⁿ-áⁿ, te nacáháⁿ cáhnú iní tnáhá-ndó ndĩhĩ-yu cuèndá sá vǎ cuǎha cuèndá ñáhá-gǎ-yu xii-ndo nũú tée cùchiuⁿ, chi núu ducaⁿ na càdá-yu te tée cùchiuⁿ-áⁿ cuǎha cuèndá ñáhá-dě xii-ndo nũú cuè tée cùu poleciá, te cue tée-áⁿ chihi ñaha-güedé vecaá xii-ndo.

26 Te na càchí tnúhu ndáá-í xii-ndo sǎ vǎ cǎcu-ndo te núu na ngáva-ndo vecaá ndéé nacháhu-ndo nchàa sá tàú-ndó.

Cuèndá cue ñáyiú ñá túú quide váha

27 "Te nchòhó sa xìní-ndó nàcuáa ndùu tnúhu ní càháⁿ cue tée ní xĩndecu ndéé sanaha, te duha ní cachí-güedé: "Nchaa cue tée vá cúú càháⁿ ndihĩ-güedé ñadihĩ te núu

ñá díú ñadihĩ-güedé cúu-yu, te ñu-ni ducaⁿ tucu nchaa cue ñáyiú ñadihĩ vá cúú càháⁿ ndihĩ-yu tée te núu ñá díú yĩ-yu cùu-güedé", duha ní cachi-güedé.

28 Dico yúhú càchí tnúhu-í xii-ndo sǎ nděda-ni càa cue tée na cùndehe ìⁿ ñadihĩ te núu na càni iní-güedé cundecu díí iní-güedé ndihĩ-yu te cada iní-ndó sǎ dàtná sá sà ní càháⁿ ndihĩ ñaha-güedé xii-yu sá dúcáⁿ ñí sani iní-güedé.

29 "Te núu ìⁿ xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gǎ sá ná cuíta te ñá díú ñihĩ ní ndúú yiqui cuñú-ndó quĩhĩⁿ-xi núú ùhú núú ndàhú.

30 Te núu ìⁿ xio ndaha-ndo quide-xi quide-ndo nándi sá cuèhé sá dúhá te quehndé-ndó, chi váha-gǎ sá ná cuíta ìⁿ xio ndaha-ndo te ñá díú sǎ ñihĩ ní ndúú yiqui cuñú-ndó quĩhĩⁿ-xi núú ùhú núú ndàhú.

Jèsús càháⁿ-gá cuèndá cue ñáyiú dàña tnaha

(Mt. 19:9; Mr. 10:11-12; Lc. 16:18)

31 "Te nchòhó sa naha tucu-ndo nacuáa ní càháⁿ tucu cue tée ní xĩndecu ndéé sanaha, te duha ní cachí-güedé: "Te núu ìⁿ tée na dàña tnaha-dé ndihĩ ñadihĩ-dé, te xini ñuhu-xi cadúha-dé ìⁿ tutú cuǎñaha-dé núú càháⁿ-xi sá ñí dáña ñaha-dé", duha ní cachí-güedé.

32 Dico yúhú càchí tnúhu-í xii-ndo sǎ cúú dàña ìⁿ tée ñadihĩ-dé, te núu cùtnuní ndáá iní-dé sá càháⁿ ndihĩ-aⁿ ìngá tée. Dico núu ñá túú dùcaⁿ quide-aⁿ te ñá túú ndùu váha-xi dàña ñaha-dé. Te núu ñá túú dùcaⁿ quide ñadihĩ-dé, te cada iní-ó sǎ méé-dě ní sanu ichi ñaha-dě xii-aⁿ càháⁿ ndihĩ-aⁿ ìngá tée te núu na dàña ñaha-dé. Te tée na nàqueheⁿ ñaha xii ñaha ní dáña ñaha yĩ-xi-áⁿ, te ñu-ni ñá túú ní quide váha-dé sá dúcáⁿ ñí naqueheⁿ-dé ñaha-áⁿ.

Ñáyiú càcunehe ñaha xii Yá Ndiõxí cuèndá cutnùní iní tnàha ñáyiú-yu sá ndàá cadá-yu ìⁿ sá sání iní-yu cadá-yu

33 "Te sa naha tucu-ndo nacuáa ní càháⁿ tucu cue tée ní xĩndecu ndéé sanaha, chi cue tée-áⁿ ñí cachí-güedé: "Te núu càcunehe-ndo Yá Ndiõxí núú tnàha ñáyiú-ndo nàcuáa cutnùní iní-yu sá ndàá cada-ndo ìⁿ sá sání

iní-ndó càda-ndo, te cada-ndo”, duha ní cáháⁿ dóho tnàha-güedé.

³⁴ Dico yúhú càchí tnúhu-í xii-ndo sã ñà túú nã cacunehe-ndo sã ndáa cada-ndo ñⁿ sá sání iní-ndó càda-ndo. Te ni vã cácü nèhe-ndo andiu chi yacáⁿ cúu-xí núú núcõo Yá Ndiõxí táxí tnùní-gá.

³⁵ Te ni vã cácü nèhe-ndo ñuyú-a, chi tnàhá ñuyú-a ndècu-gá, te ni vã cácü nèhe-ndo ñuú Jerusàlén chi ñuú-áⁿ cúu cuendá-gá, te ñuú-gá cúu-gã Yaá ío cùnuu.

³⁶ Te ni vã cácü nèhe-ndo díquí-ndó chi nàha-ndo sá nì ñⁿ idi díquí-ndó ñã ndácú-ndó ndàda cuixíⁿ-ndó àdi ndada tnuu-ndo.

³⁷ Te váha-gá sá núu ñⁿ sá sání iní-ndó càda-ndo, te cachí-ni-ndo: “Cuu cada-ndí, àdi vá cúu càda-ndí”, cachí-ni-ndo. Chi nchaa dava-gá sá chídó-ndó cáháⁿ-ndó òré ducaⁿ sàni iní-ndó càda-ndo ñⁿ sá cádá-ndó cúu-xi sá dácàhu iní ñáhá yùcu ñávàha.

Cuendá ñáyiu nàchinaa sá quidé ñàha tnaha ñáyiu-xi

(Lc. 6:29-30)

³⁸ Te sa nàha tucu-ndo nacuaá ní cáháⁿ tucu cue téé ní xíndecu ndéé sanaha, chi cue téé-áⁿ ñí cachí-güedé: “Ñáyiu na càda ñaha tnaha ñáyiu-xi ñⁿ sá ñà túú váha, te nanchòcáva-yu nachinaá-yu sá ñí quide ñaha tnàha ñáyiu-yu”, duha ní cachí-güedé.

³⁹ Dico yúhú càchí tnúhu-í xii-ndo sã ñà túú nã cada-ndo nchaa cue ñáyiu cuihna iní-xi te núu quide ñahá-yu ñⁿ sá ñà túú váha xii-ndo. Te núu ní canihá-yu ñⁿ xito te cuini tucú-yu canihá-yu ñngá xito te dañà-ndo na canihá-yu.

⁴⁰ Àdi ní sacáⁿ cuéchi-yu núu cue téé cùchiuⁿ cuendá-ndó, te cuini-yu quendeé-yu dúhnú-ndó te dañà-ndo na canehé-yu quíhíⁿ, te tnàhá-ni dóó ndíxí ndòdo-ndo dañà-ndo na canehé-yu quíhíⁿ.

⁴¹ Te núu quide yicá-yu caca-ndo dàtná úú kílometrú cuido-ndo ndàchiúⁿ-yu ña, te chido-ndo úú-gá tucu kílometrú cuido-ndo ndàchiúⁿ-yu.

⁴² Te núu ío ñⁿ sá xicáⁿ-yu núu-ndó te cuáñaha-ndo, àdi ío ñⁿ sá sánúu-yu núu-ndó te cuáñaha nùu-ndo.

Cuu iní-ó nchaa ñáyiu cùu úhú iní ñáhá xii-o

(Lc. 6:27-28, 32-36)

⁴³ Te sa nàha tucu-ndo nacuaá ní cachí tucu cue téé ní xíndecu ndéé sanaha, chi cue téé-áⁿ ñí cachí-güedé: “Cuu iní-ndó cue ñáyiu ndècu ndihí váha-ndo, te cuu úhú iní-ndó cue ñáyiu cùu úhú iní ñáhá xii-ndo”, duha ní cachí-güedé.

⁴⁴ Dico yúhú càchí tnúhu-í xii-ndo sã cúu iní-ndó cue ñáyiu cùu úhú iní ñáhá xii-ndo, te cáháⁿ váha-ndo cuendá cue ñáyiu cáháⁿ úhú ñáhá xii-ndo, te cada-ndo sã váha sá cúu-xí cue ñáyiu cùu úhú iní ñáhá xii-ndo, te cáháⁿ ndihí-ndo Yá Ndiõxí cuendá cue ñáyiu xícuèhé ñáhá xii-ndo, ndihí cuendá cue ñáyiu quide úhú ñáhá xii-ndo.

⁴⁵ Te núu na càda-ndo nchaa nacuaá cáháⁿ-í-a, te ducaⁿ te cutnùní sá cúu-ndó dèhe Tátá-ndó Dütú Ndiõxí Yaá ndécú àndiu. Te ñuú-gá cúu-gã Yaá quidé quène nchíanchii, te ñuú-ni-gá cúu-gã Yaá dácùuⁿ dáu ñuyú-a, te ducaⁿ quide-gá cuendá cuu-xi sá váha sá cúu-xí cue ñáyiu quide váha, ndihí sá cúu-xí cue ñáyiu ñá túú quide váha.

⁴⁶ Te núu nchòhó ná cúu iní-ndó mèe-ni ñáyiu na cùu iní ñáhá xii-ndo, te vá càchí-ndó sã Yá Ndiõxí taxi-gá sá ndúú tãhú-ndó sã dúcáⁿ quide-ndo, chi cuèi cue téé cuihna iní-xi quide cobrá ñáhá xii cue ñáyiu cuendá impuèstú ducaⁿ xíquide-güedé.

⁴⁷ Te núu mee-ni ñáyiu ndècu ndihí váha-ndo ío váha cáháⁿ ndihí-ndõ-yu, te vá càchí-ndó sã ío váha quide-ndo sá dúcáⁿ quide-ndo, chi cuèi ndéé nchaa ñáyiu ñá túú xini dana cuendá Yá Ndiõxí ducaⁿ xíquide-yu.

⁴⁸ Te duha ndùu tnúhu cáháⁿ-í cuendá sá nchòhó cada ndáa-ndó cùndecu-ndo datná quidé ndáa méé Tátá-ndó Dütú Ndiõxí Yaá ndécú àndiu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiu.

6

Jèsús dánèhé-gá ñáyiu nàcuáa cada-yu sá váha

¹ Te Jèsús ndécú-ni-gã dánèhé-gá cue téé xica cuu ndihí-gá ndihí nchaa ñáyiu, te xãháⁿ-gã:

—Te òré quidé-ndó sǎ vǎha te vá cádá-ndó nǔú ñáyiú cuendá-ni sá cuíní-ndó cǎháⁿ váha-yu cuendá-ndó, chi núu núú ñáyiú ducaⁿ na càda-ndo te Dútú Ndiòxí Yáá cúú Tǎtá-ndó vǎ táxí-gǎ sá ndúú tǎhú-ndó.

² Te xǎⁿ nǔú nchòhó òré chǐndèe-ndo ñáyiú ndàhú, te vá cǔñaha-ndo xii cue ñáyiú sá chǐndèe-ndo cue ñáyiú ndàhú-áⁿ dàtná xǐquide cue ñáyiú dǎndahú méé-xí sǎ quidé ndǎá te ñá ndǎá sá quidé ndǎá-yu, chi ñáyiú-áⁿ ducaⁿ xǐquidé-yu òré sǎháⁿ-yu veñúhu, chi dàtecú tnúhu-yu nchaa ñáyiú òré ducaⁿ chindeé-yu ñáyiú ndàhú. Te ðiu-ni ducaⁿ quidé-yu xǎháⁿ-yu xii cue ñáyiú sá chǐndèe-yu cue ñáyiú ndàhú-áⁿ nchaa núú xícá cùú-yu, te ducaⁿ xǐquidé-yu cuendá cuíní-yu cǎháⁿ váha ñáyiú cuendá-yu. Te yúhú na càchí tnúhu ndǎá-í xii-ndo sǎ ñà túú nǎ nduu tǎhú ñáyiú-áⁿ nǔú Yǎ Ndiòxí sá dúcáⁿ quidé-yu chi mee-ni nǔú tñaha ñáyiú-yu cùdúú-yu.

³ Te nchòhó òré chǐndèe-ndo ñáyiú ndàhú, te cuéi ñáyiú ío-gǎ váha ndècu ndihi-ndo dico vá cǔñaha-ndo sǎ dúcáⁿ chindee-ndo cue ñáyiú ndàhú-áⁿ, te ni cuè dava-gǎ ñáyiú vá cǔñaha-ndo.

⁴ Chi váha-gǎ sá ìní méé-ní-ndó ná cùhuⁿ sá dúcáⁿ chindee-ndo cue ñáyiú ndàhú-áⁿ. Te núu ducaⁿ na càda-ndo ña, te Dútú Ndiòxí Yáá cúú Tǎtá-ndó tàxi-gǎ sá ndúú tǎhú-ndó chi ðiu-ni mee-gǎ ndéhé-gǎ nàcuáa quide-ndo ndecu-ndo.

*Jèsús dánèhé-gǎ ñáyiú nàcuáa cǎháⁿ ndihi-yu Yá Ndiòxí
(Lc. 11:2-4)*

⁵ Te nchòhó òré cǎháⁿ ndihi-ndo Yǎ Ndiòxí, te vá cádá-ndó dàtná xǐquide cue ñáyiú dǎndahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-áⁿ tñahá ìní-yu cunutnǐ-yu cǎháⁿ ndihi-yu Yá Ndiòxí òré yǐhǐ-yu veñúhu. Te ðiu-ni ducaⁿ xǐquidé-yu nchaa núú xícá cùú-yu, te ducaⁿ quidé-yu cuendá sá cuíní-yu quíní ñáyiú nàcuáa xǐquidé-yu. Te na càchí tnúhu ndǎá-í xii-ndo sǎ ñà túú nǎ nduu tǎhú ñáyiú-áⁿ nǔú Yǎ Ndiòxí sá dúcáⁿ quidé-yu chi mee-ni nǔú tñaha ñáyiú-yu cùdúú-yu.

⁶ Te nchòhó òré cuíní-ndó cǎháⁿ ndihi-ndo Yǎ Ndiòxí, te ndǐhu ndedí nihnu-ndo xǐtí vehe-ndo, chi ðiu-gǎ

cúú Tǎtá-ndó te ndècu ndihi ñaha-gǎ xii-ndo, te ðiu-ni mee-gǎ ndéhé ñaha-gǎ xii-ndo nàcuáa quide-ndo, te núu ducaⁿ na càda-ndo te taxi-gǎ sá ndúú tǎhú-ndó.

⁷ Te òré cǎháⁿ ndihi-ndo Yǎ Ndiòxí te vá sǔúní cuendá-ni dacáa-ndó tñúhu cǎháⁿ ndihi-ndo-gǎ dàtná xǐquide cue ñáyiú ñá túú xíní tnúhu-gǎ, chi ñáyiú-áⁿ sání ìní-yu sá tédòho ñaha vǐhi-gǎ Yǎ Ndiòxí xii-yu sá dúcáⁿ sǔúní dàcaá-yu tnúhu cǎháⁿ ndihi ñahá-yu xii-gǎ dico ñahá.

⁸ Dico nchòhó, vá cádá-ndó dàtná xǐquide cue ñáyiú-áⁿ, chi mee Tǎtá-ndó Dútú Ndiòxí sa ñaha-gǎ ná cúú nchaa sá xíní ñúhu-ndo cuéi òré vátá càcáⁿ-gǎ-ndó nǔú-gǎ.

⁹ Te duha cǎháⁿ-ndó òré cǎháⁿ ndihi-ndo Yǎ Ndiòxí:

Yòhó Tǎtá-ndǐ Dútú Ndiòxí Yáá ndécú àndiu,

nchaa ñáyiú na cǎháⁿ-yu sá cúú-n Yáá ío yǐñúhu.

¹⁰ Te xícáⁿ tǎhú-ndǐ núú-n sǎ ná sàà nduu ndǐhu ndàhá-n-yu.

Te cada-n dàtná càchí ìní-n ñùyíú-a dàtná quidé-n àndiu.

¹¹ Te xícáⁿ tǎhú-ndǐ núú-n sǎ táxí-n sǎ cóhó-ndǐ sá cǎxí-ndǐ ìⁿ nduu ìⁿ nduu.

¹² Te cada cǎhnu ìní-n nchaa yícá cuèchi-ndǐ, chi tñahá nchúhú quidé cǎhnu ìní-ndǐ nchaa sá quidé ñaha tñaha ñáyiú-ndǐ.

¹³ Te vá dáñá-n dàcǎháⁿ ñahá yùcu ñávǎha xii-ndǐ cada-ndǐ sá ñà túú vǎha, chi coto ñaha-n xii-ndǐ cuendá sá vǎ dúcáⁿ càda ñaha-xí.

Te ðiu-n cùu-n Yáá ío cùnuu nchaa nduu nchaa quíú, te ío cǎhnu cuu-n, te ðiu-ni-n quǐndaha ñaha-n xii-ndǐ ni caa ni quíhǐⁿ. Te ducaⁿ na cùnduu.

Duha dǎnehé ñahá-í xii-ndo cǎháⁿ ndihi-ndo Yǎ Ndiòxí.

¹⁴ Te núu nchòhó quidé cǎhnu ìní-ndó nchaa sá quidé ñaha tñaha ñáyiú-ndo, te ducaⁿ te Tǎtá-ndó Dútú Ndiòxí Yáá ndécú àndiu cada cǎhnu ìní-gǎ nchaa sá ñà túú vǎha quide-ndo tucu.

¹⁵ Dico núu nchòhó vá cádá cǎhnu ìní-ndó nchaa sá quidé ñaha tñaha ñáyiú-ndo ña, te ni Dútú Ndiòxí Yáá cúú Tǎtá-ndó vǎ cádá cǎhnu ìní-gǎ nchaa sá quidé-ndó tucu.

Cuendá ñáyiú ñá túú tnàhí ná xéxí áma cãháⁿ ndihí-yu Yá Ndiöxí

16 "Te nchòhó, nduu ñà túú tnàhí ná xéxí-ndó cãháⁿ ndihí-ndo Yá Ndiöxí, te vá cündiyí-ndó dàtná xíquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chi ñáyiú-áⁿ ducaⁿ xíquidé-yu cuendá sá cuini-yu cutnuni iní ñáyiú sá ñà túú tnàhí ná xéxí-yu cãháⁿ ndihí-yu Yá Ndiöxí. Te yúhú càchí tnúhu-í xii-ndo sã sã dúcáⁿ quidé-yu te ñá túú ná chindee ñàha-xi xií-yu cuendá níhí-yu ñⁿ sá ndúú tãhú-yu núú Yá Ndiöxí.

17 Dico nchòhó, nduu dùcaⁿ quide-ndo ñá túú tnàhí ná xéxí-ndó cãháⁿ ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cücá

18 cuendá sá vá cutnuni iní ñáyiú sá ñà túú ná xéxí-ndó nduu ducaⁿ cãháⁿ ndihí-ndo Yá Ndiöxí. Te Dútú Ndiöxí Yaá cúú Tãtá-ndó ndècu ndihí-ndo ñiú-ni mee-gã ndéhe-gã nàcuáa quide-ndo ndecu-ndo, te ñiú-gã taxi-gã sá ndúú tãhú-ndó.

Cuendá nchaa sá váha nduu táhú-ó (Lc. 12:33-34)

19 "Te vá caní iní-ndó cùu-ndo ñáyiú cuica nãndi sá cündècu ndihí-ndo ñuyíú-a chi vá cúdñi-xi, chi dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedé.

20 Te váha-gã chí ndúcú nàcuáa cada-ndo cuendá ducaⁿ ngündecu sá ndúú tãhú-ndó àndiú, te xiãⁿ cudí-xi cundecu ndihí-ndo nì caa nì quíhíⁿ, chi yacáⁿ vá queé-gã tíquidi, te ni vá cãxí-gã cudi ñùhu, te ni vá quini-gã-ndó ñadúhú duhu-güedé ndachùⁿ-ndo.

21 Te núu cùu-ndo ñáyiú cuica ndècu ñuyíú-a, te ñiú-ni nchaa sá ndécú ndihí-ndo ñuyíú-a ñùhu iní-ndó. Àdi cuu-ndo ñáyiú quide nacuáa ngündecu sá ndúú tãhú-ndó àndiú, te ñiú-ni sá ndúú tãhú-ndó ndècu àndiú-áⁿ ñúhú iní-ndó.

Núú-ó cùu-xi datná ñⁿ ñuhú (Lc. 11:34-36)

22 "Te cada iní-ndó sã núú-ndó cùu-xi datná ñⁿ ñuhú. Te núu núú-ndó cãváha te cutnuni iní-ndó ná cúú sã ndécú núú-ndó.

23 Dico núu cùhú núú-ndó ñà túú cutnuni cundehe-ndo ña, te ñá túú cutnuni iní-ndó ná cúú sã ndécú núú-ndó. Te sã dúcáⁿ cùhú

núú-ndó te cada iní-ndó sã ndécú-ndó dàtná ñⁿ núú néé. Te duha nduu tnúhu cãháⁿ-í chi núu sãni váha iní-ndó cuendá Yá Ndiöxí ñá, te cùu vii cuu váha iní-ndó ndècu-ndo. Áⁿ te núu ñá túú sãni váha iní-ndó cuendá-gã ñá, te ñá túú tnàhí cùu váha iní-ndó ndècu-ndo. Te sã dúcáⁿ ñà túú sãni váha iní-ndó cuendá-gã te cada iní-ndó sã ndécú-ndó dàtná ñⁿ núú néé.

Vá ndácú ñⁿ téé cunu cuechi-dé núú úú pãtróóⁿ

(Lc. 16:13)

24 "Te ni ñⁿ téé xinu cuechi vá ndácú-dé cunu cuechi-dé núú úú pãtróóⁿ, chi téé-áⁿ cuu váha iní-dé núú ñⁿ pãtróóⁿ-dé te tñi-dé nchaa tnúhu cãháⁿ pãtróóⁿ téé cùu váha iní-dé núú-xi-áⁿ. Te núú ñngá tucu pãtróóⁿ-dé vá cúú váha iní-dé, te ni vá tñí-dé tnúhu cãháⁿ ñngá téé-áⁿ. Te ducaⁿ sãtnahá-xi cùu nchòhó chi vá ndácú-ndó cunu cuechi-ndo núú Yá Ndiöxí te cuhuⁿ iní-ndó nchaa sá ió ñuyíú-a.

Yá Ndiöxí xító-gã nchaa ñáyiú cùu déhe-gã (Lc. 12:22-31)

25 "Te na càchí tnúhu-í xii-ndo sã vá ño cani iní-ndó núu nása níhí-ndó sã còhó sã cãxí-ndó, te ni vá ño cani iní-ndó núu nása níhí-ndó dõo cuihnu-ndo, chi cunu-gã méé-ndó dàcúxí sã nchító-ndó, te ducaⁿ cunu-gã yiqui cùñú-ndó dàcúxí dõo sãcuihnu-ndo.

26 Te chí cadá cuendá sá ncháá quiti ndava ñá túú tnàhí ná xítú-güedi, te ni ñà túú ndèé cuáháⁿ-güedi nãtahu-güedi, te ni ñà túú ná nãtãxúha-güedi, te ni ñà túú ndèé cáá yacá-güedi, chi mee Tãtá-ó Dútú Ndiöxí Yaá ndécú àndiú xito ñàha-gã xii-güedi ñihí-güedi sá xéxí-güedi. Te núu cue quiti-áⁿ ducaⁿ xito ñàha-gã xii-güedi, ñte uuⁿ-gã xító ñàha-gã xii nchòhó, chi nchòhó ío-gã cùnùu-ndo dacúxí cuè quiti-áⁿ!

27 Te cuèi nãndi sá sãní vihi iní-ndó ndècu-ndo, dico ñá ndácú-ndó cada-ndo nacuáa cuehnu-ndo cuèdìcò ñⁿ yiqui-gã.

28 "Te vá ño cani iní-ndó núu nása níhí-ndó dõo cuihnu-ndo. Te chí cadá cuendá nacuáa sãhnu nchaa itá ió yucu, chi nchaa itá-áⁿ ñà túú quide chiuⁿ-xi, te ni ñà túú quèheⁿ-xi idi.

29 Te na càchí tnúhu-í xii-ndo sã ndíi Salòmón cuèi ío vii ní xinduu dóo ñi xóo

cuihnu ndíi, dico ñá túú nǔtnahá-xi nàcuáa càa nchaa itá, chi ío-gá vii càa nchaa itá.

³⁰ Te nchaa itá ío yucu tnaa-ni cùdíi-xi, te yìchí-xi te sàhmi ñáyiu. Te cuèi ducaⁿ dico mee Yá Ndiöxí quidé-gã ío vii sàcúnduu-xi. Te núu nchaa itá-áⁿ ducaⁿ quide-gá xító-gã sàcúnduu vii-xi, te xiãⁿ cùtnùní sá ío-gá coto ñaha-gã xii-ndo, dìcò-ni sá ñà túú sàndáa váha iní-ndó-gã.

³¹ Te xiãⁿ núu ñá túú xìni ñuhu vihi-xi cani iní-ndó núu nása níhí-ndó sá cóhó sá cáxí-ndó, àdi nása níhí-ndó dóo cuihnu-ndo.

³² Chi nchaa ñáyiu ñá túú xìní nàcuáa càháⁿ tnúhu Yá Ndiöxí mee-ni nchàa xiãⁿ ñúhú iní-yu. Dico nchòhó chi mee Tátá-ndó Dútú Ndiöxí sa nàha-gá ná cúú sá xìní ñuhu-ndo.

³³ Te xiãⁿ núu ío xìni ñuhu-xi sá cúhúⁿ iní-ndó sá Yá Ndiöxí yíndàha ñaha-gá xii-ndo, te ducaⁿ càda-ndo nchaa nacuaa cuiní-gá, te ducaⁿ te taxi-gá nchaa sá xìní ñuhu-ndo.

³⁴ Núu xiãⁿ vá ío cani iní-ndó nása cundecu-ndo nduu tneé, chi cani iní-ndó nàcuáa cada-ndo cundecu-ndo vitna, chi nduu tneé-áⁿ te òré-nà te cutnùní núu nása cada-ndo cundecu-ndo. Chi nchòhó sa nàha-ndo sá ío titní núú sá quidé-xí ìⁿ nduu ìⁿ nduu —duha ní dánèhé ñáhá Jèsús xii cue téé xìca cuu ndihí-gá ndihí nchaa ñáyiu.

7

Vá càháⁿ cuèhé-ó cuendá tnàha ñáyiu-ó (Lc. 6:37-38, 41-42)

¹ Te Jèsús ndècuu-ni-gá dánèhé-gá cue téé xìca cuu ndihí-gá ndihí nchaa ñáyiu, te xàhaⁿ-gã:

—Vá càháⁿ cuèhé-ndó cuendá tnàha ñáyiu-ndo, te ducaⁿ te Yá Ndiöxí ñá túú ná tnúhu cúñaha-gã xii-ndo.

² Chi núu na càháⁿ cuèhé-ndó cuendá tnàha ñáyiu-ndo, te Yá Ndiöxí ío ìⁿ sá cáda ñaha-gá xii-ndo. Te núu nchòhó ná càháⁿ cuèhé víhí-ndó cuendá tnàha ñáyiu-ndo te Yá Ndiöxí ío-gá dandòho ñaha-gá xii-ndo.

³ ¿Te ná cuendá ndéhé-ndó ìⁿ sá ñà túú váha quide tnaha ñáyiu-ndo te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìⁿ mihi líhli ñuhu núú tnàha ñáyiu-ndo te mee-ndo

ñuhu ìⁿ mihi cahnu-gá núú-ndó te ñá túú quide cuendá-ndó.

⁴ Te núu na nàcanu ichi-ndo tnaha ñáyiu-ndo cuendá sá ñá túú quide váha-yu ndécú-yu, te mee-ndo vihi-gá quidé-ndó ñá, te cada iní-ndó sá xàhaⁿ-ndo xii tnaha ñáyiu-ndo sá nátàva-ndo mihi líhli ñuhu núú-yu sá dúcáⁿ quide-ndo, te mihi càhnu ñuhu núú méé-ndó ñà túú quide cuendá-ndó.

⁵ Te sá dúcáⁿ quide-ndo te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó, te xìni ñuhu-xi díhna-gá ñàha-ndo nchàa sá ñà túú váha quide-ndo, te dàtnùní ducaⁿ te cuu nacanu ichi-ndo tnàha ñáyiu-ndo cuendá nchaa sá ñà túú váha quidé-yu.

⁶ Te nchaa ñáyiu ío sàá iní-xi, te vá cáda yìca-ndó-yu cundedòho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhà-yu xii-ndo. Te ñáyiu-áⁿ cúú-yu dàtná iná chi quití-áⁿ núu na cuñaha-o ìⁿ sá cuñaha-o, te núu ñá túú cùtnuní iní-dí ná cúú xiãⁿ te tní ñaha-dí xii-o. Te cùu tucú-yu dàtná cùchí chi quití-áⁿ núu na chùcu-o núú-dí yúú váha sá ío vii càa nani pérá, te dìcò-ni cùnu sáhá-dí chi ñá túú cùtnuní iní-dí sá cúú-xí yúú váha.

Cácáⁿ-ó núú Yá Ndiöxí núu ná cuiní-ó (Lc. 11:9-13; 6:31)

⁷ Te na càchí tnúhu-í xii-ndo sá cãcáⁿ-ndó núú Yá Ndiöxí te núu ná cuiní-ndó te taxi-gá, te vá dáña ndèé-ndó cãcáⁿ-ndó núú-gã núu ná cuiní-ndó te ducaⁿ te níhí-ndó. Te cada iní-ndó sá ní quexìo-ndo vehe ìⁿ tnaha ñáyiu-ndo te ní cáháⁿ-ndó, te ñáyiu-áⁿ ní tedòho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedòho ñaha-gã xii-ndo, te taxi-gá sá ná cãcáⁿ-ndó núú-gã.

⁸ Chi nchaa ñáyiu ducaⁿ xiquide, te Yá Ndiöxí tedòho ñaha-gã xií-yu te níhí-yu sá cuiní-yu. Te diu-ni ducaⁿ tucu nchaa ñáyiu na càcáⁿ núú-gã ìⁿ sá cuiní-yu, chi sãñaha-gã sá xìcáⁿ-yu núú-gã. Te diu-ni ducaⁿ tucu nchaa ñáyiu ñá túú dàña ndéé xìcáⁿ núú Yá Ndiöxí sá cuiní-yu chi níhí-yu.

⁹ Te nchòhó cue téé cùu tátá, ñá túú cundee iní-ndó cuñaha-ndo xii cue déhe-ndo ìⁿ yúú caxi-güexi òré xìcáⁿ-güexi ìⁿ pàa núú-ndó càxi-güexi.

10 Te ni ñà túú cùndee iní-ndó cuãñaha-ndo ñí còó caxi-güexi òrè xìcáⁿ-güexi ñí chácá núú-ndó càxi-güexi.

11 Te nchòhó cuèi ndèé dau-na sàá iní-ndó dico sàha-ndo cuè déhe-ndo sà vâha xèxi-güexi òrè ná cúú sã xìcáⁿ-güexi núú-ndó càxi-güexi. Te núu nchòhó ducaⁿ quide-ndo, jte uuⁿ-gá ducaⁿ quide Tátá-ndó Dútú Ndiõxí Yaá ndécú àndiu, chi taxi-gá sã vâha sã cúú-xí-ndó te núu na càcáⁿ-ndó núú-gã!

12 Te nchaa sã vâha cuèni-ndó càda tnahã ñáyiu-ndo, te cada-ndo tnahã-ndó ndihí-yu, chi ducaⁿ sànu ichi ñaha tnúhu ní chídó tnùní ndíi Moisés, te diu-ni ducaⁿ sànu ichi ñaha tucu nchaa tnúhu ní chídó tnùní cue téé ní xóo cáháⁿ tnúhu Yá Ndiõxí ndéé sanaha.

Yuyèhe cuiñi

(Lc. 13:24)

13-14 Te xini ñuhu-xi nducu-ndo nacuaá cada-ndo tní-ndo ichi Yá Ndiõxí. Te ichi-gá-áⁿ cúú-xí dàtná ñí ichi cuiñi, àdi datná ñí yuyèhe cuiñi. Te duha cáháⁿ-í chi ío úhú xínu iní-ndó tní-ndo ichi Yá Ndiõxí, te sacú-ni nchòhó cue ñáyiu ndècu ñuyú-a tní-ndo ichi-gá. Te nchaa ñáyiu ndècu ichi cuehé ichi duha ta xíta nihnú-yu cuáháⁿ. Te ichi ndécú-yu-áⁿ cada iní-ndó sã cúú-xí ñí ichi cahnu ichi quehéⁿ, àdi ñí yuyèhe quehéⁿ. Te duha cáháⁿ-í chi ío vai ñáyiu ndécú-yu ichi-áⁿ.

Ndi ñí núú yutnu xini-ó ñá yutnu cùu-xi cuendá sã sãvidí-xi

(Lc. 6:43-44)

15 Te càchí tnúhu-í xii-ndo sã ío quihi iní-ndó cùndecu-ndo cuendá sã vã dándàhú ñáháⁿ cuè téé càchí sã cáháⁿ tnúhu Yá Ndiõxí te ñá ndáá sã cáháⁿ-güedé tnúhu-gá. Chi cue téé-áⁿ sànuu sã quidé-güedé dàtná quidé mbéé quiñi ío váha iní-xi, dico ñá ndáá chi ñá túú ñuhu váha iní-güedé, chi quide-güedé dàtná quidé quiñi dééⁿ quiñi nàni yíhi.

16 Te òrè quexìo-güedé núú ndécú-ndó te cada cuendá-ndó nàcuáa quide-güedé cuendá ducaⁿ cùtnuní iní-ndó ñá ñáyiu cùu-güedé. Te nchòhó xini-ndó sã ñà túú cùuⁿ ndéhé yoho yàha stilé tnu iñu, te ni ñà túú xini-ndó cùuⁿ ngúxí ñí tnu iñu.

17-18 Te xini tucu-ndo sã ncháá yutnu váha cùuⁿ sãvidí váha, te nchaa yutnu váha-áⁿ ñà

túú cùuⁿ sãvidí sã ñà túú vâha. Te nchaa yutnu sã ñà túú vâha ñá túú cùuⁿ sãvidí váha, chi mee-ni sãvidí sã ñà túú vâha cùuⁿ.

19 Te nchaa yutnu sã ñà túú cùuⁿ sãvidí váha xèndé-güedé, te cuánguee-xi núú ñùhú càyú-xi. Te ducaⁿ sãtnahá-xi yáha nchaa cue téé dándahú ñáháⁿ càchí sã cáháⁿ tnúhu Yá Ndiõxí te ñá ndáá sã cáháⁿ-güedé tnúhu-gá, chi quihiⁿ-güedé núú ñùhú núú càyú.

20 Te nchòhó cutnùní iní-ndó ñá ñáyiu cùu cue téé-áⁿ cuendá nchaa sã quidé-güedé.

Ñá ncháá ñáyiu ngündecú-yu núú ndécú Yá Ndiõxí táxi tnùnigá

(Lc. 13:25-27)

21 Te na càchí tnúhu-í xii-ndo sã ío vai ñáyiu cachí-yu sã yúhú cùu-í Xítóhó-yu, dico ñá ncháá-yu nduu táhú-yu cundecú-yu núú ndécú Tátá-í Dútú Ndiõxí táxi tnùnigá, chi mee-ni ncháa ñáyiu na càda nchaa nacuaá cáháⁿ-gá ñáyiu-áⁿ nduu táhú-yu cundecú-yu núú ndécú-gã táxi tnùnigá.

22 Te na sàá nduu càda ndáá Yá Ndiõxí cuèchi nchaa ñáyiu, te vai-yu cúñahá-yu xii-í: “Yòhó Xítóhó Jesucristú nchúhú cúú-ndí ñáyiu ní cáháⁿ tnúhu-n nàcuáa ní cachí-n, te diu-ni-n ñí cacunehe-ndí te ní sándáá iní ñáháⁿ ncháa espíritú cùndíhi yucu ñávâha xii-ndí ní quee-xi yiqui cùñú ñáyiu, te diu-ni yòhó ní chindee ñaha-n xii-ndí ní ndacu-ndí ní quide-ndí titní núú sã vã yòo tnahí ndàcu cada”, duha cúñahá-yu xii-í dàvá-áⁿ.

23 Dico yúhú cúñaha-í xii-yu: “Ñá túú tnahí xini ñáhá-í xii nchòhó núu ndèé ñáyiu cùu-ndo, te chí xocuiñi nchaa nchòhó ñáyiu quide nchaa sã cuèhé sã dúhá núú ndécú-í-a”, duha cúñaha-í xii-yu.

Ñí vehe ndècu cimientú-xi ndíhi ñí vehe ñá túú cimientú-xi

(Mr. 1:22; Lc. 6:47-49)

24 Te nchaa ñáyiu sàcúndedóho tnúhu cáháⁿ-í te núu na tní-yu, te ñáyiu-áⁿ cùu-yu dàtná ñí téé ío váha cùtnuní iní-xi. Chi téé-áⁿ ñí dácáá-dé ñí vehe, dico díhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi.

25 Te òrè ní cuuⁿ dáú te ní ndee ndute ñuhu, te ní dándáá-xí ndéé núú cáá vehe-áⁿ,

dico ñá túú ní ndàcu-xi cuido-xi. Te ní quene tucu táchí ñhi dico ñá túú ní ndàcu-xi cuido-xi vehe-án, te ducaⁿ chi téé ní dácáá vèhe-án ñ tava-dé cimientú-xi núú yúú cáxíⁿ. Duha sãtnahá-xi cùu nchaa ñáyiu tñì tñúhu càháⁿ-í.

²⁶ Dico nchaa ñáyiu sácúndedóho tñúhu càháⁿ-í te ñá túú cuíní-yu tñíⁿ-yu, ñáyiu-án cúú-yu dàtná ñⁿ téé ñá túú tñàhí cùtnuní iní-xi. Chi téé-án ñ dácáá-dě ñⁿ vehe núú yúú mée-ni ñuhu cúchí.

²⁷ Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-án, te ní quene táchí ñhi te íi-ni ní xido-xi vehe-án cuèndá sá núú ñuhu cúchí ñ sáá. Duha sãtnahá-xi cùu nchaa ñáyiu sácúndedóho tñúhu càháⁿ-í te ñá túú cuíní-yu tñíⁿ-yu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiu.

²⁸ Te òré ní ndihí Jèsús sá dúcáⁿ ñ cáháⁿ-gá, te nchaa ñáyiu ní xíndedóho nchaa tñúhu ní cáháⁿ-gá ío ní cuñúhu-yu nàcuáa ní dánèhé ñáhá-gá xii-yu.

²⁹ Chi ní cáháⁿ-gá dàtná càháⁿ cue téé cùnuu, te cùnuu ndisa-gá, te ñá túú ní cáháⁿ-gá dàtná càháⁿ nchaa cue téé dàcuaha ñaha xii ñáyiu nchaa tñúhu ní chídó tñuní ndíi Moisés.

8

Jèsús quidé tãtna-gá ñⁿ téé tñàhá cuéhé sã dátèhyú nihnu-xi yiqui cùñú-ó
(Mr. 1:40-45; Lc. 5:12-16)

¹ Te Jèsús ní xica-gá cuánuu-gá ñíⁿ tñúú núú dúcáⁿ ñ xíndecu-gá ní dánèhé-gá ñáyiu-án, te cuéhé víhí ñáyiu nchicúⁿ ñáhá xii-gá cuánuu.

² Te ní quexìo ñⁿ téé tñàhá cuéhé sã dátèhyú nihnu-xi yiqui cùñú-ó núú Jèsús, te ní ngüñí xítí-dě núú-gã, te xãhaⁿ-dě xii-gá:

—Mèstrú, véxi-í càháⁿ ndàhú-í núú-n núú vá cùndèe iní-n càda tãtna ñaha-n xii-í, chi cùtnuní iní-í sá ndácú-n —càchí-dé xãhaⁿ-dě xii-gá.

³ Te Jèsús ní dácáá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna ndúha-n —càchí-gá xãhaⁿ-gã xii-dé.

Te òré-ni-án ñ xócúñí cuéhé tñàhá-dé.

⁴ Te Jèsús ní xãhaⁿ tucu-gá xii-dé:

—Te vitna cuanùhú te vá yõo ñⁿ cúñaha-n sã yùhú ní quide tãtna ñaha-í xii-n, núú dütú-ni cuáháⁿ cuèndá sá ná quíní ñáhá-dě xii-n sã ñ ndúha-n, te cuáñaha-n sã ndúú tãhú Yã Ndiõxí dàtná ní cachí ndíi Moisés. Te ducaⁿ càda-n cuèndá cutnùní iní ñáyiu sá ñ ndúha-n —càchí-gá xãhaⁿ-gã xii téé ní quide tãtna-gá-án.

Jèsús quidé tãtna-gá ñⁿ téé xinu cuechi núú ñⁿ téé cùu capitáⁿ

(Lc. 7:1-10)

⁵ Te Jèsús ní xica-gá cuáháⁿ-gá ñúú Capèrnaúm. Te òré cuánguñhu-gá ñúú-án te ní quexìo ñⁿ téé cùu capitáⁿ càháⁿ ndàhú-dé núú-gã,

⁶ te xãhaⁿ-dě xii-gá:

—Mèstrú, véxi-í càháⁿ ndàhú-í núú-n núú vá cùndèe iní-n càda tãtna-n ñⁿ téé xinu cuechi núú-í, chi cùhú-dé te càhú víhí tñàhá-dé, te ío ndòho-dé te ní ñã cùndèe-gá-dé candá nihnu-dé —càchí-dé xãhaⁿ-dě xii-gá.

⁷ Te Jèsús ní xãhaⁿ-gã xii-dé:

—Te na quihíⁿ-ó càda tãtna-í-dé —càchí-gá xãhaⁿ-gã xii-dé.

⁸ Te téé cùu capitáⁿ-án ñ xãhaⁿ-dě xii-gá:

—Mèstrú, ñá túú tàú-í sá quñhu-n ndéé xítí vehe-í, chi cùu-í ñⁿ téé cùtexínu sá cúú-xi-n, te cáháⁿ-ni sá ndúha téé xinu cuechi núú-í te ndúha-dé.

⁹ Chi yùhú ndècu cue téé tàxi tñuní ñáhá xii-í, te ducaⁿ yùhú tucu ndècu cue sandadú táxi tñuní-í. Te òré xãhaⁿ-í xii ñⁿ-dé quihíⁿ-dé ñⁿ chiuⁿ te cuáháⁿ-dé, te òré xãhaⁿ-í xii ingá-dé quixi-dé te véxi-dé, te òré xãhaⁿ-í xii ñⁿ téé xinu cuechi núú-í cada-dé ñⁿ chiuⁿ te quide-dé. Núú xíãⁿ yòhó cáháⁿ-ni sá ndúha téé xinu cuechi núú-í te ndúha-dé —càchí-dé xãhaⁿ-dě xii Jèsús.

¹⁰ Te Jèsús ío ní cuñúhu-gá sá dúcáⁿ ñ cáháⁿ téé cùu capitáⁿ-án, te ní xãhaⁿ-gã xii nchaa ñáyiu nchicúⁿ ñáhá xii-gá:

—Na càchí tñúhu ndáá-í xii-ndo sã vãtã quíní-gá-í ní ñⁿ ñáyiu isràél, ñáyiu súúni ío váha sãndáá iní ñáhá xii Yã Ndiõxí dàtná sãndáá iní ñáhá tée-a xii-gá.

¹¹ Te na càchí tñúhu ndáá tucu-í xii-ndo sã ío cuéhé ñáyiu quixi ndàa xio nacuáa quène nchíanchii, te ñúu-ni ducaⁿ ío cuéhé tucú-yu quixi ndàa xio nacuáa quée tucu nchíanchii. Te nchaa ñáyiu-án naníhí

tnáhã-yu ndihi té Àbrahám, ndihi té Isàac, ndihi té Jàcób núú ndécú Yã Ndiõxí táxí tnùnì-gá te yàcáⁿ cundecu ndihi ñàhá-yu xii-güedé.

¹² Te nchaa ñáyiú tàú nduu táhú cundecu núú ndécú Yã Ndiõxí táxí tnùnì-gá ní cùu, ñáyiú-áⁿ quee tíhũ-yu, chi quíhíⁿ-yu ìⁿ xichi núú néé núú ïo ndohó-yu cundecu-yu, te yàcáⁿ ío ndáhí-yu, te dícó rúhñú-ñã cuu núhu-yu sá sàtú ínì-yu cuendá sá ndóhõ-yu —càchí-gá xãhaⁿ-gã xii-yu.

¹³ Te Jèsús ní xãhaⁿ tùcu-gá xii tée cùu capitáⁿ-áⁿ:

—Yòhó tée ndècu ndihi tée cùhú cuanùhú vehe-n vitna chi ndúha-dé chi ní sándáá ínì-n Yã Ndiõxí —càchí-gá xãhaⁿ-gã xii-dé.

Te ñu-ni òré ducaⁿ ñi xãhaⁿ Jèsús xii tée cùu capitáⁿ-áⁿ ñi ndúha tée xinu cuechi núú-dé.

Jèsús quidé tãtna-gá nãná ñadihí té Pèlú
(Mr. 1:29-31; Lc. 4:38-39)

¹⁴ Te Jèsús ní xica-gá cuáhãⁿ-gá vehe té Pèlú, te òré ní quexìo-gá vehe-dé te ní xinì-gá cáá nãná ñadihí-dé cùhú-aⁿ ñuhu vihi-aⁿ cahni.

¹⁵ Te Jèsús ní tñi-gá ndaha ñaha cùhú-áⁿ, te òré-ni-áⁿ ñi nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndihi-gá.

Jèsús quidé tãtna-gá vai ñáyiú cùhú
(Mr. 1:32-34; Lc. 4:40-41)

¹⁶ Te òré ní dáhu nchícanhii te ní quexìo ñáyiú núú ndécú Jèsús, te ndècá-yu vai ñáyiú yìhì ñaha espíritú cùndìhì yucu ñávãha ní sáá núú-gã te ndèca tucú-yu vai ñáyiú tnáhã dava-gá núú cuéhé. Te ìⁿ-ni tnúhu ní cáháⁿ Jèsús ní tenáá-gá nchaa espíritú cùndìhì yucu ñávãha yìhì ñaha xii nchaa ñáyiú-áⁿ, te ní quee-xi yiqui cùñú-yu cuáhãⁿ-xi. Te tnáhã nchaa dava-gá ñáyiú cùhú-áⁿ ñi quide tãtna-gá.

¹⁷ Te ducaⁿ ñi cuu chi ní quee ndáá-xi nàcuáa ní cáháⁿ ndí Chaiá tée ní xóo cáháⁿ tnúhu Yã Ndiõxí ndéé sanaha, te duha ní cachí ndí: “Mee-gã cada tãtna ñaha-gã xii-o, chi ñu-gá xocàni-gá nchaa sá quidé ùhú yiqui cùñú-ó”, duha ní cachí ndí.

Ñáyiú cuiní tuha ñaha xii Jèsús
(Lc. 9:57-62)

¹⁸ Te òré ní xinì Jèsús sá ïo cuéhé ñáyiú xixúcu núú ndécú-gã, te ní xãhaⁿ-gã xii cue tée xica cuu ndihi-gá sá quée-gá ndihi-güedé bàrcú cuendá téhndé-gá ndihi-güedé ndàa ingá xio yuhu làgúná.

¹⁹ Te mei òré-áⁿ ñi quexìo ìⁿ tée dàcuaha ñaha xii cue ñáyiú nchaa tnúhu ní chídó tnùnì ndí Moisés, te xãhaⁿ-dè xii-gá:

—Mèstrú, cuiní-í canchicúⁿ ñãhã-í xii-n ndèni ní cuu na quíhíⁿ-n —càchí-dé xãhaⁿ-dè xii-gá.

²⁰ Te Jèsús ní xãhaⁿ-gã xii-dé:

—Nchaa ñúcui chi ndècu yaú cúu vèhe-güedi saquíhì-güedi, te nchaa cue quiti ndava caa tacá-güedi diquí yutnu. Dico yuhú Téé cùu ñani tnáhã-ndó nchãa-ndo chi ñã túú ndèé cáá vèhe-í ñuyíú-a ndetatú-í —càchí-gá xãhaⁿ-gã xii-dé.

²¹ Te ìⁿ téé ní chitnahá ñáhã xii Jèsús ní xãhaⁿ-dè xii-gá:

—Jèsús, daña na nùhú-í cundetu-í cuú tãtã-í te chindúxi-í-dé dàtnùnì quixi-í chitnahá ñáhã dùcaⁿ-ná-í xii-n —càchí-dé xãhaⁿ-dè xii-gá.

²² Te Jèsús ní xãhaⁿ-gã xii-dé:

—Daña ñáyiú ñã túú sándáá ínì ñáhã xii-í ná chindúxi tnàha meé-yu, chi ñáyiú-áⁿ cúu-yu dàtná ñáyiú ní xihí cuéi ndècu-ní-yu núú ñuyíú-a, te yòhó canchicúⁿ ñáhã-ní xii-í —càchí-gá xãhaⁿ-gã xii-dé.

Jèsús ngánì-gã táchì ndihì ndute làgúná
(Mr. 4:35-41; Lc. 8:22-25)

²³ Te sáta dúcãⁿ te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-áⁿ cuáhãⁿ-xi.

²⁴ Te ñini ñuhu bàrcú-áⁿ ichi cuáhãⁿ-xi núú ndute ní xidí Jèsús, te ní ngúita-xi níhi vihi quene táchí, te ta nàdachitú-xi ndute xití bàrcú cuáhãⁿ.

²⁵ Te cue téé xica cuu ndihi-gá cuáhãⁿ-güedé núú cáá-gã xidí-gá, te xãhaⁿ-güedé xii-gá:

—¡Mèstrú, ndiquíú ínì chi dàcácu ñaha-n xii-o chi quée naa-o cuiní-xi! —càchí-güedé xãhaⁿ-güedé xii-gá.

²⁶ Te Jèsús ní xãhaⁿ-gã xii-güedé:

—¿Ná cuendá ndéé ducaⁿ ïo yuhú-ndó? ¿Náa ñã túú sándáá ínì ñáhã ndisa-ndo xii-í-ãⁿ? —càchí-gá xãhaⁿ-gã xii-güedé.

Te Jèsús ní ndacóo-gá te ní tenàá-gá táchí-áⁿ ndihí ndute-áⁿ, te ní ngüíñí táchí-áⁿ te ní nucúndecu nahi-ná ndute làgúná-áⁿ.

²⁷ Te nchaa cue téé ñùhu xítí bàrcú-áⁿ ñí cuñúhu-güedé sá dúcáⁿ ñí quide-gá ní xiní-güedé, te ní xítñàha-güedé:

—¿Te ná téé cùu téé-a núu duha ní cáháⁿ-ni-dé te ní ngüíñí táchí te ní nucúndecu nahi-ni ndüte làgúná-a-i? — cächí-güedé xítñàha-güedé.

Cue téé ñuú Gàdará cue téé yíhi ñaha espíritú cündìhi yucu ñávãha
(Mr. 5:1-20; Lc. 8:26-39)

²⁸ Te òré ní quèxio Jesús ndàa ingá xio yuhu làgúná yucu cue téé ñuú Gàdará, te úú tñàhá cue téé quide vehe núu yíndüxi ndíyí ní quee-güedé cuáháⁿ-güedé núu ndécú Jèsús, te ndí ndúú-güedé yíhi ñaha espíritú cündìhi yucu ñávãha xii-güedé, te ío màñá-güedé chí vá yõ tñàhí dàña-güedé yáha yatni núu ndécú-güedé.

²⁹ Te cue espíritú yíhi ñaha xii-güedé-áⁿ ñí quide-xi níhi ní cáháⁿ-güedé, te xáhaⁿ-güedé xii-gá:

—¿Ná cuèndá véxi-õ Jèsús Déhe Dútú Ndiõxí chidácá ñáhá-n xii-ndí? ¿Áⁿ sàma véxi-n dándoho ñaha-n xii-ndí? Te vátá sàá-gá nduu dùcaⁿ cada-n —cachí-güedé xáhaⁿ-güedé xii-gá.

³⁰ Te yatni xíaⁿ xíxica cuu vai cuchí xíxexi-güedé.

³¹ Te cue espíritú cündìhi yucu ñávãha yíhi ñaha xii cue téé-áⁿ ñí cáháⁿ ndàhú-xi núu Jèsús, te xáhaⁿ-xi:

—Te núu vá dáñá-gã-n quíhi-ndí yiqui cùnú cue téé-a, te cãháⁿ ndàhú-ndí núu-n sã dàña-n na quíhíⁿ-ndí quíhu-ndí yiqui cùnú nchaa cùchí-áⁿ —cächí cue espíritú-áⁿ xáhaⁿ-xi xii-gá.

³² Te Jèsús ní xáhaⁿ-gã xii cue espíritú cündìhi yucu ñávãha-áⁿ:

—Chí táquèe yiqui cuñú cue téé-áⁿ te quíhíⁿ-ndó ñuu ndèé ichi quíhíⁿ-ndó — cächí-gá xáhaⁿ-gã xii nchaa espíritú-áⁿ.

Te cue espíritú cündìhi yucu ñávãha-áⁿ ñí quee-xi yiqui cùnú cue téé-áⁿ, te cuáháⁿ-xi cuánguìhu-xi nchaa cùchí-áⁿ. Te cue

quiti-áⁿ ñí xinu-güedé duha ní quée-güedé ndàa núu dèhvá yuhu làgúná-áⁿ, te ní ngau-nihnu-güedé xítí ndute, te ní ndihí-güedé ní cáhá.

³³ Te cue téé xító ñaha xii nchaa cuchí-áⁿ ñí yùhú-güedé te ní xinu-güedé, te ní sáháⁿ-güedé ní cani-güedé cuèndú núu cuè ñáyiú ndècu xítí ñuú nchaa nàcuáa ní cuu cuèndá cue téé ní xíhi ñaha nchaa espíritú cündìhi yucu ñávãha-áⁿ.

³⁴ Te nchaa ñáyiú ñuú-áⁿ ñí queé-yu cuáháⁿ-yu núu ndécú Jèsús. Te òré ní quexió-yu núu ndécú-gã te ní cáháⁿ ndàhú-yu núu-gã sá ná quèe-gá yucu ñuú-yu núhú-gá.

9

Jèsús quidé tãtna-gá #ⁿ téé cùhú ñá cúu-gã candá nihnu

(Mr. 2:1-12; Lc. 5:17-26)

¹ Te sátá dúcáⁿ ñí cuu te Jèsús cuánde-gá bàrcú cuáháⁿ-gá ní natehndé-gá ndàa ingá xio yuhu làgúná. Te xíaⁿ ñí ndexió-gá ñuú núu quidé ñuú-gá.

² Te xíaⁿ ndécú-gã ní quexió cue téé nchido-güedé #ⁿ téé cùhú ñá cúu-gã candá nihnu ñùhu-dé xító, te Jèsús ní cutnùní iní-gá sá sàndáa ndisa iní ñáhá-güedé xii-gá ñuu ní xáhaⁿ-gã xii téé cùhú-áⁿ:

—Yòhó téé cùhú vá ndíhú-gá iní-n, chí sa ní quide cãhnu iní-í nchaa cuèchi-n — cächí-gá xáhaⁿ-gã xii-dé.

³ Te sá dúcáⁿ ñí cáháⁿ-gá ñuu xíaⁿ cue téé dàcuaha ñaha xii ñáyiú nchaa tñúhu ní chídó tñùní ndíi Moisés ní sani iní-güedé: “Téé-a cãháⁿ cuèhé-dé cuèndá Yã Ndiõxí”, duha ní sani iní-güedé.

⁴ Te Jèsús ní cutnùní iní-gá nàcuáa sàni iní-güedé ñuu ní xáhaⁿ-gã xii-güedé:

—¿Ná cuèndá ducaⁿ sàni cuehé sání dùha iní-ndó?

⁵ Te sá dúhá ñí xáhaⁿ-í xii téé cùhú-a sá ñí quide cãhnu iní-í nchaa yíca cuèchi-dé, te xíaⁿ nchòhó ñá túú cutnùní iní-ndó ñuu ndáa cãháⁿ-í àdi ñá ndáa. Dico núu cúu-í-dé sá ndáa cãháⁿ-í àdi ñá ndáa, chí cundehe núu-ndó nàcuáa cada-í.

⁶ Te vitna na càda-í nàcuáa cutnùní iní-ndó nchaa-ndo sá yùhú Téé cùu ñaní tñáhá-ndó nchaa-ndo ndecu ndihí-í tñúhu

ndee iní ñuyú-a sá cáda càhnu iní-í nchaa cuéchi ñáyi —càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii té cùhú-áⁿ:

—Ndacóo, te ndocani-n xíto ñùhu-n véxi-áⁿ te núhú-n vèhe-n —cachí-gá xáhaⁿ-gã xii-dé.

⁷ Te òré-ni-áⁿ ñí ndúha té cùhú-áⁿ te ní ndacóo-dé te ní ndocani-dé xíto ñùhu-dé ní quexìo-áⁿ te ní xica-dé cuánuhú-dé vèhe-dé.

⁸ Te nchaa ñáyi xíndecu-áⁿ ño ní cuñúhu-yu sá dúcáⁿ ñí quide Jèsús ní xiní-yu, te ní cachí-yu sá ño càhnu cuu Yá Ndióxi cuendá sá ñí sáñaha-gã xii Jèsús tnúhu ndee iní cada-gá nchaa sá vã yõo tnàhí ndàcu cada.

Jèsús càháⁿ-gá ñí té nàni Mateú chitnahá ñáhá-dé xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcõo ñí té nàni Mateú quidé còbrá-dé ñáyi chi cobràdór impuèstú cúu-dé, te ní xáhaⁿ-gã xii-dé:

—Màteú, néhé chitnahá ñáhá-n xii-í —càchí-gá xáhaⁿ-gã xii-dé.

Te té Màteú-áⁿ ñí ndacuíñí-dé ní chitnahá ñáhá-dé xii-gá.

¹⁰ Te ñí xito ndècu Jèsús ñí vèhe, te yíhi-gá mèsá ndihi cue té xica cuu ndihi-gá xéxi ndihi ñaha-gá xii-güedé. Te tnàhá cue té cuihna iní-xi quide cobrá ñáhá xii ñáyi cuendá impuèstú yíhi ndihi-gá mèsá, te tnàhá tucu dava-gá cue té ndècu ichi cuehé ichi duha yíhi ndihi-gá mèsá.

¹¹ Te sá ñí xiní cue té cùu fariséu xéxi Jèsús ndihi nchaa cue té-áⁿ, te ní xicáⁿ tnúhú-güedé núu cuè té xica cuu ndihi-gá, te xáhaⁿ-güedé:

—¿Ná cuendá ducaⁿ quide té cùu mestrú-ndó xèxi-dé ndihi cue té cuihna iní-xi quide cobrá ñáhá xii ñáyi cuendá impuèstú, ndihi nchaa dava-gá cue té ndècu ichi cuehé ichi duha-i? —càchí-güedé xáhaⁿ-güedé.

¹²⁻¹³ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue té xica cuu ndihi-gá, núu ní xáhaⁿ-gã xii-güedé:

—Nchaa ñáyi ñá túu cùhú chi ñá túu xini ñuhú-yu ñátátná, dico nchaa ñáyi cùhú chi xini ñuhú-yu ñátátná. Te yúhu

véxi-í cáháⁿ-í ñáyi cùtnuní iní-xi sá ndécú cuéchi-xi cuendá dàñá-yu nchaa sá cuéhé sá dúhá quidé-yu, te ñá túu véxi-í cáháⁿ-í ñáyi cùtnuní iní-xi sá ndécú cuéchi-xi. Te chí cáda cuendá váha nàcuáa càháⁿ Yá Ndióxi núu tütú-gá núu cùtnuní-xi: “Yúhu cùtnuní-í sá cùndàhú iní-ndó cuè tnaha ñáyi-ndo, te ñá díu mèe-ni sá cáhni-ndó quiti nduu táhú-í”, duha cùtnuní-gá núu tütú-gá —càchí Jèsús xáhaⁿ-gã xii-güedé.

Cue té ndècu tnúhu núu Jèsús cuendá ñáyi ñá túu tnàhí ná xéxi áma càháⁿ ndihi-yu Yá Ndióxi

(Mr. 2:18-22; Lc. 5:33-39)

¹⁴ Te cue té xica cuu ndihi té Juáa té dàcuandute ñaha xii ñáyi ní sáháⁿ-güedé núu ndécú Jèsús, te xicáⁿ tnúhú-güedé núu-gã, te xáhaⁿ-güedé:

—Cùtnuní-ndí cachí tnúhu-n ñá cuendá nchúhú, ndihi cue té cùu fariséu ñá túu tnàhí ná xéxi-ndí áma càháⁿ ndihi-ndí Yá Ndióxi, te cue té xica cuu ndihi-n ñá túu dúcaⁿ quide-güedé —càchí-güedé xáhaⁿ-güedé xii-gá.

¹⁵ Te Jèsús ní xáhaⁿ-gã xii-güedé:

—Nchòhó xiní-ndó sã vã cúu cùñaha-o xii ñáyi ñùhu vico tnándaha sã vã cúu caxí-yu nini ndècu ndihi ñaha té tnándaha xii-yu, dico sáa nduu vã cùndècu ndihi ñaha-gá té tnándaha-áⁿ xii-yu, te dàvá-áⁿ te cahni iní-yu vã caxí-yu cuendá sá ndihi iní-yu.

¹⁶ Te ni vã yõo dàndée luha dóo sáa ñí dóo sa ní cuu tühú víhí, chi dóo sáa-áⁿ nàndiyi-xi te uuⁿ-gá ndata-xi dóo sã ñí cuu tühú-áⁿ.

¹⁷ Te ni vã yõo chìhi ndidí sáa xiti ñí lamba sa ní cuu tühú víhí, chi núu yoo ducaⁿ na càda te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu, núu xíáⁿ xini ñùhu-xi quée ndidí sáa-áⁿ xiti ñí lamba saa cuendá ducaⁿ ñá túu ñá cuu cováha-xi —càchí-gá xáhaⁿ-gã xii-güedé.

Cuendá déhe yoco té Jàirú ndihi cuendá ñí ñaha ní tnándeé dóo Jèsús

(Mr. 5:21-43; Lc. 8:40-56)

¹⁸ Te càháⁿ dúcáⁿ-ní Jèsús ní quexìo ñí té cùnuu núu ndécú-gã, ñí té táxi tnuní veñúhu, te ní ngüñí xiti-dé núu-gã càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n nũu vá cùndèe iní-n quíhíⁿ-ó vèhe-í dandòto-n déhe yoco-í chi ní xíhí-xi tnàvíí, te yúhú cútnùní iní-í sá nũu quíhíⁿ-n tëndaha-n yíqui cuñú-xi te ndoto-xi —càchí-dé xǎhaⁿ-dě xii-gá.

19 Te Jèsús ní xica-gá cuáháⁿ-gá ndíhi-dé ndíhi cue téé xica cuu ndíhi-gá.

20 Te ichi ñùhu-gá cuáháⁿ-gá ní sáháⁿ ñⁿ ñadìhí ní tnándeé-aⁿ yuhu dǒó-gǎ ndàa sátá-gǎ, te ñaha-áⁿ sa ní cuu úxúú cuíá sǎ cùhú-aⁿ ngòyo ñaha níñí xii-aⁿ.

21 Te ducaⁿ ní quide-aⁿ chi ní sani iní-aⁿ sá nũu ndacu-aⁿ tnándeé-aⁿ cuèdicó luha yuhu dǒó Jèsús te ndúha-aⁿ ní sani iní-aⁿ.

22 Te Jèsús ní nchócótó-gǎ ndàa sátá-gǎ te ní xiní-gá ñadìhí-áⁿ, te ní xáhaⁿ-gǎ:

—Yòhó ñaha cùhú, vá ndíhú-gá iní-n vitna chi sa ní ndúha-n, chi ní sándáá iní ñáhá-n xii-í —càchí-gá xǎhaⁿ-gǎ xii-aⁿ.

Te òré-ni-áⁿ ní ndúha ñaha cùhú-ǎⁿ.

23 Te òré ní quexìo Jesús vehe téé cùnuu taxi tnuní veñúhu-áⁿ, te ní xiní-gá xǐndáhí víhí ñáyíu, te xǐndecu mǔsicú.

24 Te ní xáhaⁿ-gǎ xií-yu:

—Chí táquèe xití vehe-a, chi xíhí-a ñá túú ní xíhí-xi chi dícó xidí-xi —càchí-gá xǎhaⁿ-gǎ xií-yu.

Te ní sácú ndeé ñáhǎ-yu xii-gá sá dúcáⁿ ní càháⁿ-gá, chi sá cúú-xi mèe-yu te ní xíhí ndisa xíhí-ǎⁿ.

25 Te ñáyíu-áⁿ ní queé-yu te cuánguìhu Jèsús núú cándòdo xíhí ní xíhí-áⁿ, te ní tní-gá ndaha-xi te òré-ni-áⁿ ní ndacóo-xi.

26 Te nchaa ñuú cáá yàtni xíaⁿ ní níhí ñáyíu tnúhu nàcuáa ní quide Jèsús.

Jèsús quidé tǎtna-gá núú úú tnàhá cue téé cuáá

27 Te sátá dúcáⁿ ní cuu te ní xica Jèsús cuánuhú-gá, te ichi ñùhu-gá ní chinchícúⁿ ñáhá úú tnàhá cue téé cuáá xii-gá, te níhi càháⁿ-güedé, te xǎhaⁿ-güedé xii-gá:

—Yòhó Jèsús, téé cùu ñaní tnàhá ndí Dàvíí, cundàhú iní ñáhá xii-ndí —càchí-güedé xǎhaⁿ-güedé xii-gá.

28 Te òré ní nasáá Jèsús núú quidé vèhe-gá, te cue téé cuáá-áⁿ ní quexìo-güedé ndéé núú-gǎ, te ní xícáⁿ tnúhú-gǎ núú-güedé, te xǎhaⁿ-gǎ:

—¿Sándáá iní-ndó sǎ yúhú ndacu-í cada tǎtna-í núú-ndó-ǎⁿ? —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Sándáá iní-ndí sá díú yòhó Jèsús ndacu-n cada tǎtna-n núú-ndí —càchí-güedé xǎhaⁿ-güedé xii-gá.

29 Te Jèsús ní dácáá-gá ndaha-gá ní tendaha-gǎ núú-güedé, te ní xáhaⁿ-gǎ xii-güedé:

—Te vitna, ndúha núú-ndó chi ní sándáá iní-ndó sǎ díú yúhú ndacu-í cada tǎtna-í núú-ndó —càchí-gá xǎhaⁿ-gǎ xii-güedé.

30 Te òré-ni-áⁿ ní ndúha núú-güedé, te Jèsús ní càháⁿ víhí-gǎ dóho-güedé cuendá sá vǎ càháⁿ-güedé nàcuáa ní cuu ní ndúha núú-güedé.

31 Te cue téé-áⁿ òré ní ndee-güedé núú ndécú Jèsús, te ní nguíta-ni-güedé ní cani-güedé cuendú núú ñáyíu nàcuáa ní quide ñaha-gǎ xii-güedé. Te nchaa dava-gá ñuú cáá yàtni xíaⁿ ní sáháⁿ-güedé ní cani-güedé cuendú núú ñáyíu nàcuáa ní quide ñaha Jèsús xii-güedé.

Jèsús quidé tǎtna-gá ñⁿ téé ñíhí

32 Te íhí ní ndee cue téé ní ndúha núú-xi-áⁿ nũú ndécú Jèsús, te ní quexìo ñⁿ úú ñáyíu ndécá-yu ñⁿ téé ñíhí yíhí ñaha espíritú cùndíhi yucu ñávaha.

33 Te Jèsús ní queñuhu-gá espíritú cùndíhi yucu ñávaha yíhí ñaha xii téé-áⁿ, te òré-ni-áⁿ ní cuu ní nacáháⁿ-dé. Te nchaa ñáyíu xǐndecu-áⁿ ño ní cuñúhu-yu, te ní xǐtnàhá-yu:

—Ñá túú tnàhí xini-ó ñⁿ téé duha cada ñuú nchoo cuè ñáyíu isráél ní cùu —cachí-yu xǐtnàhá-yu.

34 Te cue téé cùu fariséú ní nguíta-güedé xǐtnàha-güedé:

—Téé-a chi sácúhna chindèe ñaha-xi xii-dé queñúhu-dé nchaa espíritú yíhí ñaha xii ñáyíu te díu-ni sácúhna-áⁿ táxí tnùn-í-xi nchaa espíritú-áⁿ —càchí-güedé xǐtnàha-güedé.

Jèsús cùndàhú iní-gá ñáyíu

35 Te Jèsús cuáháⁿ-gá nchaa ñuú náhnú ndíhi nchaa ñuú líhli, te ndí tnàhá ñⁿ ñⁿ ñuú sáa-gá te ducaⁿ cuánguìhu-gá ñⁿ ñⁿ veñúhu càa nchaa ñuú-áⁿ dánèhé-gá ñáyíu

tnúhu váha, tnúhu sá sánú ìchi ñaha xií-yu nàcuáa ndíhu ndaha ñaha Yá Ndiöxí xií-yu. Te ducaⁿ-ni ta quide tátna-gá nchaa ñáyi cuhú cuáháⁿ cuèi ndi dííⁿ ndi dííⁿ núú cuèhé tnàhá-yu ìíⁿ ìíⁿ-yu.

³⁶ Te sá ñí xini Jèsús sá ìo vài ñáyi nchìcúⁿ ñáhá xii-gá, te ní cundàhú iní ñáhá-gá xií-yu chi ío ndihú iní-yu, te vá yòo nèhe cuendá ñáhá xií-yu, te cúu-yu dàtná cue mbéé cue quiti ñá túú tòli-xi.

³⁷ Te Jèsús ní xáhaⁿ-gã xii cue téé xica cuu ndihi-gá:

—Nchòhó xini-ndó sã òré ná sàá nduu cùu nchaa sá xítú ñáyi te ío vài cuu. Te na càchí tnúhu ndáá-í xii-ndo sã dàtná ío vài sá xítú ñáyi cùu, ducaⁿ ìo vài ñáyi cùmání cundedóho tnúhu-í, te ío sacú ñáyi dàcuaha ñaha xií-yu.

³⁸ Núú xíáⁿ xini ñùhu-xi cácaⁿ-ndó núú Yá Ndiöxí Yaá cúu Xìtohó-ndó ndihí-yu cuendá sá ná dàcaháⁿ-gá iní-yu cáháⁿ-yu tnúhu-gá núú nchàa dava-gá tnàha ñáyiú-yu cùmání cundedóho tnúhu-gá —càchí-gá xàhaⁿ-gã xii-güedé.

10

Jèsús sãñaha-gã tnúhu ndee iní xii ndi ùxúú cue téé xica cuu ndihi-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue téé xica cuu ndihi-gá, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündihí yucu ñávãha yìhi ñaha xii ñáyi, ndihí cuendá sá cáda tátna-güedé nchaa dava-gá ñáyi cuhú cuèi nándi núú cuèhé tnàhá-yu.

² Te duha xínani ndi ùxúú cue téé-áⁿ: téé cùnuu-gá nání-dé Xímú, àdi Pelú chi úú diu-dé, te ñaní-dé cúú tã Ndríxí, te tnàhá téé-áⁿ cúú-dé téé xica cuu ndihí Jèsús, ndihí té Jàcobó ndihí ñaní té Jàcobó-áⁿ tã nàni Juaá, te ndi ndúú cue téé-áⁿ cúú-güedé déhe té Zebèdeú.

³ Te tnàhá té Lìpé xíca cùu ndihi-gá, ndihí té Bartolómé, ndihí té Mǎxí, ndihí té Mátèú téé cùu cobradór impuéstú ní cùu, ndihí té Jàcobó déhe té Àlfèú, ndihí té Lèbeú téé dãnani-güedé Tàdeú,

⁴ ndihí té Xímú téé ní cundihí cue téé canànístá, ndihí té Jüdás Iscàrioté téé ní sáá

nduu ñí sáha cuendá ñáhá xii Jèsús núú cuè téé cùu úhú iní ñáhá xii-gá.

Jèsús téndàha-gá ndi ùxúú cue téé xica cuu ndihí-gá quihíⁿ-güedé cáháⁿ-güedé tnúhu-gá núú ñáyi

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gã xii ndi ùxúú cue téé xica cuu ndihí-gá sá quihíⁿ-güedé cáháⁿ-güedé tnúhu-gá núú ñáyi, te cùmání-gã caca-güedé quihíⁿ-güedé, te ní xáhaⁿ-gã xii-güedé:

—Na càchí tnúhu-í xii-ndo sã méé-ní ñúú núú xíndecu cue ñáyi isràél quihíⁿ-ndó cáháⁿ-ndó tnúhu-í, te vá quihíⁿ-ndó ñí ìíⁿ ñúú yíndèhu distritú Sàmariá, te ní vá quihíⁿ-ndó dàva-gá ñúú núú xíndecu ñáyi ñá túú cùu ñáyi isràél. Te cue ñáyi isràél-áⁿ cúu-yu dàtná cue mbéé cue quiti ní xíta chi ta xíta nihnú-yu cuáháⁿ.

⁷ Te cúñaha-ndo xii-yu sá sã ní cuyatni nduu ndíhu ndaha ñaha Yá Ndiöxí xií-yu.

⁸ Te cada tátna-ndo nchàa ñáyi cuhú cuèi ñáyi tnàhá cuèhé sã dátèhyú nihnu-xi yiqui cùñú-yu, te queñuhu-ndo nchàa espíritú cündihí yucu ñávãha yìhi ñaha xii ñáyi, te dandòto-ndo cue ñáyi sa ní xíhí, te vá cácaⁿ-ndó yãhu-ndo núú ñáyi òré cada-ndo nchàa chiuⁿ-áⁿ, chi sa nàha-ndo sá dícó ducaⁿ ñí taxi-í tnúhu ndee iní ndécú ndihí-ndo.

⁹ Te vá cánèhe-ndo díhúⁿ cuu ichi-ndo,

¹⁰ te ní vá cánèhe-ndo ñunu cuhuⁿ ndachiuⁿ-ndo, te ní vá cánèhe-ndo ìngá ichi dóó-ndó nàdáma-ndo, te ní vá cánèhe-ndo úú-gá chàú-ndó chi diu-ni chàú yíhí-ndó-áⁿ xíáⁿ-ni quihí-ndo, te ní vá cánèhe-ndo tatnu, te ducaⁿ càda-ndo chi nchòhó sa nàha-ndo sá ncháá ñáyi quide chiuⁿ te diu-ni cuendá chiuⁿ quidè-yu nihí-yu sá xéxí-yu.

¹¹ Te ndi tnàhá ñúú ná quèxio-ndo te nducu-ndo ñáyi cùtnuní iní-ndó sã cúu-yu ñáyi váha, te vehe ñáyi-áⁿ cundecu-ndo ndéé sáá nduu ndèe-ndo ñúú-áⁿ.

¹² Te òré quèxio-ndo vehé-yu te cúñaha-ndo xii-yu: “Yá Ndiöxí chíndèe chítúu ñaha-gã xii-ndo ndècu-ndo”, duha cúñaha-ndo xii-yu.

13 Te núu ní cáháⁿ váha ndihi ñàhá-yu xii-ndo, te cuu-xi sá váha sá cúu-xí-yu cuendá tnúhu ní xáhaⁿ-ndo-ãⁿ, dico núu ñá túú ní cáháⁿ váha ndihi ñàhá-yu xii-ndo, te cúñaha-ndo xii-yu sá vã cúu-xí sá váha xii-yu tnúhu ní xáhaⁿ-ndo-ãⁿ.

14 Te núu ní sáá-ndó ìⁿ ñuú àdi ìⁿ vehe, te núu ñá túú ní cáháⁿ ndihi ñaha váha-yu xii-ndo te ni ñà túú ní cuini-yu cund-edóho-yu tnúhu cáháⁿ-ndó te ndee-ndo ñùú-áⁿ àdi vehe-áⁿ, te naquidi-ndo tícá chúhmá ñí tní sáhá-ndó cuendá ná cùtnuní iní-yu sá ñà túú quide váha-yu.

15 Te na càchí tnúhu ndáá-í xii-ndo sã sáá nduu te ío-gá dandóho ñaha Yá Ndióxi xii ñáiyu ducaⁿ na càda ñaha xii-ndo-áⁿ dàcúúxí ñáiyu ní xíndecu ñuú Sòdomá ndihi ñuú Gòmorrá.

Ndoho tnahá-ó cùndecu-o ichi Xítoho Jesu-crístú

16 "Te cada iní-ndó sã cúu-ndó dàtná cue mbéé cue quiti cuáháⁿ núu ío yíhí. Te ducaⁿ sãtnahá-xi cùu-ndo chi yúhú tendaha ñaha-í xii-ndo quíhíⁿ-ndó núu xíndecu cue ñáiyu cuihna iní-xi, te ío váha cuáha-ndo cuendá nàcuáa cada-ndo dàtná quidé cõó, dico cunduu váha iní-ndó ñà túú ñà cada-ndo dàtná quidé lõmá.

17 Te quíhi iní-ndó chi cue ñáiyu na cùu úhú iní ñáhá xii-ndo, te cuáha cuendá ñáhá-yu xii-ndo núu cuè téé cùchiuⁿ, te caniha-güedé xii-ndo xítí veñúhu-güedé.

18 Te dava tucu ñáiyu cuu úhú iní ñáhá xii-ndo candeca ñáhá-yu xii-ndo quíhíⁿ núu cuè téé cùnuu yíndaha nacióⁿ, àdi núu dàva-gá cue téé cùnuu sá cuendá-í. Te nchòhó níhí-ndó nàcuáa cada-ndo cáháⁿ váha-ndo cuendá-í núu-güedé ndihi núu cuè ñáiyu ñá túú cùu ñáiyu isràél.

19-20 Dico òré cuáha cuendá ñáhá-yu xii-ndo núu nchàa cue téé-áⁿ, te vá cání iní-ndó núu nása cunduu tnúhu cáháⁿ-ndó núu-güedé, chí òré-ñá te níhí-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chí mee Espíritú Yá Ndióxi Yáá cúu Tátá-ndó dàcahú iní ñáhá-xi xii-ndo nacuáa cunduu tnúhu cáháⁿ-ndó.

21 "Te dava cue téé cuáha cuendá-güedé ñaní-güedé núu cuè téé cùchiuⁿ cuendá cahni ñaha-güedé, te dava cue téé cùu tátá ñu-ni ducaⁿ càda-güedé déhe-güedé, te

ñu-ni ducaⁿ càda ñaha dava cue ñáiyu cùu déhe xii tãtã-yu ndihi ñànã-yu, chí cuáha cuendá ñáhá-yu núu cuè téé cùchiuⁿ cuendá cahni ñaha-güedé xii-yu.

22 Te nchòhó chi nchaa ñáiyu ngüíta-yu cuu úhú iní ñáhá-yu xii-ndo sã cuendá-í. Te núu na càda ndee-ni iní-ndó càncicúⁿ nihnu-ni-ndo ìchi-í cuèi nãndí sá ná càda ñáhá-yu xii-ndo ndéé ná sáá nduu vã cùndecu-gá-ndó ñùuyú-a ña, te nduu táhú-ndó cùndecu-ndo ni caa ni quíhíⁿ ndihi Yá Ndióxi.

23 Te núu ìⁿ ñuú cuini-güedé tñii ñaha-güedé xii-ndo càda úhú ñáhá-güedé sã cuendá-í, te cunu-ndo núu-güedé quíhíⁿ-ndó ìngá ñuú. Te na càchí tnúhu ndáá-í xii-ndo sã cùmání-gã quíhíⁿ-ndó nchàa dava-gá ñuú núu xíndecu ñáiyu isràél cáháⁿ-ndó tnúhu-í, te sa quixi tucu yúhú, Téé cùu ñaní tnahá-ndó nchàa-ndo ñuyú-a.

24-25 "Te nchòhó xini-ndó sã ñi ìⁿ téé dàcuaha ñá túú cùnuu-dé dàcúúxí mèstrú-dé, te núu mèstrú téé-áⁿ nãndí yãha-dé ndécú-dé te tàú-dé nduu vétú iní-dé te núu tnahá-dé yãha-dé dàtná yãha mèstrú-dé-áⁿ. Te ñu-ni ducaⁿ sãtnahá tucu-xi cùu ìⁿ téé xinu cuechi, chí ñá túú cùnuu-dé dàcúúxí pãtróóⁿ-dé, te nchaa sá yãha pãtróóⁿ-dë-áⁿ te tàú-dé nduu vétú iní-dé te núu tnahá-dé yãha-dé dàtná yãha pãtróóⁿ-dë-áⁿ. Te núu yúhú Yáá táxi tnùní ñáhá xii-ndo cachí-yu sá cúu-í sácuihná, te uuⁿ-gá ducaⁿ cññáhá-yu xii nchòhó cue téé cùndihí-í.

Vá yùhú-ó cuendá nchaa sá cáda ñaha ñáiyu xii-o

(Lc. 12:2-7)

26 "Te nchòhó vá yùhú-ndó núu ñáiyu. Chi nchaa tnúhu sá cúu yùhu ni cuu vá cúu yùhu-gá, chí nchaa dacuítí sã quée túu-xi núu ñáiyu.

27 Te nchaa tnúhu sá càchí tnúhu-í xii-ndo núu méé núu ìⁿ-ó, cùu-xi tnúhu sá ndúú yùhu ni cuu datúu-ndo núu cuè ñáiyu cuèi núu chítú núu tàcá.

28 Te xini ñuhu-xi sá vã yùhú-ndó cuè ñáiyu cuèi na cahni ñáhá-yu xii-ndo, chí ñu-ni yiqui cùñú-ndó ndacú-yu cahni-yu, dico ñá túú ñágá ndacú-yu cada ñáhá-yu xii-ndo. Te tàú-ndó sã Yá Ndióxi yùhú-ndó chí Yáá-áⁿ ndacu-gá danàa-gá yiqui

cũnú-ndó, te ndacu-gá daquihíⁿ ñáhá-gă xii-ndo núú ùhú núú ndàhú.

²⁹ Te nchòhó xìní-ndó sã ndèé úú tnàhá tĩlaá cùyãhu-di núú ìíⁿ-ní dǐhúⁿ, te ni ìíⁿ-di ñá túú xihí cùtexínu-di chi ndéé núu mee Yã Ndiõxí Yaá cúú Tãtã-ndó ná càchí-gá te xihí-di.

³⁰ Dico nchòhó chi ío-gá néhé cuèndá ñáhá Yã Ndiõxí xii-ndo chi ndéé idi díquí-ndó yĩndehu.

³¹ Núu xiãⁿ càchí-í sá vã yùhú-ndó chi cùnuu-gá-ndó dàcúúxí tĩlaá cuèi vãi vihi-güedi.

Nchaa ñáyiu dàtúu núú tnàha ñáyiu-xi sá ndécú ndihí-yu Xitohó Jesucristú
(Lc. 12:8-9)

³² Te na càchí tnúhu-í xii-ndo sã ncháá ñáyiu na dàtúu núú tnàha ñáyiu-xi sá ndécú ndihí ñáhá-yu xii-í, te ducaⁿ te tnàhá yúhú dàtúu-í núú Tãtã-í Dútú Ndiõxí Yaá ndécú àndiu sá ndécú ndihí-í-yu.

³³ Dico nchaa ñáyiu na cũñaha xii tnaha ñáyiu-xi sá ñà túú ndècu ndihí ñáhá-yu xii-í, te diu-ni ducaⁿ càda yúhú tucu chi cũñaha-í xii Tãtã-í Dútú Ndiõxí Yaá ndécú àndiu sá ñà túú ndècu ndihí-í-yu.

Ñá túú cùu ìíⁿnuu ñáyiu
(Lc. 12:51-53; 14:26-27)

³⁴ Te na càchí tnúhu-í xii-ndo sã vã cání iní-ndó sã yúhú véxi-í ñuyúú-a te cuu ìíⁿnuu-gã ñáyiu cundecú-yu, chi da ngũta-yu vã cúú ìíⁿnuu-gá-yu cundecú-yu, te ducaⁿ chi nchaa ñáyiu vã quĩndáá iní ñáhá xii-í ñáyiu-áⁿ ngõo-yu cuu úhú iní-yu nchaa ñáyiu quĩndáá iní ñáhá xii-í.

³⁵ Te dava cue téé xĩndecu tãtã-xi te ngóo-güedé cuu úhú iní-güedé tãtã-güedé, te diu-ni ducaⁿ càda cue ñáyiu dǐhí xĩndecu nãná-xi, chi ngóo-yu cuu úhú iní-yu nãná-yu, te diu-ni ducaⁿ càda tucu cue ñáyiu cùu sãnu, chi ngóo-yu cuu úhú iní-yu nãná yíí-yu.

³⁶ Te ndi mèé-yu vehé-yu ngóo-yu vã cúú ìíⁿnuu-gá-yu cundecú-yu.

³⁷ Te na càchí tnúhu tucu-í xii-ndo sã ncháá ñáyiu ío-gá ná cùu iní tãtã-xi àdi nãná-xi dàcúúxí yúhú, te ñáyiu-áⁿ ñà túú tàú-yu cundecu ndihí ñáhá-yu xii-í, te nchaa ñáyiu ío-gá ná cùu iní déhe ducuⁿ-xi, àdi déhe yoco-xi dàcúúxí yúhú, te diu-ni

ducaⁿ ñà túú tàú-yu cundecu ndihí ñáhá-yu xii-í.

³⁸ Te nchaa ñáyiu vã cãncǐcúⁿ nihnu ñaha xii-í cuèndá sá yùhú-yu ndohó-yu dàtná ndoho-í ñáyiu-áⁿ ñà túú tàú-yu cundecu ndihí ñáhá-yu xii-í.

³⁹ Te cue ñáyiu na yùhú cuú sá cuèndá-í te ñáyiu-áⁿ cuíta nihnú-yu, dico nchaa ñáyiu vã yùhú cuú sá cuèndá-í, te ñáyiu-áⁿ nduu táhũ-yu cundecú-yu ni caa ni quíhíⁿ ndihí Yã Ndiõxí.

Cuèndá sá ndúú tãhú-ó
(Mr. 9:41)

⁴⁰ Te nchaa ñáyiu na quèheⁿ cuendá ñáhá xii-ndo te cada iní-yu sá tnàhá yúhú ní queheⁿ cuèndá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tnàhá Tãtã-í Dútú Ndiõxí Yaá ní tendaha ñaha xii-í véxi-í ñuyúú-a ní queheⁿ cuèndá-yu.

⁴¹ Te nchaa ñáyiu na quèheⁿ cuendá ìíⁿ téé càháⁿ tnúhu Yã Ndiõxí cuèndá sá quídé-dé chiuⁿ-gá, te dàtná-ni càa táhú cuãñaha-gã nduu táhú téé ducaⁿ càháⁿ tnúhu-gá-áⁿ, diu-ni ducaⁿ cùnduu táhú cuãñaha-gã nduu táhú ñáyiu ducaⁿ na quèheⁿ cuendá ñáhá xii-dé. Te nchaa ñáyiu na quèheⁿ cuendá ìíⁿ téé quíde váha cuèndá sá dúcáⁿ quíde váha-dé, te dàtná-ni càa táhú nduu táhú téé-áⁿ diu-ni ducaⁿ cùnduu táhú nduu táhú ñáyiu na quèheⁿ cuendá ñáhá xii-dé.

⁴² Te nchaa ñáyiu na cuãñaha ìíⁿ yaxiⁿ ndute coho ìíⁿ ñáyiu cùu cuendá-í cuèndá sá nĩ tuha ñáhá-yu xii-í cuèi ñá túú cùnuu vihi-yu, te ñáyiu ducaⁿ na cuãñaha ndùte-áⁿ nĩhĩ-yu sá ndúú tãhũ-yu núú Yã Ndiõxí – càchí Jèsús xãhaⁿ-gã xii-güedé.

11

Jèsús càháⁿ ndihí-gá cue téé xica cuu ndihí té Juáá

(Lc. 7:18-35)

¹ Te sátá nĩ yáha ducaⁿ nĩ xáhaⁿ Jèsús xii ndi ùxúú cue téé xica cuu ndihí-gá, te ní xica-gá cuáháⁿ-gá nchaa ñuú cáá yãtni xiáⁿ dánèhé-gá ñáyiu tnúhu-gá.

² Te té Juáá yíhí-dé vecaá te ní níhí-dé tnúhu nchaa nãcuáa quíde Xitohó Jesucristú. Te sátá dúcáⁿ te ní tendaha-dé ìíⁿ úú

cue téé xica cuu ndihi-dé cuáháⁿ-güedé núú ndécú Jèsús.

³ Te òré ní quexìo-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ tē Juáá xii-güedé, te xãhaⁿ-güedé xii-gá:

—Véxi-ndí xicáⁿ tnúhú-ndí núú-n ñuu sá díú-n cùu-n Cristú Yaá ní tendaha Yã Ndiöxí véxi ñuyíú-a, àdi sá cündètu nahi-ni-ndí mei Yáá-áⁿ —càchí-güedé xãhaⁿ-güedé xii-gá.

⁴ Te Jèsús ní xáhaⁿ-gã xii-güedé:

—Chí cuánuhú te cani-ndo cuèndú núú tē Juáá nchaa sá ñi xini-ndó quide-í, ndihi nchaa nàcuáa ndùu tnúhu ní cáháⁿ-í ní xindedóho-ndo.

⁵ Te cúñaha-ndo xii-dé sá quidé tãtna-í núú cuè ñáyiú cuáá, te quide tãtna-í cue ñáyiú yacua, ndihi cue ñáyiú tnàhá cuéhé sã dátèhyú nihnu-xi yiqui cùñú-yu, ndihi cue ñáyiú doho, nchaa ñáyiú-áⁿ quidé tãtna-í, te ndũha-yu, te ndéé tnàhá cue ñáyiú sa ní xihí dándòto-í cúñaha-ndo. Te cúñaha tucu-ndo xii-dé sá ndècuu-í dánèhé-í nchaa ñáyiú ndàhú, tnúhu sá sánú ichi ñaha xii-yu nàcuáa naníhí tàhú-yu.

⁶ Te cúñaha tucu-ndo xii-dé sá ìo váha táhú nchaa ñáyiú ñá túú quide sáa iní-xi nchaa tnúhu càháⁿ-í, duha cúñaha-ndo xii-dé —càchí-gá xãhaⁿ-gã xii-güedé.

⁷ Te sátá ñi yáha-güedé cuánuhú-güedé te ní ngüíta Jèsús ní cáháⁿ-gá núú ñáyiú cuèndá tē Juáá, te xãhaⁿ-gã xií-yu:

—Nchòhó ní sáháⁿ ndéhé-ndó ñiⁿ téé ndècu xití yucu, te téé-áⁿ ñà túú sàni ñiⁿ sàni úú iní-dé, chi ñá túú quide-dé dàtná quidé nchaa ité nahnú cuáháⁿ-xi duha cuáháⁿ-xi dàcáⁿ òré quéné tãchí.

⁸ Te ñi ñà túú ní sáháⁿ ndéhé-ndó ñiⁿ téé nihnu dóó vãha dóó vii càa. Te nchòhó xini-ndó sã ncháá ñáyiú nihnu dóó vãha dóó vii càa xindécú-yu vehe cue téé cùnuu yìndaha ñáyiú.

⁹ Dico nchòhó chi ní sándéhé-ndó ñiⁿ téé càháⁿ tnúhu Yá Ndiöxí, te ndáá sá díú ñiⁿ téé càháⁿ tnúhu-gá cúú-dé, te cùnuu-gá-dé dàcúúxí dàva-gá cue téé càháⁿ tnúhu-gá.

¹⁰ Te ñi cuèndá tē Juáá-áⁿ càháⁿ-xi núú tütú Yã Ndiöxí nàcuáa ní xáhaⁿ-gã xii Cristú, te duha ní xáhaⁿ-gã:

Tendaha-í ñiⁿ téé cáháⁿ-dé tnúhu-í codonùu-dé núú-n,

cuèndá dàtúha-dé ñáyiú cuèndá quíndáá iní-yu tnúhu-n.

Duha ní xáhaⁿ-gã, te ducaⁿ ñi ngódó tnùní núú tütú-gá.

¹¹ Te na càchí tnúhu ndáá-í xii-ndo sã ñi ñiⁿ cue téé ñuyíú-a ñá túú cùnuu-güedé dàtná cùnùu tē Juáá tē dàcuandute ñaha xii ñáyiú. Te nchaa ñáyiú sa ta ndĩhu ndaha ñaha Yá Ndiöxí vitna cuáháⁿ cùnùu-gá-ni tucú-yu dàcúúxí tē Juáá cuèi cùu-yu ñáyiú ñá túú cùnuu dacúúxí dàva-gá ñáyiú yìndaha-gá.

¹² Te ndéé cùtnàhá ní ngüíta tē Juáá tē dàcuandute ñaha xii ñáyiú càháⁿ-dé tnúhu Yá Ndiöxí ñuyíú-a, ndéé dàvá-áⁿ ñi ngüíta ñáyiú cuini-yu sá ndĩhu ndaha ñaha Yá Ndiöxí xií-yu te ndùcu ndéé-yu quidé-yu nàcuáa ndĩhu ndaha ñaha-gá xií-yu.

¹³ Te nchaa cue téé ní xóo cáháⁿ tnúhu Yá Ndiöxí ndéé sanaha ñi cáháⁿ-güedé sá díú-gã ndĩhu ndaha-gã cue ñáyiú, te ñi-ni ducaⁿ ñi cáháⁿ tucu ndí Moisés ní ngódó tnùní núú tütú ndí. Te ñi-ni ducaⁿ cùnuu nchaa tnúhu-áⁿ càháⁿ-xi nàcuáa ndĩhu ndaha Yã Ndiöxí ñáyiú ndéé ní sáa nduu ñi ngüíta tē Juáá càháⁿ-dé tnúhu-gá ñuyíú-a.

¹⁴ Te na càchí tnúhu-í xii-ndo sã cáda cuèndá-ndó, chí núú tütú Yã Ndiöxí càchí-xi sá ndíxí tē Èliás, te ñi núú tē Èliás-áⁿ ñi quide tē Juáá.

¹⁵ Te nchaa nchòhó ñáyiú ndèdóho nchaa tnúhu càháⁿ-í-a te ìo váha chí cuáha cuèndá.

¹⁶ Te na càchí tnúhu tucu-í xii-ndo nàcuáa sãtnahá-xi cùu ñáyiú ndècu vitna. Chí ñáyiú-áⁿ cúú-yu dàtná cue landú sácòo núú yãhu dàdiqui-güexi te níhi càháⁿ-güexi, te xitnàha-güexi ndi mee landú-güexi:

¹⁷ “Ní tiú-ndí yaá ndihi vïlu te ñá túú ní cuini-ndó càta-ndo. Te ìo yica iní ní xita yuhu-ndí te ñá túú ní ndãhyú-ndó”, càchí-güexi xitnàha-güexi. Te ducaⁿ sãtnahá-xi cùu ñáyiú ndècu vitna,

¹⁸ chí tē Juáá ìo ndàhú ní xóo caxi-dé, te ñi ñà túú ní xóo coho-dé ndudí ndéhé yoho yãha stilé sã ní nduu-xi ndidí, te sá dúcáⁿ ñi xóo cada-dé te ní cachí-yu sã ñi xindecu ndihi-dé espíritú cündihí yucu ñávãha.

¹⁹ Te sátá ñi quexìo yúhú Téé cùu ñani tnàhá-ndó nchaa-ndo, te xèxi-í xihí-í quidè-í, te càchí-yu sã yúhú cúú-í ñiⁿ téé xèxi vihi te xihí vihi, te càchí tucú-yu sã cúú-í téé

xìca cuu ndihi cue tée cuihna ìní-xi quide cobrá ñáhá xii-yu cuendá impuèstú ndihi nchaa dava-gá cue tée ndècu ichi cuehé ichi duha, duha càchí-yu. Te ñáiyu ní tnahá tnúhu ndihi Yá Ndiöxí, ñáiyu-án quidè-yu sá váha nàcuáa cutnùnì sá mée-gã ío ndècu ndihi-gá sá xìnì tnùnì-gá —càchí-gá xãhaⁿ-gã xii-yu.

Cuendá ñáiyu dava ñuú ñá túú sàndáá ini tnúhu Xítóhó Jesucristú

(Lc. 10:13-15)

²⁰ Te Jèsús ní ngüíta-gá càháⁿ-gá dóho nchaa ñáiyu ñuú núú ío-gá vai núú sã vã yõo tnàhí ndàcu cada ní quide-gá, chi nchaa ñáiyu ñuú-án ñà túú cuiní-yu ndixi túu iní-yu sá ñà túú quide váha-yu ndècú-yu, te xãhaⁿ-gã xii-yu:

²¹ —¡Ndàhú nchòhó cue ñáiyu ñuú Coràzín! ¡Te ndàhú nchòhó cue ñáiyu ñuú Bètsaidá! Chi núu dícó ñuú Tìrú ndihi ñuú Sidón ní quide-í nchaa sá vã yõo tnàhí ndàcu cada datná ní quide-í ñuú-ndó-á ní xìnì-ndó ñá, te sá ndéé ama-gá cuhnú-yu dóo ndàhú te cunu cóo-yu núú yáa cuendá sá ndíxí cuèchi iní-yu sá ñà túú quide váha-yu ni cùu.

²² Dico sáa nduu te ío-gá dandòho ñaha Yá Ndiöxí xii-ndo dàcúxí ñáiyu ñuú Tìrú ndihi ñáiyu ñuú Sidón.

²³ Te nchòhó cue ñáiyu ñuú Capèrnaúm ío quide cahnu-ndo mee-ndo, te quide iní-ndó sã sã cuándaa-ná-ndó àndiu, dico ñáhá chi núú ùhú núú ndàhú nduu táhú-ndó cùndecu-ndo. Te núu dícó ñuú Sòdomá ní quide-í nchaa sá vã yõo tnàhí ndàcu cada datná ní quide-í ñuú-ndó ní xìnì-ndó ñá, te ñáiyu-án vã náa-yu chi cundecu-ní-yu ndéé vitna ni cùu.

²⁴ Te na càchí tnúhu-í xii-ndo sã sã nduu te ío-gá dandòho ñaha Yá Ndiöxí xii-ndo dàcúxí ñáiyu ñuú Sòdomá —càchí-gá xãhaⁿ-gã xii nchaa ñáiyu ñuú-án.

Jèsús cuiní-gá sá túhá ñaha ñáiyu xii-gá
(Lc. 10:21-22)

²⁵ Te sátá xiãⁿ te Jèsús ní ngüíta-gá càháⁿ ndihi-gá Tãtã-gã Dútú Ndiöxí, te xãhaⁿ-gã:

—Yòhó Tãtã-í Dútú Ndiöxí, ío chĩñuhu ñaha-í xii-n chi ñuú-ndó tãxi tnùnì-n àndiu ndihi ñuyú-a, te dànehé-n cuè ñáiyu nchaa tnúhu váha, te ñuú-ndó ñáiyu-án cúu-yu ñáiyu ñá túú cùtnunì iní-xi nchaa tnúhu càháⁿ cue

tée càchí sá ío túha, te nchaa tnúhu váha-án ñà túú dàtúu-n núú ñáiyu càchí sá ío túha te ío váha sãa díquí-xi.

²⁶ Chi ducaⁿ cuiní-n cùnduu —cachí-gá xãhaⁿ-gã xii Tãtã-gã.

²⁷ Te xãhaⁿ-gã xii nchaa ñáiyu xĩndecu-án: —Mee Tãtã-í Dútú Ndiöxí ní cachí-gá sá cùnùu-í núú nchàandi túhú sá ío. Te vá yõo ñuú-ndó xìnì nàcuáa sàni iní yúhú Déhe Dútú Ndiöxí, chi ñuú-ndó dícó ní mee-gã xìnì-gá nàcuáa sàni iní-í, te mee-í xìnì-í nàcuáa sàni iní mée-gã. Te nchaa ñáiyu càchí iní-í sá quiní-yu nàcuáa sàni iní Tãtã-í Dútú Ndiöxí te xĩtnúhu-í-yu, te vá yõo ñuú-ndó xìnì chi ñuú-ndó ñáiyu ducaⁿ xĩtnúhu-í-án xìnì-yu.

²⁸ Te nchaa nchòhó ñáiyu ñá túú ndècu váha, ñáiyu ñá túú ñihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cùndecu váha iní-ndó.

²⁹ Te cuu vii cuu váha iní-ndó tnè-ndo nchaa tnúhu càháⁿ-í, te ío dacuàha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cùndecu-ndo.

³⁰ Te tnè-ndo nchaa tnúhu càháⁿ-í chi ñá túú cùu-xi ñuú sá vèe, chi cada iní-ndó sá cúu-xi datná ñuú chiuⁿ ñamá —càchí-gá xãhaⁿ-gã xii-yu.

12

Cue tée xìca cuu ndihi Jèsús sàhnú-güedé yoco triú nduu ndètatú ñáiyu

(Mr. 2:23-28; Lc. 6:1-5)

¹ Te ñuú nduu cùu-xi nduu ndetatú ñáiyu ñuú Jèsús ichi ndihi cue tée xìca cuu ndihi-gá, te ta yãha-gá ndihi-güedé ñuú xichi núu cáá triú te xixíhí-güedé docó núu xiãⁿ ní ngüíta-güedé sàhnú-güedé yoco triú-án, te ndihi ndaha-güedé quíⁿ-güedé quée triú-án tá xèxi-güedé cuáháⁿ.

² Te cue tée cùu fariséu ní xìnì-güedé nàcuáa quide cue tée xìca cuu ndihi Jèsús, núu ní xãhaⁿ-güedé xii-gá:

—¿Ná cuendá ducaⁿ quide cue tée xìca cuu ndihi-n sahnú-güedé yoco triú, te vitna cùu-xi nduu ndetatú-í? Te ñá túú táu-güedé ducaⁿ càda-güedé —càchí-güedé xãhaⁿ-güedé xii-gá.

³ Te Jèsús ní xãhaⁿ-gã xii-güedé:

—¿Náa ñá túú dàcuaha-ndo núu tütú Yá Ndiöxí núu càháⁿ-xi nàcuáa ní quide ndí

Dàvíí cútnàhá ní xíhí ndíi docó ndihí cue téé ní xica cuu ndihí ndíi-ǎⁿ?

⁴ Chi ndíi-ǎⁿ nǐ quíhu ndíi vehe Yá Ndiöxí ní queheⁿ ndíi pàá ní cuu íí ndécú-ǎⁿ nǐ xexi ndíi ndihí cue téé ní xica cuu ndihí ndíi, te ñá túú tàù ndíi sá dúcáⁿ càda ndíi ndihí cue téé-ǎⁿ ní cùu, chi mee-ni cuè dútú tàù-güedé caxi-güedé pàá-ǎⁿ ní cùu.

⁵ ¿Te náa ñá túú xìní-ndó nàcuáa càháⁿ-xi núú tütú ndíi Moisés sá ncháá cuè dútú vǎ ndétatú-güedé nduu cùu-xi nduu ndetatú-ǎⁿ? Te ñá díú ìⁿ cuéchi cùu-xi sá dúcáⁿ ñà túú ndétatú-güedé nduu cùu-xi nduu ndetatú.

⁶ Te na càchí tnúhu-í xii-ndo sǎ yǔhú cùu-í téé ío-gá cúnùu ndecu ndihí-ndo dacúxí veñúhu sá ìo cùnùu.

⁷ Dico nchòhó chi ñá tècú tnùní-ndó nàcuáa càháⁿ Yá Ndiöxí núú tütú-gá núú càchí-xi: “Yúhú cuìní-í sá cúnđàhú iní-ndó cuè tnaha ñáyíu-ndo te ñá díú mèe-ni sá cáhni-ndó quítí nduu táhù-í”, duha càchí-gá núú tütú-gá. Te núú dìcò nchòhó tècú tnùní-ndó ñá, te vǎ càháⁿ cuèhé-ndó cuendá nchaa ñáyíu ñá túú ndècu cuéchi-xi.

⁸ Te yúhú Téé cùu ñaní tnáhá-ndó nchàa-ndo, tnàhá-í ndécú ndihí-í tnúhu ndee ìní sá cùu-í nchaa ñáyíu nàcuáa cadá-yu nduu ndétatú-ó-á —càchí-gá xǎhaⁿ-gǎ xii-güedé.

*Ìⁿ téé ní yíchí ìⁿ xio ndaha-xi
(Mr. 3:1-6; Lc. 6:6-11)*

⁹ Te Jèsús ní xica-gá cuáháⁿ-gá, te cuánguìhu-gá xití ìⁿ veñúhu.

¹⁰ Te xíáⁿ ndécú ìⁿ téé ní yíchí ìⁿ xio ndaha-dé. Te daya cue téé xíndecu-ǎⁿ ndúcú-güedé nàcuáa cada-güedé cacáⁿ cuéchi-güedé cuendá-gá núú cuè téé cùnùu, te ní xícáⁿ tnúhú-güedé núú-gǎ, te xǎhaⁿ-güedé:

—Cachí tnúhu xii-ndí nǔu cuu cada tátna-o ìⁿ téé cùhú nduu cùu-xi nduu ndetatú-ó ǎⁿ ñáhá —càchí-güedé xǎhaⁿ-güedé xii-gá.

¹¹ Te Jèsús ní xǎhaⁿ-gǎ xii-güedé:

—Te nchòhó òré ná ngàunihnu ìⁿ mbéé-ndó ìⁿ déhvá cùnùu te nàtava-ndo-di cuéi cùu-xi nduu ndetatú-ó.

¹² Te ìⁿ ñáyíu ío-gá cúnùú-yu dàcúxí ìⁿ mbéé, núú xíáⁿ tàù-ó sǎ cadá-ó sǎ vǎha sá

cúu-xí-yu cuèi cùu-xi nduu ndetatú-ó —càchí-gá xǎhaⁿ-gǎ xii-güedé.

¹³ Te dǎtnùní ní xǎhaⁿ-gǎ xii téé cùhú ndaha-xi-ǎⁿ:

—Ndacani ndaha-n —càchí-gá xǎhaⁿ-gǎ xii-dé.

Te téé-ǎⁿ nǐ ndacani-dé ndaha-dé, te òré-ni ní ndúha ní nduu-xi dǎtná cáá ìngá xio ndaha-dé.

¹⁴ Te cue téé cùu fariséú ní ndee-güedé xití veñúhu, te ní ngúita-güedé ndátnúhu-güedé nǔu nása cada-güedé cahni-güedé Jèsús.

Nàcuáa sa ndéé tnuní cuendá Jèsús

¹⁵ Te sátá nǐ cutnùní iní Jèsús nàcuáa cuìní-güedé cada ñaha-güedé xii-gá te ní xica-gá cuáháⁿ-gá, te ío vǎi ñáyíu nchìcúⁿ ñáhá xii-gá cuáháⁿ, te tnàhá cue ñáyíu cùhú nchìcúⁿ ñáhá xii-gá cuáháⁿ, te ní quide tátna-gá cue ñáyíu-ǎⁿ.

¹⁶ Te ní xǎhaⁿ-gǎ xii-yu sá vǎ càháⁿ-yu yoo cùu-gá.

¹⁷ Te ducaⁿ nǐ cuu chi ní quee ndáá-xi nàcuáa ní xǎhaⁿ Yá Ndiöxí xii ndíi Chàíá téé ní xóo càháⁿ tnúhu-gá ndéé sanaha nǐ chídó tnùní ndíi núú tütú-gá, te duha nduu tnúhu ní xǎhaⁿ-gǎ:

¹⁸ Téé-a cùu-dé téé ní sani iní-í sá cúnú cuéchi-dé núu-í,

te ío cùu iní-í-dé, te cùdíí iní-í-dé.

Te yúhú cuáñaha-í Espiritú-í cundecu ndihí-dé,

te diu-dé cúñaha-dé xii nchaa ñáyíu ñuyíú sǎ yǔhú ío ndáá quidè-í.

¹⁹ Te vǎ dácàá-dé tnúhu càháⁿ-dé ndihí ñáyíu, te ni vǎ cáná sàa-dé òré càháⁿ-dé,

te ni vǎ yóo níhí tnúhu nása càháⁿ-dé cuhuⁿ-dé ichi.

²⁰ Te ni ñà túú nǎ cada-dé cue ñáyíu cùu datná ìⁿ tnu ndóó sá cuìní-xi tnáhnú, te diu-ni ñáyíu-ǎⁿ cúú túcú-yu dǎtná ìⁿ mèchá càndíl sá ìo quène ñúhmá te cuìní-xi ndahvá.

Te ducaⁿ sǎtnahá-xi cùu ñáyíu-ǎⁿ chi ñá túú níhí ndéé-yu cundecú-yu sá cúú-xi-í, te mee-ni sǎ vǎha cada ñaha-dé xii-yu,

te diu-ni ducaⁿ càda-dé ndéé sáá nduu cùtnuní iní nchaa ñáyíu sá ìo ndáá quidè-dé.

21 Te nchaa ñáyiú ñihí ñuyúú ïo cundee cùu cahnu iní ñáhã-yu xii-dé.
Duha ní xáhaⁿ-gã xii ndí Chàíá ní chídó tnùní ndí nùú tütú-gá.

Càchí-güedé sá ndécú ndíhi Jesús espíritú cündíhi yucu ñávãha

(Mr. 3:20-30; Lc. 11:14-23; 12:10)

22 Te ní quexìo ìⁿ úú cue téé nùú ndécú Jèsús, te ndèca-güedé ìⁿ téé ñihí te cuàá-dé, te yìhi ñaha espíritú cündíhi yucu ñávãha xii-dé, te Jèsús ní queñuhu-gá espíritú cündíhi yucu ñávãha yìhi ñaha xii-dé, te òré-ni-áⁿ ñí cuu ní nacáhãⁿ-dé te ní ndúha nùú-dé.

23 Te nchaa ñáyiú xíndecu-áⁿ ïo ní cuñúhu-yu sá dúcáⁿ ñí quide-gá, te ní xítñahá-yu:

—Váa téé-a cùu-dé ñaní tnáhã ndí Dàvíí téé tendaha Yã Ndiòxí quixi ñuyúú-a — càchí-yu xítñahá-yu.

24 Te cue téé cùu fariséú ní tecú dóho-güedé nàcuáa ndùu tnúhu xítñahá-yu, nùú xíãⁿ ní xítñaha-güedé:

—Téé-a ndèñuhu-dé nchaa espíritú cündíhi sácuíhná yíhi ñaha xii ñáyiú, chi ñu-ni sácuíhná-ãⁿ chíndèe ñaha-xi xii-dé te ñu-ni-xi tàxi tnuní-xi nchaa espíritú-áⁿ — duha ní xítñaha-güedé.

25 Te Jèsús ní cutnùní iní-gá nàcuáa ndùu tnúhu ní xítñaha-güedé, nùú ní xáhaⁿ-gã xii-güedé:

—Te nchòhó xìní-ndó sã nùu ìⁿ téé yíndaha ìⁿ nacióⁿ vá cúú ìⁿnuu-dé ndíhi cue téé cündíhi-dé, te vá cúdñi-dé cunuu-dé. Te ñu-ni ducaⁿ sãtnahá tucu-xi cùu tucu cue téé cùchiuⁿ ìⁿ ñuú, chi nùú vá cúú ìⁿnuu-güedé cundecu-güedé, te vá cúdñi-güedé cundecu-güedé taxi tnùní-güedé. Te ñu-ni ducaⁿ sãtnahá tucu-xi cùu cue ñáyiú xíndecu ìⁿ-ni vèhe, chi nùú vá cúú ìⁿnuú-yu cundecú-yu te vá cúdñi-yu cundecu càhnú-yu.

26 Te nùú sácuíhná ducaⁿ quide-xi queñuhu-xi cue espíritú cündíhi-xi yìhi ñaha xii ñáyiú ña, te ñá túú cùu ìⁿnuu-xi ndecu-xi te nùú ducaⁿ, te vá cúdñi sácuíhná-ãⁿ cundecu-xi taxi tnùní-xi te nùú ducaⁿ quide-xi.

27 Te duha càháⁿ-í chi nchòhó càchí-ndó sã chíndèe ñaha sácuíhná xii-í queñuhu-í

nchaa espíritú cündíhi-xi yìhi ñaha xii ñáyiú. Te nùú yúhú quidé cuendá-ndó sã sácuíhná chíndèe ñaha-xi xii-í, te xìní ñuhu-xi cada cuendá-ndó yòo chindee ñaha xii cue téé xica cuu ndíhi-ndo queñuhu-güedé nchaa espíritú cündíhi yucu ñávãha yìhi ñaha xii ñáyiú. Te mee-güedé càchí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó.
28 Dico yúhú chi Espíritú Yã Ndiòxí chíndèe ñaha-xi xii-í queñuhu-í nchaa espíritú cündíhi sácuíhná yìhi ñaha xii ñáyiú, te sá dúcáⁿ chindee ñaha Espíritú-gá xii-í, xíãⁿ cútnùní sá sà ní sáá nduu cùní-gá ndíhu ndaha ñaha-gá xii-ndo.

29 Te nchòhó xìní-ndó sã cuè ñadúhú chi vá ndácú-güedé cuendá-ni quíhu-güedé duhu-güedé vèhe ìⁿ téé ío ndee, chi díhna-gá xìní ñuhu-xi tñi-güedé téé-áⁿ dacùtu ñaha-güedé xii-dé dãtnùní ducaⁿ te ndacu-güedé duhu-güedé nchaa sá ndécú ndíhi-dé.

30 Te nchaa ñáyiú ñá túú cündíhi ñaha xii-í, te cùu úhú iní ñáhã-yu. Te nchaa ñáyiú ñá túú chindee ñaha xii-í, te dàquee tíhũ-yu chiuⁿ quide-í.

31 Te na càchí tnúhu-í xii-ndo sã ncháá ñáyiú quide nchaa sá cuèhé sá dúhá cuu cada càhnu iní ñáhã Yã Ndiòxí xií-yu, te ñu-ni ducaⁿ cùu cada cahnu iní-gá nchaa tnúhu cuèhé tnúhu duha càháⁿ-yu. Dico cue ñáyiú na càháⁿ úhú cuendá Espíritú-gá, te ñáyiú-áⁿ vã cádá càhnu iní ñáhã tnáhí-gá xií-yu.

32 Te nchaa ñáyiú na càháⁿ úhú cuendá yúhú Téé cùu ñaní tnáhã-yu ncháá-yu, te cuu cada càhnu iní ñáhã Yã Ndiòxí xií-yu. Dico cue ñáyiú na càháⁿ úhú cuendá Espíritú-gá te vá cádá càhnu iní ñáhã tnáhí-gá xií-yu cuèi vitna ndècu vívũ-yu, te cuèi na cùú-yu.

Ndi díⁿ nùú yutnu xìní-ó nã yutnu cùu-xi cuendá sã sãvidí-xi
(Lc. 6:43-45)

33 Te nchòhó xìní-ndó sã ndí díⁿ nùú yutnu xìní-ó nã yutnu cùu-xi cuendá sã sãvidí-xi, te xìní-ó sã ncháá yutnu váha cùuⁿ mee-ni sãvidí váha, dico nchaa yutnu sá ña túú váha te cùuⁿ mee-ni sãvidí sá ña túú váha. Te duha càháⁿ-í cuendá cada cuendá váha-ndo nàcuáa ndùu chiuⁿ quide-ndo

ɨ̃n ɨ̃n-ndo cuendá ducaⁿ cùtnuní ná ñáyi u cùu-ndo.

³⁴ Dico nchòhó cúu-ndó dàtná ɨ̃n cóo dèén chi ío cuihna ìní-ndó, te v́ cáni ìní-ndó sá ndácú-ndó cǎháⁿ-ndó ɨ̃n tnúhu váha, chi ío cuihna ìní-ndó. Te nchòhó xìní-ndó sá ncháá ñáyi u cǎháⁿ-yu náni véxi ìní-yu.

³⁵ Te nchaá ñáyi u váha ìní-xi cǎháⁿ-yu tnúhu váha, chi ñi-ni tnúhu váha-áⁿ ñúhú ìní-yu. Te nchaá ñáyi u cuihna ìní-xi cǎháⁿ-yu tnúhu cuèhé tnúhu duha, chi ñi-ni tnúhu cuèhé tnúhu duha-áⁿ ñúhú ìní-yu.

³⁶ Te na cǎchí tnúhu-í xii-ndo sá ná sáá nduu càda ndáá Yǎ Ndiǒxí cuéchi nchaá nchòhó ñáyi u ndècu ñuyíu-a, te nchaá tnúhu cuèhé tnúhu duha cǎháⁿ-ndó cǎháⁿ-gá sá ñà túú ní quide váha-ndo sá dúcáⁿ ní cǎháⁿ-ndó tnúhu-áⁿ.

³⁷ Te nàcuáa nduu tnúhu ní cǎháⁿ-ndó ɨ̃n ɨ̃n-ndo, te ducaⁿ cǎháⁿ Yǎ Ndiǒxí te núu ndècu cuéchi-ndo àdi ñá túú ndècu cuéchi-ndo. Te núu ñá túú cuéchi-ndo te cǎcu-ndo, dico núu ndècu cuéchi-ndo te v́ cǎcu-ndo —cǎchí-gá xǎhaⁿ-gǎ xii cue téé cùu fariséu-áⁿ.

Cue téé cuini sá cáda Jèsús ɨ̃n sá vǎ yǒo tnàhí ndàcu cada

(Mr. 8:12; Lc. 11:29-32)

³⁸ Te cue téé cùu fariséu, ndihí cue téé dàcuaha ñaha xii ñáyi u nchaá tnúhu ní chídó tnùní ndí Moisés xǎhaⁿ-güedé xii Jèsús:

—Mèstrú, cuini-ndí cada-n ɨ̃n sá vǎ yǒo tnàhí ndàcu cada cuendá ducaⁿ cùtnuní ìní-ndí sá Yǎ Ndiǒxí chindèe ñaha-gá xii-n —cǎchí-güedé xǎhaⁿ-güedé xii-gá.

³⁹ Te Jèsús ní xǎhaⁿ-gǎ xii-güedé:

—Ñáyi u ndècu ichi cuehé ichi duha ñá túú cuini-yu tní-yu tnúhu cǎháⁿ Yǎ Ndiǒxí, te ñáyi u-áⁿ cuini-yu cada-í ɨ̃n sá vǎ yǒo tnàhí ndàcu cada nacuáa cutnùní ìní-yu núu ndáá sá Yǎ Ndiǒxí chindèe ñaha-gá xii-í. Dico yúhú chi ñá túú nǎgá cada-í quini-yu, chi sa nihí-yu tnúhu nàcuáa ní yáha ndí Jónás téé ní xóo cǎháⁿ tnúhu Yǎ Ndiǒxí ndéé sanaha, te ñi-ni ducaⁿ yǎha yúhú tucu.

⁴⁰ Chi ndí Jónás-áⁿ ní xúhu ndí úní nduu úní niú xití ɨ̃n chácá cǎhnú vǎhi nani ballená. Te ñi-ni ducaⁿ yǎha yúhú Téé cùu ñani tnàhá-ndó ncháa-ndo, chi úní nduu úní niú cuhuⁿ-í xití ñuhu.

⁴¹ Te na sáá nduu càda ndáá Yǎ Ndiǒxí cuéchi nchaá ñáyi u ndècu ñuyíu-a, te dàvá-áⁿ cachí nchaá ñáyi u ñuu Nínivé sá ñà túú ní quide ndáá nchaá ñáyi u ndècu vitna, te ducaⁿ cǎháⁿ-yu chi mèe-yu ní dáñá-yu ichi cuèhé ichi duha cùtnàhá ní sáháⁿ ndí Jónás ñuu-yu ní cǎháⁿ ndí tnúhu Yǎ Ndiǒxí núu-yu. Dico vitna iha ndècu ndihí ñaha-ndo xii yúhú, te ñi-í ío-gá cùnùu-í dàcúxí ndí Jónás.

⁴² Te nduu càda ndáá Yǎ Ndiǒxí cuéchi nchaá ñáyi u, te dàvá-áⁿ quini-ndó ɨ̃n ñadihí ñaha ní xindaha ɨ̃n nacióⁿ cáá ndàa xio datni núu quéné nchicanhii, te ñaha-áⁿ ío xica ní xíndecu-aⁿ te ní sáháⁿ-aⁿ ní xíndedóho-aⁿ nchaá tnúhu ní cǎháⁿ ndí Salómón, chi ndí-áⁿ ío ní sáá sá xini tnùní ndí. Te tnàhá ñaha-áⁿ cǎháⁿ-aⁿ sá ñà túú ní quide ndáá nchaá ñáyi u ndècu vitna. Dico vitna iha ndècu ndihí ñaha-ndo xii yúhú, te ñi-í ío-gá cùnùu-í dàcúxí ndí Salómón.

Espiritú cündihí yucu ñávaha sá nánchòcava xito cùu uu
(Lc. 11:24-26)

⁴³ Te òré ná quée ñaha ɨ̃n espíritu cündihí yucu ñávaha xii ɨ̃n ñáyi u, te cuáháⁿ-xi ndècu-xi ɨ̃n xichi núu cündècu-xi te ñá nihí-xi te ní sani ìní-xi:

⁴⁴ “Váha-gá nùhú tucu-í núu ní xíndecu-í”, duha ní sani ìní-xi. Te cuánuhú-xi, te òré ní nasáá-xi, te ní xini-xi sá cáá ìní ñáyi u-áⁿ dàtná cáá-nǎ ɨ̃n vehe ní natíhú ní nduu vii-ná te vǎ yǒo-gá ndécú.

⁴⁵ Te sáta dúcáⁿ te ní xica-xi cuáháⁿ-xi cuándúcú-xi ùsá tnàhá espíritu cündihí-xi sá nèhé víhí-gǎ xíquide. Te òré ní nihí-xi cue espíritu-áⁿ te ndèca ñaha-xi cuáháⁿ cuendá ngúndecu ndihí-xi ñáyi u-áⁿ. Te ñáyi u-áⁿ uuⁿ-gá nándi yáha-yu dàcúxí ndéé díhna. Te ñi-ni ducaⁿ sǎtnahá-xi yáha nchaá ñáyi u cuihna ìní-xi ndècu ñuyíu-a vitna —cǎchí-gá xǎhaⁿ-gǎ xii-güedé.

Cue ñani Jèsús ndihí nǎná-gǎ
(Mr. 3:31-35; Lc. 8:19-21)

⁴⁶ Te cǎháⁿ dúcáⁿ-ní Jèsús ní quexió náná-gǎ ndihí cue ñani-gá cuini-yu cǎháⁿ ndihí ñàhá-yu xii-gá, te ní ngúnu tní-yu ndàa quehé vehe núu ndécú-gá.

⁴⁷ Te ɨ̃n cue ñáyi u xíndecu-áⁿ ní xáhǎⁿ-yu xii-gá:

—Ní quexìo náná-n ndìhi cue ñaní-n xĩnutnĩ-yu quehé, te cuiní-yu cáháⁿ ndìhi ñàhá-yu xii-n —càchí ñáyi^u-áⁿ xǎháⁿ-yu xii-gá.

⁴⁸ Te ní xáhaⁿ-gǎ xii ñáyi^u ducaⁿ xǎhaⁿ xii-gá-áⁿ:

—Te cachí tnúhu yóndi-gá ñáyi^u cùu datná nǎnà-í ndìhi dàtná cue ñaní-í —càchí-gá xǎhaⁿ-gǎ xii ñáyi^u-áⁿ.

⁴⁹ Te ní dánèhé ñàhá-gǎ nchaa cue téé xica cuu ndìhi-gá, te ní xáhaⁿ-gǎ xii ñáyi^u-áⁿ:

—Cue téé-a cùu-güedé dàtná nǎnà-í, ndìhi dàtná cue ñaní-í.

⁵⁰ Te nchaa ñáyi^u na càda nchaa nacuaá càháⁿ Tàtá-í Dútú Ndiöxí Yaá ndécú àndi^u, te ñáyi^u-áⁿ cúu-yu dàtná nǎnà-í, ndìhi dàtná cue ñaní-í, ndìhi dàtná cue cúha-í —càchí-gá xǎhaⁿ-gǎ xii ñáyi^u ducaⁿ ñí dáyǎha tnúhu núu-gǎ-áⁿ.

13

Nàcuáa quide téé cuángacáⁿ triú

(Mr. 4:1-9; Lc. 8:4-8)

¹ Te ñi^u-ni nduu-áⁿ ní quee Jèsús vehe núu ndécú-gǎ, te ní xica-gá cuáháⁿ-gá ní ngóo-gá yuhu làgúná.

² Te ío cuéhé ñáyi^u ní tacá núu ndécú-gǎ. Te sá dúcáⁿ ío cuéhé ñáyi^u núu ní queé-gá xití ñí bàrcú núnñi xití ndute làgúná-áⁿ, te núu xǎⁿ ní ngóo-gá, te nchaa ñáyi^u-áⁿ xixúcu-yu yuhu làgúná-áⁿ.

³ Te Jèsús ní ngüíta-gá ní cani-gá titní cuendú núu-yu nàcuáa tecú tnùn-í-yu nchaa nàcuáa ndùu tnúhu-gá, te xǎhaⁿ-gǎ xií-yu:

—Íⁿ téé cuángacáⁿ-dé triú,

⁴ te òré ní ngüíta-dé dǎngoyo-dé triú-áⁿ, te dava ní queene ndava ní ngava ndéé ichi, te ní xiní cue tílaá te ní nadatàcá-güedi.

⁵ Te dava ní ngava ñuhu yadi núu yíhí vèhi yúu, te ndìhi-ni ní xínu-xi chi ñá túu càvìhi ñuhu.

⁶ Dico òré ní nayehé te ñá túu ní cùndee iní-xi chi ní yíchí-xi, chi ñá túu ní ñíhí quíhíⁿ cùnú yóho-xi.

⁷ Te dava ní ngava núu yúcu ndíquíⁿ tnu iñu, te ñíⁿnuu-ni ñí xínu-xi ndìhi tnu iñu. Te tnu iñu-áⁿ ñí sañu-xi te ní dánáá-xi nchaa triú sá ñí xínu-áⁿ.

⁸ Dico dava-gá triú ní ngava núu ndécú ñuhu cocoⁿ te xǎⁿ ío váha ní cuu, chi núu

ííⁿ-ní triú-áⁿ te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñíⁿ ciendú triú-xi.

⁹ Te vitna nchaa nchòhó ñáyi^u ní xíndedóho tnúhu ní cáháⁿ-í-a, te ío váha chí cuáha cuendá —càchí-gá xǎhaⁿ-gǎ xií-yu.

Cue téé xica cuu ndìhi Jèsús ndúcú tnúhu-güedé núu-gǎ ná cuendá caní-gá cuendú núu ñáyi^u

(Mr. 4:10-12; Lc. 8:9-10)

¹⁰ Te cue téé xica cuu ndìhi Jèsús ní sáháⁿ-güedé ndéé núu-gǎ, te xǎhaⁿ-güedé xii-gá:

—Ndúcu tnúhu-ndí núu-n núu ná cuendá ducaⁿ mée-ni cuendú caní-n núu ñáyi^u —càchí-güedé xǎhaⁿ-güedé xii-gá.

¹¹ Te ní xáhaⁿ-gǎ xii-güedé:

—Nchòhó chí sa càchí tnúhu Yá Ndiöxí xii-ndo ñíⁿ sá vǎtá quini-gá-ndó, chí càchí tnúhu-gá nàcuáa quide-gá ndìhu ndaha-gǎ ñáyi^u, dico dava-gá ñáyi^u chí ñá túu ñá xǎhaⁿ-gǎ xií-yu.

¹² Te nchaa ñáyi^u sa tècú tnùn-í te uuⁿ-gá cuita tecú tnùn-í-yu quíhíⁿ, te nchaa ñáyi^u ñá túu tècú tnùn-í te uuⁿ-gá vá tècú tnùn-í-yu.

¹³ Te xǎⁿ núu duha caní-í mee-ni cuendú núu-yu, chí cuéi na quini-yu nchaa nàcuáa cuu dico ní vǎ cùtnùn-í iní-yu ná cuendá ducaⁿ cùu, te cuéi na cùndedóho-yu dico ní vǎ tècú tnùn-í-yu.

¹⁴ Te ñi^u cuendá ñáyi^u-áⁿ ñí xáhaⁿ Yǎ Ndiöxí xii ndíi Chàíá téé ní xóo cáháⁿ tnúhu-gá ndéé sanaha ñí chídó tnùn-í ndíi núu tütú-gá núu càchí-xi:

Nchaa nchòhó cùndedóho-ndo tnúhu càháⁿ-í, dico ní vǎ tècú tnùn-í-ndó, te cuéi na quini-ndó nchaa nacuaá cada-xi, dico ní vǎ cùtnùn-í iní-ndó ñá cuendá ducaⁿ quide-xi.

¹⁵ Te ducaⁿ chí cùu-ndo ñáyi^u ío sàá iní-xi, te cùu-ndo ñáyi^u ñá túu tècú tnùn-í tnúhu càháⁿ-í,

te cùu tucu-ndo datná cue ñáyi^u cuáa chí ñá túu cuini-ndó càda cuendá-ndó tnúhu-í,

te ni ñá túu cuini-ndó cùndedóho-ndo,

te ni ñá túu cuini-ndó tècú tnùn-í-ndó,

te ni ñá túu cuini-ndó nàtuha ñaha-ndo xii-í cuendá cada càhnu iní-í nchaa

yíca cuëchi-ndo nàcuáa ío váha cuu iní-ndó cùndecu-ndo. Duha ní xáhaⁿ Yá Ndiöxí xii ndí Chàíá ní chídó tnùní ndí núú tütú-gá.

16 'Dico nchòhó chí ío váha táhú-ndó chí cùtnuní iní-ndó nchàa nacuáa quide-í, te cùtnuní tucu iní-ndó nchàa nacuáa ndùu tnúhu càháⁿ-í.

17 Te na càchí tnúhu ndáá-í xii-ndo sã ïo vãi cue tée ní xóo cáháⁿ tnúhu Yá Ndiöxí ndéé sanaha ndíhi nchaa dava-gá ñáyiú váha iní-xi ní cuiní-yu cundehé-yu nchaa sá ndéhé-ndó vitna quide-í dico ñá túú ní xini-yu, te ní cuiní tucú-yu cundedóho-yu nchaa tnúhu ndédóho-ndo vitna cáháⁿ-í te ñá túú ní xíndedóho-yu.

Jèsús càháⁿ-gá nàcuáa quèe-xi cuendá tée cuángacáⁿ triú

(Mr. 4:13-20; Lc. 8:11-15)

18 Te vitna cundedóho váha-ndo na càchí tnúhu-í xii-ndo nàcuáa quèe-xi cuendú tée cuángacáⁿ triú ní caní-í núú-ndó.

19 Te triú sá ñí quene ndava ní ngava ndéé ichi, xíáⁿ cúú-xí dàtná ñáyiú ní xíndedóho tnúhu sá càháⁿ nàcuáa ndíhu ndaha ñàha Yá Ndiöxí xii-yu, dico ñá túú ní cuiní-yu tní-yu, chí sácúíhná cuáháⁿ-xi nàdatuhú-xi iní-yu cuendá sá vã cáncñicúⁿ nihnú-yu nàcuáa càháⁿ tnúhu-áⁿ.

20 Te triú sá ñí ngava ñuhu yadi núú yíhí vihi yúú-áⁿ, xíáⁿ cúú-xí dàtná ñáyiú ní xíndedóho tnúhu Yá Ndiöxí te dñí iní ní tní-yu tnúhu-gá,

21 dico òré ná ngüita ñáyiú cúcuèhé ñáhã-yu xií-yu àdi nãndi-gá sá yãha-yu sá cuendá tnúhu-gá, te ñá cùndèe iní-yu chí dàñá-yu tnúhu-gá cuendá sá ñà túú nihí ndéé-yu.

22 Te triú sá ñí ngava núú yúcu ndíquín tnu ññu-áⁿ, xíáⁿ cúú-xí dàtná ñáyiú ní tecú dóho-xi tnúhu Yá Ndiöxí dico cuèé cuèé ní nacuanaá-yu tnúhu-gá, chí cuendá mee-ni sã ío ñuyíú-a ññu iní-yu, ndíhi cuendá sã ïo sãni iní-yu cuu cuicá-yu, te mee-ni nchàa xíáⁿ ññúhú iní-yu te ñá túú ññu iní-yu tnúhu sá ñí xíndedóho-yu-áⁿ nàcuáa cada váha-yu cundecú-yu.

23 Dico triú sá ñí ngava núú ndécú ññu cocoⁿ-áⁿ, xíáⁿ cúú-xí dàtná ñáyiú ní xíndedóho tnúhu Yá Ndiöxí te quide-yu nàcuáa càháⁿ tnúhu-gá. Te cada iní-ndó

sã ñáyiú-áⁿ cúú-yu dàtná triú sá ñí ngüihí yoco-xi ócò úxí triú-xi, ndíhi triú sá ñí ngüihí yoco-xi únídico triú-xi, ndíhi triú sá ñí ngüihí yoco-xi ñⁿ ciendú triú-xi. Ducaⁿ sãtnahá-xi cúú-yu chí ío váha quide-yu — càchí-gá xáhaⁿ-gã xii-güedé.

Cuendá nchaa cúhú sã ñà túú vãha xñu xiti triú

24 Te Jèsús ní caní-gá ñⁿ cuendú núú ñáyiú nàcuáa tecú tnùní-yu tnúhu-gá, te xáhaⁿ-gã xii-yu:

—Te vitna na càni-í ñⁿ cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ñⁿ tée ío váha triú ní sacáⁿ-dé núú ññúhú-dé.

25 Dico xiti níu ní sáháⁿ ñⁿ tée cùu úhú iní ñáhá xii-dé, te ní dãngoyo-dé ndíquín yúcu sã ñà túú vãha núú ñí sacáⁿ-dé triú-áⁿ.

26 Te òré vitna váha váha ní ngüita-xi quèe yoco nchaa triú-áⁿ, te ní xínu coyo nchaa yúcu sã ñà túú vãha-áⁿ.

27 Te cue tée xínu cuechi núú tée ní sacáⁿ triú-áⁿ ñí xitnñhu ñaha-güedé xii-dé sá dúcáⁿ ñí xínu cúhú sã ñà túú vãha-áⁿ núú triú-dé, te xáhaⁿ-güedé: “Pãtróón, ¿nása ní cuu núú ní xínu cúhú sã ñà túú vãha núú triú-n, te ío váha càa triú ní sacáⁿ-n ní cùu?”, cachí-güedé xáhaⁿ-güedé.

28 Te tée cùu patróón-güedé-áⁿ ñí xáhaⁿ-dè xii-güedé: “Íⁿ tée cùu úhú iní ñáhá nãhi xii-í ducaⁿ ñí quide-dé ní sáháⁿ-dé ní dãngoyo-dé ndíquín cùhú sã ñà túú vãha-áⁿ núú triú-í núu ducaⁿ ñí xínu coyo-xi”, càchí-dé xáhaⁿ-dè xii-güedé. Te cue tée xínu cuechi núú-dé ní xáhaⁿ-güedé xii-dé: “Te núu cuiní-n te quíhíⁿ-ndí tnuhu-ndí nchaa cúhú sã ñà túú vãha ní xínu núú triú-n”, cachí-güedé xáhaⁿ-güedé xii-dé.

29 Te tée cùu xitohó triú-áⁿ ñí xáhaⁿ-dè xii cue tée xínu cuechi núú-dé-áⁿ: “Ñáhá, vá quíhíⁿ-ndó tnùhu-ndo, chí òré tnuhu-ndo te tnàhá-ni triú quene chí càa vihi cúhú-áⁿ.”

30 Vãha-gá chí dàñá ná cuñnu nahi ndéé ná cùu triú, te dàtnùní nducu-í cue tée quíhíⁿ-güedé tnuhu-güedé nchaa cúhú sã ñà túú vãha-áⁿ, te dacùtu nuhní-güedé te cahmi-güedé, te dàtnùní nãquehdé-güedé triú nacani-güedé te nataxúha-güedé xiti yacá-í”, càchí-dé xáhaⁿ-dè xii-güedé —duha ní caní Jèsús cuendú núú-yu.

*Cuendá ndíquíⁿ yutnu nàni mostázá
(Mr. 4:30-32; Lc. 13:18-19)*

31 Te Jèsús ní caní tucu-gá ingá cuendú núú ñáyiú nàcuáa tecú tnùnì-yu tnúhu-gá, te xáhaⁿ-gã xii-yu:

—Na càni-í ìⁿ cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiòxí xii ñáyiú. Ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dě.

32 Te ndíquíⁿ yutnu-áⁿ ìo chàhu, dico òré ná xínu-xi te sàhnu-gá-xi dàcúxí nchàa cùhú, te cue quitì ndàva núú tàchí cádúha-güedi tacá-güedi núú dité-xi — càchí-gá xáhaⁿ-gã xii-yu.

*Nàcuáa quide levadurá
(Lc. 13:20-21)*

33 Te Jèsús ní xáhaⁿ tùcu-gá xii ñáyiú:

—Te na càchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiòxí xii ñáyiú. Ìⁿ ñadìhì ní chihì-aⁿ levadurá únì arròbá yuchi triú, te levadurá-áⁿ ñi quide-xi ní ndaa ñihì yusaⁿ-áⁿ —càchí-gá xáhaⁿ-gã xii-yu.

*Mee-ni cuendú ní caní Jèsús núú ñáyiú
(Mr. 4:33-34)*

34 Te mee-ni cuendú ní caní Jèsús núú ñáyiú ndí tnahá òré ní dánèhé ñàhá-gã xii-yu tnúhu-gá.

35 Te ducaⁿ ñi quide-gá chi ní quee ndáá-xi nàcuáa ní chídó tnùnì ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gá núú càchí-xi:

Mee-ni cuendú caní-í núú ñáyiú òré danèhé-í-yu tnúhu-í cuendá tecú tnùnì-yu,

te nchaa tnúhu sá vätä yõo-gá cundedóho danèhé-í-yu, te nchaa tnúhu-áⁿ ndúú yùhu-xi ndéé cùtnàhá ní ngáva ñuyíú.

Duha ní chídó tnùnì téé-áⁿ núú tütú-gá.

*Jèsús càháⁿ-gá nàcuáa quèe-xi cuendá
cùhú sã ñà túú vãha càa xití triú*

36 Te Jèsús ní dándácá-gã ñáyiú te cuánuhú-gá vehe, te cue téé xica cuu ndihì-gá ní xáhaⁿ-güedě xii-gá:

—Cachí tnúhu xii-ndí nása quèe-xi cuendá cùhú sã ñà túú vãha càa xití triú —càchí-güedě xáhaⁿ-güedě xii-gá.

37 Te Jèsús ní xáhaⁿ-gã xii-güedé:

—Tée càchí-í ní sacáⁿ triú cávãha-áⁿ cúú yùhú Tée cùu ñanì tnáhá-ndó nchàa-ndo.

38 Te nchaa núú ñi sacáⁿ téé-áⁿ triú cúú-xí ñuyíú. Te tatá váha-áⁿ cúú-xí cuè ñáyiú yìndaha ñaha Yá Ndiòxí. Te nchaa cùhú sã ñà túú vãha-áⁿ cúú-xí ñáyiú yìndaha ñaha sàcúíhná.

39 Te téé ní dǎngoyo ndíquíⁿ cùhú sã ñà túú vãha núú triú-áⁿ cúú-dě mee sàcúíhná. Te nduu nàtehndé-ñà triú-áⁿ cúú-xí nduu ndihì ñihnu-ná nchaa sá ìo ñuyíú-a. Te nchaa ñáyiú nàquehdé triú-áⁿ cúú-yu mee-ni cuè espíritú xínú cuèchi núú Yá Ndiòxí.

40 Te dàtná cada cue téé quíhìⁿ tnuhu nchaa cùhú sã ñà túú vãha-áⁿ dacùtu nuhnì-güedé te cahmi-güedé, ducaⁿ sãtnahá-xi yáha nchaa ñáyiú cùndihì yucu ñávãha na sàà nduu.

41 Te yùhú Tée cùu ñanì tnáhá-ndó nchàa-ndo tendaha-í nchaa espíritú xínú cuèchi núú-í quíhìⁿ-xi nadatàcá-xi nchaa ñáyiú sànu ichi cue tnahá ñáyiú-xi ichi cuèhé ichi duha, ndihì nchaa dava-gá ñáyiú ñà túú quide váha, te nchaa ñáyiú-áⁿ xĩndecú-yu nchaa núú ndécú cuè ñáyiú yìndaha-í.

42 Te cue espíritú-áⁿ daquíhìⁿ-xi cue ñáyiú-áⁿ núú ñúhú núú càyú, te yàcáⁿ ìo ndáhyú-yu te dìcò rúhñú-ñà cuu núhu-yu sá sàtú inì-yu sá ndóhõ-yu.

43 Te nchaa ñáyiú quide nchaa nacuéa cuinì Tãtã-yu Dútú Ndiòxí, ñáyiú-áⁿ ìo cunúú-yu cundecú-yu núú ndécú-gã táxí tnùnì-gá, chi cuú-yu dàtná nchicanhii dayèhé-yu cundecú-yu núú ndécú-gã. Te nchaa nchòhó ñáyiú ndèdóho nchaa tnúhu càháⁿ-í-a, te ìo váha chí cuãha cuendá — càchí-gá xáhaⁿ-gã xii-güedé.

Cuendá ìⁿ sá ìo ndèyáhu

44 Te Jèsús xáhaⁿ tùcu-gá xii-güedé:

—Na càni tucu-í ingá cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndiòxí xii ñáyiú. Ìⁿ téé ní naníhì-dě ìⁿ sá ìo ndèyáhu yìndúxi ìⁿ xichì, te ní nachindúxi tucu-dé ñu-ni núú ñi naníhì-dě-áⁿ, te ìo ní cudíí inì-dé sá dúcáⁿ ñi naníhì-dě xíáⁿ. Te ní xica-dé cuánuhú-dé te ní nadico-dě nchaa sá ndécú ndihì-dé, te

ní nacuaaⁿ-dé ñuhu núú dúcáⁿ ñí naníhí-dě xǎⁿ.

Cuèndá ñí sá ïo ndèyáhu nàni pèrlá

45 Te na càni tucu-í ñngá cuèndú núú-ndó nàcuáa tecú tnùní-ndó nàcuáa cada-xi òrè ndíhu ndaha ñàha Yá Ndiòxí xii ñáyiu. ñí tée quide ndáhú ndúcú-dě sá nání pèrlá sá ïo ndèyáhu.

46 Te ní naníhí-dě ñáyiu ndècu ndíhi ñí pèrlá sá ïo-gá ndèyáhu, te ní xica-dé cuánuhú-dé te ní nadico-dě nchaa sá ndécú ndíhi-dé, te ní sáháⁿ-dé ní saaⁿ-dé pèrlá sá ïo-gá ndèyáhu-áⁿ.

Cuèndá ñunu tnì-güedé chácá

47 Te na càni tucu-í ñngá cuèndú núú-ndó nàcuáa tecú tnùní-ndó nàcuáa cada-xi òrè ndíhu ndaha ñàha Yá Ndiòxí xii ñáyiu. Cue tée tnì chácá ñí dáquèe-güedé ñunu-güedé xití ndute làmár tnì-güedé chácá, te dàcá nuu dàcá nihnu chácá cuãnguee-güedé xití ñunu-áⁿ.

48 Te òrè ní cutnùní iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüita-güedé nácaxi-güedé nchaa chácá-áⁿ. Te nchaa chácá vâha dàquèe-güedé-dì xití tídihi, te nchaa chácá nèhé dǎngoyo-güedé-dì.

49 Te dàtná ní quide cue tée-áⁿ ducaⁿ càda cue espíritú xínú cuèchi núú Yá Ndiòxí ná sàá nduu vâ cùndècu-gá nchaa sá ïo ñuyíú-a, chi cue espíritú-áⁿ daquèe dñⁿ-xi nchaa ñáyiu ní quide váha tnuú nchaa ñáyiu ñá túú ní quide váha.

50 Te nchaa ñáyiu ñá túú ní quide váha-áⁿ daquèhíⁿ ñáhá-xí xii-yu núú ñùhú núú càyú, te yàcáⁿ ïo ndáhyú-yu, te dícó rúhñú-nǎ cuu núhu-yu sá sàtú iní-yu cuèndá sá ndóhǒ-yu —càchí-gá xǎhaⁿ-gǎ xii cue tée xica cuu ndíhi-gá.

Cuèndá cue tée ndècu ndíhi sá ñí quee túu díhna ndíhi sá ñí quee túu saa

51 Te Jèsús ní xicáⁿ tnúhú-gǎ núú-güedé, te xǎhaⁿ-gǎ xii-güedé:

—¿Ní tecú tnùní-ndó nàcuáa ndùu nchaa tnúhu ní cáháⁿ-í-áⁿ? —càchí-gá xǎhaⁿ-gǎ xii-güedé.

Te ní xǎhaⁿ-güedé xii-gá:

—Ní tecú tnùní-ndí —càchí-güedé xǎhaⁿ-güedé xii-gá.

52 Te ní xǎhaⁿ tucu Jèsús xii-güedé:

—Te núu ñí tée dàcuaha ñaha xii ñáyiu nchaa tnúhu ní chídó tnùní ndíi Moisés ná cùtnuní iní-dé nàcuáa quide Yá Ndiòxí ndíhu ndaha-gǎ ñáyiu, te tée-áⁿ cúú-dě dàtná ñí tée cùu xítóhó vehe. Te tée cùu xítóhó vehe-áⁿ ñí queñuhu-dé nchaa sá ñí quee túu díhna ndècu ndíhi-dé, ndíhi nchaa sá ñí quee túu saa. Te ducaⁿ sǎtnahá-xi cùu tée-áⁿ te núu na cùtnuní iní-dé nàcuáa quide Yá Ndiòxí ndíhu ndaha-gǎ ñáyiu —càchí-gá xǎhaⁿ-gǎ xii-güedé.

Jèsús ndécú-gǎ ñuú núú ñí sahnu-gá

(Mr. 6:1-6; Lc. 4:16-30)

53 Te sàtá ñí yáha ducaⁿ ñí cani Jèsús cuèndú núú-güedé, te ní xica-gá cuánuhú-gá.

54 Te ní ndexìo-gá ñuú núú cúú ñuú-gá, te cuánguihu-gá xití veñúhu càa ñuú-áⁿ te ní ngüita-gá dánèhé-gá ñáyiu. Te nchaa ñáyiu ndédóho nchaa tnúhu càháⁿ-gá xícunúhu-yu, te xitnàhá-yu:

—¿Nása ní cuu núu ïo váha cùtnuní iní tée-a nàcuáa cunduu tnúhu càháⁿ-dé, te quide-dé nchaa sá vâ yǒo tnàhí ndàcu cada-i?

55 Te dícó déhe tée cùu carpinterú ndíhi tá Màriá cúú-dě, te ñaní-dé cúú tē Jàcobó, ndíhi té Chèé, ndíhi té Xímú, ndíhi té Jùdás.

56 Te cue cúha-dé ndécú ndíhi ñáhá-yu xii-o ñuú-a. ¿Te nása ní quide-dé ñuú ndéé dàcáⁿ ïo váha cùtnuní iní-dé nàcuáa cunduu tnúhu càháⁿ-dé-i? —càchí-yu xitnàhá-yu.

57 Te ñá túú ní cuíní-yu càháⁿ ndíhi váha-yu Jèsús, dico mee-gǎ ní xǎhaⁿ-gǎ xii-yu:

—Te núu ñí tée càháⁿ tnúhu Yá Ndiòxí ná nàsáá-dé ñuú-dé, te nchaa ñáyiu ñuú-dé-áⁿ ndíhi nchaa ñáyiu cùu ndimee-dé ñá túú nèhé-yu sá yíñùhu núú-dě, dico cue ñáyiu nchaa dava-gá ñuú chi nèhé-yu sá yíñùhu núú-dě —càchí-gá xǎhaⁿ-gǎ xii-yu.

58 Te ñá túú ní quide Jèsús titní núú sǎ vâ yǒo tnàhí ndàcu cada ñuú-áⁿ, chi ñá túú ní cuíní-yu quindáá iní ñáhá-yu xii-gá.

14

Nàcuáa ní cuu ní xíhí té Juáá tée dàcuandute ñaha xii ñáyiu

(Mr. 6:14-29; Lc. 9:7-9)

1 Te ñi-u-ni ñàvâ-áⁿ ñi ñíhí tẽ Hèrodés tñúhu nchaa ñàcuâa quide Jesús, te tẽ Hèrodés-áⁿ cúú-dẽ tée tàxi tñuní ñistrítú Galileá.

2 Te ñi xáhaⁿ-dẽ xii nchaa cue tée ñdècu ñdihí-dé:

—Tée ñdii cuèndú-xi ñíhí-ó-áⁿ cùu-dé tẽ Juàá tée ñdàcuandute ñaha xii ñáyíu, tée ñi xíhí ñi cùu te ñi ñdoto-dé ñúu ñàcáⁿ ñdácú-dé quide-dẽ nchaa sá vâ yõo tñahí ñdàcu cada —cachí-dé xáhaⁿ-dẽ xii-güedé.

3 Te ñducaⁿ ñi cáháⁿ tẽ Hèrodés chi mee-dẽ ñi táuchíúⁿ-dẽ ñi tñi ñaha-güedé xii tẽ Juàá, te ñi ñdácútú ñaha-güedé xii-dé, te ñi chíhi ñaha-güedé veçaá. Te ñducaⁿ ñi quide tẽ Hèrodés-áⁿ sã cuèndá ñaha ñani Herodiás, ñaha ñi cándeca ñaní-dé tẽ Lìpé, te ñi ñaqueheⁿ ñaha-dẽ xii-aⁿ ñdèca ñaha-dé.

4 Te tẽ Juàá ñi xáhaⁿ-dẽ xii tẽ Hèrodés:

—Ñá túú ñi quide váha-n ñuha ñi ñaqueheⁿ-n ñaha ñi cándeca ñaní-n —ñuha ñi xáhaⁿ tẽ Juàá xii tẽ Hèrodés.

5 Te sá ñdúcáⁿ ñi xáhaⁿ tẽ Juàá-áⁿ xii tẽ Hèrodés, te ñi cuíni tẽ Hèrodés-áⁿ cahni-dé tẽ Juàá-áⁿ, ñdico ñá túú ñi cùyí-dé chí ñi yùhú-dé núú cuè ñáyíu, chí ñchaá-yu ñi cutñuní ñni-yu sá tẽ Juàá cúú-dẽ ñi tée càháⁿ tñúhu Yá Ndiõxí.

6 Te ñi ñduu ñi quide tẽ Hèrodés vico vehe-dé ñi quide càhnu-dé ñduu ñi cacu-dé. Te ñdècu ñi ñdèhe yoco ñaha ñani Herodiás-áⁿ, te xíhí-áⁿ ñi quíhu-xi xití vehe núú cúú vico-áⁿ ñi xita saha-xi. Te ñdúcoo tẽ Hèrodés ñdihí cue tée ñi cáháⁿ-dẽ ñdéhé-güedé, te ío ñi cudí ñni-dé ñàcuâa ñi xita xíhí-áⁿ.

7 Te tẽ Hèrodés-áⁿ ñi cacunehe-dé ñdée Yá Ndiõxí ñàcuâa cutñuní ñni xíhí-áⁿ sã ñdàá cuañaha-dé ñúu ná cúú sã ña càcáⁿ-xi núú-dẽ.

8 Te xíhí-áⁿ ñi ñdácáhu ñni ñáhá ñnáná-xi xii-xi ná cúú sã càcáⁿ-xi núú tẽ Hèrodés, núu xíáⁿ ñi xáhaⁿ-xi xii-dé:

—Cuíni-í quehndé-n ñdiquí tẽ Juàá tée ñdàcuandute ñaha xii ñáyíu te taxi-n, ñdico ña cùhuⁿ ñi xití cóhó taxi-n —càchí-xi xáhaⁿ-xi xii-dé.

9 Te sá ñdúcáⁿ ñi xáhaⁿ-xi, te ñi cundíyí tẽ Hèrodés, ñdico ñá túú ñi ñíhí-dẽ ñasa cada-dé, chí ñdèdóho ñáyíu ñdè ñi cacunehe-dé Yá Ndiõxí sá ñdàá cuañaha-dé ñi sá ña càcáⁿ-xi núú-dẽ. Te ñi quide-dé ñàcuâa ñi xáhaⁿ-xi.

10 Chí ñi táuchíúⁿ-dẽ ñi sáháⁿ cue tée ñi xehndé-güedé ñdiquí tẽ Juàá ñdè yíhí-dẽ veçaá.

11 Te ñi chíhi-güedé ñdiquí-dẽ ñi xití cóhó te ñèhe-güedé cuánuhú ñi sáñaha-güedé xii xíhí-áⁿ, te xíhí-áⁿ ñi ñacuañaha-xi xii ñnáná-xi.

12 Te cue tée xica cuu ñdihí tẽ Juàá-áⁿ ñi sáháⁿ-güedé ñi ñaqueheⁿ-güedé yíquí cùñú-dé ñi chindúxi-güedé, te ñdàtñuní ñi sáháⁿ-güedé ñi xáhaⁿ-güedé xii Jèsús ñàcuâa ñi cuu.

Jèsús ñdàcàxi-gá úhúⁿ ñi cue tée te ñi ñáyíu ñdihí ñdihí landú

(Mr. 6:30-44; Lc. 9:10-17; Jn. 6:1-14)

13 Te Jèsús ñi ñíhí-gã tñúhu ñàcuâa ñi cuu ñi xíhí tẽ Juàá. Te sáta xíáⁿ te cuánguee-gá ñi bàrcú cuáháⁿ-gá ñi xichi núú ña túú ñáyíu ñdècu, ñdico nchaa ñáyíu xíndecu nchaa ñuú cáá yàtñi xíáⁿ ñi ñíhí-yu tñúhu sá cuáháⁿ-gá, te ñi queé-yu ñuú-yu xica sahá-yu cuáháⁿ núú quide-yu cuèndá quexìo Jesús.

14 Te ñdè ñi quexìo Jesús núú cuáháⁿ-gá, te ñi quene-gá bàrcú, te ñi xiní-gá cuéhé víhí ñáyíu xíxúcu-yu xíáⁿ, te ñi cundáhu ñni ñáhá-gã xii-yu, te ñi quide tátña-gã nchaa ñáyíu cùhú ñdihí-yu.

15 Te sáta ñi cuaa te ñi sáháⁿ cue tée xica cuu ñdihí Jesús núú-gã, te xáhaⁿ-güedé xii-gá:

—Sa ñi cuu ñdàdàca-n nchaa ñáyíu-a chí sa ñi cuaa, te ña quíhíⁿ-yu nchaa ñuú cáá yàtñi ñha cuaaⁿ-yu sá cáxi-yu, chí núú ñdècú-ó ñha ñá túú tñahí ná ío —càchí-güedé xáhaⁿ-güedé xii-gá.

16 Te Jèsús ñi xáhaⁿ-gã xii-güedé:

—Ñáhá, vá ñdàdàca-í-yu, váha-gã mee-ndo chí cuañaha sã ña càxí-yu —càchí-gá xáhaⁿ-gã xii-güedé.

17 Te ñi xáhaⁿ-güedé xii-gá:

—Ñá túú ñágá ñdècú ñdihí-ñdí, chí úhúⁿ ñuha-ñá pàá ñdihí úú-ñá chácá ñdècú ñdihí-ñdí —càchí-güedé xáhaⁿ-güedé xii-gá.

18 Te Jèsús ñi xáhaⁿ-gã xii-güedé:

—Chí càñèhe paá-áⁿ ñdihí chácá-áⁿ táquìxi ñha —cachí-gá xáhaⁿ-gã xii-güedé.

19 Te Jèsús ñi xáhaⁿ-gã xii nchaa ñáyíu sá ña ngõo-yu ñchaá-yu núú ñtè cuíí càa xíáⁿ, te ñi queheⁿ-gã ñdihí úhúⁿ pàá-áⁿ ñdihí ñdihí

ndúú chácá-ǎⁿ te ní ndacoto-gá andiu, te ní ndacáⁿ táhú-gǎ núú Yǎ Ndiǒxí, te dǎtnùní ní táhú cuèchi-gá pàá-áⁿ te ní sǎñaha-gǎ xii cue té xica cuu ndihí-gá ní dácǎhñu-güedé cue ñáyiu ní xexí-yu.

²⁰ Te nchaá-yu ní xexí-yu ní ndahá xití-yu. Te sátá nǐ túhú cóhǒ-yu te ní nadatácá-güedé nchaa sá nǐ quendóo, te ní chítú ùxúú tnáhá tídihi mee-ni sǎ nǐ quendóo.

²¹ Te nchaa ñáyiu ní xexi-áⁿ nǐ xínu úhúⁿ mǐl mee-ni cuè té chi mee-ni cuè té-áⁿ nǐ quíundehu, te ðíⁿ cue ñáyiu ðíhí ndihí cue landú.

*Jèsús xicá-gǎ núú ndute
(Mr. 6:45-52; Jn. 6:16-21)*

²² Te òré-ni-áⁿ nǐ xáhaⁿ Jèsús xii cue té xica cuu ndihí-gá sá quèe-güedé bàrcú téhndé-güedé ndàa ingá xio yuhu làgúná, te mee-gǎ quendóo-gá cada ndee ìní tnáhá-gǎ ndihí cue ñáyiu.

²³ Te sátá nǐ yáha ní quide ndee ìní tnáhá-gǎ ndihí cue ñáyiu, te medii-gá ní xica-gá cuásaá-gá ñⁿ tìndúú cáa yàtni xíaⁿ cuèndá cáháⁿ ndihí-gá Yǎ Ndiǒxí, te ðiu-ni medii-gá ndécú xíaⁿ nǐ cundiquíⁿ.

²⁴ Te bàrcú sá ñúhú cuè té xica cuu ndihí-gá-áⁿ sa cuáháⁿ-xi ndéé cuádava xití làgúná-áⁿ, te níhi vǐhi quene táchí ndàa ichi cuáháⁿ-xi, te dácandau ndeé-xi ndute nchaa ðíñi-xi.

²⁵ Te tàcuíhndá váhi-gá tá xica Jèsús núú ndute cuáháⁿ tá cùyatni-gá bàrcú-áⁿ.

²⁶ Te cue té xica cuu ndihí-gá ní xiní ñáhá-güedě xii-gá tá xica-gá núú ndute cuáháⁿ, te ní yuhú-güedé te níhi ní cáháⁿ-güedé te xǐtnàha-güedé:

—ñⁿ àlmá! —càchí-güedé xǐtnàha-güedé.

²⁷ Te Jèsús ní cáháⁿ-gá, te xáhaⁿ-gǎ xii-güedé:

—Ñíí cunduu-ndo vǎ yuhú-ndó, chi yuhú cúu-í —càchí-gá xáhaⁿ-gǎ xii-güedé.

²⁸ Te té Pèlú ní xáhaⁿ-dě xii-gá:

—Mèstrú, te núú ðiu-n te tauchìuⁿ sá tnáhá-í ná càca-í núú ndute quixi tnahá ñáhà-í xii-n —càchí-dé xáhaⁿ-dě xii-gá.

²⁹ Te Jèsús ní xáhaⁿ-gǎ xii-dé:

—Taquixi —cachí-gá xáhaⁿ-gǎ xii-dé.

Te té Pèlú ní nuu-dé núú bàrcú, te ní ngüita-dé tá xica-dé núú ndute cuáháⁿ cuátnahá ñáhá-dě xii-gá.

³⁰ Te ní cutnùní ìní-dé sá ïo níhi xico táchí, te ní ngüita-dé yuhú-dé. Te òré-ni-áⁿ tá quèe naa-dé xití ndute cuáháⁿ ní cùu, te níhi ní cáháⁿ-dé xáhaⁿ-dě xii Jèsús:

—ñⁿ Mèstrú, vá dáñá-n quèe naa-í xití ndute! —càchí-dé xáhaⁿ-dě xii-gá.

³¹ Te òré-ni-áⁿ nǐ tnⁿ Jèsús ndaha-dé, te ní xáhaⁿ-gǎ xii-dé:

—ñⁿ Ná cuèndá ñá túú sàndáá ndisa ìní ñáhá-n xii-í sàni ñⁿ sani úú ìní-n-í? —càchí-gá xáhaⁿ-gǎ xii-dé.

³² Te òré cuánguee Jèsús ndihí té Pèlú xití bàrcú, te òré-ni-áⁿ nǐ ngüíñí táchí.

³³ Te cue té ñuhu xití bàrcú-áⁿ nǐ ngüíñí xití-güedě núú-gǎ, te xáhaⁿ-güedě xii-gá:

—Sá ndàá sá cuítí sǎ díú yohó cúu-n Dèhe Dútú Ndiǒxí —càchí-güedé xáhaⁿ-güedě xii-gá.

*Jèsús quidé tǎtna-gá ñáyiu cùhú ñⁿ xichi
núú nání Gènesarét
(Mr. 6:53-56)*

³⁴ Te ní quexìo Jèsús ndihí cue té xica cuu ndihí-gá ndàa ingá xio yuhu làgúná, te núú nǐ quexìo-gá ndihí-güedé-áⁿ nání-xí Gènesarét.

³⁵ Te nchaa ñáyiu xǐndecu xíaⁿ nǐ cutnùní ìní-yu sá díú-gǎ ní quexìo, te ní dátécú tnúhu-yu nchaa dava-gá ñáyiu xǐndecu yatni xíaⁿ sǎ nǐ quexìo-gá. Te ndécá-yu nchaa ñáyiu cùhú ndécú ndíhí-yu cuáháⁿ núú ndécú Jèsús.

³⁶ Te nchaa ñáyiu cùhú-áⁿ nǐ ngüita-yu càháⁿ ndàhú-yu núú Jèsús sá ná dàña-gá tnándeé-yu cuèdicó luha yuhu dǒó-gǎ cuèndá ndúha-yu, te cue ñáyiu cùhú, ñáyiu ní tnándeé yuhu dǒó-gǎ ní ndúha-yu.

15

*Cuèndá nchaa sá quidé-xí ngǐndecu cuéchi
ñáyiu*

(Mr. 7:1-23)

¹ Te sátá dúcáⁿ te ñⁿ úú cue té cùu fariséu ní quee-güedé ñúú Jerusalén, ndihí cue té dácuaaha ñaha xii ñáyiu nchaa tnúhu ní chídó tnùní ndí Moisés ní quexìo-güedé núú ndécú Jèsús, te xáhaⁿ-güedě xii-gá:

² —¿Ná cuendá cue téé xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tnáhá-ó ñí xíndecu ndéé sanaha-i? —càchí-güedé xáhaⁿ-güedé xii-gá.

³ Te Jèsús ní xáhaⁿ-gã xii-güedé:

—Te nchòhó tucu, ¿ná cuendá ñá túú quide-ndo nacuáa ní cachí Yã Ndiöxí cada-ndo, núu da nacuáa ta quide cue téé ñuyíú-a quide-ndo-i?

⁴ Te Yá Ndiöxí càchí-gá núú tütú-gá: “Canehe-ndo sã yíñùhu núú tãtã-ndó ndihi núú nãná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiú na càháⁿ úhú tãtã-xi àdi nãná-xi te cahni ñaha-güedé xii-yu”, duha càchí-gá núú tütú-gá.

⁵ Dico nchòhó càchí-ndó sã cuè ñáyiú chi cuu cúñhá-yu xii tãtã-yu àdi nãná-yu: “Vá cúú chindee ñaha-ndí xii-n, chi sá táxí-ndí xii-n ni cùu, xíáⁿ ní nduu cuendá Yã Ndiöxí”, cuu duha cúñaha ñáyiú xii tãtã-yu àdi nãná-yu càchí-ndó.

⁶ Te càchí-ndó sã cuè ñáyiú ducaⁿ na cúñaha xii tãtã-xi àdi nãná-xi te ñá túú-gã tàú-yu chindèé-yu ni tãtã-yu ni nãná-yu. Te ducaⁿ quide-ndo chi ní dáquéé tihú-ndó nacuáa ní cachí Yã Ndiöxí cada-ndo, te mee-ni nacuáa ta quide cue téé ñuyíú-a véxi nchìcúⁿ nihnu-ndó quide-ndo.

⁷ Te nchòhó cúú-ndó ñáyiú ío dàndahú méé-xí, chi càchí-ndó sã quidé ndáá-ndó te ñá ndáá sá quidé ndáá-ndó! Te ní quee ndáá-xi nacuáa ní chídó tnùní ndíi Chàjá téé ní xóo càháⁿ tnúhu Yá Ndiöxí ndéé sanaha núú tütú-gá núú càháⁿ-xi nacuáa ní càháⁿ-gá cuendá-ndó, te duha ní cachí-gá:

⁸ Ñáyiú-a càchí-yu sá ío càhnu cuu-í dico dícó-ni yuhu càháⁿ-yu,

chi duuⁿ duuⁿ ñá túú ñùhu iní ñáhã-yu xii-í.

⁹ Te àúⁿ nã cuu chihnu ñahá-yu xii-í chi ñá túú vèdana ndéé nándíhi-xi,

chi cue ñáyiú-a dàcuahá-yu cue tnàha ñáyiú-yu nacuáa cundecú-yu, dico mee-ni tnúhu sá ñí cahu iní cue ñáyiú ñuyíú-a càháⁿ-yu.

Duha ní chídó tnùní ndíi Chàjá núú tütú Yã Ndiöxí nacuáa ní càháⁿ-gã cuendá-ndó —càchí-gá xáhaⁿ-gã xii-güedé.

¹⁰ Te ní xáhaⁿ-gã xii cue ñáyiú:

—Chí táquixi ndehe iha, te cundedóho váha-ndo tnúhu na càháⁿ-í, te ío váha cuáha-ndo cuendá.

¹¹ Nchaa sá xéxi-ndó chi ñá túú nã quidé-xí iní-ndó, dico nchaa sá cuèhé sá dúhá sàni iní-ndó càháⁿ-ndó nchaa xíáⁿ quidé-xí ndècu cuéchi-ndo —càchí-gá xáhaⁿ-gã xii-yu.

¹² Te cue téé xica cuu ndihi-gá ní sáháⁿ-güedé ndéé núú-gã, te xáhaⁿ-güedé xii-gá:

—Véxi-ndí càchí tnúhu-ndí xii-n sã cuè téé cùu fariséu ñá túú cùu váha iní-güedé cuendá tnúhu ní càháⁿ-n —càchí-güedé xáhaⁿ-güedé xii-gá.

¹³ Te ní xáhaⁿ-gã xii-güedé:

—Nchaa ñáyiú ñá túú cùu cuendá Tãtã-í Dútú Ndiöxí cuíta nihnú-yu, chi ñáyiú-áⁿ cúú-yu dàtná nchaa cúhú sã ñà túú nándíhi te tnúhu ñáyiú.

¹⁴ Te vá cáda cuendá-ndó nacuáa càháⁿ cue téé-áⁿ, chi cùu-güedé dàtná cue ñáyiú cuáá sácuíta nehe tnàha. Te nchòhó xini-ndó sã núu ñáyiú cuáá ná cuíta nèhe tucú-yu ingá ñáyiú cuáá, te ndí ndúú-yu quée-yu déhvã —càchí-gá xáhaⁿ-gã xii-güedé.

¹⁵ Te té Pèlú ní xáhaⁿ-dè xii-gá:

—Cachí tnúhu xii-ndí nacuáa quèe-xi tnúhu ní càháⁿ-n-ãⁿ —càchí-dé xáhaⁿ-dè xii-gá.

¹⁶ Te Jèsús ní xáhaⁿ-gã:

—¿Náa tnàhá nchòhó ñá túú ní tècú tnùní-ndó nacuáa ndùu tnúhu ní càháⁿ-í núú ñáyiú-áⁿ ñã?

¹⁷ Nchaa sá xéxi-yu cuánguee-xi xití-yu, te dàtnùní náyãha ñaha-xi xii-yu.

¹⁸ Dico nchaa tnúhu cuèhé tnúhu duha càháⁿ-yu xíáⁿ véxi quene-xi iní-yu, te diu nchaa xíáⁿ quidé-xí ndècu cuéchi-yu.

¹⁹ Te iní-yu-áⁿ cácu nihnu nchaa sá cuèhé sá dúhá, chi sàni cuehé sání dùha iní-yu, te sàhni-yu tnàha ñáyiú-yu, te cue téé càháⁿ ndihi-güedé ñáyiú dñí te ñá díú ñàdñí-güedé cúú-yu. Te diu-ni ducaⁿ quide cue ñáyiú dñí càháⁿ ndihí-yu cue téé te ñá díú yí-yu cùu-güedé, te cuèi téé te cuèi ñadñí mee-ni ìchi díí iní cúdí iní-yu cundecú-yu, te dùhu ndachiuⁿ tnahá-yu, te

dàcuandehndé-yu, te càháⁿ cuèhé-yu cuendá tnàha ñáiyú-yu.

²⁰ Te nchaá xǎⁿ quidé-xí ndècu cuéchi-yu, dico ñá díú sǎ ñà túú ndàhá-yu dàtná ní cachí cue téé ndéé sanaha, chi xǎⁿ ñá túú quide-xi cuendá ngúndecu cuéchi-yu — càchí-gá xǎhaⁿ-gǎ xii-güedé.

Ïⁿ ñadìhí ñaha cùu ñaní tnáhá ñáiyu canàneá ní sándáá iní-aⁿ Jèsús

(Mr. 7:24-30)

²¹ Te Jèsús ní xica-gá cuáháⁿ-gá ní sáá-gá yucu cue téé ñuú Tírú, ndihí yucu cue téé ñuú Sídón.

²² Te ïⁿ ñadìhí ñaha cùu ñaní tnáhá ñáiyu canàneá ndécú yàtni-aⁿ xǎⁿ, te níhi ta càháⁿ-aⁿ ní quexìo núú ndécú Jèsús, te xǎhaⁿ-aⁿ xii-gá:

—jMèstrú, ñaní tnáhá ndíi Dàvíí, cundàhú iní ñáhá xii-í cada tátna-n dèhe yoco-í! Chi yìhi ñaha espíritú cundìhi yucu ñávãha xii-xi te ío dándoho ñaha-xi —cachí-aⁿ xǎhaⁿ xii-gá.

²³ Dico Jèsús ñá túú tnàhí ni cǎháⁿ-gá, te cue téé xica cuu ndihí-gá ní sáháⁿ-güedé núú-gǎ, te xǎhaⁿ-güedé xii-gá:

—Cúñaha xii ñaha-áⁿ ná nùhú-aⁿ, chi ío níhi càháⁿ-aⁿ nchìcúⁿ ñáhá-áⁿ xii-o —cachí-güedé xǎhaⁿ-güedé xii-gá.

²⁴ Te Jèsús ní xáhaⁿ-gǎ xii-güedé:

—Yá Ndiõxí ní tendaha ñàha-gá xii-í véxi-í mee-ni ñuú núú xíndecu cue ñáiyu isràél, chi ñáiyu-áⁿ cúu-yu dàtná cue mbèé cue quití ní xíta, chi ta xíta nihnú-yu cuáháⁿ —càchí-gá xǎhaⁿ-gǎ xii-güedé.

²⁵ Te ñadìhí-áⁿ ní sáháⁿ-aⁿ ndéé núú Jèsús ní ngüíñí xítí-áⁿ, te xǎhaⁿ-aⁿ xii-gá:

—jMèstrú, chindee ñàha xii-í! —càchí-aⁿ xǎhaⁿ-aⁿ xii-gá.

²⁶ Te Jèsús ní xáhaⁿ-gǎ xii-aⁿ:

—Vá cúú chindee-í cue ñáiyu ñá túú cùu ñáiyu isràél, chi ïⁿ-ni cùu-xi núu na quèheⁿ-o paá cúú cuendá cue landú te cuáha-o iná caxi-di —càchí-gá xǎhaⁿ-gǎ xii-aⁿ.

²⁷ Dico ñaha-áⁿ ní xáhaⁿ-aⁿ xii-gá:

—Ndáá càháⁿ-n, dico cue iná chi nàdatacá-güedi sá ngóyó yùhu cóhó xíttohó-güedi —càchí-aⁿ xǎhaⁿ-aⁿ xii-gá.

²⁸ Te Jèsús ní xáhaⁿ-gǎ xii-aⁿ:

—jYòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuíní-n —càchí-gá xǎhaⁿ-gǎ xii-aⁿ.

Te òré-ni-áⁿ ní ndúha déhe-aⁿ.

Jèsús quidé tátna-gá vai ñáiyu cùhú

²⁹ Te sáta dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distrítú Galileá, te cuásaá-gá ïⁿ tindúú te xǎⁿ ní ngóo-gá.

³⁰ Te xǎⁿ núcõo-gá ní quexìo cuéhé víhí ñáiyu, te ndécá-yu ñáiyu yacua, ndihí ñáiyu ní yíchí ïⁿ xio ndaha-xi, ndihí ñáiyu cuáá, ndihí ñáiyu ñìhí, te vai dava-gá cue ñáiyu cùhú tnáhá dava-gá núú cuéhé ndécá-yu ní quexìo núú ndécú-gǎ. Te ní taxi ndecu ñàhá-yu núú Jèsús te ní quide tátna ñaha-gǎ xii-yu te ní ndúha-yu.

³¹ Te nchaá ñáiyu xíndecu-áⁿ ío ní cuñúhu-yu sá dúcáⁿ ní xiní-yu ní cuu ní nacáháⁿ nchaá ñáiyu ñìhí, ndihí cuendá sá ní ndúha nchaá cue ñáiyu yacua, ndihí cuendá sá ní ndúha cue ñáiyu ní yíchí ïⁿ xio ndaha-xi, ndihí cuendá sá ní ndúha núú cue ñáiyu cuáá. Te nchaá-yu ní cachí-yu sá ío càhnu cuu Yá Ndiõxí Yáá cúú Ndiõxí cue ñáiyu isràél.

Jèsús dácaxi-gá cúmí mǐl cue téé te dǐⁿ ñáiyu dǐhí ndihí landú

(Mr. 8:1-10)

³² Te Jèsús ní cana-gá cue téé xica cuu ndihí-gá, te ní xáhaⁿ-gǎ xii-güedé:

—Yúhú cundàhú iní-í nchaá ñáiyu-a, chi sa ní cuu úní nduu ndècu ndihí ñàhá-yu xii-o ìha, te ñá túú tnàhí-gá sá cǎxí-yu, te ñá túú cuíní-í natendaha-í-yu núhú tnámã-yu vehé-yu, chi ná ndéé cuáháⁿ cuneé-yu docó ichi —càchí-gá xǎhaⁿ-gǎ xii-güedé.

³³ Te ní xáhaⁿ-güedé xii-gá:

—¿Te ndéé níhí-ó sǎ cuañaha-o càxi nchaá ñáiyu-a, te ío cuéhè-yu te ñá túú nǎ ío ìha chi cùu-xi xítí yucu-í? —càchí-güedé xǎhaⁿ-güedé xii-gá.

³⁴ Te Jèsús ní xícáⁿ tnúhú-gǎ núú-güedé, te xǎhaⁿ-gǎ:

—¿Ná daha-gá paá ndécú ndihí-ndo-í? —cachí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tnàhá pàá ndihi ñí ùú-gá chácá —càchí-güedé xàhaⁿ-güedé xii-gá.

³⁵ Te Jèsús ní xáhaⁿ-gã xii nchaa ñáyiú sá ná ngõo-yu nchaá-yu, te ní ngóo-yu.

³⁶ Te ní queheⁿ-gá ndi ùsá pàá-áⁿ ndi ñí ùú-gá chácá-áⁿ, te ní ndacáⁿ táhú-gã núú Yá Ndiõxí, te dàtnùní ní táhú cuèchi-gá pàá-áⁿ ndihi chácá-áⁿ te ní sáñaha-gã xii cue téé xica cuu ndihi-gá ní dácãhñu-güedé nchaa ñáyiú-áⁿ.

³⁷ Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatàcá-güedé nchaa sá ñí quendóo, te ní chítú ùsá tnàhá tídihi mee-ni sã ñí quendóo-áⁿ.

³⁸ Te núú ncháá ñáyiú ní xexi te ní xínu cúmí mĩl mee-ni cuè téé chi diu-ni cue téé-áⁿ ñí quiúndehu, te diñí cue ñáyiú diñí ndihi cue landú.

³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñúú Màgdalá.

16

Cue téé cùu fariséú ndihi cue téé cùu saducéú xàhaⁿ-güedé xii Jèsús cada-gá ñí sá vã yõo tnàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xitó ndèé ñáhá-güedé xii-gá, te xàhaⁿ-güedé sá ná cádá-gã ñí sá vã yõo tnàhí ndàcu cada cundehe-güedé nàcuáa cutnùní iní-güedé núú ndáá sá Yá Ndiõxí ní tendaha ñàha-gá xii-gá véxi-gá ñuyíú-a.

² Te Jèsús ní xáhaⁿ-gã xii-güedé:

—Nchòhó chi òré tá cuàa cuáháⁿ te ndàcoto-ndo andiu, te càchí-ndó: “Ío váha cada-xi tneé chi càa vícò tícuèhé andiu”, duha càchí-ndó.

³ Te òré dátneé ndàcòto tucu-ndo andiu, te càchí-ndó: “Vá cádá vãha-xi nduu vitna chi tícuèhé andiu, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sã quidé ndáá te ñá ndáá sá quidé ndáá-ndó! Te cutnùní iní-ndó nàcuáa quide-xi andiu, dico ñá túú cutnùní iní-ndó nàcuáa quèe-xi nchaa sá quidé Yá Ndiõxí vitna.

⁴ Dico nchaa nchòhó ñáyiú ndècu ñuyíú vitna ío cuihna iní-ndó, te ñá túú cuñí-ndó càda ndáá-ndó núú Yá Ndiõxí, te cuñí-ndó càda-í ñí sá vã yõo tnàhí ndàcu cada dico ñá túú nãgá cada-í, chi diu-ni nàcuáa ní quide Yá Ndiõxí ndí Jònás diu-ni ducaⁿ càda tucu-gá vitna —càchí-gá xàhaⁿ-gã xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuèndá cue téé cùu fariséú ndihi cuèndá cue téé cùu saducéú

(Mr. 8:14-21)

⁵ Te òré ní quexìo ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá ñí cunaa-güedé canehe-güedé pàá quiñíⁿ caxi-güedé.

⁶ Te Jèsús ní cáháⁿ-gá dóho-güedé, te xàhaⁿ-gã xii-güedé:

—Na càchí tnúhu-í xii-ndo sã ío quiñi iní-ndó cùndecu-ndo, te vá cádá cuèndá tnàhí-ndo lèvadurá cue téé cùu fariséú ndihi cue téé cùu saducéú —càchí-gá xàhaⁿ-gã xii-güedé.

⁷ Te ní ngüíta-güedé xitnàha-güedé:

—Cuèndá sá ñá túú ní cànehe-o pàá quixi xiáⁿ duha càháⁿ-gá —càchí-güedé xitnàha-güedé.

⁸ Te Jèsús ní cutnùní iní-gá nàcuáa nduu tnúhu xitnàha-güedé, núú ní xáhaⁿ-gã xii-güedé:

—Nchòhó chi ñá túú sàndáá iní ñáhá vãha-ndo xii-í núú xiáⁿ da sá ñá túú ní cànehe-ndo pàá quixi càháⁿ-ndó.

⁹ ¿Te náa ñá ndácú iní-ndó sã núú ùhúⁿ-ni pàá, te ní taxi-í ní dácãhñu-ndo ñí xexi ùhúⁿ mĩl cue téé, chi diu-ni cue téé-áⁿ ñí quiúndehu, te sátá ñí túhú cóhó-güedé te ní chítú titní tídihi mee-ni sã ñí quendóo-áⁿ? Te ñá tècú tnùní-ndó nàcuáa quèe-xi nàcuáa ní quide-í.

¹⁰ ¿Te náa ñá ndácú tucu iní-ndó sã núú ùsá-ni pàá te ní taxi-í ní dácãhñu tucu-ndo ñí xexi cúmí mĩl cue téé, chi diu-ni cue téé-áⁿ ñí quiúndehu, te sátá ñí túhú cóhó-güedé te ní nadatàcá-ndó nchaa sá ñí quendóo, te ní chítú titní tídihi mee-ni sã ñí quendóo-áⁿ?

¹¹ Dico nchòhó chi ñá túú ní quide cuèndá-ndó nàcuáa nduu tnúhu càháⁿ-í òré ní cachí-í sá vã quéhéⁿ cuèndá-ndó lèvadurá

cue tée cùu fariséú ndihi cue tée cùu saducéú, chi ñá díú cuendá pàá ní cãháⁿ-í – cãchí-gã xãhaⁿ-gã xii-güedé.

¹² Te sátá dúcáⁿ ñí xãhaⁿ Jèsús xii cue tée xica cuu ndihi-gá, te ní tecú tnùní-güedé sá xãhaⁿ-gã xii-güedé sá vã tníí-güedé tnúhu cãháⁿ cue tée cùu fariséú ndihi cue tée cùu saducéú, te ñá díú cuendá levadurá sá quíhu yuchi cuãha pàá ní cãháⁿ-gã.

Té Pèlú xãhaⁿ-dë xii Jèsús sá díú-gã cúú-gã Crìstú

(Mr. 8:27-30; Lc. 9:18-21)

¹³ Te Jèsús ní quexìo-gá yucu cue tée ñuú Cèsareá Filipú, te ní xícáⁿ tnúhú-gã núú cuè tée xica cuu ndihi-gá, te xãhaⁿ-gã xii-güedé:

–¿Yoo cùu yúhú Téé cùu ñaní tnáhá-ndó nchãa-ndo cachí cue ñáyiu-va? –cãchí-gã xãhaⁿ-gã xii-güedé.

¹⁴ Te ní xãhaⁿ-güedé xii-gá:

–Davá-yu cãchí-yu sá cúú-n ndíi Juàa téé ní xóo dacuàndute ñaha xii ñáyiu, te davá-yu cãchí-yu sá cúú-n tẽ Èliás, te davá-yu cãchí-yu sá cúú-n ndíi Jeremiás téé ní xóo cãháⁿ tnúhu Yá Ndiõxí ndéé sanaha, àdi cuu-n ingá téé ní xóo cãháⁿ tnúhu-gã ndéé sanaha, duha cãchí-yu –cãchí-güedé xãhaⁿ-güedé xii-gá.

¹⁵ Te Jèsús ní xícáⁿ tnúhú tùcu-gã núú-güedé, te xãhaⁿ-gã xii-güedé:

–Te nchòhó, ¿yoo sàni iní-ndó cùu-í-i? –cãchí-gã xãhaⁿ-gã xii-güedé.

¹⁶ Te té Xímú, àdi Pelú chi úú diu-dé, ní xãhaⁿ-dë xii-gá:

–Yòhó cúú-n Crìstú Yaá ní tendaha Yã Ndiõxí véxi ñuyíú-a, te diu Yá Ndiõxí cúú-gã Yaá ndécú nchãa nduu nchaa quíú, te yòhó cúú-n Dëhe-gã –cãchí-dé xãhaⁿ-dë xii-gá.

¹⁷ Te Jèsús ní xãhaⁿ-gã xii-dé:

–Yòhó té Xímú déhe té Jónás, ío váha táhú-n chi mee Tãtà-í Dútú Ndiõxí ní dácáhu iní ñáhã-gã xii-n nãcuáa cunduu tnúhu cãháⁿ-n, te ñá díú ñí ñáyiu ñuyíú-a ducaⁿ ni dàcahu iní ñáhã-yu xii-n tnúhu-án.

¹⁸ Te yúhú xãhaⁿ-í Pèlú xii-n, te tnúhu-án quée-xí yúú, chi quèe ndáá-xi nãcuáa nàni-n, chi cuu-n ñí téé vá cání ñí cani úú iní-xi canu ichi-n cuè ñáyiu nãcuáa cundecu ndihi ñáhã-yu xii-í. Te nchaa

ñáyiu cùu cuendá-í vá ndácú yucu ñávãha dacuíta nihnu ñaha-xi xii-yu.

¹⁹ Te yúhú taxi-í tnúhu ndee iní cundecu ndihi-n cuendá cunuu-n núú cuè ñáyiu yindaha ñaha Yá Ndiõxí, te nchaa sá ná cãháⁿ-n sã cúú-xí sã vãha, te diu-ni ducaⁿ cãháⁿ Yã Ndiõxí, te nchaa sá ná cãháⁿ-n sã ñà túú cùu-xi sã vãha, te diu-ni ducaⁿ cãháⁿ tucu-gã, chi quide-n nacuáa cuiní-gã –cãchí-gã xãhaⁿ-gã xii-dé.

²⁰ Te sátá dúcáⁿ te ní xãhaⁿ Jèsús xii cue téé xica cuu ndihi-gá sá vã yõo cúñaha-güedé sá díú-gã cúú-gã Crìstú Yaá ní tendaha Yã Ndiõxí véxi ñuyíú-a.

Jèsús cãháⁿ-gã sá cãhni ñãha-güedé xii-gã

(Mr. 8:31-9:1; Lc. 9:22-27)

²¹ Te ndéé dàvá-án ñí ngüíta Jèsús xãhaⁿ-gã xii cue téé xica cuu ndihi-gã:

–Dacuití sã quíhíⁿ-í ñuú Jerusálén, te yacáⁿ cue téé cùu sacuéhé núú ñáyiu isràél, ndihi cue dútú cùnùu, ndihi cue téé dàcuaha ñaha xii ñáyiu nchaa tnúhu ní chidó tnùní ndíi Moisés, nchaa cue téé-án ío dandòho ñaha-güedé xii-í, te cahni ñaha-güedé, dico nduu úní sá cúú-í te ndoto-í –cãchí-gã xãhaⁿ-gã xii-güedé.

²² Te té Pèlú ní cana-dé Jèsús ñí xio, te ní ngüíta-dé tènàá ñáhã-dë xii-gã, te xãhaⁿ-dë:

–¿Sá vã cãchí Ndiõxí sá dúcáⁿ ndòho-n chi ñá túú tàú-n sã dúcáⁿ ndòho-n! –cachí-dé xãhaⁿ-dë xii-gã.

²³ Te ndàa sátá Jèsús nútñí té Pèlú òré ducaⁿ xãhaⁿ-dë xii-gã núu ní nchócuñhu-gã, te xãhaⁿ-gã xii-dé:

–¿Xocuíñí yòhó yucu ñávãha núu-í-a chi dicó quidé tneñu-n! Chi ñá túú sàni iní-ò dàtná sání iní Yã Ndiõxí chi ñí sàni iní-ò ndihi dava-gã cue ñáyiu ndecu ñuyíú-a –cãchí-gã xãhaⁿ-gã xii-dé.

²⁴ Te sátá dúcáⁿ te ní xãhaⁿ-gã xii nchaa cue téé xica cuu ndihi-gã:

–Nchaa ñáyiu cuiní chitnahá ñáhã xii-í, te xini ñuhu-xi dañá-yu vá cádá-gã-yu sá sání iní méè-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í.

²⁵ Te nchaa ñáyiu cuiní sá ñà túú tnàhí ná yãha cundecu ñuyíú-a cuíta nihnú-yu, dico nchaa ñáyiu ñá túú tnàhí yùhú cuèi

nándi sá ná yǎha-yu cundecú-yu ñuyíú-a sá cuendá-í, te ñáyiú-áⁿ naníhí tǎhú-yu.

²⁶ Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu ñu nchaa xíáⁿ ná càda cuíta nihnú-yu te ñá túú vèdana nándíhi-xi sá dúcáⁿ ndècu ndihí-yu nchaa xíáⁿ. Te ni ñⁿ sá ío ñuyíú-a vá chíndèe ñaha-xi xii-yu cuendá naníhí tǎhú-yu.

²⁷ Te ndáá quée-xí tñuhu càháⁿ-í, chi na quixi tucu yúhú Tée cùu ñani tnáhǎ-yu ncháa-yu, te dàvá-áⁿ quiní-yu sá ío càhnu cuu-í dàtná càhnu cuu Tátà-í Dútú Ndiǒxí, te quixi-í ndihí cue espíritú xínú cuèchi núú-gǎ, te dàvá-áⁿ cuǎha-í nchaa ñáyiú sá ndúú tǎhú-yu nàcuáa ndúu sá ní quidé-yu ñⁿ ñⁿ-yu.

²⁸ Te na càchí tñuhu ndáá-í xii-ndo sá ío dava nchòhó ñáyiú ndècu iha vitna vá cùú-ni-ndo, chi cundecu-ni-ndo ndèe quiní-ndó quixi tucu yúhú Tée cùu ñani tnáhǎ-ndó nchàa-ndo taxi tñuní-í nchaa ñáyiú —càchí-gǎ xǎhaⁿ-gǎ xii-güedé.

17

*Ní nadáma dóo Jèsús ndihí núú-gǎ
(Mr. 9:2-13; Lc. 9:28-36)*

¹ Te núú íñú nduu sá dúcáⁿ ñí cáháⁿ Jèsús, te ní xica-gǎ cuásaá-gǎ ñⁿ yucu dúcúⁿ, te ndèca-gǎ té Pèlú, ndihí té Jàcobó, ndihí té Juáa ñani té Jàcobó-áⁿ cuásaá. Te úní tñàhí-ni cue tée-áⁿ ndécá-gǎ cuásaá.

² Te yucu-áⁿ ndécú-gǎ ní nadáma núú-gǎ ndihí dóo-gǎ, te núú-gǎ súúni dàtásaⁿ-xi dàtná quidé-xí núú nchǐcanchii, te dóo-gǎ súúni ní nduu cuixíⁿ dàtná cáá ñùhú cuixíⁿ.

³ Te òré-ni-áⁿ ñí xiní-güedé ndíi Moisés ndihí té Èliás nútní-güedé ndihí-gǎ ndátnùhu ndihí ñaha-güedé xii-gǎ.

⁴ Te té Pèlú ní xǎhaⁿ-dè xii Jèsús:

—Mèstrú, ¡váha ní cuu sá ndécú-ó iha vitna! Te núu cuini-n, te na dàcaa-ndí úní tñáhǎ vehe tñuvixiⁿ, te ñⁿ cuu cuendá-n, te ñⁿ cuu cuendá té Moisés, te ñⁿ cuu cuendá té Èliás —càchí-dé xǎhaⁿ-dè xii-gǎ.

⁵ Te ñini dùcaⁿ cáháⁿ té Pèlú ní quexíó ñⁿ vícò núú ndécú-güedé ní dádǎhu ñaha-xi xii-güedé te súúni chàhnchí. Te xití vícò-áⁿ ñí tecú ní cáháⁿ Yǎ Ndiǒxí, te xǎhaⁿ-gǎ xii-güedé:

—Tée-a cùu-dé Déhe-í tée ío cùu iní-í, te ío cùdíí iní-í-dé, te cundedóho-ndo nchàa tñuhu càháⁿ-dè —duha ní xǎhaⁿ-gǎ xii-güedé.

⁶ Te sá dúcáⁿ ñí cáháⁿ Yǎ Ndiǒxí ní tecú dóho cue tée xica cuu ndihí Jèsús te ío ní yùhú-güedé, te ní ngüíñí xití-güedé te ní nuu núú-güedé ndàa núú ñùhú.

⁷ Te Jèsús cuáháⁿ-gǎ núú xǐndecu cue tée xica cuu ndihí-gǎ, te ní tendaha ñàha-gǎ, te xǎhaⁿ-gǎ xii-güedé:

—Chí ndácuíñí, vá yùhú-ndó —càchí-gǎ xǎhaⁿ-gǎ xii-güedé.

⁸ Te òré ní ndanehe núú-güedé, te ñá túú-gǎ ní xiní-güedé cue tée úú-áⁿ chi mee-ñǎ Jèsús.

⁹ Te òré cuánuu ndihí ñaha Jèsús xii-güedé tñdúú-áⁿ, te ní xǎhaⁿ-gǎ xii-güedé:

—Vá yóo cúñaha-ndo ní ñⁿ sá ní xiní-ndó núú ní sáá-ó-á, te cuu cáháⁿ-ndó dico ndéé ná yǎha ndoto yúhú Tée cùu ñani tnáhǎ-ndó nchàa-ndo sá cùú-í —càchí-gǎ xǎhaⁿ-gǎ xii-güedé.

¹⁰ Te cue tée xica cuu ndihí-gǎ ní xǎhaⁿ-güedé xii-gǎ:

—Cuini-ndí cachí tñuhu-n ñá cuendá cue tée dàcuaha ñaha xii ñáyiú nchaa tñuhu ní chídó tñuní ndíi Moisés càchí-güedé sá dǐhna-gǎ té Èliás quixi, te dàtnúni quixi Yaá tendaha Yǎ Ndiǒxí quixi ñuyíú-a —càchí-güedé xǎhaⁿ-güedé xii-gǎ.

¹¹ Te Jèsús ní xǎhaⁿ-gǎ xii-güedé:

—Ndáá sá códó núu ñⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nàcuáa cùu.

¹² Te na càchí tñuhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáyiú ñá túú ní cùtnuní iní-yu sá díú-dè, te ní quide ñáhǎ-yu xii-dé nchaa nàcuáa ní quixi iní méè-yu, te ñu-ni ducaⁿ càda ñaha tucú-yu xii yúhú Tée cùu ñani tnáhǎ-yu ncháa-yu, chi dandòho ñáhǎ-yu xii-í —càchí-gǎ xǎhaⁿ-gǎ xii-güedé.

¹³ Te cue tée xica cuu ndihí-gǎ ní cutnùní iní-güedé sá cuendá ndíi Juáa tée ní xóo dacuàndute ñaha xii ñáyiú ní cáháⁿ-gǎ.

*Jèsús quidé tǎtna-gǎ ñⁿ tée cuechi tñáhǎ
cuéhé xǐyíhí*

(Mr. 9:14-29; Lc. 9:37-43)

14 Te Jèsús ní nasáá-gá ndihi cue téé ní sáá ndihi-gá tĩndúú-ǎn nùú xĩndecu vài ñáyiu, te ní quexìo ìn tée nùú-gǎ ní ngüíñí xítí-dě, te xǎhaⁿ-dě xii-gá:

15 —Mèstrú, cundàhú iní déhe-í chi tnàhá-dé cuéhé xǐyìhí, te ío dándoho ñaha-xi xii-dé, te ní cuu vài xito daquéé ñaha-xi nùú ñùhú xii-dé, te ní cuu vài tucu xito dangaunihnu ñaha-xi ndute xii-dé.

16 Te sa ndèca-í-dé ní quixi nùú cuè téé xica cuu ndihi-n dico ñá túú ní ndàcu-güedé cada tátna ñaha-güedě xii-dé —càchí-dé xǎhaⁿ-dě xii-gá.

17 Te Jèsús ní xǎhaⁿ-gǎ xii nchaa ñáyiu xĩndecu-áⁿ:

—Nchaa nchòhó ñáyiu ndècu ñuyíú-a, ío sàá iní-ndó chi ñá túú cuíní-ndó quĩndáá iní-ndó Yǎ Ndiǒxí, te ní cuu vài nduu quide ndee iní-í nchaa sá quídé-ndó. ¿Te ná ndéé ama vá dúcáⁿ-gǎ cada-ndo-i? Te chí cándèca téé cùhú-áⁿ táquixi iha —cachí-gá xǎhaⁿ-gǎ xii-yu.

18 Te Jèsús ní tenáá-gá espíritú cundìhi yucu ñávǎha yìhi ñaha xii téé-áⁿ, te ní quee ñaha-xi xii-dé, te òré-ni-áⁿ nĩ ndúha-dé.

19 Te sátá dúcáⁿ te òré ndécú mèe Jesús ndihi cue téé xica cuu ndihi-gá, te ní xicáⁿ tnúhú-güedě nùú-gǎ, te xǎhaⁿ-güedě xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cundìhi yucu ñávǎha yìhi ñaha xii téé-áⁿ —càchí-güedé xǎhaⁿ-güedě xii-gá.

20 Te Jèsús ní xǎhaⁿ-gǎ xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yǎ Ndiǒxí. Te na càchí tnúhu ndáá-í xii-ndo sǎ nùu nchòhó quĩndáá ndisa iní-ndó Yǎ Ndiǒxí cuèdicó luha líí dàtná lìhli ndíquíⁿ yutnu nàni mostázá, te ducaⁿ te cuu cúñaha-ndo xii ìn tĩndúú xocuíñí-xi nùú ndécú-xi te xocuíñí-xi. Te nchaa nùú sǎ vǎha ndacu-ndo càda-ndo te nùu na quĩndáá iní ndisa-ndo Yǎ Ndiǒxí.

21 Te xini ñuhu-xi sá ío cáháⁿ ndihi-ndo-gǎ te ñá túú tnàhí ná caxi-ndo cáháⁿ ndihi-ndo-gǎ, te ducaⁿ te ndacu-ndo queñuhu-ndo espíritú cundìhi yucu ñávǎha yìhi ñaha xii ñáyiu, dàtná cúú espíritú sá yíhí ñaha xii téé-áⁿ ní cùu —cachí-gá xǎhaⁿ-gǎ xii-güedé.

Jèsús càháⁿ tucu-gá sá cáhni ñaha-güedé xii-gá

(Mr. 9:30-32; Lc. 9:43-45)

22 Te nini xica cuu Jesús ndihi cue téé xica cuu ndihi-gá distritú Galileá, te ní xǎhaⁿ-gǎ xii-güedé:

—Yúhú Téé cùu ñaní tnàhá-ndó nchàa-ndo sáá ìn nduu te cuáha cuèndá ñáhá-güedě xii-í nùú cuè téé cùu úhú iní ñáhá,

23 te cahni ñaha-güedě xii-í dico nduu úní sá cùú-í te ndoto-í —càchí-gá xǎhaⁿ-gǎ xii-güedé.

Te sá dúcáⁿ nĩ xǎhaⁿ-gǎ xii-güedé, te ío ní ndíhú iní-güedé.

Díhúⁿ cuèndá veñúhu

24 Te òré ní quexìo Jesús ndihi cue téé xica cuu ndihi-gá ñuú Capèrnaúm, te cue téé quide cobrá díhúⁿ cuèndá veñúhu ní sáháⁿ-güedé ní cáháⁿ ndihi-güedé té Pèlú, te xǎhaⁿ-güedé:

—¿Chǎhu mèstrú-ndó úú díhúⁿ sǎ nání drǎcmá cuèndá veñúhu ǎn ñáhá? —càchí-güedé xǎhaⁿ-güedě xii-dé.

25 Te té Pèlú ní xǎhaⁿ-dě:

—Chǎhu-dé —càchí-dé xǎhaⁿ-dě xii-güedé.

Te té Pèlú cuánguihu-dé xití vehe nùú ndécú Jesús, te díhna-gá ní cáháⁿ-gǎ, te xǎhaⁿ-gǎ xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè téé yĩndaha ñáyiu ndècu ñuyíú-a cuèndá nchaa sá ndúú yǎhu ñuú-güedé ndihi cuèndá nchaa díhúⁿ sǎ ngàútnàha, cue ñáyiu ñuú-güedé ǎn cuè ñáyiu véxi xica quide cobrá-güedé? —càchí-gá xǎhaⁿ-gǎ xii-dé.

26 Te té Pèlú ní xǎhaⁿ-dě xii-gá:

—Cue ñáyiu véxi xica quide cobrá-güedé —càchí-dé xǎhaⁿ-dě xii-gá.

Te Jèsús ní xǎhaⁿ-gǎ xii-dé:

—Te nùu ducaⁿ te cue ñáyiu ñuú-güedé ñá túú nǎ chǎhu-yu te nùu ducaⁿ.

27 Dico cuèndá sá vǎ yòo dasátú-ó iní-xi, te cuáháⁿ làgúná te dàquéé-n sǎ tníí-n chǎcá xití ndute, te chácá díhnanuu na tàva-n te cundehe-n yùhu-di, chi yìhi ìn díhúⁿ cuixíⁿ. Te díhúⁿ-ǎn canehe-n quíhíⁿ chǎhu-n cuèndá-í ndihi cuèndá-n, chi díhúⁿ-ǎn sa tnàhá quéyǎhu cuèndá-ó ndí ndúú-ó —càchí-gá xǎhaⁿ-gǎ xii-dé.

18

Cue tée ndücu tnúhu núú Jèsús yoo ío-gá cúnüu

(Mr. 9:33-37; Lc. 9:46-48)

¹ Te sáta dúcáⁿ te cue tée xica cuu ndíhi Jèsús ní sáháⁿ-güedé núú-gá, te xáhaⁿ-güedé xii-gá:

—Cachí tnúhu xii-ndí, yoo ío-gá cúnüu núú cuè ñáyiú yíndaha ñaha Yá Ndiöxí — càchí-güedé xáhaⁿ-güedé xii-gá.

² Te Jèsús ní cana-gá ìⁿ té lîhli te ní sanutnî ñaha-gă xii-dé cuádava tnuú-güedé.

³ Te xáhaⁿ-gă xii-güedé:

—Na càchí tnúhu ndáá-í xii-ndo sã nüú vá dáña-ndó nchàa sã ñà túú vâha quide-ndo, te nduu ndàhú iní-ndó dàtná ndàhú iní té lîhli-a, te vá ndúú tãhú-ndó ndíhu ndaha ñaha Yá Ndiöxí xii-ndo.

⁴ Te ñáyiú quide datná quidé tẽ lîhli-a ndàhú iní-yu, te ñá túú quide cahnú-yu mée-yu, ñáyiú-áⁿ ìo cunúú-yu núú ndécú Yá Ndiöxí táxí tnùnî-gá.

⁵ Te nchaa ñáyiú na quèheⁿ cuendá ìⁿ landú dàtná té lîhli-a cuendá sã cúú ìní ñáhă-yu xii-í ñă, te cada iní-yu sã yûhú ní queheⁿ cuendá-yu —càchí-gá xáhaⁿ-gă xii-güedé.

Quihi iní-ó vã cündècu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xáhaⁿ tùcu-gá xii-güedé:

—Te núu ìⁿ tée na dàcaháⁿ-dé cue ñáyiú sàndáá ìní ñáhá xii-í cadá-yu nándi sã cuèhé sã dúhá, te váha-gá sã ná dàcutu ndeé-güedé ìⁿ yúú yödó dúcúⁿ-dẽ, te dàquée ñaha-güedé xii-dé xití ndute làmár, te ñá díú sã cündècu-dé ducaⁿ càda-dé.

⁷ ¡Te ndàhú ní cuu nchaa ñáyiú xîndecu ñuyíú-a, chi coo cue tée dacàháⁿ ñáhá xii-yu cadá-yu nándi sã cuèhé sã dúhá te dacuítí sã dúcáⁿ càda-xi! ¡Dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sã cuèhé sã dúhá!

⁸ Te núu ìⁿ xio ndaha-ndo àdi ìⁿ xio sáhá-ndó quide-xi quide-ndo nándi sã cuèhé sã dúhá, te quehndé-ndó ná cuíta, chi váha-gá sã nánihí tãhú-ndó cuèi na cuíta ìⁿ xio ndaha-ndo àdi ìⁿ xio sáhá-ndó, te ñá díú sã quihíⁿ-ndó ñihí ní ndúú-ndó nüú ñùhú núú càyú.

⁹ Te núu ìⁿ xio tinüu-ndo quide-xi quide-ndo nándi sã cuèhé sã dúhá, te tava-ndo na cuíta-xi, chi váha-gá sã nánihí tãhú-ndó cuèi na cuíta ìⁿ xio tinüu-ndo, te ñá díú sã ndí ndúú xio núú-ndó quihíⁿ-ndó nüú ñùhú núú càyú.

Cuendá ìⁿ mbéé quiti ní xíta

(Lc. 15:3-7)

¹⁰ Te vá dáquée tihú-ndó cuè ñáyiú cùu cuendá-í cuèi cùú-yu ñáyiú ío ndàhú iní-xi. Te na càchí tnúhu-í xii-ndo sã cuè espíritú xínú cuèchi núú Yá Ndiöxí, cue espíritú néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xi nüú Tãtã-í Dútú Ndiöxí Yaá ndécú àndü.

¹¹ Te ducaⁿ chí yúhú Tée cùu ñanî tnáhá-ndó nchaa-ndo véxi-í ñuyíú-a dàcácu nihnu-í ñáyiú núú ùhú núú ndàhú, ñáyiú ta xíta nihnu cuáháⁿ.

¹² ¿Te nása sàni iní-ndó cuendá ìⁿ tée ndècu ìⁿ ciendú mbéé-xi?, chí núu na cuíta ìⁿ-di te dàndóo-dé cúmídícó sãhúⁿ cúmí-di cundecu-di ìⁿ yucu te quihíⁿ-dé cúnúndúcú-dẽ quiti ní xíta-áⁿ.

¹³ Te núu na nánihí-dẽ-di, te nchòhó sa cùnnumí iní-ndó sã ío-gá cudíí ìní-dé cuendá quiti ní xíta-áⁿ òré naníhí-dẽ-di dàcúxí cúmídícó sãhúⁿ cúmí quiti ñá túú ní xíta-áⁿ.

¹⁴ Te ducaⁿ sãtnahá-xi quide Tátá-ó Dútú Ndiöxí Yaá ndécú àndü, chí cuínî-gá sã vá cuíta ní ìⁿ cue ñáyiú cùu cuendá-gá.

Cada càhnu iní-ó sã quidé ñaha tnaha ñáyiú-o

(Lc. 17:3)

¹⁵ Te núu ìⁿ ñáyiú ndècu ndíhi-ndo ní quidé-yu ìⁿ sã ñà túú tàú-yu cadá-yu sã cúú-xi-ndó, te cáháⁿ-ndó dôho-yu núú mée nüú ìⁿ-ndó ndíhí-yu cuendá sã ná ndixi cuèchi iní-yu sã ñà túú quide váha-yu. Te núu ní tní-yu tnúhu ní xáhaⁿ-ndo xii-yu, te ní ndacu-ndo ñi nacanu ichi-ndõ-yu.

¹⁶ Te núu ñá túú ní cuínî-yu tní-yu tnúhu xáhaⁿ-ndo xii-yu, te nducu-ndo ìⁿ àdi úú tnáhá cue tée canehe núú-güedé cuendá cundedóho-güedé nàcuáa ndüu tnúhu ndàtnúhu-ndo ndíhí-yu.

¹⁷ Te tnáhá cue tée-áⁿ cãháⁿ-güedé dôho-yu, dico núu ní tnúhu càháⁿ cue tée-áⁿ ñà túú ní cuínî-yu tní-yu, te dàtúu-ndo nüú

dàva-gá ñáiyu ndècu ndihí-ndo ichi Xítóhó Jesucristú cuendá cutnùnì iní-yu nàcuáa quide ñáiyu-án. Te núu ñáiyu ndècuéchi-án ñà túú ní cuiní-yu tní-yu tnúhu sá ñí xáhaⁿ dàva-gá cue ñáiyu ndècu ichi-gá, te cada-ná iní-ndó sá cúu-yu ñáiyu ñà túú ndècu ichi Yá Ndióxi dàtná cue té cuihna iní-xi quide cobrá ñáhá xii ñáiyu cuendá impuèstú.

18 Te na cächí tnúhu ndáá-í xii-ndo sá nõu nchòhó ná cächí-ndó sá ndécú cuéchi ñáiyu, te ñu-ni ducaⁿ cáháⁿ Yá Ndióxi, àdi cachí-ndó sá ñà túú cuéchi-yu te ñu-ni ducaⁿ cáháⁿ tucu-gá, te ducaⁿ chi nchòhó quidé-ndó nàcuáa cáháⁿ-gá.

19 Te na cächí tnúhu-í xii-ndo sá nõu úú tnàhá-ndó cùu ñnuu-ndo caháⁿ ndihí-ndo Tàtá-í Dútú Ndióxi Yaá ndécú àndiú xicáⁿ-ndó nõu-gá nõu ná cúu sá cuiní-ndó, te taxi-gá nõu ná cúu sá xicáⁿ-ndó nõu-gá.

20 Te núu úú tnàhá-ndó àdi únì tnàhá-ndó ñí nataká-ndó ñí xichi cuendá sá ñúhú iní ñáhá-ndó xii-í, te xiáⁿ ndécú ndihí ñaha-í xii-ndo —cächí-gá xáhaⁿ-gá xii-güedé.

21 Te té Pèlú ní sáháⁿ ndehe yatni-dé núu Jèsús, te xáhaⁿ-dè xii-gá:

—Mèstrú, cachí tnúhu xii-í ná daha xito cada cànhu iní-í tnàha ñáiyu-í te núu ñí sá ná càda ñahá-yu xii-í. ¿Cuèdicó úsá xito-á?
—cächí-dé xáhaⁿ-dè xii-gá.

22 Te Jèsús ní xáhaⁿ-gá xii-dé:

—Yúhú cächí-í sá ñà díu-ní úsá xito cada cànhu iní-n-yu, chi únídico úxí xito ndihí úsá ndihí úsá xito cada cànhu iní-n-yu — cächí-gá xáhaⁿ-gá xii-dé.

Cuendá tée ñà túú quide cahnú iní tnàha ñáiyu-xi

23 Te xáhaⁿ tucu-gá xii-güedé:

—Na càni-í ñí cuendú núu-ndó nàcuáa tecú tnùnì-ndó nàcuáa cada-xi òré ndíhu ndaha ñàha Yá Ndióxi xii ñáiyu. ñí té yìndaha ñaha xii ñáiyu ní sani iní-dé sá càdá ndáá-dé ndihí cue té xinu cuechi núu-dè cuendá nchaa sá tàú-güedé núu-dè.

24 Te òré sa ní ngündecu túha-dé te ní quexìo ñí té xinu cuechi núu-dè. Te té-án tàú-dé cuéhé víhí díhúⁿ nõu-dè, chi tàú-dé úxí mǐ díhúⁿ sá nánì tàlentú.

25 Te té xinu cuechi-án ñà túú díhúⁿ ndécú ndihí-dé nacháhu-dé sá tàú-dé núu patróonⁿ-dè-án, núu xiáⁿ ní táuchíúⁿ tée cùu patróonⁿ-dè-án dico ñàha-güedé xii-dé ndihí

ñadhí-dé ndihí cue déhe-dé ndihí nchaa sá ndécú ndihí-dé cuendá nchaá-yu cuú-yu ñáiyu ñà túú tnàhí dàhá quee núu chíúⁿ patróonⁿ-xi, te ducaⁿ te ndéyáhu sá tàú-dé núu patróonⁿ-dè.

26 Te té xinu cuechi-án ñí ngüñí xiti-dè núu patróonⁿ-dè, te xáhaⁿ-dè: “Patróonⁿ, cáháⁿ ndàhú-í núu-n sá ño ndee ño cànhu cada iní-n sá dúhá tàú-í núu-n, te ñà túú ná caní iní-n chi nacháhu-í nchaa sá tàú-í núu-n”, cächí-dé xáhaⁿ-dè xii patróonⁿ-dè.

27 Te té cùu patróonⁿ-dè-án ñí cundàhú iní ñáhá-dè xii-dé, te ní quide cànhu iní ñáhá-dè, te ní dàhá ñàha-dé cuánuhú-dé.

28 Te té xinu cuechi-án ñí naníhí-dè ñí té xinu cuechi ndihí-dé ichi cuánuhú-dé, te té ní naníhí-dè-án tàú-dé sacú-ñí díhúⁿ nõu-dè chi ñí ciendú-ñí díhúⁿ denariú tàú-dé. Te ní tní-dé tée tàú nõu-dè-án dácuèhné ñáhá-dè xii-dé, te xáhaⁿ-dè: “Nacháhu sá tàú-n nõu-í”, cächí-dé xáhaⁿ-dè.

29 Te tée tàú-án ñí ngüñí xiti-dè núu tée dii nõu-xi tàú-dé-án, te xáhaⁿ-dè: “Cáháⁿ ndàhú-í núu-n sá càdá cànhu iní ñáhá-n xii-í sá tàú-í núu-n, te nacháhu cuéé-í nchaa sá tàú-í núu-n”, cächí-dé xáhaⁿ-dè.

30 Dico tée dii nõu-xi tàú-dé-án ñà túú ní cuiní-dé cada ndee iní-dé cundetu-dé nacháhu cuéé té-án sá tàú-dé, chi ní chihí ñaha-dè vecaá cuendá yacáⁿ quihí-dé ndéé nacháhu-dé nchaa sá tàú-dé.

31 Te dava-gá cue té xinu cuechi ní xiní-güedé nàcuáa ní quide té-án, te ní cudééⁿ-güedé núu-dè, te ní sáháⁿ-güedé ní xitnùhu-güedé té cùu patróonⁿ-güedé sá dúcáⁿ ñí quide-dé.

32 Te té cùu patróonⁿ-güedé-án ñí cana-dé té ducaⁿ ñí quide-án, te ní xáhaⁿ-dè: “Yòhó cúu-n ñí té ño cuihna iní-xi xinu cuechi nõu-í, chi yúhú ní quide cànhu iní ñàhá-í xii-n cuendá nchaa sá tàú-n nõu-í òré ní cáháⁿ ndàhú-n.

33 Te tnàhá yòhó tàú-n dùcaⁿ cada-n cada cahnú iní-n tée xinu cuechi ndihí-n nõu-í cuendá nchaa sá tàú-dé núu-n dàtná ní quide ñaha-í xii-n ñí quide cànhu iní-í cuendá nchaa sá tàú-n”, cächí té cùu patróonⁿ-án xáhaⁿ-dè xii té ducaⁿ ñí quide-án.

34 Te té cùu patróonⁿ-án ñí cudééⁿ víhí-dè sá dúcáⁿ ñí quide té-án, te ní táuchíúⁿ-dè dandòho ñaha-güedé xii-dé ndéé nacháhu-dé nchaa sá tàú-dé —duha

ní cani Jèsús cuèndú núú-güedě.

³⁵ Te xáhaⁿ tùcu-gá xii-güedě:

—Dàtná ní quide tée cùu patróoⁿ-ãⁿ ní dándóhó-dě tée tàú núú-dě-áⁿ ducaⁿ càda ñaha Tàtá-í Dútú Ndiòxí Yaa ndécú àndiu xii-ndo, te núu vá ní yùhu ni iní-ndó càda cahnu iní-ndó sã quidé ñaha tnaha ñáyi-ndo xii-ndo —cachí-gá xáhaⁿ-gã xii-güedě.

19

Jèsús càháⁿ-gá cuèndá cue ñáyi-ndo dàña tnaha

(Mr. 10:1-12; Lc. 16:18)

¹ Te sátá ní yáha ducaⁿ ní càháⁿ Jèsús, te ní ndee-gá distritú Galileá cuáháⁿ-gá ndaa ingá xio yúte Jòrdán yucu distritú Jùdeá.

² Te ío cuéhé ñáyi-ndo nchìcúⁿ ñáhá xii-gá cuáháⁿ, te yàcáⁿ ní quide tátna-gá nchaa ñáyi-ndo cùhú.

³ Te ní quexìo ìⁿ úú cue tée cùu fariséú núú ndécú Jèsús xító ndéé ñáhá-güedě xii-gá ñuu nása cunduu tnúhu càháⁿ-gá, te xáhaⁿ-güedě xii-gá:

—Véxi-ndí xicáⁿ tnúhú-ndí núú-n, ¿cúu dàña ìⁿ téé ñadìhí-dé ñuu ndédani càa ìⁿ sá ñà túú cùndáá-yu-ãⁿ? —càchí-güedě xáhaⁿ-güedě xii-gá.

⁴ Te Jèsús ní xáhaⁿ-gã xii-güedě:

—Te nchòhó, ¿náa ñá túú dàcuaha-ndo núú tütú Yá Ndiòxí, te diu núú tütú-gá càháⁿ-xi sá cùtnàhá ní cadúha-gá ñáyi-ndo, te téé ñadìhí ní cadúha-gá-ãⁿ?

⁵ Te duha càchí tucu-xi núú tütú Yá Ndiòxí nàcuáa ní càháⁿ-gá: “Cue téé na ñadìhí-xi te dèⁿ-ná cada-güedě tátá-güedě ndihí náná-güedě, chi ñadìhí-nã-güedě cuu cuu ndihí-güedě, te cada iní-ndó sã ìⁿ-ná yiqui cùñú cuú-yu cundecú-yu”, duha càchí Yá Ndiòxí núú tütú-gá.

⁶ Te xíãⁿ ñuu cada iní-ndó sã cué ñáyi-ndo úú-áⁿ ìⁿ-ná yiqui cùñú cuú-yu, te ñá túú-gá ndí díⁿ ndí díⁿ yiqui cuñú cuú-yu. Núu xíãⁿ ñá túú nduu váha-xi dàña cué téé ñadìhí-güedě, chi mee Yá Ndiòxí ní cachí-gá sá cúú úú-yu cundecú-yu —càchí Jèsús xáhaⁿ-gã xii-güedě.

⁷ Te ní xáhaⁿ-güedě xii Jèsús:

—Te núu ducaⁿ, ¿te ná cuèndá ndí Moisés ní cachí ndí sá ñuu ìⁿ téé cuíní-dé dàña-dě

ñadìhí-dé, te cuu cadúha-dé ìⁿ tutú núú càháⁿ-xi sá ní dáñá-dě ñadìhí-dé, te ducaⁿ te cuu dàña ñaha-dé ní cachí ndí vãⁿ? —càchí-güedě xáhaⁿ-güedě xii-gá.

⁸ Te Jèsús ní xáhaⁿ-gã xii-güedě:

—Te ducaⁿ ní cachí ndí Moisés sá cúú dàña-ndo ñadìhí-ndó, chi nchòhó ío sã iní-ndó, dico ndéé díhna chi ní tecú tnúhu nchaa cue téé sá vã dáñá-güedě ñadìhí-güedě.

⁹ Dico yúhú càchí tnúhu-í xii-ndo sã ñuu ìⁿ téé na dàña-dé ñadìhí-dé te naqueheⁿ-dé ingá ñadìhí te ío nèhé quidé-dě, te núu ñá díú cuèndá sá càháⁿ ndihí-aⁿ ingá téé ducaⁿ na dàña ñaha-dé. Te sá dúcáⁿ cuèndá-ni na dàña ìⁿ téé ñadìhí-dé, te ìⁿ-ni cuéchi cùu-xi ndihí cuéchi quide téé ndéca ñadìhí te càháⁿ ndihí-dé ingá ñadìhí —càchí-gá xáhaⁿ-gã xii-güedě.

¹⁰ Te cue téé xica cuu ndihí-gá ní xáhaⁿ-güedě xii-gá:

—Te núu ducaⁿ cùu cuèndá cue téé ndihí ñadìhí-güedě, te váha-gá sá vã cándéca cue téé ñadìhí —càchí-güedě xáhaⁿ-güedě xii-gá.

¹¹ Te Jèsús ní xáhaⁿ-gã xii-güedě:

—Ñá ncháá ñáyi-ndo ducaⁿ nduu táhú-yu cundecú-yu, chi mee-ni ñáyi-ndo ní cachí Yá Ndiòxí sá dúcáⁿ tnàhí nduu táhú cundecu mee.

¹² Te ío cue téé ducaⁿ tnàhí ní nduu táhú-güedě ndéé òré ní cacu-güedě sá vã cándéca-güedě ñadìhí. Te ío cue téé ñá ndácú-güedě candéca-güedě ñadìhí cuèndá sá ní quide ñaha dàva-gá cue tnàha téé-güedě xii-güedě. Te dàva-güedě ñá túú cándéca-güedě ñadìhí chi cuíní-güedě sá vã dáñá ndéé-güedě cunu cuechi-güedě núú Yá Ndiòxí. Te nchaa cue téé ducaⁿ ní nduu táhú núú Yá Ndiòxí cundecu mee, te váha-ni te núu na cundecu mee-güedě —càchí-gá xáhaⁿ-gã xii-güedě.

Jèsús xicáⁿ táhú-gã núú Yá Ndiòxí cuèndá landú

(Mr. 10:13-16; Lc. 18:15-17)

¹³ Te ìⁿ úú ñáyi-ndo ndéca-yu landú líhli cuáháⁿ núú Jèsús, chi cuíní-yu sá téndàha ñaha-gá xii-güexi, te cácaⁿ táhú-gã núú Yá Ndiòxí cuèndá-güexi. Te cue téé xica cuu ndihí-gá ní ngüita-güedě ténáa ñáhá-güedě xii-yu, te xáhaⁿ-güedě sá vã dúcáⁿ càdá-yu.

14 Te Jèsús ní xáhaⁿ-gã xii-güedé:

—Chí dáñá ná quixi nahi cue landú lĩhli-áⁿ nũ-í-a, te vá càdí-ndó ìchi-güexi, chi dàtná cúú vǎha iní cue landú lĩhli-áⁿ ducaⁿ cùu váha iní cue ñáyiú yìndaha ñaha Yá Ndiõxí —càchí-gá xǎhaⁿ-gã xii-güedé.

15 Te ní tendaha ñàha-gá xii-güexi, te ní xícáⁿ táhú-gã núú Yá Ndiõxí cuendá-güexi, te sátá dúcáⁿ nĩ quide-gá te ní xica-gá cuaháⁿ-gá.

*Èⁿ téé cuica càháⁿ ndihí-dé Jèsús
(Mr. 10:17-31; Lc. 18:18-30)*

16 Te èⁿ téé cuechi nĩ quexio-dé núú ndécú Jèsús, te xicáⁿ tnúhú-dě núú-gã, te xǎhaⁿ-dě xii-gá:

—Yòhó Mèstrú, cùu-n téé ío váha iní-xi, te cuení-í nũu vá cündèe iní-n càchí tnúhu-n ná cúú sǎ vǎha cada-í cuendá nduu táhú-í cundecu-í ndihí Yá Ndiõxí nĩ caa nĩ quíhíⁿ —càchí-dé xǎhaⁿ-dě xii-gá.

17 Te Jèsús ní xáhaⁿ-gã xii-dé:

—¿Te cùtnuní iní-n nàcuáa ndùu tnúhu càháⁿ-n sǎ yǔhú váha iní-ǎⁿ?, chi èⁿndi díi-ni Yá Ndiõxí ío váha iní-gá. Te núu cuení-n nàníhí táhú-n te tni-n nchàa tnúhu càháⁿ Yá Ndiõxí, tnúhu sá sánú ìchi ñaha xii ñáyiú nàcuáa cadá-yu cundecú-yu —càchí-gá xǎhaⁿ-gã xii-dé.

18 Te téé cuechi-ǎⁿ ní xáhaⁿ-dě xii-gá:

—¿Te ndëndida càa tnúhu càháⁿ Yá Ndiõxí cada-í-i? —càchí-dé xǎhaⁿ-dě xii-gá.

Te Jèsús ní xáhaⁿ-gã xii-dé:

—Te duha ní cachí Yá Ndiõxí cada ñáyiú: “Vá cáhni-ndó tnàha ñáyiú-ndo, vá càháⁿ ndihí-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyiú dìhí tucu vá càháⁿ ndihí-ndo tée te núu ñá díú yì-ndo cuu-güedé, te vá dúhú-ndó sǎ ndécú ndihí tnaha ñáyiú-ndo, vá dácàcu-ndo cuèchi neñúú sá cúú-xí tnàha ñáyiú-ndo.

19 Te canehe-ndo sǎ yìñuhu núú tǎtá-ndó ndihí núú nǎná-ndó, te cundàhú iní-ndó tnàha ñáyiú-ndo dàtná cündàhú iní-ndó mèe-ndo”, duha ní cachí Yá Ndiõxí cada ñáyiú —càchí-gá xǎhaⁿ-gã xii-dé.

20 Te téé cuechi-ǎⁿ ní xáhaⁿ-dě xii-gá:

—Nchaa xǎⁿ ní ngüíta-í quidè-í ndéé cùtnàhá cúú làndú-í, ¿te vitna nágá cúmǎni cada-í-i? —càchí-dé xǎhaⁿ-dě xii-gá.

21 Te Jèsús ní xáhaⁿ-gã xii-dé:

—Te núu cuení-n cùu-n èⁿ téé ío váha cada ndáá, te cuaháⁿ dico-n nchàa sá ndécú ndihí-n, te díhú-n cuǎha táhú-n cuè ñáyiú ndàhú, te ducaⁿ te nduu táhú-n ngündecu váha-n núú ndécú Yá Ndiõxí táxí tnúni-gá. Te sátá ná yǎha ducaⁿ càda-n te quixi-n chitnahá ñáhá-n xii-í —càchí-gá xǎhaⁿ-gã xii-dé.

22 Te sá dúcáⁿ nĩ xáhaⁿ Jèsús xii-dé te ío ní cundiýí-dé, chi ío cuica-dě, te ní xica-dé cuaháⁿ-dé.

23 Te Jèsús ní xáhaⁿ-gã xii cue téé xica cuu ndihí-gá:

—Na càchí tnúhu ndáá-í xii-ndo sǎ ìo úhú quíndáá iní ñaha cuè ñáyiú cuica xii Yá Ndiõxí cuendá ndíhu ndaha ñàha-gá xií-yu.

24 Te na càchí tnúhu tucu-í xii-ndo sǎ yǎchí-gá yáha èⁿ càméyu yaú èⁿ yiqui tìcú dàcúúxí sǎ quíndáá iní èⁿ ñáyiú cuica Yá Ndiõxí cuendá ndíhu ndaha ñàha-gá xií-yu —càchí-gá xǎhaⁿ-gã xii-güedé.

25 Te sá dúcáⁿ nĩ cáháⁿ Jèsús, xǎⁿ ío ní cuñúhu cue téé xica cuu ndihí-gá, te ní ngüíta-güedé xitnàha-güedé:

—¿Yoo naníhí táhú te núu ducaⁿ vǎiⁿ? —càchí-güedé xitnàha-güedé.

26 Te Jèsús ní ndacoto-gá núú-güedé, te xǎhaⁿ-gã xii-güedé:

—Nchaa ñáyiú ñuyú-a chi vá ndácü-yu ná cadá-yu nàcuáa ndíhu ndaha ñàha Yá Ndiõxí xií-yu, dico mee-gã chi ndacu-gá ndíhu ndaha ñàha-gá xií-yu chi nchaandi túhú sá vǎha ndàcu-gá quidè-gã —càchí-gá xǎhaⁿ-gã xii-güedé.

27 Te té Pèlú ní xáhaⁿ-dě xii-gá:

—Nchúhú ní dándõ-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sǎ nihí-ndí nduu táhú-ndí sá dúcáⁿ nĩ quide-ndí-i? —càchí-dé xǎhaⁿ-dě xii-gá.

28 Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sǎ ná sǎá nduu, ndùu saa nchaa sá ío andíu ndihí ñuyú-a, te dàvá-áⁿ cunucóo yúhú Tée cùu ñani tnàhá-ndó nchàa-ndo èⁿ núú xilé váha, te nchaa ñáyiú quini-yu sǎ ìo càhnu cuu-í, te nchòhó cue téé ní tuha ñaha xii-í tnàhá-ndó cùnucóo-ndo núú èⁿ caa xilé váha ndi ùxúú tnàhá-ndó, te xǎⁿ cunucóo-ndo càda ndáá-ndó cuèchi ndi ùxúú xichi cue ñáyiú isràèl.

29 Te nchaa ñáyiú na dàndóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na càdá-yu sá cuèndá-í te ío-gá cuéhé sã cuãñaha Yã Ndiõxí cundecu ndihí-yu, te ñá díú-ní xǎⁿ chi tnàhá nduu táhũ-yu cundecú-yu ndihí-gá ni caa ni quíhíⁿ.

30 Te dava ñáyiú cùnnuu ndecu ichi Yá Ndiõxí vitna, ñáyiú-áⁿ sǎá nduu te vá ío-gá cunúú-yu dàtná cúnúú-yu vitna, te dava ñáyiú nchìcúⁿ ñá túú cùnnuu vitna, ñáyiú-áⁿ sǎá nduu te ío cunúú-yu –càchí-gá xǎhaⁿ-gǎ xii-güedé.

20

Cuèndá cue téé quide chiuⁿ

1 Te xǎhaⁿ tucu Jesús xii cue téé xica cuu ndihí-gá:

–Na càni-í ñⁿ cuèndú núú-ndó cuèndá tecú tnùní-ndó nàcuáa cada-xi òré ndihu ndaha ñàha Yá Ndiõxí xii ñáyiú. ñⁿ téé ní xitu-dé yoho yàha stilé, te ñⁿ nduu ní quee-dé nehé-ni cuándúcú-dé cue téé cada chiuⁿ núú dúcáⁿ ní xitu-dé yoho yàha stilé-áⁿ.

2 Te òré ní níhí-dé cue téé cada chiuⁿ-áⁿ, te ní quide ndáá-dé ndihí-güedé sá chǎhu ñaha-dé xii-güedé ñⁿ díhúⁿ denàriú ñⁿ nduu. Te sáta dúcáⁿ te ní tendaha ñàha-dé xii-güedé cuáháⁿ-güedé cada chiuⁿ-güedé núú dúcáⁿ ní xitu-dé yoho yàha stilé-áⁿ.

3 Te dàtnùní ní xica tucu-dé cuáháⁿ-dé dàtná òré caá ñⁿ dátneé cuándúcú-gǎ-dé cue téé cada chiuⁿ núú ní xitu-dé yoho yàha stilé-áⁿ, te ní xiní-dé xǎnutnǎi ñⁿ úú cue téé núú yǎhu te ñá túú nǎ chiuⁿ xiquide-güedé.

4 Te ní xǎhaⁿ-dǎ xii-güedé: “Ñá túú cùdana cuyáchí-ndó càda-ndo chiuⁿ-í te chǎhu ñaha-í xii-ndo nàcuáa tàú-xi cunduu-ǎⁿ”, càchí-dé xǎhaⁿ-dǎ xii-güedé. Te cue téé-áⁿ ní sǎha-güedé tnúhu cada chiuⁿ-güedé te ní xica-güedé cuáháⁿ-güedé.

5 Te téé ní xitu yoho yàha stilé-áⁿ ní xica tucu-dé dàtná òré caúxúú nduu cuándúcú-gǎ-dé cue téé cada chiuⁿ-dé, te ní níhí tucu-dé cue téé cada chiuⁿ. Te ní quee tucu-dé dàtná òré caá úní sacuaa, te diu-ni ducaⁿ ní quide tucu-dé.

6 Te ní quee tucu-dé dàtná òré caá úhúⁿ sacuaa cuándúcú-gǎ-dé cue téé cada

chiuⁿ-dé, te ní xiní-dé xǎnutnǎi ñⁿ úú cue téé diu-ni núú yǎhu-áⁿ te ñá túú nǎ chiuⁿ quide-güedé, te ní xǎhaⁿ-dǎ xii-güedé: “Sànuu sá nchòhó ní cuu nchàca vitna ñá túú ñihí-ndó chiuⁿ cada-ndo”, cachí-dé xǎhaⁿ-dǎ xii-güedé.

7 Te cue téé-áⁿ ní xǎhaⁿ-güedé xii-dé: “Ñá túú ñihí-ndí chiuⁿ cada-ndí chi vá yõo ndùcu ñaha xii-ndí”, càchí-güedé xǎhaⁿ-güedé xii-dé. Te ní xǎhaⁿ-dǎ xii-güedé: “Yúhú taxi-í chiuⁿ cada-ndo, te quíhíⁿ-ndó núú ní xitu-í yoho yàha stilé yàcáⁿ cada chiuⁿ-ndo, te chǎhu ñaha-í xii-ndo nàcuáa tàú-xi cunduu”, càchí-dé xǎhaⁿ-dǎ xii-güedé.

8 Te sáta ní dáhu nchícanhii, te téé dii chiuⁿ-xi-áⁿ ní xǎhaⁿ-dǎ xii téé tàxi tnuní ñáhá xii cue téé quide chiuⁿ-áⁿ: “Cúñaha xii nchaa cue téé quide chiuⁿ-áⁿ ná quíxí-güedé te chǎhu-n-güedé, te díhna-gá cue téé nchìcúⁿ cuí-nǎ cuánguihu núú chíúⁿ ngüíta-n chǎhu-n, te ndéé núú ní ndihí-ná chǎhu-n cuè téé cuánguihu díhna nuu-gǎ núú chíúⁿ”, càchí-dé xǎhaⁿ-dǎ xii téé tàxi tnuní ñáhá xii cue téé quide chiuⁿ-áⁿ.

9 Te díhna-gá cue téé cuánguihu caá úhúⁿ sacuaa ní quexio-güedé cuèndá chǎhu ñaha-dé, te ní chǎhu ñaha-dé ñⁿ caa díhúⁿ denàriú xii ñⁿ ñⁿ-güedé.

10 Te sáta ní chǎhu-dé dava-gá cue téé ní quide chiuⁿ. Te ndéé núú ní ndihí-ná ní chǎhu-dé cue téé cuánguihu díhna nuu-gǎ núú chíúⁿ. Te cue téé-áⁿ ní sani iní-güedé sá vái-gǎ chǎhu ñaha-dé xii-güedé, dico ñáhá chi ñⁿ caa-ni díhúⁿ denàriú ní chǎhu ñaha-dé xii ñⁿ ñⁿ-güedé.

11 Te cue téé-áⁿ ní queheⁿ cuèndá-güedé díhúⁿ-güedé dico ñá túú ní quide váha-xi iní-güedé.

12 Te ní xǎhaⁿ-güedé xii téé dii chiuⁿ-xi ní quide-güedé: “¿Ná cuèndá cue téé nchìcúⁿ cuí-nǎ cuánguihu núú chíúⁿ ñⁿ-ni ní chǎhu ñaha-n xii-ndí ndihí-güedé, te ñⁿ dii oré duha ní quide chiuⁿ-güedé? Te nchúhú nchàca nchaa ní sahní iní-ndí ní quide chiuⁿ-ndí, te ní ndoho-ndí cahni, te ñⁿ-ni ní chǎhu ñaha-n xii-ndí ndihí-güedé”, càchí-güedé xǎhaⁿ-güedé xii téé dii chiuⁿ-xi ní quide-güedé.

13 Te téé dii chiuⁿ-xi ní quide-güedé-áⁿ ní

xáhaⁿ-dě xii ìⁿ téé-áⁿ: “Yòhó, ñá túú quide-í ìⁿ sá ñà túú tàú-í cada-í sá cúú-xí-n, chi ní quide ndáá-ó sá díú-ní ìⁿ díhúⁿ denàriú cháhu ñaha-í xii-n ìⁿ nduu.

¹⁴ Te vitna queheⁿ díhúⁿ cuendá nduu-n te núhú-n, chi yúhú cuiní-í sá ìⁿ-ní cháhu ñaha-í xii-n ndìhi cue téé nchícúⁿ cuìi-ñá cuánguìhu núú chíúⁿ.

¹⁵ Chi yúhú cuu-ni cada-í nání cuiní-í ndìhi díhúⁿ-í, ¿àdi dico ñá túú quide váha-xi iní-n sá dúhá cùndahú iní-í cue téé-áⁿ ducaⁿ cháhu-í-güedé?”, cächí téé cùu patróóⁿ-áⁿ xáhaⁿ-dě xii téé-áⁿ. Duha nduu cuendú caní-í núú-ndó.

¹⁶ Te duha càháⁿ-í chi dava ñáyiú cùnuu ndecu ichi Yá Ndióxi vitna sáá nduu te vá cùnùu vihi-gá-yu dàtná cùnùú-yu vitna, te dava ñáyiú ñá túú cùnuu vitna sáá nduu ìo cùnùú-yu. Te ío cuéhé ñáyiú càháⁿ ñáhá Yá Ndióxi xií-yu dico sacú-ni-yu nduu táhù-yu cundecú-yu ndìhi-gá —cächí-gá xáhaⁿ-gã xii-güedé.

Jesús càháⁿ tucu-gá sá cáhni ñàha-güedé xii-gá

(Mr. 10:32-34; Lc. 18:31-34)

¹⁷ Te ñùhu Jesús ichi cuásaá-gá ñuu Jerusálén ndìhi cue téé xica cuu ndìhi-gá, te ní cana ñaha-gã xii-güedé ní naníhi tnáhá-güedé ndìhi-gá, te ta ndàtnúhu ndìhi ñaha-gã xii-güedé cuáháⁿ, te xáhaⁿ-gã xii-güedé:

¹⁸ —Vitna ñùhu-o ichi cuásaá-ó ñuu Jerusálén, te yàcáⁿ cuáha cuendá ñáhá-güedé xii yúhú Téé cùu ñaní tnáhá-ndó nchàa-ndo núú cuè téé cùu dútú cùnùu, ndìhi núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés. Te diu cue téé-áⁿ cùñaha-güedé xii dava-gá cue téé sá cáhni ñàha-güedé xii-í.

¹⁹ Te cuáha cuendá ñáhá-güedé xii-í núú cuè téé ñá túú cùu cue téé isràél, te cue téé-áⁿ cudíquí ndeé ñáhá-güedé xii-í, te caniha-güedé ndìhi ñii, te dàtnùní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úní sá cùú-í te ndoto-í —cächí-gá xáhaⁿ-gã xii-güedé.

Ñaná tẽ Jàcobó ndìhi té Juàá cuiní-aⁿ sá cùnùu-güedé ndìhi Jèsús

(Mr. 10:35-45)

²⁰ Te cue déhe té Zebèdeú té Jàcobó ndìhi té Juàá ndécá ñàha náná-güedé xii-güedé cuáháⁿ núú ndécú Jèsús, te òré ní quexio-aⁿ ndìhi-güedé núú ndécú-gã te ní ngüíñí xítí-áⁿ núú-gã cuendá cuiní-aⁿ ndàtnúhu ndìhi ñaha-aⁿ xii-gá cuendá sá cúú-xí cuè déhe-aⁿ.

²¹ Te cùmání-gã cáháⁿ-aⁿ te ní xicáⁿ tnúhú Jèsús núú-aⁿ, te xáhaⁿ-gã:

—¿Ná cuiní-n? —cächí-gá xáhaⁿ-gã xii-aⁿ.

Te ní xáhaⁿ-aⁿ xii-gá:

—Véxi-í càháⁿ ndàhú-í núú-n núu vá cùndèe iní-n cùnucóo ìⁿ déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n núú táxi tnùní-n —cächí-áⁿ xáhaⁿ-aⁿ xii-gá.

²² Te Jèsús ní xáhaⁿ-gã xii úú cue téé-áⁿ:

—Nchòhó, ñá túú cùtnuní váha iní-ndó nàcuáa nduu sá xicáⁿ-ndó núu-í. ¿Te náa cundee iní-ndó dándoho ñaha ñáyiú xii-ndo dàtná dándoho ñáhá-yu xii-í, te cundee tùcu iní-ndó càhni ñáhá-yu xii-ndo dàtná càhni ñáhá-yu xii-í-áⁿ? —cächí-gá xáhaⁿ-gã xii-güedé.

Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —cächí-güedé xáhaⁿ-güedé xii-gá.

²³ Te Jèsús ní xáhaⁿ-gã xii-güedé:

—Ndáá sá cùndèe iní-ndó ndòho-ndo nchaa nàcuáa ndòho-í, dico sá dúcáⁿ cuiní-ndó sá ìⁿ-ndó cùnucóo-ndo xio cuha-í, te ìⁿ-ndo cùnucóo-ndo xio datni-í, te xiáⁿ chi ñá díú yúhú tàú-í cachí-í núu sá cúú cùnucóo-ndo àdi sá vã cúú cùnucóo-ndo, chi mee Tàtà-í Dútú Ndióxi cachí-gá te núu ná cúú ñáyiú nduu táhú cunucóo diñi-í dàvá-áⁿ —cächí-gá xáhaⁿ-gã xii-güedé.

²⁴ Te òré ní níhi ùxí-gá cue téé xica cuu ndìhi-gá tnúhu nàcuáa nduu sá cuiní cue téé úú-áⁿ, te ní cudééⁿ-güedé núú cuè téé úú-áⁿ.

²⁵ Te Jèsús ní cana-gá nchaa cue téé xica cuu ndìhi-gá, te ní xáhaⁿ-gã xii-güedé:

—Nchòhó xini-ndó sá cuè téé yìndaha nacióⁿ quidé-güedé sá ìo cùnuu-güedé, te nchaa dava-gá cue téé cùnuu ndìhi-güedé quidé-güedé tnáhá-güedé sá ìo cùnuu-güedé.

²⁶ Dico nchòhó chi vá dúcáⁿ càda-ndo, chi núu dava-ndo cuiní-ndó cùnuu-ndo, te xini ñuhu-xi cunu cuechi núú tnáhá-ndó te vá càdá-ndó sá cùnùu-ndo.

27 Te núu dava-ndo cuení-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíúⁿ pàtróóⁿ-xi cunu cuechi núú tnáhá-ndó.

28 Te cada-ndo dàtná quidé yùhú Tée cùu ñaní tnáhá-ndó nchàa-ndo, chi yùhú véxi-í ñuyíú-a dico ñá díú sã cúnú cuèchi ñáyiú núú-í chi véxi-í sá cúnú cuèchi-í núú-yu. Te cuú-í ñuyíú-a cuendá vai-yu cácu nihnú-yu núú ùhú núú ndàhú —càchí-gá xãhaⁿ-gã xii-güedé.

Jèsús quidé tãtna-gá núú úú tnàhá cue téé cuáá

(Mr. 10:46-52; Lc. 18:35-43)

29 Te òré ní quee Jèsús ñúú Jericó ndihi cue téé xica cuu ndihi-gá, te cuéhé víhí ñáyiú nchícúⁿ ñáhá xii-gá cuáháⁿ.

30 Te yuhu ìchi cuáháⁿ-gá xñucóo úú tnàhá cue téé cuáá, te cue téé-ánⁿ ñi cutnùní iní-güedé sá Jèsús ñúhú-gã ichi-ánⁿ te ní ngüíta-güedé níhi càháⁿ-güedé, te xãhaⁿ-güedé xii-gá:

—¡Yòhó Mèstrú, ñaní tnáhá ndíi Dàvíi, cundàhú iní ñáhá xii-ndí! —càchí-güedé xãhaⁿ-güedé xii-gá.

31 Te cue ñáyiú tènáá ñáhã-yu xii-güedé, te xãhãⁿ-yu sá ná càdí-güedé yuhu-güedé, dico uuⁿ-gá níhi ní cáháⁿ-güedé, te xãhaⁿ-güedé xii-gá:

—¡Yòhó Mèstrú, ñaní tnáhá ndíi Dàvíi, cundàhú iní ñáhá xii-ndí! —càchí-güedé xãhaⁿ-güedé xii-gá.

32 Te ní ngüíñí Jèsús te ní cana ñaha-gã xii-güedé, te ní xicáⁿ tnúhú-gã núú-güedé, te xãhaⁿ-gã:

—¿Ná cuení-ndó càda ñaha-í xii-ndo-í? —càchí-gá xãhaⁿ-gã xii-güedé.

33 Te ní xãhaⁿ-güedé xii-gá:

—Mèstrú, cuení-ndí sá càdá tãtna-n núú-ndí cuendá cundehe-ndí —càchí-güedé xãhaⁿ-güedé xii-gá.

34 Te Jèsús ní cundàhú iní ñáhã-gã xii-güedé, te ní tendaha-gã núú-güedé. Te òré-ní ní ndúha núú-güedé, te nchícúⁿ ñáhã-güedé xii-gá cuáháⁿ.

21

Jèsús cuánguihu-gá ñúú Jerusàlén

(Mr. 11:1-11; Lc. 19:28-40; Jn. 12:12-19)

1 Te òré sa ta cùyatni Jèsús ndihi cue téé xica cuu ndihi-gá ñúú Jerusàlén, te ní quexìo-gá ndihi-güedé yatni vií-nã ñúú Bèttagé, te xíáⁿ cáá yùcu nani Olívú. Te ní ndatnúhu-gá ndihi úú cue téé xica cuu ndihi-gá,

2 te ní xãhaⁿ-gã xii-güedé:

—Chí cuáháⁿ ñúú cáá yàtni yacáⁿ, te òré quexìo-ndo yacáⁿ te nanihí-ndó ñⁿ búrru dìhí ndètníⁿ-dì ndihi déhe-dì, te nandaxi-ndo-güèdì te candeca-ndo-güèdì quixi.

3 Te núu ió ñáyiú dàdahaⁿ ñaha xii-güedi, te cúñaha-ndo xii-yu sá yùhú Yaá xicá cùu ndihi-ndo xini ñuhu-í-güedi, te ndíhi-ni nãtendaha-í-güedi núhú-güedi cúñaha-ndo —càchí-gá xãhaⁿ-gã xii-güedé.

4 Te ducaⁿ ñi cuu chi ní quee ndáá-xi nãcuáa ní chídó tnùní ñⁿ téé ní xóo cáháⁿ tnúhu Yá Ndiõxí ndéé sanaha núú tütú-gá núú càchí-xi:

5 Chí cùñaha cuè ñáyiú ñúú Sìón ná càdá cuendá-yu, chi véxi téé yìndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ téé ió ndàhú iní-xi. Duha ní chídó tnùní ñⁿ téé ní xóo cáháⁿ tnúhu Yá Ndiõxí ndéé sanaha núú tütú-gá.

6 Te cue téé xica cuu ndihi-gá ní xica-güedé cuáhãⁿ-güedé, te ní quide-güedé nãcuáa ní xãhaⁿ-gã xii-güedé cada-güedé.

7 Te ní ndexìo-güedé ndécã-güedé ñⁿ búrru dìhí ndihi déhe-dì, te ní sacáⁿ ndodo-güedé dóo-güedé sátã-güedi, te dàtnùní cuásã Jèsús sátã ñⁿ-dì ní ngódó ñaha-gã xii-dì.

8 Te ió cuéhé ñáyiú ta sàcãⁿ-yu dóo-yu ichi cuáhãⁿ-gá cuendá núú dóo-yu-ánⁿ yãha-gã ndihi quiti yòdo-gá. Te davã-yu xèhndé-yu ndaha yùtnu ñúú tá sàcãⁿ-yu cuáhãⁿ.

9 Te nchaa ñáyiú yòdonuu núú-gã ndihi nchaa ñáyiú nchícúⁿ ndàa sátã-gã ní ngüíta-yu níhi càháⁿ-yu, te càchí-yu:

—¡Ío càhnu cuu Yaá cúú ñaní tnáhã ndíi Dàvíi! ¡Te Yá Ndiõxí ió na chìndee ñaha-gã chi cùu-gá Yaá ní tendaha Yá Ndiõxí véxi quide núú-gã! ¡Te ndéé nchaa sá ió andíu na càchí-xi sá ío càhnu cuu-gá! —duha càchí-yu.

10 Te òré cuánguihu Jèsús ñuú Jerusalén, te nchaa ñáyiú ñuú-án ní ngüíta-yu xícuaá-yu, te davá-yu ní ngüíta-yu xitnàhá-yu:

—¿Yoo cùu tée-án? —càchí-yu xitnàhá-yu.

11 Te davá-yu xitnàhá-yu:

—Tée-án cùu-dě Jèsús tée càháⁿ tnúhu Yá Ndiöxí, te cùu-dé tée ñuú Nazàrét ñuú yíndèhu distritú Galileá —càchí-yu xitnàhá-yu.

Jèsús ñá túú tnàhá iní-gá nàcuáa xíquide ñáyiú xití veñúhu

(Mr. 11:15-19; Lc. 19:45-48; Jn. 2:13-22)

12 Te Jèsús cuánguihu-gá xití veñúhu càhnu sá ïo cùnunu, te xití veñúhu-án xíndecu ñáyiú quide ndáhu nádìcò-yu, ndìhi ñáyiú xísaaⁿ, te nchaa-yu ní queñuhu ñaha Jèsús xií-yu quehé, te ní dándúa-gá mèsá nchaa ñáyiú dàma díhúⁿ, ndìhi nchaa xilé sácòo nchìhi ñáyiú dìcò lómá xíndecu xití veñúhu-án.

13 Te ní xáhaⁿ-gá xií-yu:

—Núú tütú Yá Ndiöxí càháⁿ-xi nàcuáa ní càháⁿ-gá, te ní cachí-gá: “Vehe-í cùu-xí núú càháⁿ ndìhi ñaha ñáyiú xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gá xií-yu.

14 Te xíaⁿ ndécú Jèsús ní quexìo cue tée cuáa ndìhi cue tée yacua, te ní quide tátna ñaha-gá xii-güedé te ní ndúha-güedé.

15 Te cue dütú cùnunu ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní xiní-güedé ní quide Jèsús sá vǎ yòo tnàhí ndàcu cada, te ndédóho tucu-güedé níhi xícáháⁿ cue landú xití veñúhu càhnu sá ïo cùnunu-án, te càchí-güexi: “Ío càhnu cuu Yaá cùu ñàní tnàhá ndíi Dàvíí”, càchí-güexi. Te ní cudééⁿ-güedé,

16 te ní xáhaⁿ-güedé xii Jèsús:

—¿Ndédóho-n nàcuáa càháⁿ cue landú-án ñá? —càchí-güedé xáhaⁿ-güedé xii-gá.

Te Jèsús ní xáhaⁿ-gá xii-güedé:

—Ndédóho-í, te nchòhó náa ñá túú dàcuaha-ndo núú tütú Yá Ndiöxí núú càháⁿ-xi cuendá cue landú-án, te duha càchí-xi:

Yòhó ní quide-n sǎ cuè landú vitna sàdi, ndìhi cue dava-gá landú, chiñuhu ñaha-güexi xii-n nàcuáa tàú-xi cundu.

Duha càchí-xi núú tütú-gá —càchí-gá xáhaⁿ-gá xii-güedé.

17 Te xíaⁿ ní dándóo ñaha Jèsús xii-güedé, te ní xica-gá cuáháⁿ-gá ñuú Bètaniá, yàcáⁿ ní xíndecu-gá niú-án.

Jèsús xáhaⁿ-gá xii yutnu ngüxí sá vǎ cùuⁿ-gá sávidí-xi

(Mr. 11:12-14, 20-26)

18 Te nduu tnèé-án nehé-ni cuáháⁿ tucu Jèsús ñuú Jerusalén, te ichi ñuhu-gá ní xihí-gá docó.

19 Te ní xiní-gá ñiⁿ yutnu ngüxí nútniⁿ ñiⁿ xio yuhu ìchi, te ní xica-gá cuáháⁿ ndéhé-gá nùu ndèé sávidí-xi, dico ñá túú nǎ ndèé chi mee-ni ndàha-xi ndeé. Te ní xáhaⁿ-gá xii yutnu ngüxí-án:

—¿Vitna te vǎ ñiⁿ ndùu-gá cuuⁿ sávidí-n! —càchí-gá xáhaⁿ-gá xii-xi.

Te òré-ni-án ní yíchí yutnu ngüxí-án.

20 Te sá dúcáⁿ ní cuu ní xiní cue tée xica cuu ndìhi Jesús, te ío ní cuñúhu-güedé, te ní xicáⁿ tnúhú-güedé núú-gǎ, te xáhaⁿ-güedé:

—¿Ná cuendá ndéé dàcáⁿ ío ndìhi ní yíchí yutnu ngüxí-án-i? —càchí-güedé xáhaⁿ-güedé xii-gá.

21 Te Jèsús ní xáhaⁿ-gá xii-güedé:

—Na càchí tnúhu ndáa-í xii-ndo sǎ nùu nchòhó quíndáa ndisa iní-ndó Yá Ndiöxí, te vǎ cáni ñiⁿ cani úú iní-ndó, te ñá díú-ni sǎ ní quide-í-a ní xiní-ndó ndàcu-ndo cada-ndo, chi ndéé tíndúú-a xocuiñí-xi núú ndécú-xi te núu cúñaha-ndo sǎ xócuñí-xi te quíhíⁿ-xi quee-xi xití lámár. Te ñiⁿ ducaⁿ càda-xi te núu na quíndáa iní-ndó.

22 Te nchaa sá ná càcáⁿ-ndó nùú Yá Ndiöxí òré càháⁿ ndìhi-ndo-gá te taxi-gá te núu sàndáa ndisa iní-ndó sǎ táxi-gá sá xicáⁿ-ndó núú-gǎ —càchí-gá xáhaⁿ-gá xii-güedé.

Jèsús ndécú ndìhi-gá tnúhu ndee iní

(Mr. 11:27-33; Lc. 20:1-8)

23 Te Jèsús cuánguihu-gá xití veñúhu càhnu sá ïo cùnunu danehé-gá ñáyiú, te xíaⁿ ndécú-gá ní quexìo cue dütú cùnunu ndìhi cue tée cùu sacuéhé núú ñáyiú isràél, te xáhaⁿ-güedé xii-gá:

—Cuñí-ndí cachí tnúhu-n xì-ndí nása ndùu tnúhu ndee iní ndécú ndìhi-n núu quide-n nándi sá quidé-n, ¿te yoo ducaⁿ ní

taxi tnúhu ndee ìní-án xii-n-i? —càchí-güedé xăhaⁿ-güedě xii-gá.

24 Te Jèsús ní xăhaⁿ-gă xii-güedé:

—Yúhú tnàhá-í cuìní-í cắcáⁿ tnúhu-í ìⁿ sá cắcáⁿ tnúhu-í núú-ndó, te núu na cắchí tnúhu-ndo te cachí tnúhu-í xii-ndo yòo ní taxi tnúhu ndee ìní duha quide-í.

25 Te chí cắchí tnúhu xii-í yoo ní táúchíúⁿ nǐ dắcuándùte ndíi Juàá ñáyiú, ¿Yá Ndiòxí àⁿ cuè tée ñuyíú-a ní táúchíúⁿ dùcaⁿ ní quide ndíi?, te chí cắchí tnúhu —cắchí-gá xăhaⁿ-gă xii-güedé.

Te ní ngúíta-güedé xǐtnàha-güedé:

—¿Nása cǔñaha-o? Chi núu na cǔñaha-o sǎ Yá Ndiòxí ní táúchíúⁿ dùcaⁿ ní quide ndíi Juàá ñá, te quesaha-dě: “¿Ná cuèndá ñá túú ní sàndáá ìní-ndó tnúhu ní cắháⁿ ndíi vǎiⁿ?”, quesaha-dě.

26 Te núu na cǔñaha-o sǎ cuè ñáyiú ñuyíú-a ní táúchíúⁿ dùcaⁿ ní quide ndíi ña, te cudééⁿ ñáyiú núú-ó, chi nchaá-yu cắchí-yu sá Yá Ndiòxí ní xăhaⁿ-gă xii ndíi sá cắháⁿ ndíi tnúhu-gá núú ñáyiú —cắchí-güedé xǐtnàha-güedé.

27 Te ní xăhaⁿ-güedě xii Jèsús:

—Ñá túú xìní-ndí yoo ní táúchíúⁿ dùcaⁿ ní dắcuándùte ndíi Juàá ñáyiú —cắchí-güedé xăhaⁿ-güedě xii-gá.

Te ní xăhaⁿ-gă xii-güedé:

—Te núu ducaⁿ te ni yúhú vá cắchí tnúhu-í xii-ndo yòo ní taxi tnúhu ndee ìní duha quide-í —cắchí-gá xăhaⁿ-gă xii-güedé.

Cuèndá ìⁿ tée ndíi úú déhe-dé

28 Te Jèsús ní xăhaⁿ tucu-gá xii-güedé:

—Na cǎni-í ìⁿ cuèndú núú-ndó nắcuáa tecú tnùn-ndó tnúhu cắháⁿ-í. ìⁿ tée nděcu úú déhe-dé, te ní xăhaⁿ-dě xii déhe-dé tée sacuéhé-gă: “Yòhó déhe-í, véxi-í cắháⁿ ndàhú-í núú-n nǔu vá cǔndèe ìní-n cuánùndaha ñaha-n xii-í cada chiúⁿ-o núú nǐ xitu-í yoho yàha stilé”, cắchí-dé xăhaⁿ-dě.

29 Te ní xăhaⁿ dểhe-dé xii-dé: “Vá quíhíⁿ-í cada chiúⁿ-í núú chíúⁿ-n”, cắchí-dé xăhaⁿ-dě xii tǎtá-dě. Dico cuèé ní nacani ìní-dé te ní sáháⁿ-dé ní quide chiúⁿ-dé núú chíúⁿ tǎtá-dě.

30 Te tée-án nǐ sáháⁿ tucu-dé ní xăhaⁿ-dě xii déhe-dé té lǐhli-gá nǔu vá cǔndèe ìní-dé cuánùndaha ñaha-dé, te ní xăhaⁿ dểhe-dé-án xii-dé: “Cuu cuánùndaha ñaha-í xii-n”, cắchí-dé xăhaⁿ-dě. Dico ñá túú ní sáháⁿ-dé cada chiúⁿ-dé.

31 Te vitna chí cắháⁿ nǔu ndědacàa cue téu úú-án nǐ quide-güedé sá cuìní tǎtá-güedě —cắchí-gá xăhaⁿ-gă xii-güedé.

Te ní xăhaⁿ-güedě xii-gá:

—Tée cùu sacuéhé-gă, téu ní cắháⁿ ndíi-dé díhna —cắchí-güedé xăhaⁿ-güedě xii-gá.

Te Jèsús ní xăhaⁿ-gă xii-güedé:

—Na cắchí tnúhu ndáá-í xii-ndo sǎ ncháá cuè téu cuihna ìní-xi quide cobrá ñáhá xii ñáyiú cuèndá impuèstú, ndíi cue ñáyiú díhí xǐndecu ichi díí ìní yáchí-gá ndíhu ndaha ñàha Yá Ndiòxí xii cue téu-án ndíi cue ñáyiú díhí-án dắcúúxí nchòhó.

32 Chi ndíi Juàá téu ní xóo dacuàndute ñaha xii ñáyiú ní cắháⁿ ndíi nắcuáa cadá-yu cundecú-yu, dico nchòhó chi ñá túú cuìní-ndó quèndáá ìní-ndó nắcuáa ní cắháⁿ ndíi, dico cue téu cuihna ìní-xi quide cobrá ñáhá xii ñáyiú cuèndá impuèstú, ndíi cue ñáyiú díhí xǐndecu ichi díí ìní, chi sàndáá ìní-güedé ndíhí-yu tnúhu ní cắháⁿ ndíi. Te nchòhó cuèi nděhe-ndo sá sàndáá ìní cue ñáyiú-án nchaa tnúhu ní cắháⁿ ndíi, dico ñá túú cuìní-ndó ndíxi cuéchi ìní-ndó cuèndá nchaa sá cuèhé sá dúhá quide-ndo cuèndá tní-ndo tnúhu ní cắháⁿ ndíi —cắchí-gá xăhaⁿ-gă xii-güedé.

*Cuèndá cue téu cuihna ìní-xi
(Mr. 12:1-12; Lc. 20:9-19)*

33 Te xăhaⁿ tucu Jesús xii-güedé:

—Cundedóho-ndo na cǎni tucu-í ìngá cuèndú núú-ndó cuèndá tecú tnùn-ndó tnúhu cắháⁿ-í. ìⁿ téu ní nacúxi-dé mee-ni yòho yaha stilé núú ñúhú-dě, te ní chidoco-dě cuèndá sá vǎ cúú dǎnú, te ní cadúha-dé núú quíhni-dě ndéhé yoho yàha stilé-án òré ná cùu, te ní cadúha-dé ìⁿ xító dùcúⁿ núú cáúndòdo cue téu coto nchaa yoho yàha stilé-án.

Te ní sáá ìⁿ nduu quèe-dé quíngaca cuu xica-dě te ní dándòo ndaha-dě sá nǐ xitu-dé-án xii ìⁿ úú cue téu xìní tnàhá ndíi-dé cuèndá cada chiúⁿ-güedé, te ní ndatnúhu-güedé sá òré ná cúú te cuu cuèndá dava-güedé, te ducaⁿ te ní quee-dé cuáháⁿ-dé.

34 Te sǎtá nǐ sáá nduu nǐ cuu ndéhe nchaa yoho yàha stilé sá nǐ xitu-dé-án, te ní xăhaⁿ-dě xii ìⁿ úú cue téu xínu cuechi núú-dě: “Chí cuáháⁿ cắcáⁿ-ndó sǎ cúú

cuendá-í núú cuè téé ní dándõ ndàha-í nchaa yoho yàha stilé sá ní xitu-í”, càchí-dé xàhaⁿ-dë xii-güedé.

³⁵ Te cue téé ní dándõ ndaha-dë nchaa yoho yàha stilé sá ní xitu-dé-áⁿ ní tñi-güedé cue téé xinu cuechi núú-dë-áⁿ, te ìⁿ-dé ní cani-güedé, te ìⁿ-dé ní sahani ñaha-güedé, te ingá-dé ní sàñaha-güedé yúú.

³⁶ Te téé ní xitu yoho yàha stilé-áⁿ ní tendaha-dë titní-gá tucu cue téé xinu cuechi núú-dë cuáháⁿ-güedé cuángacáⁿ-güedé sá cúú cuendá-dé núú cuè téé ní dándõ ndaha-dë sá ní xitu-dé-áⁿ, dico ñu-ni ducaⁿ ní quide ñaha cuè téé-áⁿ xii cue téé xinu cuechi núú-dë-áⁿ.

³⁷ “Te téé cùu xitohó nchaa yoho yàha stilé-áⁿ ní sani iní-dé: “Vàha-gá ñu tendaha-í déhe-í-a núhú-dé, chi òré quini ñáhá-güedé xii-dé te canehe-güedé sá yíñuhu núú-dë”, duha ní sani iní-dé. Te ní tendaha-dë déhe-dé cuánuhú-dé.

³⁸ Dico òré ní xini cue téé quide chiuⁿ-áⁿ dëhe téé cùu xitohó nchaa yoho yàha stilé-áⁿ, te ní xitnàha-güedé: “Téé-áⁿ téé véxi nduu táhú ñuhu-a ndihi nchaa sá cáá núú-xi, dico cahni-o-dë te mee-o nduu táhú-ó sá ndúú táhú-dë”, càchí-güedé xitnàha-güedé.

³⁹ Te ní tñi-güedé téé-áⁿ te ndèca ñaha-güedé cuáháⁿ ìⁿ xio yuhu ñuhu-áⁿ, te ní sahani ñaha-güedé xii-dé —duha cuáháⁿ cuendú ní cani Jèsús núú-güedé.

⁴⁰ Te ní xáhaⁿ tucu Jesús xii-güedé:

—¿Te nchòhó sa cùtnuní iní-ndó ñasa cada ñaha xitohó ñuhu-áⁿ xii cue téé-áⁿ ñá? — càchí-gá xàhaⁿ-gã xii-güedé.

⁴¹ Te cue téé-áⁿ ní xáhaⁿ-güedé xii-gá:

—Téé cùu xitohó ñuhu-áⁿ núhú-dé, te vá cùndàhú iní-dé cue téé cuihna iní-xi-áⁿ chi cahni ñaha-dë xii-güedé, te dándõ ndaha-dë ñuhu-dé xii cue téé cùtnuní iní-dé cada ndáá cuendá ndi tnahá cúúⁿ ndèhé nchaa yoho yàha stilé sá ní xitu-dé-áⁿ te cuáñaha-güedé xii-dé sá cúú cuendá-dé — càchí-güedé xàhaⁿ-güedé xii-gá.

⁴² Te Jèsús ní xáhaⁿ-gã xii-güedé:

—Te nchòhó, náa ñá túú dàcuaha-ndo núú tütú Yá Ndiõxí núú càchí-xi:

Yúú sá ní dáquée tíhú cue téé dàcaa vehe, ní cuu-xi yúú cùnùu vitna.

Chi mee Dütú Ndiõxí ducaⁿ ní cachí-gá cundu, te cùu-xi ìⁿ sá ño cùñuhu-o vitna.

Duha càchí-xi núú tütú-gá.

⁴³ Te duha càháⁿ-í chi Yá Ndiõxí cada-gá te vá ñihí-ndó tñuhu ndee iní cundecu ndihi-ndo cuendá ndihu ndaha ñàha-gá xii-ndo, chi tñuhu ndee iní-áⁿ cundecu ndihi cue ñáyu cada ndáá cuendá ndihu ndaha ñàha Yá Ndiõxí xi-yu.

⁴⁴ Te yúú sá cùnùu-áⁿ cúú-xi yùhú, te nchaa ñáyu ñá túú tñi tñuhu-í cùu-yu dàtná ìⁿ ñáyu ndúá núú yùú-áⁿ te tñahnú duúⁿ-yu, àdi núu na tàú ñáhá-xi xi-yu, te dacàchi duuⁿ ñaha-xi —cachí-gá xàhaⁿ-gã xii-güedé.

⁴⁵ Te sá dúcáⁿ nduu cuendú ní cani Jèsús te cue téé cùu dütú cùnùu-áⁿ, ndihi cue téé cùu fariséú ní cutnùni iní-güedé sá cuendá-güedé ní cáháⁿ-gá.

⁴⁶ Te ní cuini-güedé tñi ñaha-güedé xii-gá òré-áⁿ dico ñá túú ní cùyì-güedé, chi ní yùhú-güedé cue ñáyu, chi ní cutnùni iní-yu sá cúú-gã ìⁿ téé càháⁿ tñuhu Yá Ndiõxí.

22

Cuendá ìⁿ vico tñandaha

¹ Te Jèsús ní ngüita tucu-gá caní-gã ingá cuendú núú-güedé, te xàhaⁿ-gã:

² —Na càni tucu-í ingá cuendú núú-ndó cuendá tecú tñuní-ndó nàcuáa cada-xi òré ndihu ndaha ñàha Yá Ndiõxí xii ñáyu. ìⁿ téé yindaha ñaha xii ñáyu ní quide-dé ìⁿ vico ní dátñandaha-dé déhe ducuⁿ-dé.

³ Te ní tendaha-dë cue téé xinu cuechi núú-dë cuáháⁿ-güedé cuàngana-güedé cue ñáyu sa ní cáháⁿ-dé cuhuⁿ vico, dico ñáyu-áⁿ ñà túú ní cuini-yu quíhíⁿ-yu.

⁴ Te ní xáhaⁿ tucu-dé xii dava-gá cue téé xinu cuechi núú-dë: “Quíhíⁿ-ndó cùñaha-ndo xii cue ñáyu sa ní cáháⁿ-í cuhuⁿ vico sá sà ní quide túha-í sá cáxi-yu, te sa ní sahani-í ndicutu ndihi nchaa dava-gá quiti ní dánucúihnu-í, te nchaa sa ní quide túha-í, te na quixí-yu cuhúⁿ-yu vico càchí-í cùñaha-ndo”, càchí-dé xàhaⁿ-dë xii cue téé xinu cuechi núú-dë-áⁿ.

⁵ Dico ní ìⁿ ñáyu ní cáháⁿ-dé-áⁿ ñà túú ní cuini-yu quíhíⁿ-yu cuhúⁿ-yu vico. Chi ìⁿ-yu ní sáháⁿ-yu ní quide chiúⁿ-yu núú ñúhú-yu, te ingá-yu ní sáháⁿ-yu ní nadicó-yu núu nándi cùu ndáhú quidë-yu.

6 Te dava-gá-yu ní tñí-yu dava cue té xínu cuechi núú tée quide vico-áⁿ, te ní canihá-yu ndéé ní sahní ñáhá-yu xii-güedé.

7 Te tée yindaha ñaha xii ñáyiu quide vico-áⁿ ñí cudééⁿ víhí-dě sá dúcáⁿ ñí quidé-yu, te ní tendaha-dě cue sandádú-dé ní sáháⁿ-güedé ní sahní-güedé cue ñáyiu ducaⁿ ñí quide-áⁿ, te ní sahní-güedé nchaa vehe càa ñúú-yu.

8 Te sátá dúcáⁿ te ní xáhaⁿ-dě xii dava-gá cue té xínu cuechi núú-dě: “Nchaa sa ndècu túha, te cue ñáyiu ní cáháⁿ-í cuhuⁿ vico-a ní cùu ñá túú-gă tàú-yu sá cùhŭⁿ-yu.

9 Te chí cuáháⁿ ndèni ní cuu te cáháⁿ-ndó ncháa ñáyiu na nánihí-ndó ìchi na quixí-yu cuhúⁿ-yu vico-a”, càchí-dé xăhaⁿ-dě xii-güedé.

10 Te cue té xínu cuechi-áⁿ ñí quee-güedé cuáháⁿ-güedé, te ní cáháⁿ-güedé nchaa ñáyiu ní nanihí-güedé ichi, te cuèi ñáyiu váha iní-xi, te cuèi ñáyiu cuihna ìní-xi, te ní chítŭ-yu núú cúú vico-áⁿ.

11 Te sátá dúcáⁿ te tée yindaha ñáyiu quide vico-áⁿ ñí quihu-dé xití vehe ní xíndéhé-dě cue ñáyiu ñuhu vico-áⁿ, te ní xiní-dé ñí tée ñùtnahá tnuú-yu te ñá túú càa dóó-dě dàtná cáá dóó níhnú cuè ñáyiu ñuhu vico-áⁿ.

12 Te ní xáhaⁿ-dě xii tée-áⁿ: “¿Tăta, nása ní cuu cuánguihu-õ iha, te ñá túú càa dóó-n dàtná cáá dóó níhnú cuè ñáyiu ñuhu vico tñándaha-í?”, càchí-dé xăhaⁿ-dě xii tée-áⁿ. Dico tée-áⁿ ñà túú ní ñíhí-dě tñuhu cáháⁿ-dé.

13 Te tée yindaha ñáyiu quide vico-áⁿ ñí xáhaⁿ-dě xii cue ñáyiu xínu cuechi núú mèsá: “Chí tñí tée-áⁿ te dacùtu-ndo-dé, te queñuhu-ndo-dě ná quihíⁿ-dé cundecu-dé ñí xichi núú néé núú ïo ndoho-dé, te yacáⁿ ío ndáhyú-dé te dicó rúhñú-nă cuu núhu-dé sá sátú iní-dé sá ndóhó-dě”, càchí-dé xăhaⁿ-dě xii cue ñáyiu xínu cuechi núú mèsá-áⁿ.

14 Te duha ndùu cuendú cáháⁿ-í chí ío cuéhé ñáyiu cáháⁿ ñáhá Yă Ndiõxí xii-yu, dico sacú-ni-yu nduu táhŭ-yu cundecú-yu ndihí-gá –càchí-gá xăhaⁿ-gă xii-güedé.

Cuendá impuèstú

(Mr. 12:13-17; Lc. 20:20-26)

15 Te cue té cùu fariséú ní sáháⁿ-güedé ñí xichi ní ndatnúhu-güedé nàcuáa

cada-güedé datìcánuu-güedé Jèsús núú tñuhu cáháⁿ-gá cuendá ducaⁿ ñíhí-güedé nàcuáa cada-güedé cacáⁿ cuèchi-güedé cuendá-gá.

16 Te ní tendaha-güedé ñí úú cue té cùndihí-güedé, ndihí cue té cùndihí té Hèrodés cuáháⁿ-güedé núú ndécú Jèsús. Te òré ní quexìo-güedé núú ndécú-gă, te ní xáhaⁿ-güedé xii-gá:

–Mèstrú, ñíhí-ndí tñuhu sá ïo ndáá cáháⁿ-n, te cáháⁿ ndáá-n nàcuáa cáháⁿ Yă Ndiõxí cundecu-o ñùyíú-a, te cuèi nděda-ni càa ñáyiu ñí cáháⁿ-n ndihí-yu chí ñá túú quide cuendá-n cuèi ná ñáyiu cùú-yu.

17 Te cachí tñuhu xii-ndí, núu váha-ni quide-ndí sá chăhu-ndí té Cèsár tée ío cùnuu cuendá impuèstú áⁿ ñáhá –càchí-güedé xăhaⁿ-güedé xii-gá.

18 Dico Jèsús ní cutnùní iní-gá sá xító ndèé ñáhá-güedé xii-gá, núu ní xáhaⁿ-gă xii-güedé:

–Nchòhó cue té dândahú méé-xí sá quidé ndáá te ñá ndáá sá quidé ndáá-ndó, çná cuendá xító ndèé ñáhá-ndó xii-í?

19 Chí dánèhé ñáhá xii-í ñí díhúⁿ sá chăhu-ndo cuendá impuèstú núu nása càa –cachí-gá xăhaⁿ-gă xii-güedé.

Te ní dánèhé ñáhá-güedé xii-gá ñí díhúⁿ sá nání dènaríú.

20 Te òré ní xiní-gá díhúⁿ-ăⁿ te ní xicáⁿ tñuhú-gă núú-güedé, te xăhaⁿ-gă:

–Chí càchí tñuhu yoo núú-xi ndèé ndihí yoo diu-xi ndéé –càchí-gá xăhaⁿ-gă xii-güedé.

21 Te ní xáhaⁿ-güedé xii-gá:

–Núú tĕ Cèsár ndèé ndihí diu-dé –càchí-güedé xăhaⁿ-güedé xii-gá.

Te Jèsús ní xáhaⁿ-gă xii-güedé:

–Te núu ducaⁿ te chí nàcuáha té Cèsár sá cúú cuendá-dé, te sá cúú cuendá méé Yă Ndiõxí te xíaⁿ nacuáha-ndo-gă –càchí-gá xăhaⁿ-gă xii-güedé.

22 Te cue té-áⁿ ïo ní cuñúhu-güedé sá dúcáⁿ ñí cáháⁿ-gá, te ní natñí-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

23 Te diu-ni nduu-ăⁿ ñí quexìo ñí úú cue té cùu saducéú núú ndécú Jèsús. Te cue

tée-án ñà túú sàndáá iní-güedé sá ndótó cuè ñáyiú ní xíhí, te ní xáhaⁿ-güedě xii-gá:

24 —Mèstrú, ndí Moisés ní cachí ndí sá nũu ìⁿ tée ndècu ñadihí-xi cuú-dé te quendóo ñadihí-dé, te núu ñá túú dèhe-dé ní xõ ndihí-aⁿ te tée cùu ñaní-dé naqueheⁿ-dé ñaha ní quendóo quèé-án cuèndá coo déhe-dé ndihí-aⁿ cuèndá ñaní-dé tée ní xíhí-án.

25 Te ñuú-ndí-a ní xíndecu úsá tñahá cue tée mee-ni ndí ñaní-güedé. Te tée díhna ní níhí ñadihí-dé te ñá túú ní cùdí-dé cundecu-dé chi ní xíhí-dé, te ni ìⁿ dèhe-dé ñá túú ní xõ ndihí ñadihí-dé-án. Te tée cùu uú ní nàqueheⁿ-dé ñaha ní quendóo quèé-án.

26 Dico ní xíhí tucu-dé, te ni ìⁿ tucu déhe-dé ñá túú ní xõ ndihí ñaha-án, te ñu-ni ducaⁿ ñí yáha tée cùu uní, te ní xínu ndí ùsá-güedé ní cándeca ñaha-güedě xii ñaha-án dico ñu-ni ducaⁿ ñí xíhí-güedé.

27 Te ndéé núú ñí ndihí-ná te ní xíhí tñahá ñadihí-án.

28 Te na sàá nduu ndòto-güedé ndihí ñaha-án, ¿te ndèdacàa-güedé ñadihí-güedé cuu-aⁿ-i? Chi ndí ùsá-güedé ní cándeca ñaha-güedě xii-aⁿ —càchí-güedé xáhaⁿ-güedě xii-gá.

29 Te Jèsús ní xáhaⁿ-gã xii-güedé:

—Ní xíta nchòhó tñuhu càháⁿ-ndó, chi ñá túú xíní-ndó nàcuáa càháⁿ Yá Ndiõxí núú tütú-gá, te ni ñà túú cùtnuní iní-ndó sã díú-gã ndácú-gã quídé-gã nchaandi túhú sá vãha.

30 Te na càchí tñuhu-í xii-ndo sã òré ná sàá nduu ndòto nchaa ñáyiú ní xíhí, te dàvá-án vã yõ-gá dasaⁿ dèhe yoco-xi chi vá yõ-gá candeca tñaha, chi cuu-ná-yu dàtná cue espíritú xínú cuèchi núú Yá Ndiõxí.

31 ¿Te náa ñá túú quide cuendá-ndó nàcuáa càháⁿ Yá Ndiõxí núú tütú-gá núú càháⁿ-gá cuèndá cue ñáyiú ní xíhí-án? Te duha càchí-gá:

32 “Yúhú cùu-í Ndiõxí tẽ Àbrahám, ndihí té Isàác, ndihí té Jàcób”, duha càchí-gá núú tütú-gá. Te cue tée-án chi cuèi ní xíhí-güedé núú ñuyíú-a, dico sá cúu-xí Yá Ndiõxí chi ndècu vívú-ni-güedé. Chi ñu-ni gá cúu-gã Ndiõxí mee-ni cuè ñáyiú xíndecu vívú, te ñá túú cùu-gá Ndiõxí cue ñáyiú ñá túú ndècu vívú —càchí-gá xáhaⁿ-gã xii-güedé.

33 Te sá dúcáⁿ ñí cáháⁿ-gá ní xí-gá cue tée-án, te ío ní cuñúhu nchaa ñáyiú cuèndá sá ïo váha nduu tñuhu ní cáháⁿ-gá.

Tñuhu sá ïo-gá cùnùu

(Mr. 12:28-34)

34 Te cue tée cùu fariséú ní xíní-güedé ní sadí Jèsús yuhu cue tée cùu saducéú, chi ñá túú ní níhí-gã-güedé tñuhu cúñaha-güedě xii-gá, te cue tée cùu fariséú-án ñí nat-acá-güedé te cuáháⁿ-güedé núú ndécú Jèsús.

35 Te ìⁿ tée cùu fariséú-án ïo váha cùtnuní iní-dé nàcuáa nduu nchaa tñuhu ní chídó tñuní ndí Moisés te xito ndeé-dé Jèsús, te xáhaⁿ-dě xii-gá:

36 —Mèstrú, cachí tñuhu ndèdacàa tñuhu sá ñí chídó tñuní ndí Moisés ío-gá cùnùu cada-o —cachí-dé xáhaⁿ-dě xii-gá.

37 Te Jèsús ní xáhaⁿ-gã xii-dé:

—Duha càháⁿ tñuhu sá ïo-gá cùnùu: “Cuu iní-ndó Dütú Ndiõxí Yáa cúu Ndiõxí-ndó ñí yuhu ñí iní-ndó, te caní iní-ndó càda-ndo datná cùní mée-gã, te mee-ni tñuhu váha caní iní-ndó nàcuáa cuu vii cuu váha-ndo núú-gã”,

38 duha càháⁿ tñuhu sá ïo-gá cùnùu.

39 Te duha càháⁿ tucu ingá tñuhu cùu uú sá ïo cùnùu, te sa yatni ìⁿ-ni cùu-xi ndihí tñuhu díhna nuu, te càchí-xi: “Cuu iní-ndó tñaha ñáyiú-ndo dàtná cúu iní-ndó mèe-ndo”, duha càháⁿ tñuhu cùu uú-án.

40 Te cuèndá úú tñuhu-a ní cáá nchaa tñuhu ní cáháⁿ ndí Moisés nàcuáa cada ñáyiú, te ñu-ni cuèndá úú tñuhu-a ní cáá tñuhu ní cáháⁿ nchaa cue tée ní xóo cáháⁿ tñuhu Yá Ndiõxí ndéé sanaha —càchí-gá xáhaⁿ-gã xii-güedé.

Yoo cùu Xítohó Jesucristú

(Mr. 12:35-37; Lc. 20:41-44)

41 Te ndècu ducaⁿ-ni cue tée cùu fariséú núú ndécú Jèsús.

42 Te ní xícáⁿ tñuhú-gã núú-güedě, te xáhaⁿ-gã:

—Cùní-í cachí tñuhu-ndo yòo déhe-xi cùu Cristú Yáa tendaha Yá Ndiõxí quixi ñuyíú-a —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Déhe ndí Dàvíí cúu Yáa-án —càchí-güedé xáhaⁿ-güedě xii-gá.

43 Te Jèsús ní xáhaⁿ-gã xii-güedé:

—¿Te nása càchí-tu-ndo sã dèhe ndí Dàvíí cúu Cristú Yáa tendaha Yá Ndiõxí quixi

ñuyíú-a, te mee ndíi Dàvíí-áⁿ ní dácáhú ìní ñáhá Espíritú Yá Ndiöxí xii ndíi, te ní cachí ndíi sá Crístú Yaá tendaha Yá Ndiöxí quixi ñuyíú-a cùu-gá Xítóhó ndíi? Te duha ní cachí ndíi:

⁴⁴ Dútú Ndiöxí ní xáhaⁿ-gã xii Yaá cùú Xítóhó-í:

“Ngóo xio cùha-í, te yúhú cada-í te nchaa sá cùú ùhú ìní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cùú Xítóhó-í, cächí ndíi.

⁴⁵ ¿Te nása cùu Crístú déhe ndíi Dàvíí, te mee ndíi ní cachí ndíi sá cùú-gã Xítóhó ndíi? — cächí Jèsús xáhaⁿ-gã xii-güedé.

⁴⁶ Te ni ñⁿ-güedé ñá túú-gã ní ñíhí-güedé tnúhu cùñaha-güedé xii-gá. Te ndéé nduu-áⁿ ñà túú-gã ní cùyí-güedé ná tnúhu cacán tnúhú-güedé núú-gã.

23

Jèsús cáháⁿ-gá cuendá cue téé cùu fariséú ndíhi cuendá cue téé dàcuaha ñaha xii ñáyíu (Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gá núú nchaa ñáyíu, ndíhi núú cuè téé xica cuu ndíhi-gá, te xáhaⁿ-gã:

² —Cue téé dàcuaha ñaha xii ñáyíu nchaa tnúhu ní chídó tñuní ndíi Moisés, ndíhi cue téé cùu fariséú ndécú ndíhi-güedé tnúhu ndee ìní cáháⁿ-güedé nchaa tnúhu sá ní chídó tñuní ndíi Moisés-áⁿ.

³ Te cada-ndo nàcuáa dànehé ñáhá-güedé xii-ndo, dico vá cadá-ndó dàtná xíquide-güedé chi tucu ndùu tnúhu cáháⁿ-güedé, te tucu quide-güedé.

⁴ Te quide-güedé dàtná quidé ñáyíu dàcuído ñⁿ tñaha ñáyíu-xi ñⁿ sá ïo vée, te mée-yu ni lùha ñá túú cuíní-yu cuidó-yu. Te ducaⁿ sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuíní-güedé cada-güedé nàcuáa dànehé ñáhá-güedé xii-ndo.

⁵ Te mee-ni ndùcu-güedé nàcuáa quide-güedé cuendá quíní ñáyíu sá ïo cùu cahnu-güedé. Te ndéé xindá sá ndéé ñⁿ ùú tnúhu Yá Ndiöxí tneé-güedé ndíhi ndaha-güedé, te tñahá ìní-güedé sá ïo-gá cunduu quèhéⁿ xindá-áⁿ dàcúúxí xindá dava-gá ñáyíu. Te tñahá tucu ìní-güedé sá

ïo-gá cunduu nàni núú dõó sácúñhu-güedé dàcúúxí dõó sácúñhu dava-gá-yu.

⁶ Te ndí tnahá òré sácõo vico, òré quíhu-güedé mèsá caxi-güedé te ïo-gá cùdí ìní-güedé cunucóo-güedé núú xilé núú sácõo cue téé cùnuu-gá, te diu-ni ducaⁿ quide tucu-güedé cuèi xití veñúhu.

⁷ Te nchaa núú xicá cùu-güedé cuíní-güedé sá ndíhi tnúhu yíñùhu cáháⁿ ndíhi ñaha ñáyíu xii-güedé, te cuíní tucu-güedé sá cùñahá-yu xii-güedé mèstrú.

⁸ Dico nchòhó vá cùñaha-ndo xii ñáyíu sá cùñahá-yu mèstrú xii-ndo, chi nchòhó ñⁿ-ni cùu-ndo ndecu-ndo, chi ducaⁿ ñⁿ-dii-ni yúhú Yaá ní tendaha Yá Ndiöxí véxi ñuyíú-a cùu-í Mèstrú ndécú ndíhi ñaha-í xii-ndo.

⁹ Te ñⁿ-dii-ni Dútú Ndiöxí Yaá ndécú àndíu cuu-gá Tátá-ndó, núu xíáⁿ vá cáháⁿ-ndó sã dàva cue téé ñuyíú-a cùu-güedé tátá-ndó.

¹⁰ Te ni vã cání ìní-ndó càda-ndo nacuáa cáháⁿ ñáyíu sá cùnùu-ndo, chi ñⁿ-dii-ni yúhú Crístú Yaá ní tendaha Yá Ndiöxí véxi ñuyíú-a cùnuu-í.

¹¹ Te ñáyíu ïo-gá cùnùu ndecu ndíhi-ndo, ñáyíu-áⁿ cùú-yu ñáyíu xínu cuechi núú-ndó.

¹² Te nchaa ñáyíu quide cahnu mee-xi ñáyíu-áⁿ vã cùú-yu ñáyíu cùnuu, te nchaa ñáyíu ñá túú quide cahnu mee-xi ñáyíu-áⁿ cùnùú-yu.

¹³ Te nchòhó cue téé dàcuaha ñaha xii ñáyíu nchaa tnúhu ní chídó tñuní ndíi Moisés, ndíhi nchòhó cue téé cùu fariséú, cùu-ndo cue téé ïo dàndahú mée-xí sã quidé ndáá te ñá ndáá sá quidé ndáá-ndó, te ndàhú ní cuu-ndo chi sàdí-ndó ìchi ñáyíu ñá dáñá-ndó ndíhu ndaha ñaha Yá Ndiöxí xii-yu, te ni mée-ndo ñá túú quide-ndo nacuáa ndíhu ndaha ñaha-gá xii-ndo, te ni dàva-gá cue ñáyíu cuíní sá ndíhu ndaha ñaha-gá xii-yu ñá dáñá-ndó.

¹⁴ Te nchòhó cue téé dàcuaha ñaha xii ñáyíu nchaa tnúhu ní chídó tñuní ndíi Moisés, ndíhi nchòhó cue téé cùu fariséú, cùú-ndó cuè téé ïo dàndahú mée-xí sã quidé ndáá te ñá ndáá sá quidé ndáá-ndó, te ndàhú ní cuu-ndo chi quèndeé-ndó vèhe cue ñáyíu quèé, te ïo naha cáháⁿ ndíhi-ndo Yá Ndiöxí cuendá cuíní-ndó sã vã yõo cutnùní ìní-xi nàcuáa quide-ndo. Te sá

dúcáⁿ quide-ndo te ío-gá ndoho-ndo núú úhú núú ndàhú dàcúúxí dàva-gá ñáyiu.

15 'Te nchòhó cue téé dâcuaha ñaha xii ñáyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dândahú méé-xí sã quidé ndää te ñá ndää sã quidé ndää-ndó, te ndàhú ní cuu-ndo chí sàhni iní-ndó cuáháⁿ-ndó ndèni ní cuu dâcaháⁿ-ndó ñáyiu cuendá cuiní-ndó tñí-yu ichi ndècu-ndo. Te òré ná xĩnu iní-yu tñí-yu ichi ndècu-ndo-án te uuⁿ-gá cuíta nihnú-yu dàcúúxí mèe-ndo.

16 'Te nchòhó cúú-ndó dàtná cue ñáyiu cuàá, chí ñá cùtnùní iní-ndó nâcuáa canu ichi-ndo ñáyiu, te ndàhú ní cuu-ndo chí càchí-ndó: "Íⁿ ñáyiu na càcunehe veñúhu càhnu sã ío cùnuu òré cuiní-yu cutnùní iní tnàha ñáyíu-yu sã ndää cadá-yu ìⁿ sã sání iní-yu cadá-yu, te vá cúú cuèchi xií-yu cuèi vá cádã-yu. Dico núu na càcu nehé-yu díhúⁿ cuàáⁿ yíhí xítí veñúhu-áⁿ te cuu cuèchi xií-yu te núu vá cádã-yu sã ñí cachí-yu cadá-yu", duha càchí-ndó.

17 'Nchòhó cúú-ndó cuè téé ío ñí dǐquí-xi, te cùu-ndo datná cue ñáyiu cuàá chí ñá tècú tnùní-ndó! Te vá càchí-ndó sã ío-gá cùnùu díhúⁿ cuàáⁿ dàcúúxí veñúhu, chí diu cuendá veñúhu-áⁿ ñí cuu íí díhúⁿ cuàáⁿ-áⁿ.

18 Te càchí tucu-ndo: "Íⁿ ñáyiu na càcunehe xító núú sácódó sã ndúú tãhú Yá Ndiòxí òré cuiní-yu cutnùní iní tnàha ñáyíu-yu sã ndää cadá-yu ìⁿ sã sání iní-yu cadá-yu, te vá cúú cuèchi xií-yu cuèi vá cádã-yu, dico núu na càcu nehé-yu sã ndúú tãhú Yá Ndiòxí yódó núú xító-áⁿ te cuu cuèchi xií-yu te núu vá cádã-yu sã ñí sani iní-yu cadá-yu", duha càchí-ndó.

19 'Te cùu-ndo cue téé ío ñí dǐquí-xi, te cùu-ndo datná cue ñáyiu cuàá chí ñá tècú tnùní-ndó! Te vá cání iní-ndó sã ío-gá nándíhí sã ndúú tãhú Yá Ndiòxí sácódó núú xító núú sácódó tnàhí sã ndúú tãhú-gã-áⁿ dàcúúxí mèe xító-áⁿ.

20 Chi nchaa ñáyiu ducaⁿ càcunehe xító-áⁿ, te tnàhá-ni sã yódó núú-xi càcu nehé-yu òré ducaⁿ càháⁿ-yu.

21 Te nchaa ñáyiu ducaⁿ càcunehe veñúhu càhnu sã ío cùnuu te ñá díú mèe-ni veñúhu càcu nehé-yu òré ducaⁿ càháⁿ-yu, chí tnàhá-ni Yá Ndiòxí Yaá cúú

cuendá veñúhu-áⁿ cáciú nehé-yu òré ducaⁿ càháⁿ-yu.

22 Te nchaa ñáyiu càcunehe andiu cuendá cutnùní iní tnàha ñáyíu-yu sã ndää cadá-yu ìⁿ sã sání iní-yu cadá-yu, te ñá díú mèe-ni andiu cacu nehé-yu chí tnàhá-ni núú núcõo Yá Ndiòxí táxí tnùní-gá cáciú nehé-yu òré ducaⁿ càháⁿ-yu, te tnàhá méé-gã cáciú nehé-yu òré ducaⁿ càháⁿ-yu.

23 'Te nchòhó cue téé dâcuaha ñaha xii ñáyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dândahú méé-xí sã quidé ndää te ñá ndää sã quidé ndää-ndó. Te cuèi núú ùxí xichi yúcu mèntá ñihí-ndó, te sãñaha-ndo ìⁿ xichi xii Yá Ndiòxí, te diu-ni ducaⁿ quide-ndo yúcu nání ànís, ndihí yúcu nání cõminú, dico ndàhú ní cuu-ndo chí ñá túú quide cuendá-ndó nâcuáa càháⁿ nchaa tnúhu sã ío-gá cùnùu sanu ichi ñaha xii-ndo, te tnúhu-áⁿ càchí-xi sã ío xini ñuhu-xi cada ndää-ndó cùndecu-ndo, te cundàhú iní-ndó cuè tnaha ñáyiu-ndo, te quindáá iní-ndó Yá Ndiòxí, te cada-ndo nchaa nâcuáa ndùu tnúhu càháⁿ-ndó, te nchaa tnúhu-áⁿ cúú-xí tnúhu sã ío cùnuu xini ñuhu-xi cada-ndo nâcuáa càháⁿ-xi, dico vá dáñá ndèé-ndó càda-ndo nchaa dàva-gã nâcuáa càháⁿ tnúhu sã sánú ichi ñaha xii-ndo.

24 'Te nchòhó cúú-ndó dàtná cue ñáyiu cuàá, chí ñá túú cùtnùní iní-ndó nâcuáa canu ichi-ndo ñáyiu, chí quide cuendá-ndó mèe-ni nchaa tnúhu sã ñá túú ío cùnuu, dico nchaa tnúhu sã ío-gá cùnùu xini ñuhu-xi cada cuendá-ndó ñá túú quide cuendá-ndó!

25 'Te nchòhó cue téé dâcuaha ñaha xii ñáyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cùu-ndo cue téé ío dândahú méé-xí sã quidé ndää te ñá ndää sã quidé ndää-ndó. Te ndàhú ní cuu-ndo chí cùu-ndo datná cue ñáyiu nâquete sátá-ni tásáⁿ ndihí sátá-ni cõhó te xítí-xi càndehe caduha-ni. Te ducaⁿ sãtnahá-xi cùu-ndo chí mee-ni sã ndécú ndihí tnaha ñáyiu-ndo ñuhu iní-ndó, te nándi dândahú-ndó-yu te quèheⁿ-ndo sã ndécú ndihí-yu.

26 Te nchòhó cue téé cùu fariséú, cúú-ndó dàtná cue ñáyiu cuàá, chí ñá túú cùtnùní iní-ndó nâcuáa ndùu sã quidé-ndó. Te

ío xini ñuhu-xi sá cáda-ndó nàcuáa nduu ndoo nduu ñiñe iní-ndó cuèndá ndacu-ndo cáda-ndo sá váha, te xiáⁿ nuu chí cáda dátá ñiquide ñáyiú nàquete ndaa xití tàsáⁿ ndihi ndaa xití cóhó.

27 Te nchòhó cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndihi nchòhó cue tée cùu fariséu, cùu-ndo cue tée ío dándahú méé-xí sá quidé ndáa te ñá ndáa sá quidé ndáa-ndó. Te ndàhú ní cuu-ndo chi cùu-ndo datná núú yíndüxi ndíyí núú nì cuáha vii te ní nacáhyú sá cuixíⁿ, dico xití yaú-áⁿ chi càndehe caduha chi mee-ni yiqui ndíyí ñuhu.

28 Te ducaⁿ sãtnahá-xi cùu-ndo chi sãnuu sá cúu-ndó cuè tée váha dico iní-ndó chi mee-ni sã cuéhé sá dúhá ñuhu, te ío dándahú-ndó mée-ndo sá quidé ndáa-ndó te ñá ndáa sá quidé ndáa-ndó.

29 Te nchòhó cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndihi nchòhó cue tée cùu fariséu, cúu-ndó cuè tée ío dándahú méé-xí sá quidé ndáa te ñá ndáa sá quidé ndáa-ndó. Te ndàhú ní cuu-ndo chi càdúha-ndo nchaa núú ñi nguíndüxi cue tée ní xóo cáháⁿ tnúhu Yá Ndiöxí ndéé sanaha, te ío vii quide-ndo nchaa núú sã ñi cuáha núú yíndüxi cue ñáyiú ní quide váha ní xíndecu ñuyíú-a.

30 Te cãchí-ndó: “Te núú dícó nchoo ñi xíndecu-o cùtnahá ní xíndecu cue ñaní tnáhá-ó ndéé sanaha, te vá chítnahá-ó-güedé cahni-o cuè tée ní xóo cáháⁿ tnúhu Yá Ndiöxí dàvá-áⁿ ní cùu”, duha cãchí-ndó.

31 Te sá dúcáⁿ cãháⁿ-ndó, te xiáⁿ cùtnùnì sá ííⁿ-ní cùu-ndo ndihi cue ñaní tnáhá-ndó cuè tée ní xíndecu ndéé sanaha, cue tée ní sahani ñaha xii cue tée ní cáháⁿ tnúhu Yá Ndiöxí dàvá-áⁿ.

32 Te núú ducaⁿ te chí dáxínu cava chiúⁿ ní tausaha-güedé.

33 Te nchòhó cúu-ndó cuè tée ío cuihna iní-xi, chi cùu-ndo datná cóo dëéⁿ! Te nchòhó vá ñihí-ndó nàcuáa cada-ndo cãcu nihnu-ndo núú úhú núú ndàhú.

34 Te cuèndá xiáⁿ nuu tendaha-í cue tée cãháⁿ tnúhu Yá Ndiöxí quixi núú-ndó, ndihi cue tée cùu mestrú danéhé ñáhá xii-ndo tnúhu-gá, ndihi cue tée ío váha cùtnunì iní-xi cuèndá cáháⁿ-güedé tnúhu-gá núú-ndó. Dico nchòhó chí da cùu úhú iní-ndó-güedé,

chi dava-güedé cahni-ndo-güedé, te dava-güedé cata caa-ndo-güedé núú cùrúxí, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quíhíⁿ-ndó nànducu-ndo-güedé cuèndá cada úhú iní-ndó-güedé.

35 Te sá dúcáⁿ ná cáda-ndo, te ndadíquí-ndó cuè tée ní quide ndáa ní xíndecu ní xihí ní sahani ñaha cuè ñaní tnáhá-ndó. Te ndéé ndíi Àbél tée ío váha ní quide ndáa ní xíndecu ní sahani-güedé ndadíquí-ndó, ndihi nchaa dava-gá cue tée ní sahani-güedé, ndihi ndéé ndíi Zacàriá déhe ndíi Berèquiás tée ní sahani-güedé ndéé núú ñi ndihi-ná ndadíquí-ndó, te ndíi-áⁿ ñi sahani-güedé mei tnúú veñúhu càhnu sá ío cùnuu ndihi xito núú sácödó sã ndúú tãhú Yá Ndiöxí, te nchaa cue tée-áⁿ ndadíquí-ndó chi dátá tnúhu mee-ndo ñi sahani-ndo cuè tée-áⁿ, chi diu-ni ñaní tnáhá mée-ndo ducaⁿ ní sahani ñaha xii-güedé.

36 Te na cãchí tnúhu ndáa-í xii-ndo sã nchaa cue tée ní quide ndáa ní xíndecu ní sahani-güedé, nchaa cue tée-áⁿ ndadíquí nchaa ñáyiú ndècu vitna —cachí-gá xãháⁿ-gã xii-güedé.

Jèsús cãháⁿ-gã cuèndá ñáyiú ñuu Jerusàlén (Lc. 13:34-35)

37 Te xãháⁿ Jèsús xii ñáyiú ñuu Jerusàlén:

—Nchòhó ñáyiú ñuu Jerusàlén sãhani-ndo cue tée ní tendaha Yá Ndiöxí véxi cãháⁿ tnúhu-gá núú-ndó, te mee-ni ndihi yúú sãhni-ndó dàva-güedé. Te yúhú titní xito ní cuiní-í coto ñaha-í xii-ndo dátá quidé nchùxi xito-güedi déhe-güedi sãquíhi-güedi xití ndíxíⁿ-güedi, dico nchòhó ñá túú ní cuiní-ndó, te diu-ni ducaⁿ sãni iní-í ndéé vitna!

38 Te na cãchí tnúhu ndáa-í xii-ndo sã sãá nduu te ío ndàhú yãhá ñuu-ndó, te vá cùndecu-gá-ndó.

39 Te na cãchí tnúhu tucu-í xii-ndo sã vã quini ñáhá-gã-ndó xii-í, dico sãá nduu quini ñáhá tucu-ndo, te dàvá-áⁿ cachí-ndó: “Ío càhnu cuu Yaá ní tendaha Dütú Ndiöxí véxi”, duha cachí-ndó —cachí-gá xãháⁿ-gã xii-yu.

24

Jèsús cächí-gá sá ngóyó veñúhu
(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sá ïo cùnunu, te mei òré ní queheⁿ-gá ichi quíhíⁿ-gá ìⁿ xichi, te ní sándehe yatni cue téé xìca cuu ndìhi-gá dǐñi-gá, te xǎhaⁿ-güedě xii-gá:

—Cundehe veñúhu-a nǎ ïo váha ní sáá — cächí-güedé xǎhaⁿ-güedě xii-gá.

² Te Jèsús ní xǎhaⁿ-gǎ xii-güedé:

—Na cächí tñúhu ndáá-í xii-ndo sǎ ncháá sǎ ndéhé-ndó-á vitna saá nduu te vá cündüu-gá-xi dàtná cáá-xí vitna, chi ni ìⁿ-gá yúú vǎ códó nchìhi tnaha-xi chi ndìhi ngoyo —cächí-gá xǎhaⁿ-gǎ xii-güedé.

Nàcuáa cada-xi nduu ta cùyatni naa ñuyúu-a

(Mr. 13:3-23; Lc. 21:7-24; 17:22-24)

³ Te Jèsús ní sáá-gá ndìhi cue téé xìca cuu ndìhi-gá yucu Òlívú, te xíáⁿ nǐ ngóo-gá te núú núcõo-gá-áⁿ nǐ sáháⁿ cue téé xìca cuu ndìhi-gá, te dayuhu nǐ xǎhaⁿ-güedě xii-gá:

—Cuìní-ndí cachí tñúhu-n nǎ nduu dùcaⁿ cada-xi ngoyo veñúhu càhnu sá ïo cùnunu, ndìhi nándi cùu sá cáda-xí òré sa ta cùyatni nduu quixi tucu-n ñuyúu-a, ndìhi òré sa ta cùyatni naa-xi —cachí-güedé xǎhaⁿ-güedě xii-gá.

⁴ Te Jèsús ní xǎhaⁿ-gǎ xii-güedé:

—Ío quíhi iní-ndó cündecu-ndo cuendá sá vǎ yõo dandàhú ñáhá xii-ndo.

⁵ Chi ïo cuéhé cue téé coo ñuyúú, te danàni-güedé méé-güedé dàtná nánì-í, te cachí-güedé: “Yúhú cùu-í Cristú Yaá ní tendaha Yǎ Ndiõxí véxi ñuyúu-a”, duha cachí-güedé. Te sá dúcáⁿ cǎháⁿ-güedé te ïo vǎi ñáyiu dandàhú-güedé.

⁶ Te níhí-ndó tñúhu nǎá-güedé nděni ní cuu, dico vá yuhú-ndó chi dacuítíi sǎ dúcáⁿ càda-xi, dico vátá sǎá-gá nduu nàa ñuyúú òré ducaⁿ càda-xi.

⁷ Chi cue téé ìⁿ nàcióⁿ nǎá-güedé ndìhi cue téé ingá nàcióⁿ, te titní ñuú ngüíta-güedé nǎá-güedé, te titní xichi ñuyúú coo tnamá, te titní tucu xichi ñuyúú quixi cuéhé, te titní tucu xichi ñuyúú ïo níhi tnáa.

⁸ Te nchaa xǎáⁿ cuu-xi tñúndòho sá vítná vǎha váha quèsaha sá cùu-xí cuè ñáyiu xǐndecu ñuyúú.

⁹ Te cue ñáyiu na cùu úhú iní ñáhá xii-ndo cuáha cuendá ñáhǎ-yu núú cuè téé cùchiuⁿ cuendá caniha-güedě xii-ndo, te dava-ndo càhni ñaha-güedé, te nchaa ñáyiu cuu úhú iní ñáhǎ-yu xii-ndo sǎ cuendá-í.

¹⁰ Te dàvá-áⁿ ïo vǎi ñáyiu dàñá-yu sá sàndáá iní-yu Yá Ndiõxí, te ngóo-yu cuu úhú iní tnáhǎ-yu, te cuáha cuendá tnáhǎ-yu núú cuè téé cùchiuⁿ.

¹¹ Te ïo vǎi cue téé cachí-güedé sá cǎháⁿ-güedé tñúhu Yá Ndiõxí te ñǎ ndáá sá cǎháⁿ-güedé tñúhu-gá, te ducaⁿ ïo vǎi ñáyiu dandàhú-güedé.

¹² Te dàvá-áⁿ cunuu mèe-ni nchaa sá cuéhé sá dúhá càda-yu, te vǎi-yu vá cùu iní-gá-yu tnàha ñáyiu-yu.

¹³ Dico nchaa ñáyiu na càda ndee-ni iní canchicúⁿ nihnu ñaha-ni xii-í, ñáyiu-áⁿ naníhí tǎhú-yu.

¹⁴ Te níhì ñuyúú quíhíⁿ ñáyiu cǎháⁿ-yu tñúhu váha, tñúhu sá cǎháⁿ nàcuáa ndìhu ndaha ñàha Yá Ndiõxí xii ñáyiu, te sátá ná níhí nchaa ñáyiu tñúhu-áⁿ te naa ñuyúú.

¹⁵ Te ndí Dániél téé ní xóo cǎháⁿ tñúhu Yá Ndiõxí ndéé sanaha nǐ chídó tñúni ndíi cuendá ìⁿ sá dáquèe tihú Yá Ndiõxí cundecu ìⁿ xichi núú nǐ cuu íi, te xǎáⁿ cada-xi sá vǎ cündecu-gá ni ìⁿ ñáyiu xíáⁿ. Te cada cuendá váha-ndo nàcuáa ní cǎháⁿ ndíi, chi nduu na quíni-ndó xǎáⁿ cundecu-xi núú dúcáⁿ nǐ cuu íi,

¹⁶ te dàvá-áⁿ nchaa ñáyiu xǐndecu distrítú Júdeá xíní ñùhu-xi cunú-yu quíhíⁿ-yu xití yucu.

¹⁷ Te nchaa ñáyiu ndáa ndódó dǐquí véhé-xí vǎ ndǐhu-gá-yu vehé-yu quehéⁿ-yu ìⁿ ndachíuⁿ-yu canehé-yu quíhíⁿ.

¹⁸ Te nchaa ñáyiu cuáháⁿ yucu vá nùhú-gá-yu vehé-yu cúnúquehéⁿ-yu dóó-yu.

¹⁹ Te ndàhú ní cuu nchaa ñáyiu dǐhí ñúhú dēhe-xi, ndìhi cue ñáyiu dǐhí xǐndeca déhe vitna sàdi na saá nduu dùcaⁿ cada-xi!

²⁰ Te nchòhó, chí càcáⁿ tǎhú nùú Yá Ndiõxí cuendá sá vǎ dúcáⁿ ndòho-ndo yóo quídé vǐxiⁿ-xi, te ni vǎ dúcáⁿ ndòho-ndo nduu cuu-xi nduu ndetatú-ndó.

21 Chi dàvá-án coo tnúndòho cahnu vihi ñuyíú, te vátá ííⁿ ndùu-gá coo tnúndòho cahnu vihi-án ndèe cútnàhá ní ngáva ñuyíú, chi ñu-ni dàvá-án coo tnúndòho cahnu vihi-án, te ni núu cuáhán núu véxi vá cóó-gá tnúndòho-án.

22 Te Yá Ndiöxí cächí-gá sá və ïo vại nduu coo tnúndòho cahnu vihi-án sá cuendá nchaa ñáyíu ní cáháⁿ-gá cundecu ndihí-gá. Chi núu vại nduu na coo tnúndòho-án te vá yõ cácu nihnu.

23 Te núu ïó ñáyíu cächí-yu xii-ndo: “Chí cündèhe iha, chi iha ní quexìo Cristú Yáá ní tendaha Yá Ndiöxí véxi ñuyíú-a”, àdi cachí-yu: “Chí cündèhe yacáⁿ chi yacáⁿ ndécú-gá”, cächí-yu ña. Te vá quindáá iní-ndó tnúhu cáhán-yu.

24 Chi coo cue téee cachí-güedé sá cúu-güedé Yáá ní tendaha Yá Ndiöxí véxi ñuyíú-a, te dava-güedé cachí-güedé sá cúu-güedé cue téee cáhán tnúhu Yá Ndiöxí dico ñá ndáá sá cúu-güedé cue téee cáhán tnúhu-gá, te cada-güedé titní núu sá və yõ tnàhí ndàcu cada cuendá dandàhú-güedé ñáyíu. Te caní iní-güedé dandàhú-güedé ndéee cue ñáyíu ní cáháⁿ Yá Ndiöxí cundecu ndihí-gá.

25 Te duha ndùu tnúhu cáhán-í dátúha ñaha-í xii-ndo.

26 Te núu cächí-yu xii-ndo: “Xití yucu-án ní quexìo Yáá ní tendaha Yá Ndiöxí véxi ñuyíú-a”, cächí-yu. Te vá quindáá iní-ndó quíhíⁿ-ndó, àdi cachí-yu: “Vehe-án ndécú Yáá ní tendaha Yá Ndiöxí véxi ñuyíú-a”, cächí-yu. Te vá quindáá iní-ndó tnúhu cáhán-yu.

27 Chi dàtná xìní nchaa ñáyíu quide-xi oré sáá ndúté dáyehé-xi ní càa xico ñuyíú ducaⁿ càda-xi oré quixi tucu yúhú Téee cùu ñaní tnáhá-ndó nchaa-ndo chi nchaa-yu quini ñáhá-yu xii-í.

28 Te nchòhó xìní-ndó sá ncháá núu yúcu yiqui cuñú ní xihí te yacáⁿ tàcá nchaa ndixíí xéxi-güedé.

Nàcuáa cada-xi òré quixi tucu Téee cùu ñaní tnáhá cuè ñáyíu

(Mr. 13:24-37; Lc. 21:25-33; 17:26-30, 34-36)

29 Te na yáha-ni coo tnúndòho cahnu vihi-án, te vá dáyehé-gá nchícanhii, te ni

vá dáyehé-gá yóó, te ngoyo nchaa chódíní ndèe andíu, te quidi-xi andíu

30 nàcuáa cutnùní iní ñáyíu sá sá véxi yúhú Téee cùu ñaní tnáhá-yu nchaa-yu. Te cue ñáyíu nihíí ñuyíú ndáhyú-yu sá ndihú iní-yu òré ducaⁿ càda-xi, te nchaa-yu quini ñáhá-yu xii-í quee-í andíu quixi-í ichi xití vícò, te quini-yu sá ïo cànno cuu-í, te quide-í nchaa sá vəha.

31 Te tauchìuⁿ-í cue espíritú xínú cuèchi núu-í níhi tíu-xi cútú nadatàcá-xi nchaa ñáyíu ní cáháⁿ-í chitnahá ñáhá xii-í xíndecu ní càa xico ñuyíú.

32 Te nchòhó sa xìní-ndó nàcuáa quide yutnu ngúxí, chi yutnu-án ndúu yùte núu dité-xi te nàtáhu ndaha-xi. Te òré ducaⁿ quide-xi te cächí-ndó sá sá ní cuyatni nuu cahni.

33 Te ñu-ni ducaⁿ sàtnahá-xi cada-xi ñuyíú-a òré ná quini-ndó càda-xi nchaa nàcuáa ní cáháⁿ-í, te cutnùní iní-ndó sá sá ní cuyatni vii-ná nduu nàa ñuyíú.

34 Te na cächí tnúhu ndáá-í xii-ndo sá òré vátá cùu-gá nchaa ñáyíu xíndecu ñuyíú-a vitna, te cada-xi nchaa nàcuáa ní cáháⁿ-í.

35 Te andíu ndihí ñuyíú-a chi ndihí nihnu-xi, dico tnúhu-í chi vá ndihí nihnu-xi chi cùu-xi tnúhu ndáá cuiti.

36 Dico ñá túu cùtnuní ná nduu quixi tucu-í, te ni ñá túu cùtnuní ná òré chi vá yõ xìní, te ni cuè espíritú xínú cuèchi núu Yá Ndiöxí ñá túu xìní-xi ná nduu quixi-í, te ni mèe yúhú Téee cùu Déhe Dútú Ndiöxí ñá túu xìní-í ná nduu quixi tucu-í, chi ñndìi díi-ni mee-gá xìní-gá núu ná nduu quixi-í.

37 Te nduu na quixi tucu yúhú Téee cùu ñaní tnáhá-ndó nchaa-ndo ñuyíú-a te cada-xi dàtná ní quide-xi cútnàhá ní xíndecu ndíi Nõé.

38 Chi nchaa ñáyíu ní xíndecu dàvá-án òré vátá ndáá-gá ndute ñuyíú, te xéxi-yu xihí-yu quide-yu, te davá-yu ïó-yu vico tnándaha, te davá-yu dàsán-yu déhe yòcò-yu candeca ñaha tée, te ducaⁿ-ni xíquidé-yu ndéee ní sáá nduu cuãguee té Nõé xití bàrcú.

39 Te ñá túu ní cùtnuní iní-yu nàcuáa cada-xi ñuyíú ndéee ní sáá nduu ní ngúíta-xi ní cuuⁿ dáu ní ndaa ndute ñuyíú ní dánáá ñaha-xi xii-yu. Te ñu-ni ducaⁿ sàtnahá tucu-xi cada-xi nduu na quixi tucu yúhú Téee cùu ñaní tnáhá-yu nchaa-yu ñuyíú-a,

chi nduu ñà túú nã yíhí ìní-yu te quixi tucu-í.

40 Te dàvá-án nũu úú tnàhá cue tée yíhi-güedé xití yucu, te ñⁿ-dé ndanchita te ñⁿ-dé quendóo.

41 Àdi úú ñáyiú dîhí nchícö-yu ñⁿ-ni vèhe, te ñⁿ-yu ndanchita te ñⁿ-yu quendóo.

42 Te duha nduu tnúhu càháⁿ-í cuendá nchòhó cundecu túha-ndo, chi ñá túú xìní-ndó nã òré quixi tucu yúhú Yaá cúú Xìtohó-ndó.

43 Te nchòhó xìní-ndó sã nũu ñⁿ tée cùu xítòhó vehe xìní-dé ná òré cúú-xí niú quíhu ñadúhú vehe-dé duhu-güedě, te quíhi ìní-dé cundecu-dé cuendá sã vã dáñá-dě quíhu ñadúhú-ãⁿ vehe-dé duhu-güedě, dico ñá túú xìní-dé.

44 Te duha càháⁿ-í chi nchòhó xìní ñùhu-xi cundecu túha-ndo, chi na cuáhánⁿ òré ñá túú nã yíhí ìní-ndó quèxio yúhú Tée cùu ñaní tnáhá-ndó nchàa-ndo.

*Cuendá ñⁿ tée xìnu cuechi
(Lc. 12:41-48)*

45 Te na càni-í ñⁿ cuendú núú-ndó. ñⁿ tée xìnu cuechi núú ñⁿ pàtróónⁿ cúú-dě ñⁿ tée ío váha tècú tnùní, te quide ndáá-dé ndécú-dě. Te ñⁿ xito ní dándõ ndaha ñaha patróónⁿ-dě xii-dé nchaa cue ñáyiú ndècu vehe-dé cuendá coto ñaha-dě xii-yu cuáñaha-dě sã cáxí-yu òré taú-xi caxí-yu, te tée cùu patróónⁿ-án nĩ quee-dé cuáhánⁿ-dě.

46 Te váha táhú tée xìnu cuechi-án te núú ndècuu-dé quidé-dě nchaa nàcuáa ní xáhaⁿ patróónⁿ-dě cada-dé mei òré ní nasáa patróónⁿ-dě-án.

47 Te na càchí tnúhu ndáá-í xii-ndo sã tée cùu patróónⁿ-dě-án cùñaha-dě xii-dé sã quíndàha-dé nchaa sã ndécú ndìhi-dé.

48 Dico núú tée xìnu cuechi-án ní cùu-dé ñⁿ tée cuihna ìní-xi, te ngóo-dé caní ìní-dé sã cùyàa patróónⁿ-dě vá násàa ndìhi-dé.

49 Te ngüíta-dé caní-dé nchaa dava-gá cue ñáyiú xìnu cuechi ndìhi-dé, te ngóo-dé caxi-dé coho-dé cada-dé ndìhi nchaa cue tée quíhu.

50 Te ñⁿ nduu òré ñá túú yíhi ìní-dé nasáa patróónⁿ-dě,

51 te ío dandòho ñaha patróónⁿ-dě xii-dé, chi daquihíⁿ ñáhá-dě xii-dé núú xíndecu cue ñáyiú ní cachí sã nĩ quide ndáá te ñá ndáa sã nĩ quide ndáá-yu. Te ducaⁿ sãtnahá-xi

dandòho ñaha Yá Ndiõxí xii ñáyiú, chi daquihíⁿ ñáhá-gã xii-yu ñⁿ xichi núú ío ndohó-yu te yacáⁿ ío ndáhyú-yu, te dícó rúhñú-nã cuu núhu-yu sã sàtú ìní-yu sã ndóhó-yu —càchí-gá xãhaⁿ-gã xii-güedé.

25

Cuendá úxí ñáyiú dîhí

1 Te xãhaⁿ tucu Jesús xii-güedé:

—Na càni-í ñⁿ cuendú núú-ndó nàcuáa tecú tnùní-ndó nàcuáa cada-xi òré ndìhu ndaha ñaha Yá Ndiõxí xii ñáyiú. Te úxí tnàhá ñáyiú dîhí ñáyiú cuechi nĩ quehéⁿ-yu linterná-yu, te cuáhánⁿ-yu ñⁿ xichi núú cóo víco tnándaha cuendá cundetú-yu quexio tée tnándaha.

2 Te ùhúⁿ ñáyiú cuechi-ãⁿ ío váha cùtnuní ìní-yu, te ùhúⁿ-yu ñáhá.

3 Te ndi ùhúⁿ ñáyiú cuechi dùcaⁿ ñá túú cùtnuní ìní-xi-án ñà túú ní cãnehé-yu sã nděe linterná-yu.

4 Dico ndi ùhúⁿ ñáyiú cuechi cùtnuní ìní-xi-án nêhë-yu sã nděe linterná-yu.

5 Te tée tnándaha-án cùyàa-dé quexio-dé núú ndétú ñáhá-yu-án, te nini dùcaⁿ cuyaa-dé ní tnã ñaha sàní xii-yu ní xidí-yu.

6 Te cùu-xi datná dava niú níhi ní cáháⁿ dava-gá ñáyiú, te càchí-yu: “Sa véxi tée tnándaha, chí táquèe quehé queheⁿ cuendá-ndó-dě”, càchí-yu.

7 Te ndi ùxí ñáyiú cuechi-ãⁿ nĩ ndacóo-yu quide túha-yu linterná-yu.

8 Te ndi ùhúⁿ ñáyiú cuechi ñà túú cùtnuní ìní-xi-án nĩ xáhãⁿ-yu xii cue ndi ùhúⁿ ñáyiú cùtnuní ìní-xi-án: “Chí táxí nùu luha sã nděe linterná-ndó ná nděe linterná-ndi chí ñá cùní-xi cáyú mee-ni ndáhvá”, càchí-yu xáhãⁿ-yu.

9 Te cue ñáyiú cuechi cùtnuní ìní-xi-án nĩ xáhãⁿ-yu: “Vá táxí nùu-ndi chí vá tnàhá canehé chiuⁿ mee-ndi, te váha-gá chí cuáhánⁿ cuaaⁿ-ndo núú cùe ñáyiú xidícó cuendá sã vã cùmãní xii-ndo, te vá cùmãní xii nchúhú tucu”, càchí-yu xáhãⁿ-yu.

10 Te nini cuáhánⁿ ndi ùhúⁿ ñáyiú ducaⁿ ñà túú cùtnuní ìní-xi-án cuãguaáⁿ-yu sã nděe linterná-yu ní quexio tée tnándaha. Te ndi ùhúⁿ ñáyiú cuechi cùtnuní ìní-xi-án nĩ queheⁿ cuendá ñáhá-yu xii-dé, te cuãnguìhu

ndihî ñàhá-yu xii-dé núú cóó vico tnándaha, te sáta dúcáⁿ te ní nandedí yuyèhe.

11 Te òré ní nasáá cue ñáyiú cuechi ñáyiú ní ságuaaⁿ sá ndée linténa-xi-áⁿ, te ní ngúita-yu càháⁿ-yu xĩnutnii-yu ndàa sáta yuyèhe ndaa quehé, te xǎháⁿ-yu xii téé tnándaha-áⁿ: “¡Táta, nacaáⁿ yuyèhe na quíhu-ndí!”, càchí-yu xǎháⁿ-yu xii-dé.

12 Te téé tnándaha-áⁿ ní xáhaⁿ-dē xii-yu: “Na càchí tnúhu ndáá-í xii-ndo sǎ nchòhó ñá túú tàú-ndó quíhu-ndo vico-a, chi ñá túú tnàhá tnúhu ndihî ñaha-ndo xii-í”, càchí-dé xǎhaⁿ-dē xii-yu –càchí Jèsús xǎhaⁿ-gǎ xii-güedé.

13 Te xǎhaⁿ tucu Jèsús xii-güedé:

—Ío quíhî iní-ndó cùndecu-ndo, chi ñá túú xini-ndó nǎ nduu, te ni ñá túú xini-ndó nǎ òré quixi tucu yúhú Téé cùu ñani tnàhá-ndó nchǎa-ndo –càchí-gǎ xǎhaⁿ-gǎ xii-güedé.

*Cuendá cue téé ní ndóo ndaha díhúⁿ
(Lc. 19:11-27)*

14 Te xǎhaⁿ tucu Jèsús xii-güedé:

—Na càni tucu-í ingá cuendú núú-ndó nàcuáa tecú tnùni-ndó nàcuáa cada-xi òré ndíhu ndaha ñaha Yá Ndiõxí xii ñáyiú. Ìⁿ téé sa ñihu ichi-ná-dé sá cáca-dē quíngaca cuu xica-dē, te ní cana-dé cue téé xinu cuechi núú-dē cuendá dándóo ndaha ñaha-dé díhúⁿ-dē xii-güedé.

15 Te nàcuáa ndùu chiuⁿ quide ìⁿ ìⁿ-güedé te ducaⁿ díhúⁿ ní sáñaha-dē xii-güedé, te ìⁿ-dé ní sáñaha-dē úhúⁿ tnàhá díhúⁿ sǎ ío yahu nani talentú, te ingá-dé ní sáñaha-dē úú tnàhá díhúⁿ-ǎⁿ, te ingá-dé ní sáñaha-dē ìⁿ díhúⁿ-ǎⁿ, te dǎtnùni ní quee-dé cuáháⁿ-dé.

16 Te téé ní queheⁿ cuendá úhúⁿ tnàhá díhúⁿ sǎ nání tàlentú ní quide-dé ndáhú ndihî-xi te ní níhí tucu-dé úhúⁿ-gǎ tucu tnàhá díhúⁿ-ǎⁿ.

17 Te ñiu-ni ducaⁿ ní quide tucu téé ní níhí úú díhúⁿ sǎ nání tàlentú-áⁿ, chi ní quide-dé ndáhú te ní níhí tucu-dé úú-gǎ tucu tnàhá.

18 Dico téé ní níhí ìⁿ-ni díhúⁿ-ǎⁿ chi da ní chiváha-dé díhúⁿ patróoⁿ-dē, chi ní xete-dé ìⁿ yaú te ní chindúxi-dé.

19 Te ní cuu cuéhé nduu sá ní quee patróoⁿ-güedé-áⁿ ní sángaca cuu-dé, te ní nasáá-dé te ní ngúita-dé quidé ndáá-dé

ndihî-güedé cuendá díhúⁿ sǎ ní dándóo ndaha ñaha-dé xii-güedé.

20 Te téé ní quendóo ndaha úhúⁿ tnàhá díhúⁿ-ǎⁿ ní xáhaⁿ-dē xii patróoⁿ-dē: “Patróoⁿ, náú úhúⁿ tnàhá díhúⁿ sǎ ní dándóo ndaha ñaha-n xii-í-a, te ní sáháⁿ-í ní quide-í ndihî-xi ndáhú te ní chídó-xí úhúⁿ-gǎ tucu tnàhá, te náú-a naqueheⁿ cuendá-n”, càchí-dé xǎhaⁿ-dē xii patróoⁿ-dē.

21 Te téé cùu patróoⁿ-dē-áⁿ ní xáhaⁿ-dē xii-dé: “Ío váha ní quide-n, te vitna quide ñaha-í xii-n ìⁿ téé váha téé quide ndáá, te sá sàcú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gǎ taxi cuendá ñaha-í xii-n. Te vitna cuu cundecu-n núú ndécù-í, te ío cudíⁿ iní-ó cùndecu ndihî tnaha-o”, càchí téé cùu patróoⁿ-dē-áⁿ xǎhaⁿ-dē xii-dé.

22 Te sáta dúcáⁿ te téé ní quendóo ndaha úú tnàhá díhúⁿ sǎ nání tàlentú-áⁿ ní xáhaⁿ-dē xii patróoⁿ-güedé: “Patróoⁿ, náú úú tnàhá díhúⁿ sǎ ní dándóo ndaha ñaha-n-a, te ní sáháⁿ-í ní quide-í ndihî-xi ndáhú, te ní chídó-xí úú-gǎ tucu tnàhá, te náú-a naqueheⁿ cuendá-n”, càchí-dé xǎhaⁿ-dē xii patróoⁿ-güedé.

23 Te ní xáhaⁿ tēe cùu patróoⁿ-áⁿ xii-dé: “Ío váha ní quide-n, te vitna quide ñaha-í xii-n ìⁿ téé váha téé quide ndáá, te sá sàcú díhúⁿ ní dándóo ndaha ñaha-í xii-n te ní quide ndáá-n, te sá dúcáⁿ ní quide-n te vai-gǎ taxi cuendá-í. Te vitna cuu cundecu-n núú ndécù-í, te ío cudíⁿ iní-ó cùndecu ndihî tnaha-o”, càchí téé cùu patróoⁿ-áⁿ xǎhaⁿ-dē xii-dé.

24 Te téé ní ndóo ndaha ìⁿ-ni díhúⁿ-ǎⁿ ní xáhaⁿ-dē xii téé cùu patróoⁿ-dē-áⁿ: “Patróoⁿ, yúhú sa naha-í sá yòhó cúu-n ìⁿ téé ndùcu mee-ni sá cúú-xí mèe-xi te tàhu-n chiuⁿ cuáháⁿ nchúhú cue téé xinu cuechi núú-n sàcáⁿ-ndí tríú, te òré ná nàtaxi tnaha-ndí, te yòhó dicó-nǎ náqueheⁿ cuendá-n tàxúha-n.

25 Te núu xǎⁿ ní yùhú-í cada-í ndáhú ndihî díhúⁿ-n, te ní sáháⁿ-í ní xete-í ìⁿ yaú te ní chindúxi-í, te náú díhúⁿ-n-áⁿ naqueheⁿ cuendá-n”, càchí-dé xǎhaⁿ-dē xii téé cùu patróoⁿ-áⁿ.

26 Te téé cùu patróoⁿ-áⁿ ní xáhaⁿ-dē: “Yòhó cúu-n ìⁿ téé cuihna iní-xi xinu cuechi núú-í te cuhndu-n, te núu yòhó sání iní-n sǎ cúu-í ìⁿ téé tàuchiuⁿ cuáháⁿ-ndó sàcáⁿ-ndó tríú

te òré nàtàxi tnaaha-ndo, te yúhú dìcò-nǎ náquèheⁿ cuendá-í nàtàxúha-í.

27 Te núu sàni iní-n sǎ dúcáⁿ quide-í, te dasaⁿ núu-n díhùⁿ-í te cúñaha-n chǎhu-yu díquí-xi ni cùu, te òré ndexìo-í te sa ngódó lùha-gá díquí-xi naqueheⁿ-í ní cùu”, cachí-dé xǎhaⁿ-dǎ xii téé xìnu cuechi-áⁿ.

28 Te téé cùu patróoⁿ-áⁿ nǐ xǎhaⁿ-dǎ xii dava-gá cue téé ndècu ndìhi-dé: “Chí quéndèé ìⁿ díhùⁿ sǎ nání tàlentú néhé tǎe-áⁿ, te cuáha-ndo tǎe nèhe úxí tnàhá ðiu-ni díhùⁿ-ǎⁿ.

29 Chì cue téé sa ndècu ndìhi te níhí-gǎ-güedé cundecu ndìhi-güedé, te ni vǎ nìhí-gǎ-güedé ndéé cundecu nchaa sǎ cùndècu ndìhi-güedé. Te cue téé ñǎ túú nǎ ndécú ndìhi vai, te nchaa sǎ ndécú ndìhi-güedé vǎ cùndècu ndìhi-gǎ-güedé.

30 Te téé xìnu cuechi ñǎ túú vǎdana nàndíhi-áⁿ, chí tnǐ-dǎ te daquìhíⁿ-ndó-dǎ ìⁿ xichi núú néé núú ìo ndoho-dé, te yàcáⁿ ndáhyú-dé, te dìcò rúhñú-nǎ cuu núhu-dé sǎ sàtú iní-dé sǎ ndóhó-dǎ”, càchí téé cùu patróoⁿ-áⁿ xǎhaⁿ-dǎ xii-güedé. Duha sǎtnahá-xi ndoho nchaa ñáyiu ñǎ túú quide váha —càchí-gǎ xǎhaⁿ-gǎ xii-güedé.

Cuendá cue ñáyiu ní quide váha ndìhi cuendá cue ñáyiu ñǎ túú ní quide váha

31 Te xǎhaⁿ tùcu Jesús xii-güedé:

—Te nduu na quìxi tucu yúhú Téé cùu ñaní tnàhá-ndó nchaa-ndo, te quixi-í ndìhi nchaa cue espíritú xínú cuèchi núu-í, te nchaa ñáyiu quini-yu sǎ ìo càhnu cuu-í, te dàvá-áⁿ cunucóo-í núú táxi tnùn-í, te ìo cuñúhu ñáyiu sǎ ìo càhnu cuu-í.

32 Te dàvá-áⁿ nataká nchaa ñáyiu xǐndecu ni càa xico ñuyíú cundecú-yu núu-í, te cada-í-yu dàtná quidé ìⁿ toli oré táú ðìⁿ-dǎ nchaa mbǎé ndìhi nchaa chivá chí ðìⁿ taxi ndecu-dé nchaa mbǎé, te ðìⁿ taxi ndecu-dé nchaa chivá.

33 Te ducaⁿ sǎtnahá-xi cada-í chí nchaa ñáyiu ní quide ndáá núu-í ñáyiu-áⁿ taxi ndecu-í-yu xio cùha-í, te nchaa ñáyiu cuihna ìni-xi ñǎ túú ní cuini cada ndáá núu-í ñáyiu-áⁿ taxi ndecu-í-yu xio dàtni-í.

34 Te ducaⁿ te yúhú téé ìo cùnuu cúñaha-í xii ñáyiu na cùndecu xio cuha-í: “Nchaa nchòhó ñáyiu ní quide váha ñaha Tǎtà-í Dútú Ndióxi, chí nèhé chí vitna ní sǎá nduu cùndecu-ndo núú ndécú-gǎ táxi tnùn-í-gǎ,

chì ndéé cùtnàhá ní ngáva ñuyíú sa ndècu túha tnàhí núú ndécú-gǎ-áⁿ sǎ nchòhó nduu táhú-ndó cùndecu-ndo.

35 Te ducaⁿ chí òré xihí-í docó te ní taxi-ndo sǎ nǐ xexi-í, te òré yìchí-í ndute te ní taxi-ndo ndute ní xihí-í, te òré ñùhù-í ichi te ní taxi-ndo vèhe ní ndetatú-í.

36 Te òré xíní ñùhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo nǐ quixi coto ñaha-ndo xii-í”, duha cúñaha-í xii nchaa ñáyiu-áⁿ.

37 Te nchaa ñáyiu ducaⁿ nǐ quide ndáá-áⁿ cùñahá-yu xii-í: “Yòhó Yaa cúú Xìtohó-ndí, ni ìⁿ xito ñǎ túú ní tàxi-ndí sǎ cáxi-n òré xihí-n dòcò, te ni ìⁿ xito ñǎ túú ní tàxi-ndí ndute coho-n òré yìchí-n.

38 Te ni ñǎ túú ní tàxi-ndí vehe ndetatú-n òré ñùhù-n ichi, te ni ñǎ túú ní tàxi-ndí dóo cuihnu-n òré xíní ñùhu-n.

39 Te ni ñǎ túú ní quixi coto ñaha-ndí xii-n òré ní cuhú-n, te ni ñǎ túú ní quixi coto ñaha-ndí xii-n òré ní xihí-n vècaá”, duha quesàhá-yu cúñahá-yu xii-í.

40 Te yúhú téé cùnuu cúñaha-í xii-yu: “Na càchí tnúhu ndáá-í xii-ndo sǎ ncháá sǎ vǎha ní quide-ndo sǎ cúu-xi nchaa ñáyiu xǐndecu ichi-í cuèi ìo ndàhú xǐndáa-yu, te sǎ dúcáⁿ nǐ quide-ndo sǎ vǎha sǎ cúu-xi-yu, te cada iní-ndó sǎ mèe-í ducaⁿ nǐ quide-ndo nǐ xito ñaha-ndo xii-í”, duha cúñaha-í xii-yu.

41 Te dàtnùn-í cúñaha-í xii ñáyiu na cùndecu xio datni-í: “Nchaa nchòhó ñáyiu ní xíta nihnu chí xócuñí núú ndécú-í-a, chí nchòhó ní nduu táhú-ndó cùndecu-ndo núú ñùhú núú càyú, ðiu-ni núú nǐ quide túha-í cundecu sácúhna ndìhi nchaa espíritú cùndìhi-xi, te yàcáⁿ cundecu-ndo nǐ caa ni quíhíⁿ.

42 Chì yúhú òré xihí-í docó te ñǎ túú ní tàxi-ndo sǎ cáxi-í, te ni òré yìchí-í ndute te ñǎ túú ní tàxi-ndo ndute coho-í.

43 Te ni òré ní xúhuⁿ-í ichi ñǎ túú ní tàxi-ndo vehe ndetatú-í, te ni òré xíní ñùhu-í dóo cuihnu-í te ñǎ túú ní tàxi-ndo, te ni òré ní cuhú-í te ñǎ túú ní quixi-ndo quixi coto ñaha-ndo xii-í, te ni òré ní xihí-í ve-caá te ðiu-ni ducaⁿ nǐ quide-ndo ñǎ túú ní quixi-ndo quixi coto ñaha-ndo xii-í”, duha cúñaha-í xii-yu.

44 Te ñáyiu-áⁿ cùñahá-yu xii-í: “Yòhó Yaa

cúu Xĩtohó-ndí ni ìⁿ xito ñá túú ní xìní-ndí òré xihí-n dòcó cuendá taxi-ndí sá caxí-n, te ni ìⁿ xito ñá túú ní xìní-ndí òré yichí-n ndùte cuendá taxi-ndí ndute coho-n, te ni ìⁿ xito ñá túú ní xìní-ndí cuhuⁿ-n ìchi cuendá taxi-ndí vehe ndetatú-n, te ni ìⁿ xito ñá túú ní xìní-ndí òré xíní ñùhu-n dóó cuendá taxi-ndí dóó cuihnu-n, te ni ìⁿ xito ñá túú ní xìní-ndí òré cùhú-n cuendá quixi coto ñaha-ndí xii-n, te ni ìⁿ xito ñá túú ní xìní-ndí quihí-n vècaá cuendá quixi coto ñaha-ndí xii-n”, duha quesàhá-yu cúñàhá-yu xii-í.

45 Te yúhú cúñaha-í xii-yu: “Na càchí tnúhu ndáá-í xii-ndo sã sã cuendá sã ñá túú ní quide-ndo ìⁿ sã vãha sã cúú-xí cuè ñáyiú ndècu ìchi-í cuèi ío ndàhú xĩndáa-yu, te sã dúcáⁿ ñí quide-ndo ñà túú ní quide-ndo sã vãha sã cúú-xí-yu, te cada iní-ndó sã mèe-í ducaⁿ ñí quide-ndo ñà túú ní quide-ndo sã vãha sã cúú-xí-í”, duha cúñaha-í xii-yu.

46 Te nchaa ñáyiú-áⁿ quíhíⁿ-yu núú ùhú núú ndàhú ni caa ni quíhíⁿ. Te nchaa ñáyiú ní quide ndáá núú-í ní xĩndecu ñuyíú-a, ñáyiú-áⁿ nduu táhú-yu ío vãha cundecú-yu ni caa ni quíhíⁿ —càchí-gá xãhaⁿ-gã xii-güedé.

26

Cue tée cùu úhú iní ñáhá xii Jesús ndúcú-güedé nàcuáa cada-güedé tní ñaha-güedé xii-gá

(Mr. 14:1-2; Lc. 22:1-2; Jn. 11:45-53)

1 Te sátá ñí yáha ducaⁿ ñí cáháⁿ Jèsús, te ní xáhaⁿ-gã xii cue tée xica cuu ndihí-gá:

2 —Nchòhó sa xìní-ndó sã cùmání úú-gá nduu te coo vico pàscuá, te càchí tnúhu-í xii-ndo sã yúhú Tée cùu ñaní tnáhá-ndó nchàa-ndo tní ñaha-güedé xii-í, te cuáha cuendá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-áⁿ cuú-í —càchí-gá xãhaⁿ-gã xii-güedé.

3 Te diu-ni òré càháⁿ ndihí Jèsús cue tée xica cuu ndihí-gá ní nataká cue tée cùu dútú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue tée cùu sacuéhé núú ñáyiú isràél. Te mei quèhé vehe núú cúú vèchiuⁿ té Caifás tée cùu dútú ío-gá cùnùu ní nataká-güedé.

4 Te xíaⁿ ñí ndatnúhu-güedé nàcuáa cada-güedé dandàhú-güedé Jèsús cuendá tní ñaha-güedé xii-gá, te cahni ñaha-güedé.

5 Te ní xitnàha-güedé:

—Vãha-gá sã vã tní-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —càchí-güedé xitnàha-güedé.

Èⁿ ñadìhí chíhí-áⁿ àcítí díquí Jèsús (Mr. 14:3-9; Jn. 12:1-8)

6 Te ndècu Jesús ñúu Bètaniá vehe ìⁿ tée nàni Xímú, tée ní tnahá cuéhé sã dátèhyú nihnu-xi yiqui cùñú-ó.

7 Te xíaⁿ ndécú-gã ní quexìo ìⁿ ñadìhí néhé-áⁿ ìⁿ sã ñí cuáha yúú vãha nàni alabasturú, te xití xíaⁿ ñúhú àcítí sáháⁿ tnámí sã ío ndèyáhu. Te yìhi Jesús mèsá xéxí-gã, te ñaha-áⁿ ñí sáháⁿ-aⁿ ní sódó-aⁿ àcítí ñúhú xití xíaⁿ díquí-gã.

8 Te òré ní xìní cue tée xica cuu ndihí Jesús sã dúcáⁿ ñí quide ñaha-áⁿ te ní cudééⁿ-güedé, te ní nguíta-güedé xitnàha-güedé:

—Ñá túú quide vãha ñaha-áⁿ dàcáⁿ quidé-áⁿ dacuíta-aⁿ acítí-áⁿ.

9 Chi vãha-gá núu cuyáhu acítí-áⁿ ní cùu chi ío ndèyáhu, te díhúⁿ cuyáhu acítí-áⁿ cuu cuendá cue ñáyiú ndàhú ní cùu —cachí-güedé xitnàha-güedé.

10 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gã xii-güedé:

—Vã dásatú-ndó iní ñadìhí-a, chi sã ñí quide ñaha-aⁿ xii-í cúú-xí ìⁿ sã vãha.

11 Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, dico yúhú chi vá ncháa ndùu cundecu ndihí ñaha-í xii-ndo ñuyíú-a.

12 Te sã dúhá ñí quide ñaha ñadìhí-a xii-í ní sódó-aⁿ àcítí díquí-í, te xíaⁿ cada iní-ndó sã sã quide túha-aⁿ yiqui cùñú-í cuendá nguíndüxi-xi.

13 Te na càchí tnúhu ndáá-í xii-ndo sã ndèni ní cuu nihí ñuyíú ná càháⁿ ñáyiú tnúhu-í, te cáháⁿ-yu tnáhá cuendá ñadìhí-a cuendá quiní nchaa ñáyiú nàcuáa ní quide-aⁿ te ducaⁿ vã nàcuánaá-yu —càchí-gá xãhaⁿ-gã xii-güedé.

Té Jùdás ndúcú-dě nàcuáa cada-dé cuáha cuèndá-dé Jèsús núú cuè tée cùu úhú iní ñáhá xii-gá

(Mr. 14:10-11; Lc. 22:3-6)

14 Te sáta dúcáⁿ te té Jùdás Iscarioté ní sáháⁿ-dé ní ndatnúhu-dé ndihí cue tée cùu dútú cúnùu. Te núú tnáhá té Jùdás-áⁿ cúu ùxúú cue tée xica cuu ndihí Jèsús.

15 Te ní xáhaⁿ-dě xii cue tée cùu dútú cúnùu-áⁿ:

—¿Ndédau cháhu ñaha-ndo xii-í te taxi cuèndá-í Jèsús xii-ndo-i? —càchí-dé xáhaⁿ-dě xii-güedé.

Te cue dútú-áⁿ ní xáhaⁿ-güedé xii-dé sá cuáña-güedé ócò úxí díhúⁿ cuixíⁿ, te diu-ni ducaⁿ ní sáña-güedé xii-dé.

16 Te ndéé òré ní queheⁿ cuèndá té Jùdás-áⁿ díhúⁿ, te ní ngüíta-dé ndúcú-dě nàcuáa cada-dé cuáha cuèndá-dé Jèsús núú-güedé.

Cùdini Jèsús ndihí cue tée xica cuu ndihí-gá

(Mr. 14:12-25; Lc. 22:7-23; Jn. 13:21-30;

1 Co. 11:23-26)

17 Te ní sáá nduu ní quesaha vico xexi ñáyiú pàá sá ñà túú yìhi levadurá diu-ni vico pàscuá, te cue tée xica cuu ndihí Jèsús ní sàndehe yatni-güedé diñi-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nùu ndéé cuini-n càda túha-ndí cuèndá cudini-o sacuaa nduu vico pascuá —càchí-güedé xáhaⁿ-güedé xii-gá.

18 Te Jèsús ní xáhaⁿ-gá xii-güedé:

—Chí cuáháⁿ xití ñúú-áⁿ, te yacáⁿ naníhí-ndó ñⁿ tée cùnùnì iní-ndó sá sà xini ñáhá-dě xii-o, te cúña-ndo xii-dé: “Yaa cúu Mèstrú càchí-gá sá sà ní cuyatni nduu vã cùndècu-gá ñuyíú-a, te vehe-n cuini-gá cada-gá vico pàscuá ndihí cue tée xica cuu ndihí-gá”, duha cúña-ndo xii té-áⁿ —càchí-gá xáhaⁿ-gá xii-güedé.

19 Te cue tée xica cuu ndihí-gá-áⁿ ní xica-güedé cuáháⁿ-güedé, te ní quide-güedé nàcuáa ní xáhaⁿ-gá xii-güedé, te ní quide túha-güedé sá cùdini-güedé ndihí-gá sacuaa nduu vico pascuá-áⁿ.

20 Te òré sa ní cundiⁿ te cuánguihu Jèsús ndihí ndi ùxúú cue tée xica cuu ndihí-gá mèsá cuèndá cudini-gá ndihí-güedé.

21 Te nini xèxi-gá ndihí-güedé ní xáhaⁿ-gá xii-güedé:

—Na càchí tnúhu ndáá-í xii-ndo sã díú ñⁿ nchohó cue tée xica cuu ndihí-í cuáha cuèndá ñáhá-ndó xii-í núú cuè tée cùu úhú iní ñáhá —càchí-gá xáhaⁿ-gá xii-güedé.

22 Te sá dúcáⁿ ní xáhaⁿ-gá xii-güedé te nchaa-güedé ní ngüíta-güedé cùndiyí-güedé, te da ñⁿ da ñⁿ-güedé ní ngüíta-güedé xáhaⁿ-güedé xii-gá:

—Mèstrú, ¿ñá díú yùhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

23 Te ní xáhaⁿ-gá xii-güedé:

—Tée nacaxi ndihí-í ñⁿ-ni cóhó caxi-ndí, té-áⁿ cuáha cuèndá ñáhá-dě xii-í núú cuè tée cùu úhú iní ñáhá.

24 Te yùhú Tée cùu ñanì tnáhá-ndó nchaa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yã Ndiöxí, dico ndàhú ní cuu tée ducaⁿ na cuáha cuèndá ñáhá xii-í núú cuè tée cùu úhú iní ñáhá, chí váha-gá sá vã cacú tée-áⁿ cundecu-dé ní cùu, te ñá díú sã ní cacu-dé te ducaⁿ càda-dé —càchí-gá xáhaⁿ-gá xii-güedé.

25 Te sáta dúcáⁿ te ní cáháⁿ té Jùdás té cuáha cuèndá ñáhá xii-gá, te xáhaⁿ-dë:

—Mèstrú, ¿te náa sàni iní-n sã yùhú cuáha cuèndá ñáhá-í xii-n nùú cuè tée cùu úhú iní ñáhá xii-n-áⁿ? —càchí-dé xáhaⁿ-dë xii-gá.

Te Jèsús ní xáhaⁿ-gá xii-dé:

—Diu-n —càchí-gá xáhaⁿ-gá xii-dé.

26 Te nini cùdini cue tée xica cuu ndihí Jèsús ní queheⁿ-gá pàá, te ní ndacáⁿ táhú-gá núú Yã Ndiöxí, te dàtnùnì ní táhú cuèchi-gá te ní ngüíta-gá dácãhñu-gá cue tée xica cuu ndihí-gá-áⁿ, te xáhaⁿ-gá xii-güedé:

—Chí quéhéⁿ pàá-a caxi-ndo, te cada iní-ndó sã yìqui cuñú-í cúú-xí —càchí-gá xáhaⁿ-gá xii-güedé.

27 Te ní queheⁿ-gá vàsú ñúhú ndudí ndéhé yoho yàha stilé, te ní ndacáⁿ táhú-gá núú Yã Ndiöxí, te dàtnùnì ní ngüíta-gá sãña-gá xii-güedé cuèndá coho-güedé luha luha sá ñúhú xití-xi, te xáhaⁿ-gá xii-güedé:

—Chí cóhó nchaa nchohó ndudí ndéhé yoho yàha stilé ñúhú xití vàsú-a.

28 Te cada iní-ndó sã cúú-xí dàtná níñi-í sá cãtì òré cahni ñaha-güedé xii-í, te sá dúcáⁿ cãtì níñi-í xíáⁿ cutnùnì ndáá sã Yã Ndiöxí cada-gá ingá núú sã vãha sá cúú-xí vãi

ñáyiú dàtná ní cachí-gá cada-gá, te ío vai ñáyiú cada càhnu iní-gá cuéchi-yu.

²⁹ Te na càchí tnúhu-í xii-ndo sã vítná-nã duha xihí ndihí ñaha-í xii-ndo ndùdí ndéhé yoho yàha stilé-a, te vá cóhó ndihí ñaha-gá-í xii-ndo, dico na sàá nduu nànihí tnáhá-ó nùú ndécú Tătá-í Dútú Ndiöxí táxí tnùní-gá te dàvá-án cada iní-ndó sã dàtná sá cóhó ndihí ñaha tucu-í xii-ndo chí ío cudí iní-ó —càchí-gá xàhaⁿ-gã xii-güedé.

Té Pèlú cúñaha-dě xii ñáyiú sá ñà túú xini-dé Jèsús

(Mr. 14:26-31; Lc. 22:31-34; Jn. 13:36-38)

³⁰ Te Jèsús ní xita-gá ìⁿ ndudú ndihí cue téé xica cuu ndihí-gá, te dàtnùní ní xica-gá cuáháⁿ-gá ndihí-güedé yucu Òlívú.

³¹ Te yacáⁿ ní xàhaⁿ-gã xii-güedé:

—Na càchí tnúhu-í xii-ndo sã ncháá-ndó dándóo ñaha-ndo xii-í niú vitna, chí quee ndáá-xi nàcuáa càháⁿ-xi nùú tütú Yã Ndiöxí nùú càchí-xi: “Yúhú cuáha-í tnúhu cahni-güedé téé cùu toli, te nchaa mběe-dě ndihí-güedé cuténuu”, duha càchí-xi nùú tütú-gá.

³² Dico na ndòto-í te codonùu-í nùú-ndó quíhíⁿ distritú Galileá —càchí-gá xàhaⁿ-gã xii-güedé.

³³ Te té Pèlú ní xàhaⁿ-dě xii-gá:

—Te cuéi nchaa-güedé ná dándóo ñaha-güedě xii-n, dico yúhú chí vá dándóo ñaha-í xii-n —càchí-dé xàhaⁿ-dě xii-gá.

³⁴ Te Jèsús ní xàhaⁿ-gã xii-dé:

—Na càchí tnúhu ndáá-í xii-n sã niú vitna cùmání-gã cana ìⁿ líhi, te úní xito cáháⁿ-n nùú ñáyiú sá ñà túú xini ñáhà-n xii-í —càchí-gá xàhaⁿ-gã xii-dé.

³⁵ Te té Pèlú ní xàhaⁿ-dě xii-gá:

—Cuéi na cùú ndihí ñaha-í xii-n dico vá càháⁿ-í nùú ñáyiú sá ñà túú xini ñáhà-í xii-n —càchí-dé xàhaⁿ-dě xii-gá.

Te nchaa dava-gá cue téé xica cuu ndihí-gá diu-ni ducaⁿ ñi xàhaⁿ-güedě xii-gá.

Jèsús càháⁿ ndihí-gá Yã Ndiöxí ìⁿ xichi nùú nání Gètsemaní

(Mr. 14:32-42; Lc. 22:39-46)

³⁶ Te Jèsús ní quexio-gá ndihí cue téé xica cuu ndihí-gá ìⁿ xichi nùú nání Gètsemaní, te xíaⁿ ñi xàhaⁿ-gã xii-güedé:

—Chí cúnúcoo iha cundetú-ndo na quíhíⁿ-í yacáⁿ cáháⁿ ndihí-í Yã Ndiöxí —càchí-gá xàhaⁿ-gã xii-güedé.

³⁷ Te ndèca-gá té Pèlú, ndihí ndi ndùú déhe té Zebèdeú cuáháⁿ, te ní ngüíta-xi súúní ndihú iní-gá.

³⁸ Te ní xàhaⁿ-gã xii cue téé úní-án:

—Súúní ndihú iní-í dàtná sá cùú-í, te chí quéndóo nchòhó iha te vá cùdú-ndó chí yúhú vá cùdú-í —càchí-gá xàhaⁿ-gã xii-güedé.

³⁹ Te sa ñùnchií luha ní xica ndehe Jèsús nùú ndécú-güedě, te ní ngüíñi xítí-gã te ní nuu nùú-gã ndàa nùú ñúhú, te ní ngüíta-gá càháⁿ ndihí-gá Tătá-gã Dútú Ndiöxí, te xàhaⁿ-gã:

—Yòhó Tătá mée-í, càháⁿ ndàhú-í nùú-n nùú vá cündèe iní-n tàunihnu ñaha-n xii-í cuendá sá vá ndóhò-í ná sàá òré, dico vá cadá-n nàcuáa càchí iní mée-í, chí cada-n nàcuáa càchí iní mée-n —càchí-gá xàhaⁿ-gã xii Tătá-gã Dútú Ndiöxí.

⁴⁰ Te sátá ñi yàha ní cáháⁿ ndihí-gá Tătá-gã Dútú Ndiöxí, te cuánuhú-gá nùú ñi dándóo-gá cue téé úní-án te xixídí-güedé òré ní nasáá-gá, te ní xàhaⁿ-gã xii té Pèlú:

—¿Náa ña cündèe iní-ndó vá cùdú-ni-ndo cuèdicó ìⁿ òré ñini càháⁿ ndihí-í Yã Ndiöxí-án?

⁴¹ Te chí quéndóo tucu te cuhuⁿ iní-ndó vá cùdú-ndó, te cáháⁿ ndihí-ndo Yã Ndiöxí cuendá sá vá dácàháⁿ ñáhá yùcu ñávàha xii-ndo càda-ndo sá ñà túú tàú-ndó càda-ndo. Te xini ndáá-í sá nchòhó cuíni-ndó càda-ndo nchaa nacuáa càháⁿ-í dicó-ni sá ñà túú ñihí ndéé-ndó —càchí-gá xàhaⁿ-gã xii-güedé.

⁴² Te xito cùu uú cuáháⁿ tucu Jèsús cáháⁿ ndihí-gá Tătá-gã Dútú Ndiöxí, te xàhaⁿ-gã:

—Yòhó Tătá mée-í, te nùu vá cündèe iní-n tàunihnu ñaha-n xii-í cuendá sá vá ndóhò-í, te cada nàcuáa càchí iní mée-n —càchí-gá xàhaⁿ-gã xii Tătá-gã Dútú Ndiöxí.

⁴³ Te òré ní yàha ní cáháⁿ ndihí-gá Tătá-gã Dútú Ndiöxí, te cuánuhú tucu-gá nùú xíndecu cue téé úní xicá cùu ndihí-gá-án, te xidí-ni tucu-güedé òré ní nasáá-gá, te ducaⁿ ñi quide-güedé chí súúní ñùhu saní nùú-güedé.

⁴⁴ Te ní dándóo ñaha tucu Jèsús xii-güedé xíaⁿ, te cuáháⁿ tucu-gá xito cùu úní cáháⁿ ndihí tucu-gá Tătá-gã Dútú Ndiöxí, te diu-ni tnúhu sá sã ní xàhaⁿ-gã xii Tătá-gã Dútú Ndiöxí, diu-ni tnúhu-án ñi xàhaⁿ tucu-gá.

45 Te sáta ní yáha ní cáháⁿ ndihí-gá Tātá-gã Dútú Ndiõxí, te cuánuhú tucu-gá núú ndécú cuè téé xica cuu ndihí-gá-án, te òré ní nasáá-gá, te ní xáhaⁿ-gã xii-güedé:

—¿Te náa xidí-ni tucu-ndo? Te sa ní sáá òré cuáha cuèndá ñáhá-güedé xii-í núú cuè téé ndècu ichi cuehé ichi duha.

46 Dico vitna chí ndácõo na quèhíⁿ-ó, chi sa véxi téé cuáha cuèndá ñáhá xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

Ní tñi-güedé Jèsús ndécá ñàha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

47 Te càháⁿ dúcáⁿ-ní Jèsús ní quexìo té Jùdás. Te núú tñhá téé-áⁿ cúú ùxúú tñhá cue téé xica cuu ndihí-gá ní cùu te ducaⁿ ñi quide-dé. Te ndihí-dé vai cue téé ní quexìo te dava-güedé xínehe-güedé machítí, te dava-güedé xínehe-güedé carrutí. Te cue téé-áⁿ ñi tendaha ñàha cue dútú cùnùu, ndihí cue téé cùu sacuéhé núú ñáyiú isràél.

48 Te té Jùdás téé cuáha cuèndá ñáhá xii-gá-án sa ní xitnùhu-dé cue téé-áⁿ nàcuáa cada-dé cuáha cuèndá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo tée na tèyuhu-í te téé-án tñi-ndo-dè chi téé-án cúú-dè téé ndèé iní-ndó —duha ní xáhaⁿ-dè xii-güedé.

49 Te sáta dúcáⁿ ñi xáhaⁿ-dè xii-güedé, te ní sándehe yatni-dé núú Jèsús, te ní xáhaⁿ-dè xii-gá:

—¡Racióⁿ Mèstrú! —càchí-dé xáhaⁿ-dè xii-gá.

Te ní teyuhu ñàha-dé xii-gá.

50 Te Jèsús ní xáhaⁿ-gã xii-dé:

—Yòhó téé ní chitnahá ñáhá xii-í, ¿ná cuíní-n núú véxi-n núú-í? —càchí-gá xáhaⁿ-gã xii-dé.

Te òré-ni-án ñi tñi ñàha cuè téé ndihí té Jùdás-án xii Jèsús, te ndèca ñàha-güedé xii-gá cuáháⁿ.

51 Te ñi cue téé ndihí Jèsús ní tava-dé machítí-dé, te ní xehndé-ni-dé ñi xio lóho ñi téé xinu cuechi núú dútú cùnùu te ní quendeé duuⁿ lóho-dé.

52 Te Jèsús ní xáhaⁿ-gã xii téé ducaⁿ ñi xehndé lóho téé-án:

—Nachihí machítí-n ñi-xi, chi nchaa cue téé na náa ndihí machítí cahni-güedé tñàha

ñáyiú-güedé te diu-ni ndihí machítí cuú mée-güedé tucu.

53 Te na càchí tñuhu-í xii-ndo sã núu yúhú cuíní-í cácu-í te cáháⁿ ndihí-í Tātá-í Dútú Ndiõxí, te tendaha-gã cuéhé víhí espíritú xínú cuèchi núú-gã quixi-xi dàcácu ñàha-xi xii-í.

54 Dico núu ducaⁿ na càda-í te vá quée ndáá-xi nàcuáa càháⁿ-xi núú tütú Tātá-í Dútú Ndiõxí núú ndèé tñuní sá dàcuítí xini ñuhu-xi nándi ndoho-í —càchí-gá xáhaⁿ-gã xii-dé.

55 Te Jèsús ní xáhaⁿ-gã xii cue téé ducaⁿ ñi tñi ñàha xii-gá-án:

—Nchaa-ni nduu ní xiní-ndó ñi xóo cunucóo-í xití veñúhu càhnu sá ño cùnùu ní xóo danèhé-í ñáyiú, te ñá tütú ní tñi ñàha-ndo xii-í, ¿te ná cuèndá vitna quide ñàha-ná-ndó xii-í dàtná quidé-ndó ñi ñadúhú, nèhe-ná-ndó màchítí nèhe-ná-ndó càrrutí ní quexìo ní tñi ñàha-ndo xii-í-í?

56 Dico dacuítí sã dúhá càda-xi nacuáa quee ndáá-xi nàcuáa ní cáháⁿ cue téé ní xóo cáháⁿ tñuhu Yá Ndiõxí ndèé sanaha ñi ngódó tñuní núú tütú-gá —càchí-gá xáhaⁿ-gã xii-güedé.

Te nchaa cue téé xica cuu ndihí-gá ní xinu-güedé ní dándõ ñàha-güedé xii-gá.

Jèsús ndécú-gã jùndá

(Mr. 14:53-65; Lc. 22:54-55, 63-71; Jn. 18:12-14, 19-24)

57 Te cue téé ní tñi ñàha xii Jèsús ndécá ñàha-güedé xii-gá cuáháⁿ núú tẽ Caifás téé cùu dútú cùnùu-gá. Te núú ndécú dútú cùnùu-gá-án sa ní tacá cue téé dàcuaha ñàha xii ñáyiú nchaa tñuhu ní chídó tñuní ndí Moisés, ndihí cue téé cùu sacuéhé núú ñáyiú isràél cuèndá cada-güedé jùndá.

58 Te té Pèlú xica xica-ni nchicúⁿ ñáhá-dè xii-gá cuáháⁿ ní sáá-dé ndèé quehé vehe núú ndécú tée cùu dútú cùnùu-gá-án, te xíaⁿ ñi ngóo-dé ndihí cue téé cùu poleciá cuèndá cuíní-dé quiní-dé nása cada ñàha-güedé xii Jèsús.

59 Te cue téé cùu dútú cùnùu, ndihí cue téé cùu sacuéhé núú ñáyiú isràél, ndihí nchaa dava-gá cue téé xíndecu jùndá ndúcú-güedé nàcuáa cada-güedé dacàa-güedé ñi cuèchi díquí Jèsús cuèi cùu-xi ñi sá ñã ndáa cuèndá níhí-güedé nàcuáa cada-güedé cahni ñàha-güedé xii-gá.

60 Te vâi cue tée ní ngüíta-güedé dâcâa-güedé cuéchi díquí-gă, dico ñá túú ní cûndee tnúhu-güedé chi mee-ni tnúhu ndehnde cûu-xi. Te sâta dúcáⁿ te ní quexio tucu úú tnàhá cue tée dàcuandehnde-güedé,

61 te xăhaⁿ-güedě xii nchaa cue tée xîndecu jûndá:

—Véxi-ndí câchí tnúhu-ndí xii-ndo sã tée-a câchí-dé sá dângòyo-dé veñúhu cãhnu sá ïo cûnuu núú chíñúhu-o Yá Ndiöxí, te dandâa-dé ingá veñúhu saa, diu-ni núú cáá tnàhí veñúhu-ăⁿ, te xití úní-ni nduu sa nadaxînu-dé, duha câchí-dé —câchí-güedé xăhaⁿ-güedě.

62 Te tée cûu dútú cúnûu-gá-áⁿ nî ndacuíñí-dé, te xăhaⁿ-dě xii Jèsús:

—¿Ná cuendá duha ndûu tnúhu cãháⁿ cue tée-a cuendá-n? Te cãháⁿ nûu nása cunduu tnúhu cãháⁿ-n —câchí-dé xăhaⁿ-dě xii-gá.

63 Dico Jèsús ñá túú tnàhí ni cãháⁿ-gá. Te tée cûu dútú cúnûu-gá-áⁿ nî xăhaⁿ tûcu-dé xii-gá:

—Yúhú, cáci nêhe-í Yă Ndiöxí chi cuíní-í sá câchí tnúhu ndáá-n xii-ndí nûu sá díú Crîstú Déhe Yá Ndiöxí Yaá ní tendaha-gă véxi ñuyíú-a cûu-n —cachí-dé xăhaⁿ-dě xii-gá.

64 Te Jèsús ní xăhaⁿ-gă xii-dé:

—Diu Yaá-áⁿ cûu-í dàtná câchí-n-ăⁿ, te na câchí tnúhu-í xii-ndo sã sãá nduu te quíní-ndó yúhú Tée cûu ñaní tnàhá-ndó nchâa-ndo cunucóo-í xio cûha Dútú Ndiöxí Yaá ndáci quide nchaandi túhú sá vâha. Te dàvá-áⁿ quíní ñáhá-ndó xii-í quee-í andiu quixi-í ichi xití vícô —câchí-gá xăhaⁿ-gă xii-dé.

65 Te dútú cúnûu-gá-áⁿ nî ndátá-dě dóo níhnú-dě cuendá sá ñà túú ní tnàhá iní-dé nâcuáa ní cãháⁿ Jèsús, te ní xăhaⁿ-dě xii nchaa cue tée xîndecu jûndá:

—Tée-a cãháⁿ úhú-dé cuendá Yă Ndiöxí, te vitna ñá túú-gă xíní ñúhu-xi cue tée cãháⁿ ndáá nûu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nâcuáa ndûu tnúhu ní cãháⁿ-dé ní cãháⁿ úhú-dé cuendá Yă Ndiöxí.

66 Te nchaa-ndo chí cãháⁿ vitna núu nása sàni iní-ndó cûnduu cuendá tée-a —câchí-dé xăhaⁿ-dě xii nchaa cue tée-áⁿ.

Te cue tée-áⁿ nî xăhaⁿ-güedě:

—Nchúhú câchí-ndí sá tàù-xi cuú-dé chi ndècuéchi-dé —câchí-güedé xăhaⁿ-güedě.

67 Te ní ngüíta-güedé ní tiú dí ñáhá-güedě xii-gá te ní caniha-güedě, te tnàhá núú-gă ní cani-güedé.

68 Te ní cudíquí ndeé ñáhá-güedě xii-gá, te xăhaⁿ-güedě:

—Yòhó Tée câchí sá cúú Crîstú Yaá ní tendaha Yă Ndiöxí véxi ñuyíú-a, cãháⁿ ná còto yoo ní caniha xii-n —cachí-güedé xăhaⁿ-güedě xii-gá.

Té Pèlú xăhaⁿ-dě xii ñáyiú sá ñà túú xíní-dé Jèsús

(Mr. 14:66-72; Lc. 22:56-62; Jn. 18:15-18, 25-27)

69 Te nîni núcóo té Pèlú quehé, te ní sáháⁿ ïⁿ xíchí xínú cuèchi vehe-áⁿ nûú-dě, te xăhaⁿ-xi xii-dé:

—Yòhó tnàhá-n cûu-n tée xica cuu ndihí Jesús tée distritú Galiléa —câchí-xi xăhaⁿ-xi xii-dé.

70 Te té Pèlú ñá túú ní nûnuu-dé, te ndèdóho nchaa ñáyiú xîndecu-áⁿ nî xăhaⁿ-dě xii xíchí-ăⁿ:

—Yúhú, ñá túú cûtnuní iní-í nása ndûu tnúhu cãháⁿ-n —câchí-dé xăhaⁿ-dě xii-xi.

71 Te ní xica té Pèlú cuáháⁿ-dé ndàa nâcuáa nchíi yuyèhe vehe-áⁿ, te ní xíní ñáhá tûcu ingá xíchí xínú cuèchi vehe-áⁿ, te xăhaⁿ-xi xii nchaa ñáyiú xîndecu-áⁿ:

—Tée-a tnàhá-dé xícá cûu-dé ndihí Jèsús tée ñuú Nazàrét —câchí-xi xăhaⁿ-xi xii-yu.

72 Te té Pèlú ní xăhaⁿ-dě:

—Nchâcui^ti Yá Ndiöxí sá ñà túú xíní-í tée càcunehe-ndo-áⁿ —câchí-dé xăhaⁿ-dě xii-yu.

73 Te tna tnaa-ni ní cuu, te dava ñáyiú xîndecu xíaⁿ nî xăhaⁿ tûcú-yu xii té Pèlú:

—Ndáá sá tnàhá-n xica cuu-n ndihí tée ndèca-güedé cuánguihu-ăⁿ, chi ñáyúhú cãháⁿ-n —câchí-yu xăhăⁿ-yu xii-dé.

74 Te té Pèlú ní xăhaⁿ-dě xii-yu:

—Nchâcui^ti Yá Ndiöxí sá yúhú cãháⁿ ndáá-í sá ñà túú xíní-í tée càcunehe-ndo-áⁿ —câchí-dé xăhaⁿ-dě xii-yu.

Te òré-ni-áⁿ nî cana ïⁿ líhi.

75 Te ní ndacu iní té Pèlú nâcuáa ní xăhaⁿ Jèsús xii-dé sá cûmání-gă cana ïⁿ líhi te úní xito cãháⁿ-dé sá ñà túú xíní ñáhá-dě xii-gá. Te ní quee-dé tnuú ñáyiú-áⁿ cuáháⁿ-dé ïⁿ xio ní ndáhyú víhí-dě ní ndixi cuéchi iní-dé.

27

Ndèca-güedé Jèsús cuáháⁿ núú tē Pilatú
(Mr. 15:1; Lc. 23:1-2; Jn. 18:28-32)

1 Te sáta ní tún daá te nchaá cue tée cùu dútú cùnùu, ndihí cue tée cùu sacuéhé nùú ñáyiú isràél ní ndatnúhu-güedé nàcuáa cada-güedé cahni-güedé Jèsús.

2 Te ní dácútú ñàha-güedé xii-gá, te ndèca ñaha-güedé cuáháⁿ núú tē Pilatú tée cùu gobiernú.

Ní xihí té Jùdás

3 Te té Jùdás tée ní sáha cuendá ñáhá xii Jesús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcáⁿ ní quide-dé ní sáha cuendá ñáhá-dē xii-gá núú cuè tée cùu úhú iní ñáhá, te ní xica-dé cuáháⁿ-dé danchòcáva-dé ócò úxí díhúⁿ cuixíⁿ núú cuè dútú cùnùu-áⁿ, ndihí núú cuè tée cùu sacuéhé nùú ñáyiú isràél, chi ñu cue tée-áⁿ ní sáñaha-güedé díhúⁿ xii-dé.

4 Te òrè ní quexio té Jùdás-áⁿ nùú ndécú-güedé, te xàhaⁿ-dē xii-güedé:

—Yúhú, ñà túú ní quide váha-í sá dúcáⁿ ní quide-í ní taxi cuendá-í ñⁿ tée ñà túú tñahí cuéchi-xi cahni-ndo-dē —càchí-dé xàhaⁿ-dē xii-güedé.

Te cue tée-áⁿ ní xàhaⁿ-güedé xii-dé:

—Nchúhú, ñà túú nǎgá cuendú cuiní-ndí cáháⁿ ndihí ñaha-ndí xii-n, te mee-n nàha núu nása sàni iní-n càda-n —càchí-güedé xàhaⁿ-güedé xii-dé.

5 Te té Jùdás ní dǎngoyo-dé díhúⁿ-áⁿ xití veñúhu càhnu sá ño cùnùu, te ní xica-dé cuáháⁿ-dé ní dácüehné-dé méé-dē.

6 Te cue dútú cùnùu ní naqueheⁿ-güedé díhúⁿ-áⁿ, te ní xitnàha-güedé:

—Díhúⁿ-a ní quéyàhu cuendá sá cùú ñⁿ ñáyiú, núú xíáⁿ vá cúú nàchihi-o xití cǎjá núú ñúhú sǎ cúú cuendá Yǎ Ndióxi —càchí-güedé xitnàha-güedé.

7 Te ní ndatnúhu-güedé te ní cuu ñⁿnuu-güedé cuendá nacuaaⁿ-güedé ñⁿ xichi núú cáá ñúhu danani-güedé Núú Cuàha Nchaá Sá Cuàha Ñuhu, te xíaⁿ ní saaⁿ-güedé cuendá xíaⁿ nguñdúxi nchaá ñáyiú véxi xica.

8 Te ní nadáma ñu ñuhu-áⁿ, te vitna dǎnani-güedé Ñuhu Yáhu Níñí, duha dǎnani-güedé.

9 Te ducaⁿ ní cuu chi ní quee ndáá-xi nàcuáa ní cáháⁿ ndí Jeremiás tée ní xóo cáháⁿ tñuhu Yá Ndióxi ndéé sanaha,

te duha ní cachí ndí: “Cue tée isràél ní cachí-güedé sá ócò úxí díhúⁿ cuixíⁿ cháhu-güedé cuendá ñⁿ tée queheⁿ cuendá-güedé. Te díhúⁿ-áⁿ nàqueheⁿ-güedé,

10 te cuaaⁿ-güedé ñⁿ xichi núú nání Núú Cuàha Nchaá Sá Cuàha Ñuhu, te ducaⁿ càda-xi chi ducaⁿ ní cachí Yǎ Ndióxi cunduu”, duha ní cachí ndí Jeremiás-áⁿ.

Jèsús ndécú-gǎ núú tē Pilatú

(Mr. 15:2-5; Lc. 23:3-5; Jn. 18:33-38)

11 Te Jèsús ndécú-gǎ núú tē Pilatú tée cùu gobiernú, te tée-áⁿ ní xicáⁿ tñuhú-dē núú-gǎ, te xàhaⁿ-dē xii-gá:

—¿Ndáá sá díu-n cùu-n tée yìndaha ñaha xii ñáyiú isràél-áⁿ? —càchí-dé xàhaⁿ-dē xii-gá.

Te Jèsús ní xàhaⁿ-gǎ xii-dé:

—Ñu-í yìndaha-í-yu —càchí-gǎ xàhaⁿ-gǎ xii-dé.

12 Te cue dútú cùnùu ndihí cue tée cùu sacuéhé nùú ñáyiú isràél sàcáⁿ cuéchi-güedé núú tē Pilatú cuendá Jèsús, dico mee-gǎ ni ñⁿ tñuhu ñà túú ní cáháⁿ-gǎ.

13 Te té Pilatú ní xàhaⁿ-dē xii-gá:

—Cáháⁿ, ná cuendá ñà túú càháⁿ-n, te cundehe nǎ ndéé duha tñí cuéchi dàcaa cue tée-a díquí-n —càchí-dé xàhaⁿ-dē xii-gǎ.

14 Dico Jèsús ñà túú tñahí ni cáháⁿ-gǎ, te té Pilatú tée cùu gobiernú-áⁿ ño ní cuñúhu-dé sá dúcáⁿ ñà túú tñahí ni cáháⁿ-gǎ.

Ní quide ndáá-güedé sá cáhni-güedé Jèsús

(Mr. 15:6-20; Lc. 23:13-25; Jn. 18:38-19:16)

15 Te ndí tñahá nduu vico pascuá dácǎcu té Pilatú tée cùu gobiernú-áⁿ ñⁿ tée yìhi ve-caá chi ducaⁿ tñahí quide-dé, te mee ñáyiú càháⁿ-yu te núu ndédacàa tée yìhi ve-caá-áⁿ cǎcu-dé te tée-áⁿ dácǎcu-dé.

16 Te dàvá-áⁿ yìhí ñⁿ tée nàni Barrabás ve-caá, te tée-áⁿ ño cuendú-dé sá ño nèhé ní quide-dé.

17 Te ní nataká nchaá ñáyiú, te té Pilatú ní xicáⁿ tñuhú-dē núú-yu, te xàhaⁿ-dē:

—¿Ndédacàa núú úú cue tée-a cuiní-ndó dácǎcu-í-güedé-í? ¿Té Barrabás áⁿ Jèsús tée nàni Cristú? —càchí-dé xàhaⁿ-dē xií-yu.

18 Te ducaⁿ ní cáháⁿ té Pilatú, chi ní cutnùní iní-dé sá dícò sá cuèdú iní-güedé

ducaⁿ nĩ quide-güedé ní sáha cuèndá ñáhá-güedě xii Jèsús núú-dě.

19 Te nini nùcòo té Pilatú núú xèhndé-dé cuéchi ní tendaha ñàdihí-dé tnúhu cuáháⁿ núú-dě, te duha ndúu tnúhu ní tendaha-aⁿ: “Vá cání ìní-n nã cada-n tée ní taxi cuèndá ñáhá-güedě xii-n, tée ñá túú tnàhí cuéchi-xi, chi icuini ío nèhé ní dácótó ñàha saní-í cuèndá-dé”, duha ndúu tnúhu ní xáhaⁿ-aⁿ xii té Pilatú.

20 Dico cue tée cùu dútú cúnùu, ndihí cue tée cùu sacuéhé nũ ñáyiú isràèl ní xáhaⁿ-güedě xii ñáyiú sá ná cũñáhá-yu xii té Pilatú dàcácu-dé té Barràbás te cahni-dé Jèsús, te ní quidé-yu nàcuáa ní xáhaⁿ-güedě.

21 Te té Pilatú-áⁿ nĩ xáhaⁿ tùcu-dé xií-yu:

—¿Ndédacàa núú ùu cue tée-a cuìní-ndó dàcácu-í? —càchí-dé xáhaⁿ-dě xií-yu.

Te ní xáhãⁿ-yu xii-dé:

—Té Barràbás dàcácu-n —càchí-yu xáhãⁿ-yu xii-dé.

22 Te té Pilatú ní xicáⁿ tnúhú-dě nũ-yu, te xáhaⁿ-dè:

—¿Te ná cuìní-ndó càda-í Jèsús tée nàni Cristú tée càchí sá Yã Ndiòxí ní tendaha ñàha xii-dé véxi-dé ñuyíú-a-í? —càchí-dé xáhaⁿ-dě xií-yu.

Te nchaá-yu ní cáháⁿ-yu, te xáhãⁿ-yu:

—Cata caa-dé núú cùrúxí —càchí-yu xáhãⁿ-yu xii-dé.

23 Te té Pilatú ní xáhaⁿ tùcu-dé xií-yu:

—¿Te ná cúu cuéchi ní quide-dé nũ ducaⁿ cuìní-ndó càda-í-dé-í? —càchí-dé xáhaⁿ-dě xií-yu.

Dico nchaá-yu uuⁿ-gá níhi ní cáháⁿ-yu, te xáhãⁿ-yu xii-dé:

—¿Cata caa-dé núú cùrúxí! —càchí-yu xáhãⁿ-yu xii-dé.

24 Te té Pilatú ní cutnùnì iní-dé sá vã ñihí-dé nàcuáa cada-dé, chi uuⁿ-gá ní ngüíta ñáyiú xĩcuáa-yu, te xiãⁿ ní xicáⁿ-dé ndute ní ndáhá-dě núú nchàa ñáyiú, te ní xáhaⁿ-dě xií-yu:

—Tée-a cùu-dé ìⁿ tée ñá túú tnàhí cuéchi-xi, te nchòhó cuìní-ndó sã cùú-dé, dico ñiu-ni mee-ndo cuìdo yáhu-ndo-dě chi yúhú vá cuìdó yáhu-í-dé —càchí-dé xáhaⁿ-dě xií-yu.

25 Te nchaá-yu ní xáhãⁿ-yu xii-dé:

—¿Ñiu nchúhú ndihí cue déhe-ndí cuìdo yáhu-ndí-dé! —càchí-yu xáhãⁿ-yu.

26 Te sáta dúcáⁿ te té Pilatú ní dácácu-dé té Barràbás, te ní táuchíúⁿ-dě ní cani-güedě Jèsús. Te sáta dúcáⁿ nĩ quide ñaha-güedě xii-gá, te ní táuchíúⁿ-dě candeca ñaha-güedě xii-gá quíhíⁿ cata caa ñaha-güedě xii-gá núú cùrúxí.

27 Te cue tée cùu sandadú té Pilatú ndécá-güedě Jèsús cuánguihu xití vehe càhnu cuu cuèndá-dé, te cue tée cùu sandadú-áⁿ nĩ cana-güedě dava-gá cue sandadú núú dúcáⁿ ndéca-güedě Jèsús cuánguihu-áⁿ.

28 Te xiáⁿ nĩ taunuu-güedě dóo-gã, te ní dácúíhnú ñaha-güedě xii-gá ìⁿ dóo tícuèhé víhí.

29 Te ní cadúha-güedě ìⁿ coróná iñu ní chihi-güedě díquí-gã, te ní chitnì-güedě ìⁿ carrutí ndaha cùha-gá, te ní ngüíñí xití-güedě núú-gã cúdíquí ndeé ñáhá-güedě xii-gá, te xáhaⁿ-güedě:

—¿Ío càhnu cuu yohó tée yìndaha ñaha xii ñáyiú isràèl! —càchí-güedě xáhaⁿ-güedě xii-gá.

30 Te ní tíú díí ñáhá-güedě xii-gá, te ní queheⁿ-güedě carrutí sá nĩ sãñaha-güedě xii-gá te ní ducuⁿ-güedě díquí-gã.

31 Te sáta nĩ yáha ní cudíquí ndeé ñáhá-güedě xii-gá, te ní nataunuu ñaha-güedě xii-gá dóo tícuèhé víhí sã nĩ dácúíhnú ñaha-güedě xii-gá, te ní dándíunuu ñaha-güedě xii-gá dóo méé-gã, te dàtnùnì ndécá ñaha-güedě cuáháⁿ núú catá càa ñaha-güedě xii-gá núú cùrúxí.

Sàta caa-güedě Jèsús núú cùrúxí

(Mr. 15:21-32; Lc. 23:26-43; Jn. 19:17-27)

32 Te ñùhu-güedě ndihí-gá ichi, te ní naníhí-güedě ìⁿ tée ñuú Cirené nání-dě Xímú, te tée-áⁿ nĩ quide yica-güedě ní xido-dé cùrúxí sá nchídó Jèsús.

33 Te ní sáa-güedě ndihí-gá ìⁿ xichi núú nání Gõlgotá, te tnúhu-áⁿ queé-xí: Núú nání yìquí díquí ndíyi, duha quèe-xi tnúhu-áⁿ.

34 Te xiáⁿ sãñaha-güedě ndudí úa coho-gá ní cùu, te ñá túú ní xihí-gá chi dico-ni ní xito ndeé-gá.

35 Te ní sata caa ñaha-güedě xii-gá núú cùrúxí, te sáta dúcáⁿ te cue tée cùu sandadú-áⁿ nĩ xito ndeé-güedě nũ

ndëdacàa-güedé cuu cuëndá-güedé dóó-gã. Te ducaⁿ ní cuu chi ní quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndiöxí ndéé sanaha yódo tnuní núú tütú-gá, te duha càchí-xi: “Ní xito ndéé-güedé nõu ndëdacàa-güedé cuu cuëndá-güedé dóó-gã”, duha ní cachí-tée-áⁿ te ducaⁿ ní ngódó tnùnì núú tütú-gá.

³⁶ Te sáta dúcáⁿ ñi quide-güedé, te ní ngóo-güedé ndéé ñáhá-güedé xii-gá.

³⁷ Te ní taxi ndecu-güedé ìⁿ sá ndéé lètrá ndàa díquí-gã. Te lètrá-áⁿ cáháⁿ-xi ná cuëndá ducaⁿ ñi quide ñaha-güedé xii-gá, te duha cáháⁿ lètrá-áⁿ: “Tée-a cùu-dé téé yìndaha ñaha xii ñáyiù isràél”, duha càchí-xi.

³⁸ Te tnàhá úú cue téé cùu ñadúhú ñi sata caa-güedé ñi-ni núú cùrúxí tucu, te ìⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá.

³⁹ Te nchaa ñáyiù yãha yatni núú tácaà-gá-áⁿ, te dàcuicó-yu díquí-yu ndèhe ñáhá-yu xii-gá, te xícùèhé ñáhá-yu.

⁴⁰ Te xãháⁿ-yu xii-gá:

—Yòhó càchí-n sã dàngoyo-n veñúhu càhnu sá ìo cùnùu, te dandàa-n ingá veñúhu saa, te xití únì-ni nduu sa nadaxìnu-n, te vitna tanùu núú cùrúxí-áⁿ dàcácu-n mée-n te núu ndisa sá Dèhe Yá Ndiöxí cúu-n — càchí-yu xãháⁿ-yu xii-gá.

⁴¹ Te ñi-ni ducaⁿ cùdìquí ndéé ñáhá cué téé cùu dútú cùnùu xii-gá, ndihi cue téé dàcuaha ñaha xii ñáyiù nchaa tnúhu ní chídó tnùnì ndíi Moisés, ndihi cue téé cùu fariséu, ndihi cue téé cùu sacuéhé nõu ñáyiù isràél, te xitnàha-güedé:

⁴² —Tée-a ní ndacu-dé ní dácácu-dé dava ñáyiù, te mee-dé ñá ndácú-dé dàcácu ni-hnu-dé mée-dé. Te núu ndisa sá cúu-dé téé yìndaha ñaha xii ñáyiù isràél, te na cùndehe-o nuu-dé núú cùrúxí-a cuëndá quíndáá iní-ó-dé.

⁴³ Te càchí-dé sá sándáá iní-dé Yá Ndiöxí, te mee-gã ná dàcácu ñaha-gã xii-dé te núu cùndahú iní ñáhá-gã, chi mee-dé càchí-dé sá Dèhe-gá cúu-dé —càchí-güedé xitnàha-güedé.

⁴⁴ Te ndéé tnàhá cue téé cùu ñadúhú tácaà xio xio ñi-ni-gá xícùèhé ñáhá-güedé xii-gá.

Ní xihí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee ñihi ñuyiù, te ducaⁿ-ni cáa ní cuu caá únì sacuaa.

⁴⁶ Te òré sa ta cùyatni cuu caá únì sacuaa-áⁿ, te ñihi ní cáháⁿ Jèsús, te càchí-gá: —Èlí, Èlí, ¿láma sabàctani? —càchí-gá.

Te tnúhu-áⁿ quée-xi: Ndiöxí mée-í, Ndiöxí mée-í, ¿ná cuëndá ní dáñá ñaha-n xii-í?, duha quèe-xi tnúhu-áⁿ.

⁴⁷ Te dava cue téé xìndecu yatni núú tácaà-gá-áⁿ ñi tecú dóho-güedé nàcuáa ní cáháⁿ-gá, te ní xitnàha-güedé:

—Tée-a càna-dé té Èliás —càchí-güedé xitnàha-güedé.

⁴⁸ Te òré-ni-áⁿ ñi quene cunu ìⁿ cue téé xìndecu-áⁿ ñi queheⁿ-dé luha cáchí, te ní chindóyo-dé xití ndudí íá, te ní chinenu-dé díquí ìⁿ yutnu càni te ní ndocani-dé ní chíhi-dé yuhu-gá.

⁴⁹ Te dava-güedé ní xáhaⁿ-güedé xii téé-áⁿ: —Cundetü tnaa na cùndehe-o nacoto núu quixi té Èliás dàcácu ñaha-dé xii-dé —càchí-güedé xãháⁿ-güedé xii téé-áⁿ.

⁵⁰ Te Jèsús ñihi ní cana saa-gá, te ní xihí-ni-gá.

⁵¹ Te sáta dúcáⁿ te ní ndátá dõó cúú còrtiná xití veñúhu càhnu sá ìo cùnùu ní quée dava ndáá, te ndàa núú ñinu ní ngúita-xi ní ndátá, te ní tnáa, te dava cava nãhnu ní táhú.

⁵² Te dava yaú núú yìndüxi ñáyiù ní xihí ní sándáá iní ñáhá xii Yá Ndiöxí ní nacaáⁿ te ní ndotó-yu.

⁵³ Te sáta ñi yáha ní ndoto Jèsús, te cue ñáyiù ní ndoto-áⁿ cuãnguihú-yu xití ñuú Jerusálén, te cue ñáyiù ñuú-áⁿ ìo vài-yu ní xiní-yu cue ñáyiù ducaⁿ ñi ndoto-áⁿ.

⁵⁴ Te sá dúcáⁿ nãndi ní quide-xi, ndihi sá dúcáⁿ ñi tnáa xíáⁿ ío ní yùhú téé cùu capitáⁿ ndihi nchaa dava-gá cue téé ndècu ndihi-dé ndéé-güedé yiqui cùnú Jèsús, te ní xitnàha-güedé:

—Sá ndáá ndisa sá díú tée-a cùu-dé Dèhe Yá Ndiöxí ní cùu —cachí-güedé xitnàha-güedé.

⁵⁵ Te xica xìnutnìi vài ñáyiù ñihi ndéhé-yu nchaa nàcuáa ní quide ñaha-güedé xii Jèsús, te ñáyiù-áⁿ cúu-yu ñáyiù ní chindéé-yu

Jèsús, te ndéé distritú Galileá ní chinchícún ñáhã-yu xii-gá.

⁵⁶ Te tnuú ñáyiú-án tnàhá tá Màriá Magdalèná, ndihí tá Màriá nãná tè Jàcobó ndihí té Chèé, ndihí nãná cue déhe té Zebèdeú.

Chindúxi-güedé Jèsús

(Mr. 15:42-47; Lc. 23:50-56; Jn. 19:38-42)

⁵⁷ Te ndècu ìñ tée cuica nàni-dé Chèé te cùu-dé tée ñnuú Arimàteá, te tnàhá-dé ní tnahá tnúhu-dé ndihí Jèsús. Te òré sa ní cuaa,

⁵⁸ te ní sáhán-dé núú tẽ Pilatú, te xãhã-dẽ nõu vá cùndèe iní-dé dañã-dẽ chindúxi-dé yìqui cùñú Jèsús. Te té Pilatú-án ní sáhã-dé tnúhu, te ní táuchíú-dẽ sá cuãha cuendá-güedé té Chèé-án yìqui cùñú-gá.

⁵⁹ Te té Chèé-án ñi queheⁿ cuendá-dé yìqui cùñú-gá, te ní chidúcúⁿnuu-dé ìñ dóó cuixín dóó cándò.

⁶⁰ Te sa nchìi ìñ yaú sáá ñi caán té Chèé-án ìñ yìqui naha càva te xíán cúú cuendá-dé, te yaú-án ñi chihi-dé yìqui cùñú Jèsús, te dàtnùní ní sadí-dé ìñ yúú cáhnú yúú quèhèⁿ yuhu yaú-án, te ní xica-dé cuánuhú-dé.

⁶¹ Te tnàhá tá Màriá Magdalèná, ndihí ìngá xíchí nání Màriá ní quexió-yu ní ngóo-yu yatni núú nchìi yaú-án.

Cue tée ndèé yaú núú yíhí yìqui cùñú Jèsús

⁶² Te sátá ñi yáha ní quide túha ñáyiú nchaa sá nándihí-yu nduu tnèé nduu ndètátú-yu-án, te ñiu-ni nduu ndètátú-yu-án ñi sáhán cue dútú cùnù, ndihí cue tée cùu fariséú ní cáhán ndihí-güedé té Pilatú.

⁶³ Te xãhã-güedẽ xii-dé:

—Yòhó tée cùnùu, véxi-ndí càchí tnúhu-ndí sá ñi ndacu iní-ndí sá tẽ ndehnde ñi xíhí-án càchí-dé òré ndécú-gã-dé sá ndùu úní sá cúú-dé, te ndoto-dé.

⁶⁴ Te tendaha-n cuè tée na quíhíⁿ-güedé cundeé-güedé yuhu yaú núú ñi chihi-güedé yìqui cùñú-dé, chi na cuáhán quíhíⁿ cue tée ní xica cuu ndihí-dé duhu-güedé yìqui cùñú-dé, te cùñaha-güedé xii ñáyiú sá ñi ndoto-dé. Chi núu ducaⁿ na càda-güedé te ío-gá dandàhú-güedé cue ñáyiú dàcúúxí dàtná ní quide mee tẽ ní xíhí-án — càchí-güedé xãhã-güedé.

⁶⁵ Te té Pilatú ní xáhã-dẽ xii-güedé:

—Náu cue sandàdú-a candeca-ndo-güedé quíhíⁿ, te cadí váha-ndo ndihí-güedé yuhu yaú-án nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xãhã-dẽ xii-güedé.

⁶⁶ Te cue tée-án ñi xica-güedé cuáhán-güedé, te ní tee-güedé ìñ sèñá yúú ndèdí yèhe yaú-án, te ní dándòo-güedé cue sandàdú-án ndèé-güedé yaú-án, te ducaⁿ ñi quide-güedé cuendá sá vã yõ quíhíⁿ nacaán yaú-án.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá ñi yáha nduu ndètátú ñáyiú, te ndumìngú nehé víhí-ní ñi xica tá Màriá Magdalèná ndihí ìngá xíchí nání Màriá cuángotó-yu yaú núú ñi chihi-güedé yìqui cùñú Jèsús.

² Te uuⁿi níhi vìhi ní tnáa, te òré ducaⁿ ñi quide-xi chi ìñ espíritú xínú cuèchi núú Yã Ndiõxí ní quexìo-xi núú dúcán nchìi yaú núú ñi chihi-güedé yìqui cùñú Jèsús, te ní xócání espíritú-án yúú ndèdí yèhe yaú-án te ní ngóo-xi núú yúú-án.

³ Te dàtná dátãsa-xi òré sàá ndúté dùcaⁿ datãsa-xi núú espíritú-án, te dóó níhnú-xi cuixín quiyí.

⁴ Te òré ducaⁿ ñi quide-xi te cue sandàdú ndèé yaú-án ñi quidi ñaha-xi xii-güedé sá ñi yùhú-güedé, te ní nduá-güedé, te ní xíta sá xíní tnùnì-güedé.

⁵ Te espíritú-án ñi xáhã-xi xii cue ñáyiú ñihí cuángoto yaú-án:

—Nchòhó ñáyiú ñihí véxi coto yaú-a, vá yùhú-ndó chi yùhú cùtnùní iní-í sá nchòhó véxi-ndo nànducu-ndo yìqui cùñú Jèsús Yaa ní xíhí núú cùrúxí.

⁶ Dico Yaa-án chi ñá túú-gã ndécú yìqui cùñú-gá iha, chi sa ní ndoto-gá, te ñiu ducaⁿ ní cachí-gá sá ndótó-gã cùtnahá vátá cùú-gá, te chí táquixi cundehe-ndo núú ñi sacán-güedé yìqui cùñú-gá ní cùu te quiní-ndó ñá túú-gã.

⁷ Te vitna ío ndihí chí cuáhán núú xĩndecu cue tée ní xica cuu ndihí-gá, te duha cùñaha-ndo xii-güedé: “Ní ndoto Jèsús Yaa ní xíhí ní cùu, te codonuu-gá núú-ndó quíhíⁿ distritú Galileá te yacáⁿ

quiní-ndó-gǎ”, duha cúñaha-ndo xii-güedé. Duha ndüu tnúhu ní cachí tnúhu-í xii-ndo —càchí espíritú-án xǎhaⁿ-xi xii cue ñáyiü dihí-án.

⁸ Te cue ñáyiü dihí-án nǐ natnǐ-yü ichi, te súúni ndǐhi cuánuhú-yü núú xǐndecu cue téé ní xica cuu ndǐhi Jèsús cuèndá nacani tnúhu-yü núú-güedé nàcuáa ní xáhaⁿ espíritú-án xii-yü, te cuèi ní yühú-yü dico súúni cùdíí ínǐ-yü.

⁹ Te ichi ñühú-yü cuánuhú-yü, te na ínǐ-yü ní quexiò Jesús núü-yü ní dándácõ váha ñaha-gǎ xii-yü. Te ñáyiü-án nǐ ngüíñí xǐtǐ-yü núú-gǎ, te ní numi ñàhá-yü xii-gǎ, te ní chiñuhu ñàhá-yü.

¹⁰ Te ní xáhaⁿ-gǎ xii-yü:

—Vá yühú-ndó, chí cuáhán cúñaha-ndo xii cue téé ní xica cuu ndǐhi-í sá ná quíhíⁿ-güedé distritú Galileá, te yàcáⁿ quiní ñàhá-güedé xii-í —càchí-gǎ xǎhaⁿ-gǎ xii-yü.

Nàcuáa ndüu tnúhu ní nacani cue sandàdú

¹¹ Te nǐni ñuhu cue ñáyiü dihí-án ichi cuánuhú-yü, te dava cue sandàdú cue téé ndéé yaú-án ní cùu ní xica-güedé cuánuhú-güedé ñuú cuèndá nacani tnúhu-güedé núú cuè téé cùu dútú cùnùu nacuáa ní cuu.

¹² Te cue téé cùu dútú cùnùu-án nǐ quide-güedé jùndá ndǐhi cue téé cùu sacuéhé núú ñáyiü isràél, te ní ndatnúhu-güedé nàcuáa cada-güedé, te ní quide ndáá-güedé ndǐhi cue sandàdú-án sá cuñaha-güedé vǎi díhúⁿ cuèndá dacuàndehnde-güedé.

¹³ Te ní xáhaⁿ-güedé xii cue sandàdú-án:

—Cuínǐ-ndí sá vǎ càháⁿ ndáá-ndó núú ñáyiü nàcuáa ní cuu, chí cúñaha-ndo xii-yü sá òré xidí-ndó nǐ quixi cue téé ní xica cuu ndǐhi-dé ní dúhú-güedé yǐqui cùñú-dé néhé-güedé cuáhán, duha cúñaha-ndo xii-yü.

¹⁴ Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiü, te nchúhú cada ndáá-ndí ndǐhi-dé cuèndá sá ñà túú ñǎ cada ñaha-dé xii-ndo —càchí-güedé xǎhaⁿ-güedé xii cue sandàdú-án.

¹⁵ Te cue sandàdú-án nǐ queheⁿ cuèndá-güedé díhúⁿ, te ní xica-güedé

cuáhán-güedé te ní càháⁿ-güedé nàcuáa ní xáhaⁿ cuè téé-án càháⁿ-güedé. Te nchaa ñáyiü isràél ní nihí-yü tnúhu ní càháⁿ-güedé-án, te diu-ni tnúhu-án càháⁿ-yü ndéé vitna.

Jèsús xǎhaⁿ-gǎ xii cue téé ní xica cuu ndǐhi-gǎ nàcuáa ndüu chiuⁿ cada-güedé
(Mr. 16:14-18; Lc. 24:36-49; Jn. 20:19-23)

¹⁶ Te ndǐ ùxí ñⁿ cue téé ní xica cuu ndǐhi Jèsús ní xica-güedé cuáhán-güedé ñⁿ yucu càa distritú Galileá núú nǐ xáhaⁿ-gǎ naníhí tnàhá-güedé ndǐhi-gǎ.

¹⁷ Te òré ní xiní-güedé Jèsús te ní chiñuhu ñaha-güedé xii-gǎ, dico dava-güedé sàni ñⁿ sani úú ínǐ-güedé núu diu-gǎ àdi ñǎ díú-gǎ.

¹⁸ Te Jèsús ní sàndehe yatni-gǎ ndéé núú-güedé, te ní xáhaⁿ-gǎ xii-güedé:

—Yühú ndécú ndǐhi-í tnúhu ndee ínǐ táxí tnùnǐ-í cuèi andǐu te cuèi ñuyíú-a.

¹⁹ Te vitna tàuchiuⁿ-í sá quíhíⁿ-ndó nihí ñuyíú càháⁿ-ndó tnúhu-í núú ñáyiü cuèndá tuha ñàhá-yü xii-í, te dacuàndute-ndó-yü. Te òré ducaⁿ càda-ndo, te cacunehe-ndo tǎtá-ó Dütú Ndiöxí ndǐhi yühú Yaá cúú Dèhe-gǎ ndǐhi Espíritú-gǎ.

²⁰ Te cúñaha-ndo xii-yü sá ná càdá-yü nchaa nàcuáa sa ní dánèhé ñàhá-í xii-ndo càda-ndo. Te na càchí tnúhu-í sá cùndècu ndǐhi ñaha-ni-í xii-ndo ñuyíú-a ndéé ná sàá nduu nàa-xi —cachí-gǎ xǎhaⁿ-gǎ xii-güedé. Te ducaⁿ na cùnduu.

TNÚHU NÍ CHÍDÓ TNÙNÍ TÉ MĂCÚ

*Té Juàá té dăcuandute ñaha xii ñáyi
càháⁿ-dé tnúhu Yá Ndiöxí xití yucu*

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ năcuáa naníhí tǎhú-ó tnúhu Xítóhó Jesucrístú Déhe Yá Ndiöxí.

² Te ndíi Chàiaá té ní xóo càháⁿ tnúhu Yá Ndiöxí ndéé sanaha ní chídó tnùní ndíi năcuáa ní xáhaⁿ Yá Ndiöxí xii Déhe-gá, te duha ní xáhaⁿ-gă:

Tendaha-ĩ ñⁿ téé codonùu-dé núu-n,

te dātúha-dé ñáyi cuendá tñí-yu tnúhu-n.

³ Te téé-áⁿ quihi-dé xití yucu te níhi càháⁿ-dé cúñaha-dě xii ñáyi:

“Chí dáñá nchàa ichi cuehé ichi duha ndècu-ndo, te tñí-ndo ichi váha, te ducaⁿ càda-ndo cuendá cundecu túha-ndo, chí véxi Yaá ío cūnuu”, duha cúñaha-dě xií-yu.

Duha ndúu tnúhu ní chídó tnùní ndíi Chàiaá năcuáa ní xáhaⁿ Yá Ndiöxí xii Déhe-gá.

⁴ Te téé dii cuendá-xi ní ngódó tnùní-áⁿ nání-dě Juàá, te téé-áⁿ ní xíhi-dé xití yucu ní càháⁿ-dé tnúhu Yá Ndiöxí, te ní xóo dăcuandute-dé ñáyi, te duha ní xáhaⁿ-dě xií-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndiöxí cada càhnu iní-gá nchaa yíca cuèchi-ndo —duha ní xáhaⁿ-dě xií-yu.

⁵ Te nchaa ñáyi distritú Jùdeá, ndíhi ñáyi ñúú Jerusálén ní sáháⁿ-yu ndéé yúte Jòrdán núu ndécú tē Juàá ní xíndedóho-yu nchaa tnúhu ní càháⁿ-dé. Te cue ñáyi ní náhmá nchaa yíca cuèchi-xi te ní dăcuandute ñaha-dé xií-yu.

⁶ Te té Juàá-áⁿ ní xíhnu-dé dóo idi cāméyu, te ñⁿ ñⁿ ní cuu pāñú xití-dé, te ní xóo caxi-dé tíca làngóstá ndíhi ndudí ñúñú cuéchi.

⁷ Te ní xáhaⁿ tùcu-dé xii ñáyi:

—Nchícúⁿ ñⁿ téé véxi, te téé-áⁿ ño-gá cūnùu-dé dăcúxí yúhú, chí yúhú cū-í ñⁿ téé duuⁿ duuⁿ ñà túú tàú-í ngúnundeyi-í

nandaxi cuèdicó ñⁿ nihnu chàú-dé dico quide-í chiuⁿ-dé.

⁸ Te yúhú dăcuandute ñaha-í xii-ndo, dico mee-dé taxi-dé Espiritú Yá Ndiöxí cundecu ndíhi-ndo —càchí-dé xáhaⁿ-dě xií-yu.

Sàndute Jesús

(Mt. 3:13-17; Lc. 3:21-22)

⁹ Te dāvá-áⁿ ní quee Jèsús ñúú Nazàrét ñⁿ ñúú yíndèhu distritú Galileá cuáháⁿ-gá yúte Jòrdán. Te yàcáⁿ ní dăcuandute ñaha té Juàá xii-gá.

¹⁰ Te òré ní nene-gá xití ndute, te ní xiní-gá nchí andíu, te ní quee Espiritú Yá Ndiöxí véxi cuuⁿ-xi ngúndecu ndíhi ñaha-xi xii-gá, te dātá cáá ñⁿ lómá cáá Espiritú-áⁿ véxi cuuⁿ-xi.

¹¹ Te òré-áⁿ ní tecú ní càháⁿ Yá Ndiöxí ndéé andíu, te xáhaⁿ-gă xii Jèsús:

—Yòhó cúu-n Déhe-í téé ío cū iní-í te ío cūdí iní ñáhà-í xii-n —càchí-gá xáhaⁿ-gă.

Sácuíhná quidé yica-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiöxí ndécá-xí Jèsús cuáháⁿ ñⁿ xití yucu.

¹³ Te xití yucu-áⁿ ío víhí quiti dééⁿ, te xiáⁿ ndécú Jèsús ní ngúíta sácuíhná quidé yica-xi cada-gá ñⁿ sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núu Yá Ndiöxí ní xinú cuechi-xi nūú-gă. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiuⁿ ní tǎhú Tǎtá-gă Dútú Ndiöxí cada-gá

(Mt. 4:12-17; Lc. 4:14-15)

¹⁴ Te sátá ní ngava té Juàá vecaá, te Jèsús cuáháⁿ-gá distritú Galileá dānehé-gá ñáyi tnúhu váha, tnúhu sá càháⁿ năcuáa ndíhu ndaha ñaha Yá Ndiöxí xií-yu.

¹⁵ Te xáhaⁿ-gă xií-yu:

—Vitna sa ní cuyatni nduu ndíhu ndaha ñaha Yá Ndiöxí xii-ndo, te chí dáñá nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá càháⁿ năcuáa naníhí tǎhú-ndó —càchí-gá xáhaⁿ-gă xií-yu.

Jèsús càháⁿ-gá cúmí tñhá cue téé tñí chácá

(Mt. 4:18-22; Lc. 5:1-11)

16 Te Jèsús ñúhú-gǎ ichi cuáhán-gá tá yáha-gá yuhu làgúná Galileá, te ní xiní-gá té Xímú ndihí ñaní-dé té Ndríxí xídáquëe-güedé ñunu-güedé xití ndute tnè-güedé chácá, chi quití tnàhí-án cúu chiuⁿ-güedé tní-güedě-di.

17 Te Jèsús ní xáhaⁿ-gǎ xii-güedé:

—Chí dáñá chiuⁿ quide-ndo-án, te quixi-ndo chitnahá ñáhá-ndó xii-í te taxi-í ingá núu chiuⁿ cada-ndo chi quihíⁿ-ndó cǎháⁿ-ndó ñáyiú cuendá dacuáhá-yu tnúhu-í —càchí-gá xáhaⁿ-gǎ xii-güedé.

18 Te òré-ni-án ñí dáñá cuè téé-án ñunu-güedé te ní tuha ñaha-güedě xii-gá.

19 Te cuáhán-gá luha-gá, te ní xiní-gá té Jàcobó ndihí ñaní-dé té Juàá ñúhú-güedě xití bàrcú-güedé náticu-güedé ñunu-güedé, te ndi ndúú-güedé cúu-güedě déhe té Zebèdeú.

20 Te ní cana ñaha-gǎ xii-güedé, te ní dándóo-güedé tǎtá-güedě ndihí cue téé xinu cuechi núu-güedě xití bàrcú, te ní tuha ñaha-güedě xii-gá.

Íⁿ téé yìhi ñaha espíritú cúndihí yucu ñávǎha
(Lc. 4:31-37)

21 Te ní quexio Jesús ndihí cue téé-án ñí ñúú nání Cǎpernaúm, te yàcáⁿ ndécú-gǎ ní tnahá nduu ndètatú ñáyiú, te cuánguihu-gá veñúhu ñáyiú isràél dǎnehé ñáhá-gǎ xií-yu.

22 Te xicuñúhu vǐhí-yu nchaa tnúhu cǎháⁿ-gá, chi quide-gá sá cúu-gǎ ñí Yaá táxi tnúni vǐhí, te ñá túú dàcuaha ñaha-gǎ xií-yu dàtná dǎcuaha ñaha cue téé dàcuaha ñaha xií-yu nchaa tnúhu ní chídó tnúni ndí Moisés.

23 Te xití veñúhu-án ndécú tnàhá ñí téé yìhi ñaha ñí espíritú cúndihí yucu ñávǎha, te espíritú-án ñí quide-xi níhi ní cǎháⁿ téé-án, te xáhaⁿ-dě xii Jèsús:

24 —¿Te ná cuini yòhó Jèsús téé ñúú Nazàrét cada ñaha-n xii-ndí núu véxi-n núu ndécú-ndí-i? ¿Áⁿ vèxi-n dànaa ñaha-n xii-ndí? Chi yúhú xiní ñáhà-í xii-n sǎ cúu-n ñí téé ñá túú tnàhí cuéchi-xi, chi núú Yǎ Ndióxi ní quee-n vèxi-n ñùyíú-a —càchí-dé xáhaⁿ-dě xii-gá.

25 Dico Jèsús ní tenàá-gǎ espíritú cúndihí yucu ñávǎha-án, te xáhaⁿ-gǎ:

—¿Cǎdí yuhu-n, te taquèe yiqui cuñú téé-án! —càchí-gǎ xáhaⁿ-gǎ xii espíritú-án.

26 Te espíritú cúndihí yucu ñávǎha-án ñí dǎcüyìhí ñáhá-xí xii téé-án, te ní dǎcáná sǎa ñaha-xi, te ní quee-xi yiqui cuñú-dé cuáhán-xi.

27 Te nchaa ñáyiú xǐndecu-án ñó ní cuñúhu-yu, te ní xitnàhá-yu:

—¿Te nása ndúu-tu sá quidé téé-a? ¿Ndudú sǎá cǎháⁿ-tu-dé sǎnùu? Te quide-dé dàtná quidé ñí téé cùnùu vǐhi, chi cǎháⁿ-ni-dé te sǎndáá iní ñáhá nchaa espíritú cúndihí yucu ñávǎha —càchí-yu xitnàhá-yu.

28 Te ío ndíhi ní níhi nchaa ñáyiú dava-gǎ ñúú yǐndèhu distritú Galileá tnúhu nchaa nǎcuáa cǎháⁿ Jèsús ndihí nchaa sá quidé-gǎ.

Jèsús quidé tǎtna-gǎ nǎná ñadìhí té Xímú
(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyiú isràél, te cuáhán-gǎ ndihí té Jàcobó ndihí té Juàá vehe té Xímú ndihí té Ndríxí.

30 Te nǎná ñadìhí té Xímú cùhú-aⁿ ñúhu vǐhi-aⁿ cahni, te ndíhi-ni ní xáhaⁿ-güedě xii Jèsús sá cùhú-aⁿ.

31 Te ní sáháⁿ-gǎ núu cáá ñaha cùhú-án te ní tní-gǎ ndaha-aⁿ ní ndocani ñaha-gǎ xii-aⁿ. Te òré-ni-án ñí nchíco-aⁿ cahni, te ní ngüíta-aⁿ xinu cuechi-aⁿ núu-güedě ndihí-gǎ.

Jèsús quidé tǎtna-gǎ vǎi ñáyiú cùhú
(Mt. 8:16-17; Lc. 4:40-41)

32 Te òré sa cuini-xi cundiquiⁿ te ní quexio ñáyiú núu ndécú Jèsús, te nchaa ñáyiú cùhú ní dátacá-yu ndécá-yu ní sǎá núu-gǎ, te tnàhá cue ñáyiú yìhi ñaha espíritú cúndihí yucu ñávǎha ndécá-yu ní sǎá núu-gǎ.

33 Te nchaa ñáyiú ñúú-án ñí chítú níhnú-yu yuyèhe vehe núu ñí quexio Jesús.

34 Te Jèsús ní quide tǎtna-gǎ nchaa ñáyiú cùhú cuèi ndí dííⁿ ndí dííⁿ núu cuéhé tnàhá-yu ñí ñí-yu, te ní queñuhu-gǎ nchaa espíritú cúndihí yucu ñávǎha yìhi ñaha xii ñáyiú, te ñá túú ní dàña-gǎ cǎháⁿ cue espíritú cúndihí yucu ñávǎha-án ní ñí tnúhu, te ducaⁿ ñí quide-gǎ chi cue espíritú-án sa xini-xi yoo cùu-gǎ.

Jèsús càháⁿ-gá tnúhu Yá Ndiöxí distritú Galiléá

(Lc. 4:42-44)

³⁵ Te òré vátá tũndaá váha-gá ní ndacóo Jèsús cuáháⁿ-gá ìⁿ xio yuhu ñúú núú ñà túú ñáyiú ndècu cuendá yàcáⁿ cáháⁿ ndihí-gá Yá Ndiöxí.

³⁶ Te té Xímú ndihí cue té cùndihí-dé nándücu ñaha-güedé xii-gá.

³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nándücu ñahá-yu xii-n — càchí-güedé xáhaⁿ-güedé xii-gá.

³⁸ Te ní xáhaⁿ-gá xii-güedé:

—Chí ná quíhíⁿ-ó nchàa ñúú xĩndáa yatni-a, chi danèhé-í ñáyiú tnúhu Yá Ndiöxí chi ñúú chiuⁿ-áⁿ vèxi-í —càchí-gá xáhaⁿ-gá xii-güedé.

³⁹ Te Jèsús tá xica ndodo-gá cuáháⁿ nchaa ñúú yĩndèhu distritú Galiléá dánèhé-gá ñáyiú, te ndi tnahá ìⁿ ìⁿ ñúú sáa-gá te ducaⁿ cuãnguihu-gá veñúhu-yu dānehé ñáhá-gá xii-yu tnúhu Yá Ndiöxí, te cue ñáyiú yíhi ñaha espíritú cùndihí yucu ñávāha ta quèñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tātna-gá ìⁿ té tñàhá cuéhé sã dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexìo ìⁿ té tñàhá cuéhé sã dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gá càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n ñúú vá cùndèe iní-n càda tātna ñaha-n xii-í chi cùtnuní iní-í sá ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gá xii-dé te ní dácáa-gá ndaha-gá ní tendaha ñaha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴² Te òré-ni-áⁿ ñí xócuíñí cuéhé tñàhá-dé.

⁴³⁻⁴⁴ Te Jèsús ní cáháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yõo ìⁿ cùñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quini ñáhá-dè xii-n sà ní ndúha-n te cuáha-n-dè sá ndúú tãhú Yá Ndiöxí dàtná ní cachí ndí

Moisés cuendá ná quini ñáyiú sá ndáa ní ndúha-n —càchí-gá xáhaⁿ-gá xii-dé.

⁴⁵ Te té ní cuhú-áⁿ ñí xica-dé cuáháⁿ-dé, te ní ngüíta-dé xáhaⁿ-dè xii nchaa ñáyiú ta naníhí-dè nàcuáa ní quide Jèsús ní quide tātna ñaha-gá xii-dé. Te sá dúcáⁿ ñí xité nuu té-áⁿ cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xiãⁿ ñúú dayuhu ñí xóo quíhu-gá dava ñúú núú ñò vèi ñáyiú ndèhe ñaha xii-gá, te ní xóo cundecu-gá xítí yucu núú ñà túú ñáyiú ndècu. Te nchaa ñúú ní quee ñáyiú ní sáháⁿ-yu núú ndécú-gá ní cáháⁿ ndihí ñahá-yu xii-gá.

2

Jèsús quidé tātna-gá ìⁿ té cùhú ñá cúú-gá candá nihnu

(Mt. 9:1-8; Lc. 5:17-26)

¹ Te sātá ñí cuu ìⁿ ùú nduu sá ñí quee Jèsús ñúú Capèrnaúm te ní nasáa tucu-gá, te cue ñáyiú ní níhí-yu tnúhu sá ñí ndexìo-gá núú quidé vèhe-gá.

² Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tñàhá-gá-yu. Te ní ngüíta-gá ní dánèhé ñáhá-gá xii-yu tnúhu Yá Ndiöxí.

³ Te òré-áⁿ ñí quexìo cúmí tñàhá cue té núú ndécú-gá nchídó-güedé ìⁿ té cùhú ñá cúú-gá candá nihnu-dé.

⁴ Dico ñá túú ní ndàcu-güedé sáa-güedé ndéé núú-gá chi ío cuéhé ñáyiú ndècu. Te xiãⁿ ñúú ní sáa-güedé díquí véhé ñúú yíhí-gá-áⁿ ñí caáⁿ-güedé, te ichi ndáa díquí véhé-áⁿ ñí dáquèe-güedé té cùhú-áⁿ, te ñúhu-dé ìⁿ xító ní dáquèe ñaha-güedé ndéé núú-gá.

⁵ Te Jèsús sa ní cutnùní iní-gá sá sàndáa iní ñáhá-güedé xii-gá ñúú ní xáhaⁿ-gá xii té cùhú-áⁿ:

—Yòhó té cùhú, sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

⁶ Te xiãⁿ xĩnucóo ìⁿ ùú cue té dācuaha ñaha xii ñáyiú nchaa tnúhu ní chídó tnùní ndí Moisés, te sá dúcáⁿ ñí cáháⁿ Jèsús núú cue té-áⁿ ñí sani iní-güedé:

⁷ “Té-a càháⁿ cuéhé-dé cuendá Yá Ndiöxí duha càháⁿ-dé, chi vá yõo ìⁿ ndàcu cada cahnu iní nchaa yíca cuéchi ñáyiú chi ìⁿndí

dí-ni Yá Ndiõxí quidé càhnu iní-gá”, duha ní sani iní-güedé.

⁸ Dico òré-ni-áⁿ nǐ cutnùní iní Jèsús nàcuáa sàni iní-güedé, núu ní xáhaⁿ-gǎ xii-güedé:

—¿Te ná cuendá ducaⁿ sàni iní-ndó-í?

⁹ Te sá dúhá nǐ xáhaⁿ-í xii téé cùhú-a sá nǐ quide càhnu iní-í nchaa yíca cuèchi-dé, te xǎⁿ nchòhó ñá túú cùtnuní iní-ndó núu ndáá càháⁿ-í àdi ñá ndáá. Dico núu cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùní ndáá iní-ndó núu ndáá càháⁿ-í àdi ñá ndáá chi cundehe núu-ndó nàcuáa cada-í.

¹⁰ Te vitna na càda-í nàcuáa cutnùní iní-ndó nchàa-ndo sá yùhú Téé cùu ñani tnáhá-ndó nchàa-ndo ndecu ndihí-í tnúhu ndee iní sá cáda càhnu iní-í nchaa cuèchi ñáyiú ñuyú-a —càchí-gá xǎhaⁿ-gǎ xii-güedé.

Te sáta dúcáⁿ te ní xáhaⁿ-gǎ xii téé cùhú-áⁿ:

¹¹ —Ndacóo te ndocani-n xító ñùhu-n véxi-áⁿ, te núhú-n vehe-n —cachí-gá xǎhaⁿ-gǎ xii-dé.

¹² Te òré-ni-áⁿ nǐ ndacóo-dé, te ní ndocani-dé xító ñùhu-dé ní quexìo-áⁿ, te ndèhe nchaa ñáyiú xíndecu-áⁿ nǐ ndee-dé tnuú-yu cuáháⁿ-dé. Te sá dúcáⁿ nǐ quide Jèsús ní quide tátna-gá téé-áⁿ, xǎⁿ ío ní cuñúhu nchaa ñáyiú, te ní xítnáhá-yu:

—Càhnu vihi cuu Yá Ndiõxí, chi ñá ñⁿ ndùu quini-ó dùha cuu datná ní cuu vitna —càchí-yu xítnáhá-yu.

*Jèsús càháⁿ-gá ñⁿ téé nàni Leví
(Mt. 9:9-13; Lc. 5:27-32)*

¹³ Te Jèsús cuáháⁿ tucu-gá yuhu làgúná, te ío cuéhé ñáyiú ní sátnáhá ñáhá xii-gá, te ní dánèhé ñáhá-gǎ xii-yu tnúhu Yá Ndiõxí.

¹⁴ Te òré ní yáha ní dánèhé ñáhá-gǎ xii-yu, te ní naqueheⁿ-gá ichi, te ní yáha yatni-gá ñⁿ xichi núu núcóo ñⁿ téé nàni Leví déhe ñⁿ téé nàni Alfeú quidé còbrá-dé ñáyiú cuendá impuèstú chi còbrádór cúu-dé. Te òré ní xiní ñáhá-gǎ xii-dé, te ní xáhaⁿ-gǎ:

—Néhe chitnahá ñáhá-n xii-í —càchí-gá xǎhaⁿ-gǎ xii-dé.

Te té Leví-áⁿ nǐ ndacuíñí-dé, te ní tuha ñaha-dé xii-gá.

¹⁵ Te té Leví-áⁿ cuáháⁿ-dé ndihí Jèsús vehe-dé. Te yíhi Jèsús mèsá xéxi-gǎ ndihí cue téé xica cuu ndihí-gá, te tnáhá vèi cue téé cuihna iní-xi quide còbrá ñáhá xii ñáyiú

cuendá impuèstú, ndihí dava-gá cue téé ndècu ichi cuehé ichi duha núcóo ndihí ñaha-güedé xii-gá xéxi ndihí ñaha-güedé, te ducaⁿ chi ío vèi ñáyiú nchicúⁿ ñáhá xii-gá.

¹⁶ Te sá nǐ xiní cue téé dàcuáha ñaha xii-yu nchaa tnúhu ní chídó tnùní ndii Moisés, ndihí cue téé cùu fariséú xéxi Jèsús ndihí nchaa cue téé-áⁿ núu ní xicáⁿ tnúhú-güedé núu cuè téé xica cuu ndihí-gá, te xáhaⁿ-güedé:

—¿Ná cuendá ducaⁿ quide téé cùu mestrú-ndó xéxi-dé ndihí cue téé cuihna iní-xi quide còbrá ñáhá xii ñáyiú cuendá impuèstú, ndihí nchaa dava-gá cue téé ndècu ichi cuehé ichi duha-i? —càchí-güedé xǎhaⁿ-güedé.

¹⁷ Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue téé xica cuu ndihí-gá, núu ní xáhaⁿ-gǎ xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càháⁿ-í ñáyiú cùtnuní iní-xi sá ndécú cuèchi-xi te ñá túú véxi-í càháⁿ-í ñáyiú càchí sá ñá túú ndècu cuèchi-xi —càchí-gá xǎhaⁿ-gǎ xii-güedé.

Cuendá cue ñáyiú ñá túú tnàhí ná xéxi áma càháⁿ ndihí-yu Yá Ndiõxí

(Mt. 9:14-17; Lc. 5:33-39)

¹⁸ Te cue téé xica cuu ndihí té Juáá, ndihí cue téé xica cuu ndihí cue téé cùu fariséú ñá túú tnàhí ná xéxi-güedé áma càháⁿ ndihí-güedé Yá Ndiõxí. Te ñⁿ nduu ducaⁿ xíquide-güedé, te ní sáháⁿ ñáyiú ní xicáⁿ tnúhú-yu núu Jèsús, te xǎhǎⁿ-yu xii-gá:

—Cuini-ndí cachí tnúhu-n nǎ cuendá cue téé xica cuu ndihí té Juáá, ndihí cue téé xica cuu ndihí cue téé cùu fariséú ñá túú tnàhí ná xéxi-güedé áma càháⁿ ndihí-güedé Yá Ndiõxí, te cue téé xica cuu ndihí-n ñá túú dùcaⁿ quide-güedé —càchí-yu xǎhǎⁿ-yu xii-gá.

¹⁹ Te Jèsús ní xáhaⁿ-gǎ xii-yu:

—Nchòhó xini-ndó sǎ vǎ cúu cùñaha-o xii ñáyiú ñùhu vico tnándaha sǎ vǎ cúu càxí-yu nini ndècu ndihí ñaha téé tnándaha xii-yu.

²⁰ Dico sáá nduu te vǎ cùndècu ndihí ñaha-gá téé tnándaha-áⁿ xii-yu, te dàvá-áⁿ te cahni iní-yu vǎ cáxí-yu cuendá sá ndihí iní-yu.

21 Te vá yõo ìⁿ dândée luha dóó sáá ìⁿ dóó sa ní cuu tùhú víhí, chi dóó sáá-ǎⁿ nàndiyi-xi te uuⁿ-gá ndata-xi dõó sà ní cuu tùhú-áⁿ.

22 Te ni vǎ yõo ìⁿ chìhi ndidí sáá xití ìⁿ lamba sa ní cuu tùhú víhí, chi núu yoo ducaⁿ na càda te ndava lamba sa ní cuu tùhú-áⁿ, chi ío níhi yóco ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xíǎⁿ xíní ñùhu-xi quee ndidí sáá-ǎⁿ xití ìⁿ lamba saa —càchí-gá xǎhaⁿ-gǎ xii-yu.

Cue tée xica cuu ndihi Jesús sàhnú-güedé yoco triú nduu ndetátú ñáyiu
(Mt. 12:1-8; Lc. 6:1-5)

23 Te ìⁿ nduu cùu-xi nduu ndetátú ñáyiu ñùhu Jesús ichi ndihi cue tée xica cuu ndihi-gá, te ta yǎha-gá ndihi-güedé ìⁿ xichi núu cáá triú, te ní ngúíta-güedé sàhnú-güedé yoco triú-áⁿ.

24 Te cue tée cùu fariséú ní xáhaⁿ-güedé xii-gá:

—¿Ná cuendá ducaⁿ quide cue tée xica cuu ndihi-n sàhnú-güedé yoco triú vitna cùu-xi nduu ndetátú-í? Te ñá túú tàú-güedé ducaⁿ càda-güedé —càchí-güedé xǎhaⁿ-güedé xii-gá.

25 Te ní xáhaⁿ-gǎ xii-güedé:

—¿Te náa vátá dácuàha tnahi-gá-ndó núú tütú Yǎ Ndiõxí núú càháⁿ-xi nàcuáa ní quide ndíi Dàvíí cùtnàhá ní xíhí ndíi docó ndihi cue tée ní xica cuu ndihi ndíi-ǎⁿ?

26 Te dàvǎ-áⁿ ní xíndecu ìⁿ tée ní xínani Abiàtár ní cuu-dé dütú cùnùu, te ndíi Dàvíí ní quíhu ndíi xití vehe Yǎ Ndiõxí ní queheⁿ ndíi pàá ní cuu íí ndécú-ǎⁿ ní dácǎhñu ndíi cue tée ní xica cuu ndihi ndíi ní xexi ndíi ndihi-güedé, te mee-ni cué dütú tàú-güedé caxi-güedé pàá-áⁿ ní cùu —cachí-gá xǎhaⁿ-gǎ xii-güedé.

27 Te ní xáhaⁿ tucu Jesús xii-güedé:

—Mee Yǎ Ndiõxí ní taxi ndecu-gá nduu ndetátú ñáyiu, te ñá túú ní càchí-gá sá mée-yu nándi cani iní-yu cadá-yu canehe íi-yu nduu ndetátú-yu-áⁿ.

28 Te yúhú Téé cùu ñaní tnáhá-ndo nchàa-ndo, tnáhá-í ndécú ndihi-í tnúhu ndee iní sá cùu-í nchaa ñáyiu nàcuáa cadá-yu nduu ndetátú-ó-áⁿ —càchí-gá xǎhaⁿ-gǎ xii-güedé.

3

Ìⁿ téé ní yíchí ìⁿ xio ndaha-xi
(Mt. 12:9-14; Lc. 6:6-11)

1 Te Jèsús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé.

2 Te xíáⁿ ndécú cué téé xito dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetátú-güedé ndihi ñáyiu, cuendá ducaⁿ te níhí-güedé nàcuáa cada-güedé cacáⁿ cuéchi-güedé cuendá-gá.

3 Te ní xáhaⁿ-gǎ xii téé cùhú ndaha-xi-áⁿ:

—Ndacuíñí te ngúnutñi-n cuádava iha —càchí-gá xǎhaⁿ-gǎ xii-dé.

4 Te ní xícaⁿ tnúhú-gǎ núu-güedé, te xǎhaⁿ-gǎ:

—Chí càchí tnúhu ná cúú sǎ cúú càda-nduu ndetátú-ó. ¿Sá vǎha ñǎ sá cuèhé? ¿Sá cáda tátna-o ñáyiu cùhú ñǎ sá cáhni-ó-yu? —càchí-gá xǎhaⁿ-gǎ xii-güedé.

Dico ni ìⁿ-güedé ñá túú tnáhi ní càháⁿ-güedé.

5 Te Jèsús ní xíndéhé vǎha-gá núú nchàa-güedé te ní cudééⁿ-gǎ, te ní ndíhú iní-gá chi ío sáa iní-güedé, te ní xáhaⁿ-gǎ xii téé cùhú ndaha-xi-áⁿ:

—Ndocani ndaha-n —càchí-gá xǎhaⁿ-gǎ xii-dé.

Te ní ndocani-dé ndaha-dé, te òré-ni-áⁿ ní ndúha.

6 Te cue téé cùu fariséú ní xica-güedé cuáháⁿ-güedé ìⁿ xichi núú ní naníhí tnáhá-güedé ndihi cue téé cùndihi té Hérodés cuendá ndatnúhu-güedé nása cada-güedé cahni-güedé Jèsús.

Cuéhé víhí ñáyiu ní quexio yuhu lagúná

7 Te Jèsús ní xica-gá cuáháⁿ-gá ndihi cue téé xica cuu ndihi-gá yuhu làgúná distrítú Galileá, te ío cuéhé ñáyiu distrítú-áⁿ nchícúⁿ ñáhǎ-yu xii-gá cuáháⁿ.

8 Te núú ní quexio-gá-áⁿ ní sáháⁿ ñáyiu distrítú Júdeá, ñáyiu ñuú Jerusálén, ñáyiu distrítú Idùmeá, ñáyiu xíndecu ndàa ingá xio yúte Jòrdán, ndihi ñáyiu xíndecu yatni ñuú Tírú ndihi ñuú Sidón, te ducaⁿ ío vǎi-yu ní sáháⁿ núú ndécú-gǎ chi ní níhí-yu tnúhu nchaa nàcuáa quide-gá.

9 Te Jèsús ní xáhaⁿ-gǎ xii cue téé xica cuu ndihi-gá sá cáda tǔha-güedé ìⁿ bàrcú cuendá

caa-gá núú-xi cuendá sá vǎ dádèhnde ñahá-yu xii-gá chi ío cuéhě-yu.

10 Te sá dúcáⁿ ñí ñíhí-yu tnúhu sá quidé tǎtna-gá ñáyiú cùhú, núu xiǎⁿ nchaa dava-gá ñáyiú cùhú súúni dícó ngõnchihi tnàhá-yu cuáháⁿ-yu núú ndécú-gǎ cuìní-yu tnándeé ñáhǎ-yu xii-gá cuendá sá cuìní-yu ndúha-yu.

11 Te cue ñáyiú yìhi ñaha espíritú cùndìhi yucu ñávǎha ní sanu xiti ñaha-xi xií-yu núú Jèsús òré ní xiní ñáhá-xi xii-gá, te xiǎⁿ ní quide níhi ní cáháⁿ-yu, te xǎhǎⁿ-yu xii Jèsús:

—¡Yòhó cúú-n Dèhe Yá Ndiõxí! —càhí-yu xǎhǎⁿ-yu xii-gá.

12 Te Jèsús ní tenàá-gá nchaa espíritú cùndìhi yucu ñávǎha-áⁿ, te ní xáhaⁿ-gǎ xii nchaa ñáyiú ní xíhi-xi-áⁿ sǎ vǎ càháⁿ-yu núú ñáyiú yoo cùu-gá.

Jèsús cǎxi-gá úxúú tnàhá cue téé dacuàha ñaha xii ñáyiú tnúhu-gá

(Mt. 10:1-4; Lc. 6:12-16)

13 Te sáta dúcáⁿ ñí cuu te Jèsús ní sáá-gá ñíⁿ yucu, te xiǎⁿ ndécú-gǎ ní cana-gá nchaa cue téé càhí iní-gá. Te òré ní quexio nchaa cue téé-áⁿ núú-gǎ,

14 te ní cǎxi-gá úxúú tnàhá cue téé caca cuu ndìhi-gá, te ñíu-ni cue téé-áⁿ tendaha-gǎ quíhíⁿ-güedé cáháⁿ-güedé tnúhu-gá núú ñáyiú.

15 Te ní sǎnhaha-gǎ xii-güedé tnúhu ndee ñí cundecu ndìhi-güedé cuendá cada tǎtna-güedé ñáyiú cùhú, ndìhi cuendá queñuhu-güedé nchaa espíritú cùndìhi yucu ñávǎha yìhi ñaha xii ñáyiú.

16 Te duha xǎnani ndi úxúú cue téé-áⁿ: ñíⁿ-dé nání-dě Xímú, te mee-gǎ ní taudiu ñaha-gá xii-dé sá cúnàni-dé Pèlú.

17 Te ñngá-dé nání-dě Jàcobó, te ñngá-dé nání-dě Juàá, te ñnani té Jàcobó-áⁿ cúú tǎ Juàá te ndi ndúú-güedé cúú-güedé déhe té Zebèdeú, te ndi ndúú cue téé-áⁿ ñí dánání ñaha Jèsús xii-güedé Boànergés, te tnúhu-áⁿ quée-xí: Cue téé ío yáchí cúdeéⁿ, duha quèe-xi tnúhu-áⁿ.

18 Te duha xǎnani dàva-gá-güedé: Té Ndríxí, té Lìpé, té Bartolòmé, té Mǎteú, té Mǎxí, té Jàcobó déhe té Àlfeú, té Tàdeú, té Xímú téé ní cundìhi cue téé canànistá ní cùu,

19 ndìhi té Jùdás Iscàrioté téé ní sáá nduu ñí sáha cuendá ñáhá xii Jèsús núú cuè téé cùu úhú iní ñáhá xii-gá, duha xǎnani cuè téé ní cǎxi Jèsús ní xica cuu ndìhi-gá.

Càhí-güedé sá ndécú ndìhi Jèsús yucu ñávǎha dico ñá ndáá

(Mt. 12:22-32; Lc. 11:14-23; 12:10)

Te sáta dúcáⁿ te cuáháⁿ-gá ndìhi-güedé núú quidé vèhe-gá.

20 Te ío vǎi ñáyiú ní tacá-ni tucú-yu xiǎⁿ, te ní ñǎ ní ñíhí-gǎ nása cada-gá caxi-gá ndìhi cue téé xica cuu ndìhi-gá cuendá sá ío vǎi-yu.

21 Te cue ñáyiú cùu ndi mee Jèsús ní ñíhí-yu tnúhu nchaa nàcuáa cùu, te nchaa ñáyiú ñǎ cùtnuní váha iní-xi ní cachí-yu sá ñí nduu lùcú-gá núu xiǎⁿ cuáháⁿ ñáyiú cùu ndi mee Jèsús núú ndécú-gǎ cuendá can-deca ñáhá-yu xii-gá núhú ní cùu.

22 Te cue téé dàcuaha ñaha xii ñáyiú nchaa tnúhu ní chídó tnùní ndí Moisés véxi ndéé ñúú Jerusálén ní cáháⁿ cuéhé-güedé cuendá Jèsús, chi ní xítnàha-güedé:

—Téé-a ndècu ndìhi-dé sácuíhná, te ñíu xiǎⁿ chíndèe ñaha-xi xii-dé queñuhu-dé nchaa espíritú cùndìhi-xi yìhi ñaha xii ñáyiú, te ñíu-ni-xi tàxi tnuní-xi nchaa espíritú-áⁿ —duha ní xítnàha-güedé.

23 Te Jèsús ní cana ñaha-gǎ xii-güedé, te ní caní-gá ñíⁿ cuendú núú-güedé nàcuáa tecú tnùní-güedé tnúhu-gá, te xáhaⁿ-gǎ xii-güedé:

—¿Te nása cada sácuíhná queñuhu-xi cue espíritú cùndìhi-xi yìhi ñaha xii ñáyiú-i?

24 Te nchòhó xíní-ndó sǎ núu ñíⁿ téé yíndaha ñíⁿ nacióⁿ vá cúú ñíⁿnuu-dé ndìhi cue téé cùndìhi-dé, te vá cùdì-dé cunuu-dé.

25 Te ñíu-ni ducaⁿ sǎtnahá-xi cùu tucu ñáyiú xíndecu ñíⁿ-ni vèhe, chi núu vá cúú ñíⁿnuú-yu, te vá cùdì-yu cundecu càhnú-yu.

26 Te núu sácuíhná ñǎ túú cùu ñíⁿnuu-xi ndìhi cue espíritú cùndìhi-xi, te vá cùdì-xi cundecu-xi taxi tnùní-xi te núu ducaⁿ quide-xi.

27 Te nchòhó xíní-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vèhe ñíⁿ téé ío ndee, chi díhna-gá xíní ñíⁿnuu-xi tníⁿ-güedé téé-áⁿ dacùtu ñaha-güedé xii-dé dàtnùní ducaⁿ te ndacu-güedé duhu-güedé nchaa sá ndécú ndìhi-dé.

28 Te na càchí tnúhu ndáá-í xii-ndo sã ncháá sã cuèhé sã dúhá quide ñáyi, ndihi nchaa tnúhu cuèhé tnúhu duha càháⁿ-yu cuendá Yã Ndiõxí cuu cada càhnu iní-gá.

29 Dico cue ñáyi na càháⁿ cuèhé cuendá Espíritú Yã Ndiõxí, ñáyi-áⁿ vã cáda càhnu iní ñháá tnàhí-gá xií-yu, chi cundecu-ni cuéchi-yu núú-gã ni caa ni quíhíⁿ —càchí-gá xãháⁿ-gã xii-güedé.

30 Te ducaⁿ ñí cáháⁿ-gá chi càchí-güedé sã ndécú ndihi-gá espíritú cündihi yucu ñávãha.

*Nãná Jèsús ndihi cue ñaní-gá
(Mt. 12:46-50; Lc. 8:19-21)*

31 Te ní quexì náná Jèsús ndihi cue ñaní-gá núú ndécú-gã xĩnutnĩⁿ-yu quehé, te ní xáhãⁿ-yu xii ñáyi xĩndecu-áⁿ sã dáyãha-yu tnúhu núú-gã cuendá quee-gá ndatnúhu ndihi ñaha-gá xií-yu.

32 Te cue ñáyi xĩnucóo ni càndéé dìñi-gá ní xáhãⁿ-yu xii-gá:

—Nãná-n ndihi cue ñaní-n ndécú-yu quehé nándücu ñháá-yu xii-n —càchí-yu xáhãⁿ-yu xii-gá.

33 Te Jèsús ní xãháⁿ-gã xií-yu:

—Te cachí tnúhu-ndo yõndi-gá ñáyi cù datná nãná-í ndihi dàtná cue ñaní-í —càchí-gá xãháⁿ-gã xií-yu.

34 Te dàtnùní ní xíndéhé vãha-gá núú nchaa ñáyi xĩnucóo ni càndéé dìñi-gá-áⁿ, te ní xãháⁿ-gã xií-yu:

—Nchaa ñáyi-a cùú-yu dàtná nãná-í ndihi dàtná cue ñaní-í.

35 Chi nchaa ñáyi quide nacuáa càháⁿ Yã Ndiõxí, ñáyi-áⁿ cúú-yu dàtná cue ñaní-í, ndihi dàtná cue cúha-í, ndihi dàtná nãná-í —càchí-gá xãháⁿ-gã xií-yu.

4

*Nàcuáa quide téé cuángacáⁿ triú
(Mt. 13:1-9; Lc. 8:4-8)*

1 Te Jèsús ní ngüíta-gá dácuàha tucu-gá ñáyi yuhu làgúná. Te cuéhé víhĩ-yu ní tacá xíáⁿ nõu cuásaá-gá núú ñí bàrcú nútñĩ xití ndute làgúná-áⁿ, te núú xĩãⁿ ní ngóo-gá te ní ngüíta-gá dánèhé ñháá-gã xií-yu, te ncháá-yu xixúcu-yu yuhu làgúná-áⁿ.

2 Te ní ngüíta-gá ní cani-gá titní cuèndú nõu-yu nãcuáa tecú tnùní-yu tnúhu-gá, te xãháⁿ-gã xií-yu:

3 —Chí cündedóho váha ñí cuèndú ná càni-í-a. ñí tée cuángacáⁿ-dé triú.

4 Te òré ní ngüíta-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatácá-güedi.

5 Te dava ní ngava ñuhu yadi nõú yíhí víhi yúú, te ndihi-ni ní xínu-xi cuendá sã ñà túú càvivi ñuhu.

6 Dico òré ní nayehé ñà túú ní cündee iní-xi chi ní yíchí-xi, chi ñà túú ní ñíhí quíhíⁿ cùnú yóho-xi.

7 Te dava ní ngava núú yúcu ndĩquíⁿ tnu ññu, te ñí nuu-ni ní xínu-xi ndihi tnu ññu, te tnu ññu-áⁿ ñí sahnu-xi te ní dánáá-xí nchaa triú sã ñí xínu-áⁿ.

8 Dico dava triú-áⁿ ñí ngava-xi núú ndécú ññu cocoⁿ, te xíãⁿ ní xínu-xi te ní sahnu-xi te ío váha ní cuu, chi núú ñí triú-áⁿ te dava yoco-xi ní ngüihí ócò úxí triú-xi, te dava yoco-xi ní ngüihí únídico triú-xi, te dava yoco-xi ní ngüihí ñí cièndú triú-xi —càchí-gá xãháⁿ-gã xií-yu.

9 Te xãháⁿ tucu-gá xií-yu:

—Nchaa nchòhó ñáyi ní xíndedóho nchaa tnúhu ní cáháⁿ-í-a, te ío váha chí cuãha cuendá —càchí-gá xãháⁿ-gã xií-yu.

*Jèsús càháⁿ-gá ná cuendá ducaⁿ càni-gá
cuèndú
(Mt. 13:10-17; Lc. 8:9-10)*

10 Te sátá ñí ndaca ñáyi-áⁿ te ní quendóo mee-nã Jèsús ndihi cue tée xica cuu ndihi-gá, ndihi ñí ùú-nã ñáyi. Te ñáyi-áⁿ ndihi cue tée-áⁿ ñí xicáⁿ tnúhũ-yu ndihi-güedé núú-gã, nõu nása quèe-xi cuèndú ní cani-gá nõu-yu ndihi-güedé.

11 Te ní xãháⁿ-gã:

—Nchòhó chi sa càchí tnúhu Yã Ndiõxí xii-ndo ñí sã vãtá quèní-gá-ndó, chi càchí tnúhu-gá nãcuáa cada-gá ndihu ndaha-gã ñáyi, dico dava-gá ñáyi càni-í mee-ni cuèndú nõu-yu.

12 Chi cuéi na quèní-yu nchaa nãcuáa cuu dico ni vã cùnùní iní-yu ná cuendá ducaⁿ cùu, àdi cuéi na cündedóho-yu dico ni vã tècú tnùní-yu. Te ducaⁿ ndòhó-yu cuendá sã vã quèndáá iní-yu Yã Ndiõxí,

ndihi cuendá sá vǎ cáda càhnu iní-gá nchaa yíca cuèchi-yu —càchí-gá xǎhaⁿ-gǎ xií-yu ndihi-güedé.

Jèsús càháⁿ-gá nàcuáa quèe-xi cuendá téé cuángacáⁿ triú

(Mt. 13:18-23; Lc. 8:11-15)

13 Te ní xáhaⁿ tùcu Jèsús xii cue téé xica cuu ndihi-gá, ndihi cue ñáyi^u-áⁿ:

—Nchòhó, ñá túú ní tècú tnùní-ndó cuèndú ní caní-í núú-ndó, te núu ducaⁿ, ¿te nása tecú tnùní-ndó dàva-gá cuèndú caní-í núú-ndó-í? Te na càchí tnúhu-í xii-ndo nàcuáa quèe-xi cuèndú ní caní-í núú-ndó.

14 Te téé cuángacáⁿ triú-áⁿ cúú-dé dàtná ñáⁿ téé cuáháⁿ càháⁿ tnúhu Yá Ndiòxí núú ñáⁿyi^u.

15 Te triú-áⁿ cúú-xí dàtná tnúhu Yá Ndiòxí, te triú sá ñí quene ndava ní ngava ndéé ichi, xiǎⁿ cúú-xí dàtná ñáⁿyi^u ní tnahá iní-xi tnúhu Yá Ndiòxí, dico sácúhna cuáháⁿ-xi xòcani-xi tnúhu-gá iní-yu cuèndá sá vǎ cǎnchícúⁿ nihnú-yu nàcuáa càháⁿ tnúhu-áⁿ.

16 Te triú sá ñí ngava ñuhu yadi núú yíhí vîhi yúú, xiǎⁿ cúú-xí dàtná ñáⁿyi^u ní xíndedóho tnúhu Yá Ndiòxí te díí iní ní tníⁿ-yu tnúhu-gá.

17 Dico òré ná nguíta ñáⁿyi^u cúcuèhé ñáhǎ-yu xií-yu àdi nándi-gá sá yǎha-yu sá cuèndá tnúhu-gá, te ñá cündèe iní-yu chi dàñá-yu tnúhu-gá cuèndá sá ñà túú ñihí ndéè-yu.

18 Te triú sá ñí ngava núú yúcu ndíquíⁿ tnu ñhu xiǎⁿ cúú-xí dàtná ñáⁿyi^u ní tecú dóho-xi tnúhu Yá Ndiòxí,

19 dico cuèé cuèé ní nacuanaá-yu tnúhu-gá, chi cuèndá mee-ni sǎ cúú-xí mèe-yu ñuhu iní-yu, ndihi cuèndá sá ño sàni iní-yu cuu cuicá-yu, ndihi cuèndá sá ño cùdíí iní-yu nchaa sá ño ñuyú-a, te ñá túú ñuhu iní-yu tnúhu sá ñí xíndedóho-yu-áⁿ nàcuáa cada váha-yu cundecú-yu.

20 Dico triú sá ñí ngava núú ndécú ñuhu cocoⁿ, xiǎⁿ cúú-xí dàtná ñáⁿyi^u ní xíndedóho tnúhu Yá Ndiòxí te quidé-yu nchaa nàcuáa càháⁿ tnúhu-áⁿ. Te cada iní-ndó sǎ ñáⁿyi^u-áⁿ cúú-yu dàtná triú sá ñí nguíhi yoco-xi ócò úxí triú-xi, ndihi triú sá ñí nguíhi yoco-xi únídico triú-xi, ndihi triú sá ñí nguíhi yoco-xi ñáⁿ cièndú triú-xi. Te ducaⁿ sǎtnahá-xi cùú-yu chi ño váha quidé-yu

—càchí-gá xǎhaⁿ-gǎ xii cue téé xica cuu ndihi-gá ndihi cue ñáyi^u-áⁿ.

Cuèndá iti
(Lc. 8:16-18)

21 Te xǎhaⁿ-gǎ xii nchaa ñáyi^u:

—Ñá túú ñí ñáⁿ ñáyi^u tèñuhú iti te chiváha-yu ñáⁿ xití quídi, àdi chiváha-yu ñáⁿ caha càma, chi tàxi ndecú-yu ñáⁿ núú dùcúⁿ cuèndá cutnùní núú nchaa ñáyi^u.

22 Te ñí ñáⁿ tnúhu sá ñá tècú tnùní ñáyi^u vitna cachí-ó sǎ vǎ tècú tnùní-yu chi dacuítí sǎ tècú tnùní-yu, te ñí ñáⁿ tnúhu sá càchí-ó cùu yuhu vitna vá cúú yùhu chi dacuítí sǎ quèé tǔu-xi núú ñáyi^u.

23 Te nchòhó cue ñáyi^u ní xíndedóho nchaa tnúhu ní càháⁿ-í-a, te ño váha chí ná cuáha cuèndá —càchí-gá xǎhaⁿ-gǎ xií-yu.

24 Te ní xáhaⁿ tùcu-gá:

—Ño váha chí cündedóho tnúhu na càháⁿ-í-a. Te nàcuáa-ni quide-ndo danehé-ndó ñáⁿyi^u tnúhu Yá Ndiòxí, te diu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó.

25 Te nchaa nchòhó ñáⁿyi^u tècú tnùní tnúhu Yá Ndiòxí, uuⁿ-gá cuita tecú tnùní-ndó tnúhu-gá quíhíⁿ. Te nchaa nchòhó ñáⁿyi^u ñá túú tècú tnùní tnúhu-gá, te uuⁿ-gá vá tècú tnùní-ndó —càchí-gá xǎhaⁿ-gǎ xií-yu.

Nàcuáa sàhnu triú

26 Te Jèsús xǎhaⁿ tùcu-gá:

—Na càni-í ñáⁿ cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñaha Yá Ndiòxí xii ñáyi^u. ñáⁿ téé cuángacáⁿ-dé triú.

27-28 Te sáta ñí yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ñí quene yoco-xi te ní nguíhi triú-xi, dico téé ní sacáⁿ triú-áⁿ ñà túú xíní-dé nása ní sahnu-xi, chi mee ñuhu ní quide-xi ní sahnu triú-áⁿ.

29 Te òré sa ní ndihi ní cuaaⁿ te ní nguíta téé ní sacáⁿ-áⁿ náquèhndé-dé nátàxi tnahá-dé —càchí-gá xǎhaⁿ-gǎ xií-yu.

Cuèndá ndíquíⁿ yutnu nàni mostázá
(Mt. 13:31-32; Lc. 13:18-19)

30 Te xăhaⁿ tucu Jësús xii-yu:

—Na cànì tucu-í ingá cuendú núú-ndó cuendá tecú tnùnì-ndó nàcuáa cada-xi òré ndìhu ndaha ñàha Yá Ndiòxí xii ñăyiu.

31 Hⁿ yutnu nàni mostázá cúú-xí ìⁿ yutnu sá lîhli vîhi-gá ndîquíⁿ-xi dàcúúxí ndîquíⁿ nchaa cúhú,

32 dico òré ná càcáⁿ-güedé núú ñúhú-güedë, te na xînu-xi te sàhnu-gá-xi dàcúúxí nchaa cúhú, te nchaa dité-xi ío cùu cahnu-xi, te ndéé cue quiti ndàva núú tàchí sácõo-güedi nchaa núú dité-xi xînu ndeti-güedi —cachí-gá xăhaⁿ-gă xii-yu.

*Ío titní cuendú ní canì Jësús núú ñăyiu
(Mt. 13:34-35)*

33 Te ío-gá vâi cuendú ní canì Jësús núú ñăyiu cuendá tecú tnùnì-yu tnúhu Yá Ndiòxí, dico dava cuendú ñá túú ní cànì-gá núú-yu, chi ní cutnùnì iní-gá sá vă tècú tnùnì-yu nchaa.

34 Te mee-ni cuendú ní canì Jësús núú ñăyiu ndi tnahá òré ní dánèhé ñáhá-gă xii-yu tnúhu-gá. Te òré ndécú mée Jësús ndîhi cue téé xîca cuu ndîhi-gá, te ní xăhaⁿ-gă xii-güedé nàcuáa quèe-xi ìⁿ ìⁿ cuendú ní canì-gá núú ñăyiu.

*Jësús ngánì-gă táchí ndîhi ndute làgúná
(Mt. 8:23-27; Lc. 8:22-25)*

35 Te ñiu-ni nduu-ăⁿ òré sa ta cundîquíⁿ cuáháⁿ ní xăhaⁿ Jësús xii cue téé xîca cuu ndîhi-gá:

—Chí ná quîhíⁿ-ó ndàa ingá xio yuhu làgúná —càchí-gá xăhaⁿ-gă xii-güedë.

36 Te ní quide ndee iní-gá nchaa ñăyiu xîxúcu-áⁿ, te ñiu-ni bàrcú sá ñúhú-gă òré ní dánèhé-gá ñăyiu tnúhu-gá ñiu-ni xîăⁿ ní dácácá cuè téé xîca cuu ndîhi-gá ndécá ñàha-güedé xii-gá cuáháⁿ, te tnàhá ìⁿ úú-gá bàrcú ní xica-xi nchìcúⁿ-xi bàrcú ñúhú-gă-áⁿ cuáháⁿ.

37 Te ñúhu bàrcú ñúhú-gă-áⁿ ichi cuáháⁿ-xi núú ndute, te ní quexìo ìⁿ táchí ñîhi, te ta nàdachitú-xi ndute xití bàrcú-áⁿ cuáháⁿ, te sa cuìní-nă-xi quèe naa bàrcú-áⁿ xití ndute ni cùu.

38 Te Jësús cáá-gă xidí-gá ìⁿ xichi ndàa sátá bàrcú-áⁿ, te yìnchìhi ìⁿ dóo dîquí-gă. Te sá dúcáⁿ cuìní-xi quèe naa bàrcú-áⁿ

núu ní sáháⁿ-güedé ní ndocani ñàha-güedë xii-gá, te xăhaⁿ-güedë:

—ìMèstrú, ndîquíú iní! ¿Náa ñá túú ndîhú iní-n să tá quèe naa-o cuáháⁿ-ăⁿ? —càchí-güedé xăhaⁿ-güedë xii-gá.

39 Te Jësús ní ndîquíú iní-gá te ní ndacóo-gá, te ní tenáá-gá táchí-ăⁿ, te ní xăhaⁿ-gă xii ndute làgúná:

—ìTnavíí-nă cuhuⁿ, chi ío dusaⁿ! —càchí-gá xăhaⁿ-gă xii ndute-áⁿ.

Te òré-ni ní ngüíñí táchí-ăⁿ te ní nucúndecu nahi-nă ndute làgúná-áⁿ.

40 Te Jësús ní xăhaⁿ-gă xii-güedé:

—¿Ná cuendá ndéé dúcáⁿ yùhú-ndó-í? ¿Náa ñá túú sàndáá iní ñáhá ndîsa-ndo xii-í-ăⁿ? —càchí-gá xăhaⁿ-gă xii-güedë.

41 Dico mee-güedë chi ío ní yùhú-güedé sá ducaⁿ ñî quide-gá ní xiní-güedé, te ní xitnàha-güedé:

—¿Te ná téé cùu téé-a núu ní cáháⁿ-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnàha-güedë.

5

*Hⁿ téé yîhi ñàha espíritú cundîhi yucu ñávăha
(Mt. 8:28-34; Lc. 8:26-39)*

1 Te ní sáá Jësús ndîhi cue téé xîca cuu ndîhi-gá ndàa ingá xio yuhu làgúná yucu cue téé ñúú Gàdará.

2 Te òré ní quene-gá xití bàrcú te ìⁿ téé yîhi ñàha espíritú cundîhi yucu ñávăha ní quee-dé núú yîndûxi ndîyi cuáháⁿ-dé núú-gă.

3 Te mee-ni núú yîndûxi ndîyi-áⁿ quidé vèhe-dé, te cuèi dàcutu ñàha-güedé cadená xii-dé dico ñá túú tnàhí ndàcu-güedé núú-dë.

4 Te ío titní xito ní dácútú-güedë cadená sáhá-dë ndîhi ndaha-dé dico ní dándává-ni-dë, te ní xóo dacàchi-gá-dé nchaa cadená-áⁿ, te ñá túú tnàhí ni ndàcu-güedé núú-dë.

5 Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núú yîndûxi ndîyi dico càna saa nahi-ni-dé, te ío ní xóo dànícuehé-dé méé-dë ndîhi yúu.

⁶ Te òré ní xini-dé Jèsús te xinu-dé ní sáháⁿ núú-gă, te ní ngüíñí xítí-dě,

⁷ te espíritú yíhí ñaha xii-dé-áⁿ nǐ quide-xi níhi ní cáháⁿ-dé, te xăhaⁿ-dě xii-gá:

—¿Ná cuendá véxi yòhó Jèsús Déhe Dútú Ndiòxí sàdí-n ìchi-í? Te càháⁿ ndàhú-í núú Ndiòxí yuhu nǔú-n sǎ vǎ dándòho ñaha-n xii-í —càchí-dé xăhaⁿ-dě xii-gá.

⁸ Te ducaⁿ nǐ cáháⁿ-dé cuendá sá Jèsús ní xáhaⁿ-gă xii espíritú cundìhi yucu ñávăha yíhi ñaha xii-dé-áⁿ sǎ quée ñaha-xi xii-dé.

⁹ Te Jèsús ní xicáⁿ tnúhú-gă núú-dě, te xăhaⁿ-gă:

—¿Nása nàni-n-í? —cachí-gă xăhaⁿ-gă xii-dé.

Te ní xáhaⁿ-dě:

—Vài Sandadú, duha nàni-í chi ío cuéhé-ndí —càchí-dé xăhaⁿ-dě xii-gá.

¹⁰ Te cue espíritú cundìhi yucu ñávăha-áⁿ nǐ cáháⁿ ndàhú-xi núú Jèsús sá vǎ téndàha ñaha-gă xii-xi quíhíⁿ-xi ingá xichi.

¹¹ Te ðiu-ni yatni yucu núú ndécú Jèsús-áⁿ yíhí vài cuchí xixexi-güedi.

¹² Te nchaa cue espíritú-áⁿ nǐ cáháⁿ ndàhú-xi núú-gă, te xăhaⁿ-xi xii-gá:

—Càháⁿ ndàhú-ndí núú-n sǎ dáñá-n quíhu-ndí yiqui cùñú nchaa cùchí-áⁿ —càchí-xi xăhaⁿ-xi xii-gá.

¹³ Te Jèsús ní xáhaⁿ-gă sá cúú quíhu-xi yiqui cùñú-güedi, te xǐnu dàtná úú mǐl-güedi yíhi yucu-áⁿ. Te nchaa espíritú cundìhi yucu ñávăha yíhi ñaha xii téé-áⁿ nǐ quee ñaha-xi xii-dé, te cuánguihu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quée-güedi ndàa núú dèhvá yuhu làgúná-áⁿ, te ní ngauni-hnu-güedi xítí ndute te ní ndihi-güedi ní cáhá.

¹⁴ Te òré ní xini cue téé xito cuchí-áⁿ nàcuáa ní cuu te ní xinu-güedé, te ní sáháⁿ-güedé ní cani-güedé cuendú núú cuè ñáyiu ndècu xítí ñuú, ndihi núú cuè ñáyiu ndècu xítí yucu. Te nchaa ñáyiu ní níhi tnúhu ní xicá-yu cuáháⁿ ndéhě-yu nàcuáa ní cuu.

¹⁵ Te òré ní quexió-yu núú ndécú Jèsús te ní xini-yu téé ní xíhi ñaha cuè espíritú cundìhi yucu ñávăha-áⁿ núcòo-dé núú sáhá Jèsús, te nǐhnu-ná-dé dóo-dě te núcòo-ná-dé

dàtná ìⁿ ñáyiu váha, te ní yùhú-yu òré ní xini ñáhă-yu xii-dé.

¹⁶ Te nchaa ñáyiu ní xini nàcuáa ní cuu ní ndúha téé yíhi ñaha cue espíritú cundìhi yucu ñávăha-áⁿ ní cùu ní cani-yu cuendú núú nchàa ñáyiu ní quexió-áⁿ nàcuáa ní cuu ní ndúha téé-áⁿ ndihi nàcuáa ní cuu cuendá nchaa cùchí-áⁿ.

¹⁷ Te sá dúcáⁿ ni níhi ñáyiu-áⁿ tnúhu nàcuáa ní cuu núu nchaá-yu ní ngüíta-yu càháⁿ ndàhú-yu núú Jèsús sá ná quée-gă yucu ñuú-yu núhú-gă.

¹⁸ Te ní xica-gă cuáháⁿ-gă núú ndécú bàrcú, te òré ndée-gă bàrcú-áⁿ nùhú-gă ní ngüíta téé ní xíhi ñaha cuè espíritú cundìhi yucu ñávăha-áⁿ càháⁿ ndàhú-dé núú-gă nùu vá cundèe iní-gă quíhíⁿ ndihi ñaha-gă xii-dé.

¹⁹ Dico ñá túú ní sàha-gă tnúhu quíhíⁿ ndihi ñaha-gă xii-dé, te ní xáhaⁿ-gă xii-dé:

—Cuanùhú vehe-n, te cani-n cuendú núú cuè ñáyiu sá Yă Ndiòxí ní cundàhú iní ñáhá-gă xii-n, te ío càhnu cuu nchaa sá vǎha ní quide-gă sá cúú-xi-n —càchí-gă xăhaⁿ-gă xii-dé.

²⁰ Te téé-áⁿ nǐ xica-dé cuánuhú-dé, te ní sáháⁿ-dé ndí ùxí ñuú nání Dècápolís, te ní cani-dé cuendú núú nchàa ñáyiu sá ío càhnu cuu nchaa sá vǎha ní quide ñaha Jèsús xii-dé, te nchaá-yu ío ní cuñúhu-yu.

Cuendá déhe yoco té Jàirú ndihi cuendá ìⁿ ñadìhí ní tnándeé dóo Jèsús

(Mt. 9:18-26; Lc. 8:40-56)

²¹ Te Jèsús cuándeé-gă bàrcú, te ní natehndé-gă ndàa ingá xio yuhu làgúná, te ío vài ñáyiu ní tacá núú nǐ quexió-gă-áⁿ, te xíáⁿ ndécú-gă

²² ní quexió ìⁿ téé tàxi tnuní veñúhu núú-gă, te téé-áⁿ nání-dě Jàirú, te ní ngüíñí xítí-dě núú-gă.

²³ Te ní ngüíta-dé càháⁿ ndàhú-dé núú-gă, te xăhaⁿ-dě xii-gá:

—Ío càhú tnàhá déhe yoco-í cùhú-xi, te ndècu-ná-xi sá cùú-xi, te véxi-í càháⁿ ndàhú-í núú-n nùu vá cundèe iní-n quíhíⁿ-ó vèhe-í tendaha-n-xi cuendá ndúha-xi, te cundecu-xi —càchí-dé xăhaⁿ-dě xii-gá.

²⁴ Te Jèsús ní xica-gă cuáháⁿ-gă ndihi téé-áⁿ, te ío vài ñáyiu nchìcúⁿ ñáhá xii-gă

cuáháⁿ, te dàdehnde ñaha-ná-yu xii-gá ni cùu.

²⁵ Te tnuú nchaa ñáyiú-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuíá sá cùhú-aⁿ ngòyo ñaha níñí xii-aⁿ.

²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndihí nchaa sá ndécú ndihí-aⁿ ní nadico-aⁿ cuendá ní níhí-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ dico ni ìⁿ-yu ñá túú ní ndàcú-yu ndúha-aⁿ, chi da uuⁿ-gá tá cùu cahú-aⁿ cuáháⁿ.

²⁷ Te òré ní níhí-aⁿ tnúhu cuendá Jèsús, te ní xica-aⁿ cuáháⁿ-aⁿ núú ndécú-gá. Te òré ní quexio-aⁿ núú ndécú-gá te ní sáháⁿ ndehe yatni-aⁿ ndàa sátá-gá ní tnándeé-aⁿ dóo-gá.

²⁸ Te ducaⁿ ní quide-aⁿ chi ní sani iní-aⁿ sá nùu ndacu-aⁿ tnándeé-aⁿ cuèdìcò luha yuhu dóo Jèsús te ndúha-aⁿ ní sani iní-aⁿ.

²⁹ Te òré ducaⁿ ní quide-aⁿ te ñá túú-gá ní ngòyo ñaha-gá níñí xii-aⁿ, te òré-áⁿ ní cutnùní iní-aⁿ sá ní ndúha-aⁿ cuéhé tnàhá-aⁿ.

³⁰ Te Jèsús ní cutnùní iní-gá sá ìⁿ ñáyiú ní ndúha sá cuendá-gá, núu ní nchócótó-gá ndàa sátá-gá te ní xicáⁿ tnúhú-gá núu nchaa ñáyiú nchìcúⁿ ñáhá xii-gá, te xàhaⁿ-gá xií-yu:

—¿Ndèdacàa-ndo ní tnándeé ñáhá xii-í? —càchí-gá xàhaⁿ-gá xií-yu.

³¹ Te cue téé xica cuu ndihí-gá ní xàhaⁿ-güedé xii-gá:

—Mèstrú, ndèhe-n sá váí ñáyiú nchìcúⁿ ñáhá xii-n, te texio texio dàdehnde ñáhá-yu xii-n te xicáⁿ tnúhú-gá-n yòo ní tnándeé ñáhá xii-n —cachí-güedé xàhaⁿ-güedé xii-gá.

³² Te Jèsús ní xíndéhé vâha-gá xio xio dîñi-gá nùu ndèdacàa ñáyiú ní tnándeé ñáhá xii-gá.

³³ Te sá dúcáⁿ ní cutnùní iní ñadhí-áⁿ nàcuáa ní cuu, núu yùhú yùhú-aⁿ ní sáháⁿ-aⁿ ní ngüíñí xítí-áⁿ núu Jèsús, te ní xàhaⁿ ndáa-aⁿ xii-gá nàcuáa ndùu cuendá-aⁿ.

³⁴ Te Jèsús ní xàhaⁿ-gá xii-aⁿ:

—Yòhó ñaha cùhú ní cùu, ní sándáa iní ñáhá-n xii-í, núu ní ndúha-n, te vitna cuanùhú te vá ndihú-gá iní-n, chi vá dúcáⁿ-gá ndoho-n —càchí-gá xàhaⁿ-gá xii-aⁿ.

³⁵ Te càháⁿ dúcáⁿ-ní Jèsús ní sáa cue téé xìnu cuechí vehe té Jàirú téé tàxi tnuní veñúhu-áⁿ, te xàhaⁿ-güedé xii-dé:

—Sa ní xihí déhe-n, vá chíchìuⁿ-gá-n Mèstrú —càchí-güedé xàhaⁿ-güedé xii-dé.

³⁶ Dico Jèsús ñá túú ní quide cuendá-gá nàcuáa ndùu tnúhu ní cáháⁿ cue téé-áⁿ, te ní xàhaⁿ-gá xii téé tàxi tnuní veñúhu-áⁿ:

—Ñá túú nă cani iní-n, quíndáa iní ñáhá-ní-n xii-í —càchí-gá xàhaⁿ-gá xii-dé.

³⁷ Te Jèsús vá yòo-gá ní cuíní-gá canchicúⁿ ñáhá xii-gá quíhíⁿ, chi té Pèlú-ni, ndihí té Jàcobó-ni, ndihí ñaní-ni-dé té Juáa cuáháⁿ ndihí ñaha-gá xii-güedé.

³⁸ Te òré ní quexio-gá ndihí-güedé vehe téé tàxi tnuní veñúhu-áⁿ, te ní xini-gá sá ío vai ñáyiú xíndecu, te súúni dùsaⁿ quidé-yu te níhi xicáháⁿ-yu te xíndahí-yu.

³⁹ Te òré cuánguihu-gá xítí vehe, te ní xàhaⁿ-gá xií-yu:

—¿Ná cuendá ndéé dúcáⁿ ío dusaⁿ quide-ndo, te ndàhyú-ndó? Te xichí-a ñá túú ní xihí-xi chi dícó xidí-xi —càchí-gá xàhaⁿ-gá xií-yu.

⁴⁰ Te ní sácú ndeé ñáhă-yu xii-gá sá dúcáⁿ ní cáháⁿ-gá, chi sá cúú-xí mèé-yu chi ní xihí ndisa xichí-áⁿ. Te òré-áⁿ ní queñuhu-gá nchaa-yu quehé, te cuánguihu-gá núu cándodo yiquí cuñú xichí ní xihí-áⁿ. Te ndèca-gá tátá xichí ní xihí-áⁿ ndihí náná-xi cuánguihu, te tnàhá cue téé úní ndihí-gá-áⁿ cuánguihu ndihí-gá.

⁴¹ Te ní tñi-gá ndaha xichí ní xihí-áⁿ, te ní xàhaⁿ-gá:

—Tàlita, cúmí —càchí-gá xàhaⁿ-gá.

Te tnúhu-áⁿ quée-xí: Yòhó xichí cuéchí yuhú càchí-í sá ndácòo-n, duha quèe-xi tnúhu-áⁿ.

⁴² Te òré-ni-áⁿ ní ndoto xichí cuéchí-áⁿ ní ndacóo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaa ñáyiú sá dúcáⁿ ní dándótó ñaha Jesús xii-xi.

⁴³ Te Jèsús ní cáháⁿ víhí-gá dóho tátá-xi ndihí náná-xi sá vá yòo ìⁿ cúñáhá-yu sá ní dándótó ñaha-gá xii-xi. Te sátá dúcáⁿ te ní xàhaⁿ-gá xií-yu sá cuñàhá-yu xii-xi sá cáxí-xí.

6

*Jèsús ndécú-gã ñuú Nazàrét
(Mt. 13:53-58; Lc. 4:16-30)*

¹ Te Jèsús ní ndee-gá ñuú núú nĩ dándótó-gã xíhí nĩ xíhí-án, te cuánuhú-gá núú cúú ñùú-gá, te tnahá cue téé xica cuu ndihi-gá cuánuhú ndihi-gá.

² Te ndècu Jesús ñuú-gá ní tnahá nduu ndètátú ñáyíu. Te nduu-án cuãnguìhu-gá xití veñúhu dàcuaha ñaha-gá xií-yu. Te vãi ñáyíu ndèdóho nchaa tnúhu càhá-gá, te xicuñúhu vñí-yu, te xitnàhá-yu:

—¿Ndèé ní sáhán dácúhá tée-a núu ndéé duha váha càhá-dé, nása ní quide-dé nũu ndéé duha ío váha cùtnuní iní-dé, te ndàcu-dé quidé-dé nchaa sá vã yõo tnahí ndàcu cada-i?

³ Te dìcò carpintèrú cúú-dé, dìcò déhe tá Màriá cúú-dé, te ñaní-dé cúú tã Jàcobó, ndihi té Chèé, ndihi té Jùdás, ndihi té Xímú, te ñuú-ni cue cúha-dé cúú ñáyíu ndècu ndihi-o ñuú-a —càchí-yu xitnàhá-yu.

Te ñá túú ní cuíní-gá-yu càhá ndihi váha ñàhá-yu xii-gá.

⁴ Te Jèsús ní xáha-gã xií-yu:

—Te núu ñn tée càhá tnúhu Yá Ndiõxí ná nàsáá-dé ñuú-dé dacuàha-dé ñáyíu tnúhu-gá, te nchaa ñáyíu ñuú-dé-án, ndihi nchaa ñáyíu ndècu ndihi-dé vehe-dé, ndihi nchaa ñáyíu cùu ndi mee-dé ñá túú nèhé-yu sá yíñùhu núú-dé, dico cue ñáyíu nchaa dava-gá ñuú chi nèhé-yu sá yíñùhu núú-dé —càchí-gá xãha-gã xii-yu.

⁵ Te ñá túú ní quide tátna Jèsús vãi ñáyíu cuendá sá ñà túú ní sàndáá iní ñáhã-yu xii-gá, dico ní quide tátna-gá ñn úú ñáyíu cùhú ní sàndáá iní ñáhã xii-gá. Te ní tendaha ñàha-ni-gá xií-yu te ní ndúha-yu.

⁶ Te ío ní cuñúhu-gá sá dúcá ñà túú ní cuíní-yu quindáá iní ñáhã-yu xii-gá. Te sátá dúcá te ní xica-gá cuáhã-gá nchaa dava-gá ñuú lìhli càa yatni xía cuendá dacuàha-gá ñáyíu tnúhu-gá.

Jèsús táuchìu-gá quíhí cue téé xica cuu ndihi-gá càhá-güedé tnúhu Yá Ndiõxí núú ñáyíu

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndihi-gá, te ní sãñaha-gã xii-güedé

tnúhu ndee iní cundecu ndihi-güedé cuendá queñuhu-güedé nchaa espíritú cündihí yucu ñávãha yíhí ñaha xii ñáyíu. Te ní xáha-gã xii-güedé sá ndi ndúú ndi ndúú-güedé quíhí-güedé càhá-güedé tnúhu Yá Ndiõxí núú ñáyíu.

⁸⁻⁹ Te cùmání-gã caca-güedé quíhí-güedé, te ní xáha-gã xii-güedé:

—Vã cànehè-ndo ñunu cuhu ndachiu-ndo, te ní vã cànehè-ndo sá caxí-ndó, te ní vã cànehè-ndo díhú, chi ñn caa-ni tàtnu canehe-ndo, te chàú yíhí-ní-ndó-án xía-ni quíhí-ndo, te vã cànehè-gá-ndó ñngá ichi dóó-ndó chi ñuú-ni dóó ñíhí-ndó-án xía tnahí-ni cuíhnu-ndo te ñá túú tnahí-gá ná canehe-ndo —càchí-gá xãha-gã xii-güedé.

¹⁰ Te xáha túcu-gá:

—Te òré ná sàá-ndó ñn ñuú, te ío ñáyíu càhá ñáhã-yu xii-ndo vèhé-yu, te xía-ni cundecu-ndo ndéé ná sàá nduu ndèe-ndo ñuú-án.

¹¹ Te núu ío dava ñuú ñá túú cuíní-yu càhá ndihi ñaha vãha-yu xii-ndo, te ní ñà túú cuíní-yu cundedóho-yu tnúhu càhá-ndó, te ndee-ni-ndo ñuú-án te naquidi-ndo ticáchúhmá nĩ tñi sáhã-ndó cuendá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yá Ndiõxí cuéchi nchaa ñáyíu, te cue ñáyíu ñuú na càda ñaha xii-ndo-án ío-gá ndohó-yu dàvã-án dàcúxí dàtná ndoho cue ñáyíu ñuú Sòdomá ndihi cue ñáyíu ñuú Gòmorra —càchí-gá xãha-gã xii-güedé.

¹² Te cue téé-án nĩ xica-güedé cuáhã-güedé te ní ngúita-güedé dacuàha-güedé cue ñáyíu tnúhu Yá Ndiõxí, te xáha-güedé xií-yu:

—Chí dándixi túu iní sá ñà túú quide váha-ndo ndècu-ndo, te dañã-ndo nchaa ichi cuehé ichi duha ndècu-ndo. —càchí-güedé xáha-güedé xií-yu.

¹³ Te vãi espíritú cündihí yucu ñávãha yíhí ñaha xii ñáyíu ta queñuhu-güedé yiqui cùñú-yu cuáhã, te vãi tucu ñáyíu cùhú tá quide tátna-güedé cuáhã chíhí ñàha-güedé acití xií-yu te ndúha-yu.

Nàcuáa ní cuu ní xíhí té Juáá téé dàcuandute ñaha xii ñáyíu

(Mt. 14:1-12; Lc. 9:7-9)

14 Te nchaa xichi ní níhí ñáyiú tnúhu nchaa nàcuáa quide Jesús, te tñahá té Hèrodés tée yíndaha ñaha xii ñáyiú ní níhí-dě tnúhu nchaa nàcuáa quide-gá, te ní cachí-dé:

—Té Juàá tée ní xóo dacuàndute ñaha xii ñáyiú ní ndoto núu dácáⁿ ndácú-dě quide-dě nchaa sá vǎ yǎo tñahí ndàcu cada —duha ní cachí-dé.

15 Te dava ñáyiú cǎchí-yu sá tǎ Èliás tée ní xóo cǎháⁿ tnúhu Yá Ndiǒxí ndéé sanaha ní nasáá-dé.

Te davá-yu cǎchí-yu sá cúú-gǎ dàtná ìⁿ tée ní xóo cǎháⁿ tnúhu Yá Ndiǒxí ndéé sanaha.

16 Te té Hèrodés ní níhí-dě tnúhu nchaa nàcuáa cǎháⁿ-yu, te ní cachí-dé:

—Diu té Juàá tée ní táúchíuⁿ-í ní xehndé-güedé díquí-xi ní ndoto —cǎchí-dé.

17-18 Te duha ní cuu cútnàhá ní sahani té Hèrodés té Juàá, chí dàvǎ-áⁿ ñí naqueheⁿ té Hèrodés-áⁿ ìⁿ ñaha nàni Herodiás ndécá-dě, te ñaha-áⁿ sá ní cǎndeca ñaha ñaní-dé té Lìpé. Te té Juàá ní xáhaⁿ-dě xii té Hèrodés sá ñà túú ní quide váha-dé sá dúcáⁿ ñí naqueheⁿ-dé ñaha ní cǎndeca ñaní-dé, núu sá cuendá ñaha-áⁿ ñí táúchíuⁿ tǎ Hèrodés ní tñi-güedé té Juàá ní chíhi ñaha-güedé vecaá, te ní dácútú ñaha-güedé xii-dé, te ducaⁿ ñí quide-dé cuendá sá ndécá ñaha-dé xii-aⁿ.

19 Te ñaha nàni Herodiás ndécá tǎ Hèrodés-áⁿ ìo ní cuu úhú iní-aⁿ té Juàá, te ní cuiní-aⁿ cahni-aⁿ-dé, dico ñá túú ní níhí-aⁿ nàcuáa cada-aⁿ.

20 Te mee tǎ Hèrodés chí ní cutnùní ndáá iní-dé sá tǎ Juàá cúú-dě ìⁿ tée quide mee-ni sá vǎha, te quide ndáá-dé núú Yá Ndiǒxí, te ní xóo yùhú ñahá-dě núu xíáⁿ ñá túú ní dàña-dé ná cada ñaha ñaha ndeca-dé-áⁿ xii té Juàá. Te té Hèrodés-áⁿ ìo ní cudíⁿ iní-dé ní xíndedóho-dé nchaa tnúhu ní xáhaⁿ té Juàá xii-dé, dico ñá túú ní sàni iní-dé duuⁿ duuⁿ tñi-dé tnúhu-áⁿ.

21 Te ìⁿ nduu ní xóo vico vehe té Hèrodés ní quide cǎhmu-dé nduu ní cacu-dé. Te nduu-áⁿ ñí níhí ñaha nàni Herodiás-áⁿ nàcuáa cada-aⁿ cuendá cuú té Juàá. Te nduu-áⁿ ní cǎháⁿ té Hèrodés nchaa cue tée cùchiuⁿ, ndíhi nchaa cue tée tàxi tñuní ñahá xii cue sandadú, ndíhi nchaa cue tée cuica ndècu distritú Galileá cuendá cudini ndíhi ñaha-dé xii-güedé nduu-áⁿ.

22 Te ndècu ìⁿ déhe yoco ñaha nani Herodiás-áⁿ, te xíchí-áⁿ ñí quíhu-xi vehe núú cúú vico-áⁿ ñí xita saha-xi mèi oré yíhí tǎ Hèrodés mèsá ndíhi nchaa cue tée ní cǎháⁿ-dé, te ío ní cudíⁿ iní-dé ndíhi nchaa cue tée-áⁿ nàcuáa ní xita xíchí-áⁿ. Te té Hèrodés ní xáhaⁿ-dě xii-xi:

—Cácaⁿ núu-í núu ná cuiní-n te taxi-í —cǎchí-dé xáhaⁿ-dě xii-xi.

23 Te ní cacunehe-dé ndéé Yá Ndiǒxí nàcuáa cutnùní iní xíchí-áⁿ sá ndáá cuñaha-dě núu ná cúú sá ná cǎcáⁿ-xii núú-dě cuèi ndéé cuádava nchaa sá ndécú ndíhi-dé, te núu na cǎcáⁿ-xi.

24 Te sá dúcáⁿ ñí xáhaⁿ-dě xii-xi núu ní quee-xi quehé ní xáhaⁿ-xi xii náná-xi:

—Nǎá, ìⁿ ná cúú sǎ cǎcáⁿ-í núú tǎ Hèrodés? —cǎchí-xi xáhaⁿ-xi xii-aⁿ.

Te náná-xi-áⁿ ñí xáhaⁿ-aⁿ xii-xi:

—Cuáháⁿ cácaⁿ-n díquí tǎ Juàá tée dàcuandute ñaha xii ñáyiú —cǎchí-aⁿ xáhaⁿ-aⁿ.

25 Te ndíhi-ni cuándihu xíchí-áⁿ xití vehe núú yíhí tǎ Hèrodés-áⁿ, te xáhaⁿ-xi xii-dé:

—Cuiní-í sá mèi nduu vitna quehndé-n díquí tǎ Juàá tée dàcuandute ñaha xii ñáyiú te taxi-n, dico na cùhuⁿ ìⁿ xití cóhó taxi-n —cǎchí-xi xáhaⁿ-xi xii-dé.

26 Te té Hèrodés ní ngúita-dé ndíhú víhí iní-dé sá dúcáⁿ ñí xáhaⁿ-xi xii-dé, dico ñá túú ní cùyí-dé cuñaha-dě xii-xi sá vǎ cúú cuñaha-dě sá xicáⁿ-xi, chí cuendá sá núú nchaa ñáyiú ní xáhaⁿ-dě sá cúú cuñaha-dě núu ná cúú sá ná cǎcáⁿ-xi, te ní cacunehe-dé ndéé Yá Ndiǒxí nàcuáa cutnùní iní-xi sá ndáá cuñaha-dě sá ná cǎcáⁿ-xi núú-dé.

27 Te té Hèrodés-áⁿ ndíhi-ni ní xáhaⁿ-dě xii ìⁿ sandadú sá quíhíⁿ-dé quehndé-dé díquí tǎ Juàá.

28 Te sandadú-áⁿ ñí xica-dé cuáháⁿ-dé vecaá núú yíhí tǎ Juàá-áⁿ, te ní quexìo-dé te ní xehndé-ni-dé díquí tǎ Juàá, te ní chíhi-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ ñí nacuáha-xi náná-xi.

29 Te òré ní níhí nchaa cue tée ní xica cuu ndíhi ndíi Juàá-áⁿ tnúhu sá dúcáⁿ ñí sahani ñaha-güedé xii ndíi, te ní sáháⁿ-güedé ní ndocani-güedé yíquí cùnú ndíi te ní chindúxi-güedé.

*Jèsús dácàxi-gá úhúⁿ mĩl cue téé te d̃iⁿ
ñáyiú d̃ihí ndihí landú*

(Mt. 14:13-21; Lc. 9:10-17; Jn. 6:1-14)

³⁰ Te nchaá cue téé ní táúchíúⁿ Jèsús cuáháⁿ cáháⁿ tnúhu Yá Ndiöxí núú ñáyiú ní ndexìo-güedé núú-gã te ní ngüíta-güedé nácàni tnúhu-güedé nchaá nàcuáa ní quide-güedé ndihí nchaá nàcuáa ní dánèhé ñáhá-güedé xií-yu.

³¹ Te Jèsús ní xáhaⁿ-gã xii-güedé:

—Chí nèhé ná quèhíⁿ-ó ìⁿ xichi núú ñà túú ñáyiú ndetatú-ó —càchí-gá xãhaⁿ-gã xii-güedé.

Te ducaⁿ ñi xáhaⁿ-gã xii-güedé, chí ío cuéhé ñáyiú cuáháⁿ véxi-yu cùú-yu núú ndécú-gã. Te ní ñà ñihí-gá nása cada-gá caxi-gá ndihí cue téé xica cuu ndihí-gá.

³² Te Jèsús cuánguee-gá bàrcú ndihí mee-ni cuè téé ní táúchíúⁿ-gã cáháⁿ tnúhu-gá, te cuáháⁿ-gã ndihí-güedé ìⁿ xichi núú ñà túú ñáyiú ndècu.

³³ Dico vâi ñáyiú ní cutnùnì iní-yu sá díú-gã ñúhú bàrcú-áⁿ cuáháⁿ ndihí cue téé xica cuu ndihí-gá, te nchaá ñuú cáá yàtni xiáⁿ ñi quee ñáyiú xixinú-yu cuáháⁿ núú ñi quidè-yu cuendá quexìo Jèsús, te sa ndècú-yu xiáⁿ ñi quexìo-gá.

³⁴ Te òré ní queene Jèsús xití bàrcú, te ní xiní-gá cuéhé víhí ñáyiú xixúcu núú ñi quexìo-gá-áⁿ, te ní cundàhú iní ñáhá-gã xií-yu chí ndècú-yu dàtná x̃ndecu cue mbéé cue quitì ñà túú tòli-xi, te ío vâi núú sã ñi ngüíta-gá ní dácuahá ñàha-gá xií-yu.

³⁵ Te sáta tá cuàa cuáháⁿ te ní sáháⁿ cue téé xica cuu ndihí Jèsús núú-gã, te xãhaⁿ-güedé xii-gá:

—Sa ní cuaa te ñà túú ñáyiú ndècu yatni iha.

³⁶ Váha-gá dandàca nchaá ñáyiú-a chí na quèhíⁿ-yu nchaá vehe càa xití yucu-a, ndihí nchaá ñuú cáá nchàa yatni iha cuaáⁿ-yu sá cáxi-yu —càchí-güedé xãhaⁿ-güedé xii-gá.

³⁷ Te Jèsús ní xáhaⁿ-gã:

—Mee-ndo chí cuãñaha sã ná càxí-yu —càchí-gá xãhaⁿ-gã xii-güedé.

Te xáhaⁿ-güedé xii-gá:

—¿Te nása cada-ndí, chí x̃ini ñuhu-xi datná úú ciendú díhúⁿ denàriú cuendá cuaaⁿ-ndí sá cáxi-yu? —càchí-güedé xãhaⁿ-güedé xii-gá.

³⁸ Te Jèsús ní xáhaⁿ-gã xii-güedé:

—Chí cuáháⁿ cundehe-ndo núu ná daha pàá ndécú ndihí-ndo te cachí tnúhu-ndo —càchí-gá xãhaⁿ-gã xii-güedé.

Te ní sáháⁿ ndéhé-güedé núu ná daha pàá ndécú, te ní xáhaⁿ-güedé xii-gá:

—Úhúⁿ duha-ná pàá ndihí úú-ñà chácá ndécú —càchí-güedé xãhaⁿ-güedé xii-gá.

³⁹ Te Jèsús ní xáhaⁿ-gã xii nchaá ñáyiú sá ná ñihí tnáhã-yu cuu titní xichí-yu, te ngóo-yu nchaá núú cùhú cuíí càa xiáⁿ.

⁴⁰ Te nchaá-yu ní ngóo-yu, te dava xichí-yu ní ngóo ìⁿ ciendú-yu, te dava xichí-yu ní ngóo údico úxí-yu.

⁴¹ Te sáta ñi ndihí-yu ní ngóo, te ní queheⁿ Jèsús ndi ùhúⁿ pàá ndi úú chácá-ãⁿ, te ní ndacoto-gá andiu te ní ndacáⁿ táhú-gã núú Yá Ndiöxí, te dàtnùnì ní táhú cuèchi-gá pàá-áⁿ te ní sãñaha-gã xii cue téé xica cuu ndihí-gá ní dácãhñu-güedé nchaá ñáyiú-áⁿ ñi xexí-yu. Te d̃iu-ni ducaⁿ ñi quide tucu-gá úú chácá-ãⁿ.

⁴² Te nchaá-yu ní xexí-yu ní ndahá xití-yu.

⁴³ Te sáta ñi túhú cóhõ-yu te ní nadatacá-güedé nchaá sá ñi quendóo, te ní chítú ùxúú tnáhá tídihi mee-ni sã ñi quendóo núú ùhúⁿ-ni pàá, ndihí núú ùú-ni chácá.

⁴⁴ Te nchaá ñáyiú ní xexi-áⁿ chí x̃inu úhúⁿ mĩl mee-ni cuè téé chí d̃iu-ni cue téé-áⁿ ñi quíúndehu, te d̃iⁿ ñáyiú d̃ihí ndihí cue landú.

Jèsús xicá-gã núú ndute

(Mt. 14:22-27; Jn. 6:16-21)

⁴⁵ Te òré-ni-áⁿ ñi xáhaⁿ Jèsús xii cue téé xica cuu ndihí-gá sá quèe-güedé bàrcú codonùu-güedé quèhíⁿ-güedé ìⁿ ñuú nánì Bètsaidá cáá ndàa ingá xio yuhu làgúná núú ndécú-güedé-áⁿ, te mee-gã quendóo-gá cada ndee iní tnáhá-gã ndihí cue ñáyiú.

⁴⁶ Te sáta ñi yáha ní quide ndee iní tnáhá-gã ndihí-yu, te ní xica-gá cuáháⁿ-gã ìⁿ t̃indúú cáá yàtni xiáⁿ cuendá cáháⁿ ndihí-gá Yá Ndiöxí.

⁴⁷ Te òré sa ní cundiquiⁿ te bàrcú sá ñúhú cuè téé xica cuu ndihí-gá sa cuáháⁿ-xi ndéé cuádava xití làgúná-áⁿ, te mee-gã ndécú-gã ìⁿ núú t̃indúú.

48 Te túu ndèhe-gá sá sũúni ndòho-güedé tá dàcaca-güedé bàrcú-án cuáhán, chi cuendá ndàa nacuáa cuáhán-xi-án duha véxi táchí te nàtúndaha-xi. Te ingá nduu-án tàcuíhndá-gá sa ní cuyatni vii-nã Jèsús bàrcú ñúhú-güedé-án, dico núú ndute tá xica-gá cuáhán te luha-ná te yáha ñaha-gã xii-güedé ní cùu.

49-50 Te òré ní xiní ñáhá cuè téé ñùhu barcú-án xii-gá te ní yùhú-güedé ní cana saa-güedé, chi ní sani iní-güedé sá ñn almá cúú-gã. Te ní xáha-gã xii-güedé:

—¡Ñí cunduu-ndo, vá yùhú-ndó, chi yùhú cúú-í! —càchí-gá xáha-gã xii-güedé.

51 Te Jèsús cuánguee-gá xití bàrcú ñúhú-güedé-án, te sáta cuánguee-gá te òré-ni ní ngüíñí táchí, te ní cuñúhu vihi-güedé.

52 Te ducaⁿ chi cue téé-án ñà túú ní cùtnuní iní-güedé nása quide-gá, chi ñá túú ní cùtnuní váha iní-güedé nacuáa ndùu sá ñi quide-gá òré ní nadacàyá-gá pàá, chi ío ñi díquí-güedé.

Jèsús quidé tãtña-gá ñáyiu cùhú ñuú Genesàrét
(Mt. 14:34-36)

53 Te ní yáha-güedé ndihi-gá ndàa ingá xio yuhu làgúná, te ní sáa-güedé ndihi-gá yucu cue téé ñuú Genesàrét. Te yàcáⁿ ní dácútú ndèé-güedé bàrcú-güedé yuhu làgúná.

54 Te òré ní quene Jèsús ndihi cue téé xica cuu ndihi-gá xití bàrcú, te nchaa ñáyiu xíndecu-án ñi cutnùní iní-yu sá díú-gã.

55 Te ñáyiu-án ndihi-ni ní sáhán-yu nchaa núú xíndecu cue ñáyiu cùhú, te cue ñáyiu cùhú-án ñi quée-yu xito nchido ñahá-yu cuáhán ndi tnahá ñn ñn xichi núú ñihí-yu tnúhu quèxio Jèsús.

56 Te nchaa ñuú náhnú ndihi nchaa ñuú líhli núú cuáhán Jèsús, ducaⁿ xíndecá-yu nchaa ñáyiu cùhú cuáhán xití ñuú sàcáⁿ ñáhã-yu núú-gã cuendá cada tátña ñaha-gã xii-yu. Te díu-ni ducaⁿ xíquidé-yu nchaa dava-gá xichi núú cuáhán-gá núú xíndecu cue ñáyiu, te càháⁿ ndàhú-yu núú-gã sá ná dáñá-gã tnándeé cue ñáyiu cùhú-án cuèdicó luha yuhu dõó-gã cuendá ndúha-yu. Te nchaa ñáyiu cùhú ní tnándeé yuhu dõó-gã ní ndúha-yu.

7

Cuendá nchaa sá quidé-xi ngündecu cuéchi ñáyiu

(Mt. 15:1-20)

1 Te ñuú Jerusalén ní quee cue téé dàcuaha ñaha xii ñáyiu nchaa tnúhu ní chídó tnùní ndíi Moisés, te ní quexio-güedé núú ndécú Jèsús, te tnáhá cue téé cùu fariséú ní quexio ndihi-güedé.

2 Te cue téé-án ñi xiní-güedé sá dàva cue téé xica cuu ndihi Jèsús ñá túú ndàha-güedé dàtná ndáhá mèe cue téé cùu fariséú-án òré caxi-güedé. Te xiãⁿ núu cue téé ní quexio-án ñi cáháⁿ cuèhé-güedé cuendá cue téé xica cuu ndihi-gá.

3 Te ducaⁿ chi nchaa cue téé cùu fariséú-án ndihi nchaa ñáyiu isràél nchicúⁿ nihnú-yu quidé-yu dàtná ní xóo cada nchaa cue ñaní tnáhã-yu ní xíndecu ndéé sanaha, chi nchaa ñáyiu-án và caxí-yu te núu và ndáhã-yu dàtná ní xóo ndaha nchaa cue ñaní tnáhã-yu ní xíndecu ndéé sanaha-án.

4 Te ñáyiu-án ndi tnahá òré cuáhán-yu núú yáhu te nàsáa-yu, te ndáhã-yu nacuáa sàni iní-yu ndùvétú iní Yã Ndiõxí, te núu và dúcáⁿ càdá-yu te và caxí-yu. Te tnáhá náquète-yu vàsú sá sácùhuⁿ sá xihí-yu, ndihi lítu, ndihi cóhó càá, ndihi càamá. Te nchaa xéhé náquète-yu nacuáa sàni iní-yu ndùvétú iní Yã Ndiõxí. Te ío-gá titní sá ñi xóo cada nchaa ñáyiu ní xíndecu ndéé sanaha-án nchicúⁿ nihnú-yu quidé-yu.

5 Te cue téé cùu fariséú-án, ndihi cue téé dàcuaha ñaha xii ñáyiu nchaa tnúhu ní chídó tnùní ndíi Moisés-án ñi xáha-güedé xii Jèsús:

—¿Ná cuendá cue téé xica cuu ndihi-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-i? —càchí-güedé xáha-güedé xii-gá.

6 Te Jèsús ní xáha-gã xii-güedé:

—Nchòhó cúú-ndó cuè téé ío dándahú mée-xí chi càchí-ndó sã ío quide ndáá-ndó te ñá ndáá sá quidé ndáá-ndó. Te ní quee ndáá-xi nacuáa ní chídó tnùní ndíi Chàjá téé ní xóo cáháⁿ tnúhu Yã Ndiõxí ndéé sanaha núú tütú-gá núú càháⁿ-xi nacuáa ní cáháⁿ-gã cuendá-ndó, te duha ní cachí-gá: Ñáyiu-a càchí-yu sá ío càhnu cuu-í, dico dicó-ni yuhu càháⁿ-yu,

chi ñá túú ñùhu iní ñáhă-yu xii-í.

⁷ Te àúⁿ nă cuu chiñuhu ñahá-yu xii-í, chi ñá túú vèdana ndèé nándîhi-xi,

chi cue ñáyiu-a dàcuahá-yu cue tnàha ñáyíu-yu nàcuáa cundecú-yu, dico mee-ni tnùhu sá nǐcahu iní cue ñáyiu ñuyíu-a càháⁿ-yu.

Duha ní chídó tnùní ndíi Chàíá núú tùtú Yă Ndiôxí nàcuáa ní cáháⁿ-gá cuendá-ndó.

⁸ Te nchòhó ní dáñá-ndó nàcuáa ní cachí Yă Ndiôxí cada-ndo, te nchìcúⁿ nihnu-ndo quide-ndo nacuáa nícahu iní cue ñáyiu ñuyíu-a, chi nàquete-ni-ndo lítu, te nàquete-ni-ndo vasú sácũhuⁿ sá xíhí-ndó nàtava-ndo nacuáa ní xóo cada ñáyiu-áⁿ nǐ xóo naqueté-yu nchaa xíăⁿ, te nándi-gá nchaa núú sǎ quidé-ndó —càchí Jèsús xăhaⁿ-gă xii-güedé.

⁹ Te ní xăhaⁿ tùcu-gá xii-güedé:

—Te nchòhó, ñá túú cuení-ndó càda-ndo nacuáa cuení Yă Ndiôxí, chi mee-ni nàcuáa ní cachí cue téé ní xíndecu ndéé sanaha nchìcúⁿ nihnu-ndo quide-ndo.

¹⁰ Te ndíi Moisés ní cachí ndíi sá ncháá ñáyiu canehé-yu sá yíñùhu núú tătă-yu ndîhi núú nănă-yu. Te nchaa ñáyiu na càháⁿ úhú cuendá tătă-yu àdi cuendá nănă-yu te cahni ñaha-güedé xii-yu ní cachí ndíi.

¹¹ Te nchòhó càchí-ndó sǎ nùu ìⁿ téé na cũñaha-dé xii tătă-dé ndîhi nănă-dé sá sǎ ní sani iní-dé cuañaha-dé xii-yu cùu-xi Corbán, te ñá túú-gă xíni ñùhu-xi sá cuañaha-dé xii-yu, te tnùhu Còrbán-áⁿ quée-xí: Sá cúú cuendá Yă Ndiôxí.

¹² Te sá dúcáⁿ ná càháⁿ ìⁿ téé-áⁿ te nchòhó chindèe tnùhu-ndo-dé cuendá sá vǎ chindèe-gá-dé tătă-dé ndîhi nănă-dé.

¹³ Te ducaⁿ quide-ndo chi ní dáquée tîhú-ndó nàcuáa ní cachí Yă Ndiôxí cada-ndo, te mee-ni nàcuáa ta quide cue téé ñuyíu-a véxi nchìcúⁿ nihnu-ndo quide-ndo, te ñu-ni ducaⁿ ta sǎnu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xăhaⁿ-gă xii-güedé.

¹⁴ Te Jèsús ní xăhaⁿ tùcu-gá xii cue ñáyiu xíndecu-áⁿ:

—Chí táquixi ndehe iha, te cundedóho vǎha-ndo tnùhu na càháⁿ-í-a te ío vǎha cuǎha-ndo cuendá.

¹⁵ Nchaa sá xéxi-ndó chi ñá túú nǎ quidé-xí iní-ndó, dico nchaa sá cuèhé sá

dúhá sàni iní-ndó quide-ndo, nchaa xíăⁿ quidé-xí ndècu cuéchi-ndo.

¹⁶ Te nchaa nchòhó ñáyiu ndèdóho nchaa tnùhu càháⁿ-í-a ío vǎha chí cuǎha cuendá —càchí-gá xăhaⁿ-gă xii-yu.

¹⁷ Te Jèsús ní dándóo-gá nchaa ñáyiu núú xíxúcu-yu-áⁿ te cuándihu-gá xití vehe. Te cue téé xíca cuu ndîhi-gá ní xícáⁿ tnúhú-güedé núú-gă nùu nása quèe-xi cuendú ní caní-gá núú ñáyiu-áⁿ.

¹⁸ Te ní xăhaⁿ-gă xii-güedé:

—¿Te náa tnàhá nchòhó ñá túú ní tècú tnùní-ndó cuendú ní caní-í núú ñáyiu-áⁿ? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu.

¹⁹ Chi ñá díú iní-yu cuánguee-xi chí cuánguee ndáá-xi xití-yu, te nàyáha ñaha-xi xii-yu —càchí-gá xăhaⁿ-gă xii-güedé.

Te sá dúcáⁿ ní cáháⁿ-gá te ní dátũu-gá sá cúú càxi-o nchaa núú sá cúú càxi-o.

²⁰ Te ní xăhaⁿ tùcu-gá xii-güedé:

—Nchaa sá cuèhé sá dúhá quide ñáyiu xíăⁿ cácu nihnu-xi iní-yu, te nchaa xíăⁿ quidé-xí ndècu cuéchi-yu.

²¹ Te iní-yu-áⁿ cácu nihnu nchaa sá cuèhé sá dúhá, chí sàni cuèhé sání dùha iní-yu. Te cue téé càháⁿ ndîhi-güedé ñadîhí te ñá díú ñadîhí-güedé cúu-yu, te ñu-ni ducaⁿ quide cue ñáyiu dîhí càháⁿ ndîhí-yu téé te ñá díú yíi-yu cùu-güedé. Te sǎhní-yu cue tnàha ñáyíu-yu, te mee-ni ìchi díi iní cúdí iní-yu cundecú-yu.

²² Te dùhu ndachiuⁿ tnahá-yu, te xihó-yu cundecu ndîhí-yu sá ndécú ndîhi tnaha ñáyíu-yu, te ío quide úhú iní-yu sá cúú-xí tnàha ñáyíu-yu, te ío dándahú tnáhă-yu, te mee-ni nchaa sá cuèhé sá dúhá cùdí iní-yu quidé-yu, te ío cuédú iní-yu, te ío yití yùhú-yu, te ío quide cahnú-yu mèe-yu, te quidé-yu nándi-gá sá ñá túú tàú-yu cadá-yu.

²³ Te nchaa sá cuèhé sá dúhá-áⁿ cácu nihnu-xi iní-yu, te nchaa xíăⁿ quidé-xí ndècu cuéchi-yu, te ñá túú cùu-xi sá vǎha sá cúú-xí iní-yu.

*Íⁿ ñadîhí véxi ñuú xícá nǐ sándáá iní-aⁿ
Jèsús
(Mt. 15:21-28)*

24 Te ní xica Jèsús cuáháⁿ-gá ndéé yucu cue téé ñúú Tírú, ndihí yucu cue téé ñúú Sidón. Te òré ní quexìo-gá xiáⁿ te cuánguihu-gá ìⁿ vehe te xiáⁿ cundecu-gá, te cuiní-gá sá vǎ quèní ñáyiú sá xiáⁿ ndécú-gǎ ní cùu, dico dai ní níhǐ-yu tnúhu.

25 Te ìⁿ ñadìhí ndécú ìⁿ déhe yoco-aⁿ, te yìhí ñaha espíritú cùndìhí yucu ñávǎha xii-xi, te ñaha-áⁿ ìo ndìhí ní níhí-aⁿ tnúhu sá ní quexìo Jesús xiáⁿ núu ní sáháⁿ-aⁿ núú ndécú-gǎ, te ní ngüíñí xítí-áⁿ núú-gǎ.

26 Te ní ngüíta-aⁿ càháⁿ ndàhú-aⁿ núú-gǎ, te xǎhaⁿ-aⁿ sǎ núu vá cùndèe iní-gá queñuhu-gá espíritú cùndìhí yucu ñávǎha yìhí ñaha xii déhe-aⁿ. Dico ñá díú ñaha israél cúú-áⁿ chí ñaha ñúú Sirofèniciá cúú-áⁿ te tnúhu griégú cúú tñuhu-aⁿ.

27 Te xiáⁿ núu ní xáhaⁿ Jèsús xii-aⁿ:

—Daña na càxi tnaa nchaa landú chítú xítí-güexi, te dàtnùnì caxi cue iná, chí ñá túú ndùu váha-xi queheⁿ-o sǎ xéxí làndú te cuáha-o iná —càchí-gá xǎhaⁿ-gǎ xii-aⁿ.

28 Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chí nàdatacá-güedi sá ngóyó yùhu cóhó làndú —càchí-aⁿ xǎhaⁿ-aⁿ xii-gá.

29 Te Jèsús ní xáhaⁿ-gǎ xii-aⁿ:

—Ío váha ní càháⁿ-n, te cuanùhú te ñá túú-gǎ ná cani iní-n, chí sa ní quee espíritú cùndìhí yucu ñávǎha yìhí ñaha xii déhe-n —càchí-gá xǎhaⁿ-gǎ xii-aⁿ.

30 Te ñaha-áⁿ ní nasáa-aⁿ vehe-aⁿ te càa déhe-aⁿ núú camá, dico ñá túú-gǎ espíritú cùndìhí yucu ñávǎha yìhí ñaha xii-xi chí sa ní quee ñaha-xi.

Jèsús quidé tǎtna-gá ìⁿ téé ñá cúú càháⁿ váha te doho-dě

31 Te Jèsús ní ndee-gá yucu cue téé ñúú Tírú te ní yáha-gá yucu cue téé ñúú Sidón, ndihí yucu ndi ùxí ñúú nání Dècápolís, te ní sáa-gá ndéé yuhu làgúná distritú Galileá.

32 Te xiáⁿ ndécú-gǎ ní quexìo ñáyiú ndéé núú-gǎ ndécǎ-yu ìⁿ téé ñá cúú càháⁿ váha-dé te doho-dě. Te càháⁿ ndàhú-yu núú-gǎ sá ná tëndaha ñaha-gá xii-dé cuèndá ndúha-dé.

33 Te Jèsús ní queñuhu ñaha-gǎ xii-dé tnuú-yu, te ndèca ñaha-gá cuáháⁿ ìⁿ xio, te ní dáquihu-gá díquí ndáhá-gǎ yaú lóho-dé,

te ní dácànù-gá díí-gá díquí ndáhá-gǎ, te ní tendaha-gǎ yàa-dé.

34 Te ní ndacoto-gá andiu te ní sánuu iní-gá, te ní càháⁿ-gá tnúhu mee-gǎ, te xǎhaⁿ-gǎ:

—ǐĔfatá! —càchí-gá xǎhaⁿ-gǎ xii-dé.

Te tnúhu-áⁿ queé-xi: Nacaáⁿ yòhó lóho.

35 Te òré-ni-áⁿ ní nacaáⁿ lóho-dé, te ní nduu váha yàa-dé, te ní cuu càháⁿ váha-dé.

36 Te Jèsús ní càháⁿ víhí-gǎ dóho ñáyiú ndihí ñaha xii téé ní quide tǎtna-gá-áⁿ sǎ vǎ yòo ìⁿ cùñàhá-yu sá ní quide tǎtna ñaha-gǎ xii-dé, dico uuⁿ-gá ní quidé-yu ní càháⁿ-yu núú ñáyiú sá ní quide tǎtna-gá téé-áⁿ.

37 Te nchaá-yu ío ní cuñúhu-yu, te ní xítñàhá-yu:

—Váha vìhí quide-dé, chí nchaa-ni ndàcu-dé quidé-dě, chí quide tǎtna-ni-dé ñáyiú doho, te quide tǎtna-ni-dé ñáyiú ñihí —càchí-yu xítñàhá-yu.

8

Jèsús dácàxi-gá cúmí mǐl ñáyiú (Mt. 15:32-39)

1 Te ìⁿ nduu tucu ío cuéhé ñáyiú ní tacá núú ndécú Jèsús, te ñá túú tñàhí sá cǎxǐ-yu. Te ní cana-gá cue téé xica cuu ndihí-gá, te ní xáhaⁿ-gǎ xii-güedé:

2 —Yúhú, cùndahú iní-í nchaa ñáyiú-a chí sa ní cuu úní nduu ndècu ndihí ñahá-yu xii-o ìha, te ñá túú tñàhí ná sá cǎxǐ-yu.

3 Te núu na nàtendaha-í-yu núhú tñámǎ-yu vehé-yu, te cuneé-yu docó ichi, chí davá-yu ío xica ndécú-yu —càchí-gá xǎhaⁿ-gǎ xii-güedé.

4 Te ní xáhaⁿ-güedé xii-gá:

—¿Te ndéé níhí-ó sǎ cuǎñaha-o càxi nchaa ñáyiú-a, te iha ñá túú ná ìo chí cùu-xi xítí yucu-í? —càchí-güedé xǎhaⁿ-güedé xii-gá.

5 Te Jèsús ní xicáⁿ tñuhú-gǎ núú-güedé, te xǎhaⁿ-gǎ:

—¿Ná daha-gá pàá ndécú ndihí-ndo-í? —cachí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Ndècu ndihí-ndí úsá-gá tñàhá —càchí-güedé xǎhaⁿ-güedé xii-gá.

6 Te Jèsús ní xáhaⁿ-gǎ xii nchaa ñáyiú sá ngòo-yu nchaá-yu, te ní ngóo-yu, te ní queheⁿ-gá ndi ùsá pàá-áⁿ, te ní ndacáⁿ

táhú-gă núú Yă Ndiöxí. Te dătnùní ní táhú cuèchi-gă te ní sáñaha-gă xii cue téé xica cuu ndihi-gă ní dăcăhñu-güedé nchaa ñăyiu-án.

7 Te ndècu ndihi-güedé ìⁿ úú chácá lĩhli, te diu-ni ducaⁿ ñi quide-gă ní ndacáⁿ táhú-gă núú Yă Ndiöxí. Te dătnùní ní táúchíúⁿ-gă ní dăcăhñu ñaha-güedé xií-yu.

8 Te nchaá-yu ní xexí-yu ní ndahá xití-yu. Te sátá ñi túhú cóhō-yu te ní nadatácá-güedé nchaa sá ñi quendóo, te ní chítú úsá tñahá tídihi mee-ni sá ñi quendóo-án.

9 Te núú ncháá ñăyiu ní xexi-án xĩnu dătná cúmí mĩl-yu. Te sátá ñi yáha ní dácáxí ñaha Jesús xií-yu te ní dándácá ñaha-gă.

10 Te dătnùní cuánguee-gă bàrcú ndihi cue téé xica cuu ndihi-gă cuáhán-gă ndihi-güedé yucu cue téé ñuú Dalmànutá.

Cue téé cùu fariséú xăhaⁿ-güedé xii Jèsús cada-gă ìⁿ sá vă yōo tñahí ndàcu cada (Mt. 16:1-4; Lc. 12:54-56)

11 Te núú ñi quexìo Jesús xiáⁿ ñi sáá cue téé cùu fariséú, te ní ngüíta-güedé nándi tñuhu xáhaⁿ-güedé xii-gă xító ndèé ñáhá-güedé. Te xăhaⁿ-güedé sá ná cádá-gă ìⁿ sá vă yōo tñahí ndàcu cada cundehe-güedé nàcuáa cutnùní iní-güedé ñuú ndáá sá Yă Ndiöxí ní tendaha ñaha-gă xii-gă véxi-gă ñuyíú-a.

12 Te ní sánuu iní-gă te ní xáhaⁿ-gă xii-güedé:

—Nchaa nchòhó ñáyiu ndècu ñuyíú-a cuení-ndó càda-í ìⁿ sá vă yōo tñahí ndàcu cada nacuáa cutnùní iní-ndó ñuú ndáá sá Yă Ndiöxí chindèe ñaha-gă xii-í. Dico na càchí tñuhu ndáá-í xii-ndo sá vă càdà-í sá cuení-ndó —càchí-gă xăhaⁿ-gă xii-güedé.

13 Te ní dándōo-gă ñáyiu xĩndecu-án, te cuánde-gă bàrcú ndihi cue téé xica cuu ndihi-gă te cuáhán-gă ndihi-güedé ndàa ìngá xio yuhu làgúná.

Nàcuáa quide cue téé cùu fariséú (Mt. 16:5-12)

14 Te ní cunaa-güedé canehe-güedé sá caxí-güedé quíhíⁿ, te ìⁿndi-ni paá ndécú xití bàrcú-án ñi naníhí-güedé.

15 Te Jèsús ní cáhán-gă dóho-güedé, te xăhaⁿ-gă xii-güedé:

—Na càchí tñuhu-í xii-ndo sá ìo quihi iní-ndó cùndecu-ndo te vă cádá cuendá tñahí-ndo lèvadurá cue téé cùu fariséú, ndihi levadurá cue téé cùndihi té Hèrodés —càchí-gă xăhaⁿ-gă xii-güedé.

16 Te ní ngüíta-güedé xĩtñaha-güedé:

—Cuendá sá ñà túú ní cãnehe-o pàa quixi núu xiáⁿ duha càhán-gă —càchí-güedé xĩtñaha-güedé.

17 Te Jèsús ní cutnùní iní-gă nàcuáa ndùu tñuhu xĩtñaha-güedé, núu ní xáhaⁿ-gă xii-güedé:

—¿Ná cuendá da sá ñà túú ní cãnehe-ndo pàa quixi càhán-ndó? Te ñá díú cuendá pàa-án ní cáhán-í, te dicó-ni sá mée-ndó ñà túú quide cuendá váha-ndo nàcuáa ndùu tñuhu càhán-í, te ni ñà tècú tñùní-ndó chí ìo ñi díquí-ndó.

18 Te cuéi ndèhe-ndo dico ñá túú cùtnuní iní-ndó nă cúú nchaa sá quide-í, te cuéi ndèdóho-ndo nchaa tñuhu càhán-í dico ñá cùtnuní iní-ndó năsa ndùu-xi, te ni ñà ndácú iní-ndó nchaa sá tá quide-í véxi.

19 Te chí dándàcu iní cùtnahá ní táhú cuèchi-í úhúⁿ-ni pàa te ní xexi úhúⁿ mĩl mee-ni cuè téé chí diu-ni cue téé-án ñi quíundehu. Te chí càchí tñuhu ná daha tídihi ní chítú mee-ni sá ñi quendóo òré ní nadatácá-ndó —càchí-gă xăhaⁿ-gă xii-güedé.

Te ní xáhaⁿ-güedé xii-gă:

—Úxúú tñahá tídihi ní chítú mee-ni sá ñi quendóo —càchí-güedé xăhaⁿ-güedé xii-gă.

Te xăhaⁿ tucu-gă:

20 —Te cùtnahá ní táhú cuèchi tucu-í úsá tñahá pàa ní xexi cúmí mĩl ñáyiu, te chí càchí tñuhu ná daha tucu tídihi ní chítú mee-ni sá ñi quendóo —càchí-gă xăhaⁿ-gă xii-güedé.

Te ní xáhaⁿ-güedé xii-gă:

—Úsá tñahá tídihi ní chítú mee-ni sá ñi quendóo —càchí-güedé xăhaⁿ-güedé xii-gă.

21 Te Jèsús ní xáhaⁿ tucu-gă xii-güedé:

—Vitna, ¿te sa ní tecú tñùní-ndó tñuhu ní cáhán-í ãⁿ ñáhá? —càchí-gă xăhaⁿ-gă xii-güedé.

Jèsús quidé tătna-gă ìⁿ téé cuáá ñuú Bètsaidá

22 Te Jèsús ní sáá-gă ndihi cue téé xica cuu ndihi-gă ñuú Bètsaidá. Te ñuú-án ndécú-gă ní quexìo ñáyiu núú-gă tánèhé-yu ìⁿ téé cuáá, te càhán ndàhú-yu núú-gă ñuú

vá cùndèe iní-gá tendaha ñàha-gá xii-dé cuèndá ndúha núú-dě.

²³ Te Jèsús ní tñi-gá ndaha tée cuàá-án, te ní queñuhu ñaha-gã tnuú-yu, te ndèca ñaha-gá cuáhán ìⁿ xio yuhu ñúú. Te yàcán ní dácánù-gá díí-gá núú-dě te ní tendaha ñàha-gá xii-dé, te dàtnùnì ní xícán tñúhú-gã núú-dě, te xãhaⁿ-gã:

—¿Cùtnunì núú-n-ãⁿ? —càchí-gá xãhaⁿ-gã xii-dé.

²⁴ Te tée cuàá-án ñí ndonehe núú-dě, te xãhaⁿ-dë xii-gá:

—Cùtnunì núú-í ndéhè-í nchaa cue té-ãⁿ, dico dà ndáa yutnu cuì ndáa-güedé te xica-güedé —càchí-dé xãhaⁿ-dë xii-gá.

²⁵ Te Jèsús ní tendaha tùcu-gá núú-dě te ní cuu ní ndacoto váha-gá-dé, te òré-án ñí ndúha núú-dě. Te nchaandi túhú sá ndéhé-dé ní cutnùnì váha núú-dé nándi cù nchaa xíãⁿ.

²⁶ Te ní xáhaⁿ Jèsús xii-dé:

—Vitna te núhú-n, dico ndáa ichi vehe-n núhú-n te ñá díú dà xití ñúú quíhíⁿ-n, te vá yõo ìⁿ cùñaha-n sã yùhú ní quide tátna-í núú-n ñí ndúha —càchí-gá xãhaⁿ-gã xii-dé.

Té Pèlú xãhaⁿ-dë xii Jèsús sá díú-gã cúú-gã Crìstú

(Mt. 16:13-20; Lc. 9:18-21)

²⁷ Te Jèsús ní xica-gá cuáhán-gá ndihì cue tée xica cuu ndihì-gá nchaa ñúú líhli càa ñúú Cèsareá Filipú, te òré ñúhú-gã ndihì-güedé ichi te ní xícán tñúhú-gã núú-güedé, te xãhaⁿ-gã xii-güedé:

—Chí càchí tñúhu nása càhán ñáyi cuèndá-í. ¿Yoo cùu-í càchí-yu-va? —càchí-gá xãhaⁿ-gã xii-güedé.

²⁸ Te ní xáhaⁿ-güedé xii-gá:

—Davá-yu càchí-yu sá cúú-n ndi Juàá téé ní xóo dacuàndute ñaha xii ñáyi, te davá-yu càchí-yu sá cúú-n tã Èliás, te dava tucú-yu càchí-yu sá cúú-n ìⁿ téé ní xóo càhán tñúhu Yá Ndiõxí ndéé sanaha, duha càchí-yu —càchí-güedé xãhaⁿ-güedé xii-gá.

²⁹ Te ní xícán tñúhú tùcu-gá núú-güedé, te xãhaⁿ-gã xii-güedé:

—Te nchòhó, ¿yoo sàni iní-ndó cùu-í-i? —càchí-gá xãhaⁿ-gã xii-güedé.

Te té Pèlú ní xáhaⁿ-dë xii-gá:

—Yòhó cúú-n Crìstú Yaá ní tendaha Yã Ndiõxí véxi ñuyíú-a —càchí-dé xãhaⁿ-dë xii-gá.

³⁰ Te Jèsús ní càhán-gá dóho-güedé, te xãhaⁿ-gã:

—Vá yõo ìⁿ cùñaha-ndo yòo cuu-í —càchí-gá xãhaⁿ-gã xii-güedé.

Jèsús càhán-gá sá càhni ñàha-güedé xii-gá (Mt. 16:21-28; Lc. 9:22-27)

³¹ Te Jèsús ní ngüíta-gá xitnùhu-gá cue téé xica cuu ndihì-gá nàcuáa yáha-gá, te xãhaⁿ-gã xii-güedé:

—Yúhú Téé cùu ñaní tñáhá-ndó nchaa-ndo chi ío ndoho-í, chi daquèe tihú ñáhá nchaa cue téé cùu sacuéhé núú ñáyi isráel, ndihì cue dútú cùnùu, ndihì cue téé dàcuaha ñaha xii ñáyi nchaa tñúhu ní chídó tñunì ní chídó tñunì ndi Moisés, nchaa cue téé-án dàquee tihú ñáhá-güedé xii-í. Te sáa nduu te cahni ñaha-güedé xii-í, dico nduu únì sá cùu-í te ndoto-í —càchí-gá xãhaⁿ-gã xii-güedé.

³² Te ducaⁿ ñí càhán Jèsús núú cuè téé xica cuu ndihì-gá nàcuáa tecú tñunì váha-güedé tñúhu càhán-gá. Te té Pèlú ní cana ñaha-dë xii-gá ìⁿ xio, te ní ngüíta-dé ténàá ñáhá-dë xii-gá ní cùu.

³³ Dico Jèsús ndihì-ni ní nchócuñhu-gá ní ndacoto-gá núú nchaa-güedé chi ndaa sáta-gã xíndecu-güedé, te ní ngüíta-gá ténàá-gá té Pèlú, te xãhaⁿ-gã xii-dé:

—¿Xocuñí yòhó núú-í-a, chi dàtná càhán yucu ñávaha càhán-n! Chi ñá túú sàni iní-ò dàtná sàni iní Yã Ndiõxí, chi ìⁿ-ni sàni iní-ò ndihì dava-gá cue ñáyi ndècu ñuyíú-a —càchí-gá xãhaⁿ-gã xii-dé.

³⁴ Te Jèsús ní cana-gá nchaa cue téé xica cuu ndihì-gá, ndihì nchaa ñáyi xíndecu-án, te ní xáhaⁿ-gã:

—Nchaa ñáyi cuíni chitnahá ñáhá xii-í, te xini ñuhu-xi vá cáda-gã-yu sá sàni iní méè-yu, te ío cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

³⁵ Te nchaa ñáyi cuíni sá ñà túú tñahí ná yáha cundecu ñuyíú-a cuíta niñnú-yu, dico nchaa ñáyi ñá túú tñahí yùhú cuèi nándi sá ná yáha-yu cundecú-yu ñuyíú-a sá cuèndá-í, ndihì sá cuèndá tñúhu-í, te ñáyi-án naníhí tàhú-yu.

36 Te cuèi nchaandi tùhú sá ìó ñuyíú-a na nihí ñáyiú cundecu ndihí-yu, dico núu ñu nchaa xiáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xiáⁿ.

37 Te ni ñⁿ sá ìó ñuyíú-a vá chindèe-xi ñáyiú cuèndá naníhí tàhú-yu.

38 Te nchaa ñáyiú na cùcahaⁿ núu-xi cáháⁿ váha cuèndá-í, ndihí cuèndá tnúhu-í núu nchàa ñáyiú dàquee tihú ñáhá xii Yá Ndiöxí, ñáyiú xíndecu ichi cuèhé ichi duha, te tnàhá yúhú Tée cùu ñaní tnáhá-yu nchaá-yu cucahaⁿ núu-í núu-yu òré ná quixi tucu-í ndihí cue espíritú xínú cuèchi núu Tàtà-í Dútú Ndiöxí. Te mee-gã cada cutnùní iní nchaa ñáyiú sá yùhú ío càhnu cuu-í.

9

1 Te na càchí tnúhu ndáá-í xii-ndo sá ìó dava nchòhó ñáyiú xíndecu iha vitna vá cùu-ni-ndo, chi cundecu-ni-ndo ndèe quiní-ndó sá nduu ndíhu ndaha ñàha Yá Ndiöxí xii ñáyiú, te dàvá-áⁿ quiní-ndó sá ndácú-gã quidé-gã nchaandi tùhú sá váha —càchí-gã xàhaⁿ-gã xii cue tée xica cuu ndihí-gã ndihí cue ñáyiú-áⁿ.

*Jèsús ní nadama dóo-gã ndihí núu-gã
(Mt. 17:1-13; Lc. 9:28-36)*

2 Te núu ñnú nduu sá dúcáⁿ ñí cáháⁿ Jèsús te ní xica-gã cuásaá-gã ñⁿ yucu dùcúⁿ, te ndèca-gã té Pèlú, ndihí té Jàcobó, ndihí té Juáa cuásaá, te úní tnàhí-ni cue tée-áⁿ ndécá-gã cuásaá. Te yucu-áⁿ ndécú-gã ní nadama núu-gã,

3 te ní nadama dóo-gã. Te dóo-gã-áⁿ sùúní ñí nduu cuixíⁿ quiyí te tásaⁿ, te ni ñⁿ ñáyiú ñuyíú-a ñá túú ndàcú-yu naqueté-yu ñⁿ dóo nduu cuixíⁿ dàtná ní nduu dóo-gã.

4 Te ní xiní-güedé té Moisés ndihí té Èliás nútní-güedé ndihí-gã ndátnúhu ndihí ñàha-güedé xii-gã.

5 Te té Pèlú ní xàhaⁿ-dè xii Jèsús:

—Mèstrú, ñváha ní cuu sá ndécú-ó ìha vitna! Te na dàcaa-ndí úní tnàhá vehe tnuvixíⁿ, te ñⁿ cuu cuèndá-n te ñⁿ cuu cuèndá té Moisés te ñⁿ cuu cuèndá té Èliás —càchí-dé xàhaⁿ-dè xii-gã.

6 Te ducaⁿ ñí cáháⁿ-dé chi ío ní yùhú-güedé, te cuèndá-ni ní cuu yáchí-dé

ní cáháⁿ-dé, te ni mèe-dé ñá túú ní cùtnuní iní-dé nása ndùu tnúhu ní cáháⁿ-dé.

7 Te òré-áⁿ ñí quexìo ñⁿ vícò núú ndécú-güedé ndihí Jèsús ní dádàhu ñàha-xi xii-güedé ndihí-gã, te xití vícò-áⁿ ñí cáháⁿ Yá Ndiöxí ní tecú dóho-güedé, te xàhaⁿ-gã xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tnúhu càháⁿ-dé —càchí-gã xàhaⁿ-gã xii-güedé.

8 Te òré ní quide cuèndá-güedé, te ñá túú-gã ní xiní-güedé cue tée úú-áⁿ chi mee-nã Jèsús ndécú.

9 Te òré cuánuu ndihí ñàha-gã xii-güedé yucu-áⁿ, te ní cáháⁿ-gã dóho-güedé, te xàhaⁿ-gã:

—Vá yòo ñⁿ cùñaha-ndo nchàa sá ñí xiní-ndó núú ñí sáá-ó-á, te cuu cáháⁿ-ndó dico ndéé ná yàha ndoto yúhú Tée cùu ñaní tnáhá-ndó nchàa-ndo sá cùu-í —càchí-gã xàhaⁿ-gã xii-güedé.

10 Núu xiáⁿ cue tée-áⁿ ñí xúhuⁿ nahi-ñí iní-güedé nchaa sá ñí xiní-güedé núú ñí sáháⁿ-güedé ndihí Jèsús te ñá túú tnàhí ni cáháⁿ-güedé, dico ní ndúcú tnúhu núu tnáhá-güedé ná cuèndá ducaⁿ ñí cáháⁿ-gã sá ndéé ná yàha ndoto-gã sá cùu-gã te dàtnùní cáháⁿ-güedé nàcuáa ndùu nchaa sá ñí xiní-güedé.

11 Te ní xicáⁿ tnúhú-güedé núú Jèsús, te xàhaⁿ-güedé xii-gã:

—¿Cuíní-ndí cachí tnúhu-n ñá cuèndá càchí cue tée dàcuaha ñàha xii ñáyiú nchaa tnúhu ní chídó tnùní ndí Moisés sá ñíhna-gã té Èliás ndixi-dé te dàtnùní quixi Yá tendaha Yá Ndiöxí quixi ñuyíú-a? —càchí-güedé xàhaⁿ-güedé xii-gã.

12 Te Jèsús ní xàhaⁿ-gã:

—Ndáá sá códo núu ñⁿ tée quixi-dé te cada-dé dàtná ní quide té Èliás, te tée-áⁿ cada ndáá-dé nchaa nàcuáa cùu. Dico núu tütú Yá Ndiöxí cáháⁿ-xi cuèndá yúhú Tée cùu ñaní tnáhá-ndó nchàa-ndo sá ìo ndoho-í, te daquée tihú ñáhá ñáyiú xii-í.

13 Te na càchí tnúhu-í xii-ndo vitna sá sá ní quixi ñⁿ tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñúhu núu-dè, te ní quide ñáhá-yu xii-dé nchaa nàcuáa ní quixi iní mée-yu. Te núu tütú Yá Ndiöxí sa ndéé tnuní nchaa nàcuáa

yáha-dé, te nchaa xíáⁿ sa ní quide ñaha ñáyiú xii-dé —càchí-gá xáhaⁿ-gã xii-güedé.

Jèsús quidé tãtna-gá ñⁿ tée cuechi yìhi ñaha espíritú cùndìhi yucu ñávãha (Mt. 17:14-21; Lc. 9:37-43)

14 Te Jèsús ní ndexìo-gá ndìhi cue tée úní-áⁿ nùú xíndecu dava-gá cue tée xica cuu ndìhi-gá, te vãi vihi ñáyiú ndècu núú ndécú-güedé-áⁿ, te tnàhá cue tée dàcuaha ñaha xii-yu nchaa tnúhu ní chídó tnùní ndí Moisés xíndecu, te cue tée-áⁿ nãndi tnúhu xáhaⁿ-güedé xii cue tée xica cuu ndìhi Jesús.

15 Te òré ní xiní-yu ní ndexìo-gá, te ncháa-yu ío ní cuñúhu-yu, te xínú-yu ní sáháⁿ ní cáháⁿ ndìhi ñàhá-yu xii-gá.

16 Te ní xícáⁿ tnúhú-gã núú cuè tée xica cuu ndìhi-gá nùu ná tnúhu ndàtnúhu-güedé ndìhi cue tée-áⁿ.

17 Te ñⁿ ñáyiú xíndecu xíáⁿ ñí xáhãⁿ-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cùndìhi yucu ñávãha xii-dé, te diu xíáⁿ ní quide ní cuu ñìhí-dé.

18 Te ío ndòho-dé chi súuní ndèni ní cuu ngòtní ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nùhu-dé, te ndàda ruúⁿ ñáhá-xí xii-dé. Te sa ní xáhaⁿ-í xii cue tée xica cuu ndìhi-n sá queñùhu-güedé espíritú cùndìhi yucu ñávãha yìhi ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-áⁿ xáhãⁿ-yu xii-gá.

19 Te Jèsús ní xáhaⁿ-gã:

—¡Nchaa nchòhó ñáyiú ndècu ñuyíú-a ío sàá iní-ndó, chi ñá túú cuíní-ndó quíndáá iní-ndó Yã Ndiòxí, te ní cuu vãi nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gã cada-ndo-i? Te chí cándèca tée cùhú-áⁿ táquixi iha —cachí-gá xáhaⁿ-gã xii-yu.

20 Te ñáyiú ndìhi ñaha xii tée yìhi ñaha espíritú cùndìhi yucu ñávãha-áⁿ ndécá ñàhá-yu xii-dé cuáháⁿ ndéé núú Jèsús, te òré ní xiní ñáhá espíritú cùndìhi yucu ñávãha-áⁿ xii-gá, te ní ngüíta-ni-xi sàhni yìhí ñáhá tùcu-xi xii-dé, te ní dándùá ñáhá-xí

xii-dé, te ní ngüíta-dé xíchí ñùhu-dé, te quène tíñú yuhu-dé.

21 Te Jèsús ní xícáⁿ tnúhú-gã núú tãtá-dé, te xáhaⁿ-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáhaⁿ-gã xii-dé.

Te tée-áⁿ ñí xáhaⁿ-dè xii-gá:

—Ndéé cùtnàhá cúú lìhli-dé ní ngüíta espíritú cùndìhi yucu ñávãha duha quide ñaha-xi xii-dé.

22 Te ní cùtìtní xito dàngaunihnu ñaha-xi xii-dé núú ñùhú, te ní cutìtní tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dé, te cundàhú iní ñáhá-n xii-ndí chindee ñaha-n —cachí-dé xáhaⁿ-dè xii-gá.

23 Te Jèsús ní xáhaⁿ-gã:

—Te ná cuendá càchí-n nùu ndacu-í cada tãtna-í déhe-n, chi nchaa ñáyiú na quíndáá iní ñáhá xii-í te ñìhí-yu sá ná càcáⁿ-yu núú-í —càchí-gá xáhaⁿ-gã xii-dé.

24 Te tãtá tée cuechi-áⁿ ñìhi ní cáháⁿ-dè xáhaⁿ-dè xii-gá:

—Sàndáá iní ñáhá-í xii-n, dico chindee ñaha xii-í cuendá ná quíndáá iní ñáhá-gã-í xii-n —càchí-dé xáhaⁿ-dè xii-gá.

25 Te Jèsús ndéhé-gã sá ío vãi ñáyiú ta tàcá núú ndécú-gã-áⁿ. Te ní tenáá-gá espíritú cùndìhi yucu ñávãha-áⁿ, te xáhaⁿ-gã xii-xi:

—Yòhó espíritú cùndìhi yucu ñávãha, ní quide ñìhí-n ñí quide doho-n tée-a, dico vitna yúhú càchí-í sá queé-n yìqui cuñú-dé te vá ndìhu-gá-n —càchí-gá xáhaⁿ-gã xii espíritú cùndìhi yucu ñávãha-áⁿ.

26 Te espíritú cùndìhi yucu ñávãha-áⁿ ñí dácáná sàa ñaha-xi xii tée-áⁿ, te ní sahni yìhí ñáhá tùcu-xi xii-dé, te dàtnùní ní quee ñaha-xi xii-dé cuáháⁿ-xi, dico tée-áⁿ chí dacàa-ni ndíyì càa-dé cátùu-dé. Te nchaa ñáyiú xíndecu xíáⁿ càchí-yu sá ñí xíhí-dé ní cùu.

27 Te Jèsús ní tñi-gá ndaha-dé ní ndo-cani ñaha-gã xii-dé, te ní ndacóo-dé ní nucúnutnì-dé.

28 Te Jèsús cuándihu-gá xití vehe ndìhi cue tée xica cuu ndìhi-gá, te òré ndéhé-güedé ñá túú-gã ñáyiú, te ní xícáⁿ tnúhú-güedé núú-gã, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cündìhi yucu ñávãha yìhi ñaha xii téé-ãⁿ — càchí-güedé xãhaⁿ-güedé xii-gá.

²⁹ Te Jèsús ní xãhaⁿ-gã xii-güedé:

—Na càchí tnúhu-í xii-ndo sã nõu òrè cuiní-ndó queñuhu-ndo espíritú cündìhi yucu ñávãha yìhi ñaha xii ñáyiu dàtná cúú espíritú cündìhi-xi yìhi ñaha xii téé-ãⁿ ní cùu ñã, te xini ñuhu-xi sá ïo cáháⁿ ndihí-ndo Yã Ndiõxí te ñá túú tnàhí ná caxi-ndo cáháⁿ ndihí-ndo-gã, te ducaⁿ te ndacu-ndo queñuhu-ndo espíritú cündìhi yucu ñávãha yìhi ñaha xii ñáyiu —càchí-gá xãhaⁿ-gã xii-güedé.

Jèsús cáháⁿ tucu-gá sá cáhni ñaha-güedé xii-gá

(Mt. 17:22-23; Lc. 9:43-45)

³⁰ Te Jèsús ní quee-gá núú ndécú-gã-áⁿ ndihí cue téé xica cuu ndihí-gá cuáhãⁿ-gã ndihí-güedé distritú Galileá, te cuiní-gá sá vã quini ñáyiu ndèé ichi cuáhãⁿ-gã.

³¹ Te ducaⁿ ñi sani iní-gá, chi mee-gã sa naha-gá sá ndáá cada-xi nãcuáa xãhaⁿ-gã xii cue téé xica cuu ndihí-gá, te duha xãhaⁿ-gã xii-güedé:

—Yúhú Téé cùu ñani tnáhã-ndó nchãa-ndo sãã ñiⁿ nduu te cuáha cuendá ñáhã-güedé xii-í núú cuè téé cùu úhú iní ñáhã, te cahni ñaha-güedé xii-í, dico nduu úní sá cùú-í te ndoto-í —càchí-gá xãhaⁿ-gã xii-güedé.

³² Dico ñá túú tnàhí ni tècú tnùnì-güedé nása ndùu tnúhu ní cáháⁿ-gã, te ni ñá túú ní cùyi-güedé cácaⁿ tnúhú-güedé núú-gã.

Cue téé ndùcu tnúhu núú tnáhã nõu ndèdacã-güedé ïo-gá cùnùu

(Mt. 18:1-5; Lc. 9:46-48)

³³ Te Jèsús ní quexìo-gá ndihí cue téé xica cuu ndihí-gã ñuú Capèrnaúm, te òrè sa ndècu-gã ñiⁿ vehe te ní xicãⁿ tnúhú-gã núú-güedé, te xãhaⁿ-gã xii-güedé:

—¿Nándi cùu tnúhu ta xitnãha-ndo véxi? — càchí-gá xãhaⁿ-gã xii-güedé.

³⁴ Dico ñá túú tnàhí ni cáháⁿ-güedé cúñaha-güedé xii-gã nõu ná tnúhu xitnãha-güedé òrè ñúhú-güedé ichi. Te ducaⁿ ñi quide-güedé chi cuendá tá ndàtnúhu-güedé nõu ndèdacã-güedé ïo-gá cùnùu.

³⁵ Te Jèsús ní ngóo-gá, te ní xãhaⁿ-gã xii ndi ùxúú cue téé xica cuu ndihí-gá:

—Chí táquixi iha te cundedóho-ndo tnúhu na cáháⁿ-í-a. Te núu ïo dava-ndo cuiní-ndó cùnùu-ndo, te cada-ndo sã cúú-ndó ñáyiu nchicúⁿ cuií-nã, te cunu cuechi-ndo nõú tnãha ñáyiu-ndo —càchí-gá xãhaⁿ-gã xii-güedé.

³⁶ Te Jèsús ní sanutnãⁿ-gã ñiⁿ té líhli cuádava tnuú-güedé, te dàtnùnì ní nguídèhé ñáhã-gã xii-dé, te xãhaⁿ-gã xii-güedé:

³⁷ —Nchaa ñáyiu na quèheⁿ cuendá ñiⁿ té líhli dàtná té líhli-a cuendá sá ñúhú iní ñáhã-yu xii-í ñã, te cada iní-yu sá yùhú ní queheⁿ cuendá-yu. Te nchaa ñáyiu na quèheⁿ cuendá ñáhã xii-í te ñã díú-ní mèe-í ní quèheⁿ cuendá-yu, chi tnáhã Tãtã-í Dútú Ndiõxí Yaa ní tendaha ñaha xii-í véxi-í ñuyúú-a ní queheⁿ cuendá-yu —càchí-gá xãhaⁿ-gã xii-güedé.

Nchaa ñáyiu ñá túú cùu úhú iní ñáhã xii-o te cündìhi ñahã-yu

(Mt. 10:42; Lc. 9:49-50)

³⁸ Te té Juáá ñiu-ni ñiⁿ téé xica cuu ndihí-gã ní xãhaⁿ-dè xii-gá:

—Mèstrú, ní xiní-ndí ñiⁿ téé càcunehe ñaha-dé xii-n, te queñuhu-dé espíritú cündìhi yucu ñávãha yìhi ñaha xii ñáyiu, te nchúhú ñá túú ní dàña-gã-ndí ducaⁿ càda-dé, chi ñá túú xica cuu ndihí ñaha-dé xii-o —càchí-dé xãhaⁿ-dè xii-gá.

³⁹ Te Jèsús ní xãhaⁿ-gã xii-güedé:

—Daña-ndo na càda nahi-dé ní cùu, chi ñá túú ni ñiⁿ ñáyiu ndìhi ndìhi-ni ndacu cáháⁿ cuèhé cuendá-í te núu càcunehe ñahã-yu xii-í, te quidé-yu sã vã yõo tnàhí ndàcu cada.

⁴⁰ Te nchaa ñáyiu ñá túú cùu úhú iní ñáhã xii-o te cündìhi ñahã-yu.

⁴¹ Te na càchí tnúhu-í xii-ndo sã cuè ñáyiu na tàxi ñiⁿ yaxiⁿ ndute coho-ndo cuendá sã cúú-ndó cuè téé xica cuu ndihí-í, te ñáyiu-áⁿ sãã nduu te dacuèi sá nihí-yu sá ndúú tãhú-yu —càchí-gá xãhaⁿ-gã xii-güedé.

Cada cuendá-ó vã cündècu-o ichi cuehé ichi duha

(Mt. 18:6-9; Lc. 17:1-2)

⁴² Te xãhaⁿ tucu Jèsús xii-güedé:

—Te núu ñiⁿ téé na dàcaháⁿ-dé cue ñáyiu sãndáá iní ñáhã xii-í cadã-yu nándi sã cuèhé sã dúhá, te váha-gã sã nõu na dàcutu

ndeé-güedé ñá yúú yǒdó dücúⁿ-dě, te dàquée ñaha-güedě xii-dé xití ndute làmár, te ñá díú sá cündecu-dé ducaⁿ càda-dé.

43 Te núu ñá xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tǎhú-ndó cuèi na cuíta ñá xio ndaha-ndo te ñá díú sá quíhíⁿ-ndó ñihí ní ndúú-ndó núú ùhú núú ndàhú núú dícó sàá ndáhá itá ñuhú ñi caa ñi quíhíⁿ.

44 Chi yàcáⁿ cúu-xí núú ñá túú tñàhí ndàhvá ñuhú, te ío ndoho-ndo cündecu-ndo xíaⁿ ñi caa ñi quíhíⁿ.

45 Te núu ñá xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tǎhú-ndó cuèi na cuíta ñá xio sáhá-ndó, te ñá díú sá quíhíⁿ-ndó ñihí ní ndúú-ndó núú ùhú núú ndàhú núú dícó sàá ndáhá itá ñuhú ñi caa ñi quíhíⁿ.

46 Chi yàcáⁿ ñá túú tñàhí ndàhvá ñuhú, te ío ndoho-ndo cündecu-ndo xíaⁿ ñi caa ñi quíhíⁿ.

47 Te núu ñá xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cündecu-ndo núú ndécú Yá Ndiǒxí táxí tñùní-gá cuèi na cuíta ñá xio tinùu-ndo, te ñá díú sá ndí nduú xio núú-ndó quíhíⁿ-ndó núú ùhú núú ndàhú.

48 Chi yàcáⁿ ñá túú tñàhí ndàhvá ñuhú, te ío ndoho-ndo cündecu-ndo xíaⁿ ñi caa ñi quíhíⁿ.

49 Te dàtná quídé-güedě quiti sàhni-güedé chìhí-güedé cuñú-di ñí te dàquée-güedé núú ñuhú, ducaⁿ sàtnahá-xi ndoho cue ñáyíu chi ío ndohó-yu.

50 Te ñí chi ío váha nándihí-xi, dico núu na ndùu víxiⁿ-xi te ñá túú-gǎ nándihí-xi te ñi ñá túú-gǎ nása cada-o ndùu úhá tucu-xi. Te ío váha cada cuèndá-ndó nàcuáa cundecu-ndo cuèndá cuu-ndo ñáyíu váha, te ducaⁿ te cuu-ndo dàtná ñí sá ñá túú ndùu víxiⁿ, te ío váha cundecu ndihí tñaha-ndo —cachí-gǎ xǎhaⁿ-gǎ xii-güedé.

10

Jèsús càháⁿ-gá cuèndá cue ñáyíu dàña tñaha
(Mt. 19:1-12; Lc. 16:18)

1 Te Jèsús ní xica-gá cuáháⁿ-gá ní yáha-gá yucu distrítú Jùdeá ní téhndé-gá ndàa ingá xio yúte Jòrdán. Te yàcáⁿ ndécú-gǎ ní tacá tucu cuèhé víhí ñáyíu, te ní ngúita-ni tucu-gá dánèhé ñáhá-gǎ xii-yu tñuhu-gá chi ducaⁿ tñàhí quide-gá.

2 Te ní quèxio ñá úú cue tée cùu fariséu núú ndécú Jèsús xito ndèé ñáhá-güedě xii-gá núu nása cunduu tñuhu cáháⁿ-gá, te xǎhaⁿ-güedě xii-gá:

—Véxi-ndí xicáⁿ tñuhú-ndí núú-n núu cuu dañá ñá tée ñadihí-dé ñá ñáhá —càchí-güedé xǎhaⁿ-güedě xii-gá.

3 Te Jèsús ní xáhaⁿ-gǎ xii-güedé:

—Te nchòhó, ñá nása ní cachí ndíi Moisés cada-ndo-i? —càchí-gǎ xǎhaⁿ-gǎ xii-güedé.

4 Te ní xáhaⁿ-güedě xii-gá:

—Ndíi Moisés ní cachí ndíi sá cúu dàña ñá tée ñadihí-dé dícó-ni sá cadúha-dé ñá tutú cuáñaha-dé, te núú tütú-áⁿ codo tñùní sá ñi dáñá ñaha-dé, te ducaⁿ te cuu dañá-dé ñadihí-dé —càchí-güedé xǎhaⁿ-güedě xii-gá.

5 Te Jèsús ní xáhaⁿ-gǎ xii-güedé:

—Te ducaⁿ ñi chídó tñùní ndíi Moisés cada-ndo cuèndá sá ío sàá iní-ndó.

6 Dico Yá Ndiǒxí cútnàhá ní cadúha-gá ñuyíu ndihí nchaa sá ío, chi tée ñadihí ní cadúha-gá.

7 Te xǎⁿ núu nchaa cue tée na ñihí ñadihí-xi, te dñá-ná cada-güedé tǎtá-güedé ndihí náná-güedé, chi mee-ñá ñadihí-güedé cuu cuu ndihí-güedé.

8 Te cue ñáyíu úú-áⁿ ñá túú-gǎ ndí dñá ndí dñá yiqui cuñú cúu-yu, chi cada iní-ndó sá ñá-ná yiqui cùñú cúu-yu.

9 Te xíaⁿ núu ñá túú ndùu váha-xi dañá cuè tée ñadihí-güedé, chi mee Yá Ndiǒxí ní cachí-gá sá cúu úu-yu cundecú-yu ndéé naa ndéé cuu-yu —càchí-gǎ xǎhaⁿ-gǎ xii-güedé.

10 Te òré yíhí Jèsús ndihí cue tée xica cuu ndihí-gá vehe, te ní xicáⁿ tñuhú-güedé núú-gǎ nása ndùu tñuhu ní cáháⁿ-gá cuèndá cue ñáyíu dàña tñaha.

11 Te Jèsús ní xáhaⁿ-gǎ xii-güedé:

—Te núu ñá tée na dàña-dé ñadihí-dé te naqueheⁿ-dé ingá ñadihí, te ío nèhé quídé-dé, te ñá-ni cuèchi cùu-xi ndihí cuèchi

quide tée ndèca ñadihí te càháⁿ ndihí-dé ingá ñadihí.

¹² Te ñu-ni ducaⁿ sätnahá-xi cùu tucu ñáyiu ñáhu te núu na dāñá-yu yí-yu te naquehéⁿ-yu ingá tée, chi ñⁿ-ni cuéchi cùu-xi sá quidě-yu ndihí sá quidé cuè ñáyiu ñáhu ndécú yí-xi, te càháⁿ ndihí-yu ingá tée –càhí-gá xáhaⁿ-gã xii-yu.

Jèsús xicáⁿ táhu-gã núu Yã Ndiõxí cuendá landú

(Mt. 19:13-15; Lc. 18:15-17)

¹³ Te ñⁿ úú ñáyiu ndècá-yu landú líhli cuháⁿ núu Jèsús, chi cuini-yu sá téndaha ñaha-gá xii-güexi. Te cue tée xica cuu ndihí-gá ní nguíta-güedé ténaá ñáhá-güedé xii-yu, te xáhaⁿ-güedé sá vã dúcáⁿ càdá-yu.

¹⁴ Te òré ní xiní-gá sá dúcáⁿ quide-güedé, te ní cudééⁿ-gã núu-güedé, te xáhaⁿ-gã xii-güedé:

–Chí dáñá ná quixi nahi cue landú líhli-áⁿ nùu-í-a te vã càdí-ndó ìchi-güexi, chi dàtná cúu váha iní cue landú líhli-áⁿ ducaⁿ cùu váha iní cue ñáyiu yindaha Yá Ndiõxí.

¹⁵ Te na càhí tñuhu ndáá-í xii-ndo sã nñu vã quindáá iní ñáhá-ndó dàtná quidé cuè landú líhli sãndáá iní ñáhá xii-í, te vã ndíhu ndaha ñaha Yá Ndiõxí xii-ndo –càhí-gá xáhaⁿ-gã xii-güedé.

¹⁶ Te sátá dúcáⁿ ní xáhaⁿ-gã te ní nguídéhé-gá cue landú-áⁿ te ní tendaha ñaha-gá xii-güexi, te ní xicáⁿ táhu-gã núu Yã Ndiõxí cuendá-güexi.

Ñⁿ tée cuica càháⁿ ndihí-dé Jèsús

(Mt. 19:16-30; Lc. 18:18-30)

¹⁷ Te òré sa ñuhu ichi Jèsús caca-gá quíhíⁿ-gá ingá xichi ní cùu ní quexio cunu ñⁿ tée ní nguíñí xiti-dě núu-gã, te xáhaⁿ-dě xii-gá:

–Yòhó Mèstrú, cùu-n tée ío váha iní-xi, te cuini-í nñu vã cündèe iní-n càhí tñuhu-n ñá cúu sã càdá-í cuendá nduu táhu-í cundecu-í ndihí Yá Ndiõxí ní caa ní quíhíⁿ –càhí-dé xáhaⁿ-dě xii-gá.

¹⁸ Te Jèsús ní xáhaⁿ-gã xii-dé:

–¿Te cùnnumí iní-n nàcuáa nduu tñuhu càháⁿ-n sã yúhú váha iní-ãⁿ? Chi ñⁿdii díí-ni Yá Ndiõxí ío váha iní-gá.

¹⁹ Te yòhó xini-n nàcuáa ní cachí Yã Ndiõxí cada ñáyiu, te duha ní cachí-gá:

“Nchòhó cue tée vã càháⁿ ndihí-ndo ñadihí te núu ñá díú ñadihí-ndó cùu-yu, te ducaⁿ-ni nchòhó cue ñáyiu ñáhu tucu vã càháⁿ ndihí-ndo tée te núu ñá díú yí-ndo cuu-güedé, te vã càhí-ndó tñaha ñáyiu-ndo, te ní vã dúhú-ndó sã ndécú ndihí-yu, te ní vã dácacu-ndo cuéchi neñúú sá cúu-xí tñaha ñáyiu-ndo, te ní vã dácacunde-ndo, te canehe-ndo sã yíñùhu núu tátá-ndó ndihí núu ñáná-ndó”, duha ní cachí Yã Ndiõxí cada ñáyiu –càhí-gá xáhaⁿ-gã xii-dé.

²⁰ Te tée-áⁿ ní xáhaⁿ-dě xii-gá:

–Mèstrú, nchaa xíáⁿ ní nguíta-í quidé-í ndée cùtnáhá cúu lãndú-í –càhí-dé xáhaⁿ-dě xii-gá.

²¹ Te Jèsús ní xindéhé ñaha váha-gá xii-dé, te ní cuu váha iní ñáhá-gã, te ní xáhaⁿ-gã xii-dé:

–Dico cùmání ingá núu sã càdá-n. Vitna te quíhíⁿ-n te dico-n nchaa sá ndécú ndihí-n, te díhúⁿ-n cuáha táhu-n cuè ñáyiu ndáhú. Te ducaⁿ, te nduu táhu-n nùcunde cuu váha-n núu ndécú Yã Ndiõxí táxi tñuní-gá, te sátá ná yáha ducaⁿ càda-n, te quixi-n chitnahá ñáhá-n xii-í cuéi na ndòho-n datná ndòho-í –càhí-gá xáhaⁿ-gã xii-dé.

²² Te sátá dúcáⁿ ní xáhaⁿ Jèsús xii-dé te ío ní cundiýí-dé chi ío cuica-dě, te ní xica-dé cuánuhú-dé.

²³ Te ní ndacoto-gá ní càndéé ñi-gá, te ní xáhaⁿ-gã xii cue tée xica cuu ndihí-gá:

–Cue ñáyiu cuica chi ío úhú quindáá iní-yu Yá Ndiõxí cuendá ndíhu ndaha ñaha-gá xii-yu –càhí-gá xáhaⁿ-gã xii-güedé.

²⁴ Te cue tée xica cuu ndihí-gá-áⁿ ío ní cuñuhu-güedé nàcuáa ní càháⁿ-gá, te ní xáhaⁿ tucu-gá xii-güedé:

–Nchòhó cue tée xica cuu ndihí-í càhí tñuhu tucu-í xii-ndo sã ío úhú quindáá iní cue ñáyiu cuica Yã Ndiõxí cuendá ndíhu ndaha ñaha-gá xii-yu, chi sãni iní-yu sã ncháá sã ndécú ndihí-yu dácacu nihnu ñaha-xi xii-yu núu úhú núu ndáhú.

²⁵ Te yáchí-gá yáha ñⁿ caméyu yaú ñⁿ yiqui tìcú dácúxí sã quindáá iní ñⁿ ñáyiu cuica Yã Ndiõxí cuendá ndíhu ndaha ñaha-gá xii-yu –càhí-gá xáhaⁿ-gã xii-güedé.

26 Te cue téé xica cuu ndihi-gá ní cuñúhu vñhi-gá-güedé sá dúcáⁿ ñí cáháⁿ-gá, te ní ngüíta-güedé xitnáha-güedé:

—¿Te yoo sa ndacu naníhí tǎhú te núu ducaⁿ vaiⁿ? —cǎchí-güedé xitnáha-güedé.

27 Te Jèsús ní xíndéhé vǎha ñaha-gǎ xii-güedé, te ní xáhaⁿ-gǎ:

—Nchaa ñáyiú ñuyíú-a chi vá ndácü-yu ná cadá-yu nàcuáa ndíhu ndaha ñaha Yá Ndiöxí xii-yu, dico mee-gǎ chi ndacu-gá ndíhu ndaha ñaha-gá xii-yu, chi nchaandi túhú sá vǎha ndàcu-gá quídé-gǎ —cǎchí-gǎ xáhaⁿ-gǎ xii-güedé.

28 Te té Pèlú ní xáhaⁿ-dǎ xii-gá:

—Nchúhú ní dándöo-ndí nchaandi túhú sá ndécú ndíhi-ndí te ní tuha ñaha-ndí xii-n —cǎchí-dé xáhaⁿ-dǎ xii-gá.

29 Te Jèsús ní xáhaⁿ-gǎ xii-dé:

—Na cǎchí tnúhu ndáá-í xii-ndo sǎ ncháá ñáyiú na dándöo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu ducaⁿ na cadá-yu sá cuendá-í ndíhi sá cuendá tnúhu-í,

30 te ío-gá cuéhé sǎ cuǎñaha Yá Ndiöxí cundecu ndíhí-yu, chi níhí-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ ncháa xíáⁿ níhí-yu cundecu ndíhí-yu, chi tnáhá nduu táhü-yu cundecu ndíhi ñáhá-yu xii-í ñí caa ñí quíhíⁿ ná sǎá nduu. Dico díhna-gá ndoho tnahá-yu núu ñuyíú-a sá cuendá-í.

31 Te dava ñáyiú cùnnoo ndecu ichi Yá Ndiöxí vitna, ñáyiú-án sǎá nduu te vá ío-gá cunúu-yu dàtná cunúu-yu vitna, te dava ñáyiú nchícúⁿ ñá túú cùnnoo vitna ñáyiú-án sǎá nduu te ío cunúu-yu —cǎchí-gǎ xáhaⁿ-gǎ xii-güedé.

Jèsús cǎháⁿ tucu-gá sá cáhni ñaha-güedé xii-gá

(Mt. 20:17-19; Lc. 18:31-34)

32 Te ñuhu Jèsús ichi ndíhi cue téé xica cuu ndíhi-gá cuásaá ndíhi ñaha-gǎ xii-güedé ñuu Jerusálén, te yòdo nuu-gá núu-güedé cuásaá. Te cue téé-án xícuñúhu-güedé sá dúcáⁿ cuáháⁿ-gá ñuu Jerusálén, te dava cue ñáyiú xínchícúⁿ xiyúhú-yu. Te ní taudíⁿ-gá ndí ùxúú cue téé xica cuu ndíhi-gá, te ní ngüíta-gá cání-gǎ cuendú núu-güedé nchaa nàcuáa yáha-gá.

33 Te xáhaⁿ-gǎ xii-güedé:

—Vitna ñuhu-o ichi cuásaá-ó ñuu Jerusálén, te yácáⁿ cuáha cuendá ñáhá-güedé xii yúhú Téé cùu ñaní tnáhá-ndó ncháa-ndo núu cué téé cùu dútú cùnnoo, ndíhi núu cué téé dàcuaha ñaha xii ñáyiú nchaa tnúhu ní chídó tnùní ndíi Moisés. Te díu cue téé-án cuñaha-güedé xii dava-gá cue téé sá cáhni ñaha-güedé xii-í, te cuáha cuendá ñáhá-güedé xii-í núu cué téé ñá túú cùu cue téé isráél.

34 Te cue téé-án cudíquí ndeé ñáhá-güedé xii-í, te caniha-güedé ndíhi ñíi, te túú díi ñáhá-güedé, te cahni ñaha-güedé xii-í dico nduu úní sá cùu-í te ndoto-í —cǎchí-gǎ xáhaⁿ-gǎ xii-güedé.

Té Jàcobó ndíhi té Juáá cǎháⁿ ndàhú-güedé núu Jèsús sá cadá-gǎ #ⁿ sá cuíní-güedé (Mt. 20:20-28)

35 Te cue déhe té Zebèdeú té Jàcobó ndíhi té Juáá ní quexìo-güedé núu Jèsús, te xáhaⁿ-güedé xii-gá:

—Mèstrú, véxi-ndí cǎháⁿ ndàhú-ndí núu-n ñuu vá cündèe iní-n càda-n #ⁿ sá cuíní-ndí —cǎchí-güedé xáhaⁿ-güedé xii-gá.

36 Te Jèsús ní xícaⁿ tnúhú-gǎ núu-güedé, te xáhaⁿ-gǎ:

—¿Ná cúú sǎ cuíní-ndó càda-í-i? —cǎchí-gǎ xáhaⁿ-gǎ xii-güedé.

37 Te ní xáhaⁿ-güedé xii-gá:

—Cuíní-ndí sá òré ná sǎá nduu cündecu-n núu táxi tnùní-n, te #ⁿ-ndí cunucóo-ndí xio cùha-n te #ⁿ-ndí cunucóo-ndí xio dàtni-n —cǎchí-güedé xáhaⁿ-güedé xii-gá.

38 Te Jèsús ní xáhaⁿ-gǎ xii-güedé:

—Nchòhó, ñá túú cùtnuní iní-ndó nàcuáa nduu sá xícaⁿ-ndó núu-í. ¿Te náa cundee iní-ndó dándoho ñaha ñáyiú xii-ndo dàtná dándoho ñahá-yu xii-í, te cundee túcu iní-ndó cahni ñahá-yu xii-ndo dàtná cahni ñahá-yu xii-í-áⁿ? —cǎchí-gǎ xáhaⁿ-gǎ xii-güedé.

39 Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa cǎháⁿ-n-áⁿ —cǎchí-güedé xáhaⁿ-güedé xii-gá.

Te Jèsús ní xáhaⁿ-gǎ xii-güedé:

—Ndáá sá cündèe iní-ndó ndòho-ndo nchaa nacuáa ndoho-í, te cundee túcu iní-ndó cahni ñahá-yu xii-ndo, chi yúhú cahni ñahá-yu xii-í.

40 Dico sá dúcáⁿ cuíní-ndó sã ííⁿ-ndó cùnucóo-ndo xìo cuhá-í te ííⁿ-ndo cùnucóo-ndo xìo datní-í, te xíáⁿ chí ñá díú yǔhú tàú-í cachí-í te núu sá cúu cùnucóo-ndo àdi sá vã cúu cùnucóo-ndo, chí mee Tãtà-í Dútú Ndiöxí cachí-gá te núu ná cúu ñãyiú nduu táhú cùnucóo dñí-í dàvá-áⁿ —càchí-gá xãháⁿ-gã xii-güedé.

41 Te òré ní níhí ùxí-gá cue téé xìca cuu ndíhi-gá tnúhu nàcuáa ndùu sá cuíní té Jàcobó ndíhi ñaní-dé té Juáá, te ní cudééⁿ-güedé núu cuè téé úú-áⁿ.

42 Te Jèsús ní cana-gá nchaa cue téé xìca cuu ndíhi-gá-áⁿ, te ní xáháⁿ-gã xii-güedé:

—Nchòhó xìní-ndó sã cuè téé yìndaha ííⁿ nacióⁿ quíde-güedé sá ío cùnuu-güedé, te nchaa dáva-gá cue téé cùndíhi-güedé tnàhá-güedé quíde-güedé sá ío cùnuu-güedé.

43 Dico nchòhó chí vá dúcáⁿ càda-ndo. Chí núu dáva-ndo cuíní-ndó cùnuu-ndo te xìni ñuhu-xi cunu cuechi núu tnàhá-ndó te vá cáda-ndó sã cùnùu-ndo.

44 Te núu dáva-ndo cuíní-ndó quène cáva-ndo, te cuu-ndo dàtná cue ñáyiú ñá túú tnàhí dàná quee núu chíúⁿ pàtróóⁿ-xi cunu cuechi núú tnàhá-ndó.

45 Te yúhú Téé cùu ñaní tnàhá-ndó nchàa-ndo, chí ñá túú vèxi-í sá cúnú cuèchi ñáyiú núu-í, chí véxi-í sá cúnú cuèchi-í núú-yu. Te cuú-í ñuyúú-a cuèndá vài-yu cácu nihnu núu ùhú núu ndàhú —càchí-gá xãháⁿ-gã xii-güedé.

Jèsús quíde tãtna-gá ííⁿ téé cuàá nání-dé Bartimeú

(Mt. 20:29-34; Lc. 18:35-43)

46 Te Jèsús ní quexìo-gá ñuú Jericó ndíhi cue téé xìca cuu ndíhi-gá, te ní yáha-gá ndíhi-güedé ichi xití ñuú-áⁿ, te ío cuéhé ñáyiú nchícúⁿ ñáhá xii-gá cuáháⁿ te ííⁿ xio yuhu ichi sá ñí quee xití ñuú-áⁿ núcõo ííⁿ téé cuàá nání-dé Bartimeú, te tãtá-dé nání-dé Tímeú, te téé-áⁿ núcõo-dé yuhu ichi-áⁿ xicáⁿ ndàhú-dé.

47 Te téé-áⁿ ñí cutnùní iní-dé sá Jèsús téé ñuú Nazàrét ñúhú-dé ichi, te ní ngüíta-dé níhi càháⁿ-dé, te xãháⁿ-dë xii-gá:

—Jèsús, ñaní tnàhá ndíi Dàvíi, cundàhú iní ñáhá xii-í! —càchí-dé xãháⁿ-dë xii-gá.

48 Te vài ñáyiú tènaá ñáhã-yu xii-dé, te xãháⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xãháⁿ-dë xii-gá:

—Jèsús, ñaní tnàhá ndíi Dàvíi cundàhú iní ñáhá xii-í! —càchí-dé xãháⁿ-dë xii-gá.

49 Te Jèsús ní ngüíñí-gá te ní xáháⁿ-gã xii cue téé ndíhi-gá:

—Chí cuãnguaca téé cuàá-áⁿ can-deca-ndo-dë quixi iha —càchí-gá xãháⁿ-gã.

Te cue téé-áⁿ ñí xica-güedé cuãnguaca-güedé téé cuàá-áⁿ, te òré ní quexìo-güedé núu-dë te ní xáháⁿ-güedé xii-dé:

—Ndacuíñí te vá ndíhú-gá iní-n, na quíhíⁿ-ó chí càna ñaha Jesús xii-n —càchí-güedé xãháⁿ-güedé xii-dé.

50 Te téé-áⁿ ñí xócání-dë dóo ndíxí-dë, te ndíhi-ni ní ndacuíñí-dé te ní xica-dé cuáháⁿ-dé núu Jèsús.

51 Te òré ní quexìo-dé te ní xicáⁿ tnúhú-gã núu-dë, te xãháⁿ-gã xii-dé:

—¿Ná cuíní-n càda ñaha-í xii-n-í? —càchí-gá xãháⁿ-gã xii-dé.

Te téé cuàá-áⁿ ñí xáháⁿ-dë xii-gá:

—Mèstrú, cuíní-í cada tãtna-n núu-í cuèndá cundehe-í —càchí-dé xãháⁿ-dë xii-gá.

52 Te Jèsús ní xáháⁿ-gã xii-dé:

—Cuanùhú vitna, chí sa ní ndúha núu-n chí ní sándáá iní-n Yã Ndiöxí —càchí-gá xãháⁿ-gã xii-dé.

Te òré-ni-áⁿ ñí ndúha núu-dë te nchícúⁿ-dé Jèsús cuáháⁿ.

11

Jèsús cuãnguáhu-gá ñuú Jerusàlén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndíhi cue téé xìca cuu ndíhi-gá ñuú Bètaniá, ndíhi ñuú Bèttagé, te xíáⁿ cáá yùcu nani Olívú, te yatni víi-ñá xíáⁿ cáá ñuú Jerusàlén. Te Jèsús ní cana-gá úú-ni tnàhá cue téé xìca cuu ndíhi-gá.

2 Te ní xáháⁿ-gã xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ííⁿ búrru ndètní-í, te vátá yõo ííⁿ-gá codo ñaha xii-í, te nandaxi-ndo-í te candeca-ndo-í quixi.

3 Te núu yoo na càcáⁿ tnúhú núu-ndó ñá cuèndá nándaxi-ndo-í, te cúñaha-ndo sã yúhú Yáá xicá cùu ndíhi-ndo xini ñuhu-í-í, te na yãha canehe chiuⁿ-í-í te ndíhi-ni nãtendaha-í-í, duha cúñaha-ndo —càchí-gá xãháⁿ-gã xii-güedé.

4 Te cue tée-án nǐ xica-güedé cuáhán-güedé, te òré ní quexìo-güedé ñuú-án te ní naníhí-güedě ìñ bǔrru ndètní-dí ìñ yutnu nìhnu yatni ìñ yuyehe vehe caa yatni yuhu ichi, te ní ngüíta-güedé nándàxi-güedé-dí.

5 Te mei òré nándàxi-güedé-dí ní quexìo ñáyiu xǎhǎn-yu xii-güedé:

—¿Ná cuendá nándàxi-ndo búrru-án-í? — cǎchí-yu xǎhǎn-yu xii-güedé.

6 Te cue tée-án nǐ xáha-güedě xii-yu nàcuáa ní xáha Jèsús cúñaha-güedě. Te sátá dúcán te ní dáññ-yu ndèca-güedé búrru-án cuáhán núú ndécú Jèsús.

7 Te òré ní quexìo-güedé ndíhi-dí núú ndécú-gǎ, te ní sacán ndodo-güedé dóo-güedě sátá-dí, ní ngódó ñaha Jèsús xii-dí.

8 Te ío cuéhé ñáyiu ta sácán-yu dóo-yu ichi cuáhán-gá cuendá núú dóo-yu-án yǎha-gá ndíhi quití yòdo-gá, te davá-yu xèhndé-yu ndaha yùtnu ta sacán-yu cuáhán.

9 Te nchaa ñáyiu yòdo nuu núú-gǎ ndíhi nchaa ñáyiu nchícú ndàa sátá-gǎ ní ngüíta-yu níhi cǎhán-yu, te cǎchí-yu:

—¡Ío cǎhnu cuu Yaá-a! ¡Te Yá Ndiòxí ná chindee ñaha-gá, chí diu-gá cúú-gǎ Yaá ní tendaha-gǎ véxi quide núú-gǎ!

10 ¡Te diu-ni Yaá-á cúú-gǎ Yaá véxi quindaha ñaha xii-o datná ní xóo cada ndí Dáví! ¡Te ndéé nchaa sá ío andiu na cǎchí-xi sá ío cǎhnu cuu-gǎ! —duha cǎchí-yu.

11 Te Jèsús ní quexìo-gá ñuú Jerusálén, te cuánguìhu-gá xití veñúhu cǎhnu sá ío cùnnuu, te ní xíndéhé vǎha-gá nchaa sá ndécú xití veñúhu-án. Te sátá dúcán te ní ndee-gá cuáhán-gá ñuú Bètaniá ndíhi ndí ùxúú cue tée xica cuu ndíhi-gá chí sa ní cuaa.

Jèsús xǎha-gǎ xii yutnu ngǔxí sá vǎ cúú-gǎ sávidí-xi

(Mt. 21:18-19)

12 Te nduu tnéé-án nǐ quee Jèsús ñuú Bètaniá ndíhi cue tée xica cuu ndíhi-gá, te ichi ñùhu-gá ní xíhí-gá docó.

13 Te xica nǐ xíní-gá nútní ìñ yutnu ngǔxí, te ní xica-gá cuándéhé-gǎ ñuu ndéé sávidí-xi te ñá túú nǎ ndéé, chí mee-ni ndàha-xi ndéé chí ñá díú yóo sácúndéé sávidí-xi.

14 Te Jèsús ní xáha-gǎ xii yutnu ngǔxí-án: —Vitna te vá yóo ìñ-gá caxi sávidí-n, chí vá cúú-gǎ —cǎchí-gá xǎha-gǎ xii yutnu ngǔxí-án.

Te cue tée xica cuu ndíhi-gá ní tecú dóho-güedé nàcuáa ní xáha-gǎ xii yutnu ngǔxí-án.

Jèsús ñá túú tnàhá iní-gá nàcuáa quide ñáyiu xití veñúhu

(Mt. 21:12-17; Lc. 19:45-48; Jn. 2:13-22)

15 Te Jèsús ní quexìo tucu-gá ndíhi cue tée xica cuu ndíhi-gá ñuú Jerusálén, te cuánguìhu tucu-gá xití veñúhu cǎhnu sá ío cùnnuu, te xití veñúhu-án xíndecu cue ñáyiu quide ndáhú nádícó-yu, ndíhi cue ñáyiu xísaa. Te nchaa-yu ní queñuhu ñaha Jèsús xii-yu quehé, te ní dándúá-gá mèsá cue ñáyiu dàma díhú, ndíhi nchaa xilé sácóo nchíhi cue ñáyiu dico lómá xíndecu xití veñúhu-án.

16 Te ñá túú tnàhí-gá ní dàña-gá yáha cue ñáyiu ndíhi nchaa sá nchídó-yu ichi xití veñúhu-án.

17 Te ní xáha-gǎ xii-yu:

—Núú tütú Yá Ndiòxí cǎhán-xi nàcuáa ní cǎhán-gá, te ní cǎchí-gá: “Vehe-í cúú-xi vèhe núú tàcá ñáyiu níhí ñuyú cǎhán ndíhi ñahá-yu xii-í”, duha ní cǎhán-gá cǎchí-xi núú tütú-gá. Dico nchòhó quidé-ndó vèhe-gá vehe ñadúhú —cǎchí-gá xǎha-gǎ xii-yu.

18 Te nchaa dútú cùnnuu, ndíhi nchaa cue tée dàcuaha ñaha xii-yu nchaa tnúhu ní chídó tnùní ndí Moisés ní tecú dóho-güedé nàcuáa ní cǎhán-gá te ní ngüíta-güedé ndúcú-güedě nàcuáa cada-güedé cǎhni ñaha-güedě xii-gá, chí yùhú-güedé sá ío cunuu-gǎ, te duca chí nchaa ñáyiu ío cùnúhu-yu nchaa tnúhu cǎhán-gá.

19 Te òré sa ní cuaa cuií-nǎ, te ní quee tucu Jèsús ndíhi cue tée xica cuu ndíhi-gá ñuú Jerusálén cuáhán-gá ndíhi-güedé ingá xichi.

Ní yíchí yutnu ngǔxí

(Mt. 21:20-22)

20 Te nduu tnéé nehé-ni ní yáha tucu Jèsús ndíhi cue tée xica cuu ndíhi-gá núú níhnu yùtnu ngǔxí, te ní xíní-güedé sa ní yíchí níhí ndéé yóho-xi.

21 Te té Pèlú ní ndacu iní-dé nàcuáa ní xáhaⁿ Jèsús xii yutnu ngùxí-án, te ní xáhaⁿ-dë xii-gá:

—Mèstrú, cundehe nã ní yíchí yutnu ngùxí sá ní xáhaⁿ-n sã vã cúúⁿ-gã sávídí-xi —càchí-dé xáhaⁿ-dë xii-gá.

22 Te Jèsús ní xáhaⁿ-gã xii-güedé:

—Quindáá ndisa iní-ndó Yã Ndiöxí.

23 Te na càchí tnúhu ndáá-í xii-ndo sã nũu nchòhó cùñaha-ndo xii tìndúú-a xocuíñí-xi núú ndécú-xí, te quíhíⁿ-xi quée-xi xití làmár. Te ñu ducaⁿ càda-xi te núu nchòhó vá cání ñⁿ cani úú iní-ndó, te quindáá iní-ndó sã dúcáⁿ càda-xi.

24 Te xíãⁿ nũu càchí tnúhu-í xii-ndo sã nchàa sá ná càcáⁿ-ndó nũú Yã Ndiöxí òré càháⁿ ndihí-ndo-gã, te taxi-gá te núu nchòhó sàndáá ndisa iní-ndó sã táxí-gã sá xicáⁿ-ndó nũú-gã.

25 Te òré càháⁿ ndihí-ndo Yã Ndiöxí te dandacu iní-ndó te núu ndècu ñáyíu ñá túú cùu váha iní ñáhá xii-ndo, te cada càhnu iní-ndó-yu cuendá ducaⁿ càda cahnu iní ñáhá Tãtá-ndó Dütú Ndiöxí Yaá ndécú àndíu xii-ndo cuendá nchaa sá ñá túú váha quide-ndo.

26 Dico núu nchòhó vá cadá càhnu iní-ndó sã quidé ñaha tnaha ñáyíu-ndo xii-ndo, te ni Tãtá-ndó Dütú Ndiöxí vá cadá càhnu iní ñáhá-gã xii-ndo cuendá nchaa sá ñá túú váha quide-ndo —cachí-gá xáhaⁿ-gã xii-güedé.

Jèsús ndécú ndihí-gá tnúhu ndee iní

(Mt. 21:23-27; Lc. 20:1-8)

27 Te Jèsús ní ndexìo tucu-gá ñuú Jerusàlén ndihí cue téé xica cuu ndihí-gá, te cuánguñhu tucu-gá xití veñúhu càhnu sá ño cùnũu ndihí-güedé. Te xití veñúhu-án yíhí-gã ní quexìo cue dütú cùnũu ndihí cue téé dàcuaha ñaha xii ñáyíu nchaa tnúhu ní chídó tnùní ndíi Moisés, ndihí cue téé cùu sacuéhé nũú ñáyíu isràél.

28 Te xáhaⁿ-güedé xii-gá:

—Cuíní-ndí cachí tnúhu-n xii-ndí nása ndũu tnúhu ndee iní ndécú ndihí-n núu quide-n nándí sá quidé-n, ¿te yoo ducaⁿ ñí taxi tnúhu ndee iní-án xii-n-í? —càchí-güedé xáhaⁿ-güedé xii-gá.

29 Te Jèsús ní xáhaⁿ-gã xii-güedé:

—Yúhú tnàhá-í cuíní-í càcáⁿ tnúhu-í ñⁿ sá càcáⁿ tnúhu-í núú-ndó te núu na càchí

tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í.

30 Te chí càchí tnúhu xii-í yoo ní táuchíúⁿ ñí dácúandüte ndíi Juáá ñáyíu, ¿Yá Ndiöxí ãⁿ cuè téé ñuyíú-a ní táuchíúⁿ dùcaⁿ ní quide ndíi? Te chí càchí tnúhu —càchí-gá xáhaⁿ-gã xii-güedé.

31 Te ní ngüíta-güedé xitnàha-güedé:

—¿Nása cùñaha-o? Chi núu na cùñaha-o sã Yã Ndiöxí ní táuchíúⁿ dùcaⁿ ní quide ndíi Juáá ñá, te quesaha-dë: “¿Ná cuendá ñá túú ní sàndáá iní-ndó tnúhu ní càháⁿ ndíi vài?” , quesaha-dë.

32 Te ni vã cúú cùñaha-o sã cuè ñáyíu ñuyíú-a ní táuchíúⁿ dùcaⁿ ní quide ndíi Juáá —càchí-güedé xitnàha-güedé.

Te ducaⁿ ñí xitnàha-güedé chi ñá túú ní cùtnuní iní-güedé nása cùñaha-güedé xii-gá, chi xiyuhú-güedé cue ñáyíu chí nchaa ñáyíu-án ñí cutnùní ndáá iní-yu sá Yã Ndiöxí ní táuchíúⁿ-gã ducaⁿ ñí quide ndíi Juáá.

33 Te ní xáhaⁿ-güedé xii Jèsús:

—Ñá túú xìní-ndí yoo ní táuchíúⁿ dùcaⁿ ñí dácúandüte ndíi Juáá ñáyíu —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáhaⁿ-gã xii-güedé.

12

Cuendá cue téé cuihna iní-xi

(Mt. 21:33-46; Lc. 20:9-19)

1 Te Jèsús ní ngüíta-gá cání-gã ñⁿ cuendú núú ñáyíu nàcuáa tecú tnùní-yu tnúhu-gá, te xáhaⁿ-gã xií-yu:

—Ñⁿ téé ní nacúxi-dé mee-ni yòho yaha stilé núú ñúhú-dë, te ní chidoco-dë cuendá sá vã cúú dàñú, te ní cadúha-dé núú quíhí-dë ndéhé yoho yàha stilé-án òré ná cùu, te ní cadúha-dé ñⁿ xító dùcúⁿ núú cáúndòdo cue téé coto yoho yàha stilé-án.

”Te ní sáá ñⁿ nduu quèe-dé quíngaca cuu xica-dë vài nduu, te ní dándõo ndaha-dë sá ñí xitu-dé-án xii ñⁿ úú cue téé càháⁿ ndihí-dé cuendá cada chiúⁿ-güedé, te ní ndatnúhu-güedé sá òré ná cúú te cuu cuendá dava-güedé te ducaⁿ te ní quee-dé cuaháⁿ-dé.

² Te sáta nǐ sáá nduu nǐ cuu ndéhé yoho yàha stilé sá nǐ xitu-dé-án, te ní xáhaⁿ-dě xii ñⁿ téé xínu cuechi núú-dě: “Cuáhán cácaⁿ-n sǎ cúú cuendá-í núú cuè téé ní dándóo ndàha-í nchaa yoho yàha stilé sá nǐ xitu-í-án”, càchí-dé xǎhaⁿ-dě. Te téé xínu cuechi-án nǐ xica-dé cuáhán-dé.

³ Te cue téé-án nǐ tñi-güedé téé xínu cuechi-án, te ní caniha-güedě xii-dé, te dǎtnúni ní nacuícúⁿ ñáhá-güedě, te ñá túú tñahí ná ní sǎñaha-güedě.

⁴ Te téé cùu xítóhó yoho yàha stilé-án nǐ tendaha tùcu-dé ingá téé xínu cuechi núú-dě cuáhán-dé. Te òré ní quexìo téé xínu cuechi-án te cue téé-án nǐ sáha ñaha-güedě yúú xii-dé, te ní táhú-güedě díquí-dě, te ní xícuèhé ñáhá-güedě xii-dé.

⁵ Te téé cùu xítóhó nchaa yoho yàha stilé-án nǐ tendaha tùcu-dé ingá téé xínu cuechi núú-dě cuáhán-dé núú cuè téé-án, dico téé-án òré ní quexìo-dé te ní sahani ñaha-güedě xii-dé. Te téé cùu xítóhó nchaa yoho yàha stilé-án nǐ tendaha-dě vǎi-gá cue téé xínu cuechi núú-dě cuáhán ngácáⁿ-güedé sá cúú cuendá-dé ní cùu dico ñu-ni ducaⁿ nǐ quide ñaha tùcu cue téé ndèé nchaa yoho yàha stilé-án xii-güedé, chi dava-güedé ní caniha-güedě te dava-güedé ní sahani ñaha-güedě.

⁶ Te téé cùu xítóhó nchaa yoho yàha stilé-án ndécú ñⁿdii-ná téé tendaha-dě quíhíⁿ núú cuè téé ní dándóo ndaha-dě sá nǐ xitu-dé-án, te téé tendaha-dě-án cúú-dě déhe ducuⁿ-dé, te ío cùu iní ñáhá-dě. Te ní sani iní-dé: “Váha-gá nǔu tendaha-í déhe-í-a núhú-dé, chi òré quini ñáhá-güedě xii-dé te cànehe-güedé sá yíñùhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-án sǎ nùhú-dé, te téé-án cuñuhú-dé cuáhán ngácáⁿ-dé sá cúú cuendá tátá-dě núú cuè téé-án.

⁷ Dico òré ní xiní cue téé quide chiuⁿ-án déhe téé cùu xítóhó nchaa yoho yàha stilé-án, te ní xítñaha-güedé: “Téé-ǎn téé véxi nduu táhú ñuhu-a ndihí sá cáá nǔú-xi, dico cahni-o-dé te mee-o nduu táhú-ó sǎ ndúú táhú-dě”, duha ní xítñaha-güedé.

⁸ Te ní tñi-güedé téé-án, te ní sahani ñaha-güedě, te ní dáquéné-güedě yiqui cùñú-dé ñⁿ xio yuhu ñuhu núú cáá yòho yaha stilé-án —duha cuáhán cuendú ní cani

Jèsús núú-yu.

⁹ Te Jèsús ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-án ǎn? Chi núhú-dé te cahni-dé cue téé-án te dándóo ndaha-dě ñuhu-dé xii cue téé cùtnuní iní-dé cada ndáa —càchí-gá xǎhaⁿ-gǎ xií-yu.

¹⁰ Te xǎhaⁿ tùcu-gá xií-yu:

—Te nchòhó, náa ñá túú dàcuaha-ndo núú tütú Yǎ Ndióxi núú càchí-xi:

Yúú sǎ nǐ dáquée tihú cue téé dàcaa vehe, ní cuu-xi yúú cùnùu vitna.

¹¹ Chi mee Yǎ Ndióxi ducaⁿ nǐ cachí-gá cunduu, te cùu-xi ñⁿ sá ío cùñúhu-o vitna. Duha càchí-xi núú tütú-gá —càchí Jèsús xǎhaⁿ-gǎ xií-yu.

¹² Te cue téé ní xíndedóho nàcuáa nduu tnúhu ní cáháⁿ-gá ní cuini-güedé tñi ñaha-güedě xii-gá ní cùu, chi ní cutnùni iní-güedé sá cuendá-güedé ní cáháⁿ-gá, dico ní yuhú-güedé tñi ñaha-güedě xii-gá cuendá sá ío vǎi ñáyiú, te ná ío ná cada ñáhá-yu xii-güedé ní sani iní-güedé, te ní xica-güedé cuáhán-güedé.

Cuendá impuèstú

(Mt. 22:15-22; Lc. 20:20-26)

¹³ Te sáta nǐ xica-güedé cuáhán-güedé, te ní tendaha-güedě ñⁿ úú cue téé cùu fariséú, ndihí ñⁿ úú cue téé cùndihí té Hèrodés cuáhán-güedé núú ndécú Jèsús ndúcú-güedě nàcuáa cada-güedé datìcánuu ñaha-güedě xii-gá núú tñuhu càháⁿ-gá.

¹⁴ Te cue téé-án nǐ quexìo-güedé núú Jèsús, te xǎhaⁿ-güedě xii-gá:

—Mèstrú, cùtnuní iní-ndí sá ío ndáa càháⁿ-n, te ñá túú quide cuendá-n nàcuáa càháⁿ ñáyiú, te cuèi ndédani cáá-yu ñⁿ-ni càháⁿ-n ndihí-yu chi ñá túú quide cuendá-n cuèi ná ñáyiú cùu-yu, te càháⁿ ndáa-n nàcuáa càháⁿ Yǎ Ndióxi cundecu-o ñuyíú-a. Te cachí tnúhu xii-ndí nǔu váha-ni quide-ndí sá chǎhu-ndí té Cèsár téé ío cùnùu cuendá impuèstú ǎn ñáhá —càchí-güedé xǎhaⁿ-güedé xii-gá.

¹⁵ Dico Jèsús ní cutnùni iní-gá sá xító ndèé ñáhá-güedě xii-gá, núu ní xáhaⁿ-gǎ xii-güedé:

—¿Ná cuendá ducaⁿ xító ndeé ñáhá-ndó xii-í? Chí dánèhé ñáhá xii-í ñⁿ díhúⁿ sǎ chǎhu-ndo cuendá impuèstú te núu nása càa —cachí-gá xǎhaⁿ-gǎ xii-güedé.

16 Te cue tée-án nǐ dánèhé ñáhá-güedě xii-gá ìñ dǐhúñ sǎ chǎhu-güedé cuendá impuèstú. Te Jèsús ní xáhañ-gǎ xii-güedé:

—Chí cǎchí tñúhu xii-í nǔu yoo núu-xi ndèé ndihí yoo ñiù-xi ndeé —cǎchí-gǎ xǎhañ-gǎ xii-güedé.

Te ní xáhañ-güedě xii-gá:

—Núú tǎ Cèsár ndèé ndihí ñiù-dé —cǎchí-güedé xǎhañ-güedé xii-gá.

17 Te Jèsús ní xáhañ-gǎ xii-güedé:

—Te núu ducañ te chí nǎcuǎha té Cèsár sǎ cúú cuendá-dé, te sǎ cúú cuendá méé Yǎ Ndiöxí te xǎñ nǎcuǎha-ndo-gǎ —cǎchí-gǎ xǎhañ-gǎ xii-güedé.

Te cue tée-án ño ní cuñúhu-güedé sǎ dúcáñ nǐ cǎháñ-gǎ.

Cuendá cue ñáyiù ndoto

(Mt. 22:23-33; Lc. 20:27-40)

18 Te sátá dúcáñ te ní quexì ññ úú cue tée cùu saducéú núu ndécú Jèsús, te cue tée-án ñǎ túú sǎndáá iní-güedé sǎ ndótó cuè ñáyiù ní xihí, te ní xáhañ-güedě xii-gá:

19 —Mèstrú, ndíi Moisés cǎchí ndíi núu tütú ndíi ndècu vitna sǎ nǔu ññ tée na cùú-dé te quendóo ñadìhí-dé, te núu ñǎ túú ní xǎo déhe-dé ndihí ñadìhí-dé-án, te tée cùu ñaní-dé naqueheñ-dé ñaha ní quendóo quèé-án cuendá coo déhe-dé ndihí-añ cuendá tée ní xihí-án.

20 Te ní xindecu úsǎ tñahá cue tée mee-ni ndì ñaní-güedé. Te tée díhna ní níhí ñadìhí-dé, te ñǎ túú ní cùdí-dé cundecu-dé chí ní xihí-dé, te ní ññ déhe-dé ñǎ túú ní xǎo ndihí ñadìhí-dé.

21 Te tée cùu úú ní naqueheñ-dé ñaha ní quendóo quèé-án, dico ní xihí tucu-dé, te ní ññ tucu déhe-dé ñǎ túú ní xǎo ndihí ñaha-án. Te ñiù-ni ducañ nǐ xihí tée cùu uní.

22 Te ní xínu ndí ùsǎ-güedé ní cǎndeca ñaha-güedě xii ñaha-án, dico ní ññ-güedé ñǎ túú ní xǎo déhe-güedé ndihí-añ, te ní ndihí-güedé ní xihí te ndeé núu nǐ ndihí-ná ní xihí tñahá ñadìhí-án.

23 Te na sǎá nduu ndòto-güedé ndihí ñaha-ñ, ¿te ndèdacàa-güedé ñadìhí-güedé cuu-añ-i? Chí ndí ùsǎ-güedé ní cǎndeca ñaha-güedě xii-añ —cǎchí-güedé xǎhañ-güedé xii-gá.

24 Te Jèsús ní xáhañ-gǎ xii-güedé:

—Ní xíta nchòhó tñúhu cǎháñ-ndó, chí ñǎ túú xini-ndó nǎcuǎa cǎháñ Yǎ Ndiöxí núu tütú-gá, te ní ñǎ túú xini-ndó sǎ díú-gǎ ndácú-gǎ quidé-gǎ nchaandi tühú sǎ vǎha.

25 Te na cǎchí tñúhu-í xii-ndo sǎ òré ná sǎá nduu ndòto nchaa ñáyiù ní xihí, te dǎvá-án vǎ yǎo-gǎ dasañ dèhe yoco-xi chí vǎ yǎo-gǎ candeca tñaha, chí na ndótó-yu te cuu-ná-yu dàtná cue espíritú xínu cuèchi núu Yǎ Ndiöxí.

26 Te núu nchòhó cuini-ndó cǎháñ-ndó cuendá nchaa ñáyiù ndoto, te díhna-gǎ dacuǎha-ndo nǎcuǎa ní chídó tñuní ndíi Moisés núu tütú ndíi ní cùu. Chí ñiù núu tütú ndíi cǎháñ-xi nǎcuǎa ní xáhañ Yǎ Ndiöxí xii ndíi cùtñahá ní cǎháñ ndihí ñaha-gǎ ññ xichi núu níhnú tñutaú nchìcúñ ñuhú. Te duha ní xáhañ-gǎ xii ndíi: “Yúhú cùú-í Ndiöxí tǎ Àbrahám, ndihí té Isàác, ndihí té Jàcób”, duha ní xáhañ Yǎ Ndiöxí xii ndíi cǎchí-xi núu tütú ndíi.

27 Te Yǎ Ndiöxí ñǎ túú cùu-gǎ Ndiöxí cue ñáyiù ní xihí, chí cùu-gǎ Ndiöxí cue ñáyiù xindecu vívú, núu xǎñ nchòhó ío xíta-ndo tñúhu cǎháñ-ndó. Te sátá dúcáñ nǐ cǎháñ-gǎ cuendá cue tée-án, te xǎñ cùtñuní sǎ cuèi ní xihí-güedé sǎ cúú-xi tñaha ñáyiù-güedé, dico ndècu vívú-güedě sǎ cúú-xi-gǎ —cǎchí-gǎ xǎhañ-gǎ xii-güedé.

Tñúhu sǎ ño-gǎ cúnùu

(Mt. 22:34-40)

28 Te tñahá ññ tée dàcuaha ñaha xii ñáyiù nchaa tñúhu ní chídó tñuní ndíi Moisés ndèdóho-dé nchaa tñúhu cǎháñ Jèsús ndihí cue tée cùu saducéú-án, te ndèdóho-dé sǎ sùuní vǎha ñihí-gǎ tñúhu nǎdanhocáva-gǎ. Te ní sǎndehe yatni-dé núu-gǎ, te xǎhañ-dě xii-gá:

—Cǎchí tñúhu xii-í ndèdacàa tñúhu sǎ ní cǎháñ Yǎ Ndiöxí ío-gǎ cúnùu cuu díhna —cǎchí-dé xǎhañ-dě xii-gá.

29 Te Jèsús ní xáhañ-gǎ xii-dé:

—Duha cǎháñ tñúhu sǎ ño-gǎ cúnùu: “Nchòhó ñáyiù israhèl ío vǎha chí cùndèdóho tñúhu-a. ññdì dí-ñi Yǎ Ndiöxí ndécú, te ñiù-ni-gǎ cúú-gǎ Ndiöxí-ó.

30 Te cuu iní-ndó Dütú Ndiöxí Yáá cúú Ndiöxí-ndó nǐ yuhu ní iní-ndó, te caní iní-ndó cǎda-ndo datná cuini méé-gǎ, te mee-ni tñúhu vǎha caní iní-ndó cuendá cuu víi cuu vǎha-ndo nǔú-gǎ, te coo iní-ndó

càda-ndo nacuaa cuu váha iní-gá”, duha càháⁿ tnúhu sá ïo-gá cúnùu.

³¹ Te duha càháⁿ tucu ingá tnúhu cùu uú sá ïo cúnùu: “Cuu iní-ndó tnàha ñáyiu-ndo dàtná cùu ìní-ndó mèe-ndo”, duha càháⁿ tnúhu cùu uú-áⁿ. Te úú duha-ni tnúhu-a cùu-xi tnúhu sá ïo-gá cúnùu –cachí-gá xàhaⁿ-gã xii-dé.

³² Te tée dàcuaha ñaha xii ñáyiu nchaa tnúhu ní chídó tnùní ndíi Moisés ní xáhaⁿ-dè xii-gá:

–Mèstrú, váha-ni càháⁿ-n chi ndáá sá ñⁿdii-ni Yá Ndiöxí ndécú, te ñá túú-gã ndèè ndécú ìngá ndiöxí.

³³ Te dàtná ní cachí-n sã ñⁿ yuhu ñⁿ iní-ó cùu iní-ó Yã Ndiöxí, te caní iní-ó càda-o nacuaa cuu vii cuu váha iní-gá te ïo vii ïo váha cuu iní-ó dàtná cuíni méé-gã, te coo iní-ó càda-o nacuaa cuu váha iní-gá, te cuu iní-ó cuè tnaha ñáyiu-o dàtná cùu ìní-ó mèe-o. Te nchaa xíãⁿ ïo-gá xíní ñùhu-xi cada-o dacúúxí sã cuãñaha-o quiti cahni-güedé te cáyú-di nduu táhú ñáhá Yã Ndiöxí, ndihi dàcúúxí nchaa dava-gá sá sãñaha-o ndùu táhú-gã –càchí-dé xàhaⁿ-dè xii-gá.

³⁴ Te sá dúcáⁿ ïo váha ndùu tnúhu ní cáháⁿ téé-áⁿ, núu ní xáhaⁿ Jèsús xii-dé:

–Luha-ná cúmãní xii-n te ndíhu ndaha ñaha Yá Ndiöxí –càchí-gá xàhaⁿ-gã xii-dé.

Te sá dúcáⁿ ñⁿ xáhaⁿ-gã xii téé-áⁿ, núu vá yõ ñⁿ-gá ní cùyⁿ nágá tnúhu nducu tnúhu-yu núú-gã.

Yoo cùu Xitohó Jesucristú

(Mt. 22:41-46; Lc. 20:41-44)

³⁵ Te Jèsús yíhí-gã xití veñúhu càhnu sá ïo cúnùu danehé-gá ñáyiu, te xàhaⁿ-gã xii-yu:

–Cue tée dàcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá Crístú Yaá tendaha Yã Ndiöxí quixi ñuyú-a cùu-gá déhe ndíi Dàvií, te ndíi-áⁿ ñⁿ cunaha vihi ní xíhí ndíi. ¿Te ná cuendá ducaⁿ càháⁿ-güedé?

³⁶ Te mee ndíi Dàvií-áⁿ ñⁿ dácáhu ìní ñáhá Espíritú Yá Ndiöxí xii ndíi nacuaa cáháⁿ ndíi, te duha ní cachí ndíi:

Dútú Ndiöxí ní xáhaⁿ-gã xii Yaá cùu Xitohó-í:
“Ngóo xio cùha-í,

te yúhú cada-í te nchaa sá cùu ùhú ìní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cùu Xitohó-í.

Duha ní cachí ndíi.

³⁷ ¿Te nása cùu Crístú déhe ndíi Dàvií, te mee ndíi ní cachí ndíi sá cùu-gã Xitohó ndíi? –càchí Jèsús xàhaⁿ-gã xii-yu.

Te ïo cuéhé ñáyiu ní xíndedóho nchaa tnúhu ní cáháⁿ-gã, te ïo ní cudíi ìní-yu ní xíndedóho ñáhá-yu xii-gá.

Jèsús càháⁿ-gá cuendá cue tée dàcuaha ñaha xii ñáyiu nchaa tnúhu ní chídó tnùní ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñáhá Jèsús xii cue ñáyiu, te xàhaⁿ-gã xii-yu:

–Cada cuendá-ndó vã cáda-ndó dàtná quidé cuè tée dàcuaha ñaha xii ñáyiu nchaa tnúhu ní chídó tnùní ndíi Moisés, chi cue téé-áⁿ tnàhá ìní-güedé cuihnu-güedé dóó nání sã sácuihnu cue téé cúnùu-gá te cuíni-güedé sá méé-ní ndíi tnúhu yíñùhu cáháⁿ ndíi ñaha ñáyiu xii-güedé nchaa núú xicá cùu-güedé.

³⁹ Te nácaxi-güedé xilé sácõo nchihi cue téé cúnùu-gá xití veñúhu sácõo nchihi-güedé. Te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ñⁿ vico, chi mee-ni núú sácõo cue téé cúnùu cuíni-güedé coo-güedé.

⁴⁰ Te quèndé-güedé vehe nchaa ñáyiu quèé, te ïo naha càháⁿ ndíi-güedé Yã Ndiöxí dándahú-güedé méé-güedé sá ïo quide ndáá-güedé cuendá sá cuíni-güedé cáháⁿ váha ñáyiu cuendá-güedé. Te sá dúcáⁿ quide-güedé te ïo-gá ndoho-güedé núú ùhú núú ndàhú dàcúúxí dàva-gá ñáyiu –càchí-gá xàhaⁿ-gã xii-yu.

Díhúⁿ nduu táhú Yã Ndiöxí ní dáquèe ñⁿ ñaha ndàhú ñaha quèé

(Lc. 21:1-4)

⁴¹ Te núcóo Jèsús xití veñúhu yatni núú ndécú àlcançiá te ndèhe-gá xídáquèe ñáyiu díhúⁿ xití alcanciá-áⁿ, te tnàhá cue ñáyiu cuica xídáquèe-yu vãi díhúⁿ.

⁴² Te ní quexiõ ñⁿ ñaha ndahú ñaha quèé, te ndèhe-gá ní dáquèe-aⁿ úú tnàhá

díhúⁿ còbrí xití alcanciá, te díhúⁿ-ãⁿ ïo sacú yáhu-xi.

⁴³ Te Jèsús ní cana-gá cue tée xica cuu ndihí-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã ñaha ndahú ñaha quèe-a ío-gá nándihí díhúⁿ nĩ dáquëe-aⁿ xití alcanciá dàcúxí díhúⁿ nĩ dáquëe dava-gá-yu.

⁴⁴ Chi nchaa ñáyiu-áⁿ nĩ dáquëe-yu mee-nã díhúⁿ sã nĩ quendóo-ná, dico ñaha quèe-a cuëi ndàhú-aⁿ dico ní dáquëe-aⁿ nihí díhúⁿ sã cuááⁿ sã cáxí-áⁿ ní cùu — cachí-gá xáhaⁿ-gã xii-güedé.

13

Jèsús càchí-gá sá ngóyó veñúhu
(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sá ïo cùnuu, te ìⁿ tée xica cuu ndihí-gá ní xáhaⁿ-dẽ xii-gá:

—jMèstrú, cundehe nã ío vii ní sáá veñúhu-aⁿ ndihí nchaa vehe nèhe tñaha ndihí-xi, te ío vii ndãa nchaa yúu yíhí! — càchí-dé xáhaⁿ-dẽ xii-gá.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe sá cùñúhu-n-a vitna sáá nduu te vá cùndúu-gá-xi dàtná cáá-xí vitna, chi ni ìⁿ-gã yúu vã códó nchíhi tñaha-xi, chi ndihí ngoyo —càchí-gá xáhaⁿ-gã xii-dé.

Nàcuáa cada-xi nduu ta cùyatni naa ñuyúu
(Mt. 24:3-28; Lc. 21:7-24; 17:22-24)

³ Te Jèsús ní xica-gá ndihí cue tée xica cuu ndihí-gá cuáháⁿ ndihí ñaha-gã xii-güedé yucu nàni Olívú, te yucu Òlívú-áⁿ tũu ndáá núu cáá veñúhu càhnu sá ïo cùnuu. Te Jèsús ní quexìo-gá ndihí-güedé yucu Òlívú-áⁿ, te xíáⁿ nĩ ngóo-gá te núu núcõo-gá-áⁿ nĩ sáháⁿ té Pèlú ndihí té Jàcobó ndihí té Juáá ndihí té Ndríxí, te dayuhu nĩ xáhaⁿ-güedẽ xii-gá:

⁴—Cuíní-ndí cachí tnúhu-n nã nduu ducaⁿ cada-xi ngoyo veñúhu càhnu sá ïo cùnuu, àdi nándi cùu sá cádá-xí cuendá cutnùnì iní-ndí sá sà ta cuyatni nduu ducaⁿ cada-xi —cachí-güedé xáhaⁿ-güedẽ xii-gá.

⁵ Te Jèsús ní xáhaⁿ-gã xii-güedé:

—Ío quíhi iní-ndó cùndecu-ndo cuendá sá vã yõo dandàhú ñáhá xii-ndo.

⁶ Chi ío cuéhé cue tée coo ñuyúu te danàni-güedé méé-güedẽ dàtná nánì-í, te

cachí-güedé: “Yúhú cùu-í Crístú Yaa ní tendaha Yã Ndiõxí véxi ñuyúu-a”, duha cachí-güedé. Te sá dúcáⁿ cãháⁿ-güedé te ío vãi ñáyiu dandàhú-güedé.

⁷ Te òré ná nihí-ndó tnúhu sá nàá-güedé ndëni ní cuu, te vá yùhú-ndó chi dacuití sã dúcáⁿ càda-xi, dico vátá sáá-gá nduu nàa ñuyúu òré ducaⁿ càda-xi.

⁸ Chi cue tée ìⁿ nacióⁿ nàá-güedé ndihí cue tée ìngá nacióⁿ, te titní ñuu ngüita-güedé nàá-güedé, te titní xichi ñuyúu nĩhi vñhi tnáa, te titní tucu xichi ñuyúu coo tnamá, te ío-gá cuéhé sã yãha ñáyiu. Te nchaa sá dúcáⁿ càda-xi-áⁿ cúu-xí tnündòho sá vítná vãha vãha quësaha-xi sácúu-xí cuè ñáyiu ndècu ñuyúu-a.

⁹ Dico nchòhó ío quíhi iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá ñáhã-yu xii dava-ndo núu cuè tée cùchiuⁿ, te candeca ñaha-güedẽ xii-ndo quíhíⁿ xití veñúhu-güedé, te yácáⁿ caniha-güedẽ xii-ndo. Te quíhíⁿ-ndó núu cuè tée yíndaha nacióⁿ àdi núu dàva-gá cue tée cùnuu sá cuendá-í, te nchòhó nihí-ndó nàcuáa cada-ndo cãháⁿ vãha-ndo cuendá-í núu-güedẽ.

¹⁰ Te cùmání-gã sáá nduu nàa ñuyúu-a te sa cuténuu tnúhu-í ni càa xico ñuyúu-a, te tnúhu-áⁿ cãháⁿ-xi nàcuáa naníhí tãhú ñáyiu.

¹¹ Te òré ná candeca ñaha ñáyiu xii-ndo quíhíⁿ núu cuè tée cùchiuⁿ cuáha cuendá ñáhã-yu, te òré vátá sáá-gá-ndó núu-güedẽ te vá cánì iní-ndó núu nása cunduuy tnúhu cùñaha-ndo xii-güedé. Chi òré-nã te Yã Ndiõxí dacàhu iní ñáhá-gã xii-ndo nása cunduuy tnúhu cùñaha-ndo xii-güedé, te diu-ni tnúhu sá dacàhu iní ñáhá-gã-áⁿ cùñaha-ndo xii-güedé. Te ñá díu mèe-ndo cãháⁿ-ndó chi Espiritú Yã Ndiõxí cãháⁿ-xi yuhu-ndo.

¹² Te dava cue tée cuáha cuendá-güedé ñaní-güedé núu cuè tée cùchiuⁿ cuendá cahni ñaha-güedẽ. Te dava cue tée cùu tátá diu-ni ducaⁿ càda-güedé cuáha cuendá-güedé déhe-güedé núu cuè tée cùchiuⁿ. Te dava cue tée cùu déhe cuu úhú iní-güedé tátá-güedẽ ndihí nãná-güedẽ, te cuáha cuendá ñáhá-güedẽ xii-yu núu cuè tée cùchiuⁿ cuendá cahni ñaha-güedẽ xii-yu.

13 Te ío cuéhé ñáyiú cuu úhú iní ñáhă-yu xii-ndo sã cuëndá-í, dico nchaa nchòhó ñáyiú na càda ndee-ni iní canchicúⁿ nihnu ñaha-ni xii-í te naníhí tãhú-ndó.

14 "Te ndíi Dániél téé ní xóo cáháⁿ tnúhu Yá Ndióxi ndéé sanaha ní chídó tnùní ndíi núú tütú ndíi cuëndá ñⁿ sã dáquée tíhú Yá Ndióxi cundecu ñⁿ xichi núú ñà túú tàú-xi cundecu-xi, te xiãⁿ cada-xi sã vã cundècu-gá ni ñⁿ ñáyiú xiãⁿ. Te cada cuëndá váha-ndo nàcuáa ní cáháⁿ ndíi, chi nduu na quíní-ndó xiãⁿ cundecu-xi ñⁿ xichi núú ñà túú tàú-xi cundecu-xi, te dàvá-áⁿ nchaa ñáyiú xíndecu distritú Júdeá xíní ñùhu-xi cunú-yu quíhíⁿ-yu xití yucu.

15 Te nchaa ñáyiú ndáa ndódó dìquí vehé-xí vã ndíhu-gá-yu vehé-yu quehéⁿ-yu ñⁿ ndachíuⁿ-yu canehé-yu quíhíⁿ.

16 Te nchaa ñáyiú cuáháⁿ yucu ni vã nùhú-gá-yu vehé-yu cúnúquehéⁿ-yu dóó-yu.

17 Te ndàhú ní cuu nchaa ñáyiú dìhí ñùhú dèhe-xi, ndíhi cue ñáyiú dìhí xíndeca déhe vitna sàdi na saá nduu dùcaⁿ cada-xi!

18 Te nchòhó ío chí càcáⁿ táhú núú Yá Ndióxi cuëndá sã vã dúcáⁿ ndòho-ndo yóo quidé víxiⁿ-xi.

19 Chi dàvá-áⁿ coo tnúndòho cahnu vihi ñuyíú, te vátá ñⁿ nduu-gá coo tnúndòho cahnu vihi-áⁿ ndéé cúnahá ní cadúha Yá Ndióxi ñuyíú, chi diu-ni dàvá-áⁿ coo tnúndòho cahnu vihi-áⁿ, te ni núú cuáháⁿ núú vèxi vã cóo-gã tnúndòho-áⁿ.

20 Te Yá Ndióxi càchí-gá sã vã ño vài nduu coo tnúndòho cahnu vihi-áⁿ ñuyíú sã cuëndá nchaa ñáyiú ní cáháⁿ-gá cundecu ndíhi-gá. Te núú vài nduu na coo tnúndòho-áⁿ, te vã yóo cácu nihnu.

21 "Te dàvá-áⁿ cñaha ñáyiú xii-ndo: "Chí cundèhe iha, chí iha ní quexio Cristú Yaá ní tendaha Yá Ndióxi véxi ñuyíú-a", duha cúnahá-yu xii-ndo. Àdi quesahá-yu: "Chí cundèhe yacáⁿ chí yacáⁿ ndécú-gã", quesahá-yu. Te vã quíndáá iní-ndó tnúhu càháⁿ-yu.

22 Te coo cue téé danàni-güedé méé-güedé dàtná nàni-í te cachí-güedé sã cúu-güedé Yaá ní tendaha Yá Ndióxi véxi ñuyíú-a. Te dava-güedé cachí-güedé sã cúu-güedé cue téé càháⁿ tnúhu Yá Ndióxi dico ñã ndàa

sã cúu-güedé cue téé càháⁿ tnúhu-gá, te cada-güedé títñí núú sã vã yóo tnàhí ndàcu cada cuendá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáháⁿ Yá Ndióxi cundecu ndíhi-gá.

23 Te vitna ío váha cuáha-ndo cuëndá, te quíhí iní-ndó cundecu-ndo, chí nchaa sa ní dátúha ñaha-í xii-ndo.

Nàcuáa cada-xi òré quixi tucu Téé cùu ñani tnáhá nchaa ñáyiú

(Mt. 24:29-35,42-44; Lc. 21:25-36)

24 "Te nà váha-ni coo tnúndòho cahnu vihi-áⁿ, te vã dáyhé-gá nchícanhii te ni vã dáyhé-gá yóo.

25 Te ngoyo nchaa chódíní ndéé andíu, te quidi-xi andíu.

26 Te dàvá-áⁿ quíní ñáhá nchaa ñáyiú xii yúhú Téé cùu ñani tnáhă-yu ncháa-yu quee-í andíu quixi-í ichi xití vícò, te quíní-yu sã ño càhnu cuu-í, te quide-í nchaa sã vãha.

27 Te tendaha-í cue espíritú xínú cuèchi núú-í quíhíⁿ-xi nadatàcá-xi nchaa ñáyiú ní cáháⁿ-í chitnahá ñáhá xii-í xíndecu ní càa xico ñuyíú.

28 "Te cundehe-ndo nàcuáa quide yutnu ngúxí, chí yutnu-áⁿ ndúú yùte núú díté-xi te nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni.

29 Te ducaⁿ sãtnahá-xi cada-xi òré ná quíní-ndó càda-xi nchaa nacúáa ní cáháⁿ-í, te cutnùní iní-ndó sã sã ní cuyatni víi-ná nduu nàa ñuyíú.

30 Te na càchí tnúhu ndáá-í xii-ndo sã òré vátá cúu-gá cue ñáyiú xíndecu ñuyíú-a vitna, te cada-xi nchaa nàcuáa ní cáháⁿ-í.

31 Te andíu ndíhi ñuyíú-a chí ndíhi nihnu-xi, dico tnúhu-í chí vã ndíhí nihnu-xi chí cùu-xi tnúhu ndáá.

32 "Dico ñã túú cùnùní ná nduu quixi tucu-í, te ni ñà túú cùnùní ná òré chí vã yóo xíní, te ni cuè espíritú xínú cuèchi núú Yá Ndióxi ñã túú xíní-xi ná nduu quixi-í, te ni mèe yúhú téé cùu Déhe Dútú Ndióxi ñã túú xíní-í ná nduu quixi tucu-í, chí ñⁿdií díi-ni mee Tãtà-í Dútú Ndióxi xíní-gá núu ná nduu quixi-í.

33 "Te nchòhó xíní ñùhu-xi sã ño quíhí iní-ndó cundecu-ndo, te cáháⁿ ndíhi-ndo Yá

Ndiòxí, chi ñá túú xìní-ndó nă nduu quixi tucu-í.

³⁴ Te na cächí tnúhu-í xii-ndo cuendá ñí tée cuení quingaca cuu xica. Te tée-án cùmání-gă quee-dé vehe-dé te ní xáhaⁿ-dë xii cue tée xinu cuechi núú-dë sá ná cáda cuendá-güedé vehe-dé. Te ní sáñaha-dë xii-güedé ndí dííⁿ núú-güedé chiúⁿ cada-güedé. Te ní xáhaⁿ-dë xii tée ndëe yuyèhe sá ná cündecu túha-ni-dé yuyèhe ndéé nàsáá-dé.

³⁵ Te duha nduu tnúhu cáhán-í cuendá nchòhó cundecu túha-ndo, chi ñá túú xìní-ndó nă nduu te ní ñá túú xìní-ndó nă òré quixi tucu yúhú Yaá cúú Xítohó-ndó, núú òré sa ní cundiquíⁿ, àdi dava niú, àdi oré sa ní cana uuⁿ líhi, àdi oré sa ta cùditó cuáhán, núú xiáⁿ ío chí cündecu túha.

³⁶ Te duha cáhán-í chí na cuáhán òré ñá túú nă yíhí ín-ndó quèxio-í, te ñá túú ndëcu túha-ndo.

³⁷ Te dàtná-ni xáhaⁿ-í xii nchòhó sá cündecu túha-ndo, te diu-ni ducaⁿ xáhaⁿ-í xii nchaa dava-gá ñáyiú sá cündecu túha-yu –cächí-gá xáhaⁿ-gă xii-güedé.

14

Ndücu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání ũú-gá nduu te quesaha vico pascuá, vico xèxi ñáyiú pàá sá ñá túú yíhi levadurá. Te cue dútú cúnùu, ndihí cue tée dàcuaha ñaha xii ñáyiú nchaa tnúhu ní chídó tnùn-í ndí Moisés ndúcú-güedé nàcuáa cada-güedé dandáhú-güedé Jèsús cuendá tní ñaha-güedé xii-gá te cahni ñaha-güedé.

² Te ní xítnàha-güedé:

–Váha-gá sá vă tníí-ó Jèsús mei nduu vico, chí núú ducaⁿ na càda-o te ío dusaⁿ càda ñáyiú –cächí-güedé xítnàha-güedé.

Íñ ñadìhí chíhí-án àcítí díquí Jèsús

(Mt. 26:6-13; Jn. 12:1-8)

³ Te Jèsús ndécú-gă ñúú Bètaniá vehe ñí tée nani Xímú, tée ní tnahá cuéhé sá dátèhyú nihnu-xi yíqui cùnù-ó. Te yíhi Jèsús mèsá xéxí-gă ní quèxio ñí ñadìhí néhé-án ñí sá ní cuáha yúú văha yúú nání àlabastrú, te xítí xiáⁿ ñúhú àcítí sàháⁿ tnámí sá nání nărdú sá

ío ndèyáhu, te ní táhú-án xiáⁿ te acítí ñúhú xítí-xi-án ní sódo-aⁿ díquí Jèsús.

⁴ Te ñí ũú cue tée xíndecu-án ní cudééⁿ-güedé sá dúcáⁿ ní quide-aⁿ, te ní xítnàha-güedé:

–Ñá túú quide váha ñaha-án dácán quidé-án, chí íí ní dácuita-aⁿ acítí váha-án.

⁵ Chí váha-gá núu cuyáhu acítí-án sá úní ciëndú díhúⁿ denàriú, te díhúⁿ sá cùyáhu acítí-án cuu cuendá ñáyiú ndàhú ní cùu –cachí-güedé xítnàha-güedé.

Te ní tenáa-güedé ñaha-án sá dúcáⁿ ní quide-aⁿ.

⁶ Te Jèsús ní xáhaⁿ-gă xii-güedé:

–Chí dáñá, vá dásatú-ndó ín-í ñadìhí-a, chí sá ní quide ñaha-aⁿ xii-í cúú-xí ñí sá văha.

⁷ Chí cue ñáyiú ndàhú ducaⁿ-ni cùtnahá ñáyiú-án tnuú-ndó, te nani òré cächí ín-ndó te chindee-ndö-yu. Dico yúhú chí vá ncháá nduu cundecu ndihí ñaha-í xii-ndo ñúyíú-a.

⁸ Te ñadìhí-a ní quide-aⁿ ñí sá văha ndéé není ní ndacu-aⁿ, chí sá dúhá ní quide ñaha-aⁿ xii-í ní chíhi ñaha-aⁿ àcítí, te xiáⁿ cada ín-ndó sá sá quide túha-aⁿ yíqui cùnù-í cuendá quíndúxi-xi.

⁹ Te na cächí tnúhu ndáá-í xii-ndo sá ndëni ní cuu nihí ñuyíú ná cáhán ñáyiú tnúhu-í, te cáhán-yu tnahá cuendá ñadìhí-a cuendá quini nchaa ñáyiú nàcuáa ní quide-aⁿ, te ducaⁿ vă nàcuána-yu –cächí-gá xáhaⁿ-gă xii-güedé.

Té Jùdás ndúcú-dë nàcuáa cada-dé cuáha cuendá-dé Jèsús núú cuè tée cùu úhú ín-í ñáhá xii-gá

(Mt. 26:14-16; Lc. 22:3-6)

¹⁰ Te té Jùdás Iscarioté ní sáhán-dé ní ndatnúhu-dé ndihí cue tée cùu dútú cúnùu sá cuáha cuendá-dé Jèsús núú-güedé, te núú tnahá té Jùdás-án cúú ùxúú tnahá cue tée xica cuu ndihí-gá ní cùu.

¹¹ Te òré ducaⁿ ní ndatnúhu-dé ndihí-güedé, te ío ní cudí ín-í-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jùdás-án ní ngúita-dé ndúcú-dë nàcuáa cada-dé cuáha cuendá-dé Jèsús núú-güedé.

Cùdini Jesús ndihi cue té xica cuu ndihi-gá (Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu ní quesaha vico pascuá, vico ñá túú xèxi ñáyiú pàá sá ñà túú yìhi levadurá, te ñu-ni nduu-áⁿ sáhní-güedé ìⁿ mbéé líhli xèxí-yu nduu vico pascuá-áⁿ. Te cue téé xica cuu ndihi Jesús ní xicáⁿ tnúhú-güedé núú-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n ñúu ndèé cáá vèhe cuiní-n càda túha-ndí sá cùdini-o sacuaa nduu vico pascuá —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gá xii úú-ni tnàhá cue téé xica cuu ndihi-gá:

—Chí cuàháⁿ xití ñuú-áⁿ, te yacáⁿ naníhí-ndó ìⁿ téé tànehe yóó ndute, te téé-áⁿ cándèndaha-ndo-dé quíhíⁿ.

¹⁴ Te núú ndédacàa vehe na ndíhu-dé te xíáⁿ quíhu-ndo. Te cúñaha-ndo xii xítóhó vehe-áⁿ: “Yaá cúú Mèstrú càchí-gá sá ñúu ndédacàa xichi xití vehe-n cuñaha ñúu-n xii-gá cùdini-gá ndihi cue téé xica cuu ndihi-gá sacuaa nduu pascuá”, duha cúñaha-ndo.

¹⁵ Te dàtnùní danèhé ñáhá-dé xii-ndo ìⁿ quartú cáhnú càa núú ñínu, chí vehe yòdo tnaha cuu-xi, te sa ní quide túha-dé nchaa sá nándíhi, te nchòhó dícó-ná comidá cada túha-ndo cùdini-o —cachí-gá xáhaⁿ-gá xii-güedé.

¹⁶ Te cue téé-áⁿ ní xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndihi-gá sacuaa nduu vico pascuá-áⁿ.

¹⁷ Te sáta ní cundiquíⁿ te ní quexìo Jesús ndihi ndí ùxúú cue téé xica cuu ndihi-gá.

¹⁸ Te cuánguihu-gá mèsá ndihi-güedé cuèndá cùdini ndihi ñaha-gá xii-güedé, te òré yíhí-gá mèsá ndihi-güedé, te xáhaⁿ-gá xii-güedé:

—Na càchí tnúhu ndáá-í xii-ndo sá ìⁿ nchóhó cue téé xèxi ndihi ñaha xii-í cuáha cuèndá ñáhá-ndó núú cuè téé cùu úhú iní ñáhá xii-í —càchí-gá xáhaⁿ-gá xii-güedé.

¹⁹ Te sá dúcáⁿ ní xáhaⁿ-gá xii-güedé, te nchaa-güedé ní ngüíta-güedé cùndiyí-güedé. Te da ìⁿ da ìⁿ-güedé ní ngüíta-güedé xicáⁿ tnúhú-güedé núú-gá, te xáhaⁿ-güedé xii-gá:

—¿Ñá díú yùhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gá xii-güedé:

—Ñu-ni ìⁿ nchòhó cue téé úxúú xicá cùu ndihi-í, téé na dàquèndaha còhó òré dàquèndaha-í, téé-áⁿ cuáha cuèndá ñáhá-dé xii-í núú cuè téé cùu úhú iní ñáhá.

²¹ Te yúhú Téé cùu ñaní tnàhá-ndó nchaa-ndo ñuhu ichi-í cuáháⁿ-í ndoho-í nàcuáa càháⁿ-xi núú tütú Yá Ndiòxí. Dico ndàhú ní cuu téé ducaⁿ na cuáha cuèndá ñáhá xii-í núú cuè téé cùu úhú iní ñáhá, chí váha-gá sá vǎ cacú tée-áⁿ cundecu-dé ní cùu, te ñá díú sá ní cacu-dé te ducaⁿ càda-dé —càchí-gá xáhaⁿ-gá xii-güedé.

²² Te ñini cùdini cue téé xica cuu ndihi Jesús ní queheⁿ-gá pàá, te ní ndacáⁿ táhú-gá núú Yá Ndiòxí, te dàtnùní ní táhú cuèchi-gá, te ní ngüíta-gá dácáhnü ñaha-gá xii-güedé, te xáhaⁿ-gá:

—Chí quéhéⁿ pàa-a caxi-ndo, te cada iní-ndó sá cúú-xí dàtná yiquí cùñú-í —càchí-gá xáhaⁿ-gá xii-güedé.

²³ Te ní queheⁿ-gá vàsú ñúhú ndùdí ndéhé yoho yàha stilé, te ní ndacáⁿ táhú-gá núú Yá Ndiòxí, te dàtnùní ní ngüíta-gá sáñaha-gá xii-güedé cuèndá coho-güedé luha luha sá ñúhú xití-xi, te nchaa-güedé ní xihí.

²⁴ Te ní xáhaⁿ-gá xii-güedé:

—Ndudí ndéhé yoho yàha stilé-a cada iní-ndó sá cúú-xí dàtná níñí-í sá catí òré cahni ñaha-güedé xii-í. Te sá dúcáⁿ catí níñí-í xíáⁿ cutnùní ndáá sá Yá Ndiòxí cada-gá ingá núú sá váha sá cúú-xí vǎi ñáyiú dàtná ní cachí-gá cada-gá.

²⁵ Te na càchí tnúhu ndáá-í xii-ndo sá vítná-ná duha xihí-í ndudí ndéhé yoho yàha stilé-a te vá cóhó-gá-í, dico na sàá nduu cùndecu-í núú ndécú Yá Ndiòxí táxí tnùní-gá, te dàvá-áⁿ cada iní-í sá dàtná sá cóhó tucu-í chí ío cudíí iní-í —càchí-gá xáhaⁿ-gá xii-güedé.

Jèsús càháⁿ-gá sá tǎ Pèlú cúñaha-dé xii ñáyiú sá ñà túú xini ñáhá-dé xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ìⁿ ndudú ndihi cue téé xica cuu ndihi-gá, te dàtnùní ní xica-gá cuáháⁿ-gá ndihi-güedé yucu Òlívú.

²⁷ Te yacáⁿ ní xáhaⁿ-gá xii-güedé:

—Na càchí tnúhu-í xii-ndo sã ncháá-ndó daña nihnu ñaha-ndo xii-í níú vitna, chi quee ndáá-xi nàcuáa càháⁿ-xi núú tütú Yã Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dë ndihi-güedi cuténuu”, duha càchí-xi núú tütú-gá.

28 Dico na cùú-í te ndoto-í te codonùu-í núú-ndó quíhíⁿ distritú Galileá —càchí-gá xáhaⁿ-gã xii-güedé.

29 Te té Pèlú ní xáhaⁿ-dë xii-gá:

—Te cuëi nchaa-güedé ná dándóo ñaha-güedé xii-n, dico yúhú chi vá dándóo ñaha-í xii-n —càchí-dé xáhaⁿ-dë xii-gá.

30 Te Jèsús ní xáhaⁿ-gã xii-dé:

—Na càchí tnúhu ndáá-í xii-n sã níú vitna cùmání-gã cana líhi úú xito, te úní xito cáháⁿ-n núú ñäyiu sã ñà túú xìní ñáháⁿ-n xii-í —càchí-gá xáhaⁿ-gã xii-dé.

31 Dico té Pèlú ní cáháⁿ ñíí-dé, te xáhaⁿ-dë xii-gá:

—Cuëi na cùú ndihi ñaha-í xii-n dico vá càháⁿ-í núú ñäyiu sã ñà túú xìní ñáháⁿ-í xii-n —càchí-dé xáhaⁿ-dë xii-gá.

Te nchaa dava-gá cue tée xica cuu ndihi-gá diu-ni ducaⁿ ñí xáhaⁿ-güedé xii-gá.

Jèsús càháⁿ ndihi-gá Yã Ndiöxí #ⁿ xichi núú nání Gètsemaní

(Mt. 26:36-46; Lc. 22:39-46)

32 Te Jèsús cuáháⁿ-gá ndihi cue tée xica cuu ndihi-gá #ⁿ xichi núú nání Gètsemaní. Te òré ní quexìo-gá ndihi-güedé xiáⁿ, te ní xáhaⁿ-gã xii-güedé:

—Chí cúnúçòo iha cundetun-ndo na quíhíⁿ-í yàcán cáháⁿ ndihi-í Yã Ndiöxí —càchí-gá xáhaⁿ-gã xii-güedé.

33 Te ndèca-gá té Pèlú, ndihi té Jàcobó, ndihi té Juàá cuáháⁿ, te ñà túú tnàhí-gá cúú vaha iní-gá te ní ngüíta-xi súúni ndihú iní-gá.

34 Te ní xáhaⁿ-gã xii cue tée úní-án:

—Súúni ndihú iní-í dàtná sá cùú-í, te chí quéndóo iha te vá cùdú-ndó —càchí-gá xáhaⁿ-gã xii-güedé.

35 Te sa ñunchíí luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndihi-gá Tãtã-gã Dútú Ndiöxí sá núu vá cündèe iní-gá taunihnu ñaha-gã xii-gá cuendá nchaa nàcuáa yáha-gá.

36 Te òré càháⁿ ndihi Jèsús Tãtã-gã Dútú Ndiöxí, te xáhaⁿ-gã:

—Yòhó tãtã mée-í, nchaandi túhú sá vaha ndàcu-n quide-n, te càháⁿ ndàhú-í núú-n núu vá cündèe iní-n tàunihnu ñaha-n xii-í cuendá sá vá ndóhò-í ná sáá òré, dico vá càdá-n nàcuáa càchí iní mée-í chi cada-n nàcuáa càchí mee-n —càchí-gá xáhaⁿ-gã xii Tãtã-gã Dútú Ndiöxí.

37 Te sãtã ñí yáha ní cáháⁿ ndihi-gá Tãtã-gã Dútú Ndiöxí, te cuánuhú-gá núú ñí dándóo-gá cue tée úní-án, te xixídí-güedé òré ní nasáá-gá, te ní xáhaⁿ-gã xii té Pèlú:

—Xímú, ¿náa sama xidí-n? ¿Náa ñà cündèe tnahi núú-n vá cùdú-ñi-n cuèdicó #ⁿ òré-ãⁿ? —càchí-gá xáhaⁿ-gã xii-dé.

Te ní xáhaⁿ tucu-gá xii-güedé:

38 —Te chí quéndóo tucu, te cuhuⁿ iní-ndó vá cùdú-ndó, te cáháⁿ ndihi-ndo Yã Ndiöxí cuendá sá vá dácàháⁿ ñáhá yùcu ñávãha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sã nchòhó cuíní-ndó càda-ndo nchaa nacuáa càháⁿ-í dicó-ñi sá ñà túú nihí ndéé-ndó —càchí-gá xáhaⁿ-gã xii-güedé.

39 Te Jèsús ní xica tucu-gá cuáháⁿ-gá cáháⁿ ndihi-gá Tãtã-gã Dútú Ndiöxí, te diu-ni nàcuáa ní xáhaⁿ-gã díhna xáhaⁿ tucu-gá.

40 Te òré ní yáha ní cáháⁿ ndihi-gá Tãtã-gã Dútú Ndiöxí, te cuánuhú tucu-gá núú xíndecu cue tée úní xicá cùu ndihi-gá-án, te xidí-ñi tucu-güedé òré ní nasáá-gá, te ducaⁿ ñí quide-güedé chí súúni ñùhu saní núú-güedé, te ñà ní ñhí-güedé tnúhu cúñaha-güedé xii-gá òré ní nasáá-gá.

41 Te ní sáháⁿ tucu-gá xito cùu úní ní cáháⁿ ndihi-gá Tãtã-gã Dútú Ndiöxí, te òré ní nasáá tucu-gá núú xíndecu-güedé, te xáhaⁿ-gã xii-güedé:

—¿Te náa xidí-ñi tucu-ndo?, te vitna vá cùdú-gá-ndó chí sa ní sáá òré cuáha cuendá ñáhá-güedé xii yúhú Téee cùu ñaní tnáhá-ndó nchàa-ndo núú cuè tée ndècu ichi cuehé ichi duha.

42 Te vitna chí ndácòo na quíhíⁿ-ó chí sa véxi téee cuáha cuendá ñáhá xii-í núú cuè téee cùu úhú iní ñáhá —càchí-gá xáhaⁿ-gã xii-güedé.

Ní tn#-güedé Jèsús ndécá ñàha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

43 Te càháⁿ dúcáⁿ-ní Jèsús ní quexìo té Jùdás. Te núú tnàhá téé-áⁿ cúú ùxúú tnàhá cue téé xìca cuu ndihì-gá. Te ndihì-dé vài cue téé ní quexìo, te dava-güedé xïnehe-güedé machití te dava-güedé xïnehe-güedé carrutí. Te cue téé-áⁿ nì tendaha ñàha cue dútú cúnùu ndihì cue téé dàcuaha ñàha xii ñáyiú nchaa tnúhu ní chídó tnùnì ndíi Moisés, ndihì cue téé cùu sacuéhé núú ñáyiú isràél.

44 Te té Jùdás téé cuáha cuèndá ñàhá xii Jèsús sa ní xítñùhu-dé cue téé-áⁿ nàcuáa cada-dé cuáha cuèndá ñàhá-dě xii Jèsús núú-güedě. Te duha ní xáhaⁿ-dě xii-güedé:

—Cundehe-ndo tée na tèyuhu-í, te téé-áⁿ tnì-ndo-dě chi téé-áⁿ cúú-dě téé ndèé iní-ndó, te ío quihì iní-ndó càndeca-ndo-dé quihìⁿ —duha ní xáhaⁿ-dě xii-güedé.

45 Te òré ní quexìo té Jùdás ndihì cue téé-áⁿ núú ndécú Jèsús, te ní xáhaⁿ-dě xii-gá:
—Mèstrú —càchí-dé xàhaⁿ-dě xii-gá.

Te ní teyuhu ñàha-dé.

46 Te nchaa cue téé ndihì-dé-áⁿ nì tnì-güedé Jèsús cuèndá càndeca ñàha-güedé xii-gá quihìⁿ.

47 Te ìⁿ cue téé cùndihì Jèsús ní tava-dé machití-dé, te ní xehndé-ni-dé ìⁿ xio lóho ìⁿ téé xínu cuechi núú dútú cúnùu, te ní quendeé duuⁿ lóho téé-áⁿ.

48 Te Jèsús ní xáhaⁿ-gã xii cue téé ní tnì ñàha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tnì ñàha-ndo xii-í, dàtná quidé-ndó ìⁿ ñadúhú quidé ñàha-ndo xii-í.

49 Te nchaa-ni nduu ní xiní-ndó nì xíndecu-í xití veñúhu càhnu sá ïo cùnùu ní xóo danèhé-í ñáyiú, te ñá túú ní tnì ñàha-ndo xii-í. Dico dàcuítí sã dúhá yáha-í cuèndá quee ndáá-xi nàcuáa càháⁿ-xi núú tütú Yá Ndiòxí —càchí-gá xàhaⁿ-gã xii-güedé.

50 Te nchaa cue téé xìca cuu ndihì-gá ní xínu-güedé ní dándóo ñàha-güedé xii-gá.

Ìⁿ téé cuechi nì xínu-dé

51 Te ìⁿ téé cuechi ndëndaha-dě Jèsús cuáháⁿ, te lavichi-dě, ìⁿ-ni dóo yádí yídúcúⁿ nuu-dé nihì-dé, te ní tnì ñàha-güedé xii-dé,

52 dico ní ndacu-dé ní quenuñ-dě te ní dándóo-dé dóo yídúcúⁿ nuu-dé-áⁿ nì xínu-dé.

Jèsús ndécú-gã jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tnì ñàha xii Jèsús ndécá ñàha-güedé xii-gá cuáháⁿ núú tée cùu dútú cúnùu-gá. Te xíaⁿ nì tacá nchaa dava-gá cue téé cùu dútú cúnùu, ndihì cue téé cùu sacuéhé núú ñáyiú isràél, ndihì cue téé dàcuaha ñàha xii-yu nchaa tnúhu ní chídó tnùnì ndíi Moisés cuèndá cada-güedé jùndá.

54 Te té Pèlú xica xìca-ni nchicúⁿ ñàhá-dě xii-gá cuáháⁿ ní sáa-dé ndéé quehé vehe núú ndécú tée cùu dútú cúnùu-gá-áⁿ, te xíaⁿ nì ngóo teté-dé yuhu nùhú ndihì cue téé cùu poleciá.

55 Te cue téé cùu dútú cúnùu ndihì nchaa dava-gá cue téé xíndecu jùndá ndúcú-güedé ñáyiú dacáa ìⁿ cuéchi díquí Jèsús cuèndá ducaⁿ ñihí-güedé nàcuáa cada-güedé cahni ñàha-güedé xii-gá, dico ñá túú ní ndàcu-güedé.

56 Te cuèi vài ñáyiú dàcaá-yu cuéchi díquí-gã dico mee-ni sã nì cahu iní méé-yu ní cáháⁿ-yu, chi tucu càháⁿ ìⁿ tucu càháⁿ ìⁿ-yu.

57 Te davá-yu ní ndacuñí-yu te ní ngüíta-yu dàcaá-yu ìⁿ cuéchi neñùú díquí-gã, te xähãⁿ-yu xii nchaa cue téé cùnùu:

58 —Nchúhú ní tecú dóho-ndí càchí-dé sã dängòyo-dé veñúhu càhnu sá ïo cùnùu sã nì dácáá cuè téé ñuyíú-a, te dandáa tucu-dé ingá veñúhu saa, ñu-ni núú cáá tnàhí veñúhu-áⁿ te xití úní-ni nduu sa nadaxínu-dé, te vá cúú-gã-xi veñúhu sá nì dácáá cuè téé ñuyíú-a, duha càchí-dé ní tecú dóho-ndí —càchí-yu xähãⁿ-yu xii-güedé.

59 Dico ní dùcaⁿ ñá túú ní cùu ìⁿnuú-yu nchaa tnúhu ní cáháⁿ-yu.

60 Te téé cùu dútú cúnùu-gá ní ndacuñí-dé tnuú nchaa ñáyiú, te xàhaⁿ-dě xii Jèsús:

—¿Ná cuèndá duha ndùu tnúhu càháⁿ ñáyiú-a cuèndá-n? Te cáháⁿ nùu nása ndùu tnúhu cáháⁿ-n —càchí-dé xàhaⁿ-dě xii-gá.

61 Dico Jèsús ñá túú tnàhí ní cáháⁿ-gá. Te téé cùu dútú cúnùu-gá-áⁿ nì xáhaⁿ tucu-dé xii-gá:

—Cuñí-í cachí tnúhu-n xii-ndí nùu sá díú Cristú Déhe Yá Ndiòxí Yáá ní tendaha-gã

véxi ñuyíú-a cùu-n. Te ñiú Yá Ndiõxí cúú-gă Yaá quidé càhnu-ndí –càchí-dé xăhaⁿ-dĕ xii-gá.

⁶² Te Jèsús ní xáhaⁿ-gă xii-dé:

–Ñiú Yaá-áⁿ cúú-í, te na càchí tnúhu-í xii-ndo sã sã nduu te quiní-ndó yǔhú Tée cùu ñaní tnáhá-ndó nchàa-ndo cunucóo-í xio cùha Dútú Ndiõxí Yaá ndácú quide nchaandi túhú sá văha. Te dàvá-áⁿ quiní ñáhá-ndó xii-í quee-í andiú quixi-í ichi xití vícô –càchí-gă xăhaⁿ-gă xii-dĕ.

⁶³ Te dútú cúnùu-gă-áⁿ ñi ndátá-dĕ dóó cání ñihnu-dé cuendá sá ñà túú ní tnáhá iní-dé năcuáa ní cáháⁿ Jèsús, te ní xáhaⁿ-dĕ xii nchaa cue tée xĩndecu jùndá:

–Ñá túú-gă xini ñihu-xi cue tée cáháⁿ nũ ndáá sá ndècuéchi-dé àdi ñá túú ndècuéchi-dé.

⁶⁴ Chi sa ní xĩndedóho-o năcuáa ndùu tnúhu ní cáháⁿ-dĕ ní cáháⁿ úhú-dé cuendá Yá Ndiõxí, te nchaa-ndo chí cáháⁿ vitna núu nása sàni iní-ndó cùnduu cuendá tée-a –càchí-dé xăhaⁿ-dĕ xii-í-güedé.

Te nchaa-güedé ní cachí-güedé sá ná cúú-dé.

⁶⁵ Te dava-güedé ní ngüíta-güedé ní tiú dí ñáhá-güedé xii-gá, te ní dádăhu-güedé núú-gă, te ní ngüíta-güedé cáñha-güedé xii-gá, te xăhaⁿ-güedé:

–¡Cáháⁿ ná cótó ñă cúú tĕe ní caniha xii-n! –cachí-güedé xăhaⁿ-güedé xii-gá.

Te cue tée cùu poleciá ní cani-güedé núú-gă.

Té Pèlú càháⁿ-dé núú ñăyiu sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú ñinu quide-güedé jùndá, chí vehe yòdo tnaha cuu-xi, te té Pèlú núcôo-dé quehé vehe-áⁿ. Te ñiⁿ xíchí xínú cuèchi núú dútú cúnùu-áⁿ ñi quexio-xi núú núcôo té Pèlú.

⁶⁷ Te òré ní xini ñáhá-xi xii-dé núcôo teté-dé yuhu nùhú, te ní xĩndéhé ñaha váha-xi xii-dé, te xăhaⁿ-xi:

–Yòhó tnáhá-n cùu-n tée xica cuu ndihí Jèsús tée ñuu Nazàrét –càchí-xi xăhaⁿ-xi xii-dé.

⁶⁸ Te té Pèlú ní xáhaⁿ-dĕ xii-xi:

–Yúhú ñá túú xini-í tée-áⁿ, te ñi ñà túú cùnùní iní-í nása ndùu tnúhu càháⁿ-n –càchí-dé xăhaⁿ-dĕ xii-xi.

Te té Pèlú ní xica-dé cuáháⁿ-dé ndàa năcuáa nchii yuyèhe vehe-áⁿ, te ní cana ñiⁿ líhi.

⁶⁹ Te xíchí xínú cuèchi-áⁿ ñi xini ñáhá tùcu-xi xii-dé, te xăhaⁿ-xi xii nchaa ñăyiu xĩndecu-áⁿ:

–Ñiú tée-áⁿ tnáhá-dé xicá cùu-dé ndihí tée ndèca-güedé cuanguihu-a –càchí-xi xăhaⁿ-xi xii-yu.

⁷⁰ Dico té Pèlú ñá túú ní nũnuu tucu-dé sá xicá cùu-dé ndihí Jèsús. Te tna tnaa-ñi ní cuu sá dúcáⁿ ñi xáhaⁿ xíchí-áⁿ xii-dé, te ní xáhaⁿ tùcu dava cue ñăyiu xĩndecu-áⁿ xii-dé:

–Ndáá sá tnáhá-n cùu-n tée xica cuu ndihí tée ndèca-güedé cuanguihu-áⁿ chí cùu-n tée distritú Galileá, te cáháⁿ-n dàtná cáháⁿ-güedé –càchí-yu xăháⁿ-yu xii-dé.

⁷¹ Te té Pèlú ní xáhaⁿ-dĕ xii-yu:

–Nchacuiti Yá Ndiõxí sá yǔhú càháⁿ ndáá-í sá ñà túú xini-í tée càcunehe-ndo-áⁿ –càchí-dé xăhaⁿ-dĕ xii-yu.

⁷² Te òré-ñi-áⁿ ñi cana tucu líhi xito cùu úú, te òré-áⁿ ñi ndacu iní té Pèlú năcuáa ní xáhaⁿ Jèsús xii-dé sá cùmání-gă cana ñiⁿ líhi úú xito te úní xito cáháⁿ-dé núú ñăyiu sá ñà túú xini ñáhá-dĕ xii-gá. Te òré ducaⁿ ñi ndacu iní-dé năcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gă núú tĕ Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá ñi túndaá te cue tée cùu dútú cúnùu, ndihí cue tée cùu sacuéhé núú ñăyiu isràél, ndihí cue tée dàcuaha ñaha xii ñăyiu nchaa tnúhu ní chídó tnùní ndii Moisés, ndihí nchaa dava-gá cue tée cùnùu ní xĩndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tĕ Pilatú.

² Te té Pilatú ní xicáⁿ tnúhú-dĕ núú Jèsús, te xăhaⁿ-dĕ xii-gá:

–¿Ndáá sá díú-n cùu-n tée yìndaha ñaha xii ñăyiu isràél-áⁿ? –càchí-dé xăhaⁿ-dĕ xii-gá.

Te Jèsús ní xáhaⁿ-gă xii-dé:

–Ñiú-í yìndàha-í-yu –càchí-gă xăhaⁿ-gă xii-dé.

³ Te cue tée cùu dútú cúnùu dăcaa-güedé vâi cuéchi díquí-gă.

4 Te té Pilatú ní xícaⁿ tnúhú tùcu-dé núú-gã, te xãhaⁿ-dẽ xii-gá:

—Cáháⁿ, ná cuendá ñá cãháⁿ-n te cundehe nã ndéé duha titní cuéchi dàcaa díquí ñáhá cuè téa-xii-n —càchí-dé xãhaⁿ-dẽ xii-gá.

5 Dico Jèsús ñá túú tnàhí ní cãháⁿ-gá te té Pilatú ío ní cuñúhu-dé sá dúcáⁿ ñà túú tnàhí ní cãháⁿ-gá.

Cue ñáyiú xãhãⁿ-yu xii té Pilatú sá cáhni-dẽ Jèsús

(Mt. 27:15-31; Lc. 23:13-25; Jn. 18:38-19:16)

6 Te ndi tnahá nduu víco pascuá dácãcu té Pilatú ìⁿ téé yìhi vecaá chi ducaⁿ tnàhí quide-dé, te mee ñáyiú cãháⁿ-yu te núu ndédacãa téé yìhi vecaá-án cãcu-dé, te téé-án dácãcu-dé.

7 Te yìhi ìⁿ téé nàni Barrabás vecaá ndihí dava-gá cue téé cùndihí-dé. Te té Barrabás-án ñi sanu ichi-dé ñáyiú ñuú ingá ichi, te ní ngüíta-yu ndihí-dé ní cuu úhú iní-yu cue téé cùchiuⁿ, te ní sahani-dé ndíyi núu xíáⁿ ní chihí ñaha-güedẽ vecaá xii-dé.

8 Te nchaa ñáyiú ní sáháⁿ-yu núú tẽ Pilatú, te cãháⁿ ndáhú-yu núú-dé sá ná cáda nàhi-ni-dé dàtná quidé-dẽ.

9 Te té Pilatú ní xãhaⁿ-dẽ xii-yu:

—¿Cuíní-ndó sã dácãcu-í téé yìndaha ñaha xii ñáyiú isràél-ãⁿ? —càchí-dé xãhaⁿ-dẽ xii-yu.

10 Te ducaⁿ ñi cãháⁿ té Pilatú, chi ní cutnùní iní-dé sá dícó sá cuèdú iní cuè dútú cùnùu núu xíáⁿ ducaⁿ ñi quide-güedé ní sãha cuendá ñáhá-güedẽ xii Jèsús núú-dẽ.

11 Te cue dútú cùnùu ní xãhaⁿ-güedẽ xii nchaa ñáyiú sá ná cũñáhá-yu xii té Pilatú dácãcu-dé té Barrabás, te ní quidé-yu nãcuáa ní xãhaⁿ-güedẽ.

12 Te té Pilatú ní xícaⁿ tnúhú-dẽ núú-yu, te xãhaⁿ-dẽ xii-yu:

—¿Ná cuíní-ndó càda-í téé càchí-ndó yìndaha ñaha xii ñáyiú isràél-i? —càchí-dé xãhaⁿ-dẽ xii-yu.

13 Te nchaá-yu níhi ní cãháⁿ-yu, te xãhãⁿ-yu xii-dé:

—¿Cata caa-dé núú cùrúxí! —càchí-yu xãhãⁿ-yu xii-dé.

14 Te té Pilatú ní xãhaⁿ-dẽ xii-yu:

—¿Te ná cúú cuèchi ní quide-dé te núu ducaⁿ cuíní-ndó càda-í-dé-i? —càchí-dé xãhaⁿ-dẽ xii-yu.

Dico nchaá-yu uuⁿ-gá níhi ní cãháⁿ-yu, te xãhãⁿ-yu xii-dé:

—¿Cata caa-dé núú cùrúxí! —càchí-yu xãhãⁿ-yu xii-dé.

15 Te té Pilatú ní quide-dé nãcuáa ní xãhãⁿ-yu xii-dé cuendá sá cúdiu-dé núú-yu, te ní dácãcu-dé té Barrabás, te ní táuchíúⁿ-dẽ ní cani-güedé Jèsús ndihí ñi. Te sáta dúcáⁿ ñi quide ñaha-güedẽ xii-gá, te ní táuchíúⁿ-dẽ candeca ñaha-güedẽ quíhíⁿ cata caa ñaha-güedẽ xii-gá núú cùrúxí.

16 Te cue téé cùu sandadú ndéca ñaha-güedé xii-gá cuáháⁿ vechiúⁿ, te diu-ni xíáⁿ cúú vèhe téé cùu gobiernú. Te xíáⁿ ñi tacá nchaa dava-gá cue téé cùu sandadú.

17 Te xíáⁿ ñi dáculnú ñaha-güedé xii-gá ìⁿ dóo tìcuèhé víhí, te ní cadúha-güedé ìⁿ coróná iñu ní chihí-güedé díquí-gã.

18 Te ní ngüíta-güedé níhi cãháⁿ-güedé cúdíquí ndéé ñáhá-güedé xii-gá, te xãhaⁿ-güedé:

—¿Ío cãhnu cuu yohó téé yìndaha ñaha xii ñáyiú isràél! —càchí-güedé xãhaⁿ-güedé xii-gá.

19 Te cãni-güedé díquí-gã ndihí ìⁿ carrutí, te tiú díí ñáhá-güedé xii-gá, te ngüñí xítí-güedé núú-gã quidé-güedé sá néhé-güedé sá yìñùhu núú-gã dico ñá ndàa chi dícó cúdíquí ndéé ñáhá-güedé xii-gá.

20 Te sáta dúcáⁿ ñi cudíquí ndéé ñáhá-güedé xii-gá, te ní nataunuu ñaha-güedé xii-gá dóo tìcuèhé víhí sã ñi dáculnú ñaha-güedé, te ní dándíúnuu ñaha-güedé xii-gá dóo méé-gã. Te dàtnùní ndéca ñaha-güedé cuáháⁿ núú cáta càa ñaha-güedé xii-gá núú cùrúxí.

Sãta caa-güedé Jèsús núú cùrúxí

(Mt. 27:32-44; Lc. 23:26-43; Jn. 19:17-27)

21 Te ichi cuáháⁿ-güedé ndihí Jèsús ní naníhí-güedé ìⁿ téé ñuú Cirené nání-dẽ Xímú, te déhe-dé cúú ìⁿ téé nàni Lijandrú, ndihí ingá téé nàni Rúfú. Te té Xímú-án ñúhú-dẽ ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

22 Te ndèca-güedé Jèsús cuáháⁿ ìⁿ xichi núú nání Gõlgotá, te tnúhu-áⁿ quée-xí: Ìⁿ xichi núú nání yìquì díquì ndíyì, duha quèe-xi tnúhu-áⁿ.

23 Te ní sãñaha-güedě xii-gá ndudí sá ñi quée yúcu nání mirrá coho-gá ní cùu dico ñá túú ní xìhi-gá.

24 Te ní sata caa ñaha-güedě xii-gá núú cùrúxí. Te sátá dúcáⁿ te cue tée cùu sandadú-áⁿ ñi xito ndeé-güedé núu ndèdaca-güedé cuu cuendá-güedé dóó-gá.

25 Te cùu-xi caá ìⁿ dátneé òré ní sata caa ñaha-güedě xii-gá núú cùrúxí.

26 Te ní taxi ndecu-güedé ìⁿ sá ndeé lètrá núú táca-gá. Te lètrá-áⁿ càháⁿ-xi ná cuendá ducaⁿ ñi quide ñaha-güedě xii-gá. Te duha càháⁿ lètrá-áⁿ: “Tée yìndaha ñaha xii ñáyìu isràél”, duha càchí-xi.

27 Te tnàhá úú cue tée cùu ñadúhú ñi sata caa-güedé ñi-ni núú cùrúxí tucu. Te ìⁿ-dé ní sata caa-güedé xio cùha-gá, te ìngá-dé ní sata caa-güedé xio dàtni-gá.

28 Te ducaⁿ ñi cuu chí ní quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Ìⁿ-ni ñi quide ñaha-güedě xii-gá ndíhi cue tée ndècu cuéchi-xi”, duha càchí-xi núú tütú-gá.

29 Te nchaa ñáyìu yãha yatni núú táca-gá dácucó-yu díquì-yu te xìcuèhé ñáhã-yu xii-gá, te xãhãⁿ-yu:

—Te ná cuendá ducaⁿ càa-n tacaa-n xíaⁿ, te càchí-n sã dàngoyo-n veñúhu càhnu sá ìo cùnnuu te dandaa-n ìngá veñúhu saa, te xití únì-ni nduu sa nadaxìnu-n càchí-n.

30 Te vitna tanùu núú cùrúxí-áⁿ dàcácu-n mèe-n —cachí-yu xãhãⁿ-yu xii-gá.

31 Te ñi-ni ducaⁿ ñi quide cue tée cùu dútú cùnùu, ndíhi cue tée dàcuaha ñaha xii ñáyìu nchaa tnúhu ní chídó tnùnì ndíi Moisés, chí ní cudíquí ndeé ñáhã-güedě xii-gá, te ní xìtnàha-güedé:

—Tée-a ní ndacu-dé ní dácácu nihnu-dé ñáyìu, ¿te ná cuendá ñá ndácú-dé dácácu nihnu-dé mée-dé-i?

32 Te núu ndáá sá díú-dě cúú-dě Crìstú Yá ní tendaha Yã Ndiõxí véxi ñuyíú-a quindaha ñaha xii ñáyìu isràél, te na cundehe-o nuu-dé núú cùrúxí, cuendá quindáá ìní-ó-dě —càchí-güedé xìtnàha-güedé.

Te ndeé tnàhá cue tée tàcaa xio xio díñi-gá xìcuèhé ñáhã-güedě xii-gá.

Ní xíhí Jèsús

(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee nihíi ñuyíú, te ducaⁿ-ni càa ní cuu ndeé caá únì sacuaa.

34 Te ñi-ni òré caá únì sacuaa-áⁿ ñi ní càháⁿ Jèsús, te xãhaⁿ-gã xii Tãtã-gã Dútú Ndiõxí:

—Elói, Elói, láma sabàctaní —càchí-gá xãhaⁿ-gã.

Te tnúhu-áⁿ quée-xí: Ndiõxí mée-í, Ndiõxí mée-í, ná cuendá ní dáñá ñaha-n xii-í, duha quèe-xi tnúhu-áⁿ.

35 Te dava cue tée xìndecu yatni núú táca-gá-áⁿ ñi tecú dóho-güedé nàcuáa ní càháⁿ-gá, te ní xìtnàha-güedé:

—Chí cùndèdóho chí càna-dé té Èliás —càchí-güedé xìtnàha-güedé.

36 Te ìⁿ cue tée xìndecu-áⁿ xínú-dě ní sáháⁿ ní chindóyo-dé luha cáchí xití ndudí íá, te ní chinenu-dé díquì ìⁿ yutnu càni te ní ndo-cani-dé chíhí-dě yuhu-gá cuendá coho-gá. Te ní xãhaⁿ cuè tée xìndecu-áⁿ xii tée-áⁿ:

—Cundetú tnaa na cundehe-o nacoto núu quixi té Èliás nunehe ñaha-dě xii-dé núú cùrúxí —càchí-güedé xãhaⁿ-güedě xii-dé.

37 Te Jèsús níhi ní canasaa-gá te ní xíhí-ni-gá.

38 Te sátá dúcáⁿ te ní ndátá dõó cúú còrtinã xití veñúhu càhnu sá ìo cùnnuu ní quée dava ndáá, te ndaa núú ñi-ni ní ngúita-xi ní ndátá.

39 Te tée cùu capitáⁿ nútñi-dé ndaa núú Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáá ndisa sá díú tõe-a cùu-dé Déhe Yã Ndiõxí ní cùu —duha ní cachí-dé.

40 Te xica xìnutñi ìⁿ úú ñáyìu dìhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalená, ndíhi tá Salómé, ndíhi tá Màriá nãná tẽ Chèé ndíhi té Jàcobó tée càchí-güedé cúú lìhli-gá.

41 Te cue ñáyìu dìhí-áⁿ ñi xica cúú-yu ndíhi Jèsús distritú Galileá ní xinu cuèchí-yu núú-gá. Te cue ñáyìu dìhí-áⁿ nchicúⁿ ñáhã-yu xii-gá ní quexìo ndeé ñuú

Jerusalén ndihí dava-gá ñáyiú ðihí nchìcúñ ñáhá xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndètatú ñáyiú. Te nduu-áⁿ xĩquide túha-yu sá cúú ìngá nduu nduu ndètatú-yu-áⁿ, te ðiu-ni nduu-á sa ní cuaa v̄ihí,

⁴³ te ìⁿ tée nàni Cheé tée ñuú Arimàtea ní cuyii-dé ní sáháⁿ-dé núú tē Pilatú, te ní xáhaⁿ-dē sá ñuu vá cùndēe iní-dé dañá-dē chindúxi-dé yiqui cùñú Jèsús. Te tnàhá tē Chèe-áⁿ cúú-dē ìⁿ tée cùnū cundihí-dé cue tēe quide jundá, te tnàhá-dé ndétú-dé sáá nduu ndíhu ndaha ñàha Yá Ndiöxí xii-dé ndihí cue ñáyiú.

⁴⁴ Te tē Pilatú ío ní cuñúhu-dé sá dúcáⁿ ío ndihí ní xihí Jèsús, te ní cana-dé tēe cùu capitáⁿ ní xicáⁿ tnúhu-dé núú-dē ñuu ndisa sá sà ní xihí-gá.

⁴⁵ Te tēe cùu capitáⁿ-áⁿ ñi xáhaⁿ-dē xii tē Pilatú sá ndáá ní xihí Jèsús, núu xíáⁿ tē Pilatú-áⁿ ñi sáha-dé tnúhu chindúxi tē Chèe-áⁿ yiqui cùñú-gá.

⁴⁶ Te tē Chèe-áⁿ ñi saaⁿ-dé ìⁿ dóo v̄aha, te ní sáháⁿ-dé ní nunehe-dé yiqui cùñú Jèsús núú cùrúxí, te ní chidúcúⁿnduu-dé yiqui cùñú-gá dóo v̄aha sá ñi saaⁿ-dé-áⁿ, te dàtnúni néhé-dé yiqui cùñú-gá cuáháⁿ ní chihí-dé ìⁿ yaú nchii yiqui naha càva, te ní sadí-dé yuhu yaú-áⁿ ndihí ìⁿ yúú quèhéⁿ.

⁴⁷ Te tá Màriá Magdalèná, ndihí tá Màriá náná tē Chèe ní xiní-yu núú ñi chihí-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sáta ñi cundiquiⁿ nduu ndètatú ñáyiú, te tá Màriá Magdalèná, ndihí tá Salòmē, ndihí tá Màriá náná tē Jàcobó ní saáⁿ-yu acití sáháⁿ tnámí cuèndá canehé-yu quihíⁿ chihí-yu yiqui cùñú Jèsús.

² Te ndumìngú nehé-ni òré vitna váha váha ní xínu coto núú nchĩçanchii ní quexió-yu núú nchii yaú yihí yiqui cùñú Jèsús.

³ Te ní xitnàhá-yu:

—Yoo cúñaha-o xòcani yúú ndèdí yuhu yaú-a, chi vá yõ tnàhí ndècu iha —cachí-yu xitnàhá-yu.

⁴ Te òré ní xindéhé v̄aha-yu te ní xiní-yu sá yúú cáhnú ndèdí yuhu yaú-áⁿ ìⁿ xio-ná ndécú.

⁵ Te cuánguñhú-yu xití yaú-áⁿ, te ní xiní-yu núcóo ìⁿ espíritú xínu cuèchi núú Yá Ndiöxí ndàa xio cuhá-yu, te càa-xi datná cáá ìⁿ tēe cuechi, te ñhnu-xi ìⁿ dóo cuixíⁿ dóo cání, te ní yùhú-yu òré ní xiní-yu espíritú-áⁿ.

⁶ Te espíritú-áⁿ ñi xáhaⁿ-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yiqui cùñú Jèsús tēe ñuú Nazàrét tēe ní sañni-güedé núú cùrúxí, dico ñá túú-gá yiqui cùñú-dé ndécú iha chi sa ní ndoto-dé, te chí cùndèhe núú ñi sacáⁿ-güedé yiqui cùñú-dé te quiní-ndó ñá ñá túú-gá-dé.

⁷ Te chí cuáháⁿ núú ndécú tē Pelú ndihí dava-gá cue tēe ní xica cuu ndihí-dé, te duha cúñaha-ndo xii-güedé: “Jèsús codonū-gá núú-ndó quihíⁿ distritú Galileá, te yacáⁿ quiní-ndó-gá dàtná ní cachí-gá xii-ndo”, duha cúñaha-ndo xii-güedé —càchí espíritú-áⁿ xáhaⁿ-xi xii-yu.

⁸ Te cue ñáyiú ðihí-áⁿ ío ní yùhú-yu, te ní quene cunú-yu cuánuhú-yu, te quèdi ñaha-ná-xi xii-yu sá ío ní yùhú-yu, te ñá túú tnàhí ná tnúhu ni xáhãⁿ-yu xii cue ñáyiú ní naníhí-yu ichi cuèndá sá ío ní yùhú-yu.

Tá Màriá Magdalèná ní xiní-xi Jèsús

(Jn. 20:11-18)

⁹ Te sáta dúcáⁿ ñi ndoto Jèsús ndumìngú nehé-ni-áⁿ, te díhna nuu-gá tá Màriá Magdalèná ní quee túú-gá núú-xi, te ðiu tá Màriá-áⁿ cúú-xi xíchí ñi xihí ñaha úsá espíritú cundihí yucu ñávaha ni cùu, te Jèsús ní queñuhu-gá nchaa espíritú-áⁿ yiqui cùñú-xi.

¹⁰ Te xíchí-áⁿ ñi sáháⁿ-xi ní xitnũhu-xi cue tēe ní xica cuu ndihí Jèsús nàcuáa ní cuu, te xindáhí-güedé sá ndihú iní-güedé òré ní quexió-xi núú ndécú-güedé.

¹¹ Te òré ní xáhaⁿ tá Màriá xii-güedé sá ñi ndoto Jèsús ndihí sá ñi xiní ñáhá-xi xii-gá, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndihi-gá

(Lc. 24:13-35)

¹² Te úú tnàhá cue téé ní xica cuu ndihi Jèsús ñúhú-güedě ichi cuáháⁿ-güedé yucu, te uuⁿi ní quee túu-gá núú-güedě, te ní dácótó ñàha-xi xii-güedé sá ñà túú-gá cáá-gă dâtná cáá-gă.

¹³ Te cue téé úú-áⁿ ñí xica-güedé cuáháⁿ-güedé ní xitnúhu-güedé nchaa dava-gá cue téé ní xica cuu ndihi-gá sá ñí xiní ñáhá-güedě xii-gá, dico diu-ni ducaⁿ ñà túú ní sàndáá iní cue téé-áⁿ tnúhu ní cáháⁿ-güedé.

Jèsús xáhaⁿ-gă xii cue téé ní xica cuu ndihi-gá nàcuáa ndiú chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndi úxí ñí cue téé ní xica cuu ndihi Jèsús yíhi-güedě mèsá xéxí-güedě, te ní quee túu-gá núú-güedě te ní tenàà ñáhá-gă xii-güedé cuendá sá ño sàá iní-güedé ñà túú sàndáá iní ñáhá vâha-güedé xii-gá, chi ñà túú ní cuñí-güedé quíndáá iní-güedé nàcuáa ní xáhaⁿ ñáyiú ní xiní ñáhá xii-gá sátá ñí yáha ní ndoto-gá.

¹⁵ Te ní xáhaⁿ-gă xii-güedé:

—Quíhíⁿ-ndó ñíhií ñuyíú cáháⁿ-ndó núú ncháa ñáyiú tnúhu váha tnúhu sá cáháⁿ nàcuáa naníhí tãhú-yu.

¹⁶ Te nchaa ñáyiú na quíndáá iní tnúhu-áⁿ te cuanduté-yu, te naníhí tãhú-yu, dico nchaa ñáyiú vá quíndáá iní tnúhu-áⁿ te cuíta nihnú-yu.

¹⁷ Te nchaa ñáyiú na quíndáá iní ñáhá xii-í te cadá-yu sá vâ yôo tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cündihi yucu ñávãha yíhi ñaha xii ñáyiú. Te uuⁿi ndacú-yu cáháⁿ-yu ingá núú tnúhu sá vâtá dácuàha-gá-yu.

¹⁸ Te cuëi na tníi-yu cóo dëéⁿ dico ñà túú ñà cada ñaha-di xii-yu, te cuëi venènú ná cáxi-yu dico ñà túú ñà tnahá-yu, te tendàhá-yu cue ñáyiú cùhú te ndúha-yu — càchí-gá xáhaⁿ-gă xii-güedé.

¹⁹ Te sátá ñí yáha ducaⁿ ñí xáhaⁿ Jèsús xii cue téé ní xica cuu ndihi-gá, te ní ndanchita-gá cuándaa-gá andiú te ní ngóo-gá xio cùha Dútú Ndiõxí.

²⁰ Te cue téé-áⁿ ñí xica-güedé cuáháⁿ-güedé, te ní ngúíta-güedé cáháⁿ-güedé tnúhu Xítohó Jesucristú nchaa xichi. Te mee-gă ní chindee ñàha-gá xii-güedé ní quide-güedé nchaa sá vâ yôo tnàhí ndàcu cada cuendá cutnùní iní ñáyiú sá ndàá cáháⁿ-güedé tnúhu-gá. Duha ní cuu dàvá-áⁿ.

Jèsús cuándaa-gá andiú
(Lc. 24:50-53)

TNÚHU NÍ CHÍDÓ TNÙNÍ TÉ LÛCÁ

Nàcuáa ní ngódó tnùní tnúhu Yá Ndiöxí

¹ Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu.

² Te ñu-ni nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xiní ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí.

³ Te yúhú sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tèofilú chí ío váha cùu iní-í sá cúú-xí-n,

⁴ te tèe-í cuendá cutnùní iní-n sã sã ndàá cúú-xí nchaa sá ní dánèhé ñàhá-güedé xii-n.

Íⁿ espíritú xínú cuèchi núú Yá Ndiöxí cächí-xi sá cáciu ñⁿ téé cunani Juàá

⁵ Te cútnàhá ní xíndaha té Hèrodés ñáyiú distrítú Jùdeá dàvá-án ñí xíndecu ñⁿ dútú ñí xínani-dě Zacàriá, te ní cundihí-dé cue dútú Àbiás. Te ñadihí-dé ní xínani-aⁿ Èlisabét, te ñaha-án ñí cuu-aⁿ ñani tnàhá ndí Àrón.

⁶ Te ndí ndúu-yu ío ní quide ndáá-yu núú Dútú Ndiöxí, chí ní tñí-yu nchaa tnúhu ní cáháⁿ-gá.

⁷ Te ñá túú ñí ñⁿ déhe-yu, chí ducaⁿ tãhú tã Elisabét sá vã cóó ñéhe-aⁿ, te ducaⁿ ndí ndúu-yu ío ní sahnú-yu.

⁸ Te ñⁿ nduu xínu cuechi tucu té Zacàriá ndihí nchaa cue téé cundihí-dé núú Yá Ndiöxí xítí veñúhu.

⁹ Te dàvá-án ñí xito ndeé-güedé cuendá cutnùní iní-güedé núu ndédacàa-güedé quíhu núú nàá xítí veñúhu-án cahmi-güedé sá sàháⁿ tnámí, te ní cutnùní sá tẽ Zacàriá quíhu-dé. Te ducaⁿ ñí quide-güedé, chí ducaⁿ tnàhí ní xóo cada nchaa cue dútú dàvá-án.

¹⁰ Te ñini sàhmi té Zacàriá sá sàháⁿ tnámí núú nàá, te vâi vihi ñáyiú xíndecu quehé veñúhu-án càháⁿ ndihí-yu Yá Ndiöxí.

¹¹ Te ní xiní té Zacàriá ñⁿ espíritú xínú cuèchi núú Yá Ndiöxí nùtní-xi xio cùha núú nàá núú càyú sá sàháⁿ tnámí-án.

¹² Te òré ní xiní té Zacàriá espíritú-án te ñá ní cùtnuní iní-dé nása cada-dé chí ío ní yùhú-dé.

¹³ Te espíritú-án ñí xáhaⁿ-xi:

—Zacàriá, vá yùhú-n chí Yá Ndiöxí ní tedóho-gá tnúhu ní cáháⁿ-n, te vitna coo ñⁿ déhe ñadihí-n tã Elisabét te danàni-n-dé Juàá.

¹⁴ Te ío cudíí ñí-n, te ducaⁿ ío vâi ñáyiú cudíí ñí-yu na càcu-dé.

¹⁵ Te ío cudíu-dé núú Yá Ndiöxí, te ní vã cóhó-dě ndidí te ní vã cóhó-dě ndudí sá ñí natiu, te sa cundecu ndihí-dé Espíritú Yá Ndiöxí òré cacu-dé.

¹⁶ Te ñu-dé cada te ío vâi ñáyiú isràél natuhá-yu ichi Dútú Ndiöxí Yaá cúú Ndiöxí-ó.

¹⁷ Te té Juàá-án codonùu-dé núú-gã, te cundecu ndihí-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuechi, te cuèi cue téé ío sàá iní-xi, te ñu-dé cada te tñí-güedé tnúhu váha, tnúhu càháⁿ ñáyiú quide ndáá. Te ducaⁿ càda-dé cada túha-dé ñáyiú cuendá cunu cuèchí-yu núú Dútú Ndiöxí —cächí-xi xáhaⁿ-xi xii-dé.

¹⁸ Te té Zacàriá ní ndúcú tnúhu-dé núú espíritú-án, te xáhaⁿ-dẽ:

—¿Te nása cutnùní ndáá iní-í tnúhu càháⁿ-n-í? Chí yúhú ío ní sahnú-í ndihí ñadihí-í —cächí-dé xáhaⁿ-dẽ xii-xi.

¹⁹ Te espíritú-án ñí xáhaⁿ-xi:

—Yúhú cùu-í espíritú nání Gàbriél, te xínu cuechi-í núú Yá Ndiöxí, te mee-gã ní táuchíú-gã nàhá-í tnúhu-gá véxi cuendá cutnùní iní-n nàcuáa cada ñaha-gã xii-ndo.

²⁰ Te vitna cuu ñihí-n te vá càháⁿ-gá-n ndéé ná sàá nduu càcu déhe ñadihí-n, chí ñá túú ní sàndáá-ni iní-n tnúhu ní cáháⁿ-í. Te dacuití sáá nduu càda-xi nacuáa ní cáháⁿ-í-a —cächí espíritú-án xáhaⁿ-xi xii-dé.

²¹ Te nchaa ñáyiú xíndecu quehé ndétü-yu té Zacàriá, te xícuñúhu-yu sá ío cùyaa-dé xítí veñúhu.

²² Te òré ní ndee té Zacàriá, te ñá ní cùu-gá càháⁿ ndihí ñaha-dé xii-yu, te òré-án ñí cutnùní iní-yu sá ñí xiní-dé ñⁿ espíritú xínú cuèchi núú Yá Ndiöxí xítí veñúhu. Te mee-ñá ndaha-dé ní quide-dé núu-yu chí ñá ní cùu-gá càháⁿ-dé.

23 Te ní xínu nduu nǐ xinu cuechi tǎ Zacàriá núú Yǎ Ndiöxí xítí veñúhu, te cuánuhú-dé vehe-dé.

24 Te sátá dúcáⁿ nǐ cuu te ñadìhí-dé tá Elisàbét ní ngúhuⁿ déhe-aⁿ, te úhúⁿ yóó ñà túú tnàhí-gá ní quèe-aⁿ caca cuu-aⁿ, te ní cachí-aⁿ:

25 “Mee Dütú Ndiöxí duha ní cundàhú iní ñáhá-gǎ sá cóó ìⁿ déhe-í cuendá sá vǎ cúú yǐchí iní ñáhá ñǎyiu xii-í”, duha ní cachí-aⁿ.

Ìⁿ espíritú xínú cuèchi núú Yǎ Ndiöxí cǎchí-xi sá cǎcú Jèsús

26-27 Te núú ìñú yóó sǎ nǐ ngúhuⁿ déhe tá Elisàbét, te ní tendaha tùcu Yǎ Ndiöxí espíritú nání Gábriél cuáháⁿ-xi ìⁿ ñúú nání Nàzarét cuáháⁿ ngoto-xi ìⁿ xíchí cuéchi nání Mariá. Te ñúú-áⁿ yíndèhu-xi distritú Galileá. Te xíchí-áⁿ sa ní cundáá tnúhu sá tnàndaha-xi ndìhi ìⁿ téé nání Cheé ñaní tnáhá ndí Dàvíí.

28 Te espíritú-áⁿ nǐ quíhu-xi ndéé xítí vehe núú ndécú tǎ Màriá, te ní xáhaⁿ-xi:

—ìCòvǎha-n-aⁿ! Dütú Ndiöxí ío cùu iní ñáhá-gǎ xii-n te ndècu ndìhi ñaha-gá, te ío-gá xító ñàha-gá xii-n dàcúxí dàva-gá ñáyiu dìhí —cǎchí espíritú-áⁿ xǎhaⁿ-xi.

29 Dico òré ní xiní tá Màriá espíritú-áⁿ, te ní quiyùhú iní-xi sá dúcáⁿ nǐ cǎháⁿ espíritú-áⁿ. Te ní sani iní-xi: “¿Ná cuendá duha cǎháⁿ-tu espíritú-a-í?”, duha ní sani iní-xi.

30 Te espíritú-áⁿ nǐ xáhaⁿ-xi:

—Màriá, vá yùhú-n chi ducaⁿ nǐ nduu táhú-n ñúu Yǎ Ndiöxí.

31 Te vitna ngúhuⁿ déhe-n, te na càcu-dé te danàni-n-dé Jèsús.

32 Te ío cunuu-dě, chi Dütú Ndiöxí Yaá ío cùnuu cachí-gá sá Dèhe-gá cúú-dě, te ñúu-gá cada te cuu-dé ìⁿ téé cùnuu núú ñáyiu isràél dàtná ní quide-gá ndí Dàvíí.

33 Te taxi tnùní-dé ñáyiu isràél, te ducaⁿ-ni cùnuu-dé nǐ caa nǐ quíhíⁿ —cǎchí-xi xǎhaⁿ-xi.

34 Te tá Màriá ní xáhaⁿ-xi xii espíritú-áⁿ:

—¿Te nása cuu tnúhu cǎháⁿ-n te ñà túú yì-í-í? —cǎchí-xi xǎhaⁿ-xi.

35 Te ní xáhaⁿ espíritú-áⁿ:

—Espíritú Yǎ Ndiöxí quixi cundecu ndìhi-n, te ducaⁿ Yǎ Ndiöxí cada-gá ìⁿ sá vǎha sá cúú-xí-n ná càcu déhe-n. Te Yǎ

Ndiöxí cǎchí-gá sá ío cundecu yíñùhu-dé núú-gǎ, chi Dèhe-gá cúú-dě.

36 Te tnàhá didí-n tǎ Elisàbét ñúhú dèhe-aⁿ cuèi ío ní sahnu-aⁿ, te ñúu-aⁿ cǎchí-yu sá vǎ cóó dèhe-aⁿ ní cùu, te vitna sa ní cuu ìñú yóó ñúhú dèhe-aⁿ.

37 Chi Yǎ Ndiöxí ndácú-gǎ quidé-gǎ nchaa sá vǎ yóo tnàhí ndàcu cada —cachí-xi xǎhaⁿ-xi.

38 Te tá Màriá ní xáhaⁿ-xi:

—Yùhú ná cúnú cuèchi-í núú Dütú Ndiöxí, te mee-gǎ ná cǎdá ñàha-gá xii-í nàcuáa ní cachí-n —cǎchí-xi xǎhaⁿ-xi xii espíritú-áⁿ.

Te sátá dúcáⁿ te espíritú-áⁿ nǐ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

39 Te tá Màriá ío ndìhi cuáháⁿ-xi ìⁿ ñúú cǎá xítí yucu distritú Jùdeá.

40 Te ní sǎá-xi vehe té Zacàriá, te cuánguihu-xi ní dándácòo váha-xi tá Elisàbét.

41 Te òré ní tecú dóho tá Elisàbét ní cǎháⁿ tá Màriá, te ní candá déhe-aⁿ xítí-aⁿ, te òré-áⁿ nǐ ngúndecu ndìhi-aⁿ Espíritú Yǎ Ndiöxí.

42 Te níhi ní cǎháⁿ-aⁿ, te xǎhaⁿ-aⁿ xii tá Màriá:

—Yǎ Ndiöxí ío xító ñaha-gá xii-n dàcúxí dàva-gá tnàha dìhí-ó, te ducaⁿ-ni xító-gá cuèi déhe-n.

43 ¿Te ná cúú yùhú ñúu véxi coto ñaha yòhó nǎná Yaá cúú Xìtohó-í-í?

44 Chi òré-ni ní tecú dóho-í ní cǎháⁿ-n te ní candá-ni déhe-í xítí-í sá cùdí iní-dé.

45 Te váha táhú yòhó sá ni sàndáá iní-n, chi dacuítí sǎ cǎdá Dütú Ndiöxí nàcuáa ní cǎháⁿ espíritú ní tendaha-gǎ ní quixi ní cachí tnúhu xii-n nàcuáa cada-gá —cǎchí-aⁿ xǎhaⁿ-aⁿ xii tá Màriá.

46 Te ní xáhaⁿ tá Màriá:

Ío cǎhnu cuu Dütú Ndiöxí,

47 ío cùdí iní-í chi ñúu-gá taunihnu ñaha-gǎ xii-í núú ùhú núú ndàhú.

48 Chi ní ndacu iní ñáhá-gǎ xii yùhú, te dìcò ìⁿ xíchí xínú cuèchi núú-gǎ cúú-í, te vitna te nchaandi túhú ñáyiu cachí-yu sá ío váha táhú-í.

49 Te Yǎ Ndiöxí cándòo caa nine iní-gá, te ío cǎhnu ìⁿ sá vǎha ní quide-gá sá cúú-xí-í.

50 Te cundahú iní-gá nchaa ñáyiu nèhe sá yíñùhu núú-gǎ.

Te ducaⁿ-ni cuëi ñáyiú sa ndècu ñuyíú-a ndihí ñáyiú vitna véxi.

51 Chi ta quide-gá nchaa sá vã yõo tnàhí ndàcu cada véxi,

te ta dàndóo canúú-gã cue ñáyiú quide cahnu mee-xi.

52 Te cue ñáyiú tàxi tnuní ñá túú-gã dáñá-gã taxi tnuní-yu,

te cue ñáyiú ndàhú ní quide nínu ñaha-gã xií-yu.

53 Te cue ñáyiú ndècu ndihí tnúndòho tnúhu ndàhú ní quide váha ñaha-gã xií-yu,

te cue ñáyiú cuica ñà túú nã ní ñihí-gã-yu cundecu ndihí-yu.

54 Te chindee-gá ñáyiú isràél, ñáyiú xìnu cuechi núú-gã, te ñá túú dàña ni-hnu ñaha-gá xií-yu, chi cùndahú iní ñáhá-gã.

55 Chi ducaⁿ ñí xáhaⁿ-gã xii ndíi Àbrahám, ndihí cue ñaní tnáhá ndíi.

Duha ní xáhaⁿ tá Màriá xii tá Elisàbét.

56 Te ní xíndecu tá Màriá dàtná úní yóo ndihí tá Elisàbét te dàtnuní cuánuhú-xi vehe-xi.

Ní cacu té Juàá té dacuàndute ñaha xii ñáyiú

57 Te ní sáá nduu ñí cacu ñí déhe téé tá Elisàbét.

58 Te nchaa ñáyiú ndècu yatni ndihí-aⁿ, ndihí nchaa ñaní tnáhá-áⁿ ní ñihí-yu tnúhu nàcuáa ní chindee ñàha Yá Ndiõxí xii-aⁿ. Te ío ní cudíí iní-yu cuendá-aⁿ.

59 Te núú ùná nduu sá ñí cacu déhe-aⁿ, te ní sáháⁿ ñáyiú núú ndécú-áⁿ cuendá cuáhã-yu señá ñí déhe-aⁿ. Te cuiní-yu cunani déhe-áⁿ Zacàriá dàtná nání tãtá ní cùu.

60 Te ní xáhaⁿ nãná déhe-áⁿ:
—Ñáhá, chi Juàá cunani-dě —càchí-aⁿ xãhaⁿ-aⁿ xií-yu.

61 Te ní xáhãⁿ-yu:
—¿Te ná cuendá te ñá túú nì ñí ñaní tnáhá-ndó dùcaⁿ nani-i? —cachí-yu xãhãⁿ-yu.

62 Te ní quidé-yu ndàhá-yu núú tãtá dẽhe-áⁿ cuendá cuiní-yu núú nása cuiní mée-dě cunani dẽhe-dé.

63 Te ní xícáⁿ-dé ñí tutú ní chídó tnuní-dé nàcuáa cunani dẽhe-dé, te duha ní chídó tnuní-dé: “Juàá cunani-dě”, càchí-xi núú tutú ní tee-dé-áⁿ. Te nchaa ñáyiú xíndecu-áⁿ ñí cuñúhu-yu nàcuáa ní cuu.

64 Te òré-áⁿ ñí nacáháⁿ té Zacàriá sá ñí cuu ñihí-dé ní cùu, te ní ngúta-dé ní cachí-dé sá ño càhnu cuu Yá Ndiõxí.

65 Te nchaa ñáyiú xíndecu yatni ndihí-dé ní cuñúhu-yu, te nchaa ñáyiú xíndecu ñihí xití yucu distritú Jùdeá ní ñihí-yu tnúhu nàcuáa ní cuu.

66 Te nchaa ñáyiú-áⁿ ño vãi ní sani iní-yu, te ní xítnáhá-yu:

—¿Ná cúú sã cádá tẽ-ãⁿ ndéé idá-gá ná cuèhnu-dé? —càchí-yu xítnáhá-yu.

Te ducaⁿ ñí xítnáhá-yu chi Dútú Ndiõxí ndécú ndihí ñaha-gã xii-dé.

Té Zacàriá càchí-dé sá ño càhnu cuu Yá Ndiõxí

67 Te té Zacàriá tãtá tẽ lìhli-áⁿ ñí ngúndecu ndihí-dé Espiritú Yá Ndiõxí te ní cáháⁿ-dé nchaa tnúhu sá ñí dánèhè ñáhá-gã, te ní cachí-dé:

68 Ío càhnu cuu Dútú Ndiõxí nchoo ñáyiú isràél,

chi ní quixi coto ñaha-gã xii-o, te cùu-o ñáyiú cùu cuendá-gá, chi dàcácu ni-hnu ñaha-gã xii-o vitna.

69 Chi ní tendaha-gã ñí tée véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíí tée ní xinu cuechi núú-gã ndéé sanaha.

70 Te ñíu-ni tnúhu ní cáháⁿ Yá Ndiõxí ní cáháⁿ cue tée ní quide ndáá ní xíndecu núú-gã ñuyíú-a ndéé sanaha.

71 Te ní cachí-güedé sá táunihnu ñaha-gá xii-o núú nchàa ñáyiú cùu ùhú iní ñáhá, ndihí núú nchàa ñáyiú ñá túú cùu quiní ndee ñáhá.

72 Te ní xáhaⁿ-gã sá cùndahú iní ñáhá-gã xii-o, te ducaⁿ càda-gá chi vá nàcuànaa-gá tnúhu ní cáháⁿ-gá ndihí-güedé.

73 Te ñíu ducaⁿ ndùu tnúhu ní xáhaⁿ-gã xii ndíi Àbrahám sá

74 táunihnu ñaha-gá xii-o núú nchàa ñáyiú cùu ùhú iní ñáhá,

cuendá sá vã yùhú-ó cùnu cuechi-o núú-gã.

75 Te cada ndáá-ó, te cundecu yíñùhu-o núú-gã ndí nchàa nduu cundecu-o ñuyíú-a.

Duha ní cachí té Zacàriá.

76 Te xãhaⁿ-dě xii té lìhli-áⁿ:

Te yòhó té lĩhli, cáháⁿ ñáyiu cuendá-n sǎ cúu-n ìⁿ tée càháⁿ tnúhu Dútú Ndiõxí Yaá ío cùnūu,

chi quíhíⁿ-n còdonūu-n núú Yǎá cúu Xĩtohó-ó dàtúha-n ñáyiu cuendá cundecu túha-yu òré quexìo-gá.

77 Te cúñaha-n xì ñáyiu isràél sá cuìní-gá cada càhnu iní-gá nchaa cuéchi-yu, te naníhí tǎhú-yu.

78 Te ducaⁿ càda-gá chi ío cùu iní ñáhá-gǎ xii-o, chi ndéé andiu ñĩ tendaha-gǎ ìⁿ tée véxi

cuuⁿ-dé dandixi túu-dé iní-ó cuendá cutnùní iní-ó nàcuáa ndūu cuendá Yǎ Ndiõxí.

79 Te ducaⁿ dandixi túu-dé iní nchaa ñáyiu ndècu ichi cuehé ichi duha ta xĩta nihnu cuáháⁿ cuendá nucúnu ichí-yu ìⁿ ichi váha.

Duha ní xáhaⁿ tǎ Zacàriá xii déhe-dé.

80 Te té lĩhli-áⁿ tá sàhnu-dé, te ta chĩndee chitúu ñaha Yǎ Ndiõxí xii-dé cuáháⁿ, te ní xĩndecu-dé xití yucu ndéé ní sáá ndūu ñĩ ngũíta-dé ní cáháⁿ-dé núú cuè ñáyiu isràél tnúhu Yǎ Ndiõxí.

2

Ní cacu Jèsús

(Mt. 1:18-25)

1 Te dàvá-áⁿ ñĩ táúchíúⁿ tǎ Àugustú Cèsár nucódó tnùní nchaa ñáyiu nàción yíndàha-dé.

2 Te xéhe sǎ dĩhnanūu ñĩ nucódó tnùní ñáyiu, te diu-ni dàvá-áⁿ ñĩ cunūu té Cìreniú distritú Síríá.

3 Te nchaa ñáyiu ní natacá-yu ñūú núú ñĩ cacú-yu cuendá nucódó tnùní-yu.

4 Núu xiǎⁿ ní quee té Chèé ñūú Nazàrét ìⁿ ñūú yíndèhu distritú Galileá, te cuáháⁿ-dé ñūú Bèlén ìⁿ ñūú yíndèhu distritú Jùdeá, chi xiǎⁿ ñĩ cuu ñūú ndíi Dàvíi, te diu-ni ñani tnáhá tǎ Chèé-áⁿ ñĩ cuu ndíi.

5 Núu xiǎⁿ cuáháⁿ-dé ndéé ñūú Bèlén nucódó tnùní-dé, te tnáhá tá Màriá xíchí ñĩ cundáá tnúhu sá tnǎndaha ndihí-dé cuáháⁿ ndihí ñaha-dé, te sa ñūhu déhe-xi.

6 Te ñini cùyaá-yu ñūú Bèlén-áⁿ ñĩ sáá òré cacu déhe-xi.

7 Te ní cacu déhe díhna-xi, te ní chidúcúⁿnuu-xi dóó, te ní sacáⁿ ñáhá-xí ìⁿ vehe núú cúu vèhe quití, chi ñǎ túú ní ñĩhí-yu vehe coó-yu.

Cue espíritú xínú cuèchi núú Yǎ Ndiõxí ndihí cue toli.

8 Te yatni ñūú-áⁿ xĩndecu ìⁿ ũú toli ndèé-güedé mbéé-güedé ndécú-güedé ma-jadá niú-áⁿ.

9 Te uuⁿni ní quexìo ìⁿ espíritú xínú cuèchi núú Yǎ Ndiõxí, te Yǎ Ndiõxí ní guide-gá ní dáyèhé-xi ñĩ càndéé núú xĩndecu-güedé, te ní yùhú víhí-güedé.

10 Te ní xáhaⁿ espíritú-áⁿ:

—Vá yùhú-ndó, chi nàha-í ìⁿ tnúhu váha véxi sá cúu-xí-ndó, te ío cudíi iní-ndó ndihí nchaa ñáyiu.

11 Chi vitna ní cacu ìⁿ tée dàcácu nihnu ñaha xii-ndo núú ùhú núú ndàhú ñūú ndíi Dàvíi, te tée-áⁿ cúu-dé Xĩtohó Jesucrìstú.

12 Te dàtná ìⁿ señá te naníhí-ndó tǎ lĩhli-áⁿ yídúcúⁿ nuu-dé dóó cáá-dé ìⁿ vehe quití — càchí-xi xáhaⁿ-xi xii-güedé.

13 Te òré-áⁿ ñĩ quexìo cuéhe víhí espíritú véxi cuuⁿ andiu ñĩ naníhí tnáhá-xí ndihí espíritú-áⁿ, te ní ngũíta-xi ní chĩñuhu-xi Yǎ Ndiõxí, te càchí-xi:

14 ¡Ío càhnu cuu Yǎ Ndiõxí Yaá ndécú àndiu, te na cùndecu váha-ni nchaa ñáyiu cùu iní méeé-gǎ!

Duha càchí cue espíritú-áⁿ.

15 Te òré cuándaá cue espíritú-áⁿ andiu, te ní ngũíta cue toli-áⁿ xĩtnàha-güedé:

—Na quíhíⁿ-ó ñūú Bèlén quini-ó nàcuáa ní cuu, chi Dútú Ndiõxí sa ní cachí tnúhu-gá — càchí-güedé xĩtnàha-güedé.

16 Te ní tní-güedé ichi súúni ndihí cuáháⁿ-güedé, te ní naníhí-güedé tá Màriá ndihí té Chèé, ndihí té lĩhli-áⁿ cáá-dé xití ìⁿ vehe quití.

17 Te òré ní xiní ñáhá-güedé te ní xáhaⁿ-güedé xii-yu nàcuáa ní xáhaⁿ espíritú-áⁿ xii-güedé cuendá té lĩhli-áⁿ.

18 Te nchaa ñáyiu ní tecú dóho-xi ní cuñúhu-yu nàcuáa ní cáháⁿ-güedé.

19 Dico tá Màriá chi ñūhu nahi-ni iní-xi, te dicó-ni sàni iní-xi cuendá nchaa tnúhu-áⁿ.

20 Te cue toli-áⁿ ñĩ natní-güedé ichi, te ta xĩtnàha-güedé cuánuhú sá ío càhnu cuu Yǎ Ndiõxí cuendá nchaa tnúhu ní xĩndedóho-güedé, ndihí cuendá nchaa sá ñĩ xiní-güedé, chi cuendá sá ndàá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

21 Te núú ùná nduu sá nǐ cacu té lǐhli-án, te ní sáha-güedé sèñá ñǐ-dé, te ní dánání ñàha-güedé Jèsús xii-dé, ñi-ni nàcuáa ní xáhaⁿ espíritú xínú cuèchi núú Yá Ndiöxí xii tá Màriá ndéé cútnàhá vátá ngühuⁿ-gá-dé xití-xi.

22 Te sátá nǐ tnahá nduu, ndüu ñi-yu nàcuáa càháⁿ nchaa tnúhu ní chídó tnùnì ndíi Moisés, te ndécá-yu té lǐhli-án cuáháⁿ ñuú Jerusálén cuèndá quee túu-dé núú Dútú Ndiöxí.

23 Te ducaⁿ nǐ quidé-yu, chi ducaⁿ càháⁿ-xi núú tùtú Yá Ndiöxí sá ncháá làndú té na càcu díhna quetúu-güexi núú-gá cuèndá cundecu-ná-güexi cuèndá-gá.

24 Te ní quidé-yu nàcuáa càháⁿ Yá Ndiöxí núú tùtú-gá núú càchí-xi: “Canehe-ndo ùú lómá àdi úú cǔcu quíhíⁿ nduu táhú ñàhá Yá Ndiöxí”, duha càháⁿ-gá núú tùtú-gá.

25 Te dàvá-án ndécú ñiⁿ té nàni Mió ñuú Jerusálén. Te ío váha iní-dé, te chiñuhu-dé Yá Ndiöxí, te ndètu-dé sáá nduu chindee ñaha Yá Ndiöxí xii ñáyiú isràél. Te ndècu ndíhi té Mió-án Espíritú Yá Ndiöxí.

26 Te sa ní xáhaⁿ-xi xii-dé sá vǎ cùu-ni-dé, chi dacuítí quíní-dé Crístú Yaá tendaha Yá Ndiöxí quixi ñuyíú-a.

27 Te té-án ndécá ñàha Espíritú Yá Ndiöxí xii-dé cuáháⁿ veñúhu càhnu sá ío cùnuu. Te cuáháⁿ-yu ndíhi Jèsús veñúhu-án cuèndá cadá-yu ndíhi-gá nàcuáa càháⁿ tnúhu ní chídó tnùnì ndíi Moisés.

28 Te òré ní sáá-yu, te té Mió-án nǐ nguídèhé-dé Jèsús, te ní càháⁿ-dé sá ío càhnu cuu Yá Ndiöxí, te ní xáhaⁿ-dè xii-gá:

29 Yòhó Dútú Ndiöxí sa ní cuu daña-n cùú-í vitna,
chi sa ní quide-n nàcuáa ní cachí-n xii yúhú té xínu cuechi núú-n.

30 Chi sa ní xiní núú-í Yaá dàcácu nihnu ñaha xii ñáyiú núú ùhú núú ndàhú vitna.

31 Te Yaá ní tendaha-n vèxi núú ndécú nchàa ñáyiú ñuyíú-a.

32 Te cùu-gá dàtná ñiⁿ ñuhú, chi dandìxi túu-gá iní ñáyiú cuèndá cutnùnì iní-yu cuèndá Yá Ndiöxí cuèi ñá díú ñáyiú isràél cùu-yu.

Te ñi-gá cada, te canehe ñáyiú dava-gá ñuú sá yíñuhu núú ñáyiú isràél chi

ñi ñáyiú isràél cùu-yu ñáyiú cùu cuèndá-n.

Duha ní xáhaⁿ tǎ Mió xii Yá Ndiöxí.

33 Te té Chèé ndíhi náná Jèsús ní cuñuhu-yu tnúhu ní càháⁿ té Mió cuèndá-gá.

34 Te dàtnùnì té Mió ní xícáⁿ táhú-dé núú Yá Ndiöxí cuèndá-yu, te xáhaⁿ-dè xii tá Màriá náná Jèsús:

—Cundedóho tnúhu na càháⁿ-í-a, té lǐhli-a ní nduu táhú-dé nacanu ichi-dé dava ñáyiú isràél ichi Yá Ndiöxí, te davá-yu vǎ tñiⁿ-yu tnúhu càháⁿ-dé, te ñáyiú-án cuíta nihnú-yu, te cada-dé nàcuáa cutnùnì iní ñáyiú sá Yá Ndiöxí ní tendaha ñàha-gá xii-dé, dico vǎ quèndáá iní-yu, chi daquèe tíhú ñàhá-yu xii-dé.

35 Te ducaⁿ te cutnùnì nàcuáa sàni iní ñiⁿ ñáyiú. Dico sá cùu-xí yòhó chi ío cada ndàhú-xi iní-n, chi súunì dàtná sá nǐ nícuèhé iní-n càda-xi —cachí-dé xáhaⁿ-dè xii tá Màriá.

36 Te xíaⁿ ndécú tnahá ñiⁿ ñaha càháⁿ tnúhu Yá Ndiöxí nání-án Áná, te tǎtá-aⁿ ní xínani-dé Fànuél ñani tnahá ndíi Àsér. Te ñaha-án sa ní sahnu vèhi-aⁿ, te cuechi-ni-aⁿ ní tñándaha-aⁿ te úsá-ni cuía nǐ xíndecu-aⁿ ndíhi yí-aⁿ,

37 te ní quendóo quèé-aⁿ, te sa ñuhu-aⁿ cùmídíco cùmí cuía-aⁿ. Te ñá túú ní xóo quee-aⁿ veñúhu càhnu sá ío cùnuu, chi nduu niú ní xóo chiñuhu-aⁿ Dútú Ndiöxí, te áma ñá túú tnahí ná ní xóo caxi-aⁿ ní xóo càháⁿ ndíhi-aⁿ Yá Ndiöxí.

38 Te ñi-ni òré ndécú-yu ndíhi Jèsús ní quexío-aⁿ núu-yu, te ní ndacáⁿ táhú-án núú Yá Ndiöxí cuèndá sá nǐ xiní-aⁿ Jèsús, te dàtnùnì ní ngüíta-aⁿ càháⁿ váha-aⁿ cuèndá-gá núú nchàa ñáyiú, ñáyiú ndètu quínì sáá nduu dàcácu Yá Ndiöxí ñáyiú Jerusálén núú tñndòho tnúhu ndàhú.

Cuánuhú-yu ñuú Nazàrét

39 Te sátá nǐ quidé-yu nchaa nàcuáa càháⁿ tnúhu Yá Ndiöxí, te cuánuhú-yu ñuú Nazàrét núú ndécú tnahí-yu, te ñuú-án yíndèhu-xi distritú Galiléa.

40 Te té lǐhli nàni Jèsús-án tá sahnu-dé, te ta nihí ndéé-dé cuáháⁿ, te ducaⁿ ío váha ta sáá sá xiní tnùnì-dé cuáháⁿ, chi Yá Ndiöxí ndécú ndíhi ñaha-gá xii-dé.

Jèsús ndécú-gǎ veñúhu

41 Te ndi tnahá cuía ní xóo quihíⁿ té Chèè ndihí nǎná Jèsús vico pàscuá ñuú Jerusalén.

42 Te cútnahá ní chítú Jèsús úxúú cuía-gǎ, te cuáháⁿ-yu ndihí-gǎ ñuú Jerusalén vico pàscuá, chí ducaⁿ tnáhi quidé-yu.

43 Te òré ní yáha vico, te ní natníⁿ-yu ichi cuánuhú-yu, te ní quendóo-gǎ ñuú Jerusalén, te ní nǎná-gǎ, te ní tǎ Chèè ñá túú ní xini ní quendóo-gǎ.

44 Chi ní sani iní-yu sá ñútnahá-gǎ tnuú nchaa ñáyiú ní sáháⁿ vico cuánuhú. Te ní xúhuⁿ-yu ñⁿ nduu ichi ta ndúcu tnuúhu-yu-gǎ núú nchaa ñaní tnáhǎ-yu, ndihí núú nchaa ñáyiú xini tnáhá ndihí-yu,

45 te ñá túú ní nánihí ñáhǎ-yu xii-gǎ. Núú ní nacuícú-yu cuánuhú tucú-yu ñuú Jerusalén cuèndá yàcáⁿ nanducu ñáhá-yu xii-gǎ.

46 Te núú ùní nduu sá ñí dana núú ñáhǎ-yu xii-gǎ, te ní naníhí ñáhǎ-yu núcúo-gǎ xití veñúhu càhnu sá ño cùnuu tnuú cue téé dàcuaha ñaha xii-yu nchaa tnuúhu ní chídó tnùní ndí Moisés, te ndèdóho ñaha-gǎ xii-güedé, te nándi sá ndúcú tnuúhu-gǎ núú-güedé.

47 Te nchaa cue téé xíndedóho ñaha xii-gǎ xicuñúhu-güedé sá ño váha sàá sá xini tnùní-gǎ, te ño váha nihí-gǎ tnuúhu nàdanchocáva-gǎ.

48 Te òré ní xini ñáhá tǎ Chèè ndihí nǎná-gǎ xii-gǎ, te ño ní cuñúhu-yu, te ní xáhaⁿ nǎná-gǎ xii-gǎ:

—Yòhó déhe-í, ¿ná cuèndá ducaⁿ ní quide ñaha-n xii-ndí? Te tǎtá-n ndihí yúhú ndihú iní-ndí xicá nanducu ñaha-ndí xii-n —càchí-xi xáhaⁿ-xi xii-gǎ.

49 Te ní xáhaⁿ Jèsús xii-yu:

—¿Ná cuèndá nánducu ñaha-ndo? ¿Náa ñá túú xini-ndó sǎ núú chíúⁿ Tǎtá-í tàú-í caca cuu-í-ǎⁿ? —càchí-gǎ xáhaⁿ-gǎ xii-yu.

50 Dico mèé-yu ñá túú ní tècú tnùní-yu nàcuáa ní xáhaⁿ-gǎ.

51 Te sátá dúcáⁿ te cuánuhú ndihí ñáhá-yu xii-gǎ ñuú Nazàrét, te ño ní sándáá iní ñáhá-gǎ xii-yu. Te nchaa sá ñí quide-gǎ-án ñí xúhuⁿ nahi-ni iní nǎná-gǎ.

52 Te Jèsús ducaⁿ-ni ta sàhnu-gǎ cuáháⁿ, te ta sàá-gǎ sá xini tnùní-gǎ cuáháⁿ, te ducaⁿ cùdu-gǎ núú Yǎ Ndiöxí, ndihí núú nchaa ñáyiú.

3

Té Juáá téé dàcuandute ñaha xii ñáyiú càháⁿ-dé tnuúhu Yá Ndiöxí xití yucu (Mt. 3:1-12; Mr. 1:1-8; Jn. 1:19-28)

1 Te ní cuu sáhúⁿ cuía sǎ yíndaha té Tiberiú cuéhé nàcióⁿ, te dàvá-áⁿ ñí cunuu té Pilatú distritú Jùdeá, te té Hèrodés ní cunuu-dé distritú Galileá, te ñaní-dé té Lipé ní cunuu-dé distritú Itureá ndihí ingá distritú nání Tràconité, te té Lisaniás ní cunuu-dé distritú Abiliniá.

2 Te té Ànás ndihí té Caifás ní cuu-güedé dútú cùnù. Te dàvá-áⁿ ñí cáháⁿ ndihí ñaha Yǎ Ndiöxí xii té Juáá déhe té Zacàriá xití yucu sá quihíⁿ-dé cáháⁿ-dé tnuúhu-gǎ núú ñáyiú.

3 Te té Juáá ní yáha-dé nchaa ñuú cáá yàtni yúte Jòrdán, te xáhaⁿ-dè xii nchaa ñáyiú:

—Chí dándixi túu iní sá ñà túú quide váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yǎ Ndiöxí nchaa yicá cuèchi-ndo —duha ní xáhaⁿ-dè xii-yu.

4 Te ducaⁿ ñí quide-dé chí ní quee ndáá-xi nàcuáa ní chídó tnùní ndí Chàíá téé ní xóo cáháⁿ tnuúhu Yá Ndiöxí ndéé sanaha núú tütú ndí núú càchí-xi:

Tècú càháⁿ níhi ñⁿ téé yìhi xití yucu, te xáhaⁿ-dè xii ñáyiú:

“Chí dáñá nchaa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuèndá cundecu túha-ndo, chí véxi Yaá ño cùnuu.

5 Te nchaa núú cùnú nachítú, te nchaa tindúú ndihí nchaa yucu ngoyo nihnu cuèndá nduu ndáá, te nchaa ichi ñá túú cuáháⁿ ndáá nduu ndáá,

te nchaa ichi ñá túú càváha nduu váha.

6 Te nchaa ñáyiú ñuyíú-a níhi-yu tnuúhu sá Yǎ Ndiöxí véxi-gǎ dàcácu nihnu ñaha-gǎ xii-yu núú ùhú núú ndáhú.”

Duha ní chídó tnùní ndí Chàíá núú tütú ndí.

7 Te òré ní xica ñáyiú cuáháⁿ-yu cuèndá dacuandute ñaha té Juáá xii-yu, te ní xáhaⁿ-dè:

—¡Nchaa nchòhó cúú-ndó dàtná ñⁿ cóo dèéⁿ chí ño cuihna iní-ndó! ¿Te nása ní cuu núu tnáhá nchòhó ndúcú-ndó nàcuáa cácu nihnu-ndo núú tnúndóho càhnu vihi sá tá cùyàtni ñaha xii-ndo véxi-i?

8 Te chí cádá vǎha vitna cuendá ducaⁿ cùtnuní sá ñí dáñá-ndó nchàa ichi cuehé ichi duha ndècu-ndo. Te vá cǎchí-ndó sá ïo cǎhnu cuu-ndo cuendá sá cúú-ndó ñaní tnáhá ndíi Àbrahám, chí cuéi ndéé yúú te ndacu Yá Ndiöxí ndada-gá ñáyiú te cuú-yu ñaní tnáhá ndíi Àbrahám.

9 Te caá chí ndècu túha-xi sá quèndé-xi nchaa yutnu sá ñà túú cǎváha sǎvidí-xi, chí nchaa yutnu-áⁿ tènndé-xi te cuánguee-xi núú ñùhú cǎyú-xi. Te duha sǎtnahá-xi ndoho nchaa ñáyiú ñá túú quide váha, chí nchaa ñáyiú ducaⁿ ñà túú quide váha cúú-yu dàtná nchaa yutnu sá ñà túú cǎváha sǎvidí-xi. —cǎchí-dé xǎhaⁿ-dē xií-yu.

10 Te ní xícáⁿ tnúhu-yu núú-dē, te xǎhǎⁿ-yu:

—¿Te nása cada-ndí váiⁿ? —cǎchí-yu xǎhǎⁿ-yu xii-dé.

11 Te xǎhaⁿ-dē:

—Te núú ndédacàa-ndo ndecu ndíhi-ndo úú dóó te cuáñaha-ndo ñí xii ñáyiú ñá túú ndècu ndíhi, àdi núú ndècu ndíhi-ndo sá nchító-ó te cuáha-ndó-yu na cǎxí-yu —cǎchí-dé xǎhaⁿ-dē xií-yu.

12 Te ní quexìo ñí úú cue téé cuihna ñí-xi quide cobrá ñáhá xii ñáyiú cuendá impuèstú cuendá cuàndute-güedé, te ní xícáⁿ tnúhu-güedé núú tē Juàá, te xǎhaⁿ-güedé:

—Mèstrú, ¿te nása cada-ndí cuendá cuu váha ñí Yá Ndiöxí-i? —cǎchí-güedé xǎhaⁿ-güedé xii-dé.

13 Te té Juàá ní xáhaⁿ-dē:

—Vá cuidó-ndó cǎda cobrá-ndó ñáyiú —cǎchí-dé xǎhaⁿ-dē xii-güedé.

14 Te tnàhá ñí úú cue téé cùu sandadú xǎndecu-áⁿ ñí xícáⁿ tnúhú-güedé núú tē Juàá, te xǎhaⁿ-güedé:

—Te nchúhú ¿nása cada-ndí cuendá cuu váha ñí Yá Ndiöxí-i? —cǎchí-güedé xǎhaⁿ-güedé xii-dé.

Te ní xáhaⁿ tē Juàá:

—Vá quéndé-ndó sǎ néhé tnàha ñáyiú-ndo, te ñí vǎ dǎcàa díquí-ndó-yu ñí sá ñà túú nǎ quidē-yu, te nduu vétú ñí-ndó nàcuáa ñùhu yáhu-ndo —cǎchí-dé xǎhaⁿ-dē xii-güedé.

15 Te nchaa ñáyiú xǎndetu sá quíxí Crìstú sǎni ñí sǎni úú ñí-yu núú sá díú Crìstú

Yaá tendaha Yá Ndiöxí quixi ñuyíú-a cùu te Juàá àdi ñáhá.

16 Dico té Juàá ní cǎháⁿ ndodo-dé núú-yu nchaa-yu, te xǎhaⁿ-dē:

—Na cǎchí tnúhu ndáá-í xii-ndo sǎ yùhú véxi-í sá cuendá-ñí dacuàndute ñaha-í xii-ndo dàtná ñí cǎchí Yá Ndiöxí, dico nchícúⁿ ñngá téé véxi, te téé-áⁿ taxi-dé Espíritú Yá Ndiöxí cundecu ndíhi-ndo, te cùu-xi datná ñí ñuhú, chí ndada ndoo ndada ñí-xi ñí-ndó. Te téé-áⁿ ño-gá cúnúu-dé dǎcúxí yùhú, chí yùhú cúú-í ñí téé duuⁿ duuⁿ ñá túú tàú-í nandaxi-í cuédicó ñí chǎú-dé dico quide-í chiuⁿ-dē.

17 Te téé-áⁿ sa véxi túha-dé sá cádá ñí ñaha-dé xii-o dàtná quidē ñáyiú ndàda ndoo triú, chí ñáyiú-áⁿ sa nēhe túha-ná-yu yaxíⁿ-yu òré nǎñáni cuendá ndada ndoo-yu, te òré ndádá ndoo-yu triú-áⁿ te dàquee díⁿ-yu mihi-xi, te tàxúha-yu mee-nǎ triú-áⁿ, te mihi-xi-áⁿ sǎhmí-yu. Te dàtná quidē-yu mihi triú-áⁿ ducaⁿ sǎtnahá-xi cada ñaha téé-áⁿ xii nchaa ñáyiú ñá túú quide váha, chí daquihíⁿ ñáhá-dē xií-yu núú ñùhú núú cǎyú, te ñuhú-áⁿ ñà túú tnàhí ndàhvá —cǎchí-dé xǎhaⁿ-dē xií-yu.

18 Te tǎtní víhí-gǎ tnúhu váha ñí xáhaⁿ tē Juàá xií-yu òré ñí dásàhú ñáhá-dē.

19 Te ní cǎháⁿ-dé dóho té Hèrodés cuendá sá ndécá-dē ñí ñaha ñani Herodiás ñaha ñí cǎndeca ñaní-dé té Lìpé, te ní xáhaⁿ-dē cuendá nchaa dava-gá sá cuéhé sá dúhá quide-dé.

20 Dico té Hèrodés ñá túú ñí quide cuendá-dé tnúhu ñí cǎháⁿ té Juàá, chí nēhé-gá tucu ñí quide-dé, chí da vecáá ñí chihi-dé té Juàá.

Sàndute Jesús

(Mt. 3:13-17; Mr. 1:9-11)

21 Te òré dǎcuàndute té Juàá nchaa ñáyiú, te tnàhá Jèsús ñí dǎcuàndute ñaha-dé xii-gá. Te ñí cǎháⁿ ndíhi-gá Dútú Ndiöxí ñí nacaáⁿ andíu,

22 te ñí quee Espíritú Yá Ndiöxí véxi cuuⁿ túu-xi, te cǎa-xi datná cǎá ñí lómá, te òré-áⁿ ñí tecú ñí cǎháⁿ Yá Ndiöxí ndéé andíu, te xǎhaⁿ-gǎ xii Jèsús:

—Yòhó cúú-n Dēhe-í téé ño cùu ñí-í, te ño cùdí ñí ñáhá-í xii-n —cǎchí-gá xǎhaⁿ-gǎ xii Jèsús.

Cue téé ní xíndecu díhna-gá ñuyíú-a dàcúúxí Xìtòhó Jesucristú
(Mt. 1:1-17)

²³ Te ndècu Jesús dàtná ócò úxí cuíá-gă cútnàhá ní chisaha-gă chiu ní táhú Tàtá-gă Dútú Ndiòxí cada-gă. Te ní cuu-gă déhe té Chèé chi ducaⁿ sàni iní ñáyiú ñuyíú-a. Te té Chèé-ánⁿ ní cuu-dé déhe té Èlí,

²⁴ te téé-ánⁿ ní cuu-dé déhe té Mátát. Te té Mátát-ánⁿ ní cuu-dé déhe té Lèví, te téé-ánⁿ ní cuu-dé déhe té Mèlquí. Te té Mèlquí-ánⁿ ní cuu-dé déhe té Jàná, te téé-ánⁿ ní cuu-dé déhe té Chèé.

²⁵ Te té Chèé-ánⁿ ní cuu-dé déhe té Matàtiás, te téé-ánⁿ ní cuu-dé déhe té Àmós. Te té Àmós-ánⁿ ní cuu-dé déhe té Nàhúm, te téé-ánⁿ ní cuu-dé déhe té Èslí. Te té Èslí-ánⁿ ní cuu-dé déhe té Nagái,

²⁶ te téé-ánⁿ ní cuu-dé déhe té Màát. Te té Màát-ánⁿ ní cuu-dé déhe té Matàtiás, te téé-ánⁿ ní cuu-dé déhe té Semèí. Te té Semèí-ánⁿ ní cuu-dé déhe té Chèé, te téé-ánⁿ ní cuu-dé déhe té Jùdá.

²⁷ Te té Jùdá-ánⁿ ní cuu-dé déhe té Jòaná, te téé-ánⁿ ní cuu-dé déhe té Rèsá. Te té Rèsá-ánⁿ ní cuu-dé déhe té Zorobàbél, te téé-ánⁿ ní cuu-dé déhe té Salàtiél. Te té Salàtiél-ánⁿ ní cuu-dé déhe té Nèrí,

²⁸ te téé-ánⁿ ní cuu-dé déhe té Mèlquí. Te té Mèlquí-ánⁿ ní cuu-dé déhe té Àdí, te téé-ánⁿ ní cuu-dé déhe té Còsám. Te té Còsám-ánⁿ ní cuu-dé déhe té Elmòdám, te téé-ánⁿ ní cuu-dé déhe té Ęr.

²⁹ Te té Ęr-ánⁿ ní cuu-dé déhe té Jòsué, te téé-ánⁿ ní cuu-dé déhe té Elièzér. Te té Elièzér-ánⁿ ní cuu-dé déhe té Jòrím, te téé-ánⁿ ní cuu-dé déhe té Mátát.

³⁰ Te té Mátát-ánⁿ ní cuu-dé déhe té Lèví, te téé-ánⁿ ní cuu-dé déhe té Mió. Te té Mió-ánⁿ ní cuu-dé déhe té Jùdá, te téé-ánⁿ ní cuu-dé déhe té Chèé. Te té Chèé-ánⁿ ní cuu-dé déhe té Jònán, te téé-ánⁿ ní cuu-dé déhe té Eliàquím.

³¹ Te té Eliàquím-ánⁿ ní cuu-dé déhe té Mèléá, te téé-ánⁿ ní cuu-dé déhe té Mainán. Te té Mainán-ánⁿ ní cuu-dé déhe té Mátatá, te téé-ánⁿ ní cuu-dé déhe té Nàtán.

³² Te té Nàtán-ánⁿ ní cuu-dé déhe té Dàvíí, te téé-ánⁿ ní cuu-dé déhe té Isàí. Te té Isàí-ánⁿ ní cuu-dé déhe té Òbéd, te téé-ánⁿ ní cuu-dé déhe té Bòóz. Te té Bòóz-ánⁿ ní cuu-dé déhe té Sàlmón, te téé-ánⁿ ní cuu-dé déhe té Naàson.

³³ Te té Naàson-ánⁿ ní cuu-dé déhe té Am-inàdáb, te téé-ánⁿ ní cuu-dé déhe té Àrám. Te

te Àrám-ánⁿ ní cuu-dé déhe té Èsróm, te téé-ánⁿ ní cuu-dé déhe té Fàrés. Te té Fàrés-ánⁿ ní cuu-dé déhe té Jùdá,

³⁴ te téé-ánⁿ ní cuu-dé déhe té Jàcób. Te té Jàcób-ánⁿ ní cuu-dé déhe té Isàác, te téé-ánⁿ ní cuu-dé déhe té Àbrahám. Te té Àbrahám-ánⁿ ní cuu-dé déhe té Tàré, te téé-ánⁿ ní cuu-dé déhe té Nàcór.

³⁵ Te té Nàcór-ánⁿ ní cuu-dé déhe té Sèrúg, te téé-ánⁿ ní cuu-dé déhe té Ragàú. Te té Ragàú-ánⁿ ní cuu-dé déhe té Pèlég, te téé-ánⁿ ní cuu-dé déhe té Hèbér. Te té Hèbér-ánⁿ ní cuu-dé déhe té Sàlá,

³⁶ te téé-ánⁿ ní cuu-dé déhe té Cànán. Te té Cànán-ánⁿ ní cuu-dé déhe té Arfàxád, te téé-ánⁿ ní cuu-dé déhe té Sèm. Te té Sèm-ánⁿ ní cuu-dé déhe té Nòé, te téé-ánⁿ ní cuu-dé déhe té Làméc.

³⁷ Te té Làméc-ánⁿ ní cuu-dé déhe té Matusalén, te téé-ánⁿ ní cuu-dé déhe té Ènóc. Te té Ènóc-ánⁿ ní cuu-dé déhe té Jàréd, te téé-ánⁿ ní cuu-dé déhe té Mahalàleél. Te té Mahalàleél-ánⁿ ní cuu-dé déhe té Cànán,

³⁸ te téé-ánⁿ ní cuu-dé déhe té Ènós. Te té Ènós-ánⁿ ní cuu-dé déhe té Sèt, te téé-ánⁿ ní cuu-dé déhe té Àdán. Te té Àdán-ánⁿ chi mee Yà Ndiòxí ní cadúha ndaha ñàha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espiritú Yà Ndiòxí, te Espiritú-ánⁿ ndécá ñàha-xi xii-gá cuáhánⁿ ìⁿ xití yucu.

² Te yàcáⁿ ní xíndecu-gá údico nduu, te sácuíhná ní cuiní-xi coto ndeé ñàhá-xí xii-gá te núu ndisa sá vǎ cáda-gǎ ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndi ùdico nduu-ánⁿ, te sátá dúcáⁿ te ní xícáⁿ iní-gá caxi-gá.

³ Te sácuíhná-ǎⁿ ní xáhaⁿ-xi xii-gá:
—Te núu ndisa sá cúú-n Dèhe Yà Ndiòxí, te cúñaha xii yúú-a na ndùu-xi paá —càchí-xi xǎhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núú tütú Yà Ndiòxí càchí-xi: “Ñà díú mèe-ni paá candeca-xi iní ñáyiú, chi tnàhá nchaa tnúhu càháⁿ Yà Ndiòxí candeca-xi iní-yu”, duha càchí-xi núú tütú-gá —càchí-gá xǎhaⁿ-gǎ xii-xi.

⁵ Te dătnùnî sácuíhná ndécá ñàha-xi xii-gá cuáháⁿ ñⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi túhu nacióⁿ cáá ñùyíú.

⁶ Te ní xáhaⁿ-xi xii-gá:

—Yúhú cada-í, te taxi tnùnî-n nchàa-ndi túhú nacióⁿ-a ndìhi nchaa sá vâha ió diu-ni nchaa nacióⁿ-a, te cachí ñáyiú sá ïo cùnuu-n, chi yúhú cúú cuendá-í nchaa sá ió nchaa nacióⁿ-a, te ndédani càa ñáyiú cùu iní-í te cúñaha-í xii-yu taxi tnùnî-yu.

⁷ Te núu ni yùhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xâhaⁿ-xi xii-gá.

⁸ Te Jèsús ní xáhaⁿ-gă xii-xi:

—Xocuiñî yòhó sácuíhná núú ndécù-í-a, chi vá cúú càda-í nàcuáa càchí-n chi núú tütú Yă Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñⁿdií díí-ni-gă cada-ndo nchàa nacuáa càháⁿ-gá”, duha càchí-xi núú tütú-gá —càchí-gá xâhaⁿ-gă xii-xi.

⁹ Te sácuíhná ndécá ñàha tucu-xi xii-gá cuáháⁿ ñuú Jerusàlén, te ní xáhaⁿ-xi xii-gá cuásaá-gá díquí veñúhu càhnu sá ïo cùnuu, te ní xáhaⁿ tucu-xi:

—Te núu ndisa cùu-n Déhe Yă Ndiöxí te cuandèe ndava ndéé núú ñúhú

¹⁰ cuendá quee ndáá-xi nàcuáa càháⁿ-xi núú tütú Yă Ndiöxí núú càchí-xi:

Yă Ndiöxí tendaha-gă cue espíritú xínú cuèchi núú-gă quixi-xi coto ñaha-xi xii-n.

¹¹ Te núú ndáhá-xí càundodo-n cuendá sá vâ dánicuéhé yúú sáhá-n, duha càchí-xi núú tütú-gá —càchí sácuíhná xâhaⁿ-xi xii-gá.

¹² Te Jèsús ní xáhaⁿ-gă xii-xi:

—Te càchí tucu-xi núú tütú Yă Ndiöxí: “Vá cánî iní-n còto ndéé-n Dütú Ndiöxí Yaá cúú Ndiöxí-n ñuú ndisa sá dácăcu nihnu ñaha-gă xii-n cuendá ñⁿ sá sání iní-n càda-n sá cúú-xí mèe-n”, duha càchí-xi núú tütú-gá —càchí-gá xâhaⁿ-gă xii-xi.

¹³ Te sátá dúcáⁿ te sácuíhná ñà túú-gă ní cùtnunî iní-xi nása cada-xi Jèsús, núú xiáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tătá-gă Dütú Ndiöxí cada-gá

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gá distritú Galileá, dico sa ndècu ndìhi-gá Espíritú Yă Ndiöxí,

te ni càa xico xiáⁿ ní níhî-yu tnúhu nchaa nàcuáa quide-gá.

¹⁵ Te ndi tnahá ñuú cuáháⁿ-gá ducaⁿ cuãnguïhu-gá veñúhu-yu dānehé ñáhá-gă xií-yu, te ncháá-yu càchí-yu sá ïo càhnu cuu-gá.

Jèsús ndécú-gă ñuú Nazàrét

(Mt. 13:53-58; Mr. 6:1-6)

¹⁶ Te Jèsús ní sáháⁿ-gá ñuú Nazàrét ñuú núú ní sahnu-gá. Te nduu ndètatú ñáyiú ní quíhu-gá veñúhu, chi ducaⁿ tnàhí quide-gá, te ní ngúnutñî-gá dácuaⁿha-gá tutú ndéé tnúhu Yă Ndiöxí.

¹⁷ Te ní sáñaha-güedě xii-gá tutú ndéé tnúhu ní cáháⁿ ndíi Chàíá téé ní xóo cáháⁿ tnúhu Yă Ndiöxí ndéé sanaha, te òré ní nandicá-gá núú tütú-áⁿ te ní naníhî-gă núú càchí-xi:

¹⁸ Espíritú Yă Ndiöxí ndécú ndìhi ñaha-xi xii-í,

chi ní cachí-gá sá càháⁿ-í tnúhu-gá sá cúú-xi ñáyiú ndàhú,

ñáyiú vátá cündèdóho tnàhí-gá.

Te véxi-í cuendá vá ndìhú-gá iní ñáyiú ñá túú ndècu váha iní-xi,

te cue ñáyiú sa nèhe váha ñaha-nă yucu ñăvâha dácăcu nihnu-í-yu.

Te cue ñáyiú cuáá nacaáⁿ-í núú-yu,

te ñáyiú ndòho dandoho ñaha tnahá ñáyiú-xi taunihnu-í-yu.

¹⁹ Te cúñaha-í xii ñáyiú sá sàá nduu càda Yă Ndiöxí ñⁿ sá vâha sá cúú-xí-yu.

Duha càchí-xi núú tütú dácuaⁿha-gá.

²⁰ Te Jèsús ní nacadí-gá núú tütú-áⁿ, te ní nacuáha-gá ñⁿ téé xínu cuechi veñúhu-áⁿ, te ní ngóo-gá. Te nchaa ñáyiú yìhi veñúhu ñá núú núú-yu ndèhe ñahá-yu xii-gá.

²¹ Te xâhaⁿ-gă xií-yu:

—Mei vitna ní quee ndáá-xi nàcuáa càháⁿ-xi núú tütú Yă Ndiöxí —càchí-gá xâhaⁿ-gă xií-yu.

²² Te ncháá-yu ní cáháⁿ váha-yu cuendá-gá, te ní cuñúhu-yu tnúhu váha càháⁿ-gá, te xitnàhá-yu:

—¿Te náa ñá díú tēe-a cùu-dé déhe té Chéé-ăⁿ? —càchí-yu xitnàhá-yu.

²³ Te Jèsús ní xáhaⁿ-gă:

—Na càchí tnúhu ndáá-í xii-ndo sã ñúhú iní-ndó cùñaha-ndo xii-í ñⁿ tnúhu cùtexínu sá càháⁿ méé-ndó, te quesaha-ndo:

“Ñátátná cada tátna mee-n”, duha quesaha-ndo. Te cúñaha tùcu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnàhá ñúú núú ní sahnú-n”, duha quesaha-ndo —càchí-gá xáhaⁿ-gã xií-yu.

24 Te ní xáhaⁿ tùcu-gá:

—Na càchí tnúhu ndáá-í xii-ndo sã ní ñⁿ tée càháⁿ tnúhu Yá Ndiõxí ñá túú tnàhá iní ñáhá ñáyíu ñúú-dé.

25 Te na càchí tnúhu ndáá tucu-í xii-ndo sã ño vãi ñáyíu ñáhí ñáyíu quèé ní xíndecu nacióⁿ Isràél cútnàhá ní xíndecu té Èliás cútnàhá ñá túú ní cùuⁿ dáú ùní cuíá dava, te dàvá-áⁿ ño ní ndoho ñáyíu docó nitùhú nacióⁿ.

26 Dico Yá Ndiõxí ñá túú ní tëndaha-gá té Èliás quíhíⁿ-dé vehe ndédani càa ñáyíu ñáhí-áⁿ, chi vehe ñⁿ ñaha ñúú Sàreptá ní xáhaⁿ-gã ní sáháⁿ-dé, te ñúú-áⁿ cáa yàtni-xi ñúú Sìdón.

27 Te ní xíndecu tucu ingá tée ní xóo cáháⁿ tnúhu Yá Ndiõxí ndéé sanaha, te tée-áⁿ ñí xínani-dé Eliseú, te ñíu-ni dàvá-áⁿ ñí xíndecu tucu vãi ñáyíu cùhú nacióⁿ Isràél, ñáyíu ní tnàhá cuéhé sã dátèhyú nihnu-xi yíqui cùnú-yu dico ñá túú ní ndùha-yu, chi ñⁿ ñí-ni té Nàamán tée distritú Siríá ní ndúha-dé —càchí-gá xáhaⁿ-gã xií-yu.

28 Te sá dúcáⁿ ñí cáháⁿ-gá te xíáⁿ ní cudééⁿ víhí nchaa ñáyíu yíhi veñúhu-áⁿ núú-gã.

29 Te ní queñuhú-yu Jèsús yuhu dèhvá tìndúú núú cáa ñúú-yu-áⁿ cuèndá yàcáⁿ dàquée-yu-gá déhvá ní cùu.

30 Dico Jèsús vii-ni ní quee-gá tnuú-yu cuáháⁿ-gá.

Ñⁿ tée yíhi ñaha espíritú cùndíhi yucu ñávãha
(Mr. 1:21-28)

31 Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yàcáⁿ ndécú-gã ní tnàhá nduu ndètatú ñáyíu, te ní ngúita-gá dácuàha-gá ñáyíu.

32 Te xícuñúhu-yu nchaa nàcuáa dànehé ñáhá-gã xií-yu, chi càháⁿ-gá dàtná càháⁿ ñⁿ tée cùnuu, te cùnuu ndisa-gá.

33 Te xití veñúhu yíhi ñⁿ tée yíhi ñaha ñⁿ espíritú cùndíhi yucu ñávãha, te espíritú-áⁿ ñí quide-xi níhi ní cáháⁿ tée-áⁿ, te xáhaⁿ-dè xii Jèsús:

34 —¿Te ná cùní yòhó Jèsús tée ñúú Nazàrét cada ñaha-n xii-ndí ñúú véxi-n núú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xini ñáhà-í xii-n sã cúú-n ñⁿ tée ñá túú tnàhí cuéchi-xi chi núú Yá Ndiõxí ní quee-n véxi-n ñúyíu-a —càchí-dé xáhaⁿ-dè xii-gá.

35 Te Jèsús ní tenáá-gá espíritú cùndíhi yucu ñávãha-áⁿ, te xáhaⁿ-gã:

—¿Cadí yuhu-n, te taquèe yíqui cùnú tée-áⁿ! —càchí-gá xáhaⁿ-gã.

Te espíritú cùndíhi yucu ñávãha-áⁿ ñí dándúá-xi tée-áⁿ ndéé ñuhu tnuú ñáyíu xíndecu-áⁿ, te ñá túú-gã ná ní quide ñaha-xi, te ní quee ñaha-xi xii-dé.

36 Te nchaa ñáyíu xíndecu-áⁿ ñí cùnúhu-yu, te ní xítnàhá-yu:

—¿Te nása ndùu-tu tnúhu càháⁿ tée-áⁿ ñá? ¿Te càháⁿ-dé dàtná càháⁿ ñⁿ tée tàxi tnuú víhí, chi càháⁿ-ni-dé te nchaa espíritú cùndíhi yucu ñávãha quèe-ni-xi yíqui cùnú-yu! —càchí-yu xítnàhá-yu.

37 Te nchaa xichi ní níhí-yu tnúhu nàcuáa quide Jèsús.

Jèsús quidé tãtna-gá nãná ñadíhi té Xímú
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadíhi té Xímú-áⁿ cùhú-aⁿ ñúhu vihi-aⁿ cahni, te ní cáháⁿ ndàhú-yu núú Jèsús cuèndá-aⁿ.

39 Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xáhaⁿ-gã xii cahni-áⁿ sã ná xòcuiñí-xi, te ní xòcuiñí-ni-xi, te òré-ni-áⁿ ñí ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedé ndíhi-gá.

Jèsús quidé tãtna-gá vãi ñáyíu cùhú
(Mt. 8:16-17; Mr. 1:32-34)

40 Te òré ní ngódó tnuú nchíanchii, te nchaa ñáyíu xíndecu ndíhi ñáyíu cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ñⁿ ñáyíu cùhú-áⁿ, te ducaⁿ ñí quide-gá te ní ndúha-yu. Te ndí dñⁿ núú cuéhé tnàhá-yu ñⁿ ñⁿ-yu ni cùu.

41 Te tnàhá dava ñáyíu cùhú-áⁿ yíhí ñaha espíritú cùndíhi yucu ñávãha xií-yu ni cùu, te òré ní quee ñaha-xi xií-yu, te xíáⁿ ní

quide-xi níhi ní cáháⁿ-yu, te xǎhǎⁿ-yu xii Jèsús:

—Yòhó cúú-n Dēhe Dútú Ndiǒxí — cǎchí-yu xǎhǎⁿ-yu xii-gǎ.

Dico Jèsús níhi ní cáháⁿ-gǎ ní tenàá-gǎ nchaa espíritú cùndìhi yucu ñávǎha-áⁿ, te xǎhǎⁿ-gǎ sǎ vǎ dúcǎⁿ-gǎ cada-xi, chi sa xìní-xi sǎ díú-gǎ cúú-gǎ Crìstú Yaá ní ten-daha Yǎ Ndiǒxí véxi ñuyúú-a.

Jèsús dánèhé-gǎ ñáyiu distritú Galileá

(Mr. 1:35-39)

⁴² Te ñⁿ nduu ní túndaá-ni ní quee Jèsús ñuú núú ndécú-gǎ-áⁿ cuǎháⁿ-gǎ ñⁿ xichi núú ñǎ túú ñáyiu ndècu. Te cue ñáyiu ní ngüíta-yu nànducu ñahá-yu xii-gǎ te ní naníhí ñáhǎ-yu, te cuìní-yu ngani ñahá-yu xii-gǎ cuendá sǎ ñà túú-gǎ ndéé quíhíⁿ-gǎ ní cùu.

⁴³ Dico ní xǎhǎⁿ-gǎ xií-yu:

—Dacuití quíhíⁿ-í cuñaha-ǎ xii nchaa ñáyiu dava-gǎ ñuú tnúhu sǎ cǎháⁿ nàcuáa ndíhu ndaha ñaha Yá Ndiǒxí xií-yu, chi chiúⁿ tnahí-ǎⁿ vǎxi-í —cǎchí-gǎ xǎhǎⁿ-gǎ xií-yu.

⁴⁴ Te ní xica cuu Jèsús ní dánèhé-gǎ ñáyiu tnúhu-gǎ nchaa xití veñúhu ndǎa distritú Galileá.

5

Jèsús ní quide-gǎ ní níhí-güedě chácá

(Mt. 4:18-22; Mr. 1:16-20)

¹ Te ñⁿ xito ndècu Jesús yuhu làgúná Genesàrét, te ío cuéhé ñáyiu ní sǎá, te ta dàdehnde ñaha-ná-yu xii-gǎ cuáháⁿ sǎ cuìní-yu cundedóho-yu nchaa tnúhu cǎháⁿ-gǎ.

² Te Jèsús ní xiní-gǎ úú bàrcú cue tée tnè chácá xínutnè-xi yatni yuhu làgúná-áⁿ, te sa ní quene cue tée ñuhu xití-xi-áⁿ xínaquete-güedé ñunu-güedé.

³ Te Jèsús cuásaá-gǎ núú ñⁿ bàrcú-áⁿ, te bàrcú-áⁿ cúú-xi bàrcú té Xímú, te ní xǎhǎⁿ-gǎ xii té Xímú-áⁿ sǎ dánündehe-dé-xi luha-gǎ xití ndute. Te dǎtnùní ní ngóo-gǎ núú bàrcú-áⁿ, te xíáⁿ núcǒo-gǎ ní ngüíta-gǎ dánèhé-gǎ ñáyiu.

⁴ Te òré ní túhú ní dánèhé ñahá-gǎ xií-yu, te ní xǎhǎⁿ-gǎ xii té Xímú:

—Daquihíⁿ bàrcú-a xití làgúná mei núú cùnú-gǎ, te dàquée-ndo ñunu-ndo tnè-ndo chácá —cǎchí-gǎ xǎhǎⁿ-gǎ xii-dé.

⁵ Te té Xímú ní xǎhǎⁿ-dě:

—Mèstrú, ni niú ní quide chiúⁿ-ndí te ni ñⁿ chácá ñà túú ní níhí-ndí, dico vitna cuendá-ni sǎ yòhó táuchíuⁿ-n te na dàquée-ndí ñunu-ndí váⁿ —cǎchí-dé xǎhǎⁿ-dě xii-gǎ.

⁶ Te òré ní dàquée-güedé ñunu-güedé te súúní vai chácá ní níhí-güedě, te ta ndátá-ñǎ ñunu-güedé cuáháⁿ ní cùu.

⁷ Núu ní quide-güedé ndaha-güedé núu dàva-gǎ cue tée cùndìhi-güedé xixúhuⁿ ingá bàrcú cuendá quíhíⁿ-güedé chindee ñaha-güedé. Te cue tée-áⁿ ní sáháⁿ-güedé ní chindee tnàha-güedé ní dáchitú-güedé ndi ndúú bàrcú mee-ni chácá, te súúní ní cuu véé núu cuìní-na-xi quée naa-güedé ndíhi bàrcú ní cùu.

⁸ Te sǎ dúcǎⁿ cuìní-xi quée naa bàrcú ní cùu, núu té Xímú, àdi Pelú chi úú diú-dé, ní ngüñí xití-dě núu Jèsús, te xǎhǎⁿ-dě:

—Xocuñí yòhó Jèsús núú ndécú-í-a, chi yuhú cúú-í ñⁿ tée ío ndècu cuéchi-xi —cǎchí-dé xǎhǎⁿ-dě xii-gǎ.

⁹ Te ducaⁿ ní cáháⁿ-dé chi ní yuhú-dé, te ní cuñúhu-dé ndíhi nchaa cue tée ndíhi-dé-áⁿ cuendá sǎ ío vai chácá ní níhí-güedě.

¹⁰ Te tnàhá té Jàcobó ndíhi té Juáa cue déhe té Zebèdeú ío ní cuñúhu-güedé, te diu-ni cue tée cùndìhi té Xímú-áⁿ cúú-güedé tnàhá-güedé. Te Jèsús ní xǎhǎⁿ-gǎ xii té Xímú:

—Vá yuhú-n, chi není vitna quíhíⁿ-n dàcáháⁿ-n ñáyiu cuendá tuha ñahá-yu xii-í —cǎchí-gǎ xǎhǎⁿ-gǎ xii-dé.

¹¹ Te ní quene-güedé ndíhi bàrcú ndéé ñuhu yichí yuhu làgúná-áⁿ. Te òré-áⁿ ní dándõo-güedé nchaandi túhú sǎ ndécú ndíhi-güedé, te ní tuha-güedé Jèsús.

Jèsús quidé tǎtna-gǎ ñⁿ tée tnàhá cuéhé sǎ dátèhyú nihnu-xi yiqui cùñú-ó

(Mt. 8:1-4; Mr. 1:40-45)

¹² Te òré ní quexìo Jesús ñⁿ ñuú, te ní quexìo ñⁿ tée cùhú tnàhá-dé cuéhé sǎ dátèhyú nihnu-xi yiqui cùñú-ó, te òré ní xiní-dé Jesús te ní sáháⁿ-dé núú ndécú-gǎ,

te ní ngüíñí xítí-dě núú-gă te ní nuu núú-dě ndăa núú ñúhú te cãháⁿ ndàhú-dé, te xăhaⁿ-dě xii-gă:

—Mèstrú, véxi-í cãháⁿ ndàhú-í núú-n nũ vá cündêe iní-n cãda tátna ñaha-n xii-í, chi cùtnuní iní-í sá ndácú-n —càchí-dé xăhaⁿ-dě xii-gă.

13 Te Jèsús ní dácãá-gă ndaha-gă ní tendaha ñaha-gă xii-dé, te xăhaⁿ-gă:

—Cuu cada tátna ñaha-í xii-n, te vitna te ndúha-n —càchí-gă xăhaⁿ-gă xii-dé.

Te òré-ni ní xócuíñí cuéhé tnàhá-dé.

14 Te dàtnuní ní xáhaⁿ tucu Jèsús xii-dé:

—Vá yõo ñⁿ cúñaha-n sã ñí quide tátna ñaha-í xii-n, núú dütú-ni cuaháⁿ cuendá sá ná quini ñahá-dě xii-n sã ñí ndúha-n te cuáha-n-dě sá ndúú tãhú Yã Ndiõxí dàtná ní cachí ndíi Moisés cuendá ná quini ñáyiu sá ndăá ní ndúha-n —càchí-gă xăhaⁿ-gă xii-dé.

15 Te ducaⁿ ta xíté nuu-gă tnúhu nchaa nàcuáa quide Jèsús, te ío cuéhé ñáyiu ní xóo tacá nchaa núú ñí xíndecu-gă cuendá sá cuini-yu cundedóho-yu tnúhu cãháⁿ-gă, ndíhi cuendá sá cuini-yu cada tátna ñaha-gă xii-yu.

16 Dico Jèsús ní xóo quee nihni-gă tnuú-yu ní xóo quíhíⁿ-gă núú ñà túú ñáyiu ndècu ní xóo cãháⁿ ndíhi-gă Yã Ndiõxí.

Jèsús quidé tátna-gă ñⁿ tée cùhú ñá cúú-gă candá nihnu

(Mt. 9:1-8; Mr. 2:1-12)

17 Te ñⁿ nduu dânehé-gă ñáyiu, te xínucóo ñⁿ úú cue tée cùu fariséú, ndíhi cue tée dàcuaha ñaha xii ñáyiu nchaa tnúhu ní chídó tnùní ndíi Moisés. Te cue tée-án ñí quee-güedé nchaa ñúú yíndèhu distritú Galileá, ndíhi distritú Jüdeá, ndíhi ñúú Jerusalén, te nchaa ñúú-án ñí quee-güedé cuaháⁿ-güedé núú ndécú-gă. Te Yá Ndiõxí chíndèe ñaha-gă quidé tátna-gă ñáyiu cùhú.

18 Te ñⁿ úú cue tée nchido-güedé ñⁿ tée cùhú ñá cúú-gă candá nihnu ñúhu-dé xító ní quexìo ndíhi ñaha-güedé, te cuini-güedé quíhu ndíhi ñaha-güedé ndéé xítí vehe, sáa-güedé ndéé núú Jèsús ndíhi tée cùhú-án.

19 Dico ñá túú ní ñíhí-güedé ndéé ichi quíhu-güedé, chi cuendá ío cuéhé ñáyiu ndècu, núú xíãⁿ ní sáa-güedé díquí véhé-ãⁿ ñí caáⁿ-güedé te ndăa díquí véhé-ãⁿ ñí dáquëe-güedé tée cùhú-án, te ñúhu-ni-dé

xító ní dáquëe ñaha-güedé tnuú ñáyiu ní sáa ndéé núú Jèsús.

20 Te Jèsús ní cutnùní iní-gă sá ñí yuhu ní iní-güedé sândăá iní ñahá-güedé xii-gă, núú ní xáhaⁿ-gă xii tée cùhú-án:

—Yòhó tée cùhú, sa ní quide cãhnu iní-í nchaa cuéchi-n —càchí-gă xăhaⁿ-gă xii-dé.

21 Te cue tée dàcuaha ñaha xii-yu nchaa tnúhu ní chídó tnùní ndíi Moisés ndíhi cue tée cùu fariséú ní sani iní-güedé: “¿Ná cúú tãe-a núú cãháⁿ cuéhé-dé cuendá Yã Ndiõxí-í? Te vá yõo ñⁿ ndàcu cada cãhnu iní nchaa yíca cuéchi ñáyiu, chi ñⁿ dîi díi-ni Yã Ndiõxí quidé cãhnu iní-gă”, duha ní sani iní-güedé.

22 Dico Jèsús sa ní cutnùní iní-gă nàcuáa sãni iní-güedé nũu ní xáhaⁿ-gă xii-güedé:

—¿Te ná cuendá ducaⁿ sãni iní-ndó-í?

23 Te sá dúhá ñí xáhaⁿ-í xii tée cùhú-a sá cãdá cãhnu iní-í nchaa yíca cuéchi-dé, te xíãⁿ nchòhó ñá túú cùtnuní iní-ndó nũu ndăá cãháⁿ-í àdi ñá ndăá. Dico núú cúu-í-dé sá ndácóo-dé, te caca-dé te cutnùní ndăá iní-ndó nũu ndăá cãháⁿ-í àdi ñá ndăá, chi cundehe nũú-ndó nàcuáa cada-í.

24 Te vitna na cãda-í nàcuáa cutnùní iní-ndó nchaa-ndo sá yùhú Téee cùu ñani tnàhá-ndó nchaa-ndo ndecu ndíhi-í tnúhu ndee iní sá cãdá cãhnu iní-í nchaa cuéchi ñáyiu ñuyíú-a —càchí-gă xăhaⁿ-gă xii-güedé.

Te sátá dúcãⁿ te ní xáhaⁿ-gă xii tée cùhú-án:

—Ndacóo, te ndocani-n xító ñúhu-n véxi-án, te núhú-n vèhe-n —cachí-gă xăhaⁿ-gă xii-dé.

25 Te òré-ni-án ñí ndúha tée cùhú-án te ní ndacóo-dé, te ní ndocani-dé xító ñúhu-dé ní quexìo-án, te ní natñi-dé ichi ta cãháⁿ-dé cuánuhú sá ío cãhnu cuu Yã Ndiõxí.

26 Te nchaa ñáyiu xíndecu-án ñí cuñúhu-yu, te tnàhá-yu ní cachí-yu sá ío cãhnu cuu Yã Ndiõxí, te ducaⁿ ío ní yùhú-yu, te ní xítñahá-yu:

—Vitna ní xiní-ó ñⁿ sá ñà túú tnàhí xíní-ó ní cùu —cachí-yu xítñahá-yu.

Jèsús cãná-gă té Lèví

(Mt. 9:9-13; Mr. 2:13-17)

27 Te sátá dúcãⁿ ñí cuu te ní quee Jèsús xíãⁿ, te ní xiní-gă ñⁿ tée ñani Leví núcóo-dé ñⁿ xichi quide cobrá-dé ñáyiu cuendá impuèstú, chi cobràdór cúú-dě, te ní xáhaⁿ-gă xii-dé:

—Néhé chitnahá ñáhá-n xii-í —càchí-gá xăhaⁿ-gă xii-dé.

28 Te té Lèví-án nǐ ndàcuíñí-dé te ní dándöo-dé nchaa sá ndécú ndìhi-dé núú núcöo-dé-án, te ní tuha-dé Jèsús.

29 Te sátá dúcáⁿ te té Lèví-án nǐ quide-dé ìⁿ vico càhnu vehe-dé sá cúu-xí Jèsús, te ní tacá vâi cue téé quide chiuⁿ quide-dé, te nchaa-güedé cuánguihu-güedé mèsá ní ngóo-güedé ndìhi dava-gá ñáyiu ní quexiö cuendá caxi-güedé ndìhi-yu.

30 Dico cue téé cùu fariséú ndìhi cue téé dàcuaha ñaha xií-yu nchaa tnúhu ní chídó tnùnì ndí Moisés ní ngúita-güedé xícuehé-güedé cue téé xica cuu ndìhi-gá, te xăhaⁿ-güedé:

—¿Ná cuendá xéxí-ndó xìhi-ndo ndìhi cue téé cuihna iní-xi quide cobrá ñáhá xii ñáyiu cuendá impuestú, ndìhi nchaa dava-gá cue téé ndècu ichi cuehé ichi duha-i? —càchí-güedé xăhaⁿ-güedé.

31 Te Jèsús ní xăhaⁿ-gă xii-güedé:

—Nchaa ñáyiu ñá túú cùhú chi ñá túú xini ñuhú-yu ñátátná, dico nchaa ñáyiu cùhú chi xini ñuhu ñahá-yu.

32 Te yúhú véxi-í càháⁿ-í ñáyiu cùtnuni iní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í càháⁿ-í ñáyiu càchí sá ñà túú ndècu cuèchi-xi —càchí-gá xăhaⁿ-gă xii-güedé.

Cue téé ndücu tnúhu núú Jèsús cuendá ñáyiu ñá túú tnàhí ná xéxí áma càháⁿ ndìhi-yu Yá Ndiöxí

(Mt. 9:14-17; Mr. 2:18-22)

33 Te ní xăhaⁿ-güedé xii Jèsús:

—Te áma ñá túú tnàhí ná xéxí cuè téé xica cuu ndìhi té Juáá càháⁿ ndìhi-güedé Yá Ndiöxí, te dïu-ni ducaⁿ quide cue téé xica cuu ndìhi nchúhú cue téé cùu fariséú. ¿Te ná cuendá cue téé xica cuu ndìhi-n ñá túú dùcaⁿ quide-güedé nñu nchaa-ni nduu xèxi-güedé xìhi-güedé quidé-güedé-i? —cachí-güedé xăhaⁿ-güedé xii-gá.

34 Te Jèsús ní xăhaⁿ-gă xii-güedé:

—Nchòhó xini-ndó sǎ vǎ cúu cǔñaha-o xii cue ñáyiu ñuhu vico tnándaha sá vǎ cúu cǎxí-yu nini ndècu ndìhi ñaha téé tnándaha-án xií-yu.

35 Dico sáá nduu te vǎ cúndècu ndìhi ñaha-gá téé tnándaha-án xií-yu, te dàvǎ-án te

cahni iní-yu vǎ cǎxí-yu sá ndìhú iní-yu —càchí-gá xăhaⁿ-gă xii-güedé.

36 Te ní cani-gá ìⁿ cuendú núú ñáyiu nàcuáa tecú tnùnì-yu tnúhu-gá, te xăhaⁿ-gă:

—Vǎ yöo ìⁿ dándée luha dóó sáá ìⁿ dóó sa ní cuu tühú víhí, chi núu yoo ducaⁿ na càda, te dóó sáá-ǎⁿ nàndiyi-xi te uuⁿ-gá ndata-xi dóó sǎ ñí cuu tühú-án, te luha dóó sáá-ǎⁿ ñà túú nàtaú-xi ndée dóó sǎ ñí cuu tühú-án.

37 Te ní vǎ yöo ìⁿ chìhi ndidí sáá xití ìⁿ lamba sa ní cuu tühú víhí, chi núu yoo ducaⁿ na càda, te ndava lamba sa ní cuu tühú-án chi ío níhi yócó ndidí-án, te cuíta-ni ndidí-án te cuíta-ni lamba-án.

38 Núu xǎⁿ xini ñuhu-xi quée ndidí sáá-ǎⁿ xití ìⁿ lamba saa cuendá ducaⁿ ñà túú nǎ cuu cováha-xi.

39 Te ní ìⁿ ñáyiu ñá túú tnàhí iní-yu cohó-yu ndidí sáá, te núu díhna-gá ná còhó-yu ndidí sá ñí quene díhna-gá, chi càchí-yu sá xihí vǎha-gá ndidí sá ñí quene díhna-gá-án dàcúxí ndidí sáá —càchí-gá xăhaⁿ-gă xií-yu.

6

Cue téé xica cuu ndìhi Jèsús sàhnú-güedé yoco triú nduu ndetátú ñáyiu

(Mt. 12:1-8; Mr. 2:23-28)

1 Te ìⁿ nduu cùu-xi nduu ndetátú ñáyiu ñuhu Jèsús ichi ndìhi cue téé xica cuu ndìhi-gá, te ta yǎha-gá ndìhi-güedé ìⁿ xichi núú cáá triú, te ní ngúita-güedé sàhnú-güedé yoco triú-án te ndìhi ndaha-güedé quíⁿ-güedé quée triú tá xèxi-güedé cuáháⁿ.

2 Te ìⁿ úú cue téé cùu fariséú ní xăhaⁿ-güedé xii cue téé xica cuu ndìhi-gá:

—¿Te ná cuendá ducaⁿ quide nchohó ìⁿ sá ñà túú tàú-ó càda-o vitna cuu-xi nduu ndetátú-ó-í? —càchí-güedé xăhaⁿ-güedé.

3 Te Jèsús ní xăhaⁿ-gă xii-güedé:

—¿Te náa ñá túú dàcuaha-ndo núu tütú Yá Ndiöxí núú càháⁿ-xi nàcuáa ní quide ndí Dàví cùtnàhá ní xihí ndí docó ndìhi cue téé ní xica cuu ndìhi ndí-án?

4 Chi ní quíhu ndí vehe Yá Ndiöxí, te ní queheⁿ ndí pǎá ní cuu íí ndécú-ǎⁿ ñí dácǎhñu ndí cue téé xica cuu ndìhi ndí ní xexi ndí ndìhi-güedé, te ñá túú tàú ndí sá dúcáⁿ càda ndí ni cùu, chi mee-ni cuè

dútú tàú-güedé caxi-güedé pàá-áⁿ ní cùu — cachí-gá xáhaⁿ-gã xii-güedé.

⁵ Te ní xáhaⁿ tùcu-gá:

—Te yúhú Téé cùu ñaní tnáhá-ndó nchàa-ndo, tnàhá-í ndécú ndìhi-í tnúhu ndee ìní sá cùu-í nchaa ñáyiu nàcuáa cada-yu nduu ndètátú-ó-á —càchí-gá xáhaⁿ-gã xii-güedé.

*Èⁿ téé ní yíchí ìⁿ xio ndaha-xi
(Mt. 12:9-14; Mr. 3:1-6)*

⁶ Te ingá nduu òu-ni nduu ndètátú ñáyiu cuánguìhu Jèsús xití veñúhu dànehé-gá ñáyiu. Te xiáⁿ ndécú ìⁿ téé cùhú ní yíchí nihnu ìⁿ xio ndaha cùha-dé.

⁷ Te cue téé dàcuaha ñaha xii ñáyiu nchaa tnúhu ní chídó tnùnì ndíi Moisés, ndìhi cue téé cùu fariséu ndéhé-güedé nùu cada tátna ñaha Jèsús xii téé cùhú-áⁿ nduu ndètátú-güedé-áⁿ cuèndá níhí-güedé nàcuáa cada-güedé cacáⁿ cuéchi-güedé cuèndá-gá.

⁸ Dico Jèsús sa ní cutnùnì iní-gá nàcuáa sàni iní-güedé, te ní xáhaⁿ-gã xii téé cùhú ndaha-xi-áⁿ:

—Ndàcuiñí te ngúnutnì-n cuádava tnuú-ndí-a —càchí-gá xáhaⁿ-gã xii-dé.

Te téé-áⁿ ñí ndacuiñí-dé te ní ngúnutnì-dé cuádava tnuú-güedé ndìhi-gá.

⁹ Te dàtnùnì Jèsús ní xicáⁿ tnúhú-gá núu cuè ñáyiu xíndecu-áⁿ, te xáhaⁿ-gã xii-yu:

—Cuínì-í cachí tnúhu-ndo nà cúu sã vaha cada-o nduu ndetátú-ó. ¿Èⁿ chùⁿ váha àdi ìⁿ chiuⁿ cuehé, sá cadá tátna-o ñáyiu cùhú àdi sá cáhni-ó-yu? —càchí-gá xáhaⁿ-gã xii-yu.

¹⁰ Te dàtnùnì ní ndacoto-gá núu-yu ncháa-yu, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gã xii-dé.

Te ní ndocani-dé ndaha-dé, te òré-ni ní ndúha.

¹¹ Te cue téé xíndecu-áⁿ sùúnì ní cudééⁿ-güedé sá dúcáⁿ ní quide tátna Jèsús téé cùhú-áⁿ, te ní ngúíta-güedé ndátnúhu-güedé nùu nása cada ñaha-güedé xii-gá.

Jèsús caxi-gá úxúú tnàhá cue téé dacuaha ñaha xii ñáyiu tnúhu-gá

(Mt. 10:1-4; Mr. 3:13-19)

¹² Te sátá dúcáⁿ ñí cuu te ní xica Jèsús cuáháⁿ-gá xití yucu cuèndá yacáⁿ cáhán

ndìhi-gá Tátá-gã Dútú Ndiöxí, te ní niú ní cáhán ndìhi ñaha-gã.

¹³ Te sátá ñí túndaá, te ní cana-gá nchaa cue téé xica cuu ndìhi-gá, te ní caxi-gá úxúú tnàhá-güedé, te cue téé-áⁿ ñí xáhaⁿ-gã sá díu-güedé cuu-güedé cue téé quíhíⁿ cáhán tnúhu-gá núu ñáyiu.

¹⁴ Te duha xínani ndi úxúú cue téé-áⁿ. Té Xímú, àdi Pelú chi úú díu-dé, ndìhi ñaní-dé té Ndrìxí, ndìhi té Jàcobó, ndìhi té Juàá, ndìhi té Lìpé, ndìhi té Bartolòmé,

¹⁵ ndìhi té Mâteú, ndìhi té Mäxí, ndìhi té Jàcobó déhe té Àlfeú, ndìhi ingá té Xímú téé ní cundìhi cue téé canànistá,

¹⁶ ndìhi té Jüdás ñaní té Jàcobó, ndìhi té Jüdás Iscàrioté téé ní sáá nduu ñí sáha cuèndá ñáhá xii Jèsús núu cuè téé cùu úhú ìní ñáhá xii-gá, duha xínani cuè téé ní caxi Jèsús ní xica cuu ndìhi-gá.

*Jèsús dánèhé-gá cuéhé víhí ñáyiu
(Mt. 4:23-25)*

¹⁷ Te Jèsús cuánuu-gá yucu núu ñí sáá-gá-áⁿ, te ní ngava-gá ìⁿ núu ndáa ndìhi cue téé xica cuu ndìhi-gá, te xiáⁿ ñí ngúnutnì-gá. Te xiáⁿ ndécú dàva-gá cue téé xica cuu ndìhi-gá ndìhi vai ñáyiu ndètu ñahá-yu xii-gá, te ñáyiu-áⁿ vèxi-yu nchaa ñuú cáá dìstritú Jùdeá, ndìhi ñuú Jerusálén, te ndècu ñáyiu véxi ndàa yuhu lamár yatni ñuú Tìrú, ndìhi ñuú Sídón. Te nchaa ñáyiu-áⁿ ñí quexió-yu cuínì-yu cundedóho-yu nchaa tnúhu càhán Jèsús, ndìhi cuèndá sá cuínì-yu ndúha-yu nchaa cuéhé tnàhá-yu.

¹⁸ Te tnàhá ñáyiu yìhi ñaha espíritú cundìhi yucu ñáváha.

¹⁹ Te ncháa-yu cuínì-yu dacáa-yu ndahá-yu tendàhá-yu Jèsús ní cùu cuèndá sá ñí níhí-yu tnúhu sá ndècu ndìhi-gá tnúhu ndee ìní quidé tátna-gá nchaa ñáyiu cùhú.

*Cuèndá ñáyiu ío váha táhú-xi
(Mt. 5:1-12)*

²⁰ Te Jèsús ní ndacoto-gá núu cuè téé xica cuu ndìhi-gá, te ní xáhaⁿ-gã:

—Váha táhú nchaa nchòhó cue ñáyiu ndàhú, chi nduu táhú-ndó cùndecu-ndo núu táxí tnùnì Yã Ndiöxí.

21 'Váha táhú nchaa nchòhó ñáyiú ío cuìní cunedóho tnúhu Yá Ndiöxí chi ío vii ío váha cuu iní-ndó.

'Váha táhú nchaa nchòhó ñáyiú ndàhyú sá ndìhú iní-ndó, chi sáá nduu te cudíí iní-ndó nì caa nì quíhíⁿ.

22 'Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñáyiú váha cùu-ndo, te ducaⁿ càda ñahá-yu xii-ndo sã cuèndá yúhú Tée cùu ñaní tnáhá-ndó nchàa-ndo.

23 Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ío váha càa ndecu andíu cundecu ndìhi-ndo nduu na nasaá-ndó yacáⁿ cundecu-ndo, chi díu-ni ducaⁿ nì xóo cada ñaha cuè ñaní tnáhã-yu xii cue téé ní xóo cáháⁿ tnúhu Yá Ndiöxí ní xíndecu ndéé sanaha.

24 'Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiöxí, chi vitna ío váha ndècú-yu, dico sáá nduu te nduu ndàhú-yu.

25 'Te ndàhú ní cuu tucu nchaa ñáyiú ñà túú tnàhí ná cúmãní xii-xi vitna, chi sáá nduu quìní-yu tnúndòho tnúhu ndàhú.

'Te ndàhú ní cuu nchaa ñáyiú cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndìhú iní-yu.

26 'Te ndàhú ní cuu nchaa ñáyiú na càháⁿ váha dava-gá ñáyiú cuèndá-xi, chi ducaⁿ nì xóo cáháⁿ váha-yu cuèndá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiöxí te ñà ndàá —càchí-gá xãhaⁿ-gã xii-güedé.

Cuu iní-ó nchàa ñáyiú cùu úhú iní ñáhá xii-o

(Mt. 5:38-48; 7:12)

27 Te Jèsús ní xáhaⁿ-gã xii nchaa ñáyiú xíndecu-áⁿ:

—Nchaa nchòhó ñáyiú xíndedóho ñaha càchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã váha sá cúú-xí-yu cuèi nándi sá ná cádá ñáhá-yu xii-ndo.

28 Te cacáⁿ táhú-ndó nùú Yã Ndiöxí cuèndá ñáyiú càháⁿ úhú ñáhá xii-ndo, ndìhi cuèndá ñáyiú tèé ñaha cuéchi neñúú xii-ndo.

29 Te núu ní canihá-yu xii-ndo ìⁿ xito te cuìní tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndìhi dúhnú-ndó, te dañá-ndo na cànehé-yu quíhíⁿ.

30 Te núu xicáⁿ-yu ìⁿ sá nándíhi-yu núu-ndó te cuáñaha-ndo, àdi quèndeé-yu ìⁿ ndachìuⁿ-ndo, te vá nándàcáⁿ-ndó nùú-yu.

31 Te nchaa sá vãha cuìní-ndó càda tnaha ñáyiú-ndo, te cada-ndo tnàhá-ndó ndìhi-yu.

32 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sã ío váha quide-ndo, chi tnàhá nchaa ñáyiú ndècu ichi cuehé ichi duha ducaⁿ xíquidé-yu.

33 Àdi mee-ni ñáyiú quide ñaha sá vãha xii-ndo quide váha-ndó-yu, te vá càchí-ndó sã ío váha quide-ndo, chi tnàhá nchaa ñáyiú ndècu ichi cuehé ichi duha ducaⁿ xíquidé-yu.

34 Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ìⁿ sá xicáⁿ-yu núu-ndó, te vá cání iní-ndó sã ío quide váha-ndo, chi tnàhá ñáyiú ndècu ichi cuehé ichi duha dàsaⁿ nuú-yu ìⁿ sá néhé vãha-yu, te ndètu cahnu-ná-yu nacoto ñaha ñáyiú ní sáha nùú-yu-áⁿ.

35 Dico nchòhó xíní ñùhu-xi cuu iní-ndó ñáyiú cùu úhú iní ñáhá xii-ndo, te cada-ndo sã váha sá cúú-xí-yu, te cuáñaha nùu-ndo ìⁿ sá ná ndíhi-yu te núu xicáⁿ-yu núu-ndó, te vá cùndètu-ndo nacoto ñahá-yu xii-ndo. Te ducaⁿ te ío-gá cuéhé ñhí-ndó cùndecu ndìhi-ndo, te cuu ndisa-ndo dèhe Dútú Ndiöxí, chi ío càhnu iní-gá sá cúú-xí nchàa ñáyiú ñà túú ndàcáⁿ táhú nùú-gã cuèndá nchaa sá vãha quide-gá, ndìhi sá cúú-xí nchàa ñáyiú ndècu ichi cuehé ichi duha.

36 Te cunduu càhnu iní nchòhó tucu dàtná càhnu iní Tátá-ó Dútú Ndiöxí.

Vá càháⁿ cuèhé-ó cuèndá tnàha ñáyiú-o
(Mt. 7:1-5)

37 'Te vá càháⁿ cuèhé-ndó cuèndá sá quidé tnàha ñáyiú-ndo, te ducaⁿ te Yá Ndiöxí ñà túú nà tnúhu cúñaha-gã xii-ndo. Te vá cùñaha-ndo xii ñáyiú sá quíhíⁿ-yu ìⁿ xichi núú úhú núú ndàhú ndohó-yu cuèndá nchaa sá ñà túú vãha quide-yu, te

ducaⁿ te Yá Ndiöxí vá cũñaha-gã xii-ndo sã tnàhá-ndó quĩhíⁿ-ndó ìⁿ xichi núú ùhú núú ndàhú ndoño-ndo. Te chí cádá càhnu iní nchaa sá quidé-yu, te ducaⁿ te Yá Ndiöxí cada càhnu iní ñáhá-gã xii-ndo tùcu.

38 Te chí cuãñaha xì ñáiyu núu ná cúú sã xíní ñùhú-yu, te dàtná chitu ìⁿ yicá súúni xidó coyo-ná, ducaⁿ tàxi Yá Ndiöxí xii-ndo. Te nánicuáa na càda-ndo cada váha-ndo sá cúú-xí tnàha ñáiyu-ndo, te ñu-ni ducaⁿ càda ñaha Yá Ndiöxí xii-ndo —càchí Jèsús xãhaⁿ-gã xií-yu.

39 Te dàtnùní ní cani-gá ìⁿ cuèndú núú-yu nàcuáa tecú tnùnì-yu tnúhu-gá, te xãhaⁿ-gã: —Ìⁿ téé cuáá chí ñá ndácú-dě cuita nehe-dé ingá téé cuáá, chí núu ducaⁿ na càda-güedé te ndi ndùú-güedé ngauni-hnu-güedé déhvã.

40 Te ni ìⁿ landú yíhí scuèlá ñá túú cùnuu-gá-güexi dàcúxí mèstrú-güexi, te ndéé núu na cùtúha váha-güexi, te dàtnùní nútnahá-güexi téé dànehé ñáhá xì-güexi.

41 Te na càchí tnúhu-í xii-ndo sã nchaa cuéchi quide ñáiyu cùu-xi datná ìⁿ mihi líhli. ¿Te ná cuèndá ndéhé-ndó ìⁿ sá ñà túú váha quide tnaha ñáiyu-ndo, te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núú tnàha ñáiyu-ndo, te mee-ndo ñùhu ìⁿ mihi cahnu-gá núú-ndó.

42 Te núu na nàcanu ichi-ndo tnaha ñáiyu-ndo cuèndá sã ñà túú quide váha-yu ndécú-yu te mee-ndo vihi-gá quidé-ndó ñá, te cada iní-ndó sã xãhaⁿ-ndo xií-yu sá nátava-ndo mihi líhli ñùhu núú-yu, te mihi càhnu ñuhu núú méé-ndó ñà túú quide cuèndá-ndó. ¡Te sá dúcáⁿ quide-ndo te ío dàndahú-ndó mèe-ndo sá quidé ndáá-ndó te ñá ndáá sá quidé ndáá-ndó! Te xìni ñuhu-xi díhna-gá ñaha-ndo nchaa sá ñà túú váha quide-ndo, te dàtnùní ducaⁿ te cutnùní váha iní-ndó nàcuáa nacanu ichi-ndo tnàha ñáiyu-ndo.

Ndi díⁿ núú yutnu xìní-ó nã yutnu cùu-xi cuèndá sá sãvidí-xi

(Mt. 7:17-20; 12:34-35)

43 Te ñá túú nì ìⁿ yutnu váha te quiní-ó cùuⁿ sãvidí sá ñà túú váha, te ni ìⁿ yutnu sá ñà túú váha, te quiní-ó cùuⁿ sãvidí váha, chí mee-ni sãvidí sá ñà túú váha cùuⁿ.

44 Te ndi díⁿ núú yutnu xìní-ó nã yutnu cùu-xi cuèndá sá sãvidí-xi, chí ñà túú xìní-ó cùuⁿ ngúxí ìⁿ tnu ñu, te ni ñà túú xìní-ó cùuⁿ ndéhé yoho yàha stilé díquí ìⁿ yoho yàha cutexínu.

45 Te nchaa ñáiyu váha iní-xi càháⁿ-yu tnúhu váha, chí ñu-ni tnúhu váha tnàhí-áⁿ ñùhú iní-yu, te nchaa ñáiyu ñà túú váha iní-xi càháⁿ cuèhé-yu, chí ñu-ni tnúhu cuèhé tnàhí-áⁿ ñùhú iní-yu, chí nchaa sá ñùhú iní-yu te xíáⁿ càháⁿ-yu.

Ìⁿ vehe ndècu cimientú-xi ndìhi ìⁿ vehe ñá túú cimientú-xi
(Mt. 7:24-27)

46 ¿Te ná cuèndá càchí-ndó sã yùhú cúú-í Yáá cúú Xítóhó-ndó te ñà túú quide-ndo nchaa nacuéa càháⁿ-í-í?

47 Te na càchí tnúhu-í xii-ndo cuèndá ñáiyu tùha ñaha xii-í, chí ñáiyu-áⁿ sácúndedóho-yu nchaa tnúhu càháⁿ-í te tníⁿ-yu.

48 Te ñáiyu-áⁿ cúú-yu dàtná ìⁿ téé ní dácáá ìⁿ vehe, chí téé-áⁿ díhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, dico ñà túú ní ndacu-xi cuido-xi, te ducaⁿ chí téé ní dácáá vèhe-áⁿ ní tava-dé cimientú-xi núú yúú cáxíⁿ. Duha sãtnahá-xi cùu nchaa ñáiyu sácúndedóho tnúhu càháⁿ-í te tníⁿ-yu.

49 Te ñáiyu sácúndedóho tnúhu càháⁿ-í te ñà túú tníⁿ-yu, ñáiyu-áⁿ cúú-yu dàtná ìⁿ téé ní dácáá ìⁿ vehe, te ñà túú ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, te íí-ni ní xido-xi vèhe-áⁿ cuèndá sá ñà túú ní quène cimientú-xi. Duha sãtnahá-xi cùu nchaa ñáiyu sácúndedóho tnúhu-í te ñà túú cùnì-yu tníⁿ-yu —càchí-gá xãhaⁿ-gã xií-yu.

7

Jèsús quidé tãtna-gá ìⁿ téé xìnu cuechi núú ìⁿ téé cùu capitáⁿ

(Mt. 8:5-13)

1 Te sátá ní yàha ní cáháⁿ Jèsús ndìhi ñáiyu, te cuáháⁿ-gá ñuú Capèrnaúm.

2 Te yacáⁿ ndécú ñⁿ téé cùu capitáⁿ, te cùhú ñⁿ téé xìnu cuechi núú-dě téé ío-gá cúú ìní-dé, te sa ndècu-ná-dé sá cùú-dé.

3 Te òré ní níhí téé cùu capitáⁿ-áⁿ tnùhu cuèndá Jèsús, te ní tendaha-dě ñⁿ ùú cue téé cùu sacuéhé núú ñáyiú isràél cuáháⁿ-güedé cáháⁿ ndàhú-güedé núú-gă núu vá cündèe ìní-gá quíhíⁿ-gá cada tátna-gá téé xìnu cuechi núú-dě-áⁿ.

4 Te ní quexìo-güedé núú ndécú Jèsús, te ní ngüíta-güedé càháⁿ ndàhú víhí-güedé núú-gă, te xăhaⁿ-güedě:

—Tée cùu capitáⁿ ní cachí-dé véxi-ndí núu vá cündèe ìní-n quíhíⁿ-n càda tátna-n ñⁿ téé xìnu cuechi núú-dě chí cùhú-dé, te tàù ndisa-n càda-n nacuáa càháⁿ capitáⁿ-áⁿ,

5 chí téé-ăⁿ ío cùu ìní ñáhá-dě xii nchaa nchúhú ñáyiú isràél te ðiu-dé ní táúchíúⁿ-dě ní sáá veñúhu-ndí —càchí-güedé xăhaⁿ-güedě xii-gă.

6 Te sátá dúcáⁿ te Jèsús ní xica-gá cuáháⁿ-gá ndihí-güedé, te òré tá cùyatni-gá vehe núú ndécú tée cùhú-áⁿ cuáháⁿ, te téé cùu capitáⁿ-áⁿ ñí xăhaⁿ-dě xii ñⁿ ùú cue téé càháⁿ ndihí-dé:

—Quíhíⁿ-ndó cñaha-ndo xii Yaá cúú Mèstrú sá càchí-í sá ñà túú ñă caní ìní-gá, chí ñà túú tàú-í sá quíhu-gá ndéé xití vehe-í,

7 chí nì sá cùnú ndúcú mèe-í-gá ñà túú ní cùyí-í. Núu xăⁿ cñaha-ndo xii-gá sá ná càháⁿ-ni-gá sá ndùha téé xìnu cuechi núú-í-a te ndùha-dé.

8 Chí yúhú ndécú cuè téé tàxi tnuní ñáhá xii-í, te ducaⁿ yúhú tucu ndècu cue sandadú táxi tnùn-í. Te òré xăhaⁿ-í xii ñⁿ-dé quíhíⁿ-dé ñⁿ chiuⁿ te cuáháⁿ-dé, te òré xăhaⁿ-í xii ñngá-dé quixi-dé te véxi-dé, te òré xăhaⁿ-í xii téé xìnu cuechi núú-í cada-dé ñⁿ chiuⁿ te quide-dé. Duha càchí-í cñaha-ndo xii-gá —càchí-dé xăhaⁿ-dě xii cue téé càháⁿ ndihí-dé-áⁿ.

9 Te sátá dúcáⁿ ñí xăhaⁿ-güedě xii Jèsús, te ní cuñúhu-gá nchaa tnùhu ní cáháⁿ téé cùu capitáⁿ-áⁿ, te ní nchócótó-gă núú nchaa ñáyiú nchícúⁿ ñáhá xii-gá cuáháⁿ, te ní xăhaⁿ-gă:

—Na càchí tnùhu ndáá-í xii-ndo să vătă quíní-gá-í ní ñⁿ ñáyiú isràél, ñáyiú ío váha sàndáá ìní-xi Yá Ndiöxí dàtná sàndáá

ìní ñáhá tée-ăⁿ xii-gă —càchí-gă xăhaⁿ-gă xii-yu.

10 Te òré ní ndexìo cue téé nèhe tnùhu-áⁿ ñí sáháⁿ núú Jèsús, te sa ní ndùha téé cùhú-áⁿ.

Jèsús dándòto-gá déhe ñⁿ ñaha quèé

11 Te sátá dúcáⁿ ñí cuu te ní xica Jèsús cuáháⁿ-gá ñⁿ ñuú nání Nàín, ndihí cue téé xica cuu ndihí-gá, ndihí vâi ñáyiú.

12 Te òré ní sáá-gá yuhu ñuú-áⁿ, te ní xini-gá nchídó-güedě ñⁿ ndíyi cuáháⁿ chindúxi ñaha-güedě, te ndíyi-áⁿ cúú dèhe ñⁿ ñaha quèé, te ñⁿ ñⁿ ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiú cuáháⁿ chindúxi ñaha.

13 Te òré ní xini ñáhá Jèsús xii-aⁿ ndàhyú-aⁿ te ní cundàhú ìní ñáhá-gă, te ní xăhaⁿ-gă:

—Vá ndàhyú-n —càchí-gă xăhaⁿ-gă xii-aⁿ.

14 Te ní dáyátní-gă càjá ñúhú ndíyi-áⁿ te ní dácàá-gă ndaha-gá te ní tendaha-gă càjá-áⁿ, te ní ngüíñí cue téé nchìdo ñaha-áⁿ. Te ní xăhaⁿ-gă xii ndíyi-áⁿ:

—Tée cuechi, yúhú càchí-í sá ndácóo-n —càchí-gă xăhaⁿ-gă xii ndíyi-áⁿ.

15 Te téé ní xihí-áⁿ ñí nucúnucóo-dé te ní ngüíta-dé càháⁿ-dé, te Jèsús ní nacuáha cuèndá ñáhá-gă xii-dé ndaha náná-dě.

16 Te sátá dúcáⁿ ñí quide Jèsús ní xini-yu te ío ní yùhú-yu, te ní xitnàhá-yu:

—Ío càhnu cuu Yá Ndiöxí chí ñⁿ téé càháⁿ tnùhu-gá ní quexìo núú ndécú-ó —càchí-yu xitnàhá-yu.

Te ní xitnàha tucú-yu:

—Yá Ndiöxí véxi-gă chindee ñaha-gă xii nchaa nchoo ñáyiú cùu cuendá-gă —càchí-yu xitnàhá-yu.

17 Te nchaa ñuú distritú Jùdeá, ndihí dava-gă ñuú ní níhí-yu tnùhu nàcuáa ní quide Jèsús.

Cue téé ní tendaha té Juàá cuáháⁿ núú ndécú Jèsús

(Mt. 11:2-19)

18 Te cue téé xica cuu ndihí té Juàá ní xăhaⁿ-güedě xii-dé nchaa sá ñí quide-gă, núu ní cana-dé úú tnàhá-güedé

19 cuèndá cñaha-dě quíhíⁿ-güedé nducu tnùhu-güedé núú Jèsús, te núu sátá díú-gă cúú-gă Crìstú Yaá ní tendaha Yă Ndiöxí véxi

ñuyíú-a àdi sá cùndètu nahi-ni-güedé mei Yàá-án.

²⁰ Te òré ní quexìo cue tée ní tendaha tẽ Juàá núú ndécú Jèsús, te xãhaⁿ-güedẽ xii-gá:

—Té Juàá tée dàcuandute ñaha xii ñáyiu ní tendaha ñaha-dé xii-ndí véxi-ndí cácaⁿ tnúhú-ndí núú-n, núú sá díú-n cùu Cristú Yaa quixi ñuyíú-a, àdi sá cùndètu-ndí mei Cristú cächí-dé —cächí-güedé xãhaⁿ-güedé xii-gá.

²¹ Te mei òré ní quexìo-güedé-án ñ quide tátna Jèsús vai ñáyiu cùhú, te davá-yu cãhú víhi tnàhá-yu, te ndi dííⁿ ndi dííⁿ núú cuèhé tnàhá-yu ñⁿ ñⁿ-yu, te cue ñáyiu yìhi ñaha espíritú cùndìhi yucu ñávãha ní queñuhu-gá espíritú-án yiqui cùñú-yu, te ío vai ñáyiu cuáá ní nacaáⁿ-gá núú-yu.

²² Te Jèsús ní xãhaⁿ-gã xii-güedé:

—Chí cuánùhú te cani-ndo cuèndú núú tẽ Juàá nchaa sá ñ xini-ndó quide-í, ndihi nchaa nàcuáa ndùu tnúhu ní cáháⁿ-í ní xindedóho-ndo. Te cùñaha-ndo xii-dé sá quidé tátna-í núú cuè ñáyiu cuáá, te quide tátna-í cue ñáyiu yacua, ndihi cue ñáyiu tnàhá cuèhé sã dátèhyú nihnu-xi yiqui cùñú-yu, ndihi cue ñáyiu doho, nchaa ñáyiu-án quide tátna-í te ndüha-yu, te ndéé cue ñáyiu sa ní xíhí dándòto-í cùñaha-ndo xii-dé, te cùñaha tùcu-ndo xii-dé sá ndécuu-í dánèhé-í nchaa ñáyiu ndàhú tnúhu sá sánú ìchi ñaha xií-yu nàcuáa naníhí tãhú-yu.

²³ Te cùñaha tùcu-ndo xii-dé sã ío váha táhú nchaa ñáyiu ñá túú quide sáá iní nchaa tnúhu cáháⁿ-í, duha cùñaha-ndo xii-dé —cächí-gã xãhaⁿ-gã xii-güedé.

²⁴ Te sátá ñ yãha-güedé cuánuhú-güedé, te ní ngúita Jèsús ní cáháⁿ-gã núú ñáyiu cuèndá té Juàá, te xãhaⁿ-gã xii-yu:

—Nchòhó ní sándéhé-ndó ñⁿ tée ndècu xití yucu, te tée-án ñá túú sãni ñⁿ sãni úú iní-dé, chi ñá túú quide-dé dàtná quidé nchaa ité náhnú cuáhãⁿ-xi duha cuáhãⁿ-xi dàcãⁿ òré quéné tãchí.

²⁵ Te ni ñá túú ní sándéhé-ndó ñⁿ tée nihnu dóó vãha dóó vii càa. Te nchòhó xini-ndó sã ñáyiu sàcuíhnu dóó vãha dóó vii càa ñá túú ñá cùmãní xií-yu, te nchaa ñáyiu-án ndécü-yu vehe cue tée cùnùu yìndaha ñaha xii ñáyiu.

²⁶ Dico nchòhó chi ní sándéhé-ndó ñⁿ tée cáháⁿ tnúhu Yá Ndiõxí. Te ndáá sã díú

tẽ cáháⁿ tnúhu-gã cúú-dẽ dico cùnùu-gã-dé dàcúxí dàva-gã cue tée cáháⁿ tnúhu-gã.

²⁷ Te ñu cuèndá té Juàá-án cáháⁿ-xi núú tütú Yá Ndiõxí nàcuáa ní xãhaⁿ-gã xii Cristú, te duha ní xãhaⁿ-gã:

Tendaha-ñ ñⁿ tée cáháⁿ tnúhu-í codonùu-dé núú-n cuèndá dàtúha-dé ñáyiu cuèndá quíndáá iní-yu tnúhu-n.

Duha ní xãhaⁿ-gã, te ducaⁿ ñí ngódó tnùní núú tütú-gã.

²⁸ Te na cächí tnúhu-í xii-ndo sã ñⁿ ñⁿ cue tée ñuyíú-a ñá túú cùnùu-güedé dàtná cùnùu té Juàá tée dàcuandute ñaha xii ñáyiu. Te nchaa ñáyiu sa ta ndìhu ndaha ñaha Yá Ndiõxí vitna cuáhãⁿ cùnùu-gã-ni tucú-yu dàcúxí tẽ Juàá cuèi cùú-yu ñáyiu ñá túú cùnùu dacúxí dàva-gã ñáyiu yìndaha-gã —cächí Jèsús xãhaⁿ-gã xií-yu.

²⁹ Te sã dúcãⁿ ñí cáháⁿ Jèsús, núu nchaa ñáyiu ní dàcuándute té Juàá ní cachí-yu sã ío váha quide Yá Ndiõxí, te ñu-ni ducaⁿ ñí cáháⁿ cue tée cuihna iní-xi quide cobrá ñáhã xii ñáyiu cuèndá impuèstú, cue tée ní dàcuándute-dé.

³⁰ Dico cue tée cùu fariséú, ndihi cue tée dàcuaha ñaha xii ñáyiu nchaa tnúhu ní chídó tnùní ndíi Moisés, cue tée ñá túú ní dàcuandute té Juàá ñá túú ní tnàhá iní-güedé cada-güedé nchaa sã vãha cuìní Yá Ndiõxí.

³¹ Te Xítóhó Jesucristú ní xãhaⁿ-gã xií-yu:

—Na cächí tnúhu-í xii-ndo nàcuáa sãtnahã-xi cùu ñáyiu ndècu vitna.

³² Chi ñáyiu-án cúú-yu dàtná cue landú sãcõ núú yãhu dàdiqui-güexi te níhi cáháⁿ-güexi, te xìtnaha-güexi: “Ní tiú-ndí yaá ndihi vílu te ñá túú ní cuìní-ndó càta-ndo. Te ío yica iní ní xita yuhu-ndí te ñá túú ní ndãhyú-ndó”, cächí-güexi xìtnaha-güexi. Te ducaⁿ sãtnahã-xi cùu ñáyiu ndècu vitna.

³³ Te té Juàá tée ní xóo dacuándute ñaha xii ñáyiu ío ndàhú ní xóo caxi-dé, te ni ñá túú ní xõo coho-dé ndudí ndéhé yoho yãha stilé sã sã ní nduu-xi ndidí, te ní cachí-ndó sã ñí xíndecu ndihi-dé espíritú cùndìhi yucu ñávãha.

³⁴ Te sátá ñí quexìo yúhú Tée cùu ñani tnáhã-ndó nchaa-ndo, te xèxi-í xihí-í ndécü-í te cächí-ndó sã cúú-í tée xèxi vihi te xihí vihi-í. Te cächí tucu-ndo sã cúú-í tée xica cuu ndihi cue tée cuihna iní-xi quide

cobrá ñáhá xii ñáyiú cuendá impuèstú, ndihí nchaa dava-gá cue téé ndècu ichi cuehé ichi duha, duha càchí-ndó.

³⁵ Te ñáyiú ní tnahá tnúhu ndihí Yá Ndiòxí, ñáyiú-án quidè-yu nàcuáa cutnùní sá méé-gã ío ndècu ndihí-gá sá xini tnùnì-gá — càchí-gá xãhaⁿ-gã xii-yu.

Jèsús ndécú-gã vehe ìⁿ téé cùu fariséú téé nàni Ximú

³⁶ Te ìⁿ téé cùu fariséú ní cáháⁿ-dé Jèsús vehe-dé caxi-gá, te òré ní quexìo-gá te cuànguihu-gá mèsá.

³⁷ Te xiáⁿ núcõo-gá ní sáá ìⁿ ñadìhí te ñu-ni ñaha ñuú-án cúú-án, te ndècu-aⁿ ichi díí ìní, te sá ñí níhí-aⁿ tnúhu sá cuàngaxi Jèsús vehe téé cùu fariséú-án, núu nèhe-aⁿ ìⁿ yoo chitu àcítì sàháⁿ tnámí.

³⁸ Te ní ngóo-aⁿ ìⁿ xio ñadìhí Jèsús, te ní ngüíta-aⁿ ndàhyú-aⁿ te ndihí ndute núú-aⁿ ní naquete-aⁿ sáhá-gã. Te dättnùní ní nadayìchí-aⁿ ndihí idi díquí-aⁿ, te ní teyuhu-aⁿ sáhá-gã, te ní chihí ñaha-aⁿ àcítì sàháⁿ tnámí-ãⁿ.

³⁹ Te sá dúcáⁿ ñí quide-aⁿ ní xiní téé cùu fariséú téé ní cáháⁿ ñáhá xii-gá-án núu ní sani iní-dé: “Te núu dícó ndisa téé càháⁿ tnúhu Yá Ndiòxí cúú téé-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dícó ìⁿ ñaha ndècu ichi díí ìní cúú-án”, duha ní sani iní-dé.

⁴⁰ Te Jèsús ní xáhaⁿ-gã xii-dé:

—Ximú, ndècu ìⁿ tnúhu cachí tnúhu-í xii-n —càchí-gá xãhaⁿ-gã xii-dé.

Te téé cùu fariséú-án xãhaⁿ-dè xii-gá:

—Cachí tnúhu, Mèstrú —càchí-dé xãhaⁿ-dè xii-gá.

⁴¹ Te Jèsús ní xáhaⁿ-gã:

—Ní xindecu ìⁿ téé ní xóo dasaⁿ núu díhúⁿ, te ní xítaú úú tnàhá-güedé núú-dè. Te ìⁿ-dè ní sáha-dé úhúⁿ cièndú díhúⁿ denàriú, te ingá-dé ní sáha-dé údico úxí.

⁴² Te ñá ní ñihí-güedè nacháhu-güedé núú-dè, te téé ní sánùu ñaha-án ñí quide càhnu iní-dé ndi nduú-güedé. Te vitna cachí-ò tucu te núu ndèda cà-güedé cúú ìní ñáhá-gã-güedé xii-dé —càchí-gá xáhaⁿ-gã xii-dé.

⁴³ Te ní xáhaⁿ tẽ Ximú-án:

—Sànuu sá tẽe tàú vãi-gá díhúⁿ ño-gá cúú ìní-dé téé ní sánùu ñaha díhúⁿ-ãⁿ —càchí-dé xãhaⁿ-dè xii-gá.

Te ní xáhaⁿ Jèsús:

—Sá ndàá càháⁿ-n —càchí-gá xáhaⁿ-gã xii-dé.

⁴⁴⁻⁴⁶ Te Jèsús ní ndacoto-gá núú ñadìhí-án, te ní xáhaⁿ-gã xii téé Ximú-án:

—¿Ndèhe-n nacuáa quide ñadìhí-a ñã? Chi cuànguihu-í vehe-n, dico ñá túú ní tàxi-n ndute ndoo sáhà-í, te ni ñà túú ní teyuhu ñaha-n, te ni ñà túú ní chihí-n acítì díquí-í, dico ñadìhí-a ní naquete-aⁿ ndihí ndute núú-aⁿ sáhà-í, te ní nadayìchí-aⁿ ndihí idi díquí-aⁿ, te nuu núu teyuhu-aⁿ sáhà-í, te ní chihí-aⁿ acítì sàháⁿ tnámí sáhà-í.

⁴⁷ Te na càchí tnúhu-í xii-n sã ío cùu iní ñáhá-án xii-í, te núu xiáⁿ cutnùní iní-ó sã cuèi ío vãi sã cuehé sã dúhá ñí quide-aⁿ, dico Yá Ndiòxí sa ní quide càhnu iní ñáhá-gã xii-aⁿ. Chi Yá Ndiòxí quidé càhnu iní-gá ñáyiú cuèi vãi àdi sacú cuéchi-yu, te núu sacú cuéchi-yu te sacú cúú ìní ñáhã-yu xii-í —càchí-gá xáhaⁿ-gã xii-dé.

⁴⁸ Te ní xáhaⁿ-gã xii ñadìhí-án:

—Sa ní quide càhnu iní-í nchaa cuéchi-n —càchí-gá xáhaⁿ-gã xii-aⁿ.

⁴⁹ Te cue téé xñucóo ndihí-gá xñnàha-güedé:

—¿Ná téé cùu téé-a núu nándi sã quidé-dè, te ndéé nchaa yícá cuéchi ñáyiú quide càhnu iní-dé-í? —càchí-güedé xñnàha-güedé.

⁵⁰ Te Jèsús ní xáhaⁿ tucu-gá xii ñadìhí-án:

—Sa ní cácu nihnu-n núú ùhú núú ndàhú vitna chi ní sándáá iní ñáhá-n xii-í, te vitna cuanùhú te ña túú-gã ná caní iní-n —càchí-gá xáhaⁿ-gã xii-aⁿ.

8

Ñáyiú dìhí ní chindee ñaha xii Jèsús

¹ Te sátá dúcáⁿ ñí cuu te Jèsús ní xica-gá cuáháⁿ-gá titní víhí ñuú náhnú, ndihí ñuú lìhli dānehé-gá ñáyiú nàcuáa ndihí ndaha ñaha Yá Ndiòxí xii-yu. Te cuáháⁿ ndihí-gá ndi ùxúú tnàhá cue téé xica cuu ndihí-gá,

² ndihí ìⁿ ùú ñáyiú dìhí ní quide tátna-gá ní xihí ñaha espíritú cundihí yucu ñávãha, ndihí ñáyiú tnàhá dava-gá cuehé ùhú ní cùu. Te xiáⁿ tnàhá tucu ìⁿ ñaha nàni Mariá Magdalèná, te ñaha-án ñí xihí ñaha ùsá espíritú cundihí yucu ñávãha xii-aⁿ ni cùu, te ní quee ñaha-xi.

³ Te tnàhá ìⁿ ñaha nàni Juáná ñadhí ìⁿ té nàni Chúza té ní cunuu nǐ xinu cuechi vèhe té Hèrodés, ndìhi ìngá ñaha nàni Susaná nchaa ñáyi-u-áⁿ nǐ chindee ñàhá-yu xii-gá ndìhi nchaa sá ndécú ndìhí-yu, te diu-ni ducaⁿ nǐ quide vài-gá tucu ñáyi-u nchìcúⁿ ñàhá xii-gá cuáháⁿ.

*Nàcuáa quide té cuángacáⁿ triú
(Mt. 13:1-9; Mr. 4:1-9)*

⁴ Te ío vài ñáyi-u ndaa ñuu ní tacá-yu núu ndécú Jèsús, te ní ngüíta-gá ní cani-gá ìⁿ cuendú núu-yu cuendá tecú tnùnì-yu tnúhu-gá, te xáhaⁿ-gá xii-yu:

⁵ —Ìⁿ té cuángacáⁿ-dé triú. Te òré ní ngüíta-dé dǎngoyo-dé triú-áⁿ te dava ní quene ndava ní ngava ndéé ichi, te ní xénihnu ñáyi-u, te ní xiní tíaá te ní n-datàcá-güedi.

⁶ Te dava ní ngava ñuhu yadi núu yíhí vèhi yúu, te ní xínu-xi dico núu sàcú-ni nduu te ní yíhí-xi, chi ñá túu cǎhyo yíhí.

⁷ Te dava ní ngava núu yúcu ndǐquíⁿ tnu ìñu, te ìⁿnuu-ni nǐ xínu-xi ndìhi tnu ìñu-áⁿ, te tnu ìñu-áⁿ nǐ dánáá-xi nchaa triú sá ní xínu-áⁿ.

⁸ Dico dava triú-áⁿ ní ngava-xi núu ndécú ñuhu cocoⁿ, te xiáⁿ ní xínu-xi te ní sahnú-xi, te ío váha ní cuu, chi núu ìⁿ-ní triú te ní ngüíhi yoco-xi ìⁿ ciendú triú-xi —càhí-gá xáhaⁿ-gá xii-yu.

Te níhi ní cáháⁿ-gá ní xáhaⁿ tucu-gá xii-yu:

—Nchaa nchòhó ñáyi-u ní xíndedóho tnúhu ní cáháⁿ-í-a, te ío váha chí cuáha cuendá —càhí-gá xáhaⁿ-gá xii-yu.

*Nàcuáa quèe-xi tnúhu ní cáháⁿ Jèsús
(Mt. 13:10-17; Mr. 4:10-12)*

⁹ Te cue té xica cuu ndìhi Jesús ní xicáⁿ tnúhú-güedé núu-gá núu nása quèe-xi cuendú ní cani-gá núu ñáyi-u.

¹⁰ Te ní xáhaⁿ-gá xii-güedé:

—Nchòhó chí sa càhí tnúhu Yá Ndiöxí xii-ndo ìⁿ sá vátá quini-gá-ndó, chí càhí tnúhu-gá nàcuáa cada-gá ndíhu ndaha-gá ñáyi-u, dico dava-gá ñáyi-u cani-í mee-ni cuendú núu-yu, chí cuéi na quini-yu nchaa nàcuáa cuu dico ní vá cútnùnì iní-yu ná cuendá ducaⁿ cùu, àdi cuéi na cùndedóho-yu dico ní vá tècú tnùnì-yu —càhí-gá xáhaⁿ-gá xii-güedé.

*Jèsús càháⁿ-gá nàcuáa quèe-xi tnúhu
cuendá té cuángacáⁿ triú*

(Mt. 13:18-23; Mr. 4:13-20)

¹¹ Te xáhaⁿ tucu-gá xii-güedé:

—Duha quèe-xi cuendú ní cani-í núu-ndó, chí triú ní sacáⁿ té-áⁿ cúu-xí dàtná tnúhu Yá Ndiöxí.

¹² Te triú sá ní quene ndava ní ngava ndéé ichi-áⁿ, xiáⁿ cúu-xí dàtná ñáyi-u ní quèe iní-xi tnúhu Yá Ndiöxí, dico sàcuíhná cuáháⁿ-xi xòcani-xi tnúhu-gá iní-yu cuendá sá vǎ quindáá iní-yu, te vá nánihí tàhú-yu.

¹³ Te triú sá ní ngava ñuhu yadi núu yíhí vèhi yúu, xiáⁿ cúu-xí dàtná ñáyi-u ní xíndedóho tnúhu Yá Ndiöxí te díí iní ní tni-yu tnúhu-gá, dico òré ná dàcáháⁿ ñàhá yucu ñávàha xii-yu nándi cadá-yu, te dàña nihnú-yu tnúhu-gá chí ñá nihí ndéé-yu canchicúⁿ nihnú-yu nàcuáa càháⁿ tnúhu-gá.

¹⁴ Te triú sá ní ngava núu yúcu ndǐquíⁿ tnu ìñu-áⁿ, xiáⁿ cúu-xí dàtná ñáyi-u ní tecú dóho-xi tnúhu Yá Ndiöxí, dico cuéé cuéé ní nacuanaá-yu tnúhu-gá, chí cuendá mee-ni sá cúu-xí mèe-yu ñuhu iní-yu, ndìhi cuendá sá ío sàni iní-yu cuu cuicá-yu, ndìhi cuendá sá ío cùdí iní-yu nchaa sá ío ñuyíu-a núu xiáⁿ àuⁿ nǎ cuu ní xíndedóho-yu tnúhu-gá.

¹⁵ Dico triú sá ní ngava núu ndécú ñuhu cocoⁿ, xiáⁿ cúu-xí dàtná ñáyi-u váha iní-xi ní xíndedóho tnúhu Yá Ndiöxí chí ñá túu dàña nihnú-yu, te ní yùhu ní iní-yu quidé-yu nchaa nàcuáa càháⁿ tnúhu-gá.

*Nàcuáa quidé-yu iti
(Mr. 4:21-25)*

¹⁶ Te ñá túu nì ìⁿ ñáyi-u tèñuhú-yu ìⁿ iti te dàdáhu-yu, àdi chiváha-yu ìⁿ caha càmá, chí tàxi ndecú-yu núu ñinu cuendá cutnùnì núu nchaa ñáyi-u ndècu vehe.

¹⁷ Te ní ìⁿ tnúhu sá ñá tècú tnùnì ñáyi-u vitna vá càhí-ó sǎ vǎ tècú tnùnì-yu chí dacuèi sá tècú tnùnì-yu, te ní ìⁿ tnúhu sá càhí-ó cùu yuhu vitna vá cúu yùhu chí dacuⁿ sǎ quèé tǔu-xi núu ñáyi-u.

¹⁸ Te chí cùndedóho váha tnúhu na càháⁿ-í-a. Nchaa ñáyi-u sàndáá iní ñàhá xii Yá Ndiöxí ío-gá cuita quindáá-gá iní ñàhá-yu xii-gá quíhíⁿ, te nchaa ñáyi-u ñá túu sàndáá iní ñàhá xii-gá uuⁿ-gá cuita

cuu sàá-gá iní-yu núú-gă quíhíⁿ —càchí-gá xáhaⁿ-gă xii-güedé.

*Cue ñani Jèsús ndihi năná-gă
(Mt. 12:46-50; Mr. 3:31-35)*

¹⁹ Te ní quexio náná Jèsús ndihi cue ñani-gá vehe núú ndécú-gă, te ñá ndácú-yu cáháⁿ ndihi ñàhá-yu xii-gá chi ío cuéhé ñáyiú ndècu núú ndécú-gă.

²⁰ Te ñáyiú xĩndecu-áⁿ nĩ dáyáha-yu tnúhu núú-gă, te xăhăⁿ-yu:

—Ní quexio náná-n ndihi cue ñani-n xĩnutnĩ-yu quehé, te cuiní-yu cáháⁿ ndihi ñàhá-yu xii-n —càchí-yu xăhăⁿ-yu xii-gá.

²¹ Te ní xáhaⁿ-gă:

—Nchaa ñáyiú sàcúndedóho tnúhu Yá Ndióxi te quidé-yu nchaa nàcuáa cáháⁿ tnúhu-gă, ñáyiú-áⁿ cúú-yu dàtná nănà-í ndihi dàtná cue ñani-í —càchí-gá xáhaⁿ-gă xii ñáyiú ní dáyáha tnúhu núú-gă-áⁿ.

*Jèsús ngáni-gă táchí ndihi ndute làgúná
(Mt. 8:23-27; Mr. 4:35-41)*

²² Te ñáyiú nduu ní quée Jèsús bàrcú ndihi cue téé xica cuu ndihi-gă, te ní xáhaⁿ-gă:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gă xii-güedé.

Te cuáháⁿ-güedé ndihi-gă.

²³ Te nini ñuhu bàrcú ichi cuáháⁿ-xi núú ndute ní xidí Jèsús. Te ní ngüíta-xi níhi vìhi quene táchí te ta nàdachitú-xi ndute xití bàrcú-áⁿ cuáháⁿ, te sa cuiní-nă-xi quée naa bàrcú-áⁿ xití ndute ni cùu.

²⁴ Te ní sáháⁿ-güedé núú cáá Jèsús xidí-gă, te ní xáhaⁿ-güedé xii-gă:

—jMèstrú, ndiquíú iní chi tà quée naa-o cuáháⁿ! —càchí-güedé xáhaⁿ-güedé xii-gă.

Te Jèsús ní ndiquíú iní-gă te ní ndacóo-gă te ní tenàá-gă táchí-áⁿ ndihi ndute làgúná-áⁿ, te ní ngüíñí-ni táchí-áⁿ te ní nucúndecu nahi-nă ndute làgúná-áⁿ.

²⁵ Te ní xáhaⁿ-gă xii-güedé:

—jNáa ñá túú sàndáá iní ñáhá ndisa-ndo xii-í áⁿ? —càchí-gá xáhaⁿ-gă xii-güedé.

Te ní cuñúhu-güedé sá dúcáⁿ nĩ quide-gă ní xiní-güedé, te ní yùhú-güedé, te ní xitnáha-güedé:

—jTe ná téé cùu téé-a núú ní cáháⁿ-ni-dé te ní ngüíñí táchí te ní nucúndecu

nahi-ni ndùte làgúná-a-i? —càchí-güedé xitnáha-güedé.

*Tée yíhi ñaha cue espíritú cúndihi yucu ñávãha
(Mt. 8:28-34; Mr. 5:1-20)*

²⁶ Te ní sáá-gă ndihi-güedé yucu cue téé ñuú Gàdará, te yíhi ndáá-ni ndàa ingá xio làgúná-áⁿ cáá distritú Galiléa.

²⁷ Te òré ní quene Jèsús xití bàrcú te ní dáyátní ñaha ñáyiú téé ñuú-áⁿ xii-gă, te yíhi ñaha titní espíritú cúndihi yucu ñávãha xii-dé. Te ní cunaha ñà túú-gă sácúhnu-dé dóó-dě, te ní ñà túú-gă sácúndecu-dé vehe-dé, chi da nchaa núú yĩndüxi ndíyí quide vehe-dé.

²⁸ Te òré ní xiní-dé Jèsús te ní ngüíñí xití-dě núú-gă, te cue espíritú yíhi ñaha xii-dé-áⁿ nĩ quide-xi níhi ní cáháⁿ-dé, te xáhaⁿ-dě xii-gă:

—jNá cuendá véxi-õ Jèsús Déhe Dútú Ndióxi sàdí-n ìchi-í-i? Te cáháⁿ ndàhú-í núú-n sã và dándòho ñaha-n xii-í —càchí-dé xáhaⁿ-dě xii-gă.

²⁹ Te ducaⁿ nĩ cáháⁿ-dé cuendá sá Jèsús ní xáhaⁿ-gă xii nchaa espíritú cúndihi yucu ñávãha yíhi ñaha sá ná quée ñaha-xi xii-dé. Te nchaa xiáⁿ ní xóo dacáháⁿ-xi iní-dé nándi sá nĩ xóo cada-dé ñuú ní xóo dacùtu ñaha-güedé cadená xii-dé cuendá sá ñà túú-gă ná cada-dé, te ní xóo cundéé ñáhá-güedé, dico cuéi ducaⁿ dico ní xóo dandáva-ni-dé cadená, te cue espíritú cúndihi yucu ñávãha-áⁿ nĩ xóo dacùnu ñaha-xi xii-dé ní xóo quíhíⁿ-dé xití yucu.

³⁰ Te Jèsús ní xicáⁿ tnúhú-gă núú-dě, te xáhaⁿ-gă:

—jNása nàni-n-i? —cachí-gă xáhaⁿ-gă.

Te ní xáhaⁿ-dě:

—Vài Sandadú nàni-í —càchí-dé xáhaⁿ-dě xii-gă.

Te ducaⁿ nĩ xáhaⁿ-dě xii-gă cuendá sá ño cuéhé espíritú cúndihi yucu ñávãha yíhi ñaha xii-dé.

³¹ Te nchaa espíritú-áⁿ nĩ cáháⁿ ndàhú-xi núú Jèsús sá và téndàha ñaha-gă xii-xi quíhíⁿ-xi núú ùhú núú ndàhú.

³² Te ñuú-ni yatni yucu núú ndécú Jèsús-áⁿ yíhi vài cuchí xixexi-güedé, te nchaa espíritú-áⁿ nĩ cáháⁿ ndàhú-xi núú-gă sá ná dàña-gă quíhu-xi yiqui cùñú nchaa

cùchí-án, te Jèsús ní xáhaⁿ-gã sá cúu quíhu-xi yiqui cùñú-güedi.

³³ Te ní quee ñaha nchàa espíritú-án xii téé-án, te ní quíhu-xi nchaa cùchí-án, te cùchí-án nĩ xinu-güedi duha ní quée-güedi ndàa núú dèhvá yuhu làgúná-án, te ní ngau-nihnu-güedi xití ndute te ní ndihí-güedi ní cáhá.

³⁴ Te òré ní xiní cue téé xito cuchi-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní caní-güedé cuèndú núú cuè ñáyi ndècu xití ñuú, ndihí núú cuè ñáyi ndècu xití yucu.

³⁵ Te nchaa ñáyi ní níhí tñhu ní queé-yu cuáháⁿ ndéhé-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xihí ñaha cuè espíritú cündihí yucu ñávãha-án núcõo-dé núú sáhá Jèsús, te nihnu-ná-dé dóo-dé, te núcõo-dé dàtná ñáyi váha, te ní yùhú-yu òré ní xiní ñáhã-yu xii-dé.

³⁶ Te nchaa ñáyi ní xiní nàcuáa ní cuu ní ndúha téé yihí ñaha cue espíritú cündihí yucu ñávãha-án ní cùu ní caní-yu cuèndú núú nchàa ñáyi ní quexió-án nàcuáa ní cuu ní ndúha téé-án ndihí nàcuáa ní cuu cuèndá nchaa cùchí-án.

³⁷ Te sá dúcáⁿ nĩ níhí-yu tñhu nàcuáa ní cuu, núu nchaa ñáyi ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá nõu ndèé ichi véxi-gá. Te sá dúcáⁿ nĩ cáháⁿ-yu núu cuáháⁿ-gá núú ndécú bàrcú. Te òré ndée-gá bàrcú-án nùhú-gá

³⁸ ní ngüíta téé ní xihí ñaha cuè espíritú cündihí yucu ñávãha càháⁿ ndàhú-dé núú-gã nõu vá cündèe iní-gá quíhíⁿ ndihí ñaha-gã xii-dé, dico Jèsús ní quide ndee iní ñáhã-ni-gã xii-dé, te ní xáhaⁿ-gã:

³⁹ —Cuanuhú vehe-n, te caní-n cuèndú núú nchàa ñáyi sá ío càhnu cuu nchaa sá vãha ní quide ñaha Yã Ndiõxí xii-n —càchí-gá xáhaⁿ-gã xii-dé.

Te téé-án nĩ xica-dé cuánuhú-dé te ní ngüíta-dé ní caní-dé cuèndú núú nchàa ñáyi xĩndecu nihí ñuú sá ío càhnu cuu nchaa sá vãha ní quide ñaha Jèsús xii-dé.

Cuèndá déhe yoco tẽ Jàirú, ndihí cuèndá ñ

ñadìhí ní tnándeé dóo Jèsús

(Mt. 9:18-26; Mr. 5:21-43)

⁴⁰ Te òré ní ndexio Jèsús ndàa ingá xio yuhu làgúná, te ñáyi xĩndecu xíaⁿ sa ndètu cahnu ñaha-ná-yu, te ío váha ní cáháⁿ ndihí ñáhã-yu xii-gá òré ní nasáá-gá.

⁴¹ Te ñáyi téé tàxi tñuní veñúhu ní quexió-dé núú ndécú Jèsús, te téé-án nání-dé Jàirú, te ní ngüíhí xití-dé núú-gã càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n nõu vá cündèe iní-n quíhíⁿ-ó vehe-í cada tátna-n dèhe yoco-í —càchí-dé xáhaⁿ-dè xii-gá.

⁴² Te ducaⁿ nĩ xáhaⁿ-dè chi ndècu ñáyi dii-ni déhe yoco-dé, te ndècu-xi datná úxúu cuíá-xi, te càhú víhí tñáhã-xi cùhú-xi te cuíní-xi cuú-xi. Te Jèsús ní xica-gá cuáháⁿ-gá ndihí téé-án, te ío vãi ñáyi nchicúⁿ ñáhã xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tñuú nchaa ñáyi-án ñútnáhã ñáyi cùhú, te ñaha-án sà ní cuu úxúu cuíá sã cùhú-aⁿ ngòyo ñaha níhí xii-aⁿ, te ío cuéhé dñhúⁿ nĩ cuu dãndoñuhu-aⁿ chi ní nadico-aⁿ nchàa sá ndécú ndihí-aⁿ cuèndá ní níhí-aⁿ dñhúⁿ nĩ queheⁿ nchaa ñáyi ní quide tátna ñaha xii-aⁿ, dico ní ñáyi-án tñuú ní ndàcú-yu ndúha-aⁿ.

⁴⁴ Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dõo-gã te òré-ni-án nĩ ndúha-aⁿ.

⁴⁵ Te Jèsús ní xicáⁿ tñuhú-gã nõu-yu, te xáhaⁿ-gã:

—¿Ndèdacàa-ndo ní tnándeé ñáhã xii-í? —càchí-gá xáhaⁿ-gã xii-yu.

Te ncháa-yu ní xáhãⁿ-yu sá ní ñáyi-án tñuú ní tnándeé ñáhã xii-gá. Te té Pèlú ndihí cue téé cündihí-dé ní xáhaⁿ-güedè xii-gá:

—Mèstrú, ndèhe-n sá vãi ñáyi nchicúⁿ ñáhã xii-n, te xio xio dàdehnde ñáhã-yu, te xicáⁿ tñuhú-gã-n yòo ní tnándeé ñáhã xii-n —càchí-güedè xáhaⁿ-güedè xii-gá.

⁴⁶ Dico Jèsús ní xáhaⁿ-gã xii-yu:

—Dico diu ñáyi-ndo ní tnándeé ñáhã xii-í, chi ní cutnùní iní-í sá ñáyi-án cùhú ní tnándeé ñáhã xii-í te ní ndúha-yu —càchí-gá xáhaⁿ-gã xii-yu.

⁴⁷ Te sátá nĩ xiní ñaha-án sã nĩ cutnùní iní Jèsús sá ní tnándeé ñáhã-án xii-gá, te yùhú yùhú-aⁿ ní sáhã-aⁿ ní ngüíhí xití-án

núú-gă, te ní náhmá-aⁿ núú-gă, ndihî núú nchàa ñáyiú ná cuèndá ducaⁿ ñí quide-aⁿ ní tnándeé-aⁿ-gá, ndihî cuèndá sá òré-ni-áⁿ ñí ndúha-aⁿ.

⁴⁸ Te Jèsús ní xáhaⁿ-gă xii-aⁿ:

—Yòhó ñaha cùhú, ní sándáá iní ñáhá-n xii-í núú ní ndúha-n, te cuanùhú vitna te ñá túú-gă ná canî iní-n —càchí-gă xáhaⁿ-gă xii-aⁿ.

⁴⁹ Te càháⁿ dúcáⁿ-ní Jèsús ní sáá ìⁿ tée xìnu cuechi vehe té Jàirú tée tàxi tnunî veñúhu, te xáhaⁿ tée xìnu cuechi-áⁿ xii-dé:

—Sa ní xihî déhe-n, vá chíchìuⁿ-gá-n Mèstrú —càchí-dé xáhaⁿ-dë.

⁵⁰ Te sá dúcáⁿ xáhaⁿ tée xìnu cuechi-áⁿ xii té Jàirú ní tecú dóho Jèsús, núú ní xáhaⁿ-gă xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —càchí-gă xáhaⁿ-gă xii-dé.

⁵¹ Te òré ní sáá-gă vehe té Jàirú te ñá ní dàña-gă quihu ñáyiú cùtexínu, núú té Pèlú-ni ndihî té Jàcobó-ni, ndihî té Juáá-ni, ndihî tâtá ndihî náná-ni xíchí ñí xihî-áⁿ cuãnguïhu ndihî-gă xihî vehe.

⁵² Te nchaa ñáyiú sa xíndecu vehe-dé-áⁿ xíndáhyú-yu sá ndihú iní-yu cuèndá sá ñí xihî-xi. Te Jèsús ní xáhaⁿ-gă xii-yu:

—Vá ndáhyú-ndó, chí dicó-ni xidí-xi ñá túú ní xihî-xi —càchí-gă xáhaⁿ-gă xii-yu.

⁵³ Te ní sácú ndeé ñáhă-yu xii-gă, chí sá cúú-xí mèe-yu chí ní xihî ndisa xíchí-áⁿ.

⁵⁴ Te Jèsús ní tnî-gă ndaha xíchí ñí xihî-áⁿ, te níhi ní cáháⁿ-gă, te xáhaⁿ-gă:

—Xíchí cuéché, ndacóo —càchí-gă xáhaⁿ-gă.

⁵⁵ Te xíchí-áⁿ ñí ndoto-xi, te òré-ni ní ndacóo-xi, te Jèsús ní xáhaⁿ-gă sá ná cuãñáhă-yu sá cáxí-xí.

⁵⁶ Te tâtá-xi ndihî náná-xi súúní ñí cuñúhu-yu sá dúcáⁿ ñí dándótó ñaha Jèsús xii-xi, te ní xáhaⁿ-gă xii-yu sá vâ yoo ìⁿ cúñáhă-yu sá dúcáⁿ ñí quide-gă.

9

Jèsús téndàha-gă ndî ùxúú cue tée xica cuu ndihî-gă quihîⁿ-güedé cáháⁿ-güedé tnúhu-gă (Mt. 10:5-15; Mr. 6:7-13)

¹ Te Jèsús ní cana-gă ndî ùxúú cue tée xica cuu ndihî-gă, te ní sáñaha-gă xii-güedé tnúhu ndeé iní cundecu ndihî-güedé cuèndá

queñuhu-güedé nchaa espíritú cündihî yucu ñávâha yihî ñaha xii ñáyiú, ndihî cuèndá sá cádá tâtna-güedé nchaa ñáyiú cùhú.

² Te ní xáhaⁿ-gă xii-güedé sá quihîⁿ-güedé danèhé-güedé ñáyiú nàcuáa cada Yá Ndiöxí ndihu ndaha ñaha-gă xii-yu, te ducaⁿ cada tâtna-güedé cue ñáyiú cùhú.

³ Te cùmání-gă caca-güedé quihîⁿ-güedé, te ní xáhaⁿ-gă xii-güedé:

—Ñá túú tnàhî ná canehe-ndo cùu ichi-ndo, ni tâtnu, ni ñùnu, ni sâ cáxí-ndó, ni dîhúⁿ. Te ni vâ canèhe-ndo ingá ichi dóó-ndó, chí dîu-ni dóó níhnú-ndó-áⁿ xiãⁿ tnàhî-ni.

⁴ Te ndédani càa vehe na saá-ndó, te xiáⁿ cundecu-ndo ndèé ná sàá nduu nde-ndo.

⁵ Te núú ñá túú cuinî-yu queheⁿ cuèndá ñáhă-yu xii-ndo, te nde-ndo ñùú-áⁿ, te naquidi-ndo ticá chúhmá ñí tnî sáhá-ndó cuèndá sá ná cùtnunî iní-yu sá ñà túú quide váha-yu —càchí-gă xáhaⁿ-gă xii-güedé.

⁶ Te sáta dúcáⁿ ñí xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuàha-güedé ñáyiú tnúhu Yá Ndiöxí, tnúhu sá càháⁿ nàcuáa naníhî tàhú-yu, te ducaⁿ ta quide tâtna-güedé nchaa ñáyiú cùhú cuáháⁿ.

Nàcuáa ní cuu ní xihî té Juáá tée dàcuandute ñaha xii ñáyiú

(Mt. 14:1-12; Mr. 6:14-29)

⁷ Te té Hèrodés tée cùu gobiernú ní níhî-dë tnúhu nchaa nàcuáa quide Jèsús, te quiyuhú iní-dé te sàni iní-dé yoo cùu-gă. Te ducaⁿ ñí sani iní-dé chí dava ñáyiú càchí-yu sá tã Juáá tée ní xóo dacuandute ñaha xii ñáyiú ní ndoto cùu-gă.

⁸ Te davá-yu càchí-yu sá tã Èliás cúú-gă, te davá-yu càchí-yu sá ìⁿ tée ní xóo cáháⁿ tnúhu Yá Ndiöxí ndéé sanaha vîhi ní ndoto cùu-gă, càchí-yu.

⁹ Dico té Hèrodés ní cachí-dé:

—Yúhú ní táuchíuⁿ-í ní xehndé-güedé díquí tã Juáá. ¿Te yoo cùu tée dii cuèndú-xi nihî-a sá súúní cuèhé núú sá quidé-dë váíⁿ? —duha ní cachí-dé.

Te té Hèrodés ndúcú-dë nàcuáa cada-dé cuèndá quini-dé Jèsús.

Jèsús dácàxi-gá úhúⁿ mĩl cue téé te ðĩⁿ ñáyiu ðĩhĩ ndihĩ landú

(Mt. 14:13-21; Mr. 6:30-44; Jn. 6:1-14)

10 Te nchaa cue téé ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiu ní ndexio-güedé núú-gã te ní ngüíta-güedé nácàni tnúhu-güedé nchaa nàcuáa ní quide-güedé. Te dätñuní ní xica-gã medii-ni-gã ndécã ñàha-gã xii-güedé cuáháⁿ ìⁿ xichi núú ñà túú ñáyiu ndècu, yatni núú cáá ñúú Bètsaidá.

11 Dico òré ní níhĩ ñáyiu tnúhu sá cuáháⁿ Jèsús, te nchícúⁿ-yu-gã cuáháⁿ, te òré ní quexió-yu núú-gã, te ní queheⁿ cuendá ñáhá-gã xii-yu, te ní dánèhé ñáhá-gã xii-yu nàcuáa ndíhu ndaha ñàha Yá Ndiõxí xii-yu, te ní quide tátna-gã nchaa ñáyiu cùhu.

12 Te òré sa ní cuaa te ní natacã ndi ùxúú cue téé xica cuu ndihĩ-gã núú-gã, te ní xáhaⁿ-güedé xii-gã:

—Sa ní cuu dandàca-n nchaa ñáyiu-a, chi sa ní cuaa, te na quihĩⁿ-yu nchaa vehe càa yatni iha, ndihĩ nchaa xití ñúú cáá yàtni iha cuaaⁿ-yu sá cáxĩ-yu, te ðiu-ni yacáⁿ ndetátú-yu, chi núú ndécú-ó ìha ñà túú tnàhĩ ná íó —càchĩ-güedé xáhaⁿ-güedé xii-gã.

13 Te Jèsús ní xáhaⁿ-gã xii-güedé:

—Mee-ndo chĩ cuãñaha sã ná càxĩ-yu —càchĩ-gã xáhaⁿ-gã xii-güedé.

Te ní xáhaⁿ-güedé xii-gã:

—Ñá túú nãgã ndécú ndihĩ-ndí, chi úhúⁿ duha-ná pàá, ndihĩ úú-nã chácã ndécú ndihĩ-ndí, te ðiu-ni núú quihĩⁿ-ndí cuaaⁿ-ndí sá cáxĩ-yu —càchĩ-güedé xáhaⁿ-güedé xii-gã.

14 Te xĩnu dàtná úhúⁿ mĩl mee-ni cuè téé, te ðĩⁿ ñáyiu ðĩhĩ ndihĩ landú. Te Jèsús ní xáhaⁿ-gã xii cue téé xica cuu ndihĩ-gã:

—Chĩ cũñaha na ngõo ndi údico úxĩ ndi údico úxĩ-yu ìⁿ ìⁿ xichi —càchĩ-gã xáhaⁿ-gã xii-güedé.

15 Te ducaⁿ ñĩ quide-güedé, te ní ngóo-yu nchaaⁿ-yu.

16 Te dätñuní ní queheⁿ-gã ndi ùhúⁿ pàá-áⁿ, ndihĩ ndi ndúú chácã-ãⁿ. Te ní ndacoto-gã andi, te ní ndacáⁿ táhú-gã núú Yá Ndiõxí, te dätñuní ní táhú cuèchi-gã pàá-áⁿ ndihĩ chácã-ãⁿ, te ní sáha-gã nchaa cue téé

xica cuu ndihĩ-gã ní dácãhñu ñàha-güedé xii-yu.

17 Te nchaaⁿ-yu ní xexĩ-yu ní ndahá xitĩ-yu. Te sátá ñĩ túhú cóhõ-yu te ní nadatácã-güedé nchaa sã ñĩ quendóo, te ní chítú ùxúú tnàhá tídihi mee-ni sã ñĩ quendóo.

Té Pèlú xáhaⁿ-dẽ xii Jèsús sá ðíú-gã cúú-gã Crístú

(Mt. 16:13-19; Mr. 8:27-29)

18 Te ìⁿ nduu ndècu mee Jesús ndihĩ cue téé xica cuu ndihĩ-gã, te càháⁿ ndihĩ-gã Yá Ndiõxí, te sátá ñĩ yáha ní cáháⁿ ndihĩ-gã Yá Ndiõxí, te ní xicáⁿ tnúhú-gã núú-güedé, te xáhaⁿ-gã xii-güedé:

—¿Yoo cùu yúhú càchĩ ñáyiu-va? —càchĩ-gã xáhaⁿ-gã xii-güedé.

19 Te ní xáhaⁿ-güedé xii-gã:

—Davá-yu càchĩ-yu sá cúú-n ndĩ Juàá téé ní xóo dacuàndute ñàha xii ñáyiu, te davá-yu càchĩ-yu sá cúú-n tẽ Èliás, te davá-yu càchĩ-yu sá ìⁿ téé ní xóo cáháⁿ tnúhu Yá Ndiõxí ndéé sanaha ñĩ ndoto cùu-n, duha càchĩ-yu —càchĩ-güedé xáhaⁿ-güedé xii-gã.

20 Te ní xicáⁿ tnúhú tùcu-gã núú-güedé, te xáhaⁿ-gã xii-güedé:

—Te nchòhó, ¿yoo sàni iní-ndó cùu-í-i? —càchĩ-gã xáhaⁿ-gã xii-güedé.

Te té Pèlú ní xáhaⁿ-dẽ xii-gã:

—Yòhó cúú-n Crístú Déhe Dútú Ndiõxí —càchĩ-dé xáhaⁿ-dẽ xii-gã.

Jèsús càháⁿ-gã sá cáhni ñàha-güedé xii-gã

(Mt. 16:20-28; Mr. 8:30-9:1)

21 Te ní xáhaⁿ-gã xii-güedé sã vã yõo ìⁿ cùñaha-güedé yoo cùu-gã.

22 Te ní xáhaⁿ-gã xii-güedé:

—Yúhú Téé cùu ñàni tnàhá-ndó nchaa-ndo ío cuéhé sã ndóhò-í, chi daquée tíhú ñáhá cuè téé cùu sacuéhé núú ñáyiu israhél, ndihĩ cue dútú cùnùu, ndihĩ cue téé dàcuaha ñàha xii ñáyiu nchaa tnúhu ní chídó tnùnĩ ndí Moisés, te sáá nduu te cahni ñàha-güedé xii-í, dico nduu úní sá cúú-í te ndoto-í —càchĩ-gã xáhaⁿ-gã xii-güedé.

23 Te dätñuní ní xáhaⁿ-gã xii nchaa ñáyiu:

—Nchaa ñáyiu cuiní chitnahá ñáhá xii-í, te xini ñuhu-xi vã cadá-gã-yu sá sání iní mée-yu, te ìⁿ nduu ìⁿ nduu cada ndee

iní-yu cundecu túha-yu ndohó-yu cuendá-í, te cuëi na ndohó-yu dàtná ndoho-í.

²⁴ Te nchaa ñáyiú cuiní sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yùhú cuëi nándi sá ná yáha-yu cundecú-yu ñuyíú-a sá cuendá-í, te ñáyiú-án naníhí tàhú-yu.

²⁵ Te cuëi nchaandi túhú sá ío ñuyíú-a na nihí ñáyiú cundecu ndihí-yu, dico núu ñu nchaa xíãⁿ ná càda cuíta nihnú-yu te ñà túú vèdana nàndíhi-xi sá dúcáⁿ ndècu ndihí-yu nchaa xíãⁿ.

²⁶ Te nchaa ñáyiú na cùcahaⁿ núú-xi cáháⁿ váha cuendá-í ndihí cuendá nchaa tnúhu-í, te tnàhá yùhú Téé cùu ñaní tnàhá-ndó nchàa-ndo cucahaⁿ núú-í núú-yu òré quixi tucu-í ndihí cue espíritú xínú cuèchi núú Tàtá-í Dútú Ndiöxí, te mee-gã cada cutnùní iní nchaa ñáyiú sá ío càhnu cuu-í.

²⁷ Te na càchí tnúhu ndáá-í xii-ndo sá ío dava nchòhó ñáyiú ndècu iha vitna vá cùu-ni-ndo, chi cundecu-ni-ndo ndèé quini-ndó sáá nduu ndíhu ndaha ñàha Yá Ndiöxí xii ñáyiú —càchí-gã xáhaⁿ-gã xií-yu.

*Ní nadáma dóo Jèsús ndihí núú-gã
(Mt. 17:1-8; Mr. 9:2-8)*

²⁸ Te ní cuu dàtná úná nduu sá dúcáⁿ ñí cáháⁿ Jèsús, te cuásaá-gã ñⁿ yucu cáháⁿ ndihí-gã Yá Ndiöxí, te ndèca-gã té Pèlú, ndihí té Jàcobó, ndihí té Juáa cuásaá.

²⁹ Te nini cáháⁿ ndihí-gã Yá Ndiöxí ní nadáma núú-gã ndihí dóo-gã, te dóo-gã-án sùúni ñí nduu cuixíⁿ víhí, te sùúni dàtásaⁿ-xi.

³⁰ Te òré-ni-án ñí xiní-güedé úú tnàhá cue téé cáháⁿ ndihí-gã, te ñⁿ-dé cúú-dè té Moisés, te ingá-dé cúú-dè té Eliás,

³¹ te sùúni dàtásaⁿ-xi ní càndéé núú ndécú cuè téé úú-án ndihí-gã, te xíndatnúhu-güedé nàcuáa ndoho Jèsús cuú-gã ñuú Jerusalén dàtná ní cachí méé-gã.

³² Te té Pèlú ndihí úú-gã-güedé cuiní víhí-güedé cúdu-güedé, dico ní sahani iní-güedé ñà túú ní xidí-güedé, te ní dánèhé núú ñàhá-xí xii-güedé sá sùúni váha càa núú ndécú Jèsús, ndihí úú cue téé cáháⁿ ndihí-gã-án.

³³ Te òré sa ndùcu ndee cue téé úú-án caca-güedé núhú-güedé, te ní xáhaⁿ té Pèlú xii-gã:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixiⁿ, ñⁿ cuu cuendá-n, te ñⁿ cuu cuendá té Moisés, te ñⁿ cuu cuendá té Eliás —càchí-dé xáhaⁿ-dè xii-gã.

Dico té Pèlú chi ní mèe-dé ñà túú ní cùtnuní iní-dé nása ndùu tnúhu ní cáháⁿ-dé.

³⁴ Te nini cáháⁿ-dé ní quexìo ñⁿ vícò núú ndécú-güedé-án ñí dàdàhu ñàha-xi xii-güedé, te ní yùhú-güedé sá dúcáⁿ ñí quexìo vícò-ãⁿ ñí dàdàhu ñàha-xi.

³⁵ Te xití vícò-ãⁿ ñí tecú ní cáháⁿ Yá Ndiöxí, te xáhaⁿ-gã xii-güedé:

—Téé-a cùu-dé Déhe-í, téé ío cùu iní-í, te tñi-ndo nchàa tnúhu cáháⁿ-dé —duha ní xáhaⁿ-gã xii-güedé.

³⁶ Te sátá dúcáⁿ ñí cáháⁿ Yá Ndiöxí, te ní quide cuendá-güedé sá mèdii-ná Jèsús ndécú-gã xíãⁿ. Te vá yòo ñⁿ ñí xáhaⁿ-güedé nàcuáa ndùu nchaa sá ñí xiní-güedé-án.

*Jèsús quidé tãtna-gã ñⁿ téé cuechi yìhi ñàha
espíritú cùndíhi yucu ñávãha
(Mt. 17:14-21; Mr. 9:14-29)*

³⁷ Te ingá nduu-ãⁿ cuãnuu-gã yucu-án ndihí-güedé, te ío cuéhé ñáyiú cuáháⁿ tnàhá ñàhá xii-gã.

³⁸ Te ñⁿ téé ñùhu tnàhá tnuú-yu-án ñí cáháⁿ níhi-dé, te xáhaⁿ-dè xii-gã:

—Mèstrú, ío cáháⁿ ndàhú-í núú-n ñuú vá cùndèe iní-n càda tãtna-n dèhe-í, chi ñⁿ dñi duha-dé ndécú,

³⁹ te yìhi ñàha espíritú cùndíhi yucu ñávãha xii-dé, te òré ná nãtni ñàha-xi xii-dé, te dàcana saa ñàha-xi, te ndàda ruúⁿ ñàhá-xí xii-dé, te tàva-xi tíñú yuhu-dé. Te ío dàndoho ñàha-xi xii-dé, chi ndéé núú ñà cúú-gã, te dàña ñàha tnaa-xi xii-dé.

⁴⁰ Te sa ní cáháⁿ ndàhú-í núú cuè téé xica cuu ndihí-n queñuhu-güedé-xi, dico ñà túú ní ndàcu-güedé —càchí-dé xáhaⁿ-dè xii-gã.

⁴¹ Te Jèsús ní xáhaⁿ-gã xii nchaa ñáyiú:

—¡Nchaa nchòhó ñáyiú ndècu ñuyíú-a ío sáá iní-ndó, chi ñà túú cuiní-ndó quíndáá iní-ndó Yá Ndiöxí! Te ní cuu vai nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gã cada-ndo-i? —càchí-gã xáhaⁿ-gã xií-yu.

Te ní xáhaⁿ-gã xii téé cùhú déhe-xi-án:

—Taxi déhe-n iha —cachí-gã xáhaⁿ-gã xii-dé.

42 Te òré cuáháⁿ téé cuechi-ǎⁿ nǔú-gǎ, te espíritú cùndìhi yucu ñávǎha-áⁿ nǐ dándùá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáháⁿ-gá ní tenàá-gá espíritú-áⁿ, te ní quee ñaha-xi xii-dé, te ní nacuáha cuèndá ñáhá-gǎ xii-dé tǎtá-dě.

43 Te nchaá-yu ní cuñúhu-yu sá dúcáⁿ nǐ cuu, te ní cachí-yu sá ïo càhnu cuu Yá Ndiöxí.

*Jèsús càháⁿ tucu-gá sá cùú-gá
(Mt. 17:22-23; Mr. 9:30-32)*

Te nini xicuñúhu-yu nàcuáa ní quide Jèsús, te ní xáhaⁿ-gǎ xii cue téé xica cuu ndìhi-gá:

44 –Nchòhó cundedóho váha-ndo tnúhu na càháⁿ-í-a, te vá ná cuánaa-ndo, chi yúhú Téé cùu ñaní tnáhá-ndó nchàa-ndo sáá ïⁿ nduu te cuáha cuèndá ñáhá-güedé xii-í núú cue téé cùu úhú iní ñáhá –càchí-gá xáhaⁿ-gǎ xii-güedé.

45 Dico cue téé-áⁿ ñà túú ní tècú tnùnì-güedé nàcuáa nduu tnúhu ní xáhaⁿ-gǎ xii-güedé, te ducaⁿ nǐ yáha-güedé, chi ducaⁿ tnàhí ní cachí-gá sá vǎ tècú tnùnì-güedé, te ní yúhú-güedé cácaⁿ tnúhú-güedé núú-gǎ nása nduu tnúhu ní xáhaⁿ-gǎ xii-güedé.

Cue téé ndùcu tnúhu núú tnáhá nǔu ndédacàa-güedé ïo-gá cúnùu

(Mt. 18:1-5; Mr. 9:33-37)

46 Te cue téé xica cuu ndìhi-gá ní ngúita-güedé ndátnúhu-güedé nǔu ndédacàa-güedé ïo-gá cúnùu,

47 dico Jèsús ní cutnùnì iní-gá nàcuáa sàni iní-güedé nǔu ní cana-gá ïⁿ té lǐhli, te ní sanu tnǐ ñaha-gǎ ïⁿ xio dǐñi-gá.

48 Te ní xáhaⁿ-gǎ xii-güedé:

–Nchaa ñáyiú na quèheⁿ cuendá ïⁿ té lǐhli dàtná té lǐhli-a cuèndá sá ñúhú iní ñáhá-yu xii-í ñá, te cada iní-yu sá yúhú ní queheⁿ cuèndá-yu, te nchaa ñáyiú na quèheⁿ cuendá ñáhá xii yúhú, te cada iní-yu sá tnáhá Tǎtá-í Dútú Ndiöxí Yaá ní tendaha ñaha xii-í véxi-í ñuyíú-a ní queheⁿ cuèndá-yu. Te nchaa ñáyiú ïo ndàhú iní-xi mee-ni xìnu cuechí-yu, ñáyiú-áⁿ ïo-gá cúnùu-yu –càchí-gá xáhaⁿ-gǎ xii-güedé.

Ñáyiú ñá túú cùu úhú iní ñáhá cùndìhi ñahá-yu xii-o

(Mr. 9:38-40)

49 Te té Juàá diu-ni ïⁿ téé xica cuu ndìhi-gá ní xáhaⁿ-dě xii-gá:

–Mèstrú, ní xiní-ndí ïⁿ téé càcunehe ñaha-dé xii-n, te ndèñuhu-dé espíritú cùndìhi yucu ñávǎha yìhí ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndìhi ñaha-dé xii-o –càchí-dé xáhaⁿ-dě xii-gá.

50 Te Jèsús ní xáhaⁿ-gǎ xii-dé:

–Daña-ndo na càda nahi-dé ní cùu, chi ñáyiú ñá túú cùu úhú iní ñáhá xii-o te cùndìhi ñahá-yu –càchí-gá xáhaⁿ-gǎ xii-dé.

Jèsús càháⁿ-gá dóho té Jàcobó ndìhi té Juàá

51 Te òré sa ta cùyatni ndaa Jèsús andiú, te ní xica-gá cuáháⁿ-gá ñúú Jerusàlén, chi duuⁿ duuⁿ ní sani iní-gá sá quìhíⁿ-gá.

52 Te ní tendaha-gǎ cue téé yòdo nuu cuáháⁿ, te ní quexìo-güedé ïⁿ ñúú, te ñúú-áⁿ yíndèhu-xi distritú Sàmariá, te ndùcu-güedé ïⁿ vehe cada túha-güedé òré quexìo-gá.

53 Dico ñáyiú Sàmariá ñá túú ní cuìní-yu cuáñaha nùú-yu vehe, chi cuèndá sá nǐ cutnùnì iní-yu sá ìchi yáha-ni-gá quìhíⁿ-gá ñúú Jerusàlén.

54 Te sá dúcáⁿ nǐ quidé-yu ñá túú ní cuìní-yu cuáñaha nùú-yu vehe ndetatú-gá, núu ní xáhaⁿ tǎ Jàcobó ndìhi té Juàá cue téé xica cuu ndìhi-gá xii-gá:

–Mèstrú, ¿cuìní-n càcáⁿ táhú-ó nǔú Yǎ Ndiöxí cuèndá dangáva-gá ñuhú danàa-gá ñáyiú ñúú-a dàtná ní quide té Èliás téé ní xóo cáháⁿ tnúhu Yá Ndiöxí ndéé sanaha-ǎⁿ? –càchí-güedé xáhaⁿ-güedé xii-gá.

55 Te Jèsús ní nchócótó-gǎ núú-güedé, te níhi ní cáháⁿ-gá dóho-güedé, te xáhaⁿ-gǎ:

–Nchòhó, chi ñá túú vǎha iní-ndó te núu ducaⁿ càháⁿ-ndó.

56 Chi yúhú Téé cùu ñaní tnáhá-ndó nchàa-ndo véxi-í sá dácăcu nihnu-í ñáyiú, te ñá díú véxi-í sá dăcuíta nihnu-í-yu –càchí-gá xáhaⁿ-gǎ xii-güedé.

Te sáta dúcáⁿ nǐ xáhaⁿ-gǎ, te ní xica-gá cuáháⁿ-gá ndìhi-güedé ïngá ñúú.

*Ñáyiú cuìní chitnahá ñáhá xii Jèsús ní cùu
(Mt. 8:19-22)*

57 Te ñúhu Jèsús ìchi ndìhi-güedé, te ïⁿ téé ní xáhaⁿ-dě xii-gá:

—Mèstrú, cuíní-í canchicúⁿ ñáhà-í xii-n ndèni ní cuu na quíhíⁿ-n —càchí-dé xáhaⁿ-dě xii-gá.

⁵⁸ Te Jèsús ní xáhaⁿ-gã xii-dé:

—Nchaa ñúcuí chi ndècu yaú cúu vèhe-güedi saquíhi-güedi, te nchaa quiti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndèé cáá vèhe-í ñuyú-a ndetatú-í —càchí-gá xáhaⁿ-gã xii-dé.

⁵⁹ Te dàtnùní ní xáhaⁿ tùcu-gá xii ingá-dé:

—Yòhó taquìxi chitnahá ñáhá-n xii-í —càchí-gá xáhaⁿ-gã xii-dé.

Dico téé-án ní xáhaⁿ-dě xii-gá:

—Mèstrú, dañá na nùhú-í cundetu-í cuú tātā-í te chindúxi-í-dé, te dàtnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dě xii-gá.

⁶⁰ Te Jèsús ní xáhaⁿ-gã xii-dé:

—Daña ñáyiú ñá túú sándáá iní ñáhá xii-í ná chindúxi tnàha meé-yu, chi ñáyiú-án cúu-yu dàtná ñáyiú ní xíhí cuèi ndècu-ní-yu núú ñuyú-a. Te yòhó taquìxi, chi quíhíⁿ-n dànehé-n ñáyiú nàcuáa cada Yá Ndiöxí ndíhu ndaha ñàha-gá xii-yu —càchí-gá xáhaⁿ-gã xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuíní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dě xii-gá.

⁶² Te Jèsús ní xáhaⁿ-gã:

—Nchaa ñáyiú ní sándáá iní ñáhá xii-í, te núu vá cànchicúⁿ nihnu ñáhá-yu ni yùhu ni iní-yu, te cùu-yu dàtná ìⁿ téé ní tñi ndaha làtú cutu-dé, chi téé-án nùu na ndàcoto-dé ndàa sáta-dé òré xítú-dé, te vá quíhíⁿ ndáá làtú-dé ducaⁿ sãtnahá-xi cùu-yu. Te cue ñáyiú chi vá cúu ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gã xii-dé.

10

Jèsús téndàha-gá únídico úxí cue téé quíhíⁿ cáháⁿ tnúhu-gá núú ñáyiú

¹ Te sáta dúcáⁿ ñi cuu, te ní cáxi tucu Xítohó Jesucristú únídico úxí cue téé codonù-güedé quíhíⁿ-güedé cáháⁿ-güedé tnúhu-gá nchaa ñuú, ndíhi nchaa dava-gá

xíchi núú quíhíⁿ-gá, te ndi ndúú ndi ndúú-güedé tendaha ñàha-gá xii-güedé quíhíⁿ-güedé.

² Te cùmání-gã caca-güedé, te ní xáhaⁿ-gã xii-güedé:

—Nchòhó xíní-ndó sã òré ná sàá yóó cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cùu, ducaⁿ ìo vài ñáyiú cùmání cundedóho tnúhu Yá Ndiöxí te ío sacú ñáyiú dàcuaha ñàha xii-yu tnúhu-gá, núu xíáⁿ xíní ñùhu-xi cácaⁿ-ndó núú Yá Ndiöxí cuendá sá ná dàcaháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá.

³ Te nchòhó cúu-ndó dàtná cue mbéé cue quiti cuáháⁿ núú yíhí cuè quiti dééⁿ. Chi tendaha ñàha-í xii-ndo quíhíⁿ-ndó núú xíndecu nchaa ñáyiú cuíhna iní-xi.

⁴ Te vá cànèhe-ndo ñunu cuhuⁿ ndachiuⁿ-ndo, ni núú cúhúⁿ díhúⁿ-ndó, te ni vã cáda tũha-gá-ndó chàú-ndó chi diu-ni chàu yíhí-ndó-ãⁿ xíáⁿ-ni quíhi-ndo, te vá ìo cuyaa-ndo cáháⁿ ndíhi-ndo ñáyiú ñùhu ichi.

⁵ Te òré ná quèxio-ndo ìⁿ vehe, te duha cúñaha-ndo xii ñáyiú dii vèhe-xi-án: “Yá Ndiöxí chindee ñàha-gá xii-ndo ìo váha cuu iní-ndó cùndecu-ndo”, duha cúñaha-ndo xii-yu.

⁶ Te núu ñáyiú-án ñi nduu táhũ-yu sá cùndècu váha iní-yu núú Yá Ndiöxí, te cuu-xi sá vãha sá cúu-xi-yu tnúhu cúñaha-ndo-ãⁿ, dico núu ñá túú ní cáháⁿ váha ndíhi ñáhá-yu xii-ndo, te cúñaha-ndo sã vã cúu-xi sã vãha sá cúu-xi-yu. Dico núu ní cáháⁿ váha ndíhi ñáhá-yu xii-ndo,

⁷ te diu-ni vehe-án cada vehe tnaa-ndo, te ñá túú-gã ndèé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiuⁿ dacuití tãú-güedé sá ñíhí-güedé sá cáxi-güedé cuendá nchaa chiuⁿ quide-güedé.

⁸ Te núu ní sáá-ndó ìⁿ ñuú núú ñi queheⁿ cuendá ñáhá-yu xii-ndo, te caxi-ndo nchàa sá ná tàxí-yu.

⁹ Te cada tátna-ndo cuè ñáyiú cùhú xíndecu ñuú-án, te cúñaha-ndo xii-yu sá sá ní sáá nduu ndíhu ndaha ñàha Yá Ndiöxí xii-yu.

¹⁰ Dico núu ní sáá-ndó ìⁿ ñuú núú ñá túú ní quèheⁿ cuendá ñáhá-yu xii-ndo, te

tn̄i-ndo ìchi cuita cáháⁿ-ndó cuáháⁿ, te cúñaha-ndo xii-yu:

11 “Ndéé tícá chúhmá n̄i tn̄i sáhá-nd̄i ñuú-ndó nàquidi-nd̄i, te duha quide-nd̄i cuendá cutn̄uní iní-ndó sã ñã túú quide váha-ndo ndècu-ndo. Dico cunaha-ndo sã sà ní sáá nduu nd̄ihu ndaha ñaha Yá Ndiõxí xii-ndo ni cùu”, duha cúñaha-ndo xii-yu.

12 Te na càchí tn̄uhu-í xii-ndo sã ná sàá nduu càda ndáá Yá Ndiõxí cuéchi nchaa ñáyiu, te ñáyiu ñuú-áⁿ ïo-gá ndohó-yu dàvá-áⁿ dàcúúxí ñáyiu ñuú Sòdomá — càchí-gá xáhaⁿ-gã xii-güedé.

Cuendá ñáyiu dava ñuú ñã túú sàndáá iní tn̄uhu Xítóhó Jesucristú
(Mt. 11:20-24)

13 Te Jèsús xáhaⁿ-gã xii ñáyiu dava ñuú ñã túú sàndáá iní tn̄uhu-gá:

—Ndàhú nchòhó cue ñáyiu ñuú Coràzín! jTe ndàhú nchòhó cue ñáyiu ñuú Bètsaidá! Chi núu d̄icó ñuú T̄irú, nd̄ih̄i ñuú S̄idón ní quide-í nchaa sá vã yõo tn̄ahí ndàcu cada datná ní quide-í ñuú-ndó-áⁿ n̄i xiní-ndó ñã, te sá ndéé ama-gá cuihn̄u-yu dóo ndàhú, te cunucóo-yu núu yáá cuendá sá nd̄ixí cuéchi iní-yu sã ñã túú quide váha-yu ni cùu.

14 Dico sáá nduu te ïo-gá dandòho ñaha Yá Ndiõxí xii-ndo dàcúúxí ñáyiu ñuú T̄irú, nd̄ih̄i ñáyiu ñuú S̄idón.

15 Te nchòhó ñáyiu ñuú Capèrnaúm quide iní-ndó sã sà cuánda-ndo ànd̄iu, dico ñáhá chi núu ùhú núu ndàhú cundecu-ndo — duha ní xáhaⁿ-gã xii nchaa ñáyiu ñuú-áⁿ.

16 Te xáhaⁿ tùcu-gá xii cue téé tendaha-gã quíh̄iⁿ cáháⁿ tn̄uhu-gá-áⁿ:

—Nchaa ñáyiu na cùndedóho nchaa tn̄uhu cáháⁿ-ndó, te cada iní-yu sá ȳhú càháⁿ-í ndèdóho-yu, te nchaa ñáyiu na dàquee t̄ihú ñáhá xii-ndo, te tn̄ahá yúhú daquèe t̄ih̄u-yu, te nchaa ñáyiu ducaⁿ na dàquee t̄ihú ñáhá xii-í, te tn̄ahá T̄atà-í Dútú Ndiõxí Yáá ní tendaha ñaha xii-í véxi-í ñuyú-a dàquee t̄ih̄u-yu —càchí-gá xáhaⁿ-gã xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé ún̄idico úxí ní tendaha Jèsús ní sáháⁿ ní cáháⁿ tn̄uhu-gá núu ñáyiu

17 Te cue téé ún̄idico úxí-áⁿ n̄i nasáá-güedé te súúní cud̄h̄i iní-güedé, te xáhaⁿ-güedé xii Jèsús:

—Mèstrú, ndéé espíritú cùnd̄ih̄i yucu ñávãha sàndáá iní ñáhá-xí xii-nd̄i òré c̄acú n̄ehe ñaha-nd̄i xii-n —càchí-güedé xáhaⁿ-güedé xii-gá.

18 Te Jèsús ní xáhaⁿ-gã:

—Ndáá càháⁿ-ndó chi yúhú ní xiní-í cùtn̄ahá ní xita nihnu yucu ñávãha, chi datná ní ngava ìⁿ tasaⁿ n̄i ngava-xi ñuyú-a.

19 Te datná quidé-ndó òré x̄nihnu-ndo ìⁿ cóo, àdi ìⁿ nchacua ducaⁿ cada-ndo daquee t̄ihú-ndó yùcu ñávãha, te ñã túú nã cada ñaha-xi xii-ndo, chi ní taxi-í tn̄uhu ndee ìní ndécú nd̄ih̄i-ndo.

20 Dico vá cud̄h̄i iní-ndó cuendá sã sàndáá iní ñáhá cuè espíritú cùnd̄ih̄i yucu ñávãha xii-ndo, chi cud̄h̄i iní-ndó cuendá sã sã yodo tnuní-ndó n̄úu t̄utú Yá Ndiõxí Yáá ndécú ànd̄iu —cachí-gá xáhaⁿ-gã xii-güedé.

Jèsús cud̄h̄i iní-gá

(Mt. 11:25-27; 13:16-17)

21 Te òré-áⁿ s̄úúní n̄i quide d̄h̄i ìní ñáhá Espíritú Yá Ndiõxí xii Jèsús, te ní xáhaⁿ-gã xii Yá Ndiõxí:

—Yòhó T̄atà-í Dútú Ndiõxí, ïo ch̄iñuhu ñaha-í xii-n chi ñ̄iu-n t̄axi tnuní-n ànd̄iu nd̄ih̄i ñuyú-a, te dànehé-n cuè ñáyiu nchaa tn̄uhu váha, te ñ̄iu-ni ñáyiu-áⁿ cùu-yu ñáyiu ñã túú cùtnuní iní-xi nchaa tn̄uhu càháⁿ cue téé túha, te nchaa tn̄uhu càháⁿ-n-áⁿ ñã túú ní datúu-n n̄úu ñáyiu càchí sã ïo túha, te ïo váha sàá díquí-xi. Te ducaⁿ quide-n, chi ducaⁿ cuìní-n cùnduu —cachí-gá xáhaⁿ-gã xii Yá Ndiõxí.

22 Te xáhaⁿ tùcu-gá xii cue téé ní nasáá-áⁿ:

—Mee T̄atà-í Dútú Ndiõxí ní cachí-gá sã cùn̄u-í núu nchàa-nd̄i túhú sã ïó. Te vã yõo ìⁿ x̄iní n̄acuáa s̄ani iní yúhú Déhe Dútú Ndiõxí, chi ìⁿd̄i díí-ni mee-gã x̄iní-gá n̄acuáa s̄ani iní-í. Te ducaⁿ ìⁿd̄ii-ni yúhú x̄iní-í n̄acuáa s̄ani iní mée-gã, te nchaa ñáyiu càchí iní-í sã quìní-yu n̄acuáa s̄ani iní T̄atà-í Dútú Ndiõxí te x̄itn̄uhu-í-yu, te vã yõo ìⁿ-gã x̄iní n̄acuáa s̄ani iní-gã chi ñ̄iu-ni ñáyiu ducaⁿ x̄itn̄uhu-í-áⁿ x̄iní-yu —càchí-gá xáhaⁿ-gã xii-güedé.

23 Te ní nchócótó-gã núu x̄indecu mee-ni cuè téé xica cuu nd̄ih̄i-gá, te ní xáhaⁿ-gã xii-güedé:

—Váha t̄ahú nchòhó nd̄ih̄i nchaa ñáyiu ndèhe nchaa n̄acuáa quide-í vitna.

24 Chi ío cuéhé cue téé ní xóo cáháⁿ tnúhu Yá Ndiöxí ndéé sanaha, ndíhi cue téé ní xíndaha ñàha xii ñáyiú ní cuiní-güedé cundehe-güedé nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tnúhu càháⁿ-í ndèdóho-ndo vitna, te ñá túú ní xíndedóho-güedé —càchí-gá xáhaⁿ-gá xii-güedé.

Nàcuáa ní quide ìⁿ téé distritú Sàmaríá

25 Te ìⁿ téé dàcuaha ñàha xii ñáyiú nchaa tnúhu ní chídó tnùní ndíi Moisés ní ndacuíñí-dé xító ndèé-dé Jèsús nùu nása cunduu tnúhu cáháⁿ-gá, te xáhaⁿ-dè xii-gá:

—Mèstrú, ¿ná cúú sá cádá-í cuèndá nduu táhù-í cundecu-í ndíhi Yá Ndiöxí ní caa ní quíhíⁿ-í? —càchí-dé xáhaⁿ-dè xii-gá.

26 Te Jèsús ní xáhaⁿ-gá xii-dé:

—Cuiní-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gá xii-dé.

27 Te xáhaⁿ-dè xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiöxí Yaá cúú Ndiöxí-ndó ní yuhu ní iní-ndó, te cani iní-ndó càda-ndo datná cuiní méé-gá, te mee-ni tnúhu váha cani iní-ndó nàcuáa cuu vii cuu váha-ndo núú-gá, te coo iní-ndó cuu iní-ndó-gá. Te cuu iní-ndó tnàha ñáyiú-ndo dàtná cúú iní-ndó mèe-ndo”, duha càchí ndíi núú tütú ndíi —càchí-dé xáhaⁿ-dè xii-gá.

28 Te Jèsús ní xáhaⁿ-gá:

—Váha-ni càháⁿ-n, te núu cada-n nàcuáa càháⁿ-n àⁿ, te nduu táhú-n cundecu-n ndíhi Yá Ndiöxí ní caa ní quíhíⁿ —càchí-gá xáhaⁿ-gá xii-dé.

29 Te sá dúcáⁿ ní xáhaⁿ Jèsús xii-dé nùu ndùcu-dé nàcuáa càda-dé cácu nihnu-dé núú tnúhu ní cáháⁿ-dé, te ní xícáⁿ tnúhú-dé núú-gá, te xáhaⁿ-dè:

—¿Yoo cuu tnàha ñáyiú-í-í? —càchí-dé xáhaⁿ-dè xii-gá.

30 Te Jèsús ní cani-gá ìⁿ cuèndú núú-dé nàcuáa tecú tnùní-dé tnúhu-gá, te xáhaⁿ-gá:

—Ìⁿ téé ní ndee-dé ñuú Jerusalén ñúhú-dé ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedé dóó níhnú-dé, ndíhi nchaa sá néhé-dé, te ní caniha vihi-güedé, te nchìto diu-ná-dé ní dáñá ñàha-güedé te cuáháⁿ-güedé.

31 Te mei òré cātùu-dé-áⁿ ñúhú ìⁿ dütú ichi-áⁿ, te òré ní xíní ñáhá dütú-àⁿ xii-dé, te ìⁿ xio-ni ní xócõo ndee-dé ní yáha-dé.

32 Te ñúhu tucu ìⁿ téé cùu levítá ichi-áⁿ, te òré ní xíní-dé téé-áⁿ cātùu-dé, te diu-ni ducaⁿ ní quide-dé ìⁿ xio-ni ní xócõo ndee-dé ní yáha-dé.

33 Dico ìⁿ téé distritú Sàmaríá ñúhú tucu-dé ichi-áⁿ te òré ní xíní-dé téé-áⁿ cātùu-dé, te ní cundàhú iní ñáhá-dè.

34 Te ní sáháⁿ-dé núú cātùu téé-áⁿ, te ní quide tátna-dé nchaa núú ní nícuèhé xii téé-áⁿ ní chihi-dé yúcú, te ní dácútú-dè. Te dàtnùní ní dácáá ñàha-dé sátá quiti-dé, te ndèca ñàha-dé cuáháⁿ ìⁿ vehe núú sácõo cue ñáyiú sácúhuⁿ ichi, te yacáⁿ ní xito ñàha-dè.

35 Te ingá nduu òré ní nucúhuⁿ téé Samaritanú-áⁿ ichi, te ní tava-dé úú díhúⁿ denàriú, te ní sáha-dé téé cùu xítóhó vehe-áⁿ, te ní xáhaⁿ-dè: “Coto saú-n tèe-a, te núu ñá ní tnàhá díhúⁿ sá ní taxi-í, te cuèi na dàndoñuhu-gá-n díhúⁿ-n cuèndá-dé, te òré ná quixi tucu-í te nacháhu-í”, duha ní xáhaⁿ tèe Samaritanú-áⁿ xii téé dii vèhe xíaⁿ.

36 Te vitna cáháⁿ, te núu ndèdacàa cue téé úní-áⁿ cúú-güedé téé váha cùu iní-güedé tnàha ñáyiú-güedé —càchí-gá xáhaⁿ-gá xii téé dàcuaha ñàha xii-í ñáyiú-áⁿ nchaa tnúhu ní chídó tnùní ndíi Moisés.

37 Te téé-áⁿ ní xáhaⁿ-dè xii-gá:

—Téé ní cundàhú iní ñáhá xii téé ní dánícuèhé ñáhá cuè ñadúhú-áⁿ, téé-áⁿ cúú-dé téé cùu iní tnàha ñáyiú-xi —càchí-dé xáhaⁿ-dè xii-gá.

Te Jèsús ní xáhaⁿ-gá:

—Cuáháⁿ te diu-ni ducaⁿ càda-n tnàhá-n —càchí-gá xáhaⁿ-gá xii-dé.

Jèsús ndécú-gá vehe tá Mārta ndíhi tá Māría

38 Te Jèsús ñúhú-ni-gá ichi cuáháⁿ-gá ndíhi cue téé xica cuu ndíhi-gá, te ní sáá-gá ìⁿ ñuú líhli, te xíaⁿ ní quee ìⁿ xíchí nání Mārta ní cáháⁿ ñáhá-xi xii-gá vehe-xi.

39 Te tá Mārta ndècu ìⁿ cùhú-xi nàni-xi Mariá, te xíchí-áⁿ ní ngóo-xi núú Jèsús ndèdóho-xi nchaa tnúhu càháⁿ-gá.

40 Te tá Mārta-áⁿ ndíhi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sá ní dándõ ndaha ñàha cùhú-í nchaa chiúⁿ-áⁿ? Cúñaha saú ná quixi-xi chindee ñàha-xi —cachí-xi xáhaⁿ-xi xii-gá.

41 Dico Jèsús ní xáhaⁿ-gǎ:

—Yòhó Màrta, ñùhu tneñu vihi-n, te ndìhú iní-n sǎ ïo vǎi chiuⁿ-n ñùhu,

42 dico xìni ñùhu vihi-gǎ-xi cundedóho-n tnùhu càháⁿ-í, chi tá Màriá-a sa ndèdóho-xi tnùhu-í, te vá yòo ìⁿ ndacu xocàni tnùhu-í sǎ ñi ngúndecu ndìhi-xi —càchí-gǎ xáhaⁿ-gǎ xii-xi.

11

Jèsús dánèhé-gǎ cue téé xica cuu ndìhi-gǎ nàcuáa càháⁿ ndìhi-güedé Yǎ Ndiöxí

(Mt. 6:9-15, 7:7-11)

1 Te ìⁿ nduu càháⁿ ndìhi Jèsús Yǎ Ndiöxí ìⁿ xichi, te sǎtá ñi yáha ní càháⁿ ndìhi-gǎ Yǎ Ndiöxí, te ní xáhaⁿ ìⁿ téé xica cuu ndìhi-gǎ xii-gǎ:

—Mèstrú, danèhé ñáhá xìi-ndí nása càháⁿ ndìhi-ndí Yǎ Ndiöxí dàtná ní quide ndíi Juáá ní dánèhé ndíi cue téé ní xica cuu ndìhi ndíi —càchí-dé xǎhaⁿ-dǎ xii-gǎ.

2 Te Jèsús ní xáhaⁿ-gǎ:

—Òré càháⁿ ndìhi-ndo Yǎ Ndiöxí, te cachí-ndó:

Yòhó tátá-ndí Dútú Ndiöxí Yaá ndécú àndiu, nchaa ñáyiú na càháⁿ-yu sǎ cúú-n Yáá ío yiñùhu.

Te xìcáⁿ táhú-ndí núú-n sǎ ná sǎá nduu ndíhu ndáhá-n-yu.

Te cada-n dàtná càchí iní-n ñùyíú-a dàtná quidé-n àndiu.

3 Te xìcáⁿ táhú-ndí núú-n sǎ táxí-n sǎ cándèca iní-ndí ìⁿ nduu ìⁿ nduu.

4 Te cada càhnu iní-n nchaa yíca cuèchi-ndí, chi tnàhá nchúhú quidé càhnu iní-ndí nchaa sǎ quidé ñàha tnaha ñáyiú-ndí.

Te vá dáñá-n dàcaháⁿ ñáhá yùcu ñávàha xii-ndí cada-ndí sǎ ñà túú vǎha, chi coto ñaha-n xìi-ndí cuèndá sǎ vǎ dúcáⁿ càda ñaha-xi,

duha càháⁿ-ndó

—càchí-gǎ xáhaⁿ-gǎ xii-güedé.

5 Te Jèsús ní xáhaⁿ tùcu-gǎ:

—Te núu ndédacàa nchóhó ndécú ìⁿ téé tnàha tnùhu ndìhi-ndo, te dava niú cuáháⁿ-ndó vèhe-dé, te òré ní quexìo-ndo, te xǎhaⁿ-ndo xìi-dé: “Véxi-í núu vá cùndèe iní-n tàxi nuu-n úní tnàhá pàá,

6 chi ìⁿ téé xìní tnàhá ndìhi-í ñùhú-dǎ ichi ní quexìo-dé vehe-í, te ñà túú tnàhí ná cuáñaha-í caxi-dé”, quesaha-ndo cùñaha-ndo.

7 Te téé-áⁿ càháⁿ-dé ndéé xití vehe-dé, te cùñaha-dǎ xii-ndo: “Vá dásàtú nihá-n chi ndèdí yuyèhe-í, te càa-í ndìhi cue landú-í, te vá cúú ndàcòo-í taxi-í sǎ cuìní-n”, quesaha-dǎ cùñaha-dǎ xii-ndo.

8 Te na càchí tnùhu-í xii-ndo sǎ cuèi cùu-dé téé tnàha tnùhu ndìhi-ndo, dico ducaⁿ cùñaha-dǎ xii-ndo, dico dacuití sǎ ndàcòo-dé taxi-dé sǎ cuìní-ndó cuèndá sǎ vǎ dásàtú-gǎ-ndó iní-dé.

9 Te yúhú càchí-í xii-ndo sǎ càcáⁿ-ndó núu ná cuìní-ndó núú Yǎ Ndiöxí te taxi-gǎ. Te vá dáñá ndèe-ndó càcáⁿ-ndó núú-gǎ núu ná cuìní-ndó, te ducaⁿ te níhí-ndó. Te cada iní-ndó sǎ ñi quexìo-ndo vehe ìⁿ tnaha ñáyiú-ndo te ní càháⁿ-ndó, te ñáyiú-áⁿ ñi tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gǎ xii-ndo, te taxi-gǎ sǎ ná càcáⁿ-ndó núú-gǎ.

10 Chi nchaa ñáyiú ducaⁿ xiquide te Yá Ndiöxí tedóho ñaha-gǎ xií-yu nihí-yu sǎ cuìní-yu. Te diu-ni ducaⁿ tùcu nchaa ñáyiú na càcáⁿ núú-gǎ ìⁿ sǎ cuìní-yu, chi sǎñaha-gǎ sǎ xìcáⁿ-yu núú-gǎ. Te diu-ni ducaⁿ tùcu nihí nchaa ñáyiú ñà túú dàña ndéé xìcáⁿ núú Yǎ Ndiöxí sǎ cuìní-yu, chi nihí-yu.

11 Te nchòhó cue téé cùu tátá ñà túú cùndee iní-ndó cuáha-ndo cuè déhe-ndo ìⁿ yúú caxi-güexi òré xìcáⁿ-güexi ìⁿ pàá núú-ndó càxi-güexi, te ñi ñà túú cùndee iní-ndó cuáñaha-ndo ìⁿ cóo caxi-güexi òré xìcáⁿ-güexi ìⁿ chácá núú-ndó càxi-güexi.

12 Te ñi ñà túú cùndee iní-ndó cuáñaha-ndo ìⁿ nchacua caxi-güexi oré xìcáⁿ-güexi ìⁿ ndíú núú-ndó càxi-güexi.

13 Te nchòhó cuèi ndéé dau sǎá iní-ndó, dico sǎha-ndo cuè déhe-ndo sǎ vǎha xèxi-güexi oré xìcáⁿ-güexi núú-ndó. Te núu nchòhó ducaⁿ quide-ndo, ÿte uuⁿ-gǎ ducaⁿ quide Tátá-ndó Dútú Ndiöxí Yaá ndécú àndiu, chi taxi-gǎ Espiritú-gǎ cundecu ndìhi-ndo te núu na càcáⁿ-ndó núú-gǎ! —càchí-gǎ xáhaⁿ-gǎ xii-güedé.

Càchí-güedé sǎ ndécú ndìhi Jèsús yucu

ñávãha

(Mt. 12:22-30; Mr. 3:20-27)

14 Te Jèsús ndéñùhu-gá espíritú cùndìhi yucu ñávãha yìhi ñaha xii ìⁿ téé ní quide ñìhí-xi, te òré ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñúhu ñáyiu sá dúcáⁿ ñi quide-gá.

15 Te davá-yu ní xítñahá-yu:

—Tée-a ndéñuhu-dé nchaa espíritú cùndìhi sácúíhná yíhí ñaha xii ñáyiu, chi ñu-ni sácúíhná-ãⁿ chíndèe ñaha-xi xii-dé, te ñu-ni-xi tàxi tnuní-xi nchaa espíritú-áⁿ —càchí-yu xítñahá-yu.

16 Te davá-yu xito ndeé ñáhã-yu xii-gá, te xáhãⁿ-yu sá ná cádá-gã ìⁿ sá vã yõo tnàhí ndàcu cada ñuyúú-a cundehé-yu nàcuáa cutnùní iní-yu núu ndáá sá Yã Ndiõxí ní tendaha ñaha-gá xii-gá véxi-gá ñuyúú-a.

17 Dico mee-gã sa ní cutnùní iní-gá nchaa nàcuáa sàni iní-yu, núu ní xáhaⁿ-gã xií-yu:

—Te nchòhó xìní-ndó sã ñuu ìⁿ téé yìndaha ìⁿ nacióⁿ vá cúú ìⁿnuu-dé ndìhi cue téé cùndìhi-dé, te vá cúdíi-dé cunuu-dé. Te ñu-ni ducaⁿ sãtnahá tucu-xi cùu cue ñáyiu xíndecu ìⁿ-ni vèhe, chi núu vá cúú ìⁿnuú-yu cundecú-yu, te vá cúdíi-yu cundecu càhnú-yu.

18 Te ducaⁿ sãtnahá-xi cùu sácúíhná, chi núu vá cúú ìⁿnuu-xi ndìhi nchaa espíritú cùndìhi-xi te vá cúdíi-xi cundecu-xi taxi tnùní-xi. Te duha càháⁿ-í chi nchòhó càchí-ndó sã sácúíhná chíndèe ñaha-xi xii-í quéñùhu-í nchaa espíritú cùndìhi-xi yìhi ñaha xii ñáyiu.

19 Te núu yúhú quidé cuendá-ndó sã sácúíhná chíndèe ñaha-xi xii-í, te xìni ñuhu-xi cada cuendá-ndó yõo chindee ñaha xii cue téé xica cuu ndìhi-ndo queñuhu-güedé nchaa espíritú cùndìhi-xi yìhi ñaha xii ñáyiu. Te mee-güedé càchí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó.

20 Te ndáá sá Yã Ndiõxí chíndèe ñaha-gá xii-í quéñùhu-í nchaa espíritú cùndìhi sácúíhná yíhí ñaha xii ñáyiu, te xiãⁿ cutnùní iní-ndó sã sá ní sáá nduu ndíhu ndaha ñaha Yã Ndiõxí xii-ndo.

21 Te núu ìⁿ téé ío ndee, te súuní ñí cáá-dé, te ndeé-dé vehe-dé cuendá sá vã

cuíta, te ní quide túha-dé titní sá dèéⁿ, te ío váha nèhe váha-dé nchaa ndachùⁿ-dé.

22 Dico núu quexìo ingá téé ío-gá ñí cáá te ndee-gã-dé, te ngúíta-dé nàá-dé ndìhi téé ndeé vehe-xi-áⁿ, te cada cànarí ñáhá téé-áⁿ xii téé ndeé vehe-xi-áⁿ, te quen-deé-dé nchaa sá dèéⁿ cùndèe iní-dé, te taxi tnùní-na-dé nchaa xiãⁿ, ndìhi nchaa sá ndécú ndìhi-dé, te dàcáhñu-dé nchaa cue téé cùndìhi-dé nchaa sá ná ñìhí-dé.

23 Te nchaa ñáyiu ñá túú cùndìhi ñaha xii-í, te cùu úhú iní ñáhã-yu, te nchaa ñáyiu ñá túú chindee ñaha xii-í, te dàquee tíhũ-yu chùⁿ quide-í.

Espíritú cùndìhi yucu ñávãha sá nánchòcáva xito cùu uú
(Mt. 12:43-45)

24 Te òré ná quèe ñaha ìⁿ espíritú cùndìhi yucu ñávãha xii ìⁿ ñáyiu, te cuáháⁿ-xi ndùcu-xi ìⁿ xichi núu cùndècu-xi te ñá ñìhí-xi, te ní sani iní-xi: “Váha-gá núhú tucu-í núu ñi xíndecu-í”, duha ní sani iní-xi.

25 Te cuánuhú-xi, te òré ní nasáá-xi, te ní xìní-xi sá cáá iní ñáyiu-áⁿ dàtná cáá-ñã ìⁿ vehe ní natíhú, chi ní nduu vii-ná, vá yõo-gá ndécú.

26 Te sáta dúcáⁿ te ní xica-xi cuáháⁿ-xi cuándúcú-xi ùsá tnàhá espíritú cùndìhi-xi sá nèhé víhí-gã xiquide, te òré ní ñìhí-xi cue espíritú-áⁿ te ndèca ñaha-xi cuáháⁿ cuendá ngúndecu ndìhi-xi ñáyiu-áⁿ, te ñáyiu-áⁿ uuⁿ-gá nándi yáha-yu dàcúúxí ndeé díhna —càchí-gá xáhaⁿ-gã xií-yu.

Cuendá ñáyiu cùu váha ndisa iní-xi

27 Te ñini càháⁿ Jèsús tnúhu-áⁿ núú ñáyiu ní cáháⁿ ñìhi ìⁿ ñadìhí tnuú-yu, te xáhãⁿ-aⁿ xii Jèsús:

—¡Sá vãha táhú ñadìhí ní dácácú ñaha xii-n, te ní dácúéhnú ñaha-aⁿ! —cachí-aⁿ xáhãⁿ-aⁿ xii-gá.

28 Te Jèsús ní xáhaⁿ-gã:

—¡Váha-gá táhú nchaa ñáyiu sàcúndedóho nchaa tnúhu càháⁿ Yã Ndiõxí te sàndáá iní-yu! —càchí-gá xáhaⁿ-gã xii-aⁿ.

Ñáyiu ñá túú sàndáá iní ñáhã xii Jèsús cuíní-yu cada-gá ìⁿ sá vã yõo tnàhí ndàcu cada
(Mt. 12:38-42; Mr. 8:12)

29 Te ta tàcá vâi ñáyiú te dàdehnde tñaha-ná-yu, te ní ngüíta Jèsús xáhaⁿ-gã xii-yu:

—Nchòhó ñáyiú ndècu ñuyíú vitna, chi ío sàá iní-ndó, te cuíní-ndó càda-í ñⁿ sá vã yõ tñahí ndàcu cada cuendá cuíní-ndó cùtnuní iní-ndó ñuu ndisa sá Yã Ndiõxí ní tendaha ñaha-gá xii-í véxi-í. Dico ñã túú nãgá cada-í quíní-ndó, chi sa ñihí-ndó tñuhu nàcuáa ní yáha ndíi Jònás téé ní xóo cáháⁿ tñuhu Yá Ndiõxí ndéé sanaha, te ñu-ni ducaⁿ yáha yúhú tucu.

30 Chi nchaa ñáyiú ñuu Nñivé ní cutnùní iní-yu sá Yã Ndiõxí ní tendaha ñaha-gá xii ndíi Jònás ní sáháⁿ ndíi ñuu-yu. Te ducaⁿ sãtnahá-xi cùu yúhú Téé cùu ñani tñahá-ndó nchaa-ndo, chi sáá nduu te cutnùní iní-ndó sá Yã Ndiõxí ní tendaha ñaha-gá xii-í véxi-í ñuyíú-a.

31 Te na sáá nduu càda ndáá Yã Ndiõxí cuéchi nchaa nchòhó ñáyiú ndècu ñuyíú-a, te dàvá-áⁿ quíní-ndó ñⁿ ñadihí ñaha ní xíndaha ñⁿ nacióⁿ cáá ndàa xio cuha núú quéné nchícanhii. Te ñaha-áⁿ ío xica ñí xíndecu-aⁿ, te ní sáháⁿ-aⁿ ní xíndedóho-aⁿ nchaa tñuhu ní cáháⁿ ndíi Salòmón, chi ndíi-áⁿ ío ní sáá sá xíní tñùní ndíi. Te ñaha-áⁿ cáháⁿ-aⁿ dàvá-áⁿ sá nchòhó ñáyiú ndècu vitna ñã túú ní quíde ndáá-ndó. Dico vitna iha ndècu ndíhi ñaha-ndo xii yúhú, te ñu-í ío-gá cùnùu-í dàcúxí ndíi Salòmón.

32 Te ñu-ni nduu càda ndáá Yã Ndiõxí cuéchi nchaa nchòhó ñáyiú ndècu ñuyíú-a vitna, dàvá-áⁿ tñahá cue ñáyiú ní xíndecu ñuu Nñivé cundecú-yu núú Yã Ndiõxí, te tñahá-yu cachí-yu sá ñà túú ní quíde ndáá-ndó. Chi ñáyiú ñuu Nñivé-áⁿ ñí ndixi túu iní-yu sá ñà túú quíde váha-yu ndècú-yu te ní natuhá-yu ichí Yá Ndiõxí cùtnahá ní cáháⁿ ndíhi ñaha ndíi Jònás tñuhu-gá xii-yu. Dico vitna iha ndècu ndíhi ñaha-ndo xii yúhú téé cáháⁿ tucu tñuhu Yá Ndiõxí, te ñu-í ío-gá cùnùu-í dàcúxí ndíi Jònás.

*Núú-ó cùu-xi datná ñⁿ ñuhú
(Mt. 5:15; 6:22-23)*

33 Te ñã túú ñí ñⁿ ñáyiú tẽñuhú ñⁿ lintérná, te taxi ndecú-yu ñⁿ núú yídãhu, àdi chiváha-yu xití ñⁿ tídihi, chi tàxi ndecú-yu ñⁿ núú ñinu cuendá nchaa ñáyiú quíhu vehe cutnùní núú-yu.

34 Te núú-ndó cùu-xi datná ñⁿ ñuhú, chi ñⁿ sá ná quíní-ndó te ndíxi túu iní-ndó ñã cùú xíãⁿ, te núú càváha núú-ndó, te ducaⁿ cùtnuní iní-ndó ñã cùú sã ndécú núú-ndó, áⁿ te núú cùhú, te vá cùtnùní iní-ndó ñã cùú sã ndécú núú-ndó. Te sá dúcáⁿ cùhú núú-ndó te cada iní-ndó sã ndécú-ndó datná ñⁿ núú néé.

35 Te ío cada cuendá-ndó vã cání cuèhé iní-ndó cuendá tñuhu Yá Ndiõxí cuendá cutnùní iní-ndó nàcuáa cundecu-ndo, chi núu na càni cuèhé iní-ndó cuendá tñuhu-gá, te cùu-ndo datná ñⁿ ñáyiú ñã túú cùtnuní núú-xí.

36 Te núú càndoo canine iní-ndó, te mee-ni sã vãha ñuhu iní-ndó, te cùtnuní váha iní-ndó tñuhu ndáá datná cùtnùní váha núú-ndó òré càyú ñuhú, ducaⁿ cùtnuní iní-ndó —càchí-gá xáhaⁿ-gã xii-yu.

*Jèsús càháⁿ-gá cuendá cue téé cùu fariséú ndíhi cue téé dàcuaha ñaha xii-í ñáyiú
(Mt. 23:1-36; Mr. 12:38-40; Lc. 20:45-47)*

37 Te òré ní ndíhi tñuhu ní cáháⁿ Jèsús, te ñⁿ téé cùu fariséú ní cáháⁿ ñahá-dẽ xii-gá vehe-dé caxi-gá, te cuánguihu-gá vehe-dé, te ní ngóo-gá mèsá.

38 Te téé cùu fariséú-áⁿ ío ní cuñúhu-dé, chi Jèsús ñã túú ní ndàha-gá nàcuáa sàni iní-güedé nduu vétú iní Yã Ndiõxí òré ní ngóo-gá caxi-gá datná quíde mèe-güedé.

39 Te Jèsús ní xáhaⁿ-gã xii-dé:

—Nchòhó cue téé cùu fariséú xíní-ndó sã ío ñáyiú nàquete sáta-ni tásáⁿ ndíhi sáta-ni cõhó, te xití-xi càndehe caduha-ni. Te ducaⁿ sãtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tñaha ñáyiú-ndo, te quèheⁿ-ndo sá ndécú ndíhi-yu, te nándi-gá nchaa sá cuèhé sá dúhá ñuhu iní-ndó quíde-ndo.

40 ¡Te nchòhó cùú-ndó cuè téé ío ñí iní-xi!
¿Te náa ñã túú cùtnuní iní-ndó sã Yã Ndiõxí Yáa ní cadúha yiqui cùñú-ó ñu-ni-gá ní chihi-gá iní-ó-ãⁿ?

41 Te nchaa sá vãha ndècu ndíhi-ndo cuáha-ndo nchaa ñáyiú xini ñuhu na cundecu ndíhi-yu, te núú ducaⁿ na càda-ndo, te cuu-ndo ñáyiú sa ní nduu ndoo ní nduu nine iní-xi.

42 ¡Te ndàhú ní cuu nchaa nchòhó cue téé cùu fariséú! Chi sãha-ndo Yã Ndiõxí núú ùxí xichi yúcú nání mèntá, ndíhi yúcú

rudá, ndihi nchaa dava-gá núú yǔcú quëe comidá, dico ñá túú quide ndáá-ndó, te ni ñá túú ñùhu iní-ndó Yá Ndiǒxí. Dico tnúhu cǎháⁿ-í-a tàù-ndó càda-ndo, te ni vǎ dáñá ndèé-ndó càda-ndo nchaa dava-gá sá vǎha.

⁴³ 'iTe ndàhú ní cuu nchòhó cue tée cùu fariséú! Chi cuiní-ndó cùnucóo-ndo núú sácóo cue tée ío cùnuu xití veñúhu, te cuiní-ndó mèe-ni ndihi tnúhu yíñùhu cǎháⁿ ndihi ñaha ñǎyiu xii-ndo nchaa núú xicá cùu-ndo.

⁴⁴ 'iTe ndàhú ní cuu nchòhó cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndihi nchòhó cue tée cùu fariséú chi ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiu ní xihí te ní nguíndǔxi, te ñá túú cùtnuní-gá ndèé yíndǔxi-yu, te cuëi nà yáha ñáyiu dico ñá túú cùtnuní sá yíndǔxi ndíyi. Te ducaⁿ sǎtnahá-xi cùu nchòhó, chi nchaa ñáyiu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó — cǎchí-gá xáhaⁿ-gǎ xii-güedé.

⁴⁵ Te ní xáhaⁿ ìⁿ tée dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ cǎháⁿ-n te tnàhá nchúhú xicuèhé-n ǎⁿ —cǎchí-dé xáhaⁿ-dè xii-gá.

⁴⁶ Te Jèsús ní xáhaⁿ-gǎ:

—iNdàhú ní cuu tnàhá nchaa nchòhó cue tée dàcuaha ñaha xii ñáyiu nchaa tnúhu ní chídó tnùní ndíi Moisés! Chi quide-ndo datná quidé ñáyiu dàcuido ìⁿ tnaha ñáyiu-xi ìⁿ sá ío vée, te mèe-yu ni lùha ñá túú cuiní-yu cuidó-yu. Te ducaⁿ sǎtnahá-xi quide nchòhó chi dànehé-ndó ñáyiu nàcuáa cadá-yu, dico mee-ndo chi ni lùha ñá túú cuiní-ndó càda-ndo nacuáa dànehé-ndó-yu.

⁴⁷ 'iTe ndàhú ní cuu tucu-ndo! Chi càdúha-ndo núú ñǎ nguíndǔxi cue tée ní xóo cǎháⁿ tnúhu Yá Ndiǒxí ndéé sanaha cuendá sá cúnàha-ndo núú yíndǔxi cue ndíi, te ñiu-ni cue ñani tnàhá-ndó ñǎ sahani-güedé cue ndíi.

⁴⁸ Te nchòhó sa nàha-ndo nacuáa ní quide cue ñani tnàhá-ndó, te cǎchí-ndó sǎ ñǎ quide váha-güedé sá dúcáⁿ ñǎ sahani-güedé cue ndíi-án, te vitna càdúha-ndo núú ñǎ nguíndǔxi cue ndíi.

⁴⁹ 'Te Yá Ndiǒxí ío sáa nchaa sá xini tnùní-gá, te ní cǎchí-gá sá dǎcǎháⁿ-gá iní cue tée cuendá cǎháⁿ-güedé tnúhu-gá núú ñǎyiu, te cada-güedé nchaa nàcuáa cuiní-gá, te dava-güedé cahni ñahá-yu xii-güedé, te dava-güedé ío dandòho ñahá-yu xii-güedé duha ní cǎchí-gá.

⁵⁰ Te nchaa ñáyiu ñuyíu vitna tnàhá-yu nacháhu-yu núú Yá Ndiǒxí cuendá sá ñǎ sahani-güedé cue tée ní cǎháⁿ tnúhu-gá ndéé cùtnàhá ní ngáva ñuyíu.

⁵¹ Te ndéé ndíi Àbél tée ní sahani-güedé ndéé díhna nuu, ndihi ndéé ndíi Zacàriá tée ní sahani-güedé ndéé núú ñǎ ndihi-ná ndácáⁿ cuendá ñahá Yá Ndiǒxí núú ñáyiu ndècu ñuyíu vitna, te ñiu ndíi-án ñǎ sahani-güedé mei tnúú veñúhu cǎhnu sá ío cùnuu, ndihi xito núú sácóo sǎ ndúú tǎhú Yá Ndiǒxí.

⁵² 'iTe ndàhú ní cuu tucu nchaa nchòhó cue tée dàcuaha ñaha xii ñáyiu nchaa tnúhu ní chídó tnùní ndíi Moisés! Chi quide-ndo datná quidé ìⁿ tée tàxi tnuní ìⁿ vehe, chi nacadí-dé te ñá dáñá-dè quíhu ñáyiu te ni mèe-dé ñá túú quíhu-dé. Te ducaⁿ sǎtnahá-xi quide-ndo, chi dàcuaha-ndo tnúhu Yá Ndiǒxí te ñá túú cuiní-ndó quindáá iní-ndó te ni ñá túú dànehé-ndó ñáyiu cuiní tnúú tnúhu-gá nàcuáa tàù-xi cunduu cuendá naníhí tǎhú-yu —cǎchí-gá xáhaⁿ-gǎ xii-dé.

⁵³ Te òré ní ndee Jèsús vehe tée cùu fariséú-án, te cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndihi cue tée cùu fariséú ní cudééⁿ-güedé núú-gǎ, te ní nguíta-güedé nándi sá xicáⁿ tnúhú-güedé núú-gǎ cuendá cuiní-güedé núu vá cuíta-gá ìⁿ tnúhu cǎháⁿ-gá

⁵⁴ cuendá ducaⁿ ñihí-güedé nàcuáa cada-güedé cacáⁿ cuéchi-güedé cuendá-gá.

12

Jèsús cǎháⁿ-gá cuendá cue tée dándahú mée-xí

¹ Te òré-án ñǎ tacá titní mǐl ñáyiu núú ndécú Jèsús, te súúní dicó ngónchihí tnàha-ná-yu. Te ndèdòho-yu ní xáhaⁿ Jèsús xii cue tée xica cuu ndihi-gá:

—Cada cuendá-ndó vǎ cǎnchícúⁿ ni-hnu-ndo nàcuáa quide cue tée cùu fariséú,

chi cue téé-án ïo dândahú-güedé méé-güedé sá quidé ndáá-güedé dico ñá ndáá sá quidé ndáá-güedé.

² Te nchaa tnúhu sá cúú yùhu ni cuu vá cúú yùhu-gá, chi nchaa dacuití sá quée tũu-xi núú ñáyiú.

³ Chi nchaa tnúhu càháⁿ dayuhu-ndo quée túu-xi núú chítú nũú tàcá, te nchaa tnúhu càháⁿ méé-ndó vèhe-ndo dacuití sá ñihí ñáyiú tnúhu.

Yá Ndiõxí xíní ñùhu-xi yuhú-ó-gã
(Mt. 10:26-31)

⁴ Te nchòhó cue téé ío váha tnàhá tnúhu ndìhi-í ná càchí tnúhu-í xii-ndo sá vã yùhú-ndó cuè ñáyiú cuèi na càhni ñahá-yu xii-ndo, chi ñu-ni yiqui cùñú-ndó ndácú-yu cahní-yu, te ñá túú nãgá ndacú-yu cada ñahá-yu xii-ndo.

⁵ Te na càchí tnúhu-í xii-ndo sá Yã Ndiõxí tàú-ndó yùhú-ndó-gã, chi mee-gã ío cùnũu-gá, te ñu-gá quidé-gã sá vã cùndecu-gá ñáyiú ñuyúú, te daquihíⁿ ñahá-gã xií-yu núú ùhú núú ndàhú, núu xiãⁿ càchí tnúhu-í xii-ndo sá Yáá-án tàú-ndó yùhú-ndó-gã.

⁶ Te nchòhó xíní-ndó sá ndèé úhúⁿ tnàhá tílaá cùyãhu-ñi núú ùú díhúⁿ, dico Yá Ndiõxí ñá túú cùnaa-gá ni ñⁿ-güedi, chi nèhe cuendá ñahá-gã xii-güedi.

⁷ Te nchòhó ndèé ñⁿ ñⁿ idi díquí-ndó yìndehu, núu xiãⁿ càchí-í sá vã yùhú-ndó, chi cùnũu-gá-ndó dàcúxí tílaá cuèi vãi vihi-güedi.

Ñáyiú na dàtúu núú dàva-gá ñáyiú sá ndécú ndìhi-yu Xítohó Jesucristú
(Mt. 10:32-33; 12:32; 10:19-20)

⁸ Te na càchí tnúhu-í xii-ndo sá nũu na dàtúu-ndo nũú dàva-gá ñáyiú sá ndécú ndìhi ñaha-í xii-ndo. Te ducaⁿ te tnàhá yùhú Téé cùu ñaní tnàhá-ndó nchàa-ndo datúu-í núú nchàa cue espíritú xínú cuèchi núú Yã Ndiõxí sá nchòhó ndécú ndìhi ñaha-ndo xii-í.

⁹ Dico núu na cùñaha-ndo xii ñáyiú sá ñà túú ndècu ndìhi ñaha-ndo xii-í, te ñu-ni ducaⁿ càda yùhú Téé cùu ñaní tnàhá-ndó nchàa-ndo, chi cùñaha-í xii cue espíritú xínú cuèchi núú Yã Ndiõxí sá ñà túú ndècu ndìhi ñaha-í xii-ndo.

¹⁰ Te ndèdani càa ñáyiú na càháⁿ cuèhé cuendá yùhú Téé cùu ñaní tnàhá-ndó nchàa-ndo, te cada càhnu iní ñahá Yã Ndiõxí xií-yu. Dico ñáyiú na càháⁿ cuèhé cuendá Espíritú Yã Ndiõxí, te ñáyiú-án vã càdá càhnu iní ñahá-gã xií-yu.

¹¹ Te òré ná càndeca ñaha-güedé xii-ndo quihíⁿ veñúhu, àdi núú cuè téé cùchiuⁿ, te ni vã cání iní-ndó nũu nása cunduú tnúhu cùñaha-ndo xii-güedé, te ni vã cání iní-ndó nũu ná tnúhu nadànchocáva-ndo nũu ná tnúhu na cùñaha-güedé xii-ndo,

¹² chi òré-nã te mee Espíritú Yã Ndiõxí dacàhu iní ñahá-xí xii-ndo tnúhu cùñaha-ndo xii-güedé —càchí-gá xáhaⁿ-gã xii-güedé.

Cuendá ñⁿ téé cuica

¹³ Te ñⁿ téé ñùhu tnàhá tnuú ñáyiú-án ñí xáhaⁿ-dè xii Jèsús:

—Mèstrú, cùñaha xii ñaní-í sá ná chidava-dé sá ñí dándõ tãtã-ndí cuu cuendá-ndí —càchí-dé xáhaⁿ-dè xii-gã.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n? Te ñá díú chiúⁿ-án vèxi-í cada-í, chi ñá díú tèe cùchiuⁿ cuu-í —càchí-gá xáhaⁿ-gã xii-dé.

¹⁵ Te xáhaⁿ-gã xii nchaa ñáyiú xíndecu-án:

—Nchaa nchòhó ñáyiú ndèdóho nchaa tnúhu càháⁿ-í ío váha cada cuendá-ndó, te vã cání iní-ndó nãndi nducu-ndo cùndecu ndìhi-ndo, chi cuèi vãi vihi na ñihí-ndó cùndecu ndìhi-ndo, dico vá chíndèe ñaha-xi cudíi-ndo cùndecu-ndo ñuyúú-a —càchí-gá xáhaⁿ-gã xií-yu.

¹⁶ Te dàtnùní ní ngúita-gá cání-gã ñⁿ cuendú núu-yu cuendá tecú tnùní-yu tnúhu-gá, te xáhaⁿ-gã:

—Ñⁿ téé cuica sùúní ñí cuu nchaa tatá ní xitu-dé núú ñùhú-dè.

¹⁷ Te ní ngúita-dé sání iní-dé: “¿Te nása cada-í? Te ñá túú ndèé nataxúha-í nchaa sá ní xitu-í”, duha ní sani iní-dé.

¹⁸ Te dàtnùní ní sáha váha tucu-dé cuendá nàcuáa cada-dé, te ní cachí-dé: “Duha na cunduú, dangòyo-í yacá-í, te ndada càhnu-gá-í, te xití-xi nataxúha-í nchaandi túhú sá ñí xitu-í, ndìhi nchaa dava-gá sá ndécú ndìhi-í.

¹⁹ Te sáta dúcáⁿ, te cachí-í: Ío vãi sá ndécú ndìhi-í, te cudíi-xi cuèhé cuíá, te vitna nde-tatú-í, te coho-í te caxi-í cada-í, te nãndi-gã

cada-í cuendá cudíí iní-í cundecu-í, duha quesaha-í”, cächí-dé.

20 Dico Yá Ndiöxí ní xáhaⁿ-gã xii-dé: “Yòhó, ñá túú nándíhi sá sání iní-n, chi yúhú cächí-í sá niú vitna cuú-n, te nchaa sá ndécú ndíhi-n ¿yoo cuu sá vâha xii-aⁿ-i?”, cächí-gá xáhaⁿ-gã xii-dé.

21 Duha yâha nchaa ñáyiú nándi sâni iní-xi cundecu ndíhi-xi ñuyú-a, dico ñáyiú-áⁿ ïo ndâhú-yu chi ñá túú ñâ nduu táhú-yu núú Yá Ndiöxí cundecu ndíhi-yu —cächí Jèsús xáhaⁿ-gã xií-yu.

Yá Ndiöxí xító-gã nchaa ñáyiú sândáá iní ñáhá xì-gá

(Mt. 6:25-34)

22 Te ní xáhaⁿ Jèsús xii cue téé xica cuu ndíhi-gá:

—Te na cächí tñúhu-í xii-ndo sã vâ ïo cani iní-ndó ñúu nása cundecu-ndo, àdi nása níhi-ndó sã cáxi-ndó, àdi nása níhi-ndó dõ cuihnu-ndo.

23 Chi cùnuu-gá méé-ndó dàcúúxí sã nchító-ndó, te ducaⁿ yiqui cuñú-ndó cùnuu-gá-xi dàcúúxí dõ sácuihnu-ndo.

24 Te chí cuâha cuendá nâcuáa quide cue tícacá, chi ni ñâ túú chîhi-güedi tata cuu itú natahu-güedi te ni ñâ túú ndèé nútnî yacá-güedi, te nihí-güedi xèxi-güedi, chi Yá Ndiöxí xító ñâha-gá xii-güedi. ¿Te nchòhó cùnù-gá-ndó dàcúúxí nchâa cue quiti ndava!

25 Te cuèi nándi sá sání vîhi iní-ndó ndècu-ndo, dico ñá ndácú-ndó càda-ndo nâcuáa cuehnu-ndo cuèdicó ñⁿ yiqui-gã.

26 Te núu ni sã lúhá xîãⁿ ñâ ndácú-ndó càda-ndo, ¿te ná cuendá ío sâni iní-ndó cuendá nchaa sá cuini-ndó ñíhi-ndó cundecu ndíhi-ndo?

27 Te chí cadá cuendá nâcuáa sâhnu ñⁿ tnu itá, chi ni ñâ túú quide chiuⁿ-xi, te ni ñâ túú quèheⁿ-xi idi. Te na cächí tñúhu-í xii-ndo sã ndí Salòmón ío vii ní cáa nchaa sã ñí xindecu ndíhi ndí, dico vii-gá tucu càa nchaa itá dàcúúxí nchâa sã ñí xindecu ndíhi ndí.

28 Te cùhú sã ïó vitna tnaa-ni cùdí-xi te sâhmí-yu, te cuèi ducaⁿ dico ío vii càdúha Yá Ndiöxí nchaa cùhú-ãⁿ. ¿Te nchòhó ío cùnuu-ndo dàcúúxí nchâa cùhú-ãⁿ, núu xîãⁿ ío xító ñâha-gá xii-ndo, te dicó yica cùu iní-ndó sândáá iní-ndó-gã!

29 Te vâ ïo canchicúⁿ nihnu-ndo sã cóhó sã cáxi-ndó, te ni vâ dândíhú-ndó iní-ndó ñúu nása cada-ndo ñíhi-ndó.

30 Chi nchaa ñáyiú ñá túú sândáá iní ñáhá xì Yá Ndiöxí ducaⁿ mèe-ni sã cóhó sã cáxi-yu xica nchicúⁿ nihnú-yu. Dico mee Tâtá-ó Dütú Ndiöxí sa nâha-gá nándi cùu sá xíní ñúhu-ndo, te taxi-gá.

31 Te cada-ndo nchâa nâcuáa cãháⁿ Yá Ndiöxí Yáá yindâha ñâha xii-ndo, te ducaⁿ te taxi-gá nchaa sã xíní ñúhu-ndo.

Cuendá sã vâha nduu táhú-ó núú Yá Ndiöxí

(Mt. 6:19-21)

32 Te vâ yùhú nchòhó cue téé ndècu ndíhi-í cuèi ío sacú-ndó, chí Tâtá-ó Dütú Ndiöxí ní cachí-gá sã ndúú táhú-ndó cundecu-ndo núú ndécú-gã taxi tñúni-ndó tñâhá-ndó.

33 Te chí dicó nchâa sã ndécú ndíhi-ndo, te chí cuâha nchaa ñáyiú ndâhú díhúⁿ-ndó ñáyiú xìni ñúhu, te cada vâha-ndo cundecu-ndo, te ducaⁿ te nduu táhú-ndó sã ïo-gá vâha núú Yá Ndiöxí cundecu ndíhi-ndo, te xîãⁿ vâ cúú tûhú tñâhí-gá-xi, te ni vâ ndíhi ñihnu-gá-xi, te ni ñâdúhú vâ ndácú-güedë duhu-güedë, te ni tiquidi vâ quèé-dí.

34 Te núu xîãⁿ cúú cuendá-ndó ñá, te ñúu-ni xîãⁿ ñúhú iní-ndó, áⁿ te núu mee-ni sã ndécú ñuyú-a ndècu ndíhi-ndo, te ñúu-ni nchaa xîãⁿ ñúhú iní-ndó.

Xîni ñúhu-xi quíhi iní-ó cundecu-o

35-36 Te ío quíhi iní-ndó cundecu-ndo, te cada-ndo dàtná quidé dàva cue téé xìnu cuechi sacúndecu túha-güedé cuèi nâni òré-áⁿ ndétú-güedë pàtróoⁿ-güedë ná òré nasáá-dé sã cuâháⁿ-dé vico tñândaha. Te núu niú te sa cúú cáyú-ni ñúhú-güedé sã cùndetu ñâha-güedé, chí òré ná nasáá-dé dacâsaⁿ-dé yuyèhe, te ndíhi-ni nâcaáⁿ-güedé ndíhu-dé.

37 Te vâha táhú nchaa cue téé xìnu cuechi-áⁿ, chí ndècu túha-ni-güedé ndétú-güedë ndéé òré ní nasáá pàtróoⁿ-güedë, te na cächí tñúhu ndáá-í xii-ndo sã òré ná nasáá pàtróoⁿ-güedë-áⁿ te chíhi ñâha-dé mèsá xii-güedé, te ndacáⁿ ndee-dé dóó níhú-dë núú yiquí-dë, te ngüíta-dé cani-dé cóhó-güedë cuendá caxi-güedé.

38 Te ñi-ñi ducaⁿ càda-dé cuèi dava niú, àdi tacuíhndá-gá, te núu ñá túú xidí-güedé òré nasáá-dé, te cue téé xinu cuechi-áⁿ ïo váha tnahá-güedé.

39 Te núu dicó ñⁿ téé cùu xitohó ñⁿ vehe xini-dé ná òré quihu ñadúhú vehe-dé ñá, te quihi iní-dé te vá cùdú-dé, te vá dáñá-dé nacaáⁿ-güedé yuyèhe-dé quihu-güedé duhu-güedé.

40 Te nchòhó tucu nchaa-ni nduu quihi iní-ndó cundecu túha-ndo, chi na cuáháⁿ nduu ñá túú yíhi iní-ndó, te quixi tucu yúhú Téé cùu ñaní tnahá-ndó nchaa-ndo — cachí-gá xáhaⁿ-gã xii-güedé.

Cue téé quide ndáá ndíhi cue téé ñá túú quide ndáá

(Mt. 24:45-51)

41 Te té Pèlú ní xicáⁿ tnúhú-dě núú Jèsús, te xáhaⁿ-dě:

—Mèstrú, ¿te tnúhu ní cáháⁿ-n-áⁿ cùu-xi mee-ni cuendá nchúhú áⁿ cuendá nchaa ñáyu? —cachí-dé xáhaⁿ-dě xii-gá.

42 Te Jèsús ní xáhaⁿ-gã:

—Càháⁿ-í cuendá ñáyu quide váha dàtná quidé ñⁿ téé tàxi tnuní ñáhá xii cue ñáyu xinu cuechi ndecu vehe patróóⁿ-xi, chi téé-áⁿ ïo váha tècú tnuní-dé, te quide-dé nchaa nàcuáa càháⁿ patróóⁿ-dě, te dàcaxi-dé cue ñáyu xinu cuechi oré tàú-xi caxí-yu.

43 Te núu ducaⁿ quide váha téé tàxi tnuní ñáhá xii cue ñáyu xinu cuechi-áⁿ ñá, te ío váha tnahá-dé òré násáá patróóⁿ-dě nñu ndéé cuáháⁿ-dě.

44 Te na cachí tnúhu ndáá-í xii-ndo sã tèé quide ndáá táxi tnuní ñáhá xii cue ñáyu xinu cuechi-áⁿ cñaha-nã patróóⁿ-dě xii-dé sá ncháandí túhú-nã sá ndécú ndíhi-dé quindaha-dě.

45 Dico núu téé tàxi tnuní ñáhá xii cue ñáyu xinu cuechi-áⁿ ná caní iní-dé sá cùyàa patróóⁿ-dě vá násáá ndíhi-ni-dé ñá, te ngüíta-dé caní-dé nchaa ñáyu xinu cuechi, cuèi téé cuèi ñadíhi, te ngüíta-dé caxi-dé coho-dé, te dàxini-dé méé-dě,

46 te nduu ñá túú yíhi iní-dé te nasáá patróóⁿ-dě, te dandòho ñaha patróóⁿ-dě-áⁿ xii-dé, te daquíhíⁿ ñáhá-dě xii-dé núú ndécú ñáyu ñá túú ní quide ndáá.

47 Te dava cue téé xinu cuechi xini-güedé nàcuáa cuini patróóⁿ-güedé cada-güedé

te ñá túú quide-güedé, te ni ñá túú cuini-güedé cundecu túha-güedé cundetu-güedé patróóⁿ-güedé, te nchaa cue téé ducaⁿ xiquide dandòho ñaha patróóⁿ-güedé, chi ñáni vèhi-güedé.

48 Te dava cue téé xinu cuechi ñá túú xini-güedé nàcuáa cuini patróóⁿ-güedé cada-güedé, te ní quide-güedé sá neñúú-güedé ñⁿ sá ñá túú tàú-güedé cada-güedé ñá, te cue téé-áⁿ sacú-gá dandòho ñaha patróóⁿ-güedé, chi sacú-gá ñáni-güedé. Te ñáyu cùtnuní iní-xi nàcuáa cuini Yã Ndióxi cadá-yu, te ñi-ñi ducaⁿ tàú-yu cadá-yu nàcuáa cuini-gá. Te ñáyu vèi-gá tècú tnuní nàcuáa càháⁿ-gá, te ñi-ñi ducaⁿ vèi nchaa sá càháⁿ-gá tàú-yu cadá-yu.

Ñá túú cùu ñⁿnuu ñáyu

(Mt. 10:34-36)

49 Te yúhú véxi-í ñuyú-a cuendá cùtnuní iní ñáyu nàcuáa cada ñaha Yã Ndióxi xií-yu, ¿te cuini-í sá ndíhi-ni cada-gá nàcuáa sàni iní-gá!

50 Te yúhú ío vèi tnúhu sàni iní-í, ¿chi sáa nduu te ío ndoho-í, te ñi-ñi xíáⁿ cuhuⁿ iní-í ndéé ná sáa nduu dùcaⁿ yáha-í!

51 Te nchòhó vá caní iní-ndó sã yúhú véxi-í ñuyú-a te cundecu ndíhi tñaha váha-ni ñáyu, te ñáhá chi da ngüíta-yu vá cúú ñⁿnuú-yu cundecú-yu.

52 Te ndéé není vitna ngüíta ñáyu vá cúú ñⁿnuú-yu cundecú-yu, te na càda-o cuendá te núu úhúⁿ ñáyu xindecu ñⁿ-ni vèhe, te vá cúú ñⁿnuu-gá-yu, chi úní-yu ndatnúhu-yu te nàa-yu ndíhi úú-gá-yu, àdi ñáyu úú-áⁿ ndatnúhu-yu te nàa-yu ndíhi ñáyu úní-áⁿ.

53 Te dava cue téé cùu tátá vá cúú ñⁿnuu-gá-güedé ndíhi déhe ducuⁿ-güedé, te ni dáva cue ñáyu cùu náná vá cúú ñⁿnuu-gá-yu ndíhi déhe yòcò-yu, te ni sãnu-yu vá cúú ñⁿnuu ndíhi-gá-yu. Te ducaⁿ cadá-yu chi davá-yu quindáá iní ñáhá-yu xii-í, te davá-yu vá quindáá iní ñáhá-yu — cachí-gá xáhaⁿ-gã xii-güedé.

Ñáyu cùtnuní iní-xi nàcuáa quide-xi ñuyú ndíhi andíu

(Mt. 16:1-4; Mr. 8:11-13)

54 Te Jèsús ní xáhaⁿ-gã xii nchaa ñáyu xindecu-áⁿ:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sã cúúⁿ dǎú, te ðiu ducaⁿ ndísa quide-xi.

⁵⁵ Te òré ná quène táchí ndàa xio datni nacuáa quène nchíanchii, te càchí-ndó sã ïo cada ihni-xi, te ðiu ducaⁿ ndísa quide-xi.

⁵⁶ Te nchòhó ïo váha cùtnuní iní-ndó nàcuáa quide-xi andiu ndihí ñuyíú, ¿te ná cuendá quidé-ní-ndó sã ñã tècú tnùní-ndó nàcuáa quide Yá Ndiöxí vitna? Te sã dúcáⁿ quide-ndo-án ïo dándahú-ndó mèe-ndo sã ïo váha cùtnuní iní-ndó, chi ñã ndàa sã cútnuní iní-ndó.

Nducu-o nàcuáa nucúndecu ndihí váha-o ñáyiú cùu úhú iní ñáhá

(Mt. 5:25-26)

⁵⁷ Te nchòhó, ¿ná cuendá ñã túú dándixi túu-ndo iní-ndó càda-ndo mee-ni sã váha sã tàú-ndó càda-ndo-i?

⁵⁸ Te núu ïó ïⁿ-ndo ñí sacáⁿ cuéchi ñáyiú cuendá-ndó cuendá ïⁿ sã ñí quide-ndo, te cuáháⁿ-ndó ndihí-yu núú tée cùchiuⁿ, te ñini ñuhu-ndo ndihí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndihí-yu cuendá sã vã cándèca ñaha-gá-yu quíhíⁿ núú tée cùchiuⁿ, chi núu ducaⁿ na càdá-yu te tée cùchiuⁿ-án nachihi ñaha-dě ndaha cue tée cùu poleciá, te cue tée-án chihi ñaha-güedě vecaá xii-ndo.

⁵⁹ Te na càchí tnúhu-í xii-ndo sã ñuu na ngáva-ndo vecaá, te vá cǎcu-ndo te núu vá nácháhu-ndo nchàa sã tàú-ndó —càchí-gá xáhaⁿ-gã xií-yu.

13

Xini ñuhu-xi natuha-o ichi Yá Ndiöxí

¹ Te ðiu-ni òré-án ñí ngúnutnii ïⁿ úú ñáyiú núú Jèsús cáni-yu cuendú núú-gã nàcuáa ní quide ñaha té Pilatú xii cue tée distritú Galileá cue tée ní sahní quiti nduu táhú Yá Ndiöxí, te mei òré ní sahní-güedé cue quití-án ñí táuchíúⁿ tẽ Pilatú cue sandádú-dé ní sahní-güedé cue tée Galileá-án, te ní xica níñí-güedé núú ñuhú ndihí níñí cue quití-án, te ní nadácánuu-xi.

² Te Jèsús ní xáhaⁿ-gã xií-yu:

—Te núu nchòhó sání iní-ndó sã sã dúcáⁿ ñí yáha cue tée distritú Galileá-án te cùu-güedé cue tée ndècu vihi-gá cuéchi-xi dácúúxí cuè tée ñuu-güedé ñã.

³ Te na càchí tnúhu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sã cuéhé sã dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiöxí.

⁴ Te núu nchòhó sání iní-ndó sã ñáyiú sáhúⁿ úní ní xihí ní táú ñáhá vèhe ducúⁿ Silòé ïo-gá ndécú cuéchi-yu dácúúxí nchàa ñáyiú xíndecu ñuu Jerusàlén ñã,

⁵ te na càchí tnúhu tucu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sã cuéhé sã dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiöxí —càchí-gá xáhaⁿ-gã xií-yu.

Yutnu ngüxí ñã túú cùuⁿ sávidí-xi

⁶ Te Jèsús ní caní tucu-gá ïⁿ cuendú núu-yu nàcuáa tecú tnùní-yu tnúhu-gá, te xáhaⁿ-gã:

—Ïⁿ tée nùtnii ïⁿ yutnu ngüxí núú ñuhú-dě, te cuáháⁿ ndéhé-dě núu ní cuuⁿ sávidí-xi ni cùu, te ñí ïⁿ ñã túú ní cùuⁿ.

⁷ Te ní xáhaⁿ tée-án xii tée ndèé ñuhu-dé; “Nàha-n sã vitna ní cuu úní cuíá quíxí còto-í yutnu ngüxí-a te ñã túú xini-í ni ïⁿ sávidí-xi. Te quehdé-n vitna, chi àúⁿ ñã cuu nùtnii-xi quide tneñu-xi núú ñuhu-án”, càchí-dé xáhaⁿ-dě xii tée ndèé ñuhu-dé-án.

⁸ Te tée ndèé ñuhu-án ñí xáhaⁿ-dè: “Pàtróóⁿ, dañá na cuñhu-xi cuíá vitna-ná, te na nàdatayá-í ñuhu núú sáhá-xi, te chihi-í saháⁿ.

⁹ Te ducaⁿ te cudana cuuⁿ sávidí-xi, àdi núu ñã túú ní cùuⁿ sávidí-xi ñã te téhdé-ná-xi”, càchí-dé xáhaⁿ-dè xii pàtróóⁿ-dè —càchí-gá xáhaⁿ-gã xií-yu.

Jèsús quidé tãtna-gá ïⁿ ñadhí ní nduu cueyi sãtá-xi nduu ndètatú ñáyiú

¹⁰ Te ïⁿ xito cùu-xi nduu ndetatú ñáyiú, te yihí Jèsús ïⁿ veñúhu dānehé-gá ñáyiú.

¹¹ Te xíáⁿ ndécú ïⁿ ñadhí ní cuu sáhúⁿ úní cuíá sã cùhú-aⁿ yihí ñaha espíritú cùndihí yucu ñávãha xii-aⁿ, te xíáⁿ ní ndada cueyi-xi sãtá-aⁿ, te ñã dáñá-gã-xi nucúnutnii ndáá-aⁿ.

¹² Te òré ní xini ñáhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuéhé tnáhá-n —càchí-gá xáhaⁿ-gã xii-aⁿ.

13 Te ní dácàá-gá ndaha-gá ní tendaha ñàha-gá xii-aⁿ, te òré-ni-áⁿ nǐ ndúha-aⁿ te ní nucúnutnǐ ndáá-aⁿ, te ní ngüíta-aⁿ ní cachí-aⁿ sá ïo càhnu cuu Yá Ndiöxí.

14 Dico tée taxi tñuní veñúhu ní cudééⁿ-dē sá dúcáⁿ nǐ quide Jèsús ní quide tátna-gá ñaha cùhú-áⁿ nduu ndètatú-yu, te ní xáhaⁿ-dē xií-yu:

— Ìó ìnú nduu tàú-ó càda chiuⁿ-o, te ndédani càa nduu-áⁿ quixi-ndo cùtátna-ndo, dico ñá díú nduu cuu-xi nduu ndetátú-ó —càchí-dé xáhaⁿ-dē xií-yu.

15 Te ní xáhaⁿ Jèsús:

— Nchòhó chí ïo dándahú-ndó mēe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó áⁿ?

16 Te ñadihí-a cùu-aⁿ ñaní tnáhá ndǐ Abrahám, te dicó-ni sá yùcu ñávãha quide duha cùhú-aⁿ ní cuu sáhúⁿ úní cuiá, ¿te náa ñá túú xìni ñuhu-xi cutátna-aⁿ cuèi cùu-xi nduu ndetátú-ó áⁿ? —càchí-gá xáhaⁿ-gã xii-dé.

17 Te sá dúcáⁿ nǐ cáháⁿ Jèsús, núu nchaa cue tée cùu úhú iní ñáhá xì-gá ní cucahaⁿ núu-güedē, dico nchaa dava-gá ñáyiu chí xǐcudí iní-yu xǐndéhē-yu nchaa sá vã yõ tñahí ndàcu cada quide-gá.

Cuèndá ndíquíⁿ yutnu nàni mostázá
(Mt. 13:31-32; Mr. 4:30-32)

18 Te ní xáhaⁿ-gã xií-yu:

— Na càni-í ìⁿ cuèndú núu-ndó nàcuáa tecú tñuní-ndó nàcuáa cada-xi òré ndihu ndaha ñaha Yá Ndiöxí xii-ndo.

19 Ìⁿ tée ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dé te ní xínu-xi, te ní sahnu-xi ní cuu dùcúⁿ-xi, te cue quití ndàva núú tàchí cádùha-güedi tacá-güedi núú dìté-xi —càchí-gá xáhaⁿ-gã xií-yu.

Nàcuáa quide levadurá
(Mt. 13:33)

20 Te ní xáhaⁿ tùcu Jèsús xií-yu:

— Te na càchí tñuhu tucu-í xii-ndo nàcuáa cada tucu Yá Ndiöxí òré ndihu ndaha ñàha-gá xii-ndo.

21 Ìⁿ ñadihí ní queheⁿ-aⁿ levadurá ní chihi-aⁿ úní arròbá yuchi triú, te levadurá-áⁿ nǐ quide-xi ní ndaa nihí yusaⁿ-áⁿ —càchí-gá xáhaⁿ-gã xií-yu.

Yuyèhe cuiñi
(Mt. 7:13-14, 21-23)

22 Te ichi ñuhu Jèsús cuáháⁿ-gá ñúú Jerusàlén, te nchaa ñúú náhnú, ndíhi nchaa ñúú líhli ta yãha-gá ducaⁿ ta dānehé-gá ñáyiu tñuhu-gá cuáháⁿ.

23 Te ìⁿ ñúú-áⁿ nǐ xáhaⁿ ìⁿ tée xii-gá:

— Mèstrú, cuiní-í cácáⁿ tñuhu-í ìⁿ tñuhu núú-n, ¿ndáá sá ïo sacú ñáyiu nànihí tàhú-áⁿ? —càchí-dé xáhaⁿ-dē xii-gá.

Te Jèsús ní xáhaⁿ-gã xii-dé ndíhi nchaa ñáyiu:

24 — Cada-ndo sã nànihí tàhú-ndó, te tñi-ndo ichi Yá Ndiöxí, te ichi-gá-áⁿ cúu-xí dàtná ìⁿ yuyèhe cuiñi, te càchí tñuhu-í xii-ndo sã ïo cuéhé ñáyiu cachí iní-yu quíhu-yu yuyèhe cuiñi-áⁿ dico vá ndácü-yu.

25 Te na càni tucu-í ìngá cuèndú núu-ndó nàcuáa tecú tñuní-ndó tñuhu càháⁿ-í. Te òré ná ndàcuíñi tée cùu xítóhó vehe, te nacadí-dé yuyèhe, te nchaa nchòhó ñáyiu na quèndóo quehé dacásaⁿ-ndo yuyehe, te quesaha-ndo cùñaha-ndo xii-dé: “Tátá, nacaáⁿ yuyèhe na quíhu-ndí”, quesaha-ndo cùñaha-ndo xì-dé. Dico tée cùu xítóhó vehe-áⁿ cùñaha-dē xii-ndo: “Ná túú xìní-í nchòhó ndèe ñáyiu cùu-ndo”, duha cùñaha-dē xii-ndo.

26 Te dàtnuní ngüíta nchòhó cùñaha-ndo xì-dé: “Nchúhú ní xexi ndíhi ñaha-ndí, te ní xíhi ndíhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cùñaha-ndo xì-dé.

27 Dico cachí tucu tée cùu xítóhó vehe-áⁿ cùñaha-dē xii-ndo: “Sa ní cachí-í sá ñà túú xìní-í ndèe ñáyiu cùu-ndo. Te chí xócuíñi nchòhó ñáyiu ndècu ichi cuehé ichi duha núú ndècu-í”, quesaha-dē cùñaha-dē xii-ndo.

28 Te na sàá nduu dùcaⁿ cada-xi te quiní-ndó tē Abrahám, ndíhi té Isàác, ndíhi té Jàcób, ndíhi nchaa cue tée ní xóo cáháⁿ tñuhu Yá Ndiöxí, te nchaa cue tée-áⁿ ndécú-güedē núú ndécú-gã táxí tñuní-gá, te nchòhó quee tíhú-ndó núu-gã sá tñuhu ñá túú ní cuiní cada ndáá, te dàvá-áⁿ ndáhyú-ndó te cuu rúhñú-nã núhu-ndo sã sàtú iní-ndó cuèndá sá ndóhó-ndó.

29 Te dàvá-áⁿ quíhu nchaa ñáyiu ndí cùmí xio ñuyú núú ndécú Yá Ndiöxí táxí

tnùní-gá caxí-yu ndihí-gá, te cundecú-yu ndihí-gá.

³⁰ Te dava ñáiyu nchícúⁿ ñá túú cùnūu ndecu ichi Yá Ndiöxí vitna, ñáiyu-áⁿ sáá nduu te ío cunúú-yu. Te dava ñáiyu cùnūu ndecu ichi-gá vitna, ñáiyu-áⁿ sáá nduu te vá ïo-gá cunúú-yu —càchí-gá xáhaⁿ-gã xií-yu.

Jèsús ndàhyú-gá cuèndá ñáiyu ñūú Jerusàlén

(Mt. 23:37-39)

³¹ Te ñūu-ni nduu-ãⁿ ñí quexìo ñⁿ úú cue téé cùu fariséú núú ndécú-gã, te xáhaⁿ-güedé xii-gá:

—Quee-n ìha quíhíⁿ-n ñūu ndéé quíhíⁿ-n, chí téé cùu Herodés cuìní-dé cahni ñaha-dé xii-n —càchí-güedé xáhaⁿ-güedé xii-gá.

³² Te Jèsús ní xáhaⁿ-gã:

—Chí cuàháⁿ te cúñaha-ndo xìi téé nèhe mañá-áⁿ sã càchí-í sá ná cùndedóho váha-dé ñⁿ tnúhu càháⁿ-í, chí cùmání ñⁿ úú-gá nduu cundecu-í xocàni-í nchaa espíritú cùndihí yucu ñávaha yíhi ñaha xii ñáiyu, te cada tátna-í nchaa dava-gá ñáiyu cùhú, te ducaⁿ te ndihí chiùⁿ-í, duha cúñaha-ndo xìi-dé.

³³ Dico dacuítí sã cúhúⁿ-í ichi ñⁿ úú-gá nduu, te ducaⁿ te sáá-í núú quíhíⁿ-í, chí vá cúú tnàhí cuú ñⁿ téé càháⁿ tnúhu Yá Ndiöxí ñngá ñūú, chí mei ñūú Jerusàlén cuú-güedé —càchí-gá xáhaⁿ-gã xii-güedé.

³⁴ Te ní xáhaⁿ-gã xii ñáiyu ñūú Jerusàlén:

—Nchòhó chí sàhni-ndo nchaa cue téé càháⁿ tnúhu Yá Ndiöxí, cue téé ní tendaha-gã véxi, te mee-ni ndihí yúú sáhní-ndó-güedé. ¡Te títí xito ní cuíni-í nadatácá ñáhà-í xii-ndo dàtná nádatacá ñⁿ nchuxi cuè déhe-di sàquihí-güedé xití ndíxíⁿ-di, dico ñá ní cuìní-ndó, te ducaⁿ-ni sàni iní-í ndéé vitna!

³⁵ Te chí cùndedóho tucu ñngá tnúhu na càháⁿ-í-a: Yá Ndiöxí dañá ñaha-gá xii-ndo. Te na càchí tnúhu tucu-í xii-ndo sã vã quíni ñáhá-gã-ndó xìi-í, dico sáá nduu te quíni ñáhá tucu-ndo, te nduu-ãⁿ cachí-ndó sã ïo càhnu cuu yúhú Yaá ní tendaha Dütú Ndiöxí véxi ñuyú-a —càchí-gá xáhaⁿ-gã xií-yu.

14

Jèsús quidé tātna-gá ñⁿ téé ñūhu cuiñu

¹ Te duha ní cuu ñⁿ nduu, nduu ndètátú ñáiyu chí ñⁿ téé cùu fariséú cùnūu ní

cáháⁿ-dé Jèsús vehe-dé caxi-gá, te cue téé ndècu vehe-dé ndéhé-güedé ñūu nása cada-gá.

² Te xíáⁿ ndécú tnàhá ñⁿ téé cùhú ñūhú-dé cuiñu.

³ Te Jèsús ní xíáⁿ tnúhú-gã núú cuè téé dàcuaha ñaha xii ñáiyu nchaa tnúhu ní chídó tnùní ndíi Moisés, ndihí núú cuè téé cùu fariséú, te xáhaⁿ-gã:

—¿Cuu cada tátna-o ñⁿ ñáiyu cùhú nduu ndètátú-ó ñⁿ ñáhá? —càchí-gá xáhaⁿ-gã xii-güedé.

⁴ Dico cue téé-áⁿ ñà túú tnàhí ní càháⁿ-güedé. Te ní dácáá-gá ndaha-gá ní tendaha-gã téé cùhú-áⁿ ñí quide tátna ñaha-gã xii-dé, te ní xáhaⁿ-gã sá ná ñūhú-dé vehe-dé.

⁵ Te ní xíáⁿ tnúhú-gã núú nchaa cue téé-áⁿ, te xáhaⁿ-gã:

—¿Te núu nchòhó ná ngáúñhnu ñⁿ búrru-ndo àdi ñⁿ ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndètátú-ndó-ãⁿ? —càchí-gá xáhaⁿ-gã xii-güedé.

⁶ Te ñá túú ní ñíhí-güedé tnúhu na dànhocáva-güedé.

Ñáiyu càháⁿ-yu quíhíⁿ vico tnándaha

⁷ Te ndèhe Jesús nàcuáa xíquide nchaa ñáiyu ndècu vico sá sūúni ñí nacáxi-yu xilé sácóo nchihi cue téé cùnūu-gá conchihí-yu òré cuánguñhú-yu mèsá caxí-yu, núu ní xáhaⁿ-gã xií-yu:

⁸ —Òré ná càháⁿ ñáhá ñⁿ ñáiyu xii-ndo ñⁿ vico tnándaha, te vá cóo-ndó núú xilé sácóo cue téé cùnūu-gá, chí núu ducaⁿ na càda-ndo, te cudana quexìo dava-gá ñáiyu cùnūu-gá dàcúxí nchòhó.

⁹ Te ñáiyu ní càháⁿ ñáhá xìi-ndo-áⁿ quixí-yu te cúñahá-yu xii-ndo: “Chí cuñaha xilé núcóo nchihi-ndo-ãⁿ ná còchihí ñáiyu ní quexìo-a”, quesàhá-yu cúñahá-yu xii-ndo. Te cuìní-ndó ñáhá cuèi cùcahaⁿ núú-ndó ndàcúñí-ndó quíhíⁿ-ndó ngóo-ndo núú xilé xínutñí ndéé núú ñí ndihí-ná ndàa sátá-xi.

¹⁰ Te yúhú càchí-í sá òré ná càháⁿ ñáhá-yu xii-ndo, te ngóo-ndo núú xilé xínutñí ndéé núú ñí ndihí-ná ndàa sátá-xi chí cuèndá òré ná quexìo ñáiyu ní càháⁿ ñáhá xìi-ndo, te cúñahá-yu xii-ndo: “Nchòhó cue ñáiyu

càháⁿ ndihí-í, chí yáha núú xilé sácõo cue tée cùnuu-gá coo-ndo”, duha cùñhá-yu xii-ndo. Te ducaⁿ te cada nínu ñaha nchàa ñáiyu yíhi ndihí-ndo mesá.

11 Te nchaa ñáiyu na càda nínu mee-xi, te ñáiyu-áⁿ ñà túú cùu nínu-yu, te nchaa ñáiyu ñá túú quide nínu mee-xi, ñáiyu-áⁿ cúu nínu-yu —càchí-gá xáhaⁿ-gã xií-yu.

12 Te dàtnùní ní xáhaⁿ-gã xii tée ní cáháⁿ ñáhá xii-gá:

—Te yòhó òré cùníní-n càda-n ìⁿ vico, te vá càháⁿ-n mée-ni cue tée càháⁿ ndihí-n, ni cuè ñaní-n, ni cuè ñáiyu cùu ñaní tnáhá-n, ni cuè ñáiyu cuica ndècu yatni ndihí-n, chí ñáiyu-áⁿ ducaⁿ càdá-yu ìⁿ nduu cáháⁿ ñáhá-yu xii-n te ndéyáhu-ni sá ñi quidé-n-yu.

13 Te ñáhá chí òré ná càda-n ìⁿ vico, te cáháⁿ-n ñáiyu ndàhú, ndihí ñáiyu ñá cúú càca, ndihí ñáiyu yacua, ndihí ñáiyu cuáá.

14 Te núu ducaⁿ na càda-n, te cuu-xi ìⁿ sá vâha xii-n, chí ñáiyu-áⁿ vâ ñihí-yu nacoto ñáhá-yu xii-n, dico na cùu-n te sáá nduu ndòto-n ndihí nchaa ñáiyu ní quide ndáá ní xíndecu ichi Yá Ndiõxí, te dàvâ-áⁿ taxi-gá sá ndúú tàhú-n —càchí-gá xáhaⁿ-gã xii-dé.

Nàcuáa xíquide ñáiyu òré càháⁿ ñáhá ìⁿ tée cada vico

(Mt. 22:1-10)

15 Te sá dúcáⁿ ñi cáháⁿ Jèsús ní tecú dóho cue tée yíhi mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáiyu na càxi nchaa sá cuáha ñaha Yá Ndiõxí nduu na sàá-yu cundecú-yu núu ndécú-gã táxi tnùní-gá —càchí-dé xáhaⁿ-dë xii-gá.

16 Te Jèsús ní xáhaⁿ-gã xii-dé:

—Íⁿ tée quide-dé vico, te ní dátècú tnúhu-dé cuéhé víhí ñáiyu quíhíⁿ-yu caxí-yu.

17 Te òré sa ní cuu-ná sá cáxi-yu, te ní xáhaⁿ-dë xii tée xìnu cuechi núú-dë sá quíhíⁿ-dë cùñhá-dë quíhíⁿ-yu caxí-yu, chí sa ndècu túha nchaa sá cáxi-yu.

18 Dico ncháá-yu ní xáháⁿ-yu xii-dé sá ná cádá càhnu iní tée càháⁿ ñáhá-áⁿ, chí ñá túú cùyáchí-yu quíhíⁿ-yu vico-áⁿ. Te tée ní cáháⁿ ndihí tée xìnu cuechi-áⁿ ñáhá ní xáhaⁿ-dë: “Íchí ñi saaⁿ-í ìⁿ pedàsú ñuhu,

te quíhíⁿ ndéhè-í tnaví, núu xíãⁿ càháⁿ ndàhú-í núú-n sã cùñháha-n xii tée càháⁿ ñáhá-áⁿ xii-í sá ná cádá càhnu iní-dé chí ñá túú cùyáchí-í”, càchí-dé xáhaⁿ-dë.

19 Te ingá-dé ní xáhaⁿ-dë: “Ní saaⁿ-í úhúⁿ yùndá ndicutu sa xìtu, te cue quití-áⁿ quíhíⁿ-í coto ndeé-í-güedi vitna, núu xíãⁿ càháⁿ ndàhú-í núú-n sã cùñháha-n xii tée càháⁿ ñáhá-áⁿ xii-í sá ná cádá càhnu iní-dé chí ñá túú cùyáchí-í”, càchí-dé xáhaⁿ-dë.

20 Te ingá tucu-dé ní xáhaⁿ-dë: “Íchí ñi tnándaha-í ñúu xíãⁿ vá cùyáchí-í quíhíⁿ-í”, càchí-dé xáhaⁿ-dë.

21 Te òré ní nasáá tée xìnu cuechi-áⁿ, te ní nacani tnúhu-dé núú pàtróóⁿ-dë nchaa nàcuáa ní xáháⁿ-yu. Te ní cudééⁿ tée cùu patróóⁿ-áⁿ, te ní xáhaⁿ-dë xii tée xìnu cuechi núú-dë-áⁿ: “Yáchí cuáháⁿ nanducu-n nchaa ñáiyu ndàhú, ndihí nchaa ñáiyu ñá cúú càca, ndihí nchaa ñáiyu yacua, ndihí nchaa ñáiyu cuáá, te ndèni ní cuu na nàníhí-n-yu te candecá-n-yu quixí”, càchí-dé xáhaⁿ-dë.

22 Te sátá ñi nasáá tée xìnu cuechi-áⁿ, te ní xáhaⁿ-dë xii pàtróóⁿ-dë: “Pàtróóⁿ, sa ní quide-í chiuⁿ ní táhú-n, dico ndècu-gá núú cóo-yu”, càchí-dé xáhaⁿ-dë.

23 Te tée cùu patróóⁿ-dë-áⁿ ñi xáhaⁿ-dë: “Cuáháⁿ tucu ndèni ní cuu te cada yica-n na quixí-yu quíhu-yu cuendá ná chítú vehe-í.

24 Te na càchí tnúhu-í xii-n sã ñi ìⁿ ñáiyu ní cáháⁿ-í ñáhá vá cúú-gã caxí-yu sá sã ní quide túha-í caxí-yu ni cùu”, cachí tée-áⁿ xáhaⁿ-dë xii tée xìnu cuechi núú-dë —càchí-gá xáhaⁿ-gã xii tée-áⁿ.

Ndoho-o cùndecu-o ichi Xítohó Jesucristú
(Mt. 10:37-38)

25 Te ío cuéhé ñáiyu nchicúⁿ-yu Jèsús, te ní xáhaⁿ-gã xií-yu:

26 —Te núu dava nchòhó cùníní-ndó chìtnahá ñáhá-ndó xì-í, te cuu iní ñáhá ndìsa-ndo. Te cuèi na dàndóo-ndo tãtá-ndó, ndihí náná-ndó, ndihí ñadihí-ndó, ndihí déhe-ndo, ndihí ñaní-ndó, ndihí cúha-ndo, te caní iní-ndó sã cuèi na cùú-ndó sã cuendá-í, te ducaⁿ te cuu ndisa-ndo cuè ñáiyu tnáhá tnúhu ndihí-í.

27 Te nchaa ñáiyu vá cànchícúⁿ nihnu ñaha xii-í cuendá sã yùhú-yu ndohó-yu dàtná ndoho-í, ñáiyu-áⁿ vâ cúú-yu ñáiyu tnahá tnúhu ndihí-í.

28 Te núu ñⁿ nchòhó ná càni iní-ndó dàcaa-ndo ñⁿ vehe ducúⁿ, ¿te náa ñá díú dǐhna-gá cada cuendá-ndó núu ndédau díhúⁿ cuu, ducaⁿ te cutnùní iní-ndó núu tnahá díhúⁿ-ndó càa vehe-áⁿ àdi ñáhá?

29 Chi núu vá dúcáⁿ càda-ndo, te na ngüita-ndo tàusaha-ndo te vá xǐnu cada-ndo, te nchaa ñáyiú na cùndehe ñaha xii-ndo, te cáháⁿ cuéhé-yu cuendá-ndó.

30 Te cachí-yu: “Tée-áⁿ ní ngüita-dé dácàa-dé ñⁿ vehe te ñá ní ndàcu-dé xǐnu”, cachí-yu.

31 Àdi te núu ñⁿ tée yǐndaha ñaha xii ñáyiú cuìní-dé nàá-dé ndihí-íngá tucu tée yǐndaha ñaha xii ñáyiú, ¿te náa ñá díú dǐhna-gá cada cuendá-dé te núu ndacu-dé ndihí-íxí mǐl cue sandàdú-dé nàá-güedé, ndihí-íóó mǐl cue sandàdú-íngá tucu tée yǐndaha ñaha xii ñáyiú cùu úhú iní tnahá ndihí-dé-áⁿ?

32 Àdi te núu xito-dé sá vǎ ndácú-dé ñá, te òré vátá cùyàtni ñaha-gá tée cùu úhú iní tnahá ndihí-dé-áⁿ, te tendaha-dé ñⁿ tée quíhíⁿ-dé quíhu-dé tnúhu ndàhú núu tǎe-áⁿ cuendá sá vǎ nàá-güedé.

33 Te duha càháⁿ-í chi núu nchòhó vá càdá ndèe iní-ndó dàña-ndo nchaa sá ndécú ndihí-ndo cuendá chitnahá ñáhá-ndó xii-í, te vá cúu-ndó cuè ñáyiú tnahá tnúhu ndihí-í.

*Ñí ñí nduu víxiⁿ
(Mt. 5:13; Mr. 9:50)*

34 “Te ñí chi ío váha, dico núu na ndùu víxiⁿ-xi, ¿te nása-gá cada-o nàndíhi-o te núu ducaⁿ-í?”

35 Chi ñá túú-gǎ nándíhi-xi nì sá dàcá ñuhu, te nì sá dàcá saháⁿ, chi cuendá-nǎ dǎngoyo-o. Te nchaa nchòhó ñáyiú ní xíndedóho tnúhu ní cáháⁿ-í-a xini ñuhu-xi ío váha cuáha-ndo cuendá —càchí-gá xáhaⁿ-gǎ xii-yu.

15

*Cuendá ñⁿ mběé quití ní xíta
(Mt. 18:10-14)*

1 Te cue tée cuihna iní-xi quide cobrá ñáhá xii ñáyiú cuendá impuèstú ndihí cue dava-gá ñáyiú ndècu ichi cuehé ichi duha ní quexió-yu núu ndécú Jèsús cuendá cundedóho-yu tnúhu càháⁿ-gá.

2 Te ní ngüita cue tée cùu fariséú, ndihí cue tée dàcuaha ñaha xii ñáyiú nchaa

tnúhu ní chídó tnùní ndí Moisés xǐcáháⁿ cuéhé-güedé cuendá-gá, te càchí-güedé:

—Tée-a quèheⁿ cuendá-dé ñáyiú ndècu ichi cuehé ichi duha, te xèxi ndihí ñaha-dé xii-yu —càchí-güedé xǐtnàha-güedé.

3 Te Jèsús ní cani-gá ñⁿ cuendú nàcuáa tecú tnùní-güedé tnúhu-gá, te xáhaⁿ-gǎ xii-güedé:

4 —Ñⁿ tée ndècu ñⁿ ciendú mběé-dě, te ní xíta ñⁿ-di, te nchòhó sa cùtnuní iní-ndó nàcuáa cada tée-áⁿ, chi dándóo-dé cùmídícó sǎhúⁿ cùmí-di ñⁿ yucu, te cúnúndúcú-dě quití ní xíta xǐáⁿ ndèe ndée naníhí-dě-di.

5 Te òré ní naníhí-dě-di te ní dácáá-dě-di chíó-dě ní docó-dé-di sá cùdǐ iní-dé.

6 Te òré ní nasáá-dé vehe-dé, te ní dátàcá-dé nchaa cue tée càháⁿ ndihí-dé, ndihí nchaa ñáyiú ndècu yatni ndihí-dé, te ní xáhaⁿ-dě: “Chí ná cùdǐ iní-ó vitna, chi ní naníhí-í mběe-í quití ní xíta ní cùu”, cachí-dé xáhaⁿ-dě xii-yu.

7 Te yúhú càchí-í sá ío-gá cùdǐ iní Yǎ Ndiòxí ndihí cue espíritú xínú cuèchi núu-gǎ núu ñⁿ ñáyiú ndècu ichi cuehé ichi duha na ndixi cuèchi iní-yu cuendá nchaa sá ñá túú vǎha quidé-yu ndécú-yu te tñí-yu ichi-gá, dàcúúxí cùmídícó sǎhúⁿ cùmí ñáyiú sa ní tuha ichi-gá, chi ñá túú-gǎ xini ñuhu-xi ndixi cuèchi iní-yu chi sa ndécú-yu ichi-gá —càchí-gá xáhaⁿ-gǎ xii-güedé.

Cuendá díhúⁿ ní xíta

8 Te ní cani Jèsús-íngá cuendú núu-güedé, te xáhaⁿ-gǎ:

—Ñⁿ ñadíhí ndécú ndihí-aⁿ úxí díhúⁿ cuixíⁿ, te ní dácúita-aⁿ ñⁿ te ní teñuhú-aⁿ iti, te ní ngüita-aⁿ nàtihu-aⁿ vehe, te súúní vǎha vǎha ní nanducu-aⁿ ndée ní naníhí-aⁿ.

9 Te òré ní naníhí-aⁿ, te ní dátàcá-aⁿ nchaa ñáyiú díhí càháⁿ ndihí-aⁿ ndihí nchaa ñáyiú ndècu yatni ndihí-aⁿ, te ní xáhaⁿ-aⁿ: “Chí ná cùdǐ iní-ó vitna chi ní naníhí-í díhúⁿ-í sá ní xíta ní cùu”, cachí-aⁿ xáhaⁿ-aⁿ xii-yu.

10 Te yúhú càchí-í sá dúcáⁿ ío cùdǐ iní nchaa espíritú xínú cuèchi núu Yǎ Ndiòxí, núu ñⁿ ñáyiú ndècu ichi cuehé ichi duha na ndixi cuèchi iní-yu cuendá nchaa sá ñá túú vǎha quidé-yu, te tñí-yu ichi-gá —càchí-gá xáhaⁿ-gǎ xii-güedé.

Cuendá ñⁿ tée ñá túú ní quide váha

11 Te ní cani tucu Jèsús ingá cuèndú núú-güedě, te xáhaⁿ-gã:

—Hⁿ tée ndècu úú déhe ducuⁿ-dé,

12 te tée lĩhli-gá ní xáhaⁿ-dě xii tãtã-dě: “Táu, taxi-n tãhú sã cúú cuèndã-í”, cãchí-dé xãhaⁿ-dě. Te tãtã-dě-áⁿ nĩ sãñaha-dě ndí dĩⁿ núú-güedě sã cúú cuèndã-güedě.

13 Te núú sàcú-ni nduu, te déhe-dé tée lĩhli-gá-áⁿ nĩ nadico-dě nchaa sã nĩ sãñaha tãtã-dě, te ní xica-dé cuáhãⁿ-dé hⁿ ñúú xicã, te yacãⁿ ní tnĩ-dé hⁿ ichi cuèhé ichi duha, te ní ndĩhi díhúⁿ-dě ní dándóñũhu-dé ndĩhi cue tée cãháⁿ ndĩhi-dé, ndĩhi nchaa ñáyiu dĩhí xĩndecu ichi dĩí ìní.

14 Te ní ndĩhi ndoo díhúⁿ-dě ní dándóñũhu-dé, te núú sàcú-ni nduu ní sãá tnamã ñúú núú ndécú-dě-áⁿ, te ñã nihí-gã-dé sã cãxí-dě, te xihí-dé docó.

15 Núú ní xica-dé cuáhãⁿ ndúcú chiuⁿ-dé núú hⁿ tée diu-ni ñúú xicã, te tée-áⁿ nĩ sãha chiuⁿ ñaha-dé hⁿ xichi núú ñúhú-dě coto-dé cùchí.

16 Te súúni xihí-dé docó te cuini-dé caxi-dé nchaa sã sãha-yu cùchí-áⁿ ní cùu, dico ñã túú ní sãñahã-yu xii-dé.

17 Te uuⁿni ní sani váha iní-dé, te ní cachí-dé: “Ío cuéhé cue tée xĩnu cuechi vehe tãtã-í te ío cuéhé sã xéxí-güedě ndécú, te yúhú duha ndòho-í docó iha!

18 Te ndacuĩñí-í te núhú-í vehe tãtã-í, te cúñaha-í xii-dé: Táu, ñã túú ní quide váha-í núú Yã Ndiõxí te ni ñã túú ní quide váha-í núú-n,

19 te ñã túú-gã tàú-í sã cúú-í déhe-n vitna, te cada ñaha-ñã-n xii-í dàtnã hⁿ tée xĩnu cuechi núú-n”, duha ní sani iní-dé cúñaha-dě xii tãtã-dě.

20 Te sãtã dúcãⁿ nĩ sani iní-dé, te ní natnĩ-dé ichi cuánuhú-dé vehe tãtã-dě, te xica-gã cuánuhú-dé ní xiní ñáhã tãtã-dě xii-dé te ní cundãhú iní ñáhã-dě. Te xĩnu tãtã-dě-áⁿ nĩ sãháⁿ nũtnahã ñáhã-dě, te ní numi ñaha-dě, te ío váha ní cãháⁿ ndĩhi ñaha-dě.

21 Te ní xáhaⁿ dẽhe-dé-áⁿ xii-dé: “Táu, ñã túú ní quide váha-í núú Yã Ndiõxí te ni ñã túú ní quide váha-í núú-n, te ñã túú-gã tàú-í sã cúú-í déhe-n vitna”, cachí-dé xãhaⁿ-dě.

22 'Dico tãtã-dě-áⁿ nĩ xáhaⁿ-dě xii cue tée xĩnu cuechi núú-dě: “Chí quẽñũhu ndĩhi-ni dóó vãha-gã cuãha-ndo dẽhe-í-a na cuĩhnu-dé, ndĩhi hⁿ dehé ná quĩhi díquĩ

ndáhã-dě, ndĩhi chàú váha na quĩhi-dé.

23 Te quĩhíⁿ ngueheⁿ-ndo hⁿ ndicutu numa quitĩ cavãha-gã, te cahni-ndo-di, te na càda-o vico, te na cãxi-o-di.

24 Chi déhe-í-a ní sani iní-í sã nĩ xihí-dé ní cùu, te ñáhã chi ndècu vívú-dě, te ní sani tucu iní-í sã nĩ xita-dé ní cùu te ní nasãá mée-dě”, cãchí-dé xãhaⁿ-dě xii cue tée xĩnu cuechi núú-dě-áⁿ. Te ní ngũta-güedě ní quide-güedě vico.

25 'Te déhe-dé tée sãcuéhé-gã cuáhãⁿ-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico.

26 Te ní cana-dé hⁿ tée xĩnu cuechi, te ní xicãⁿ tnũhú-dě núú-dě ná cuèndã ducaⁿ ío yaá.

27 Te tée xĩnu cuechi-áⁿ nĩ xáhaⁿ-dě: “Ñani-n tõe cuáhãⁿ ní cùu ní nasãá-dé, te tãtã-n nĩ táuchíúⁿ-dě ní xihí hⁿ ndicutu nũma quitĩ cavãha-gã cuèndã sã nĩ nasãá váha-dě”, cãchí-dé xãhaⁿ-dě.

28 'Dico ñani-dé tée sãcuéhé-ãⁿ nĩ cudéeⁿ-dě, te ní cachí-dé sã vã ndĩhu-dé vehe cundecu-dé vico-áⁿ ní cùu, dico ní quee tãtã-güedě ní cãháⁿ ndãhú-dé núú-dě cuèndã ndĩhu-dé.

29 Te ní xáhaⁿ-dě xii tãtã-dě: “Táu, cundedóho váha saú-n tnũhu na cãháⁿ-í-a, yúhú ío cuéhé cuãⁿ nĩ cuu xĩnu cuechi-í núú-n, te ni hⁿ xito ñã túú quide sãá iní-í núú-n, te ni hⁿ chivã lĩhli ñã túú tàxi-n-di caxi dĩí ìní-í-di ndĩhi cue tée cãháⁿ ndĩhi-í.

30 Te vitna ní nasãá déhe-n tõe ní sãháⁿ ní dándóñũhu díhúⁿ-n ndĩhi nchaa ñáyiu xĩndecu ichi dĩí ìní. Te ní sahani-n hⁿ ndicutu numa quitĩ cavãha-gã sã cuèndã-dé”, cãchí-dé xãhaⁿ-dě xii tãtã-dě.

31 Te ní xáhaⁿ tãtã-dě xii-dé: “Yòhó déhe-í ducaⁿ-ni ndècu ndĩhi ñaha-n xii-í, te nchaa sã ndécú ndĩhi-í cúú-xí cuèndã-n.

32 Te vitna dacuitíⁿ tàú-xi sã cádá-ó vico, te cudíⁿ ìní-ó, chi ñani-n-áⁿ nĩ quide-í cuèndã sã nĩ xihí-dé ní cùu, te ñáhã chi ndècu vívú-dě, te sa ní xita-dé ní cùu, te ní nasãá mée-dě”, cãchí-dé xãhaⁿ-dě xii déhe-dé tée sãcuéhé-gã-áⁿ —duha cuáhãⁿ cuèndú ní cani Jèsús núú-güedě.

16

Nãcuãa ní quide hⁿ tée tàxi tnuni ñáhã xii cue tée xĩnu cuechi

1 Te Jèsús xáhaⁿ-gã xii cue téé xica cuu ndìhi-gá:

—Ní xíndecu ìⁿ téé cuica, te ducaⁿ ní xíndecu ìⁿ téé ní taxi tñuní ñáhá xii cue téé ní xinu cuechi núú-dě. Te téé-áⁿ ní xiní ñáhá ñáyiú dùhu-dé díhúⁿ téé cùu patróóⁿ-dě, te cuáháⁿ-dé dándòñuhu-dé, te ní xáháⁿ-yu xii téé cùu patróóⁿ-dě sá dúcáⁿ quide-dé.

2 Te téé cùu patróóⁿ-dě-áⁿ ní cana ñaha-dě xii-dé, te ní xáhaⁿ-dě: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchàa chiuⁿ ní quide-n, chi vitna te vá táxi tñuní-gá-n cuè téé xinu cuechi núú-í”, càchí-dé xáhaⁿ-dě.

3 Te téé tàxi tñuní ñáhá xii cue téé xinu cuechi-áⁿ ní sani iní-dé: “¿Te nása cada-í vitna na quèhndé patròóⁿ-í chiuⁿ-í? Chi ñá cùndèe-gá-í cada-í chiuⁿ vée, te cùcahaⁿ núú-í cácaⁿ ndàhú-í.

4 Dico duha cada-í cuendá quehen cuendá ñáhá ñáyiú vehé-yu òré ná quèhndé duuⁿ-ná patròóⁿ-í chiuⁿ-í”, duha ní sani iní-dé.

5 Te sàtá dúcáⁿ te ní cana-dé ìⁿ ìⁿ cue téé tàú núú patròóⁿ-güedé. Te téé díhna ní xícáⁿ tñuhú-dé núú-dé, te xáhaⁿ-dě: “¿Ndéé dau tàú-n núú patròóⁿ-i?”, càchí-dé xáhaⁿ-dě.

6 Te téé-áⁿ ní xáhaⁿ-dě: “Tàú-í ìⁿ cièndú bàrríl acití”, càchí-dé xáhaⁿ-dě. Te téé tàxi tñuní ñáhá xii cue téé xinu cuechi-áⁿ ní xáhaⁿ-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xáhaⁿ-dě.

7 Te dàtnùnì ní xícáⁿ tñuhú tùcu-dé núú ìngá-dé, te xáhaⁿ-dě: “Te yòhó, ¿ndéé dau tàú-n-í?”, càchí-dé xáhaⁿ-dě. Te téé tàú-áⁿ ní xáhaⁿ-dě: “Ìⁿ cièndú ngohnchi triú tàú-í”, càchí-dé xáhaⁿ-dě. Te téé tàxi tñuní ñáhá xii cue téé xinu cuechi-áⁿ ní xáhaⁿ-dě: “Iha náu reciú-n-á, te cadúha ingá sá cùmídícó-nà taxi-n”, càchí-dé xáhaⁿ-dě.

8 Te téé cùu patròóⁿ-áⁿ ní cachí-dé sá ìo váha ñuhu díquí tée dùhu-áⁿ nàcuáa cada-dé cundecu váha-dé. Te nchaa ñáyiú xíndecu ichi cuèhé ichi duha, ío-gá váha ñuhu díquí-yu nàcuáa cada-yu cundecu váha-yu ndìhi nchaa ñáyiú cùndìhí-yu dàcúúxí ñáyiú ndècu ichi Yá Ndiòxí.

9 Te yúhú càchí-í sá cáda-ndó sã vãha ndìhi nchaa sá ndécú ndìhi-ndo ní cuáha ñuyíú yíca cuèchi-a, te ducaⁿ te coo cue téé ío váha tnahá tñuhu ndìhi-ndo, te òré ná ndìhi

nchaa sá ìo ñuyíú-a, te Yá Ndiòxí quehen cuendá ñáhá-gã xii-ndo, te cundecu-ndo ndìhi-gá ni caa ni quíhíⁿ.

10 Te núu ìⁿ téé quide ndáá cuèi ìⁿ chiuⁿ líhli na càda-dé, te ñu-ni ducaⁿ quide ndáá-dé cuèi ìⁿ chiuⁿ cahnu na cada-dé. Dico téé ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ìⁿ-ni quide-dé.

11 Te núu nchòhó vá cáda-ndó sã vãha ndìhi nchaa sá ní cuáha ñuyíú yíca cuèchi-a ña, te Yá Ndiòxí vá táxi-gã sá vãha ndècu ndìhi-gá xii-ndo.

12 Te núu vá cáda ndáá-ndó còto-ndo nchaa sá táxi núu tnahá ñáyiú-ndo, te vá yõo taxi sá ndúú tàhú-ndó.

13 Te ní ìⁿ téé xinu cuechi vá ndácú-dé cunu cuechi-dé núú úú patròóⁿ, chi téé-áⁿ cuu váha iní-dé núú ìⁿ patròóⁿ-dě te tñi-dé nchaa tñuhu càháⁿ patròóⁿ tée cùu váha iní-dé núú-xi-áⁿ. Te núú ìngá tucu patròóⁿ-dě vá cúú váha iní-dé, te ní vã tñí-dě tñuhu càháⁿ patròóⁿ-dě-áⁿ. Te ducaⁿ sãtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhuⁿ iní-ndó nchàa sá ìo ñuyíú-a —càchí-gá xáhaⁿ-gã xii-güedé.

14 Te nchaa cue téé cùu fariséú ío ñuhu iní-güedé nchaa sá ìo ñuyíú-a, te xíndedóho-güedé nchaa tñuhu càháⁿ Jèsús, te ní cáháⁿ yíchí-güedé cuendá-gá.

15 Te Jèsús ní xáhaⁿ-gã xii-güedé:

—Nchòhó cúú-ndó cuè téé ío váha càháⁿ núú ñáyiú cuendá-ni sá cuíní-ndó cãháⁿ váha-yu cuendá-ndó, dico Yá Ndiòxí xiní ndáá-gá nàcuáa càa iní-ndó ìⁿ ìⁿ-ndo, te nchaa sá càchí cue ñáyiú ñuyíú-a sá ìo nàndìhi, Yá Ndiòxí dáquèe tihú-gã.

Cuendá nchaa tñuhu ní chídó tñuní ndí Moisés

16 Te nchaa tñuhu ní chídó tñuní ndí Moisés cùnù-xi ni cuu, ndìhi nchaa tñuhu ní chídó tñuní cue téé ní xóo cáháⁿ tñuhu Yá Ndiòxí ndéé sanaha. Dico cùtnahá ní ngúíta té Juáá téé ní xóo dacuàndute ñaha xii ñáyiú ní cáháⁿ-dé tñuhu-í, ndéé dàvá-áⁿ ñá túú-gã ní cùnùu nchaa tñuhu ní chídó tñuní ndí Moisés ndìhi nchaa tñuhu ní chídó tñuní cue téé ní xóo cáháⁿ tñuhu Yá Ndiòxí ndéé sanaha. Te ñu-ni ndéé dàvá-áⁿ ní quesaha ta tècú tñuní ñáyiú nàcuáa ndíhu ndaha

ñaha Yá Ndiöxí xii-yu, te vai ñáyiú ío sàni iní-yu vitna nàcuáa cadá-yu ndihu ndaha ñaha Yá Ndiöxí xii-yu.

¹⁷ Te nchaa tnúhu ní chídó tnùní ndíi Moisés ío ndáá càháⁿ-xi, te ndíhi-gá naa andiu ndíhi ñuyíú dàcúxí sã ndíhi ñⁿ ñⁿ tnúhu-áⁿ cada-xi nàcuáa càháⁿ-xi.

Jèsús càháⁿ-gá cuèndá ñáyiú dàña tnaha (Mt. 19:1-12; Mr. 10:1-12)

¹⁸ Te núu ñⁿ té na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhí quide-dé te núu ducaⁿ na càda-dé, te té na tnándaha ndíhi ñaha ní dáña yí-xi, te diu-ni ducaⁿ ña túú cùu-xi sá vaha te núu ducaⁿ na cadá-yu —càchí-gá xáhaⁿ-gã xii-güedé.

Cuèndá ñⁿ té nàni Lázarus ndíhi cuèndá ñⁿ té cuica

¹⁹ Te xáhaⁿ tùcu-gá xii-güedé:

—Ní xíndecu ñⁿ té cuica, te ní xóo cuihnu-dé mee-ni dõ vaha dóo vii càa, te nchaa nduu súúni vaha ní xóo cada-dé vico vehe-dé.

²⁰ Te ní xíndecu tucu ñⁿ té ndàhú ní xínani-dé Lázarus, te té-áⁿ ñí cuhú-dé ní xíndé-dé nitùhú-dé ndíhyi, te ñⁿ nduu ñⁿ nduu ní xóo taxinucóo ñaha-güedé xii-dé yuyèhe té cuica-ãⁿ.

²¹ Te té ndàhú-áⁿ ñí xóo cuú-dé docó, te ní xóo cuini-dé caxi-dé nchaa sá ña túú-gã ní xõ yáha caxi té cuica-ãⁿ, te ñá túú ní xõ níhi-dé. Te cuèi iná ní xóo quíhíⁿ-di ní xóo nayuu-di nchaa núu ndíhyi ndèé-dé-áⁿ.

²² Te ní sáá ñⁿ nduu te ní xíhí té ndàhú-áⁿ, te cue espíritu xínú cuèchi núu Yá Ndiöxí ndécá ñaha-xi xii-dé cuánda nùu ndécú tã Abraham cundecu-dé. Te ní sáá nduu ñí xíhí té cuica-ãⁿ tnàhá-dé, te ní chindúxi ñaha-güedé xii-dé.

²³ Te ní sáá-dé núu xíndecu nchaa ñáyiú ní xíhí ñá túú ní quide ndáá núu Yá Ndiöxí te xiáⁿ ío ndòho-dé ndécú-dé, te ní ndonehe núu-dé te xica ñí xini-dé té Abraham ndíhi té Lázarus-áⁿ xíndecu-güedé.

²⁴ Te níhi ní cáháⁿ-dé, te xáhaⁿ-dè: “Yòhó tãtã Abraham, cundàhú iní ñhá xii-í, te cùñaha xii té Lázarus ná dándaxiⁿ-dé díquí ndáhá-dé, te na quixi-dé dandàxiⁿ-dé yaa-í, chi ío ndòho-í ñùhú-í núu ñùhú núu càyú-a”, càchí-dé xáhaⁿ-dè xii té Abraham.

²⁵ Dico té Abraham ní xáhaⁿ-dè: “Ndàhú yòhó ñani tnàhá-í, dandacu iní sá ío vaha ní xíndecu-n ñuyíú, te té Lázarus ío ndàhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndòhó-n vitna.

²⁶ Te ñá díu-ní sã xãⁿ tucu, chi cuádava ndècu ñⁿ déhvã cùnú ñùhú nèhu-xi núu ndécú-ó, te cuèi nchaa ñáyiú xíndecu iha na càchí iní-yu quixí-yu núu ndécú-ndó dico vá ndácú-yu, te ni nchòhó vá ndácú-ndó quixi-ndo núu ndécú-ndí”, càchí-dé xáhaⁿ-dè.

²⁷ Te ní xáhaⁿ tãe cuica-ãⁿ: “Te núu ducaⁿ te càháⁿ ndàhú-í núu yòhó tãtã Abraham vitna sá téndaha-n té Lázarus ná quíhíⁿ-dé vehe tãtã-í,

²⁸ chi ndècu úhúⁿ-gá ñani-í, te na cùñaha-dé xii-güedé sá vã cadá-güedé dàtná ní quide-í cuèndá sá vã quíxí-güedé tnàhá-güedé núu ndécú-í ndòhó-í-a”, càchí-dé xáhaⁿ-dè.

²⁹ Te té Abraham ní xáhaⁿ-dè: “Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue té ní xóo cáháⁿ tnúhu Yá Ndiöxí ndéé sanaha, te nchaa tnúhu-áⁿ ná tñi-güedé nàcuáa càháⁿ-xi”, càchí-dé xáhaⁿ-dè xii-dé.

³⁰ Te ní xáhaⁿ tùcu té cuica-ãⁿ: “Tãtã Abraham, dico vá cadá cuèndá-güedé nchaa tnúhu-áⁿ, dico núu ñⁿ ñáyiú ñá túú-gã ndécú ñuyíú ñⁿ ñáyiú ndècu ndíhi-n quíhíⁿ-yu cáháⁿ ndíhi ñhá-yu xii-güedé nàcuáa nduu tnúhu váha, te ndixi cuèchi iní-güedé nchaa sá ña túú quide váha-güedé ndécú-güedé, te cada váha-güedé”, càchí-dé xáhaⁿ-dè xii-dé.

³¹ Dico té Abraham ní xáhaⁿ-dè: “Te núu ñá túú cuini-güedé tñi-güedé tnúhu ní cáháⁿ ndíi Moisés, ndíhi tnúhu ní cáháⁿ cue té ní xóo cáháⁿ tnúhu Yá Ndiöxí ndéé sanaha ña, te diu-ni ducaⁿ càda-güedé cuèi ñⁿ ñáyiú ní xíhí ná ndòtó-yu cùñaha-yu nàcuáa nduu tnúhu váha, chi vá quíndáa iní-güedé”, càchí té Abraham xáhaⁿ-dè xii té cuica-ãⁿ —càchí Jèsús xáhaⁿ-gã xii cue té cùu fariséu.

17

Quíhi iní-ó vã cùndecu-o ichi cuehé ichi duha (Mt. 18:6-7, 21-22; Mr. 9:42)

1 Te Jèsús ní xáhaⁿ-gã xii cue téé xica cuu ndihí-gá:

—Dacuitíí sã cóó cuè téé dacàháⁿ-güedé ñáyíu cadá-yu nándí sá cuèhé sá dúhá, j dico ndàhú ní cuu cue téé ducaⁿ na dàcaháⁿ ñáhá xii-yu cadá-yu nándí sá cuèhé sá dúhá!

2 Chi váha-gá sá nõu na dàcutu ndeé ñáyíu ìⁿ yúú yödó dücúⁿ-güedé te dàquée ñáhá-yu xii-güedé xití ndute làmár, te ñá díú sã cúndècu-güedé dacàháⁿ-güedé ñáyíu cadá-yu nándí sá cuèhé sá dúhá, cuèi ñáyíu ndàhú iní-xi dandàhú-güedé.

3 Te ío quíhi iní-ndó cùndecu-ndo.

Te núu ìⁿ ñaní tnáhá-ndó quide-dé ìⁿ sá ñà túú tàú-dé cada-dé sá cúú-xí-ndó te cáháⁿ-ndó dôho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sã ñi quide-dé.

4 Te cuèi úsá xito na càda-dé nándí sá ñà túú tàú-dé cada-dé sá cúú-xí-ndó ìⁿ nduu, te núu na quixi-dé úsá xito núú-ndó, te cachí-dé sá vã dúcáⁿ-gã cada-dé, te xini ñuhu-xi cada cahnu iní-ndó-dě —càchí-gá xáhaⁿ-gã xii-güedé.

Ñáyíu sàndáá ndisa iní-xi

5 Te ní xáhaⁿ cuè téé xica cuu ndihí Jesús xii-gá:

—Chindee ñàha xii-ndí cuèndá ducaⁿ te quíndáá-gá iní-ndí sá Yã Ndiöxí ndácú-gã quidé-gã nchaa sá váha —càchí-güedé xãhaⁿ-güedé xii-gá.

6 Te ní xáhaⁿ Jèsús:

—Te núu nchòhó quíndáá ndisa iní-ndó sũúni cuèdicó luha líí dàtná cuíni-ndó càa ìⁿ ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití làmár”, duha cúñaha-ndo. Te ducaⁿ càda-xi te núu na quíndáá ndisa iní ñáhá-ndó xii-í —càchí-gá xáhaⁿ-gã xii-güedé.

Nàcuáa tàú ìⁿ téé xìnu cuechi cada-dé

7 Te xãhaⁿ tùcu-gá xii-güedé:

—Te núu ìⁿ nchòhó ndécú ìⁿ téé xìnu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quití, te òré ní nasáá-dé vehe sá ñi sáháⁿ-dé yucu, te vá cũñaha nchòhó cue téé cùu patróóⁿ-dě xii-dé: “Yáchí nehé caxi-n dítá”, vá dúhá cũñaha-ndo.

8 Chi nchòhó cue téé cùu patróóⁿ-dě cúñaha-ndo xii-dé: “Cundihí iní cada túha sá cúdini-í, te díhna-gá-í caxi-í dítá te dàtnùni caxi-n”, duha cúñaha nchòhó cue téé cùu patróóⁿ xii-dé.

9 Te òré ná ndíhí chiúⁿ ní táhú nchòhó cue téé cùu patróóⁿ cada téé xìnu cuechi núú-ndó, te ñá túú tàú-ndó ndàcáⁿ táhú-ndó nõú tãe xìnu cuechi núú-ndó.

10 Te duha càháⁿ-í chi núu òré ná ndihí nchaa chiúⁿ ní táhú Yã Ndiöxí cada-ndo, te cachí-ndó: “Nchúhú cúú-ndí cue téé xìnu cuechi núú Yã Ndiöxí, dico ñá túú tàú-gá ndacáⁿ táhú-gã núú-ndí, chi mee-ni chiúⁿ ní táhú-gã ní quide-ndí”, duha cachí-ndó —càchí-gá xáhaⁿ-gã xii-güedé.

Jèsús quidé tãtna-gá úxí cue téé tnàhá cuèhé sã dátèhyú nihnu-xi yiqui cùñú ñáyíu

11 Te ñuhu Jesús ichi cuáháⁿ-gá ñuu Jerusálén, te ní yáha-gá núú rayá distritú Sãmariá ndihí distritú Galileá.

12 Te ta cùyatni-gá ìⁿ ñuu líhli cuáháⁿ, te ní sátnahá ñáhá úxí tnàhá cue téé cùhú xii-gá, te tnàhá-güedé cuèhé sã dátèhyú nihnu-xi yiqui cùñú-ó dico xica lùha ní ngúnu tní-güedé,

13 te níhi ní cáháⁿ-güedé, te xãhaⁿ-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xãhaⁿ-güedé xii-gá.

14 Te òré ní xiní ñáhá Jèsús xii-güedé, te ní xáhaⁿ-gã:

—Chí cuáháⁿ núú düttú ná cùndehe ñaha-dé xii-ndo —càchí-gá xáhaⁿ-gã xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé cuèhé tnàhá-güedé.

15 Te nchaa-güedé ní cutnùni iní-güedé sá ñi ndúha-güedé, dico ìⁿ-ni-dé ní nacuico-dé, te ní ngúita-dé níhi ní cáháⁿ-dé, te ní cachí-dé sá ìo càhnu cuu Yã Ndiöxí.

16 Te ní ngúíñí xití-dé núú Jèsús, te ní nuu núú-dě ndàa núú ñúhú ndàcáⁿ táhú-dě núú-gã. Te téé-áⁿ cúú-dě téé distritú Sãmariá.

17 Te Jèsús ní cachí-gá:

—Úxí tnàhá-güedé ní ndúha cuèhé tnàhá-güedé. ¿Te ndèè ndécú dàva-gá-güedé-i?

18 ¿Te náa ìⁿdii-ni téé ingá ñúú-a ní nacuíco-dě ndàcáⁿ táhú-dě núú Yá Ndiòxí, te càchí-dé sá ìo càhnu cuu-gá ñǎ? — càchí-gá.

19 Te ní xáhaⁿ-gǎ xii téé-áⁿ:

—Ndacuíñí te núhú-n, chi sa ní ndúha-n cuèhé tnàhá-n, chi ní sándáá iní-n Yá Ndiòxí —càchí-gá xáhaⁿ-gǎ xii-dé.

*Nàcuáa yíndaha ñaha Yá Ndiòxí
(Mt. 24:23-28, 36-41)*

20 Te cue téé cùu fariséú ní xícáⁿ tnúhú-güedě núú Jèsús núu ná ama ngüíta Yá Ndiòxí ndíhu ndaha-gǎ ñáyíu. Te ní xáhaⁿ-gǎ:

—Ñá túú ñǎ cada-xi ñuyíú quini-ndó cuëndá cutnùní iní-ndó sǎ ndíhu ndaha ñàha Yá Ndiòxí xii-ndo.

21 Te ni vǎ yǎo cachí: “Iha ndècu-gá táxí tnùní-gǎ, àdi yacáⁿ ndécú-gǎ táxí tnùní-gǎ”, chi tnuú-ndó sà ndecu-gá ndíhi nchaa ñáyíu yíndaha-gǎ —càchí-gá xáhaⁿ-gǎ xii-güedé.

22 Te ní xáhaⁿ-gǎ xii cue téé xica cuu ndíhi-gǎ:

—Te nchòhó chi sáá nduu, te cachí iní-ndó sǎ sùúní cuèdicó ìⁿ nduu quini ñáhá-ndó xii yúhú Téé cùu ñaní tnáhá-ndó nchàa-ndo, dico vá quini ñáhá-gǎ-ndó xii-í.

23 Te coo ñáyíu cúñàhá-yu xii-ndo: “Iha ndècu-gá, áⁿ yàcáⁿ ndécú-gǎ”, quesàhá-yu cúñàhá-yu xii-ndo. Dico vá quíndáá iní-ndó quíhíⁿ-ndó ndíhí-yu núú càchí-yu, te ni vǎ cání iní-ndó quíhíⁿ méé-ndó.

24 Chi dàtná cuini-ndó quide-xi oré sàá nduté àndíu, chi uuⁿni dàyehé-xi nihí ñuyíú, ducaⁿ càda-xi nduu na quixi tucu yúhú Téé cùu ñaní tnáhá-ndó nchàa-ndo, te dàvá-áⁿ quini ñáhá nchàa-ndí túhú ñáyíu xii-í.

25 Dico díhna-gǎ ndoho víhi-í, te daquèè tíhú ñáhá ñáyíu ñuyíú-a xii-í.

26 Te cadá-yu dàtná ní quide ñáyíu ní xíndecu cútnàhá ní xíndecu té Nǒé, te ñíu-ni ducaⁿ sǎtnahá-xi cada nchaa ñáyíu ndècu vitna ndéé sáá nduu quixi tucu yúhú Téé cùu ñaní tnáhá-ndó nchàa-ndo.

27 Chi caxi-ní-yu, coho-ní-yu, te caca cuu-ni cue téé xica ndáhú, te tnàndaha-ní-yu, chi ducaⁿ ñí quidé-yu dàvá-áⁿ ndéé ní sáá nduu cuànguee té Nǒé

xití bàrcú, te ní ngüíta-xi ní cuuⁿ dáú ñí ndaa ndute ñuyíú, te nchaá-yu ní xíhí ní cáhá-yu dàvá-áⁿ.

28 Te ñíu-ni ducaⁿ ñí quide tucu ñáyíu cútnàhá ní xíndecu té Lǒt, chi xèxí-yu xíhí-yu, te sàáⁿ-yu te nàdicó-yu, te xíxítú-yu nándi sá xíxítú-yu, te nchaa cue téé xídácáá-güedě vehe.

29 Te òré ní quee té Lǒt ñúú Sòdomá, te ní ngoyo ñuhú andíu, te dàcá yúú sùúní dícó ní nduu ñuhú-ñǎ-xi, te ní xíhí nchaandí túhú ñáyíu ñúú-áⁿ.

30 Te ñíu-ni ducaⁿ sǎtnahá-xi cada ñáyíu na sàá nduu quixi tucu yúhú Téé cùu ñaní tnáhá-ndó nchàa-ndo ñuyíú-a.

31 “Te núu ìⁿ ñáyíu càndodó-yu díquí vèhé-yu nduu-áⁿ, te nì vá ndíhu-gá-yu quehéⁿ-yu ìⁿ ndachíúⁿ-yu canehé-yu quíhíⁿ, te ñáyíu cuáháⁿ yucu, te nì vá nùhú-gá-yu vehé-yu.

32 Te chí dándàcu iní nàcuáa ní yáha ñadìhí té Lǒt.

33 Te nchaa ñáyíu cuini dàcácu nihnu mee-xi ñuyíú-a ña, te cuíta nihnú-yu, te nchaa ñáyíu na cùú sá cuëndá-í, te naníhí tǎhú-yu.

34 “Te na càchí tnúhu tucu-í xii-ndo sǎ ndúu-áⁿ, te núu úú-yu càa ìⁿ núú xító, te ìⁿ-yu ndanchitá-yu ndaá-yu andíu, te ìⁿ-yu quendóo.

35 Te núu úú ñáyíu dìhí nchícǎ-yu ìⁿ-ni vèhe, te ìⁿ-yu ndanchitá-yu ndaá-yu andíu, te ìⁿ-yu quendóo.

36 Te núu úú cue téé yíhi-güedé yucu, te ìⁿ-dé ndànchita-dé ndaa-dé andíu, te ìⁿ-dé quendóo —càchí-gá xáhaⁿ-gǎ xii-güedé.

37 Te sá dúcáⁿ ñí cáháⁿ-gǎ núu ní xícáⁿ tnúhú-güedě núú-gǎ, te xáhaⁿ-güedě xii-gǎ:

—Mèstrú, ¿te ndéé ducaⁿ càda-xi-í? —cachí-güedé xáhaⁿ-güedě xii-gǎ.

Te ní xáhaⁿ-gǎ:

—Te nchòhó xini-ndó sǎ ncháá núú yúcu yíqui cuñú ní xíhí, te yàcáⁿ tàcá cue ndíxíí xéxí-güedé —cachí-gá xáhaⁿ-gǎ xii-güedé.

18

Jèsús càháⁿ-gǎ cuëndá ìⁿ juéxí ndíhi cuëndá ìⁿ ñaha quèé

¹ Te Jèsús ní cani-gá ìḡ cuèndú núú-güedě cuèndá sá vǎ ná tǔhú iní-güedé cáháⁿ ndihí-güedé Yǎ Ndiǒxí nchaa-ni òré.

² Te xáhaⁿ-gǎ:

—Èḡ ñuú ndécú ìḡ juéxí, te ni ñà túú sàndáá iní-dé Yǎ Ndiǒxí, te ni ìḡ tǔhu xáhaⁿ ñáyiú ñà túú cuìní-dé cada cuèndá-dé.

³ Te ñuú-áⁿ ndécú tǔcu ìḡ ñadihí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuèndá cada ndáá-dé ìḡ cuéchi.

⁴ Te tǔnǐ xito ní cuu sàháⁿ-aⁿ càháⁿ ndàhú-aⁿ núú-dě te ñà túú cuìní-dé cada cuèndá-dé tǔhu càháⁿ-aⁿ ni cùu, te ndéé núú ñà cúú-gǎ te ní sani iní-dé: “Te cuèi ñà túú sàndáá iní-í Yǎ Ndiǒxí, te ni ñà túú quide cuèndá-í nchaa tǔhu càháⁿ ñáyiú cada-í,

⁵ dico na càda ndáá-í cuèndá ñaha quèé-a ndihí ñáyiú cùu úhú iní tǔhá ndihí-aⁿ, chi vá cùndèe-gá iní-í nuu núu quixi-aⁿ dasatú iní ñáhá xii-í”, duha ní sani iní téé cùu juéxí-áⁿ —càchí-gá xáhaⁿ-gǎ xii-güedé.

⁶ Te ní xáhaⁿ tǔcu-gá xii-güedé:

—Cada cuèndá-ndó nàcuáa ní sani iní juéxí téé cuihna iní-xi-áⁿ.

⁷ Te Yá Ndiǒxí ío chindee-gá nchaa ñáyiú ní cáháⁿ-gá cundecu ndihí-gá, chi cuèi nduu cuèi niú càháⁿ ndihí ñáhá-yu xii-gá, te vá cúyàa-gá nachinaa-gá nchaa sá quidé ñaha nchaa ñáyiú cùu úhú iní ñáhá xii-yu.

⁸ Te ío ndihí ducaⁿ càda-gá. Te òré ná quixi yúhú Téé cùu ñaní tǔhá-ndó nchaa-ndo, ¿te náa naníhí-gǎ-í ñáyiú sàndáá ndisa iní Yǎ Ndiǒxí-ǎⁿ? —càchí-gá xáhaⁿ-gǎ xii-güedé.

Nàcuáa quide ìḡ téé cùu fariséú ndihí ìḡ téé cùu cobradór

⁹ Te Jèsús ní cáháⁿ-gá núú ñáyiú nàcuáa quide ñáyiú sàni iní sá ío quide ndáá te dàquee tíhú-yu tǔhá ñáyiú-yu, te xáhaⁿ-gǎ xii-yu:

¹⁰ —Úú cue téé cuáháⁿ-güedé veñúhu càhnu sá ío cùnuu cáháⁿ ndihí-güedé Yǎ Ndiǒxí, te ìḡ-dé cúú-dě téé cùu fariséú, te ingá-dé cúú-dě téé cuihna iní-xi quide cobra ñáhá xii ñáyiú cuèndá impuèstú.

¹¹ Te téé cùu fariséú-áⁿ nǔtnǐ-dé càháⁿ ndihí-dé Yǎ Ndiǒxí, te xáhaⁿ-dě xii-gá: “Yòhó Dútú Ndiǒxí ndáá-í tǔhú-í núú-n, chi ñà túú quide-í dàtná quidé dàva-gá-güedé, chi dùhu-güedé, càháⁿ ndihí-güedé ñadihí

te ñà díú ñadihí-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé téé cuihna iní-xi quide cobra ñáhá xii ñáyiú cuèndá impuèstú ndécú ìha.

¹² Chi yúhú ñà túú tǔhá ná xéxi-í úú nduu xití samàná cuèndá sá càháⁿ ndihí ñaha-í xii-n, te nchaa sá ñihí-í te càhu-í úxí xichi, te ìḡ xichi tàxi-í xii-n”, càchí-dé xáhaⁿ-dě xii Yá Ndiǒxí.

¹³ Dico téé cuihna iní-xi quide cobra ñáhá xii ñáyiú cuèndá impuèstú-áⁿ chi xica lùha nutnǐ-dé, te ni lùha ñà túú cùyǐ-dé ndonehe núú-dě andiú cuèndá sá ndíxí cuéchi iní-dé nchaa sá ñà túú vǎha quide-dé, te ndédí ndaha-dé pèchú-dé sá ndihú iní-dé, te xáhaⁿ-dě xii Yá Ndiǒxí: “Yòhó Dútú Ndiǒxí cundàhú iní ñáhá xii-í, chi ío cuéhé sǎ ñà túú vǎha quide-í núú-n!”, càchí-dé xáhaⁿ-dě xii Yá Ndiǒxí.

¹⁴ Te na càchí tǔhu-í xii-ndo sǎ téé cuihna iní-xi quide cobra ñáhá xii ñáyiú-áⁿ ní tedóho Yá Ndiǒxí nchaa tǔhu ní cáháⁿ-dé, te ní quide càhnu iní-gá nchaa sá ñà túú vǎha ní quide-dé, te cuánuhú-dé vehe-dé. Te téé cùu fariséú-áⁿ ñà túú ní tedóho ñaha Yǎ Ndiǒxí xii-dé. Chi nchaa ñáyiú na càda cahnu mee-xi ñuyú-a te vá cúú-yu ñáyiú cùnuu, te nchaa ñáyiú ñà túú quide cahnu mee-xi, ñáyiú-áⁿ cunúú-yu —càchí Jèsús xáhaⁿ-gǎ xii-yu.

Jèsús quidé ù-gǎ landú

(Mt. 19:13-15; Mr. 10:13-16)

¹⁵ Te ìḡ úú ñáyiú ndécá-yu landú líhli cuáháⁿ núú Jèsús chi cuìní-yu sá téndàha ñaha-gá xii-güexi, te òré ní xiní cue téé xica cuu ndihí-gá sá ndécá-yu landú-áⁿ cuáháⁿ núú-gǎ, te ní ngüíta-güedé ténàá ñáhá-güedé xii-yu, te xáhaⁿ-güedé sá vǎ dúcáⁿ càdá-yu.

¹⁶ Dico Jèsús ní cana ñaha-gǎ xii-güedé, te ní xáhaⁿ-gǎ:

—Chí dáñá ná quixi nahi landú líhli-áⁿ nùú-í-a, te vá càdí-ndó ìchi-güexi, chi dàtná cúú vǎha iní cue landú líhli-áⁿ ducaⁿ cùu vǎha iní cue ñáyiú yindaha ñaha Yá Ndiǒxí.

¹⁷ Te na càchí tǔhu ndáá-í xii-ndo sǎ nùu vá quèndáá iní ñáhá-ndó dàtná quidé dàva landú líhli sàndáá iní ñáhá xii-í, te vá ndihí ndaha ñaha Yá Ndiǒxí xii-ndo, te vá

ndúú tǎhú-ndó cùndecu-ndo ndihí-gá ni caa ni quíhíⁿ —càchí-gá xáhaⁿ-gǎ xii-güedé.

*Íⁿ téé cuica càháⁿ ndihí-dé Jèsús
(Mt. 19:16-30; Mr. 10:17-31)*

18 Te íⁿ téé cùnūu ní xícáⁿ tnúhú-dě núú Jèsús, te xáhaⁿ-dě xii-gá:

—Yòhó Mèstrú, cùu-n téé ío váha iní-xi, te cuíní-í nūu vá cùndèe iní-n càchí tnúhu-n ná cúú sǎ váha cada-í cuèndá nduu tǎhú-í cundecu-í ndihí Yá Ndiöxí ni caa ni quíhíⁿ —càchí-dé xáhaⁿ-dě xii-gá.

19 Te Jèsús ní xáhaⁿ-gǎ xii-dé:

—¿Te cùtnuní iní-n nàcuáa ndūu tnúhu càháⁿ-n sǎ yǔhú váha iní-ǎⁿ? Chi íⁿdìi díí-ni Yá Ndiöxí váha iní-gá.

20 Te yòhó xìní-n nàcuáa ní cachí Yá Ndiöxí cada ñáyiū, te duha ní cachí-gá: “Nchòhó cue téé vá càháⁿ ndihí-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyiū dìhí tucu vá càháⁿ ndihí-ndo tēe te núu ñá díú yíⁿ-ndo cuu-güedé, te vá cáhni-ndó tnàha ñáyiū-ndo, te ni vǎ dúhú-ndó sǎ ndécú ndihí-yu, te ni vǎ dácàcu-ndo cuéchi neñūú sǎ cúú-xí tnàha ñáyiū-ndo, te canehe-ndo sǎ yíñūhu núú tǎtá-ndó ndihí núú nǎná-ndó”, duha ní cachí Yá Ndiöxí cada ñáyiū —càchí Jèsús xáhaⁿ-gǎ xii-dé.

21 Te téé-áⁿ ní xáhaⁿ-dě xii-gá:

—Nchaa xǎⁿ ní nguíta-í quídè-í ndéé cùtnàhá cúú làndú-í —càchí-dé xáhaⁿ-dě xii-gá.

22 Te Jèsús ní xáhaⁿ-gǎ xii-dé:

—Dico cùmání ìngá núú sǎ cádá-n, vitna te quíhíⁿ-n te dico-n nchàa sǎ ndécú ndihí-n, te díhú-n cuǎha tǎhú-n cuè ñáyiū ndàhú, te ducaⁿ te nduu tǎhú-n cùndecu váha-n nūú ndécú Yá Ndiöxí táxí tnùní-gá, te na yǎha ducaⁿ càda-n te quixi-n chìtnahá ñáhá-n xii-í —càchí-gá xáhaⁿ-gǎ xii-dé.

23 Te sǎ dúcáⁿ ní xáhaⁿ Jèsús xii-dé, te ío ní cundìyí-dé, chi ío cuica-dě.

24 Te sǎ ní xiní ñáhá Jèsús xii-dé cùndìyí-dé, núu ní cachí-gá:

—Ío úhú quíndáá iní ñáyiū cuica Yá Ndiöxí cuèndá ndíhu ndaha ñàha-gá xii-yu!

25 Te yáchí-gá yáha íⁿ càméyu yaú íⁿ yiqui tìcú dácúxí sǎ quíndáá iní íⁿ ñáyiū cuica

Yá Ndiöxí cuèndá ndíhu ndaha ñàha-gá xii-yu —duha ní cachí-gá.

26 Te nchaa ñáyiū ní tecú dóho-xi tnúhu ní càháⁿ-gá ní xáhǎⁿ-yu xii-gá:

—¿Te yoo naníhí tǎhú te núu ducaⁿ vǎíⁿ? —càchí-yu xáhǎⁿ-yu xii-gá.

27 Te Jèsús ní xáhaⁿ-gǎ xii-yu:

—Cue ñáyiū ñuyíú-a chí vá ndácū-yu ná cadá-yu nàcuáa ndíhu ndaha ñàha Yá Ndiöxí xii-yu, dico mee-gǎ chí ndacu-gá ndíhu ndaha ñàha-gá xii-yu chí nchaa sǎ váha ndacu-gá quídé-gǎ —càchí-gá xáhaⁿ-gǎ xii-yu.

28 Te té Pèlú ní xáhaⁿ-dě xii-gá:

—Nchúhú ní dándöo-ndí nchaa sǎ ndécú ndihí-ndí, te ní tuha ñàha-ndí xii-n —càchí-dé xáhaⁿ-dě xii-gá.

29 Te ní xáhaⁿ-gǎ xii ñáyiū:

—Na càchí tnúhu ndáá-í xii-ndo sǎ nchaa ñáyiū na dándöo vehe-xi, àdi tǎtá-xi, nǎná-xi, ñaní-xi, cúha-xi, ñàdihí-xi, déhe-xi cuèndá sǎ cuíní-yu ndíhu ndaha ñàha Yá Ndiöxí xii-yu,

30 te ío-gá cuéhé sǎ cuǎñaha-gǎ xii-yu cundecu ndihí-yu, te ñá díú-ní xǎⁿ, chí tnàhá nduu tǎhú-yu cundecu ndihí ñáhá-yu xii-í ni caa ni quíhíⁿ ná sǎa nduu —càchí-gá xáhaⁿ-gǎ xii-yu.

Jèsús càháⁿ tucu-gá sǎ cáhni ñàha-güedé xii-gá

(Mt. 20:17-19; Mr. 10:32-34)

31 Te Jèsús ní taudíⁿ-gá ndi ùxúú cue téé xíca cuu ndihí-gá tnuú ñáyiū, te ní xáhaⁿ-gǎ xii-güedé:

—Vitna te quíhíⁿ-ó ñūú Jerusalén, chí yàcáⁿ cada-xi nchaa nàcuáa sa ní chídó tnùní cue téé ní xóo càháⁿ tnúhu Yá Ndiöxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo.

32 Chí cuáha cuèndá ñáhá-güedé xii-í núu cuè téé ñá túú cùu cue téé isráel, te cudíquí ndéé ñáhá-güedé xii-í, te cúcuéhé ñáhá-güedé, te tíú díí ñáhá-güedé xii-í.

33 Te caniha-güedé ndihí ñíi, te dàtnùní cahni ñàha-güedé xii-í, dico nduu úní sǎ cùú-í te ndoto-í —càchí-gá xáhaⁿ-gǎ xii-güedé.

34 Dico ni íⁿ tnúhu ní càháⁿ-gá ñá túú ní tècú tnùní-güedé, chí ío yídáhu tnúhu

ní cáháⁿ-gá nŭu xíáⁿ ní ìⁿ ñá túú ní tècú
tnùní-güedé.

*Jèsús quidé tătna-gá núú ìⁿ téé cuàá ñuú
Jericó*

(Mt. 20:29-34; Mr. 10:46-52)

³⁵ Te òré tá cùyatni Jèsús ñuú Jericó
cuáháⁿ, te yuhu ìchi cuáháⁿ-gá-áⁿ núcõ ìⁿ
téé cuàá xicáⁿ ndàhú-dé.

³⁶ Te òré ní tecú dóho-dé xicáháⁿ vài ñáyi
xíyáha-yu, te ní xicáⁿ tnúhú-dě núú ñáyi
ndècu ndìhi-dé ná cuendá ducaⁿ vài-yu
yáha.

³⁷ Te ní xáhãⁿ-yu sá Jèsús téé ñuú Nazàrét
ñúhú-dě ichi.

³⁸ Te níhi ní cáháⁿ-dé, te xáhaⁿ-dě xii-gá:

—Jèsús ñaní tnáhá ndíi Dàvií, cundàhú iní
ñáhá xii-í! —càchí-dé xáhaⁿ-dě xii-gá.

³⁹ Te ñáyi xixódó núú núú Jèsús ní tenàá
ñáhã-yu xii-dé, te xáhãⁿ-yu sá ná càdí-dé
yuhu-dé dico uuⁿ-gá níhi ní cáháⁿ-dé
xáhaⁿ-dě xii-gá:

—Yòhó téé cùu ñaní tnáhá ndíi Dàvií,
cundàhú iní ñáhá xii-í! —càchí-dé xáhaⁿ-dè
xii-gá.

⁴⁰ Te Jèsús ní ngüñí-gá, te ní táuchíúⁿ-gã
ní sãgueheⁿ ñaha cuè téé ndìhi-gá. Te òré
ní quexìo-dé núú-gã, te ní xicáⁿ tnúhú-gã
núú-dě, te xáhaⁿ-gã:

⁴¹ —¿Ná cuiní-n càda ñaha-í xii-n-í? —
càchí-gá xáhaⁿ-gã xii-dé.

Te téé cuàá-áⁿ ñí xáhaⁿ-dè:

—Mèstrú, cuiní-í cada tătna-n nŭù-í
cuendá cundehe-í —càchí-dé xáhaⁿ-dè
xii-gá.

⁴² Te Jèsús ní xáhaⁿ-gã:

—Sa ní ndúha núú-n chi ní sándáá iní-n
Yá Ndiõxí —càchí-gá xáhaⁿ-gã xii-dé.

⁴³ Te òré-ni-áⁿ ñí ndúha núú-dě, te ní
chinchícuⁿ-dé Jèsús, te ní cachí-dé sá ìo
càhnu cuu Yá Ndiõxí. Te nchaa ñáyi ní xiní
nàcuáa ní cuu ní ndúha núú-dě tnàhá-yu ní
cachí-yu sá ìo càhnu cuu Yá Ndiõxí.

19

Jèsús ndìhi ìⁿ téé nàni Zaqueú

¹ Te Jèsús ní sáá-gá ñuú Jericó, te ta
yáha-gá xití ñuú-áⁿ cuáháⁿ.

² Te ñuú-áⁿ ndécú ìⁿ téé cuica nàni-dé
Zaqueú, te cùnū-dé táxí tnùní-dé cue téé

cùndìhi-dé, cue téé cuihna ìní-xi quède co-
brá ñáhá xii ñáyi cuendá impuèstú.

³ Te téé-áⁿ cuiní-dé quini-dé Jèsús òré-áⁿ
ní cùu te ñá ní ndàcu-dé, chi ìo cuéhé ñáyi,
te ñá túú dùcúⁿ-dé.

⁴ Te xinu-dé ní ngódó núú-dè te ní sáá-dé
díquí ìⁿ yutnu sìcómorú nùtní yatni yuhu
ìchi núú yáha Jèsús cuendá cuiní-dé quini
ñáhá-dě xii-gá.

⁵ Te òré tá yáha Jèsús xíáⁿ, te ní ndonehe
núú-gã díquí yutnu núú cándòdo-dé-áⁿ, te
ní xáhaⁿ-gã xii-dé:

—Zaqueú, tanū ndìhi díquí yutnu-áⁿ, chi
tnaví quexìo-í vehe-n ndètatú-í —càchí-gá
xáhaⁿ-gã xii-dé.

⁶ Te té Zaqueú-áⁿ ñí nuu ndìhi-dé díquí
yutnu-áⁿ, te ìo ní cudí ìní-dé ní queheⁿ
cuendá-dé Jèsús vehe-dé.

⁷ Te sá ñí xiní ñáyi ní quexìo Jèsús
vehe-dé, te nchaa-yu ní ngüita-yu càháⁿ
cuéhé-yu cuendá-gá, te xitnàhá-yu:

—Téé-a cuángühu-dé vehe ìⁿ téé ndècu
ichi cuehé ichi duha —càchí-yu xitnàhá-yu.

⁸ Te té Zaqueú-áⁿ ñí ndacuñí-dé tnuú-yu,
te xáhaⁿ-dè xii Jèsús:

—Yòhó Mèstrú, na cuáha-í ñáyi ndàhú
cuádava nchaa sá ndécú ndìhi-í. Te núu
yoo ní dándàhú-í ní dúhù-í, te codo ùní-gã
tnàhá sá ñí dúhù-í-yu nacuáñaha-í xii-yu —
càchí-dé xáhaⁿ-dè xii-gá.

⁹ Te Jèsús ní xáhaⁿ-gã xii té Zaqueú:

—Vitna ní naníhí tàhú-n ndìhi nchaa
ñáyi xindecu vehe-n, chi tnàhá-n cùu-n
ñaní tnáhá ndíi Àbrahám.

¹⁰ Te yúhú Téé cùu ñaní tnáhá-ndó
nchaa-ndo véxi-í nándùcu-í ñáyi ní xita
nihnu cuendá dàcácu nihnu-í-yu núú ùhú
núú ndàhú —càchí-gá xáhaⁿ-gã xii-dé.

*Nàcuáa ní quide-güedé ndìhi díhúⁿ cuááⁿ
(Mt. 25:14-30)*

¹¹ Te nchaa ñáyi-áⁿ ñí sani iní-yu sá
ndìhi-ni ndíhu ndaha ñaha Yá Ndiõxí xii-yu
cuendá sá ñí cuyatni Jèsús ñuú Jerusálén,
te xíáⁿ nŭu ní ngüita Jèsús ní cani-gá ìⁿ
cuendú núu-yu cuendá tecú tnùní váha-yu
tnúhu-gá.

¹² Te xáhaⁿ-gã xii-yu:

—Ní xindecu ìⁿ téé cùu ñaní tnáhá ñáyi
cùnū, te cuáháⁿ-dé ingá ñuú xicá cuendá

yàcáⁿ cuáha ñaha-güedë chiuⁿ coo-dé, te dätñuní ndixi-dé quindaha-dë tñní ñuú.

13 Te cùmání-gã quee-dé quíhíⁿ-dé, te ní cana-dé úxí cue tée xínu cuechi núú-dë, te ní sãñaha-dë ndí dííⁿ núú-güedë ìⁿ caa ìⁿ caa díhúⁿ cuááⁿ, te ní xáhaⁿ-dë: “Chí cádá ndähú ndíhí díhúⁿ-ãⁿ ndëé ná sáá nduu nàsáá-í”, cächí-dé xãhaⁿ-dë xii-güedë.

14 Dico nchaa ñáyiú ñuú quindaha-dë-áⁿ ñà túú tñàhá iní-yu sá quindaha ñaha-dé, núu ní tendahá-yu cue tée nèhe tñúhu cuáháⁿ núú cuè tée cuáñaha chiuⁿ coo-dé-áⁿ, te ní xáhaⁿ-yu sá cũñaha-güedë sá ñà túú tñàhá iní-yu sá tõe-áⁿ quindaha ñaha-dé xií-yu.

15 Dico dacuítíí sã ní sáha-güedë tée-áⁿ chiuⁿ coo-dé sá díú-dë quindaha-dë ñáyiú nchaa ñuú-áⁿ, te ní nacuíco-dë cuánuhú-dé ñuú-dé. Te òré ní nasáá-dé vehe-dé, te ní tendaha-dë ìⁿ tée ní sánúcana ñaha xii cue tée xínu cuechi núú-dë, cue tée ní dándõ ndaha-dë díhúⁿ cuendá cãcãⁿ tñúhú-dë núú-güedë ìⁿ ìⁿ-güedë núu ndëé dau ní chídó-xí díquí díhúⁿ sã ní dándõ ndaha ñaha-dé-áⁿ.

16 Te tée ní ndèxio díhna xãhaⁿ-dë: “Pàtróóⁿ, ní quide-í ndáhú ndíhí díhúⁿ-n sã ní dándõ ndaha ñaha-n xii-í, te sá ìⁿ ní taxi-n te ní chídó-xí úxí-gá tñàhá te náu-a naqueheⁿ cuendá-n”, cächí-dé xãhaⁿ-dë.

17 Te tée cùu patróóⁿ-dë-áⁿ ní xáhaⁿ-dë: “Ío váha tée xínu cuechi cuu-n chí ío váha ní quide-n, te sá ní quide váha-n ndíhí sacú díhúⁿ sã ní dándõ ndaha ñaha-í xii-n, te xiãⁿ núu yúhú cächí-í sá táxí tñuní-n úxí ñuú vitna”, cächí-dé xãhaⁿ-dë.

18 Te ní ndexio ingá-dé, te ní xáhaⁿ-dë: “Pàtróóⁿ, ní quide-í ndáhú ndíhí díhúⁿ-n sã ní dándõ ndaha ñaha-n xii-í, te sá ìⁿ ní taxi-n te ní chídó-xí úhúⁿ-gá tñàhá te náu-a naqueheⁿ cuendá-n”, cächí-dé xãhaⁿ-dë.

19 Te ní xáhaⁿ tõe cùu patróóⁿ-dë-áⁿ xii-dé: “Te yòhó taxi tñuní-n úhúⁿ ñuú”, cächí-dé xãhaⁿ-dë xii tée xínu cuechi-áⁿ.

20 Te dätñuní ní ndexio tucu ingá-dé, te xáhaⁿ-dë: “Pàtróóⁿ, náu díhúⁿ-n-á, te naqueheⁿ cuendá-n chí ní taxúha-í ní chidúcúⁿ nuu-í ìⁿ pãñú te ñà túú ní quide-í ndáhú ndíhí díhúⁿ-n,

21 chí ní yúhú ñàhá-í xii-n, chí cùu-n ìⁿ tée díí, te nàqueheⁿ-n ìⁿ sá ñà túú ní

tàxi ndecu-n, te nàtahu-n ìⁿ xichi núú ñà túú ní chíhi-n tatá”, cächí-dé xãhaⁿ-dë xii patróóⁿ-dë.

22 Te ní xáhaⁿ patróóⁿ-dë xii-dé: “Yòhó cúu-n ìⁿ tée cuihna iní-xi xínu cuechi núú-í, te díu-ni nchaa tñúhu cãháⁿ-n-ãⁿ cächí tñuní-xi nãcuáa cuu ndáá cuéchi-n. Te núu sãni iní-n sã cúu-í ìⁿ tée díí, te nàqueheⁿ-í ìⁿ sã ñà túú ní tàxi ndecu-í, te nàtahu-í ìⁿ xichi núú ñà túú ní chíhi-í tatá,

23 te núu ducaⁿ ña, ¿te ná cuendá ñà túú ní càhu iní-n dàsaⁿ nuu-n díhúⁿ ní taxi-í, te cúñaha-n chãhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?”, cächí-dé xãhaⁿ-dë xii tée xínu cuechi-áⁿ.

24 Te ní xáhaⁿ tõe cùu patróóⁿ-áⁿ xii cue tée xíndecu xiáⁿ: “Chí quendëé díhúⁿ cuááⁿ néhé tõe-a, te cuáha-ndo tõe nèhe úxí tucu díhúⁿ cuááⁿ-áⁿ”, cächí-dé xãhaⁿ-dë xii-güedë.

25 Te ní xáhaⁿ-güedë: “Pàtróóⁿ, dico sa nèhe-dé úxí díhúⁿ cuááⁿ”, cächí-güedë xãhaⁿ-güedë.

26 Te ní xáhaⁿ tõe cùu patróóⁿ-áⁿ: “Na cächí tñúhu-í xii-ndo sã cuè ñáyiú òó xii-xi te níhí-gã-yu cundecu ndíhí-yu, te cue ñáyiú sacú ndécú ndíhí cuita ndíhí nihnu nchaa sã ndécú ndíhí-yu”, cächí tée cùu patróóⁿ-áⁿ xãhaⁿ-dë xii-güedë.

27 Te xáhaⁿ tucu-dé xii-güedë: “Nchaa ñáyiú cùu úhú iní ñàhá xii-í ñà tñàhá iní-yu quindaha-í-yu, te chí cándecá-yu taquixi ìha, te cahni-ndõ-yu núú-í-a”, cächí tée cùu patróóⁿ-áⁿ xãhaⁿ-dë xii-güedë —duha cuáháⁿ cuendú ní caní Jèsús núú ñáyiú.

Jèsús cuánguìhu-gá ñuú Jerusalén

(Mt. 21:1-11; Mr. 11:1-11; Jn. 12:12-19)

28 Te sátá dúcáⁿ ní cãháⁿ-gá, te ní nucúhuⁿ ichi-gá cuáháⁿ-gá ñuú Jerusalén.

29 Te òré sa ní cuyatni-gá ñuú Bèttagé, ndíhí ñuú Bètaniá te xiáⁿ cáá yùcu naní Olívú, te ní xáhaⁿ-gã xii úú cue tée xica cuu ndíhí-gá:

30 —Chí cuáháⁿ ñuú cáá yàtñi yacáⁿ, te òré quexio-ndo yacáⁿ, te naníhí-ndó ìⁿ búrru ndètníi-di, te vátá yõo ìⁿ-gá codo ñaha xii-di, te nandaxi-ndo-di te candeca-ndo-di quèxi.

31 Te núu yoo na cãcãⁿ tñúhu núú-ndó ñà cuendá nándaxi-ndo-di, te cúñaha-ndo

xii-yu sá yǔhú Yaá xícá cùu ndihí-ndo xini ñuhu-í-di —càchí-gá xáhaⁿ-gǎ xii-güedé.

³² Te cue téé-áⁿ ñí xica-güedé cuáháⁿ-güedé, te nchaa-ni nàcuáa ní xáhaⁿ Jèsús ducaⁿ ñí cuu,

³³ chi mei òré nándàxi-güedé búrru-áⁿ ñí quexìo cue ñáyiú cùu xítohó-di xícáⁿ tnúhu-yu núu-güedé, te xǎháⁿ-yu:

—¿Ná cuendá nándàxi-ndo búrru-ndí-i? —càchí-yu xǎháⁿ-yu.

³⁴ Te ní xáhaⁿ-güedé xii-yu:

—Nà ndaxi-ndí-di chi Yaá xícá cùu ndihí-ndí xíní ñuhu ñaha-gá xii-di —càchí-güedé xǎháⁿ-güedé xii-yu.

³⁵ Te ndèca-güedé-di cuáháⁿ núu ndécú Jèsús, te òré ní quexìo-güedé ndihí-di núu ndécú-gǎ te ní sacáⁿ ndodo-güedé dóo-güedé sátá-di, te ní ngódó ñáhá-gǎ xii-di.

³⁶ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núu dǒo-yu-áⁿ yǎha-gá ndihí quiti yòdo-gá.

³⁷ Te ní nucuíta nuu-gá ichi tindúú yucu Òlívú tá cùyatni-gá ñuú Jerusàlén cuáháⁿ, te nchaa ñáyiú sàndáa iní ñáhá xii-gá nchìcúⁿ ñáhá-yu te ní nguíta-yu níhi càháⁿ-yu sá cúdǐ iní-yu, te càchí-yu sá ío càhnu cuu Yá Ndióxi cuendá sá ñí xini-yu nchaa sá vǎ yǒo tnàhí ndàcu cada ní quide-gá.

³⁸ Te càchí-yu:

—¿Ío càhnu cuu Yaá véxi quindaha ñaha xii-o, te diu-gá cúu-gǎ Yaá ní tendaha Yá Ndióxi véxi quide núu-gǎ! ;Te ío càhnu cuu mee-gǎ! ;Te andiu ñà túú tnàhí ná cúu! —duha càchí-yu.

³⁹ Te ñíⁿ úú cue téé cùu fariséú ñúhú tnàhá tnuú ñáyiú-áⁿ ñí xáhaⁿ-güedé xii Jèsús:

—Mèstrú, cúñaha nchaa ñáyiú ndihí-n na càdí-yu yuhú-yu —càchí-güedé xǎháⁿ-güedé xii-gá.

⁴⁰ Dico Jèsús ní xáhaⁿ-gǎ xii-güedé:

—Te na càchí tnúhu-í xii-ndo sǎ ñuú ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ñíⁿ ñáyiú —càchí-gá xáhaⁿ-gǎ xii-güedé.

⁴¹ Te òré ní cuyatni-gá ñuú Jerusàlén te ní xini-gá, te ní ndáhyú-gá cuendá nchaa ñáyiú dii ñuú-xi-áⁿ sǎ ndihú iní-gá.

⁴² Te ní xáhaⁿ-gǎ xii cue ñáyiú-áⁿ:

—Ío cuu váha iní-í te núu dícó nchòhó tecú tnùní-ndó vitna ñíⁿ tnúhu sá cáda vǎha ñaha xii-ndo, chi ñá túú-gǎ ná cuu cundecu-ndo, te núu na təcú tnùní-ndó. Dico ñá təcú tnùní-ndó, chi ío yidáhu tnúhu-a.

⁴³ Te sáá nduu tnündòho tnúhu ndàhú sá cúu-xi-ndó, te nchaa cue téé dava-gá ñuú cúu úhú iní tnàhá ndihí-ndo quixi-güedé chidoco ñaha-güedé xii-ndo, te ñí càndéé núu ndécú-ndó-áⁿ dacàa-güedé ndóho cuendá xíaⁿ quihí váha-güedé nàá ndihí ñaha-güedé xii-ndo, te vá dáñá-güedé cunu-ndo.

⁴⁴ Te cahni ñaha-güedé xii-ndo, te ndihí nchaa vehe-ndo dàngoyo-güedé ndéé cimiéntú-xi, chi ñá túú ní cuíní-ndó nàcuáha-ndo cuendá òré ní quixi coto ñaha Yá Ndióxi xii-ndo —duha ní xáhaⁿ-gǎ xii ñáyiú ñuú-áⁿ.

Jèsús ñá túú tnàhá iní-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu cue ñáyiú quide ndàhú ndihí cue ñáyiú xísaaⁿ. Te ní queñuhu ñaha Jèsús xii-yu quehé.

⁴⁶ Te ní xáhaⁿ-gǎ xii-yu:

—Núu tütú Yá Ndióxi càháⁿ-xi nàcuáa ní càháⁿ-gá, te duha ní cachí-gá: “Vehe-í cúu-xi núu càháⁿ ndihí ñaha ñáyiú xii-í”, duha ní càháⁿ-gá càchí-xi núu tütú-gá. Dico nchòhó quidé-ndó vehe-gá vehe ñadúhú —càchí-gá xáhaⁿ-gǎ xii-yu.

⁴⁷ Te Jèsús nchaa nduu dànehé-gá ñáyiú xití veñúhu, dico cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue téé cùnuu ñuú-áⁿ ndúcú-güedé nàcuáa cada-güedé cahni ñaha-güedé xii-gá.

⁴⁸ Dico ñá nihí-güedé nàcuáa cada-güedé, chi cuendá nchaa ñáyiú ío cúdǐ iní-yu ndédóho-yu nchaa tnúhu càháⁿ-gá.

20

Jèsús ndécú ndihí-gá tnúhu ndee iní

(Mt. 21:23-27; Mr. 11:27-33)

¹ Te ñíⁿ nduu yíhi Jèsús xití veñúhu càhnu sá ío cùnuu danehé-gá ñáyiú tnúhu sá càháⁿ nàcuáa naníhí tǎhú-yu. Te ní quexìo cue téé

cùu dútú cúnùu ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi cue tée cùu sacuéhé nùú ñáyiú isràél,

² te ní xáhaⁿ-güedě xii-gá:

—Cuìnì-ndí cachí tnúhu-n xii-ndí nása ndùu tnúhu ndee ìní ndécú ndìhi-n núu quíde-n nándi sá quíde-n. ¿Te yoo ducaⁿ ní taxi tnúhu ndee ìní-áⁿ xii-n? —càchí-güedě xáhaⁿ-güedě xii-gá.

³ Te Jèsús ní xáhaⁿ-gã:

—Yúhú tnàhá-í cuìnì-í cãcãⁿ tnúhu-í ñⁿ sá cãcãⁿ tnúhu-í núú-ndó, te cachí tnúhu-ndo.

⁴ Te chí càchí tnúhu xii-í yoo ní táuchíúⁿ ñí dácúandùte ndíi Juàá ñáyiú. ¿Yá Ndiõxí ãⁿ cuè tée ñuyíú-a ní táuchíúⁿ dùcaⁿ ní quíde ndíi? —càchí-gá xáhaⁿ-gã xii-güedě.

⁵ Te ní ngüíta-güedě xitnàha-güedě:

—¿Nása cúñaha-o? Chi núu nà cúñaha-o sã Yã Ndiõxí ní táuchíúⁿ dùcaⁿ ní quíde ndíi Juàá ñá, te quesaha-dě: “¿Ná cuendá ñá túú ní sãndáá ìní-ndó tnúhu ní cãháⁿ ndíi vãíⁿ?”, quesaha-dě.

⁶ Àdi te núu nà cúñaha-o sã cuè ñáyiú ñuyíú-a ní táuchíúⁿ dùcaⁿ ní quíde ndíi ña, te nchaa ñáyiú cuáha ñáhá-yu yúú xii-o, te cahni ñáhá-yu, chi càchí-yu sá ndáá sá Yã Ndiõxí ní táuchíúⁿ-gã ní cãháⁿ ndíi Juàá tnúhu-gá núu ñáyiú —càchí-güedě xitnàha-güedě.

⁷ Te ní xáhaⁿ-güedě xii-gá sá ña túú xìnì-güedě yoo ní táuchíúⁿ dùcaⁿ ní dácúandùte ndíi Juàá ñáyiú.

⁸ Te ní xáhaⁿ Jèsús xii-güedě:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee ìní duha quíde-í —càchí-gá xáhaⁿ-gã xii-güedě.

*Cuendá cue tée cuihna ìní-xi
(Mt. 21:33-44; Mr. 12:1-11)*

⁹ Te sátá dúcãⁿ te ní ngüíta Jèsús ní cani-gá ñⁿ cuendú núu ñáyiú nàcuáa tecú tnùnì-yu tnúhu-gá, te xáhaⁿ-gã xií-yu:

—Ñⁿ tée ní xitu-dé mee-ni yòho yaha stilé núu ñúhú-dě. Te ní sáá ñⁿ nduu quíngaca cuu xica-dě vãi nduu te ní dándóo ndaha-dě sá ñí xitu-dé-áⁿ xii ñⁿ úú cue tée cãháⁿ ndìhi-dé cuendá cada chìuⁿ-güedě, te ní ndatnúhu-güedě sá òré ná cùu te cuu cuendá dava-güedě te ducaⁿ te ní quee-dé cuáháⁿ-dé.

¹⁰ Te sátá ñí sáá nduu ñí cuu nchaa ndéhé yoho yàha stilé sá ñí xitu-dé-áⁿ, te ní xáhaⁿ-dě xii ñⁿ tée xìnu cuechi núú-dě: “Cuáháⁿ cãcãⁿ-n sã cúu cuendá-í núu cuè tée ní dándóo ndàha-í nchaa yoho yàha stilé sá ñí xitu-í”, càchí-dé xáhaⁿ-dě. Te tée xìnu cuechi-áⁿ ñí xica-dé cuáháⁿ-dé, dico cue tée ndèé nchaa yoho yàha stilé-áⁿ ñí tnì-güedě tée xìnu cuechi-áⁿ te ní caniha-güedě, te ní nacuícúⁿ ñáhá-güedě xii-dé, te ñá túú tnàhí ná ní sãñaha-güedě.

¹¹ Te dàtnùnì tée cùu xítóhó nchaa yoho yàha stilé-áⁿ ñí tendaha tùcu-dé ìngá tée xìnu cuechi núú-dě cuáháⁿ-dé, dico diu-ni ducaⁿ ñí quíde ñaha-güedě xii-dé, chi ní xícuèhé ñáhá-güedě, te ní caniha-güedě te ní nacuícúⁿ ñáhá-güedě, te ñá túú tnàhí ná ní sãñaha-güedě.

¹² Te tée cùu xítóhó nchaa yoho yàha stilé-áⁿ ñí tendaha tùcu-dé ìngá-dé cuáháⁿ-dé, te diu-ni ducaⁿ ñí quíde ñaha tùcu-güedě, chi ní dánícuèhé ñáhá-güedě, te ní nacuícúⁿ ñáhá-güedě.

¹³ Te tée cùu xítóhó nchaa yoho yàha stilé-áⁿ ñí sani ìní-dé: “¿Nása cada-í vitna? Váha-gã tendaha-í déhe-í tée ío cùu ìní-a núhú-dé, chi cudana te òré quini ñáhá-güedě xii-dé, te canehe-güedě sá yíñùhu núú-dě”, duha ní sani ìní-dé.

¹⁴ Dico òré ní xìnì cue tée quíde chiuⁿ-áⁿ dèhe xítóhó nchaa yoho yàha stilé-áⁿ, te ní xitnàha-güedě: “Tée-ãⁿ tée véxi nduu táhú ñuhu-a ndìhi nchaa sá cáá núú-xi, dico cahni-o-dě te mee-o ndùu tahú-ó sã ndúú táhú-dě”, càchí-güedě xitnàha-güedě.

¹⁵ Te ní queñuhu ñaha-güedě ñⁿ xio yuhu ñuhu-áⁿ, te ní sahani ñaha-güedě xii-dé —duha cuáháⁿ cuendú ní cani Jèsús núú-yu.

Te dàtnùnì ní xáhaⁿ tùcu-gá xií-yu:

—¿Te nchòhó sa cùtnunì ìní-ndó nàcuáa cada ñaha xítóhó ñuhu-áⁿ xii cue tée-áⁿ ñã?

¹⁶ Chi núhú-dé te cahni-dé cue tée-áⁿ, te dándóo ndaha-dě ñuhu-dé xii cue tée cùtnunì ìní-dé cada ndáá —càchí-gá xáhaⁿ-gã xií-yu.

Te sá dúcãⁿ ñí cãháⁿ-gã, núu ní cachí-yu:

—¿Sá vã càchí Ndiõxí sá dúcãⁿ yàha-o! —càchí-yu.

¹⁷ Te Jèsús ní ndacoto-gá núú-yu, te ní xáhaⁿ-gã:

—Chí cächí tnúhu nása quèe-xi nacuáa cáháⁿ-xi núu tütú Yá Ndiöxí, núu cächí-xi: Yúu sá ní dáquée tíhú cue tée dàcaa vehe ní saa-xi cùu-xi yúu cùnùu vitna.

Duha cächí-xi núu tütú-gá.

18 Te nchaa ñáyiú ñá túu cuini tñi tnúhu-í, te ndohó-yu dàtná ñá ñáyiú tnàhnú duuⁿ òré nduá-yu núu yúu, àdi núu na tàu ñáhá-xí te dàcachi duuⁿ ñaha-xi —cachí-gá xáhaⁿ-gá xii-yu.

Cuendá impuèstú

(Mt. 21:45-46; 22:15-22; Mr. 12:12-17)

19 Te cue tée cùu dütú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés ní cuini-güedé tñi-güedé Jèsús òré-ni-á ní cùu, chi ní cutnùní iní-güedé sá cuendá-güedé ní cáháⁿ-gá, dico ní yuhú-güedé cuendá sá ìo vài ñáyiú.

20 Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndücu-güedé nàcuáa cada-güedé núu cáháⁿ-gá ñá tnúhu sá ñá túu tàu-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núu tē cùnùu.

21 Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiú mee-ni tnúhu váha, te cuèi ndédani càa ñáyiú ñá-ni cáháⁿ-n ndihí-yu, te cáháⁿ ndáá-n nàcuáa cáháⁿ Yá Ndiöxí cundecu-ò ñuyíu-a.

22 Te cachí tnúhu xii-ndí núu váha-ni cháhu-ndí té Cèsár téé ìo cùnùu cuendá impuèstú ñá ñáhá —cächí-güedé xáhaⁿ-güedé xii-gá.

23 Dico Jèsús ní cutnùní iní-gá sá xító ndèé ñáhá-güedé xii-gá, núu ní xáhaⁿ-gá xii-güedé:

24 —Chí dánèhé ñáhá xii-í ñá díhúⁿ cuixíⁿ te cachí tnúhu-ndo núu yoo núu-xi ndèé, ndihí yoo ñu-xi ndéé —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Núu tē Cèsár ndéé ndihí ñu-dé — cächí-güedé xáhaⁿ-güedé xii-gá.

25 Te ní xáhaⁿ tucu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá méé Yá Ndiöxí, te xíáⁿ nacuáha-ndo-gá —cächí-gá xáhaⁿ-gá xii-güedé.

26 Te ñá ní ndàcu tnahí-güedé datìcànùu ñaha-güedé xii-gá núu tnúhu cáháⁿ-gá, chi òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyiú ndoto

(Mt. 22:23-33; Mr. 12:18-27)

27 Te sátá dúcáⁿ te ní sáá ñá ùú cue téé cùu saducéú núu ndécú Jèsús. Te cue téé-áⁿ ñá túu sàndáá iní-güedé sá ndótó cuè ñáyiú ní xihí, te ní xáhaⁿ-güedé xii-gá:

28 —Mèstrú, ndíi Moisés cächí ndíi núu tütú ndècu vitna sá núu ñá téé na cùu, te quendóo ñadihí-dé te ñá túu ñéhe-dé ní xóo ndihí-aⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuendá coo ñéhe-dé ndihí-aⁿ cuendá ñaní-dé téé ní xihí-áⁿ.

29 Te ní xíndecu úsá tnahá cue téé mee-ni ndí ñaní-güedé. Te téé díhna ní níhí ñadihí-dé, dico ñá túu ní cùdí-dé cundecu-dé chi ní xihí-dé, te ni ñá déhe-dé ñá túu ní xóo ndihí ñadihí-dé-áⁿ.

30 Te téé cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ñá tucu ñéhe-dé ñá túu ní xóo ndihí ñaha-áⁿ.

31 Te téé cùu uní ní naqueheⁿ tucu-dé ñaha ní quendóo quèé-áⁿ, te ñu-ni ducaⁿ ní xihí-dé, te ní xínu ndí ùsá-güedé ní cándeca ñaha-güedé xii ñaha-áⁿ, dico ni ñá-güedé ñá túu ní xóo ñéhe-güedé ndihí-aⁿ, te ní ndihí-güedé ní xihí.

32 Te ndéé núu ní ndihí-ná ní xihí tnahá ñadihí-áⁿ.

33 Te na sáá nduu ndòto-güedé ndihí ñaha-áⁿ ¿Te ndédacàa-güedé ñadihí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —cächí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchaa ñáyiú ñuyíu-a tñandahá-yu.

35 Dico nchaa ñáyiú ní nduu táhú ndoto díhna nuu ñáyiú-áⁿ cundecú-yu ndihí Yá Ndiöxí ni caa ni quíhíⁿ, te yacáⁿ ñá túu-gá sá cándeca tnahá-yu.

36 Te ni ñà túú-gã tnúhu xihí, chi cuu-ná-yu dàtná cue espíritú xínú cuèchi núú Yã Ndiõxí cuendá sá ñi ndotó-yu, chi cuú-yu déhe-gá.

37 Te ndéé ndíi Moisés ní chídó tnùní ndíi núú tütú ndíi sá ncháá ñáiyu ní xihí ndotó-yu, te ñu-ni xíáⁿ càháⁿ-xi cuendá tnutáú nchícúⁿ ñuhú, te ñu-ni xíáⁿ càchí tucu-xi sá Yã Ndiõxí cúú-gã Ndiõxí ndíi Àbrahám, ndíi Isàác, ndíi Jàcób.

38 Te cue téé-áⁿ chi cuèi ní xihí-güedé sá cúú-xí nchòhó, dico sá cúú-xí Yã Ndiõxí chi ndècu vívú-ni-güedé. Chi cùnuni iní-ó sá Yã Ndiõxí cúú-gã Ndiõxí mee-ni cuè ñáiyu xíndecu vívú, te ñá túú cùu-gá Ndiõxí cue ñáiyu ñá túú ndècu vívú. Te sá cúú-xí mée-gá chi nchaa ñáiyu ndècu ndíi-gá ndécú vívú-yu cuèi sa ní xihí-yu núú ñùyú-a —càchí-gá xáhaⁿ-gã xii-güedé.

39 Te ñiⁿ téé dàcuaha ñaha xii ñáiyu nchaa tnúhu ní chídó tnùní ndíi Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá.

40 Te ñá túú-gã ní cùyi-güedé cacaⁿ tnúhú-güedé ñi ñiⁿ tnúhu núú-gã.

*Yoo déhe-xi cùu Cristú
(Mt. 22:41-46; Mr. 12:35-37)*

41 Te Jèsús ní xáhaⁿ-gã xii-güedé:

—¿Te nása càchí-tu-yu sá Crìstú Yaá tendaha Yã Ndiõxí quixi ñuyú-a cùu-gá déhe ndíi Dàvíí?

42 Te mee ndíi Dàvíí-áⁿ ñi cachí ndíi núú librú Sãlmú:

Dútú Ndiõxí ní xáhaⁿ-gã xii Yaá cúú Xítohó-í:

“Ngóo xio cùha-í,

43 te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiõxí xii Yaá cúú Xítohó-í càchí ndíi núú librú Sãlmú.

44 ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gã Xítohó ndíi-i? —càchí Jèsús xáhaⁿ-gã xii-güedé.

Jèsús càháⁿ-gá cuendá cue téé dàcuaha ñaha xii ñáiyu nchaa tnúhu ní chídó tnùní ndíi Moisés

(Mt. 23:1-36; Mr. 12:38-40; Lc. 11:37-54)

45 Te òré ndátnùhu Jèsús ndíi cue téé xíca cuu ndíi-gá xíndedóho ñaha ñáiyu, te xáhaⁿ-gã xii-güedé:

46 —Cada cuendá-ndó vã cáda-ndó nàcuáa quide cue téé dàcuaha ñaha xii ñáiyu nchaa tnúhu ní chídó tnùní ndíi Moisés, chi tnàhá iní-güedé cuihnu-güedé dóo nání sá sácuíhnu cue téé cùnuu. Te nchaa núú tàcá ñáiyu cuení-güedé sá ndíi tnúhu yíñùhu càháⁿ ndíi ñáhá-yu xii-güedé, te nàcáxi-güedé xilé sácóo nchíi cue téé cùnuu-gá xití veñúhu conchíi-güedé, te ducaⁿ-ni quide-güedé cuèi òré quihu-güedé mèsá caxi-güedé òré ndécú-güedé ñiⁿ vico, chi mee-ni núú sácóo cue téé cùnuu-gá cuení-güedé coo-güedé.

47 Te quèndeé-güedé vehe nchaa ñáiyu dñí ñáiyu quèé, te ío naha càháⁿ ndíi-güedé Yã Ndiõxí cuendá cuení-güedé càháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáiyu —càchí-gá xáhaⁿ-gã xii-güedé.

21

*Díhúⁿ nduu táhú Yã Ndiõxí ní dáquëe ñiⁿ
ñaha ndàhú ñaha quèé
(Mr. 12:41-44)*

1 Te Jèsús ní xiní-gá xití veñúhu xídáquëe cue téé cuica díhúⁿ nduu táhú Yã Ndiõxí xití alcanciá.

2 Te ní xiní-gá tnàhá ñiⁿ ñaha ndàhú ñaha quèé ní dáquëe-aⁿ úú díhúⁿ còbrí,

3 te ní xáhaⁿ Jèsús xii cue ñáiyu xíndecu-áⁿ:

—Na càchí tnúhu ndáá-í xii-ndo sá ñaha ndàhú ñaha quèé-a ío-gá nándíi díhúⁿ ní dáquëe-aⁿ xití alcanciá nduu táhú Yã Ndiõxí dàcúxí díhúⁿ ní dáquëe dáva-gá-yu.

4 Chi nchaa ñáiyu-áⁿ ní dáquëe-yu mee-ná sá ñi ndóo-ná, dico ñaha quèé-a cuèi ndàhú-aⁿ dico ní dáquëe-aⁿ ñiⁿ díhúⁿ sá cuááⁿ-áⁿ sá cáxí-áⁿ ní cùu —cachí-gá xáhaⁿ-gã xii-yu.

*Jèsús càchí-gá sá ngóyó veñúhu
(Mt. 24:1-2; Mr. 13:1-2)*

5 Te ñiⁿ ùú ñáiyu xícháⁿ-yu cuendá veñúhu càhnu sá ío cùnuu sá ío víi càa nchaa yúú yíhí, ndíi cuendá nchaa sá ñi sáñaha

táhú ñáyiú yìhi xití-xi. Te Jèsús ní xáhaⁿ-gã xií-yu:

6—Sáá nduu te nchaa sá cúññhu-ndo-a vã cùndùu-gá-xi dàtná cáá-xí vitna, chi ni ñⁿ-gá yúú vã códó nchìhi tnaha-gá-xi chi ndìhi ngoyo —càchí-gá xáhaⁿ-gã xií-yu.

Nàcuáa cada-xi nduu ta cuyatni naa ñuyíú (Mt. 24:3-28; Mr. 13:3-23)

7 Te cue téé xĩndecu-áⁿ ñí xicáⁿ tnúhú-güedě núú Jèsús, te xáhaⁿ-güedě xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nándi cùu sá cádá-xí cuendá cutnùní iní-ndí sá sà ta cuyatni nduu ducaⁿ cada-xi-i? —cachí-güedě xáhaⁿ-güedě xii-gá.

8 Te Jèsús ní xáhaⁿ-gã xii-güedé:

—Ío quíhi iní-ndó cùndecu-ndo, te vã dáñá-ndó mée-ndo dandahú ñáhá ñáyiú xii-ndo. Chi ío cuéhé cue téé coo ñuyíú-a, te danàni-güedé mée-güedě dàtná nàni-í te cachí-güedé: “Yúhú cùu-í Crístú Yaa ní tendaha Yá Ndiõxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vã quèndáá iní-ndó, te nì vã túhá-ndó-güedě.

9 Te òré ná nihí-ndó tnùhu sá titní nacióⁿ xĩnàá-güedé te dava ñuú xĩnàá-güedé ndi mée-güedé, te vã yùhú-ndó chi dacuití sã dúcáⁿ càda-xi, dico vátá sàá-gá nduu nàa ñuyíú òré ducaⁿ càda-xi —cachí-gá xáhaⁿ-gã xii-güedé.

10 Te xáhaⁿ tucu-gá xii-güedé:

—Nchaa cue téé ñⁿ nacióⁿ nàá-güedé ndìhi cue téé ingá nacióⁿ, te titní ñuú ngüíta-güedé nàá-güedé.

11 Te titní xichi ñuyíú ñìhi vìhi tnáa, te titní tucu xichi ñuyíú coo tnamá, te titní tucu xichi ñuyíú quixi cuéhé, te titní núú sã cádá-xí àndiú, te yùhú ñáyiú.

12 Te òré cúmàní-gã cada-xi nchaa nàcuáa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedě xii-ndo quíhíⁿ xití veñúhu-güedé cada ndáá-güedé cuéchi-ndo, te chihi ñaha-güedě vecaá xii-ndo, te candeca ñaha-güedě quíhíⁿ núú

cuè téé cùnuu yĩndaha nacióⁿ àdi núú dàva-gá cue téé cùnuu sá cuendá-í.

13 Te òré ducaⁿ na càda ñaha-güedé xii-ndo, te òré-áⁿ tàú-xi cáháⁿ váha-ndo cuendá-í núú-güedě.

14 Te vã cání iní-ndó ñuú nása cunduu tnúhu cúñaha-ndo xii-güedé cuendá cácu ni-hnu-ndo.

15 Chi yúhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sá vátá quini tnùní-gá-ndó, te ni ñⁿ ñáyiú cùu úhú iní ñáhá xii-ndo vã ñihí-gá-yu tnúhu cúñahá-yu xii-ndo.

16 Te ndéé tātá-ndó, ndìhi ñaní-ndó, ndìhi cue ñáyiú cùu ñaní tnáhá-ndó, ndìhi cue ñáyiú càháⁿ ndìhi váha-ndo cuáha cuendá ñáhá-yu xii-ndo núú cuè téé cùchiuⁿ, te dava-ndo càhni ñaha-güedé xii-ndo.

17 Te ío cuéhé ñáyiú cuu úhú iní ñáhá-yu xii-ndo sã cuendá-í.

18 Dico Yá Ndiõxí ío coto ñaha-gã xii-ndo chi ndéé idi díquí-ndó còto-gá.

19 Te núu na càda ndee iní-ndó càchicúⁿ nihnu ñaha-ndo xii-í, te nduu táhú-ndó cùndecu-ndo ndìhi Yá Ndiõxí ñi caa ñi quíhíⁿ.

20 Te nduu na quini-ndó ñùhu doco sandadú ñi càndéé yuhu ñuú Jerusàlén, te sa cutnùní iní-ndó sã sà ní cuyatni nduu dànaa-güedé ñuú-áⁿ.

21 Te dàvá-áⁿ nchaa ñáyiú xĩndecu distritú Jùdeá xini ñùhu-xi cunú-yu quíhíⁿ-yu xití yucu, te nchaa ñáyiú xĩndecu ñuú Jerusàlén queé-yu xití ñuú-áⁿ, te ñáyiú ñá túú xĩndecu ñuú-áⁿ vã ndìhu-gá-yu.

22 Chi dàvá-áⁿ cuu-xi nduu tnùndòho tnúhu ndàhú, te ducaⁿ càda-xi chi ducaⁿ ndéé tnuní núú tütú Yá Ndiõxí nàcuáa dandòho ñaha-gá xii-yu.

23 ¿Te ndàhú ní cuu nchaa ñáyiú dèhí ñùhú dèhe-xi, ndìhi nchaa ñáyiú ndèca déhe vitna sàdi ña sáá nduu dùcaⁿ cada-xi! Chi ío cuéhé tnùndòho tnúhu ndàhú coo núú ndécú-yu dàvá-áⁿ, te xíáⁿ cuu-xi ñⁿ tnùndòho tendaha Yá Ndiõxí quixi sá cúu-xí-yu.

24 Te dava cue téé cuú-güedé cahni ñaha-güedě, te dava-güedé tñi ñaha-güedě candeca ñaha-güedě quíhíⁿ nchaa ñuú xicá, te cue téé dava-gá ñuú cunuu-güedě ñuú

Jerusalén, te mee Yă Ndiöxí cachí-gá te núu ná daha nduu cunuu-güedě ñuú-áⁿ.

Nàcuáa cada-xi òré quixi tucu Tée cùu ñani tnáhá cuè ñáyiu

(Mt. 24:29-35, 42-44; Mr. 13:24-37)

²⁵ Te cada-xi ñⁿ sá vátá quíní-gá ñáyiu núu nchíanchii, ndihí núu yóó, ndihí núu nchàa chódíní, te ñuyú-a coo tnúhu ndihú iní-xi te vá cútnúni iní-yu nása cada-yu cuendá sá ño dusaⁿ càda ndute lamár òré candaundéé tnáhá-xí.

²⁶ Te nchaa ñáyiu cuneé-yu sá yùhú-yu, ndihí sá ndihú iní-yu cuendá nchaa sá cáda-xí ñuyú-a, te quidi-xi andiu.

²⁷ Te sátá dúcáⁿ te quini-ndó yùhú Tée cùu ñani tnáhá-ndó nchàa-ndo quee-í andiu quixi-í ichi xití vícò, te dàvá-áⁿ quini ñáhá nchàa ñáyiu sá ño cùnuu-í te ndàcu-í quide-í nchaa sá vâha.

²⁸ Te òré ná nguíta-xi ducaⁿ càda-xi, te cuita cundee-gã iní-ndó quíhíⁿ, te quihí iní-ndó chi sa ní cuyatni víi-nã nduu căcu nihnu-ndo vã cundècu-gá-ndó núu ñuyú yíca cuèchi-a —càchí-gá xáhaⁿ-gã xii-güedě.

²⁹ Te ní cani-gá ñⁿ cuendú núu-güedě nàcuáa tecú tnúni váha-güedě tnúhu-gá, te xáhaⁿ-gã xii-güedě:

—Chí cundèhe yutnu ngúxí ndihí nchaa dava-gá yutnu.

³⁰ Chi nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni.

³¹ Te diu-ni ducaⁿ sãtnahá-xi cùu òré ná quini-ndó càda-xi nchaa nacuáa càháⁿ-í, te sá dúcáⁿ te cutnúni iní-ndó sã sã ní cuyatni nduu ndihu ndaha ñàha Yá Ndiöxí xii-ndo.

³² Te na càchí tnúhu ndáá-í xii-ndo sã òré vátá cùu-gá cue ñáyiu xíndecu ñuyú-a vitna, te cada-xi nchaa nàcuáa ní cáháⁿ-í.

³³ Te andiu ndihí ñuyú-a chi ndihí nihnu-xi, dico tnúhu-í chi vá ndihí nihnu-xi, chi cùu-xi tnúhu ndáá.

³⁴ Te quihí iní-ndó vã cundècu-ndo ichi cuehé ichi duha, te vá cúu-ndó ñáyiu quihu, te vá cúhúⁿ iní-ndó mèe-ni nchaa sá ño ñuyú-a, chi núu ducaⁿ na càda-ndo te nacuanaa-ndo sã sã nduu càda-xi nacuáa ní cáháⁿ-í. Te uuⁿni sáá nduu-ãⁿ,

³⁵ te cada-xi dàtná cuini-ndó quide ñⁿ trampá chi uuⁿni ngáva-xi, te ducaⁿ càda-xi

nchaa ñáyiu xíndecu ñuyú-a, chi uuⁿni sáá nduu-ãⁿ.

³⁶ Te nchòhó cundecu túha-ndo te ño cáháⁿ ndihí-ndo Yă Ndiöxí cuendá ndacu-ndo yáha-ndo nchaa tnúndòho quixi ñuyú-a, te ducaⁿ te nasáá-ndó cundecu-ndo núu ndécú yùhú Tée cùu ñani tnáhá-ndó nchàa-ndo —cachí-gá xáhaⁿ-gã xii-güedě.

³⁷ Te nduu nduu ní xóo danèhé Jèsús ñáyiu tnúhu-gá xití veñúhu càhnu sá ño cùnuu, te niú niú ní xóo quíhíⁿ ngúdú-gá xití yucu Olívú.

³⁸ Te nehé nehé ní xóo quíhíⁿ nchaa ñáyiu veñúhu-áⁿ ní xóo cundedòho-yu nchaa tnúhu càháⁿ-gá.

22

Ndùcu-güedě nàcuáa cada-güedě cahni-güedě Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico pàscuá, te vico-áⁿ xexí ñáyiu pàá sá ñà túú yíhi levadurá.

² Te cue tée cùu dútú cúnúu, ndihí cue tée dàcuaha ñaha xii ñáyiu nchaa tnúhu ní chídó tnúni ndíi Moisés ndúcú-güedě nàcuáa cada-güedě cahni-güedě Jèsús, te dícò-ni sá xiyùhú-güedě ñáyiu.

³ Te yucu ñávâha ní dácáhu iní ñáhá-xí xii té Jüdás déhe té Iscarioté, te núu tnáhá tée-áⁿ cúu ùxúú tnáhá cue tée xica cuu ndihí-gá ní cùu.

⁴ Te té Jüdás-áⁿ ní sáháⁿ-dé ní ndatnúhu-dé ndihí cue tée cùu dútú cúnúu, ndihí cue tée tàxi tnúni ñáhá xii cue tée quide cuendá veñúhu nàcuáa cada-dé cuáha cuendá-dé Jèsús núu-güedě.

⁵ Te ño ní cudíi iní-güedě, te ní xáhaⁿ-güedě xii-dé sá cuãñaha-güedě díhúⁿ,

⁶ te ní xáhaⁿ-dè sá cúu quèheⁿ-dé díhúⁿ-ãⁿ, te ní nguíta-dé ndúcú-dè nàcuáa cada-dé cuáha cuendá-dé Jèsús núu-güedě òré ñà túú ñáyiu.

Cùdini Jèsús ndihí cue tée xica cuu ndihí-gá (Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu ní quesaha vico xexí-yu pàá sá ñà túú yíhi levadurá, te diu-ni nduu-ãⁿ sáhní-güedě ñⁿ mbéé líhli xexí-yu.

⁸ Te Jèsús ní xáhaⁿ-gǎ xii té Pèlú ndihì té Juàá:

—Chí cuáháⁿ chi cada túha-ndo núú cúdini-o sacuaa nduu vico pascuá —càchí-gǎ xáhaⁿ-gǎ xii-güedé.

⁹ Te ní xicáⁿ tnúhú-güedě núú-gǎ, te xáhaⁿ-güedě xii-gǎ:

—¿Te ndéé cáá vèhe cuiní-n càda túha-ndí-i? —càchí-güedé xáhaⁿ-güedě xii-gǎ.

¹⁰ Te ní xáhaⁿ Jèsús xii-güedé:

—Chí cündèdóho ña càchí tnúhu-í xii-ndo nàcuáa cada-ndo. Òré quihu-ndo xití ñuú núú quihíⁿ-ndó, te naníhí-ndó ñⁿ té tãnehe ñⁿ yoó ndute, te téé-áⁿ candéndaha-ndo-dě quihíⁿ, te núú ndédacàa vehe na ndíhu-dé te xíáⁿ quihu-ndo.

¹¹ Te cúñaha-ndo xii xítóhó vehe-áⁿ: “Yaá cúú Mèstrú càchí-gǎ núú ndédacàa xichi xití vehe-n cuñaha nùu-n xii-gǎ cudini-gǎ ndihì cue téé xica cuu ndihì-gǎ sacuaa nduu vico pascuá”, duha cúñaha-ndo.

¹² Te dàtnùní danéhé ñáhá-dě xii-ndo ñⁿ quartú cáhnú càa núú ñnu, chi vehe yòdo tnaha cuu-xi, te sa ní quide túha-dé nchaa sá ná ndihì, te nchòhó dícó-nǎ sá cúdini-o cada túha-ndo —càchí-gǎ xáhaⁿ-gǎ xii-güedé.

¹³ Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndihì-gǎ sacuaa nduu vico pascuá-áⁿ.

¹⁴ Te sátá ñi tnahá òré cudini Jesús ndihì cue téé ní táuchíúⁿ-gǎ cáháⁿ tnúhu-gǎ núú ñǎyiu, te cuánguihu ndihì ñaha-gǎ xii-güedé mèsá.

¹⁵ Te xáhaⁿ-gǎ xii-güedé:

—¿Ducaⁿ-ni ño sàni iní-í sá cúdini ndihì ñaha-í xii-ndo sàcuua nduu vico pascuá òré cúmǎní-gǎ sáá nduu ndòho-í te cuú-í!

¹⁶ Te na càchí tnúhu-í xii-ndo sǎ vǎ dúhá-gǎ caxi ndihì ñaha-í xii-ndo ndùu vico pascuá, chi ndéé òré ná sàá nduu nàsáá-ndó núú táxí tnùní Yǎ Ndiòxí cundecu-o, te dàvá-áⁿ cada iní-ndó sǎ dàtná sá cǎxí tùcu-o chi ío váha cuu iní-ó cündecu-o —càchí-gǎ xáhaⁿ-gǎ xii-güedé.

¹⁷ Te ní queheⁿ-gǎ ñⁿ vǎsú ñúhú ndùdí ndéhé yoho yàha stilé, te ní ndacáⁿ táhú-gǎ

núú Yǎ Ndiòxí, te dàtnùní ní xáhaⁿ-gǎ xii-güedé:

—Chí quéhéⁿ vǎsú ñúhú ndùdí ndéhé yoho yàha stilé-a, te coho-ndo lùha luha nchaa-ndo.

¹⁸ Te na càchí tnúhu tucu-í xii-ndo sǎ vítná-nǎ duha xihì ndihì ñaha-í xii-ndo ndùdí ndéhé yoho yàha stilé-a te vǎ cóhó ndihì ñaha-gǎ-í, dico na sàá nduu nàníhí tnáhá-ó núú ndécú Tǎtà-í Dútú Ndiòxí táxí tnùní-gǎ, te dàvá-áⁿ cada iní-ó sǎ dàtná sá cóhó ndihì ñaha tucu-í xii-ndo, chi ío cudíí iní-ó —càchí-gǎ xáhaⁿ-gǎ xii-güedé.

¹⁹ Te sátá ñi túhú cóhó-güedě ní cudini-güedé, te ní queheⁿ-gǎ pàá te ní ndacáⁿ táhú tùcu-gǎ núú Yǎ Ndiòxí, te dàtnùní ní táhú cuèchi-gǎ, te ní dácáhñu ñaha-gǎ xii-güedé, te xáhaⁿ-gǎ:

—Pàá-a cùu-xi datná yiqui cùñú-í, chi cahni ñaha-güedě xii-í sá cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —càchí-gǎ xáhaⁿ-gǎ xii-güedé.

²⁰ Te ñu-ni ducaⁿ ñi quide-gǎ ndihì vǎsú ñúhú ndùdí ndéhé yoho yàha stilé, chi ní queheⁿ-gǎ te òré sǎñaha-gǎ xii-güedé coho-güedé, te ní xáhaⁿ-gǎ:

—Ndudí ñúhú vǎsú-a cada iní-ndó sǎ cúú-xí dàtná ñíñi-í sá catí òré cahni ñaha-güedě xii-í. Te sá dúcáⁿ càti ñíñi-í xíáⁿ cutnùní ndáá sá Yǎ Ndiòxí cada-gǎ ñngǎ núú sǎ vǎha sá cúú-xí-ndó.

²¹ Dico vitna chi iha tnáhá téé cuáha cuendá ñáhá xii-í núú cuè téé cùu úhú iní ñáhá yihì-dé mèsá.

²² Te yúhú Téé cùu ñani tnáhá-ndó nchaa-ndo ñuhu ichi-í cuáháⁿ-í cuú-í dàtná ní cachí Yǎ Ndiòxí. ¿Dico ndáhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá! —càchí-gǎ xáhaⁿ-gǎ xii-güedé.

²³ Te ní ngüíta-güedé ndúcú tnúhu núú tnáhá-güedě núú ndéda càa-güedé ducaⁿ càda cuáha cuendá ñáhá xii-gǎ núú cuè téé cùu úhú iní ñáhá.

Xíndatnúhu-güedé ndédacàa-güedé cunuu-gǎ

²⁴ Te sátá dúcáⁿ te ní ngüíta-güedé xíndatnúhu-güedé núú ndédacàa-güedé tàú-güedé cunuu-güedé.

²⁵ Dico Jèsús ní xáhaⁿ-gǎ xii-güedé:

—Nchaa cue tée yíndaha ñaha xii ñáyiú ío tàxi tnuní-güedé, te mee-güedé cuíní-güedé sá càháⁿ váha ñáyiú cuèndá-güedé.

²⁶ Dico nchòhó vá dúcáⁿ càda-ndo, chi núu ìⁿ-ndo cùnúu te cada-ni-ndo sá ñà túú cùnúu-ndo, àdi cuu-ndo ìⁿ tée tàxi tnuní ñáhá xii cue tée xínu cuechi, te cada-ni-ndo sá cúú-ndó ìⁿ tée xínu cuechi-áⁿ.

²⁷ Te vá càchí-ó sá tée xínu cuechi cunuu-gá-dé, chi tée quíhu mèsá cúnúu-gá-dé. Dico yúhú ndécú ndìhi ñaha-í xii-ndo dàtná ìⁿ tée xínu cuechi.

²⁸ Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá táyáha-í véxi.

²⁹ Te Tàtá-í Dútú Ndiòxí ní cachí-gá sá táxi tnuní-í, te yúhú càchí-í xii-ndo sá sàa nduu te tnàhá-ndó tàxi tnuní-ndó.

³⁰ Te dàvá-áⁿ caxi-o coho-o càda-o núú táxi tnuní-í, te yàcáⁿ ngüíta-ndo càda ndáá-ndó cuèchi ndi ùxúú xichi ñáyiú isràél —càchí-gá xáhaⁿ-gá xii-güedé.

Jèsús càháⁿ-gá sá tē Pèlú cúñaha-dě xii ñáyiú sá ñà túú xini ñáhá-dě xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítóhó Jesucristú ní xáhaⁿ-gá xii té Xímú:

—Yòhó Xímú, cundedóho váha ìⁿ tnúhu na càháⁿ-í-a, chi dàtná cuíní-n quide táchí triú sàcáⁿ-xi duha sàcáⁿ-xi dàcáⁿ, ducaⁿ quèsaha yucu ñáváha cada ñaha-xi xii-ndo. Chi coto ndeé ñáhá-xi xii-ndo te núu ndisa sàndáá iní ñáhá-ndó xii-í.

³² Dico yúhú xicáⁿ táhù-í núú Yá Ndiòxí cuèndá-n, cuèndá sá vǎ dáñá ndèe-n quíndáá iní ñáhá-n xii-í. Te òré ndixi túu iní-n sá ñà túú ní quide váha-n, te quíhíⁿ-n cuáha-n cuè tée cündihí-n tnúhu ndee iní cuèndá canchicúⁿ nihnu-ni-güedé ichi Yá Ndiòxí —càchí-gá xáhaⁿ-gá xii-dé.

³³ Te ní xáhaⁿ-dě xii-gá:

—Mèstrú, sa ndècu túha-í sá quíhíⁿ ndìhi ñaha-í xii-n vècaá, àdi cuéi na cùú ndìhi ñaha-í xii-n —càchí-dé xáhaⁿ-dě xii-gá.

³⁴ Te Jèsús ní xáhaⁿ-gá:

—Pèlú, na càchí tnúhu-í xii-n sá cùmání-gá cana ìⁿ líhi te úní xito càháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gá xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gá xii-güedé:

—Te cútñahá ní tendaha ñaha-í xii-ndo ñi sáháⁿ-ndó chiuⁿ-í, chi ñà túú ní cǎnehe-ndo ñi ìⁿ sá cùhúⁿ díhúⁿ-ndó, te ñi ìⁿ sá cùhúⁿ ndáchíuⁿ-ndo ñà túú ní cǎnehe-ndo. Te chí càchí tnúhu núu ío ìⁿ sá ñi cùmání xii-ndo —càchí-gá xáhaⁿ-gá xii-güedé.

Te ní xáhaⁿ-güedé:

—Ñáhá, chi ñi ìⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gá:

—Te vitna núu ndècu ndìhi-ndo sá sácùhuⁿ díhúⁿ-ndó, àdi sá sácùhuⁿ ndáchíuⁿ-ndo te canehe-ndo. Te núu ñà túú ndècu ndìhi-ndo machití, te nadico-ndo dǒo tǐcachi nihnu-ndo te cuaaⁿ-ndo.

³⁷ Te na càchí tnúhu-í xii-ndo sá dàcuítí sá yáha-í nàcuáa càháⁿ-xi núú tütú Yá Ndiòxí núú càchí-xi: “Íⁿ-ni ñi quide ñaha-güedé xii-gá, ndìhi cue tée ndècu cuéchi-xi”, duha càchí-xi núú tütú-gá. Te ñà díú-ní xǎⁿ yáha-í chi nchaandi túhú nàcuáa càháⁿ-xi núú tütú-gá yáha-í —càchí-gá xáhaⁿ-gá xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gá:

—Chí návíi-ñá yuhu-ndo, vá càháⁿ-gá-ndó —càchí-gá xáhaⁿ-gá xii-güedé.

Jèsús càháⁿ ndìhi-gá Yá Ndiòxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gá cuáháⁿ-gá yucu Òlívú, chi ducaⁿ tnàhí quide-gá. Te cue tée xica cuu ndìhi-gá nchicúⁿ ñáhá-güedé xii-gá cuáháⁿ.

⁴⁰ Te òré ní quexìo-gá xíaⁿ, te ní xáhaⁿ-gá xii-güedé:

—Chí càháⁿ ndìhi Yá Ndiòxí cuèndá sá vǎ dàcàháⁿ ñáhá yucu ñáváha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gá xii-güedé.

⁴¹ Te sáta dúcáⁿ te ní quee dìⁿ-gá tnuú-güedé cuáháⁿ-gá ìⁿ xio, te sa ñùnchíí luha ní xica ndehe-gá núú ndécú-güedé, te xíaⁿ ñi ngüíñí xití-gá càháⁿ ndìhi-gá Tàtá-gá Dútú Ndiòxí.

⁴² Te xáhaⁿ-gá:

—Táu, te núu dicó cachí-n te taunihnu ñaha-n xii-í cuèndá sá vǎ ndóhò-í ná sàá òré, dico vá cadá-n nàcuáa càchí iní mèe-í, chí

cada-n nàcuáa càchí iní méé-n —càchí-gá xáhaⁿ-gã xii Tátá-gã Dútú Ndiöxí.

43 Te sátá dúcáⁿ te ní quexìo ìⁿ espíritú xínú cuèchi núú Yã Ndiöxí ní sáñaha-gã-xi tnúhu ndee ìní xii-gá.

44 Te òré súúní ndìhú iní-gá, te uuⁿ-gá súúní nì yuhu nì iní-gá càháⁿ ndìhi-gá Dútú Ndiöxí, te tnéé-gã cáá dàtná cáá ññí te ngóyó núú ñúhú.

45 Te sátá ñí yáha ní cáháⁿ ndìhi-gá Tátá-gã Dútú Ndiöxí, te ní ndacuñí-gá cuánuhú-gá núú ñí dándöo-gá cue téé-áⁿ, te òré ní nasáá-gá te xíxídí-güedé cuendá sá ìo cuéhé tnúhu sàni iní-güedé cuendá-gá.

46 Te xáhaⁿ-gã xii-güedé:

—¿Ná cuendá xídí-ndó? Chí ndácöo, te cáháⁿ ndìhi-ndo Yã Ndiöxí cuendá sá vã dácàháⁿ ñáhá yücu ñávãha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gã xii-güedé.

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ìⁿ téé xìca cuu ndìhi-gá nání Jüdás cúnú-dé yódó nù-dé núú-güedé ní quexìo ndéé núú-gã, te ní teyuhu ñàha-dé xii-gá, te núú tnàhá téé-áⁿ cúú ùxúú cue téé xìca cuu ndìhi-gá.

48 Te ní xáhaⁿ Jèsús xii-dé:

—Jüdás, ¿te yòhó cuáha cuendá ñáhá-n xii yúhú Téé cùu ñaní tnàhá-ndó nchàa-ndo núú cuè téé cùu úhú iní ñáhá xii-í cáháⁿ-n núu duha tèyuhu ñàha-n-áⁿ? —càchí-gá xáhaⁿ-gã xii-dé.

49 Te sátá ñí xíní nchaa cue téé cùndìhi Jèsús nàcuáa cùu cue téé ní quexìo-áⁿ, núú ní xícáⁿ tnúhú-güedé núú-gã, te xáhaⁿ-güedé xii-gá:

—Mèstrú, ¿cuu nàá-ndí ndìhi-güedé ndìhi machítí-a ñã? —càchí-güedé xáhaⁿ-güedé xii-gá.

50 Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dútú cúnú-gá, te ní quen-deé duuⁿ lóho-dé.

51 Te Jèsús ní xáhaⁿ-gã xii-güedé:

—Chí dáñá-güedé, vá dúcáⁿ càda-ndo —cachí-gá xáhaⁿ-gã xii-güedé.

Te ní dácàá-gá ndaha-gá ní tendaha-gã núú ñí xindeé lóho téé-áⁿ, te ní nduu váha dàtná-ni càa.

52 Te nchaa cue téé cùu dútú cúnú, ndìhi cue téé tàxi tnuní nchaa cue téé quide cuendá veñúhu sá ìo cúnúu, ndìhi cue téé cùu sacuéhé núú ñäyiu isràél, nchaa cue téé-áⁿ vèxi tñi ñàha-güedé xii-gá, te ní xáhaⁿ-gã xii-güedé:

—Nchòhó, nèhe-ná-ndó màchítí, nèhe-ná-ndó càrrutí véxi-ndo núú ndécú-í, dàtná quidé-ndó ìⁿ ñadúhú quidé ñàha-ndo xii-í.

53 Te ducaⁿ-ni ñí xíní-ndó ñí xíndecu-í xití veñúhu càhnu sá ìo cúnúu ní xóo danèhé-í ñäyiu, te ní lùha ñá túú ní cùu tnàndeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácuíhna nàcuáa cùu iní-xi —càchí-gá xáhaⁿ-gã xii-güedé.

Té Pèlú càháⁿ-dé núú ñäyiu sá ñà túú xíní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñi-güedé Jèsús, te ndéca ñàha-güedé xii-gá cuáháⁿ vehe téé cùu dútú cúnú-gá, te té Pèlú xica xìca-ni nchicúⁿ ñáhá-dé xii-gá cuáháⁿ.

55 Te òré ní quexìo-güedé xíaⁿ te ní dátñhá-güedé ñuhú quehé vehe-áⁿ, te ní càndéé yuhu nùhú-áⁿ ñí ngóo teté-güedé, chi quide víxiⁿ-xi, te tnàhá té Pèlú ní ngóo teté ndìhi ñàha-dé xii-güedé.

56 Te xíaⁿ ndécú ìⁿ xíchí xínú cuèchi vehe-áⁿ, te òré ní xíní-xi núcóo teté tnàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tnàhá téé-a xìca cuu ndìhi-dé téé ndéca-güedé cuánguihu-áⁿ —càchí-xi xáhaⁿ-xi xii-güedé.

57 Dico té Pèlú ñá túú ní nñuu-dé, te xáhaⁿ-dé xii-xi:

—Yúhú ñá túú xíní-í téé-áⁿ —càchí-dé xáhaⁿ-dé xii-xi.

58 Te tna tnaa-ni ní cuu, te ní xíní ñáhá tucu ìⁿ-dé, te xáhaⁿ-dé:

—Yòhó tnàhá-n xìca cuu ndìhi-n téé ndéca-güedé cuánguihu-áⁿ —càchí-dé xáhaⁿ-dé xii-dé.

Dico té Pèlú ní xáhaⁿ-dé:

—Ñáhá, ñá díú yúhú xícá cùu ndìhi-í-dé —càchí-dé xáhaⁿ-dé.

59 Te sa ní cuu dàtná ìⁿ òré te càchí tucu ingá-dé:

—Ndáá sá tēe-a xica cuu ndihi-dé tée ndēca-güedé cuanguihu-ãⁿ, chi tnáhá-dé cúú-dě tée distritú Galileá —càchí-dé xáhaⁿ-dě xii-güedé.

⁶⁰ Te té Pèlú ní xáhaⁿ-dě xii tée-áⁿ:

—Yúhú ñá túú cùtnuní iní-í nása ndùu tnúhu càháⁿ-n —càchí-dé xáhaⁿ-dě.

Te ní vátá xīnu ducaⁿ-gã tnúhu càháⁿ-dé ní cana-ni ñⁿ līhi.

⁶¹ Te Xítoho Jesucristú ní nchócótó-gã núú-dě, te òré-ni-áⁿ ñí ndacu iní-dé tnúhu ní xáhaⁿ-gã xii-dé sá cùmání-gã cana ñⁿ līhi, te úní xito cáháⁿ-dé sá ñà túú xíní ñáhá-dé xii-gá.

⁶² Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dé ní ndixi cuéchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue tée ndèé ñáhá xii Jesús ní cudíquí ndeé ñáhá-güedé xii-gá, te ní dadáhu-güedé núú-gã, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —cachí-güedé xáhaⁿ-güedé xii-gá.

⁶⁵ Te cuéhé víhí-gã tnúhu cuéhé ní xáhaⁿ-güedé xii-gá.

Jèsús ndécú-gã jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá ñí túnada, te ní tacá cue tée cùu sacuéhé núú ñáyiú israhél, ndihi cue tée cùu dútú cúnúu, ndihi cue tée dàcuaha ñaha xi-yu nchaa tnúhu ní chídó tnúní ndíi Moisés, te ndēca-güedé Jèsús cuáháⁿ núú cádá-güedé jùndá, te òré ní quexìo-güedé ndihi-gá núú cádá-güedé jùndá-áⁿ, te ní xáhaⁿ-güedé xii-gá:

⁶⁷ —Cuíní-ndí cachí tnúhu-n xii-ndí núu ñu-n cùu-n Cristú Yaá ní tendaha Yá Ndióxi véxi ñuyíú-a —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu na càchí-í sá díú-í cúú Cristú ñá, te ñí vá quèndáá iní-ndó,

⁶⁸ àdi te núu ñⁿ sá ná càcáⁿ tnúhu-í núú-ndó, te ñí vá càchí tnúhu-ndo, te ñí vá dáña ñaha-ndo.

⁶⁹ Dico vitna ní cuyatni nduu ngóo yúhú Tée cùu ñaní tnáhá-ndó nchaa-ndo xio

cuha Dútú Ndióxi Yaá ío cúnúu —cachí-gá xáhaⁿ-gã xii-güedé.

⁷⁰ Te dātnuní nchaa-güedé ní xicáⁿ tnúhú-güedé núú-gã, te xáhaⁿ-güedé xii-gá:

—¿Te yòhó cúú-n Dēhe Yá Ndióxi te núu ducaⁿ vāni? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dēhe-gá cúú-í dātná càchí mée-ndó-ãⁿ —càchí-gá xáhaⁿ-gã xii-güedé.

⁷¹ Te ní xitnaha-güedé:

—Ñá túú-gã xíní ñuhu-xi cue tée cáháⁿ núu ndáá sá ndēcuéchi-dé àdi ñá túú ndēcuéchi-dé chi yuhu mee-dě ní cáháⁿ-dé vitna ní xindedóho-o —càchí-güedé xitnaha-güedé.

23

Jèsús ndécú-gã núú tē Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuñí-güedé, te ndēca-güedé Jèsús cuáháⁿ núú tē Pilatú,

² te núú tēe-áⁿ ñí ngüita-güedé sàcáⁿ cuéchi-güedé cuèndá-gá, te xáhaⁿ-güedé:

—Ní naníhí-ndí tēe-a dāndahú-dé ñáyiú ñuú-ó, chi xáhaⁿ-dě xi-yu sá vā chāhu-gá-yu impuestú xii té Césár tēe ío cúnúu, te càchí-dé sá díú-dě cúú-dě Cristú Yaá ní tendaha Yá Ndióxi véxi ñuyíú-a te yīndaha-dé ñáyiú càchí-dé —càchí-güedé xáhaⁿ-güedé xii-dé.

³ Te té Pilatú ní xicáⁿ tnúhu-dé núú-gã, te xáhaⁿ-dě xii-gá:

—¿Ndáá sá díú-n cùu-n tēe yīndaha ñaha xii ñáyiú israhél-ãⁿ? —càchí-dé xáhaⁿ-dě xii-gá.

Te Jèsús ní xáhaⁿ-gã xii-dé:

—Díu-í yīndaha-í-yu —càchí-gá xáhaⁿ-gã xii-dé.

⁴ Te té Pilatú ní xáhaⁿ-dě xii nchaa ñáyiú, ndihi cue tée cùu dútú cúnúu:

—Yúhú cùtnuní iní-í sá ñà túú ñí ñⁿ cuéchi tēe-a —càchí-dé xáhaⁿ-dě xi-yu.

⁵ Dico níhi-gá ní cáháⁿ-güedé, te xáhaⁿ-güedé:

—Càchí-ndí sá ío dusaⁿ xīquide ñáyiú cuèndá nchaa sá dánèhé ñáhá-dě xi-yu, te ní quesaha-dě ndéé distritú Galileá, te ní yáha-dé ñihí distritú Júdeá dánèhé-dé

ñáyi, te vitna ní sáá-ni-tu-dé ndéé ndíha dànehé-dé-yu —càchí-güedé xàhaⁿ-güedé xii té Pilatú.

Jèsús ndécú-gǎ núú tǎ Hèrodés

⁶ Te sá dúcáⁿ nǐ tecú dóho té Pilatú ní cacu nehé-yu distritú Galileá, núu xiǎⁿ ní xicáⁿ tnúhú-dě núu-yu núu tée Galileá cúu-gǎ.

⁷ Te ní xáhǎⁿ-yu sá díú tǎe yàcáⁿ cúu-gǎ, núu xiǎⁿ ní na dàyáha ñaha-dě xii-gǎ ndaha té Hèrodés tée cùu gobiernú distritú Galileá chi nduu-ǎⁿ ndécú-dě tnàhá-dé ñuú Jerusálén-ǎⁿ.

⁸ Te òré ní xiní té Hèrodés-ǎⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quini ñáhá-dě xii-gǎ te ñá túú tnàhí xini ñáhá-dě xii-gǎ ní cùu, chi cuendá-ni tnúhu nihí-dé cuendá-gǎ, te ndetu-dé sáá ñⁿ nduu quini ñáhá-dě xii-gǎ, te cada-gǎ ñⁿ sá vǎ yǒo tnàhí ndacu cada cundehe-dé ní sani iní-dé.

⁹ Te vǎi sá nǐ xicáⁿ tnúhú-dě núú Jèsús, dico ni ñⁿ tnúhu ñá túú ní cǎháⁿ-gǎ.

¹⁰ Te xiǎⁿ xǐndecu tnàhá cue tée cùu dútú cúnùu, ndíhi cue tée dàcuaha ñaha xii ñáyi nchaa tnúhu ní chídó tnùní ndíi Moisés, te cue tée-ǎⁿ sùúní ió iní-güedé sácáⁿ cuéchi-güedé cuendá-gǎ.

¹¹ Te té Hèrodés ndíhi cue tée cùu sandadú-dé ñá túú ní cùu váha iní-güedé núú Jèsús, te ní dácúíhnu ñaha-güedé dóo vǎha xii-gǎ dàtná cáá dǒo sácúíhnu cue tée sàquíndaha ñaha xii ñáyi. Te dàtnùní té Hèrodés ní dánùhú ñáhá tùcu-dé xii-gǎ ndaha té Pilatú.

¹² Te nduu-ǎⁿ nǐ tnahá tnúhu té Pilatú ndíhi té Hèrodés, chi cùu úhú iní tnàhá-güedé ní cùu.

Càchí-güedé sá cǎhni-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³ Te té Pilatú ní nadatàcá-dé nchaa cue tée cùu dútú cúnùu ndíhi dava-gǎ cue tée cúnuu, ndíhi nchaa ñáyi ñuú-ǎⁿ,

¹⁴ te ní xáhǎⁿ-dǎ:

—Nchòhó ndécá-ndó tǎe-a véxi ní taxi cuendá-ndó-dě iha, te càchí-ndó sǎ ío dusaⁿ quide ñáyi cuendá nchaa sá dánèhé ñáhá-dě xii-yu, te núu-ndó ndùcu tnúhu-í núu-dě núu ná ní quide-dé. Dico yúhú cútnùní iní-í sá ñá túú nǐ ñⁿ cuéchi-dé dàtná cǎháⁿ-ndó-ǎⁿ.

¹⁵ Te cuéi té Hèrodés ñu-ni ducaⁿ cǎháⁿ-dé sá ñá túú cuéchi-dé núu ní techiúⁿ ñaha tucu-dé cuándixi-dé iha. Te vitna sa ní cutnùní iní-ó sá ñá túú tàú-xi cǎhni-o-dé chi ñá túú cuéchi ní quide-dé.

¹⁶ Te na dándoho-ni-í-dé te dàcácu-í-dé —càchí-dé xáhǎⁿ-dǎ xii-yu.

¹⁷ Te ndi tnahá nduu vico pascuá te dacuítíi sǎ dácácu té Pilatú-ǎⁿ ñⁿ cue tée yíhi vecaá, chi ducaⁿ tnàhí quide-dé.

¹⁸ Dico ncháa-yu ní cuáa-yu, te xáhǎⁿ-yu xii-dé:

—¡Queñuhu tée nàni Jesús-ǎⁿ, te cǎhni-n-dǎ! ¡Te dàcácu-n tǎ Barrábás! —càchí-yu xáhǎⁿ-yu xii-dé.

¹⁹ Te té Barrábás-ǎⁿ nǐ sanu ichi-dé ñáyi ñuú ingá ichi, te ní ngúita-yu ndíhi-dé ní cuu úhú iní-yu cue tée cùchiuⁿ, te ní sahani-dé ndíyi núu xiǎⁿ ní chihi ñaha-güedé vecaá xii-dé.

²⁰ Te té Pilatú cuiní-dé dàcácu-dé Jèsús núu xiǎⁿ cǎháⁿ ndíhi ñaha tùcu-dé xii-yu ní cùu,

²¹ dico uuⁿ-gǎ níhi ní cuáa-yu, te ní xáhǎⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáhǎⁿ-yu xii-dé.

²² Te xito cuu úní ní xáhǎⁿ tǎ Pilatú:

—¿Te ná cúu cuéchi ní quide-dé te núu ducaⁿ cuiní-ndó càda-í-dé-i? Te yúhú cútnùní iní-í sá ñá túú cuéchi ní quide-dé núu xiǎⁿ ñá túú tàú-xi cǎhni-o-dé, te na dándoho-ni-í-dé te dàcácu-í-dé —càchí-dé xáhǎⁿ-dǎ xii-yu.

²³ Dico níhi-ni cǎháⁿ-yu xáhǎⁿ-yu sá ná càta caa ñaha-dé xii-gǎ núú cùrúxí, te ñáyi-ǎⁿ ndíhi nchaa cue tée cùu dútú cúnùu xicáháⁿ níhi-güedé ndíhi-yu ndéé ní xínu iní té Pilatú cada-dé nàcuáa càchí iní-yu.

²⁴ Te ní xáhǎⁿ-dǎ xii-yu sá cúu càda-dé nàcuáa xáhǎⁿ-yu.

²⁵ Te ducaⁿ te ní dácácu-dé té Barrábás tée ní sanu ichi ñáyi ñuú ingá ichi, te ñu-ni-dé ní sahani-dé ndíyi núu xiǎⁿ ní xíhi-dé vecaá, te dàtnùní ní táuchíúⁿ-dǎ cada-güedé Jèsús nàcuáa xáhǎⁿ-yu.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Jn. 19:17-27)

26 Te ndèca-güedé Jèsús cuáháⁿ núú cátá càa ñaha-güedé xii-gá, te ichi cuáháⁿ-güedé ndihí-gá ní tñii-güedé ìⁿ tée ñuú Cirené nání-dè Ximú ñúhú-dè ichi duha cuándixi-dé ní sáháⁿ-dé yucu, te ní dácuidó ñaha-güedé xii-dé cùrúxí nchídó Jèsús, te ní ngúita nchicúⁿ-dé sátá-gã.

27 Te ío cuéhé ñáyiú nchicúⁿ ñáhá xii-gá cuáháⁿ, te vâi ñáyiú ðihí ío níhi ndàhí-yu sá ndihú iní-yu cuendá Jèsús.

28 Te Jèsús ní nchócótó-gã núú-yu, te ní xáhaⁿ-gã:

—Nchòhó ñáyiú ðihí ñuú Jerusálén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo.

29 Chí sáá nduu quèsaha ñáyiú: “Sá vâha táhú nchaa ñáyiú ñá túú càcu déhe-xi, ndihí nchaa ñáyiú vátá quèní-gá cuhuⁿ déhe-xi, chí ni ñá túú xini-yu dacadí-yu”, duha quesàhá-yu.

30 Te dàvá-áⁿ cùñaha ñáyiú xii nchaa tindúú ndihí nchaa núú xiquí: “Chí tácuⁿ ngónchihí ñaha-ndo xii-ndí”, duha cúñahá-yu.

31 Te núú yúhú tée quide ndáá duha quide ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha —càchí-gá xáhaⁿ-gã xií-yu.

32 Te ndèca tucu-güedé úú tñahá cue tée ndècu ndisa cuéchi-xi cuáháⁿ cuendá cahni ñaha-güedé xii-güedé ndihí Jèsús.

33 Te òré ní quexìo-güedé ndihí-gá ìⁿ xichi núú nání Yiquí Díquí Ndíyi, te xíaⁿ nñ sata caa ñaha-güedé xii-gá núú cùrúxí, ndihí úú cue tée ndècu ndisa cuéchi-xi-áⁿ, te ìⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá ðiu-ni núú cùrúxí tucu.

34 Te ní xáhaⁿ-gã xii Tátá-gã Dútú Ndiòxí:

—Táu, cada càhnu iní sá quidé-güedé, chí ñá túú cùnuni iní-güedé ná cúú sã quidé-güedé —càchí-gá xáhaⁿ-gã.

Te cue tée cùu sandadú ní xito ndèé-güedé núu ndèdacàa-güedé cuu cuendá-güedé dóó-gã.

35 Te nchaa ñáyiú xñdecu-áⁿ ndéhè-yu nàcuáa quide-güedé Jèsús, te nchaa cue tée cùnunu ní cudíquí ndeé ñáhá-güedé xii-gá, te ní xitnaha-güedé:

—Te dava ñáyiú ní ndacu-dé ní dácacu nihnu-dé, te vitna na dácacu nihnu-dé méé-dé, te núu ndisa sá Crístú Yáá ní tendaha Yã Ndiòxí véxi ñuyíú-a cùu-dé —càchí-güedé xitnaha-güedé.

36 Te tñahá cue tée cùu sandadú ní cudíquí ndeé ñáhá-güedé xii-gá, chí ní sàndehe yatni-güedé núú táca-gá sãñaha-güedé ndudí íá còho-gá ní cùu,

37 te ní xáhaⁿ-güedé xii-gá:

—Te núu yòhó cúu-n tée yindaha ñaha xii ñáyiú israél, te dácacu nihnu mee-n —càchí-güedé xáhaⁿ-güedé xii-gá.

38 Te ní taxi ndecu-güedé ìⁿ sá ndèé lètrá ndàa díquí-gã te ndèé úní núú tñuhu, tñuhu griégú, ndihí tñuhu làtín, ndihí tñuhu hèbreú, te duha quèe-xi ndi nuní núú tñuhu-áⁿ “Tée-a cùu-dé tée yindaha ñaha xii ñáyiú israél”, duha quèe-xi.

39 Te ìⁿ tée ndècu ndisa cuéchi-xi, tée ní sata caa-güedé ðiñi-gá xicuèhé ñáhá-dé xii-gá, te xáhaⁿ-dè:

—Te núu yòhó cúu-n Crístú Yáá ní tendaha Yã Ndiòxí véxi ñuyíú-a, te dácacu nihnu mee-n, te dácacu nihnu ñaha xii nchúhú tñahá-ndí tucu —càchí-dé xáhaⁿ-dè xii-gá.

40 Dico ingá tée cùndihí-dé tée tàcaa ingá xio ðiñi-gá ní tenáá ñáhá-dé xii-dé, te xáhaⁿ-dè:

—¿Te náa ñá túú ndàcu iní-n Yã Ndiòxí vitna duha càa-o ndoho-o ndihí tée nàni Jèsús-a ñã?

41 Chí nchoo tàú ndisa-o sã dúhá ndòho-o nacháhu-o cuéchi-o, dico Jèsús-a chí ñá túú cuéchi-dé —càchí-dé xáhaⁿ-dè xii tée tàcaa ndihí-dé-áⁿ.

42 Te dàtnùní ní xáhaⁿ-dè xii-gá:

—Jèsús, ndacu iní ñáhá-n xii-í òré ná quixi-n taxi tñuni-n ñuyíú-a —càchí-dé xáhaⁿ-dè xii-gá.

43 Te Jèsús ní xáhaⁿ-gã:

—Na càchí tñuhu ndáá-í xii-n sã méí ndùu vitna cundecu ndihí ñaha-í xii-n núú nñ nduu táhú-í cundecu-í —càchí-gá xáhaⁿ-gã xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

44 Te òré ní cuu cuádava nduu. Te ní cunee nihí ñuyíú, te ducaⁿ-ni càa ní cuu ndéé caá úní sacuaa.

45 Chi ñá túú-gă ní dâyehé nchíanchii te ní ndátá dǒó cúú còrtiná veñúhu càhnu sá ïo cùnuu ní quée dava ndáá.

46 Te níhi ní cáháⁿ Jèsús, te xáhaⁿ-gă xii Tătá-gă Dútú Ndiǒxí:

—Táu, naqueheⁿ cuendá-n espíritú-í — cächí-gă xáhaⁿ-gă xii Tătá-gă.

Te tnúhu-ná-áⁿ ñí cáháⁿ-gă te ní xihí-ni-gă.

47 Te òré ní xiní téé cùu capitáⁿ sá dúcáⁿ ñí cuu, te ní ndacu iní-dé Yá Ndiǒxí, te ní cachí-dé:

—Sá ndáá ndisa sá tǎe-a cùu-dé ìⁿ téé ïo quide ndáá ndécú ñuyíú-a ni cùu —duha ní cachí-dé.

48 Te chitu ñáyiú ní tacá xíaⁿ chi cuini-yu cundehé-yu nása cada-güedé Jèsús. Te sátá ñí yáha ní xiní-yu nàcuáa ní quide ñaha-güedé xii-gă, te ní ndihí-yu ní ndaca ta caní-yu pèchú-yu cuánuhú sá ndihú iní-yu.

49 Dico ndècu tnahá cue ñáyiú xiní tnahá ndihí Jèsús, ndihí ñáyiú dǐhí ní chinchícúⁿ ñáhá xii-gă ndéé distritú Galileá, te ñáyiú-áⁿ xica-ni xixínutnǐⁿ-yu xǐndéhě-yu nchaa nàcuáa ní quide ñaha-güedé xii-gă.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

50 Te ndècu ìⁿ téé ñuú Arimateá nání-dě Chèé, te ñuú-áⁿ yǐndèhu-xi distritú Jüdeá, te ïo váha iní-dé te quide ndáá-dé núú Yá Ndiǒxí, te tnahá-dé cúú-dě chùⁿ te ní xǐndecu-dé jündá cue téé israél.

51 Te ñá ní tnahá tnahí iní-dé nàcuáa ní cáháⁿ-güedé núú jündá nàcuáa cada-güedé Jèsús. Te téé-áⁿ ndétú-dě sáá nduu ndíhu ndaha ñaha Yá Ndiǒxí xii-dé ndihí ñáyiú.

52 Te téé-áⁿ ñí sáháⁿ-dé núú tǎ Pilatú te ní xáhaⁿ-dě sá ñuu vá cündèe iní-dé dañá-dě chindúxi-dé yiqui cùñú Jèsús. Te téé Pilatú-áⁿ ñí sáha-dé tnúhu.

53 Te ní nunehe-dé yiqui cùñú-gă núú cùrúxí, te ní chidúcúⁿnuu-dé ìⁿ dóó cuixíⁿ, te ní chihi-dé ìⁿ yaú nchí yiqui naha càva, te vátá yǒo ìⁿ-gă nguǐndǔxi yaú-áⁿ.

54 Te cùu-xi nduu vispré nduu ndètatú ñáyiú, núu xǐquide túha-ná-yu sá cúú ñgá nduu.

55 Te nchaa ñáyiú dǐhí ní chinchícúⁿ ñáhá xii Jèsús ndéé distritú Galileá ndèndahá-yu té Chèé ní sáháⁿ núú nchí yaú-áⁿ, núu ní xiní-yu nàcuáa ní sacáⁿ-dé yiqui cùñú-gă xití yaú-áⁿ.

56 Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihí pomádá, te ní ndetatú-yu ñgá nduu-áⁿ ñí quide-yu nàcuáa càháⁿ tnúhu Yá Ndiǒxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

1 Te ndumǐngú nehé víhí-ní cuáháⁿ tucu ñáyiú dǐhí núú nchí yaú ní chihi-güedé yiqui cùñú Jèsús, te nèhé-yu nchaa sá sáháⁿ tnámí ñí quide túha-yu-áⁿ cuáháⁿ, te tnahá tucu ìⁿ úú-gă tnahá dǐhí-yu nchícúⁿ ñáhá xii-yu cuáháⁿ.

2 Te òré ní quexió-yu yuhu yaú-áⁿ te ní xiní-yu sá yúú ndédí ìⁿ xio-ná ndécú,

3 te ní quíhu-yu xití yaú-áⁿ, dico ñá túú-gă yiqui cùñú Jèsús yíhí.

4 Te ñá ní cùtnuní tnahí iní-yu ndèe ichi cuáháⁿ yiqui cùñú-gă, te ní xiní-yu úú espíritú xínú cuèchi núú Yá Ndiǒxí xǐnutnǐⁿ-xi dǐhí-yu te xǐxíhnu-xi dóó chàhnchí.

5 Te ní yùhú-yu te ñá túú ní cùyíⁿ-yu cundehé-yu cue espíritú-áⁿ, te cue espíritú-áⁿ ñí xáhaⁿ-xi xii-yu:

—¿Ná cuendá nándücu-ndo Jèsús Yaá ndécú vǐvú núú yǐndǔxi ñáyiú ní xihí-i?

6 Te ñá túú-gă yiqui cùñú-gă ndécú ìha chi sa ní ndoto-gă, te chí dándàcu iní nàcuáa ní cáháⁿ-gă cùtnahá ní xǐndecu-ndo ndihí-gă distritú Galileá,

7 chi ní cachí-gă sá méé-gă cúú-gă ñaní tnahá-ndó nchaa-ndo, te dacuití cuáha cuendá ñáhá-güedé xii-gă núú cuè téé ndècu ichi cuehé ichi duha, te cata caa ñaha-güedé xii-gă núú cùrúxí, te núú cùrúxí-áⁿ cuú-gă dico nduu úní sá cúú-gă te ndoto-gă, duha ní cachí-gă xii-ndo.

8 Te òré-áⁿ ñí ndacu iní-yu tnúhu ní cáháⁿ Jèsús.

9 Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuèndú núú

ndí úxí ìⁿ cue téé ní táúchíúⁿ Jèsús cáháⁿ tnúhu-gá, ndíhi núú dàva-gá ñáyiú.

10 Te ñáyiú ducaⁿ nàha tnúhu cuánuhú núú-güedé-áⁿ cúú tá Màriá Magdaléná, ndíhi tá Juáná, ndíhi tá Màriá náná tē Jàcobó, ndíhi dava-gá ñáyiú dìhí.

11 Dico cue téé-áⁿ ñí sani iní-güedé sá dícó cáhú iní-yu tnúhu xáháⁿ-yu xii-güedé nùu ñá túú ní sàndáá iní-güedé nàcuáa ní xáháⁿ-yu.

12 Dico té Pèlú ní quee-dé xínú-dé cuáháⁿ cuándéhé-dé yaú núú ñí chihi-güedé yiqui cùñú Jèsús, te ní sáá-dé te ní ngáundeyi-dé xító ñìhni-dé xítí yaú-áⁿ te ní xiní-dé sá méé-ná dóó ñí xíducúⁿ nuu-gá yúcú ìⁿ xio, te ío ní cuñúhu-dé sá dúcáⁿ ñí cuu, te ní natñi-dé ichi cuánuhú-dé vehe núú xíndecu-güedé.

*Ichi ñuú Emàús
(Mr. 16:12-13)*

13 Te ñi-yu nduu-áⁿ ñúhú úú cue téé ní xica cuu ndíhi Jèsús ichi cuáháⁿ-güedé ìⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusalén, te ndéé ñuú Emàús.

14 Te ta ndàtnúhu-güedé cuáháⁿ nchaa nàcuáa ní cuu,

15 te ñini dùcaⁿ xicáháⁿ-güedé, te Jèsús ní natnahá ñáhá-gá xii-güedé te ndéca tnaha-gá ndíhi-güedé cuáháⁿ.

16 Te cuèi ndèhe ñaha-güedé xii-gá dico dàtná ìⁿ sá ndéí núú-güedé, chi ñá ná quini ñáhá-güedé xii-gá ní cùu.

17 Te Jèsús ní xicáⁿ tnúhú-gá núú-güedé, te xáhaⁿ-gá:

—¿Ná tnúhu xicáháⁿ-ndó ñùhu-ndo ichi núú ducaⁿ ío cùu ndiyí-ndó-í? —càchí-gá xáhaⁿ-gá xii-güedé.

18 Te ìⁿ téé nani Cleofás ní xáhaⁿ-dē xii-gá:

—¿Te ná cuendá nchaa ñáyiú íchí ñí sáá ñuú Jerusalén xiní-yu nchaa nàcuáa ní cuu, te ìⁿ ñi-ná yòhó ñá túú xiní-n-í? —càchí-dé xáhaⁿ-dē xii-gá.

19 Te ní xáhaⁿ-gá xii-güedé:

—¿Te ná ní cuu-í? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Cuendá Jèsús téé ñuú Nazàrét càháⁿ-ndí, chi téé-áⁿ cúú-dé ìⁿ téé càháⁿ tnúhu Yá Ndiòxí, te ío váha ndùu tnúhu càháⁿ-dē ní

cùu, te quide-dé sá vā yòo tnàhí ndàcu cada nacuáa cudíí iní Yá Ndiòxí ndíhi ñáyiú ní cùu.

20 Te cue téé cùu dútú cùnùu, ndíhi cue téé cùnùu taxi tnuní ñáhá xii-ndí ní sáha cuendá ñáhá-güedé xii-dé núú tē Pìlatú te ní sata caa ñaha-güedé te núú cùrúxí-áⁿ ñí xihí-dé.

21 Dico vitna sa ní cuu úní nduu sá ñí xihí-dé, te nchúhú ní sani iní-ndí sá tē-áⁿ dàcácu nihnu ñaha-dē xii nchúhú ñáyiú isràél núú nchàa tnúndòho tnúhu ndàhú ndécú-ndí.

22 Dico ío cùñúhu-ndí cúú, chi ìⁿ úú ñáyiú dìhí ní tuha ñaha xii-dé ndécú ndíhi-ndí ní sáháⁿ ngotó-yu ndéxuehe tàcuíhndá-gá yaú núú ñí chihi-güedé yiqui cùñú-dé,

23 te ní nasáá-yu càchí-yu xii-ndí sá ñà túú-gá yiqui cùñú-dé yihí xítí yaú-áⁿ. Te ní xiní-yu espíritú xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé.

24 Te sáta dúcáⁿ te ìⁿ úú cue téé cùndíhi-ndí ní sáháⁿ ndéhé-güedé yaú-áⁿ, te ní xiní-güedé sá ndáá cúú-xí nchàa tnúhu ní cáháⁿ ñáyiú dìhí-áⁿ, dico ñá túú ní xiní-güedé téé-áⁿ —càchí-güedé xáhaⁿ-güedé xii-gá.

25 Te Jèsús ní xáhaⁿ-gá xii-güedé:

—Ío cùmání sá xiní tnùn-ndó, chi ío cuéé sàndáá iní-ndó tnúhu ní cáháⁿ cue téé ní xóo cáháⁿ tnúhu Yá Ndiòxí ndéé sanaha!

26 ¿Te náa ñá túú tàú-xi sá ndóhó Crístú òré cùmání-gá sáá nduu ndàa-gá andíu nùú ndécú Dütú Ndiòxí cundecu-gá-áⁿ? —càchí-gá xáhaⁿ-gá xii-güedé.

27 Te ní ngúíta-gá xáhaⁿ-gá nàcuáa quèe-xi nchaa tnúhu càháⁿ-xi núú tütú Yá Ndiòxí cuendá-gá, te díhna-gá ní cáháⁿ-gá nàcuáa ndùu nchaa tnúhu yòdo tnuní núú tütú ndí Moisés, te dàtnúni ní cáháⁿ-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáháⁿ tnúhu Yá Ndiòxí ndéé sanaha.

28 Te òré ní quexio-güedé yuhu ñuú núú cuáháⁿ-güedé-áⁿ, te Jèsús ní quide-ni-gá sá yáha-gá quíhíⁿ-gá ingá xichi ní cùu.

29 Dico ní cáháⁿ ndàhú-güedé núú-gá sá quéndòo-gá xíáⁿ ndetatú-gá ndíhi-güedé, te xáhaⁿ-güedé xii-gá:

—Quendóo ndíhi ñaha xii-ndí iha ndetatú-n chi sa ní cuua, te tnavíi cundiⁿ —càchí-güedé xáhaⁿ-güedé xii-gá.

Te xíaⁿ cáá ìⁿ vehe cuánguihu-güedé ndetátú-güedé ndihi-gá.

30 Te òré sa yìhi-güedé mèsá ndihi-gá cùdini ndihi ñaha-güedé, te ní queheⁿ-gá pàá te ní ndacáⁿ táhú-gá núú Yá Ndiöxí, te ní táhú cuèchi-gá te dàtnùní ní dácãhñu ñaha-gá xii-güedé.

31 Te òré-áⁿ ñi naquiní ñáhá-güedé xii-gá ní cùu, dico uuⁿ ní ndóñúhú-gá.

32 Te ní xítñaha-güedé:

—Te ndáá sá sùúni cùdí ìní-ó òré tá ndàtnúhu-o ndihi Jesús véxi ichi, te ta dànehé ñáhá-gá xii-o nchàa nacuáa quèe-xi tñúhu càháⁿ-xi núú tütú Yá Ndiöxí —càchí-güedé xítñaha-güedé.

33 Te ñá túú-gá ní xíndetu-güedé chi ndihi-ni ní natni-güedé ichi cuánuhú-güedé ñúú Jerusalén, te ní nasáá-güedé núú xíndecu ndi ùxí ìⁿ cue téé ní táuchíúⁿ Jesús cáháⁿ tñúhu-gá, ndihi dava-gá ñáyiu.

34 Te cue téé xíndecu-áⁿ xáhaⁿ-güedé:

—Ndáá sá ñi ndoto Yaá cúú Mèstrú, chi ní xiní ñáhá tē Xímú —càchí-güedé xáhaⁿ-güedé.

35 Te cue téé ní nasáá-áⁿ ñi cani-güedé cuèndú nàcuáa ní cuu ichi, ndihi nàcuáa ní cuu ní naquiní-güedé Jesús òré ní táhú-gá pàá ní dácãhñu ñaha-gá xii-güedé.

Jèsús ní quexìo-gá núú xíndecu cue téé ní xica cuu ndihi-gá

(Mt. 28:16-20; Mr. 16:14-18; Jn. 20:19-23)

36 Te càháⁿ dúcáⁿ-ní-güedé nàcuáa ní cuu ní quexìo Jesús ní ngúnutñi-gá ndéé tnuú-güedé, te xáhaⁿ-gá xii-güedé:

—Yá Ndiöxí chíndèe ñaha-gá xii-ndo ìo váha cùu iní-ndó ndècu-ndo —cachí-gá xáhaⁿ-gá xii-güedé.

37 Te da ní yùhú-güedé, te ní sani iní-güedé sá dicó ìⁿ espíritú cúú sá ndéhe-güedé ní cùu.

38 Dico Jesús ní xáhaⁿ-gá xii-güedé:

—¿Ná cuèndá yùhú-ndó, te sàni ìⁿ sani úú iní-ndó-í?

39 Chí cùndèhe ndaha-í ndihi sáhà-í te quiní-ndó nà ñu-ni-í. Te chí téndaha ñaha xii-í te cundehe-ndo, te núu ìⁿ espíritú ndécú yìqui cuñú-xi dàtná ndécú ndihi yùhú —càchí-gá xáhaⁿ-gá xii-güedé.

40 Te sátá dúcáⁿ ñi xáhaⁿ-gá te ní dánèhé ñáhá-gá xii-güedé ndaha-gá ndihi sáhá-gá.

41 Te ío ní cuñúhu-güedé, te ní cudí ìní-güedé sá ndécú-gá tnuú-güedé dico sàni ìⁿ sani úú iní-güedé, te ní xáhaⁿ Jèsús xii-güedé:

—¿Ndècu ndihi-ndo luha sá cáxí-ó ìha ñá? —càchí-gá xáhaⁿ-gá xii-güedé.

42 Te ní sáñaha-güedé xii-gá luha chácá ñi chíhó, ndihi dítá ññú ñúhú ndùdí,

43 te ní queheⁿ-gá te ndèhe-güedé ní xexi-gá.

44 Te dàtnùní ní xáhaⁿ-gá:

—Nchaa sá ñi yáha-í-a cùu-xi sá ñi cachí tñúhu-í xii-ndo cùtnáhá ndécú ndihi ñaha-gá-í xii-ndo, chi ní cachí-í sá dàcuiñi càda-xi nchaa nacuáa càháⁿ-xi núú tütú ndi Moisés, ndihi núú tütú ndéé tñúhu ní càháⁿ cue téé ní xóo càháⁿ tñúhu Yá Ndiöxí ndéé sanaha, ndihi núú librú Sàlmú —càchí-gá xáhaⁿ-gá xii-güedé.

45 Te òré-áⁿ ñi sáñaha-gá sá xiní tñúni-güedé, te ní tecú tñúni-güedé nchaa tñúhu càháⁿ-xi núú tütú Yá Ndiöxí.

46 Te ní xáhaⁿ-gá xii-güedé:

—Ducaⁿ ndéé tñúni núú tütú Yá Ndiöxí sá dàcuiñi sá yùhú Crístú cuú-í, te nduu úní ndoto-í.

47 Te ñiñi ñuyíú cùtènuu tñúhu ní càháⁿ-í, dico díhna nuu-gá ñúú Jerusalén ngüita-yu cacunehe ñáhá-yu xii-í, te càháⁿ-yu nàcuáa ní dánèhé-í-yu, te cùñáhá-yu xii cue ñáyiu sá ná dàndixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natni-yu ichi Yá Ndiöxí, te ducaⁿ te cada càhnu iní-gá nchaa yíca cuèchi-yu.

48 Te vitna nchòhó cuu-ndo cuè téé càháⁿ ndáá nchaa nàcuáa ní cuu chi ní xiní núú-ndó.

49 Te yùhú tendaha-í Espíritú Yá Ndiöxí quixi cundecu ndihi-ndo, chi ducaⁿ ñi cachí-gá. Dico chí cùndècu-ni ñúú Jerusalén-áⁿ ndéé ná quèxio Espíritú Yá Ndiöxí ngúndecu ndihi-ndo cuèndá chindee ñaha-xi xii-ndo cada-ndo nchaa nacuáa ní càháⁿ-í —càchí-gá xáhaⁿ-gá xii-güedé.

Jèsús cuánda-gá andiu

(Mr. 16:19-20)

50 Te Jesús ní queñuhu ñaha-gá xii-güedé ñúú Jerusalén ndécá ñaha-gá cuáháⁿ ñúú

Bètaniá, te xíáⁿ nǐ ndonehe-gá ndaha-gá núú nǐnu, te ní xí cáⁿ táhú ñàha-gá xii-güedé núú Yă Ndiǒxí.

⁵¹ Te sá tá nǐ xí cáⁿ táhú ñàha-gá xii-güedé núú Yă Ndiǒxí, te ní quee-gá tnuú-güedé cuánda-gá andiu.

⁵² Te ní ngüíta-güedé ní cachí-güedé sá ïo càhnu cuu Jesús, te ní natnii-güedé ichi cuánuhú-güedé ñuú Jerusàlén, te sùú ní cùdíí ìní-güedé ñúhú-güedé ichi.

⁵³ Te ncha nduu ní xíndecu-güedé veñúhu càhnu sá ïo cùnuu ní ndacáⁿ táhú-güedé núú Yă Ndiǒxí, te ní cachí-güedé sá ïo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÙNÍ TÉ JUÀÁ

Déhe Yá Ndiõxí ní cuu-gá ìⁿ ñáyiu

¹ Cùmání-gã ngáva ñuyíú, te sa ndècu ndihí Yá Ndiõxí Déhe-gá. Te ìⁿ-ni xícuu-gá. Te Déhe-gá-áⁿ ñí cuu-gá dàtná ìⁿ tnúhu, chi ní cachí tnúhu-gá nàcuáa càa Tátá-gã Dútú Ndiõxí.

² Te sa ndècu-gá ndihí Dútú Ndiõxí te ní ngáva ñuyíú.

³ Te ñíu-ni tnúhu mee Dútú Ndiõxí ní cuu ní cadúha Déhe-gá nchaa sá íó ñuyíú. Te núu ñá túú Déhe-gá ñá, te ñá túú ñá coo ñuyíú-a ní cùu.

⁴ Te ñíu-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o.

⁵ Te tnúhu-gá ní xité nuu-xi núú ndécú nchaa ñáyiu ñuhu ichi cuehé ichi duha. Te ñáyiu-áⁿ cúú-yu dàtná cue ñáyiu ndècu ìⁿ núú néé, te ñíu-ni-yu cachí iní-yu xocàní-yu tnúhu-gá dico vá ndácú-yu.

⁶⁻⁷ Te ní xíndecu ìⁿ téé ní xínani-dě Juàá, te téé-áⁿ ñí táuchíúⁿ Yá Ndiõxí sá càháⁿ-dě tnúhu-gá núú ñáyiu. Te ní xáhaⁿ-dě xii-yu sá véxi Déhe-gá ñuyíú-a, te dandìxi túu-gá iní-yu cuendá cutnùní iní-yu nàcuáa ndùu cuendá Yá Ndiõxí cuendá quíndáá iní-yu tnúhu-gá.

⁸ Te ñá díú mèe té Juàá ní dandìxi túu-dé iní-yu cuendá cutnùní iní-yu nàcuáa ndùu cuendá Yá Ndiõxí, chi cuendá-ni ní xica cuu-dé ní cáháⁿ-dé sá Dèhe Yá Ndiõxí véxi-gá dandìxi túu-gá iní-yu.

⁹ Te ndáá ndisa sá méé-gã dandìxi túu-gá iní ñáyiu ñuyíú-a cuendá cutnùní iní-yu nàcuáa ndùu cuendá Yá Ndiõxí.

¹⁰ Te ní xíndecu-gá ñuyíú-a, te ñáyiu ñuyíú-a ñá ní cùtnuní iní-yu yoo cùu-gá, te ñíu-ni mee-gã ní cadúha-gá ñuyíú-a ní quide-gá chùⁿ ní táhú Dútú Ndiõxí.

¹¹ Te ní quixi-gá ñuyíú ñí cadúha mee-gã, dico cue ñáyiu ñuyíú-a ñá ní cùu váha iní-yu núú-gã.

¹² Dico davá-yu ní sándáá iní ñáhã-yu xii-gá, te ní nduu táhú-yu ní nduu déhe ñaha Yá Ndiõxí xii-yu.

¹³ Te ñá túú ní ndùu déhe ñaha-gã xii-yu sá cúú-yu déhe ñáyiu ñuyíú-a, àdi sá ndécú tãtã-yu, ñãñã-yu chi mee Yá Ndiõxí ducaⁿ ñí cuiní-gá cunduu sá ndúú dèhe ñaha-gã xii-yu.

¹⁴ Te Déhe-gá ní quixi túu-gá ñuyíú-a, te ní cuu-gá ìⁿ yiqui cùñú ní xíndecu ndihí ñaha-gã xii nchoo cuè ñáyiu ní xica cuu túu ndihí-gá. Te ní xiní-ó sá ío càhnu cuu-gá cuendá sá ííⁿ dìi díi-ni-gã cúú-gã Déhe Yá Ndiõxí, te ío cùndahú iní ñáhã-gã chíndèe ñaha-gã xii nchoo ñáyiu ndècu ñuyíú-a, te ío ndáá càháⁿ-gá.

¹⁵ Te duha ní cáháⁿ té Juàá cuendá Déhe Yá Ndiõxí ní xáhaⁿ-dě xii ñáyiu:

—Cuendá téé iha ni cáháⁿ-í ndéé càni-gá ní cachí-í sá quixí ìⁿ téé quixi. Te téé-áⁿ cùnùu-gá-dé, chi díhna-gá-dé sa ndècu-dé dàcúxí yùhú —duha ní xáhaⁿ-dě xii-yu.

¹⁶ Te ío váha iní Yaá-áⁿ chi xito ñaha-gã xii-o nchaa-o ìⁿ nduu ìⁿ nduu.

¹⁷ Te ndíi Moisés ní cachí tnúhu ndíi tnúhu Yá Ndiõxí tnúhu sá sánú ichi ñaha xii-o nacuáa cundecu-o, dico Déhe-gá Xítohó Jesucristú ní cachí-gá sá ío cùu iní ñáhã Yá Ndiõxí xii-o. Te ní cáháⁿ-gá nchaa dava-gá tnúhu ndáá.

¹⁸ Te ñá ííⁿ ñáyiu xiní túu-yu Yá Ndiõxí. Dico ìⁿ dìi díi-ni Déhe-gá Yaá ndécú ndihí-gá càchí tnúhu-gá nàcuáa càa-gá.

Té Juàá téé dàcuandute ñaha xii ñáyiu càháⁿ váha-dé cuendá Xítohó Jesucristú

(Mt. 3:11-12; Mr. 1:7-8; Lc. 3:15-17)

¹⁹ Te cue téé israhél ndécú ñùú Jerusalén ní tendaha-güedé cue dútú ndihí cue téé cùu levítá cuáhãⁿ-güedé núú ndécú tã Juàá ndúcú tnúhu-güedé núú-dě ñùu ná téé cùu-dé.

²⁰ Te ní cáháⁿ ndáá-dé ní xáhaⁿ-dě xii-güedé:

—Yùhú, ñá díú Crístú Yaá ní tendaha Yá Ndiõxí véxi ñuyíú-a cùu-í —càchí-dé xãhaⁿ-dě.

²¹ Te ní xáhaⁿ tùcu-güedé:

—¿Te yoo cùu yohó váí? ¿Á yohó cúu-n tã Èliás? —càchí-güedé xãhaⁿ-güedé xii-dé.

Te ní xáhaⁿ tã Juàá:

—Yùhú, ñá díú tã Èliás cúu-í —càchí-dé xãhaⁿ-dě.

Te xãhaⁿ tùcu-güedé:

—¿Te yohó cúu-n tõe ní cachí cue tée ndée sanaha quixi cáháⁿ tnúhu Yá Ndiöxí-ãⁿ? — cächí-güedé xähaⁿ-güedé xii-dé.

Te ní xähaⁿ-dë:

—Ni ñà díú tõe-áⁿ cúu-í —cächí-dé xähaⁿ-dë xii-güedé.

²² Te ní xähaⁿ tùcu-güedé:

—¿Te ná tée cùu yohó váiⁿ?, cuèndá ducaⁿ nàcani tnúhu-ndí núú cuè tée ní tendaha ñàha xii-ndí véxi-ndí, te cáháⁿ duuⁿ-n nùu ná tée cùu-n —cachí-güedé xähaⁿ-güedé xii-dé.

²³ Te ní xähaⁿ tẽ Juàá:

—Yúhú cúu-í tée xica cáháⁿ xití yucu nàcuáa ní cáháⁿ ndíi Chàiaá, chi ndíi-áⁿ nĩ cachí ndíi: “Chí dáñá ìchi cuehé ìchi duha ndècu-ndo te tñi-ndo ìchi váha, chi véxi Yaá ío cùnùu”, duha ní cachí ndíi —cächí té Juàá xähaⁿ-dë xii-güedé.

²⁴ Te cue tée ndùcu tnúhu núú tẽ Juàá nùu ná tée cùu-dé, cue tée-áⁿ nĩ tendaha ñàha cue tée cùu fariséu xii-güedé.

²⁵ Te ní xähaⁿ tùcu-güedé xii té Juàá:

—¿Ná cuèndá dácuàndute-n ñáyiú te núu ñà díú Crístú cúu-n, te ni ñà díú tẽ Eliás, te ni ñà díú tõe véxi cáháⁿ tnúhu Yá Ndiöxí cúu-n váiⁿ? —cächí-güedé xähaⁿ-güedé xii-dé.

²⁶⁻²⁷ Te ní xähaⁿ tẽ Juàá:

—Yúhú ní ngódó núu-í dácuàndute-í ñáyiú. Dico nchìcúⁿ ìⁿ tée véxi, te tée-áⁿ cùnùu-gá-dé dàcúxí yùhú, chi yùhú cúu-í ìⁿ tée duuⁿ duuⁿ ñà túú tàú nandaxi cuèdicó ñi chàu-dé dico quide-í chùuⁿ-dë. Te tée-áⁿ sa ñùhu tnahá-dé tnuú-ndó dicó-ni sá ñà túú xini-ndó-dë —cächí-dé xähaⁿ-dë.

²⁸ Duha ní cuu ñuú Bètábará ñuú cáá ndàa ingá xio yúte Jòrdán, yàcáⁿ ní xindecu té Juàá ní dácuàndute-dé ñáyiú.

Jèsús quidé càhnu iní-gá nchaa yíca cuèchi ñáyiú

²⁹ Te nduu tnèé ní xini té Juàá Jèsús véxi yatni-gá núú ndécú-dë ndíhi ñáyiú. Te ní xähaⁿ-dë xií-yu:

—Chí cündèhe tée-ãⁿ, chi tée-ãⁿ cúu-dë Crístú Yaá ní tendaha Yá Ndiöxí véxi ñuyíú-a, te véxi-dé cada càhnu iní-dé nchaa yíca cuèchi ñáyiú ñuyíú. Te cùu-dé dàtná ìⁿ mbéé quití ío váha iní-xi.

³⁰ Te diu tée-ãⁿ ní cachí-í sá cànchícúⁿ-dë quixi. Te cùnùu-gá-dé dàcúxí yùhú, chi díhna-gá-dé sa ndècu ní cachí-í xii-ndo.

³¹ Te ni yùhú ñà túú xini-í-dé ní cùu, dico xica cuu-í dácuàndute-í ñáyiú cuèndá nchaa ñáyiú israèl quini ñähä-yu xii-dé —cächí-dé xähaⁿ-dë xií-yu.

³² Te ní xähaⁿ tùcu-dé:

—Ní xini-í Espiritú Yá Ndiöxí ní quee-xi andíu vëxi cuuⁿ-xi ngúndecu ndíhi ñàha-xi xii-dé, te dàtná cáá lõmá cáá Espiritú-áⁿ vëxi cuuⁿ-xi.

³³ Te yùhú ñà túú xini-í-dé ní cùu, dico Yá Ndiöxí Yaá ní tendaha ñàha xii-í xíca cùu-í dácuàndute-í ñáyiú, Yaá-áⁿ nĩ cachí tnúhu-gá sá tõe na quini-í ngúndecu ndíhi Espiritú-gá sá vëxi cuuⁿ andíu, te tée-áⁿ taxi-dé Espiritú-gá cundecu ndíhi-o.

³⁴ Te yùhú ní xini-í-dé te xini ndáá-í sá Dëhe Dútú Ndiöxí cúu-dë. Te xiãⁿ cächí tnúhu-í xii-ndo —cächí té Juàá xähaⁿ-dë xií-yu.

Cue tée díhna nuu xica cuu ndíhi Jèsús

³⁵ Te nduu tnèé-áⁿ diu-ni xián ndécú tẽ Juàá ndíhi úú cue tée xica cuu ndíhi-dé.

³⁶ Te ní xini-dé Jèsús ñuhú-gã ìchi, te ní xähaⁿ-dë xii cue tée xica cuu ndíhi-dé-áⁿ:

—Chí cündèhe tée-ãⁿ, chi tée-ãⁿ cúu-dë Crístú Yaá ní tendaha Yá Ndiöxí véxi ñuyíú-a. Te cùu-dé dàtná ìⁿ mbéé quití ío váha iní-xi —cächí-dé xähaⁿ-dë.

³⁷ Te sá dúcáⁿ nĩ cáháⁿ té Juàá núú cuè tée úú ndíhi-dé-áⁿ nùu ní chinchícúⁿ-güedé Jèsús.

³⁸ Te ní nchócótó-gã ndàa sátá-gã, te ní xini-gá sá nchìcúⁿ ñähá-güedé xii-gá. Te ní xähaⁿ-gã xii-güedé:

—¿Ná nándùcu-ndo? —cachí-gá xähaⁿ-gã xii-güedé.

Te ní xähaⁿ-güedé:

—¿Ndèé ndécú-n, Ràbií? —cächí-güedé xähaⁿ-güedé xii-gá.

Te Ràbií-áⁿ quée-xí Mèstrú tnúhu mee-güedé.

³⁹ Te ní xähaⁿ Jèsús xii-güedé:

—Chí nèhé te quini-ndó —cächí-gá xähaⁿ-gã.

Te ní xica-güedé cuáháⁿ-güedé, te ní quexìo-güedé núú quidé vèhe-gá. Te ndècu-ni-güedé ndíhi-gá ní cuaa, chi dàtná òré caa cùmí sacuaa ní sáa-güedé.

⁴⁰ Te úú cue tée-áⁿ nĩ tñi-güedé tnúhu ní cáháⁿ té Juàá, te ní chinchícúⁿ-güedé Jèsús. Te núú úú cue tée-áⁿ, ìⁿ-dë nání-dë Ndrìxi,

te ñaní-dé cúú tẽ Xímú, àdi Pelú chi úú ñuú-dé.

⁴¹ Te té Ndrìxí-áⁿ ñí nanducu-ni-dẽ ñaní-dé te ní xáhaⁿ-dẽ:

—Ní naníhí-ndĩ tée cùu Mesiás —càchí-dé xáhaⁿ-dẽ.

Te Mesiás-áⁿ quée-xí Cristú tnúhu mee-güedẽ, Yaá ní tendaha Yá Ndiõxí véxi ñuyíú-a.

⁴² Te ndéca té Ndrìxí ñaní-dé cuáháⁿ núú ndécú Jèsús. Te òré ní xiní ñáhá Jèsús xii té Xímú, te ní xáhaⁿ-gã:

—Yòhó cúú-n tẽ Xímú déhe té Jónás, te vitna danàni ñaha-í Céfás xii-n —càchí-gá xáhaⁿ-gã.

Te Céfás-ãⁿ quée-xí Pèlú tnúhu mee-güedẽ.

Jèsús ní cáháⁿ-gá té Lìpé ndihí té Natanàél

⁴³ Te nduu tnée ní sani iní-gá quíhíⁿ-gá distritú Galileá. Te ní naníhí-gã ñíⁿ tée nàni Lìpé, te ní xáhaⁿ-gã xii-dé:

—Néhe ná quíhíⁿ-ó núú quíhíⁿ-í-a —càchí-gá xáhaⁿ-gã.

⁴⁴ Te té Lìpé-áⁿ cúú-dẽ tée ñuú Bètsaidá. Te ñuú-ni ñuú yàcáⁿ cúú ñuú té Ndrìxí ndihí té Pèlú.

⁴⁵ Te té Lìpé ní naníhí tnáhá-dẽ ndihí té Natanàél, te ní xáhaⁿ-dẽ:

—Ní naníhí-ndĩ tée dii cuèndú-xi ní chídó tnùní ndí Moisés ndihí dava-gá cue tée ní xóo cáháⁿ tnúhu Yá Ndiõxí ndéé sanaha. Te tée-áⁿ nání-dẽ Jèsús déhe té Chèé, tée ñuú Nazàrét —càchí-dé xáhaⁿ-dẽ.

⁴⁶ Te ní xáhaⁿ tẽ Natanàél xii té Lìpé:

—¿Te náa ío váha càa ñuú Nazàrét núu da yàcáⁿ quee tée cáháⁿ tnúhu Yá Ndiõxí? —càchí-dé xáhaⁿ-dẽ.

Te ní xáhaⁿ tẽ Lìpé:

—Néhe ná quíhíⁿ-ó te quiní-n —càchí-dé xáhaⁿ-dẽ.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuèndá-dé te ní cachí-gá:

—Tée véxi-ãⁿ cúú-dẽ mei tẽe isràél, te ñá ñíⁿ ndùu dandahú-dé ñáyiú —càchí-gá xáhaⁿ-gã.

⁴⁸ Te ní xáhaⁿ tẽ Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dẽ.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gã-n càha yutnu ngúxí-ãⁿ te ni tẽ

Lìpé vátá cáná ñaha-gá-dé xii-n òré-áⁿ —càchí-gá xáhaⁿ-gã xii-dé.

⁴⁹ Te sá dúcáⁿ ñí cáháⁿ-gá, núu ní xáhaⁿ tẽ Natanàél xii-gá:

—Mèstrú, yòhó cúú-n Dèhe Dútú Ndiõxí yíndaha-n ñáyiú isràél —càchí-dé xáhaⁿ-dẽ xii-gá.

⁵⁰ Te Jèsús ní xáhaⁿ-gã:

—Cuèndá sá ñí xiní ñáhà-í xii-n càha yutnu ngúxí xíãⁿ iní ñáhá-n, dico cuéhé-gã núú sã quiní-n —càchí-gá xáhaⁿ-gã xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sàá nduu, te quiní-ndó nàcaáⁿ andiú. Te quiní-ndó cuè espíritú xínú cuèchi núú Yá Ndiõxí sá ndàa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gã xii-güedé.

2

Vico tnãndaha ío ñuú Cànaá

¹ Te nduu úní sá dúcáⁿ ñí cuu te ní xóo ñíⁿ vico tnãndaha ñuú Cànaá, ñíⁿ ñuú yíndèhu distritú Galileá. Te yàcáⁿ ní xíndecu nãná Jèsús.

² Te tnáhá Jèsús ndihí cue tée xica cuu ndihí-gá ní cáháⁿ-yu cuáháⁿ-gá ndihí-güedé vico-áⁿ.

³ Te òré ní ndihí vínú, te ní xáhaⁿ nãná Jèsús xii-gá:

—Ñá túú-gã vínú ndécú ndihí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Nãá, ñá túú xini ñuhu-xi da yúhú cúñaha-n cuèndá vínú-áⁿ, chi vátá tnáhá-gá òré quiní-yu yoo cùu yúhú —càchí-gá xáhaⁿ-gã xii-aⁿ.

⁵ Te ní xáhaⁿ-aⁿ xì ñáyiú xìnu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútñí ñíⁿ quídi yúú te quée dàtná ñíⁿ cièndú lítrú ndute ñíⁿ ñíⁿ quídi-áⁿ. Te ndute-áⁿ nándñí ñáyiú isràél ndáhá-yu te nàqueté-yu cóhõ-yu chi ducaⁿ tnáhí quídè-yu nàcuáa sàndáá iní-yu Yá Ndiõxí.

⁷ Te ní xáhaⁿ Jèsús xii nchaa cue tée xìnu cuechi:

—Nadachítú-ndó ndute ndi nchaa quídi-áⁿ —càchí-gá xáhaⁿ-gã xii-güedé.

Te ní nadachítú-güedé.

⁸ Te ní xáhaⁿ-gǎ:

—Vitna te tava-ndo lùha, te canehe-ndo quǐhíⁿ cuáha-ndo tée quide vico —cachí-gá xáhaⁿ-gǎ xii-güedé.

Te ducaⁿ nǐ quide-güedé ní tava-güedé luha nèhe-güedé cuáháⁿ ní sáha-güedé tée quide vico.

⁹ Te ní xito ndéé tée quide vico-áⁿ, te sa ní nduu-xi vínú, te ñá túú ní xini-dé ndèé véxi-xi, dico mee cuè tée xinu cuechi sa naha-güedé núú nǐ tava-güedé. Ducaⁿ te tée quide vico-áⁿ nǐ cana-dé tée tnãndaha.

¹⁰ Te ní xáhaⁿ-dë:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dǎtnúni queñuhú-yu vínú ndàhú. Te yòhó díhna-gá vínú ndàhú ní queñuhu-n, te ndéé núú nǐ ndihí-ná ní queñuhu-n vínú váha —càchí tée quide vico-áⁿ xáhaⁿ-dë xii tée tnãndaha-áⁿ.

¹¹ Te sá nǐ nadatiú Jesús ndute-áⁿ nǐ nduu-xi vínú cúú-xí ñⁿ chiuⁿ díhna nuu sǎ vǎ yòo tnàhí ndàcu cada ní quide-gá ñuú Cànaá, ñⁿ ñuú yíndèhu distritú Galileá, te chiúⁿ ní quide-gá-áⁿ cúú-xí ñⁿ chiuⁿ cahnu vihi, núú xǎⁿ ní cutnúni iní-yu sá ïo càhnu cuu-gá, te ní sándáá iní ñáhá nchaa cue tée xica cuu ndihí-gá.

¹² Te sátá nǐ yáha vico, te ní xica Jèsús ndihí nǎná-gǎ, ndihí cue ñaní-gá, ndihí nchaa cue tée xica cuu ndihí-gá cuáháⁿ-yu ñuú Capèrnaúm. Te yàcáⁿ ní xíndecú-yu ñⁿ úú nduu ndihí-gá.

Jèsús ñá túú tnàhá iní-gá nàcuáa quide ñáyiú xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusalén.

¹⁴ Te sátá nǐ sáa-gá yàcáⁿ, te ní xica-gá cuáháⁿ-gá veñúhu càhnu sá ïo cùnuu, te xití veñúhu-áⁿ nǐ xiní-gá ndécú ñáyiú dìcò-yu ndicutu, mbèé ndihí lómá, te tnàhá ñáyiú dàma díhúⁿ núcò-yu ní xiní-gá.

¹⁵ Te ní queheⁿ-gá ñⁿ úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihí ndicutú-yu ndihí mbèè-yu. Te cue ñáyiú dàma díhúⁿ-ǎⁿ

ní dǎngöyo-gá díhúⁿ-yu, te ní dándùá-gá mèsa-yu.

¹⁶ Te ní xáhaⁿ-gǎ xii cue ñáyiú dìcò lómá:

—¡Queñuhu-ndo nchaa quití-a xití veñúhu-a! ¡Vá cáda-ndó vèhe núú yǎhu núú cúú vèhe Tǎtà-í Dútú Ndiöxí! —càchí-gá xáhaⁿ-gǎ xií-yu.

¹⁷ Te xǎⁿ ní ndacu iní cue tée xica cuu ndihí-gá sá dúcáⁿ yòdo tnuní núú tütú-gá, te càchí-xi: “Ío cùyica iní-í chi ñá cuini-yu canehe ï-yu vèhe Tǎtà-í”, duha càchí-xi núú tütú-gá.

¹⁸ Te ní xáhaⁿ cuè tée isràél xii-gá:

—¿Ná cúú sǎ vǎ yòo tnàhí ndàcu cada, cada-n cuendá cutnúni iní-ndí sá cúú dùha taxi tnuní ñáhá-n xii-ndí-i? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dǎngöyo veñúhu-a, te není xití úní nduu te sa nadaxínu-í —càchí-gá xáhaⁿ-gǎ xii-güedé.

²⁰ Te ní xáhaⁿ tucu cue tée isràél:

—Údico ñúú cuía nǐ xíndecuu-güedé ní sáa veñúhu-a, te yòhó cuini-n nàdaxínu-n xití úní-ni nduu —càchí-güedé xáhaⁿ-güedé xii-gá.

²¹ Dico sá nǐ cáháⁿ-gá chi ñá díú cuendá veñúhu ní cáháⁿ-gá chi cuendá yiqui cùñú-gá ní cáháⁿ-gá.

²² Núú sátá nǐ xihí-gá, te ní ndoto-gá, te òré-áⁿ nǐ ndacu iní cue tée ní xica cuu ndihí-gá nàcuáa ní cáháⁿ-gá, núú xǎⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xiní-gá nàcuáa càa iní nchaa ñáyiú

²³ Te òré ndécú Jèsús vico pàscuá, te ío vai ñáyiú ní sándáá iní ñáhá xii-gá cuendá ío titní sá vǎ yòo tnàhí ndàcu cada ní quide-gá ní xiní-yu.

²⁴ Dico Jèsús ñá ní cáháⁿ-gá nchaa tnúhu ñúhu iní-gá, chi sa ní cutnúni iní-gá sá ñà túú cùu váha iní-yu.

²⁵ Te ñá túú xini ñuhu-gá ñⁿ ñáyiú cúñaha nàcuáa càa iní nchaa tnàha ñáyiú-yu, chí mee-gǎ sa nàha ndáa-gá nàcuáa càa iní-yu ncháa-yu.

3

Jèsús ndihí té Nicòdemú

¹ Ní xíndecu ìⁿ té cùu fariséú ní xínani-dě Nicòdemú, te ní cuu-dé ìⁿ té cùnūu núú ñáyiu isràél.

² Te té-áⁿ ñí sáháⁿ-dé niú ní cáháⁿ ndihí-dé Jèsús, te ní xáhaⁿ-dě:

—Mèstrú, yúhú ndihí dava-gá-güedé sa nàha-ndí sá Yá Ndiöxí ní tendaha ñàha-gá xii-n vèxi-n dànehé ñáhá-n xii-ndí, chi núu ñá túú Yá Ndiöxí ndécú ndihí-n, te vá ndácú-n càda-n nchaa sá vǎ yǒo tnàhí ndàcu cada quide-n —cachí-dé xáhaⁿ-dě.

³ Te ní xáhaⁿ Jèsús:

—Na càchí tnúhu ndáá-í xii-n sǎ ncháá ñáyiu vá ná càcu saa tucu, te vá ndihu ndaha ñàha Yá Ndiöxí xii-yu —càchí-gá xáhaⁿ-gǎ xii-dé.

⁴ Te ní xáhaⁿ tǎ Nicòdemú:

—¿Te nása cada ìⁿ ñáyiu sa ní yǐi te cacu-ni tucú-yu? ¿Náa ndíhu tucú-yu xití nǎnǎ-yu te cacu tucú-yu xito cùu uú-ǎⁿ? —càchí-dé xáhaⁿ-dě xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sǎ nchàa ñáyiu na ndūu ndoo nduu nine iní-xi cuú-yu ñáyiu ní na càcu saa ndihí ndute ndihí Espíritú Yá Ndiöxí, ñáyiu-áⁿ ndíhu ndaha ñàha-gá xii-yu.

⁶ Te nchaa ñáyiu càcu ñuyíú-a, chi déhe ñáyiu ñuyíú-a cuú-yu. Te ñáyiu ní nduu ndoo ní nduu nine iní-xi, ñáyiu-áⁿ ñí nduu táhǔ-yu Espíritú Yá Ndiöxí te tàxi tnuní ñáhá-nǎ Espíritú-gá xii-yu.

⁷ Te vá cúñǔhu-n tnúhu ní cáháⁿ-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-áⁿ cúǔ-yu dàtná ñáyiu ní nacacu saa.

⁸ Táchí nděni xíaⁿ təcú dóho-o xico-xi, dico ñá túú xini-ó ndèé ichi véxi-xi, te ní ñá túú xini-ó ndèé ichi cuáháⁿ-xi. Ducaⁿ sǎtnahá-xi cùu Espíritú-gá ndécú ndihí ñáyiu ní nduu ndoo ní nduu nine iní-xi —càchí-gá xáhaⁿ-gǎ xii-dé.

⁹ Te dàtnuní ní xicáⁿ tnúhú tucu té Nicòdemú núú-gǎ, te xáhaⁿ-dě xii-gá:

—¿Te nása ndūu tnúhu càháⁿ-n dùcaⁿ caháⁿ-n? —càchí-dé xáhaⁿ-dě xii-gá.

¹⁰ Te ní xáhaⁿ Jèsús:

—Yòhó cúú-n ìⁿ té cùtnuní iní-xi, chi dàcuaha-n ñáyiu isràél, ¿te ñá təcú tnùní-n tnúhu càháⁿ-í-u?

¹¹ Te na càchí tnúhu ndáá-í xii-n sǎ nchǔhú càháⁿ-ndí ìⁿ sá ñí tecú tnùní-ndí, te càháⁿ ndáá-ndí cuendá ìⁿ sá ñí xini-ndí. Dico nchòhó ñá təcú tnùní-ndó tnúhu càháⁿ-ndí.

¹² Te ñá sándáá iní-ndó tnúhu càháⁿ-í cuendá nchaa nàcuáa cùu ñuyíú-a, te uuⁿ-gá cada-ndo núu cáháⁿ-í cuendá nchaa nàcuáa cùu andiu.

¹³ Vǎ yǒo ìⁿ sàa andiu, te cani-xi cuendú nàcuáa càa. Chi ìⁿ dǐi ní yúhú véxi cuuⁿ-í andiu, te cùu-í ñaní tnáhá-ndó nchàa-ndo. Te diu-ni yacáⁿ ndaa-í cundecu-í.

¹⁴ Te dàtná ní ndanehe ndí Moisés cóo ñí sata caa ndí-dí xití yucu, ducaⁿ càda ñàha-güedé cata caa ñàha-güedé núu cùrúxí xii yúhú Té cùu ñaní tnáhá-ndó nchàa-ndo ìⁿ nduu,

¹⁵ te ducaⁿ yǎha-í cuendá nchaa ñáyiu na quíndáá iní ñáhá xii-í te nduu táhǔ-yu cundecu-yu ndihí Yá Ndiöxí ñí caa ñí quíhíⁿ —càchí-gá xáhaⁿ-gǎ xii-dé.

Yá Ndiöxí ío cùu iní-gá ñáyiu ñuyíú-a

¹⁶ Te Yá Ndiöxí ío cùu iní-gá ñáyiu ñuyíú-a. Te ìⁿ dǐi-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quíndáá iní ñáhá ñáyiu, te vá cuíta nihnú-yu, chi nduu táhǔ-yu cundecu-yu ndihí-gá ñí caa ñí quíhíⁿ.

¹⁷ Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyiu, chi ní tendaha-gǎ Déhe-gá ní quixi-gá sá dácacu nihnu-gá ñáyiu ñuyíú-a núú ùhú núú ndàhú.

¹⁸ Nchaa ñáyiu sándáá iní ñáhá xii Déhe-gá, te vá cuíta nihnú-yu. Te nchaa ñáyiu ñá túú sándáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sándáá iní-yu Déhe Dútú Ndiöxí.

¹⁹ Chi ní quixi Déhe-gá ñuyíú-a ní dándíxí tǔu-gá iní-yu cuendá cutnùní iní-yu nàcuáa ndūu cuendá Yá Ndiöxí te tníⁿ-yu ìⁿ ichi váha ñí cùu, te ñá ní tnàhá iní-yu, chi ní cudíⁿ-gǎ iní-yu nchaa sá cuèhé sá dúhá dàcúxí sǎ vǎha, núu xíaⁿ tá xíta nihnú-yu cuáháⁿ.

20 Te nchaa ñáyiú quide nchaa sá cuèhé sá dúhá ñã tnàhá iní-yu cutnùní iní-yu nàcuáa ndùu cuendá Yã Ndiöxí, te ñã tníí-yu tnúhu-gá cuendá yùhú-yu nduu tnùní nchaa sá quidě-yu.

21 Te nchaa ñáyiú ñùhu ichi ndáa cuiní-yu cutnùní iní-yu nàcuáa ndùu cuendá Yã Ndiöxí, te cutnùní sá chindèe ñaha-gá xií-yu, chi quide váha-yu.

Té Juàá tée dàcuandute ñaha xii ñáyiú càháⁿ váha tucu-dé cuendá Jèsús

22 Te sátá dúcáⁿ ñí cuu, te ní quee Jèsús cuáháⁿ-gá ndíhi cue tée xica cuu ndíhi-gá distritú Jùdeá. Te yàcáⁿ ní xindecu tnaa-gá ndíhi-güedé ní xóo dacuandute-güedé ñáyiú.

23 Te ndècu té Juàá ñí xichi núu nání Ènón yatni ñuú Sàlém dácuandute-dé ñáyiú, chi yàcáⁿ ío váha ñùhu ndute, núu xiáⁿ ní xóo quíhíⁿ ñáyiú yàcáⁿ ní xóo cuanduté-yu.

24 Duha ní cuu cùtnàhá vátá ngává-gã té Juàá vecaá.

25 Te ní cacu ñí cuèndú ní càháⁿ cue tée xica cuu ndíhi té Juàá ndíhi ñí cù cue tée isràél, núu ndèdacàa sá váha-gá cada ñáyiú cuendá nduu íí-yu.

26 Te ní sáháⁿ-güedé núu ndécú tã Juàá ní xáhaⁿ-güedě:

—Mèstrú, tée ní quixi núu ñí xindecu-ndàa ingá xio yúte Jòrdán, tée dii cuèndú-xi ní càháⁿ-n, tée-ãⁿ dácuandute-dé tnàhá-dé ñáyiú. Te ío vai ñáyiú ní chinchícúⁿ ñáhá xii-dé —càchí-güedé xáhaⁿ-güedé xii-dé.

27 Te ní xáhaⁿ tã Juàá:

—Te vá yõ ñí ndàcu cada ñí chiuⁿ nacuáa cuu váha iní Yã Ndiöxí, te núu ñã túu mèe-gá chindèe ñaha-gá xií-yu.

28 Te nchòhó sa nàha-ndo sá yùhú ní càháⁿ ndáá-í sá ñã díú Crìstú cùu-í, dico mee Yã Ndiöxí ní tendaha ñaha-gá yódó nùu-í véxi núu Yàá-áⁿ.

29 Te nchòhó xini-ndó sã ñí tée tnãndaha te xichí tnãndaha ndíhi-ná-dé cùndíhi-dé. Te tée ní xica ndáhu ío cùdíí iní-dé ndèdóho-dé nchaa tnúhu càháⁿ tée tnãndaha-áⁿ. Te ducaⁿ sãtnahá-xi cùu yùhú, chi ío cùdíí iní-í sá váí ñáyiú ta chinchícúⁿ ñáhá xii Jesús cuáháⁿ.

30 Te uuⁿ-gá cuita cuu vai ñáyiú cutnùní iní-xi sá ío cùnuu-gá, te yùhú cuita ndóo ndee-í quíhíⁿ —càchí-dé xáhaⁿ-dẽ xii-güedé.

Crìstú véxi cuuⁿ-gá andíu

31 Te ñíndí díí-ñí Crìstú Yaá véxi cuuⁿ andíu cùnuu-gá núu ñùyíú-a. Te nchaa ñáyiú ndècu ñùyíú-a cùu-yu ñáyiú ñùyíú iha, te càháⁿ-yu sá cùu-xí ñùyíú-a. Dico Crìstú Yaá véxi cuuⁿ andíu

32 càháⁿ-gá ñí sá ñí xini-gá, te càháⁿ-gá ñí sá ñí tecú dóho-gá. Te ñã túu cuiní-yu quindáá iní-yu tnúhu càháⁿ-gá.

33 Te nchaa ñáyiú tní tnúhu càháⁿ Yaá véxi cuuⁿ andíu-áⁿ càháⁿ-yu sá tnúhu Yá Ndiöxí cùu-xí ñí sá ndáá.

34 Te Déhe-gá Yaá véxi cuuⁿ andíu càháⁿ-gá mee-ñí tnúhu-gá. Te ñã ùhú iní-gá ní sãñaha-gã Espiritú-gá ndécú ndíhi Déhe-gá.

35 Te Dútú Ndiöxí ío cùu iní-gá Déhe-gá, núu ní xáhaⁿ-gã sá mèe-gã taxi tnùní-gá nchaandi túhú sá ío.

36 Te nchaa ñáyiú na quindáá iní ñáhá xii Déhe-gá, ñáyiú-áⁿ cundecú-yu ndíhi-gá ní caa ní quíhíⁿ. Te nchaa ñáyiú vá quindáá iní ñáhá xii Déhe Yá Ndiöxí ío dandòho ñaha-gá xií-yu.

4

Jèsús ndíhi ñí ñaha Sàmariá

1 Te ní níhí cue tée cùu fariséu tnúhu sá vai-gá ñáyiú ta chinchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáháⁿ dàcúxí tã Juàá.

2 Te cuèí ñã díú mèe-gá dácuandute ñaha-gá xií-yu, dico cue tée xica cuu ndíhi-gá dácuandute ñaha-güedé xií-yu.

3 Te ní níhí Jèsús tnúhu nàcuáa càháⁿ cue tée cùu fariséu, núu ní ndee-gá distritú Jùdeá cuánuhú tucu-gá distritú Galileá.

4 Te ichi ñùhu-gá ní nayáha-gá distritú Sàmariá.

5 Te ní sáa-gá ñí ñuú nání Sicár te ñuú-áⁿ yíndèhu-xi distritú Sàmariá. Te xiáⁿ cáa yatni ñuhu núu ñí sáha táhú ndí Jàcób déhe ndí ndí Chèé.

6 Te yàcáⁿ cáa dòco ní cuu cuendá ndí Jàcób. Te cùu-xi datná cuádava nduu ñùhu Jesús ichi, te ío ní xàú-gá ñuú ní sáa-gá yuhu dòco-áⁿ ñí ngóo-gá ndétátú-gá.

7-8 Te ní xica cue tée xica cuu ndíhi-gá cuáháⁿ-güedé xití ñuú Sicár cuánguaaⁿ-güedé sá cáxí-güedé. Te yuhu

dòco-áⁿ núcõo-gá ní sáá ìⁿ ñàdihí ñaha distritú Sàmariá véxi quéhnu-aⁿ ndute, te ní xáhaⁿ Jèsús:

—Taxi táhú luha ndute na cõho-í — cächí-gá xáhaⁿ-gã.

⁹ Te ní xáhaⁿ ñàdihí-áⁿ:

—¿Ná cuendá da núu-í xicáⁿ-n ndùte coho-n? Te yòhó cúu-n tée isràél, te yúhú cúu-í ñaha Sàmariá —cächí-aⁿ xáhaⁿ-aⁿ xìi-gá.

Te ducaⁿ ñí xáhaⁿ-aⁿ, chi ñá túú ndècu váha ñáyiu isràél ndihí ñáyiu distritú Sàmariá.

¹⁰ Te ní xáhaⁿ Jèsús xii-aⁿ:

—Ñá cútnùní iní-n nã taxi Yá Ndiõxí xii-n, te ni ñá cútnùní iní-n yòo xicáⁿ ndute núu-n. Te núu dicó xini-n yòo cuu yúhú á, te da mee-n cãcãⁿ-n ndùte núu-í coho-n, te yúhú taxi-í ndute cundecu ndihí-n núu cuáháⁿ núu véxi —cächí-gá xáhaⁿ-gã.

¹¹ Te ní xáhaⁿ tùcu ñàdihí-áⁿ:

—Tátá, ni sá quéhnu-n ndùte ñá túú nèhe-n, te doco-a cùnú víhí, te ñá túú ndèe quíngueheⁿ-n ndùte taxi-n coho-í.

¹² Ndíi Jácób ñaní tnáhá-ndí ní xíndecu ndèe sanaha ñí cadúha ndíi doco-a ñí tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúxí ndíi-áⁿ? —cächí-aⁿ xáhaⁿ-aⁿ xìi-gá.

¹³ Te ní xáhaⁿ Jèsús:

—Nchaa ñáyiu xihí ndute doco-a, te vá cúu vétú dúcáⁿ iní-yu chi dayichí ñáhá-ní tùcu-xi ndute-a.

¹⁴ Dico nchaa ñáyiu na cõho ndute na cuáñaha-í, te vá ìⁿ ndùu-gá dayichí ñáhá-xí ndùte-áⁿ xií-yu, chi ndute cuáñaha-í cúu-xí ndùte váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìhí, ducaⁿ sãtnahá-xi cada-xi chi candeca-xi iní-yu ni caa ni quíhíⁿ, te núu na cõhó-yu ndute cuáñaha yúhú —cächí-gá xáhaⁿ-gã xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná cõho-í cuendá sá vã dayichí ñáhá tnáhí-gá-xi ndute. Te vá quíxí-gã-í quixi quéhnu-í ndute doco-a —cächí-aⁿ xáhaⁿ-aⁿ xìi-gá.

¹⁶ Te ní xáhaⁿ Jèsús:

—Cuáháⁿ cuángàna yì-n, te quixi-ndo ìha —cachí-gá xáhaⁿ-gã xii-aⁿ.

¹⁷ Te ní xáhaⁿ-aⁿ:

—Ñá túú yì-í —cächí-aⁿ xáhaⁿ-aⁿ xìi-gá.

Te ní xáhaⁿ tùcu Jèsús:

—Ndáá cãháⁿ-n sã ñà túú yì-n.

¹⁸ Dico ní cuu úhúⁿ tée cãndeca-n, te tée ndèca-n vitna chi ñá díú yì-n cuu-dé, te ndáá cãháⁿ-n sã ñà túú yì-n —cachí-gá xáhaⁿ-gã xii-aⁿ.

¹⁹ Te sá dúcáⁿ ñí xáhaⁿ-gã núu ní xáhaⁿ tùcu-aⁿ:

—Tátá, yúhú sání iní-í sá yòhó cúu-n ìⁿ tée cãháⁿ tnúhu Yá Ndiõxí.

²⁰ Te cue ñaní tnáhá-ndí ní xíndecu ndèe sanaha ñí xóo cada cãhnú-yu Yá Ndiõxí tìndúú-a, dico nchòhó ñáyiu isràél cächí-ndó sã ndèe ñuú Jerusàlén cada cãhnu-o-gá —cächí-aⁿ xáhaⁿ-aⁿ xìi-gá.

²¹ Te ní xáhaⁿ Jèsús xii-aⁿ:

—Ìⁿ tnúhu na cãháⁿ-í-a, te quíndáá iní-n. Sa ta cùyatni sáá nduu sá ñà díú-gã mee-ni tìndúú-a, te ni ñà díú-gã mee-ni ñuú Jerusàlén cada cãhnu-ndo Tátá-ó Dütú Ndiõxí, chi ndèni ní cuu cada cãhnu-ndo-gá.

²² Te nchòhó cue ñáyiu Sàmariá chi ñá cútnùní iní-ndó nã cúu sã quidé cãhnu-ndo, dico nchúhú ñáyiu isràél, chi cùtnuní iní-ndí ná cúu sã quidé cãhnu-ndí. Chi ìⁿ tée isràél véxi-dé dàcácu nihnu-dé ñáyiu cuendá vá quíhíⁿ-yu núu úhú núu ndàhú.

²³ Te není vitna ngüíta-yu cada cãhnu ndisá-yu Tátá-ó Dütú Ndiõxí, te cadá-yu ni yùhu ni iní-yu sá cúu-xí-gã, chi mee-gã ducaⁿ cuíní-gá cadá-yu cada cãhnú-yu-gã.

²⁴ Te Yá Ndiõxí chí ìⁿ espíritú cúu-gã. Te nchaa ñáyiu na càda cãhnu ñaha, te cadá-yu ni yùhu ni iní-yu sá cúu-xí-gã te cadá-yu dàtná cãháⁿ tnúhu-gá —cächí-gá xáhaⁿ-gã xii-aⁿ.

²⁵ Te ní xáhaⁿ ñàdihí-áⁿ:

—Xini-í sá quíxí tée cùu Mesiás, tée cächí-güedé nání Crístú. Te tée-áⁿ ná sàá-dé, te cachí tnúhu ndáá-dé nãcuáa cuu —cächí-aⁿ xáhaⁿ-aⁿ xìi-gá.

²⁶ Te ní xáhaⁿ Jèsús:

—Díu tée-áⁿ cúu yúhú tée ndàtnúhu ndihí-n —cächí-gá xáhaⁿ-gã xii-aⁿ.

²⁷ Te òré-áⁿ ñí ndexiõ cue tée xica cuu ndihí-gá, te ní cuñúhu-güedé sá ndàtnúhu-gá ndihí ñàdihí-áⁿ. Dico ni

ñá ní xicáⁿ tnúhú-güedě núú-gă nũu ná cuendú ndátnũhu-gá ndihí ñadìhí-áⁿ.

28 Ducaⁿ te ní dándõo ñadìhí-áⁿ yoó ndute-aⁿ xíaⁿ, te ní xica-aⁿ cuánuhú-aⁿ ñuú cútnũhu-aⁿ ñáyiú cuendá Jèsús.

29 Te ní xáhaⁿ-aⁿ:

—Chí nèhé ná quíhíⁿ-ó, chí quíní-ndó nă cúú ñⁿ téé núcóo yuhu dòco-áⁿ nũu ñá díú Cristú Yaá ní tendaha Yă Ndiõxí véxi ñuyíú-a cùu-dé nũu ní cáháⁿ ndáá-dé nàcuáa cùu ndecu-í —càchí-aⁿ xăhaⁿ-aⁿ xii-yu.

30 Te sá nĩ níhí ñáyiú ñuú-áⁿ tnũhu, xíaⁿ ní xicá-yu cuáháⁿ-yu.

31 Te òré vátá sàá-gá-yu xíaⁿ nĩ xáhaⁿ cuè téé xica cuu ndihí-gá xii-gá:

—Mèstrú, cudèhñu na cudehñu-o —cachí-güedé xăhaⁿ-güedé xii-gá.

32 Te ní xáhaⁿ-gă:

—Ndècu ñⁿ sá cáxì-í, ñⁿ sá ñà túú xìnì nchòhó —càchí-gá xáhaⁿ-gă xii-güedé.

33 Te cue téé xica cuu ndihí-gá xitnàha-güedé:

—Váa íó ñáyiú ní quixi nehe sá nĩ xexi-gá nũu duha càháⁿ-gá —càchí-güedé xitnàha-güedé.

34 Te ní xáhaⁿ-gă:

—Dàtná cuíní-ndó cùu vétú iní-ó òré xéxí-ó, ducaⁿ cùu vétú iní-í quidè-í nchaa nàcuáa ní cáháⁿ Yă Ndiõxí Yaá ní tendaha ñàha xii-í véxi-í ñuyíú-a, te chiúⁿ-gá ío cùdíí iní-í dandìhí-í.

35 Te nchòhó càchí-ndó sã cùmání cǔmí-gă yóó te cuu itú. Dico yúhú càchí-í sá cundehe-ndo ñáyiú-ăⁿ, chí sa ndècu túha-yu, dàtná cúú-nă itú sá sà ní cuu-ná natahu-o cùú-yu, chí sa ndècu túha-ná-yu cundedóho-yu tnúhu-í.

36 Te dàtná cúú ñáyiú nàtahu itú chí sa cúhuⁿ yáhu-yu, ducaⁿ sãtnahá-xi cùu ñáyiú na càháⁿ tnúhu-í, chí cuáñaha-í sá ndúú tãhũ-yu na sàá nduu. Te nchaa ñáyiú na tnèi tnúhu-í te nduu tãhũ-yu cundecu-í ndihí-yu nĩ caa nĩ quíhíⁿ. Te dàtná cúú ñáyiú ní chihi tatá-xi, ndihí ñáyiú ní natahu itú-xi cùdíí-nă iní-yu. Ducaⁿ sãtnahá-xi cùu ñáyiú na càháⁿ tnúhu-í.

37 Chí ndáá quée-xí nàcuáa cuáháⁿ ñⁿ cuendú sá càchí-xi: “Tucu téé ní chihi

tatá, te tucu téé ní natahu”, duha cuáháⁿ cuendú-áⁿ.

38 Te yúhú tendaha ñaha-í xii-ndo quíhíⁿ-ndó cãháⁿ-ndó tnũhu-í núú sà ní yáha-güedé ní cáháⁿ-güedé tnúhu-í. Te nchòhó quíhíⁿ-ndó dícó-nă nduu cuendá-ndó chiúⁿ-áⁿ —càchí-gá xáhaⁿ-gă xii-güedé.

39 Te ío cuéhé ñáyiú ñuú-áⁿ nĩ xíndedóho-yu cuendú ní caní ñadìhí-áⁿ nũu-yu sá Jèsús ní xáhaⁿ-gă nchaa nàcuáa quide-aⁿ, te xíaⁿ ío vái-yu ní sándáá iní-yu Jèsús.

40 Te ní quexió-yu núú ndécú-gă, te ní cáháⁿ ndàhú-yu núú-gă sá quèndõo-gá ñuú-yu, núu xíaⁿ ní xíndecu-gá ndihí-yu úú nduu.

41 Te ío cuéhé-gă-yu ní sándáá iní-yu tnúhu ní cáháⁿ méé-gă.

42 Te ní xáhăⁿ-yu xii ñadìhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chí ní cáháⁿ méé-gă ní xíndedóho-ndí vitna núu ní sándáá ndisa iní-ndí sá díú-gă cúú-gă Cristú Yaá ní tendaha Yă Ndiõxí véxi ñuyíú-a dàcácu nihnu-gá ñáyiú núú ùhú núú ndàhú —càchí-yu xáhăⁿ-yu xii-aⁿ.

Jèsús quidé tãtna-gá déhe ñⁿ téé ndèè chíúⁿ nũú gobièrnú

43 Te nduu úní ní nucúhuⁿ Jèsús ichi cuáháⁿ-gá distritú Galileá.

44 Te cuáháⁿ-gá yàcáⁿ, chí mee-gă ní cachí-gá sá nũu ñⁿ téé na càháⁿ-dé tnúhu Yă Ndiõxí ñuú núú nĩ cacu-dé, te ñá túú nèhé-yu sá yíñũhu núú-dě.

45 Te òré ní sáá-gá distritú Galileá, te ío váha ní cuu iní ñáhăⁿ-yu xii-gá, chí cuendá tnàhá-yu ní xíndecu ndihí-gá vico pàscuá ñuú Jerusálén. Te yàcáⁿ ní xíní-yu nchaa sá nĩ quide-gá.

46 Te ní sáháⁿ tucu-gá ñuú Cànaá ñⁿ ñuú yíndèhu distritú Galileá, núú nĩ nadatiu-gá ndute ní nduu-xi vínú. Te ñuú Capèrnaúm ndécú ñⁿ téé ndèè chíúⁿ nũú tée cùu gobièrnú, te téé-áⁿ cùhú ñⁿ déhe-dé.

47 Te ní níhí-dě tnúhu sá nĩ ndee Jèsús distritú Jùdeá ní ndexió-gá distritú Galileá, núu ní sáháⁿ-dé núú ndécú-gă, te ní cáháⁿ

ndàhú-dé núú-gǎ sá quìhíⁿ-gá cada tátna-gá déhe-dé, chi sa ndècu-na-dé sá cùú-dé.

⁴⁸ Te ní xáhaⁿ Jèsús xii-dé:

—Nchòhó, chi vá quìndáá iní ñáhá-ndó xii-í te núú vá cǎdà-í ìⁿ sá vǎ yòo tnhí ndàcu cada quini-ndó —càchí-gá xáhaⁿ-gǎ xii-dé.

⁴⁹ Te ní xáhaⁿ tùcu tée cùhú déhe-xi-áⁿ xii-gá:

—Tǎtá, cundee iní-n ná quìhíⁿ-ni-o cǎda tátna-n dèhe-í ná cuu-dé, chi cǎhú víhí tnhá-dé —càchí-dé xǎhaⁿ-dě xii-gá.

⁵⁰ Te ní xáhaⁿ Jèsús:

—Cuanùhú te quini-n nǎ ní ndúha déhe-n —càchí-gá xáhaⁿ-gǎ xii-dé.

Te ní sándáá iní-dé tnhú ní cǎhǎⁿ Jèsús, te cuánuhú-dé.

⁵¹ Te ñùhu-dé ichi cuánuhú-dé ní sǎnú tnhá ñáhá cuè tée xinu cuechi núú-dé. Te ní xáhaⁿ-güedé sá sǎ ta ndúha déhe-dé cuáháⁿ.

⁵² Te ní xicǎⁿ tnhú-dé núú-güedé ná òré cúú-xí ñí ngüíta-xi ta quètaú cuéhé-dě. Te ní xáhaⁿ-güedé:

—Icu dàtná òré cǎá ìⁿ sacuaa ní nchíco-dé cahni —càchí-güedé xǎhaⁿ-güedé xii-dé.

⁵³ Te tǎtá tée cùhú-áⁿ ñí ndacu iní-dé sá díú òré ní quètaú cuéhé-dě ní cǎhǎⁿ ndihí-dé Jèsús ní xáhaⁿ-gǎ sá ndúha déhe-dé. Te xǎⁿ ñùu ndi nchǎa tée-áⁿ vehe-dé ní sándáá iní-yu Jèsús.

⁵⁴ Te sǎ ñí quide-gǎ-áⁿ cúú ùú xito quide-gǎ sá vǎ yòo tnhí ndàcu cada. Te sǎ ñí quide-gǎ xito cùu uú-áⁿ cúú-xí sǎ ñí quide-gǎ cùtnáhá ní ndee-gǎ distritú Jùdeá cuánuhú-gǎ distritú Galiléa.

5

Jèsús quidé tátna-gǎ ìⁿ tée cùhú ìⁿ xichi núú nání Bètesdá

¹ Te sǎtá dúcǎⁿ ñí cuu, te ní tnhá nduu ñí quide ñáyiu israhél ìⁿ vico. Te ní sǎhǎⁿ Jèsús ñúú Jerusàlén.

² Te ñí cǎa xico yuhu ñúú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xǎⁿ cǎá ìⁿ tanquí ndute dàna-ní-yu Bètesdá tnhú mèe-yu tnhú hèbreú, te yuhu tànquí-áⁿ cǎá ùhúⁿ corrèdór.

³ Te xití corrèdór-áⁿ xǎndecu cuéhé ñáyiu cùhú, ñáyiu cuáá, ñáyiu yacua, ñáyiu ñá

cúú-gǎ candá nihnu, ndètú-yu candá ndute-áⁿ.

⁴ Chi ñihí-yu tnhú sǎ ǎma nihnu cùuⁿ ìⁿ espíritú xínú cuèchi núú Yǎ Ndiòxí, te dàcandá-xi ndute ñùhu tanquí-áⁿ. Te ñáyiu díhna nuu nà quée xití ndute-áⁿ, te òré-ni ndúha-yu.

⁵ Te yàcǎⁿ ñútnáhá ìⁿ tée ní cuu ócò sǎhúⁿ úní cuíá sǎ cùhú-dé.

⁶ Te ní xiní Jèsús cǎá-dě, te ní cutnùni iní-gǎ sǎ ñí cuu cuéhé cuíá cùhú-dé, te ní xáhaⁿ-gǎ:

—¿Cuini-n ndúha-n-ǎⁿ? —càchí-gǎ xáhaⁿ-gǎ xii-dé.

⁷ Te ní xáhaⁿ tée cùhú-áⁿ:

—Tǎta, vá yòo ñihí-í dàquée ñaha xii-í xití tànquí-a òré candá ndute, chi òré cuini-í quée-í, te ingá-ni tucú-yu quènduú-yu núú-í cuángueé-yu —càchí-dé xǎhaⁿ-dě xii-gǎ.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gǎ xáhaⁿ-gǎ xii-dé.

⁹ Te òré-ni-áⁿ ñí ndúha tée cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-ǎⁿ cúú-xí nduu ndetatú ñáyiu,

¹⁰ núu ní xáhaⁿ cuè tée israhél xii tée ní cuhú-áⁿ:

—Vitna cùu-xi nduu ndetatú-ó ñùu vá cúú cuìdo-n yuu-n —cachí-güedé xǎhaⁿ-güedé xii-dé.

¹¹ Te ní xáhaⁿ-dě:

—Mee tée ní quide tátna ñaha xii-í ní cachí-dé sǎ ndàcàni-í yuu-í, te caca-í —càchí-dé xǎhaⁿ-dě xii-güedé.

¹² Te ní xáhaⁿ-güedé:

—¿Te ná cúú tée ducaⁿ ñí cachí sǎ ndàcàni-n yuu-n te caca-n-í? —càchí-güedé xǎhaⁿ-güedé xii-dé.

¹³ Dico tée ní cuhú-áⁿ ñà túú ní cùtnuní iní-dé ná cúú tée ñí quide tátna ñaha xii-dé, chi Jèsús òré-ni ní xica-gǎ cuáháⁿ-gǎ tnuú nchaa ñáyiu chitu xǎndecu xǎⁿ.

¹⁴ Te sǎtá dúcǎⁿ te ní naníhí tnhá Jèsús ndihí tée ñí quide tátna-gǎ-áⁿ xití veñúhu cǎhnu sǎ ìo cùnuu, te ní xáhaⁿ-gǎ xii-dé:

—Ní xiní-n nǎ ní ndúha-n-va. Te vitna vá cǎdá-gǎ-n nǎndi sǎ cuéhé sǎ dúhá, chi núu na cǎda-ni-n ña, te quixi ingá cuéhé, te víhi-gǎ ndoho-n —càchí-gǎ xáhaⁿ-gǎ xii-dé.

15 Ducaⁿ te ní xica téé ní cuhú-áⁿ cuángúñaha-dě xii cue téé israél sá Jèsús ní quide tátna ñaha-gã xii-dé.

16 Núu sátá ñí níhí cue téé israél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuendá sá dúcáⁿ ñí quide tátna-gá nduu ndètatú-güedé.

17 Te ní xáhaⁿ Jèsús xii-güedé:

—Tàtá-í Dútú Ndiöxí quidé chiúⁿ-ni-gá nõu xiãⁿ quidé chiúⁿ-í tnàhá-í —càchí-gá xáhaⁿ-gã xii-güedé.

18 Te ní cudééⁿ-güedé sá ñã ní cãnehe íí-gã nduu ndètatú-güedé, te ní cuiní-güedé cahni ñaha-güedé, te uuⁿ-gá ní cuiní-güedé cahni ñaha-güedé xii-gá sá ñí cachí-gá sá Tàtá-gã cúú Dútú Ndiöxí, chi ní sani iní-güedé sá cuiní-gá nútahá-gá Yã Ndiöxí nõu xiãⁿ ío ní cudééⁿ-güedé.

Jèsús Déhe Yá Ndiöxí táxí tnùn-í-gá

19 Te ní xáhaⁿ tucu Jesús xii-güedé:

—Na càchí tnúhu ndáá-í xii-ndo sã yúhú chi ni ñíⁿ sá ñã ndácú-í cada mee-í nõu ñã túú mèe Tàtá-í dánèhé ñàhá-gã xii-í nàcuáa cada-í, chi nchaa sá quidé Tàtá-í quidè-í tnàhá-í.

20 Te Tàtá-í ío cùu iní ñàhá-gã xii-í nõu dãnèhé ñàhá-gã nchaa nàcuáa quide-gá. Te vitna ndècu vai-gá chiúⁿ tahu-gá cada-í, chiúⁿ sá vátá quini-gá-ndó càda-í nàcuáa cuñúhu vìhi-ndo.

21 Chi Tàtá-í dandòto-gá ñáyiu ní xihí. Te yúhú cada-í te nduu táhú nchaa ñáyiu càchí iní-í cundecu ndihí ñàhá-yu xii-í ni caa ni quíhíⁿ.

22 Te na sàá nduu te ñã díú Tàtá-í cada ndáá-gá cuéchi ñáyiu, chi ní cachí-gá sá yúhú cada ndáá-í

23 cuendá nchaa ñáyiu canehé-yu sá yíñùhu núu-í dàtná nêhè-yu sá yíñùhu núu Tàtá-í Yáá ní tendaha ñàha xii-í véxi-í ñuyíú-a. Te nchaa ñáyiu ñã túú nêhe sá yíñùhu núu yúhú, te ni nõu Tàtá-í ñã túú nêhè-yu sá yíñùhu.

24 "Te na càchí tnúhu ndáá-í xii-ndo sã nchaa ñáyiu na cùndedóho tnúhu na càháⁿ-í, te núu na quindáá iní-yu Dútú Ndiöxí Yáá ní tendaha ñàha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ni caa ni quíhíⁿ.

25 Te vitna na càchí tnúhu ndáá-í xii-ndo sã nchaa ñáyiu ndècu ichi cuehé ichi duha cùu-yu dàtná ñíⁿ ñáyiu ní xihí, te vitna ní sáá nduu cùndedóho-yu tnúhu càháⁿ yúhú Déhe Dútú Ndiöxí, te nchaa ñáyiu na quindáá iní-xi, te naníhí tãhú-yu.

26 Te dàtná quidé mèe Tàtá-í dácacu nihnu-gá ñáyiu, ducaⁿ ñí cachí-gá cada-í dácacu nihnu-í-yu.

27 Te ní cachí tucu-gá sá sàá ñíⁿ nduu, te cada ndáá-í cuéchi nchaa ñáyiu ñã túú quide ndáá, chi yúhú táxí tnùn-í, te cùu-í ñani tnàhá-ndó nchaa-ndo.

28 Te ni vã cúñúhu-ndo tnúhu càháⁿ-í, chi sáá nduu te nchaa ñáyiu ní xihí tecú dóho-yu tnúhu càháⁿ-í.

29 Te ndoto nchaa ñáyiu ní quide váha cundecu ndihí-í-yu ni caa ni quíhíⁿ, te ndoto tnàhá nchaa ñáyiu ní quide cuèhé ní quide duha, te ñáyiu-áⁿ quíhíⁿ-yu núu ùhú núu ndàhú.

Yá Ndiöxí chindèe tnúhu-gá Jèsús

30 "Te yúhú, chi ni ñíⁿ sá ñã ndácú-í cada mee-í nõu ñã díú mèe Yá Ndiöxí táuchíúⁿ-gá nàcuáa cada-í. Te quide ndáá-í cuéchi ñáyiu nàcuáa tàxi tnùn-í-gá cada-í, te yúhú ñã túú quide-í sá cúú iní mèe-í chi Tàtá-í ní táuchíúⁿ-gã nàcuáa cada-í.

31 Te núu na càháⁿ-í sá mèe-í táxí tnùn-í, te vá quindáá iní-ndó.

32 Chi Yá Ndiöxí chindèe tnúhu ñaha-gã xii-í, te yúhú xìn-í sá tnúhu càháⁿ-gá cuendá-í cúú-xí ñíⁿ sá ndáá.

33 Te nchòhó ní téchíúⁿ-ndó cuè téé ní sáháⁿ ní ndúcú tnúhu-güedé núu tè Juáá nõu ná tnúhu càháⁿ-dé cuendá-í, te téé-áⁿ ní càháⁿ ndáá-dé nàcuáa nduu cuendá-í.

34 Dico yúhú, chi ñã túú xini ñuhu-í ñíⁿ ñáyiu ñuyíú-a chindèe tnúhu ñàhá-yu xii-í, dico té Juáá ní càháⁿ váha-dé cuendá-í, te xiãⁿ càchí tnúhu tucu-í cuendá quindáá iní-ndó, te naníhí tãhú-ndó.

35 Te dàtná cuiní-ndó cùu ñíⁿ iti ndéñuhú te dàyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudéé iní-ndó tnúhu ní càháⁿ-dé.

36 Te váha-ni ní càháⁿ té Juáá, dico yúhú chi ndècu nchaa sá tá quide-í véxi nàcuáa ní táuchíúⁿ Yá Ndiöxí cada-í, te nchaa xiãⁿ cúú-xí ñíⁿ sá cùtnùn-í iní-ndó sã mèe

Yã Ndiõxí ní tendaha ñaha-gá xii-í véxi-í ñuyíú-a.

³⁷ Te ñu-ni-gá chíndèe tnúhu ñaha-gã xii-í, ñicó-ni sá méé-ndó ñà túú cuñí-ndó càda cuendá-ndó tnúhu càháⁿ-gá, te ni ñà túú xini-ndó nàcuáa càa-gá.

³⁸ Te ñà túú quèe iní nchòhó tnúhu càháⁿ-gá, chi ñà túú sàndáá iní ñáhá-ndó xii yúhú Déhe-gá.

³⁹ Te ñacuaha vihi-ndo tutú ndèe tnúhu-gá, chi sàni iní-ndó sá xíãⁿ-ni ñacuaha-ndo te naníhí tãhú-ndó. Te váha-ni quide-ndo, chi ñu tutú-ãⁿ càháⁿ-xi cuendá-í.

⁴⁰ Te nchòhó ñà túú cuñí-ndó quindáá iní ñáhá-ndó xii-í cuendá naníhí tãhú-ndó.

⁴¹ Te yúhú, ñà túú xini ñuhu-í sá càdá càhnu ñaha-ndo xii-í.

⁴² Dico sa xini-í nàcuáa sàni iní-ndó chi ñà túú cùu iní-ndó Yã Ndiõxí.

⁴³ Te yúhú véxi-í ñuyíú-a chi Tãtã-í ní tendaha ñaha-gá, te nchòhó ñà túú cuñí-ndó tnú-ndo tnúhu càháⁿ-í, dico núu quixi ñⁿ tée càháⁿ cuendá méé-xí, chi quindáá iní-ndó.

⁴⁴ Te ná váha nchòhó ná tnú-ndó tnúhu càháⁿ-í, te xio xio-ni quide cahnu tnaha-ndo, te ñà túú quide cuendá-ndó sá tnúhu váha càháⁿ Yã Ndiõxí cuu xii-ndo.

⁴⁵ Te vá cání iní-ndó sá yúhú ndacáⁿ cuéchi-í núu Tãtã-í nàcuáa quide-ndo, chi ndíi Moisés ní chídó tnúni ndíi núu tütú Yã Ndiõxí nàcuáa quide-ndo sá ñà túú quide váha-ndo, te mee-ndo sàni iní-ndó sá nánihí tãhú-ndó cuendá tnúhu ní càháⁿ ndíi.

⁴⁶ Chi núu nchòhó sàndáá ndisa iní-ndó tnúhu ní càháⁿ ndíi Moisés ñà, te ducaⁿ te quindáá iní-ndó yúhú ní cùu, chi ndíi-ãⁿ ní chídó tnúni ndíi nàcuáa cada-í ñuyíú-a vitna.

⁴⁷ Te núu ñà túú sàndáá iní-ndó tnúhu ní chídó tnúni ndíi, te ñu-ni ducaⁿ càda ñaha-ndo xii-í vá quindáá iní-ndó tnúhu càháⁿ-í —càchí-gá xãhaⁿ-gã xii-güedé.

6

Jèsús ñacàxi-gá úhúⁿ mĩ ñáyiu

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñi cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úu ñu-xi.

² Te ío cuéhe ñáyiu nchícúⁿ ñáhá xii-gá cuáháⁿ cuendá sá ñi xini-yu nchaa sá vã yõo

tnáhí ndàcu cada ní quide-gá, chi ní quide tátna-gá nchaa ñáyiu cùhú.

³ Te ní sáá Jèsús ndíhi cue tée xica cuu ndíhi-gá ñⁿ núu tìndúú, te xíãⁿ ñi ngóo-gá ndíhi-güedé.

⁴ Te ta cùyatni coo vico pascuá, vico quide ñáyiu isràél.

⁵ Te ní xini-gá sá ío vãi ñáyiu nchícúⁿ ñáhá xii-gá cuáháⁿ, te ní xãhaⁿ-gã xii té Lìpé:

—¿Ndèe quíhíⁿ-ó quínguaaⁿ-o sã cáxi nchaa ñáyiu-a? —càchí-gá xãhaⁿ-gã xii-dé.

⁶ Te ducaⁿ ñi xãhaⁿ-gã xii-dé cuendá sá cuñí-gá quini-gá nása cunduu tnúhu càháⁿ-dé, dico mee-gã sa xini-gá nàcuáa cada-gá.

⁷ Te ní xãhaⁿ tẽ Lìpé xii-gá:

—Te cuèi úu ciendú díhúⁿ denàriú ná ñandoñuhu-o cuaaⁿ-o paá, te ni vã tnáhá caxí-yu luha luha —càchí-dé xãhaⁿ-dẽ xii-gá.

⁸ Te té Ndríxi ingá tée xica cuu ndíhi-gá, ñani té Xímú, àdi Pelú chi úu ñu-dé, ní xãhaⁿ-dẽ:

⁹ —Iha ndècu ñⁿ té lĩhli nèhe-dé úhúⁿ paá cebadá te úu chácá, dico ndèe tnáhá xéhe, te cuéhe víhí ñáyiu —càchí-dé xãhaⁿ-dẽ xii-gá.

¹⁰ Te ní xãhaⁿ Jèsús xii-güedé:

—Chí cũñaha nà ngóo-yu nchaa-yu —càchí-gá xãhaⁿ-gã.

Te ñáyiu-ãⁿ ñi ngóo-yu, te càa vihi ité núu ñi ngóo-yu-ãⁿ, te xinu ñatná úhúⁿ mĩ mee-ni cuè tée, te ñi ñáyiu díhí ndíhi landú.

¹¹ Te ní queheⁿ Jèsús paá, te ní ndacáⁿ tãhú-gã núu Yã Ndiõxí, te ní sãñaha-gã paá-ãⁿ xii cue tée xica cuu ndíhi-gá, te cue tée-ãⁿ ñi ñacãhũ-güedé ní xexi nchaa ñáyiu xixúcu-ãⁿ. Te ñu-ni ducaⁿ ñi quide-gá chácá, te ní ñacãhũ tucu-güedé-ñi ní xexi ñáyiu ní ndahá xití-yu.

¹² Te òré ní túhú cóhõ-yu, te ní xãhaⁿ Jèsús xii cue tée xica cuu ndíhi-gá sá ná ñaqueheⁿ-güedé nchaa sá ñi quendóo cuendá sá vã quíhíⁿ-xi núu míhí.

¹³ Te cue tée-ãⁿ ní ñaqueheⁿ-güedé nchaa sá ñi quendóo, te ní chítú ùxúú tídihi núu úhúⁿ-ni paá cebadá.

¹⁴ Te sá ñi xini-yu ní nadacáyá-gá sá ñi xexí-yu, xíãⁿ ní ngúita-yu ní xitnãhá-yu:

—Ndáá sá tēe-a sa ió cuendú sá quíxí-dě ñuyíú-a cáháⁿ-dé tnúhu Yá Ndiöxí — cächí-yu xitnàhá-yu.

15 Te ní cutnùní iní Jèsús sá cádá yicá-yu candeca ñàhá-yu xii-gá quíhíⁿ cuendá cundecu-gá quindaha ñàha-gá xii-yu ni cùu, núu xiáⁿ ní xica tucu-gá cuáháⁿ-gá xití yucu mee dii chícuú-gá.

Jèsús xicá-gă núú ndute
(Mt. 14:22-27; Mr. 6:45-52)

16 Te òré ní cuu ndiquiⁿ, te cuáháⁿ cue tée xica cuu ndihi-gá yuhu làgúná.

17 Te ní quée-güedé bàrcú cuáháⁿ-güedé ñuú Capèrnaúm cáá ndàa ingá xio yuhu làgúná, te sa ní cuu ndiquiⁿ, te ñá túú Jèsús quéxió quée-gá bàrcú ñúhú-güedě-áⁿ.

18 Te ní ngüita-xi quène táchí ñhi, te níhi dàcandau ndéé tnàhá ndùte làgúná-áⁿ.

19 Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedě véxi-gá núú ndúté, te ní yùhú-güedé.

20 Te ní xáhaⁿ Jèsús xii-güedé:

—Yúhú véxi-í, vá yùhú-ndó —cächí-gá xáhaⁿ-gă xii-güedé.

21 Te ió ní cudíí ìní-güedé sá ñi quexiò-gá cuánguee-gá bàrcú, te òré-ni ní quexiò-güedé ndihi-gá ndéé ingá xio yuhu làgúná núú cuáháⁿ-güedé.

Ñáyiu nànducu ñaha xii Jesús

22 Te ingá nduu-áⁿ xindecu-ni nchaa ñáyiu ní quendóo yuhu làgúná. Te ní quide cuendá-yu sá ñiⁿ dii-ná bàrcú nútni-áⁿ ní cùu ñá túú-gă, chi cue tée xica cuu ndihi Jesús ní quée-güedé bàrcú-áⁿ cuáháⁿ-güedé. Te ní níhi-yu tnúhu sá ñà túú ní quée tnàhá Jèsús.

23 Te diu-ni nduu-áⁿ ñi quée ñiⁿ úú bàrcú ñuú Tiberiás ní sáá-xi yatni núú ñi xexí-yu pàá sá ñi ndacáⁿ táhú Jèsús núú Yá Ndiöxí.

24 Te ní xiní-yu sá ñà túú Jèsús ndihi cue tée xica cuu ndihi-gá, núu ní quée-yu bàrcú-áⁿ cuáháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gă dàtná ñi sá nchító-ó

25 Te ní sáá-yu ingá xio yuhu làgúná, xiáⁿ ñi naníhi-yu Jèsús, te ní xáhãⁿ-yu xii-gá:

—Mèstrú, ¿ná òré ní sáá-n ìha? —cachí-yu xáhãⁿ-yu xii-gá.

26 Te ní xáhaⁿ Jèsús:

—Na cächí tnúhu ndáá-í sá nchòhó nánducu ñaha-ndo xii-í cuendá-ni sá ñi xexi-ndo ñi ndahá xití-ndó, dico ñá diú cuendá sá ñi quide-í sá vã yõo tnàhi ndàcu cada nanducu ñaha-ndo.

27 Te vá cádá cuendá-ndó sã mée-ni sã cáxi-ndó càda chiuⁿ-ndo chi xiáⁿ vá cùdii-xi. Chi ió-gá xiní ñuhu-xi cada cuendá-ndó tnúhu Yá Ndiöxí te tni-ndo, te naníhi tàhú-ndó. Te tnúhu-áⁿ cachí tnúhu yúhú Tée cùu ñani tnàhá-ndó nchàa-ndo, te xiáⁿ candeca-xi iní-ndó ñi caa ñi quíhíⁿ, chi mee Dütú Ndiöxí ní cachí-gá sá dúcáⁿ càda-í —cächí-gá xáhaⁿ-gă xii-yu.

28 Te ní xáhãⁿ-yu:

—¿Nása cada-ndí cuendá ngúnu ichi-ndí nàcuáa cùní Yá Ndiöxí cunduu-i? —cächí-yu xáhãⁿ-yu xii-gá.

29 Te ní xáhaⁿ Jèsús xii-yu:

—Yá Ndiöxí cùní-gá sá quindáá iní ñàhá-ndó xii yúhú, tée ní tendaha-gă véxi ñuyíú-a —cächí-gá xáhaⁿ-gă xii-yu.

30 Te ní xáhaⁿ tucú-yu xii-gá:

—¿Ná cúú sã vã yõo tnàhi ndàcu cada, cada-n cundehe-ndí cuendá quindáá iní ñàhá-ndí xii-n-i? ¿Àdi nágá cúú sã cádá-n cuendá cutnùní iní-ndí sá ndáá càháⁿ-n-í?

31 Chi cue ñani tnàhá-ó ñi xindecu ndéé sanaha ñi xexí-yu pàá nani mànáá xití yucu dàtná yódó tnùní núú tütú Yá Ndiöxí núú cächí-xi: “Yá Ndiöxí ní sãñaha-gă sá ñi xexí-yu, te ní cuuⁿ túu-xi andiu”, duha cächí-xi núú tütú-gá —cächí-yu xáhãⁿ-yu xii-gá.

32 Te ní xáhaⁿ Jèsús:

—Na cächí tnúhu ndáá-í xii-ndo sã ñà diú ndíi Moisés ní sãñaha ndíi pàá ní cuuⁿ andiu ñi xexí-yu, chi mee Tãtà-í ní sãñaha-gă sá ñi xexí-yu. Te sá táxi-gă vitna cùu-xi

33 datná pàá véxi cuuⁿ andiu càndeca-xi iní-ndó ñi caa ñi quíhíⁿ —cächí-gá xáhaⁿ-gă xii-yu.

34 Te ní xáhãⁿ-yu xii-gá:

—Tãtà, mee-ni pàá-áⁿ taxi-n càxi-ndí —cächí-yu xáhãⁿ-yu xii-gá.

35 Te ní xáhaⁿ Jèsús:

—Yúhú cùú-í dàtná ñi sá xexí-ndó càndeca-xi iní-ndó. Te duha ndùu tnúhu càháⁿ-í, chi nchaa ñáyiu na quindáá iní

ñáhá xii-í, te vá ndóhó-gă-yu docó te vá ndóhó-gă-yu ndute.

³⁶ Dico-ni sá nchòhó ñá túú sàndáá iní ñáhá-ndó cuèi xini ñáhá-ndó xii-í.

³⁷ Te nchaa ñáyiú na cächí Tàtá-í nduu cuendá-í nasaá-yu núù-í, te ñáyiú-áⁿ vǎ dáquèe tíhù-í-yu.

³⁸ Te ñá díú yúhú sá vǎxi cuuⁿ-í andiú te quide-í nchaa sá cúú iní mée-í, chi véxi cuuⁿ-í sá cada-í nchaa nàcuáa ní táuchíúⁿ mée Tàtá-í Dútú Ndiòxí Yá ní tendaha ñàha xii-í véxi-í ñuyúú-a.

³⁹ Te cuini-gá sá ncháá ñáyiú ní cachí-gá nduu cuendá-í vá dáñà-í-yu cuíta nihnú-yu, te na sáá nduu te diu-ni-í dandòto-í-yu.

⁴⁰ Chi ducaⁿ ñí cachí Dútú Ndiòxí cunduu sá ncháá ñáyiú na tñi tñúhu cáháⁿ-í, te quindáá ndisa iní ñáhă-yu xii yúhú Déhe-gá, te nduu táhŭ-yu cundecú-yu ndihí Yá Ndiòxí ñi caa ñi quíhíⁿ, te yúhú dandòto-í-yu na sáá nduu —cächí-gá xáhaⁿ-gǎ xií-yu.

⁴¹ Te ñá ní tñáhá iní ñáyiú isràél tñúhu ní cáháⁿ Jèsús nŭu ní ngüíta-yu ní cáháⁿ cuèhé-yu cuendá-gá cuendá sá ñí xáhaⁿ-gǎ sá mée-gǎ cúú-gǎ dàtná sá xéxi-ó vǎxi cuuⁿ andiú.

⁴² Te ní xitnàhá-yu:

—¿Náa ñá díú tǎe-a cùu-dé Jèsús déhe té Chèé? Nchoo xini-ó tǎtá-dě, te xini-ó nǎná-dě, ñá cachí-tu tǎe-a sá andiú vǎxi cuuⁿ-dé! —cächí-yu xitnàhá-yu.

⁴³ Te ní xáhaⁿ Jèsús xií-yu:

—Vá cáháⁿ cuèhé-gá-ndó cuendá-í, chí dáñá.

⁴⁴ Vá yǎo quindáá iní ñáhá xii yúhú nŭu ñá túú mée Tàtá-í táxi cuendá ñáhá-gǎ xií-yu. Te diu-gá ní tendaha ñàha-gá xii-í véxi-í, te yúhú dandòto-í-yu na sáá nduu.

⁴⁵ Te núú tütú cue tǎe ní xóo cáháⁿ tñúhu Yá Ndiòxí ndéé sanaha cächí-xi: “Yá Ndiòxí danèhé ñáhá-gǎ xií-yu tñúhu-gá”, duha cächí-xi. Te nchaa ñáyiú na cùndedóho nchaa tñúhu cáháⁿ Dútú Ndiòxí, te cutúha-yu nàcuáa cáháⁿ-gá, te ñáyiú-áⁿ quindáá iní ñáhă-yu xii yúhú.

⁴⁶ Te vá yǎo xini ñáhá xii Dútú Ndiòxí chi ñⁿdi-ñi yúhú xini-í-gá, chi núú ndécú-gǎ ní quee-í véxi cuuⁿ-í —cächí-gá xáhaⁿ-gǎ xií-yu.

⁴⁷ Te xáhaⁿ tucu-gá:

—Na cächí tñúhu ndáá-í xii-ndo sǎ nchàa ñáyiú na quindáá iní ñáhá xii-í, te naníhí tǎhú-yu.

⁴⁸ Te yúhú cùu-í dàtná ñⁿ sá xéxi-ndó cǎndeca-xi iní-ndó, te ducaⁿ sǎtnahá-xi cùu-í chi yúhú cada-í te nduu táhú-ndó cùndecu-ndo ndihí Yá Ndiòxí ñi caa ñi quíhíⁿ.

⁴⁹ Te cue ñaní tñáhá-ó ñí xíndecu ndéé sanaha ñí xéxi-yu pǎá nání mǎnáá xití yucu, dico ní sáá nduu te dacuití ñí xihí-yu.

⁵⁰⁻⁵¹ Te yúhú cáháⁿ-í cuendá mée-í, chi véxi cuuⁿ-í andiú. Te cùu-í dàtná ñⁿ sá nchító-ndó, te nchaa ñáyiú na cǎxi te cǎndeca-xi iní-yu ñi caa ñi quíhíⁿ te vá cuíta nihnu-gá-yu. Te sá táxi-í xii-ndo xiǎⁿ cúú-xi yiqui cuñú-í, te cùu-xi cuendá nchaa ñáyiú ñihí ñuyúú cuendá nduu táhŭ-yu cundecú-yu ndihí Yá Ndiòxí ñi caa ñi quíhíⁿ —cächí-gá xáhaⁿ-gǎ xií-yu.

⁵² Te ní ngüíta ñáyiú isràél xitnàhá-yu:

—¿Nása cada-tu tǎe-a núu cächí-tu-dé sá yiqui cuñú-dé taxi-dé caxi-o-í? —cächí-yu xitnàhá-yu.

⁵³ Te ní xáhaⁿ Jèsús:

—Na cächí tñúhu ndáá-í xii-ndo sǎ nŭu na cǎda iní-ndó sǎ dàtná sá cǎxi-ndó yiqui cuñú yúhú Tǎe cùu ñaní tñáhá-ndó nchàa-ndo, te cada tucu iní-ndó sǎ dàtná sá cóhó-ndó ñíñi-í ñá, te xiǎⁿ quéé-xi sǎ quindáá iní ñáhá-ndó ñi yuhu ñi iní-ndó te naníhí tǎhú-ndó, te núu ñáhá te cuíta nihnu-ndo.

⁵⁴ Nchaa ñáyiú na cǎda iní-xi sá dàtná sá cǎxi-yu yiqui cùñú-í te cohó-yu ñíñi-í, ñáyiú-áⁿ naníhí tǎhú-yu te yúhú dandòto-í-yu na sáá nduu.

⁵⁵ Chi yiqui cùñú-í ndihí ñíñi-í cúú-xi mée-í.

⁵⁶ Te nchaa ñáyiú na cǎda iní-xi sá dàtná sá cǎxi-yu yiqui cùñú-í te cohó-yu ñíñi-í, te ñáyiú-áⁿ ñⁿ-nǎ cuu-í ndihí-yu chi cundecu ndihí-í-yu.

⁵⁷ Te yúhú nchìto-í chi ducaⁿ nchìto Tàtá-í Yá ní tendaha ñàha xii-í véxi-í ñuyúú-a. Te diu-ni ducaⁿ nchàa ñáyiú na quindáá iní ñáhá xii-í te cundecu ndihí-í-yu ñi caa ñi quíhíⁿ.

58 Te yúhú cùu-í dàtná ìⁿ sá nchító-ndó vëxi cuuⁿ andi^u, dico ñá díú pàá sá nání mànáá ní xèxi cue ñaní tnàhá-ó nǐ xíndecu ndéé sanaha, chi ní xexi-yu pàá te dacuèi ní xíhí-yu. Te nchaa ñáyiu na quíndáá iní ñáhá xii yúhú Yaá véxi cuuⁿ andi^u, te cundecu ndihí-í-yu nǐ caa nǐ quíhíⁿ —càchí-gá xáhaⁿ-gǎ xií-yu.

59 Nchaa tnúhu-a ní cáháⁿ-gá xití veñúhu ñáyiu ñúú Capernaúm.

Jèsús càchí tnúhu-gá nàcuáa naníhí tǎhú-ó

60 Te sá dúcáⁿ nǐ cáháⁿ-gá nǔu vai ñáyiu nchícúⁿ ñáhá xii-gá ní xítnàhá-yu:

—Vá tníⁿ cuèti-o tnúhu càháⁿ-dé chi ñá díú tnúhu sá cúu vǎha iní-ó càháⁿ-dé —càchí-yu xítnàhá-yu.

61 Te ní cutnùní iní Jèsús sá ñà túú càháⁿ váha-yu cuèndá tnúhu ní cáháⁿ-gá, núu ní xáhaⁿ-gǎ xií-yu:

—¿Náa ñá tnàhá iní-ndó nàcuáa càháⁿ-í-a?

62 Te uuⁿ-gá cada nchòhó nǔu quini-ndó yúhú Téé cùu ñaní tnàhá-ndó nchàa-ndo ndaa-í núu nǐ xíndecu-í díhna.

63 Te espíritú ndécú ndihí yiqui cuñú-ó, xiǎⁿ ndécá ñàha-xi xii-o, te núu ñá túú xiǎⁿ, te yiqui cuñú-ó ñà túú nándihí-xi. Dico núu nchaa tnúhu càháⁿ-í-a quée-xi iní-ndó ñá, te quini-ndó nǎ xéhé candeca ñaha-xi xii-ndo núu cuàháⁿ núu véxi.

64 Te dava nchòhó chi ñá túú sàndáá iní-ndó —càchí-gá xáhaⁿ-gǎ xií-yu.

Te ducaⁿ nǐ xáhaⁿ-gǎ chi sa nàha-gá nándi cùu ñáyiu vá quíndáá iní ñáhá xii-gá. Te ducaⁿ sá naha-gá ndédacàa téé cuàha cuèndá ñáhá xii-gá núu cuè téé cùu úhú iní ñáhá.

65 Te ní xáhaⁿ tùcu Jesús xií-yu:

—Te duha càháⁿ-í chi sa ní cachí tnúhu-í xii-ndo sǎ vǎ yóo ìⁿ cuèni tníⁿ tnúhu-í te núu ñá túú Tǎtà-í Dútú Ndiǒxí sánú ichi ñaha-gá xií-yu —càchí-gá xáhaⁿ-gǎ xií-yu.

66 Te òré-áⁿ ìo vai ñáyiu nchícúⁿ ñáhá xii-gá ní xócõo-yu ñá ní xica cuu-gá-yu ndihí-gá.

67 Te xiǎⁿ ní xáhaⁿ Jèsús xii ndi ùxúú cue téé xica cuu ndihí-gá:

—¿Cuèni-ndó dàndóo ñaha-ndo tnàhá-ndó-ǎⁿ duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuèndá sá càháⁿ-í sá quíde-yu nchaa sá cuèhé sá dúhá.

68 Te ní xáhaⁿ tǎ Xímú, àdi Pelú chi úú diu-dé:

—Mèstrú, ñá túú-gǎ ndéé quíhíⁿ-ndí, chi nchúhú nàhá-ndí sá tnúhu mee-n cùu-xi sá vǎha candeca-xi iní-ndí nǐ caa nǐ quíhíⁿ.

69 Chi nchúhú sa ní sàndáá iní ñáhá-ndí xii-n chi nàha-ndí sá yòhó cúu-n Crístú Déhe Dútú Ndiǒxí yaá ndécú àndi^u —cachí-dé xáhaⁿ-dǎ xii-gá.

70 Te ní xáhaⁿ Jèsús:

—Nàha-ndo sá yúhú ní cáháⁿ ñáhà-í xii ndi ùxúú-ndó xica cuu ndihí ñaha-í xii-ndo, dico ìⁿ-ndo quíhu ñaha yùcu ñávǎha xii-ndo —càchí-gá xáhaⁿ-gǎ xii-güedé.

71 Duha ní cáháⁿ Jèsús cuèndá té Júdás déhe té Xímú Iscarioté ìⁿ téé ñùtnahá núu ùxí ìⁿ cue téé xica cuu ndihí-gá, chi sa nàha-gá sá tǎe-ǎⁿ cuàha cuèndá ñáhá-dǎ xii-gá ìⁿ nduu núu cuè téé cùu úhú iní ñáhá.

7

Cue ñaní Jèsús ñá túú sàndáá iní-güedé nàcuáa ndúu tnúhu càháⁿ-gá

1 Te sáta dúcáⁿ nǐ cuu, te ní xica cuu Jèsús distritú Galileá, te ñá ní sǎháⁿ-gá distritú Júdeá, chi yàcáⁿ cuèni cue téé israhél cahni ñaha-güedé xii-gá ní cùu.

2 Te ní cuyatni nduu càdá-yu vico, vico sá dánani-yu Vico Vehe Tnuvixiⁿ.

3 Te ní xáhaⁿ cuè ñaní Jèsús xii-gá:

—Váha-gá quíhíⁿ-n distritú Júdeá te vá cündecu-n iha, chi yàcáⁿ cada-n nchàa sá quíde-n iha cuèndá quini nchaa ñáyiu cündihí ñaha xii-n ndecu yacáⁿ.

4 Chi núu cuèni-ó quini nchaa ñáyiu ná chiuⁿ cada-o te vá càdá dàyuhu-o. Te yòhó cuèhé nǔú sǎ quíde-n, te cada-n na quini nchaa ñáyiu —càchí-güedé xáhaⁿ-güedé xii-gá.

5 Ducaⁿ nǐ cáháⁿ cue ñaní-gá, chi ni mèe-güedé ñá túú sàndáá iní-güedé nàcuáa ndúu tnúhu càháⁿ-gá.

6 Te ní xáhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndédani càa òré cuu quíhíⁿ-ndó.

7 Chi nchaa ñáyiu ñúhu ichi cuehé ichi duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuèndá sá càháⁿ-í sá quíde-yu nchaa sá cuèhé sá dúhá.

8 Te chí cuáháⁿ nchòhó vico chí yúhú vá quíhíⁿ-ní-í chí vátá tnàhá-gá òré quíhíⁿ-í — cächí-gá xáhaⁿ-gã xii-güedé.

9 Te ducaⁿ ñí xáhaⁿ-gã te ní ndóo-gá Galileá, te cue téé-áⁿ cuáháⁿ-güedé.

Jèsús ndécú-gã ìⁿ vico chíñuhú-yu Yá Ndiöxí

10 Dico sátá cuáháⁿ cue ñaní-gá, te ní xica-gá cuáháⁿ-gã tnàhá-gá dicó-ní sá dàyuhu cuáháⁿ-gá.

11 Te ñáyi israél ñáyi xĩndecu vico nànducú-yu Jèsús, te xĩtnàhá-yu:

—¿Ndèé ndécú Jèsús? —cächí-yu xĩtnàhá-yu.

12 Te nchaa ñáyi xĩndecu vico xĩndatnúhu-yu cuendá-gá. Te davá-yu xĩtnàhá-yu sá ìo váha iní-gá, te davá-yu xĩtnàhá-yu sá ñà díú tée váha cùu-gá, chí dándahú-gá ñáyi.

13 Dico mee-ni xĩcáháⁿ náhí-yu, chí xiyùhú-yu cue téé cùnno núu-yu.

14 Te ta ngùhuⁿ dava vico, te cuánguihu Jèsús veñúhu càhnu sá ìo cùnno, te ní ngüíta-gá dácuaⁿ-gá ñáyi.

15 Te ñáyi israél ní cuñúhu vèhí-yu sá ìo váha càháⁿ-gá, te ní xĩtnàhá-yu:

—¿Ná cuendá ìo váha ñùhu-tu díquí tée-a tnúhu càháⁿ-dé te ñá túú ní dàcuaha-dé-í? —cächí-yu xĩtnàhá-yu.

16 Te ní xáhaⁿ Jèsús:

—Ñá díú cuendá mée-í cúu-xí sã dánèhé ñáhà-í xii-ndo, chí cuendá Dútú Ndiöxí Yá ní tendaha ñaha xii-í véxi-í cúu-xí.

17 Te núu ìo dava-ndo ñí yuhu ñí iní-ndó cuñí-ndó càda-ndo nacuaá cuñí Yá Ndiöxí cunduu, te cutnúni ndáá iní-ndó sã tnúhu dàcuaha ñaha-í xii-ndo cùu-xi cuendá mée Dútú Ndiöxí, te ñá díú cuendá mée-í cúu-xí.

18 Te téé cuñí sá cáda càhnu ñaha ñáyi xii-dé, téé-áⁿ càháⁿ-dé nàcuáa véxi iní mée-dé. Dico yúhú cuñí-í sá cáda càhnu-yu Dútú Ndiöxí Yá ní tendaha ñaha xii-í véxi-í ñuyíu-a, te càháⁿ ndáá-í te ñá túú dàcuandehnde-í.

19 Te ndíi Moisés ní taxi ndíi tnúhu sá sánú ìchi ñaha xii-ndo nacuaá cundecu-ndo, te ní ducaⁿ ñá túú sàndáá iní-ndó nàcuáa càháⁿ tnúhu-áⁿ. ¿Te ná cuendá cuñí-ndó càhni ñaha-ndo xii-í? —cächí-gá xáhaⁿ-gã xii-yu.

20 Te ní xáhãⁿ-yu xii-gá:

—Yucu ñávãha dàcoto ñaha xii-ó, chí vá yõ ìⁿ cuñí cahni ñaha xii-n —cächí-yu xáhãⁿ-yu xii-gá.

21 Te ní xáhaⁿ Jèsús xii-yu:

—Sá ñí quide-í ìⁿ sá vã yõ tnàhí ndàcu cada nduu cuu-xi nduu ndetatú-ó, xíáⁿ ìo ní cuñúhu ñaha-ndo xii-í.

22 Te ndíi Moisés ní cachí ndíi sá cuãha-yu seña ñí cue landú téé, dico ñá díú mée ndíi ní càhu iní ndíi chí ducaⁿ tnàhí ní xóo cada cue ñaní tnàhá-ó dàvã-áⁿ, núu xíáⁿ nchòhó sãha-ndo seña ñí landú téé cuèi cùu-xi nduu ndetatú-ó.

23 Te ducaⁿ quide-ndo cuendá sá ñà túú nã cumání-ndó núu tnúhu sá sánú ìchi ñaha xii-ndo ní dándõo ndíi Moisés. ¿Te ná cuendá cúdeéⁿ-ndó núu-í sá ñí quide tátna-í téé cùhú nduu ndetatú-ó-í?

24 Te váha váha cada cuendá-ndó, te vá cuendá-ni càháⁿ-ndó sã yúhú ndècuéchi-í chí ñá túú xini-ndó —cächí-gá xáhaⁿ-gã xii-yu.

Jèsús xáhaⁿ-gã xii-yu núu véxi-gá

25 Te dava ñáyi ñuú Jerusàlén ní ngüíta-yu xĩtnàhá-yu:

—¿Náa ñá díú tée-áⁿ nánducu-güedé cahni-güedé?,

26 núu náí-dé nútñí núu chítú núu tàcá-ãⁿ càháⁿ-dé, te vá yõ cùyíi cúñaha xii-dé ìⁿ tnúhu. Cudana te cue téé cùchiuⁿ sandáá iní-güedé sá díú-dé cúu-dé Crístú Yá ní tendaha Yá Ndiöxí véxi ñuyíu-a.

27 Dico nchoo xini-ó ndèé ìchi véxi téé-ãⁿ, dico Crístú ná quixi-gá chí vá yõ ìⁿ quini ndèé ìchi quixi Yáá-áⁿ —cächí-yu xĩtnàhá-yu.

28 Te yíhi Jesús xití veñúhu càhnu sá ìo cùnno danehe-gá ñáyi, te ní tecú dóho-gá tnúhu càháⁿ-yu. Te níhi ní càháⁿ-gá, te xáhaⁿ-gã xii-yu:

—¿Ná quini-tu nchòhó ndèé ìchi véxi yúhú! Yúhú véxi-í dico ñá díú sã cúu ìní mée-í, chí Yá Ndiöxí Yá quidé nchàa-ndíi túhú sá vãha ní tendaha ñaha-gá xii-í véxi-í, te nchòhó ñá túú xini-ndó-gá.

29 Te yúhú xini-í-gá chí núu ndécú-gá ní quee-í véxi-í, te diu mee-gã ní tendaha ñaha-gá véxi-í —cächí-gá xáhaⁿ-gã xii-yu.

30 Te sá dúcáⁿ ñí càháⁿ-gá, núu cuñí-güedé tní ñaha-güedé xii-gá quíhíⁿ-gá

vecaá ní cùu, dico vá yǎo ìí ní cùyíí tñí ñaha xii-gá chi vátá sàá-gá òré tñí ñaha-güedě.

³¹ Dico vǎi-yu ní sándáá iní ñáhǎ-yu xii-gá, te ní xítnáhǎ-yu:

—¿Nágá cùú sǎ cǎdá Crístú ná quìxi-gá-i?, te tée-a ío cuéhé nǔú sǎ tá quìde-dé véxi. Vǎa ñu tée-a cùu-dé Crístú Yaá ní tendaha Yǎ Ndiǒxí véxi ñuyíú-a —cǎchí-yu xítnáhǎ-yu.

Cue tée cùu fariséú cuení-güedé quíhíⁿ Jèsús vecaá

³² Te ní níhí cue tée cùu fariséú tñúhu nǎcuáa cǎháⁿ ñáyíu cuendá Jèsús, núu ní ndatnúhu-güedé ndíhí cue dútú cúnúu, te ní techíuⁿ-güedé cue tée quìde cuendá veñúhu cuáháⁿ-güedé cuátñí ñaha-güedě xii-gá ní cùu.

³³ Te ní xáhaⁿ-gǎ xii-güedé:

—Sacú duha nduu cundecu ndíhí ñaha-í xii-ndo, te núhú tucu-í núú ndécú tǎtà-í Yaá ní tendaha ñaha xii-í véxi-í ñuyíú-a.

³⁴ Te cuéi na nǎnducu ñaha-ndo dico vá ná níhí ñáhǎ-ndó chi vá sàá-ndó nǔú cúndecu-í —cǎchí-gá xáhaⁿ-gǎ xii-güedé.

³⁵ Te ní ngüíta ñáyíu isráel xítnáhǎ-yu:

—¿Ndéé quíhíⁿ-tu tée-a te vá ná níhí-ó-dě-i? ¿Ádi quíhíⁿ-dé na chítnahǎ-dé ñáyíu isráel ñáyíu nchítenuu nchaa ñúú xíca cuendá danéhé-dé ñáyíu griégú?

³⁶ ¿Nása cǎháⁿ-tu-dé duha cǎháⁿ-dé: “Nanducu ñaha-ndo te vá nánihí ñáhǎ-ndó chi vá sàá-ndó nǔú cúndecu-í”, cǎchí-tu-dé? —cǎchí-yu xítnáhǎ-yu.

Nǎcuáa cada Espíritú Yǎ Ndiǒxí iní-ó

³⁷ Te nduu ní yáha-ná vico cùu-xi nduu cahnu vihi, te nduu-ǎⁿ ní ngúnu tñí Jèsús tnuú ñáyíu, te níhí ní cǎháⁿ-gá, te xáhaⁿ-gǎ xii-yu:

—Núu ío dava-ndo yìchí-ndó ndùte, te quixi-ndo nǔú-í, te coho-ndo.

³⁸ Duha cǎháⁿ-í chi nchaa ñáyíu na quíndáá iní ñáhǎ xii-í, te cada-xi iní-yu dàtná ìí núú xíca ndùte, nchaa-ni nduu xíca ñá túú yìchí, ducaⁿ cǎda-xi iní-yu núú cuáháⁿ núú véxi dàtná cǎháⁿ-xi núú tütú Yǎ Ndiǒxí —cǎchí-gá xáhaⁿ-gǎ xii-yu.

³⁹ Te ducaⁿ ní cǎháⁿ-gá cuendá sá quíxí Espíritú Yǎ Ndiǒxí ngúndecu ndíhí nchaa ñáyíu na quíndáá iní ñáhǎ xii-gá, chi sáá nduu ndáa-gá andíu cǎda cahnu ñaha

Tátá-gǎ xii-gá, te dàvá-án te quixi Espíritú Yǎ Ndiǒxí cundecu ndíhí-yu.

Ñá ní cùu ìíⁿnuú-yu cuendá tñúhu ní cǎháⁿ Jèsús

⁴⁰ Te dava ñáyíu ní xíndedóho tñúhu ní cǎháⁿ Jèsús ní xítnáhǎ-yu:

—Ndáá sá tée-a cùu-dé tée cǎchí-yu quixi cǎháⁿ tñúhu Yǎ Ndiǒxí —cǎchí-yu xítnáhǎ-yu.

⁴¹ Te dava tucu-yu xítnáhǎ-yu:

—Tée-a cùu-dé Crístú Yaá ní tendaha Yǎ Ndiǒxí véxi ñuyíú-a —cǎchí-yu xítnáhǎ-yu.

Te dava-gá tucu-yu xítnáhǎ-yu:

—¿Náa ndáa distritú Galiléa quixi Crístú Yaá tendaha Yǎ Ndiǒxí quixi ñuyíú-a?

⁴² Chi núú tütú Yǎ Ndiǒxí cǎchí-xi sá Crístú Yaá tendaha Yǎ Ndiǒxí quixi ñuyíú-a cuu-gá ìí ñaní tñáhǎ ndí Dáví, te quee-gá ñúú Bèlén ñúú méé ndí Dáví, duha cǎháⁿ-xi núú tütú Yǎ Ndiǒxí —cǎchí-yu xítnáhǎ-yu.

⁴³ Te xíáⁿ nǔu ñá ní cùu ìíⁿnuú-yu cuendá Jèsús.

⁴⁴ Te davá-yu cuení-yu tñí-yu Jèsús quíhíⁿ-gá vecaá ní cùu, dico ní ìíⁿ-yu ñá túú ní cùyíí-yu tñí ñáhǎ-yu xii-gá.

Cue tée cùchiuⁿ ñá túú sándáá iní-güedé Jèsús

⁴⁵ Te cue tée cuáháⁿ tñí ñaha xii Jesús ní cùu ní ndexíio-güedé núú cué tée cùu fariséú ndíhí núú cué dútú cúnúu. Te xáhaⁿ cué tée cúnúu-áⁿ:

—¿Ná cuendá ñá ní cǎndeca-ndo tée-ǎⁿ quixí? —cǎchí-güedé xáhaⁿ-güedé.

⁴⁶ Te cue tée ní sáháⁿ chiuⁿ ní xáhaⁿ-güedé:

—Ní ìíⁿ tée ñá túú xíní-ndí cǎháⁿ dàtná cǎháⁿ tée-ǎⁿ —cǎchí-güedé xáhaⁿ-güedé.

⁴⁷ Te ní xáhaⁿ cué tée cùu fariséú:

—¿Náa tñáhǎ nchòhó ní sándáá iní-ndó tñúhu ndehnde cǎháⁿ tée-ǎⁿ?

⁴⁸ ¿Náa ñá túú xíní-ndó sǎ ní ìíⁿ cue tée tàxi tñuní nchúhú, te ní ìíⁿ nchúhú cue tée cùu fariséú ñá túú sándáá iní-ndí tée-ǎⁿ ñá?

⁴⁹ Nchaa ñáyíu tñúha ñaha xii tée-ǎⁿ ñá túú sándáá iní-yu nǎcuáa cǎháⁿ tñúhu sá sánú ìchi ñaha xii-o, dico cuíta nihnú-yu sá dúcáⁿ quìde-yu —cǎchí-güedé xáhaⁿ-güedé xii cue tée-áⁿ.

50 Te té Nicòdemú tée ní sáháⁿ niú ní ndatnúhu-dé ndihí Jèsús cúú-dé tnàhá-dé ìⁿ tée fariséú, te ní xáhaⁿ-dě xii-güedé:

51 —Tnúhu sá sánú ìchi ñaha xii-o nacuaá cundecu-o cächí-xi sá ndeé cundedóho-o nása cáháⁿ tée tǎú cuéchi cuendá cutnùní iní-ó ná ní quide-dé, te dǎtnùní cáháⁿ-ó nǔ ndisa ndecuéchi-dé àdi ñá túú ndecuéchi-dé —cächí-dé xáhaⁿ-dě.

52 Te ní xáhaⁿ-güedě:

—Cùu ní cachí sá tnàhá-ò cúú-n tée distritú Galileá nǔ ducaⁿ cáháⁿ-n. Dacuàha tutú yódó tnùní tnúhu Yá Ndiòxí te quiní-n nàcuáa cáháⁿ-xi sá ní ìⁿ tée véxi distritú Galileá ñá túú cáháⁿ-dé tnúhu Yá Ndiòxí —cächí-güedé xáhaⁿ-güedě.

53 Ducaⁿ te ndi díⁿ cuānuhú-güedé vehe-güedé.

8

Ìⁿ ñadìhí ndécú vîhi cuéchi-xi

1 Te Jèsús cuáháⁿ-gá yucu Òlívú.

2 Te sátá ñí tún daá nduu tnéé, te cuáháⁿ tucu-gá veñúhu càhnu sá ìo cùn uu. Te ìo cuéhé ñǎyiu ní chítú níhnǔ-yu núú-gǎ, te ní ngóo-gá ní dǎnehé ñáhá-gǎ xií-yu.

3 Te ní quexìo cue tée dàcuaha ñaha xií-yu nchaa tnúhu ní chídó tnùní ndíi Moisés, ndihí cue tée cùu fariséú, te ndèca-güedé ìⁿ ñadìhí ní sáá, te ñaha-áⁿ ñí xiní ñáhǎ-yu cáháⁿ ndihí-aⁿ ìⁿ tée dico ñá díú yì-aⁿ cuu-dé, te ní sanutnìi ñaha-güedě xii-aⁿ tnuú nchaa ñáyiu xǐndecu núú Jèsús.

4 Te ní xáhaⁿ-güedě xii Jèsús:

—Mèstrú, ñadìhí-a ní xiní ñáhá ñáyiu xii-aⁿ cáháⁿ ndihí-aⁿ ìⁿ tée dico ñá díú yì-aⁿ cuu-dé.

5 Te tnúhu ní chídó tnùní ndíi Moisés cächí-xi sá yúú cahni-o nchaa ñáyiu díhí duha quide. Te yòhó, ¿nása cächí-n cùnduu-í? —cachí-güedé xáhaⁿ-güedě xii-gá.

6 Duha ní cáháⁿ-güedé chi cuendá sá cuiní-güedé coto ndeé ñáhá-güedě xii-gá nǔ nása cáháⁿ-gá cuendá núcóo nchihi ñaha-güedě xii-gá ní cáháⁿ-güedě. Te ní ngúnu ndeyi-gá te ní ngúita-gá tée-gǎ ndihí díquí ndáhá-gǎ lètrá núú ñúhú.

7 Te xicáⁿ tnúhú-ní tucu-güedé núú-gǎ nǔ ní ndonehe núú-gǎ, te ní xáhaⁿ-gǎ:

—Ndèdani càa nchohó te núu ñá túú ná cuéchi quide-ndo te díhna nuu-gǎ-ndó chí cuàha-aⁿ yúú —cächí-gá xáhaⁿ-gǎ xii-güedé.

8 Te ní ngúnu ndeyi tucu-gá tée tucu-gá lètrá núú ñúhú.

9 Te sá dúcáⁿ ñí xáhaⁿ-gǎ xii-güedé te ní ndixi túu iní-güedé sá ñá túú quide váha mee-güedě tnàhá-güedé, núu da ìⁿ da ìⁿ-güedé ní ndee, te díhna-gá cue tée cùu sacuéhé ñí ndee te ní ngúita nchicúⁿ dava-gá-güedé. Te sátá ñí ndihí-güedé ní ndee, te ní quendóo mee-nǎ Jèsús ndihí ñadìhí-áⁿ.

10 Te ní ndonehe núú Jèsús te ní xiní-gá sá ñí ndihí-güedé cuáháⁿ te mee-nǎ ñadìhí-áⁿ ñí ndóo-aⁿ, te ní xáhaⁿ-gǎ xii-aⁿ:

—¿Ndèndi cuáháⁿ cue tée cächí sá ñí quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —cächí-gá xáhaⁿ-gǎ xii-aⁿ.

11 Te ní xáhaⁿ-aⁿ xii Jèsús:

—Ñáhá, chi ní ìⁿ-güedé ñá ní ndàcu-güedé —cächí-aⁿ xáhaⁿ-aⁿ.

Te ní xáhaⁿ Jèsús:

—Te ní yúhú vá dáquihíⁿ ñáhà-í castiú xii-n. Te vitna te núhú-n te vá cadá-gǎ-n nǎndi sá cuéhé sá dúhá —cächí-gá xáhaⁿ-gǎ xii-aⁿ.

Jèsús dándixi túu-gá iní-ó

12 Te ní cáháⁿ tucu Jèsús núú ñáyiu, te xáhaⁿ-gǎ xií-yu:

—Yúhú cúú-í dàtná ìⁿ ñuhú dáyèhe-í ñuyú-a, te nchaa ñáyiu na chìtnahá ñáhá xii-í, te vá cùndècu-gá-yu ìchi cuéhé ìchi duha, chi yúhú dándixi túu-í iní-yu cuendá cutnùní iní-yu nàcuáa ndùu cuendá Yá Ndiòxí, te cundecu-í ndihí-yu ní caa ní quíhíⁿ —cächí-gá xáhaⁿ-gǎ xií-yu.

13 Te ní xáhaⁿ cuè tée cùu fariséú xii-gá:

—Medì-n caháⁿ-n sǎ cúú-n tée váha, te vá yòo ìⁿ-gá chindèe tnúhu ñaha xii-n núu ná tée cùu-n, dico xǎⁿ ñá túú nàndìhí-xi —cächí-güedé xáhaⁿ-güedě xii-gá.

14 Te ní xáhaⁿ Jèsús:

—Cuèi cáháⁿ-í cuendá mèè-í dico nàndìhí tnúhu cáháⁿ-í. Chi yúhú nàha-í ndeé ìchi véxi-í, te xìní-í ndeé ìchi núhú-í, dico nchòhó chi ñá túú xìní-ndó ndeé ìchi véxi-í, te ní ñá túú xìní-ndó ndeé ìchi quíhíⁿ-í.

15 Te nchòhó chi cuèndá-ni càháⁿ-ndó cuèndá ñáyiú núu quide váha-yu àdi ñá túú quide váha-yu. Te yúhú ñá túú càháⁿ-í cuèndá ñáyiú núu quide váha-yu àdi ñá túú quide váha-yu.

16 Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mèe-í càháⁿ, chi tnàhá Tàtá-í Yaa ní tendaha ñàha xii-í véxi-í ñuyíú-a càháⁿ-gá chíndèe tnúhu ñàha-gã xii-í.

17 Te tnúhu sá sánú ìchi ñàha xii-ndo cachí-xi sá núu na cùndecu úú cue tée càháⁿ ndáá-güedé nàcuáa cùu ìⁿ sá cùndáa, te núu ìⁿ-ni tnúhu na càháⁿ-güedé ndi ndúú-güedé te xíãⁿ nándíhi-xi, duha càchí tnúhu-áⁿ.

18 Te ñu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúu-xí mèe-í, te ñu-ni dàtná càháⁿ-í càháⁿ Tàtá-í Yaa ní tendaha ñàha xii-í véxi-í ñuyíú-a —càchí-gá xáhaⁿ-gã xii-güedé.

19 Te ní xáhaⁿ-güedé xii-gá:

—¿Te ndéè ndécú Tàtá-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dicó xini-ndó yòo cuu yúhú-á te ducaⁿ te quiní-ndó Tàtá-í. Te ni yúhú ñá túú xini-ndó yòo cuu-í núu xíãⁿ ñá túú xini-ndó Tàtá-í —càchí-gá xáhaⁿ-gã xii-güedé.

20 Duha ní càháⁿ Jèsús ñini dàcuaha-gá ñáyiú xití veñúhu núu ndécú àlcaniciá díhúⁿ. Te vá yòo ìⁿ ni cùyìi tñi ñàha xii-gá chi vátá sáa-gá òré tñi ñàha-güedé.

Ñáyiú ñá túú sàndáá iní ñàhá xii Jèsús vá ndácú-yu quíhíⁿ-yu núu nùhú-gá cundecu-gá

21 Te ní xáhaⁿ tucu Jèsús xii-güedé:

—Yúhú nùhú-í te nanducu ñàha-ndo te vá nánihí ñàhá-ndó, te cuú-ndó núu yíca cuèchi-ndo, chi vá ndácú-ndó sáa-ndó núu nùhú-í cundecu-í —càchí-gá xáhaⁿ-gã xii-güedé.

22 Te ní xitnàha cue tée isràel:

—¿Te náa cahni-dé méé-dé núu càchí-dé sá vã ndácú-ó sáa-ó núu quíhíⁿ-dé-ãⁿ? —càchí-güedé xitnàha-güedé.

23 Te ní xáhaⁿ Jèsús xii-güedé:

—Nchòhó chi cue tée ñuyíú-a cùu-ndo, núu ío ñùhu iní-ndó sã ío ñuyíú-a. Te yúhú chi tée núu ñnu cùu-í núu xíãⁿ ñá túú sã ío ñuyíú-a ñùhu iní-í.

24 Te xíãⁿ núu càchí-í sá cùu-ndó núu yíca cuèchi-ndo, chi ñá cuini-ndó quindáa

iní-ndó sã yúhú véxi cuuⁿ-í andiu, te núu xíãⁿ ñu-ni núu yíca cuèchi-ndo cùu-ndó —càchí-gá xáhaⁿ-gã xii-güedé.

25 Te ní xícaⁿ tnúhú-güedé núu-gã, te xáhaⁿ-güedé:

—¿Te ná cúu yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gã:

—Sa ní cachí tnúhu-í xii-ndo ndéè díhna —càchí-gá xáhaⁿ-gã xii-güedé.

26 Te xáhaⁿ tucu-gá:

—Ndècu cuéhé tnúhu càháⁿ-í cada ndáá-í cuèndá nchòhó. Te Tàtá-í Yaa ní tendaha ñàha xii-í véxi-í ñuyíú-a càháⁿ-gã tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gã ní xíndedóho-í —càchí-gá xáhaⁿ-gã xii-güedé.

27 Te mee-güedé ñá túú ní tècú tnùni-güedé sá cuèndá Dútú Ndiõxi ní càháⁿ Jèsús.

28 Te ní xáhaⁿ-gã xii-güedé:

—Òré ná catá caa ñàha-ndo xii yúhú Tée cùu ñani tnàhá-ndó nchàa-ndo núu cùrúxi cahni ñàha-ndo, te òré-áⁿ cutnùni iní-ndó yòo cuu-í, te ñá túú quide-í sá cúu iní mèe-í, chi yúhú càháⁿ-í nàcuáa ní dánèhé ñàhá Tàtá-í

29 Yaa ní tendaha ñàha xii-í véxi-í. Te ñu-gá ndécú ndíhi ñàha-gã xii-í, te ñá túú dàña nihnu ñàha-gã chi quide-í nchaa nàcuáa cùu iní-gá —càchí-gá xáhaⁿ-gã xii-güedé.

30 Te sá dúcáⁿ ñi càháⁿ-gã núu ío vai ñáyiú ní sàndáá iní ñàhá xii-gá.

Ñáyiú sàndáá iní ñàhá xii Yá Ndiõxi ndíhi ñáyiú ndècu ichi cuéhé ichi duha

31 Te ní xáhaⁿ Jèsús xii ñáyiú isràel ñáyiú ní sàndáá iní ñàhá xii-gá:

—Te núu vá dáñá ndéè-ndó càda-ndo nchaa nàcuáa càháⁿ-í, te cuu ndisa-ndo cue tée tnàhá tnúhu ndíhi-í,

32 te tecú tnùni-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gã xii-yu.

33 Te ní xáhaⁿ-yu:

—Nchúhú cúu-ndí cue ñani tnàhá ndíi Àbrahám, te ni ìⁿ nduu ñá túú ndéè sácùndedí nihnu-ndí ndoho tnàhá-ndí núu càchí-ò sá dàcácu nihnu ñàha-n xii-ndí —càchí-yu xáhaⁿ-yu xii-gá.

34 Te ní xáhaⁿ Jèsús xii-yu:

—Na càchí tnúhu ndáá-í xii-ndo sã nchàa ñáyíu quíde nchaa sá cuèhé sá dúhá tàxi tnuní ñáhá-ñá-xi xií-yu.

³⁵ Te cue ñáyíu xínu cuechi te vá cúu ñⁿ-ná cúu-yu ndihí ñáyíu dii vèhe-xi xínu cuechí-yu, dico cue déhe ñáyíu dii vèhe-xi-áⁿ chí ñⁿ-ni cùu ndihí ñaha-güexi xií-yu.

³⁶ Te núu yúhú Yaá cúu Dèhe Yá Ndiöxí dàcácu nihnu ñaha-í xii-ndo núu nchàa yíca cuèchi-ndo, te ndáá sá nchòhó cácu nihnu ndisa-ndo.

³⁷ Te yúhú sa xíní-í sá nchòhó cúu-ndó ñàní tnáhá ndíi Àbrahám, te dìcò-ni sá ñã tnáhá iní-ndó tnúhu càháⁿ-í núu xiãⁿ cuíní-ndó càhni ñaha-ndo.

³⁸ Te yúhú càháⁿ-í nàcuáa ní dánèhé ñáhá Tãtà-í, te nchòhó quidé-ndó nàcuáa càháⁿ tãtà-ndó —càchí-gá xáhaⁿ-gã xií-yu.

³⁹ Te ní xáháⁿ-yu:

—Ndíi Àbrahám cúu tãtà-ndí —càchí-yu xãháⁿ-yu xii-gá.

Te ní xáháⁿ Jèsús:

—Núu ndisa ñaní tnáhá ndíi Àbrahám cúu-ndó, te cada-ndo nàcuáa ní xóo cada ndíi ni cùu.

⁴⁰ Te yúhú cuèi càháⁿ-í ñⁿ tnúhu ndáá nàcuáa càháⁿ Yã Ndiöxí càchí tnúhu-gá xii-í, te cuíní-ndó càhni ñaha-ndo. ¡Dico ndíi Àbrahám chí ñá túu dùcaⁿ ni quide ndíi!

⁴¹ Te nchòhó quidé-ndó nàcuáa quíde tãtà-ndó —càchí-gá xáhaⁿ-gã xií-yu.

Te ní xáháⁿ-yu:

—Nchúhú, ñá túu yàyacáⁿ ndécú tãtà-ndí, chí ñⁿ dii Yá Ndiöxí cúu tãtà-ndí —càchí-yu xãháⁿ-yu xii-gá.

⁴² Te ní xáháⁿ Jèsús:

—Núu dìcò Yã Ndiöxí ndisa cùu Tãtà-ndó te cuu iní ñáhá-ndó xii-í ní cùu chí yúhú ní quee-í núu ndécú-gã véxi-í ñuyíú-a. Te ñá túu véxi-í sá cúu iní mée-í, chí mee-gã ní tendaha ñaha-gá véxi-í.

⁴³ Te ñá túu tècú tnùní-ndó tnúhu càháⁿ-í chí ñá túu tnáhá iní-ndó.

⁴⁴ Te nchòhó chí tãtà-ndó cùu yucu ñávãha núu cùdí iní-ndó quíde-ndo nchaa nàcuáa cùu iní-xi, chí ndéé òré ní ngáva ñuyíú ducaⁿ-ni ndècu-xi dacáháⁿ-xi iní-ndó sàhni tnaha-ndo. Te ñá ñⁿ ndùu cáháⁿ-xi ñⁿ tnúhu ndáá chí ñá túu xìca-xi ichi ndáá, chí mee-ni ichi tnúhu ndehnde xìca-xi chí

ducaⁿ iní-xi. Te diu-xi dàcahu-xi iní-ndó dàcuandehnde-ndo.

⁴⁵ Te yúhú càháⁿ-í tnúhu ndáá te ñá túu cuíní-ndó quíndáá iní ñáhá-ndó.

⁴⁶ ¿Te ndèdacàa nchohó xíní-ndó sã quíde-í ñⁿ sá cuèhé sá dúhá-í?, te yúhú ñá túu ñã quíde-í chí càháⁿ ndáá-í, ¿te ná cuendá ñá túu cuíní-ndó quíndáá iní-ndó tnúhu càháⁿ-í?

⁴⁷ Te nchaa ñáyíu ndècu ichi Yá Ndiöxí, ñáyíu-áⁿ sácündedóho-yu nchaa tnúhu càháⁿ-gá. Te nchòhó chí ñá díú ichi Yá Ndiöxí ndécú-ndó núu ñá túu sácündedóho-ndo tnúhu càháⁿ-gá —càchí-gá xáhaⁿ-gã xií-yu.

Díhna-gá Cristú sa ndècu dacúúxí ndíi Àbrahám

⁴⁸ Te ní xáháⁿ ñáyíu isràél:

—Váha-ni càháⁿ-ndí sá tée samaritànú cúu-n, te yucu ñávãha ndècu ndihí-n —cachí-yu xãháⁿ-yu xii-gá.

⁴⁹ Te ní xáháⁿ Jèsús:

—Yúhú, ñá túu yùcu ñávãha ndècu ndihí-í, chí Tãtà-í quíde càhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gã xií-yu.

⁵⁰ Te xáháⁿ tùcu-gá:

—Yúhú, ñá túu càchí-í sá cádá càhnu ñaha-ndo, dico Dútú Ndiöxí cuíní-gá sá cádá càhnu ñaha-ndo xii-í. Te mee-gã cáháⁿ-gá núu ndèdacàa-ndo quíde váha, te ndèdacàa-ndo ñá túu quíde váha.

⁵¹ Te na càchí tnúhu ndáá-í xii-ndo sã nchàa ñáyíu na tnèi tnúhu càháⁿ-í te vá cuíta nihnú-yu —càchí-gá xáhaⁿ-gã xií-yu.

⁵² Te ní xáháⁿ tùcu ñáyíu isràél:

—Vitna te ní xíní ndáá-ndí sá yùcu ñávãha ndècu ndihí-n, chí ndíi Àbrahám ndihí nchaa cue tée ní xóo cáháⁿ tnúhu Yá Ndiöxí ndéé sanaha ní xihí-güedé, te yòhó càchí-tu-n sã ncháá ñáyíu na tnèi tnúhu càháⁿ-n te vá cùú-gá-yu.

⁵³ ¿Náa ío-gá càhnu cuu-ó dàcúúxí ñàní tnáhá-ndí ndíi Àbrahám-ãⁿ? Tée-áⁿ dai ní xihí-dé ndihí cue tée ní xóo cáháⁿ tnúhu Yá Ndiöxí ndéé sanaha. ¿Te yòhó nágá-tu cùu-n te vá cùú-n càháⁿ-n-í? —cachí-yu xãháⁿ-yu.

⁵⁴ Te ní xáháⁿ Jèsús:

—Te núu dìcò mèè-í quidé càhnu-í mèè-í ñá, te ñá túú nàndíhi sá quidé-í nõu ducaⁿ. Dico Tåtá-í quidé càhnu ñaha-gá xii-í, te ñu-ni Yaá-áⁿ càchí-ndó cùu Ndióxi-ndó.

⁵⁵ Te nchòhó chi ñá túú xini-ndó-gã. Te yúhú chi xini-í-gá. Te núu na càchí-í sá ñà túú xini-í-gá te dàcuandehnde-í dàtná ndehnde mèe-ndo. Te yúhú chi xini ndisa-í-gá te tñi-í nchaa tñuhu càháⁿ-gá.

⁵⁶ Te ndíi Àbrahám ñaní tñhá-ndó ñi xindecu ndéé sanaha ío ní cudíi ñi ndíi sá quini ñhá ndíi xii-í, te ní sáá nduu ñi xini ñhá ndíi xii-í nõu ío ní cudíi ñi ndíi — càchí-gá xáhaⁿ-gá xií-yu.

⁵⁷ Te ní xáhaⁿ ñáyi israél xii Jèsús:

—Ni vátá cùhúⁿ-gã-n ùdico úxí cuía-n te càchí-n sã ñi xini-n ndíi Àbrahám, te ní cunaha vñhi ní xihí ndíi-áⁿ —càchí-yu xãháⁿ-yu xii-gá.

⁵⁸ Te ní xáhaⁿ Jèsús:

—Te na càchí tñuhu ndáá-í xii-ndo sã cùmání-gã cundecu ndíi-áⁿ ñuyú-a te yúhú sa ndècu-gá-í —càchí-gá xáhaⁿ-gã xií-yu.

⁵⁹ Te sá dúcáⁿ ñi cáháⁿ-gá nõu xiáⁿ ní quehéⁿ-yu yúu cuáha ñhá-yu xii-gá ní cùu, te ní nguivãha-gá nõu-yu te ní quee-gá xití veñúhu cuáháⁿ-gá.

9

Jèsús quidé tãtna-gá ñi tée cuáá

¹ Te núu xicá cùu Jesús ní naníhí-gã ñi tée cuáá, te sa ducaⁿ tñáhi càa núu-dě ní cacu-dé.

² Te ní xáhaⁿ cuè tée xica cuu ndíhi-gá xii-gá:

—Mèstrú, ¿ná cuendá dàcáⁿ cuáá tée-áⁿ ní cacu-dé? ¿Sá cuendá nchaa yicá cuèchi tãtá-dě, áⁿ sã cuendá nchaa yicá cuèchi nãná-dě, áⁿ sã cuendá nchaa yicá cuèchi mee-dě dàcáⁿ cáá-dě ní cacu-dé? —càchí-güedé xáhaⁿ-güedé xii-gá.

³ Te ní xáhaⁿ Jèsús:

—Ni ñà díú sã cuendá nchaa yicá cuèchi mee-dě, te ni ñà díú sã cuendá nchaa yicá cuèchi tãtá-dě, te ni ñà díú sã cuendá nchaa yicá cuèchi nãná-dě, chi mee Yã Ndióxi ní cuini-gá sá dúcáⁿ cùnduu-dé sáá-dé ñuyú-a cuendá sã ñuyú-a quini ñáyi nása cada ñaha Yã Ndióxi xii-dé ndúha núu-dě.

⁴ Te vitna ío-gá nduu cùyica sá cáda-í nchaa chiúⁿ ní táhú Yáá ní tendaha ñaha xii-í véxi-í ñuyú-a, chi sáá nduu te vá ndácú-gã-í cada-í chiúⁿ-gá.

⁵ Te nini ndècu-gá-í ñuyú-a te dándixi túu-í iní nchaa ñáyi cuendá cutnùni iní-yu nàcuáa nduu cuendá Yã Ndióxi —càchí-gá xáhaⁿ-gã xii-güedé.

⁶ Te sátá dúcáⁿ ñi cáháⁿ-gá, te ní sati-gá díi-gá núu ñuhú te ní dácá-gã luha ñuhu ní cuáha ndéhyú, te ndéhyú-áⁿ ñi dácánù-gá ndúu xio núu tée cuáá-áⁿ.

⁷ Te ní xáhaⁿ-gã xii-dé:

—Quíhíⁿ-n nàquete-n núu-n ndüte tanquí Silòé —càchí-gá xáhaⁿ-gã xii-dé. Te Silòé-áⁿ quéé-xi tñuhu mèe-yu: Tée xica chiúⁿ.

Te ní sáháⁿ tée cuáá-áⁿ ñi naquete-dé núu-dě, te òré ní ndexìo-dé te sa ndèhe-dé.

⁸ Te nchaa ñáyi ndècu yatni núu ndécú-dě ndíhi nchaa ñáyi xini ñhá xii-dé núu xicáⁿ ndáhú-dé ní xitnãhá-yu:

—¿Náa ñá díú tée-áⁿ ní xóo cácaⁿ ndáhú-dé? —càchí-yu xitnãhá-yu.

⁹ Te davá-yu càchí-yu sá díú-dě, te davá-yu càchí-yu sá ñà díú-dě, dico ducaⁿ càa-dé, càchí-yu xitnãhá-yu.

Dico mee-dě ní xáhaⁿ-dě xií-yu sá díú-dě.

¹⁰ Te ní xicáⁿ tñuhú-yu núu-dě, te xãháⁿ-yu:

—¿Náa ní cuu núu ní ndúha núu-n ndèhe-n vitna? —càchí-yu xãháⁿ-yu xii-dé.

¹¹ Te ní xáhaⁿ-dë:

—Tée nani Jesús-áⁿ ní cadúha-dé luha ndéhyú te ní dácánù-dé núu-í, te ní táuchíúⁿ-dë ní sáháⁿ-í tanquí Silòé ní naquete-í núu-í, te òré-áⁿ ñi cuu cundehe-í —càchí-dé xáhaⁿ-dë xií-yu.

¹² Te ní xicáⁿ tñuhú tucú-yu núu-dě, te xãháⁿ-yu:

—¿Te ndèe ndécú tée-áⁿ? —càchí-yu xãháⁿ-yu xii-dé.

Te ní xáhaⁿ-dë:

—Ñá túú xini-í —càchí-dé xáhaⁿ-dë xií-yu.

Cue tée cùu fariséu ndátnùhu-güedé ndíhi tée ní ndúha núu-xi

¹³ Te ndèca-güedé tée ní ndúha núu-xi-áⁿ cuáháⁿ núu cuè tée cùu fariséu.

¹⁴ Te cuendá sá nduu ndetatú-yu ní cadúha Jèsús ndéhyú ñi dácánù-gá núu tée-áⁿ te ní ndúha,

15 xíǎⁿ nũ ní xícáⁿ tnúhú cuè téé cùu fariséú núú-dě, te xǎhaⁿ-güedě:

—¿Nása ní cuu ní ndúha núú-n? — cǎchí-güedé xǎhaⁿ-güedě xii-dé.

Te ní xáhaⁿ-dě xii-güedé:

—Íⁿ téé ní dácánũu-dé ndéhyú nũ-í te ní sáháⁿ-í ní naquete-í, te ní cuu ndèhe-í vitna —cǎchí-dé xǎhaⁿ-dě xii-güedé.

16 Te dava cue téé cùu fariséú ní xítñaha-güedé:

—Ñá díú Yǎ Ndiǒxí ní tëndaha ñaha-gá xii téé-ǎⁿ véxi-dé nũ duha quide-dé nchaa sá vǎ yǒo tnàhí ndàcu cada, te ñá túú sàndáá iní-dé canehe íí-dě nduu ndètátú-ó —cǎchí-güedé xítñaha-güedé.

Te dava-güedé ní xítñaha-güedé:

—¿Nása ndacu-dé cada-dé sá vǎ yǒo tnàhí ndàcu cada te núu cùu-dé téé yícá cuèchi? — cǎchí-güedé xítñaha-güedé.

Te ñá túú ní cùu ìⁿnuu-güedé tnúhu ní cǎháⁿ-güedé.

17 Te ní xícáⁿ tnúhú tucu-güedé núú tēe ní ndúha núú-xi-áⁿ, te xǎhaⁿ-güedě:

—Te yòhó, ¿nása cǎchí-n cuendá téé ní quide tátna núú-n te ní ndúha? — cǎchí-güedé xǎhaⁿ-güedě xii-dé.

Te ní xáhaⁿ-dě:

—Yúhú cǎchí-í sá ìⁿ tēe cǎháⁿ tnúhu Yǎ Ndiǒxí cúú-dě —cǎchí-dé xǎhaⁿ-dě xii-güedé.

18 Dico cue téé isràél ñá ní sàndáá iní-güedé sá cuàá-dé ní cùu, chi cuendá sa ní ndúha núú-dě ní xiní ñáhá-güedě, te xíǎⁿ nũ ní cana-güedé tǎtá-dě ndihí nǎná-dě,

19 te ní xícáⁿ tnúhú-güedě núú-yu, te xǎhaⁿ-güedě:

—¿Díu téé-a déhe-ndo tēe cǎchí-ndó cuàá-dé ní cacu-dé-ǎⁿ? ¿Te nása ní cuu ní ndúha núú-dě? —cǎchí-güedé xǎhaⁿ-güedě xii-yu.

20 Te ní xáhaⁿ tǎtá-dě ndihí nǎná-dě:

—Díu déhe-ndí cúú-dě te sa cuàá ndisa-dé ní cacu-dé,

21 dico ñá túú xiní-ndí nása ní cuu ní ndúha núú-dě, te ní ñá túú xiní-ndí yoo ní quide tátna. Chí cǎcáⁿ tnúhú núú méé-dé xíǎⁿ nũ sa sàcuéhé-dě, te na cǎháⁿ-dé nũ nása ní cuu ní ndúha núú-dě —cǎchí-yu xǎháⁿ-yu xii-güedé.

22 Duha ní cǎháⁿ tǎtá-dě ndihí nǎná-dě ní xǎháⁿ-yu xii-güedé cuendá sá yùhú-yu cue téé cùnũu núú ñáyiũ isràél, chi cue téé-ǎⁿ

sa ní ndatnúhu-güedé ní cuu ìⁿnuu-güedě sá nũ ndèdacàa ñáyiũ na cǎháⁿ sá Jèsús cúú-gǎ Crístú Yáá ní tendaha Yǎ Ndiǒxí véxi ñuyíú-a, te vǎ dáñá-gǎ-güedé quíhu-yu veñúhu.

23 Núu xíǎⁿ ní xáhaⁿ tǎtá-dě ndihí nǎná-dě sá ná cǎcáⁿ tnúhú-güedé núú méé-dě chi sa sacuéhé-dě.

24 Te xíǎⁿ nũ ní cana tucu-güedé téé ní ndúha núú-xi-áⁿ, te ní xáhaⁿ-güedě:

—Cǎháⁿ-n ìⁿ tnúhu ndáá chi Yǎ Ndiǒxí ndéhe ndíi-gá nàcuáa ní cuu ní ndúha núú-n, chi nchúhú xiní-ndí sá dìcò ìⁿ téé ndècu yícá cuèchi-xi cùu téé cǎchí-n ní quide tátna núú-n —cǎchí-güedé xǎhaⁿ-güedě xii-dé.

25 Te ní xáhaⁿ-dě:

—Yúhú, ñá túú xiní-í te núu téé ndècu yícá cuèchi-xi cùu-dé àdi ñáhá. Dìcò-ni sá xiní-í sá cuàá-í ní cùu te vitna ní cuu cundehe-í —cǎchí-dé xǎhaⁿ-dě xii-güedé.

26 Te ní xícáⁿ tnúhú tucu-güedé núú-dě, te xǎhaⁿ-güedě:

—¿Nása ní quide ñaha-dě xii-n te ní ndúha núú-n-í? —cǎchí-güedé xǎhaⁿ-güedě xii-dé.

27 Te ní xáhaⁿ-dě:

—Yúhú sa ní cǎháⁿ-í te ñá túú quide cuendá-ndó. ¿Te ná cuendá cuiní-ndó cǎchí tnúhu-ni tucu-í? ¿Á tnàhá-ndó cuiní-ndó quindáá iní-ndó tnúhu cǎháⁿ-dé? —cǎchí-dé xǎhaⁿ-dě xii-güedé.

28 Te ní cudééⁿ-güedě núú-dě, te ní xáhaⁿ-güedě xii-dé:

—Te núu yòhó cuiní-n chinchícúⁿ-n tēe-ǎⁿ te cuáháⁿ, dico nchúhú chi canchícúⁿ nihnu nahi-ni-ndí nàcuáa ní cǎháⁿ ndíi Moisés.

29 Te nchúhú chi nàha-ndí sá Yǎ Ndiǒxí ní cǎháⁿ ndihí-gá ndíi Moisés, dico téé cǎchí-n-ǎⁿ chi ní ñá túú xiní-ndí ndèè téé cùu-dé —cǎchí-güedé xǎhaⁿ-güedě xii-dé.

30 Te ní xáhaⁿ tēe ní ndúha núú-xi-áⁿ:

—¿Te náa ñá díú nchòhó cǎchí-ndó sǎ ìo túha-ndo? Te núu ducaⁿ cǎháⁿ-ndó sǎ ñá túú xiní-ndó ndèè téé cùu-dé, te díu-dé ní quide tátna-dé núú-í ní ndúha —cǎchí-dé xǎhaⁿ-dě xii-güedé.

Te xǎhaⁿ tucu-dé:

31 —Xiní-ó sá Yǎ Ndiǒxí ñá túú tédòho-gá tnúhu cǎháⁿ ñáyiũ quide nchaa sá cuéhé sá dúhá, chi nchaa ñáyiũ quide cahnu ñaha xii-gá te quidé-yu nchaa nàcuáa cùu iní-gá, te ñáyiũ-áⁿ tédòho-gá tnúhu cǎháⁿ-yu.

32 Te ñá ìíⁿ ndùu cáháⁿ ñáyiú cuendá ìíⁿ té cada tátna núú ìíⁿ ñáyiú cuàá ndéé ní cacu-xi te ndúha.

33 Te núu ñá díú mèe Yá Ndiöxí ní tëndaha ñaha-gá xii té-áⁿ véxi-dé ñá, te vá ndácú-dé cada tátna-dé núú-í ní cùu — cächí-dé xáhaⁿ-dë xii-güedé.

34 Te ní xáhaⁿ-güedé:

—Dico yòhó ndéé yatni vài cuéchi sa ta quide-n véxi, ¿te vitna nacanú ichi ñaha-n xii-ndí cáháⁿ-n-áⁿ? —cächí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhi tnáhá ndíhi ñaha-dé xii-güedé.

Ñáyiú ñá túú ndíxi túú iní cuendá nchaa sá cuéhé sá dúhá quidé-yu

35 Te ní níhi Jèsús tnúhu sá ñí queñuhu-güedé té ní cuhú núú-xi-áⁿ tnuú-güedé cuendá sá vǎ tnáhá tnúhu ndíhi ñaha-gǎ-dé xii-güedé, te ní naníhi ñáhá-gǎ xii-dé te ní xáhaⁿ-gǎ:

—¿Sàndáá iní-n Dèhe Yá Ndiöxí-áⁿ? — cächí-gá xáhaⁿ-gǎ.

36 Te ní xáhaⁿ tée ní cuhú núú-xi-áⁿ:

—Mèstrú, cächí tnúhu núu ndéé ndécú tée-áⁿ cuendá quíndáá iní-í-dé —cächí-dé xáhaⁿ-dë xii-gǎ.

37 Te ní xáhaⁿ Jèsús:

—Sa xíní-n-dë chi díu-dé cúu yǎhú té ndàtnúhu ndíhi-n —cächí-gá xáhaⁿ-gǎ xii-dé.

38 Te ní ngüíñí xítí-dé núú-gǎ, te ní xáhaⁿ-dë:

—Xítóhó Jesucristú, sàndáá iní ñáhà-í xii-n —cächí-dé xáhaⁿ-dë xii-gǎ.

39 Te ní xáhaⁿ tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quide váha cúu-yu dàtná ìíⁿ ñáyiú cuàá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu cáháⁿ-í, te cada iní-ndó sǎ dàtná sá ñí nacaáⁿ núú-yu chi tñí-yu tnúhu cáháⁿ-í. Te ñáyiú cächí sá quidé váha vá ñuu núu-yu cuéchi-yu chi quesáhá-yu sá ìo ndáá quidé-yu, ñáyiú-áⁿ cúu-yu dàtná ìíⁿ ñáyiú cuàá, chi vá ndíxi túú iní-yu sá ñà túú quide váha-yu ndécú-yu, te

vǎ tñí-yu tnúhu cáháⁿ-í —cächí-gá xáhaⁿ-gǎ xii-dé.

40 Te sá dúcáⁿ ñí cáháⁿ-gǎ, núu ní cáháⁿ ìíⁿ úú cue té cùu fariséu, te xáhaⁿ-güedé:

—¿Te náa tnáhá nchúhú cuàá-ndí cáháⁿ-n-áⁿ? —cächí-güedé xáhaⁿ-güedé xii-gǎ.

41 Te ní xáhaⁿ Jèsús:

—Te núu dìcò nchòhó cuàá-ndó ñá, te vá cùndècu cuéchi-ndo ní cùu, dico cächí-ndó sǎ ndéhé-ndó ìíⁿ sá quidé-ndó te ñá ndáá, núu xǎⁿ ìo ndècu cuéchi-ndo.

10

Jèsús cáháⁿ-gá cuendá currálí mbéé

1 Te na cächí tnúhu ndáá-í xii-ndo sǎ ìíⁿ té ñá túú quíhu ndáa yuyehe ìíⁿ currálí mbéé, te cùtexínu-ni na cuidó-dé, té-áⁿ cúu-dé ñádúhú.

2 Dico té quíhu ichi yèhe currálí-güedi, té-áⁿ cúu-dé xítóhó-güedi.

3 Te té ndéé yèhe currálí-güedi nacaáⁿ-dé te cuánguihu xítóhó-güedi te ní cáháⁿ-dé, te ní nucúhuⁿ ndudú ñáhá-güedi xii-dé. Te ní cáháⁿ díú-dë-güedi te ní queñuhu-dé-güedi currálí.

4 Te sátá ñí quee-güedi currálí, te ní ngódó núú-dë núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi.

5 Te ñá túú chinchicúⁿ-güedi ìíⁿ té tátú, chi núcúhuⁿ ndudú-güedi sá ñà díú xítóhó-güedi cùu-dé, núu xǎⁿ xínú-güedi núú-dë — cächí-gá xáhaⁿ-gǎ xii-güedé.

6 Duha ní cáháⁿ Jèsús cuendá sá cùní-gá dacuáhá-yu tnúhu-gá ní cùu, dico ñá ní tècú tnùní-yu nása ndùu tnúhu ní cáháⁿ-gǎ.

Jèsús cúu-gǎ dàtná ìíⁿ toli

7 Te ní xáhaⁿ tùcu Jèsús xii-güedé:

—Na cächí tnúhu ndáá-í xii-ndo sǎ yǎhú cùu-í dàtná ìíⁿ yèhe currálí núu ndíhu cue mbéé.

8 Te nchaa cue té sa yòdo nuu-gá ní quixi ní dándàhú-güedé ñáyiú cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùní iní-güedi sá ñà díú xítóhó-güedi cùu-güedé.

9 Te yúhú cúu-í dàtná yuyèhe currálí cue mbéé. Te ducaⁿ sàtnahá-xi cùu-í chi

nchaa ñáyi na tùha ñaha xii-í te naníhí tàhú-yu. Te cùu-yu dàtná cue mběé quiti xĩquee cùrrálí-xi cuáháⁿ-güedi núú cáá ité caxi-güedi, te dàtnùní cuándihu-ná-güedi cùrrálí, ducaⁿ sãtnahá-xi cùu-yu.

10 'Ñádúhú òré véxi-dé chi dùhu-dé, sãhni-dé te dànaa-dé mběé, dico yúhú chi véxi-í cuendá sá naníhí tàhú-ndó te ío cudíí ìní-ndó cùnu cuechi-ndo núú Dútú Ndiõxí ni caa ni quíhíⁿ.

11 Te yúhú cùu-í dàtná ìⁿ toli téé ío nèhe cuendá mběé-xi, chi téé-áⁿ cuèi na cùu-dé sá cùu-xi mběé-dé cuendá-nã sá ná cãcu-güedi.

12 Te núu ìⁿ téé na còto ñaha xii-güedi, te téé-áⁿ cuendá-ni sá ñúhú yãhu-dé xító-dé-güedi. Te núu na quini-dé sáá ìⁿ quiti dééⁿ te dàña-dé-güedi xinu-dé, te ndihí-güedi xité nuu ñaha quiti dééⁿ-ãⁿ, chi ñá díú mèi xítóhó-güedi cùu-dé.

13 Chi cuendá-ni sá ñúhú yãhu-dé xító-dé-güedi núu ñá túú nã ndihí ìní-dé cuèi na dàndihí ñaha quiti cuihna.

14 Te yúhú cùu-í dàtná ìⁿ téé ío váha xìto mbéé-xi, chi téé-áⁿ da ìⁿ da ìⁿ-di xìní-í-dé nàcuáa ndãa-di, te ducaⁿ xìní ñáhá-güedi xii-dé. Te ducaⁿ sãtnahá-xi cùu yúhú ndihí nchaa ñáyi sãndáá ìní ñáhá xii-í, chi yúhú xìní-í-yu te ducaⁿ mèé-yu xìní ñáhã-yu xii-í.

15 'Te ñu-ni ducaⁿ cùu-í ndihí Tãtà-í, chi xìní ñáhá-gã xii-í te xìní-í-gã. Te sáá nduu cùu-í cuendá nchaa ñáyi sãndáá ìní ñáhá xii-í.

16 Te ndècu-gá ñáyi vátá quindáá ìní ñáhá-gã xii-í. Te xìní ñuhu-xi cundedóho-yu tnúhu-í te quindáá ìní ñáhã-yu cuendá ìⁿ-nã ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cùu yúhú.

17 'Te Tãtà-í ío cudíí ìní ñáhá-gã xii-í cuendá sá sãá ìⁿ nduu te cuú-í, te cuú-í chi ducaⁿ cãchí ìní-í, te ñá díú sã cùu ìní ñáyi ñuyíú-a cuú-í, te cuú-í dico ndoto-í.

18 Te vá yõo ìⁿ te ndacu cahni ñaha xii-í, te núu ñá díú sã cùu ìní mèé-í cuú-í. Te dàtná-ni cùu ìní-í sá cùu-í te ñu-ni ducaⁿ ndòto-í chi ducaⁿ ñí cachí Tãtà-í Dútú Ndiõxí cunduu —cãchí-gã xáhaⁿ-gã xii-güedé.

19 Te sá dúcáⁿ ñí cáháⁿ-gá te ñá ní cùu ìⁿnuu tucu ñáyi isràél.

20 Te davá-yu ní xitnãhá-yu:

—¿Ná cuendá sãndáá-tu ìní-ndó tnúhu cáháⁿ téé-ãⁿ, te yucu ñávãha ndècu ndihí-dé, lúcú téé-ãⁿ? —cãchí-yu xitnãhá-yu.

21 Te davá-yu ní xitnãhá-yu:

—¿Náa xìní-ndó ìⁿ téé ndècu ndihí yucu ñávãha duha váha cáháⁿ-dé? ¿Náa xìní-ndó núu ndàcu yucu ñávãha cada tátna-xi núu ìⁿ téé cuáá te ndúha? —cãchí-yu xitnãhá-yu.

Ñáyi isràél dáquèe tíhũ-yu Jèsús

22 Te ndi tnahá cuía ndadá cãhnú-yu vico veñúhu cãhnu sá ío cùnuu ñuú Jerusalén, te mei yõo quidé vixiⁿ-xi quidé-yu vico-áⁿ.

23 Te corrèdór veñúhu-áⁿ nání-xi Sàlomón, te xíaⁿ xicá cùu Jèsús.

24 Te ní chítú ñíhú ñáyi isràél núu-gã, te ní xáháⁿ-yu:

—¿Ná ndéé òré cachí tnúhu ndáá-n, te núu sá Crístú Yaá ní tendaha Yã Ndiõxí véxi ñuyíú-a cùu-n, àdi ná téé cùu-n?, cáháⁿ-ni-n —cãchí-yu xáháⁿ-yu xii-gã.

25 Te ní xáhaⁿ Jèsús:

—Sa ní cachí tnúhu-í te ñá sãndáá ìní-ndó, te ndèhe-ndo sá vái núu sã quidè-í sá ñí táuchíúⁿ Tãtà-í cada-í, te cùu-xi ìⁿ sá cùtnùní ìní-ndó nã téé cùu-í.

26 Dico nchòhó ñá sãndáá ìní-ndó, chi ñá túú cùu-ndo ñáyi ní chitnahá ñáhá xii-í.

27 Chi nchaa ñáyi ní chitnahá ñáhá xii-í cùu-yu dàtná cue mběé quiti xĩndecu ndihí xítóhó-xi chi núcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sãtnahá-xi cùu nchaa ñáyi ní chitnahá ñáhá xii-í.

28 Te yúhú cada-í te nduu táhũ-yu cundecu ndihí ñáhá-yu xii-í ni caa ni quíhíⁿ te vá ìⁿ ndúu-gã cuíta ñíhú-yu, te ni vã yõo ìⁿ ndacu naquendéé ñáhá xii-yu ndaha-í.

29 Chi Tãtà-í ní taxi cuendá ñáhá-gã xii-yu. Te ío cùnuu-gá núu xíaⁿ vá yõo ìⁿ ndacu naquendéé ñáhá xii-yu ndaha-gã.

30 Yúhú ndihí Tãtà-í Dútú Ndiõxí ìⁿ-ni cùu-ndí —cãchí-gã xáhaⁿ-gã xii-yu.

31 Te ní queheⁿ tucu ñáyi isràél yúu cuãha ñáhá-yu xii-gã ní cùu.

32 Te ní xáhaⁿ-gã xii-yu:

—Ío cuéhé sã vãha ní quide-í núú-ndó nĩ chindee ñàha Tàtá-í Dútú Ndiõxí. ¿Te ndèdacaà sã ñã tnahá iní-ndó nõu cuiní-ndó cuãha ñaha-ndo yúú xii-í-í? —càchí-gá xáhaⁿ-gã xií-yu.

³³ Te ní xáhaⁿ ñãyiu isràél:

—Ñá díú cuendá nchaa sã vãha ni quide-n cuiní-ndí cuáha ñaha-ndí yúú xii-n, chi ìⁿ dìi-ni sã ïo càháⁿ úhú-n cuendá Yã Ndiõxí. Te dìcò ìⁿ tée ñuyúú-a cùu-n te càchí-n sã cúú-n Ndiõxí —càchí-yu xãhãⁿ-yu xii-gá.

³⁴ Te ní xáhaⁿ Jèsús:

—Núú tùtú Yã Ndiõxí sã ndécú ndìhi-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó nõù-í”, duha ní cachí-gá.

³⁵ Te nàha-o sã vã cúú quèhndé nihnu-o tñuhu yòdo tñuní núú tùtú Yã Ndiõxí, chi mee-gã ní cachí-gá sã cádá-yu núú-gã, te vá càchí-ó sã ñã ndáá.

³⁶ Te núu ducaⁿ nĩ cáháⁿ-gá sã nõú-gã quidé nchàa ñãyiu ní sándáá iní ñáhá xii-gá ñá, ¿te ná cuendá cudèéⁿ-ndó nõú yùhú sã càchí-í sã cúú-í Déhe-gá? Te mee Yã Ndiõxí ní tendaha ñaha-gá xii-í véxi-í ñuyúú-a sã cádá-í chiùⁿ-gá.

³⁷ Te núu ñá túú quide-í nàcuáa ní táuchíúⁿ Tàtá-í cada-í ñá, te vá quindáá iní ñáhá-ndó.

³⁸ Te núu quide-í ñá, te cuèi vá quindáá iní ñáhá-ndó xii mee-í dico quindáá iní-ndó nchàa chiuⁿ quide-í. Ducaⁿ te cutnùní ndáá iní-ndó sã Yã Ndiõxí ndécú ndìhi-í te ìⁿ-ni cùu-ndí —càchí-gá xáhaⁿ-gã xií-yu.

³⁹ Te ní cuiní-güedé tñi ñaha tùcu-güedé xii-gá quíhíⁿ-gá vecaa ní cùu, dico ní xinu núú ñáhá-gã xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núú nĩ xóo dacuàndute ndí Juàá ñãyiu ndéé díhna, yàcáⁿ ní xindecu-gá.

⁴¹ Te yàcáⁿ ío vai ñãyiu ní sáháⁿ ní cáháⁿ ndìhi ñaha xii-gá, te ní xitnahá-yu:

—Ndí Juàá, cuèi ñá túú ní quide ndí sã vã yòo tnahí ndàcu cada dico ndáá ní cáháⁿ ndí, chi dàtná-ni ní cáháⁿ ndí quide tée-a —càchí-yu xitnahá-yu.

⁴² Te yàcáⁿ ío vai-yu ní sándáá iní ñáhã-yu xii-gá.

11

Ní xíhí té Lãzarú

¹ Nnúú Bètaniá ní xindecu ìⁿ tée ní xínani-dè Lãzarú. Te càhú víhí nĩ tnahá-dé ní cuhú-dé, te ní xindecu ndìhi-dé cue cúha-dé tá Màriá ndìhi tá Màrta chi xiáⁿ ñuú-yu.

² Te tá Màriá-án cúú-xí xíhí nĩ sódó àcití sáháⁿ tñámí sáhá Jèsús, te ní nadayíhí-xi sáhá-gã ndìhi idi díquí-xi. Te cuendá sã cùhú cúha-yu té Lãzarú,

³ núu ní tendáhá-yu ñãyiu nàha tñuhu cuáháⁿ núú Jèsús, te xãhãⁿ-yu xii-gá:

—Mèstrú, tée ío cùu iní-n ïo càhú tnahá-dé cùhú-dé —càchí-yu xãhãⁿ-yu xii-gá.

⁴ Te sã dúcáⁿ càa tñuhu ní sáá, núu ní xáhaⁿ Jèsús xií-yu:

—Dico cuéhé-ãⁿ chi vá cúú-dé sã cúú dúcáⁿ-dè, chi Yã Ndiõxí cuiní-gá sã quini-yu nchaa sã cádá-gã cuendá chiñuhu ñáhá-yu xii-gá, te dìu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gã xií-yu.

⁵ Te cuèi ío cùu iní ñáhá Jèsús xii té Lãzarú ndìhi cue cúha-dé

⁶ dico òré ní níhí-gã tñuhu, te ní cuyaa-gã úú-gá nduu núú ndécú-gã.

⁷ Te ní xáhaⁿ-gã xii cue tée xica cuu ndìhi-gá:

—Na quíhíⁿ tucu-o dístrítú Jùdeá —càchí-gá xáhaⁿ-gã xii-güedé.

⁸ Te ní xáhaⁿ cuè tée xica cuu ndìhi-gá xii-gá:

—Mèstrú, vitna-ni cuiní cue tée isràél xindecu yàcáⁿ cuáha ñaha-güedé xii-n yúú ní cùu, ¿te cuiní-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núu nduu na càca cuu-o, te ñá túú nã candaundé-ó chi cùtñuní núú-ó chi dító.

¹⁰ Dico núu niú ná càca cuu-o, te ío ná candaundé-ó chi vá cùtñuní núú-ó —càchí-gá xáhaⁿ-gã xii-güedé.

¹¹ Te ní xáhaⁿ Jèsús:

—Té Lãzarú tée ío váha tnahá tñuhu ndìhi-o nĩ xídí-dé dico quíhíⁿ-ó chi ndo-cani-o-dè —càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xídí-dé te váa sa ta ndùha-dé cuáháⁿ —càchí-güedé xáhaⁿ-güedé xii-gá.

13 Duha ní cáháⁿ Jèsús, chi té Lăzarú sa ní xíhí-dé te cue tée xica cuu ndihí-gá ní sani iní-güedé sá nǐ xídí ndisa-dé.

14 Te Jèsús ní xáhaⁿ ndáá-gá xii-güedé:

—Sa ní xíhí té Lăzarú.

15 Váha-gá sá ñă ní sáháⁿ-í quíngoto-í-dé, chi ndècu ingá chiúⁿ cada-í quini-ndó, te quíndáá iní ñáhá-gă-ndó xii-í, te vitna na quíhíⁿ-ó núú ndécú yiqui cuñú ndíi —càchí-gá xáhaⁿ-gă xii-güedé.

16 Te té Măxí tée xăhaⁿ-güedě cuăchí ní xáhaⁿ-dě xii dava-gă-güedé:

—Na quíhíⁿ-ó nchàa-o chi yàcáⁿ cuú-ó ndihí-dé —càchí-dé xăhaⁿ-dě xii-güedé.

Jèsús càháⁿ-gá sá cuēi na cùú ñáyiu dico ndotó-yu cundecú-yu ndihí-gá

17 Te òré ní sáá Jèsús ñúú Bètaniá, te ní xáhăⁿ-yu sá sà ní cuu cúmí nduu ní xíhí té Lăzarú.

18 Te ñúú-áⁿ cáá yàtni-ni-gá ñúú Jerusàlén, dàtná cuádava-ná òré cuhuⁿ-o ìchi te saá-ó.

19 Núú xiăⁿ vâi ñáyiu isrâél ní sáháⁿ-yu ní cáháⁿ ndihí-yu tá Mărta ndihí cúhú-xi tá Măriá, te ní sãñháⁿ-yu tnúhu ndee iní sá dúcáⁿ nǐ xíhí cúha-yu.

20 Te ní níhí tă Mărta tnúhu sá ñúhú Jèsús ichi cuáháⁿ-gá núú ndécú-yu núú ní sáháⁿ-xi ní sátnahá-xi-gá, te cúhú-xi tá Măriá ní ndóo-xi vehe.

21 Te òré ní naníhí tă Mărta Jèsús, te ní xáhaⁿ-xi xii-gá:

—Mèstrú, te núú dicó ní xíndecu-n ìha te vá cùú cúha-ndí ní cùu.

22 Te cuēi vitna te núú ná sá ná càcáⁿ-n núú Yă Ndiôxí te taxi-gá xii-n —càchí-xi xăhaⁿ-xi xii-gá.

23 Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gă xii-xi.

24 Te ní xáhaⁿ tă Mărta:

—Ndáá chi sa xini-í sá ndótó-dě ná quítnahá nduu ndoto nchaa ñáyiu ní xíhí —càchí-xi xăhaⁿ-xi xii-gá.

25 Te ní xáhaⁿ Jèsús:

—Yúhú dandoto-í-yu cuendá cundecú-yu ní caa ní quíhíⁿ ná sáá nduu. Te nchaa ñáyiu na quíndáá iní ñáhá xii-í, te cuēi na cùú-yu dico ndotó-yu cundecu-í ndihí-yu ní caa ní quíhíⁿ.

26 Te nchaa ñáyiu ndècu vívú ñuyú-a te núu na quíndáá iní ñáhă-yu xii-í, te cundecu ndihí-í-yu ní caa ní quíhíⁿ. ¿Sàndáá iní-n tnúhu-a ñă? —càchí-gá xáhaⁿ-gă xii tá Mărta.

27 Te xăhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yă Ndiôxí, Yáá ní tendaha-gă véxi ñuyú-a —càchí-xi xăhaⁿ-xi xii-gá.

Jèsús ndàhí-gá núú nǐ nguíndüxi té Lăzarú

28 Sátá dúcáⁿ nǐ cáháⁿ-xi te ní sáháⁿ ngana-xi cúhú-xi tá Măriá, te dayuhu nǐ xáhaⁿ-xi:

—Yácáⁿ ní quexio Mestrú, te càna ñaha-dé xii-n —càchí-xi xăhaⁿ-xi.

29 Te sá dúcáⁿ xăhaⁿ cúhú tă Măriá sá cáná ñaha Jèsús xii-xi, núu ndihí-ni ní xica-xi cuáháⁿ-xi núú ndécú-gă.

30 Te Jèsús vátá quíhu-gá xití ñúú, chi ndècu-ni-gá núú nǐ sáháⁿ tnahá ñáhá tă Mărta.

31 Te ñáyiu isrâél ndécú sãñaha tnúhu ndee iní xii tá Măriá ndihí cúhú-xi ní sani iní-yu sá cuáháⁿ-xi núú yíndüxi cúha-xi ndáhyú-xi ní cáháⁿ-yu, núu nchícúⁿ-yu-xi cuáháⁿ.

32 Te ní sáá tá Măriá núú ndécú Jèsús te ní nguíñí xití-xi núú-gă, te xăhaⁿ-xi xii-gá:

—Mèstrú, te núú dicó ní xíndecu-n ìha te vá cùú cúha-ndí ní cùu —cachí-xi xăhaⁿ-xi xii-gá.

33 Te sá nǐ xini Jèsús ndáhyú tá Măriá ndihí ñáyiu isrâél nchícúⁿ ñáhá cuáháⁿ, xiăⁿ ío ní cuyica iní-gá.

34 Te ní xáhaⁿ-gá xii-yu:

—¿Ndèé ní taxi ndecu-ndo yiqui cuñú-dé-i? —càchí-gá xáhaⁿ-gă xii-yu.

Te ní xáhăⁿ-yu:

—Mèstrú, néhé ná quíhíⁿ-ó te quini-n —càchí-yu xáhăⁿ-yu xii-gá.

35 Te ní ndáhyú-gá tnahá-gá.

36 Te ní xitnaha ñáyiu isrâél:

—Súúni cùu iní-dé ndíi ní cùu —cachí-yu xitnaha-yu.

37 Te davá-yu xitnaha-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lăzarú cuendá sá vă cùú-dé ní cùu-i? —cachí-yu xitnaha-yu.

Jèsús dándòto-gá té Lăzarú

38 Te ío ní cuyica tucu iní Jèsús òré ní quexio-gá yuhu yaú núú nǐ chihi-güedé yiqui cùñú té Lăzarú. Te yuhu yaú-án ndèdí ìn yúú.

39 Te ní xáhaⁿ Jèsús xii-yu:

—Chí xócàni yúú-ǎⁿ —càchí-gá xáhaⁿ-gǎ xii-yu.

Te ní xáhaⁿ tă Mărta cúha téé ní xihí-án:

—Mèstrú, sa tucu sàháⁿ-dé chi sa ní cuu cúmí nduu sá nǐ xihí-dé —càchí-xi xáhaⁿ-xi xii-gá.

40 Te ní xáhaⁿ Jèsús:

—¿Náa ñá díú nǐ cachí-í sá nǔu na quíndáá iní-n, te quini-n sǎ ìo càhnu cuu Yá Ndiöxí? —càchí-gá xáhaⁿ-gǎ xii-xi.

41 Te ní xócánǐ-yu yúú ndèdí yuhu yaú-án. Te ní ndacoto-gá andiú, te ní xáhaⁿ-gǎ xii Tătá-gǎ Dútú Ndiöxí:

—Táu, ndàcáⁿ táhù-í núú-n sǎ nǐ tèdoho-n tnúhu ní cáháⁿ-í.

42 Te yúhú sa nàha-í sá ncháá-ni òré ndèdóho ñaha-n xii-í, dico duha cáháⁿ-í cuèndá sá ná təcú dóho nchaa ñáyiú ndècu iha cuèndá quíndáá iní-yu sá díú-n nǐ tendaha ñaha-n xii-í véxi-í ñuyíú-a —càchí-gá xáhaⁿ-gǎ xii Dútú Ndiöxí.

43 Te sátá dúcáⁿ nǐ cáháⁿ-gá ndihí Yá Ndiöxí, te níhi ní cáháⁿ-gá xáhaⁿ-gǎ xii téé ní xihí-án:

—¿Lăzarú, tandèe xíaⁿ! —càchí-gá xáhaⁿ-gǎ xii-dé.

44 Te ní ndee téé ní xihí-án yaú-án, te ndùtu dóo cuíñí ndàha-dé ndihí sáhá-dé, te dǎhu tucu ìn dóo nǔú-dé. Te ní xáhaⁿ Jèsús xii-yu:

—Chí nándàxi-dé te dañà-ndo-dé ná cáca-dé —càchí-gá xáhaⁿ-gǎ xii-yu.

Ndùcu-güedé nàcuáa cada-güedé cahni-güedé vico pascuá

(Mt. 26:1-5; Mr. 14:1-2; Lc. 22:1-2)

45 Te nchaa ñáyiú nchícúⁿ ñáhá xii tá Màriá cuáháⁿ ío vai-yu ní sándáá iní-yu Jèsús sá nǐ xiní-yu nàcuáa ní quide-gá.

46 Dico davá-yu ní sáháⁿ-yu núú cuè téé cùu fariséú, te ní caní-yu cuèndú núú-güedé nàcuáa ní quide Jèsús.

47 Te cue téé cùu fariséú ndihí cue dútú cùnùu ní natacá-güedé ní xóo-güedé jundá, te ní xitnàha-güedé:

—¿Nása cada-o?, chi téé-ǎⁿ ío vai sá vǎ yǒo tnàhí ndàcu cada quide-dé.

48 Te núu na dàña ío te nchaa ñáyiú quíndáá iní ñáhá-yu xii-dé, te quixi cue téé ñuú Rómá dangòyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

49 Te ìn cue téé-án nání-dé Caifás, te cùnùu-gá-dé núú dàva-gá cue dútú cuíá-ǎⁿ, te ní xáhaⁿ-dǎ xii-güedé:

—Nchòhó ni lùha ñá túú cùnùnì iní-ndó.

50 Te ní ñǎ sàha-ndo cuèndá sá vǎha-gá tnahá-ó, te núu na cùú ìn-ni téé cuèndá nchaa ñáyiú isràél, te ñá díú sǎ dánàa ñaha-güedé xii-yu —càchí-dé xáhaⁿ-dǎ xii-güedé.

51 Dico té Caifás chi ñá díú sǎ cúú iní mée-dé ní cáháⁿ-dé, chi cuèndá sá cuíá-ǎⁿ nǐ cunuu-dé núú cuè dútú, núu xíaⁿ Yá Ndiöxí ní dácáhu iní ñáhá-gǎ nàcuáa cáháⁿ-dé sá Jèsús cuú-gá sá cúú-xí nchaa ñáyiú isràél.

52 Te ñá díú cuèndá mee-ni ñáyiú-án cuú-gá, chi cuú-gá tnàhà cuèndá nchaa ñáyiú ní sándáá iní ñáhá xii-gá, ñáyiú nchítènuu nihí ñuyíú, te ìn-nǎ cuú-yu ndihí-gá.

53 Núu ndéé nduu-ǎⁿ nǐ ndatnúhu cue téé cùnùu núú ñáyiú isràél nàcuáa cada-güedé cahni-güedé Jèsús.

54 Te xíaⁿ nǔu ñá ní xica cuu-gá Jèsús quini ñáhá ñáyiú isràél, te ní quee-gá cuáháⁿ-gá ñuú Efráin, ìn ñuú cáá yàtni yucu, yàcáⁿ ní ngüíñí-gá ndihí cue téé xica cuu ndihí-gá.

55 Te ta cùyatni nduu cadá-yu vico pascuá. Te cuéhé ñáyiú ní quee-yu ñuú-yu cuáháⁿ-yu ñuú Jerusàlén cuèndá sá sà ndihí-yu ncháa-yu nduu íi, te tnahá nduu vico pascuá.

56 Te yàcáⁿ nándúcú-yu Jèsús ní cùu te ñá túú-gǎ òré-án, te ní naníhí tnàhà-yu xití veñúhu, te xitnàhá-yu:

—¿Nása sàni iní-ndó-í? ¿Quixi Jèsús vico ǎⁿ ñáhá? —càchí-yu xitnàhá-yu.

57 Te cue téé cùu fariséú ndihí cue dútú cùnùu sa ní xáhaⁿ-güedé xii ñáyiú sá nǔu ndèda-ni cáa-yu xiní-yu núú ndécú Jèsús te na cáháⁿ-ni-yu cuèndá tñ ñaha-güedé xii-gá.

12

Īⁿ ñadìhí chĭhí-án Jèsús acití
(Mt. 26:6-13; Mr. 14:3-9)

¹ Īñú-gá nduu cùmání tnahá vico pàscuá, te ní sáháⁿ Jèsús ñuú Bètaniá, ñuú té Lăzarú tée ní dándótó-gă.

² Te xíaⁿ ñi cadúha-yu sá ñi cudini Jesús. Te tá Mărta ní sani-xi cóhó, te té Lăzarú yíhí-dě mèsá ndihí Jèsús, ndihí dava-gă-güedé xéxí-güedé.

³ Te tá Măriá nêhé-xí cuădava lĭtrú acití sáháⁿ tnámí sã ĩo ndeyáhu, te acití-án ñi cuáha mee-ni yücú nărdú, te ní sódó-xi sáhá Jèsús, te ní nadayichí-xi ndihí idi díquí-xi sáhá-gă. Te ñihí xití vehe ní xité nuu dicó acití-án.

⁴ Te té Júdás déhe té Xímú Iscarioté ñu-ni ĩⁿ tée xica cuu ndihí-gă, tée cuáha cuendá ñáhá xii-gă núu cuè tée cùu úhú iní ñáhá ñi xáhaⁿ-dě xii-gă:

⁵ —Īná cuendá ñá ní cùyáhu acití-a sá ùní ciendú díhúⁿ denariú cuu cuendá ñáyiu ndàhú? —càchí-dé xáhaⁿ-dě xii-gă.

⁶ Dico sá dúcáⁿ ñi cáháⁿ té Júdás chi ñá díú sã ndísá ñuhu iní-dé ñáyiu ndàhú chi dicó-ni ĩⁿ ñádúhú cúú-dě, chi ñu-dé nêhé cuendá-dé díhúⁿ-güedé nchaa-güedé te ní xóo duhu ñaha-dé xii-güedé.

⁷ Te ní xáhaⁿ Jèsús:

—Daña, vá dásatú-n ĩní xíchí-a na tàxúha nahi-xi acití-a, chi nandihí ndéé òré ná nguñdũxi-í.

⁸ Chi nchòhó chi cuhuⁿ tnahá-ni ñáyiu ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gă xáhaⁿ-gă xii-dé.

Tnàhá té Lăzarú cuñí-güedé cahni ñaha-güedé xii-dé

⁹ Te vai ñáyiu isràél ní níhí-yu tnúhu sá ndécú Jèsús ñuú Bètaniá. Te ní sáháⁿ-yu cuendá quini-yu-gă, te quini-yu tnàhá té Lăzarú tée ní dándótó-gă.

¹⁰ Te cue dútú cùnù ní ndatnúhu-güedé ní cuu ĩⁿnuu-güedé cuendá sá cahní-güedé tnàhá té Lăzarú ní cùu,

¹¹ chi ñu cuendá tée-án ñi cuu cuéhé ñáyiu isràél tá daña niñnú-yu-güedé cuáháⁿ cuendá sá ñi sándáá iní-yu Jèsús.

Jèsús cuánguihu-gă ñuú Jerusalén
(Mt. 21:1-11; Mr. 11:1-11; Lc. 19:28-40)

¹² Te nduu tnée-án vai ñáyiu ní quexio ñuú Jerusalén cuendá cundecu-yu vico, te ní níhí-yu tnúhu sá Jèsús sáá-gă tnàhá-gă cundecu-gă vico-án,

¹³ núu ní xehndé-yu ndaha yùtnu ñúú, te nêhé-yu ní sáháⁿ ní sátnahá ñáhă-yu xii-gă. Te níhi ní cáháⁿ-yu, te cächí-yu:

—Īo càhnu cuu Yá Ndiöxí! Te ducaⁿ-ni ĩo càhnu cuu Yaá ní tendaha-gă véxi quindaha ñaha xii-o —duha ní cachí-yu.

¹⁴ Te Jèsús ní níhí-gă ĩⁿ bŭrru, te yòdo-gă-dí cuáháⁿ. Te ducaⁿ ñi cuu chi ní quee ndáá-xi năcuáa cáháⁿ-xi núú tütú Yá Ndiöxí núú cächí-xi:

¹⁵ Vá yùhú nchòhó cue ñáyiu ndècu ñuú Sión,

chi iha véxi tée yindaha ñaha xii-ndo yodo-dé ĩⁿ bŭrru.

Duha cächí-xi núú tütú-gă.

¹⁶ Dico cue tée xica cuu ndihí Jesús ñá ní ndàcu iní-güedé năcuáa cáháⁿ-xi núú tütú Yá Ndiöxí năcuáa cada Jèsús. Dico sátá cuândaa-gă andiù càda cahnu ñaha Tátá-gă xii-gă, te ní ndacu iní-güedé sá dúcáⁿ yòdo tnuní năcuáa cada-gă, te ducaⁿ ñi cuu.

¹⁷ Nchaa ñáyiu ní xindecu ndihí Jèsús òré ní dándótó-gă té Lăzarú, ya yàcáⁿ ní caní-yu cuendú núú ñáyiu năcuáa ní quide ñaha-gă xii-dé.

¹⁸ Te vai-yu ní sáháⁿ-yu núú ndécú Jèsús cuendá sá ní níhí-yu tnúhu ní quide-gă sá vá yòo tnàhí ndàcu cada.

¹⁹ Te cue tée cùu fariséú ní xitnàha-güedé:

—Ní xito-ndo ñá ñá túú nandihí sá quidé-ó-vá, chi nchaa ñáyiu ní chinchícúⁿ ñáhă-yu xii-dé —cächí-güedé xitnàha-güedé.

Ñáyiu ñá túú cùu ñáyiu isràél nándúcú-yu Jèsús

²⁰ Te tnàhá ñáyiu ñá túú cùu ñáyiu isràél ní sáháⁿ-yu vico ñuú Jerusalén ní quide càhnu-yu Yá Ndiöxí.

²¹ Te ñáyiu-án ñi sáháⁿ-yu núú tẽ Lìpé tée ñuú Betsaidá, te ñuú-án yindèhu-xi distritú Galileá. Te ní xáhăⁿ-yu xii-dé:

—Tátá, vá cündèe iní-n cächí tnúhu-n nũu ndéé ndécú Jèsús, chi cuñí-ndí cáháⁿ ndihí-ndí-gă —cächí-yu xáhăⁿ-yu xii-dé.

22 Te té Lìpé ní naníhí-dě té Ndrìxí te ní xáhaⁿ-dě nàcuáa càháⁿ-yu, te ndi ndúú-güedé ní sáháⁿ-güedé ní xáhaⁿ-güedé xii Jèsús nàcuáa càháⁿ-yu.

23 Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tàtá-í xii-í, te quini-yu sá ïo càhnu cuu yúhú Téé cùu ñani tñáhá-yu nchaá-yu.

24 Te na càchí tñúhu ndáá-í xii-ndo sá nũu ñⁿ tatá vá ngává-xí nũú ñúhú tēhyú-xi ña, te ñⁿ ñi ducaⁿ cùnduu-xi cundecu-xi. Dico ñⁿ tatá ná ngává nũú ñúhú xinu déhe-xi, te xiáⁿ nádacayá tñáhá-xí, te mee-xi tēhyú-xi.

25 Te nchaá ñáyiú ío ñúhu iní-xi cundecu ñuyíú-a ñá túú ñúhu iní-yu Yá Ndiöxí, te ñáyiú-áⁿ cuíta nihnú-yu. Te nchaá ñáyiú ío ñúhu iní ñáhá xii Yá Ndiöxí, ñáyiú-áⁿ cundecú-yu ndihi-gá ni caa ni quíhíⁿ.

26 Te nchaá ñáyiú cuini cunu cuechi nũú-í xini ñuhu-xi natuha ñahá-yu xii-í, te nduu táhũ-yu cundecú-yu núú ñúhú-í cundecu-í. Te nchaá ñáyiú na cunu cuechi núú-í, te cada càhnu ñaha Tàtá-í xií-yu —càchí-gá xáhaⁿ-gã xii-güedé.

Jèsús càháⁿ-gá sá cáhni ñaha-güedé xii-gá

27 Te ní xáhaⁿ tucu-gá:

—Ío ndihú iní-í. Te cúñaha-í xii Tàtá-í taunihnu ñaha-gã nũu dico sá cúú, dico vá cúú chi cuendá tñahí-a véxi-í —càchí-gá xáhaⁿ-gã xii-güedé.

28 Te ní xáhaⁿ-gã xii Tàtá-gã Dútú Ndiöxí:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáyiú xii-n —càchí-gá xáhaⁿ-gã.

Te ducaⁿ te ní tecú ní cáháⁿ Yá Ndiöxí ndéé andiu, te càchí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuendá cada càhnu ñaha-gã-yu xii-í —càchí Yá Ndiöxí xáhaⁿ-gã xii Déhe-gã.

29 Te nchaá ñáyiú xíndecu ní tecú dóho-yu ní cáháⁿ-gã, dico ñá túú ní sani iní-yu sá méé-gã ní cáháⁿ, chi davá-yu ní xitnàhá-yu sá ñúhu ní cáháⁿ, te davá-yu ní xitnàhá-yu sá ñⁿ espíritú xínú cuèchi núú Yá Ndiöxí ní cáháⁿ.

30 Te ní xáhaⁿ Jèsús xií-yu:

—Ñá díú cuendá yúhú ní cáháⁿ Yá Ndiöxí, chi ní cáháⁿ-gã cuendá sá nchòhó cundedóho-ndo.

31 Te vitna ní sáá nduu càda ndáá Yá Ndiöxí cuèchi nchaá ñáyiú ñuyíú-a, te ducaⁿ te vá cùnù-gá yucu ñávãha.

32 Te na càta caa ñaha-güedé xii-í núú cùrúxí, te xiáⁿ cuú-í te níhĩ-yu tñúhu ní caa xico ñuyíú, te quindáá iní-yu tñúhu-í —càchí-gá xáhaⁿ-gã xií-yu.

33 Duha ní cáháⁿ-gã cuendá cutnùní iní-yu nàcuáa ndoho-gã òré cuú-gá.

34 Te ní xáháⁿ-yu xii-gá:

—Nihí-ndí tñúhu sá nũú tütú yódó tñùní tñúhu Yá Ndiöxí càháⁿ-xi sá Cristú Yaá tendaha-gã quixi ñuyíú-a cundecu-gá ni caa ni quíhíⁿ. ¿Te yòhó nása càháⁿ-tu-n sá ñⁿ téé cùu ñani tñáhá nchaa ñáyiú ñuyíú-a cahni ñaha-güedé núú cùrúxí? Te cachí tñúhu-n ná cúú tēe-áⁿ —càchí-yu xáháⁿ-yu xii-gá.

35 Te ní xáhaⁿ Jèsús:

—Yúhú cúú-í dàtná ñⁿ ñuhú dáyèhé ñuyíú-a, dico sacú-ni nduu ndècu ndihi ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cutnùní-gá núú-ndó ndéé ichi quíhíⁿ-ndó.

36 Quindáá iní ñáhá-ndó xii-í vitna ndècu ndihi ñaha-gã-í xii-ndo dándixi túu-í iní-ndó, cuendá cutnùní iní-ndó nàcuáa nduu cuendá Yá Ndiöxí, te cuu-ndo déhe-í —càchí-gá xáhaⁿ-gã xií-yu.

Te sátá dúcáⁿ ní cáháⁿ Jèsús, te ní quee-gá cuaháⁿ-gã ñⁿ núú vá ná nihí ñáhá-yu xii-gá.

Ñáyiú isràèl ñá cuini-yu quindáá iní-yu Jèsús

37 Te cuéi ío vai sá vã yòo tñahí ndàcu cada ní quide Jèsús ní xiní-yu, dico ni dùcaⁿ ñá túú ní sàndáá iní-yu-gá.

38 Te ducaⁿ ní quidé-yu chi dacuití ní quee ndáá-xi nàcuáa ní chídó tñùní ndí Chàíá ndí ní cáháⁿ tñúhu Yá Ndiöxí ndéé sanaha nũú tütú-gá núú càchí-xi:

Yòhó Yaá cúú Xitohó-í, vá yòo ñⁿ sàndáá iní tñúhu càháⁿ-ndí.

Te vá yòo ñⁿ cutnùní iní-xi sá ïo càhnu cuu-n. Duha ní chídó tñùní ndí Chàíá núú tütú-gá.

39 Te ñá ní sàndáá iní-yu chi ní quee ndáá-xi nàcuáa ní chídó tñùní tucu ndí Chàíá núú tütú Yá Ndiöxí nàcuáa cáháⁿ Jèsús:

40 Mee Yá Ndiöxí ní quide-gá sá vã tècú tñùní-yu,

chi ní dádãhu ndodo iní ñáhá-gã xií-yu,

chi ío sàá iní-yu núu ñá ní cuení-gá-yu quíndáá iní ñáhã-yu xii-gá.

Te ni vã túhá ñáhã-yu xii yúhú cuèndá dacãcu nihnu-í-yu.

41 Duha ní chídó tnùní ndíi Chàíá nàcuáa cáháⁿ Jèsús chi ní xiní ndíi sá ïo càhnu cuu-gá.

42 Te cuèi ducaⁿ ñí cuu dico titní cue téé cùnūu núú ñáyūu isràél ní sándáá iní ñáhã-güedé xii-gá. Dico ñá túú ní xõo cáháⁿ ndáá-güedé chí ní xõo yúhú-güedé sá vã dáñá-gã cue téé cùu fariséú quíhu-güedé veñúhu.

43 Chi ní xõo cudíí-gã iní-güedé sá càháⁿ ñáyūu dàcúúxí tnúhu càháⁿ Yã Ndiõxí.

Ñáyūu ñá túú sándáá iní tnúhu Jèsús cuíta nihnú-yu

44 Jèsús níhi ní cáháⁿ-gá, te càchí-gá:

—Nchaa ñáyūu na quíndáá iní ñáhã xii-í, te ñá díú-ní mèe-í quíndáá iní-yu, chi tnàhá Tãtã-í Yáá ní tendaha ñàha xii-í véxi-í ñuyíú-a quíndáá iní-yu.

45 Te ñáyūu xini ñáhã xii yúhú xini-yu tnàhá Tãtã-í.

46 Te yúhú véxi-í dandixi túu-í iní ñáyūu ñuyíú-a cuèndá cutnùní iní-yu nàcuáa ndūu cuendá Yã Ndiõxí, te nchaa ñáyūu na quíndáá iní ñáhã xii-í te vã cündècu-gá-yu ichi cuèhé ichi duha.

47 Te núu ïó davá-yu ndèdóho-yu nàcuáa càháⁿ-í te ñá túú tní-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dácuíta nihnu-í-yu, chi véxi-í sá dacãcu nihnu-í-yu.

48 Te nchaa ñáyūu na cùyíchí iní ñáhã xii-í te ñá túú quide cuendá-yu nàcuáa càháⁿ-í, te ñáyūu-áⁿ ná sàá nduu te cuíta nihnú-yu chi ñá ní tní-yu tnúhu ní cáháⁿ-í.

49 Te yúhú ñá túú càháⁿ-í tnúhu véxi iní mèe-í, chi mee Tãtã-í Yáá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cáháⁿ-í danèhé-í ñáyūu.

50 Te yúhú xini-í sá tnúhu ní táuchíúⁿ Tãtã-í cáháⁿ-í cúú-xí ñíⁿ sá vãha sá cúú xii-ndo chí nduu táhú-ndó cündecu-ndo ndíhi-gá ní caa ní quíhíⁿ, núu xiãⁿ càháⁿ-í nchaa nàcuáa ní táuchíúⁿ-gã —càchí-gá xáhaⁿ-gã xii-yu.

13

Jèsús náquète-gá sáhã cuè téé xica cuu ndíhi-gá

1 Te cùmání-gã tnahá vico pascuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tãtã-gã. Te ío ní cuu iní-gá nchaa ñáyūu ní sándáá iní ñáhã xii-gá, te ní quide ndisa-gá sá ñí cuu iní ñáhã-gã xii-yu.

2-4 Te ní quíhu yucu ñávãha díquí tẽ Jùdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhã xii-gá. Te Jèsús sa nàha-gá sá mée Yã Ndiõxí Yáá cúú Tãtã-gã ní sãñaha-gã tnúhu ndee iní xii-gá sá cádá-gã núú-gã, te nàha-gá sá díú núú Tãtã-gã ní quee-gá véxi-gá ñuyíú-a. Te sáá nduu nàsáá tucu-gá núú Tãtã-gã. Te cùdini Jèsús ndíhi cue téé xica cuu ndíhi-gá ní cùu, te ní ndacuíñí-gá yuhu mèsá, te ní taunuu-gá ñíⁿ dóó níhnú-gã, te ní queheⁿ-gá ñíⁿ dóó ñí dácútú-gã núú yíquí-gã.

5 Te ní chihí-gá ndute ñíⁿ tñá, te xiáⁿ ñí naquete-gá sáhã cuè téé xica cuu ndíhi-gá, te ndíhi dóó ndútú núú yíquí-gã-áⁿ ñí na-dayíchí-gá sáhã-güedé.

6 Te òré naquete-gá sáhã tẽ Xímú, àdi Pelú, ní cùu ní xáhaⁿ-dẽ xii-gá:

—Mèstrú, ¿te yòhó naquete-n sãhã-í-u? —càchí-dé xáhaⁿ-dẽ xii-gá.

7 Te ní xáhaⁿ Jèsús:

—Vitna ñá cùnùní iní-n sã quidè-í-a dico sáá nduu te cutnùní iní-n —càchí-gá xáhaⁿ-gã xii-dé.

8 Te ní xáhaⁿ tẽ Pèlú:

—Yúhú chí vã ñíⁿ ndūu te naquete-n sãhã-í —càchí-dé xáhaⁿ-dẽ xii-gá.

Te ní xáhaⁿ Jèsús:

—Te núu vã náquète-í sáhã-n áⁿ, te vã cádá-gã-n cuèndá sá ndécú ndíhi ñàha-í xii-n —càchí-gá xáhaⁿ-gã xii-dé.

9 Te ní xáhaⁿ tẽ Pèlú:

—Te núu ducaⁿ te vã mée-ní sãhã-í naquete-n, chí naquete-n tnàhá ndaha-í ndíhi díquí-í —càchí-dé xáhaⁿ-dẽ xii-gá.

10 Te ní xáhaⁿ Jèsús xii-dé:

—Tée íchí ñí xichi chí xini ñuhu-xi sá sáhã-na-dẽ ndoo, te ducaⁿ te nduu ndoo-dé nihí-dé. Te nchòhó sa càndoo-ndo cuéi

ñá ncháá-ndó càndoo —cachí-gá xáhaⁿ-gã xii-dé.

11 Te ducaⁿ ñí cáháⁿ Jèsús chi sa nàha-gá sá ìⁿ cuè téé-áⁿ cuãha cuendá ñáhá-güedé xii-gá núú cuè téé cùu úhú iní ñáhá, xíáⁿ núu ní xáhaⁿ-gã sá ñà túú càndoo-güedé nchaa-güedé.

12 Te sátá ñí naquete-gá sáhá-güedé, te ní ndécúihnu-gá dóó-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã ñí quide ñaha-í xii-ndo-ãⁿ?

13 Te nchòhó váha-ni càháⁿ-ndó sã cùnùu-í, te dãnani ñaha tucu-ndo Mestrú xii-í, te ndáá càháⁿ-ndó.

14 Te núu yúhú cùu-í Mestrú, te cùu tucu-í téé cùnùu te nàquete-í sáhá-ndó, te ñu-ni ducaⁿ càda nchohó tucu naquete sáhá tnáhá-ndó.

15 Yúhú sànu ichi ñaha-í xii-ndo nàcuáa cada-ndo.

16 Te na càchí tnúhu ndáá-í xii-ndo sã ñí ìⁿ téé xínu cuechi ñá túú cùnùu-dé dàcúxí pàtróoⁿ-dè, te ñí ìⁿ téé xica chiuⁿ ñá túú cùnùu-dé dàcúxí tée tëndaha ñaha xii-dé cuáháⁿ-dé chiⁿ. Te ducaⁿ sãtnahá-xi cùu yúhú ndíhi nchòhó.

17 Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yã Ndiöxí xii-ndo.

18 'Yúhú, ñá túú càháⁿ-í cuendá-ndó nchaa-ndo, chi yúhú sa nàha-í nàcuáa sàni iní ìⁿ ìⁿ nchòhó cue téé ní nanducu ñihnu-í tnuú nchaa ñáyiu ñùhu ichi cuehé ichi duha ní cachí-í chitnahá ñáhá-ndó xii-í. Chi dacuítí sã quée ndáá-xi nàcuáa càháⁿ-xi núú tütú Yã Ndiöxí núú càchí-xi: “Tée xèxi ndíhi ñaha xii-í ngóo-dé cuu úhú iní ñáhá-dè”, duha càchí-xi núú tütú-gá.

19 Te cùmání-gã sáá nduu càda ñaha-dé sá sání iní-dé, núu xíáⁿ càchí tnúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cùu-í Crìstú Yaá ní tendaha Yã Ndiöxí véxi ñuyúú-a.

20 Te na càchí tnúhu ndáá-í xii-ndo sã nchaa ñáyiu na quèheⁿ cuendá ñáhá xii cue téé tendaha-í cáháⁿ tnúhu-í, te cada iní-yu sá tnáhá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tnáhá Tãtã-í Dútú Ndiöxí Yaá ní tendaha ñaha xii-í véxi-í ñuyúú-a

ní queheⁿ cuendá-yu —càchí-gá xáhaⁿ-gã xii-güedé.

Jèsús càchí-gá sá tẽ Jùdás cuáha cuendá ñáhá-dè xii-gá núú cuè téé cùu úhú iní ñáhá (Mt. 26:20-25; Mr. 14:17-21; Lc. 22:21-23)

21 Te sátá dúcáⁿ ñí cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã díú-ní ìⁿ nchohó cuáha cuendá ñáhá-ndó xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

22 Te ní ngüíta cue téé xica cuu ndíhi-gá ndéhé ìⁿ ndehe ìⁿ núú tnáhá-güedé, chi ñá ní cùnùní iní-güedé ndédacàa-güedé cuendá-güedé ní cáháⁿ-gá.

23 Te ìⁿ téé-áⁿ ío cùdí iní ñáhá Jèsús, te ndècu yatni-dé ñíhi-gá cùdini-dé ndíhi-gá.

24 Te té Xímú, àdi Pelú chi úu ñu-dé, ní quide-dé seña núú tée ndècu yatni ñíhi-gá-áⁿ sá càcáⁿ tnúhú-dè núú-gã núu ndédacàa-güedé cuendá-güedé ní cáháⁿ-gá.

25 Te téé-ãⁿ ní sáháⁿ ndehe yatni-gá-dé ñíhi Jesús, te ní xáhaⁿ-dè xii-gá:

—Mestrú, ¿ndédacàa-ndí cuendá-ndí ní cáháⁿ-n-í? —càchí-dé xáhaⁿ-dè xii-gá.

26 Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cùú-dè —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté.

27 Te òré ní queheⁿ-dé pàá, te ní ngúndecu ndíhi ñaha dùuⁿ-ná yucu ñávãha xii-dé. Te ní xáhaⁿ Jèsús:

—Sá ñí sani iní-n càda-n te cada ndíhi-ni-n —càchí-gá xáhaⁿ-gã xii-dé.

28 Te ñí ìⁿ cue téé cùdini ndíhi-gá ñá ní tècú tnùnigüedé nása ndùu tnúhu ní xáhaⁿ-gã xii té Jùdás.

29 Te dava-güedé ní sani iní-güedé sá sã cuendá sá ndécú ndíhi-dé sá ñúhú ñíhúⁿ, te váa ío ìⁿ sá cuááⁿ-dè nándíhi-güedé vico, àdi ñíhúⁿ cuáha-dé ñáyiu ndàhú xáhaⁿ-gã ní cáháⁿ-güedé.

30 Te sa ní cundiquíⁿ ní queheⁿ cuendá té Jùdás pàá caxi-dé, te òré ní níhi-dè pàá-áⁿ te ní quee-dé cuáháⁿ-dé.

Jèsús càchí tnúhu-gá nàcuáa cada-o

³¹ Te sáta ní quee té Jùdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndìhi nchaa ñáyiu sá ïo càhnu cuu yúhú Tée cùu ñaní tnáhá-ndó nchàa-ndo, te òrè-áⁿ cutnùnì iní-ndó sã ïo càhnu cuu tucu mee Yá Ndiöxí.

³² Te núu yúhú quidé càhnu-í Yá Ndiöxí, te ðiu-ni ducaⁿ càda cahnu ñaha-gá xii yúhú, te ñá túú-gã títí nduu te ducaⁿ càda-gá.

³³ Te nchòhó cue déhe-í na càchí tnúhu-í sá sácú duha-ná nduu ndècu ndìhi ñaha-í xii-ndo. Te nchòhó nanducu ñaha-ndo xii-í ðico vá ná ñihí ñáhá-ndó dàtná ní xáhaⁿ-í xii ñáyiu isràèl, te ðiu-ni ducaⁿ càháⁿ-í núu-ndó sã vã ndácú-ndó quíhíⁿ-ndó núu quíhíⁿ-í.

³⁴ Te duha sànu ichi ñaha tucu-í xii-ndo nàcuáa cada-ndo sã cúú ìní tnáhá-ndó ìⁿ ìⁿ-ndo datná yúhú cúú ìní ñáhà-í xii-ndo.

³⁵ Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùnì iní nchaa ñáyiu sá cúú-ndó cuè tée ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú vá nũnuu-dé sá xicá cùu ndìhi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úú ðiu-dé, xii Jèsús:

—Mèstrú, ¿ndèé quíhíⁿ-n-í? —càchí-dé xáhaⁿ-dẽ xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núu quíhíⁿ-í, ðico na sàá nduu te ðai sàá-n núu cùndècu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuendá núu vá ndácú-í canchicúⁿ ñáhà-í xii-n quíhíⁿ vitna-i? Chi yúhú ñá túú tnàhí yùhú-í cuèi na cùú-í sã cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sá xèhndé iní-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñá túú xìnì ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó núu ndécú Yá Ndiöxí

¹ Te ní xáhaⁿ-gã xii-güedé:

—Te ñá túú nã canì iní-ndó. Quindáá iní-ndó Yá Ndiöxí, te quindáá iní-ndó yùhú.

² Chi núu ndécú Tàtà-í ïo nùne núu cùndècu-o, chi núu ñáhá ñá te sa cachí tnúhu-í xii-ndo ñi cùu. Te vitna na nùhú-í te cada túha-í núu cùndècu-ndo.

³ Te dàtnùnì quixi tucu-í te candeca ñaha-í xii-ndo quíhíⁿ cuendá ìⁿ-ni xìchi cundecu-o.

⁴ Te sa nàha-ndo ndéé quíhíⁿ-í te sa xìnì-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túú xìnì-ndí ndèé quíhíⁿ-n te da ichi-ná quiní-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùú-í dàtná ìⁿ ichi te càháⁿ-í tnúhu ndáá, te yúhú cada-í te naníhí tǎhú-ndó. Te ìⁿ ði dǐ-ñi yúhú cada-í te sàá-ndó núu Yá Ndiöxí cundecu-ndo te núu na quindáá iní ñáhá-ndó xii-í.

⁷ Te núu ðicó cùtnùnì ndisa iní-ndó yòo cuu-í-áⁿ, ducaⁿ te cutnùnì iní-ndó yòo cuu Tàtà-í ní cùu. ðico vitna dàtná sá ñi xìnì núu-ndó Dútú Ndiöxí Yá cúú Tàtà-í cada iní-ndó, chi ní xìnì-ndó yùhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xìnì ñáhá-n xii-í? Te sa ní cuu vǎi nduu ndecu ndìhi ñaha-í xii-ndo, chi ñáyiu xìnì ñáhá xii-í te xìnì-yu tnáhá Tàtà-í. ¿Te ná cuendá yòhó càchí-n sã dánèhé ñáhà-í xii-ndo Tàtà-í?

¹⁰ ¿Náa ñá túú sàndáá iní-ndó sã yùhú ndécú-í ndìhi Tàtà-í? Te mee-gã ndécú ndìhi ñaha-gá xii-í. Te nchaa tnúhu càháⁿ-í núu-ndó ñá túú càháⁿ-í sá vèxi iní mée-í, chi Tàtà-í Yá ndécú ndìhi ñaha xii-í chindèè ñaha-gá quidé-í chiuⁿ-gá.

¹¹ Te quindáá iní-ndó sã yùhú ndécú-í ndìhi Tàtà-í, te ducaⁿ mée-gá ndécú ndìhi ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandàcu iní-ndó nchàa chiuⁿ ta quide-í véxi, te quindáá iní ñáhá-ndó.

12 Te na càchí tnúhu ndáá-í xii-ndo sã nchaa ñáyiú na quindáá iní ñáhá xii-í, te cadá-yu chiúⁿ quide-í te càhnu-gá chiúⁿ cadá-yu chi yúhú núhú-í núú ndécú Tàtá-í cundecu-í nàcuáa níhí ndéé-gã-yu cundecu-yu.

13 Te nchaa sá ná càcáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáyiú sá ïo càhnu cuu Tàtá-í Dútú Ndiöxí.

14 Te yúhú cada-í nchaa sá cuiní-ndó càcáⁿ táhú-ndó nüü-í, te núu na quindáá iní ñáhá ndisa-ndo xii-í.

Jèsús càchí-gá sá téndaha-gá Espiritú Yã Ndiöxí quixi cundecu ndihí-o

15 Te núu nchòhó cúú iní ñáhá-ndó xii-í te tníi-ndo nchaa tnúhu càháⁿ-í.

16 Te yúhú cacáⁿ táhú-í núú Tàtá-í sá téndaha-gá Espiritú-gá quixi cundecu ndihí-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhíⁿ.

17 Te nchaa ñáyiú ndècu ichi cuehé ichi duha ñá túú xini-yu Espiritú Yã Ndiöxí te ni vã cúú cundecu ndihí-yu. Dico nchòhó sa xini-ndó Espiritú-gá te ndècu ndihí ñaha-xi xii-ndo. Te sáá ìⁿ nduu te cunuu Espiritú-gá iní-ndó.

18 Te yúhú vá dáñá nihnu ñaha-í xii-ndo, chi quixi tucu-í cundecu ndihí ñaha-í xii-ndo.

19 Te sácú duha-ná nduu ndècu-í te vá quini ñáhá-gã ñáyiú xii-í, dico nchòhó chi quini ñáhá-ní-ndó xii-í. Te ducaⁿ-ni cundecu-ndo ichi váha chi cundecu ndihí ñaha-í xii-ndo ni caa ni quíhíⁿ.

20 Te dàvá-áⁿ cutnùní iní-ndó sã ndécú-í ndihí Tàtá-í, te ducaⁿ nchòhó cundecu ndihí ñaha-ni-ndo xii-í.

21 Te nchaa ñáyiú dàcuaha tnúhu-í te tníi-yu, ñáyiú-áⁿ quidé ndisá-yu sá cúú iní ñáhá-yu xii-í. Te ducaⁿ Tàtá-í cúú iní ñáhá-gã xii-yu, te ducaⁿ-ni yúhú cúú iní-í-yu tucu, te ducaⁿ te cutnùní iní-yu sá ndécú ndihí-í-yu —càchí-gá xáhaⁿ-gã xii-dé.

22 Te ní cáháⁿ ìⁿ téé nani Judás dico ñá díú té Jùdás déhe té Ximú Iscarioté ní cáháⁿ, chi ingá té Jùdás ní xáhaⁿ-dë xii-gá:

—Mèstrú, ¿nása cada-n cuendá cutnùní iní-ndí sá cundècu ndihí ñaha-n xii-ndí, te

ñáyiú ñùhu ichi cuehé ichi duha vá cundècu ndihí-n-yu-í? —càchí-dé xáhaⁿ-dë xii-gá.

23 Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tníi-yu tnúhu càháⁿ-í, te ñáyiú-áⁿ cúú iní ñáhá Tàtá-í xii-yu, te yúhú ndihí Tàtá-í ndécú-ndí ndihí-yu.

24 Te nchaa ñáyiú ñá túú cùu iní ñáhá xii-í te ñá túú tníi-yu tnúhu càháⁿ-í. Te nchaa tnúhu ní cáháⁿ-í ní xindèdóho-ndo chi Tàtá-í Yáa ní tendaha ñaha xii-í véxi-í ñuyúú-a ní dácáhú iní ñáhá-gã xii-í, te ñá díú mèe-í ní càhu iní-í tnúhu càháⁿ-í.

25 Duha nduu tnúhu càháⁿ-í núú-ndó vitna ndecu ndihí ñaha-gá-í xii-ndo.

26 Dico Yá Ndiöxí tendaha-gã Espiritú-gá quixi-xi cada-xi núú-í taxi-xi tnúhu ndee iní xii-ndo, te diu-xi chindee ñaha-xi xii-ndo te danèhé ñáhá-xi xii-ndo nchaa sá cúmání quini-ndó, te diu-ni-xi dandacu iní ñáhá-xi xii-ndo nchaa nacuáa ní cáháⁿ-í.

27 Te yúhú chindee chituu ñaha-í xii-ndo ïo váha cuu iní-ndó cundecu-ndo datná yúhú ïo váha cùu iní-í ndécú-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vá càdà-í datná quidé ñáyiú ñùhu ichi cuehé ichi duha. Te ni vã ndihú iní-ndó, te ni vã yúhú-ndó.

28 Te sa ní xindèdóho-ndo ní cáháⁿ-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tàtá-í, te cudíí iní-ndó ní cùu, chi ïo càhnu cuu-gá dàcúxí yúhú.

29 Te sa ní cachí tnúhu-í sá nùhú-í, te na sáá òré núhú-í núú ndécú Tàtá-í, te quindáá iní ñáhá-ndó xii-í.

30 Te ñá túú-gã vai tnúhu ndatnúhu ndihí ñaha-í xii-ndo chi sa véxi yucu ñávaha sá táxi tnùní ñuyúú-a, dico vá táxi tnùní ñáhá-xi xii yúhú.

31 Te cada-í nchaa nàcuáa ní táuchíúⁿ Tàtá-í cuendá cutnùní iní nchaa ñáyiú ñuyúú-a sá yúhú ïo cùu iní-í-gá. Te vitna chí ndácuíñí ná quíhíⁿ-ó —càchí-gá xáhaⁿ-gã xii-güedé.

15

Cuendá yoho yàha stilé ndihí nchaa dité-xi

1 Te ní xáhaⁿ tucu-gá xii-güedé:

—Yúhú cúu-í dàtná yoho yàha stilé, te Tàtá-í cúu-gã dàtná ìⁿ téé xìto yoho yaha stilé-áⁿ.

² Te nchaa ñáyíu ní sándáá iní ñáhá xii-í cúu-yu dàtná dité nchaa yoho yàha stilé-áⁿ. Te téé xìto yoho yaha stilé-áⁿ xèhndé-dé nchaa dité-xi sá ñã cuíní-gá-xi cuuⁿ ndéhé-xi, te ndàda ndoo-dé nchaa dité-xi sá cúuⁿ cuèndá cuuⁿ-gá.

³ Te ducaⁿ sãtnahá-xi cùu nchohó, chi sa ní xócuiñí nchaa sá cuèhé sá dúhá ndècu ndihí-ndo, chi ní sándáá iní-ndó tnúhu ní cáháⁿ-í.

⁴ Te cuu ìⁿnuu-ndo cùndecu ndihí ñaha-ndo xii-í, te núu ducaⁿ na càda-ndo, te cundecu ndihí ñaha-í xii-ndo. Chi núu ìⁿ yutnu vídí ná quèndéé dité-xi, te dité-xi sá ñã quèndéé-áⁿ vã cúuⁿ-gã sávidí-xi chi duuⁿ duuⁿ ní xíta-xi. Ducaⁿ sãtnahá-xi cùu nchohó chi vã ndácú-ndó càda-ndo chiuⁿ-í, te núu vã cùndècu ndihí ñaha-í xii-ndo.

⁵ 'Chi yúhú cúu-í dàtná yutnu vídí-áⁿ, te nchòhó cúu-ndó dàtná nchaa dité-xi. Te nchaa ñáyíu cùu ìⁿnuu ndihí ñaha xii-í, te ndècu ndihí-í-yu, te ndácú-yu quèdé-yu chiuⁿ-í. Te núu vã cúu ìⁿnuu ndihí ñahá-yu xii-í, te vã ndácú-yu cadá-yu chiuⁿ-í.

⁶ Te nchaa ñáyíu vã cúu ìⁿnuu ndihí ñaha xii-í, te yáha-yu dàtná yàha ìⁿ dité yutnu vídí sá ñã túú cùuⁿ sávidí-xi, chi xèhndé-güedé yìchí-xi, te sàhmi-güedé.

⁷ 'Cuu ìⁿnuu ndihí ñaha-ndo xii-í, te vã nácuaⁿna-ndo nacuáa ní cáháⁿ-í. Te núu ducaⁿ na càda-ndo, te nání cuíní-ndó cãcãⁿ-ndó nùu-í te taxi-í.

⁸ Te núu nchòhó ná cadá vãha-ndo cùndecu-ndo, te ío cada càhnu-ndo Tàtá-í, te ducaⁿ cùtnuní sá ndísá cùu-ndo cue téé ní chitnahá ñáhá xii-í.

⁹ Te yúhú ío cùu iní ñáhà-í xii-ndo dàtná cúu iní ñáhá Yã Ndióxi xii-í. Te cada-ni-ndo mèe-ni sá vãha cuèndá cudí^í iní ñáhá-gã-í xii-ndo.

¹⁰ Te núu na quèndáá iní-ndó càda-ndo nchaa nacuáa ní cáháⁿ-í, te ío cuu iní ñáhà-í xii-ndo, chi yúhú ducaⁿ ío sándáá iní-í Tàtá-í quèdè-í nchaa nacuáa ní cáháⁿ-gá, te xíãⁿ nùu ío cùu iní ñáhá-gã xii-í.

¹¹ 'Duha càháⁿ-í núu-ndó cuèndá cudí^í ndísa iní-ndó dàtná cudí^í iní mèe-í.

¹² Te duha ndùu tnúhu càháⁿ-í cuèndá sá cúu iní tnáhá-ndó ìⁿ ìⁿ-ndo datná cúu iní ñáhà-í xii-ndo.

¹³ Te núu ní xíhó sã cúu-xí ìⁿ téé ío vãha tnáhá tnúhu ndihí-o, te xíãⁿ cutnùní iní ñáyíu sá ío cùu iní-ó-dě.

¹⁴ Te nchòhó cuu-ndo cuè téé ío vãha tnáhá tnúhu ndihí-í te núu na càda-ndo nchaa nacuáa càháⁿ-í.

¹⁵ Te vã cùñaha-gã-í xii-ndo sã cúu-ndó cuè téé xìnu cuechi núu-í, chi ní ìⁿ téé xìnu cuechi ñã túú xìní-dé ná quèdé pàtróoⁿ-dě. Te yúhú càhí-í xii-ndo sã cúu-ndó cuè téé ío vãha tnáhá tnúhu ndihí-í, chi ní cachí tnúhu-í nchaa nacuáa ní cáháⁿ Tàtá-í.

¹⁶ Te ñã díu nchòhó ní càháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchìuⁿ-í quíhíⁿ-ndó càda-ndo nchaa nacuáa ní cáháⁿ-í, chi tnúhu-áⁿ vã ndihí ñihnu-xi. Te ducaⁿ nchàa sá ná càcãⁿ-ndó nùu Tàtá-í Yã Ndióxi te taxi-gá, te núu na quèndáá iní ñáhá-ndó xii-í.

¹⁷ Te yúhú càháⁿ-í dóho-ndo sã cúu iní tnáhá-ndó ìⁿ ìⁿ-ndo.

Ñáyíu ndècu ichi cuehé ichi duha cùu úhú iní-yu Jèsús ndihí nchaa ñáyíu sándáá iní tnúhu-gá

¹⁸ 'Te nchaa ñáyíu ndècu ichi cuehé ichi duha ñã cúu quíní ñáhã-yu xii-ndo, te sa nàha-ndo sá díhna-gá yúhú ní ngúita-yu ducaⁿ ñã cúu quíní ñáhã-yu xii-í.

¹⁹ Te núu dícó tnáhá nchòhó ndécú-ndó ichi cuehé ichi duha ñã, te cuu iní ñáhã-yu xii-ndo dàtná cúu iní tnáhã-yu ndi mèe-yu ni cùu. Te yúhú ní nanducu ñihnu ñaha-í xii-ndo tnùú ñáyíu ndècu ichi cuehé ichi duha, núu xíãⁿ ío cùu úhú iní ñáhã-yu xii-ndo cuèndá sá ñã túú-gã chítnáhá-ndó-yu.

²⁰ Te dandacu iní-ndó nacuáa ní cáháⁿ-í sá ní ìⁿ téé xìnu cuechi ñã túú cùnuu-dé dàcúxí pàtróoⁿ-dě. Te yúhú cúu úhú iní ñáhã-yu, te díu-ni ducaⁿ càda ñahá-yu xii nchòhó. Te núu dícó ní tní^í-yu tnúhu ní cáháⁿ-í ñã, te díu-ni ducaⁿ tní^í-yu tnúhu cáháⁿ-ndó nùu-yu ni cùu.

²¹ Te ducaⁿ càda ñahá-yu xii-ndo sã cuèndá-í, chi ñã xìní-yu Tàtá-í Yaá ní tendaha ñaha xii-í véxi-í ñuyíu-a.

²² 'Te vã vã cùndècu cuèchi-yu ni cùu, te núu ñã túú yúhú ní cáháⁿ-í nùu-yu, te vitna vã cúu tnáhí cachí-yu sá ñã túú cuèchi-yu.

²³ Chi nchaa ñáyíu cùu úhú iní ñáhá xii-í, te cùu úhú iní-yu tnáhá Tàtá-í.

24 Te váa ni ñⁿ cuéchi-yu vá cundècu ni cuu, te núu dícó ñá túú ní xìní-yu nchaa sá ñí quide-í sá vǎ yõo tnàhí ndàcu cada. Te cuéi ní xìní-yu dico dai cùu úhú iní ñáhǎ-yu xii-í ndihí Tǎtǎ-í.

25 Te duha quidé-yu chi dacuítí quèe ndáá-xi nàcuáa yòdo tnuní núú tütú Yǎ Ndiõxí sá dácuahǎ-yu, chi càchí-xi sá ñà túú nǎ cuéchi-í te cuu úhú iní ñáhǎ-yu xii-í.

26 'Te Espíritú Tǎtǎ-í Dútú Ndiõxí sá ndécú núú-gǎ tendaha-ǎ quixi chindee ñàha-xi xii-ndo, te canu ichi ñàha-xi nàcuáa cundecu-ndo, te Espíritú-áⁿ cǎháⁿ ndáá-xi cuendá cutnùní iní nchaa ñáyiu yoo cùu-í.

27 Te nchòhó tnàhá-ndó cǎháⁿ váha-ndo cuendá-í cuendá cutnùní iní-yu yoo cùu-í, chi ñàha-ndo sá ndèé òré ní ngüíta-í quidè-í chiùⁿ Tǎtǎ-í ní chitnahǎ ñáhǎ-ndó xii-í — càchí-gǎ xáhaⁿ-gǎ xii-güedé.

16

1 Te ní xáhaⁿ tùcu-gǎ xii-güedé:

—Duha càháⁿ-í cuendá ná nanchòcáva iní-ndó núhú-ndó ichi cuehé ichi duha.

2 Chi vá dáñǎ-gǎ-güedé quíhu-ndo vèñúhu, te ni vǎ cùú-gǎ quini ndéé ñáhǎ-güedé xii-ndo. Te sáá ñⁿ nduu te cahni ñàha-güedé xii-ndo, te xǎⁿ cuu cahaⁿ-güedé sá quidé-güedé chiùⁿ Yǎ Ndiõxí.

3 Te ducaⁿ càda-güedé chi ñá túú xìní-güedé Tǎtǎ-í, te ni ñà túú xìní ñáhǎ-güedé xii yúhú.

4 Te duha ndùu tnúhu càháⁿ-í núú-ndó, chi na sáá òré te ndacu iní-ndó nchàa tnúhu sá sà ní cachí tnúhu-í xii-ndo nàcuáa cada ñàha-güedé xii-í.

Nchaa chiùⁿ quide Espíritú Yǎ Ndiõxí

'Te ñá túú ní càchí tnúhu-í xii-ndo ndéé díhna chi ndècu ndihí ñàha-í xii-ndo.

5 Dico vitna sa ta cùyatni nduu núhú-í núú ndécú Tǎtǎ-í Yaá ní tendaha ñàha xii-í véxi-í ñuyú-a. Te ni ñⁿ nchòhó ñá túú xìcáⁿ tnúhú-ndó núu-í núu ndéé quíhíⁿ-í.

6 Chi mee-ni sǎ ndihú iní-ndó sǎ dúcáⁿ ní cǎháⁿ-í.

7 Te na càchí tnúhu ndáá-í xii-ndo sǎ váha-gǎ sá cùú-xí-ndó núu núhú-í, chi tendaha-ǎ Espíritú Yǎ Ndiõxí quixi cundecu ndihí-ndo chindee ñàha-xi, chi núu vá núhú-í te vá quíxí Espíritú-gǎ cundecu ndihí-ndo chindee ñàha-xi xii-ndo.

8 Te na quíxi Espíritú-gǎ te dandíxi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhǎ-xí sǎ ndécú ñⁿ ichi váha ichi ndáá. Te Espíritú-gǎ-áⁿ cada-xi nàcuáa cutnùní iní-yu sá Yǎ Ndiõxí cada ndáá-gǎ cuéchi-yu.

9 Te ducaⁿ te cutnùní iní-yu sá ndécú cuéchi-yu, chi ñá túú sàndáá iní ñáhǎ-yu xii-í.

10 Te ducaⁿ te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tǎtǎ-í, te nchòhó vá quini ñáhǎ-gǎ-ndó.

11 Te ducaⁿ te cutnùní iní-yu sá Yǎ Ndiõxí cada ndáá-gǎ cuéchi-yu, chi sa ní cǎháⁿ-gǎ sá yúcú ñávàha sá táxí tnùní ñuyú-a quíhíⁿ-xi núú ùhú núú ndàhú.

12 'Te vǎi-gǎ tnúhu ndècu cachí tnúhu-í xii-ndo, dico nchòhó chi vá cundèe iní-ndó cùndedóho-ndo nchàa vitna.

13 Te na quíxi Espíritú Yǎ Ndiõxí, Espíritú càháⁿ ndáá cuítí, te Espíritú-áⁿ danèhé ñáhǎ-xí nchàa tnúhu váha tnúhu ndáá. Te vá dacàhu iní ñáhǎ-xí xii-ndo sá véxi iní mée-xí chi dacàhu iní ñáhǎ-xí nchàa sá càháⁿ Yǎ Ndiõxí, te cachí tnúhu-xi nchaa nàcuáa cada-xi ndéé núú cuahǎⁿ núú véxi-gǎ.

14 Te Espíritú-gǎ-áⁿ cada càhnu ñàha-xi xii yúhú chi ndècu ndihí-xi tnúhu-í, te danèhé ñáhǎ-xí xii-ndo.

15 Te nchaa sá ndécú ndihí Tǎtǎ-í ndécú ndihí-í tnàhá-í, núu xǎⁿ càchí-í sá Espíritú-gǎ danèhé ñáhǎ-xí nchàa tnúhu-í xii-ndo.

Nchaa ñáyiu ndihú iní-xi nduu dǎí iní-yu na quíxi tucu Jesús

16 'Te ñⁿ úú-nǎ nduu ndècu-í te vá quini ñáhǎ-gǎ-ndó xii-í, dico núú sàcú-ni nduu te quini ñáhǎ tùcu-ndo xii-í, te ducaⁿ chi núhú-í núú ndécú Tǎtǎ-í —càchí-gǎ xáhaⁿ-gǎ xii-güedé.

17 Te sá dúcáⁿ ní cǎháⁿ-gǎ núu ní ngüíta ñⁿ úú cue téé xìca cuu ndihí-gǎ xitnàha-güedé:

—¿Nása ndùu-tu tnúhu càháⁿ-gǎ sá càchí-gǎ sá ñⁿ úú-nǎ nduu ndècu-gǎ te vá quini-gǎ-ó-gǎ, dico núú sàcú-ni nduu te quini tucu-o-gǎ-i?, chi núhú-gǎ núú ndécú Tǎtǎ-gǎ —càchí-güedé xitnàha-güedé.

18 Te xitnàha tucu-güedé:

—¿Nása cuáháⁿ-tu tnúhu-ǎⁿ sá sàcú-ni nduu? Te ñá tècú tnùnì-ó nása ndùu tnúhu càháⁿ-gá —càchì-güedé xitnàha-güedé.

19 Te Jèsús ní cutnùnì inì-gá sá cuinì-güedé cacaⁿ tnúhú-güedé núú-gá nása ndùu tnúhu ní càháⁿ-gá, núu ní xáhaⁿ-gá:

—Cuendá sá ñí cachì-í sá ñⁿ úú-nǎ nduu ndècu-í te vá quinì ñáhá-gǎ-ndó xii-í, dico núú sàcú-ni nduu te quinì ñáhá tùcu-ndo xii-í ní cachì-í, ¿xíⁿ ndúcú tnúhu núú tnáhá-ndó-ǎⁿ? —càchì-gá xáhaⁿ-gá xii-güedé.

20 Te ní xáhaⁿ tùcu-gá:

—Te na càchì tnúhu ndáá-í xii-ndo sá nchòhó ndìhú víhì inì-ndó te ndáhyú-ndó, dico nchaa ñáyiú ndècu ichi cuehé ichi duha chi da cudí inì-yu. Dico nchòhó ñáyiú ndáhyú chi sáá nduu te nduu dí inì-ndó.

21 Chi dàtná cuinì-ndó cùu ñⁿ ñadihí ñaha ní tnahá nduu cacu déhe-xi vai sani inì-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gǎ ndácú inì-aⁿ sá ñí quide úhú ñáhá-xí xii-aⁿ chi mee-nǎ sá cúdí inì-aⁿ déhe-aⁿ.

22 Ducaⁿ sätnahá-xi cùu nchòhó vitna chi ndìhú inì-ndó sá nùhú-í, dico quixi tucu-í quixi coto ñaha-í xii-ndo, te òré-áⁿ te cudí ndisa inì-ndó, te vá yòo ñⁿ-gá dandìhú inì ñáhá xii-ndo davá-áⁿ.

23 Te davá-áⁿ ñá túú-gǎ ná nducu tnúhu-ndo núú-í. Te na càchì tnúhu ndáá-í xii-ndo sá Tǎtà-í taxi-gá nchaa sá ná càcáⁿ-ndó núú-gǎ núu na quindáá inì ñáhá-ndó xii-í.

24 Te ndéé vitna vátá dúcáⁿ-gǎ cada-ndo càcáⁿ-ndó. Dico càcáⁿ-ndó núú-gǎ núu ná cuinì-ndó te taxi-gá cuendá cudí ndisa inì-ndó —càchì-gá xáhaⁿ-gǎ xii-güedé.

Xitohó Jesucristú ní cunuu tnúhu-gá núú yucu ñáváha

25 Te xáhaⁿ tùcu-gá xii-güedé:

—Mee-ni ñí chidáhu ndodo-í tnúhu ní càháⁿ-í núú-ndó, dico sáá nduu te vá chidáhu-gá-í tnúhu càháⁿ-í, chi càháⁿ ndáá-na-í cuendá Tǎtà-í.

26 Te davá-áⁿ càcáⁿ-ndó núú Tǎtà-í núu ná cuinì-ndó te taxi-gá, te núu na quindáá inì ñáhá-ndó xii yúhú Déhe-gá. Te ñá túú-gǎ xini ñuhu-xi sá yúhú càcáⁿ-í núú-gǎ cuendá-ndó chi càcáⁿ méé-nǎ-ndó.

27 Chi mee Tǎtà-í ío cùu inì ñáhá-gǎ xii-ndo cuendá cùu inì ñáhá-ndó xii-í, te sàndáá inì-ndó sá núú-gǎ ní quee-í véxi-í.

28 Te yúhú ní quee-í núú Tǎtà-í véxi-í ñuyú-a, te vitna dándóo-í ñuyú-a te nùhú-í núú ndécú-gǎ —càchì-gá xáhaⁿ-gǎ xii-güedé.

29 Te ní xáhaⁿ cuè téé xica cuu ndihì-gá:

—Vitna chi càháⁿ ndáá-nǎ-n, ñá túú-gǎ chidáhu-n tnúhu càhá-n.

30 Te vitna ní xini-ndí sá ío váha cùtnunì inì-n nchaa nacuaa cùu, te cùtnunì inì-n nchaa nacuaa sàni inì nchaa ñáyiú. Te ñá túú xini ñuhu-xi nágá nducu tnúhu-yu núú-n chi nchaa sa ní dátüu-n núu-yu. Te xíⁿ núu sàndáá inì-ndí sá núú Yǎ Ndiöxí ní quee-n véxi-n —càchì-güedé xáhaⁿ-güedé xii-gá.

31 Te ní xáhaⁿ Jèsús:

—¿Te vitna sàndáá inì-ndó-ǎⁿ?

32 Vitna ní sáá nduu ñí sáá òré sá ncháá nchòhó cuténuu-ndo càa ñⁿ caa úu cuu-ndo, te dándóo mee ñaha-ndo xii-í. Dico ñá díú mèe díi-í quendóo chi ndècu ndihì-í Tǎtà-í.

33 Duha càháⁿ-í cuendá cuu váha inì-ndó cùndecu-ndo, chi ñuyú-a cuu úhú inì ñáhá-yu xii-ndo, dico ni vá yúhú-ndó chi yúhú sa ní dáquéé tìhù-í nchaa sá cuehé sá dúhá ío ñuyú-a —càchì-gá xáhaⁿ-gǎ xii-güedé.

17

Jèsús xicáⁿ táhú-gǎ núú Tǎtà-gǎ Dútú Ndiöxí cuendá cue téé xica cuu ndihì-gá

1 Te sátá dúcáⁿ ñí càháⁿ Jèsús te ní nda-coto-gá andiu, te ní xáhaⁿ-gǎ xii Tǎtà-gǎ Dútú Ndiöxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n.

2 Chi mee-n ñí cachì-n sá táxi tnùnì-í nchaa ñáyiú ñuyú-a, te dàcacu nihnu-í nchaa ñáyiú ní cachì-n nàníhí tàhú.

3 Te cundecu ndihì-ö-yu ñí caa ñí quíhíⁿ, chi sàndáá inì ñáhá-yu sá ñⁿ dìi díi-ni yòhó cùu-n Ndiöxí ndisa, te ducaⁿ xini ñáhá-yu xii yúhú Jesucristú téé ní tendaha-n véxi ñuyú-a.

4 Te yúhú ní chiñuhu ñaha-í xii-n ñuyú-a, te ní xinu chùⁿ ní cachì-n càda-í.

5 Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu

ñaha-n xii-í ndéé cútnàhá vátá ngáva-gá ñuyíú.

6 Te nchaa ñáyíu ní nanducu ñihnu-n tnuú nchaa ñáyíu ndècu ichi cuehé ichi duha, ní taxi cuèndá-n-yu, te ní xáhaⁿ-í xii-yu yoo cùu-n. Te cuèndá-n cùú-yu, te ní taxi cuèndá-n-yu, te ní sándáá iní-yu tnúhu-n.

7 Te vitna ní cutnùní iní-yu sá ncháá tñúhu ndècu ndihí-í ñiú-ni mee-n ñí taxi-n.

8 Te ní dánèhé-í-yu nchaa tnúhu sá ñí dánèhé ñáhá-n xii-í, te ní sándáá iní-yu. Te ní cutnùní iní-yu sá nñú-n ñí queue-í véxi-í, te ní sándáá iní-yu sá yòhó ní tendaha ñàha-n xii-í véxi-í ñuyíú-a.

9 Te yúhú càháⁿ ndàhú-í núú-n cuèndá nchaa ñáyíu ní taxi cuèndá-n. Te ñá túú càháⁿ ndàhú-í núú-n cuèndá ñáyíu ndècu ichi cuehé ichi duha, chi cuèndá nchaa ñáyíu ní taxi cuèndá-n càháⁿ-í, chi cuèndá-n cùú-yu.

10 Te nchaa sá cúú cuèndá-í cúú-xí cuèndá-n, te nchaa sá cúú cuèndá-n cùu-xí cuèndá-í tnàhá-í. Te xíquide càhnu ñahá-yu xii-í.

11 Te yúhú vá cúndècu-gá-í ñuyíú-a, dico mèé-yu chi cundecu-ní-yu, te yúhú ndixi-í núú ndécú-n. Táu, yòhó ío yíñùhu ndecu-n, te yúhú càháⁿ ndàhú-í núú-n sá ní yùhu ní iní-n còto-n nchaa ñáyíu ní taxi cuèndá-n, ñáyíu ní sándáá iní tnúhu-í cuèndá sá ñíⁿ-ní ìchi cuú-yu cundecú-yu dàtná ñíⁿ-ni cùu nchoo.

12 Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ní ñíⁿ-yu ñá túú ní xíta nihnu, chi ñíⁿ-ni té Jùdás ní xíta nihnu tnàhí-dé, te ducaⁿ ñí cuu cuèndá sá ñí queue ndáá-xí nàcuáa yòdo tnuní núú tütú-n.

13 Te vitna sa ndixi-í núú ndécú-n, dico ñini ndècu-gá-í ñuyíú-a duha càháⁿ-í cuèndá sá cúú iní-yu dàtná cúú iní mèé-í.

14 Te yúhú ní dánèhé-í-yu tnúhu-n, dico nchaa ñáyíu ndècu ichi cuehé ichi duha cùu úhú iní ñáhá-yu xii-yu cuèndá sá ñá túú-gá ndécú-yu ichi cuehé ichi duha-áⁿ dàtná yúhú ñá túú ndècu-í ichi-áⁿ.

15 Te ñá túú càchí-í sá xócàní-n-yu ñuyíú-a, dico càháⁿ ndàhú-í núú-n sá dácácu ñihnú-n-yu núú yucu ñávàha.

16 Te yúhú ñá túú ndècu-í ichi cuehé ichi duha, te ducaⁿ mèé-yu ñá túú-gá ndécú-yu ichi cuehé ichi duha.

17 Te ío na cùndecu yíhi ñihu-gá-yu núú-n dàcuahá-yu tnúhu-n, chi cùu-xí ñíⁿ tnúhu ndáá.

18 Te dàtná ní tendaha ñàha-n xii yúhú véxi-í tnuú nchaa ñáyíu ndècu ichi cuehé ichi duha, ducaⁿ càda-í tendaha-í-yu quíhíⁿ-yu càháⁿ-yu tnúhu-í tnuú nchaa ñáyíu ndècu ichi cuehé ichi duha.

19 Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sá cuèndá-yu, te ducaⁿ te cundecu yíñuhú-yu núú-n dàcuahá-yu tnúhu-n.

20 Te ñá díú cuèndá mee-ni ñáyíu sa ní sándáá iní-xí càháⁿ ndàhú-í núú-n, chi tnàhá cuèndá nchaa ñáyíu na quèndáá iní ñáhá xii-í ndéé ìdá-gá ñúu na cùndedóho-yu tnúhu càháⁿ ñáyíu na tendaha-í.

21 Te xicáⁿ táhú-í núú-n sá ncháá-yu ñíⁿ-ná ichi na cùú-yu, te ñíⁿ-ná caní iní ndihí ñahá-yu xii-o dàtná cúú nchòo ñíⁿ-ni cuu-o. Te ducaⁿ ñíⁿ-ná cuu-o ndihí-yu cuèndá sá ná quèndáá iní nchaa ñáyíu ndècu ichi cuehé ichi duha sá díú-n ñí tendaha ñàha-n xii-í véxi-í ñuyíú-a.

22 Te nchaa sá vàha ní taxi-n ndècu ndihí-í ní dánèhé-í-yu cuèndá sá ñíⁿ-ná cuú-yu cundecú-yu dàtná ndécú nchòo.

23 Te yúhú cundecu ndihí-í-yu, te yòhó cundecu ndihí ñaha-n xii yúhú cuèndá ñíⁿ-ná cuu ndisá-yu cundecú-yu. Te ducaⁿ te cutnùní iní nchaa ñáyíu ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúú iní ñáhá-n xii yúhú.

24 Táu, mee-n ñí taxi cuèndá-n-yu, te cuíní-í sá cúndécú-yu núú cúndècu-í cuèndá quíní-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndéé cútnàhá vátá ngáva-gá ñuyíú.

25 Táu, yòhó ío yíñùhu ndecu-n. Te ñáyíu ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyíu ní sándáá iní ñáhá xii-í sa xini-yu sá díú-n ñí tendaha ñàha-n xii-í véxi-í ñuyíú-a.

26 Te sa xáhaⁿ-í xii-yu yoo cùu-n, te ñiú-ni ducaⁿ càda-í cuèndá cuu iní tnàhá-yu dàtná

cúu iní ñáhá-n xii-í, te ducaⁿ cùndecu-í ndihí-yu —càchí-gá xáhaⁿ-gã xii Tătá-gã Dútú Ndiõxí.

18

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñí cáháⁿ Jèsús, te ní quee-gá ndihí cue tée xica cuu ndihí-gá cuáháⁿ-güedé ndàa ingá xio yuhu yùú Cèdrón. Te yacáⁿ cáá ñiⁿ lahuertá, te xití lahuertá-áⁿ cuãnguihu Jèsús ndihí cue tée xica cuu ndihí-gá.

² Te té Jùdás déhe té Xímú Iscarioté tée ní sáha cuendá ñáhá xii-gá núú cuè tée cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihí-güedé xiáⁿ.

³ Núu ndáá ichi xiáⁿ ñí sáá té Jùdás ndihí vai sandadú, ndihí cue tée quide cuendá veñúhu ní techiúⁿ ñaha cue dútú cùnùu, ndihí cue tée cùu fariséú. Te xínehe-güedé machití ndihí ñiⁿ úú-gá sá dééⁿ, te yòtnuú-güedé lintéⁿá ndihí iti ní sáá.

⁴ Te Jèsús sa ñaha-gá nchaa nàcuáa cada ñaha-güedé xii-gá núu ní sáháⁿ tuha ñaha-gã xii-güedé, te ní xáhaⁿ-gã:

—¿Yoo nànducu-ndo? —cachí-gá xáhaⁿ-gã xii-güedé.

⁵ Te ní xáhaⁿ-güedé:

—Jèsús tée ñuú Nazàrét nánducu-ndí —càchí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nánducu-ndo —cachí-gá xáhaⁿ-gã xii-güedé.

Te tñhá té Jùdás tée ní sáha cuendá ñáhá xii-gá ndihí-güedé.

⁶ Te òré ní xáhaⁿ Jèsús sá díú-gã cúu tée nànducu-güedé, te ní nacaca dùma-güedé te ní nduá-güedé ndéé ñuhu.

⁷ Te ní xicáⁿ tñuhú tùcu Jesús núu-güedé yoo nànducu-güedé. Te ní xáhaⁿ tùcu-güedé sá Jèsús tée ñuú Nazàrét nánducu-güedé,

⁸ núu ní xáhaⁿ-ñá Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nánducu-ndo, te dañá-ndo nchaa cue tée iha na nùhú-güedé —càchí-gá xáhaⁿ-gã xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ññyiu ní sáha cuendá ñáhá Yã Ndiõxí cundecu ndihí-gá vá cuíta nihnú-yu.

¹⁰ Te té Xímú, àdi Pelú chi úú diu-dé, néhé-dé ñiⁿ machití, te ní tava-dé machití-áⁿ ññ-xi te ní xehndé-dé lóho xio cùha ñiⁿ téé nàni Malcú ní quèndéé duuⁿ. Te téé-áⁿ xínú cuèchi-dé núú dútú cùnùu-gá.

¹¹ Te ní xáhaⁿ Jèsús xii té Pèlú:

—Nataxúha machití-áⁿ núú ññhú-xí, chi dacutíí sã ndóhò-í nàcuáa ní cachí Tătá-í cunduu —càchí-gá xáhaⁿ-gã xii-dé.

Jèsús ndécú-gã núú dútú cùnùu-gá

(Mt. 26:57-58; Mr. 14:53-54; Lc. 22:54)

¹² Te cue sandadú ndihí cue tée cùnùu-gá núú-güedé, ndihí cue tée quide cuendá veñúhu ní tñi-güedé Jèsús, te ní dácútú ñaha-güedé.

¹³ Te ndéca ñaha-güedé xii-gá cuáháⁿ núú ndécú tã Ànás, te té Ànás-áⁿ cúu-dé tătá ñadihí té Caifás. Te té Caifás-áⁿ ñí cuu-dé dútú cùnùu-gá cuíá-áⁿ.

¹⁴ Te diu-ni téé-áⁿ ñí xáhaⁿ-dè xii ññyiu isràél sá vãha-gá sá ñiⁿ-ní tée na cùu-dé sá cuendá-yu nchaá-yu.

Té Pèlú càháⁿ-dé núú ññyiu sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pèlú, àdi Xímú chi úú diu-dé, ndihí ingá tucu-dé nàcuáa xica cuu ndihí-güedé Jèsús nchicúⁿ ñáhá-güedé xii-gá cuáháⁿ. Te ñiⁿ téé-áⁿ xini tñáhá-dé ndihí dútú cùnùu-áⁿ núu nchicúⁿ-dé tñáhá-dé Jèsús cuãnguihu ndéé núú cáá vèhe téé cùnùu-áⁿ.

¹⁶ Dico té Pèlú ní ndóo-dé yuyèhe ndaa quehé, núu ní ndee téé ndihí té Pèlú-áⁿ ñí cáháⁿ ndihí-dé ñaha ndéé yuyèhe, te ndéca-dé té Pèlú cuãnguihu.

¹⁷ Te ní xáhaⁿ ñaha ndéé yuyèhe-áⁿ xii té Pèlú:

—¿Náa ñá díú yòhó tñáhá-n xica cuu ndihí-n téé ndéca-güedé cuãnguihu-a? —càchí-aⁿ xáhaⁿ-aⁿ xii-dé.

Te ní xáhaⁿ tã Pèlú:

—Ñáhá, ñá túú tée-áⁿ xicá cùu ndihí-ú —càchí-dé xáhaⁿ-dè xii-aⁿ.

¹⁸ Te ío víxiⁿ quide-xi núu cue téé xinu cuechi, ndihí cue téé quide cuendá

veñúhu ní dátñhá-güedé ñuhú, te xínutñí teté-güedé ndihí té Pèlú.

Dútú cúnúu nducu tnúhu-dé núú Jèsús

(Mt. 26:59-66; Mr. 14:55-64; Lc. 22:66-71)

19 Te dútú cúnúu ní xícáⁿ tnúhú-dé núú Jèsús nūu nándi cūu cue téé xica cuu ndihí-gá, te nándi sá dánèhé ñáhá-gá xii-güedé.

20 Te ní xáhaⁿ-gá:

—Yúhú càháⁿ ndodo-í núú nchàa ñáyiu cuéi xití veñúhu càhnu sá ïo cūnuu, te cuéi xití nchaa dava-gá veñúhu núú tàcá nchaa ñáyiu isràél ducaⁿ-ni dānehé-í-yu, te ñá túú dāyuhu cáháⁿ-í.

21 Núu vá càcáⁿ tnúhú-n nūú-í. Càcáⁿ tnúhú nūú nchàa ñáyiu sácúndedóho tnúhu càháⁿ-í, te na càháⁿ-yu núu nása ndūu tnúhu càháⁿ-í chi xíní-yu —càchí-gá xáhaⁿ-gá xii-dé.

22 Te sá dúcáⁿ ñí càháⁿ Jèsús nūu ïⁿ téé quide cuendá veñúhu nūtní-dé tnàhá-dé te ní cani-dé ïⁿ déhndé nūú-gá. Te ní xáhaⁿ-dè:

—¿Ná cuendá ducaⁿ càháⁿ-n nūú dūtú cúnúu-í? —cachí-dé xāhaⁿ-dè xii-gá.

23 Te ní xáhaⁿ Jèsús xii-dé:

—Te núu nèhé ní càháⁿ-í te càháⁿ-n nása ndūu tnúhu ní càháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gá xii-dé.

24 Te ndūtu yoho-ni Jèsús ní dánùhú ñáhá tē Ànás xii-gá ndaha té Caifás dūtú cúnúu-gá.

Té Pèlú càháⁿ tucu-dé núú ñáyiu sá ñà túú xíní-dé Jèsús

(Mt. 26:71-75; Mr. 14:69-72; Lc. 22:58-62)

25 Te té Pèlú nūtní teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xícá cūu ndihí téé ndèca-ndí véxi-āⁿ? —càchí-güedé xāhaⁿ-güedé xii-dé.

Te ní xáhaⁿ tē Pèlú:

—Ñáhá, ñá túú tēe-áⁿ xícá cūu ndihí-ú —càchí-dé xāhaⁿ-dè xii-güedé.

26 Te ïⁿ ñaní tnàhá tēe ní xehndé té Pèlú lóho-xi-áⁿ xínú cuèchi-dé tnàhá-dé núú dūtú cúnúu. Te tée-áⁿ ñí xáhaⁿ-dè xii té Pèlú:

—¿Náa ñá díú tnàhá-n ndihí-n-dé ní xíní ñáhá-í òré ní tñí-ndí-dé xití lahuertá? —càchí-dé xāhaⁿ-dè xii-dé.

27 Te té Pèlú ní xáhaⁿ tūcu-dé sá ñà díú-dè, te òré-áⁿ ñí cana ïⁿ líhi.

Jèsús ndécú-gá núú tē Pilatú

(Mt. 27:1-2, 11-14; Mr. 15:1-5; Lc. 23:1-5)

28 Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiūⁿ téé cūu gobiernú. Te sa ta cùditó-ni-gá cuáháⁿ nūu ñá ní cuíní cue téé isràél quíhu-güedé xití vechiūⁿ téé cūu gobiernú-áⁿ. Te núu ñí quíhu-güedé vechiūⁿ-áⁿ ñá, te vá cúú-gá quíhu-güedé cudini-güedé vico pāscuá ní cūu chi ducaⁿ tnàhí quide-güedé.

29 Núu té Pilatú téé cūu gobiernú ní quee-dé vechiūⁿ-dé ní càháⁿ ndihí ñaha-dè xii-güedé, te ní xáhaⁿ-dè:

—¿Ná cuèchi ní quide téé-a núu ndèca-ndo-dé véxi? —càchí-dé xāhaⁿ-dè xii-güedé.

30 Te ní xáhaⁿ-güedé:

—Te núu dícó ñá túú cuèchi-dé-áⁿ te vá cāndèca-ndí-dé quixi núú-n ní cūu —cachí-güedé xāhaⁿ-güedé xii-dé.

31 Te ní xáhaⁿ tūcu té Pilatú xii-güedé:

—Chí cāndèca-dé cuánùhú, te cada ndáá-ndó cuèchi-dé nācuáa càa leí méé-ndó —càchí-dé xāhaⁿ-dè xii-güedé.

Te ní xáhaⁿ-güedé:

—Dico nchúhú ñáyiu isràél chi ñá túú dùcaⁿ taxi tñuní leí sá cáhni-ndí —càchí-güedé xāhaⁿ-güedé xii-dé.

32 Te ducaⁿ ñí cuu chi dacuití ñí quee ndáá-xi nācuáa ní càháⁿ méé Jèsús cada-xi cuú-gá.

33 Te cuándihu té Pilatú vechiūⁿ-dé, te ní cana-dé Jèsús ní xícáⁿ tnúhú-dè núú-gá, te xāhaⁿ-dè:

—¿Yòhó yíndàha-n ñáyiu isràél-āⁿ? —càchí-dé xāhaⁿ-dè xii-gá.

34 Te ní xáhaⁿ Jèsús:

—¿Te xíāⁿ càháⁿ-n sá véxi iní méé-n, àdi ío ïⁿ ñáyiu ní cachí tnúhu xii-n cuendá-í? —càchí-gá xáhaⁿ-gá xii-dé.

35 Te ní xáhaⁿ tē Pilatú xii-gá:

—Ñá díú tēe isràél cūu-í nūu ducaⁿ càháⁿ-n, chi cue ñaní tnàhá-n cuè téé isràél ndihí cue dūtú cúnúu ní taxi cuendá ñáhá-güedé xii-n ìha. ¿Te ná ní quide-n? —càchí-dé xāhaⁿ-dè xii-gá.

36 Te ní xáhaⁿ Jèsús:

—Ñá díú tē ñuyú-a cùu-í te ni ñà túú vëxi-í taxi tnùn-í ñuyú-a, chi núu dícó iha tàxi tnùn-í áⁿ te cue tēe xica cuu ndih-í nàá-güedé ndih-í cue tēe israhél cuendá sá vã tní ñaha-güedé xii-í ní cùu, dico ñá túú vëxi-í sá táxi tnùn-í ñuyú-a —càchí-gá xáhaⁿ-gã xii-dé.

³⁷ Te ní xáhaⁿ tē Pilatú:

—¿Te tēe yìndaha ñáyiú cùu-ó vání? —
càchí-dé xáhaⁿ-dë xii-gá.

Te ní xáhaⁿ Jèsús:

—Te dàtná càchí-n-ãⁿ yìndaha ndisa-í ñáyiú, chi yúhú véxi-í ñuyú-a te iha ní cacu-í te càháⁿ-í mee-ni tnúhu ndáá. Te nchaa ñáyiú na cùdí iní-xi tnúhu ndáá, te tedóho-yu nchaa tnúhu càháⁿ-í —càchí-gá xáhaⁿ-gã xii-dé.

³⁸ Te ní xáhaⁿ tē Pilatú:

—¿Te ná cúu-tu tnúhu ndáá-áiⁿ? —
càchí-dé xáhaⁿ-dë xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicáⁿ tnúhú tē Pilatú núu Jèsús, te ní quee tucu-dé quehé, te xáhaⁿ-dë xii cue tēe israhél:

—Ñá túú ñá cuéchi tēe-a.

³⁹ Te váha-ni chi ducaⁿ tnàhí quide nchóhó sá ndì tnahá nduu vico pascuá cuiní-ndó sã dácacu-í ñⁿ tēe yìhi vecaá. Te núu cuiní-ndó te na dàcacu-í tēe yìndaha ñaha xii-ndo —càchí-dé xáhaⁿ-dë xii-güedé.

⁴⁰ Te sá dúcáⁿ ñí cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácacu-n tēe-áⁿ, té Barrábás dácacu-n! —càchí-güedé xáhaⁿ-güedé xii-dé.

Te té Barrábás-áⁿ ñí cuu-dé ñⁿ ñadúhú.

19

¹ Te té Pilatú ní táuchíúⁿ-dë ní tní ñaha cué sandadú xii Jèsús, te ní caniha-güedé xii-gá ndih-í ñí.

² Te diu-ni cue tēe-áⁿ ñí cadúha-güedé ñⁿ coroná iñu ní chihi-güedé díquí-gã, te ní dáquí nuu ñaha-güedé xii-gá ñⁿ dóo tícuèhé víhí.

³ Te ní sáháⁿ ndehe yatni-gá-güedé núu-gã, te ní xáhaⁿ-güedé:

—¡Jo càhnu cuu yohó tēe yìndaha ñaha xii ñáyiú israhél! —càchí-güedé xáhaⁿ-güedé cúdíquí ndeé ñáhá-güedé xii-gá.

Te ní cani-güedé déhndé núu-gã.

⁴ Te ní quee tucu tē Pilatú quehé te ní xáhaⁿ-dë xii nchaa ñáyiú xìndecu quehé:

—Te cundehe-ndo-dë ná ndeé ñùhu-í-dé iha, chi yúhú sáha-í cuendá sá ñà túú cuéchi-dé —càchí-dé xáhaⁿ-dë xii-yu.

⁵ Te ní ndeñuhu ñaha tē Pilatú xii Jèsús xití vechiúⁿ-dé te ñùhu ñⁿ coroná iñu díquí-gã, te ñihnu-gá dóo tícuèhé víhí-ãⁿ. Te ní xáhaⁿ tē Pilatú xii-yu:

—¡Nái-dé-a! —càchí-dé xáhaⁿ-dë xii-yu.

⁶ Te ní xiní ñáhá cué dútú cùnùu ndih-í cue tēe quide cuendá veñuhu. Te ní cuáá-güedé, te xáhaⁿ-güedé:

—¡Cata caa-dé! ¡Cata caa-dé núu cùrúxí! —
càchí-güedé xáhaⁿ-güedé xii-dé.

Te ní xáhaⁿ tē Pilatú:

—Váha-gá núu candeca mee-ndo-dë quíhíⁿ cata caa-ndo-dë núu cùrúxí, chi yúhú cútnúni iní-í sá ñà túú na cuéchi-dé —càchí-dé xáhaⁿ-dë xii-güedé.

⁷ Te ní xáhaⁿ cué tēe israhél:

—Léi ndécú ndih-í nchúhú càchí-xi sá dàí cuú-dé, chi càchí-dé sá Dëhe Yá Ndiöxi cúu-dé —càchí-güedé xáhaⁿ-güedé xii-dé.

⁸ Te sá dúcáⁿ ñí xáhaⁿ-güedé xii tē Pilatú, te vaa-gá ní yúhú-dé.

⁹ Núu cuándihu tucu-dé vechiúⁿ-dé, te ní xáhaⁿ tucu-dé xii Jèsús:

—¿Te yòhó ndeé tēe cùu-n-i? —càchí-dé xáhaⁿ-dë xii-gá.

Dico Jèsús ñá túú ní cáháⁿ-gá.

¹⁰ Núu ní xáhaⁿ tē Pilatú xii-gá:

—¿Te vá càchí tnúhu-n núu ndeé tēe cùu-n-u? ¡Náa ñá túú xiní-n sã yúhú táxi tnùn-í, te cuu-ni tauchiúⁿ-í cata caa ñaha-güedé xii-n núu cùrúxí cuú-n, te cuu-ni dácacu ñaha-í xii-n-ãⁿ? —càchí-dé xáhaⁿ-dë xii-gá.

¹¹ Te ní xáhaⁿ Jèsús:

—Yòhó ñá túú sã táxi tnùn-í ñáhá-n xii yúhú ní cùu núu ñá túú Yá Ndiöxi ní cuiní-gá sá dúcáⁿ cùnduu, te tēe ní taxi cuendá ñáhá xii-í núu-n tēe-áⁿ ño-gá ndecuéchi-dé dácúxí yòhó —càchí-gá xáhaⁿ-gã xii-dé.

¹² Te òré-áⁿ ñí ngüita tē Pilatú ndúcú-dë nàcuáa cada-dé dácacu-dé Jèsús ní cùu,

dico cue tée isràel ní ngüíta-güedé ní cuáá-güedé, te xáhaⁿ-güedé:

—Te núu na dàcácu-n tée-áⁿ, te ñá díú tée tnàhá tnúhu ndihí té Cèsár cúú-n. Chi ndèda-ni càa tée na càchí sá cúú-dé tée yìndaha ñaha xii ñáyiú cùu úhú iní-dé té Cèsár. Te té Jèsús-áⁿ càchí-dé sá táxí tnùnì-dé —càchí-güedé xáhaⁿ-güedé xii-dé.

13 Te sá dúcáⁿ ñí xáhaⁿ-güedé xii té Pilatú núu ní quee-dé ndihí Jèsús cuáháⁿ ndihí ñaha-dé corrèdór núu ñí quee mee-ni yúú vâha núu ñúhú, te xiáⁿ nání-xí Găbatá tnúhu hēbreú. Te xiáⁿ ndécú xilè sácõo nchihi té Pilatú xēhdé-dé cuéchi ñáyiú, núu ní nucóo-dé núu xilè-dé òré ní quexiò-dé ndihí Jèsús.

14 Te cùu-xi datná cuádava nduu, nduu vîspré vico pàscuá. Te ní xáhaⁿ tē Pilatú xii ñáyiú isràel:

—¡Nái tée yìndaha ñaha xii-ndo-a! —cachí-dé xáhaⁿ-dē xii-yu.

15 Te ní cuáá-yu, te xáhãⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xáhãⁿ-yu.

Te ní xáhaⁿ tē Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xáhaⁿ-dē xií-yu.

Te cue dútú cúnùu ní xáhaⁿ-güedé:

—Nchúhú ñá túú-gă tée yìndaha ñaha xii-ndí, chi ñⁿdìi-ni té Cèsár yìndaha ñaha-dé xii-ndí —càchí-güedé xáhaⁿ-güedé xii-dé.

16 Te té Pilatú ní xáhaⁿ-dē ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sàta caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gă cùrúxí cuáháⁿ ñⁿ xichi núu nání Yìqui Díqui Ndÿyí. Te tnúhu hēbreú queé-xí Gōlgotá.

18 Te yàcáⁿ ní sata caa ñaha-güedé xii-gá núu cùrúxí-áⁿ. Te xio xio dñi-gá ní sata caa-güedé úu cue tée ndècu ndisa cuéchi-xi dñi-ni núu cùrúxí tucu.

19 Te ní táuchíúⁿ tē Pilatú ní taxi ndecu-güedé ñⁿ sá ndèè lètrá núu cùrúxí tá càa-gá, te duha càchí lètrá-áⁿ: “Jèsús tée ñuú Nazàrét, tée yìndaha ñaha xii ñáyiú isràel”, duha càchí-xi.

20 Te vâi ñáyiú isràel ní xiní-yu nàcuáa càháⁿ lètrá-áⁿ, chi yatni-ni yuhu ñuú ní sata caa ñaha-güedé xii-gá núu cùrúxí. Te lètrá-áⁿ càháⁿ-xi tnúhu hēbreú, te càháⁿ-xi tnúhu griégú, te càháⁿ-xi tnúhu làtín.

21 Te ní xáhaⁿ cuè dútú cúnùu xii té Pilatú:

—Vá táuchíuⁿ-n tee-güedé lètrá càháⁿ-xi “Tée yìndaha ñaha xii ñáyiú isràel” ní cùu, váha-gá tauchíuⁿ-n tee-güedé lètrá càháⁿ-xi “Tée càchí yìndaha ñaha xii ñáyiú isràel ní cùu” —cachí-güedé xáhaⁿ-güedé xii-dé.

22 Te ní xáhaⁿ tē Pilatú:

—Nàcuáa ní táuchíúⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

23 Te sátá ñí sata caa ñaha cuè sandadú xii Jèsús núu cùrúxí, te cùmí xichi ní quide-güedé dóó-gă, te ñⁿ ñⁿ xichi dóó-gă ní càhñu cue sandadú-áⁿ. Te ndècu ñⁿ dóó-gă dóó cání ñà túú ní tñcu.

24 Te cuèndá dóó-ăⁿ ñí xítñaha cue sandadú-áⁿ:

—Vá ndátá-ó dđó-a, váha-gá núu na còto ndéé-ó cuèndá quini-ó ndédacàa-o cuu cuèndá-ó —càchí-güedé xítñaha-güedé.

Te ducaⁿ ñí quide-güedé chi ní quee ndáá-xi nàcuáa càháⁿ-xi núu tütú Yă Ndiõxí núu càchí-xi: “Títñí xichi ní càhñu-güedé dóò-í. Te ní xito ndéé-güedé cuèndá cutnùnì iní-güedé ndédacàa-güedé níhí-güedé dóò-í”, duha càchí-xi núu tütú-gá. Te sá dúcáⁿ càháⁿ-xi núu tütú Yă Ndiõxí núu xiãⁿ ducaⁿ ñí quide cue sandadú-áⁿ.

25 Te yatni dñi curúxí núu tácaà Jesús nùtnñí năná-gă, ndihí cùhú-xi, ndihí tá Màriá ñadihí té Clèofás, ndihí tá Màriá Magdalèná.

26 Te ní xiní Jèsús năná-gă nùtnñí-aⁿ dñi ñⁿ tée ní xica cuu ndihí-gá, tée ío cùu iní-gá, te ní xáhaⁿ-gă xii năná-gă:

—Năá, tée nùtnñí-áⁿ nduu-dé dàtná déhe mee-n —càchí-gá xáhaⁿ-gă xii-aⁿ.

27 Te ní xáhaⁿ-gă xii tée ní xica cuu ndihí-gá-áⁿ:

—Ñaha-áⁿ nduu-aⁿ dàtná năná mée-n —càchí-gá xáhaⁿ-gă xii-dé.

Núu ndéé dàvá-áⁿ ñí nduu năná ñahá tē-áⁿ xii năná-gă.

Ní xíhí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá nǐ ndíhi chùuⁿ ní táhú Tàtá-gǎ Dútú Ndiöxí ní quide-gá nǔu ní cachí-gá:

—Yìchí-í ndute —càchí-gá.

Te duha ní cáháⁿ-gá chi ní quee ndáá-xi nàcuáa càháⁿ-xi núú tütú Yǎ Ndiöxí.

²⁹ Te ndècu ìⁿ lítu ñùhu ndudí íá. Te sá dúcáⁿ nǐ cáháⁿ-gá sá yìchí-gá ndute, núu xíǎⁿ ní queheⁿ-güedé cáchí te ní chindóyo-güedé xítí ndudí íá-ǎⁿ, te ní chinenu-güedé díquí ìⁿ díte yutnu nàni hisópó, te ní ndo-cani-güedé ní chihi-güedé yuhu-gá.

³⁰ Te sáta nǐ xíhi-gá ndudí íá-ǎⁿ, te càchí-gá:

—Vitna ní dǎxǐnu cava-í nchaa chùuⁿ ní cachí Tàtá-í cada-í —duha ní cachí-gá.

Te ní xócuíta dúcúⁿ-gǎ ndàa núú-gǎ, te ní xíhí-ni-gá.

Ìⁿ sandàdú ní caáⁿ-dé yiqui naha Jèsús ndíhi ìⁿ pùyá yíhí càá núú-xi

³¹ Te cuèndá sá ndùu vispré vico pàscuá cúú-xí nǔu ñá ní cuìní cue téé isràél cundecu-ni yiqui cùñú-gá núú cùrúxí ndíhi yiqui cùñú cue téé ní sata caa-güedé díñi-gá, chi cuèndá nduu tnéé-áⁿ cúú-xí ndùu ndetatú ñáyíu, te ío quide cahnú-yu nduu-ǎⁿ, núu ní xáhaⁿ-güedé xii té Pilatú sá táuchùuⁿ-dé quíhíⁿ cue téé cahnú-güedé díhíⁿ Jèsús ndíhi díhíⁿ cue téé tàcaa ndíhi-gá, te xocàni-güedé yiqui cùñú-gá ndíhi yiqui cùñú-güedé yàcáⁿ.

³² Te sáta dúcáⁿ te ní sáháⁿ cue sandàdú ní sáhnú-güedé díhíⁿ cue téé tàcaa xio xio díñi Jèsús.

³³ Te òré ní cuyatni-güedé núú-gǎ, te ní xíní-güedé sá sà ní xíhí-gá nǔu ñá ní sáhnú-güedé díhíⁿ-gá.

³⁴ Dico ìⁿ sandàdú-áⁿ nǐ cúxi-dé pùyá néhé-dě ìⁿ xio yiqui naha-gǎ, te yíhi caá núú-xi núu ní caáⁿ-xi yiqui naha-gǎ ní quee níñí ndíhi ndute cuí.

³⁵ Te yúhú té Juáá téé ní cadúha tutú-a ní xíní-í nàcuáa ní cuu ní xíhí Jèsús, te xíǎⁿ nǔu càháⁿ ndáá-í cuèndá quíndáá iní-ndó.

³⁶ Te ducaⁿ nǐ cuu ñá ní sáhnú-güedé díhíⁿ Jèsús, chi ní quee ndáá-xi nàcuáa càháⁿ-xi

núú tütú Yǎ Ndiöxí núú càchí-xi: “Vá càhnú-güedé ni ìⁿ yiqui-gá”, duha càchí-xi.

³⁷ Te ducaⁿ ní quide-güedé Jèsús ní caáⁿ-güedé yiqui naha-gǎ, chi ingá xíhí núú tütú Yǎ Ndiöxí càchí-xi: “Sáá nduu te quini-güedé ìⁿ téé ní dǎnicuèhé-güedé”, duha càchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcáⁿ nǐ cuu, te té Chèé téé ñúú Arimateá tnàhá-dé ní sándáá iní-dé tnúhu Jèsús dico dayuhu, chi ní xóo yùhú-dé cue téé cùnnuu núú ñáyíu isràél. Te téé-áⁿ nǐ xáhaⁿ-dě xii té Pilatú nǔu vá dáñá-dě canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dě xii-dé sá cúú cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núú cùrúxí nchídó-dě cuáháⁿ.

³⁹ Te té Nicòdemú téé ní sáháⁿ niú ní cáháⁿ ndíhi-dé Jèsús ndéé díhna, téé-áⁿ néhé-dě ócò úxí kílú yuchi ní cuáha mee-ni yúcú sǎ nání mǐrrá ndíhi yúcú sǎ nání àloés. Te ío váha tnàmi saháⁿ.

⁴⁰ Te ní naníhí tnàhá-dě ndíhi té Chèé, te ní chidúcúⁿnuu-güedé yiqui cùñú Jèsús mee-ni dǒó vǎha, te nàcuáa ta dùcuⁿ nuu-güedé yiqui cùñú-gá dóó-ǎⁿ, te ducaⁿ ta chido-güedé yuchi sáháⁿ tnámí-ǎⁿ nǔú dǒó-ǎⁿ chi ducaⁿ tnàhí quide ñáyíu isràél òré chindúxi tnàhá-yu.

⁴¹ Te yatni núú nǐ sata caa-güedé Jèsús cáá ìⁿ lahuertá. Te xítí lahuertá-áⁿ nchìí ìⁿ yaú cava duha cuáháⁿ ndáá-xi, te vátá yǒo ìⁿ-gá nguíndúxi xíáⁿ.

⁴² Te cuèndá sá nǐ cuyatni tnàhá nduu ndetatú ñáyíu isràél nǔu xíǎⁿ yaú cava nchìí yatni-ni xíáⁿ nǐ chihi-güedé yiqui cùñú Jèsús.

20*Jèsús ní ndoto-gá*

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núú nǐ chihi-güedé yiqui cùñú Jèsús, te ní sáá-xi ní xíní-xi sá ñà túú-gǎ ndèdí yúú yèhe yaú-áⁿ.

² Núu xìnu-xi cuánuhú núú ndécú tè Xímú, àdi Pelú chi úú diù-dé, ndíhi ingá téé ní xica

cuu ndihi-gá tée ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xini-ó ndéé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pèlú ndihi ingá tée-áⁿ cuáháⁿ ndéhe-güedé yaú núú nǐ chihi-güedé yiqui cùñú-gá.

⁴ Te ndúú-güedé xínú-güedé cuáháⁿ ní cùu, dico ingá tée-áⁿ nǐ cuu níhi-gá sáhá-dé cuáháⁿ-dé núu díhna-gá-dé ní sáá-dé yuhu yaú núú nǐ chihi-güedé yiqui cùñú Jèsús ní cùu.

⁵ Te ní ngáundeyi-dé xító nihni-dé xití yaú-áⁿ, te ní xini-dé mee-nǎ dóo vǎha sá nǐ xiducúⁿ nuu-gá yúcu, dico ñá ní quǐhu-dé.

⁶ Te sáta nǐ sáá té Pèlú te cuánguihu-dé xití yaú-áⁿ, núu tnáhá-dé ní xini-dé nchaa dóo nǐ xiducúⁿ nuu-gá yúcu-ǎⁿ.

⁷ Te ní xini-dé sá dóo nǐ xindútú díqui-gǎ ñá túú càtuu jundú-xi ndihi dóo nǐ xiducúⁿ nuu-gá chi ní naducúⁿ nuu-ná càtuu ìⁿ xio.

⁸ Te nchícúⁿ tucu tée ní sáá díhna-gá-áⁿ cuánguihu xití yaú-áⁿ, te ní xini-dé sá dóo-nǎ yúcu, te ñá túú-gǎ yiqui cùñú Jèsús núu ní sándáá iní-dé sá nǐ ndoto-gá.

⁹ Chi vátá tècú tnùnigá-güedé nàcuáa càháⁿ-xi núu tùtú Yǎ Ndiöxí núu càchí-xi sá Jèsús ndoto-gá.

¹⁰ Te ní xicó ndì ndúú cue tée ní sángoto yaú núú nǐ chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndihi tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú nǐ chihi-güedé yiqui cùñú Jèsús te ní ngüíta-xi ndàhyú-xi, te ní ngáundeyi-xi xito nihni-xi xití yaú-áⁿ.

¹² Te xití yaú-áⁿ nǐ xini-xi úú espíritú xínú cuèchi núú Yǎ Ndiöxí xixihnu-xi mee-ni dóo cuixíⁿ xindecu-xi núú nǐ cáa yiqui cùñú-gá. Te ìⁿ-xi nùcúo núú nǐ cáa díqui-gǎ, te ìⁿ-xi nùcúo núú nǐ cáa sáhá-gǎ.

¹³ Te espíritú-áⁿ nǐ xáhaⁿ-xi xii tá Màriá:

—¿Ná cuendá ndàhyú-n? —càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaá cúú Xitohó-í cuáháⁿ, te ñá túú xini-í ndéé ní taxi ndecu-güedé —càchí-xi xáhaⁿ-xi xii cue espíritú-áⁿ.

¹⁴ Te tnúhu-ni-áⁿ nǐ cáháⁿ-xi te ní nchócótó-xi ìⁿ xio, te ní xini-xi Jèsús núnñi-gá dico ñá túú ní cùtnuní iní-xi sá díú mèe-gá.

¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gǎ xii-xi.

Te mee-xi nǐ sani iní-xi sá tée xito lahuertá-áⁿ cúú tée-áⁿ, núu ní xáhaⁿ-xi:

—Táta, te núu yòhó néhe-n yiqui cùñú Jèsús cuáháⁿ, te cáháⁿ-n ndéé ní taxi ndecu-n chi cuendá naqueheⁿ-í canehe-í nùhú —càchí-xi xáhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gǎ:

—¡Màriá! —càchí-gá xáhaⁿ-gǎ xii-xi.

Te ní ndacoto-xi núú-gǎ, te ní cáháⁿ-xi tnúhu hèbreú, te xáhaⁿ-xi:

—¡Rabóni! —càchí-xi xáhaⁿ-xi. Te tnúhu-áⁿ quéé-xi Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gǎ-í núú ndécú Tǎtà-í. Te nùhú-n cùñaha-n xii cue tée ío váha ní tnáhá tnúhu ndihi-í sá ndáa-í núú ndécú Tǎtà-í Dútú Ndiöxí, te diu-gá cúú Tǎtà-ndó nchàa-ndo, te diu-ni-gá cúú Ndiöxí-ndó —càchí-gá xáhaⁿ-gǎ xii-xi.

¹⁸ Te ní natnñi tá Màriá Magdalèná ichi cuánuhú-xi cùñaha-xi xii cue tée ní xica cuu ndihi-gá sá nǐ xini-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gǎ xii-xi.

Ní quexìo Jèsús núú xindecu cue tée ní xica cuu ndihi-gá

(Mt. 28:16-20; Mr. 16:14-18; Lc. 24:36-49)

¹⁹ Te diu-ni ndumìngú sandiquiⁿ ní nat-aca cue tée ní xica cuu ndihi-gá, te xindedí nihnu-güedé vehe sá xiyùhú-güedé cue tée cùnuu núú ñǎyiu isràél. Te ní quíhu Jèsús ndéé tnuú-güedé ní ngúnutnñi-gá, te ní xáhaⁿ-gǎ:

—Yá Ndiöxí chindèe ñàha-gá xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

20 Te ní dánèhé ñáhá-gă ndaha-gă ndihî yiqui naha-gă xii-güedé. Te ío ní cudíí ìní-güedé sá díú ndìsa-gá ní xiní ñáhá-güedé.

21 Te ní xáhaⁿ tùcu Jèsús xii-güedé:

—Yá Ndiöxí chindèe ñaha-gá xii-ndo ìo váha cùu iní-ndó ndècu-ndo. Te dàtná ní tendaha ñaha Tàtá-í Dútú Ndiöxí xii-í véxi-í ñuyíú-a, te ducaⁿ tëndaha ñaha-í xii-ndo quíhíⁿ-ndó cǎháⁿ-ndó tnũhu-í núú ñáyiu —càchí-gá xáhaⁿ-gă xii-güedé.

22 Te ní chiyóócó-gă núú-güedé, te ní xáhaⁿ-gă:

—Chí ndúú tàhú Espiritú Yá Ndiöxí cun-decu ndihî-ndo.

23 Te nchaa ñáyiu na quindáá iní-xi tnúhu-í te cúñaha-ndo xii-yu sá ñí quide càhnu iní Yá Ndiöxí nchaa cuéchi-yu. Te nchaa ñáyiu vá quindáá iní tnúhu-í te cúñaha-ndo xii-yu sá vǎ cádá càhnu iní-gá cuéchi-yu —càchí-gá xáhaⁿ-gă xii-güedé.

Té Mǎxí cǎháⁿ ndihî-dé Jèsús

24 Te núú ùxúú cue téé ní xica cuu ndihî-gá, te ìⁿ-dé nání-dě Mǎxí téé ní xóo danàni-güedé Cuächí, te téé-áⁿ ñà túú-dě ndécú ndihî-güedé òré ní sáháⁿ Jèsús.

25 Te dava-gá cue téé ní xica cuu ndihî-gá ní xáhaⁿ-güedé xii-dé:

—Ní xiní-ndí Jèsús —càchí-güedé xáhaⁿ-güedé.

Te ní xáhaⁿ tǎ Mǎxí:

—Te vá quindáá iní-í, chi ndéé quìní-í ndaha-gá núú ñí quée nduyú, te dàquíhu-í díquí ndáhà-í núú ñí caáⁿ nduyú-áⁿ, te dàquíhu ndàha-í yiqui naha-gă núú ñí caáⁿ, ducaⁿ te quindáá iní-í —càchí-dé xáhaⁿ-dě xii-güedé.

26 Te núú ùná tucu nduu ní natacá tucu cue téé ní xica cuu ndihî Jèsús ìⁿ vehe, te nduu-áⁿ tnàhá té Mǎxí ndécú ndihî-güedé. Te cuèi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gă:

—Yá Ndiöxí chindèe ñaha-gá xii-ndo ìo váha cùu iní-ndó ndècu-ndo —càchí-gá xáhaⁿ-gă xii-güedé.

27 Te ní xáhaⁿ-gă xii té Mǎxí:

—Cundehe ndàha-í te dàquíhu-n díquí ndáhá-n núú ñí quée nduyú, te dàquíhu-n

ndàha-n yiqui naha-í-a cuendá quindáá iní-n te vá cání ìⁿ caní úú iní-n —càchí-gá xáhaⁿ-gă xii-dé.

28 Te ní xáhaⁿ tǎ Mǎxí xii-gá:

—ìYòhó cúú-n Xìtohó-í! ìYòhó cúú-n Ndiöxí-í! —càchí-dé xáhaⁿ-dě xii-gá.

29 Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdíí-gă iní nchaa ñáyiu ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gă xii-dé.

Quindáá iní-ó tnũhu yòdo tnuní núú tütú-a

30 Te vǎi-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihî-gá.

31 Dico dava-gá ní ngódó tnuní núú tütú-a cuendá sá quindáá iní-ndó sǎ Jèsús cúú-gă Cristú Déhe Dútú Ndiöxí, te naníhí tàhú-ndó te núu na quindáá iní-ndó-gă.

21

Úsá cue téé ní xica cuu ndihî Jèsús ní xiní ñáhá-güedé xii-gá

1 Te ìngá nduu tucu xĩndecu cue téé ní xica cuu ndihî Jèsús yuhu làgúná ñuú Tiberiás, te ní sáháⁿ-gá núú xĩndecu-güedé-áⁿ. Te duha ní cuu ní xiní ñáhá-güedé xii-gá.

2 Te ndècu té Xímú, àdi Pelú chi úú diú-dé, ndihî té Mǎxí téé ní xóo cúñaha-güedé Cuächí, ndihî té Natanàel téé ñuú Cànaá, te ñuú-áⁿ yĩndèhu-xi distritú Galileá, te tnàhá ndi ndúú déhe té Zebèdeú, ndihî úú-gá tucu cue téé ní xica cuu ndihî-gá.

3 Te ní xáhaⁿ tǎ Pèlú xii-güedé:

—Quíhíⁿ-í quítní-í chácá —càchí-dé xáhaⁿ-dě xii-güedé.

Te ní xáhaⁿ-güedé:

—Tnàhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xití bàrcú-áⁿ cuáháⁿ-güedé. Te niú-áⁿ ñá ní ñíhí tnàhí-güedé chácá.

4 Te sa ta cùditó-nǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gă.

⁵ Te ní xáhaⁿ-gǎ xii-güedé:

—Cue tée cuechi, ¿ní níhí-ndó chǎcá caxi-o ñǎ? —càchí-gǎ xáhaⁿ-gǎ xii-güedé.

Te ní xáhaⁿ-güedé:

—Védana chǎcá ñà túú ní níhí-ndǐ — càchí-güedé xáhaⁿ-güedé xii-gǎ.

⁶ Te ní xáhaⁿ Jèsús:

—Chí dáquēe ñunu-ndo ndàa xio cuha barcú chi níhí-ndó-dí —càchí-gǎ xáhaⁿ-gǎ xii-güedé.

Te ducaⁿ ñí quide-güedé, te òre nátava-güedé ñunu xití ndute, te ñá cündèe-gǎ-güedé natava-güedé cuendá sá ñí chítú chǎcá xití-xi.

⁷ Te tée ní xica cuu ndihí-gǎ tée ío cùu iní-gǎ ní xáhaⁿ-dǎ xii té Pèlú:

—¡Díu Xítoho Jesucristú! —càchí-dé xáhaⁿ-dǎ xii-dé.

Te sá ñí tecú dóho té Pèlú sá dúcáⁿ càháⁿ-dé ñuu ní ndíunuu-dé dóo-dǎ, chí dóo sǎ yímàa-ni-dé níhnú-dǎ ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-áⁿ ñí quene-dé ndéé ñuhu yìchí.

⁸ Te dava-gǎ cue tée ndihí té Pèlú díu-ni cue tée ní xica cuu ndihí Jèsús ní quendóo-güedé dàtná ìⁿ ciendú-gǎ mètrú te quene-güedé yuhu ndüte. Te tàñuhu-ni-güedé ñunu-güedé chitu chǎcá ñí quene-güedé ndéé yuhu ndüte.

⁹ Te òré ní quene-güedé ñuhu yìchí, te ní xiní-güedé càyú ñuhú, te núú ñùhú-áⁿ ñùhú ìⁿ chǎcá ndihí ìⁿ pàá.

¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ìⁿ úú chǎcá quití íchí ñí tñi-ndo —càchí-gǎ xáhaⁿ-gǎ xii-güedé.

¹¹ Núu té Pèlú ní sáháⁿ-dé núú ndécú bàrcú, te ní quée-dé xití-xi ní cándé-dé ñunu ñùhu chǎcá táñuhu-dé ní quene ndéé ñuhu yìchí, te chitu chǎcá náhnú, te ñuhu ìⁿ ciendú údico úxí úní-dí xití ñunu-áⁿ, te cuèi ducaⁿ vai-dí ñuhu dico ñá ní ndátá ñunu-áⁿ.

¹² Te ní xáhaⁿ Jèsús:

—Chí nèhé cadí iní-ndó —càchí-gǎ xáhaⁿ-gǎ xii-güedé.

Dico ni ìⁿ cue tée ní xica cuu ndihí-gǎ-áⁿ ñǎ ní xicáⁿ tnúhú-güedé núú-gǎ ñuu yoo cùu-gǎ, chí sa ní cutnùní iní-güedé sá díú Jèsús cúu-gǎ.

¹³ Te Jèsús ní sáháⁿ-gǎ ní queheⁿ-gǎ pàá ní sáñaha-gǎ xii-güedé caxi-güedé, te dàtnùní ní queheⁿ tucu-gǎ chǎcá ñí sáñaha-gǎ xii-güedé.

¹⁴ Vitna cùu úní xito sá xiní ñáhá cue tée ní xica cuu ndihí-gǎ sátá ñí ndoto-gǎ.

Jèsús càháⁿ ndihí-gǎ té Pèlú

¹⁵ Te sátá ñí túhú cóhó-güedé ní sadí iní-güedé te ní xicáⁿ tnúhú Jèsús núú té Xímú, àdi Pelú chí úú díu-dé, te xáhaⁿ-gǎ:

—Xímú, déhe té Jónás, ¿cùu iní-gǎ-n yùhú dàcúxí dàva-gǎ cue tée-a ñǎ? —càchí-gǎ xáhaⁿ-gǎ xii-dé.

Te ní xáhaⁿ té Pèlú:

—Mèstrú, cùu iní ñáhà-í, yòhó sa nàha-n — cachí-dé xáhaⁿ-dǎ xii-gǎ.

Te ní xáhaⁿ Jèsús:

—Te núu ducaⁿ, te dacàxi-n cue mbéé lǐhli-í —càchí-gǎ xáhaⁿ-gǎ xii-dé.

Te cue mbéé-áⁿ cúu-güedé ñáyu cùu cuendá-gǎ.

¹⁶ Te ní xáhaⁿ tucu-gǎ xii té Pèlú:

—Xímú, déhe té Jónás, ¿cùu iní ñáhá-n xii-í-u? —càchí-gǎ xáhaⁿ-gǎ xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n — cachí-dé xáhaⁿ-dǎ xii-gǎ.

Te ní xáhaⁿ-gǎ:

—Te núu ducaⁿ, te coto-n cuè mbéè-í — càchí-gǎ xáhaⁿ-gǎ xii-dé.

¹⁷ Te xito cùu úní ní xáhaⁿ tucu-gǎ xii té Pèlú:

—Xímú, déhe té Jónás, ¿cùu iní ñáhá-n-ǎⁿ? —càchí-gǎ xáhaⁿ-gǎ xii-dé.

Te té Pèlú ío ní cundiyí-dé sá dúcáⁿ ñí cuu úní xito xicáⁿ tnúhú-gǎ núú-dǎ ñuu ndisa sá cúu iní ñáhá-dǎ xii-gǎ, te ní xáhaⁿ-dǎ:

—Mèstrú, yòhó nchaa sa xiní-n, te sa cutnùní iní-n sǎ cúu iní ñáhà-í xii-n — càchí-dé xáhaⁿ-dǎ xii-gǎ.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í.

¹⁸ Te na càchí tnúhú ndáá-í xii-ñ sǎ cutnàhá cuechi-gǎ-n ñí xóo ndécuihnu mee-n dǎo-n, te ní xóo quíhíⁿ-n nděni ní xóo cachí iní-n, dico na yì-n te dacàa-n ndàha-n, te ñngá tée dacuihnu ñaha xii-n dóo-n te cada yica-dǎ candeca ñaha-dǎ xii-n quíhíⁿ ìⁿ núú ñà túú tnàhá iní-n — càchí-gǎ xáhaⁿ-gǎ xii-dé.

19 Te sá dúcáⁿ nǐ cáháⁿ Jèsús cúú-xí sǎ nǐ dátécú tnúhu ñaha-gǎ xii té Pèlú nàcuáa cada-xi cuú-dé, te ducaⁿ càda cahnu-dé Yǎ Ndiõxí, te ní xáhaⁿ-gǎ xii-dé:

—¡Canchicúⁿ ñáhá-n xii-í! —càchí-gá xáhaⁿ-gǎ xii-dé.

Tée ío cùu iní-gá

20 Te ní nchócótó tǎ Pèlú ndàa sátá-dě, te ní xiní-dé sá nchicúⁿ ñáhá ìngá tée xica cuu ndihí-gá cuáháⁿ, tée ío cùu iní-gá tée ní xínucóo dǐñí-gá òré ní cudìni ndihí ñaha-gá xii-güedé, te ñu-ni tée-áⁿ nǐ xicáⁿ tnúhú-dě núú-gǎ dàvá-áⁿ nǔu nděda càa tée cuáha cuendá ñáhá xii-gá núú cuè tée cùu úhú iní ñáhá.

21 Te òré ní xiní té Pèlú sá nchicúⁿ ñáhá tée-áⁿ, te ní xicáⁿ tnúhú-dé núú Jèsús, te xáhaⁿ-dě:

—Mèstrú, te tée-ǎⁿ, ¿ná cúú sǎ yǎha-dé-i? —càchí-dé xáhaⁿ-dě xii-gá.

22 Te ní xáhaⁿ Jèsús:

—Te núu yúhú cuìní-í sá cùndècu-ni-dé ndéé ná quìxi tucu-í ñuyíú-a, ¿te yòhó ná cuendá-n nǔu xicáⁿ tnúhú-n? Yòhó canchicúⁿ ñáhá-ní xii-í —càchí-gá xáhaⁿ-gǎ xii-dé.

23 Te ní xinu tnúhu núú nchàa ñáyiu sàndáá iní tnúhu-gá sá tǎ-ǎⁿ vǎ cùú-dé. Dico Jèsús ñá túú dùcaⁿ ní xáhaⁿ-gǎ sá vǎ cùú-dé, chi ní xáhaⁿ-gǎ: “Núu yúhú cuìní-í sá tǎ-ǎⁿ cundecu-ni-dé ndéé ná quìxi tucu-í ñuyíú-a, ¿te yòhó ná cuendá-n?”, duha ní xáhaⁿ-gǎ xii té Pèlú.

24 Te ñu-ni yúhú té Juáá tée ní sani iní-yu sá vǎ cùú càháⁿ ndáá-í nchaa nàcuáa ní cuu, te ducaⁿ nǐ tee-í núú tütú-a, te cùtnuní iní-ndó sǎ tñhu ndáá cúú-xí.

25 Te ndècu vai-gá núú sǎ nǐ quide Jèsús. Te núu dìcò ní ngǔndee nchaandí túhú ñá, te vǎa ni te ñihí ñuyíú te vǎ tñhá núú-xi cundecu libré, te núu dìcò ní ngǔndee nchaa. Te ducaⁿ na cùnduu. Te ío chí cádá ndèe iní-nǎ vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáá-gá sá quixí
Espíritú Yă Ndiöxí cundecu ndihi ñáyiu*

¹ Te duha ní cáháⁿ té Lùcá ní xii-dé té Těofilú: Yúhú sa ní chídó tnùn-í núú librú ndéé díhna nchaa sá ñí quide Jèsús, ndihi nchaa sá ñí dácuahá-gă ñáyiu. Te ní chídó tnùn-í nchaa sá ñí quide-gă ndéé nduu ñí quesaha-gă quidé chiúⁿ-gă,

² ndihi nchaa sá ñí quide-gă ndéé òré cuánda-gă andiu. Te sa ta cùyatni nduu ndaa-gă andiu, te ní ndatnúhu-gă ndihi cue tée ní cáháⁿ-gă dacuàha ñaha xii ñáyiu tnúhu-gă, te mee Espíritú Yă Ndiöxí ní chindee ñaha-xi xii-gă ní xáhaⁿ-gă nàcuáa cada-güedé.

³ Te sáta ñí xihí-gă te ní ndoto-gă, te ní xindecu-gă údico nduu. Te titní xito ní sáháⁿ-gă núú ñí xindecu-güedé, te ducaⁿ ñí quide-gă cuendá quini-güedé sá ndáá ní ndoto-gă, te ní xáhaⁿ-gă nàcuáa quide Yă Ndiöxí ndihu ndaha-gă ñáyiu.

⁴ Te ñí nduu ndècu ndihi ñaha-gă xii-güedé, te ní xáhaⁿ-gă:

—Vá quée-ní-ndó ñúú Jerusálén, chi cundetú-ndó quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcáⁿ ñí cáháⁿ Tătá-ó Dütú Ndiöxí Yaá ndécú àndiu nacuáa cunduu.

⁵ Te ndáá sá ndii Juáá ní dácuaándute ñaha ndii xii-ndo, dico vitna ñá túú-gă cuhé nduu, te quexio Espíritú Yă Ndiöxí cundecu ndihi-ndo —càchí-gă xáhaⁿ-gă xii-güedé.

Jèsús cuánda-gă andiu

⁶ Te òré ní xindecu-güedé ndihi Jèsús, te ní xáhaⁿ-güedé xii-gă:

—Mèstrú, cuini-ndí cachí tnúhu-n ñuu sa ta cùyatni nduu chindee-n ñáyiu ñúú Isràél cuendá taxi tnùn-í tucú-yu ñúú-yu —càchí-güedé xáhaⁿ-güedé xii-gă.

⁷ Te ní xáhaⁿ Jèsús xii-güedé:

—Ñá túú xini ñuhu-xi cunaha nchohó xiáⁿ, chi Tătá-ó Dütú Ndiöxí náhá-gă ná nduu càda-gă nchaa sá ñí cáháⁿ-gă.

⁸ Te òré quexio Espíritú Yă Ndiöxí cundecu ndihi-ndo, te cuyi-ndo ñí yuhu ñí iní-ndó quihíⁿ-ndó cáháⁿ-ndó tnúhu-í núú ñáyiu ñúú Jerusálén ndihi núú ñáyiu distritú Jùdeá ndihi núú ñáyiu distritú Sàmariá. Te ducaⁿ-ni cáháⁿ-ndó quihíⁿ-ndó ñí caxico ñuyú —càchí-gă xáhaⁿ-gă xii-güedé.

⁹ Te sáta dúcáⁿ ñí cáháⁿ-gă, te ndèhe-güedé ní ndanchita-gă cuánda-gă andiu cuándihu-gă xiti vícò, te ñá túú-gă ní xini náhá-güedé xii-gă.

¹⁰ Te ndèhe vihi-güedé andiu núú ndéé quini náhá-güedé xii-gă yòtnúhu, te ní quexio cunu úú cue tée ñihu dóó cuixíⁿ núú ndécú-güedé.

¹¹ Te xáhaⁿ-güedé:

—Nchòhó cue tée Galileá, ¿ná cuendá ndéhe-ndó àndiu? Te dàtná-ni càa Jèsús cuánda-gă andiu vitna, te ducaⁿ-ni cunduu-gă quixi tucu-gă —càchí cue tée ñihu dóó cuixíⁿ-án xáhaⁿ-güedé.

Cuendá sá ñá túú-gă ndii Jùdás ñuu ní nanducu-güedé té Màtiá ní nucúnutni-dé núú ndii

¹² Te ní ndee-güedé yucu Òlívú cuánuhú-güedé ñúú Jerusálén, te ní xúhu-güedé cuédicó cuádava òré ichi.

¹³ Te òré ní ndexio-güedé ñúú-án, te cuánda-güedé cuártú ndéé núú ñinu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáá, té Ndríxí, té Lìpé, té Mǎxí, té Bartolòmé, té Mâteú, té Jàcobó déhe té Àfeú, ndihi té Xímú tée ní cundihi cue tée cananistá, ndihi té Jùdás ñaní té Jàcobó.

¹⁴ Te ní naníhí tnáhá-güedé nchaa-güedé yàcáⁿ ndihi tá Màriá náná Jèsús, ndihi cue ñaní-gă ndihi dava-gă cue ñáyiu dìhí. Te ñí-ñí ñí cuú-yu ní cáháⁿ ndihí-yu Yă Ndiöxí.

¹⁵ Te ñí nduu ní xindecu dàtná ñí ciendú ócò mee-ñí ñáyiu sàndáá iní tnúhu Jèsús, te ní ngúnutni té Pèlú núú-yu, te ní xáhaⁿ-dè xii-yu:

¹⁶⁻¹⁷ —Nchòhó cue ñáyiu ndècu ndihi-í ichi Xítóhó Jesucristú, na càni-í cuendú núú-ndó nàcuáa ní chídó tnùn-í ndii Dáví

tée ní xíndecu ndéé sanaha nàcuáa ní cáháⁿ Espíritú Yă Ndiöxí cuendá té Jüdás. Te dacuítí dùcaⁿ ní cuu, chi tnàhá té Jüdás ní xíndecu ndìhi-o, te ní xinu cuechi-o ndìhi-dé núú-gă sá dǐhna, te ducaⁿ nǐ quide-dé ní sáha cuendá-dé Jèsús núú cuè tée cùu úhú iní ñáhá xii-gá.

18 Te ní cháhu ñaha-güedě xii-dé cuendá sá nǐ sáha cuendá ñáhá-dě xii-gá. Te ní sáháⁿ-dé ìⁿ xichi ní sata caa-dé méé-dě, te ní ngava-dé, te ní cahndí duuⁿ xití-dé te xíáⁿ nǐ xihí-dé. Te ní naqueheⁿ-güedé díhúⁿ sǎ nǐ cháhu-güedé ndíi, te ní nacuaaⁿ-güedé ñuhu núú nǐ ngava ndíi-áⁿ.

19 Te nchaa ñáyiu Jerusálén ní níh-yu tnúhu, te ní dánání-yu ñuhu-áⁿ Acèldamá. Te tnúhu mèé-yu quèe-xi: Ñuhu núú nǐ sati níñí.

20 Te duha ní cáháⁿ ndíi Dàvií ní chídó tnùní ndíi núú librú Sǎlmú ní dándöo ndíi: “Nà ndóo nahi vèhe-dé, vá yöo ìⁿ quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nànducu-güedé ingá tée nucúnutnǐ núú ndíi”, duha ní cáháⁿ ndíi Dàvií —càchí té Pèlú xǎhaⁿ-dě xii-yu.

21-22 Te ní xáhaⁿ tùcu-dé:

—Te ducaⁿ nǐ cáháⁿ ndíi Dàvií, te vitna xini ñuhu-xi nanducu-o ìⁿ tée nucúnutnǐ-dé núú ndíi Jüdás, te xini ñuhu-xi diu-ni ìⁿ tée ní xica cuu ndìhi Xítóhó Jesucristú cútnàhá ní xica cuu-o ndìhi-gá, ìⁿ tée ní xiní ndéé òré ní dácuándüte ñaha ndíi Juáá xii-gá, te ndéé òré cuánda-gá andiu. Te tée nanducu-o cùndecu-dé cáháⁿ-dé nàcuáa ní cuu ní ndoto-gá —càchí té Pèlú xǎhaⁿ-dě xii-yu.

23 Te ní cacunehe-güedé úú tnàhá-güedé nǔu ndédacàa-güedé nduu táhú-güedé nucúnutnǐ-güedé núú ndíi. Te ìⁿ-dé nání-dě Chéé Barsábás, àdi Justú chi úú diu-dé, te ingá-dé nání-dě Màtiá.

24 Te ní cáháⁿ ndìhi-güedé Yă Ndiöxí, te xǎhaⁿ-güedé xii-gá:

—Yòhó Dútú Ndiöxí xini-n iní nchaa ñáyiu, te mee-n naha-n núu ndéda càa núú úú cue tée-a tnàhá iní-n

25 cǎháⁿ-güedé tnúhu-n nǔú ñáyiu, te tée-áⁿ nucúnutnǐ-dé núú ndíi Jüdás, chi cuáháⁿ ndíi núú úhú núú ndàhú núú tau-xi quíhíⁿ ndíi —càchí-güedé xǎhaⁿ-güedé xii-gá.

26 Te ní xito ndéé-güedé, te ní cutnùní sá tée nàni Matiá quendóo-dé ndìhi úxí ìⁿ cue tée ní táuchíúⁿ-gă dacuàha ñaha xii ñáyiu tnúhu-gá.

2

Ní quexìo Espíritú Yă Ndiöxí cundecu ndìhi ñáyiu

1 Te ní sáá nduu còo vico Pentecostés te xíndecu nchaa ñáyiu ìⁿ-ni xìchi.

2 Te ní tecú dóho-yu uuⁿni ní níhi andiu, dàtná quidé ìⁿ táchí níhi vìhi ní quide-xi, te ducaⁿ nǐ cuu ndéé xití vehe núú ndécü-yu nchaá-yu.

3 Te ní xiní-yu dàtná cáá itá ñuhú cáá sǎ ndécú xití vehe, te ní xité nuu-xi ní ngoyo ndodo-xi díquǐ-yu nchaá-yu.

4 Te ducaⁿ nǐ quide-xi òré ní quexìo Espíritú Yă Ndiöxí ní ngúndecu ndíhí-yu nchaá-yu. Te ní ngúita-yu ní cáháⁿ-yu tnúhu cue ñáyiu ñá túú cùu ñáyiu isràél, te nchaa xǎⁿ ní quide Espíritú Yă Ndiöxí.

5 Te vài ñáyiu isràél xíndecu nchaa dava-gá ñuú ní tacá-yu ñuú Jerusálén, te ñáyiu-áⁿ ìo ndücu ndéé-yu dàcuahá-yu nchaa ndudú sá dácuàha tnahí-yu.

6 Te òré ní tecú dóho-yu níhi, te ní sáháⁿ-yu ní xíndedóho-yu tnúhu càháⁿ méè-yu ìⁿ ìⁿ ñuú-yu, chi ndi dííⁿ ndi dííⁿ tnúhu càháⁿ ñáyiu ndècu-áⁿ.

7 Te xíáⁿ ío ní cuñúhu ñáyiu véxi dava-gá ñuú, te ní xitnàhá-yu:

—Ñáyiu ducaⁿ xícáháⁿ cúu-yu ñáyiu distritú Galileá.

8 ¿Te nása ní quidé-yu ní cutúha-yu nàcuáa càháⁿ-ó ìⁿ ìⁿ-o ndéé líhli-o?

9 Te iha véxi ñáyiu dava nàcióⁿ, chi véxi ñáyiu Pàrtiá, véxi ñáyiu Mèdiá, véxi ñáyiu Èlám, véxi ñáyiu Mesopòtamiá, véxi ñáyiu Júdeá, véxi ñáyiu Capadociá, véxi ñáyiu Pòntó, véxi ñáyiu Àsiá,

10 véxi ñáyiu Frigiá, véxi ñáyiu Pànfilíá, véxi ñáyiu Ègiptú, véxi ñáyiu Áfricá ñáyiu ndècu ndéé núú-gă-xi ñuú Cirené. Te tnàhá ñáyiu ñuú Rómá véxi, te ñáyiu-áⁿ chi ñá díú mèe-ni ñáyiu isràél cúu-yu nchaá-yu, dico ìⁿ-ni cùu sá dácuahá-yu.

11 Te véxi ñáyiú Crětá, véxi ñáyiú Àrabiá. Te nchaa-o sa ndèdóho-o càháⁿ-yu nàcuáa cuáháⁿ tnúhu mee-o ñⁿ ñⁿ-o. Te nchaa ñáyiú xícáháⁿ tnúhu-o càháⁿ-yu cuèndá nchaa sá vǎ yǒo tnàhí ndàcu cada ní quide Yá Ndiǒxí —càchí-yu xǐtnàhá-yu.

12 Te ní cuñúhu vǐhí-yu, te ñá ná sàá iní-yu nása ní cuu, te xǐtnàhá-yu:

—¿Nása ní cuu duha càháⁿ-yu tnúhu-o? —
càchí-yu xǐtnàhá-yu.

13 Te davá-yu ní sácú ndeé yíchí ñáhǎ-yu, te xǐtnàhá-yu:

—Xǐxíni ñáyiú-áⁿ nǔu ñá náhǎ-yu tnúhu càháⁿ-yu —càchí-yu xǐtnàhá-yu.

Tnúhu ní xáhaⁿ tǎ Pèlú xii cue ñáyiú

14 Te ní ngúnutnǐ té Pèlú ndihí úxí ñⁿ cue téé ní táuchíúⁿ Jèsús dacuàha ñaha xii ñáyiú tnúhu-gá, te níhi ní cáháⁿ-dé, te xǎhaⁿ-dǎ xíi-yu:

—Nchaa nchòhó ñáyiú distritú Jùdeá ndihí nchòhó ñáyiú ñúú Jerusalén, cundedóho váha-ndo tnúhu na càháⁿ-í-a.

15 Ná ndàá tnúhu càháⁿ-ndó, chi ñá túú xǐni-ndí te ducaⁿ càháⁿ-ndó, chi davitna cùu-xi caá ñⁿ dátneé, vátá tnàhá-gá òré coho ñáyiú ndidí.

16 Te yúhú ná càchí tnúhu-í xii-ndo vitna nacuáa ní xáhaⁿ Yǎ Ndiǒxí xii ndíi Jòél téé ní xóo cáháⁿ tnúhu-gá ndeé sanaha nàcuáa cada ñaha-gǎ xii ñáyiú, te ndíi-áⁿ nǐ chídó tnùní ndíi nàcuáa ní cáháⁿ-gá.

17 Te duha ní xáhaⁿ-gǎ xii ndíi:

Cùmání-gǎ sáá nduu nàa ñuyíú, te cuáñaha-í
Espiritú-í cundecu ndihí nchaa ñáyiú
na quèndáá iní ñáhǎ xii-í.

Te cue déhe-yu cáháⁿ-yu tnúhu-í,
te cue téé cuechi dacòto núú ñáhǎ-xí
xii-güedé,

te ducaⁿ-ni cuè téé ni sàhnu cáháⁿ
saní-güedé,

te ñu-ni cuèndá nchaa sá quidè-í ducaⁿ
dàcoto núú ñáhǎ-xí xii-güedé.

18 Te nchaa ñáyiú xǐnu cuechi núu-í
cáháⁿ-yu tnúhu-í, te cuáñaha-í
Espiritú-í cundecu ndihí-yu.

19 Te ndeé andiú, yàcáⁿ vǎi sá cáda-í nàcuáa
cuñúhu vǐhí-yu,
te núú ñuyíú-a cada-í ñⁿ sá vátá quèni
tnàhí-gá-yu,

te ngoyo níñí te ngoyo ñuhú te quene vǐhi
ñúhmá.

20 Te vǎ dáyèhé-gá nchícanhii,
cuu nee ñuyíú te cuu ticuèhé núú yǒo dàtná
ticuèhé níñí.

Te davá-áⁿ sáá nduu quixi Yaá cúú
Xǐtohó-yu,

te nduu-ǎⁿ cuu-xi ñⁿ nduu càhnu vǐhi, chi
cada-gá nchaa sá ñà túú xǐnǐ-yu, te
cuñúhu vǐhí-yu.

21 Te òré xíaⁿ te nchaa ñáyiú càháⁿ ndihí
ñaha xii Yaá cúú Xǐtohó-yu-áⁿ naníhí
táhú-yu.

Duha ní xáhaⁿ Yǎ Ndiǒxí xii ndíi Jòél ní
chídó tnùní ndíi.

22 Te nchòhó ñáyiú isràél, cundedóho
váha-ndo tnúhu na càháⁿ-í-a cuèndá Jèsús
téé ñúú Nazàrét. Te Jèsús ní quide-gá chiúⁿ
Yá Ndiǒxí, chi mee Yǎ Ndiǒxí ní chindee
ñaha-gá ní quide Jèsús ná daha núú chiúⁿ,
núu xǐǎⁿ ní ndacu-gá ní quide-gá nchaa
sá vǎ yǒo tnàhí ndàcu cada, te xǐǎⁿ ní
cuñúhu vǐhi-ndo. Te sa nàha-ndo nacuáa ní
quide-gá cùtnàhá ní xica cuu-gá ñuyíú.

23 Te ndíi Jùdás ní taxi cuèndá ñáhǎ ndíi
Jèsús xii nchòhó cue téé ní cuu úhú iní
ñáhǎ xii-gá, te ní ndúcú-ndó cuè téé úhú
iní-xi ní tnǐ ñaha-güedé xii-gá te ní sata caa
ñaha-güedé núú cùrúxí, te núú cùrúxí-áⁿ nǐ
xíhí-gá. Dico sa ní cutnùnǐ iní Yǎ Ndiǒxí sá
dúcáⁿ càda-ndo Jesús, te mee Yǎ Ndiǒxí ní
cachí-gá sá dúcáⁿ ndòho Jesús.

24 Te ñu-ni mee Yǎ Ndiǒxí ní dándótó-gǎ
Jèsús, chi sa ní cáháⁿ-gá sá òré cuú-gá te vǎ
cúú dúcáⁿ-gǎ.

25 Te ndíi Dàvíí téé ní xǐndaha ñaha xii
cue ñanǐ tnàhá-ó nǐ xǐndecu ndeé sanaha nǐ
chídó tnùnǐ ndíi nàcuáa ní cáháⁿ Jèsús, te
duha ní cáháⁿ-gá:

Cùtnunǐ iní-í sá ncháá nduu ndecu ndihí-í
Yá Ndiǒxí, te ío chindee ñaha-gá xii-í,

te ñá túú tnàhí sá yùhú-í.

26 Te ío ndàcáⁿ tǎhú-í núú Yǎ Ndiǒxí chi
cùdí iní-í, chi sa nàha-í sá cùú-í dico
ndoto-í,

27 chi vǎ dáñǎ-gǎ quíhǐⁿ dúcáⁿ àlmá-í núú
ndécú ñáyiú ní xíhí,

te vǎ dáñǎ-gǎ téhyú yiqui cùñú-í chi cùu-í
Déhe-gá, te yúhú sa nàha-í sá cúú iní
ñáhǎ-gǎ xii-í.

28 Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndìhi ñaha-gá xii-í nùu ío cùdíí ìní-í.

Duha ní cáháⁿ Jèsús, te ducaⁿ nǐ chídó tnùnì ndíi Dàvíí.

29 "Te nchòhó cue ñanì tnáhà-í, na càchí tnúhu ndáá-í xii-ndo cuèndá ndíi Dàvíí tée ní xíndecu ndéé sanaha vihi, chí ní xihí-dé, te ní chindúxi ñaha-güedé, te ñaha-o tnavíi núú nǐ chindúxi ñaha-güedé.

30 Te ndíi Dàvíí ní xóo cáháⁿ ndíi tnúhu Yá Ndiöxí, te sa ñaha ndíi sá Yá Ndiöxí ní cáháⁿ ndáá cuiti-gá sá díú-ní ìⁿ tñaha ndíi taxi tnùnì-dé ñáyiú isràèl ndéé cuèé-gá dàtná ní xóo taxi tnùnì méé ndíi cùtnàhá ní xíndecu ndíi, te tée taxi tnùnì-áⁿ cúú Crìstú chí cùu-gá ìⁿ tñaha ndíi.

31 Te sa ní cutnùnì iní ndíi sá ndótó Crìstú, núu xíáⁿ ní chídó tnùnì ndíi sá vǎ dáñá Yá Ndiöxí sá quíhíⁿ dúcáⁿ àlmá-gá cundecu-xi núú ndécú ñáyiú ní xihí, te vǎ dáñá-gǎ téhyú yiqui cùñú-gá.

32 "Te ndáá chí Yá Ndiöxí ní dándótó-gǎ Jèsús, te nchúhú ní xiní-ndíi sá nǐ ndoto-gá.

33 Te ní xáhaⁿ Yá Ndiöxí xii Jèsús sá cùndecu ndìhi ñaha-gá, te taxi tnùnì Jèsús nǐ caa nǐ quíhíⁿ. Te Yá Ndiöxí ní sáñaha-gǎ Espiritú-gá ní ngúndecu ndìhi-gá nàcuáa ní xáhaⁿ-gǎ, te ñu Jèsús ní quide-gá nchaa sá nǐ xiní-ndó vitna ndìhi nchaa sá nǐ xíndedóho-ndo.

34 Te ndíi Dàvíí ñá túú ní ndàa túú ndíi andíu ndìhi yiqui cuñú ndíi, te òré ndécú-gǎ ndíi ñuyíú-a ní cachí ndíi:

Dútú Ndiöxí ní xáhaⁿ-gǎ xii Yaá cúú Xǐtohó-í:
"Ngóo xio cùha-í,

35 te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n."

Duha ní xáhaⁿ Dútú Ndiöxí xii Yaá cúú Xǐtohó-í càchí ndíi.

36 "Te nchòhó ñáyiú isràèl cùu-ndo ndí mee-í, te cuìnì-í cùndedóho váha-ndo ìⁿ tnúhu na càháⁿ-í-a. Jèsús ní sata caa-ndo-gǎ núú cùrúxí, dico Yá Ndiöxí ní cachí-gá sá Jèsús dacácu nihnu-gá ñáyiú, te vǎ cánì ìⁿ canì úú iní-ndó, chí ñu-gá cùnùu-gá núú nchaa ñáyiú —càchí té Pèlú xáhaⁿ-dè xii-yu.

37 Te ñáyiú ní xíndedóho tnúhu ní cáháⁿ té Pèlú ní ndixi túú iní-yu nàcuáa quidé-yu

ndécú-yu, te ní xáháⁿ-yu xii-dé ndíhi dava-gá cue tée ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñanì tnáhà-ndí, ¿nása cachí-ndó cùnduu, nása cada-ndí vitna? —càchí-yu xáháⁿ-yu xii-güedé.

38 Te ní xáhaⁿ tǎ Pèlú xii-yu:

—Daña-ndo nchaa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuèndá quini-yu sá nǐ natuha-ndo ìchi Jèsús, te ducaⁿ te taxi Yá Ndiöxí Espiritú-gá cundecu ndíhi-ndo,

39 chí cuìnì-gá taxi-gá Espiritú-gá xii mee-ndo ndìhi déhe-ndo, te cuáñaha-gǎ Espiritú-gá xii nchaa ñáyiú nǐ càa xico ñuyíú, ñáyiú cáháⁿ-gá cundecu ichi-gá ndéé idá-gá —càchí té Pèlú xáhaⁿ-dè xii-yu.

40 Te titní-gá tnúhu ní xáhaⁿ-dè nàcuáa cadá-yu, te xáhaⁿ tùcu-dé:

—Daña-ndo nchaa sá cuèhé sá dúhá quide-ndo, vǎ cadá-ndó sǎ quidé dǎva-gá-yu —càchí-dé xáhaⁿ-dè.

41 Te nchaa ñáyiú ní sándáá iní-xi tnúhu ní cáháⁿ té Pèlú ní sanduté-yu, te ñu-ni nduu-áⁿ nǐ cuu dàtná únì mǐl ñáyiú ní sándáá iní-xi ní xíndecu ndìhi ñáyiú xídacuáhá tnúhu Yá Ndiöxí.

42 Te ío ní xíndedóho-yu tnúhu ní cáháⁿ cue tée ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhá-yu sá dúcáⁿ nǐ quide Jèsús cùtnàhá vátá càhni ñaha-gá-güedé xii-gá, te ní xóo cáháⁿ ndíhi-yu Yá Ndiöxí.

Nàcuáa ní quide nchaa ñáyiú ní sándáá iní tnúhu Jèsús ndéé díhna nuu

43 Te ncháa-yu ní cuñúhu vǐhí-yu, chí cue tée ní táuchíúⁿ-gǎ dacuàha ñaha xii-yu tnúhu-gá ní quide-güedé titní núú sǎ vǎ yóo tñáhí ndàcu cada, te xíáⁿ ní cutnùnì iní-yu sá méé Yá Ndiöxí chíndèe ñaha-gá xii-güedé.

44 Te nchaa ñáyiú sándáá iní tnúhu Jèsús càháⁿ ndìhi tñaha váha-yu, te cuèi-ni nchaa ndachíuⁿ nandíhi-yu ndècu cahnu.

45 Te ní dícö-yu nchaa ndachíuⁿ sá ñà túú xini ñuhú-yu, te ní níhí-yu díhúⁿ te ní sáñahá-yu xii nchaa ñáyiú ñá níhí.

46 Te ñⁿ nduu ñⁿ nduu ní xóo quíhíⁿ ndíhi tnàhá-yu veñúhu càhnu sá ño cùnuu. Te ní xexi ndíhi tnàhá-yu vehé-yu. Te ío ní cudíí iní-yu chí ñⁿ-ni ní cuú-yu nchaá-yu.

47 Te ío ní ndacáⁿ táhũ-yu núú Yá Ndiöxí, te nchaa dava-gá ñáyiú ní cáháⁿ váha-yu cuendá ñáyiú-áⁿ. Te mee Yá Ndiöxí ní quide-gá ní sándáá iní vâi-gá ñáyiú, te ní xíndecú-yu ndíhi dava-gá ñáyiú xídácuahá tnũhu-gá.

3

Quide tátna-güedé ñⁿ tée yacua

1 Te ñⁿ nduu òré caá úní sacuaa, òré xícáháⁿ-yu ndíhi Yá Ndiöxí cuáháⁿ té Pèlú ndíhi té Juáá veñúhu càhnu sá ño cùnuu sácúú-xí ñáyiú isràél.

2 Te ndècu ñⁿ tée yacua, te ducaⁿ-ni càa-dé ní cacu-dé. Te sàháⁿ ndíhi ñàhá-yu veñúhu càhnu sá ño cùnuu, te sàcòo-dé ñⁿ xio yuyèhe veñúhu sá nání Yèhe Vii Caa, chí ducaⁿ nàni-xi, te xicáⁿ ndàhú-dé núú nchàa ñáyiú sàháⁿ veñúhu.

3 Te ní xiní-dé té Pèlú ndíhi té Juáá cuánguìhu-güedé veñúhu, te xicáⁿ ndàhú-dé núú-güedé.

4 Te ní ndacoto-güedé núú-dé, te ní xáhaⁿ tē Pèlú xii tée yacua-áⁿ:

—Cundehe ñàha xii-ndí —càchí té Pèlú xàhaⁿ-dē xii-dé.

5 Te ní xíndéhé ñàha-dé xii-güedé, chí ní cáháⁿ-dē sá ño ñⁿ sá cuañaha-güedé.

6 Te ní xáhaⁿ tē Pèlú:

—Ñá túú tnàhí díhúⁿ néhé-í dico chindee ñàha-í xii-n, te Xítohó Jesucristú Yaá ní xíndecu ñúú Nazàrét, ndacu-gá cada tátna ñàha-gá xii-n, ndacuíñí te caca-n —càchí-dé xàhaⁿ-dē.

7 Te té Pèlú ní tnũ-dé ndaha cùha tée yacua-áⁿ, te ní nguíta-dé ndácàni ñàha-dé, te òré xíaⁿ ñí naníhí ndéé-dé, te ní ndúha sàhá-dé.

8 Te ní ndacuíñí cunu mee-dé te ní xica-dé, te ní cachí-dé sá ño càhnu cuu Yá Ndiöxí cuendá sá ñí ndúha-dé, te ta sándava-dé cuánguìhu ndíhi ñàha-güedé veñúhu.

9 Te nchaa ñáyiú xíndecu-áⁿ ñí xiní-yu sá ñí nduu váha-dé, te ndèhé-yu ndacáⁿ táhú-dé núú Yá Ndiöxí.

10 Te ní naquiní ñàhã-yu xii-dé sá díú tēe xicáⁿ ndàhú tēe ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ñí ndúha-dé.

Té Pèlú ní cáháⁿ-dé corredór sá néhé ñí ndí Salómón

11 Te sátá veñúhu càa corredór sá néhé ñí ndí Salómón. Yacáⁿ ndécú tē Pèlú ndíhi té Juáá ndíhi tēe ní ndúha sàhá-xi, te ñá cuini tēe ní ndúha sàhá-xi-áⁿ dañ-dē quíhíⁿ-güedé dandõ ñàha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vihi-yu sá ñí ndúha sàhá tēe cùhú-áⁿ.

12 Te té Pèlú ní xiní-dé ní quexìo coyó-yu, te ní xáhaⁿ-dē xii-yu:

—Nchòhó ñáyiú isràél, ¿ná cuendá ndéé dúcáⁿ ndèhe ñàha-ndo xii-ndí te cuñúhu-ndo sá ñí ndúha tée yacua-áⁿ? Nchòhó cáháⁿ-ndó sã méé-ndí ní quide tátna-ndí-dé sá ño váha iní-ndí, dico ñàhá chí ñá díú mēe-ndí ní quide tátna-ndí-dé.

13 Chí Yá Ndiöxí ní ndadúha ñàha-gá xii-dé, chí ñíu-gá cúú Ndiöxí ndíi Àbrahám ndíhi ndíi Isàác ndíhi ndíi Jàcób, te ñíu-ni cue tēe-áⁿ cúú ñàní tnàhá-ó ñí xíndecu ndéé sanaha vihi. Te ñíu-ni Ndiöxí-áⁿ ñí xáhaⁿ-gá xii Déhe-gá Jèsús sá táxi tnúni-gá nchaa sá ño andíu ndíhi nchaa ñáyiú ndècu ñuyú-a, dico mee-ndo ñí sàha cuendá-ndó Jèsús núú tēe cùchiuⁿ. Te té Pilatú ní cuini-dé dacacu-dé Jèsús ní cùu, te mee-ndo ñá ní cuini-ndó.

14 Te Yá Ndiöxí ní cachí-gá sá ño váha iní Jèsús te ñá túú tnàhí cuéchi-gá. Te mee-ndo ñà túú ní cuini-ndó càcu-gá ñúu ní xáhaⁿ-ndo xii té Pilatú sá váha-gá dacacu-dé ñⁿ tée ndècu vihi cuéchi-xi, te vá dacacu-dé Jèsús.

15 Te ní xáhaⁿ-ndo sã cáhni-güedé Jèsús Yaá quidé nchìto-o ndecu-o, dico Yá Ndiöxí ní dándótó ñàha-gá, te ní xiní-ndí sá ndàá ní ndoto-gá.

16 Te nchúhú sa nàha-ndí sá díú Xítohó Jesucristú ní ndadúha-gá tée yacua, te ná-dé núnñí-a. Te ducaⁿ ñí quide-gá chí ní sándáá iní ñàhá-dé xii-gá, te vitna ní xiní-ndó sã ndàá ní ndúha-dé.

17 Te nchòhó ndihi cue tée cùnunu ní sahani-ndo Xítohó Jesucristú, chi ñá ní cùtnuní iní-ndó sã ñi quide-ndo.

18 Te cue tée ní xóo cáháⁿ tnúhu Yá Ndiöxí ndéé sanaha ñi chídó tnùnì-güedé nàcuáa ní xáhaⁿ Yá Ndiöxí xii-güedé sá Crístú quixi-gá ñuyíú-a, te ndoho vihi-gá, te xíãⁿ núu ducaⁿ ñi cuu ío ní ndoho-gá.

19 Te vitna te dañá-ndo ncháa sá cuèhé sá dúhá quide-ndo. Te quindáa iní-ndó Yá Ndiöxí, te ducaⁿ te cada càhnu iní-gá ncháa sá ñà túú vaha ní quide-ndo ñuyíú-a, te canu ichi ñaha-gã xii-ndo ñi ichi váha.

20 Te ní tendaha-gã Crístú ní quixi-gá ñuyíú-a, chi mee Yá Ndiöxí ní cachí-gá sá díú Crístú taunihnu ñaha-gã xii-ndo.

21 Te dacuití cùndecu-gá andiu ndéé ná sáa nduu nàtaxi ndecu-gá ncháa sá ndécú ñuyíú nàcuáa sàni iní méé-gã. Te diu ducaⁿ ñi cáháⁿ Yá Ndiöxí núu ducaⁿ ñi chídó tnùnì cue tée ní xóo cáháⁿ tnúhu-gá ndéé sanaha.

22 Te ndíi Moisés ní xáhaⁿ ndíi xii cue ñaní tnáhá-ó ñi xíndecu ndéé sanaha: “Yá Ndiöxí tendaha-gã ñi tée quixi-dé cáháⁿ-dé tnúhu-gá dàtná cuiní-ndó ñi quide ñaha-gã xii yúhú, te tée-áⁿ cuu-dé ñi ñaní tnáhá-ndó. Te cundedóho váha-ndo ncháa tnúhu cáháⁿ-dé.

23 Te ncháa ñáyiú vá quindáa iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyiú sándáa iní tnúhu Yá Ndiöxí”, duha ní xáhaⁿ ndíi Moisés xii-yu —càchí té Pèlú xáhaⁿ-dë xii-yu.

24 Te ní xáhaⁿ tùcu té Pèlú xii-yu:

—Ndíi Sàmuél ndihi ncháa cue tée nchícúⁿ-gá ní xóo cáháⁿ tnúhu Yá Ndiöxí ndéé sanaha ñi cáháⁿ-güedé nàcuáa cada-xi vitna.

25 Te Yá Ndiöxí ní cáháⁿ-gá ndihi cue tée ní cáháⁿ tnúhu-gá ndéé sanaha. Te ní quide ndáa-gá ndihi ncháa ñaní tnáhá-ó ñi xíndecu ndéé sanaha nàcuáa cada-gá naníhí tàhú-ó. Te duha ní xáhaⁿ-gã xii ndíi Àbrahám: “Ío nduu cacu ñi tnàha-n, te tée-áⁿ cada-dé te naníhí tàhú ñáyiú ñuyíú-a”, duha ní xáhaⁿ-gã xii ndíi Àbrahám.

26 Núu xíãⁿ ní tendaha-gã Déhe-gá ní quixi-gá núú ndécú-ndó cuendá dañá-ndo ncháa sá cuèhé sá dúhá quide-ndo, te naníhí tàhú-ndó —càchí té Pèlú xáhaⁿ-dë xii-yu.

4

Té Pèlú ndihi té Juàá ndécú-güedë ndaha tée cùchiuⁿ

1 Te té Pèlú ndihi té Juàá cáháⁿ dúcáⁿ-ni-güedë ndihi ñáyiú, ní quexío cue dútú ndihi tée tàxi tnuní ñáhá xii cue tée quide cuendá veñúhu càhnu sá ío cùnunu, ndihi cue tée cùu saducéú.

2 Te ní cudééⁿ-güedë ncháa-güedé núú tã Pèlú ndihi té Juàá sá xáhaⁿ-güedë xii ñáyiú sá ndótó ñáyiú ní xihí dàtná ní ndoto Jèsús.

3 Te ní tñi ñaha-güedë ní chihí ñaha-güedë vecaá xii-güedé, te ñá ní quide ndáa tée cùchiuⁿ cuéchi-güedé nduu-ãⁿ chi sa ní cuaa.

4 Te ío vãi ñáyiú ní sándáa iní-yu tnúhu ní cáháⁿ-güedé, te ñáyiú-áⁿ ndihi ñáyiú sa ní sándáa iní-xi ndéé cãni-gá ní xínu dàtná úhúⁿ mĩl mee-ni cuè tée, te dñiⁿ ñáyiú dñiⁿ ndihi landú.

5 Te nduu tnéé-áⁿ diu-ni ñuú Jerusálén-áⁿ ñi tacá cue tée yíndaha veñúhu, ndihi cue tée cùu sacuéhé núú ñáyiú isràél ndihi cue tée dàcuaha ñaha xii-yu ncháa tnúhu ní chídó tnùnì ndíi Moisés.

6 Te tnáhá dútú cùnunu-gá tée nàni Anás ndécú ndihi té Caifás, ndihi té Juàá, ndihi té Lijandrú ndihi dava-gá ñaní tnáhá dútú cùnunu-gá-áⁿ ndécú.

7 Te ní xáhaⁿ-güedë xii cue tée xínu cuechi núú-güedë:

—Chí cuaháⁿ queñuhu-ndo tã Pèlú ndihi té Juàá vecaá, te na quixi-güedé iha —càchí-güedé xáhaⁿ-güedë.

Te ní quexío té Pèlú ndihi té Juàá núú cuè tée cùnunu, te cue tée cùnunu-áⁿ ñi xicáⁿ tnúhú-güedë núú-güedë, te xáhaⁿ-güedë:

—¿Nása ní quide-ndo cuendá tée yacua-ãⁿ? ¿Yoo ní táuchíuⁿ dùcaⁿ cada-ndo? —cachí-güedé xáhaⁿ-güedë.

8 Te ndècu ndihi té Pèlú Espiritú Yá Ndiöxí, núu xíãⁿ ní xáhaⁿ-dë xii-güedë:

—Nchòhó cue tée cùchiuⁿ ndihi nchòhó cue tée cùu sacuéhé núú ñáyiú isràél,

9 te núu cuiní-ndó quini-ndó nãsa ní quide-ndí ní ndúha tée yacua-ãⁿ,

10 te cundedóho-ndo ñi tnúhu na cáháⁿ-í-a. Xini ñuhu-xi cundedóho ncháa ñáyiú isràél cuendá quini-yu nàcuáa ní cuu ní ndúha tée-ãⁿ. Xítohó Jesucristú Yaá ní xíndecu ñuú Nazàrét ní quide tátna-gá sáhá

tëe yacua ní ndúha, te diu-ni-gá ní sata caa-ndo núú cùrúxí te núú cùrúxí-án nǐ xíhí-gá, te ní dándótó ñàha Yá Ndiöxí xii-gá.

11 Te núú tùtú Yá Ndiöxí càchí-xi: “Crìstú cúú-gã dàtná ìⁿ yúú ndécú xǐquí ìⁿ vehe. Te yúú càchí-yu sá ñà túú nàndíhi, te diu xǐáⁿ ní nàndíhi-xi ní ngúnutní-xi xǐquí véhé”, duha càchí-xi núú tùtú-gá. Te ducaⁿ sàtnahá-xi cùu Jesús, chi càchí-ndó sã ñà túú nàndíhi-gá,

12 dico Yá Ndiöxí ñà túú ndèé ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chi ìⁿdìi díi-ni Déhe-gá Xítóhó Jesucristú dacácu nihnu ñaha-gã xii-o —càchí té Pèlú xãhaⁿ-dë xii-güedé.

13 Te té Pèlú ndihí té Juáá ñà túú tũha-güedé, te cùñúhu cue tée cùchiuⁿ sá ìo ñíi xǐndáa-güedé. Te ní cutnùní iní cue tée cùchiuⁿ-án sã Jèsús ní xica cuu ndihí-güedé, núu xǐáⁿ ñà túú tnàhí yùhú-güedé càháⁿ-güedé.

14 Te cuèndá ndécú ndihí té Pèlú ndihí té Juáá tée ní ndúha sáhá-xi, núu xǐáⁿ ñà ní nǐhí cue tée cùchiuⁿ tnúhu càháⁿ-güedé.

15 Te ní xáhaⁿ-güedé xii té Pèlú ndihí té Juáá sá quée-güedé quehé cuèndá ndóo mee-güedé ndatnúhu-güedé.

16 Te ní xítñaha-güedé:

—¿Nása cada-o úú cue tée-ãⁿ?, chi nchaa ñáyiu ñuú Jerusalén nãhá-yu sá nǐ quide tátna-güedé ìⁿ tée yacua, te xǐáⁿ xǐcuñúhu vǐhi ñáyiu. Te vá cúú càchí-ó sã ñã ndáá, chi vài ñáyiu ní xiní nàcuáa ní cuu.

17 Te dayùhú-ó-güedé te cùñaha-o sã vã càháⁿ-gá-güedé tnúhu Jèsús, chi núu ñáhá te quindáá-gá iní-yu —càchí-güedé xǐtnàha-güedé.

18 Te ní cana tucu-güedé té Pèlú ndihí té Juáá, te xãhaⁿ-güedé sá vã dácuaⁿ-gá-güedé ñáyiu tnúhu Jèsús.

19 Te té Pèlú ndihí té Juáá ní xáhaⁿ-güedé:

—Chí cuãha cuèndá, te núu sá càchí nchòhó cada-ndí àdi sá càháⁿ Yá Ndiöxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yá Ndiöxí.

20 Chi dacuítí càháⁿ-ndí nàcuáa ní càháⁿ Jèsús, te càháⁿ-ndí nchaa sá nǐ xiní-ndí ní quide-gá —càchí-güedé xãhaⁿ-güedé.

21 Te cue tée cùchiuⁿ nǐhi-gá ní càháⁿ-güedé xãhaⁿ-güedé sá cáda càstiú ñáhá-güedé núu vá dáñá-güedé sá dácuaⁿ-güedé ñáyiu. Te ducaⁿ te ní dáñá ñaha-güedé cuánuhú-güedé, chi ñà ní nǐhí-güedé nása cada-güedé cada castiú ñáhá-güedé, chi nchaá-yu ndàcáⁿ táhũ-yu núú Yá Ndiöxí sá nǐ ndúha tée yacua.

22 Te tée ní quide tátna-güedé-áⁿ ndécú-dë vǐhi-gá údico cuía-dë, te ìo ní cuñúhu-yu sá nǐ ndúha-dé.

Ñáyiu sàndáá iní tnúhu Jèsús xicáⁿ táhũ-yu núú-gã sá vã yùhú-yu càháⁿ-yu tnúhu-gá

23 Te ní ndee té Pèlú ndihí té Juáá cuánuhú-güedé núú ndécú cuè tée cùndihí-güedé, te ní nacani tnúhu-güedé nàcuáa ní xáhaⁿ cuè dútú cùnùu ndihí cue tée cùu sacuéhé núú ñáyiu isràél.

24 Te sáta nǐ xǐndedóho-yu tnúhu ní càháⁿ-güedé, te ìⁿ-ni tnúhu ní càháⁿ-yu nchaá-yu ndihí Yá Ndiöxí, te ní xáhãⁿ-yu xii-gá:

—Yòhó Dútú Ndiöxí, ní cadúha-n àndiu, ní cadúha-n ñùyíú, ní cadúha-n làmár, ní cadúha-n nchàandi túhú sá ìo ñuyíú.

25 Te ndíi Dàvíí ní sàndáá iní ndíi tnúhu ní càháⁿ-n, te ní chídó tnùní ndíi nàcuáa ní xáhaⁿ-n càháⁿ ndíi, te diu-ni Espiritú-n nǐ chindee ñaha-xi xii ndíi ní chídó tnùní ndíi, te duha ní chídó tnùní ndíi:

Ñáyiu ñà túú cùu ñáyiu isràél ìo cùdèëⁿ-yu núú Yá Ndiöxí,

te cuíní-yu nàá-yu ndihí-gá, dico vá ndácũ-yu chi mee-gã cùnùu-gá.

26 Te cue tée yìndaha nacióⁿ ndihí cue tée cùchiuⁿ tacá-güedé nàá-güedé ndihí Dútú Ndiöxí ndihí Crìstú Yaá ní quixi ñuyíú-a.

Duha ní chídó tnùní ndíi Dàvíí nàcuáa ndùu tnúhu ní càháⁿ-n —càchí-yu xáhãⁿ-yu xii Yá Ndiöxí.

27 Te xãhaⁿ tùcú-yu xii-gá:

—Ndáá ní càháⁿ ndíi Dàvíí chi diu-ni ñuú iha ní tacá té Hèrodés ndihí té Pònciú Pilatú ndihí ñáyiu ñà túú cùu ñáyiu isràél ndihí ñáyiu isràél ní càháⁿ cuèhé-yu cuèndá Jèsús. Te Yòhó Dútú Ndiöxí, Déhe-n cùu Jesús núu ìo váha iní-gá, te ní sáha chiùⁿ-n-gá, te ìo úhú ní cuu iní ñáhá ñáyiu xii-gá.

28 Te ní quidé-yu nàcuáa ní sani iní-n càdá-yu ndéé sanaha, ndéé cútnàhá ní ngáva ñuyíú.

29 Te Yòhó Dútú Ndiõxí sa nàha-n nása càháⁿ cue tée cuení cada úhú ñáhá xii-ndí. Te quíde-ndí chiúⁿ tahu-n, te vitna chindee ñàha-n xii-ndí cuendá sá vǎ yùhú-ndí cáháⁿ-ndí tnúhu-n.

30 Te cada tátna-n ñǎyiu cùhú, te chindee ñàha-n xii-ndí, te cada-ndí nchaá sá vǎ yòo tnàhí ndàcu cada nacuáa cuñúhu vǐhí-yu. Te xíní-ndí sá méé Jèsús chindee ñàha-gá xii-ndí, chi quíde-gá chiúⁿ tahu-n —cachí-yu xǎhǎⁿ-yu xii Yá Ndiõxí.

31 Te sátá ñǎ yáha ní cáháⁿ-yu ndihí Yá Ndiõxí, te ní quíde-xi vehe núú xǐndecú-yu, te òré-áⁿ ñǎ cutáhú tucú-yu nchaá-yu Espíritú-gá. Te ní cáháⁿ-yu tnúhu Yá Ndiõxí, te ñá túú tnàhí ní yùhú-yu.

Cuendá nchaá ndachíuⁿ cánehe chiúⁿ-yu

32 Te nchaá ñáyiu ní sándáá iní tnúhu Yá Ndiõxí ñⁿ-ni tnúhu ní cáháⁿ-yu nchaá-yu. ñⁿ-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhǎ-yu nchaá sá xíní ñùhú-yu, te ní ñⁿ-yu ñá túú ní cáháⁿ-yu sá ndàchiúⁿ-yu ñⁿ-dì-ní-yu cùu nchaá sá ndécú ndihí-yu.

33 Te cue tée ní táuchíúⁿ Jèsús dacuàha ñaha xií-yu tnúhu-gá ío váha ní cáháⁿ-güedé nàcuáa ní cuu ní ndoho Xítóhó Jesu-crístú. Te ío ní chindee ñàha Yá Ndiõxí ní cáháⁿ-yu tnúhu-gá, te ñá túú ní cáháⁿ cuéhé dava-gá-yu cuendá ñáyiu dàcuaha tnúhu-gá.

34 Te ñá túú tnàhí ní cùndahú-yu díhúⁿ, chi nchaá ñáyiu ndècu ndihí ñuhu-xi, ndihí nchaá ñáyiu càa vehe-xi ní nadìcò-yu, te da ñⁿ da ñⁿ ndachíuⁿ-yu ní nadìcò-yu òré xíní ñùhú-yu díhúⁿ.

35 Te ní sǎñàhá-yu xii cue tée ní táuchíúⁿ Jèsús dacuàha ñaha xií-yu tnúhu-gá, te cue tée-áⁿ ñǎ dácǎhñu-güedé nchaá ñáyiu xini ñuhu.

36 Te distrítú Chìpré ndécú ñⁿ tée nàni-dé Chèé ñaní tnàhá ndíi Lèví, te ní xóo cunu cuechi-dé veñúhu ñáyiu isràél. Te cuendá sá sǎñaha-dé tnúhu ndee ìní xií-yu, xǎⁿ nùu ní dánání ñàha-güedé Vèé xii-dé.

37 Te tée-áⁿ ñǎ nadico-dě luha ñuhu-dé, te nèhe-dé díhúⁿ cuáháⁿ núú cuè tée ní táuchíúⁿ-gǎ dacuàha ñaha xií-yu tnúhu-gá.

5

Té Ananiás ndihí tá Sàfirá ñá túú ní quíde ndáá-yu

1 Te ndècu ñⁿ tée nàni Ananiás, te ñadhí-dé nání-áⁿ Sàfirá, te ñáyiu-áⁿ ñǎ nadìcò-yu luha ñuhú-yu.

2 Te ní taxúha-dé sacú díhúⁿ, te sacú-gá néhé-dé cuáháⁿ ní sǎñaha-dé xii cue tée ní táuchíúⁿ Jèsús dacuàha ñaha xii ñáyiu tnúhu-gá, te ní dándàhú ñáhá-dé xii-güedé, chi ní xáhaⁿ-dè sá ñihí ní sǎñaha-dé, te nàha ñadhí-dé sá dúcáⁿ ñǎ quíde-dé.

3 Te ní xáhaⁿ tè Pèlú xii-dé:

—Ananiás, ¿ná cuendá ducaⁿ ñǎ quíde-n ñǎ dáñá-n ñǎ quíhu sácúhná ìní-n? Te ní dácúandèhnde-n núú Espíritú Yá Ndiõxí, te ní taxúha-n sàcú díhúⁿ ñǎ níhí-n cuendá ñuhu-n.

4 ¿Te ñuhu-áⁿ cuendá sá ñùhú mèe-n, àdi díhúⁿ-ǎⁿ cuendá sá díhúⁿ méé-n cùu-xi, te cuu-ni cada-n nàcuáa càchí ìní-n càhaⁿ-n ñá? ¿Ná cuendá ducaⁿ ñǎ quíde-n? ¿Ná ní quíde-xi ìní-n nùu ní dácúandèhnde-n núú Yá Ndiõxí? Chi ñá díú-ní mèe-ni ñáyiu ní dándahú-n —càchí té Pèlú xáhaⁿ-dè xii-dé.

5 Te òré ní ndihí tnúhu ní xáhaⁿ tè Pèlú, te uuⁿni ní nduá-dé te ní xíhí-ni-dé. Te nchaá ñáyiu ní níhí tnúhu sá ñǎ xíhí-dé, te ní yùhú víhí-yu.

6 Te ní quixi ñⁿ ùú cue tée cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

7 Te ní cuu úu uní òré, te ní quexìo ñadhí tée ní xíhí-áⁿ, te vátá quíní-gá-aⁿ sá ñǎ xíhí yíⁿ-aⁿ.

8 Te ní xáhaⁿ tè Pèlú xii-aⁿ:

—Cuení-í cachí tnúhu ndáá-n. ¿Ndèdau ní dícò-ndó ñùhu, ní dícò-ndó nàcuáa ní cachí yíⁿ-aⁿ? —càchí té Pèlú xáhaⁿ-dè xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ —cachí-aⁿ xáhaⁿ-aⁿ.

9 Te ní xáhaⁿ tè Pèlú:

—¿Ná cuendá ducaⁿ ñǎ chitnàha tnúhu-ndo dùcaⁿ ní quíde-ndo ñǎ cuení-ndó

dàndahú-ndó Espíritú Yă Ndiöxí? Quiní-n, chi sa cuándixi cue téé ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —càchí-dé xăhaⁿ-dē xii-aⁿ.

10 Te òré-áⁿ nǐ nduá-aⁿ núú tē Pèlú, te ní xíhí-ni-aⁿ. Te cuándihu cue téé cuechi-áⁿ xítí vehe, te ní xíní-güedé sá sà ní xíhí-aⁿ, núú ní xido ñaha tucu-güedé cuáháⁿ chindúxi-güedé-aⁿ ñíhí yíi-aⁿ.

11 Te ní yùhú víhí ñáyíu ní sándáá iní tnúhu Yă Ndiöxí, ndihí dava-gá ñáyíu ní níhí tnúhu nàcuáa ní cuu.

Ní quide-güedé titní núú sǎ vǎ yǒo tnàhí ndàcu cada te ío ní cuñúhu ñáyíu

12 Te cue téé ní táuchíúⁿ Jèsús dacuàha ñaha xií-yu tnúhu-gá titní víhí sǎ vǎ yǒo tnàhí ndàcu cada ní quide-güedé, te ní cuñúhu víhí-yu. Te nchaa ñáyíu ní sándáá iní-xi tnúhu Jèsús ní xóo tacá-yu corrèdór néhé ñíu ndí Salòmón.

13 Te nchaa ñáyíu ñá túú dàcuaha tnúhu-gá ñá ní cùyíi-yu chitnahá-yu ñáyíu ní sándáá iní-xi tnúhu-gá, dico nchaá-yu ní cáháⁿ váha-yu cuèndá ñáyíu ní sándáá iní-xi tnúhu-gá.

14 Te vǎi téé, vǎi ñadihí ní sándáá iní-yu tnúhu-gá.

15 Te cuèndá sá nǐ níhí-yu tnúhu sá quidé tǎtna cue téé ní xica cuu ndihí Jèsús, núú xiǎⁿ ní queñuhú-yu nchaa ñáyíu cùhú ichi, te davá-yu ní quide túha-yu camá te davá-yu ní quide túha-yu yuu, núú núú nchàa xiǎⁿ tá sàcáⁿ-yu cue ñáyíu cùhú-áⁿ cuáháⁿ, te xiáⁿ cáa-yu ndètú-yu, chi ní sani iní-yu sá òré yáha té Pèlú te cuèdicó cuándahú-dē yáha ndodo ñaha-xi xíi-yu te ndúha-yu.

16 Te ní quixi ñáyíu ñúú yatni Jerusàlén ndécǎ-yu ñáyíu cùhú, ndihí ñáyíu yíhí ñaha espíritú cùndihí yucu ñávàha ní quixi, te nchaá-yu ní ndúha.

Ío ní quide úhú-güedé té Pèlú ndihí té Juàá

17-18 Te dútú cúnú-gá ndihí cue téé cùu saducéú cue téé cùndihí-dé ní cudééⁿ-güedé sá ío chítú-yu dàcuaha tnúhu Jèsús, núú xiǎⁿ ní tñí-güedé cue téé ní táuchíúⁿ Jèsús dacuàha ñaha xií-yu tnúhu-gá ní chihí ñaha-güedé vecaá.

19 Te xítí niú-áⁿ nǐ quexìo ñí espíritú xínú cuèchi núú Yă Ndiöxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

20 —Quíhíⁿ-ndó veñúhu càhnu sá ío cúnúu te cúñaha-ndo xii ñáyíu nàcuáa cadá-yu naníhí tǎhú-yu —càchí espíritú-áⁿ xăhaⁿ-xi xii-güedé.

21 Te sá dúcáⁿ nǐ xáhaⁿ-xi nǐu sátá nǐ túndaá, te ní sáháⁿ-güedé veñúhu càhnu sá ío cúnúu sá cúú-xí ñáyíu isràèl ní dácuahá ñaha-güedé xií-yu.

Te dútú cúnú-gá ndihí cue téé cùndihí-dé ní nadatàcá tnàhá-güedé ndihí nchaa cue téé cùu sacuéhé nǐu ñáyíu isràèl ndihí cue téé cùchiuⁿ, te ní tendaha-güedé sandàdú cuáháⁿ queñuhu-güedé cue téé yíhí vecaá ní cùu.

22 Te ní quexìo-güedé yèhe vecaá, te ní xíní-güedé sá nǐ ñí-gá cue téé dàcuaha ñaha xii ñáyíu tnúhu Jèsús ñá túú-gǎ-güedé yíhí. Te cuánuhú-güedé

23 ní xítñúhu-güedé cue téé cùchiuⁿ, te xăhaⁿ-güedé:

—Ní sáháⁿ-ndí ní sándéhé-ndí vecaá, te ndèé chóo-ni, te xíndecu-ni sandàdú cue téé xíndéé yèhe vecaá. Te ní nacaáⁿ-ndí vecaá, te vá yǒo ñí-gá yíhí —càchí-güedé xăhaⁿ-güedé.

24 Te sá dúcáⁿ nǐ xáhaⁿ-güedé, te cuáháⁿ iní cue dútú cúnúu ndihí téé tàxi tnuní cue téé xíndéé veñúhu càhnu sá ío cúnúu, te ní xítñaha-güedé:

—¿Nása cada-xi vitna duha càa ní cuu ní xinu cue téé yíhí vecaá-i? —càchí-güedé xítñaha-güedé.

25 Te ní quexìo ñí téé ní xáhaⁿ-dē:

—Cundedóho-ndo na càchí tnúhu-í ñí tnúhu. Cue téé ní chihí-ndo vecaá ndécú-güedé veñúhu càhnu sá ío cúnúu dacuaha-güedé ñáyíu —càchí-dé xăhaⁿ-dē.

26 Te cue téé ndèé veñúhu ndihí téé tàxi tnuní ñáhá xii-güedé cuanguaca ñaha-güedé, te ñá túú ní quide úhú ñáhá-güedé, chi ní yùhú-güedé cuáha yúú ñáhá ñáyíu ñí ñúú-xi-áⁿ.

27 Te ní ndexìo ndihí ñaha-güedé núú cue téé cùu sacuéhé ndihí núú cuè téé cùchiuⁿ. Te dútú cúnú-gá ní ngüita-dé ténáá ñáhá-dē xii-güedé, te xăhaⁿ-dē:

28 —Te náa ñá ñíu nǐ cachí-ndí sá vǎ dácuaáha-gá-ndó ñáyíu tnúhu Jèsús te

dàcuaha-ni-ndó-yu, te vitna nchaa ñáyi
ñúú Jerusalén ní níhí-yu tnúhu nàcuáa
càháⁿ-ndó. ¿Te ná cuèndá ducaⁿ quide-ndo,
te càchí-ndó sã nchũhú ndècuéchi-ndí ní
sahni-ndí Jèsús-i? —càchí dútú cùnùu-gá
xãhaⁿ-dẽ xii-güedé.

29 Te té Pèlú ndihí dava-gá cue té
ní táuchíúⁿ Jèsús dacuàha ñaha xií-yu ní
xáhaⁿ-güedẽ xii cue té cùchiuⁿ:

—Nchúhú, Yá Ndiõxí cùnùu-gá sàndáá
iní-ndí tnúhu càháⁿ-gá dàcúúxí tnũhu càháⁿ
ñáyi.

30 Te nchòhó ní sata caa-ndo Jèsús núu
cùrúxí te núu cùrúxí-áⁿ ní xihí-gá, dico ní
dándótó ñaha Yá Ndiõxí xii-gá. Te Yá Ndiõxí
ní sàndáá iní cue ñani tnáhá-ndí ní xindecu
ndéé sanaha.

31 Te Yá Ndiõxí ní xáhaⁿ-gã sá cùndècu
Jesús xio cùha-gá cuèndá taxi tnùnigá te
dacãcu nihnu-gá ñáyi isràel núu ùhú núu
ndàhú. Te ducaⁿ-ni dacãcu nihnu-gá nchaa
ñáyi na dàña nchaa sá cuèhé sá dúhá, te
cada càhnu iní-gá nchaa yícá cuèchi-yu.

32 Te ní xiní-ndí nàcuáa ní quide-gá,
núu xiãⁿ cání-ndí cuèndú núu nchaa ñáyi,
te Espíritú Yá Ndiõxí chindèe ñaha-xi
xii-ndí càháⁿ-ndí tnúhu-gá. Te diu-ni
Espíritú-gá ní sãñaha-gã xii nchaa ñáyi
ní sàndáá iní-xi tnúhu-gá —càchí té Pèlú
ndihí dava-gá-güedé xáhaⁿ-güedẽ xii cue té
cùchiuⁿ.

33 Te sátá dúcáⁿ ñí xáhaⁿ-güedẽ xii cue
té cùchiuⁿ, te ní cudééⁿ-güedẽ, te ní
ndatnúhu-güedé sá cáhni ñaha-güedé.

34 Te ñíⁿ té cùu fariséu tnàha-dé cúu-dẽ
chiuⁿ, te nàni-dé Gamaliél, te cùu-dé mèstrú
dàcuàha-dé ñáyi nàcuáa ní chídó tnùní ndí
Moisés, te ío yĩñùhu caháⁿ ndihí ñahá-yu
xii-dé. Te ní ngúnutnĩ-dé, te ní xáhaⁿ-dẽ sá
ná quèe tnaa té Pèlú ndihí dava-gá-güedé
quehé.

35 Te ní xáhaⁿ-dẽ xii cue té cùchiuⁿ:

—Nchòhó cue té isràel, xini ñuhu-xi sá
cání vãha iní-ndó nãsa cada-ndo ndihí cue
té-ãⁿ.

36 Chi ní cunaha ñí xindecu ñíⁿ té ní xínani
Tèudás, te ní cachí-dé sá cùnùu-dé, te ní
cundihi-dé dàtná cúmí cièndú cue té, te
ñá ní cuini-güedé cuu ñíⁿnuu-güedẽ ndihí
cue té cùchiuⁿ. Te ní sahani ñaha cuè té
cùchiuⁿ-áⁿ xii té Tèudás, te ní ndihí cue

té ní xica cuu ndihí-dé ní xité nuu-güedé,
te ñá túu-gã ní quide-güedé nàcuáa ní sani
iní-güedé cada-güedé.

37 Te sátá ñí xihí té-áⁿ, te ní tnahá nduu
núcódó tnùní ñáyi. Te dàvá-áⁿ ñí xindecu
ñíⁿ té distritú Galileá ní xínani-dẽ Júdás. Te
titnĩ-güedé ní chitnahá ñahá-güedẽ xii-dé.
Te tnahá-dé ní sahani ñaha tucu cue té
cùchiuⁿ, te nchaa cue té ní xica cuu
ndihí-dé ní xité nuu-güedé.

38 Te na càchí tnúhu-í sá dáñá-ndó
cuè té-áⁿ, te ní ñá túu nãgá tnúhu
cúñaha-ndo xii-güedé, chi núu chiuⁿ
mee-güedé quidé-güedẽ te cuíta-güedé,

39 dico núu chiuⁿ Yá Ndiõxí quidé-güedẽ,
te vá ndínihnu chiuⁿ quide-güedé. Te núu
quide-güedé chiuⁿ Yá Ndiõxí, te vá nàá-ndó
ndihí-güedé, chi Yá Ndiõxí nàá ndihí-ndo
sã dúcáⁿ xiquide-ndo —càchí té Gamaliél
xãhaⁿ-dẽ xii cue té cùchiuⁿ.

40 Te nchaa-güedé ní càháⁿ sá tnũhu
ndáá càháⁿ-dé. Te dàtnùní ní nacana
tucu-güedé té Pèlú ndihí dava-gá-güedé te
ní caniha-güedẽ, te ní càháⁿ níhi-güedé, te
xãhaⁿ-güedé sá vã càháⁿ-gá-güedé tnúhu
Jèsús, te dàtnùní ní dáñá ñaha-güedé
cuánuhú-güedé.

41 Te ío ní cudíí iní-güedé, chi mee Yá
Ndiõxí ní cachí-gá sá dúcáⁿ ndòho-güedé
dacuàha-güedé ñáyi tnúhu Jèsús.

42 Te ñíⁿ nduu ñíⁿ nduu ní dácuahá-güedẽ
ñáyi xití veñùhu càhnu sá ío cùnùu ndihí
nchaa vehé-yu. Te ní xáhaⁿ-güedé xií-yu sá
Jèsús cúu-gã Crístú Yaá ní quixi ñuyú-a.

6

*Ní ndúcú-güedẽ úsá cue té cundecu
dacãñu sá cáxi ñáyi*

1 Te diu-ni dàvá-áⁿ ñí sàndáá iní vai ñáyi
tnúhu Jèsús. Te cue ñáyi griégú ní càháⁿ
cuèhé-yu cuèndá ñáyi isràel, sá ñáyi dihí
ñáyi quèe ñáyi càháⁿ tnúhu griégú ñá
túu tnahá sá cáxi-yu, chi ñá túu sãñaha
ñíⁿnuu-güedé.

2 Te cue té úxúú ní táuchíúⁿ Jèsús
dacuàha ñaha xií-yu tnúhu-gá, cue té-ãⁿ ñí
cana-güedé nchaa ñáyi sàndáá iní tnúhu
Jèsús. Te ní xáhaⁿ-güedé xií-yu:

—Nchúhú chi vá cúú dàcáhñu-ndí sá cáxi-yu, chi mee-ni tnúhu Yá Ndiöxí cáháⁿ-ndí.

³ Te nchòhó cue té ndècu ndihí-ndí ichi Xítohó Jesucristú cáháⁿ ndihí-ndo úsá cue té xíndecu iha, cue té cáháⁿ ndihí ñàhá-yu mee-ni tnúhu yíñùhu, cue té ndècu ndihí Espíritú Yá Ndiöxí, mee-ni cuè té cùtnuní váha iní-xi. Te cue té-áⁿ cuàha-ndí-güedé chiúⁿ cada-güedé dacáhñu-güedé sá cáxi-yu.

⁴ Te nchúhú mee-ni Yá Ndiöxí cáháⁿ ndihí-ndí, te mee-ni tnúhu-gá dacuàha-ndí-yu —càchí-güedé xàhaⁿ-güedé xií-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcü-yu cue té cada chiúⁿ-áⁿ. Te ñíⁿ-dé nání-dě Těvá, te ío váha sándáá iní-dé Yá Ndiöxí, te ndècu ndihí-dé Espíritú-gá. Te duha ní xínani dàva-gá-güedé: té Lípé, té Pröcoró, té Nicànór, té Tímón, té Pàrmenás, té Lăxí téé ñuú Antiòquia téé ní sándáá iní-xi sá dacuàha ñáyiú isràél te vitna ní sándáá iní-dé tnúhu Jèsús.

⁶ Te úsá cue té-áⁿ ñí sáháⁿ-güedé núu cuè téé úxúú ní táuchíúⁿ Jèsús dacuàha ñaha xií-yu tnúhu-gá, te cue téé úxúú-áⁿ ñí cáháⁿ ndihí-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiú ní sándáá iní tnúhu Jèsús cuáháⁿ-yu titní xichi cáháⁿ-yu tnúhu-gá. Te vai-gá ñáyiú ta sándáá iní-yu tnúhu-gá cuáháⁿ, te ní xíndecú-yu ndihí dava-gá ñáyiú dacuaha tnúhu-gá ñuú Jerusálén. Te titní dútú ñí sándáá iní-güedé tnúhu-gá.

Ní tñí-güedé té Těvá

⁸ Te té Těvá ní quide-dé titní núu sã vã yõ tnàhí ndàcu cada, te ní cuñúhu vihí-yu sá dúcáⁿ ñí quide-dé, te ducaⁿ ñí quide-dé chi ndècu ndihí-dé Yá Ndiöxí chíndèe ñaha-gá.

⁹ Te ní xíndecu cue téé ní xóo cunu cuechi núu ñíⁿ téé tàxi tnuní, te téé tàxi tnuní-áⁿ ñá ní xõ dañá tnàhí-dé quee-güedé núu chíúⁿ-dè, te ní xínu-ná-güedé. Te sátá xiãⁿ, te ní dácáá-güedé veñúhu-güedé, te veñúhu-áⁿ sáháⁿ ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndihí

ñáyiú distritú Àsiá. Te nchaa ñáyiú-áⁿ ñí nàá ndihí-yu té Těvá.

¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dè xií-yu, chi Espíritú Yá Ndiöxí ní chindee ñàha-xi xii-dé.

¹¹ Te ní cháhu-yu cue téé ní dácuándèhnde tnúhu ní cáháⁿ té Těvá núu-yu. Te ní xáhaⁿ-güedé sá cáháⁿ cuèhé-dé cuendá ndí Moisés ndihí cuendá Yá Ndiöxí.

¹² Te cuendá sá dúcáⁿ ñí dácuándèhnde-güedé núu ní sándáá iní-yu, te ní cudéñⁿ-yu núu tẽ Těvá. Te ní cudéⁿ cue téé cùu sacuéhé, te tnàhá cue téé dacuaha ñaha xií-yu nchaa tnúhu ní chídó tnuní ndí Moisés ní cudéñⁿ-güedé. Te ní sáháⁿ-güedé ní tñí-güedé té Těvá ndécá ñaha-güedé cuáháⁿ núu quidé cuè téé cùchiuⁿ jundá, ndihí cue téé cùu sacuéhé.

¹³ Te ndécá-yu cue téé dacuandehnde cuáháⁿ núu quidé-güedé jundá, te ní quesaha-ni tùcu-güedé cáháⁿ cuèhé-güedé, te xàhaⁿ-güedé:

—Té-a mee-ni cáháⁿ cuèhé-dé cuendá veñúhu sá ío cùnuu, veñúhu ní cuu íí, te cáháⁿ cuèhé-dé cuendá nchaa sá ñí chídó tnuní ndí Moisés.

¹⁴ Te ní tecú dóho-ndí càchí-dé sá Jèsús téé ñuú Nazàrét dangòyo-dé veñúhu cahnú sá ío cùnuu te vá dáñá-gã-dé cada-ndí nàcuáa ní cachí ndí Moisés cada-ndí —càchí-güedé xàhaⁿ-güedé.

¹⁵ Te nchaa cue téé ndècu jundá ní ndacoto váha-güedé núu tẽ Těvá. Te ní dáyèhé-xi núu-dè dàtná quidé-xi núu espíritú xínú cuèchi núu Yá Ndiöxí.

7

Té Těvá xàhaⁿ-dè sá ñà túú cuèchi-dé

¹ Te ní xáhaⁿ dütú cùnù-gá xii-dé:

—¿Ndáá tnúhu cáháⁿ-güedé cuendá-n-ãⁿ? —càchí-dé xàhaⁿ-dè.

² Te té Těvá ní xáhaⁿ-dè xii-güedé:

—Nchòhó cue ñaní tnáhà-í ndihí nchòhó cue téé cùu sacuéhé, cundedóho-ndo ñíⁿ tnúhu na cáháⁿ-í-a. Yá Ndiöxí ío cùnuu-gá, te ní cáháⁿ ndihí-gá ndí Àbrahám nacióⁿ Mesopotamiá cùtnáhá vátá quíhíⁿ-gá ndí cundecu ndí ñuú Hàrán.

³ Te ní xáhaⁿ-gã xii ndí: “Daña-n nchàa ñaní tnáhá-n, te dañá-n ñuhu-n, te quíhíⁿ-n

ɨ̃n xichi núú dánèhé ñáhà-í cundecu-n”, duha ní xáhaⁿ Yá Ndiõxí xii ndíi Àbrahám.

4 Te sátá dúcáⁿ nĩ xáhaⁿ Yá Ndiõxí xii ndíi Àbrahám, te ní ndee ndíi ñuú Câldeá, te cuáháⁿ ndíi cundecu ndíi ñuú Hârán. Te sátá nĩ xíhí tâtá ndíi, te ní xáhaⁿ Yá Ndiõxí quixi ndíi cundecu ndíi núú ndécú-ó vitna.

5 Te Yá Ndiõxí ñá túú ní sãñaha-gã ni lùha ñuhu cuu cuendá ndíi núú nĩ xíndecu ndíi. Te ní xáhaⁿ ndáá Yá Ndiõxí xii ndíi sá cuãñaha-gã ñuhu cuu cuendá ndíi, te na cùú ndíi, te ndóo ndíi nchaa ñaní tnáhá ndíi cacu túú ndéé cuèé-gá. Te ducaⁿ nĩ xáhaⁿ-gã cuèi vátá cùndècu-gá ni ɨ̃n déhe ndíi.

6 Te ní xáhaⁿ tùcu Yá Ndiõxí xii ndíi Àbrahám sá díú-ní ñaní tnáhá ndíi quíhíⁿ-yu núú xícá cùndecú-yu cúmi cièndú cuíá, te vá dáñá-yu queé-yu núú chíúⁿ-yu, te ío dandòho ñaha-güedé núú cùndècu-yu. Duha ní xáhaⁿ Yá Ndiõxí xii ndíi, te ndáá ducaⁿ nĩ cuu.

7 Te ní xáhaⁿ tùcu Yá Ndiõxí xii ndíi Àbrahám: “Yúhú dandòho-í nchaa ñáyiú na dàndòho ñaha xii cue ñaní tnáhá-n. Te dàvá-áⁿ te ndee cue ñaní tnáhá-n núú cùndècu-yu, te quixí-yu chíñuhu ñáhá-yu xii-í iha”, duha ní xáhaⁿ Yá Ndiõxí xii ndíi Àbrahám, te ndáá ducaⁿ nĩ cuu.

8 Te Yá Ndiõxí ní quide ndáá-gá ndíi ndíi Àbrahám, te ní xáhaⁿ-gã xii ndíi sá cuãha-güedé sèñá ñi nchaa landú té cuendá cunáhá-yu nàcuáa ndùu sá nĩ quide ndáá-gá ndíi ndíi Àbrahám. Núu xíáⁿ núú ùná nduu sá nĩ cacu té Isàác déhe ndíi Àbrahám, te ní sáha ndíi sèñá ñi-dé. Te ñu-ni ducaⁿ nĩ quide tucu té Isàác déhe-dé té Jàcób, te ñu-ni ducaⁿ nĩ quide té Jàcób, chí úxúú déhe-dé ní xíndecu, te nchaa-güedé ducaⁿ nĩ quide-dé. Te ndíi úxúú cue téé-áⁿ nĩ cuu-güedé ñaní tnáhá-ó.

9 Te ɨ̃n déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní díco ñaha-güedé ní queheⁿ ñaha cue té cuáháⁿ nacióⁿ Ègiptú, te Yá Ndiõxí ñá ní dàña ñaha-gá xii-dé cuíta nihnu-dé.

10 Te ní chindee ñaha-gá xii-dé ní cácu-dé cùtnáhá ní ndoho víhi-dé. Te téé yíndaha Ègiptú ío ní cudíi iní-dé té Chèé, te ní cutnùní iní-dé sá ío váha túha té Chèé, te ducaⁿ nĩ cutnùní iní-dé, chí Yá Ndiõxí ní chindee ñaha-gá xii té Chèé. Te ní xáhaⁿ tèe

yíndaha Ègiptú xii té Chèé sá díú tè Chèé coo-dé gobièrnú Ègiptú, te taxi tnùní-dé nchaa ñáyiú xínu cuechi núú tèe yíndaha Ègiptú-áⁿ.

11 Te ní quíhu tnamá nihí nacióⁿ Ègiptú ndíi nacióⁿ Cànáá, te ío ní ndohó-yu. Te nchaa ñaní tnáhá-ó nĩ xíndecu ndéé sanaha ñá ní xóo níhí-gá-yu sá cáxi-yu.

12 Te ní níhí tè Jàcób tnúhu sá ío triú Ègiptú, núu ní tendaha-dě cue déhe-dé ní sáháⁿ-güedé ní sânguaaⁿ-güedé triú-áⁿ, te dàvá-áⁿ nĩ sáháⁿ cue ñaní tnáhá-ó xito díhna nuu nacióⁿ Ègiptú.

13 Te xito cùu uú cuáháⁿ-güedé, te ní xáhaⁿ tè Chèé sá ñaní-dé cúú-güedé. Te téé yíndaha Ègiptú ní cutnùní iní-dé sá díú-ní ñaní té Chèé cúú-güedé.

14-15 Te ní cana té Chèé tâtá-dě té Jàcób ndíi nchaa ñaní tnáhá-dě. Te cùu-xi datná únídico sáhúⁿ-yu ndèca té Jàcób cuáháⁿ nacióⁿ Ègiptú núú ndécú tè Chèé, te xíáⁿ nĩ quexió-yu ní ngóo-yu. Te yàcáⁿ ní xíhí té Jàcób ndíi nchaa déhe-dé cue ñaní tnáhá-ó.

16 Te sátá nĩ cuu titní cuíá, te ní natava-güedé yiqui ndíi Jàcób ndíi nchaa déhe ndíi nchido-güedé cuáháⁿ ñuú Sìquém. Te ndíi Àbrahám sa ní cuu titní-gá cuíá sã nĩ nacuaaⁿ ndíi ñuhu núú cuè déhe ndíi Hámór. Te xíáⁿ nchíi yaú ní nachindúxi-güedé yiqui-áⁿ.

17 Te cùtnáhá vátá nátava-gá-güedé yiqui cue ndíi, te sa ta tnáhá yatni cada Yá Ndiõxí nàcuáa ní xáhaⁿ-gã xii ndíi Àbrahám cada-gá sá cúú-xí ñáyiú isràél ndécú Ègiptú, te ta cãyá víhí-yu cuáháⁿ.

18 Te dàvá-áⁿ chí ingá téé yíndaha nacióⁿ Ègiptú, te ñá túú-gã ní xíní-dé nása ní xóo cada ndíi Chèé.

19 Te téé yíndaha Ègiptú ñá ní quide ndáá-dé, chí ío ní dándóhó-dě ñaní tnáhá-ó nĩ xíndecu dàvá-áⁿ. Te ní táuchíúⁿ-dě sá xócuíñí-yu dàndóo-yu déhe yiquiⁿ cuendá ndíi-güexi cuú.

20 Te dàvá-áⁿ nĩ cacu té Moisés, te ío ní cudíi iní ñáhá Yá Ndiõxí xii-dé. Te ní xíndecu ndíi ñaha náná-dě ndíi tâtá-dě úní-ni yóo.

21 Te ndèca ñahá-yu cuáháⁿ ingá xichi, te yàcáⁿ ní dándóo ñáhá-yu xii-dé, te ní naníhí ñáhá dèhe yoco téé yíndaha Ègiptú, te ní

xito-xi-dé dàtná xító-xí ìⁿ déhe mee-xi nǐ xito-xi-dé ndéé ní sahnú-dé.

22 Te ní cutúha-dé nchaa sá xìní cue téé ègiptú, te ío váha ní sáá díquí-dě tnúhu cáháⁿ-dé ndíhi nchaa sá cádá-dě.

23 'Te cútnàhá ndécú-dě údico cuíá-dě, te ní cachí-dé sá quíhíⁿ-dé cáháⁿ ndíhi-dé cue ñaní tnàhá-dě ñáyíu isràél.

24 Te ní xiní-dé ní caniha ìⁿ téé ègiptú xii ìⁿ téé isràél, te ñá ní cùndee iní-dé cundehe-dě nūu ní sáháⁿ-dé ní chindee-dě téé isràél, te ní sahní-dé téé ègiptú,

25 chi ní cachí Yá Ndiöxí sá díú-dě dacácu-dé ñaní tnàhá-dě ñáyíu isràél nūú cuè téé ègiptú. Te ní sani iní-dé sá cùtnuní iní-yu nàcuáa ní xáhaⁿ Yá Ndiöxí xii-dé, dico ñá túú ní cùtnuní iní-yu.

26 Te nduu tněé ní xiní-dé nàá úú cue téé isràél, te ñá túú ní tnàhá iní-dé nàá-güedé nūu ní xáhaⁿ-dě xii-güedé: “¿Ná cuèndá ducaⁿ xìnàá-ndó? ¿Náa ñá díú ndìmee-ndo nūu ducaⁿ xìnàá-ndó?” Duha ní xáhaⁿ tē Moisés xii-güedé.

27 Te téé ndècuèchi ní sáháⁿ-dé ní chindaha ñihnu-dé té Moisés ìⁿ xio, te ní xáhaⁿ-dě: “¿Ná cúú yòhó nūu véxi-n tàxi tnuní ñáhá-n?”

28 Te tnàhá-ni tucu yúhú cahni-n dàtná ní sahní-n tē ègiptú icu càhaⁿ-n á”, duha ní xáhaⁿ-dě xii té Moisés.

29 Te sá dúcáⁿ nǐ cáháⁿ téé isràél nūu ní yúhú té Moisés ní xinú-dé cuáháⁿ-dé ní sáá-dé nàcióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe téé-dé.

30 'Te sáta nǐ xínu údico cuíá, te ní sáháⁿ té Moisés ìⁿ xio yucu Sinái. Te yàcáⁿ ní xiní-dé ìⁿ tnutàú nchícúⁿ ñuhú, te xití itá ñuhú-áⁿ nǐ xiní-dé yíhí ìⁿ espíritú xínú cuèchi nūú Yá Ndiöxí.

31 Te òré ní xiní-dé sá yíhí-xí xití itá ñuhú-áⁿ, te ní cuñúhu vñhi-dé sá nǐ xiní-dé espíritú-áⁿ xití itá ñuhú-áⁿ, te ní sàndehe-gá-dé, te ní xíndéhé vñha-dé. Te ní tecú dóho-dé ní cáháⁿ Yá Ndiöxí, te xáhaⁿ-gã xii-dé:

32 “Yúhú cúú-í Ndiöxí ní cáháⁿ ndíhi cue ñaní tnàhá-n ndéé sanaha, ndíi Abrahám ndíhi ndíi Isàac ndíhi ndíi Jácób, ndíhi dava-gá cue ñaní tnàhá-n. Nchaa cue ndíi-áⁿ nǐ xóo cáháⁿ ndíhi-í.” Duha ní xáhaⁿ-gã xii té Moisés. Te ní quidi ñaha-xi xii

té Moisés sá nǐ yúhú-dé, te ñá ní cùyíi-gá-dé cundehe-dě tnutàú nchícúⁿ ñuhú-áⁿ.

33 Te Yá Ndiöxí ní xáhaⁿ-gã xii-dé: “Queñuhu chàu-n, chi nūú ñuhú nǐ cuu íí nùtní-n.

34 Te yúhú ndéhè-í sá ío ndòho nchaa ñáyíu cùu cuendá-í, ñáyíu ndècu nacióⁿ Ègiptú. Te ní tecú dóho-í sá ío ndàhú xícáháⁿ-yu, nūu xíáⁿ véxi-í càchí tnúhu-í sá nùhú-n nàcióⁿ Ègiptú cuendá ndeñuhú-n-yu yàcáⁿ.” Duha ní xáhaⁿ Yá Ndiöxí xii té Moisés.

35 'Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuèndá véxi-n tàxi tnuní ñáhá-n xii-ndí?” Duha ní xáháⁿ-yu xii té Moisés. Te díu-ni té Moisés ní tendaha ñaha Yá Ndiöxí ní sáháⁿ-dé dacácu-dé ñáyíu isràél nàcióⁿ Ègiptú cuèi ñá ní sàndáá iní ñáhá-yu xii-dé. Dico ní taxi tnuní-dé-yu, chi ducaⁿ nǐ xáhaⁿ-gã òré ní xiní-dé espíritú xínú cuèchi nūú-gã xití tnutàú nchícúⁿ ñuhú.

36 Te té Moisés ní ngúita-dé ní guide-dé sá vã yòo tnàhí ndàcu cada, te ní cuñúhu vñhi-yu sá dúcáⁿ nǐ guide-dé, te ducaⁿ nǐ guide-dé Ègiptú ndíhi Làmar Tícuèhé. Te ní ngódó nūú-dě nūú-yu ní queé-yu Ègiptú cuáháⁿ-yu ìⁿ ichi xití yucu nūú vã yòo tnàhí ndècu, te ní xíhi-yu údico cuíá xití yucu-áⁿ, te xíáⁿ nǐ xóo cada-dé sá vã yòo tnàhí ndàcu cada.

37 Te díu-ni té Moisés ní xáhaⁿ-dě xii cue ñaní tnàhá-dě dàvá-áⁿ: “Yá Ndiöxí cada-gá te coo ìⁿ ñaní tnàhá-ndó ndéé cuèé-gá, te téé-áⁿ cáháⁿ-dé tnúhu-gá nūú-ndó dàtná cuíní-ndó nǐ cachí-gá quidé yúhú, te ío xìní ñuhu-xi cundedóho-ndo tnúhu cáháⁿ-dé”, duha ní xáhaⁿ tē Moisés xii-yu dàvá-áⁿ.

38 Te díu-ni té Moisés ní xíndecu ndíhi-dé ñáyíu isràél xití yucu, te ní sáá-dé yucu Sinái, te xíáⁿ nǐ quixi ìⁿ espíritú xínú cuèchi nūú Yá Ndiöxí ní cáháⁿ ndíhi ñaha-xi xii-dé, te yàcáⁿ ní dácuáhá ñaha-xi tnúhu-gá, te díu-ni tnúhu-áⁿ nǐ ndóo dàcuaha-o.

39 'Te cue ñaní tnàhá-ó nǐ xíndecu ndéé sanaha ñá ní sàndáá iní-yu té Moisés, te ñá ní ndéé iní ñáhá-yu xii-dé, chi ní cuíní-yu nuhú tucú-yu ñuú Ègiptú cundecú-yu.

40 Te òré ndécú tē Moisés yucu ní xáháⁿ-yu xii ñaní-dé té Àrón: “Cadúha-n

ñá yiu ní xica nchido veñúhu dóó-ǎⁿ ñí xíhí, te ní ndóo ndihí dava-gá-yu. Te ducaⁿ-ni ndècu-xi ní cacu té Dàvií, té ní xíndaha ñàha xií-yu.

41 Te dàvá-áⁿ ñí cadúha-güedé ñⁿ chëhlu mee-ni dǐhúⁿ cuàáⁿ, te ní sahani-güedé ñⁿ ùú quiti nchìto ní quide càhnu-güedé chëhlu-áⁿ. Te ío ní cudíí ìní-yu quiti-áⁿ, chi ní cachí-yu sá díú-ní ndiöxí cúú-dí.

42 Te sá dúcáⁿ ñí quidé-yu, xiǎⁿ ní dáñá ñàha Yá Ndiöxí xií-yu. Te ní dáñá-gǎ ní xóo cada càhnú-yu nchícanchii, ndihí yóó, ndihí nchaa chódíní. Te duha ní chídó tñùní ñⁿ té ní xóo cáháⁿ tñúhu Yá Ndiöxí ndéé sanaha nàcuáa ní xáhaⁿ-gǎ xii ñá yiu dàvá-áⁿ:

Nchòhó ñá yiu isràél, ní cuu údico cuía yíhí-ndó yùcu,

te ní sahani-ndo quiti-ndo ní quide càhnu ñàha-ndo xii-í cáháⁿ-ndó, dico ñáhá chi ní sahani-ndo-güèdè ní quide càhnu-ndo sá ñí cadúha mee-ndo.

43 Te ní cadúha-ndo ñⁿ veñúhu líhli, te ní sanutñí-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ñⁿ chódíní, te quiti-ǎⁿ càchí-ndó sǎ cúú-dí ndiöxí Rènán, te ndí ndùú sá ñí cadúha-ndo-ǎⁿ ñí quide càhnu-ndo.

Te cuèndá sá dúcáⁿ ñí quide-ndo te yúhú queñuhu ñàha-í xii-ndo quíhíⁿ-ndó cùndecu-ndo ñngá xio nàción Babiloniá.

Duha ní xáhaⁿ Yá Ndiöxí xií-yu, te ducaⁿ ñí chídó tñùní té ní xóo cáháⁿ tñúhu-gá.

44 Te xití yucu-áⁿ ñí dácáá-güedè ñⁿ veñúhu vehe dóó. Te vehe-áⁿ ñí cuu-xi ñⁿ sá cùtñùní ìní-yu sá Yá Ndiöxí ndécú ndihí ñàha-gá xií-yu. Te vehe-áⁿ ñí dácáá-güedè nàcuáa ní xáhaⁿ Yá Ndiöxí xii té Moisés, chi ní dánèhé ñáhá-gǎ xii-dé nàcuáa dacàa-güedé.

45 Te sátá ñí xíhí nchaa cue téé-áⁿ, te ní ndóo ndihí nchaa déhe-güedé veñúhu-áⁿ. Te ní xido tucu-güedé veñúhu-güedé cuáháⁿ-güedé, te cuáháⁿ ndihí-güedé té Jòsué núú cùndécú-yu. Te sátá ñí quexió-yu, te ní dácùnñú-yu ñá yiu dii ñùú-xi-áⁿ chi mee Yá Ndiöxí ní chindee ñàha-gá xií-yu. Te sátá ñí ndihí nchaa

ñá yiu ní xica nchido veñúhu dóó-ǎⁿ ñí xíhí, te ní ndóo ndihí dava-gá-yu. Te ducaⁿ-ni ndècu-xi ní cacu té Dàvií, té ní xíndaha ñàha xií-yu.

46 Te Yá Ndiöxí ní cudíí víhí ìní-gá té Dàvií. Te ní xicáⁿ tñúhú-dè núú-gǎ ñúu cuu dacàa-dé veñúhu cuu cuèndá-gá, chi ñⁿ-ni Yá Ndiöxí ní xóo cada càhnu té Dàvií ndihí té Jácób, ñaní tñáhá-ó ñí xíndecu ndéé sanaha víhi-gá.

47 Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salómón, chi ní dáñá-gǎ ní dácáá-dè veñúhu cuu cuèndá-gá

48 cuèi ñá túú sàcùndecu-gá veñúhu dàcaa cue téé ñuyíú-a, chi ndèni xiáⁿ ndécú-gǎ chi espíritú cúú-gǎ. Te duha ní chídó tñùní té ní xóo cáháⁿ tñúhu Yá Ndiöxí ndéé sanaha nàcuáa ní cáháⁿ-gá:

49 Yúhú táxi tñùní-í andíu ndihí ñuyíú, te xiǎⁿ ñúu nchòhó vá ndácú-ndó chíhi ñàha-ndo xití veñúhu dàtná quidè-yu sá càchí-yu cùu ndiöxí-yu ní cadúha-yu.

Te ñá túú xini ñuhu-í núú ndétátú-í,

50 chi yúhú ní cadúha-í nchaa sá ío ñuyíú-a. Duha ní cáháⁿ Yá Ndiöxí, te diu-ni ducaⁿ ñí chídó tñùní té ní xóo cáháⁿ tñúhu-gá — duha ndùu nchaa tñúhu ní xáhaⁿ tē Tévá xii-güedé.

51 Te ní xáhaⁿ tucu-dé:

—Nchòhó, ío sàá ìní-ndó chi quide-ndo datná quidè ñá yiu ñá túú cùu ñá yiu isràél chí ñá túú tédóho-ndo tñúhu càháⁿ Yá Ndiöxí, chí ñá cuimí-ndó quíndáá ìní-ndó tñúhu-gá, mee-ni cùu úhú ìní-ndó Espíritú-gá dàtná ní xóo cada cue ñaní tñáhá-ndó ñí xíndecu ndéé sanaha.

52 Chi cue téé-áⁿ ío ní xóo dandòho-güedé nchaa cue téé ní xóo cáháⁿ tñúhu Yá Ndiöxí ndéé sanaha. Te ní sahani-güedé nchaa cue téé ní cáháⁿ sá quíxí Crìstú ñuyíú-a, te Yaá-áⁿ ñà túú cuèchi-gá. Te diu-ni ducaⁿ ñí quide-ndo Crìstú cùtñàhá ní quixi-gá ñuyíú-a, chí ní sáha cuèndá-ndó-gǎ núú cuè téé ní cuu úhú ìní ñáhá xii-gá ní sahani ñàha-güedé.

53 Te ndècu ndihí-ndo tñúhu ní chídó tñùní ndí Moisés nàcuáa ní xáhaⁿ espíritú xínú cuèchi núú Yá Ndiöxí xii ndí, te ni dùcaⁿ ñá túú sàndáá ìní-ndó tñúhu-áⁿ ñúu

ní sahani-ndo Jèsús. Te ñi-ndo ni tnúhu-án ndécú ndíhi-ndo ndéé vitna —cachí té Těvá xáhaⁿ-dē xii-güedé.

Ní sahani-güedé té Těvá

⁵⁴ Te sá dúcáⁿ nǐ xáhaⁿ tē Těvá xii-güedé, te ní cudééⁿ víhí-güedě núú-dě, núú ní quide rúhñú-güedě núhu-güedé sá sätú iní-güedé.

⁵⁵ Te té Těvá ndécú ndíhi-dé Espíritú Yá Ndiöxí, te ní ndacoto váha-dé andíu, te ní xiní-dé súúni dátásaⁿ-xi núú ndécú Yá Ndiöxí, te ní xiní-dé Xítohó Jesucristú nútníi-gá xio cùha Yá Ndiöxí.

⁵⁶ Te ní xáhaⁿ tē Těvá xii-güedé:

—Chí cündèhe andíu chí yúhú ndéhè-í Xítohó Jesucristú nútníi-gá xio cùha Yá Ndiöxí, te ñi-ndo ni gá cúu-gá ñani tnáha-ndó nchàa-ndo —cachí-dé xáhaⁿ-dē.

⁵⁷ Te ní sadí-güedé dóho-güedé cuendá sá ñá ní tnàhá iní-güedé cundedóho-güedé tnúhu càháⁿ-dé, te uuⁿni ní cuáá-güedé, te ní taxi ndaha ñaha-güedé xii-dé

⁵⁸ ndécá ñaha-güedé cuáháⁿ ndéé ñⁿ xio yuhu ñúú, te yacáⁿ ní sáñaha-güedé yúú xii-dé. Te ndècu ñⁿ té cuechi nàni-dé Sàulú, te té-áⁿ nǐ quide cuendá-dé dóo-güedě cuendá ní nune ndaha-güedé ní sáñaha-güedě yúú xii té Těvá.

⁵⁹ Te òré sáñaha-güedě yúú, te ní càháⁿ ndíhi-dé Xítohó Jesucristú te xáhaⁿ-dē:

—Yòhó Xítohó Jesucristú, naqueheⁿ-n iní-í —cachí-dé xáhaⁿ-dē xii-gá.

⁶⁰ Te ní ngüñí xítí-dē, te níhi ní càháⁿ-dé, te xáhaⁿ-dē:

—Yòhó Xítohó Jesucristú, vá técuèchi-n cuè té-a sá dúhá quide ñaha-güedé xii-í —cachí-dé xáhaⁿ-dē xii-gá.

Te xiáⁿ-ná ní càháⁿ-dé, te ní xíhí-dé.

8

Té Sàulú chíhí-dē ñáyíu sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá nǐ sahani-güedé té Těvá.

Te ñi-ndo ni nduu-áⁿ nǐ cuu níhi cuendá nchaa ñáyíu sàndáá iní-xi tnúhu Jèsús ñúú Jerusalén. Te ní ndíhi-yu ní xité nuu cuáháⁿ-yu distrítú Júdeá ndíhi distrítú Sàmariá. Te cue téé ní táuchíúⁿ Jèsús dácuàha ñaha xií-yu tnúhu-gá ní ndóo-güedé ñúú Jerusalén.

² Te nchaa cue téé càháⁿ ndíhi Yá Ndiöxí ní chindúxi-güedé ndí Těvá. Te ío ní ndáhyú ñáyíu ní sàndáá iní tnúhu Jèsús sá nǐ xíhí ndí.

³ Te té Sàulú ío dándoho-dé-yu, chí ndí vehe ndí vehe cuáháⁿ-dé cuátníi-dé cuèi téé cuèi ñadíhí ndécá-dē cuáháⁿ vecaá.

Càháⁿ-yu tnúhu Yá Ndiöxí distrítú Sàmariá

⁴ Te nchaa ñáyíu ní xité nuu cuáháⁿ-yu càháⁿ-yu tnúhu Jèsús nchaa núú quéxió-yu.

⁵ Te té Lìpé cuáháⁿ-dé distrítú Sàmariá càháⁿ-dé tnúhu Xítohó Jesucristú Yaá ní tendaha Yá Ndiöxí ní quixi ñuyíú-a.

⁶ Te ío vai núú sá vǎ yòo tnàhí ndàcu cada ní quide-dé, te ní cuñúhu víhí-yu, te ní xíndedóho váha-yu nchaa tnúhu ní càháⁿ-dé.

⁷ Te vai ñáyíu yíhi ñaha espíritú cündíhi yucu ñávàha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vai ñáyíu cùhú ñá cúu-gá candá nihnú-yu ndíhi ñáyíu yacua ní quide tátna-dé, te ní ndúha-yu.

⁸ Te sá dúcáⁿ nǐ càháⁿ-dé tnúhu Jèsús te ní quide tátna-dé-yu, xiáⁿ ío ní cudí iní ñáyíu ñúú-áⁿ.

⁹ Te ñi-ndo ni ñúú-áⁿ ndécú ñⁿ téé nàni Xímú, te té-áⁿ xiní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyíu distrítú Sàmariá sá dúcáⁿ quide-dé, te ní cachí-dé sá díú-ní-dē cúnú.

¹⁰ Te nchaa ñáyíu cuèi ñáyíu cuica te cuèi ñáyíu ndàhú ío nèhé-yu sá yíñúhu núú-dē, te xítnàhá-yu:

—Té-áⁿ ío chíndee ñaha Yá Ndiöxí xii-dé núu vai núú sá quidé-dē —cachí-yu xítnàhá-yu.

¹¹ Te ní sàndáá iní-yu nàcuáa ní xóo cada ndúu-dé, te ní xóo cuñúhu víhí-yu, te ní cuu naha dùcaⁿ-ni dandahú ñáhá-dē xií-yu.

¹² Te té Lìpé ní càháⁿ-dé tnúhu Xítohó Jesucristú, te ní xáhaⁿ-dē xií-yu sá Yá Ndiöxí cuíní-gá ndíhu ndaha ñaha-gá xií-yu. Te cuèi téé cuèi ñadíhí ní sàndáá iní-yu tnúhu-gá, te ní sanduté-yu.

¹³ Te tnàhá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndíhi té Lìpé, te ní cuñúhu-dé chí titní núú sá vǎ yòo tnàhí ndàcu cada ní quide té Lìpé, te ní cuñúhu víhi nchaa ñáyíu.

14 Te dava-gá cue téé ní táuchíuⁿ Jèsús dacuàha ñaha xii ñáyiú tnúhu-gá ní níhí-güedě tnúhu sá ñáyiú distritú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndihí té Juàá cuáháⁿ-güedé distritú Sàmariá.

15 Te ní quexìo-güedé, te ní cáháⁿ ndihí-güedé Yá Ndiöxí ní xicáⁿ-güedé Espiritú-gá quixi cundecu ndihí-yu.

16 Chi ní ñⁿ-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé.

17 Te òré ní sacáⁿ ndodo-güedé ndaha-güedé díquǐ-yu, te ní quexìo Espiritú-gá ní ngúndecu ndihí-yu.

18 Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuíní-dé cuáñaha-dě díhúⁿ xii té Pèlú ndihí té Juàá ní cùu.

19 Te ní xáhaⁿ-dè:

—Chindee ñaha-ndo cuendá nděda-ni cáa-yu cacáⁿ ndodo-í ndaha-í díquǐ-yu, te níhí-yu Espiritú Yá Ndiöxí cundecu ndihí-yu —càchí-dé xáhaⁿ-dè xii-güedé.

20 Te té Pèlú ní xáhaⁿ-dè xii-dé:

—Yòhó cuíta nihnu-n ndihí díhúⁿ-n, chi cuíní-n cuàaⁿ-n sá vaha quide Yá Ndiöxí.

21 Yòhó vá cúu càda-n chiuⁿ quide-ndí, chi ñá túú ndècu váha iní-n nùú Yá Ndiöxí.

22 Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n nùú Yá Ndiöxí sá ná cáda càhnu iní-gá tnúhu ní cáháⁿ-n.

23 Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dè xii té Xímú.

24 Te ní xáhaⁿ tē Xímú xii-güedé:

—Cáháⁿ ndàhú-ndó nùú Yá Ndiöxí sá ñá túú ná tnahá-í sá dúcáⁿ ní cáháⁿ-í —càchí-dé xáhaⁿ-dè.

25 Te té Pèlú ndihí té Juàá ní cáháⁿ-güedé tnúhu Yá Ndiöxí nùú ñáyiú ñuú-áⁿ. Te ní xáhaⁿ-güedé nchaa nàcuáa ní quide Jèsús ní xiní-güedé òré ní xica cuu-gá ñuyíú-a. Te ní tñi-güedé ichi cuánuhú-güedé ñuú Jerusálén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihí ñⁿ téé ñuú Etiòpiá

26 Te ñⁿ espíritú xínú cuèchi núú Yá Ndiöxí ní quexìo-xi ñuú Jerusálén ní xáhaⁿ-xi xii té Lìpé:

—Cada túha-n chi quée nuu-n ñuú Gázá, dico mee-ni xiti yucu cuáháⁿ ichi —càchí-xi xáhaⁿ-xi xii-dé.

27 Te ní xica-dé cuáháⁿ-dé, te ní nat-nahá-dé ñⁿ téé nacióⁿ Etiòpiá ñuhú-dě ichi. Te cùu-dé tesorèrú xínú cuèchi-dé núú ñⁿ ñadihí ñaha yíndaha nacióⁿ Etiòpiá, te ñaha-áⁿ nání-áⁿ Càndaçé.

28 Te téé etiòpiá-áⁿ ñí sáháⁿ-dé ñuú Jerusálén ní cáháⁿ ndihí-dé Yá Ndiöxí, te ñuhú-dé ichi cuánuhú-dé ñuú-dé ñuhú-dě carrètá, te dàcuaha-dé tnúhu ní chídó tñuní ndí Chaiá téé ní xóo cáháⁿ tnúhu Yá Ndiöxí ndéé sanaha.

29 Te ní xáhaⁿ Espiritú Yá Ndiöxí xii té Lìpé:

—Quíhíⁿ tuha-n càrretá-áⁿ —càchí Espiritú-gá xáhaⁿ-xi xii-dé.

30 Te té Lìpé ní sátuha-dé carrètá-áⁿ, te ní tecú dóho-dé nàcuáa cáháⁿ téé etiòpiá-áⁿ, téé ñuhú carretá-áⁿ dácuàha-dé nàcuáa ní chídó tñuní ndí Chaiá. Te ní xáhaⁿ tē Lìpé xii té etiòpiá-áⁿ:

—¿Técú tñuní-n nchàa tnúhu dàcuaha-n-áⁿ? —càchí té Lìpé xáhaⁿ-dè xii-dé.

31 Te ní xáhaⁿ tē etiòpiá:

—¿Nása tecú tñuní-í te vá yòo dànehé ñáhá xii-í? Ta quène iha coo-n chi danèhé ñáhá-n —càchí-dé xáhaⁿ-dè xii té Lìpé.

Te cuásaá té Lìpé núú carrètá ní ngóo-dé.

32 Te ndèdóho-dé nàcuáa dàcuaha téé etiòpiá-áⁿ nàcuáa ní chídó tñuní ndí Chaiá núú tütú Yá Ndiöxí núú càchí-xi:

Dàtná quidé ñⁿ mbéé cada-dé òré can-deca ñaha-güedě xii-dé quíhíⁿ cahni ñaha-güedě chi ñá túú ñá cada-dé, dàtná cuíní-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güedě chi ní vá cáháⁿ-dè.

33 Te mee-ni cùdiquí ndeé ñáhá-güedě xii-dé, te ní vá ndúcú tñuhú-güedé núú-dě nùu ndáá ndècuèchi-dé.

Te ío cuu nduu cuihna iní cue ñaní tñáhá-dě, chi cahni ñaha-güedě xii-dé ñuyíú-a.

Duha cáháⁿ tutú ní dácuáhá tē etiòpiá ní xíndedóho té Lìpé.

34 Te ní xáhaⁿ tucu téé Etiòpiá xii té Lìpé:

—Cundee ìní-n càchí tnúhu-n yòo cuncenehe tée ní cáháⁿ tnúhu Yá Ndiöxí ndéé sanaha, núu cáháⁿ-dé cuëndá méé-dě àdi cáháⁿ-dé cuëndá ingá ñáyiú —càchí tée etiòpiá-án xăhaⁿ-dě xii té Lìpé.

³⁵ Te té Lìpé ní cani-dé cuëndú núú tée etiòpiá nàcuáa ní cáháⁿ ndíi Chàíá nàcuáa cada Jèsús òré quixi-gá ñuyíú-a. Te ní xáhaⁿ-dě nàcuáa ndùu tnúhu Jèsús ndihì nàcuáa ní quide-gá.

³⁶ Te ñùhu-güedé ichi cuáháⁿ-güedé ní naníhí-güedé ìⁿ xichi núú ñúhú ndùte, te ní xáhaⁿ tée etiòpiá:

—Iha ñùhu ndute, ¿te vá cúú cuàndute-í iha-ăⁿ? —càchí-dé xăhaⁿ-dě xii té Lìpé.

³⁷ Te xăhaⁿ tē Lìpé:

—Te núu sàndáá ndisa iní-n Jèsús, te cuu cuandute-n —càchí-dé xăhaⁿ-dē.

Te ní xáhaⁿ tée etiòpiá:

—Sàndáá ndisa iní-í sá Dēhe Yá Ndiöxí cúú Xítohó Jesucristú —càchí-dé xăhaⁿ-dē.

³⁸ Te ní ngani-dé carrètá, te ní nuu-güedé ndi ndùu-güedé, te cuánguee-güedé xití ndute, te ní dácuándute ñaha té Lìpé xii-dé.

³⁹ Te òré ní nene-güedé xití ndute, te ndèca ñaha Espiritú Yá Ndiöxí xii té Lìpé cuáháⁿ. Te ñá túú ní xìní tée ní sandute-án ndéé ichi cuáháⁿ té Lìpé. Te ío ní cudíi ìní-dé sá ñí natuha-dé ichi Yá Ndiöxí, te cuánda-dé núú carrètá-dé cuánuhú-dé.

⁴⁰ Te ní quexio té Lìpé ñuú Àzotó, te ndi tnahá ñuú ndi tnahá ñuú cuáháⁿ-dé cáháⁿ-dé tnúhu Yá Ndiöxí, te ní yáha-dé cuáháⁿ-dé ní quexio-dé ndéé ñuú Cèsareá.

9

Té Sàulú ní tuha-dé ichi Xítohó Jesucristú (Hch. 22:6-16; 26:12-18)

¹ Te té Sàulú mee-ni cáháⁿ cuèhé-dé cuëndá ñáyiú ní sàndáá iní tnúhu Jèsús, te cuíní-dé cahni ñaha-dě xii-yu. Te ní sáháⁿ-dé núú dütú cùnù-gá,

² te ní xáhaⁿ-dē sá cádũha dütú-ăⁿ ìⁿ tutú canehe-dé quíhíⁿ cuáha-dé cue tée xindeé nchito veñúhu ñuú Dàmascú, chi cuíní-dé tñi-dé nchaa ñáyiú dàcuaha tnúhu Xítohó Jesucristú candeca ñaha-dě quíhíⁿ ñuú Jerusalén.

³ Te ní xica-dé cuáháⁿ-dé tá cùyatni-dé ñuú Dàmascú, te uuⁿ ní quee ñuhú andiú, te ní dáyehé-xi ndéé núú nùtni-dé.

⁴ Te ní nduá-dé ndéé ñuhu, te ní tecú dóho-dé cáháⁿ ìⁿ sá cáháⁿ núú ñínu, te xăhaⁿ-xi xii-dé:

—Yòhó Sàulú, ¿ná cuëndá cúú ùhú iní ñáháⁿ-n xii-í te dândoho ñaha-n? —cachí sá cáháⁿ-án xăhaⁿ-xi xii-dé.

⁵ Te ní xáhaⁿ-dē:

—¿Ná cúú yòhó sá cáháⁿ-án-i? —càchí-dé xăhaⁿ-dē.

Te ní xáhaⁿ sá cáháⁿ xii-dé:

—Yúhú cúú-í Jèsús tée cùu úhú iní-n. Te ío dândoho-n mee-n, chi dàtná quidé ndicutu quide-n, chi quiti-án ñu na cùxi-güedé-di pùyá te sáha-di patadá núú-xi, te quide úhú-di mee-di. Te ducaⁿ sätnahá-xi cùu yohó chi ñá túú sàndáá iní ñáháⁿ-n xii-í —càchí sá cáháⁿ-án xăhaⁿ-xi xii-dé.

⁶ Te té Sàulú ní quidi ñaha-xi xii-dé sá ñí yùhú-dé, te ní xáhaⁿ-dē:

—Xítohó Jesucristú, ¿te ná cuíní-n càda-í-i? —càchí-dé xăhaⁿ-dē.

Te Jèsús ní xáhaⁿ-gă xii-dé:

—Ndacóo, te quíhíⁿ-n ñúú-ăⁿ, te yácáⁿ tecú tnúhu-n ñá cúú sá cádá-n —càchí-gá xáhaⁿ-gă xii-dé.

⁷ Te cue tée cuáháⁿ ndihì té Sàulú ní tecú dóho-güedé cáháⁿ ìⁿ sá cáháⁿ, dico vá yòo tñahí ni xìní-güedé, te ní yùhú víhí-güedé, te ñá túú tñahí ni cáháⁿ-güedé.

⁸ Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú.

⁹ Te yácáⁿ ní xíndecu-dé úní nduu, te ñá ní cùu tñahí cundehe-dě, te ñá túú ñá ní xèxi-dé, te ñá túú ní xihí-dé ndute.

¹⁰ Te ndècu tée sàndáá iní tnúhu Jèsús ñuú Dàmascú, nání-dě Ananiás, te ní sáháⁿ Jèsús núú sàní-dé, te ní xáhaⁿ-gă xii-dé:

—¡Ananiás! —càchí-gá xáhaⁿ-gă.

Te ní xáhaⁿ-dē:

—¿Yúhú cáháⁿ ndihì-n-ăⁿ? —càchí-dé xăhaⁿ-dē.

¹¹ Te ní xáhaⁿ-gă:

—Ndacuíñí, te quíhíⁿ-n ìⁿ chiuⁿ ichi núú dánani-güedé Ichi Ndáá, te yácáⁿ nanducu-n vehe té Júdás, chi vehe tée-án ndécú ìⁿ tée ñuú Tàrsú nání-dě Sàulú, te tée-án sa cáháⁿ ndihì ñaha-dě xii-í.

¹² Te tée-án ñí dácótó ñaha-xi sá ñí xìní ñáháⁿ-dě xii-n ñí quexio-n núú ndécú-dě, te ní sacáⁿ ndodo-n ndàha-n díquí-dě, te ducaⁿ

te ní nacaáⁿ núú-dě ní dácótó ñàha-xi xii-dé —càchí-gá xáhaⁿ-gã.

¹³ Te té Ananiás ní xáhaⁿ-dě:

—Yòhó Xítohó Jesucristú, càchí tnúhu-í xii-n sã ní níhí-í tnúhu nàcuáa quide-dé sá ïo quide úhú-dé ñáyíu càháⁿ ndihí-n ñúú Jerusálén.

¹⁴ Chi nèhe-dé tutú ní sãñaha cuè dútú cúnúu cuendá níhí-dě nàcuáa cada-dé tñi-dé nchaa ñáyíu sãndáá iní ñáhá xii-n —cachí-dé xáhaⁿ-dě xii-gá.

¹⁵ Te Jèsús ní xáhaⁿ-gã xii-dé:

—Quihíⁿ-n ndàtnúhu-n ndihí-dé, chi cuiní-í cada-dé chiúⁿ-í, quihíⁿ-dé càháⁿ-dé tnúhu-í núú cuè ñáyíu isràél, ndihí núú cuè ñáyíu ñá túú cùu ñáyíu isràél, ndihí núú cuè tée yìndaha ñaha xii-yu.

¹⁶ Te yúhú cùñaha-í xii-dé sá ndóhó vihi-dé cuendá-í —càchí-gá xáhaⁿ-gã xii té Ananiás.

¹⁷ Te cuáháⁿ té Ananiás vehe núú ndécú tè Sàulú te ní sacáⁿ ndodo-dé ndaha-dé díquí tè Sàulú, te ní xáhaⁿ-dě:

—Yòhó té Sàulú tée ndècu ndihí-í ichi Xítohó Jesucristú, diu-ni Xítohó Jesucristú Yaá ní càháⁿ ndihí ñaha xii-n ichi ní tendaha ñaha-gá véxi-í cuendá cacáⁿ táhú-í núú-gã cuendá-n te ndúha núú-n, te dàtnúú quixi Espiritú-gá cundecu ndihí-n —càchí-dé xáhaⁿ-dě.

¹⁸ Te dàtná sá ní xócání-ó ñiⁿ sá ndèdí núú-dé ní quide ñaha-xi xii-dé, te ní nacaáⁿ núú-dě, te ní sandute-dé.

¹⁹ Te ní xexi-dé, te ní naníhí ndéé-dě, te titní nduu ní xíndecu ndihí-dé ñáyíu ní sãndáá iní tnúhu-gá ñúú Dàmascú.

Té Sàulú dácuaⁿ-de ñáyíu tnúhu Yá Ndiöxí ñúú Dàmascú

²⁰ Te sátá ñi ndúha núú-dě, te ní sáháⁿ-de veñúhu cue ñáyíu isràél ní xáhaⁿ-dě sá Jèsús cúú-gã Déhe Yá Ndiöxí.

²¹ Te nchaa ñáyíu ní xíndedóho tnúhu ní càháⁿ-de, te ní cuñúhu vihi-yu, te ní xítñahá-yu:

—Diu té-ãⁿ ní sahní-dé ñáyíu ní xóo chiñuhu ñaha xii Jèsús ñúú Jerusálén. Te ní quixi-dé iha ní cuiní-dé tñi ñaha-dě xii-yu candeca ñaha-dě quihíⁿ núú cuè dútú cúnúu ni cuu —cachí-yu xítñahá-yu.

²² Te ió iní-gá té Sàulú xáhaⁿ-dě xii-yu sá díú Jèsús cúú-gã Cristú Yaá ní tendaha

Yá Ndiöxí ní quixi ñuyíu-a, te xíáⁿ ñá ní níhí ñáyíu isràél ndécú ñúú Dàmascú tnúhu càháⁿ-yu, te ní cuñúhu vihi-yu.

Té Sàulú ní dáxió-dě núú ñáyíu isràél

²³ Te sátá ñi cuu titní nduu, te ní ndatnúhu cue tée isràél sá càhní-güedě té Sàulú.

²⁴ Te té Sàulú ní níhí-dě tnúhu nàcuáa càháⁿ-güedé cada ñaha-güedě xii-dé, te cuèi nduu cuèi niú néhé cuendá-güedé yuyèhe núú ñúdòco ndóho yuhu ñúú cuendá cuiní-güedé tñi ñaha-güedě xii-dé te cahni ñaha-güedě.

²⁵ Te ñiⁿ niú ndécá ñaha cue tée ní sãndáá iní-xi tnúhu Jèsús cuáháⁿ ndéé núú ñúdòco ndóho yuhu ñúú. Te ní sáá-güedé núú ndóho, te ní chihí ñaha-güedě xii-dé xití tídihi te ní dándèe ñaha-güedé núú ñúhú, te ní quene-dé cuáháⁿ-de.

Té Sàulú ndécú-dě ñúú Jerusálén

²⁶ Te té Sàulú ní nasáá-dé ñúú Jerusálén, te cuiní-dé chitnahá-dé ñáyíu sãndáá iní tnúhu Jèsús, te ní yúhú-yu chi ní càháⁿ-yu sá dándàhú ñáhá-dě sá sãndáá iní-dé Jèsús.

²⁷ Te té Bèé ndécá-dě té Sàulú cuáháⁿ núú ndécú cuè tée ní táuchíúⁿ Jèsús dácuaⁿha ñaha xii-yu tnúhu-gá. Te ní caní té Bèé cuendú núú-güedé nàcuáa ní cuu ní naníhí tnáhá tè Sàulú ndihí Jèsús ichi, te ní càháⁿ ndihí ñaha-gã xii-dé. Te ní xáhaⁿ tucu té Bèé nàcuáa ní càháⁿ té Sàulú tnúhu Jèsús núú ñáyíu Dàmascú, te ñá túú tnàhí ni yúhú-dé ní càháⁿ-de, càchí té Bèé xáhaⁿ-dě xii-güedé.

²⁸ Te ní xíndecu té Sàulú ndihí ñáyíu xídácuaⁿhá tnúhu-gá ñúú Jerusálén. Te ní ndicuu ndicuu-dé ní càháⁿ-de tnúhu Jèsús, te ñá túú tnàhí ni yúhú-dé

²⁹ ní càháⁿ ndihí-dé ñáyíu isràél ñáyíu càháⁿ tnúhu griégú. Te ñáyíu-áⁿ ñi ngüíta-yu ndàtnúhu-yu sá càhní ñahá-yu xii-dé.

³⁰ Te ñáyíu sãndáá iní tnúhu-gá ní níhí-yu tnúhu nàcuáa cuiní ñáyíu càháⁿ tnúhu griégú cada ñahá-yu xii té Sàulú, núú ní sãndeca ñahá-yu xii-dé ñúú Cèsareá, te yàcáⁿ ní tendaha ñahá-yu cuánuhú-dé ñúú Tàrsú.

³¹ Te sátá xíáⁿ te ní sanaá-yu ñá túú-gã ní xóo cada úhú-yu nchaa ñáyíu sãndáá iní tnúhu Jèsús níhí distritú Jüdeá, ndihí distritú Galileá, ndihí distritú Sãmariá. Te ní níhí ndéé-yu ní quide-yu nàcuáa ní xáhaⁿ Yá

Ndiöxí cadá-yu, te ío ní xíndecu yiñùhú-yu núú-gã, te Espíritú-gá ní chindee ñaha-xi xii-yu, te vai-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Titní xichi ní sáháⁿ té Pèlú ní cáháⁿ-dé tnúhu Yá Ndiöxí. Te ìⁿ nduu ní sáháⁿ-dé ñuú Lidá ní cáháⁿ ndihí-dé ñáyiú sándáá iní ñhá xii Jesús.

³³ Te yàcáⁿ ní naníhí-dě ìⁿ té nàni Eneás, te ní cuu úná cuía cùhú-dé, te ni lùha ñá cúú-gã candá nihnu-dé.

³⁴ Te ní xáhaⁿ tē Pèlú xii-dé:

—Èneás, Xítohó Jesucrístú cada tátna ñaha-gã xii-n tnàvíí. Ndacóo te ndocani-n yùu-n —cachí-dé xáhaⁿ-dě.

Te òré-ni ní ndacóo-dé.

³⁵ Te nchaa ñáyiú ñuú Lidá ndihí ñáyiú ñuú Sàrón ní xiní-yu sá ñí ndúha-dé, te ní sándáá víhí iní-yu Xítohó Jesucrístú.

Ní ndoto tá Dòrcás

³⁶ Te ñuú Jòpé ndécú ìⁿ ñadìhí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xáháⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú.

³⁷ Te váha-ni ndècu-aⁿ ni cuu, te ní tñi ñaha cuèhé ñí xihí-aⁿ, te ní nadacùchi ñahá-yu, te ní chihí ñahá-yu ìⁿ cuàrtú ndécú ndéé núú ñínu.

³⁸ Te ñáyiú ní sándáá iní tnúhu Jèsús ñuú Jòpé ní níhí-yu tnúhu sá ndécú tē Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue tē cuáháⁿ-güedé núú ndécú-dé cuèndá cúñaha-güedé candeca ñaha-güedé xii-dé quíhíⁿ núú ndécú-yu. Te ní xáhaⁿ-güedé xii tē Pèlú:

—Yáchí ná quíhíⁿ-ó ñuú-ndí, chí yàcáⁿ cáná ñahá-yu quíhíⁿ-n tnàvíí —cachí-güedé xáhaⁿ-güedé xii tē Pèlú.

³⁹ Te tē Pèlú ní xica-dé cuáháⁿ-dé ndihí cue tē-áⁿ ñuú Jòpé, te òré ní quexio-güedé ndihí-dé, te cuásá ndihí ñaha-güedé cuàrtú ndéé núú ñínu. Te nchaa ñáyiú dñí ñáyiú quèé ní tacá ndéé ñahá xii ndíyí-áⁿ xíndáhyú-yu, te ní dánèhé ñahá-yu nchaa dóo ñí cadúha ñaha ní xihí-áⁿ. Chí ní xóo cadúha-aⁿ dícúⁿ, te ní xóo cadúha-aⁿ díó òré ní xíndecu-aⁿ ñuyú-a, te nchaa xíáⁿ ní dánèhé ñahá-yu xii tē Pèlú.

⁴⁰ Te tē Pèlú ní xáhaⁿ-dě sá quèé-yu ncháa-yu quehé, te ní queé-yu. Te ní ngüíñí xítí-dé te ní cáháⁿ ndihí-dé Yá Ndiöxí, te dàtnùní ní ndacoto-dé núú cándòdo ndíyí-áⁿ, te ní xáhaⁿ-dě:

—Tàbitá, ndacóo —cachí-dé xáhaⁿ-dě.

Te ní ndacoto-aⁿ núú tē Pèlú te ní ndacóo-aⁿ.

⁴¹ Te ní tñi-dé ndaha-aⁿ ní nacanutñí ñaha-dě. Te ní cana-dé nchaa ñáyiú dñí ñáyiú quèé ndihí nchaa ñáyiú sándáá iní tnúhu Jèsús cuèndá quiní-yu sá ñí ndoto-aⁿ.

⁴² Te nchaa ñáyiú ñuú Jòpé ní níhí-yu tnúhu nàcuáa ní quide tē Pèlú ní ndoto ñaha ní xihí-áⁿ, te vai-yu ní sándáá iní-yu Xítohó Jesucrístú.

⁴³ Te titní nduu ní xíndecu tē Pèlú vehe tē Xímú tēe dàcuitá ñíi.

10

Té Pèlú ndihí té Còrneliú

¹ Te ndècu ìⁿ té nàni-dé Còrneliú ñuú Cèsareá te cùu-dé capitáⁿ, te ndècu ndihí-dé ìⁿ cièndú sandàdú. Te cue tē-áⁿ nání-güedé Sandàdú Itàlianú.

² Te tē cùu capitáⁿ ío váha iní-dé, te mee-dě ndihí ñadìhí-dé ndihí nchaa landú-dé ío nèhé-yu sá yiñùhu núú Yá Ndiöxí, te sáha-dé ñáyiú ndàhú ñáyiú isràél díhúⁿ, te ío càháⁿ ndihí-dé Yá Ndiöxí.

³ Te ìⁿ nduu dàtná òré caá úní sacuaa ní dácótó núú ñahá-xí xii-dé sá ñí sáháⁿ ìⁿ espíritú xínú cuèchi núú Yá Ndiöxí núú-dé, te ní xáhaⁿ-xi:

—Còrneliú —cachí-xi xáhaⁿ-xi xii-dé.

⁴ Te ní xiní-dé ndi ndùú xio núú-dé espíritú-áⁿ. Te ío ní yùhú-dé. Te ní xáhaⁿ-dè:

—¿Ná chíúⁿ vèxi-n? —cachí-dé xáhaⁿ-dè.

Te xáhaⁿ-xi:

—Ío càháⁿ ndihí-n Yá Ndiöxí, te ñáyiú ndàhú sãñaha-n díhúⁿ-n, te nchaa xíáⁿ sa naha-gá.

⁵ Te vitna tendaha-ñ cuè tē na quíhíⁿ-güedé ñuú Jòpé quíngana-güedé ìⁿ tē nàni Xímú, àdi Pelú chí úú dñu-dé, te candeca ñaha-güedé quixi.

⁶ Te òré quexio-dé te cachí tnúhu-dé nchaa dava-gá sá cuíni Yá Ndiöxí cada-n. Te ndècu-dé vehe ingá tucu tē nàni Xímú tēe dàcuitá ñíi, te vehe tē-áⁿ caá ìⁿ xio yuhu lamár —cachí-xi xáhaⁿ-xi xii-dé.

7 Te sáta cuáháⁿ espíritú-áⁿ, te té Còrneliú ní cana-dé úú tñhá cue tée xínu cuechi núú-dě ndihí ìⁿ sandádú xínu cuèchi tucu núú-dě, te tñhá sandádú-áⁿ ïo cáháⁿ ndihí-dé Yă Ndiöxí.

8 Te té Còrneliú ní cani-dé cuèndú núú-güedě nàcuáa ní cáháⁿ espíritú xínu cuèchi núú Yă Ndiöxí. Te ní tendaha ñaha-dé xii-güedě cuáháⁿ-güedě ñuú Jòpé.

9 Te nduu tñéé-áⁿ ñúhú-ní-güedě ichi cuáháⁿ-güedě, te cùu-xi datná òré caúxúú nduu ta cùyatni-güedě ñuú-áⁿ, te òré-áⁿ ñí sáá té Pèlú díquí véhé cáháⁿ ndihí-dé Yă Ndiöxí.

10 Te òré-áⁿ sa xihí-dé docó cuíní-dé caxi-dé, te nini càdúha-yu sá caxí-dé ní dácótó nùú ñáhá-xí

11 sá ñí xíní-dé ìⁿ sá ndécú àndiú, te cà datná cáá ìⁿ dóó cáhnú nchìcúⁿ yoho ndi cùmí xíquí-xi véxi cuuⁿ núú ñúhú.

12 Te núú dǒó-áⁿ yódó cǒo ndihí quiti ndàva ndihí nchaa núú quiti ndéé cùmí sáhá-xi.

13 Te ní tecú dóho-dé cáháⁿ ìⁿ sá cáháⁿ, te xáhaⁿ sá cáháⁿ-áⁿ xii-dé:

—Pèlú, ndacuíñí cahni-n nděda-ni càa quiti-a caxi-n-di —cachí sá cáháⁿ-áⁿ xáhaⁿ-xi xii-dé.

14 Te té Pèlú ní xáhaⁿ-dě:

—Vá cáhni-í-di chi càchí tñúhu sá sánú ichi ñaha xii nchúhú ñáyiú isràél sá vǎ cúú càxi-ndí nchaa quiti-a chi cuu cuèchi, te vátá caxí-gǎ-í-di ni ìⁿ xito —cachí-dé xáhaⁿ-dě.

15 Te ní cáháⁿ tucu sá ñí cáháⁿ-áⁿ, te xáhaⁿ-xi:

—Vá cúú càchí-n sǎ vǎ cúú càxi-n-di, chi mee Yă Ndiöxí ní cachí-gá sá díú nchaa quiti-a cuu caxi-o vitna —cachí sá ñí cáháⁿ-áⁿ xáhaⁿ-xi xii-dé.

16 Te ducaⁿ ñí cáháⁿ sá ñí cáháⁿ-áⁿ ùní xito, te dǎtnùní cuándaa tucu dóó-áⁿ andiú.

17 Te té Pèlú ñá ní cùtnuní iní-dé ná cuèndá ducaⁿ ñí dácótó nùú ñáhá-xí xii-dé, núú xiǎⁿ ío cuéhé ñí sani iní-dé. Te òré-áⁿ ñí quexìo cue tée ní tendaha té Còrneliú ndéé yuyèhe, chi ndi vehe ndi vehe cuáháⁿ-güedě ndúcú tñúhu-güedě ndéé cáá vèhe té Xímú tée dii vèhe-xi ndecu té Pèlú.

18 Te ní cáháⁿ níhi-güedě, te xáhaⁿ-güedě:

—Ñá túú cùdana iha ndecu ìⁿ tée nànducu-ndí nání-dě Xímú, àdi Pèlú chi úú diú-dé —càchí-güedě xáhaⁿ-güedě.

19 Te té Pèlú vǎi sani iní-dé sá ñí dácótó nùú ñáhá-xí xii-dé. Te òré-áⁿ ñí xáhaⁿ Espíritú Yă Ndiöxí xii-dé:

—Cundedóho-n ìⁿ tñúhu na cáháⁿ-í-a. Ní quexìo úní cue tée nànducu ñaha xii-n.

20 Yáchí, cuandèe chi quíhíⁿ-n ndihí-güedě, te vǎ yúhú-n chi yúhú ní xáhaⁿ-í véxi cuaca ñaha-güedě xii-n —càchí Espíritú-gá xáhaⁿ-xi xii té Pèlú.

21 Te ní xica-dé cuándee-dé núú ndécú cuè tée xica nanducu ñaha xii-dé, te xáhaⁿ-dě xii-güedě:

—Yúhú cúú tée nànducu-ndo-áⁿ. Náu-í-a núú ná chíúⁿ cuíní ñáhá-ndó —càchí-dé xáhaⁿ-dě xii-güedě.

22 Te xáhaⁿ-güedě:

—Tée cùu capitáⁿ tée nàni Corneliú ní tendaha ñaha-dé véxi-ndí, te tée-áⁿ ïo váha iní-dé, chi ío sandáa iní-dé Yă Ndiöxí, te nchaa ñáyiú isràél ío váha cáháⁿ-yu cuèndá-dé. Te ìⁿ espíritú xínu cuèchi núú Yă Ndiöxí ní xáhaⁿ-xi xii-dé sá cáná ñaha-dé xii-n quíhíⁿ-n véhe-dé dacuàha-n-dé tñúhu Yă Ndiöxí —càchí cue tée ní tendaha té Còrneliú xáhaⁿ-güedě xii té Pèlú.

23 Te ní xáhaⁿ tǎ Pèlú sá quíhu-güedě vehe-dé, te candeca tñaha-güedě ndihí-dé quíhíⁿ ndéé nduu tñéé. Te nduu tñéé-áⁿ ñí xica-güedě ndécá tñaha-güedě ndihí té Pèlú cuáháⁿ, te tñhá ìⁿ úú cue tée sandáa iní tñúhu Jèsús ñuú Jòpé cuáháⁿ ndihí ñaha-güedě xii-dé.

24 Te ndéé ingá nduu ní quexìo-güedě ñuú Cèsareá. Te té Còrneliú ndétú ñaha-dé xii-güedě vehe-dé te sa ndècu túha-dé ndihí ñadihí-dé ndihí nchaa landú-dé ndihí cue tée ío váha tñhá tñúhu ndihí-dé, chi ní cana ñaha-dé ní nítnáhǎ-yu ndihí-dé cundetú-yu té Pèlú.

25 Te sáta ñí quèxio té Pèlú vehe té Còrneliú, te ní quee-dé quehé, te ní ngüíñí xití-dě núú tǎ Pèlú chíñùhu ñaha-dé ní cùu.

26 Te té Pèlú ní xáhaⁿ-dǎ:

—Ndacuíñí vǎ ngüíñí xití-n nùú-í chi ñá díú Ndiöxí cúú-í, dícó ìⁿ tée ñuyíú-a cùu-í —càchí té Pèlú xáhaⁿ-dǎ xii-dé.

27 Te ta cáháⁿ té Pèlú ndihí té Còrneliú cuánguihu-güedě xití vehe, te chitu ñáyiú xixíhi xití vehe.

28 Te ní xáhaⁿ tǎ Pèlú xií-yu:

—Sa naha-ndo sá càchí tñúhu sá sánú ichi ñaha xii nchúhú ñáyiú isràél sá vǎ cúú

quixi-ndí vehe ni ñⁿ nchohó ñáyiú ñá túú cùu ñáyiú isràél te ni vǎ cúú tnàhá tnúhu ndìhi ñaha-ndí xii-ndo. Dico Yá Ndiöxí ní cachí-gá sá vǎ cúú cáháⁿ-í sá vǎ cúú cáháⁿ ndìhi-í ñáyiú ñá túú cùu ñáyiú isràél, chi cuu cuéchi.

²⁹ Núu xiǎⁿ ndìhi-ni véxi-í òré ní quexìo tnúhu sá cáná ñàha-ndo. Te cachí tnúhu-ndo nǎ cuendá cáná ñàha-ndo — cachí té Pèlú xǎhaⁿ-dǎ xii-yu.

³⁰ Te té Còrneliú ní xǎhaⁿ-dǎ:

—Ní cuu cúmí nduu, te ñi-ndi dǎtná òré iha cùu-xi, te yúhú ndècu-í ñi-ndi vehe-í, te ñá túú tnàhí ná xéxi-í cáháⁿ ndìhi-í Yá Ndiöxí, te òré-áⁿ ñí quexìo ñⁿ espíritú xínú cuèchi núú-gǎ níhnú-xí dǎo cuixíⁿ dóo chàhnchí.

³¹ Te cachí-xi: “Còrneliú, ní xíndedóho Yá Ndiöxí tnúhu ní cáháⁿ-n ndìhi-gá, te xíní-gá sá sǎñaha-n dǎhúⁿ xii ñáyiú ndàhú.

³² Te ñuú Jòpé ndécú ñⁿ té nàni Xímú, àdi Pelú chi úú ñi-ndi, te ndècu-dé vehe ñⁿ té nàni tucu Xímú té dǎcuitá ñⁿ, te càa vehe-dé ñⁿ xio yuhu làmár, te cana-n-dǎ ná quixi-dé ndatnúhu-n ndìhi-dé”, duha ní cáháⁿ espíritú xínú cuèchi núú Yá Ndiöxí.

³³ Núu xiǎⁿ ndìhi-ni ní cana ñaha-í xii-n. Te táxǎhu xii-n sǎ véxi-n chi iha ndècu-ndí nchaa-ndí ndétú ñàha-ndí xii-ñ cùndedóho-ndí tnúhu Yá Ndiöxí, te cuíní-ndí cachí tnúhu-n nchàa tnúhu ní cachí Yá Ndiöxí cáháⁿ-n —cachí té Còrneliú xǎhaⁿ-dǎ.

Té Pèlú ní ndatnúhu-dé ndìhi ñáyiú ní tacá vehe té Còrneliú

³⁴ Te té Pèlú xǎhaⁿ-dǎ xii-yu:

—Vitna ní xíní-í sá Yá Ndiöxí cáháⁿ ndìhi-gá ñáyiú cuéi ndǎda-ni càa ñuú, te ñⁿ-ni quide-gá ndìhi nchaa-yu.

³⁵ Te nchaa ñáyiú nèhe sá yíñùhu núú Yá Ndiöxí, te xǐquide váha-yu, te nchaa-yu cùu váha iní ñáhá-gǎ xii-yu. Te ñá túú quide cuendá-gá cuéi ná ñáyiú ñuú cúu-yu.

³⁶ Te Yá Ndiöxí ní tendaha-gǎ Xítóhó Jesucristú ní sáháⁿ-gá ní xíndecu-gá nàcióⁿ Isràél, te ní xǎhaⁿ-gǎ xii-yu ñⁿ tnúhu váha nàcuáa cuu váha iní-yu. Te ñi-ndi mee Jesús cúnúu-gá núú ñáyiú ñi càa xico ñuyú.

³⁷ Te ñaha-ndo sá dǎhna-gá ndí Juáa ní cáháⁿ ndí tnúhu Yá Ndiöxí núú ñáyiú, te ní dǎcuándute ñaha ndí xii-yu. Te dǎtnúni ní ngúita Jesús ní cáháⁿ-gá tnúhu-gá distritú

Galileá, te dǎtnúni ní sáháⁿ-gá ñiñí nàcióⁿ Isràél ní cáháⁿ-gá tnúhu-gá núú ñáyiú.

³⁸ Te sa ñaha-ndo sá Yá Ndiöxí ní sǎñaha-gǎ Espíritú-gá xii Jesús té ñuú Nazàrét ndécú ndìhi-dé chíndèe ñaha-xi xii-dé. Te ñaha-ndo sá ñí xica cuu Jesús ní quide tátna-gá nchaa ñáyiú yíhi ñaha espíritú cùndìhi yucu ñávàha. Te ío vǎi-gá sá vǎha ní quide ñaha-gǎ xii-yu, te ducaⁿ ñí quide-gá, chi Yá Ndiöxí ní chindee ñaha-gá.

³⁹ Te mee-ndí ní xíní-ndí nàcuáa ní quide Jesús ñuú Jerusàlén ndìhi ñiñí nàcióⁿ Isràél. Te ní sata caa ñaha-güedé xii-gá núú cùrúxí te yacáⁿ ní xíhí-gá.

⁴⁰ Te núú ùni nduu ní dándótó ñaha Yá Ndiöxí xii-gá. Te ní cuíní-gá sá cùndècu Xítóhó Jesucristú titní nduu sátá ñí ndoto-gá cuendá cáháⁿ ndìhi ñaha-gǎ xii-ndí nchaa-ndí nàcuáa ní xica cuu-ndí ndìhi-gá.

⁴¹ Te ñá nchaa ñáyiú ñi xíní ñáhá xii-gá, chi mee-ni nchúhú cue té ní cachí-gá sá cáháⁿ ndáa-ndí sá ñí ndoto-gá, chi ní xíndecu ndìhi-ndí-gá, te ní xíhi ní xexi-ndí ndìhi-gá, núu cáháⁿ ndáa-ndí sá ñí ndoto-gá.

⁴² Te ní cachí-gá sá nchúhú quíhíⁿ-ndí cùñaha-ndí xii ñáyiú sá méé Yá Ndiöxí ní táuchíúⁿ-gǎ sá Jesús cada ndáa-gá cuéchi nchaa ñáyiú ndècu vívú ndìhi cuéchi nchaa ñáyiú ní xíhí. Te ducaⁿ ñí xǎhaⁿ Yá Ndiöxí xii Jesús, te ñi-ndi ducaⁿ ñí cachí Jesús cáháⁿ-ndí.

⁴³ Te cue té ní cáháⁿ tnúhu Yá Ndiöxí ndéé sanaha ñí cáháⁿ-güedé sá quíxí Jesús, te ní cachí-güedé sá nchaa ñáyiú na quíndáa iní ñáhá xii Jesús, te cada càhnu iní-gá nchaa cuéchi-yu —cachí té Pèlú xǎhaⁿ-dǎ xii-yu.

Ní quexìo Espíritú Yá Ndiöxí ní ngúndecu ndìhi cue ñáyiú ñá túú cùu ñáyiú isràél

⁴⁴ Te mei òré cáháⁿ-dé ndédóho-yu ní quexìo Espíritú Yá Ndiöxí ní ngúndecu ndìhi nchaa ñáyiú-áⁿ.

⁴⁵ Te cue té isràél cuáháⁿ ndìhi té Pèlú, cue té ní sándáa iní tnúhu Jesús ní cuñúhu víhi-güedé sá ñí quexìo Espíritú Yá Ndiöxí ní ngúndecu ndìhi-yu, chi cuendá

sá ñà díú ñáyíu isràèl cúŷ-yu núu xíǎn ní cuñúhu-güedé.

⁴⁶ Te ní cutnùní sá ñí quexìo Espíritú Yǎ Ndiǒxí ní ngúndecu ndihí-yu, chi ní ngúíta-yu càháⁿ-yu tnúhu sá dácàhu iní ñàhá Espíritú-gá, tnúhu sá ñà túú xìní-yu cáháⁿ-yu. Te ní ndacáⁿ táhũ-yu núú Yǎ Ndiǒxí cuèndá nchaá sá ñí quide-gá.

⁴⁷ Te dàtnùní ní xáhaⁿ tẽ Pèlú:

—Vitna te cuandute ñáyíu ní natuha ichi Xítóhó Jesucristú chi sa ndècu ndihí-yu Espíritú Yǎ Ndiǒxí dàtná cuíní-ndó ndècu ndihí nchoo, núu xíǎn vá cúú càchí dava-gá ñáyíu sá vǎ cúú cuànduté-yu —càchí-dé xǎhaⁿ-dẽ xíí-yu.

⁴⁸ Te dàtnùní ní xáhaⁿ-dẽ xii ñáyíu:

—Vitna te cuandute-ndo, te òré-áⁿ te cacunehe-ndo Xítóhó Jesucristú —càchí-dé xǎhaⁿ-dẽ xíí-yu.

Te dàtnùní ní cáháⁿ ndàhú-yu núú tẽ Pèlú cundecu ndihí ñaha-dẽ xíí-yu ñí ùú nduu.

11

Té Pèlú ní cani-dé cuèndú núú ñáyíu sàndáá iní tnúhu Jèsús ñúú Jerusàlén

¹ Te cue téé ní táuchíúⁿ Jèsús dacuàha ñaha xii ñáyíu tnúhu-gá, ndihí cue ñáyíu ní sàndáá iní tnúhu-gá, ñáyíu ndècu distritú Jùdeá ní níhí-yu tnúhu sá ñáyíu ñá túú cùu ñáyíu isràèl ní sàndáá iní-yu tnúhu Yá Ndiǒxí.

² Te òré ní ndexìo té Pèlú ñúú Jerusàlén, te ñáyíu isràèl ñáyíu ní cachí sá cáda nchaá nacuáa ní cáháⁿ ndíi Moisés ní satnuhu ñàhá-yu xii-dé.

³ Te ní xáhãⁿ-yu xii té Pèlú:

—¿Ná cuèndá ní sáhãⁿ-n ndéé ndiáçãⁿ ní cáháⁿ ndihí-n ñáyíu-ãⁿ, te ñá túú quidé-yu dàtná quidé nchò-o-i? Te ní sáhãⁿ-n yàcãⁿ ní xexi-n ndihí-yu —càchí-yu xǎhãⁿ-yu xii-dé.

⁴ Te té Pèlú ní cani-dé cuèndú nacuáa ní cuu núú ñí sáhãⁿ-dé, te xǎhaⁿ-dẽ:

⁵ —Ní xíndecu-í ñúú Jòpé. Te òré càháⁿ ndihí-í Yǎ Ndiǒxí, te ní dácótó ñaha-xi xii-í sá vèxi cuuⁿ ñí dóó cáhnú àndíu, te ndùtu ndi cumí xíquí-xi, te ní ngava-xi núú ndécù-í.

⁶ Te ní xíndéhé vǎha-í, te ní xíní-í nchaá quiti yòdo núú-xi. Te ñí xichi yòdo quiti cúmí sáhãⁿ-xi, te ñí xichi yòdo quiti dééⁿ, te ñí xichi yòdo cóo, te ñí xichi yòdo quiti ndava.

⁷ Te ní tecú dóho-í càháⁿ ñí sá càháⁿ, te càchí-xi: “Pèlú, ndacuíñí cahni-n ndèda-ni càa quiti-a caxi-n-di”, cachí sá ñí cáháⁿ-áⁿ.

⁸ Te ní xáhaⁿ-í: “Vá cáhní-í-di chi càchí tnúhu sá sánú ichi ñaha xii nchúhú ñáyíu isràèl sá vǎ cúú càxi-ndí nchaá quiti-a”, xǎhaⁿ-í.

⁹ Te ní tecú dóho-í càháⁿ-ni tucu núú ñíu, te càchí sá càháⁿ-áⁿ: “Vá cúú càchí-n sǎ vǎ cúú càxi-n-di, chi mee Yǎ Ndiǒxí ní cachí-gá sá díú nchaá quiti-áⁿ cuu caxi-o”, càchí sá càháⁿ-áⁿ.

¹⁰ Te ducaⁿ ñí cáháⁿ sá ñí cáháⁿ-áⁿ ùní xito, te dàtnùní cuàndaa dóó-ãⁿ ndihí nchaá quiti-áⁿ àndíu.

¹¹ Te òré-ni ní quexìo úní cue téé vehe núú ndécù-í. Te cue téé-áⁿ ñí tendaha ñaha ñí tée ñúú Cèsareá nándücu ñaha-güedé xii-í.

¹² Te mee Espíritú Yǎ Ndiǒxí ní cachí-xi sá quihíⁿ-í ndihí-güedé, te ní cachí-xi sá ñà túú ñà cani iní-í. Te tnàhá ñíu cue téé ndècu iha ní sáhãⁿ ndihí ñaha-güedé xii-í, te nchaá-ndí ní sáhãⁿ-ndí vehe té Còrneliú ñúú Cèsareá.

¹³ Te ní cani-dé cuèndú nacuáa ní cuu ní sáhãⁿ ñí espíritú xínú cuèchi núú Yǎ Ndiǒxí vehe-dé, te ní quíhu-xi ndéé xití vehe-dé, te ní xáhaⁿ-xi xii-dé: “Tendaha-n cuè téé na quihíⁿ-güedé ñúú Jòpé quíngana-güedé ñí tée nàni Xímú, àdi Pelú chi úú díu-dé. Te candeca ñaha-güedé quixi.

¹⁴ Te téé-áⁿ cachí tnúhu-dé nása cada-n nàníhí tàhú-n ndihí ñadihí-n, ndihí landú-n, ndihí nchaá ñáyíu xínu cuechi vehe-n”, duha ní xáhaⁿ espíritú-áⁿ xii té Còrneliú.

¹⁵ Te òré ní ngúíta-í càháⁿ ndihí-í-yu ní quexìo Espíritú Yǎ Ndiǒxí ní ngúndecu ndihí-yu dàtná ní quide-xi cútnàhá ní taxi Yá Ndiǒxí Espíritú-gá ndéé díhna ní ngúndecu ndihí nchoo.

¹⁶ Te ní ndacu iní-í nacuáa ní cáháⁿ Xítóhó Jesucristú, te duha ní cachí-gá: “Té Juáá ní xóo dacuàndute-dé ñáyíu, dico yúhú sǎñaha-í Espíritú Yǎ Ndiǒxí cundecu ndihí-yu”, duha ní cachí-gá.

¹⁷ Te Yá Ndiǒxí ní sǎñaha-gǎ Espíritú-gá cundecu ndihí ñáyíu ñá túú cùu ñáyíu isràèl dàtná ní quide-gá cútnàhá ní sàndáá iní-ó tnúhu Jèsús, núu xíǎn vá càchí-í sá vǎ cúú càda-í ñí sá cuíní Yǎ Ndiǒxí cada-í —càchí té Pèlú xǎhaⁿ-dẽ xíí-yu.

¹⁸ Te sáta dúcãⁿ ñí xáhaⁿ tẽ Pèlú, te ñá

túu-gă ná tnúhu ni cãháⁿ-yu, te ío ní cudíí ìní-yu nchaa nàcuáa ní quide Yá Ndiöxí, te ní xítñàhá-yu:

—Tnàhá nchaa ñáyiú ñá túú cùu ñáyiú is-ràél naníhí tãhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuiní Yá Ndiöxí cunduu —càchí-yu xítñàhá-yu.

Ñáyiú sàndáá iní tnúhu Jèsús ñuú Antiòquiá

¹⁹ Te sátá ñí sahní-güedé té Těvá, te ní cuiní-güedé cada úhú-güedé nchaa ñáyiú ní sàndáá iní-xi tnúhu Jèsús, te ní xité nuú-yu ndi tnahá ñí ñí ñuú. Te davá-yu cuáháⁿ-yu ndéé distritú Fèniciá ndihí distritú Chìpré ndihí ñuú Antiòquiá. Te ní cãháⁿ-yu tnúhu Jèsús núu mee-ni ñáyiú isràél, te ñá ní xítñúhu-yu dava-gá-yu.

²⁰ Te dava-gá ñáyiú distritú Chìpré ndihí ñáyiú ñuú Cirené ní sáháⁿ-yu ñuú Antiòquiá. Te ñá díú mēe-ni ñáyiú isràél ní cãháⁿ ndihí-yu, chi tnàhá ñáyiú ñá túú cùu ñáyiú isràél ní xáhãⁿ-yu tnúhu Jèsús.

²¹ Te ní chindee ñàha-gá xii ñáyiú càháⁿ tnúhu-gá, te vãi-gá-yu ní sàndáá iní-yu-gá chi ní tuhá-yu ichi-gá.

²² Te ñáyiú ndècu ñuú Jerusalén ñáyiú ní sàndáá iní tnúhu Jèsús ní níhí-yu tnúhu nàcuáa ní cuu, núu xíãⁿ ní tendàhá-yu té Bèè cuáháⁿ-dé ñuú Antiòquiá.

²³ Te òré ní quexìo té Bèè, te ní xiní-dé nàcuáa ní quide ñàha-gã xii-yu sá ñí naníhí tãhú-yu, núu xíãⁿ ío ní cudíí ìní-dé. Te ní dácáhú ìní ñáhá-dě, te ní xáhaⁿ-dě:

—Ío nducu ndèe-ndo cada-ndo nchaa sá càchí Yá Ndiöxí cada-ndo —càchí-dé xáhaⁿ-dě xii-yu.

²⁴ Te té Bèè cúú-dě ñí tée váha iní-xi, te ndècu ndihí-dé Espiritú Yá Ndiöxí, te ío sàndáá iní-dé tnúhu Jèsús. Te vãi vihi ñáyiú ní tuhá-yu ichi-gá.

²⁵ Te dãtnùní cuáháⁿ té Bèè ñuú Tarsú cuánúndúcú-dě té Sàulú.

²⁶ Te òré ní naníhí ñáhá-dě, te ndèca ñàha-dé cuáháⁿ ñuú Antiòquiá, te yacáⁿ ní xíndecu-güedé ñí cuíá ndihí ñáyiú ní sàndáá iní tnúhu Jèsús, te vãi-yu ní dácuahá ñàha-güedé tnúhu-gá. Te ñíu-ni ñuú Antiòquiá ní dánání ñàhá-yu Cristiãnú xii nchaa ñáyiú sàndáá iní tnúhu Jèsús.

²⁷ Te ndéé dàvá-áⁿ ñí quee ñí ùú cue tée càháⁿ tnúhu Yá Ndiöxí ñuú Jerusalén cuáháⁿ-güedé ñuú Antiòquiá.

²⁸ Te ñí-dé nání-dě Àgabú, te ní chindee ñàha Espiritú Yá Ndiöxí xii-dé, te ní sáháⁿ-dé núu nchaa ñáyiú sàndáá iní tnúhu-gá, te ní xáhaⁿ-dě xii-yu sá quíxí ñí tnamá nihí ñuyíú. Te ducaⁿ ñí cuu sátá ñí ngúnutñí té Claudiú tée yìndaha cuéhé nàcióⁿ.

²⁹ Núu xíãⁿ nchaa ñáyiú sàndáá iní tnúhu Jèsús ñuú Antiòquiá ní ndatnúhu-yu sá chíndèé-yu nchaa ñáyiú sàndáá iní tnúhu-gá ndécú distritú Jùdeá cuendá vá ndóhó vîhí-yu docó. Te nàcuáa ní níhí-yu, te ducaⁿ ñí sacáⁿ tnáhã-yu.

³⁰ Te ní tacá díhúⁿ-ãⁿ, te nèhe té Bèè ndihí té Sàulú cuáháⁿ, cuáha-güedé cue tée yìndaha ñáyiú sàndáá iní tnúhu-gá.

12

Sátá ñí xihí té Jàcobó, te ní ngava té Pèlú vecaá

¹ Te ndéé dàvá-áⁿ ñí ngüíta té Hèrodés tée yìndaha ñàha xii ñáyiú isràél ní quide úhú-dé ñí ùú ñáyiú sàndáá iní tnúhu Yá Ndiöxí.

² Te ní táuchíúⁿ-dě ní tñi-güedé té Jàcobó ñaní té Juáá, te ní sahní ñàha-güedé ndihí machití.

³ Te ío ní cudíí ìní dava ñáyiú isràél cuendá sá ñí sahní ñàha-güedé xii té Jàcobó, núu xíãⁿ ní tendaha tucu té Hèrodés sandadú-dé ní sáháⁿ tñi tucu-güedé té Pèlú. Te ducaⁿ ñí quide-dé cútñàhá ní xóo vico ní xexí-yu paa sá ñà túú yìhi levadurá.

⁴ Te ní naníhí-güedé té Pèlú, te ní tñi ñàha-güedé ndécá ñàha-güedé cuáháⁿ vecaá. Te té Hèrodés ní táuchíúⁿ-dě cuáháⁿ sáhúⁿ ñí sandadú cundeé-güedé té Pèlú. Te ní xáhaⁿ-dě:

—Cundeé-ndó ndi cúmí ndi cúmí-ndó tē-ãⁿ —càchí-dé xáhaⁿ-dě xii-güedé.

Te té Hèrodés ní sani iní-dé queñuhu-dé té Pèlú vecaá òré ná yàha vico cuendá cahni ñàha-güedé cãháⁿ-dě ní cùu.

⁵ Te ní xihí-ni té Pèlú vecaá, te ní xíndé cuaa ñàha sandadú xii-dé. Te cue ñáyiú sàndáá iní tnúhu Yá Ndiöxí ío ní xícãⁿ

táhŭ-yu núú-gǎ cuendá sá ñà túú nǎ cada ñaha-güedě xii-dé.

Yá Ndiöxí ní dácăcu-gá té Pèlú vecaá

⁶ Ǟⁿ niú-gá quihi té Pèlú vecaá ní cùu, te nduu tněé tauchìuⁿ té Hèrodés quihíⁿ sandàdú queñuhu ñaha-güedě xii-dé vecaá cuendá quini nchaa ñáyu nása cada ñaha-güedě ní cùu. Te té Pèlú cáá-dě xidí-dé xití vecaá, te ndi ndúú dúcúⁿ ndáhá-dě ndútú càdená, te xio xio ñiñi-dé ndécú sandadú, te dava-gá sandàdú xindeé-güedé yèhe vecaá.

⁷ Te ní quexìo Ǟⁿ espíritú xínú cuèchi núú Yá Ndiöxí xití vecaá núú cáá tǎ Pèlú xidí-dé, te uuⁿni ní dáyèhé-xi xití vecaá, te ní danguíhi ñaha-xi xii-dé, te xǎhaⁿ-xi xii-dé:

—Yáchí, ndácóo —càchí-xi xǎhaⁿ-xi xii-dé.

Te ní ndacóo-dé, te nchaa cadená ndútú dǔcúⁿ ndáhá-dě ní nandáxí.

⁸ Te ní xáhaⁿ tùcu espíritú-áⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xǎhaⁿ-xi xii-dé.

Te ní ndíhu nuu-dé dóo-dě, te ní xáhaⁿ tùcu espíritú-áⁿ:

—Candixi dóo-n, te na quihíⁿ-ó —càchí-xi xǎhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé nǔu ndáá Ǟⁿ espíritú xínú cuèchi núú Yá Ndiöxí ducaⁿ quide àdi ñáhá, te dàcoto ñaha-xi xii-dé ní sani iní-dé.

¹⁰ Te ndëndaha-ni-dě espíritú-áⁿ cuáháⁿ ní yáha-dé nàcuáa xǎnutnǐ sandàdú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuú, te ní nacaáⁿ méé yèhe-áⁿ, te ní quee-dé cuáháⁿ-dé ndihi espíritú-áⁿ. Te ní tnahá-dé Ǟⁿ tnuú, te yàcáⁿ ní dándõo ñaha espíritú-áⁿ xii-dé.

¹¹ Te dàtnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yá Ndiöxí ní tendaha-gǎ espíritú-áⁿ ní quixi-xi ní dácăcu ñaha-xi xii-í cuendá sá và cáhni ñaha té Hèrodés. Te dava ñáyu isràél ío ní cudíⁿ iní-yu cuendá sá ní cuini té Hèrodés cahni ñaha-dě xii-í —duha ní cachí-dé sáta nǐ cutnùní iní-dé.

¹² Te sáta nǐ cutnùní iní-dé sá ní cácu-dé, te cuáháⁿ-dé vehe Ǟⁿ ñaha nàni Mariá nǎnǎ

tǎ Juáá, àdi Mácú chi úú ñiù-dé, te xiáⁿ ndécú vai-yu càháⁿ ndihi-yu Yá Ndiöxí.

¹³ Te té Pèlú ní quexìo-dé ndéé yuyèhe ní dácásáⁿ-dě, te ní quixi Ǟⁿ xíchí nání Ròdé ní quixi ndehe-xi nǎ cúú ñáyu dàcasaⁿ.

¹⁴ Te ní nucúhuⁿ ndudú-xi sá díú tǎ Pèlú, te ní cudíⁿ víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xii-yu sá nútnǐ té Pèlú yuyèhe ndaa quehé.

¹⁵ Te ñá ní sandáá iní-yu tnúhu ní càháⁿ-xi, te xǎhǎⁿ-yu xii-xi:

—¡Ná tnúhu víhi càháⁿ-õⁿ xíchí lùcú! —càchí-yu xǎhǎⁿ-yu.

Te xǎhaⁿ-xi sǎ ndáá nútnǐ-dé, te xǎhǎⁿ-yu:

—Ñá díú tǎ Pèlú chi espíritú sá xító ñaha xii-dé cúú sǎ càháⁿ —càchí-yu xǎhǎⁿ-yu xii-xi.

¹⁶ Te òré ducaⁿ xǐtnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tǎ Pèlú, te ní cuñúhu víhí-yu.

¹⁷ Te ní quide-dé ndaha-dé núu-yu cuendá cadí-yu yuhú-yu. Te ní ngúíta-dé ní cani-dé cuendú nàcuáa ní quide ñaha Yá Ndiöxí xii-dé sá nǐ dácăcu ñaha Ǟⁿ espíritú xínú cuèchi núú-gǎ xii-dé vecaá, te ní xáhaⁿ-dě xií-yu:

—Cúu-ndo tǎ Jàcobó ndihi dava-gá ñáyu sandáá iní tnúhu Jèsús nàcuáa ní quide ñaha Yá Ndiöxí xii-í —càchí-dé xǎhaⁿ-dě xií-yu.

Te sáta dúcáⁿ nǐ xáhaⁿ-dě, te ní quee-dé cuáháⁿ-dé ingá xichi.

¹⁸ Te sáta nǐ túndaá, te ní ngúíta nchaa sandàdú càháⁿ Ǟⁿ càháⁿ Ǟⁿ-güedé, te xǐtnàha-güedé:

—Ñá túú-gǎ té Pèlú yíhí vècaá, ¿te nása cada-o-i? —càchí-güedé xǐtnàha-güedé.

¹⁹ Te té Hèrodés ní tendaha-dě titnǐ sandàdú cuáháⁿ-güedé cuánúndúcú ñaha-güedé, te ñá ní nánihí ñáhá-güedé xii-dé. Te dàtnùní ní cana-dé sandàdú cue téé ní xindeé ñáhá xii té Pèlú, te ní tenáá ñáhá-dě xii-güedé, te ní xáhaⁿ-dě xii dava-gá cue sandàdú-dé:

—Cahni-ndo cuè téé-áⁿ —càchí té Hèrodés xǎhaⁿ-dě.

Te dātnūnī ní quee té Hèrodés distritú Jùdeá cuáháⁿ-dé ñuú Cèsareá, yàcáⁿ ní ngúndecu-dé.

Ní xíhí té Hèrodés

²⁰ Té Hèrodés ní cudééⁿ-dē núú ñāyiu ñuú Tírú ndihí núú ñāyiu ñuú Sídón. Te xíáⁿ ní ndatnúhu-yu ní cuu ñⁿnuu tñhu-yu, te ní xicá-yu cuáháⁿ-yu cuáháⁿ ndatnúhu ndihí ñàhá-yu xii-dé, te ní ndatnúhu ndihí-yu té Blástú. Te téé-áⁿ cúú-dē chiuⁿ quide-dé núú tē Hèrodés, te ní chindee tñhu ñaha-dē xii-yu, chi ní cáháⁿ ndàhú-yu núú tē Hèrodés sá vā cádá ũhú ñáhá-dē xii-yu. Te ducaⁿ ñí quidé-yu cuendá ñuú té Hèrodés-áⁿ quée sá xéxí-yu.

²¹ Te ní xáhaⁿ tē Hèrodés ná nduu quíhíⁿ-yu ndatnúhu ndihí ñaha-dē xii-yu, te nduu-áⁿ ñí quíunuu-dé ñⁿ dóo vāha, ñⁿ sá sácuihnu téé tàxi tñuní. Te ní ngóo-dé núú xilé vāha, xilé sá sácōo nchihí téé tàxi tñuní, te ní ngúíta-dé ní cáháⁿ sàhú-dé dóho-yu.

²² Te uuⁿi ní cuáá-yu te càchí-yu:

—¡Téé-a càháⁿ-dé dico ñá díú tēe ñuyíú-a cùu-dé chi ndiöxí cúú-dē! —càchí-yu xitñàhá-yu.

²³ Te diu-ni òré-áⁿ ñí yáha ñⁿ espíritú xínú cuèchi núú Yá Ndiöxí, te ní sáñaha-xi cuéhé xii té Hèrodés. Te ducaⁿ ñí tñahá-dé chi mee-dē ñá ní xáhaⁿ-dē sá ñāyiu cùu-dé, te ní cáháⁿ-yu sá ndiöxí cúú-dē. Te nchìto-gá-dé ní sanú ñáhá tìndácú xii-dé, te dātnūnī ní xíhí-dé.

²⁴ Te ío tìtní xichi ní sáháⁿ ñāyiu sàndáá iní tñúhu Yá Ndiöxí ní cáháⁿ-yu tñúhu-gá, te ío chitú-yu ní sàndáá iní-yu tñúhu-gá.

²⁵ Te té Bèé ndihí té Sàulú ní ndihí chiuⁿ-güedé, te ní ndee-güedé ñuú Jerusàlén cuáháⁿ-güedé ndihí té Juáá, àdi Mácú chi úú diu-dé.

13

Té Bèé ndihí té Sàulú cuáháⁿ-güedé dácuaⁿ-güedé ñāyiu tñúhu Yá Ndiöxí nchaa ñuú xicá

¹ Te ñuú Antiòquia ndécú ñⁿ úú cue téé càháⁿ tñúhu Yá Ndiöxí núú nchàa ñāyiu ní sàndáá iní-xi tñúhu-gá. Te ndècu tucu ñⁿ úú cue téé cùu mestrú dácuaⁿ ñaha-güedé xii-yu tñúhu-gá. ñⁿ-dé nání-dē Bèé, te ñⁿ-dé nání-dē Xímú, te té Xímú-áⁿ xáhaⁿ-güedé

Nègrú chi tnuu-dē. Te ingá-dé nání-dē Lúciú, te téé-áⁿ cúú-dē téé ñuú Cirené. Te ingá-dé nání-dē Sàulú, te ingá tucu-dé nání-dē Manàén. Te té Manàén-áⁿ ndihí té Hèrodés téé cùu gobiernú Galileá ío vāha ní xóo cáháⁿ ndihí tñaha-güedé cútnàhá ní cuu lñhi-güedé.

² Te ñⁿ nduu ñá túú ñá ní xèxi ñāyiu ní sàndáá iní tñúhu Yá Ndiöxí cuendá mee-ni-gá ní cáháⁿ ndihí-yu, te ní xáhaⁿ Espíritú Yá Ndiöxí xii-yu:

—Tendaha-ndo tē Bèé ndihí té Sàulú quíhíⁿ-güedé dava-gá ñuú cada-güedé chiuⁿ tahu-í, chi ducaⁿ cuíní-í cunduu —càchí Espíritú-gá xáhaⁿ-xi xii-yu.

³ Te ní cáháⁿ ndihí tucú-yu Yá Ndiöxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí tē Bèé ndihí té Sàulú. Te sátá dúcáⁿ ñí quide-güedé, te ní quide ndee iní ñáhā-yu xii-güedé.

Té Bèé ndihí té Sàulú cuáháⁿ-güedé distritú Chìpré cáháⁿ-güedé tñúhu Yá Ndiöxí

⁴ Te té Bèé ndihí té Sàulú ní quee-güedé cuáháⁿ-güedé cuendá ducaⁿ cuíní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcáⁿ ní quée-güedé bàrcú cuáháⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute.

⁵ Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñāyiu isràél càháⁿ-güedé tñúhu Yá Ndiöxí. Te cuáháⁿ ndihí-güedé té Juáá cuendá chindee ñaha-dé xii-güedé.

⁶ Te ní tñi-güedé ichi cuáháⁿ-güedé ñuú Páfós cáá ndàa ingá xio Chìpré, te yàcáⁿ ní naníhí tñahá-güedé ndihí ñⁿ téé isràél nání-dē Barjèsús, te téé-áⁿ xíní-dé cada ndùu-dé, te càchí-dé sá càháⁿ-dé tñúhu Yá Ndiöxí dico ñá ndàa.

⁷ Te téé-áⁿ quidé chiuⁿ-dé ndihí té Sèrgiú, àdi Páblú chi úú diu-dé, te cùu-dé gobiernú Chìpré, te ío túha-dé. Te ní cana-dé té Bèé ndihí té Sàulú, chi cuíní-dé cundedóho-dé tñúhu Yá Ndiöxí.

⁸ Te téé quide nduu-áⁿ ñá ní dàña-dé cáháⁿ-güedé tñúhu-gá, chi ñá ní cuíní-dé sá tēe cùu gobiernú-áⁿ tuha-dé ichi Yá

Ndiòxí. Te ducaⁿ ñi quide té Barjèsús, té xáhaⁿ-güedë Èlimás.

⁹ Te tnahá tucu té Sàulú ndécú ùú òú-dé chi xáhaⁿ tùcu-güedé Páblú, te ndècu ndihí-dé Espíritú Yá Ndiòxí. Te ní xíndéhé ñí ñáhá-dë xii té quide nduu-áⁿ.

¹⁰ Te ní xáhaⁿ-dë:

—Yòhó, chi dàtná quidé yùcu ñávàha quide-n chi mee-ni dàndahú-n ñáyiú. Yòhó cúú-n dëhe sácúlná, chi nchaa tnúhu váha cuíní Yá Ndiòxí cáháⁿ-yu, te yòhó ñá dáñá-n.

¹¹ Te vitna quini-n nàcuáa cunduu, chi taxi Yá Ndiòxí ñⁿ castiú xii-n chi vá cútnúni-gá núú-n càca cuu-n ñⁿ úú nduu —càchí-dé xáhaⁿ-dë xii té quide nduu-áⁿ.

Te òré ducaⁿ ñi xáhaⁿ tã Páblú xii-dé, te òré-ni ní cuaa-dé, te ñá túú ní cùtnúni tnahí-gá núú-dé, te ní xóo nducu-ná-dé ñáyiú ní xóo cuíta nehe ñaha xii-dé.

¹² Te té cùu gobiernú ní xiní-dé nàcuáa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xíáⁿ ní sándáa iní-dé.

Té Páblú ndihí té Bèé ndécú-güedë ñuú Antiòquia Pìsidiá

¹³ Te té Páblú ndihí dava-gá cue té xica cuu ndihí-dé ní quee-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pànfilíá. Te té Juáa ní nacuico-dë ní dándõo ñaha-dë xii-güedé cuánuhú-dé ñuú Jerusálén.

¹⁴ Te dava-gá-güedé ní quee-güedé ñuú Pèrgé cuáháⁿ-güedé ñuú Antiòquia, te Pìsidiá yíndàha-xi ñuú-áⁿ. Te nduu xíndetatú-yu, te ní sáháⁿ-güedé veñúhu ñáyiú isràél, te ní ngóo-güedé xití veñúhu.

¹⁵ Te cue té ndècu veñúhu ní queheⁿ-güedé tutú yódó tnúni nchaa tnúhu sá ñi chídó tnúni ndíi Moisés ndihí tutú yódó tnúni nchaa tnúhu sá ñi chídó tnúni dava-gá cue té ní xóo cáháⁿ tnúhu Yá Ndiòxí ndéé sanaha, te ní dácuáhá-güedé ní xíndedóho cue ñáyiú, te dàtnúni cue té yíndaha veñúhu-áⁿ ñi xáhaⁿ-güedé xii té Páblú ndihí dava-gá-güedé:

—Nchòhó cue té cùu ñani tnahá-ndí, te núu cuíní-ndó cáháⁿ-ndó tnúhu Yá Ndiòxí, te cuu cáháⁿ-ndó tnavíi cuendá cutúha-yu —càchí-güedé xáhaⁿ-güedé.

¹⁶ Te té Páblú ní ndacuñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dë:

—Te nchòhó ñáyiú quide nchaa nacuáa cáháⁿ Yá Ndiòxí ndihí nchaa nchòhó ñáyiú isràél, cundedóho-ndo nchaa-ndo ñⁿ tnúhu na cáháⁿ-í-a.

¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gá xii-yu te ní chindee ñaha-gá cuendá cáyá-yu, chi cuíní-gá sá cúú vai-yu, te ducaⁿ ñi quide-gá cútnáhá ní xíndecú-yu nacióⁿ Ègíptú. Te dàtnúni ní dácácu ñaha-gá xii-yu ñuú-áⁿ, chi mee-gá nchaa ndàcu-gá quidé-gá.

¹⁸ Te ní xíndecú-yu ñⁿ xichi núú ñá túú tnahí sàcúndecu ñáyiú údico cuíá, te xití údico cuíá-áⁿ ñi cundee iní-gá nchaa sá ñi quidé-yu.

¹⁹ Te Yá Ndiòxí ní chindee ñaha-gá xii ñáyiú isràél, te ní dánáa-yu úsá nacióⁿ, chi cuendá ní cuíní-gá cuu cuendá-yu ñuhú-áⁿ.

²⁰ Te dàtnúni ní cachí Yá Ndiòxí sá díú-ni cuè té cùchiuⁿ taxi tnúni-güedé nchaa ñáyiú, te ducaⁿ ñi quide-güedé dàtná cúmi ciendú dava cuíá. Te sátá xíáⁿ, te ní xíndecu té Sàmúel té ní cáháⁿ tnúhu Yá Ndiòxí.

²¹ Te dàvá-áⁿ ñi cuíní ñáyiú isràél sá cùndècu ñⁿ té quíndaha ñaha-dé xii-yu, te Yá Ndiòxí ní cachí-gá sá tã Sàul quíndaha-dë-yu, te té-áⁿ ñi cuu-dé déhe té Cís, te té Benjamín té ní xíndecu ndéé sanaha-gá ní cuu ñani tnahá-dë. Te té Sàul ní xíndaha-dë ñáyiú údico cuíá.

²² Te Yá Ndiòxí ñá ní cuíní-gá cundecu-ni-dé quíndaha-dë ñáyiú, chi ní cuíní-gá sá tã Dàvíi ndíhu ndaha-dé cue ñáyiú isràél, te ní cachí-gá: “Ío váha ní tnahá iní-í nàcuáa quide té Dàvíi déhe té Isàí, te cada-dé nchaa nàcuáa cúñaha-í xii-dé”, duha ní cachí Yá Ndiòxí —càchí té Páblú xáhaⁿ-dë xii-yu.

²³ Te ní xáhaⁿ tùcu té Páblú:

—Díu-ni ñani tnahá tã Dàvíi cúú Jèsús. Te Yá Ndiòxí ní tendaha-gá Jèsús ní quixi-gá ñuyíú-a cuendá nchaa ñáyiú isràél ná quíndáa iní ñáhá xii Jèsús naníhí tãhú-yu, chi ducaⁿ ñi cachí Yá Ndiòxí cunduu.

²⁴ Te cútnáhá vátá ngüita-gá Jèsús cáháⁿ-gá tnúhu Yá Ndiòxí, te ní cáháⁿ té Juáa

núu ñáyiú isràél sá xíní ñùhu-xi dañá-yu nchaa sá cuèhé sá dúhá, te cuanduté-yu.

25 Te sa ta cùyatni-ni-gá cuú-dé, te ní xáhaⁿ-dè xií-yu: “Nchòhó cächí-ndó sá yùhú cùu-í Crìstú Yaá ndétú-ndó dico ñáhá, chi ñá díú yùhú cùu-í Crìstú, chi davitna quixi Crìstú Yaá tendaha Yă Ndiöxí quixi ñuyíú-a. Te yùhú cùu-í ìⁿ tée duuⁿ duuⁿ ñá túú tàú nandaxi cuèdicó chàú-gá dico quide-í chiùⁿ-gá”, duha ní cáháⁿ te Juàá –cächí té Păblú xăhaⁿ-dè xií-yu.

26 Te ní xáhaⁿ tucu té Păblú:

–Cundedóho tucu-ndo ìngá tnúhu na cáháⁿ-í. Nchòhó tnáhá-ndó cùu-ndo ñaní tnáhá ndíi Abrahám, te xíní-ndó sá Yă Ndiöxí cùnùu-gá. Te ñu-ni-gá cuìní-gá sá ncháá-ndó cùndedóho-ndo tnúhu-gá, chi cùu-xi tnúhu sá cáháⁿ nàcuáa naníhí tǎhú-ndó.

27 Te nchaa ñáyiú ndècu ñuú Jerusàlén ndíhi nchaa cue tée cùnùu ñá ní cùtnuní iní-yu ndíhi-güedé sá Yă Ndiöxí ní tendaha-gă Jèsús ní quixi-gá ñuyíú-a. Te ñá ní sǎha-yu cuendá sá díú Jèsús ní cuncenehe cue tée ní cáháⁿ tnúhu Yă Ndiöxí ndéé sanaha cuèi ní dăcuáhă-yu tnúhu-gá veñúhu-yu ndi tnáhá úná nduu, nduu ndètatú-yu. Te ní cachí-yu sá ndècuéchi Jèsús, te ní xáhăⁿ-yu sá cáhni ñàha-güedé xii-gá. Te xiáⁿ sa nàha cue tée ní xóo cáháⁿ tnúhu-gá ndéé sanaha sǎ dúcáⁿ cáháⁿ-yu.

28 Te cuèi ñá túú ñá ní quide-gá te ní xáhăⁿ-yu xii té Pilatú tée cùu gobiernú sá táuchiuⁿ-dé cahni ñàha-güedé xii-gá.

29 Te xiáⁿ nùu ní sata caa ñàha-güedé xii-gá núu cùrúxí. Te ní quide-güedé nchaa nàcuáa ní chídó tnùní cue tée ní cáháⁿ tnúhu Yă Ndiöxí ndéé sanaha. Te sátá nì xíhí-gá, te ní nunehe ñàha-güedé xii-gá núu cùrúxí, te nchìdo ñàha-güedé cuáháⁿ, te ní chihí ñàha-güedé ìⁿ xití yaú.

30 Te Yă Ndiöxí ní dándótó-gă Jèsús.

31 Te titní xito ní sáháⁿ Jèsús núu ndécú ñáyiú ní xica cuu ndíhi-gá, ñáyiú ní quee distrítú Galiléa ní sáháⁿ-yu ndíhi-gá ñuú Jerusàlén. Te vitna nchaa ñáyiú-áⁿ xáhăⁿ-yu xii dava-gá ñáyiú isràél nàcuáa ní cuu ní ndoto-gá.

32 Te nchúhú cáháⁿ-ndí nàcuáa cada-ndo naníhí tǎhú-ndó, chi Yă Ndiöxí ní xáhaⁿ-gă xii cue ñaní tnáhá-ó nì xíndecu ndéé sanaha

sǎ téndàha-gá Déhe-gá Jèsús quixi-gá ñuyíú-a.

33 Te ní quixi-gá ní xíhí-gá, te ní dándótó ñàha Yă Ndiöxí xii-gá, te núu xiáⁿ naníhí tǎhú-ó nùu na quìndáá iní-ó-gă. Te ìⁿ tée ní cáháⁿ tnúhu Yă Ndiöxí ndéé sanaha nì chídó tnùní-dé núu sàlmú cùu ùú nàcuáa ní cáháⁿ Yă Ndiöxí ní xáhaⁿ-gă xii Déhe-gá, te duha ní xáhaⁿ-gă: “Yòhó cùu-n Dèhe-í, te vitna cutnùní iní ñáyiú sá yùhú cùu-í Tătá-n”, duha ní xáhaⁿ-gă xii Jèsús. Te ñu-ni ducaⁿ nì chídó tnùní tée ní cáháⁿ tnúhu-gá ndéé sanaha.

34 Te ìngá xichi tucu núu tütú-gá ní chídó tnùní ìⁿ tée ní xíndecu ndéé sanaha nàcuáa ní xáhaⁿ-gă xii Déhe-gá, te duha ní xáhaⁿ-gă: “Mee-ni sǎ vǎha cada ñàha-í dǎtná ní xíi-í té Dávii”, duha ní xáhaⁿ-gă. Te ducaⁿ nì chídó tnùní tée ní xíndecu ndéé sanaha nàcuáa ní cáháⁿ Yă Ndiöxí, chi òré ní xíhí Jèsús te ní dándótó ñàha-gá cuendá sá vǎ tíu yìqui cuñú-gá.

35 Te núu xiáⁿ duha ní chídó tnùní ìⁿ tée ní xíndecu ndéé sanaha núu librú Sàlmú nàcuáa ní xáhaⁿ-dè xii-gá: “Vá dañá-n sǎ tíu yìqui cuñú Déhe-n chi ío vǎha quide-gá”, duha ní chídó tnùní tée ní xíndecu ndéé sanaha –cächí té Păblú xăhaⁿ-dè xií-yu.

36 Te xăhaⁿ tucu-dé:

–Te té Dávii ní quide-dé nchaa chiùⁿ ní tǎhú Yă Ndiöxí cada-dé, te dǎtnùní ní xíhí-dé. Te ní chindúxi ñàha-güedé xii-dé yatni nàcuáa yìndúxi cue ñaní tnáhá-dè ndéé sanaha-gă, te xiáⁿ nì téhyú yìqui cuñú-dé.

37 Te Jèsús chi ñá ní téhyú yìqui cuñú-gá, chi ní dándótó ñàha Yă Ndiöxí xii-gá.

38 Te cuìní-í cachí tnúhu-í xii-ndo cuendá cutnùní iní-ndó nchaa-ndo sá cadá cǎhnu iní Yă Ndiöxí nchaa cuéchi-o, chi ní xíhí Jèsús cuendá naníhí tǎhú-ó.

39 Te nchaa ñáyiú na quìndáá iní ñáhá xii Jèsús te cada cǎhnu iní-gá nchaa sá ñá túú vǎha ní quidé-yu, chi núu mee-ni tnúhu ní chídó tnùní ndíi Moisés ná quìndáá iní-yu te vǎ naníhí tǎhú-yu.

40-41 Te ío coto-ndo mèe-ndo cuendá sá vǎ yǎha-ndo dǎtná ní cachí Yă Ndiöxí yǎha cue ñáyiú ñá túú ní quide vǎha ní xíndecu ndéé sanaha. Te nàcuáa ní cáháⁿ-gá ní chídó tnùní ìⁿ tée ní cáháⁿ tnúhu-gá ndéé sanaha, te duha ní xáhaⁿ-gă xií-yu dává-áⁿ:

Cundedóho nchaa nchòhó ñáyiú cuèhé yuhu-xi na càháⁿ-í ìⁿ tnúhu te quiní-ndó ñă cuñúhu-ndo, yúhú quidè-í vâi núú sã ïo váha vitna ndècu-ndo ñuyúú-a, te cuèi na còo ñáyiú cachí tnúhu xii-ndo nâcuáa ndùu nchaa sã vãha-áⁿ, dico nchòhó vá quindáá iní-ndó, te sã dúcáⁿ càda-ndo vá quindáá iní-ndó, te dàcuíta nihnu-ndo mèe-ndo. Duha ní xáhaⁿ-gã xií-yu te ducaⁿ ñi chídó tnùní téé ní cáháⁿ tnúhu-gá ndéé sanaha — càchí té Pãblú xãhaⁿ-dẽ xií-yu.

⁴² Te òré ní ndee té Pãblú veñúhu ñáyiú isràél ndihí cue téé xica cuu ndihí-dé, te ní cáháⁿ ndàhú ñáyiú yìhi veñúhu núú-dẽ sã quihíⁿ-dé núú ùná nduu, te ðiu-ni tnúhu ní cáháⁿ-dé cáháⁿ tucu-dé òré quexìo-dé.

⁴³ Te sátá ñi túhú veñúhu-yu, te vâi ñáyiú isràél ndihí ñáyiú ní chitnahá ñáhá xii-yu nchicúⁿ nihnu quide nacuáa quidè-yu càháⁿ ndihí-yu Yá Ndiõxí cuáháⁿ ndihí-yu té Pãblú ndihí té Bèé. Te ní xáhaⁿ-güedẽ xií-yu sã vã dáñá ndéé-yu canchicúⁿ nihnú-yu tnúhu sã càháⁿ nâcuáa quide Yá Ndiõxí sã cúú-xí-yu.

⁴⁴ Te núú ùná nduu, nduu ndetátú-yu ní quexìo vai vihi ñáyiú, chi nihí ñuú ní quexìo ndedóho-yu tnúhu Yá Ndiõxí.

⁴⁵ Te cuendá sã ïo vâi ñáyiú ní quexìo, núú xiáⁿ ní cuu cuédú iní ñáhá ñáyiú isràél xii té Pãblú, te ní xícuèhé ñáhã-yu xii-dé. Te ní xáhãⁿ-yu xii-dé sã dándàhú ñáhã-dẽ xií-yu ndihí tnúhu càháⁿ-dé.

⁴⁶ Te té Pãblú ndihí té Bèé ñá túú ní yùhú ñáhã-güedẽ xií-yu. Te ní xáhaⁿ-güedẽ:

—Xìni ñuhu-xi díhna-gá nchòhó ñáyiú isràél cáháⁿ ndihí-ndí tnúhu Yá Ndiõxí, te mee-ndo ñă cuiní-ndó cundedóho-ndo. Te sã dúcáⁿ quide-ndo, te vá nánihí tàhú-ndó, te ni vã càháⁿ-gá-ndí tnúhu Yá Ndiõxí núú-ndó, dico cáháⁿ-ndí núú dàva-gá ñáyiú cuèi ñá díú ñáyiú isràél cúú-yu,

⁴⁷ chi ducaⁿ ñi táuchíúⁿ Yá Ndiõxí cada-ndí. Te ní cachí-gá:

Cuini-í cundecu-ndo dàtná ìⁿ téé yòtnuú ñuhú cundecu-ndo cáháⁿ-ndó tnúhu-í núú nchàa ñáyiú ñá túú cùndihí-ndo ñáyiú ndècu nihí ñuyúú, te nanihí tàhú-yu,

duha ní cáháⁿ-gá —càchí té Pãblú ndihí té Bèé xãhaⁿ-güedẽ xií-yu.

⁴⁸ Te ñáyiú ñá túú cùu ñáyiú isràél ïo ní cudíí iní-yu sã dúcáⁿ ñi cáháⁿ-güedẽ, te ní xítnahá-yu sã ïo váha cuáháⁿ tnúhu Yá Ndiõxí. Te mee Yá Ndiõxí sa nàha-gá nándi cùu ñáyiú nanihí tàhú, te ðiu-ni ñáyiú-áⁿ ñi sándáá iní-yu.

⁴⁹ Te nchaa xichi xiáⁿ ñi sáháⁿ-yu ní cáháⁿ-yu tnúhu-gá.

⁵⁰ Te cue téé isràél ní ndatnúhu-güedẽ ndihí cue téé cùnuu, ndihí cue ñáyiú ðihí cùnùu, te ñáyiú ðihí-áⁿ ñá túú tnàhí cùmání-yu veñúhu. Te ní xáhaⁿ-güedẽ sã cádá ùhú-yu té Pãblú ndihí té Bèé, te dàtnùní cuicúⁿ ñáhã-yu xii-güedẽ, te ducaⁿ ñi quidè-yu.

⁵¹ Te ní casaⁿ ñuhu té Pãblú ndihí té Bèé sáhã-güedẽ ní naquidi-güedẽ tíca chúhmá ñi tní sáhã-güedẽ. Te ducaⁿ ñi quide-güedẽ cuendá cutnùní iní-yu sã ñá túú ní quide váha-yu. Te dàtnùní ní quee-güedẽ cuáhã-güedẽ ñuú Ìconiú.

⁵² Te ñáyiú ní sándáá iní-xi tnúhu Jèsús ïo váha ní cuu iní-yu cuendá sã ñi nanihí tàhú-yu, te ncháa-yu sa ndècu ndihí-yu Espíritú Yá Ndiõxí.

14

Té Pãblú ndihí té Bèé ndécú-güedẽ ñuú Ìconiú

¹ Te ní quexìo té Pãblú ndihí té Bèé ñuú Ìconiú. Te ní sáhãⁿ-güedẽ veñúhu ñáyiú isràél, te ïo váha ní cáháⁿ-güedẽ tnúhu Yá Ndiõxí, te vâi ñáyiú isràél ndihí ñáyiú ñá túú cùu ñáyiú isràél ní sándáá iní-yu tnúhu-gá.

² Te dava ñáyiú isràél ñá ní sándáá iní-yu, te ní cáháⁿ cuèhé-yu cuendá té Pãblú ndihí té Bèé cuendá sã vã quindáá iní ñáyiú ñá túú cùu ñáyiú isràél.

³ Te ní xíndecu-güedẽ titní nduu, te ñá túú tnàhí ni yùhú-güedẽ ní dácuáhã-güedẽ ñáyiú tnúhu Yá Ndiõxí. Te mee-gã ní chindee ñàha-gá ní quide-güedẽ titní núú sã vã yòo tnàhí ndàcu cada, te ïo ní cuñúhu-yu. Te ducaⁿ ñi quide-gá cuendá cutnùní iní-yu sã ndáá càháⁿ-güedẽ sã méé-gã ïo cùu iní

ñáhá-gă xií-yu, te naníhí tàhú-yu núu na quìndáá iní-yu tnúhu-gá.

4 Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sàndáá iní tnúhu Jèsús. Te davá-yu cùndihí-yu cue tée ní táuchíúⁿ Jèsús càháⁿ tnúhu-gá.

5 Te ñáyiú isràél ndihí dava-gá ñáyiú ñá túú sàndáá iní-xi ní cuu ñⁿnúú-yu ndihí cue tée cùnⁿuu sá cáni-yu-güedé, te cuáha yúú ñáhă-yu xii-güedé.

6 Te té Păblú ndihí té Bèé ní níhí-güedé tnúhu sá cuíní-yu canihá-yu, núu xiăⁿ dayuhu ñi quee-güedé cuáháⁿ-güedé ñuú Lìstrá ndihí ñuú Dèrbé. Te ndi ndúú ñuú-áⁿ yíndèhu-xi Licaoniá. Te ní sáháⁿ-güedé dava-gá ñuú líhli càa yatni xiáⁿ.

7 Te nchaa ñuú-áⁿ ñi càháⁿ-güedé tnúhu Jèsús.

Ñuú Lìstrá ní sáha yúú ñáhă-yu xii té Păblú

8 Te ñuú Lìstrá ndécú ñⁿ tée yacua, mee-ni nùcúo-dé chi ducaⁿ tnàhí càa-dé ní cacu-dé.

9 Te ndèdóho-dé tnúhu càháⁿ té Păblú, te ní cutnùní iní té Păblú sá ño sàndáá iní tée yacua-áⁿ sá Yă Ndiöxí cada tátna ñaha-gă xii-dé, núu xiăⁿ ní xíndéhé ñaha váha té Păblú xii-dé.

10 Te té Păblú ní càháⁿ níhi-dé, te ní xáhaⁿ-dè:

—Ndacuíñí cunutñi váha-n —càchí-dé xáhaⁿ-dè.

Te ní ndacuíñí cunu-dé te ní xica-ni-dé.

11 Te òré ní xiní-yu sá tē Păblú ní quide tátna-dé tée yacua-áⁿ, te ncháa-yu ní càháⁿ-yu tnúhu mèe-yu tnúhu Licàoniá. Te ní càháⁿ níhi-yu, te xitnàhá-yu:

—Cue tée-áⁿ sànuu sá ñáyiú cùu-güedé dico ñáhá, chi ndiöxí cúu-güedé te ní quexio-güedé ñuyíú-a —càchí-yu xitnàhá-yu.

12 Te ní cachí-yu sá tē Bèé cúu-dē ndiöxí dánàní-yu Jüpitér, te té Păblú cúu-dē ndiöxí dánàní-yu Mèrcuriú, chi cuèndá tée-áⁿ cúu-dē tée càháⁿ.

13 Te càa ñⁿ veñúhu yuhu ñuú-áⁿ núu quidé càhnú-yu ndiöxí sá dánàní-yu Jüpitér. Te dútú yíndàha veñúhu-áⁿ ndécá-dē ñⁿ úú ndicutu cuáháⁿ quehé veñúhu, te ñuhu itá dúcúⁿ-güedé. Te cue quiti-áⁿ cahni-dé cada càhnu-dé ndihí-yu té Bèé ndihí té Păblú ní

cùu, chi ducaⁿ quidé-yu quide càhnú-yu ndiöxí-yu.

14 Te té Bèé ndihí té Păblú ní níhí-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuèndá cutnùní iní-yu sá ñă tnàhá iní-güedé nàcuáa sàni iní-yu cadá-yu. Te xinu-güedé cuànguihu-güedé tnuú-yu, te níhi ní càháⁿ-güedé, te xáhaⁿ-güedé:

15 —¿Ná cuèndá ducaⁿ cuíní-ndó càda-ndo? Te ñi-ni tnàha ñáyiú-ndo cùu-ndí, dícó-ni tnúhu Yă Ndiöxí véxi-ndí dacuàha ñaha-ndí xii-ndo cuèndá sá vă cádá-gă-ndó nàcuáa quide-ndo, te quìndáá iní-ndó Yă Ndiöxí, chi ñⁿdì-ni Yă Ndiöxí ndécú. Te ñi-gá ní cadúha-gá andiú ndihí ñuyíú-a ndihí lámár ndihí nchaandi túhú sá ño ñuyíú-a.

16 Te ndéé sanaha ñi dáñá Yă Ndiöxí ní quidé-yu nàcuáa cuáháⁿ iní mèe-yu.

17 Te ní xóo cada-gá sá vâha cuèndá cutnùní iní-yu sá ño váha iní-gá. Te ñi-gá dácúuⁿ-gá dáú, te tàxi-gá sá nchító-ó chi xító-gá nchaa tatá xítú-ó, te xiăⁿ cúdí iní-ó ndècu-o ñuyíú-a —càchí té Păblú ndihí té Bèé xáhaⁿ-güedé xií-yu.

18 Te cuéi ducaⁿ ñi xáhaⁿ-güedé nchaa tnúhu-áⁿ, dico ño úhú ní sàndáá iní-yu ñá ní sàhní-yu ndicutu-áⁿ chi cuèndá ducaⁿ tnàhí quidé-yu sàhní-yu ndicutu òré quidé càhnú-yu ndiöxí-yu.

19 Te ñuú Antiòquiá ndihí ñuú Ìconiú xíndecu dava ñáyiú isràél, te ní quee-yu cuáháⁿ-yu ñuú Lìstrá núu ndécú tē Păblú. Te xiáⁿ ñi quexió-yu te ní xáháⁿ-yu xii ñáyiú ñi ñuú xiáⁿ sá cáhni-yu té Păblú. Te ní sáha yúú ñáhă-yu xii-dé, te ní càháⁿ-yu sá ñi xíhí-dé, te ní tñi ñaha-güedé xii-dé, te tãñuhu ñaha-güedé xii-dé cuáháⁿ ñⁿ xio yuhu ñuú ní sá dáquéné ñaha-güedé.

20 Te ní quexio cue ñáyiú sàndáá iní tnúhu Jèsús núu cátú-dé-áⁿ, te ní nadúcúⁿ ndèé ñáhă-yu xii-dé, te ñini xínutñi-yu-áⁿ ñi ndacúo-dé cuánuhú ndihí ñaha tùcu-dé xií-yu xití ñuú. Te nduu tñé-áⁿ ñi ndee-dé ndihí té Bèé cuáháⁿ-güedé ñuú Dèrbé.

21 Te ní càháⁿ-güedé tnúhu Yă Ndiöxí ñuú-áⁿ, te ño vâi ñáyiú ní sàndáá iní-yu tnúhu-gá. Te dátñùní ní quee-güedé cuáháⁿ

tucu-güedé ñuú Lìstrá, ndihí ñuú Ìconiú, ndihí ñuú Antiòquiá.

²² Te ní xáhaⁿ-güedé xií-yu sá vǎ dáñá ñihnú-yu tnúhu Jèsús. Te sá dúcáⁿ ñí cáháⁿ-güedé, te vǐhi-gá ní cudíí ñí-yu cadá-yu nàcuáa cuíni Yǎ Ndiǒxí cadá-yu, te ní xáhaⁿ-güedé:

—Dacuití cùndecu-o ñuyíú-a ndoho-o, te dǎtnùní ducaⁿ te nacuaca ñaha Yǎ Ndiǒxí xii-o —càchí-güedé xáhaⁿ-güedé xií-yu.

²³ Te ní sáháⁿ-güedé ndi tnahá ñí ñí xichi núu ndécú ñáiyu dàcuaha tnúhu Yǎ Ndiǒxí, te ní taxi ndecu-güedé cue té quíndaha ñaha xií-yu, te ní cáháⁿ ndihí-güedé Yǎ Ndiǒxí, te ñá túu tnahí ná ní xèxi-güedé cuèndá sá ñí cáháⁿ ndihí-güedé-gá. Te ní xáhaⁿ-güedé sá Yǎ Ndiǒxí coto ñaha-gǎ xií-yu chí ñu-ni-gá ní sándáá ñí-yu.

Té Pǎblú ndihí té Bèé cuáháⁿ tucu-güedé ñuú Antiòquiá Siríá

²⁴⁻²⁵ Te dǎtnùní ní quee té Pǎblú ndihí té Bèé cuáháⁿ-güedé, ní yáha-güedé distritú Pìsidiá. Te ní quexìo-güedé ñuú Pèrgé, xíáⁿ ñí cáháⁿ-güedé tnúhu Jèsús. Te ñuú-áⁿ yíndèhu-xi Panfiliá. Te dǎtnùní cuáháⁿ-güedé ñuú Àtaliá.

²⁶ Te yàcáⁿ ní quée-güedé bàrcú cuánuhú tucu-güedé ñuú Antiòquiá. Te ñuú-áⁿ cúu-xí ñuú núu ñí xícáⁿ táhǔ-yu núu Yǎ Ndiǒxí cuèndá sá chíndèe ñaha-gá xii-güedé chiuⁿ quide-güedé. Te cuèndá sá ñí ndihí chiuⁿ-güedé nchaá ñuú núu ñí sáháⁿ-güedé, núu xíáⁿ cuánuhú-na-güedé.

²⁷ Te ní ndexìo-güedé ñuú-áⁿ, te ní cana-güedé nchaá ñáiyu sándáá ñí tnúhu-gá, te ní caní-güedé cuèndú núu-yu nchaá nàcuáa ní cuu núu ñí sáháⁿ-güedé, te xáhaⁿ-güedé: “Yǎ Ndiǒxí ío ní chindee ñaha-gá xii-ndí ní cáháⁿ-ndí tnúhu-gá núu ñí sáháⁿ-ndí, te mee-gǎ ní quide sá tnahá ñáiyu ñá túu cùu ñáiyu isràél ní xíndedóho-yu tnúhu-gá cuèndá quíndáá ñí-yu”, càchí-güedé xáhaⁿ-güedé xií-yu.

²⁸ Te vǎi nduu ní xíndecu-güedé ñuú Antiòquiá ndihí nchaá ñáiyu ní sándáá ñí tnúhu Jèsús.

15

Ní natacá ñáiyu sándáá ñí tnúhu Jèsús ñuú Jerusàlén

¹ Te ní quee ñí úu cue té distritú Jùdeá cuáháⁿ-güedé ñuú Antiòquiá, te ní sáa-güedé, te ní xáhaⁿ-güedé xii ñáiyu sándáá ñí tnúhu Jèsús sá núu vǎ cuáha-güedé sèñá ñí nchaá cue té dǎtná ní cachí ndí Moisés, te vǎ nánihí tǎhú-güedé.

² Te sá dúcáⁿ ñí cáháⁿ cue té-áⁿ, te ní ngüíta té Pǎblú ndihí té Bèé ní tenáa-güedé cue té-áⁿ, chí dandàhú ñáhá-güedé cuíni-güedé ní cùu. Te nchaá ñáiyu sándáá ñí tnúhu-gá ní cachí-yu sá quíhíⁿ té Pǎblú ndihí té Bèé ndihí ñí úu-gá-güedé ñuú Jerusàlén. Te yàcáⁿ cada-güedé ñí jùndá ndihí mee-ni cuè té ní táuchíúⁿ Jèsús cáháⁿ tnúhu-gá, ndihí cue té yíndaha ñáiyu sándáá ñí tnúhu-gá ñuú-áⁿ, te jùndá-áⁿ cada ndáa-güedé tnúhu ní cáháⁿ cue té ní sáa ñuú Antiòquiá.

³ Te nchaá ñáiyu sándáá ñí tnúhu-gá ní quide ndee ñí ñáhǎ-yu xii-güedé, te ní tñí-güedé ichi cuáháⁿ-güedé. Te ní yáha-güedé distritú Fèniciá ndihí distritú Sámariá, te yàcáⁿ ní caní-güedé cuèndú nása ní cuu ní tuha ñáiyu ñá túu cùu ñáiyu isràél ichi Yǎ Ndiǒxí, te ní cudíí vǐhí ñí nchaá ñáiyu ní xíndedóho-áⁿ.

⁴ Te té Pǎblú ndihí té Bèé ní ndexìo-güedé ñuú Jerusàlén, te ío ní cudíí ñí-yu sá ñí ndexìo váha-güedé. Te ndècu dava-gá cue té ní táuchíúⁿ Jèsús dácuàha ñaha xií-yu tnúhu-gá, ndihí cue té yíndaha ñaha xií-yu, ndihí dava-gá ñáiyu sándáá ñí tnúhu-gá, te ní caní-güedé cuèndú núu-yu nàcuáa ní quide Yǎ Ndiǒxí ní chindee ñaha-gá xii-güedé ní quide-güedé chiuⁿ-gá.

⁵ Te ndècu ñí úu cue té ní tuha ichi Yǎ Ndiǒxí, te cue té-áⁿ cúu-güedé cue té farisèú, te ní ndacuíñí-güedé, te ní xáhaⁿ-güedé:

—Dacuití xini ñuhu-xi sá cuáha-güedé sèñá ñí cue té cùmání cue té ñá túu cùu ñáiyu isràél, te cùñaha-ndo sǎ ná cáda-güedé nchaá nàcuáa ní chídó tnùní ndí Moisés —càchí cue té cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cundu.

⁷ Te vai vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dè xii-güedé:

—Nchòhó cue téé ndècu ndihí-í ichi Xítóhó Jesucristú, chí cùndedóho ìⁿ tnúhu na cáháⁿ-í-a. Sa nàha-ndo sá ñí cachí Yá Ndiòxí sá díu-í cáháⁿ-í tnúhu Jèsús núú ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu.

⁸ Dico Yá Ndiòxí sa nàha-gá nása càa iní ìⁿ ñáyiú. Te cùtnuní iní-ó sá cúú iní ñáhá-gá xii cue ñáyiú ñá túú cùu ñáyiú isràél, chí ní sáñaha-gá Espíritú-gá ndécú ndihí-yu dàtná cuìní-ndó ñí taxi-gá ndécú ndihí nchoo.

⁹ Chi Yá Ndiòxí ìⁿ nuu-ni cùu iní ñáhá-gá xii-o nchàa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá ñí xóo cadá-yu ndéé òré ní sàndáá iní-yu Jèsús.

¹⁰ ¿Te ná cuèndá nchòhó cuìní-ndó càda ñáyiú ní sàndáá iní tnúhu-gá ìⁿ sá ñá tnàhá iní-gá sá cadá-yu? Te cuìní-ndó dàndoho-ndó-yu. Te ni nchòo te ni cue ñaní tnàhá-ó ñí xíndecu ndéé sanaha ñá ní ndàcú-yu cadá-yu nchaa xiáⁿ.

¹¹ Te vá dúcáⁿ cãháⁿ-ndó, chí sa nàha-ndo sá Yá Ndiòxí ní cundàhú iní ñáhá-gá xii-o, te diò ducaⁿ ñí quide-gá sá nánihí tàhú-ó nchàa-o. Te diu-ni ducaⁿ ñí quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáhaⁿ-dè xii-güedé.

¹² Te dàtnuní té Bèé ndihí té Pãblú ní ngúíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xií-yu nàcuáa ní chindee ñàha Yá Ndiòxí xii-güedé, te ní quide-güedé vai núú sá vã yòo tnàhí ndàcu cada, te ducaⁿ te ní cutnùní iní ñáyiú ñá túú cùu ñáyiú isràél sá ndáá càháⁿ-güedé.

¹³ Te òré ní ndihí cuèndú ní cáháⁿ-güedé, te té Jàcobó ní xáhaⁿ-dè:

—Nchòhó cue téé ndècu ndihí-í ichi Xítóhó Jesucristú, chí cùndedóho ìⁿ tnúhu na càháⁿ-í-a.

¹⁴ Té Xímú, àdi Pelú chí úú díu-dé, ní cani-dé cuèndú nàcuáa ní quide Yá Ndiòxí

ndéé díhna ní dáquéé dèⁿ-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuìní-gá chíñuhu ñàhá-yu xii-gá.

¹⁵ Te dàtnuní ní cáháⁿ-dé nàcuáa ní cáháⁿ Yá Ndiòxí ndéé sanaha. Te duha ní chídó tnùní cue téé ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáa te ní ngoyo te dàndaa-güedé xito cùu uú, ducaⁿ sãtnahá-xi cada-xi ìⁿ nduu, chí ñaní tnàhá ndí Dàvíí ní xóo cáháⁿ ndihí ñàhá-yu xii-í ní cùu, te ní dáñá ndéé-yu ichi-í,

te na quixi-í te natuha ñaha tucú-yu.

¹⁷ Te ducaⁿ te vai ñáyiú ñá túú cùu ñáyiú isràél nandúcú-yu ichi-í te cáháⁿ ndihí ñàhá-yu.

¹⁸ Duha ní cáháⁿ Yá Ndiòxí, te ducaⁿ ñí chídó tnùní cue téé ní xóo cáháⁿ tnúhu-gá ndéé sanaha —càchí té Jàcobó xáhaⁿ-dè xii-güedé.

¹⁹ Te xáhaⁿ tucú-dé:

—Yúhú càchí iní-í sá vã cúú dàsatú-ó iní nchaa ñáyiú ta sàndáá iní-xi tnúhu Yá Ndiòxí, ñáyiú ñá túú cùu ñáyiú isràél, te ìⁿ úú-ni tnúhu cúñaha-o nàcuáa cadá-yu.

²⁰ Dico xini ñuhu-xi daquihíⁿ-ó tütú cúñaha-o sã vã cáxi-gã-yu nchaa sá nchító-ó ndúu táhú nchaa sá càchí-yu cùu ndiòxí-yu. Te cúñaha-o sã vã càháⁿ ndihí cue téé ñadìhí te núu ñá díú ñadìhí-güedé cúú-yu, te ni cuè ñáyiú dèhí vá càháⁿ ndihí-yu té te núu ñá díú yí-yu cùu-güedé, te vá cáxi-yu cuñú quitì cuèhné, te vá cáxi-yu níñí.

²¹ Te ducaⁿ cùñaha-o, chí ndi tnahá ñuú núú ndécú-yu, te xíndecu ñáyiú isràél dácuahá-yu tnúhu ní chídó tnùní ndí Moisés, te ndi tnahá nduu ndètatú-yu dácuahá-yu tnúhu ndí veñúhu-yu —càchí té Jàcobó xáhaⁿ-dè xii-güedé.

²² Te dàtnuní cue téé ní táuchíúⁿ Jèsús dacuàha ñaha xií-yu tnúhu-gá, ndihí cue téé yìndaha ñáyiú sàndáá iní tnúhu-gá ní cachí-güedé sá ndúcú-güedé ìⁿ úú-gá cue téé quihíⁿ ndihí té Pãblú ndihí té Bèé ñuú Antiòquiá, te diu-ni ducaⁿ ñí cáháⁿ dava-gá ñáyiú ndècu ichi-gá. Te úú cue téé ní ndúcú-güedé, ìⁿ-dé nání-dè Silás, te ìⁿ-dé

nání-dě Jùdás, àdi Barsabás chi úú d̄iù-dé, te cùnūu-güedé ndi ndúú-güedé.

²³ Te ní cadúha nchaá cue téé cùnūu tutú canehe-güedé quihíⁿ, te duha càháⁿ-xi:

“Cováha d̄iù-ndó nchàa-ndo. Nchúhú cue téé ní táuchíúⁿ Jèsús cáháⁿ-ndí tnúhu-gá, ndihí cue téé yindaha cue ñáyiú sàndáá iní tnúhu-gá quide ndee iní ñáhá-ndí xii nchòhó cue ñáyiú ndècu ndihí-ndí ichi-gá cuèi ñá díú ñáyiú isràél cúú-ndó. Te nchòhó ñáyiú x̄ndecu ñuú Antiòquiá, ndihí nchòhó ñáyiú ndècu distritú Sìriá, ndihí nchòhó ñáyiú ndècu distritú Cìlicia, càchí tnúhu-ndí xii-ndo sã

²⁴ ní níhí-ndí tnúhu sá ìⁿ úú cue téé ndècu iha ní quixi-güedé núú ndécú-ndó, te ñá túú chiúⁿ ni tahu-ndí quixi-güedé. Te sá ìⁿ tnúhu ní cáháⁿ-güedé ní xáhaⁿ-güedé xii-ndo sã nḡndecu señá ñiⁿ-ndo, te canchicúⁿ nihnu-ndo nchàa nacuaá ní chídó tñuní ndí Moisés, te x̄iáⁿ ní sani ìⁿ ní sani úú iní-ndó, chi ñá túú x̄iní-ndó n̄u ndáá tnúhu càháⁿ-güedé àdi ñá ndáá.

²⁵ Te ní ndatnúhu-ndí n̄acuáa cunduu sá téndaha-ndí úú cue téé quixi-güedé ndihí té Bèé ndihí té Pãblú, cue téé ío cùu iní-ndí, te cue téé-áⁿ cáháⁿ-güedé n̄acuáa càháⁿ-ndí-a.

²⁶ Te d̄iù-ni té Bèé ndihí té Pãblú ní sáháⁿ-güedé ní cáháⁿ-güedé tnúhu Xítóhó Jesucristú nchaá xichi. Te ndi tnahá cuáháⁿ-güedé cuiní-yu cahni ñáhá-yu xii-güedé.

²⁷ Te tendaha-ndí té Jùdás ndihí té Silás quixi-güedé tñahá-güedé cachí tnúhu váha-güedé n̄acuáa cuáháⁿ tnúhu càháⁿ-ndí.

²⁸ Te d̄iù-ni ducaⁿ càháⁿ-ndí càchí tnúhu-ndí n̄acuáa càháⁿ Espiritú Yã Ndiõxí cada-ndo, chi nchúhú vá càháⁿ-ndí sá cádá-ndó nchàa sá ñí cáháⁿ ndí Moisés cada ñáyiú, chi ío úhú, te vá yõo ndacu cada. Te vitna na càháⁿ-ndí ìⁿ úú-ni tnúhu n̄acuáa cada-ndo.

²⁹ Vá cáxí-ndó sã nchító-ó ndūu táhú nchaá sá càchí ñáyiú cùu ndiõxí-yu, te vá cáxí-ndó ñiⁿ, te vá cáxí-ndó cùnū quiti cuèhné, te vá càháⁿ ndihí cue téé ñad̄ihí te núu ñá díú ñad̄ihí-güedé cúú-yu, te ni cuè ñáyiú d̄ihí vá càháⁿ ndihí-yu téé te núu ñá díú ȳiⁿ-yu cùu-güedé. Te núu

na càda-ndo nchaá nacuaá càháⁿ-ndí-a, te cada váha-ndo. Te vitna ío cada ndee iní-ndó nchàa-ndo-na.” Duha ní chídó tñuní-güedé núú tutú ní tendaha-güedé cuáháⁿ.

³⁰ Te ní quide ndee iní-yu cue téé quihíⁿ ñuú Antiòquiá, te ducaⁿ te ní xica-güedé cuáháⁿ-güedé. Te òré ní quexiò-güedé ñuú-áⁿ, te ní cana-güedé nchaá ñáyiú sàndáá iní tnúhu Jèsús, te ní sãñaha-güedé tutú xii-yu.

³¹ Te ní d̄acuáhã-yu tutú ní sãñaha-güedé-áⁿ, te ní cud̄iⁿ víhí iní-yu chi ío váha càháⁿ tutú-áⁿ.

³² Te té Jùdás ndihí té Silás tñahá-güedé ní nduu táhú-güedé cáháⁿ-güedé tnúhu sá d̄ac̄ahu iní ñáhá Yã Ndiõxí. Te ní xáhaⁿ-güedé vai tnúhu n̄acuáa cadá-yu, te víhi-gá ní cud̄iⁿ iní-yu cadá-yu n̄acuáa càháⁿ Yã Ndiõxí cadá-yu.

³³ Te ní x̄ndecu-güedé ìⁿ úú nduu ndihí-yu, te d̄atn̄uní ní quide ndee iní ñáhã-yu xii-güedé cuendá sá nùhú-güedé núú v̄xi-güedé, te mee-ni t̄é Jùdás cuánuhú-dé.

³⁴ Te té Silás ní xáhaⁿ-d̄é sá v̄á nùhú-ni-dé.

³⁵ Te té Pãblú ndihí té Bèé ní ndóo-güedé ní cáháⁿ-güedé tnúhu Yã Ndiõxí ñuú Antiòquiá, te vai-gá tucu ñáyiú Antiòquiá ní cáháⁿ-yu tnúhu-gá.

Xito cùu úú cuáháⁿ té Pãblú càháⁿ-dé tnúhu Yã Ndiõxí núú ñáyiú

³⁶ Te sátá ñí cuu cuéhé nduu, te ní xáhaⁿ t̄é Pãblú xii té Bèé:

—Na quihíⁿ-ó nchàa ñuú núú ñí sáháⁿ-ó ñí cáháⁿ-ó tñuhu Yã Ndiõxí cáháⁿ ndihí-o nchàa ñáyiú ní tuha ichi-gá cuendá quini-ó n̄u ndècu váha-yu —càchí-dé xáhaⁿ-d̄é.

³⁷ Te té Bèé ní xáhaⁿ-d̄é sá quihíⁿ ndihí-güedé té Juáá, àdi Mácú chi úú d̄iù-dé.

³⁸ Dico té Pãblú ñá ní dàña-gá-dé quihíⁿ té Juáá, chi ní d̄ándõ ñaha-d̄é xii-güedé cútnahá ní x̄ndecu-güedé Pànfilia, te ní nacuico-d̄é cuánuhú-dé, te ñá túú-gã ní sáháⁿ ndihí ñaha-d̄é xii-güedé.

³⁹ X̄iáⁿ ní cuu ní tenãá tñahá t̄é Bèé ndihí té Pãblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáháⁿ-güedé Chìpré.

⁴⁰ Te té Pãblú ní xáhaⁿ-d̄é xii té Silás sá quihíⁿ ndihí ñaha-d̄é, te ñáyiú sàndáá iní-xi

tnúhu Jèsús ní cáháⁿ ndihí-yu Yá Ndiöxí sá chíndèe ñaha-gá xii-güedé.

41 Te ní xica-güedé cuáháⁿ-güedé te ní yáha-güedé ñihí distritú Sìriá ndihí distritú Cìlicíá. Te ní cáháⁿ-güedé tnúhu Jèsús núu nchaa ñáyiú ní sándáá iní tnúhu-gá, núu xiáⁿ ío-gá ní cudíí iní-yu cadá-yu nàcuáa càháⁿ Yá Ndiöxí.

16

Tnàhá té Timùteú cuáháⁿ ndihí-dé té Páblú ndihí té Silás

1 Te té Páblú ndihí té Silás cuáháⁿ-güedé ñuú Dèrbé ndihí ñuú Lìstrá, te ñuú Lìstrá yàcáⁿ ndécú ñⁿ té nàni Timuteú. Te té-áⁿ sándáá iní-dé tnúhu Jèsús, te tnàhá náná-dé sándáá iní-aⁿ tnúhu-gá, te ñaha isràél cúu-áⁿ, te tée griégú cúu tátá-dě.

2 Te nchaa ñáyiú ní sándáá iní tnúhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-áⁿ cudíí iní-yu nàcuáa quide-dé.

3 Te ní cuiní té Páblú sá tnàhá té Timùteú quíhíⁿ ndihí-dé dava-gá ñuú, núu xiáⁿ díhna-gá sèñá ní sáha té Páblú ñⁿ té Timùteú, chi ñá ní tnàhá iní té Páblú sá càháⁿ cuèhé ñáyiú isràél cuèndá té Timùteú. Te nchaa ñáyiú isràél ndécú ñuú-áⁿ xini-yu sá tée griégú cúu tátá-dě, te ñá díú tée isràél cúu-dé, te xiáⁿ ní sáha té Páblú sèñá ñⁿ té Timùteú.

4 Te ndi tnàhá ñuú ndi tnàhá ñuú cuáháⁿ-güedé càháⁿ ndihí-güedé nchaa ñáyiú ní sándáá iní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue té ní táuchíúⁿ Jèsús dacuàha ñaha xií-yu tnúhu-gá, ndihí cue té yìndaha ñáyiú sándáá iní tnúhu-gá ñuú Jerusàlén.

5 Te cuèndá ducaⁿ ñⁿ sáháⁿ-güedé nchaa ñuú núu ndécú ñáyiú sándáá iní tnúhu-gá ní dácuhá ñaha-güedé xií-yu, núu xiáⁿ tá cùu túha-gá-yu tnúhu Yá Ndiöxí, te vài-gá-yu ní tuhá-yu ichi-gá.

Ní dácótó ñaha-xi xii té Páblú sá ñⁿ xini-dé ñⁿ té distritú Macèdoniá

6 Te ñá ní dàña Espiritú Yá Ndiöxí quíhíⁿ-güedé cáháⁿ-güedé tnúhu-gá distritú Àsiá, núu ní sáháⁿ-güedé distritú Frigíá ndihí distritú Gàlaciá cáháⁿ-güedé tnúhu-gá.

7 Te ní sáa-güedé yuhu distritú Misiá. Te quíhíⁿ-güedé distritú Bitiniá ní cùu, dico ñá ní dàña Espiritú Yá Ndiöxí quíhíⁿ-güedé yàcáⁿ.

8 Te ní yáha-güedé Misiá, te ní quexìo-güedé ñuú Tròás, te yàcáⁿ ní nanítnhá-ndí ndihí-dé.

9 Te ñⁿ niú ní dácótó-xí nùú tē Páblú sá ñⁿ xini-dé ñⁿ té distritú Macèdoniá nùtní-dé, te ní xáhaⁿ tē-áⁿ xii té Páblú: “Cada ndee iní-n quíhíⁿ-n Mècedoniá chi dacuàha ñaha-n nchaa sá xini-n”, cächí-dé xáhaⁿ-dě, ní dácótó ñaha-xi xii té Páblú.

10 Te cuèndá sá dúcáⁿ ñⁿ dácótó ñaha-xi xii té Páblú núu ní ndatnúhu-ndí quíhíⁿ-ndí Macèdoniá, chi ní cutnùní iní-ndí sá cáná ñaha Yá Ndiöxí quíhíⁿ-ndí cáháⁿ-ndí tnúhu-gá núu ñáyiú yàcáⁿ.

Té Páblú ndihí té Silás ndécú-güedé ñuú Filipú

11 Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tnée ní quexìo-ndí ñuú Nèápolis.

12 Te yàcáⁿ ní quene-ndí bàrcú, te xica-na-ndí cuáháⁿ-ndí ñuú Filipú te ñuú-áⁿ yìndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Filipú-áⁿ ío cùnuu-xi, chi ío chitu ñáyiú ròma ní ngóo-yu.

13 Te nduu ndètatú-yu ní quee-ndí ñuú cuáháⁿ-ndí ñⁿ xio yuhu yùte, chi yàcáⁿ sáháⁿ-yu càháⁿ ndihí-yu Yá Ndiöxí. Te òré ní quexìo-ndí, te ní naníhí tnàhá-ndí ndihí mee-ni ñáyiú dìhí, te ní cáháⁿ-ndí tnúhu Yá Ndiöxí ní xíndedóho-yu.

14 Te ndècu ñⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúu-áⁿ, te dícò-aⁿ dóó muradú, te ío càháⁿ ndihí-aⁿ Yá Ndiöxí. Te diu-ni mee Yá Ndiöxí ní chindee ñaha-gá ní sándáá iní-aⁿ tnúhu ní cáháⁿ té Páblú.

15 Te ní sandute-aⁿ ndihí landú-aⁿ, ndihí nchaa ñáyiú xínu cuechi núu-aⁿ, te ní cachí-aⁿ xii-ndí:

—Te núu ní cutnùní iní-ndó sá ñⁿ sándáá ndisa iní-í tnúhu Jèsús, te cundecu tnaa-ndo vèhe-í —cächí-aⁿ xii-ndí.

Te ní quide yica-aⁿ ñi xíndecu-ndí vehe-aⁿ.

16 Te ñⁿ nduu ñùhu-ndí ichi cuáháⁿ-ndí núú cáháⁿ ndihí-yu Yá Ndiöxí, te ní naníhí-ndí ñⁿ xíchí ñúhú ìchi, te yìhi ñaha espíritú cùndìhi yucu ñávãha xii-xi. Te xíãⁿ ní quide ní cáháⁿ-xi nchaa sá vã yõ tnahí cùtnuní iní-xi núú nchaa ñáyiu ní sángándìhi ñaha xii-xi. Te ñáyiu dìi vèhe-xi xinu cuechi-xi ío vãi díhúⁿ ní níhí-yu chi ní cháhu nchaa ñáyiu ní sángándìhi ñaha xii-xi.

17 Te xíchí-ãⁿ ñi chinchícúⁿ ñáhá-xi xii-ndí ndihí té Páblú ndëndaha ñaha-xi cuáháⁿ, te ní cáháⁿ níhi-xi xãhaⁿ-xi xii dava-gá ñáyiu:

—Cue té-a xinu cuechi-güedé núú Yã Ndiöxí, chi ío cãhnu cuu-gá, te cãchí tnúhu-güedé nása cada-ndo naníhí tãhú-ndó —cãchí-xi xãhaⁿ-xi xii-yu.

18 Te titní xito ní yáha-ndí ducaⁿ-ni ní cáháⁿ-xi. Te ñá ní cùndee-gá iní té Páblú sá dúcãⁿ cáháⁿ-xi, núú ní nanchocuíhnu-dé núú nútní-xi, te ní xãhaⁿ-dë xii espíritú cùndìhi yucu ñávãha yìhi ñaha xii-xi:

—Ío cãhnu cuu Xítoho Jesucristú, núú xíãⁿ cãchí-í sá xócuíñí-n vã quíhí-gã-n yiqui cuñú xíchí-a —cãchí-dé xãhaⁿ-dë.

Te òré-ni ní quee espíritú cùndìhi yucu ñávãha-áⁿ yiqui cùnú-xi.

19-20 Te ñáyiu dìi vèhe-xi xinu cuechi-xi-ãⁿ ñi cutnùní iní-yu sá vã ñihí-gá-yu díhúⁿ cuendá tnúhu cáháⁿ-xi, núú ní tní-yu té Páblú ndihí té Silás ndécã ñáhá-yu cuáháⁿ núú cuè té cùchiuⁿ Romá, te xãhãⁿ-yu xii-güedé:

—Cue té-a cùu-güedé cue tée isràel, te ío dusaⁿ xiquide-güedé ñuú-ó.

21 Te cuíni-güedé cada-o nãcuáa quide-güedé, te vá cúú dúcaⁿ cada-o chi ñáyiu nacióⁿ Rómã cúú-ó —cãchí-yu xãhãⁿ-yu xii cue té cùchiuⁿ.

22 Te uuⁿni ní cáháⁿ ncháá-yu, te xãhãⁿ-yu sá ñã túú quide váha té Páblú ndihí té Silás. Te cue té cùchiuⁿ ní cándeé-güedé dóó té Páblú ndihí dóó té Silás ní ndátã-güedé, te ní táuchíúⁿ-güedé caniha-güedé ndihí tnudíi xii-güedé.

23 Te ní caniha-güedé, te dãtnùní ní chihi ñaha-güedé vecaá. Te ní xãhaⁿ-güedé xii

tée ndëñchito vecaá sá cáda cuèdadú víhí-dë cuendá ná canú-güedé vecaá.

24 Te cuendá sá dúcãⁿ ñi cáháⁿ-güedé, núú tée ndëñchito vecaá ní dáyãha ñaha-dë ingá cuártú ndécú xití vecaá, te ní chihi-dé sáhã-güedé yaú nduhu, te ní quide tii-dé.

25 Te dava niú ní cáháⁿ ndihí té Páblú ndihí té Silás Yã Ndiöxí, te ní xita-güedé ndudú ní quide cãhnu ñaha-güedé xii-gá. Te dava-gá cue tée yìhi vecaá ní xíndedóho-güedé nãcuáa ní xita-güedé.

26 Te uuⁿni níhi víhi ní tnãã ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndihí cadená ndútú cuè tée yìhi vecaá ní nandáxi.

27 Te ní ndiquíú cúnú ñi tée ndëñchito vecaá, te ní quide cuendá-dé ñhi nchaa yèhe vecaá. Te ní tava-dé machití-dé cãhni-dé méé-dë ní cùu, chi ní cáháⁿ-dë sá ñi ndihí cue tée yìhi vecaá ní xinu ni cùu.

28 Te té Páblú ní cáháⁿ níhi-dé, te xãhaⁿ-dë xii tée ndëñchito vecaá:

—Vã dúcãⁿ càda-n cãhni-n mee-n, chi nchaa-ni-ndí yíhí —cãchí-dé xãhaⁿ-dë xii tée ndëñchito vecaá.

29 Te dãtnùní ní xicãⁿ tée ndëñchito vecaá ñuhú, te xinu-dé cuánguìhu xití vecaá núú yíhí tã Páblú ndihí té Silás, te quidi ñaha-nã-xi xii-dé ní quexiò-dé ní ngüíñí xití-dë núú-güedé.

30 Te dãtnùní ndécã ñaha-dé xii-güedé ní ndee vecaá, te ní xicãⁿ tnúhú-dë núú-güedé, te xãhaⁿ-dë:

—Nchòhó cachí tnúhu-ndo nása cada-í naníhí tãhú-í —cãchí-dé xãhaⁿ-dë.

31 Te ní xãhaⁿ-güedé:

—Quindáá iní-n ndihí ñadihí-n, ndihí landú-n, ndihí nchaa ñáyiu xinu cuechi núú-n tnúhu cáhãⁿ Xítoho Jesucristú, te naníhí tãhú-ndó —cãchí-güedé xãhaⁿ-güedé.

32 Te ní dácuáhã ñaha-güedé xii tée ndëñchito vecaá ndihí nchaa ñáyiu ndècu vehe-dé tnúhu Yã Ndiöxí.

33 Te diu-ni òré-ãⁿ ñi naquete-dé sátã-güedé núú ñi ñãni, te dãtnùní ní sandute-dé ndihí-yu.

34 Te ndèca ñaha-dé cuáhãⁿ vehe-dé ní sãñaha-dë sá ñi xexi-güedé, te ní cudíí víhí ñi tée ndëñchito vecaá ndihí nchaa-dé

vehe-dé sá nǐ tuhá-yu ichi Yá Ndiöxí. Te cuándihu tucu té Páblú ndihí té Silás vecaá.

³⁵ Te nduu tnée ní xáhaⁿ cuè tée cùchiuⁿ xii poleciá cuáhán-güedé cùu-güedé té ndënchito vecaá queñuhu-dé úú cue tée cuánguñihu ndedí nduu ìcu núhú-güedé.

³⁶ Te té ndënchito vecaá ní xáhaⁿ-dë xii té Páblú ndihí té Silás:

—Cue tée cùchiuⁿ ní cachí-güedé sá queé-ndó nǔhú-ndó, chi ñá túú-gã ná cada-güedé, chi sa ní yáha cuendá-ndó —cächí té ndënchito vecaá xáhaⁿ-dë xii-güedé.

³⁷ Te té Páblú ní xáhaⁿ-dë xii cue tée cùu poleciá:

—Tée ròmá cúu-ndí, te vá cúu dùcaⁿ-ni cunduu, chi ní caniha-güedé tnudí xii-ndí, te ní xiní-yu nchaá-yu. Te ñá túú tnàhí ní xicáⁿ tnúhú-güedé nǔu ndáá ndècuéchi-ndí àdi ñáhá, chi cuendá-ni ní chihi ñaha-güedé vecaá xii-ndí. Te vitna cuini-güedé dacácu ñaha-güedé núhú-ndí cuendá sá vã yõ quiní ñáhá nǔhú-ndí cáháⁿ-güedé, dico vá cúu dùcaⁿ cada ñaha-güedé xii-ndí. Chí cuáhán cúñaha-ndo na quixi mee-güedé queñuhu ñaha-güedé —cächí té Páblú xii-dé cue poleciá.

³⁸ Te cue tée cùu poleciá cuánuhú-güedé núu ndécú cuè tée cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ nǐ xáhaⁿ poleciá sá tée ròmá cúu-güedé, xiáⁿ ní yùhú-güedé.

³⁹ Te ní sáhán cue tée cùchiuⁿ yehe vecaá, te ní xáhaⁿ-güedé sá cadá càhnu iní-güedé sá nǐ chihi ñaha-güedé vecaá, te ní ndeñuhu ñaha-güedé vecaá. Te ní cáháⁿ ndàhú-güedé núu cuè tée ní xihí vecaá sá ndée-güedé ñuú-áⁿ nǔhú-güedé.

⁴⁰ Te ní ndee-güedé vecaá, te cuáhán-güedé vehe tá Lidiá, te ní ndatnúhu-güedé ndihí nchaa ñáyiú ní sándáa iní-xi tnúhu Jèsús, te ní xáhaⁿ-güedé xií-yu nàcuáa cadá-yu, te ío ní cudíí ìní-yu, te ducaⁿ te ní xica-güedé cuáhán-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Anfípolís ndihí ñuú Apoloniá, te ní quexiò-güedé ñuú

Tesalónica, te yacáⁿ cáa ñⁿ veñúhu ñáyiú isràel.

² Te ní sáhán té Páblú veñúhu-áⁿ, chi ducaⁿ tnàhí quide-dé, te ndi tnahá nduu ndètatú-yu ní sáhán-dé veñúhu-áⁿ ùní xito. Te ní ndatnúhu ndihí ñaha-dë xií-yu nàcuáa ní chídó tnùnì cue tée ní xóo cáháⁿ tnúhu Yá Ndiöxí ndée sanaha.

³ Te ní xitnúhu ñaha-dë nàcuáa ní cáháⁿ cue tée-áⁿ sã Crístú Yaá tendaha Yá Ndiöxí quixi ñuyiú-a ndoho vihi-gá, te cuú-gá, te ndoto-gá, te xáhaⁿ-dë:

—Te ñuú Jèsús cúu Crístú Yaá ní tendaha Yá Ndiöxí ní quixi ñuyiú-a, núu xiáⁿ cächí tnúhu-í vitna —cächí té Páblú xáhaⁿ-dë xií-yu.

⁴ Te dava ñáyiú isràel ní sándáa iní-yu tnúhu ní cáháⁿ té Páblú, te ní níhí tnáhã-yu ndihí-dé, ndihí té Silás. Te vai ñáyiú griégú ñáyiú cáháⁿ ndihí Yá Ndiöxí ní sándáa iní-yu tnúhu Jèsús. Te ndècu titní ñáyiú ñáyiú cùnuu, te ñáyiú-áⁿ tnàhã-yu ní sándáa iní-yu tnúhu-gá.

⁵ Te dava ñáyiú isràel ñá túú ní cùu váha iní-yu núu tã Páblú nǔu ní ndúcú-yu cue tée cuihna ìní-xi tuhíó-güedé cada chiúⁿ-güedé, chi ndi cuihnu ndi cuihnu-ni-güedé, te nchaá-yu ndihí cue tée-áⁿ ndí coyo ndi coyó-yu xicuáa-yu. Te sátá nǐ tecú dóho dava-gá-yu, te ní sáhán tuhá-yu, te ío ní quide dúsáⁿ-yu. Te nísáhán-yu vehe té Jàsón, te ní quide yicá-yu ní quihu-yu vehe-dé nándúcú-yu té Páblú ndihí té Silás cuendá queñuhu ñáhã-yu núu nchãa ñáyiú.

⁶ Te ñá ní nánihí ñáhã-yu xii-güedé, núu xiáⁿ ní tñí-yu té Jàsón ndihí ñⁿ úú-gá cue tée sándáa iní tnúhu Jèsús, te tãñuhu ñáhã-yu xii-güedé cuáhán núu cuè tée cùchiuⁿ. Te òré ní quexiò-yu núu ndécú cuè tée cùchiuⁿ, te ní ngüíta-yu ní cuáa-yu, te xáhãⁿ-yu xii-güedé:

—Ní quexiò cue tée-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núu xicá cùu-güedé.

⁷ Te té Jàsón-áⁿ ní xáhaⁿ-dë sá cúu cùndecu-güedé vehe-dé, te ñá túú sándáa iní-güedé nàcuáa cáháⁿ té Cèsár té yindaha cuéhé nacióⁿ, te cächí-güedé sá ndécú ñngá té cùnuu-gá tucu nàni-dé Jèsús —cächí-yu xáhãⁿ-yu xii cue tée cùchiuⁿ.

⁸ Te sátá dúcáⁿ ñí cáháⁿ-yu, te ní cudééⁿ víhí cuè té cùchiuⁿ ndihí dava-gá ñáyiú ndèdóho.

⁹ Te vài díhúⁿ ñí xícáⁿ cue té cùchiuⁿ núú tē Jàsón ndihí dava-gá cue té cuáháⁿ ndihí-dé cuèndá té Pāblú ndihí té Silás, te núu na ndè-güedé núhú-güedé, te nacuañaha cuè té cùchiuⁿ díhúⁿ-güedé.

Té Pāblú ndihí té Silás ndécú-güedé ñuú Bèréá

¹⁰ Te òré ní cundiquíⁿ, te ní quide ndee ìní ñáhá ñáyiú sàndáá ìní tnúhu Jèsús xii té Pāblú ndihí té Silás, te ní xica-güedé cuáháⁿ-güedé ñuú Bèréá. Te ñuú ní nduu ñí sáá-güedé yacáⁿ ní sáháⁿ-güedé veñúhu ñáyiú isràél.

¹¹ Te váha-gá ìní ñáyiú ñuú Bèréá dàcúxí ñáyiú ñuú Tesalónica, chi ío ní cudíí ìní-yu ní xíndedóho-yu tnúhu Jèsús, te ñí nduu ñí dácuáhá-yu tnúhu ní chídó tnúni cue té ní xóo cáháⁿ tnúhu Yá Ndióxi ndéé sanaha cuèndá cuíni-yu quíni-yu núu ndáá cáháⁿ té Pāblú ndihí té Silás.

¹² Te titní ñáyiú isràél ní sàndáá ìní-yu tnúhu-gá ndihí titní cue té gríégú ndihí ñáyiú díhí ñáyiú cùnunu ní sàndáá ìní-yu.

¹³ Te dava ñáyiú isràél ndécú-yu ñuú Tesalónica, te ñáyiú-áⁿ ñí níhí-yu tnúhu sá ndécú tē Pāblú ndihí té Silás ñuú Bèréá cáháⁿ-güedé tnúhu Yá Ndióxi, núu xíáⁿ ní sáháⁿ-yu ñuú Bèréá ní dácuándèhndé-yu núu nchaa ñáyiú vátá dácuàha-gá. Te ñáyiú-áⁿ ñí sàndáá ìní-yu tnúhu ndehnde te ní cudééⁿ víhí-yu núu-güedé.

¹⁴ Te òré-áⁿ ñí xáhaⁿ ñáyiú sàndáá ìní tnúhu-gá xii té Pāblú sá quíhíⁿ-dé yuhu làmár, te ní xica-dé cuáháⁿ-dé, te té Silás ndihí té Timùteú ní quendóo-güedé ñuú Bèréá.

¹⁵ Te ñí ùú-güedé cuáháⁿ ndihí-güedé té Pāblú, te ndèca ñaha-güedé cuáháⁿ ndéé ñuú Àtenás, te ní xáhaⁿ tē Pāblú xii-güedé:

—Núu na nùhú-ndó, te cúu-ndo tē Silás ndihí té Timùteú ná quíxí ndihí-ni-güedé nanítnáhá-ndí iha —càchí-dé xáhaⁿ-dē.

Te ní xica-güedé cuánuhú-güedé.

Té Pāblú ndécú-dé ñuú Àtenás

¹⁶ Te ñuú Àtenás ndétú tē Pāblú quíhíⁿ té Silás ndihí té Timùteú. Te yacáⁿ ní xini-dé sá ío cuéhé sá càchí-yu cùu ndióxi-yu ndècu

te ñá ndàá sá díú ndióxi cúu-xí, te xíáⁿ ñá túu ní cùu váha ìní-dé, chi ñá tnàhá ìní-dé nàcuáa quidé-yu.

¹⁷ Te ní sáháⁿ-dé veñúhu ní cáháⁿ ndihí-dé ñáyiú isràél ndihí dava-gá ñáyiú cáháⁿ ndihí Yá Ndióxi. Te ñí nduu ñí nduu sáháⁿ-dé xití ñuú cáháⁿ-dé tnúhu-gá ndihí nchaa ñáyiú xica cuu yacáⁿ.

¹⁸ Te cue té cùu epicureú ndihí cue té cùu estoicú, cue té-áⁿ ñí ndatnúhu-güedé ndihí té Pāblú, te dava-güedé xitnáha-güedé:

—¡Ná tnúhu víhí cáháⁿ tée lùcú-áⁿ! —càchí-güedé xitnáha-güedé.

Te dava-güedé xitnáha-güedé:

—Sàni ìní-ndí sá cáháⁿ-dé cuèndá ndióxi sá vátá quíni-gá-ó —càchí-güedé xitnáha-güedé.

Te ducaⁿ xitnáha-güedé, chi cáháⁿ té Pāblú tnúhu Jèsús, te ní cáháⁿ-dé nàcuáa ní dándótó ñàha Yá Ndióxi xii-gá, xíáⁿ núu ducaⁿ xitnáha-güedé.

¹⁹ Te ndèca ñaha-güedé xii té Pāblú cuáháⁿ ñí xichi núu nání Àreópagú, te ní xáhaⁿ-güedé xii-dé:

—Cachí tnúhu ndáá-n ñása cuáháⁿ tnúhu cáháⁿ-n, chi na cùtnuní ndáá ìní-ndí,

²⁰ chi ducaⁿ-ni cáháⁿ-n tnúhu sá ñá túu sàcúndedóho-ndí, te cuíni-ndí cachí tnúhu ndáá-n ñása nduu tnúhu-áⁿ cuèndá cutnúni váha ìní-ndí —càchí-güedé xáhaⁿ-güedé xii-dé.

²¹ Te nchaa ñáyiú ñuú Àtenás ndihí ñáyiú dava-gá ñuú, mee-ni tnúhu saa cuíni-yu cáháⁿ-yu, nchaa sá vátá cùndedóho-gá-yu cuíni-yu cundedóho-yu.

²² Te té Pāblú ní ngúnutní-dé núu xixúcu-yu nchaa-yu, te xáhaⁿ-dē:

—Nchòhó cue ñáyiú ñuú Àtenás, cundedóho-ndo nchaa tnúhu na cáháⁿ-í-a. Ío quide cahnu nchohó sá càchí-ndó cùu ndióxi-ndó.

²³ Te vitna ní quexìo-í ñuú-ndó, te ní xini-í sá yàyacáⁿ ndécú nchaa sá càchí-ndó cùu ndióxi-ndó cáháⁿ ndihí-ndo. Te ní xini-í ñí xichi núu ndéé tnuní quidé cahnu-ndo Yá Ndióxi Yaá ñá túu xini-ndó, te ñuú ducaⁿ cáháⁿ lètrá ndéé tnuní xíáⁿ, te càchí-xi: “Iha quide cahnu-ndí Ndióxi sá ñá túu xini-ndí”, duha cáháⁿ lètrá-áⁿ. Te quide cahnu-ndo Yá Ndióxi cáháⁿ-ndó, dico ñá túu xini-ndó ñása càa-gá, te yúhú xini ndáá-í nàcuáa càa Yá

Ndiöxí, chi diu-ni Yá Ndiöxí càháⁿ ndihí-í, te diu tnúhu-gá càháⁿ-í vitna.

24 Te diu Yá Ndiöxí ní cadúha-gá ñuyíú-a ndihí nchaa sá íó, núu diu-gá cúú Xítohó ñuyíú-a ndihí andiu. Te ñá túú xìni ñuhu-gá vehe dàcaa ñáyiú ñuyíú-a cundecu-gá.

25 Te ñá túú xìni ñuhu-gá ñáyiú chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó táchi-ó ndihí nchaa sá xíní ñuhu-o.

26 Te ndéé sanaha ñí cadúha-gá ñⁿdìi-ni téé, te diu-ni níñí-dě cúú ñáyiú ndècu nicaxico ñuyíú. Te diu-ni mee Yá Ndiöxí ní xáhaⁿ-gá nchaa núú cundécú-yu, te mee-gá ní cáháⁿ-gá ná daha cuía cudíi nchaa nacióⁿ ndihí mée-yu.

27 Te cuíní-gá sá ncháá ñáyiú nanducu ñàhá-yu cáháⁿ ndihí ñàhá-yu xii-gá, te mee-gá ndécú túha-gá sá càháⁿ ndihí ñaha-gá xií-yu ñⁿ ñⁿ-yu.

28 Te diu-ni Yá Ndiöxí xító ñàha-gá xií-yu núu cùdíi-yu ndécú-yu te càndá-yu. Te duha ní cáháⁿ ñⁿ ñaní tnáhá-ndó, téé ní cutnùní iní-xi ní xíndecu ndéé sanaha, te ní xáhaⁿ-dě xií-yu: “Nchaa-o cùu-o déhe Yá Ndiöxí”, duha ní xáhaⁿ-dě xií-yu.

29 Te núu déhe Yá Ndiöxí cúú-yu ncháá-yu, te vá cúú càháⁿ-yu sá Yá Ndiöxí cúú sá ñí cadúha-yu ndahá-yu. Te sá ñí cadúha-yu cùu ndióxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mée-yu ní cahu iní-yu nàcuáa cunduu sá cúú ndióxí-yu.

30 Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xíáⁿ, te ñá túú ní quide cuendá Yá Ndiöxí sá dúcáⁿ ñí quidé-yu. Te vitna càchí Yá Ndiöxí sá dáñá ncháa ndi túhú-yu nchaa sá cuèhé sá dúhá quidé-yu.

31 Te Yá Ndiöxí náhá-gá ná nduu cùndecu nchaa ñáyiú núú-gá, te mee-gá sa nàha-gá ndèndida càa ñáyiú ní quide váha, te ndèndida càa ñáyiú ñá túú ní quide váha. Te mee-gá ní xáhaⁿ-gá xii Déhe-gá Yaá nání Jèsús cúñaha-gá xií-yu núu ndèndida càa-yu ní quide váha te ndèndida càa-yu ñá túú ní quide váha. Te mee Jèsús cáháⁿ ndáá cuiti-gá, te sa nàha-o sá ncháá xíáⁿ cada Jèsús, chi diu cuendá-áⁿ ñí dándótó ñàha

Yá Ndiöxí xii-gá —càchí té Páblú xáhaⁿ-dě xií-yu.

32 Te òré ní cáháⁿ té Páblú sá ñí ndoto Jèsús, te dava ñáyiú ñá ní tnáhá iní-xi tnúhu ní cáháⁿ-dè ní cáháⁿ yíchí-yu. Te davá-yu ní xáháⁿ-yu xii-dé:

—Te ñngá xito quixi-n, te cáháⁿ tucu-n tnúhu ní cáháⁿ-n vitna —cachí-yu xáháⁿ-yu xii-dé.

33 Te ní xica-dé cuáháⁿ-dè.

34 Te dava ñáyiú ní xíndedóho tnúhu ní cáháⁿ té Páblú ní sándáá iní-yu Jèsús, te ní chindee tnúhu ñàhá-yu xii-dé. Te ñⁿ téé cùchiuⁿ Areópagú nání-dě Níxú ndihí ñⁿ ñadìhí nání-áⁿ Dámarís, tnáhá-yu ní sándáá iní-yu tnúhu-gá ndihí dava-gá-yu.

18

Té Páblú ndécú-dě ñuú Còrintú

1 Te té Páblú ní quee-dé ñuú Àtenás cuáháⁿ-dè ñuú Còrintú.

2 Te yàcáⁿ ní naníhí tnáhá-dě ndihí ñⁿ téé isràél nání-dě Àquilú, te téé-áⁿ cúú-dě téé distritú Pòntó, te ní xíndecu-dé ndihí ñadìhí-dé tá Priscilá ñuú Rómá. Te té Cèsár téé yíndaha cuéhé nacióⁿ, téé nàni Claudiú ní xáhaⁿ-dè sá vā cúú-gá cundecu ñáyiú isràél ñuú Rómá, te xíáⁿ núu ní ndee té Àquilú ndihí ñadìhí-dé cuáháⁿ-yu ñuú Còrintú. Te sácú-ni nduu ní cuu sá ñí quexió-yu ñuú-áⁿ, te ní sáháⁿ té Páblú ní ndatnúhu ndihí ñaha-dé xií-yu vehé-yu.

3 Te ní xáháⁿ-yu sá cùndècu-dé cada chiúⁿ ndihí ñàhá-yu, chi ñⁿ-ni chiúⁿ quide-dé ndihí-yu, te ní xóo dacáa-yu vehe dóó. Te núu xíáⁿ ní xíndecu ndihí ñaha tē Páblú ní quide chiúⁿ ndihí ñaha-dé xií-yu.

4 Te núú ùná núú ùná nduu, nduu ndètatú-yu, ní xóo quíhíⁿ-dè veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáhaⁿ-dè sá quíndáá iní-yu tnúhu Jèsús.

5 Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú tē Páblú. Te òré ní quexió-güedé, te ní cáháⁿ-ni té Páblú tnúhu Yá Ndiöxí núú ñáyiú isràél, te xáhaⁿ-dè xií-yu sá Jèsús cúú-gá Cristú Yaá ní tendaha Yá Ndiöxí ní quixi ñuyíú-a.

6 Te sá dúcáⁿ ñí cáháⁿ-dè núu ní nàa ndihí ñàhá-yu xii-dé, te ní cáháⁿ cuèhé-yu

cuendá-dé, núu xiǎⁿ ní naquidi-dé dóo-dě. Te ducaⁿ ñi quide-dé cuendá sá cútnùní iní-yu sá ñǎ ní tnàhá iní-dé nàcuáa ní cáháⁿ-yu, te ní xáhaⁿ-dě xií-yu:

—Yúhú ñá túú cuěchi-í, te núu ní xíta ni-hnu-ndo, xiǎⁿ quèndóo cuéchi mee-ñǎ-ndó. Te vitna quíhíⁿ-í cáháⁿ ndihí-í ñáyiu ñá túú cùu ñáyiu isràél, te vá nándùcu-gá-í nchòhó ñáyiu isràél cáháⁿ ndihí ñaha-í xii-ndo —càchí-dé xáhaⁿ-dě xií-yu.

⁷ Te ní xica-dé cuáháⁿ-dé vehe ìⁿ té nàni Justú, te té-áⁿ ndécú yàtni-dé núú cáá veñúhu, te tnàhá-dé càháⁿ ndihí-dé Yá Ndiòxí.

⁸ Te té Crìspú té yìndaha veñúhu-áⁿ ñi sándáa iní-dé Jèsús ndihí ñadihí-dé ndihí landú-dé. Te vài ñáyiu ñuú Còrintú ní sáháⁿ-yu ní xíndedóho-yu tnúhu-gá, te ní sándáa iní ñáhǎ-yu xii-gá, te ní sanduté-yu.

⁹ Te ìⁿ niú ní cáháⁿ saní té Páblú sá ñi xáhaⁿ Yá Ndiòxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáyiu,

¹⁰ chi yúhú chindee ñaha-í xii-n, te vá yòo ìⁿ cada úhú ñáhá xii-n, te vài-gá ñáyiu ñuú-áⁿ quèndáa iní-yu tnúhu-í —càchí-gá xáhaⁿ-gǎ núú sàní-dé.

¹¹ Te ñuú Còrintú ní xíndecu té Páblú ìⁿ cuía dava, te mee-ni tnúhu Yá Ndiòxí ní xóo dacuàha-dé ñáyiu.

¹² Te ndècu-gá-dé ñuú-áⁿ ñi ngóo té Gàlìón chiuⁿ taxi tnuní-dé distritú Acáyá. Te dàvá-áⁿ ñi cudééⁿ ñáyiu isràél núú tē Páblú, te ní tñi ñáhá-yu xii-dé ndécá ñáhá-yu cuáháⁿ núú cuè té cùchiuⁿ.

¹³ Te ní xáháⁿ-yu xii té Gàlìón té cùu gobiernú:

—Tée-a ní quexìo-dé ñuú-ó xica cuu-dé te cuiní-dé dandàhú ñáhá-dě chitnahá-ndí-dé cada-ndí nàcuáa quide-dé quidé càhnu-dé Ndiòxí-dě, te dañá-ndí vá cádá-gǎ-ndí nàcuáa càháⁿ tnúhu sá sánú ìchi ñaha xii-o nacuáa cundecu-o cuiní-dé —càchí-yu xáháⁿ-yu xii té cùu gobiernú.

¹⁴ Te té Páblú cuiní-dé caní-dé cuèndú ní cùu, te ní ngúita té Gàlìón càháⁿ-dé, te xáhaⁿ-dě xií-yu:

—Nchòhó ñáyiu isràél, cundedóho-ndo tnúhu na càháⁿ-í-a. Te núu ndècu núú ìⁿ cuéchi ní quide-dé àdi ní sahani-dé ìⁿ ndíyí,

te cuu cundáa-xi iha, te cáháⁿ-ndó ñuú nándi cùu sá ñi quide-dé,

¹⁵ àdi dico-ni sá ìⁿ tnúhu ní cáháⁿ-dé, te yáchí-gá chí cuáháⁿ yàcáⁿ ndatnúhu-ndo núú méé-ndó, chi mee-ni sǎ ñà túú quide-dé nàcuáa càháⁿ tnúhu sá sánú ìchi ñaha xii-ndo caháⁿ-ndó, te yúhú ñá túú tnàhá iní-í cada ndáa-í nchaa xiǎⁿ —càchí-dé xáhaⁿ-dě.

¹⁶ Te ní cudééⁿ-dě, te ní ndeñuhu ñaha-dě xií-yu vechiⁿ.

¹⁷ Te ñáyiu ñá túú cùu ñáyiu isràél ní tñi-yu té Sòstenés té yìndaha veñúhu ñáyiu isràél, te ndèhe té Gàlìón té cùu gobiernú ní canihá-yu xii-dé, dico ñá túú tnàhí ná tnúhu ni càháⁿ-dé taunihnu-dé té ní caní-yu-áⁿ.

Té Páblú cuáháⁿ tucu-dé ñuú Antiòquia, te yàcáⁿ ní xica tucu-dé cuáháⁿ-dé dava-gá ñuú càháⁿ-dé tnúhu Yá Ndiòxí

¹⁸ Te titní-gá nduu ní xíndecu té Páblú ñuú Còrintú, te ní quide ndee iní-dé nchaa ñáyiu ní sándáa iní-xi tnúhu Jèsús, te ní tñi-dé ichi cuáháⁿ-dé distritú Sìriá ndihí té Àquilú ndihí ñadihí té Àquilú-áⁿ tǎ Priscilá, te ní quexìo-yu ñuú Cèncreá. Te cùmání-gǎ tñi-yu ichi quíhíⁿ-yu ñuú Éfesú, te ní dèté díquí tē Páblú, chi ducaⁿ ñi xáhaⁿ-dě xii Yá Ndiòxí sá ndéé xínu ìⁿ chiuⁿ ní saní iní-dé cada-dé cuendá-gá, te dàtnùní dèté-dé. Te ní quée-yu bàrcú cuáháⁿ-yu.

¹⁹ Te ní quexìo-yu ñuú Éfesú, te yàcáⁿ ní xáhaⁿ tē Páblú sá cùndècu té Àquilú ndihí ñadihí-dé, te mee-dě quíhíⁿ-dé dava-gá ñuú. Te cùmání-gǎ caca-dé quíhíⁿ-dé, te ní sáháⁿ-dé veñúhu ñáyiu isràél ní ndatnúhu ndihí ñaha-dě xií-yu.

²⁰ Te ní xáháⁿ-yu sá cùndècu-dé titní nduu, te ñá ní cuiní-dé cundecu-dé.

²¹ Te ní xáhaⁿ-dě:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiòxí ná càchí-gá, te vitna chí cádá ndèe iní —càchí-dé xáhaⁿ-dě xií-yu.

Te ní quée-dé bàrcú cuáháⁿ-dé.

²² Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexìo-dé, te ní dándácõ váha-dé ñáyiu ndècu ichi Yá Ndiòxí, te dàtnùní ní xica-dé cuáháⁿ-dé ñuú Antiòquia.

23 Te yàcáⁿ ní xíndecu-dé titní nduu, te dǎtnùní ní tñi-dé ichi cuáháⁿ-dé. Te ní sáháⁿ-dé ñihí distritú Gàlaciá ñihí distritú Frigiá. Te ñi tnahá ñuú ní sáháⁿ-dé ní cáháⁿ-dé ñihí ñáyiú sàndáá iní tñuhu Yá Ndiöxí, te ní ndúcú ndéé-gǎ-yu ní quidé-yu nchaa nàcuáa ní xáhaⁿ-dë cadá-yu.

Té Àpolós càháⁿ-dé tñuhu Yá Ndiöxí ñuú Éfesú

24 Te dàvá-áⁿ ñi quèxio ñiⁿ té isràél ñuú Éfesú, te nàni-dé Àpolós, te cùu-dé té ñuú Alejandriá, te ío váha túha-dé tñuhu Yá Ndiöxí, te ío váha ñuhu díquí-dë nàcuáa cáháⁿ-dé,

25 chi sa xìní-dé nàcuáa ní xóo cáháⁿ ndí Juáa cùtnàhá ní xóo dacuàndute ndí ñáyiú. Te ío ní cudí iní-dé ní cáháⁿ-dé nchaa nàcuáa ní cuu cuèndá Jèsús, dico vátá dácuaⁿhá-gá-dé nchaa tñuhu ní cáháⁿ mée Jèsús.

26 Te ní sáháⁿ-dé veñúhu ñáyiú isràél, te yàcáⁿ ní cáháⁿ-dé ñi yùhu ñi iní-dé. Te ndècu té Àquilú ñihí ñadhí-dé tá Priscilá ndédóho-yu tñuhu ní cáháⁿ-dé, te ní xáháⁿ-yu sá quíhíⁿ-dé vehé-yu, te ní sáháⁿ-dé, te ní xítñuhu ñàhá-yu xii-dé dava-gá tñuhu Yá Ndiöxí sá ñà túú xìní-dé.

27 Te ní cachí té Àpolós sá quíhíⁿ-dé distritú Acáyá, núu xíáⁿ ní cadúha ñáyiú ñuú Éfesú ñi tutú canehe-dé quíhíⁿ ndaha ñáyiú sàndáá iní tñuhu-gá xíndecu Acáyá. Te xáháⁿ-yu núu tütú-yu: “Cáháⁿ váha-ndo ñihí té Àpolós ñuú ní quexio-dé”, cächí-yu xáháⁿ-yu núu tütú-yu. Te ní xica-dé cuáháⁿ-dé, te ní quexio-dé Acáyá. Te nchaa ñáyiú sàndáá iní tñuhu-gá yàcáⁿ, ñi-ñi mee Yá Ndiöxí ní chindee ñàha-gá ní sàndáá iní ñáhá-yu xii-gá. Te té Àpolós ío váha ní cáháⁿ-dé tñuhu Yá Ndiöxí núu-yu, te xíáⁿ ío ní ndúcú ndéé-gǎ-yu ní quidé-yu chiⁿ-gá.

28 Te té Àpolós ní ndatnùhu-dé ñihí ñáyiú isràél, te ní xíndedóho dava-gá-yu. Te ío váha ní caní-dé cuèndú nchaa nàcuáa ní xóo cáháⁿ cue té ndéé sanaha sá quíxí Crìstú ñuyíú-a. Te ní cáháⁿ ndáá-dé ní xáhaⁿ-dë sá díú-ní Jèsús cúu-gǎ Crìstú Yaá ní tendaha Yá Ndiöxí ní quíxi ñuyíú-a. Te ñáyiú isràél xíndatnùhu-yu sá ñà ndàá nàcuáa càháⁿ-dé,

dico ñá ní ñihí-yu tñuhu cùñàhá-yu xii-dé, chi ío váha ñuhu díquí-dë tñuhu cáháⁿ-dé.

19

Té Pǎblú ndécú-dë ñuú Éfesú

1 Te cùtnàhá ndécú-gǎ té Àpolós ñuú Còrintú, te ní xica té Pǎblú cuáháⁿ-dé tá yàha-dé mee-ñi xítí yucu cuáháⁿ, te ní sáá-dé ndéé ñuú Éfesú. Te ñuú-áⁿ ñi naníhí tñàhá-dë ñihí cue té sàndáá iní tñuhu Jèsús.

2 Te ní xícaⁿ tñuhú-dë núu-güedë, te xáháⁿ-dë:

—¿Sa ní quexio Espiritú Yá Ndiöxí ní ngúndecu ñihí-ndo ndéé òré ní sàndáá iní-ndo Jèsús-áⁿ? —cächí-dé xáháⁿ-dë xii-güedë.

Te ní xáhaⁿ-güedë:

—Ñá túú xìní-ndí sá ío Espiritú Yá Ndiöxí —cächí-güedë xáháⁿ-güedë xii-dé.

3 Te ní xáhaⁿ tucu-dé:

—¿Nása ní cáháⁿ té ní dácuaⁿndute ñaha xii-ndo-i? —cachí-dé xáháⁿ-dë xii-güedë.

Te ní xáhaⁿ-güedë:

—Ní cáháⁿ-dé nàcuáa ní xóo cáháⁿ ndí Juáa —cächí-güedë xáháⁿ-güedë xii-dé.

4 Te ní xáhaⁿ tē Pǎblú:

—Ndí Juáa ní dácuaⁿndute ñaha ndí xii ñáyiú, chi ní cuíní-yu sá dáñá-yu nchaa sá cuèhé sá dúhá quidé-yu. Te ní xáhaⁿ ndí xii-yu: “Quíndáá iní-ndo tñuhu Jèsús chi dácuaⁿtí quíxi-gá ñiⁿ nduu”, duha ní xáhaⁿ ndí Juáa xii-yu —cächí té Pǎblú xáháⁿ-dë xii-güedë.

5 Te sá dúcáⁿ ñi cáháⁿ té Pǎblú xáháⁿ-dë xii-güedë, núu xíáⁿ ní sandute-güedë nàcuáa ní dándóo tñuhu Jèsús.

6 Te ní sacáⁿ ndodo té Pǎblú ndahá-dé díquí-güedë, te òré-ñi ní quexio Espiritú Yá Ndiöxí ní ngúndecu ñihí-güedë, te ní ngúita-güedë ní cáháⁿ-güedë tñuhu sá dácuaⁿ iní ñáhá Espiritú-gá, tñuhu sá ñà túú xìní-güedë cáháⁿ-güedë, te ní cáháⁿ-güedë tñuhu Yá Ndiöxí nàcuáa ní dácáhú iní ñáhá Espiritú-gá xii-güedë.

7 Te cùu datná úxúú tñàhá-güedë.

8 Te té Pǎblú ní sáháⁿ-dé veñúhu ñáyiú isràél ní cáháⁿ ñihí-dé-yu, te úní yóo ñi xínu ní xica cuu-dé veñúhu-yu. Te ío váha ñuhu díquí-dë tñuhu cáháⁿ-dé, núu

xiãⁿ ní cuyi-dě ní cáháⁿ-dé, te ní xáhaⁿ-dě sá quindáá iní-yu tnúhu Jèsús, te ducaⁿ te ndíhu ndaha ñaha Yá Ndiõxí xii-yu.

⁹ Te davá-yu ío sàá iní-yu ñá ní cuini-yu quindáá iní-yu, te ío ní cáháⁿ cuèhé-yu cuendá Jèsús xití veñúhu núú dáva-gá-yu. Te té Páblú ní ndee-dé veñúhu cuáháⁿ-dé ndihi ñáiyu sándáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácuahá ñaha-dé xii-yu.

¹⁰ Te úú cuíá ducaⁿ ñí sáháⁿ-dé scuèlá ní dácuahá-dě ñáiyu. Te nchaa ñáiyu isràél ñáiyu ndècu ñihí distritú Àsiá ndihi nchaa ñáiyu ñá túú cùu ñáiyu isràél ní xíndedóho-yu tnúhu Jèsús.

¹¹ Te té Páblú ío ní chindee ñaha Yá Ndiõxí xii-dé ní quide-dé vèi núú sã vã yõo tnàhí ndàcu cada.

¹² Te pãnú díquí-dě ndihi dóo cándèé núú yíquí-dě ní xicáⁿ-yu nèhé-yu ní sáháⁿ núú ndécú ñáiyu cùhú, te xiãⁿ ní tñi ñáiyu cùhú ndihi ñáiyu yìhi ñaha espíritú cùndihi yucu ñávãha, te ní ndúha-yu.

¹³ Te ñuú Isràél véxi cue téé tatna xica cuu-güedé quidé tátna-güedé ñáiyu yìhi ñaha espíritú cùndihi yucu ñávãha. Te ní ngüíta-güedé ní cacu nèhe-güedé Jèsús cuendá quee espíritú-áⁿ yiqui cùñú-yu, te ní xáhaⁿ-güedé:

—Xocuiñí-n, chi cächí Jèsús sá vã cùndècu ndihi-gá-n téé-a. Te ñiu-ni Jèsús cacú nèhe té Páblú òré càháⁿ-dé tnúhu-gá —cächí-güedé xãhaⁿ-güedé xii espíritú-áⁿ.

¹⁴ Te úsá tnàhá-güedé ducaⁿ ñí xóo cada-güedé. Te tátá-güedé ní xínani-dě Èsevá, te téé-áⁿ ñí cuu-dé dútú cùnùu.

¹⁵ Te sá dúcáⁿ ñí cáháⁿ-güedé, te ní xáhaⁿ espíritú cùndihi yucu ñávãha-áⁿ xii-güedé:

—¿Te ná cúú nchòhó ñuú dayùhu ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhá-í xii-ndo —cächí espíritú-áⁿ xãhaⁿ-xi xii-güedé.

¹⁶ Te téé yìhi ñaha espíritú cùndihi yucu ñávãha-áⁿ ñí ndanchita-dé ní tñi-dé cue téé quide tátna-áⁿ, te ní ndihi dóo-güedé ní ndátá-dě, te ní dánicuehé ñáhá-dě xii-güedé, te ní xinu-güedé cuáháⁿ-güedé.

¹⁷ Te nchaa ñáiyu isràél ndécú ñuú Éfesú ndihi dava-gá ñáiyu ndècu ñiu-ni ñuú-áⁿ ñí ñihí-yu tnúhu nàcuáa ní cuu, te ío ní yùhú-yu, te vèi-yu ní cachí sá ío càhnu cuu Xitohó Jesucristú.

¹⁸ Te dava ñáiyu ní sándáá iní-xi tnúhu Jèsús ní sáháⁿ-yu núú ndécú tẽ Páblú, ndihi núú ndécú nchaa ñáiyu ní sándáá iní tnúhu-gá ní nãhmá-yu nàcuáa ní xóo cada-yu.

¹⁹ Te titní ñáiyu ní xóo cada ndùu nehé-yu tutú-yu ní sáháⁿ núú ndécú nchaa ñáiyu sándáá iní-xi tnúhu-gá, te yacáⁿ ní ndada cuendá-yu sá ío yahu ní sãha-yu tutú-yu, chi ndéé údico úxí mĩl díhúⁿ cuixíⁿ ní sãha-yu núú ncháá. Te ncháá-yu ní sahmí-yu tutú-yu.

²⁰ Te sátá ñí cáyú nchaa tutú-áⁿ, te vèi-gá ñáiyu ní tuhá-yu ichi Yá Ndiõxí, te ní sãha-yu cuendá sá ío xini ñuhu tnúhu Yá Ndiõxí.

²¹ Te ní cachí té Páblú sá quihíⁿ-dé distritú Macèdoniá ndihi distritú Acáyá, te dàtnùní nùhú-dé ñuú Jerusàlén, te ducaⁿ te dàtnùní quihíⁿ-dé ñuú Rómá.

²² Te ndècu ndihi-dé té Timùteú ndihi té Èrastú cue téé chindee ñaha xii-dé. Te té Páblú ní xáhaⁿ-dẽ xii-güedé sá códo ñuú-güedé quihíⁿ Macèdoniá, te ní xica-güedé cuáháⁿ-güedé, te mee-dě ní quendóo-dé.

Ñáiyu Éfesú ío dusaⁿ quidé-yu ñuú-yu

²³ Te dàvá-áⁿ ío ní cudèéⁿ-yu núú nchaa ñáiyu ní tuha ichi Yá Ndiõxí.

²⁴ Te ñⁿ téé ñuú Éfesú nání-dě Demètriú. Te téé-áⁿ ñí xóo canehé chiúⁿ-dé mee-ni díhúⁿ cuixíⁿ ní xóo cadúha-dé veñúhu líhli, dàtná cuini-ndó càa veñúhu Diáná sá cúú ndiõxí-yu. Te vèi díhúⁿ ñí xóo ñihí-dě ndihi cue téé ní xóo cada chiúⁿ ndihi-dé.

²⁵ Te ní cana-dé cue téé quide chiúⁿ ndihi-dé, ndihi nchaa cue téé quide chiúⁿ ndihi díhúⁿ cuixíⁿ, te ní xáhaⁿ-dẽ xii-güedé:

—Nãha-ndo sá ío váha ñihí-ó díhúⁿ cuendá chiúⁿ quide-o.

²⁶ Te nãha-ndo sá cächí té Páblú sá ñà díú ndiõxí cúú sá ñí cadúha ñáiyu ñuyíú-a. Te ducaⁿ càháⁿ-dé ñuú-ó, te ducaⁿ-ni càháⁿ-dé ñihí distritú Àsiá, te ío-gá vèi ñáiyu sándáá iní tnúhu càháⁿ-dé.

27 Te ío úhú nŭu na cuíta chiúⁿ quide-o, vá yŕo-gá cuaaⁿ sá cáduha-o. Te nguíta-yu cáháⁿ-yu sá veñúhu Diána ñá túú cáváha, te vá cáda cãhnu-gá-yu sãndú-ó. Te nãha-ndo sá ío cãhnu cuu Dianá, chi nchaa ñáyiú distritú Àsiá quidé cãhnu ñahá-yu ndihi ñáyiú xĩndecu ní cãa xico ñuyíú —cãchí té Demètriú xãhaⁿ-dẽ xii-güedé.

28 Te sá dúcãⁿ ñí cáháⁿ té Demètriú, xiãⁿ ní cudééⁿ-güedé núú tẽ Pãblú, te uuⁿni ní cuáá-güedé te cãchí-güedé:

—Ío cãhnu cuu Dianá sãndú ñáyiú Éfesú! —cãchí-güedé.

29 Te nchaa ñáyiú ñuú Éfesú ndi coyo ndi coyó-yu xicáhãⁿ-yu. Te tnãhá úú cue té distritú Macèdoniá xicã cùu-güedé ndihi té Pãblú, ñⁿ-dé nãní-dẽ Gãyú, te ñⁿ-dé nãní-dẽ Arĩstarcú. Te ní tñi-güedé úú cue té-ãⁿ, te cuãnguihu coyo ndihi ñaha-güedé vehe núú quidé-güedé jũndá.

30 Te té Pãblú cuiní-dé quihu-dé tnãhá-dé vehe-ãⁿ cáháⁿ ndihi ñaha-dé ní cùu, te ñá ní daña cue té ní sãndãá iní tnúhu-gã.

31 Te ñⁿ úú cue té cùnuu distritú Àsiá ní cáháⁿ váha-güedé cuendá té Pãblú, te ní xãhaⁿ-güedé xii ñⁿ té xĩnu cuechi núú-güedé ní sáhãⁿ-dé ní xãhaⁿ-dẽ xii té Pãblú sá vá quihu-dé vehe núú quidé-güedé jũndá.

32 Te uuⁿni ní cuáá-yu nchaa-yu, te ñá ñⁿ-ní tnũhu ní cáháⁿ-yu, chi ndi dñⁿ tnũhu ní cáháⁿ-yu ñⁿ ñⁿ-yu. Te chitu-gã ñáyiú ñá ní cùtnuní iní-yu ná cuendá ní dátacã ñáhã-güedé xití vehe-ãⁿ, chi ñá ñⁿ-ní tnũhu ní cáháⁿ-yu.

33 Te davã-yu ní cáháⁿ-yu sá cuẽchi té Lijandrú cúú-xí, chi ní xãhaⁿ ñáyiú isrãél xii-dé sá cáháⁿ-dé yuhú-yu chindee tnũhu ñaha-dẽ xií-yu. Te ní quide-dé ndaha-dé núú-yu sá cùndedóho-yu tnúhu cáháⁿ-dé chindee tnúhu ñaha-dẽ xií-yu yòtnúhu.

34 Te ní cutnùní iní-yu sá tẽ isrãél cúú-dẽ, te uuⁿni ní cuáá tucú-yu, ñá ní daña-yu cáháⁿ-dé, te cãchí-yu:

—Ío cùnuu Dianá sãndú ñuú Éfesú! —cãchí-yu. Te dàtnã úú òré ñⁿ-ni tnũhu ní cáháⁿ-yu.

35 Te tẽ cùu secretariú-ni-gã ní cáháⁿ-dé, te dàtnùní cuèé cuèé ní sadí-yu yuhú-yu. Te ní xãhaⁿ-dẽ xií-yu:

—Nchaa-ndo cùndedóho-ndo ñⁿ tnúhu na cáháⁿ-í-a. Ío cùnuu Dianá, te nchaandi túhú ñáyiú sa nãhá-yu sá ncháã-ó ío nèhe cuendã-ó veñúhu-ãⁿ. Te nãhá-yu sá néhé cuendã-ó sãndú-ãⁿ, chi véxi cuuⁿ-gã andiú.

36 Te vá yŕo ñⁿ cãchí sá ñã ndãá. Te coto-ndo mẽe-ndo, te vá cuidó-ndó cáda-ndo, te vá cuidó-ndó cáháⁿ-ndó.

37 Te ná cuendã ndécã-ndó cuè té-ãⁿ véxi, te ñá túú ñã ní quide-güedé, te ñá túú ñã ní dùhu-güedé veñúhu, te ñá túú cáháⁿ cuèhé-güedé cuendã Diána.

38 Te núu ío yoo nãá ndihi ñaha xii té Demètriú ndihi cue té quide chiuⁿ ndihi-dé, te quihíⁿ-güedé cacãⁿ cuèchi-güedé núú cuè té cùchiuⁿ. Te cue té cùchiuⁿ na cundoho-güedé nũu quehndé-güedé cuèchi-yu àdi ñáhã.

39 Àdi ío-gã ná cuendú ñúhú iní-ndó, te cáháⁿ-ndó òré ná cóo jũndá.

40 Te ío úhú nŭu na ñihí tẽ tàxi tnuní ñáhã xii-o tnúhu sá dúhá ío quide dusaⁿ-o, te cachí-dé sã ndècuèchi-o chi ñá túú sãndãá iní-ó-dẽ quesaha-dẽ. Te ñá túú tnãhí ndũu váha-xi sã dúhá cáda-o ní cuu, te vitna duha ní quide-o, te ñá cùtnùní iní-ó ñãsa cúñaha-o xii tẽ tàxi tnuní ñáhã xii-o núu na cãna ñaha-dé —cãchí tẽ cùu secretariú xãhaⁿ-dẽ xií-yu.

41 Te ní xãhaⁿ-dẽ sã nùhú-yu te ní ndihí-yu cuãnuhú.

20

Té Pãblú cuáhãⁿ-dé distritú Macèdoniá ndihi distritú Grèciá

1 Te òré ñá túú-gã ní quide dusaⁿ-yu, te ní cana ñaha tẽ Pãblú xii nchaa ñáyiú sãndãá iní tnúhu Jèsús ní cáháⁿ-dé dóho-yu nãcuãa cadã-yu. Te ní quide ndee iní ñáhã-dẽ xií-yu, te ní tñi-dé ichi cuáhãⁿ-dé distritú Macèdoniã.

2 Te tayãha-dé cuáhãⁿ ñⁿ ñⁿ ñuú yĩndèhu Macedoniã. Te cáháⁿ-dé dóho nchaa ñáyiú sãndãá iní tnúhu Jèsús nãcuãa cadã-yu, te ní cudí iní-yu cadã-yu nãcuãa cáháⁿ Yã Ndiõxí cadã-yu sá dúcãⁿ ñí cáháⁿ-dé dóho-yu. Té ní quexiõ-dé distritú Grèciã.

³ Te xíáⁿ nǐ xíndecu-dé úní yóó. Te xíáⁿ quěe-dé bàrcú quíhíⁿ-dé distritú Siriá ní cùu, te ní níhí-dě tnúhu sá ndétú ñaha ìⁿ úú cue téé israél cahni ñaha-güedě xii-dé ní cùu, núu xíáⁿ ní tñi-dé ichi cuáháⁿ-dé ní yáha-dé ichi distritú Macèdoniá.

⁴ Te cuáháⁿ ndihí-dé té Sopàtér téé ñuú Bèrea, ndihí té Arìstarcú, ndihí ìⁿ téé nàni Segundú. Te ndi ndúú cue téé-áⁿ cúú-güedě cue téé ñuú Tesalónicá. Te tnàhá té Gáyú téé ñuú Dèrbé, ndihí té Timùteú cuáháⁿ ndihí-dé, te tnàhá té Tiquicú ndihí té Trõfimú cuáháⁿ ndihí-dé, te úú cue téé-áⁿ cúú-güedě cue téé distritú Àsiá. Te nchaa cue téé-áⁿ cuáháⁿ ndihí-güedé té Pàblú.

⁵⁻⁶ Te ní quexìo-güedé ñuú Filipú, te yàcáⁿ ní naníhí ñahá-güedě xii-ndí. Te té Pàblú ní tendaha-dě cue téé ndihí-dé cuáháⁿ-güedé ñuú Tròás, te ní xáhaⁿ-dě sá díú-ní yàcáⁿ cundetu ñaha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhí levadurá. Te sátá nǐ yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuú-áⁿ. Te yàcáⁿ ní naníhí tnáhá-ndí ndihí cue téé yòdo nuu cuáháⁿ ní xíndecu-ndí úsá nduu.

Té Pàblú cuáháⁿ ngándihí-dé ñáyiu ñuú Tròás

⁷ Te ìⁿ nduu ndumìngú ní naníhí tnáhá-ndí ndihí nchaa ñáyiu ní sàndáá iní-xi tnúhu Jèsús ní xexi-ndí pàá ndihí-yu. Te ducaⁿ nǐ quide-ndí, chi ní cachí Jèsús sá dúcáⁿ càda-o cuendá sá vǎ nàcuànaa-o sá nǐ xíhí-gá cuendá naníhí tǎhú-ó. Te té Pàblú ní ngüíta-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tũndaá ingá nduu-áⁿ, te caca-dé quíhíⁿ-dé ingá xichi.

⁸ Te ndécú-yu vehe yòdo tnaha, te yìhí-yu ndéé cuàrtú cúú úní núú nǐnu, te càyú víhí ñùhú xití cuàrtú-áⁿ.

⁹ Te ìⁿ téé sa ta cùu sacuéhé luha nàni-dé Eùticú núcõo-dé yèhe ventaná, cuìní-dé cúdú-dé, chi ní cunaha vìhi caháⁿ té Pàblú, te ní tñi ñaha sàní xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñahá-yu, te sa ní xíhí-dé, chi ío dùcúⁿ ní ngava-dé.

¹⁰ Te tnàhá té Pàblú nchìcúⁿ-dé ní nuu. Te ní quexìo cunu-dé núú cǎtùu téé ní xíhí-áⁿ, te ní numi ñaha-ni-dě, te ní xáhaⁿ-dě xií-yu:

—Vá ndihú iní-ndó, chi ní ndoto-dé — cǎchí-dé xáhaⁿ-dě xií-yu.

¹¹ Te dàtnùní cuándaḡa ndihí ñaha tùcu-dé xií-yu cuàrtú núú yìhí-yu ni cùu, te yàcáⁿ ní xexi ndihí ñaha-dě xií-yu, dàtnùní ní ngüíta-dé vǎi-gá tnúhu ní cáháⁿ-dé, te càháⁿ-ni-dé ní tũndaá, te dàtnùní ní xica-dé cuáháⁿ-dé.

¹² Te téé ní ngava-áⁿ ní sánúndeca ñahá-yu xii-dé ndéé vehe-dé, te ío ní cudí iní-yu sá nǐ ndoto-dé.

Ní quee-güedé ñuú Tròás cuáháⁿ-güedé ñuú Miletú

¹³ Te té Pàblú ní cachí-dé sá quíhíⁿ-ndí ndihí bàrcú ndéé ñuú Àsón, te mee-dě caca saha-dě, te yàcáⁿ naníhí tnáhá-ndí ndihí-dé te quée-dé bàrcú, te ní quée-ndí bàrcú cuáháⁿ-ndí.

¹⁴ Te ní naníhí tnáhá-ndí ndihí-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené.

¹⁵ Te ní quexìo-ndí ndéé ingá nduu yatni ñuú Quiú, te ndéé nduu tnéé ní quexìo-ndí ñuú Sámú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú.

¹⁶ Te té Pàblú ñá ní cuìní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndíhí iní-dé cuendá cuìní-dé quini-dé nũu vá ndácú-dě ndexìo-dé ñuú Jerusàlén cundecu-dé vico Pentecòstés.

Té Pàblú càháⁿ ndihí-dé cue téé yìndaha ñaha xii ñáyiu sàndáá iní tnúhu Jèsús ñuú Éfesú

¹⁷ Te òré ndécú tǎ Pàblú ñuú Miletú, te ní cana-dé cue téé yìndaha ñaha xii ñáyiu sàndáá iní tnúhu Jèsús ñuú Éfesú sá quíhíⁿ-güedé núú ndécú-dě.

¹⁸ Te sátá nǐ quexìo-güedé, te ní xáhaⁿ-dě xii-güedé:

—Nàha-ndo nacuáa ní quide-í ndéé cútnàhá ní quexìo-í distritú Àsiá.

¹⁹ Chi ní quide-í nàcuáa ní cáháⁿ Yǎ Ndiõxí cada-í, ñá túú ní tũhío-í, te ñá túú ní quide cahnu-í mèe-í, te ío ní ndáhyú-í

sá quidé dàvá-yu, chi ío sàá iní-yu. Te sa nàha-ndo sá tìtní xito ní cuiní ñáyiú isràél cahni ñàhá-yu xii-í ní cùu, te ío ní ndoho-í ní cácu-í.

²⁰ Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chindèe ñaha Yá Ndiòxí xii-ndo. Te ní cáháⁿ-í tnúhu-gá núú-ndó ncháa-ndo, te ñu-ni ducaⁿ ní quixi-í ndi tnahá vehe-ndo ní cáháⁿ-í tnúhu-gá núú-ndó.

²¹ Te ní xáhaⁿ-í xii ñáyiú isràél ndihi ñáyiú ñá túú cùu ñáyiú isràél sá dáñá-yu nchaá sá cuèhé sá dúhá quidé-yu te quindáá iní-yu tnúhu Xítohó Jesucristú.

²² Te dacuítí quíhíⁿ-í ñuú Jerusalén, chi Espíritú Yá Ndiòxí ní cachí-xi sá dáí quíhíⁿ-í, te ñá túú xini-í nándi cada ñaha-güedé xii-í yacáⁿ te núu na quèxio-í.

²³ Te ñuⁿ ñuú núú sàháⁿ-í cächí tnúhu Espíritú-gá sá chíhí ñaha-güedé vecaá, te cada úhú ñàhá-güedé.

²⁴ Dico ñá túú tnahí ná cuu cuèi na cahni ñaha-güedé xii-í, dico cuiní-í sá dñí iní dandihí-í nchaá sá ní cachí Xítohó Jesucristú cada-í. Te ní cachí Yá Ndiòxí sá cáháⁿ-í núú ñáyiú sá ío cùu iní ñàhá-gá xii-yu, te naníhí tànhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo ncháa-ndo sá núu na quindáá iní-ndó Yá Ndiòxí, te ndíhu ndaha ñaha-gá xii-ndo. Te na cächí tnúhu-í sá ní ñuⁿ nduu-gá vá quini ñàhá-ndó xii-í ñuyú-a.

²⁶⁻²⁷ Te yúhú ñá túú cuèchi-í núu ío ñáyiú vá naníhí tànhú, chi sa ní cachí tnúhu-í nchaá sá ní cáháⁿ mée Yá Ndiòxí cada-ndo.

²⁸ Te coto-ndo mée-ndo, te coto-ndo tnahá ñáyiú sàndáá iní tnúhu-gá, chi Espíritú-gá ní cachí-xi sá cùnù-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cada-ndo cuendá, chi nàha-ndo sá Jèsús ní sati níñí-gá, te ní xihí-gá cuendá naníhí tànhú-ó ndihí-yu.

²⁹ Te yúhú sa cùtnuní iní-í sá òré ñá túú-gá-í ndécú, te quixi ñáyiú dandáhú ñàhá xii-ndo cuendá dañá-ndo tnúhu Yá Ndiòxí, te cada ñàhá-yu xii-ndo dàtná quidé ñàhá òré tñí-dí mbéé.

³⁰ Te ñu-ni ñuⁿ ñuú cue téé ndècu ndihi-ndo, cue téé-án dacuàndehnde-güedé, te cudana davá-yu quindáá iní-yu chítnáhá ñàhá-yu xii-güedé.

³¹ Te xáⁿ núu cächí tnúhu-í sá ío quíhí iní-ndó cùndecu-ndo ndihi nchaá ñáyiú sàndáá iní tnúhu-gá. Te nàha-ndo sá yúhú ní xíndecu-í úní cuíá ní cáháⁿ-í tnúhu Jèsús núú ñáyiú cuèi nduu cuèi níú. Te áma ní xóo ndáhyú-í, chi ñá ní cuiní-yu quindáá iní-yu nchaá-yu tnúhu ní cáháⁿ-í —cächí té Páblú xáhaⁿ-dè xii-güedé.

³² Te xáhaⁿ tùcu-dé:

—Nchòhó cue téé ndècu ndihi-í ichi Xítohó Jesucristú, ío cuiní-í sá mée Yá Ndiòxí chindee ñaha-gá xii-ndo. Te mee-gá ní cáháⁿ-gá sá ío cùdí iní ñàhá-gá xii-ndo. Te naníhí tànhú-ndó ndihi nchaá ñáyiú cùu cuendá-gá, te chindee ñaha-gá xii-ndo cuendá cada-ndo ncháa sá cáháⁿ-gá.

³³ Te òré ní xíndecu ndihi ñaha-í xii-ndo, te ní dñíⁿ ní dñó ñá túú ní cùdí iní-í.

³⁴ Te mee-ndo sá naha-ndo sá yúhú ní quide chiuⁿ-í, te ní níhí-í nchaá sá ní nandihí-í ndihi cue téé xica cuu ndihi-í.

³⁵ Te sa ní xini-ndó nàcuáa ní quide-í ní quide chiuⁿ-í, te ñu-ni ducaⁿ cada chiuⁿ-ndo cuendá chindee-ndo ncháa ñáyiú ndáhú, chi sa nàha-ndo nacuáa ní cachí Xítohó Jesucristú, te duha ní cachí-gá: “Cùdí-gá iní-ó cuàha-o ñáyiú ndáhú sá xini ñuhú-yu dàcúxí sá táxi-yu xii mee-o”, duha ní cachí-gá —cächí té Páblú xáhaⁿ-dè xii-güedé.

³⁶ Te sátá dúcáⁿ ní cáháⁿ-dé, te ní ngüíñí xítí-dè ndihi dava-gá-güedé, te ní cáháⁿ ndihi-dé Yá Ndiòxí.

³⁷ Te sátá ní túhú tnúhu ní cáháⁿ-dé ndihi Yá Ndiòxí, te ní ndáhyú víhí-güedé sá quíhíⁿ-dé, te ní numi ñaha-güedé, te ní teyuhu ñaha-güedé.

³⁸ Te ní ndíhú víhí iní-güedé, chi ní xáhaⁿ tñé Páblú sá ní ñuⁿ nduu-gá vá naníhí tnahá-güedé cáháⁿ ndihi tñaha-güedé. Te cuáháⁿ ndihi ñaha-güedé xii-dé núú ndécú bàrcú.

21

Té Páblú cuáháⁿ-dé ñuú Jerusalén

¹ Te ní quide ndee ìní-ndí nchaá cue téé cùnuu. Te ní quée-ndí bàrcú cuáháⁿ ndáá ichi-ndí ñuú Cõs. Te nduu tnée ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará.

² Te yàcáⁿ ní naníhí-ndí ìⁿ bàrcú ñúhú ichi-xi quíhíⁿ-xi distritú Fèniciá, xiáⁿ ní quée-ndí cuáháⁿ-ndí.

³ Te ichi cuáháⁿ-ndí ní xiní-ndí distritú Chìpré cáá cuädava xítí làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tìrú ìⁿ ñuú yíndèhu distritú Sìriá cuendá yàcáⁿ tava-güedé nchaá sá nchídó bàrcú.

⁴ Te yàcáⁿ ní naníhí tnáhá-ndí ndihí ñáyiu ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhãⁿ-yu sá vã quíhíⁿ té Pãblú ñuú Jerusalén, chi Espiritú Yã Ndiõxí ní xáhaⁿ-xi xií-yu sá ndóhó vîhi-dé ñuu na quíhíⁿ-dé.

⁵ Te sátá ñí yáha nduu úsá, te ní quee-ndí cuáháⁿ-ndí yuhu làmár. Te ní quee nchaá ñáyiu ní sándáá iní tnúhu-gá, téé, ñadíhí, nchaá landú, nchaá-yu ní sãndeca ñáhá-yu yuhu làmár, te òré ní quexìo-ndí, te ní ngüíñí xítí-ndí ní cáháⁿ ndihí-ndí Yã Ndiõxí.

⁶ Te ní quide ndee ìní tnáhá-ndí ndihí-yu, te dàtnùní ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñúhú-ndí ní quee-xi ñuú Tìrú cuáháⁿ-ndí ndihí-xi ñuú Tolèmaidá. Te xiáⁿ ñí sáá-xi te ní queene-ndí, te ní sáháⁿ-ndí ní cáháⁿ ndihí-ndí nchaá ñáyiu sándáá iní-xi tnúhu Jèsús, te ní xíndecu-ndí ndihí-yu ìⁿ nduu.

⁸ Te nduu tnée ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní queene tucu-ndí bàrcú, te cuáháⁿ-ndí vehe té Lìpé cundecu-ndí ndihí-dé. Te téé-áⁿ ñí xóo cada chiúⁿ ndihí-dé ìñú-gá cue téé ní chindee ñàha xii ñáyiu sándáá iní tnúhu-gá ñuú Jerusalén ní xóo cuáñaha-güedé sá ñí xóo caxí-yu. Te dàtnùní mee-ñã tnúhu Yã Ndiõxí càháⁿ-dé xícá cùu-dé.

⁹ Te té Lìpé-áⁿ ndècu cùmí dèhe òhí-dé, te ní ìⁿ-yu vátá ndúcú ñàha-gá téé xií-yu, te

nchaá-yu càháⁿ-yu tnúhu Yã Ndiõxí tnúhu sá dácàhu iní ñáhá mèe-gá.

¹⁰ Te xiáⁿ ñí cuu titní nduu ndècu-ndí, te ní quexìo ìⁿ téé nàni Agabú ñuú-áⁿ, véxi-dé distritú Jùdeá, te téé-áⁿ tnáhá-dé càháⁿ-dé tnúhu Yã Ndiõxí.

¹¹ Te ní níhí-dé tnúhu núú ndécú-ndí ñuu ní quixi-dé ní cáháⁿ ndihí ñàha-dé xii-ndí. Te ní xícáⁿ-dé cìnchú té Pãblú, te ní ngóo-dé, te ní ngüíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yã Ndiõxí ní cachí-xi sá tée dii cìnchú-xi-a tñi ñàha cuè téé isràèl ñuú Jerusalén, te duha dacùtu ñàha-güedé xii-dé, te cuáha cuendá ñáhá-güedé xii-dé núú cuè téé ñuú Rómá. Duha ní cáháⁿ Espiritú-gá —càchí té Agabú.

¹² Te sá dúcáⁿ ñí cáháⁿ-dé, te ní xáhaⁿ-ndí nchaá-ndí sá vã quíhíⁿ té Pãblú ñuú Jerusalén.

¹³ Te té Pãblú ní cachí-dé:

—¿Ná cuendá ndée dúcáⁿ ndàhyú-ndó dàndihú iní ñáhá-ndó xii-í-i? Te ñá túú ñã cuu cuèi na dàcutu ñàha-güedé, àdi cuèi na càhni ñàha-güedé xii-í cuendá sá càháⁿ ndihí-í Jèsús, chi sa ndècu túha-í sá cùú-í —càchí-dé.

¹⁴ Te ñá túú ní sándáá iní-dé sá dúcáⁿ xáhaⁿ-ndí, núu xiáⁿ ñá túú-gã ná ní xáhaⁿ-ndí xii-dé sá vã quíhíⁿ-dé, te ní xítnàha-ndí:

—Mee-ni-gã Yã Ndiõxí ná cùnaha-gá nása sàni iní-gá cada-gá —xítnàha-na-ndí.

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusalén.

¹⁶ Te cuáháⁿ ndihí-ndí ìⁿ úú cue téé Cèsareá, cue téé ní sándáá iní tnúhu Jèsús. Te ndèca ñàha-güedé xii-ndí cuáháⁿ vehe té Mnàson, te téé-áⁿ cùú-dé téé distritú Chìpré, te ndècu-dé ñuú Jerusalén, te sa ní cuu vài nduu ní sándáá iní-dé tnúhu-gá, te vehe téé-áⁿ ñí xíndecu-ndí.

Té Pãblú ndátnúhu-dé ndihí té Jàcobó

¹⁷ Te òré ní quexìo-ndí ñuú Jerusalén, te nchaá ñáyiu ní sándáá iní tnúhu Jèsús ní quixí-yu ní dándácõ váha ñàhá-yu, chi ní cudíí víhí iní-yu sá ñí quexìo-ndí.

¹⁸ Te nduu tnée cuáháⁿ ndihí-ndí té Pãblú cuendá cáháⁿ ndihí-ndí té Jàcobó, te òré ní

quexìo-ndí núú ndécú-dě, te ndècu ndihì-dé nchaa cue tée yìndaha ñaha xii ñáyiú sàndáá iní tnúhu Jèsús.

19 Te té Păblú ní dándácõ vâha ñaha-dě xii-güedé, te ní xâhaⁿ-dě nâcuâa ní quide Yá Ndiõxí ní chindee ñaha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isrâél.

20 Te sâtá ñí yâha ní cáháⁿ-dé, te ní ndácáⁿ tâhŷ-yu núú Yá Ndiõxí cuendá nchaa sá ñí quide-gá. Te dâtnùní ní xâhaⁿ-güedě xii té Păblú:

—Yòhó sa nâha-n sá ñí cuu tîtní mĭl ñáyiú isrâél ní sàndáá iní-yu tnúhu Jèsús, te càchí-yu sá ño xîni ñuhu-xi cadá-yu nchaa nâcuâa càháⁿ tnúhu sá ñí chídó tnùní ndí Moisés.

21 Te ní níhŷ-yu tnúhu sá dâcuâha-n ñáyiú isrâél ñáyiú ndècu ñuú xícá cuendá sá vâ cadá-gă-yu nâcuâa ní cachí ndí Moisés cadá-yu. Te xâhaⁿ-n xîi-yu sá vâ cuâha-gá-yu sèñá ñîi landú-yu, te vâ cadá-gă-yu dâtná ní xóo cada ñáyiú ndéé sanaha, duha dâcuaha-n ñáyiú ní níhŷ-yu tnúhu.

22 Te na ñihí-yu tnúhu sá ndécú-n ñha, te tnàvíí ngüíta-yu cáháⁿ cuèhé-yu cuendá-n.

23 Te na càchí tnúhu-ndí nâcuâa cada-n, Ndècu cúmí cue tée vátá cadá-gă-güedé nâcuâa ní cáháⁿ méé-güedě sá cadá-güedé cuendá nduu vétú iní Yá Ndiõxí.

24 Te quíhŷ-n ndihì-güedé te cada-n nchâa nâcuâa ní xóo cada ñáyiú ndéé sanaha cuendá nduu vétú iní Yá Ndiõxí. Te tava-n dîhŷⁿ cuu núú-güedě châhu-güedé veñúhu, te ducaⁿ te dâtnùní ndacu dèté díquí-güedě. Nchaa xîãⁿ cada-n, te quini ñáyiú sá ñâ ndâá tnúhu càháⁿ nchaa ñáyiú càháⁿ cuèhé cuendá-n. Te na cùtnuní iní-yu sá tnâhá-n quide-n nchaa nâcuâa ní chídó tnùní ndí Moisés cadá-yu.

25 Te sa ní quide ndáá-ndí cuendá nchaa ñáyiú ñuú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-án sâ vâ cáxŷ-yu nchaa sá nchító-ó ndùu tâhŷ nchaa sá càchí-yu cùu ndiõxí ní cadúha cue ñáyiú ñuyúú-a. Te ní xâhaⁿ-ndí sá vâ cáxŷ-yu níñí, te vâ cáxŷ-yu cuñú nchaa quiti cuèhné. Te vâ càháⁿ ndihì cue tée ñadîhŷ te núú ñá

díú ñadîhŷ-güedé cúŷ-yu, te ní cuè ñáyiú dîhŷ vâ càháⁿ ndihŷ-yu tée te núu ñá díú yîi-yu cùu-güedé. Duha ní tee-ndí núú tùtú cuáháⁿ —càchí-güedé xâhaⁿ-güedě xii té Păblú.

Ní tñi-güedé té Păblú xiti veñúhu ñáyiú isrâél

26 Te nduu tnéé cuáháⁿ té Păblú ndihŷ cúmí cue tée veñúhu càhnu sá ño cùnuu núú ñáyiú isrâél cada-güedé nâcuâa ní xóo cada ñáyiú ndéé sanaha cuendá nduu vétú iní Yá Ndiõxí. Te ní quíhu-dé veñúhu càhnu sá ño cùnuu-án ñí xâhaⁿ-dě ná daha-gá nduu cùmání dandîhŷ-güedé nâcuâa ní xóo cada ñáyiú ndéé sanaha, te dâtnùní cànehe-güedé sá ndúú tâhŷ Yá Ndiõxí quíhŷⁿ veñúhu.

27 Te cùmání-gă cuu úsá nduu sá ñí sáháⁿ-güedé veñúhu càhnu sá ño cùnuu, te sa ndècu tucu té Păblú veñúhu. Te cue tée isrâél véxi distritú Àsiá ní xiní-güedé té Păblú yíhŷ-dě veñúhu, te ní tñi ñaha-güedě xii-dé, te ño ní cáháⁿ cuèhé-güedé cuendá-dé núú dâva-gá ñáyiú yîi veñúhu cuendá sá cúdeēⁿ-yu núú tē Păblú.

28 Te níhi ní cáháⁿ-güedé, te xâhaⁿ-güedě xii-yu:

—ñNchòhó ñáyiú isrâél, yáchí-ndó chì cuánundaha ñaha-ndo! Chì tée-a yayacáⁿ cuáháⁿ-dé càháⁿ-dé sá ñâ túú nândîhŷ-o, te càháⁿ-dé sá vâ cadá-ó nchâa nâcuâa càháⁿ tnúhu sá ñí chídó tnùní ndí Moisés, te càchí-dé sá ñâ túú nândîhŷ veñúhu-a. Te ñá díú-ní xîãⁿ chi sa ní quíhu-dé veñúhu-a ndihŷ cue tée ñá túú cùu ñáyiú isrâél, te sá dúcáⁿ ñí quide-dé, te ñá túú-gă ní cànehe íi-dě xiti veñúhu. Te veñúhu-a cùu-xi vehe Yá Ndiõxí —càchí-güedé xâhaⁿ-güedě xii-yu.

29 Te ducaⁿ ñí cáháⁿ-güedé chi ní sani iní-güedé sá ñí quíhu ndihŷ-dé té Trõfimú veñúhu-güedé, chì ní xiní-güedé xícá cùu ndihŷ ñaha-dé xiti ñuú. Te tée-án cúú-dě téé ñuú Èfesú, te ñá díú tē isrâél cúú-dě.

30 Te chitu ñáyiú ñuú-án ñí tacá-yu ní tñi-yu té Păblú tâñùhu ñahá-yu ní ndee veñúhu càhnu sá ño cùnuu, te òré-ni ní nacadí-güedé yèhe veñúhu-án.

31 Te sa cahní-yu té Păblú ní cùu, te ní sáháⁿ ññⁿ ŷŷ-güedé núú ndécú tē cùu capitáⁿ cùnuu-gá, te ní xâhaⁿ-güedě xii-dé sá ncháá ñáyiú ñuú Jerusàlén xînáá-yu.

32 Te òré-án cuáhán tée cùu capitán cúnùu-gá ndihì dava-gá cue tée nchìcùn-gá ndihì sandàdú-dé. Te òré ní xiní-yu ní quexio coyo-güedé núú xixúcu-yu, te ní yuhú-yu ñá túú-gă ní càní-yu té Păblú.

33 Te tée cùu capitán ní sátuha-dé té Păblú, te ní xáhaⁿ-dê xii cue sandàdú-dé sá tñí ñaha-güedé dacùtu ñaha-güedé úú cadèná. Te dătnùnì ní xicáⁿ tnúhu-dê núú-yu, te xáhaⁿ-dê:

—¿Ná cúú tēe-a? ¿Ná ní quide-dé? — cächí-dé xáhaⁿ-dê xií-yu.

34 Te tée cùu capitán-án ñă ní cùnuni iní-dé núu ná cúú sã ní quide té Păblú, chi uuⁿi ní cuáá-yu. Te tucu cãháⁿ ñⁿ, tucu cãháⁿ ñⁿ-yu, núu xiãⁿ ní xáhaⁿ-dê cue sandàdú-dé sá cándèca ñaha-güedé xii-dé quíhíⁿ cuàrtél núú ndécú-güedé.

35-36 Te nchìcùn ñáhă-yu cuáhán ní quexio ndéé năcuáa cãa nchio cùnì-yu cahni ñáhă-yu xii-dé ni cùu. Te níhi ní cãháⁿ-yu xăhăⁿ-yu sá cãhní ñaha-güedé, te xiãⁿ ní ndacani ñaha-güedé ndécá ñaha-güedé cuásáá nchio-ãⁿ.

Té Păblú xáhaⁿ-dê xii-güedé sá ñà túú cuēchi-dé

37 Te cuánguihu-güedé cuàrtél ndihì té Păblú ní cùu, te ní xáhaⁿ-dê xii tée cùu capitán cúnùu-gá:

—Cãháⁿ ndàhú-í núú-n cùndetu-n na cúñaha-í ñⁿ úú tnúhu xií-yu —cächí-dé xáhaⁿ-dê.

Te tée tàxi tñuní-án ní xáhaⁿ-dê:

—¿Náa tnàhá yòhó cãháⁿ-n tnúhu griégú?

38 Te ní cãháⁿ-í sá tēe ègiptú cúú-n, chi ñiu-n ní ndúcú-n cuè tée ní nàà ndihì tée cùchiuⁿ Césár ní cãháⁿ-í, chi ñiu ñⁿ tēe yacáⁿ ní ndúcú-dê cúmí mîl cue tée ní sahnì ndíyì. Te ndèca tnaha-güedé ní sáhán xití yucu ní xihì váha-güedé —cächí-dé xáhaⁿ-dê xii té Păblú.

39 Te té Păblú ní xáhaⁿ-dê:

—Ñá ñíú tēe ègiptú cúú-í, chi tēe isràél cúú-í, chi ñiu-ni tēe isràél cúú tătà-í, te ñicó-ni sá ní cacu-í ñuú Tàrsú ñuú cãhnú, te ñuú-án yíndèhu-xi ñiñtítú Ciliciá. Te cùnì-í cada ndee ñn-í n dăña-n na cãháⁿ ndihì-í-yu —cächí-dé xáhaⁿ-dê.

40 Te ní xáhaⁿ tēe cùu capitán cúnùu-gá sá cúú cãháⁿ té Păblú, núu ní gúnutñí-dé

núú nchio, te ní quide-dé ndaha-dé sá cündedóho-yu. Te ní sadí-yu yuhú-yu, te ní cãháⁿ-dê tnúhu ñáyiú isràél, te xáhaⁿ-dê xií-yu:

22

1 —Chí cãdá cãhnu iní nchòhó cue tēe sa cuéhé ndihì nchòhó cue tēe cuechi, na cãháⁿ-í ñⁿ tnúhu cündedóho-ndo sã ñà túú cuēchi-í, chi ñá túú ñă ní quide-í, te ni ñă túú ñă tnúhu cãháⁿ-í —cächí-dé xáhaⁿ-dê xii-güedé.

2 Te cuendá sá dúcáⁿ ní cãháⁿ-dê tnúhu mēe-yu núu tñaví-ñă ní sadí-yu yuhú-yu ní xíndedóho-yu ní cãháⁿ-dê, te xáhaⁿ-dê:

3 —Yúhú cúú-í tēe isràél, te ní cacu-í ñuú Tàrsú, te ñuú-án yíndèhu-xi Ciliciá. Te davitna lîhli-í cùtnàhá ní quexio-í ñuú Jerusàlén ní dácuáhă ñaha té Gamaliél. Te ní dácuáhă-í nchaa tnúhu ní chídó tñuní nchaa cue tēe ndéé sanaha năcuáa cada ñáyiú. Te yuhú ní cahu iní-í ní quide-í tñnì núú chiuⁿ nacuáa cuu váha iní Yă Ndiöxí ní cãháⁿ-í, te ñiu-ni ducaⁿ quide nchohó tucu.

4 Te ní sánú ndúcú-í nchaa ñáyiú sândáá iní-xi tnúhu Jèsús, cuēi tēe, cuēi ñáyiú ñihí ní dácútú-í-yu, te ní chihi-í-yu vecaá, te ní níhi-í tnúhu ndee iní sá cãhní-ndí-yu.

5 Te dútú cúnùu-gá ndihì cue tēe cùnuu núú-ndó ñaha-güedé sá ndáá cãháⁿ-í chi mee-güedé ní taxi-güedé tutú cuáñaha-í xii ñáyiú isràél ñáyiú ndècu ñuú Dàmascú cuendá cutnùnì iní-yu ná chíúⁿ cuáhán-í ní cùu. Te ñuhu-í ichi cuáhán-í ñuú-án cuànúndúcú-í ñáyiú ní sândáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhă-güedé xií-yu ni cùu.

Té Păblú xáhaⁿ-dê xii ñáyiú năcuáa ní cuu ní tuha-dé ichi Jèsús

(Hch. 9:1-19; 26:12-18)

6 Te ta cùyatni-í ñuú Dàmascú cuáhán-í, te cùu-xi datná òré cauxúú nduu, te uuⁿi ní quee ñuhú andiu, te ní dáyèhé-xi ndéé núú núnñí-í.

7 Te ní quide nee-xi núú-í, xiãⁿ ní nduá-í ndéé ñuhu. Te ní tecú dóho-í cãháⁿ ñⁿ sá cãháⁿ andiu, te cächí-xi: “Yòhó té Sàulú, ¿ná cuendá cúú úhú iní ñáhă-n dândoho ñaha-n xii-í?”, cächí sá cãháⁿ-án.

8 Te ní xáhaⁿ-í: “¿Ná cúú yòhó sá càháⁿ-áiⁿ?”, xáhaⁿ-í. Te ní cáháⁿ tucu ingá xito te cächí-xi: “Yúhú cúù-í Jèsús téé ní xíndecu ñúú Nazàrét, te ducaⁿ ïo dándoho ñaha-n xii-í”, cächí sá càháⁿ-án. Te xíáⁿ ní cutnùní iní-í sá díú Jèsús càháⁿ.

9 Te nchaá cue téé ndíhi-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cáháⁿ-gá.

10 Te ní xáhaⁿ-í xii-gá: “Yòhó Xítóhó Jesucristú, ¿ná cuìní-n càda-í?”, xáhaⁿ-í xii-gá. Te ní cachí-gá: “Ndacóo, te quíhíⁿ-n ñúú Dàmascú, yàcáⁿ tecú tnúhu-n nchàa nacuaá cuìní Yá Ndióxi cada-n”, cächí-gá —cächí té Páblú xáhaⁿ-dè xii-yu.

11 Te ní xáhaⁿ tucu té Páblú:

—Te cuèndá sá ñí dácuáá ñàha ñuhú xii-í nùú ní tñiⁿ cue téé ndíhi-í ndaha-í ndécá ñàha-güedé cuáháⁿ ndéé ñúú Dàmascú.

12 Te yàcáⁿ ndécú ñíⁿ téé nàni Ananiás, te ío vài sá ñí chídó tnùnⁿí ndíi Moisés cadá-yu quide-dé. Te nchaá ñáyiu ñúú Dàmascú ío váha càháⁿ ndíhi ñàhá-yu xii-dé.

13 Te ní quexiò-dé núú ndécú-í, te ní cachí-dé: “Yòhó té Sàulú, téé ndècu ndíhi-í ichi Xítóhó Jesucristú, ndúha núú-n”, cächí-dé. Te òré-ni ní nacaáⁿ núù-í te ní xiní-í-dé.

14 Te dätñùnⁿí ní cachí-dé: “Yá Ndióxi ní cáháⁿ ndíhi-gá ñaní tnáhá-ó ñí xíndecu ndéé sanaha. Te díu-gá ní cáxi ñaha-gá xii-n cuèndá quiní-n nchàa sá vâha cuìní-gá cada-n. Te quiní-n Jèsús Yaá ñá túú cuèchi-xi, te díu-ni mee-gá cáháⁿ ndíhi ñaha-gá xii-n.

15 Te cáháⁿ-n tnúhu Jèsús núú nchàa ñáyiu, te cáháⁿ-n nchàa sá ñí xiní-n ndíhi nchaá sá ñí xíndedóho-n.

16 Tnàvíí, te quíhíⁿ-n cuàndute-n, te cáháⁿ ndíhi-n Yá Ndióxi cuèndá cada càhnu iní-gá nchaá sá cuèhé sá dúhá ñí quide-n”, duha ní cachí té Ananiás xii-í —cächí té Páblú xáhaⁿ-dè xii-yu.

Te Páblú ní caní-dé cuèndú nacuaá ní xáhaⁿ Jèsús cada-dé quíhíⁿ-dè ñúú núú xíndecu ñáyiu ñá túú cùu ñáyiu isràèl

17 Te ní xáhaⁿ tucu té Páblú:

—Te ní ndee-í cuàndixi-í ñúú Jerusàlén. Te ní sáháⁿ-í veñúhu càhnu sá ïo cùnūú ní cáháⁿ ndíhi-í Yá Ndióxi, te ní dácótó núú ñáhá-xi sá méé Jèsús ní xiní-í xití veñúhu,

18 te ní cachí-gá: “Yáchí, quee-n ñúú Jerusàlén, chi ñáyiu-a vá quíndáá iní-yu nacuaá ní cachí-í cúñaha-n xii-yu cuèndá-í”, duha ní cachí-gá xii-í.

19 Te ní xáhaⁿ-í xii-gá: “Yòhó Xítóhó Jesucristú, sa xiní-n sá ncháá ñáyiu nàhá-yu sá ñí sáháⁿ-í ndí tnahá ñíⁿ ndí tnahá ñíⁿ veñúhu nànducu-í ñáyiu sàndáá iní tnúhu-n, te ní tñiⁿ-í-yu, ní chihi-í-yu vecaá, te ní táuchíuⁿ-í ní caniha-güedé xii-yu.

20 Te cútnàhá ní sahani-güedé ndíi Těvá téé ní xóo cáháⁿ tnúhu-n, te tnàhá-í ndécú òré-án te ní xíndecú-í dóo cue téé ní sahani ñaha xii ndíi. Te yúhú ní cáháⁿ-í sá ñí quide váha-güedé sá dúcáⁿ ñí quide-güedé”, duha ní xáhaⁿ-í xii-gá.

21 Te ní cachí tnúhu-gá xii-í: “Cuáháⁿ chi cuìní-í quíhíⁿ-n nchàa ñúú xicá núú xíndecu cue ñáyiu ñá túú cùu ñáyiu isràèl cáháⁿ-n tnúhu-í”, cächí-gá —cächí té Páblú xáhaⁿ-dè xii-yu.

Te Páblú ndíhi téé tàxi tnuní ñáhá xii cue sandadú

22 Te sá dúcáⁿ ñí cáháⁿ-dé, te ñá ní tnàhá-gá iní-yu cundedóho-yu tnúhu càháⁿ-dé. Te ñíⁿ-ni ñí cuú-yu nchaá-yu, te ní cuáá-yu, te xäháⁿ-yu:

—¡Chí cáhni-dè! ¡Ñá díú sá cùndècu-dé ñuyíú-a! —cächí-yu xäháⁿ-yu.

23 Te mei òré ducaⁿ ñí cáháⁿ-yu, te ní ndátá-yu dóo-yu, te ní dáquéně-yu núú ñínu sá sätú iní-yu. Te ní quèhnu-yu ñuhu, te ní dácácòyó-yu núú ñínu sá ïo sätú iní-yu.

24 Te téé cùu capitáⁿ cùnūu-gá ní xáhaⁿ-dè xii cue sandadú-dé:

—Chí dítá-dè ná quíhu-dé ndéé xití vehe, te caní-ndo-dè ñí, chi na quène yuhu-dé ná tnúhu ní cáháⁿ-dé núú ndéé dúcáⁿ cùdèñⁿ-yu núú-dè —cächí-dé xáhaⁿ-dè xii-güedé.

25 Te sátá ñí dácútú ñàha-güedé xii té Páblú sá cáni ñàha-güedé ní cùu, te ní xáhaⁿ-dè xii téé cùu capitáⁿ ndécú-áⁿ:

—Te na cächí tnúhu-í sá vâ cúú càniha-güedé ñí, chi téé ròma cúù-í, te vátá quíni ndáá-gá-ndó núú ndècuèchi-í àdi ñáhá —cächí-dé xáhaⁿ-dè xii téé cùu capitáⁿ.

26 Te sá dúcáⁿ ñí cáháⁿ-dé, te ní sáháⁿ téé cùu capitáⁿ núú tée cùnūu-gá, te ní xáhaⁿ-dè:

—Vá cúú cànì-o tée-ǎⁿ, chi tée ròmá cúú-dě —càchí-dé xǎhaⁿ-dě.

²⁷ Te ní sáháⁿ tée cùu capitáⁿ cúnùu-gá ndéé núú tǎ Pǎblú, te ní xáhaⁿ-dě:

—Cáháⁿ ndáá-n nùu ndisa tée ròmá cúú-n —càchí-dé xǎhaⁿ-dě.

Te ní xáhaⁿ tǎ Pǎblú:

—Ndáá sá tǎe ròmá cúú-í —càchí tǎ Pǎblú xǎhaⁿ-dě xii tǎe cùnùu-áⁿ.

²⁸ Te ní xáhaⁿ tǎe cùnùu-áⁿ:

—Yúhú tnàhá-í cúú-í tǎe ròmá, chi vǎi díhúⁿ ní cháhú-í —càchí-dé xǎhaⁿ-dě.

Te tǎ Pǎblú ní xáhaⁿ-dǎe:

—Tnàhá-í cúú-í tǎe yàcáⁿ tucu, chi tǎtà-í cúú-dě tǎe ròmá —càchí tǎ Pǎblú xǎhaⁿ-dǎe xii tǎe cùu capitáⁿ cúnùu-gá.

²⁹ Te uuⁿ ní nacaca sata cuè tǎe cuáháⁿ caniha xii-dǎe ní cùu. Te ní yúhú tǎe tàxi tnuní sá dúcáⁿ ní xáhaⁿ tǎ Pǎblú sá tǎe ròmá cúú-dǎe, chi ní xáhaⁿ-dǎe ní dácútú ñàha-güedé xii-dǎe, núu xiǎⁿ ní yùhu-dǎe.

Té Pǎblú ní cáháⁿ ndihí-dǎe cue tǎe cùnùu oré ní quide-güedé jündá

³⁰ Te tǎe tàxi tnuní sandàdú ñá ní xìní-dǎe ná cuèchi ní dácáá ñáyiu isràél díquí tǎ Pǎblú, núu xiǎⁿ nduu tnéé ní cana-dǎe cue dútú cúnùu, ndihí cue tǎe cùchiuⁿ, ndihí cue tǎe cùu sacuéhé, te ní xáhaⁿ-dǎe sá cáda-güedé jündá cuèndá nducu tnùhu-güedé núú tǎ Pǎblú ná cuèchi ní dácáa-yu díquí-dǎe. Te ní xáhaⁿ-dǎe xii cue sandàdú sá nándàxi ñaha-güedé cadená ndútú-dǎe, te candeca ñaha-güedé quíhíⁿ núú cáda-güedé jündá. Te ní sáháⁿ-güedé ní nandaxi ñaha-güedé xii-dǎe ndécá ñaha-güedé cuáháⁿ jündá, te ní quexìo-güedé, te ní ngúnutnii-dǎe núú cuè tǎe cùchiuⁿ.

23

¹ Te yàcáⁿ ní xíndéhé vǎha tǎ Pǎblú núú nchàa-güedé, te ní xáhaⁿ-dǎe:

—Cada càhnu iní nchòhó cue tǎe cùchiuⁿ, te ducaⁿ nchòhó cue tǎe cùu sacuéhé, véxi-í càchí tnùhu-í sá ñà túú cuèchi-í, chi mee Yǎ Ndiöxí nàhá-gá nása ndècu-í ñuyíú-a, te ñà túú cùcahaⁿ núú-í núú-gǎ —càchí tǎ Pǎblú xǎhaⁿ-dǎe xii-güedé.

² Te tǎ Ananiás tǎe cùu dútú cúnùu-gá ní xáhaⁿ-dǎe xii cue tǎe nùtnii yatni dǎi tǎ Pǎblú sá cání-güedé déhndé yuhu-dǎe.

³ Te tǎ Pǎblú ní xáhaⁿ-dǎe xii dútú-ǎⁿ:

—Yòhó, chi úhú tnàhí iní-n, chi ní ndúcú-n tǎe ní caniha xii-í, te ñá túú cuèchi-í, dico quini-n ñà cada ñaha Yǎ Ndiöxí xii-n. Te yòhó ní cana ñaha-n nducu tnùhu-n nùu quide-í nchaa nàcuáa càháⁿ tnùhu sá ní chídó tnùní ndii Moisés cada-o. Te mee-n ní ndúcú-n tǎe ní caniha, te ñá túú dùcaⁿ ní cáháⁿ ndii cada-o —càchí tǎ Pǎblú xǎhaⁿ-dǎe xii dútú cúnùu-gá-áⁿ.

⁴ Te cue tǎe xǐnutnii dǎi tǎ Pǎblú ní xáhaⁿ-güedé xii-dǎe:

—Nèhé ní quide-n chi ní xícuèhé-n dǎtú cúnùu-gá tǎe xínu cuechi núú Yǎ Ndiöxí —càchí-güedé xáhaⁿ-güedé xii tǎ Pǎblú.

⁵ Te tǎ Pǎblú ní xáhaⁿ-dǎe xii-güedé:

—Cada càhnu iní-ndó chi ñá túú xìní-í sá dútú cúnùu-gá cúú-dǎe, chi núú tútú Yǎ Ndiöxí càchí-xi sá vǎ cúú cǎháⁿ cuèhé-ó cuèndá ñⁿ tǎe cùnùu ñuú-ó yòtnùhu. Te yúhú ñá túú xìní-í sá tǎe cùnùu cuu-dǎe nùu ní sácóo-í ní cáháⁿ-í —càchí tǎ Pǎblú xáhaⁿ-dǎe xii-güedé.

⁶ Te òré-áⁿ ní cutnùní iní tǎ Pǎblú sá dáva-güedé cündihí-güedé cue tǎe cùu saducéú, te dava-güedé cündihí-güedé cue tǎe cùu fariséú, te níhi ní cáháⁿ-dǎe ní xáhaⁿ-dǎe xii-güedé:

—Yúhú cúú-í tǎe fariséú, te tnàhá tǎtà-í ndihí xii-í cúú-güedé cue tǎe fariséú tucu. Te tnàhá yúhú sàndáá iní-í sá ndótó nchàa ñáyiu ní xíhí, te núu xiǎⁿ cuíní-ndó nducu tnùhu-ndo núú-í cáná ñaha-ndo —cachí-dé xáhaⁿ-dǎe xii-güedé.

⁷ Te sá dúcáⁿ ní cáháⁿ-dǎe xiǎⁿ ní nàa ndihí tnàha cue tǎe cùu fariséú ndihí cue tǎe cùu saducéú, chi ñá ñⁿ-ní tnùhu ní cáháⁿ-güedé, chi ní ndi queheⁿ ndi queheⁿ-güedé sá ní cáháⁿ-güedé.

⁸ Te cue tǎe cùu saducéú càchí-güedé sá vǎ ndótó cuè ñáyiu ní xíhí, te cue tǎe cùu fariséú càchí-güedé sá ndótó-yu. Te cue tǎe cùu saducéú càchí-güedé sá ñà túú espíritú xínú cuèchi núú Yǎ Ndiöxí, te cue tǎe cùu fariséú càchí-güedé sá ió espíritú xínú cuèchi núú-gǎ.

⁹ Te ta cùdédé-güedé cuáháⁿ, te níhi-gá cúú iní-güedé càháⁿ-güedé, te ñⁿ úú cue tǎe cùu fariséú cue tǎe dàcuaha ñaha xii ñáyiu nchaa tnùhu ní chídó tnùní ndii Moisés ní cáháⁿ níhi-güedé, te xáhaⁿ-güedé:

—Ñá túú cuèchi-dǎe, te cudana te ní cáháⁿ ndihí-dǎe ñⁿ espíritú xínú cuèchi núú Yǎ

Ndiòxí te vá ngõo vá cúú vâha iní-ó nõú-gã —câchí cue tée cùu fariséú xâhaⁿ-güedë xii-güedë.

10 Te cuendá sá ïo xĩnàá-güedë, xĩãⁿ ní yùhú tée cùu capitáⁿ cùnù-gá sá cáhni-güedë té Pãblú, núu xĩãⁿ ní xâhaⁿ-dë sá quihíⁿ-güedë cùnùcuaca ñaha-güedë candeca ñaha-güedë núhú cuártel.

11 Te ndéé niú cúú úú ní quexio Xítóhó Jesucristú núu ndécú tã Pãblú, te ní xâhaⁿ-gã:

—Ñí cunduu-n, vá yùhú-n, chi nâcuáa ní cáháⁿ-n ñi cacunehe ñaha-n xii-í iha, te ñu-ñi ducaⁿ cáháⁿ-n càcunehe ñaha-n xii-í quihíⁿ-n ñúú Rómá —câchí-gá xâhaⁿ-gã xii-dë.

Cahni-güedë té Pãblú ní cùu

12-13 Te nduu tnéé ní natacá vîhi-gá údico cue tée isrâél ní ndatnúhu-güedë sá cáhni-güedë té Pãblú, te ní xĩtnâha-güedë:

—Ni dítá vã cáxí-ó te ni ndùte vá cóhó-ó ndéé ndacu-o cãhni-o té Pãblú, te dãtnúni caxi-o dítá, te coho-o ndùte, chi sa ní sani iní-ó sã cádá-ó, te cuu cuéchi xii-o nõu vá cádá-ó —câchí-güedë xĩtnâha-güedë.

14 Te ní sáháⁿ-güedë núu ndécú nchaa dútú cùnùu ndihí nchaa cue tée cùu sacuéhé, te ní xâhaⁿ-güedë:

—Ní cachí-ndí sá ni dítá vã cáxí-ndí ndéé nõu ní ndacu-ndí ní sahani-ndí té Pãblú, chi sa ní sani iní-ndí sã cádá-ndí, te cuu cuéchi núu vá cádá-ndí.

15 Te duha cada-ndo ndihí dava-gá cue tée cùnùu, chi cúñaha-ndo xii tée cùu capitáⁿ cùnù-gá: “Quixi ndihí-n tã Pãblú núu ndécú-ndí cuendá ndatnúhu ndihí-ndí-dë, chi cuini-ndí nducu tnùhu váha-gá-ndí ná cúú sã ñi quide-dë”, duha cúñaha-ndo xii tée tàxi tnuní sandàdú. Te ducaⁿ-ni cúñaha-ndo dândahú-ndó-güedë cuendá quixi ndihí-güedë té Pãblú, te nchúhú sa cundetú-ndí-güedë ichi, chi quini té Pãblú ná cahni-ndí-dë —câchí-güedë xâhaⁿ-güedë xii cue tée cùchiuⁿ.

16 Te déhe cúha té Pãblú ní níhí-dë tnùhu nâcuáa cada-güedë ditó-dë. Te ní sáháⁿ-dë cuártel, te ní xâhaⁿ-dë xii ditó-dë nâcuáa cáháⁿ-güedë cada ñaha-güedë.

17 Te ní cana té Pãblú ñiⁿ tée cùu capitáⁿ, te ní xâhaⁿ-dë:

—Vá cundëe iní-n, quihíⁿ ndihí-n tãe-a na cáháⁿ ndihí-dë tée cùnùu-gá, chi ndëcu ñiⁿ cuendú cúñaha-dë cuini-í —câchí té Pãblú xâhaⁿ-dë xii tée cùu capitáⁿ.

18 Te dãtnúni ní xica tée cùu capitáⁿ ndécá-dë dáxíⁿ tã Pãblú cuáháⁿ núu ndécú tãe cùnùu-gá, te òré ní quexio-güedë núu-dë, te ní xâhaⁿ tãe cùu capitáⁿ xii-dë:

—Tã Pãblú tãe yîhi vecaá ní cana ñaha-dë xii-í, te ní cachí-dë véxi-í ndihí tãe-a cuendá cachí tnùhu-dë ñiⁿ cuendú cuini-dë —câchí-dë xâhaⁿ-dë xii tãe cùnùu-gá.

19 Te tãe cùnùu-áⁿ ñi tní-dë ndaha dáxíⁿ tã Pãblú, te tãnehe ñaha-dë cuáháⁿ ñiⁿ xio, te ní xicáⁿ tnúhú-dë núu-dë, te xâhaⁿ-dë:

—¿Ná cuendú cuini-n cáháⁿ-n? —câchí-dë xâhaⁿ-dë xii dáxíⁿ tã Pãblú.

20 Te ní xâhaⁿ-dë xii tãe cùnùu-áⁿ:

—Cue tãe isrâél ní ndatnúhu ndáá-güedë sã quixí-güedë tneé cáháⁿ ndâhú-güedë núu-n cãndeca-n té Pãblú quihíⁿ jündá, te yacáⁿ cacáⁿ tnúhú ndáá-güedë núu-dë ná cúú sã ñi quide-dë, câchí-güedë xĩtnâha-güedë.

21 Te vá quindáá iní-n chi dícó dandâhú ñahá-güedë, chi vîhi-gá údico-güedë ndatnúhu-güedë cundedí-güedë ichi cahni ñaha-güedë. Te xĩtnâha-güedë sã ni dítá vã cáxí-güedë, te ni ndùte vá cóhó-güedë ndéé nõu ní ndacu-güedë ní sahani ñaha-güedë, te dãtnúni caxi-güedë dítá, te coho-güedë ndute, chi sa ní sani iní-güedë sã cádá-güedë, te cuu cuéchi núu vá cádá-güedë, câchí-güedë xĩtnâha-güedë. Te cundecu túha-ná-güedë cundetú ñaha-güedë tneé, te núu na quindáá iní-n cãndeca-n-dë quihíⁿ jündá —câchí-dë xâhaⁿ-dë xii tãe cùnùu-áⁿ.

22 Te tãe cùnùu-áⁿ ñi xâhaⁿ-dë:

—Cuanúhú, te vá yõo tnâhí cúñaha-n sã ñi quixi-n ñi cachí tnùhu-n nâcuáa cáháⁿ-güedë cada-güedë té Pãblú —câchí-dë xâhaⁿ-dë.

Ndëca-güedë té Pãblú cuáháⁿ núu tã Juéi tãe cùu gobiernú

23 Te tãe cùnùu-gá ní cana-dë úú cue tãe cùu capitáⁿ, te xâhaⁿ-dë:

—Tava-ndo úú ciendú sandàdú cue tãe xica saha, ndihí únídico úxí sandàdú cue tãe yòdo cuayú, ndihí úú ciendú sandàdú mee-ni cuè tãe xĩnehe lànzá. Te cada

túha-ndo chi caca-ndo òré caá ñín niú quíhín-ndó ñúú Cèsareá ndihí té Páblú.

24 Te nducu-ndo cuèdicó ñín úú cuáyú codo-dé ndihí cue téé ndèé ñáhá xii-dé. Te cada cuèdádú-ndó-dé ichi, te can-deca-ndo-dé quíhín quíndeca-ndo-dé núú téé cùu gobiernú —càchí téé cùnuu-án xáhaⁿ-dē xii cue téé cùu capitán.

25 Te téé cùnuu-án ñí cadúha-dé tutú cuèndá quíhín ndaha té Juélí téé cùu gobiernú. Te duha ní chídó tnùní-dé núú tutú cuáhán:

26 “Cóvãha díí-n, tãtã gobernãdór. Ío cada càhnu iní, yúhú nãní-í Clãudiú Lisíás. Yúhú ní tendaha-í ñín tutú véxi ndaha-n cuèndá quíní tnùní-n nãcuáa ní cuu íha.

27 Cue téé isràel ní tní-güedé ñín téé nãni Páblú cuíní-güedé cahni ñaha-güedé ní cùu, te ní níhí-í tnúhu sá téé rómá cúú-dé ñúú ní sáhán-í ndihí sandádú-í ní dácãcu-ndí-dé.

28 Te ní cuíní-í quíní-í ná cuèndá téé ñaha-güedé cuéchi xii-dé, núú xíãⁿ ndécã-í-dé ní sáhán núú ñí quide cue téé cùchiuⁿ isràel jündã.

29 Te yacáⁿ ní níhí-í tnúhu sá ñã túú nã cuéchi ní quide-dé, chi cuèndá-ni sá ñí níhí-güedé tnúhu sá ñã túú sandáá iní-dé cada-dé nchaa sá ñí xóo cada ñáyiú ní xíndecu ndéé sanaha nchicúⁿ nihnu-güedé quide-güedé, xíãⁿ ní cudééⁿ-güedé núú-dé. Te ñã túú cuéchi càhnu ní quide-dé ñúú quíhín-dé vecaá àdi cahni-í-dé.

30 Te ní níhí-í tnúhu sá cuè téé isràel ndúcú-güedé nãcuáa cada-güedé cahni ñaha-güedé xii-dé, xíãⁿ ní xáhaⁿ-í xii sandádú-í sá cándeca ñaha-güedé quixi xíãⁿ. Te ní xáhaⁿ-í xii cue téé tã ñaha cuéchi sá quíxí-güedé ndéé xíãⁿ cãháⁿ-güedé ñúú ná cuéchi ní quide-dé. Te cada càhnu iní-n chi duha-ni ndúu tnúhu càháⁿ-í, te cundee iní-n quèheⁿ cuèndá-n-dé”, duha ní chídó tnùní téé ní cadúha tutú cuáhán ndaha té Juélí.

31 Te cue sandádú ní quide-güedé nãcuáa ní xáhaⁿ téé tàxi tnuní ñáhá xii-güedé chi ní xica-güedé ndihí té Páblú òré caá ñín niú, te díu-ni niú-án ñí quexio-güedé ñúú Antipatrís.

32 Te sãtã ñí túndaá, te ní nacuico cuè téé xínehe lãnzã ndihí dava-gã sandádú xíã sãha cuánuhú-güedé cuãrtél, te mee-ñã

sandádú cue téé yòdo cuayú cuáhán ndihí té Páblú.

33 Te òré ní quexio-güedé ñúú Cèsareá, te ní sãha-güedé téé cùu gobiernú tutú néhé-güedé cuáhán. Te ní queheⁿ cuèndá-dé té Páblú.

34 Te sãtã ñí dãcuáhã téé cùu gobiernú-án tutú-án te ní xíãⁿ tnúhú-dé núú té Páblú, te xãhaⁿ-dē:

—¿Ndèé téé cùu-n? —cachí-dé xãhaⁿ-dē.

Te ní xáhaⁿ té Páblú:

—Téé Ciliciã cúú-í —cãchí-dé xãhaⁿ-dē.

35 Te ní xáhaⁿ téé cùu gobiernú-án:

—Òré quexio cue téé tã ñaha cuéchi xii-n, te cãháⁿ-n nãsa ní cuu, chi níhí-í nãcuáa cada ndãá-í cuèndá-n —cãchí-dé xãhaⁿ-dē xii té Páblú.

Te ní xáhaⁿ-dē xii sandádú sã cündéé-güedé té Páblú vehe càhnu té Hèrodés.

24

Té Páblú xãhaⁿ-dē xii té Juélí sã ñã túú cuéchi-dé

1 Te sãtã ñí cuu úhúⁿ nduu, te té Ananiás dútú cúnúu-gã cuáhán-dé ñúú Cèsareá ndihí cue téé cùu sacuéhé ndihí ñín téé nãni Tértulú téé càháⁿ yuhu-güedé. Te cuáhán-güedé núú téé cùu gobiernú cuáhán dãcuãndèhnde-güedé núú-dé sã ndècuéchi té Páblú.

2 Te ní sãnguaca-güedé té Páblú. Te òré ní quexio-dé núú-güedé, te ní ngüíta té Tértulú xãhaⁿ-dē xii té Juélí nãcuáa càa cuéchi tãe-güedé té Páblú:

—Ío càhnu cada iní tãtã gobernãdór. Duha ndúu chiuⁿ ndéé iní ñáhã-ndí xii-n véxi-ndí, núú nãsa cachí-n cùnduu. Tãxãhu xii-n, chi ío váha ndècu nchaa ñáyiú, te ñã túú nãa-yu chi ío váha quide-n.

3 Te ío cùdíí iní-yu chi nchaa-ni nduu xíndecu váha-yu nchaa-yu, te ío táxãhu Ndiõxí xii-n sã dúcãⁿ quide-n.

4 Te cada càhnu iní, cuíní-í ndatnúhu-o ñín úú-ni cuèndú cuèndá sã vã cúyãa-o dacuíta-í chiuⁿ-n.

5 Te ñín téé íha ío dãsatú iní ñáhã-dé, chi ndèni ní cuu cuáhán-dé ndátnúhu-dé ndihí ñáyiú isràel dãnãá-dé-yu. Te néhé quidé-dé chi cuáhán-dé dácãháⁿ-dé nchaa ñáyiú cuèndá quíndãá iní-yu tnúhu téé ní xíndecu ñúú Nazàrét.

6 Chi ducaⁿ càháⁿ cue téé iha sá nǐ sáháⁿ-dé veñúhu càhnu sá ìo cùnuu, te cuiní-dé daquèè tihú-dě veñúhu cuendá cuiní-dé xocàni-dé sá ìi ndécú, núu xiǎⁿ ní tñi ñaha-güedě ndécá ñaha-güedé cuáháⁿ núu cuè téé cùchiuⁿ cuendá cacaⁿ tnúhú-güedě núu-dě núu ná cuendá ducaⁿ cuiní-dé cada-dé, chi ducaⁿ càa lei ndécú ndihi-güedé sá cada ndää-güedé núu ná ìⁿ sá cúu.

7 Te té Lisiú téé cùu capitáⁿ cúnùu-gá ní quexìo-dé ndihi sandàdú, te ní dácúnú-güedě nchaà cue téé nùtni ndihi té Pàblú, te dàtnùní ní tñi ñaha-güedě xii-dé ndécá ñaha-güedé cuáháⁿ.

8 Te sátá xiǎⁿ, te ní xáhaⁿ-dě sá quixí-güedě ndéé ndiha cundáá cuéchi-dé. Te yòhó cundee ìní-n cacaⁿ tnúhú-n núu-dě, te núu ndáá ducaⁿ nǐ quide-dé àdi ñáhá — càchí té Tèrtulú xáhaⁿ-dě xii té Juéli téé cùu gobiernú.

9 Te dava-gá cue téé isràél xǐnutni xiáⁿ nǐ cáháⁿ-güedé sá ndáá càháⁿ té Tèrtulú.

10 Te téé cùu gobiernú ní quide-dé ndaha-dé núu tē Pàblú cuendá cáháⁿ-dé, te té Pàblú ní xáhaⁿ-dě:

—Yòhó sa ní cuu titní cuíá ndécú-n ìha xehndé-n cuéchi nchaà ñáyiú xǐnàá, núu xiǎⁿ ìo cùdǐ ìní-í sá ndiha téhndé cuéchi tē ñaha-güedé xii-í. Te cundee ìní-n cùndedóho-n na càni-í cuendú nàcuáa ní cuu.

11 Te nducu tnúhu-n te quiní-n nǎ càháⁿ ndáá-í, chi sa ní cuu úxúú nduu sá nǐ sáháⁿ-í veñúhu càhnu sá ìo cùnuu ñuu Jerusàlén ní cáháⁿ ndihi-í Yá Ndióxi.

12 Te ni ñà túú ní nàá-í ndihi ñáyiú xití veñúhu, te ñá túú ní xáhaⁿ-í nàá-yu ni ìⁿ xichi, te ni ìⁿ veñúhu lìhli ní sáháⁿ-í ñá túú nǎ ní xáhaⁿ-í cada-yu.

13 Te ni ñà túú quèñuhu-güedé cue téé cáháⁿ ndáá te núu ndáá ducaⁿ nǐ quide-í.

14 Te yúhú càháⁿ ndáá-í sá càháⁿ ndihi-í Yá Ndióxi, chi ñu-ni Yá Ndióxi ní xóo cáháⁿ ndihi ñáyiú ndéé sanaha, núu xiǎⁿ ní tuha-í ichi-gá. Te cue téé-a càchí-güedé sá ñà díú ìⁿ ichi váha ni tuha-í. Te yúhú sàndáá ìní-í nchaà sá nǐ chídó tnùní ndi Moisés ndihi dava-gá cue téé ní xóo cáháⁿ tnúhu Yá Ndióxi ndéé sanaha.

15 Te sàndáá tucu ìní-í sá ndótó nchàa ñáyiú ní xihí, cuèi ñáyiú váha ìní-xi, te cuèi ñáyiú úhú ìní-xi, dico ndotó-yu. Te ducaⁿ nǐ xóo quindáá ìní nchaà ñáyiú ní xindecu ndéé sanaha.

16 Te yúhú ìo ndùcu ndee-í quidè-í nchaà sá càháⁿ Yá Ndióxi cuendá sá vǎ cúu càhaⁿ núu-í núu-gǎ ndihi núu ñáyiú ñuyíú-a.

17 Te sa ní cuu titní cuíá sǎ ñà túú-gǎ sáháⁿ-í ñuu Jerusàlén, te ní sáháⁿ tucu-í nehé-í díhúⁿ nǐ taxi ñáyiú ñuu xicá cuendá cuañaha-í xii ñáyiú ñuu Jerusàlén. Te ní ndúcú-í sá cuáha táhú-í Yá Ndióxi.

18 Te ní xindecu-í veñúhu càhnu sá ìo cùnuu ní quide-í nchaà nàcuáa ní xóo cada ñáyiú ní xindecu ndéé sanaha cuendá nduu vétú ìní Yá Ndióxi. Te ñá túú chitú-yu ni sáháⁿ, te ni ñà túú nǎ ní cùu, te ní naníhí ñáhá ìⁿ úú cue téé isràél xii-í, cue téé véxi distritú Àsiá.

19 Te quixi mee-güedě iha cáháⁿ-güedé, te núu sá ndáá ní xini-güedé sá yúhú ndècuéchi-í ní cùu,

20 àdi ñáhá. Dico cachí tnúhu cue téé-áⁿ nása ní cuu òré ní xindecu-í jundá-güedé núu ndècuéchi-í àdi ñá túú ndècuéchi-í.

21 Dico ñá túú cuéchi-í chi ìⁿ dǐ-ni tnúhu ni cáháⁿ-í ní xáhaⁿ-í xii-güedé sá sàndáá ìní-í sá ndótó nchàa ñáyiú ní xihí, te ñu-ni núu xiǎⁿ càchí-güedé sá ndècuéchi-í —càchí té Pàblú xáhaⁿ-dě xii té Juéli.

22 Te té Juéli sa xini váha-dé nàcuáa cuáháⁿ tnúhu Jèsús, núu xiǎⁿ ñá ní cuiní-gá-dé ndatnúhu-dé ndihi té Pàblú, te ní xáhaⁿ-dě:

—Sa ní cuu, cundetu-n na quèxio té Lisiú téé cùu capitáⁿ cúnùu-gá, te òré-áⁿ cundáá cuendá-n —càchí té Juéli xáhaⁿ-dě.

23 Te ní xáhaⁿ-dě xii téé cùu capitáⁿ:

—Cundee-n tē Pàblú-áⁿ, te núu nása càchí-dé cada-n, te dañà-n na càháⁿ ndihi-dé cue téé xini tnáhá ndihi-dé núu cuañaha-güedě nchaà sá xini ñuhu-dé àdi nása cada-güedé —càchí té Juéli xáhaⁿ-dě xii téé cùu capitáⁿ.

24 Te ní cuu titní nduu, te ní sáháⁿ té Juéli vechiⁿ ndihi ñadihi-dé, te ñaha-áⁿ naní-áⁿ Drusilá, te ñaha isràél cúu-áⁿ. Te ní xáhaⁿ-dě sá quingueñuhu-güedé té Pàblú, te òré ní quexìo-dé vechiⁿ, te ní cáháⁿ-dé núu-yu nchaá-yu sá quindáá ìní-yu tnúhu Xitohó Jesucristú.

25 Te ní xáhaⁿ-dě:

—Mee-ni sã vãha cada-ndo. Te coto-ndo mée-ndo, te vá cáda-ndó ni ñiⁿ sã cuéhé sã dúhá, chi ñiⁿ nduu cáháⁿ Yã Ndiõxí ndédacãa ñáyiú váha iní-xi, te ndédacãa ñáyiú úhú iní-xi —càchí té Pãblú xãhaⁿ-dě.

Te sã dúcãⁿ ní xáhaⁿ-dě, te ní yùhú té Juéli, te ní xáhaⁿ-dě:

—Vá cáháⁿ-gá-ó tnàvíí, cuáhãⁿ, te òré cùyãchí-í, te cana ñaha-ĩ xii-n —càchí-dé xãhaⁿ-dě.

26 Te té Juéli ní quide-dé cuendã sã cuãñaha tẽ Pãblú díhúⁿ te vá ndïhu-gá-dé vecaá ní cùu, núu xíãⁿ titní xito ní cana-dé té Pãblú vechiúⁿ ní ndatnúhu ndihí tnàha-güedé, dico ñã túú ní chãhu-dé.

27 Te úú cuíã ducaⁿ ñi quide-güedé, te dãtnúni ní xínu té Juéli chiúⁿ-dé, te ní ngúnutnii té Pòrsiú Fèstú. Te òré ní xínu té Juéli chiúⁿ-dé, te ní dándõ-dé té Pãblú yíhí-ni-dẽ vecaá. Te ducaⁿ ñi quide-dé cuendã ní cuiní-dé cudïu-dé núú cuè té israhél.

25

Té Pãblú càháⁿ ndihí-dé té Fèstú

1 Te ní cuu úní nduu sã ñi quexiò té Fèstú ñuú Cèsareá ní queheⁿ-dé chiúⁿ, te ní quee-dé cuáhãⁿ-dé ñuú Jerusálén.

2 Te yacãⁿ ní naníhí tnáhã-dẽ ndihí nchaa dútú cúnúu ndihí nchaa cue téé tàxi tnuní ñáhã xii ñáyiú israhél, te xãhaⁿ-güedé xii té Fèstú sã ndãã ndècuéchi té Pãblú.

3 Te ní cáháⁿ ndàhú-güedé núú-dé sã téndãha-dé sandàdú-dé quíngueñuhu ñaha-güedé vecaá xii-dé ndéé ñuú Cèsareá te candeca ñaha-güedé quíhíⁿ. Te ducaⁿ ñi cáháⁿ-güedé, chi ní ndatnúhu-güedé sã cáhni ñaha-güedé xii té Pãblú ichi ní cùu.

4 Te té Fèstú ní xáhaⁿ-dě:

—Vá cúú quixi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-ĩ iha te dãtnúni núhú-í yacãⁿ.

5 Te yáchí-gã quíhíⁿ ndihí-í cue téé cùnúu-gã, te yacãⁿ cuu cáháⁿ-ndó ñuú ndãã ndècuéchi-dé àdi cáháⁿ mée-dé ñuú ndãã ndècuéchi-dé àdi ñáhã, te cutnúní iní-ndó —càchí-dé xãhaⁿ-dě.

6 Te ní xíndecu té Fèstú únã úxí nduu ñuú Jerusálén, te dãtnúni cuánuhú-dé ñuú Cèsareá. Te nduu tnéé cuáhãⁿ-dé vechiúⁿ, te òré ní quexiò-dé, te ní xáhaⁿ-dě xii

cue sandàdú xínu cuèchi sã quíhíⁿ-güedé queñuhu-güedé té Pãblú vecaá te candeca ñaha-güedé quíhíⁿ vechiúⁿ.

7 Te òré ní quexiò té Pãblú vechiúⁿ, te sa ndècu cue téé israhél cue téé ní quee ñuú Jerusálén, te cuánguihu-güedé ndéé dñi té Pãblú ní ngúnutnii-güedé, te xãhaⁿ-güedé xii cue téé cùchiúⁿ sã ndècuéchi vñi-dé, dico ñã túú ní cùndee tnúhu-güedé.

8 Te té Pãblú ní xáhaⁿ-dě xii té Fèstú:

—Ñã túú ndècuéchi-í, ñã túú ñã ní quide-í, chi ñã túú tnáhã iní-í cada-í ñiⁿ sã càchí lèi sã vã cúú càda-o. Te ñi xití veñuhu càhnu sã ïo cùnúu ñã túú ñã quidè-í, te ñi té Cèsár téé yíndaha cuéhé nacióⁿ ñã túú càháⁿ cuéhé-í cuendã-dé —càchí té Pãblú xãhaⁿ-dě xii-dé.

9 Te té Fèstú ní cuiní-dé cada-dé nãcuãa cudïu-dé núú cuè téé israhél ní cùu, núu xíãⁿ ní xáhaⁿ-dě xii té Pãblú:

—¿Cundee ñi-n quíhíⁿ-n ñuú Jerusálén-ãⁿ? Te yacãⁿ cundãã cuéchi sã sãã díquí-n —càchí té Fèstú xãhaⁿ-dě xii té Pãblú.

10 Te xãhaⁿ tẽ Pãblú:

—Dïu-ni ñiⁿ vechiúⁿ téé cùchiúⁿ Cèsár ndècú-í iha, te dïu-ni iha cada ndãã-n ñuú cuiní-n ní cùu. ¿Te ñã cuendã candeca ñaha-n quíhíⁿ ingã xichi? Yòhó tnáhã-n xini-n sã ñã túú ñã quidè-í ñáyiú israhél.

11 Chi núu dicó yùhú ní quide-í ñiⁿ cuéchi càhnu, te ñã túú ñã cada-xi cuèi na càhni ñaha-ndo xii-í ní cùu. Te sa ní cutnúní iní-n sã ñã ndãã, chi mee-ni tnúhu ndehnde xicáhãⁿ-güedé, te ñã túú nduu váha-xi ducaⁿ càda-n cúñaha-n sã quíhíⁿ-í ndihí-güedé ingã xichi. Te xíãⁿ cuiní-í quíhíⁿ-í núú tẽ Cèsár téé yíndaha cuéhé nacióⁿ, te yacãⁿ cáháⁿ mée-dé ñuú ndãã ndècuéchi-í —càchí té Pãblú xãhaⁿ-dě xii té Fèstú.

12 Te ní ndatnúhu té Fèstú ndihí cue téé chindee tnúhu ñaha xii-dé, te dãtnúni ní xáhaⁿ-dě xii té Pãblú:

—Te sa ní cáháⁿ-n sã quíhíⁿ-n quítnahã-n tẽ Cèsár te dïu-ni quíhíⁿ-n, te quini-n ñãsa cáháⁿ téé-ãⁿ yacãⁿ —càchí-dé xãhaⁿ-dě xii té Pãblú.

Té Pãblú càháⁿ ndihí-dé té Àgripá téé yíndaha nacióⁿ Israhél

13 Te sátã ñi cuu cuéhé nduu, te ní quee téé Àgripá téé yíndaha nacióⁿ Israhél cuáhãⁿ-dé ñuú Cèsareá ndihí ñadhí-dé, te ñaha-ãⁿ

nání-án Berènicé te òré ní quexió-yu, te ní cáháⁿ ndihí-yu té Fèstú.

14 Te sátá nǐ cuu titní nduu, te ní cáháⁿ té Fèstú cuendá té Páblú ní xii-dé té Àgripá:

—Ndècu ìⁿ téé ní dándõo té Juéli vecaá nání-dě Páblú.

15 Te cùtnàhá ní sáháⁿ-í ñuú Jerusàlén ní nanítnàhá-í ndihí cue dútú cùnùu ndihí cue téé cùu sacuéhé nùú ñàyiú isràél. Te ní dácáá díquí-güedé té Páblú cuéchi, te ní cachí-güedé sá táuchìuⁿ-í cahni ñaha-güedé xii-dé ní cùu.

16 Te ní xáhaⁿ-í xii-güedé sá vǎ cúú, chi ñá túú dùcaⁿ quide nchúhú cue téé ròmá cùtexínu cada castiú-ndí ñáyíu, chi díhna-gá ndúcú tnùhu-ndí nùú ñáyíu sàá cuéchi díquí-xi cuendá quini-ndí nùú nása cáháⁿ mée-yu ndihí ñáyíu sàcáⁿ cuéchi cuendá-yu, te òré-án cùtnùní iní-ndí nùú ndáá ndècuéchi-yu àdi ñáhá, te ducaⁿ te nihí-ndí nàcuáa quide ndáá-ndí cuendá-yu, duha ní xáhaⁿ-í xii-güedé —càchí té Fèstú xǎhaⁿ-dě xii té Àgripá.

17 Te ní xáhaⁿ tùcu té Fèstú:

—Te sátá nǐ quexió-güedé ndéé ndíha, te nduu tnéé nǐ sáháⁿ-ni-ndí vechiùⁿ. Te ní xáhaⁿ-í sá quingueñuhu-güedé té Páblú can-deca ñaha-güedé quixi, te òré ní quexió-dé,

18 te ní ngüíta-güedé xǎhaⁿ-güedé sá ndècuéchi-dé. Te ní sani iní-í sá ìⁿ cuéchi càhnu tee ñaha-güedé dico ñáhá, chi dícó-ni sá ìⁿ tnùhu ní cáháⁿ-dé, xǎⁿ ducaⁿ nǐ quide-güedé.

19 Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuendá ndiõxí-güedé. Te tnàhá-ni cuendá ìⁿ téé nàni Jesús càháⁿ-dé, chi càchí-dé sá nǐ xihí téé-án te ní ndoto-dé càchí-dé xǎhaⁿ-dě xii-güedé, càchí-güedé.

20 Te ñá ní cùtnuní iní-í nása cùñaha-í xii-güedé cuendá téhndé cuéchi-dé. Te xǎⁿ ní xicáⁿ tnùhu-í nùú tǎ Páblú nùu cundee iní-dé quihíⁿ-dé ñuú Jerusàlén, te ndéé ndiácǎ cada ndáá-ndí cuendá-dé, te nùu ndáá ndècuéchi-dé nàcuáa càháⁿ-güedé àdi ñáhá ní cùu.

21 Te dàtnuní té Páblú ní cachí-dé sá cùndècu tnaa-dé vecaá te dàtnuní quihíⁿ-dé nùú tǎ Cèsár, te téé-án cada ndáá-dé cuendá-dé. Te cuendá sá dúcáⁿ nǐ cáháⁿ

té Páblú, xǎⁿ nùu ní xáhaⁿ-í sá cùndèé ñáhá cuè sandadú xii-dé, nini na còto-í nása cada-í quihíⁿ-dé nùú tǎ Cèsár, duha ní xáhaⁿ-í xii-güedé —càchí té Fèstú xǎhaⁿ-dě xii té Àgripá.

22 Te té Àgripá ní xáhaⁿ-dě xii té Fèstú:

—Te tnàhá yúhú ío cudíí iní-í cundedóho-í tnùhu càháⁿ-dé —càchí-dé xǎhaⁿ-dě.

Te ní xáhaⁿ tǎ Fèstú:

—Tneé cana-í-dé te cundedóho-n nása cáháⁿ-dé —càchí-dé xǎhaⁿ-dě.

23 Te nduu tnéé ní quexió té Àgripá ndihí ñadihí-dé tá Berènicé vechiùⁿ, te ío ní quide càhnu ñaha-güedé xii-yu. Te cuánguihú-yu vechiùⁿ ndihí cue téé cùu capitáⁿ cùnùu-gá ndihí cue téé cùnùu ñuú Cèsareá. Te té Fèstú ní xáhaⁿ-dé sá quingueñuhu-güedé té Páblú vecaá, te òré ní quexió-dé,

24 te ní xáhaⁿ tǎ Fèstú xii té Àgripá ndihí nchaa ñáyíu xǐndecu-án:

—Chí cùndèhe téé iha chi téé-a càchí cue téé isràél sá ndècuéchi-dé, te cùtnàhá ní xǐndecu-í ñuú Jerusàlén ní cachí-güedé sá ndáá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchìuⁿ-í cahni ñaha-güedé xii-dé ní cùu.

25 Te sátá nǐ ndihí cuendú ní cáháⁿ-güedé, te ní cùtnuní iní-í sá ñà túú nǐ ìⁿ cuéchi càhnu nǐ quide-dé, nùu ñá túú ní tàuchiuⁿ-í cahni ñaha-güedé xii-dé. Te mee-dě ní cachí-dé sá quihíⁿ-dé nùú tǎ Cèsár téé yǐndaha cuéhé nacióⁿ, te ní xáhaⁿ-í sá cúu quihíⁿ-dé.

26 Te ñá túú ní xini váha-í nása ní quide-dé, nùu xǎⁿ ñá ní ñhì-í nàcuáa cadúha-í tutú quihíⁿ ndaha té Cèsár, te xǎⁿ ní cana-í-dé véxi-dé iha cuendá nchaa-ndo càháⁿ ndihí-ndo-dé. Te ducaⁿ cànuu cadíhna-gá yòhó tǎtá Àgripá cacáⁿ tnùhú-n nùú-dě nùu nása cáháⁿ-dé, te òré-án cùtnuní iní-í nása cada-í cadúha-í tutú quihíⁿ ndaha té Cèsár.

27 Chi sàni iní-í sá ñà túú ndùu váha-xi sá quihíⁿ ìⁿ téé tàú cuéchi te nùu vá códó tnùnì nùú ìⁿ tutú nàcuáa càa cuéchi tàú-dé —càchí té Fèstú xǎhaⁿ-dě xii-güedé.

26

Te Páblú càháⁿ ndihí-dé té Àgripá

¹ Te dătnùnî ní xáhaⁿ tĕ Àgripá tée yìndaha nacióⁿ Isràèl xii tĕ Păblú:

—Te vitna cáháⁿ-n nŭu nása ní cuu cuendá-n —càchí-dĕ xăhaⁿ-dĕ.

Te tĕ Păblú ní ndacani-dĕ ndaha-dĕ sá cùndedóho-güedé, te ní xáhaⁿ-dĕ xii tĕ Àgripá tée yìndaha nacióⁿ Isràèl:

²⁻³ —Tătá Àgripá, ío cùdíí ìní-í sá nĭ naníhí tnáhá-ó vitna, chí yòhó ío váha xìnî-n nchàa nacuáa quide ñáyiú isràèl quidé càhnú-yu Yá Ndióxi, te ío váha xìnî-n nchàa tnúhu xĭtnáhá-yu. Te vitna cundee ìní-n cùndedóho-n ìⁿ úú tnúhu na cáháⁿ-í. Na càchí tnúhu-í sá ñă ndàá ní quide-í nchaa sá cáháⁿ cue tĕe isràèl.

Té Păblú cáháⁿ-dĕ năcuáa ní quide-dĕ cùtnáhá vátá túhá-gă-dĕ ichi Yá Ndióxi

⁴ Te sa nàha nchaa cue tĕe cùnūu núú ñáyiú isràèl năcuáa ní quide-í ñuú-í ndihî ñuú Jerusàlén cùtnáhá ní cuu landú-í.

⁵ Te mee-güedĕ náhá-güedĕ sá ndĕe lihli-í ní chitnahá-í cue tĕe cùu fariséú. Te núu cuìní-güedĕ cáháⁿ-güedĕ sá tĕe fariséú cùú-í àdi ñáhá dico nchaa-güedĕ sa nàha-güedĕ sá cuè tĕe-áⁿ nĭ chitnahá-í. Te cue tĕe cùu fariséú-áⁿ ío cuìní-güedĕ cada-güedĕ nchaa năcuáa nchìcúⁿ nihnu ñáyiú quidé-yu. Te yúhú nchaa sá nchìcúⁿ nihnú-yu quidé-yu-áⁿ nĭ quide-í.

⁶ Te vitna ndĕcu-í iha, te cáháⁿ-n nŭu váha-ni quide-í àdi ñáhá, chí cue tĕe-ăⁿ tĕe ñàha-güedĕ cuéchi xii-í cuendá sá sàndáá ìní-í sá ndótó nchàa ñáyiú ní xíhí. Te ñu-ni ducaⁿ nĭ xáhaⁿ Yá Ndióxi xii nchaa ñanî tnáhá-ó ní xindecu ndĕe sanaha.

⁷ Te nchaa ñáyiú-áⁿ xĭndetú-yu nduu ndòto ñáyiú ní xíhí ní cùu. Te ñu-ni ducaⁿ ndĕtu nchaa ñanî tnáhá-ó ndĕcu ñuyú-a ndĕe vitna, te xĭăⁿ nŭu cuĕi nduu cuĕi niú cáháⁿ ndihî-yu Yá Ndióxi. Te sá sàndáá ìní-í nŭu xĭăⁿ ní cáháⁿ-í, te tĕe ñàha cue tĕe isràèl cuéchi xii-í.

⁸ ¿Te ná cuendá nchòhó cue tĕe isràèl ñá túú cuìní-ndó quìndáá ìní-ndó să dándòto Yá Ndióxi nchaa ñáyiú ní xíhí? —càchí tĕe Păblú xăhaⁿ-dĕ.

Té Păblú caní-dĕ cuendú sá nĭ xóo chihî-dĕ ñáyiú sàndáá ìní tnúhu Jĕsús vecaá

⁹ Te ní xáhaⁿ tucu tĕe Păblú:

—Ndĕe dàvá-áⁿ nĭ quide úhú-í ñáyiú sàndáá ìní-xi tnúhu Jĕsús Yaá ní quee ñuú

Nazàrét, te ní cáháⁿ-í sá vâha-ni ní quide-í sá dúcáⁿ nĭ quide-í.

¹⁰ Te ñu-ni ducaⁿ nĭ quide-í ñuú Jerusàlén. Te cue dútú cùnūu ní taxi-güedĕ ìⁿ tutú cuendá tnĭ-í ñáyiú ní sàndáá ìní tnúhu Jĕsús, te vâi-yu ní chihî-í vecaá. Te òrĕ ní cáháⁿ-güedĕ sá cahnî-güedĕ ñáyiú-áⁿ, te tnáhá-í ní cáháⁿ-í sá cúú cahnî ñàha-güedĕ xĭi-yu.

¹¹ Te titní xito ní sáháⁿ-í nchaa veñúhu ñáyiú isràèl, te ní canî-í-yu te ní xáhaⁿ-í sá dăñă-yu ichi Jĕsús. Te cuendá ío ní cudĕeⁿ-í núú-yu, xĭăⁿ ní sáháⁿ-í nchaa ñuú xĭcá nĭ sánúndúcù-í dava-gá ñáyiú sàndáá ìní tnúhu-gá cuendá dandòho ñàha-güedĕ xĭi-yu.

Té Păblú cáháⁿ tucu-dĕ nása ní cuu ní tuha-dĕ ichi Yá Ndióxi
(Hch. 9:1-19; 22:6-16)

¹² Te cuendá xĭăⁿ ní xica tucu-í cuáháⁿ-í ñuú Dâmascú, nĕhĕ-í tutú ní taxi cue dútú cùnūu cuáháⁿ, cuendá sá ndácù-í tnĭ-í nchaa ñáyiú sàndáá ìní tnúhu Jĕsús ní cùu.

¹³ Te òrĕ caúxúú nduu ñūhu-í ichi cuáháⁿ-í, te uuⁿ ní quee ñuhú andĭu nĭ dáyĕhé-xi ndĕe núú nútnĭ-í ndihî cue tĕe ndĕca tnaha ndihî-í, te níhî-gá ní dáyĕhé-xi dàcúxí nchĭcanchii.

¹⁴ Te nchaa-ndĭ ní nduá-ndĭ ndĕe ñuhu, te ní tecú dóho-í cáháⁿ ìⁿ sá cáháⁿ tnúhu ñáyiú isràèl, te càchí-xi: “Yòhó Sàulú, ¿Ná cuendá cúú úhú ìní ñáhá-n xii-í dándòho ñàha-n? Te ío dândòho-n mee-n, chí dătná cuìní-n quide ndĭcutu quide-n chí quiti-áⁿ òrĕ cŭxi-güedĕ-dĭ puyá te sàha-dĭ patadá núú-xi, te sá dúcáⁿ quide-dĭ te quide úhú-dĭ mee-dĭ. Te ducaⁿ sătnahá-xi cùu yohó chí ñá túú sàndáá ìní ñáhá-n xii-í”, càchí sá nĭ cáháⁿ-áⁿ.

¹⁵ Te ní xáhaⁿ-í: “¿Ná cúú yòhó sá nĭ cáháⁿ-áiⁿ?”, xăhaⁿ-í. Te càchí sá cáháⁿ-áⁿ: “Yúhú cùú-í Jĕsús Yaá cúú úhú ìní-n”, duha ní cachí sá cáháⁿ-áⁿ. Te xĭăⁿ ní cutnùnî ìní-í sá Jĕsús cáháⁿ.

¹⁶ Te ní cachí-gá: “Ndacuíñî-n chí yúhú cáháⁿ-í chí cuìní-í quíhî-n càda-n chiuⁿ-í, chí quíhî-n cáháⁿ-n nŭú ñáyiú năcuáa ní cuu ní xìnî ñáhá-n xii-í vitna, te quixi tucu-í cáháⁿ ndihî ñàha-í xii-n, te cúñàha-n xĭi-yu năcuáa cáháⁿ-í.

17 Chi cuiní-í quíhíⁿ-n cǎháⁿ-n tnũhu-í núú ñáyiú isràél ndihí núú ñáyiú ñá túú cùu ñáyiú isràél, te coto ñaha-í xii-n cuèndá vá cǎhní ñáhá-yu xii-n.

18 Te cuiní-í quíhíⁿ-n cũñaha-n xii-yu sá dáñã-yu nchaa ichi cuèhé ichi duha ndècú-yu, te tuhá-yu ichi váha cuèndá vá quíndáá iní-yu cadá-yu sá cǎháⁿ yucu ñávãha, te quíndáá iní-yu cadá-yu nchaa nàcuáa cǎháⁿ Yã Ndiõxí. Te núu na quíndáá iní-yu tnúhu cǎháⁿ-í, te cada cǎhnu iní-í nchaa cuéchi-yu, te naníhí tàhú-yu ndihí dava-gá ñáyiú sa ní xócuíñí nchaa sá cuèhé sá dúhá ní xíndecu iní-yu”, duha ní cachí-gá xii-í —cǎchí té Pǎblú xǎhaⁿ-dẽ xii té Àgripá té yíndaha nacióⁿ Isràél.

Té Pǎblú quíde-dẽ nchaa nàcuáa ní xǎhaⁿ Jèsús cada-dẽ

19 Te ní xǎhaⁿ tùcu té Pǎblú xii té Àgripá:

—Ñá túú dàña ndeé-í quíde-í nchaa nàcuáa ní cǎháⁿ Jèsús òré ní cǎháⁿ-gá andiú.

20 Te díhna-gá ñáyiú ñúú Dámascú ní cǎháⁿ-í tnúhu-gá núũ-yu, te ní xǎhaⁿ-í xii-yu sá dáñã-yu nchaa sá cuèhé sá dúhá quíde-yu, te cǎháⁿ ndihí-yu Yá Ndiõxí, te cadá-yu mee-ni sǎ vǎha cuèndá cutnùní iní dava-gá-yu sá ní dáñã-yu nchaa sá ñà túú vǎha ní xóo cadá-yu. Te ducaⁿ-ni nì xǎhaⁿ-í xii ñáyiú ñúú Jerusálén ndihí ñáyiú nihí nacióⁿ Isràél ndihí nchaa ñáyiú ñá túú cùu ñáyiú isràél.

21 Te cuèndá sá dúcáⁿ ní cǎháⁿ-í núu ní tñi ñaha cuè té isràél xii-í cútñáhá ní sáháⁿ-í veñúhu cǎhnu sá ò cùnuu cǎhni ñaha-güedé ní cùu.

22 Te ñu-ni mee Yã Ndiõxí ní chindee ñaha-gá xii-í núu ndècu-í iha tnáví cǎháⁿ-í tnúhu-gá, te mee-ni tnúhu-gá cǎháⁿ ndihí-í ncháa-yu, cuèi ñáyiú cuica, te cuèi ñáyiú ndáhú. Te ndí Moisés ndihí dava-gá cue té ní xóo cǎháⁿ tnúhu Yá Ndiõxí ndéé sanaha ní cǎháⁿ-güedé nàcuáa cada-xi vitna, te ñu-ni ducaⁿ cǎháⁿ-í nchaa-ni nduu.

23 Te cue té-áⁿ ní cachí-güedé sá Crìstú Yaá tendaha Yã Ndiõxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiú ní xíhí ndotó-yu núu na sàá nduu chi ducaⁿ càda-xi ní cachí méé Yã Ndiõxí. Te cuèndá sá dúcáⁿ ní ndoto-gá, xíáⁿ cútñùní sá cúu náníhí tàhú

ñáyiú, cuèi ñáyiú isràél, te cuèi ñáyiú ñá túú cùu ñáyiú isràél. Te dàtná-ni nduu tnúhu ní cǎháⁿ cue té ní xóo cǎháⁿ tnúhu-gá ndéé sanaha-ãⁿ, te ñu-ni ducaⁿ cǎháⁿ yúhú tucu —cǎchí té Pǎblú xǎhaⁿ-dẽ.

Té Pǎblú xǎhaⁿ-dẽ xii té Àgripá sá quíndáá iní-dé tnúhu Jèsús

24 Te sá dúcáⁿ ní cǎháⁿ té Pǎblú, te ní cǎháⁿ níhi té Fèstú, te xǎhaⁿ-dẽ:

—Pǎblú, jío lùcú cǎháⁿ-n! Cuèndá ío vǎi ní dácuáhá-n, núu xíáⁿ ndádá lùcú ñáhá-xí xii-n —cachí-dé xǎhaⁿ-dẽ.

25 Te ní xǎhaⁿ tẽ Pǎblú:

—Ñáhá, vá dúcáⁿ cǎháⁿ-n chi ñá díú sǎ lùcú-í duha cǎháⁿ-í, chi tnúhu ndáá cǎháⁿ-í.

26 Te té Àgripá-a sa naha-dé ndihí nchaa ñáyiú isràél nàcuáa ní cuu, chi sa ní níhí-dẽ tnúhu ndihí dava-gá-yu nàcuáa ní cǎháⁿ-í, núu xíáⁿ cúyí-í cǎháⁿ ndihí-í-dé —cǎchí-dé xǎhaⁿ-dẽ xii té Fèstú.

27 Te ní xǎhaⁿ-dẽ xii té Àgripá:

—Yúhú sa xini-í sá sàndáá iní-n tnúhu ní chídó tnùní cue té ní xóo cǎháⁿ tnúhu Yá Ndiõxí ndéé sanaha —cǎchí-dé xǎhaⁿ-dẽ.

28 Te ní xǎhaⁿ tẽ Àgripá:

—¿Quíde-n cuèndá sá ñiⁿ úú tnúhu ní cǎháⁿ-n te quíndáá iní-í tnúhu Jèsús cǎháⁿ-n-ãⁿ? —cǎchí-dé xǎhaⁿ-dẽ.

29 Te ní xǎhaⁿ tùcu té Pǎblú:

—Cuèi vitna te cuèi ndéé cuèé-gá dico cuiní-í sá dàcuítí sǎ quíndáá iní-n tnúhu Jèsús. Te ñu-ni ducaⁿ xicáⁿ tàhú-í núú Yã Ndiõxí sá ncháá ñáyiú ndècu ndihí-o iha quíndáá iní-yu tnúhu-gá dàtná cuiní-n ní quíde yúhú, ducaⁿ càda-yu. Dìcò-ni sá núu vá quíhíⁿ-ni-yu vecaá dàtná cuiní-n ndòho yúhú —cǎchí-dé xǎhaⁿ-dẽ xii té Àgripá.

30 Te sáta dúcáⁿ ní cǎháⁿ-dẽ, te ní ngúnutñi té Àgripá té yíndaha nacióⁿ Isràél, ndihí té Fèstú té cùu gobiernú, ndihí tá Berènicé ndihí dava-gá ñáyiú xínucóo yatni.

31 Te ní tnahá-yu ndèca tnahá-yu cuáháⁿ ñiⁿ xio. Te ní xítnáhá-yu:

—Té-ãⁿ ñá túú nǎ cuéchi ni quíde-dé núu chihi ñaha-güedé vecaá àdi cǎhni ñaha-güedé —cǎchí-yu xítnáhá-yu.

32 Te té Àgripá ní xǎhaⁿ-dẽ xii té Fèstú:

—Cuéchi mee-dẽ chi ní cachí-dé sá quítnáhá-dé té Cèsár, xíáⁿ núu ndíhu

tucu-dé vecaá, te núu ñá túú dùcaⁿ ni cáháⁿ-dé, te cácu-dé ní cùu —cachí-dé xáhaⁿ-dě xii té Fèstú.

27

Té Păblú cuáháⁿ-dé ñuú Rómá

1-2 Te ní ndatnúhu-güedé sá quíhíⁿ té Păblú ndíhi bàrcú nacióⁿ Itàliá, te tnàhá yúhú quíhíⁿ-í ndíhi-dé. Te tnàhá ñⁿ té nàni Aristarcú cuíní-dé quíhíⁿ ndíhi-ndí-dé, te cùu-dé téé ñuú Tesalónica, te ñuú-áⁿ yíndèhu-xi distritú Macèdoniá. Te ní sáha cuendá-güedé té Păblú ndíhi ñⁿ úú-gá cue téé xixíhi vecaá ní queheⁿ cuendá ñáhá té Jülüú téé cùu capitáⁿ, téé yíndaha nchaa sandadú nání Àugustú, te ní quee-ndí nchaa-ndí bàrcú ñuú Adràmitiú. Te ní xica bàrcú-áⁿ cuáháⁿ-ndí ndíhi-xi te cuíta yáha-ndí ñⁿ úú ñuú yíndèhu distritú Asiá quíhíⁿ.

3 Te nduu tněé ní quexìo-ndí ñuú Sidón. Te ío váha ní quide té Jülüú, chi ní dáñá-dě ní quene té Păblú ní sáháⁿ-dé ní cáháⁿ ndíhi-dé cue téé ío váha tnàhá tnúhu ndíhi-dé ñuú cudana cundàhú iní ñáhá-güedé cuáñaha-güedé nchaa sá xíní ñúhu-dé.

4 Te dătnùní ní ndée tucu-dé bàrcú cuáháⁿ-ndí. Te ío níhi táchí te ñá ní dàña-xi caca ndáá bàrcú, te ní sáháⁿ bàrcú ndée yatni yuhu distritú Chìpré, te distritú-áⁿ cáá cuădava xití làmár, te xíaⁿ ñà túú cuéhé táchí ni yáha-ndí.

5 Te ta yáha-ndí cuáháⁿ, te ní yáha-ndí ñⁿ xio yuhu distritú Cìliciá ndíhi yuhu distritú Pànfiliá, te ní sáá-ndí ndée ñuú Mírá ñⁿ ñuú yíndèhu distritú Lìciá.

6 Te ní quene téé cùu capitáⁿ cuándúcú-dě ingá bàrcú, te ní níhí-dě ñⁿ bàrcú téé ñuú Alejándriá, ñúhú ìchi-xi quíhíⁿ-xi nacióⁿ Itàliá. Te ní ndicuaca ñaha-dě xii-ndí cuáháⁿ-ndí ní quee-ndí bàrcú-áⁿ, te ní xica-xi cuáháⁿ-xi.

7 Te ío cuée cuáháⁿ bàrcú-áⁿ, cuéhé nduu ní xúhu-xi ìchi, te yica-ni ñⁿ quexìo-ndí yuhu ñuú Nidú, te ñá ní dàña-gá táchí quíhíⁿ ndáá bàrcú ñuú ní xícó ndúú-xi. Te ní yáha-ndí ñⁿ xio yuhu distritú Crětá núú ñà túú quène vihi táchí, te ñu-ni cuădava tucu

làmar cáá distritú-áⁿ. Te ní yáha-ndí yuhu ñuú Salmón, te ñu-ni Crětá yíndaha-xi ñuú-áⁿ.

8 Te ní yáha-ndí cuáháⁿ-ndí mee-ñá núú ràyá distritú Crětá, te ío ní ndoho-ndí ní sáá-ndí ñⁿ xichi núú nání Puertú Váha, yatni vii-ni-gá ñuú Làseá.

9 Te ní cuyaa vihi-ndí ìchi, ducaⁿ-ni cùu-ndí ní tnàhá yóó cúúⁿ dăú táchí, te ío úhú yáha bàrcú ñuú na quíhíⁿ-ni-xi.

10 Te ní xáhaⁿ tē Păblú xii-güedé:

—Nchaa-ndo cündedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndíhi bàrcú chi cuíta càrgá te cuíta bàrcú, te cuu-ni iní-xi tnàhá-ni mee-o cùú-ó chi cáháⁿ-ó ñuú na ngàunihnu-o xití ndute —càchí-dé xáhaⁿ-dě xii-güedé.

11 Te téé cùu capitáⁿ ñá ní sándáá iní-dé tnúhu ní cáháⁿ té Păblú. Dico tnúhu ní cáháⁿ téé dàcaca bàrcú ndíhi xitohó-xi chi ní sándáá iní-dé.

12 Te ñá ní tnàhá iní-güedé Puertú Váha cuendá sá ñⁿ tnàhá yóó cúúⁿ dăú táchí, te ñá túú dăhu váha táchí xíaⁿ, núu vâi-güedé ní cuíní-güedé yáha-güedé quíhíⁿ-güedé sáá-güedé ndée ñuú Fènicé ní cùu. Te yàcáⁿ cundecu-güedé yóó cúúⁿ dăú táchí cuéi ñá túú caváha vihi, chi nchíi năcuáa yáha bàrcú, te yàcáⁿ quíhu táchí, dico dăhu-gá. Núu xíaⁿ ndée ndíácăⁿ nătăcá bàrcú yóó cúúⁿ dăú táchí, te ñu-ni Crětá yíndaha-xi ñuú-áⁿ.

Ñitùhú làmár cúúⁿ dăú táchí

13 Te duha ní quene nuu luha táchí, xíaⁿ ní sani iní-güedé sá ndácú-güedé quíhíⁿ-güedé, núu ní natava-güedé cáá ndètníi ndée bàrcú, te ní xica-xi cuáháⁿ-xi ní yáha-ndí yatni vii yuhu distritú Crětá.

14 Te tnaa-ni ní cuu sá ñⁿ xica bàrcú, te duha ní cunuu dăú táchí ñⁿ xio yuhu ñuú-áⁿ

15 te nchîta ìchi cuáháⁿ bàrcú. Te ñá ní ndăcu-gá-xi quíhíⁿ ndáá-xi năcuáa cuáháⁿ-xi ni cùu, núu ní dáñá-ndí cuáháⁿ méé-ñá bàrcú.

16 Te ní yáha-ndí ñⁿ ñuú nání Claudá, te ñuú-áⁿ cáá cuădava xití làmár. Te ñⁿ xio yuhu ñuú núú ñà túú quène vihi táchí ñⁿ yáha-ndí, te bàrcú líhli sá nchícúⁿ sátá bàrcú

cáhnú, chi ní ndacu-ndí ní taxúha-ndí xítí bàrcú cáhnú.

17 Te sáta nǐ ndacu-ndí ní taxúha-ndí bàrcú lǐhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yǎha bàrcú ndéé núú ñhú cǔchí yuhu ñúú Sǐrté, núú xǎⁿ ní ndihí dóo nchítá dǐquí bàrcú ní nuu nehe-güedé, chi dóo-ǎⁿ ío níhí chǐndaha táchí, núú xǎⁿ cuáháⁿ bàrcú ñⁿ xio. Te ní dáñá-güedé ñá túú-gǎ ní dàcaca-güedé, núú cuáháⁿ méé-nǎ-xi ta chǐndaha táchí cuáháⁿ.

18 Te ío níhí dáú táchí, te ñá ní cuìní tñahí-xi yáha. Te nduu úú sá dúcáⁿ ñà túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xi cuèndá cuìní-güedé nduu ñamá-xi.

19 Te nduu úní ní dǎngoyo-güedé nchaa ndachiuⁿ cánehe chiuⁿ-güedé xítí bàrcú.

20 Te cuéhé nduu ñá túú ní xǐní-ndí ni chòdíni ní nchǐcanchii, chi ío níhí ní cuuⁿ dáú táchí, núú ní cáháⁿ-ndí sá vǎ cǎcu-ndí, chi ndihí-ndí cáhá ní cáháⁿ-ndí.

21 Te ní cuu tǐtní nduu ñá túú-gǎ xéxí-ndí, núú xǎⁿ ní ngúnutñí té Pǎblú núú-güedé, te xǎhaⁿ-dǎ:

—Quíndáá iní-ndó tñuhu ní cáháⁿ-í, te cundecu nahi-o Crétá ní cùu. Te núú ni tñi-ndo tñuhu-í, te vǎ dǎcuíta-o cǎrgá ndihí dava-gǎ ndǎchiuⁿ ni cuu.

22 Te vǎ yùhú-ndó chi vǎ cùú ni ñⁿ-ndo dico bàrcú chi cuíta.

23 Te ñaha-ndo sá yùhú cǎháⁿ ndihí-í Yǎ Ndiǒxí te quíde-í nǎcuáa cǎháⁿ-gǎ. Te ñu-ni mee-gǎ ní techiuⁿ-gǎ ñⁿ espíritú xínú cuèchi núú-gǎ ní quixi,

24 te ní cachí-xi xii-í: “Vǎ yùhú-n chi vǎ cùú-n, dico dacuítí quǐhíⁿ-n cǎháⁿ ndihí-n tǎ Cèsár. Te ni ñⁿ tée ndihí-n vǎ cùú, chi ío cùdíí ñí ñáhá Yǎ Ndiǒxí xii-n”, duha ní cáháⁿ espíritú xínú cuèchi núú-gǎ ní cachí tñuhu-xi xii-í.

25 Núú xǎⁿ cǎchí tñuhu-í sá vǎ yùhú-ndó, chi sa cùtnuní iní-í sá cǎdá Yǎ Ndiǒxí nǎcuáa ní cáháⁿ espíritú xínú cuèchi núú-gǎ.

26 Te mee táchí chǐndaha-xi bàrcú daquihíⁿ-xi ndéé yuhu ndüte —cachí té Pǎblú xǎhaⁿ-dǎ xii-güedé.

27 Te sa ní cuu sáhúⁿ nduu sáhúⁿ niú sá ñí ngüíta-xi cùuⁿ dáú táchí, te ñá túú-gǎ dǎcaca-güedé bàrcú, chi mee-nǎ táchí tá chǐndaha-xi bàrcú cuáháⁿ núú ndute làmár

Adriá. Te sáta nǐ cuu dava niú, te ní quíde cuèndá cue tée dàcaca bàrcú sá tá cùyatni-güedé ñuhu yǐchí.

28 Te ní chicuáhá-güedé ná daha-gǎ mètrú néhé-xí sǎ cùnú xítí ndute cuèndá cutnùní iní-güedé sá tá cùyatni-xi ndéé yuhu làmár, te nèhe-xi ócò sáhúⁿ ñⁿ-ni-gǎ mètrú. Te ní xica tucu bàrcú luha-gǎ, te dǎtnùní ní chicuáhá tucu-güedé, te xǎⁿ néhé-xí ócò úsá-ni-gǎ mètrú.

29 Te ní yùhú-güedé sá candaundeé-xi cava, te ní queheⁿ-güedé cùmí caá náhnú sǎ nchícúⁿ yoho, te ní dáquèe-güedé xítí ndute ndàa sáta bàrcú, te dǎtnùní ní ngüíñí-xi ñá ní xica-gǎ-xi, te ní cuìní-güedé sá òré-ni tũndaá ní cùu.

30 Te cue tée dàcaca bàrcú ní natava-güedé bàrcú lǐhli dǎndée-güedé núú ndute ni cùu, te ní cachí-güedé sá quǐhíⁿ-güedé ndàa núú bàrcú dàquée-güedé úú-gǎ caá cuèndá cuita candeé-xi bàrcú cáhnú cuèndá sá vǎ cǎcá-xí. Te cuìní-güedé dandáhú-güedé dava-gǎ nchúhú cue tée ñuhu ndihí-güedé bàrcú, chi ní ndatnúhu-güedé sá cùnú-güedé ní cùu.

31 Te té Pǎblú ní xǎhaⁿ-dǎ xii tée cùu capitáⁿ ndihí dava-gǎ sandàdú:

—Te núú na dǎndóo ñaha cue tée dàcaca bàrcú cunu-güedé, te vǎ cǎcu-o —cǎchí-dé xǎhaⁿ-dǎ.

32 Te sá dúcáⁿ ñí xǎhaⁿ-dǎ ñuu ní sáháⁿ sandàdú ní xehndé-güedé yoho nchícúⁿ bàrcú lǐhli dǎngáúnìhnu-güedé xítí ndute cuáháⁿ-xi.

33 Te váha váha-ni ta tũndaá cuáháⁿ, te ní xǎhaⁿ tǎ Pǎblú:

—Sa ní cuu sáhúⁿ nduu ñá túú tñahí xèxi-ndo sá ndíhú iní-ndó.

34 Te vitna yáchí-ndó, chi caxi-ndo cuèndá naníhí ndéé-ndó, te vǎ yùhú-ndó chi ñá túú ñá tñahá ni ñⁿ-ndo —cachí-dé xǎhaⁿ-dǎ xii-güedé.

35 Te sáta dúcáⁿ ñí cáháⁿ-dǎ, te ní queheⁿ-dǎ ñⁿ pàá, te ní ndacáⁿ táhú-dǎ núú Yǎ Ndiǒxí, te núú-güedé nchaa-güedé ducaⁿ ñí quíde-dé, te dǎtnùní ní táhú-dǎ luha ní xexi-dé.

36 Te ducaⁿ te dǎtnùní ní cuyí-güedé ní xexi-güedé nchaa-güedé.

37 Te úú ciëndú únídico sáhúⁿ ñⁿ-ndí ñúhú bàrcú núú tnàhá té Pàblú, te nchaa-ndí ní xexi ndihi-ndí-dé.

38 Te ní xexi-ndí ní ndahá xití-ndí. Te dātñuní ní ngüíta-güedé ní tava-güedé nchaa ngohnchi triú ní dāngoyo-güedé xití ndute cuèndá nduu ñamá-gá bàrcú.

Ní dáhu bàrcú xití làmár

39 Te sátá ní túnadaá, te ñá ní cùtnuní-gá iní-güedé ndèé cúú-xí núú ní sáá-güedé, te ní xiní-güedé ñⁿ xichi núú ní xícó ndúú luha yuhu làmár, te vài vihi cúchí dándáá-xí yùhu ndute, te xiáⁿ ñà túú dàcandá víhí tǎchí ndute. Te ní ndatnúhu-güedé sá ndácú-güedé dacàca-güedé bàrcú quíhíⁿ-xi ndéé núú ñúhú cǔchí.

40 Te xiáⁿ núú ní sáháⁿ-güedé ní xehndé-güedé nchaa yoho nchícúⁿ caá tácandeé bàrcú ní ndóo xití làmár, te ní nadatáyá-güedé vítú sǎ dácuico-xi bàrcú, te ní nacata caa-güedé ñⁿ dóo díquí bàrcú, te ta chindaha táchí cuáháⁿ yuhu làmár tá cùyatni-xi ñuhu yichí cuáháⁿ.

41 Te ndècu ñⁿ xichi ní natacá víhí cǔchí xití ndute, te xiáⁿ ní nguindǔxi nihnu bàrcú-güedé, te ní cutí-xi xití cúchí, te ñá ní ñíhí-gǎ-güedé nàcuáa cada-güedé nene-xi. Te ío níhi ní dácandá táchí ndute, te ní chúcú ndèé-xi ndàa sátá bàrcú, te ní ndihi ní táhú-xí.

42 Te cue sandàdú ní xítnàha-güedé sá cáhni-güedé nchaa cue téé ní xíhi vecaá cuèndá sá vǎ quíhíⁿ-güedé núú ndute te cunu-güedé.

43 Te téé cùu capitáⁿ ñá ní dàña-dé cahni-güedé cue téé ní xíhi vecaá, chi ñá ní cùndee iní-dé cahni-güedé tnàhá té Pàblú. Te ní xáhaⁿ-dē xii-güedé sá cuè téé xícuu cada quíhíⁿ núú ndute te na yáha-güedé ndute quene-güedé yuhu làmár.

44 Te dáva cue téé ñá cúú càda, ní xáhaⁿ-dē nanducu-güedé vítú ñí àdi vítú ní táhú sǎ ní xíhi bàrcú, te núú xiáⁿ caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Pàblú ndécú-dē ñuú Mǎltá cáá cuádava làmár

1 Te sátá ní cácu-ndí ní nene-ndí ñuhu yìchí, te ní níhí-ndí tnúhu nàcuáa nani ñuú núú ní sáá-ndí, te ñuú-áⁿ nání-xí Mǎltá, te càa-xí cuádava làmár.

2 Te ío quide víxiⁿ-xi cuèndá ío cùuⁿ dáú. Te ñáyiú ñuú-áⁿ ní cundàhú iní ñáhǎ-yu xii-ndí, ní dátñahá-yu ñuhú te ní cana ñahá-yu ní sáháⁿ-ndí ní nacuídí-ndí.

3 Te té Pàblú dátacá-dé nducú, te tnàhá-ni ñⁿ cóo dēéⁿ ní tníⁿ nihnu-dé-di, te òré cuáháⁿ ndaha-dé chucu-dé núú ñúhú, te ní ñáni-di cahni, te ní ndee-di xití nducú ní sánduu-di ndaha-dé, te ní xexihaⁿ-di xii-dé.

4 Te nchaa ñáyiú ndèhé-yu sá tácandeé-di ndaha-dé, te ní ngüíta-yu ní xítnàhá-yu:

—Váa ndíyi ní sahani téé-a, te ñá ní xíhí-dé làmár, te dacuítíi sǎ cùú-dé vitna, chi sa nàha Yá Ndiöxí ná ní quide-dé ñuyíú-a — càchí-yu xítnàhá-yu.

5 Te té Pàblú ní quidi-dé ndaha-dé ní ngaunihnu-di núú ñúhú, te ñá túú tnàhí ná ní cùu núú ní xexi-di.

6 Te ñáyiú ñuú-áⁿ xíndéhǎ-yu núu daquihíⁿ-xi chúhúⁿ àdi nduá-dé cuú-dé. Te naha ní xíndéhé ñahá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xítnàhá-yu:

—Váa ndiöxí cúú téé-a núu dàcáⁿ ñá túú tnàhí ná ní quide-xi ndaha-dé núú ní xexi cóo — càchí-yu xítnàhá-yu.

7 Te yatni núú dúcáⁿ ní xexihaⁿ cóo-ǎⁿ cáá ñúhu xitu téé nani Publiú, te téé-áⁿ táxi tnùní-dé nihíi ñuú cáá cuádava xití làmár núú ndécú-ndí nduu-ǎⁿ. Te ío váha iní-dé chi ní cana ñaha-dé ní sáháⁿ-ndí ní xíndecu-ndí úní nduu vehe-dé.

8 Te tǎtá tē Publiú-áⁿ cáá-dē cùhú-dé ñúhú-dé cahni, te tnàhá-dé daxi. Te té Pàblú ní sáháⁿ-dé núú cáá-dē, te ní cáháⁿ ndihi-dé Yá Ndiöxí, te ní sacáⁿ ndodo-dé ndaha-dé díquí tē cùhú-áⁿ, te ducaⁿ-ni ní quide-dé, te ní ndúha téé cùhú-áⁿ.

9 Te sátá dúcáⁿ ní quide té Pàblú, te ní quixi nchaa ñáyiú cùhú núú ndécú-ndí, te ní quide tátña ñaha tē Pàblú xii-yu te ní ndúha-yu.

10 Te òré ndécú-ndí xíáⁿ, te vài sá nǐ taxi táhú-güedě, te òré ní xica-ndí ní taxi tucu-güedé nchaa sá xíní ñùhu-ndí ichi.

Té Pǎblú ní quexìo-dé ñuú Ròmá

11 Te yàcáⁿ ní xíndecu-ndí úní yóó, te sa ndècu ñⁿ barcú téé ñuú Alejàndriá òré ní quexìo-ndí, te ní xíndecu-xi ñihí yóó cúúⁿ dǎú táchí. Te núú-xi càndodo sandú sá dánàni-güedé Cástór ndihí sàndú sá dánàni-güedé Pólux, te xití bàrcú-áⁿ nǐ quée-ndí cuáháⁿ-ndí.

12 Te ní quexìo-ndí ñuú Siràcusá, te yàcáⁿ ní xíndecu-ndí úní nduu.

13 Te ní xica tucu bàrcú cuáháⁿ-xi, te ní quexìo-ndí ñuú Règiú. Te nduu tnèé duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexìo-ndí ñuú Pùteolí.

14 Te yàcáⁿ ní naníhí tnáhá-ndí ndihí ñáyíu sàndáá iní tnúhu Jèsús, te ní cachí-yu sá cúndècu-ndí úná nduu, núu xíáⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexìo-ndí ñuú Ròmá.

15 Te ñáyíu ròmá ñáyíu sàndáá iní tnúhu Jèsús, ní níhí-yu tnúhu sá cuáháⁿ-ndí, te ní quixí-yu ní quixi tnahá ñáhá-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xíní té Pǎblú nchaa ñáyíu véxi tnahá ñáhá xii-ndí, te ndee ndèe ní cuu iní-dé, te ní ndacáⁿ táhú-dě núú Yá Ndiõxí sá dúcáⁿ nǐ quidè-yu.

16 Te sátá nǐ quexìo-ndí ñuú Ròmá, te cue téé cùchiuⁿ ní xáhaⁿ-güedě xii té Pǎblú sá cúndècu ñⁿ-dé, te ní xíndeé ñáhá cuàa sandadú xii-dé.

Té Pǎblú càháⁿ-dé tnúhu Yá Ndiõxí ñuú Ròmá

17 Nduu úní sá nǐ quexìo té Pǎblú, te ní cana-dé cue téé cùnnuu núú ñáyíu isràél ndécú ñuú Ròmá, te ní sáháⁿ-güedé núú ndécú-dě, te ní xáhaⁿ-dě:

—Nchòhó cue téé isràél, càchí tnúhu-í sá ñà túú nǎ ní quide-í ní ñⁿ ñáyíu cútnáhá ní xíndecu-í ñuú Jerusalén. Te ñà túú ní càháⁿ cuèhé-í sá quidè-yu nchaa nàcuáa ní xóo cada cue ñaní tnáhá-ó nǐ xíndecu ndéé

sanaha, te ñà túú nǎ ní quide-í te ní tñi ñaha-güedě ní sáha cuendá ñáhá-güedě xii-í núú cuè téé ròmá, cue téé ndècu yacáⁿ.

18 Te cue téé-áⁿ nǐ ndúcú tnúhu-güedé ñuú ndáá ndècuéchi-í, te ní cutnùní iní-güedé sá ñà túú nǎ ní quide-í, te xíáⁿ cuíní-güedé queñuhu ñaha-güedě xii-í vecaá ní cùu.

19 Te ñuú-í cue téé isràél ñà ní dàña-güedé cácu-í, chí cuíní-güedé sá cáhni ñaha cue téé ròmá, cue téé xíndecu yacáⁿ xii-í ní cùu, te xíáⁿ núu ní xáhaⁿ-í sá quixí-í càháⁿ ndihí-í té Cèsár cuendá iha cada ndáá mée-dě cuendá-í, te vá yòo ñⁿ tee-í cuéchi.

20 Núu xíáⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyíu ní xíhí, te ñuú-í ducaⁿ càháⁿ dava-gá ñáyíu isràél, te sá dúcáⁿ nǐ càháⁿ-í, te ní chihí ñaha-güedě vecaá, te xíndeé ñáhá-güedě ndéé vitna — càchí té Pǎblú xáhaⁿ-dě xii-güedé.

21 Te ní xáhaⁿ-güedě xii-dé:

—Ñà túú tnáhí tutú ní tendaha cue téé distritú Jùdeá quixi cuendá-n. Te ní cuè téé isràél ñà túú ní quixi-güedé càháⁿ cuèhé-güedé cuendá-n.

22 Te cuíní-ndí cundedóho-ndí nása cundu tnúhu càháⁿ-n, chí sa ní níhí-ndí tnúhu sá ncháá xichi ío xicáháⁿ cuèhé-yu cuendá nchaa ñáyíu sàndáá iní tnúhu Jèsús — càchí-güedé xáhaⁿ-güedě xii té Pǎblú.

23 Te ní xáhaⁿ-güedé nduu cùyáchí-güedé te quixi-güedé cundedóho-güedé dava-gá cuendú càháⁿ té Pǎblú. Te ní tnahá nduu nǐ ndatnúhu-güedé quíhíⁿ-güedé núú quidè véhe-dé, te vài-yu ní sáháⁿ-yu ní xíndedóho-yu tnúhu ní càháⁿ-dé, te ncháca nchaa ní càháⁿ ndihí-dé-yu. Te ní xáhaⁿ-dě xii-yu sá ndíi Moisés ndihí dava-gá cue téé ní xóo càháⁿ tnúhu Yá Ndiõxí ndéé sanaha nǐ chídó tnùní-güedé núú tutú-güedé sá díú-gǎ tendaha-gǎ Crístú quixi-gǎ ñuyíú-a. Te ní chídó tnùní-güedé nchaa nàcuáa cada-gá, te ñuú-í nàcuáa càháⁿ tutú-güedé cada Crístú, te ducaⁿ nǐ quide-gá cútnáhá ní xica cuu-gá ñuyíú-a, núu xíáⁿ ní cutnùní sá díú Jèsús cúú-gǎ Crístú Yaá ní tendaha Yá Ndiõxí ní quixi ñuyíú-a. Te núu quindáá iní-yu, te ndíhu ndaha ñaha Yá Ndiõxí xii-yu.

24 Te davá-yu ní sàndáá iní-yu tnúhu ní càháⁿ-dé, te davá-yu ñà túú ní sàndáá

iní-yu.

²⁵ Te cuendá sá ñǎ ĩⁿ-ní tnũhu ni cǎháⁿ-yu, núu xiǎⁿ cuiní-yu núhú-yu ni cùu. Te ní xáhaⁿ tǎ Pǎblú sá cùndètu tnaá-yu cǎháⁿ-dé ingá tnúhu, te xǎhaⁿ-dě:

—Ní xáhaⁿ Espíritú Yǎ Ndiǒxí xii ndí Chàíá nǎcuáa cǎháⁿ ndíi núu nchaa ñaní tnáhá-ó ñí xíndecu ndéé sanaha. Te ní cǎháⁿ Espíritú-gá ĩⁿ sá ndàá ní xáhaⁿ-xi xii ndíi, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiu:

Nchòhó mee-ni cùndedóho-ndo tnũhu cǎháⁿ Yǎ Ndiǒxí, dico ni vǎ tǎcú tnùní-ndó.

Te cada-gá tǐtní núu sǎ vǎ yǒo tnàhí ndàcu cada, dico ni vǎ cùtnùní iní-ndó nǎcuáa ndùu sá cǎdá-gǎ,

²⁷ chi cuendá sá ïo sǎá iní-ndó, xiǎⁿ ducaⁿ ñà túú sǎha-ndo cuendá nása cuáháⁿ tnúhu cǎháⁿ-gá,

chi ñǎ cuiní-ndó cùndedóho-ndo, te ni ñǎ sǎndǎá iní-ndó.

Te ni ñǎ cuiní-ndó dàña-ndo nchaa sá cuèhé sá dúhá quide-ndo

cuendá xocàni-gá nchaa xiǎⁿ iní-ndó,

duha cúñaha-n xii-yu.

Càchí Espíritú-gá xǎhaⁿ-xi xii ndíi.

²⁸ Te na càchí tnúhu-í sá quíhíⁿ cue téé cǎháⁿ tnúhu Yǎ Ndiǒxí cǎháⁿ-güedé tnúhu-gá núu ñáyiu ñǎ túú cùu ñáyiu isràél, chi ñáyiu isràél ñǎ túú cuiní-yu cùndedóho-yu. Dico ñáyiu ñǎ túú cùu ñáyiu isràél chi cùdíi iní-yu cùndedóho-yu, núu xiǎⁿ naníhí tǎhú-yu — càchí té Pǎblú xǎhaⁿ-dě xii-yu.

²⁹ Te sǎtá ñí ndíhí cuendú ní xáhaⁿ-dě, te ní ndéé-yu cuánuhú-yu ta ndàtnúhu-yu cuáháⁿ.

³⁰ Te úu cuía ñí xínu ní xíndecu té Pǎblú ĩⁿ vehe ní cháhu-dé. Te ní xóo cǎháⁿ váha-dé ndíhí nchaa ñáyiu ní xóo quíhíⁿ vehe-dé.

³¹ Te ní xáhaⁿ-dě sá ndíhu ndaha ñàha Yǎ Ndiǒxí xii-yu núu quíndǎá iní-yu tnúhu-gá, te vǎ yǒo ĩⁿ ni sǎdí yuhu-dé. Te mee-ni tnũhu Xítóhó Jesucrístú ní cǎháⁿ-dé núu-yu.

TUTÚ NÍ CADÚHA TĒ PĀBLÚ QUIHĪⁿ NDAHA ÑÁYIU ÑUÚ RÒMÁ

Té Pāblú cadúha-dé tutú quihĪⁿ ndaha ñáyiū xĭndecu ichi Xítohó Jesucristú ndécú ñuú Rómá

¹ Yúhú té Pāblú xínú cuèchi-í núú Xítohó Jesucristú, chi mee Yá Ndiöxí ní cachí-gá sá cúu-í ĩⁿ téé cáháⁿ tnúhu-gá núú ñáyiū, te tnúhu-gá cúu-xí tnúhu sá cáháⁿ nàcuáa naníhí tǎhú-ó, núu ñu-gá ní tendaha ñaha-gá xii-í xícáⁿ cúu-í cáháⁿ-í tnúhu-gá.

² Te ndéé sanaha ñí cachí Yá Ndiöxí sá dàcuítí sáa nduu ngündecu ndihĪ ñáyiū tnúhu-gá. Te ducaⁿ ñí xáhaⁿ-gǎ xii cue téé ní cáháⁿ tnúhu-gá dàvá-áⁿ ñí chídó tnùnĪ-güedé núú tütú-gá.

³ Te tnúhu-gá sá cáháⁿ-í-a cáháⁿ-xi ñu-ni cuendá Xítohó Jesucristú Yaá cúu Dēhe-gá. Te Dēhe-gá-áⁿ cúu-gǎ ĩⁿ ñáyiū, te cúu-gá ñanĪ tnáhá ndĪ DávĪ.

⁴ Te cúu-gá Yaá ñá túú tnáhĪ cuéchi-xi. Te ní xíhĪ-gá te ní ndoto-gá, te xiǎⁿ cútnùnĪ iní-ó sǎ cúu-gǎ Dēhe Yá Ndiöxí, te ío cáhnu cuu-gá.

⁵ Te ñu-ni Xítohó Jesucristú ní quide-gá ní nduu tǎhú-í núú Yá Ndiöxí sá cáháⁿ-í tnúhu-gá núú cuè ñáyiū ñuyíú-a cuendá quíndáá iní-yu tnúhu-gá te canchicúⁿ ni-hnú-yu cadá-yu nchaá nàcuáa cáháⁿ-xi, te ducaⁿ ío cuu cáhnu-gá.

⁶ Te tnáhá nchòhó cúu-ndó ñáyiū sa nchicúⁿ nihnu quide-ndo nchaá nacuáa cáháⁿ tnúhu-áⁿ, chi ní cachí Yá Ndiöxí sá nchòhó tnahá tnúhu-ndo ndihĪ Xítohó Jesucristú.

⁷ Te nchòhó ñáyiū xĭndecu ñuú Rómá, ñáyiū ío cúu iní ñáhá Yá Ndiöxí, cadúha-í tutú-a daquixi-í ndaha-ndo. Te ñu-ni nchòhó cúu-ndó cuè ñáyiū ní cachí Yá Ndiöxí cada ndáá cundecu-ndo ñuú-gǎ. Te xícáⁿ tǎhú-í núú Tǎtá-ó Dütú Ndiöxí ndihĪ núú Xítohó Jesucristú sá ío na chĭndee chitúu ñaha-gǎ xii-ndo, te ducaⁿ ndĪ nduú-gá ná càda te ío váha cuu iní-ndó cündecu-ndo.

Té Pāblú cuinĪ-dé quihĪⁿ ngoto-dé cue ñáyiū xĭndecu ichi Xítohó Jesucristú ndécú ñuú Rómá

⁸ Te díhna nuu-gǎ cǎchĪ tnúhu-í xii-ndo sǎ ío ndácáⁿ tǎhú-í núú Yá Ndiöxí cuendá sá ío sǎndáá iní-ndó-gǎ, te nchaá ñáyiū nihĪ-yu tnúhu sá dúcáⁿ quide-ndo. Te Xítohó Jesucristú dáyǎha-gǎ nchaá tnúhu cáháⁿ-í núú Yá Ndiöxí.

⁹ Te ndĪ tnahá òré cáháⁿ ndihĪ-í Yá Ndiöxí ducaⁿ-ní xícáⁿ tǎhú-í núú-gǎ cuendá-ndó, te mee-gǎ náhá-gǎ sá cáháⁿ ndáá-í, te ñu-ni núú-gǎ xínú cuèchi-í ñí yùhu ñí iní-í, chi cáháⁿ-í nàcuáa ní quide Dēhe-gá Xítohó Jesucristú cuendá naníhĪ tǎhú-ó.

¹⁰ Te xícáⁿ tǎhú-í núú Yá Ndiöxí sá ñuu mee-gǎ ná cǎchĪ te sáá ĩⁿ nduu quixi coto ñaha-í xii-ndo.

¹¹ Chi ío cuinĪ-í cundecu ndihĪ ñaha-í xii-ndo dànehé ñáhà-í ĩⁿ úú tnúhu nàcuáa ío-gǎ chĭndee ñaha Espiritú Yá Ndiöxí xii-ndo, te ducaⁿ ío-gǎ cuita nducu ndèe-ndo cada-ndo nchaá nacuáa cuinĪ-gá.

¹² Te ío chí ná cuǎha tnàha-o tnúhu ndee inĪ cundecu-o ìchi-gǎ, chi nchòhó ndihĪ yúhú ío sǎndáá iní-ó-gǎ.

¹³ Te nchòhó ñáyiū ndècu ndihĪ-í ichi Xítohó Jesucristú na cǎchĪ tnúhu-í xii-ndo sǎ dúcáⁿ-ní ío sǎni iní-í quixi coto ñaha-í xii-ndo. Te cuinĪ-í sá òré quixi coto ñaha-í xii-ndo, te vá cuíta chĭuⁿ quixi-í dàtná quidè-í òré sǎngoto-í nchaá ñáyiū dava-gǎ ñuú ñá túú xĭta chĭuⁿ-í chí ío váha sǎhúuⁿ-yu tnúhu cáháⁿ-í, dico ñá ndácú-í quixi-í quixi coto ñaha-í xii-ndo.

¹⁴ Te yúhú yídiquĪ-í cáháⁿ-í tnúhu Xítohó Jesucristú núú nchàa ñáyiū cáháⁿ tnúhu griégú, ndihĪ núú nchàa ñáyiū cáháⁿ dava-gǎ núú tnúhu, ndihĪ núú nchàa ñáyiū túha, ndihĪ núú nchàa ñáyiū ñá túú túha.

¹⁵ Te cuendá sá dúhá yídiquĪ-í cáháⁿ-í tnúhu-gǎ, xiǎⁿ ío cuinĪ-í danèhé ñáhà-í xii nchaá nchòhó ñáyiū ñuú Rómá nàcuáa nduu tnúhu sá cáháⁿ nàcuáa naníhĪ tǎhú-ó.

Ío cūnuu tnúhu Xítohó Jesucristú

¹⁶ Te yúhú ñá túú tnáhĪ cùcahaⁿ nùú-í cáháⁿ-í tnúhu Xítohó Jesucristú, chi cúu-xi tnúhu ío cūnuu, chí Yá Ndiöxí ní cachí-gá sá ncháá ñáyiū na quíndáá iní-xi tnúhu-áⁿ te naníhĪ tǎhú-yu. Te ní cachí-gá sá díhnanuu-gǎ ñáyiū isràel ngündecu ndihĪ-yu

tnúhu-áⁿ te dàtnùní ngúndecu ndihí ñáyíu ñá túú cùu ñáyíu isràél.

17 Te tnúhu-áⁿ dánèhé ñáhá-xí xii-o sá cúdiu-o núú Yá Ndiöxí te núu mee-ni sá quíndáá iní-ó-gã dàtná càháⁿ-xi núú tütú-gá núú càchí-xi: “Nchaa ñáyíu sàndáá iní ñáhá xii Yá Ndiöxí cúdiu-yu núú-gã, te ndècu ndihí ñahá-yu xii-gã”, duha càchí-xi núú tütú-gá.

Nchaa ñáyíu ndècu ñuyú ndècuéchi-yu

18 Te ndéé andiù tëndaha Yá Ndiöxí sá ùhu quixi sá cúú-xí nchaa ñáyíu ñá túú quide ndáá núú-gã, ñáyíu quide nchaa sá cuèhé sá dúhá. Te cuèndá nchaa sá quidè-yu-áⁿ xíáⁿ ñá túú cuíni-yu tñí-yu tnúhu ndáá tnúhu Yá Ndiöxí cuèndá cuu-xi ñⁿ sá vaha sá cúú-xí-yu.

19 Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yá Ndiöxí ndihí nàcuáa ndùu sá quidè-gã dàtná cùtnuní iní nchaa dava-gá-yu, chí diu-gá dánèhé ñáhá-gã xii-yu.

20 Te ni vã ndácú-ó quíni núú-ó nãsa càa-gá, te ni vã ndácú-ó quíni-ó nãsa càa iní-gá, te ni vã ndácú-ó quíni-ó nãsa quide-gá táxi tnùnigá nchaa nduu nchaa quíú. Te cuèi ducaⁿ dico ndéé cùtnahá ní ngáva ñuyú ní ngúita nchaa ñáyíu tècú tnùnigá vaha-yu nàcuáa ndùu sá sání iní-gá ndihí nàcuáa ndùu sá quidè-gã te ducaⁿ tècú tnùnigá cuèndá nchaa sá ñí cadúha-gá ndéhè-yu ío ñuyú-a, núu xíáⁿ vã càchí-yu sá ñá túú cuèchi-yu.

21 Te cuèi ducaⁿ ní cùtnuní iní-yu cuèndá Yá Ndiöxí dico ñá túú cuíni-yu canehé-yu sá yíñuhu núú-gã nàcuáa tàú-xi cunduu. Te ni ñá túú cuíni-yu ndacáⁿ táhü-yu núú-gã cuèndá nchaa sá vaha quide ñaha-gá xii-yu, chí mee-ni nchaa sá ñá túú vèdana nàndihí ñuhu iní-yu. Te quidè-yu dàtná quidè ñⁿ ñáyíu ñá túú ndècu ndihí nchaa sá xini tnùnigá. Te uuⁿ-gá uuⁿ-gá tá quidè-yu cuáháⁿ.

22 Te càchí-yu sá cúú-yu ñáyíu ío vaha sàá sá xini tnùnigá dico ñá ndáá, chí cùu-yu ñáyíu ío ñí díquí-xi.

23 Te ñá túú cuíni-yu càháⁿ-yu sá ío càhnu cuu Yá Ndiöxí Yáá ndécú nchaa nduu nchaa quíú, chí da nchaa sá ñí cadúha mèe-yu

quide cahnú-yu. Te ní cadúha-yu nchaa sá nahá ñáyíu ñá túú cùdí ndècu ñuyú-a. Te ní cadúha-yu sá nahá quiti ndava, ndihí sá nahá quiti sàcuíta ñuhu mee-xi, ndihí sá nahá nchaa dava-gá quiti, nchaa xíáⁿ quidè càhnu-yu.

24 Te xíáⁿ núu ní dáñá Yá Ndiöxí quidè-yu nchaa sá cuèhé sá dúhá sàni iní-yu. Te xíáⁿ ío quide ndihí tnahá-yu sá cuèhé sá dúhá sàcúú-xí yiqui cuñú-yu.

25 Te ducaⁿ quidè-yu chí ñá túú sàndáá iní-yu tnúhu ndáá tnúhu Yá Ndiöxí. Te mee-ni tnúhu ndehnde sàndáá iní-yu, te nèhé-yu sá yíñuhu núú dàva sá ñí cadúha-gá ío ñuyú-a ndihí dava sá ndéé andiù te quide cahnú-yu, te ñá túú càchí-yu sá mèe-gã ío càhnu cuu-gá, dico mee-gã xini ñuhu-xi càháⁿ-yu sá ío càhnu cuu-gá ní caa ní quíhíⁿ. Te ndáá ndisa sá ío càhnu cuu-gá.

26 Te sá dúcáⁿ ñá túú quide vaha-yu núu xíáⁿ ní dáñá-ñá Yá Ndiöxí quidè-yu nchaa sá cuèhé sá dúhá sàni iní mèe-yu. Te dava ñáyíu dìhí càháⁿ ndihí tnahá-yu ndi mèe dìhí-yu te ñá túú quidè-yu nàcuáa ní nduu táhü-yu cadá-yu.

27 Te diu-ni ducaⁿ xíquide dava cue téé chí sàni cuèhé sání dùha iní-güedé sá cúú-xí yiqui cuñú-güedé ndi mèe tnaha téé-güedé, chí càháⁿ ndihí tnaha ndi mee-güedé te ñá túú quide-güedé nàcuáa ní nduu táhü-güedé cada-güedé, te sá dúcáⁿ quide-güedé te ñá túú tnàhí cùu vaha iní-güedé ndécú-güedé, te ducaⁿ tnàhí tàú-xi ndoho-güedé cundecu-güedé.

28 Te ñá túú tnàhí ñuhu iní-yu Yá Ndiöxí núu xíáⁿ duuⁿ duuⁿ ní dáñá ñihnu ñaha-gá xii-yu sàni cuèhé sání dùha iní-yu, te quidè-yu nchaa sá ñá túú tàú-yu cadá-yu.

29 Te nchaa núu sá cuèhé sá dúhá cùnuu quidè-yu. Te cue téé càháⁿ ndihí-güedé ñáyíu dìhí te ñá díú ñàdihí-güedé cúú-yu. Te diu-ni ducaⁿ xíquide cue ñáyíu dìhí chí càháⁿ ndihí-yu cue téé te ñá díú yí-yu cùu-güedé. Te mee-ni sá ñá túú vaha quidè-yu sá cúú-xí tnàha ñáyíu-yu, te xihó-yu cundecu ndihí-yu sá ndécú ndihí dava-gá tnàha ñáyíu-yu, te ío sàni cuèhé sání dùha iní-yu sá cúú-xí tnàha ñáyíu-yu, te ío cuédú iní-yu, te sàhni tnahá-yu, te ío plètú-yu, te dàndahú

tnáhã-yu, te cùu úhú iní-yu cue tnàha ñáyíu-yu, te ío yiti yùhú-yu.

³⁰ Te càháⁿ cuèhé-yu cuendá nchaa dava-gá tnàha ñáyíu-yu, te cùu úhú iní-yu Yá Ndiöxí, te xio xio cuìní-yu cunuu tnúhu-yu, te mee-ni sàni iní-yu sá ïo váha cunduú-yu, te ío quide cahnú-yu mèé-yu, te ío sàni iní-yu sá cádá ùhú-yu tnàha ñáyíu-yu, te ñá túú sàndáá iní-yu ni tãtä-yu ni nãã-yu.

³¹ Te ñá túú tècú tnùní-yu sá vãha, te ñá túú quidé-yu ìⁿ sá càháⁿ-yu, te ñá túú cùu iní-yu ni ñáyíu cùu ndi meé-yu, te ni dàva-gá tnàha ñáyíu-yu, te ñá túú quide cahnu iní-yu ìⁿ sá cúmãní nũú tnáhã-yu, te ni ñá túú cùndahú iní-yu tnàha ñáyíu-yu.

³² Te Yá Ndiöxí ní cachí-gá sá ncháá ñáyíu ducaⁿ xíquide quíhíⁿ-yu núú ùhú núú ndàhú. Te xìní-yu sá Yá Ndiöxí daquìhíⁿ ñáhã-gã xií-yu núú ùhú núú ndàhú sá dúcãⁿ quidé-yu, dico uuⁿ-gá quidẽ-yu chi váha-gá cúú iní-yu cue ñáyíu quide datná quidé mèé-yu.

2

Yá Ndiöxí cada ndáá-gá cuéchi nchaa ñáyíu ndècu ñuyíú

¹ Te nchòhó ñáyíu càchí sá ïo ndècu cuéchi dava-gá ñáyíu tnáhã-ndó ïo ndècu cuéchi-ndo cuèi nágá ñáyíu cùu-ndo, chi tnáhã-ndó quide-ni-ndo nchaa nacuaá quide dava-gá ñáyíu càchí-ndó ndècu cuéchi-xi, te sá dúcãⁿ càháⁿ-ndó sã ndécú cuèchi ñáyíu-áⁿ te dàcaa-ndo cuéchi díquí-ndó chi tnáhã-ndó quide-ndo datná quidẽ-yu.

² Te nchoo xìní-ó sã Yá Ndiöxí ío váha cùtnuní iní-gá nacuaá cada ndáá-gá cuéchi ìⁿ ìⁿ nchoo ñáyíu ndècu ñuyíú-a, chi daquìhíⁿ-gá nchaa ñáyíu quide nacuaá ní cáháⁿ-í núú ùhú núú ndàhú.

³ Te nchòhó ñáyíu ìⁿ-ni quide ndihí ñáyíu càchí mèé-ndó sã ndécú cuèchi-xi dacuítí sã ná chãhu-ndo nũú Yá Ndiöxí sá dúcãⁿ quide-ndo.

⁴ Te ñá túú cùu váha iní-ndó sã Yá Ndiöxí cùndahú iní ñáhã-gã xii-ndo, te ni ñá túú cùu váha iní-ndó sã ïo cuìní-gá cada cahnu iní-gá nchaa sá ñá túú vãha quide-ndo, te ni ñá túú quide cuendá-ndó sã Yá Ndiöxí

quidé vãha ñaha-gã xii-ndo cuendá cuìní-gá sá nchòhó ndixi túu iní-ndó sã ñá túú quide vãha-ndo ndècu-ndo.

⁵ Te nchòhó cúú-ndó ñáyíu ío sã iní-xi, chi ñá túú cuìní-ndó ndixi túu iní-ndó sã ñá túú quide vãha-ndo ndècu-ndo, te xiãⁿ nũu ío-gá tá cùu vai tnúndòho sá cúú-xi-ndó. Te na sãá nduu tnúhu ndòho tnúhu ndàhú te ío ndoho-ndo, chi Yá Ndiöxí cada ndáá-gá nacuaá nduu cuéchi-ndo.

⁶ Te dàvá-áⁿ cada ndáá Yá Ndiöxí nchaa nacuaá nduu nchaa sá ní quide ìⁿ ìⁿ ñáyíu ndècu ñuyíú-a.

⁷ Te nchaa ñáyíu nchìcúⁿ nihnu-ni quide mee-ni sá vãha, ñáyíu-áⁿ nduu táhũ-yu cundecú-yu ndihí Yá Ndiöxí ni caa ni quíhíⁿ, te ducaⁿ quide váha-yu chi cuìní-yu sá Yá Ndiöxí cuu váha iní ñáhã-gã xií-yu, te cuìní tucú-yu nduu táhũ-yu núú ïo váha càa ndecu Yá Ndiöxí cundecú-yu ni caa ni quíhíⁿ.

⁸ Te ío cùdèéⁿ-gã núú nchaa ñáyíu ñùhu iní mee-ni sã cúú-xi mèe-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quidé-yu.

⁹ Te nchaa ñáyíu ducaⁿ xíquide ío ndíhú iní-yu. Te díhna-gá ñáyíu isràél ngüíta-xi ndohó-yu, te dàtnuní ngüíta-xi ndoho nchaa ñáyíu ñá túú cùu ñáyíu isràél.

¹⁰ Te nchaa ñáyíu ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ní quide váha-yu, te ío váha cuu iní-yu cundecú-yu. Te díhna-gá ñáyíu isràél ñáyíu ní quide váha ducaⁿ càda ñaha-gá xií-yu, te dàtnuní ducaⁿ càda ñaha-gá xii ñáyíu ñá túú cùu ñáyíu isràél ñáyíu ní quide váha.

¹¹ Te ñá túú quide cuendá-gá cuèi náí ñáyíu cùú-yu.

¹² Te nchaa ñáyíu ndècu ndihí nchaa tnúhu ní chídó tnùní ndíi Moisés, Yá Ndiöxí cada ndáá-gá cuéchi-yu nacuaá càháⁿ nchaa tnúhu-áⁿ. Te nchaa ñáyíu ñá túú ndècu ndihí tnúhu ní chídó tnùní ndíi-áⁿ, Yá Ndiöxí vá cádá ndáá-gá cuéchi-yu nacuaá càháⁿ nchaa tnúhu-áⁿ. Dico nchaa ñáyíu quide nãndi sá cuèhé sá dúhá dacuítí cuíta nihnú-yu cuèi ndècu ndihí-yu tnúhu ní chídó tnùní ndíi Moisés àdi ñá túú ndècu ndihí-yu.

13 Te nchaa ñáyiú dìcò-ni sàcúndedóho nchaa tnúhu ní cáháⁿ ndíi Moisés te ñá túú tníi-yu, ñáyiú-áⁿ ñà túú cùdú-yu núú Yá Ndióxi, dico nchaa ñáyiú tníi nchaa tnúhu ní cáháⁿ ndíi, ñáyiú-áⁿ càchí Yá Ndióxi sá cùdú-yu núú-gã, chi ñá túú-gã cuéchi-yu ndècu núú-gã.

14 Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núú quidé-yu nchaa nàcuáa ní cáháⁿ ndíi te cùu-xi ñⁿ sá sání tnàhí iní méè-yu cada-yu, te sá sání iní-yu-áⁿ cúu-xi ñⁿ tnúhu váha sá sánú ichi ñaha xií-yu nàcuáa cada váha-yu cundecú-yu.

15 Te sá dúcáⁿ quidé-yu xiáⁿ cútnùní sá sání iní-yu dàtná càháⁿ tnúhu ní chídó tnùní ndíi Moisés cada ñáyiú isràél, te ío váha cùtnuní iní-yu nchaa nàcuáa quidé-yu chi ndíxi túu iní-yu òré ñá túú quide váha-yu.

16 Te sáá nduu te Yá Ndióxi cúñaha-gã xii Xítohó Jesucristú cada ndáá-gá nchaa cuéchi ñáyiú, nchaa sá sání iní méè-yu ndùu yuhu, te cada-gá dàtná càháⁿ tnúhu sá sánú ichi ñaha xii-o nàcuáa naníhí tàhú-ó, tnúhu sá dánèhé ñáhà-í xii-ndo.

Cuèndá ñáyiú isràél ndíhi cuèndá nchaa tnúhu ní chídó tnùní ndíi Moisés

17 Te nchòhó ñáyiú isràél nchaa-ndo cùu-ndo ndí mee-í, te càchí-ndó sã nchìcúⁿ nihnu-ndo quide-ndo nchaa tnúhu ní cáháⁿ ndíi Moisés núu xiáⁿ ndécú váha-ndo, te càchí-ndó sã ío càhnu cuu-ndo sá ndécú ndíhi-ndo Yá Ndióxi.

18 Te cùtnuní iní-ndó nchàa nàcuáa cùní Yá Ndióxi cada-ndo, te sá dúcáⁿ nchìcúⁿ nihnu-ndo quide-ndo nàcuáa càháⁿ tnúhu-áⁿ xiáⁿ cútnùní iní-ndó nchàa sá ío-gá váha xini ñuhu-xi cada-ndo.

19 Te càchí-ndó sã ío váha xini-ndó cànuichi-ndo nchaa ñáyiú ñá túú cùtnuní iní-xi, te càchí tucu-ndo sã ío váha xini-ndó nà canu ichi-ndo nchaa ñáyiú ndècu ichi cuehé ichi duha.

20 Te sànu ichi-ndo nchaa ñáyiú ío ñí dīquí-xi, ndíhi nchaa ñáyiú vitna ta tècú tnùní nchaa sá váha, te ducaⁿ quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-áⁿ cúu-xi tnúhu ndáá, chi sànu ichi ñaha-xi xii-ndo nàcuáa cada-ndo.

21 Te nchòhó dàcuaha-ndo ñáyiú nàcuáa cada-yu, te mee-ndo ñà túú dàcuaha-ndo cada-ndo nchaa nàcuáa tàú-xi cunduu, te xãháⁿ-ndo xií-yu sá vã cúú dùhú-yu te mee-ndo dùhu-ndo.

22 Te dàcuaha-ndó-yu sá cuè téé vá cúú cãháⁿ ndíhi-güedé ñáyiú dīhí te núu ñá díú ñàdīhí-güedé cúu-yu, te ducaⁿ-ni cuè ñáyiú dīhí, vá cúú cãháⁿ ndíhi-yu téé te núu ñá díú yíi-yu cùu-güedé. Te nchaa sá xãháⁿ-ndo vã cúú càda ñáyiú te mee-ndo quide-ni-ndo, te xãháⁿ-ndo xií-yu sá vã cànèhé-yu sá yíñùhu núú nchàa sá càchí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñùhu.

23 Te càchí-ndó sã ío cùnuu nchaa tnúhu ní chídó tnùní ndíi Moisés, te ñá túú quide-ndo nchaa nàcuáa ní cáháⁿ ndíi, te sá dúcáⁿ quide-ndo-áⁿ te dàquee tíhú-ndó Yá Ndióxi.

24 Te quèe ndáá-xi nàcuáa càháⁿ-xi núú tütú Yá Ndióxi nàcuáa quide-ndo-áⁿ núú càchí-xi sá nchàá ñáyiú ñá túú cùu ñáyiú isràél càháⁿ cuèhé-yu cuèndá Yá Ndióxi sá cuèndá-ndó.

25 Te nchòhó ñáyiú isràél nchaa-ndo cùu-ndo ndí mee-í, te tnàhá-ndó ndècu ndíhi-ndo seña ñíi-ndo, te váha-ni sá dúcáⁿ te núu quide-ndo nchaa nàcuáa ní cáháⁿ ndíi Moisés. Dico núu ñá túú quide-ndo nchaa nàcuáa ní cáháⁿ ndíi ña, te ñá túú nàndíhi-xi sá cúú-ndó ñáyiú isràél cuèi ndècu seña ñíi-ndo.

26 Te nchaa ñáyiú ñá túú ndècu ndíhi seña ñíi-xi, te núu quidé-yu nchaa nàcuáa ní cáháⁿ ndíi Moisés, te cùu-yu dàtná cue ñáyiú ndècu ndíhi seña ñíi-xi, chi quidé-yu nchaa nàcuáa ní cáháⁿ ndíi.

27 Te ñáyiú ñá túú ndècu ndíhi seña ñíi-xi, te núu na càdá-yu nchaa nàcuáa ní cáháⁿ ndíi Moisés, te ñáyiú-áⁿ cachí-yu sá ñá túú quide ndáá nchaa nchòhó ñáyiú ndècu ndíhi seña ñíi-xi, chi ndècu ndíhi-ndo nchaa tnúhu ní chídó tnùní ndíi te ñá túú quide-ndo nàcuáa càháⁿ tnúhu-áⁿ.

28 Te nchòhó ñáyiú isràél, ñáyiú nchìcúⁿ nihnu-ni quide nchaa nàcuáa ta quide tnahi-ndo véxi, ñá túú quide-ndo sá cúú-ndó ñáyiú isràél, te mee-ndo ndècu seña ñíi-ndo dico ñá túú quide-ndo nàcuáa tàú-xi cada nchaa ñáyiú ndècu seña ñíi-xi, te mee-ni seña-áⁿ sãha-ndo ñíi-ndo te ñá

túu quide-ndo nacuaá cuení Yă Ndiöxí cada-ndo.

²⁹ Te nchaa ñáyiú sàndáá ndisa iní-xi Yă Ndiöxí, ñáyiú-án cúu ndisá-yu ñáyiú isràél, te sa ní nduu ndoo ní nduu nine iní-yu chi Espíritú Yă Ndiöxí ducaⁿ nĩ quide-xi, dico ñá díú sã sãha-yu sèñá ñí-yu dàtná ní cachí ndíi Moisés. Te ñáyiú-án cúu vãha iní ñáhá Yă Ndiöxí xií-yu cuèi ñá túu càháⁿ váha tnàha ñáyiú-yu cuèndá-yu.

3

¹ Te sá dúhá càháⁿ-í te ió dava ñáyiú quesàhá-yu sá ñí-ní cùu ñáyiú ñá túu cùu ñáyiú isràél ndihì nchoo ñáyiú isràél, te quesaha tùcú-yu sá ñí-ní quide tucu-xi cuèi na cuãha àdi vá cuãha sèñá ñí-yu.

² Dico yúhú càchí-í sá ncháá ñáyiú isràél ió-gá cùnùú-yu, chi ió tít ní núú sã vãha ní quide ñaha Yă Ndiöxí xií-yu, chi ní sãñaha-gã tnúhu-gã ndécú ndihí-yu.

³ Te davá-yu ñá túu cuení-yu cada ndáá-yu, dico ñá díú sã xĩãⁿ te cùyica iní Yă Ndiöxí ñá túu quide ndáá-gá.

⁴ Dico ñáhá chi xini ñuhu-xi sá ncháá ñáyiú cada cuèndá-yu sá Yă Ndiöxí cúu-gã Yaá quidé ndáá cuíti, te cuèi ncháá-yu na càchí-yu sá ñà túu quide ndáá-gá, dico mee-gã chi quide ndáá-ni-gá. Te núu tùtú-gá càháⁿ-xi nàcuáa ní xáhaⁿ ñí tée ní xĩndecu ndéé sanaha xii-gá, te duha ní xáhaⁿ-dë:

Yòhó Dútú Ndiöxí, cùtnuní iní ñáyiú sá ño ndáá càháⁿ-n,

te cùnuu nahi-ni tnúhu-n cuèi òré càchí ñáyiú sá ñà túu càháⁿ ndáá-n.

Duha ní xáhaⁿ tée ndéé sanaha-ãⁿ xii-gá càchí-xi núu tùtú-gá.

⁵ Te cuèndá nchaa sá cuèhé sá dúhá quide ñáyiú, xiãⁿ cùtnuní iní-yu sá Yă Ndiöxí cúu-gã Yaá ió váha quide ndáá, chi mee-gã ñá túu dùcaⁿ quide-gá. Te cuèi ducaⁿ dico vá cáni iní-yu sá Yă Ndiöxí ñá túu quide ndáá-gá sá dándòho ñaha-gá xií-yu na sàá nduu, te núu ducaⁿ na càni iní-yu, te sàni iní-yu dàtná sání iní cue ñáyiú ñá túu ndècu ichi-gá.

⁶ Te vá dúcáⁿ càni iní-yu, chi núu Yă Ndiöxí ñá túu quide ndáá-gá ñá, te vá

cúu càda ndáá-gá nchaa cuèchi cue ñáyiú ñuyíú-a te núu ducaⁿ.

⁷ Te núu yúhú ná càni iní-í càháⁿ-í ñí tnúhu ndehnde, te sá tnúhu-áⁿ te cani tucu iní-í sá quidé càhnu-gá-í tnúhu ndáá tnúhu Yă Ndiöxí, te sá dúcáⁿ ná càháⁿ-í te cani tucu iní-í sá vã cúu càháⁿ Yă Ndiöxí sá ndécú cuèchi-í.

⁸ Te núu na càni tucu iní-í sá vãha-gá cada-í nchaa sá cuèhé sá dúhá cuèndá Yă Ndiöxí cada-gá sá vãha, dico ñá ndáá. Te ió ñáyiú càháⁿ cuèhé cuèndá-í te càchí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dānehé-í-yu, te ñáyiú-án nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyíú-a ndècuèchi-yu

⁹ Te vitna càchí dava ñáyiú sá ño-gá cùnùu nchoo cue ñáyiú isràél dàcúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sã nchaa ñáyiú ndècuèchi-yu cuèi ñáyiú isràél te cuèi ñáyiú ñá túu cùu ñáyiú isràél.

¹⁰ Te núu tùtú Yă Ndiöxí càchí-xi: Vá yõ ñí quide ndáá,

¹¹ te ni vá yõ ñí təcú tnùní tnúhu váha, te ni vá yõ ñí nānducu nihnu Yă Ndiöxí.

¹² Chi ncháá-yu ñá túu nchìcúⁿ nihnú-yu ichi váha, te ncháá-yu cùu-yu ñáyiú xĩndecu neñùú sá cúu-xi Yă Ndiöxí.

Te ni ñí-yu ñá túu quidé-yu ñí sá vãha.

¹³ Te cada iní-ndó sã yúhú-yu cùu-xi datná cúu ñí yaú núu yĩndüxi ndíyi núu ño ndehe sàháⁿ,

te ducaⁿ sãtnahá-xi cùu yuhú-yu, chi ió càháⁿ cuèhé-yu, te mee-ni dāndahú-yu nchaa tnàha ñáyiú-yu.

Te cada iní-ndó sã vènenú cóo yíhí yùhú-yu chi mee-ni càháⁿ úhú-yu cuèndá tnàha ñáyiú-yu.

¹⁴ Te ió iní-yu càháⁿ úhú tnáhã-yu.

¹⁵ Te àúⁿ nã cuu àúⁿ nã xiãⁿ xĩsahni tnàhá-yu.

¹⁶ Te nchaa núu xicá cùu-yu quide úhú iní-yu nchaa tnàha ñáyiú-yu nàcuáa ndihú iní ñáyiú-án.

¹⁷ Te ñá túu cuení-yu cundecu ndihì tnàha váha-yu.

¹⁸ Te ñá túu sàni iní-yu canehé-yu sá yĩñùhu núu Yă Ndiöxí.

Duha quidé-yu càchí-xi núú tütú-gá.

¹⁹ Te cùtnuní iní-ó sã nchàa tnúhu ní chídó tnùní ndíi Moisés cúú-xí cuendá nchaa ñáyiú nchícúⁿ nihnu nchaa tnúhu-áⁿ. Te tnúhu-áⁿ cúú-xí cuendá sá vã yõo tnàhí cachí sá ñà túú cuèchi-xi, te ducaⁿ te nchaandi túhú ñáyiú cutnùní iní-yu sá ná chãhu-yu nchaa sá quidé-yu núú Yã Ndiõxí.

²⁰ Te ducaⁿ càda-xi chi ni ìⁿ ñáyiú vã càchí-ó sã vã cùndècu cuéchi-yu núú Yã Ndiõxí cuendá-ni sá nchícúⁿ nihnú-yu nchaa tnúhu sá ñi chídó tnùní ndíi Moisés, te tnúhu-áⁿ càchí tnúhu-xi cuendá-ni sá cùtnuní iní-ó sã ndécú-ó ìchi cuehé ìchi duha.

Te núu na quindáá iní-ó Xítoho Jesucristú te naníhí tàhú-ó

²¹ Te vitna ní cutnùní iní-ó sã ñà díú sã cáda-ó nchàa nacuáa ní cáháⁿ ndíi Moisés cudíu-o núú Yã Ndiõxí, chi mee-gã quidé cùdú-o núú-gã. Te núú tütú ndíi Moisés ndíi núú tütú cue téé ní xóo cáháⁿ tnúhu Yã Ndiõxí ndéé sanaha càháⁿ-xi nacuáa cada ñaha-gã xii-o vitna.

²² Te ducaⁿ cùdú-o núú Yã Ndiõxí te núu na quindáá iní-ó Xítoho Jesucristú. Te dñu-ni ducaⁿ cùdú nchaa ñáyiú ñuyú te núu na quindáá iní ñáhã-yu xii-gá, chi ìⁿ-ni cùu-o nchaa-o sá cúú-xí Yã Ndiõxí.

²³ Chi ncháa-yu ndècu cuéchi-yu, chi ñà ìⁿ-yu quidé-yu nacuáa cáháⁿ Yã Ndiõxí sá cúú-yu ñáyiú quide váha.

²⁴ Dico Yã Ndiõxí ío váha iní-gá chi ní quide ñaha-gã xii-o ìⁿ sá vãha, chi dicó-ni ducaⁿ ñi quide-gã nacuáa vã cùndècu-gã cuéchi-o núú-gã, chi Xítoho Jesucristú ní sati níñí-gã te ní xíhí-gá, te ducaⁿ ñi yáha-gã cuendá sá vã cùndècu-gã cuéchi-o.

²⁵ Te Yã Ndiõxí ní taxi ndècu-gã Xítoho Jesucristú núú ñáyiú ñuyú-a, te ní xíhí-gá sá cuendá nchaa yíca cuéchi-yu, te ducaⁿ ñi cuu cuendá sá ncháa ñáyiú na quindáá iní ñáhã xii-gá te vã náchãhu-yu cuéchi-yu núú Yã Ndiõxí. Te Yã Ndiõxí ní quide ndee ìní-gá nchaa sá cuéhé sá dúhá ñi quide cue ñáyiú ní xíndecu ndéé sanaha. Te xíãⁿ ní xíhí Xítoho Jesucristú cuendá cutnùní iní-ó sã Yã Ndiõxí cúú-gã Yaá ío váha quide ndáá cuèi ducaⁿ ñi quide ndee ìní-gá nchaa sá ñi quide cue ñáyiú-áⁿ.

²⁶ Núu xíãⁿ vitna ní cutnùní ndisa iní-ó sã quidé ndáá-gá, te quide-gã sá cuè ñáyiú vã cùndècu-gã cuéchi-yu núú-gã, te núu na quindáá iní-yu Xítoho Jesucristú.

²⁷ Te vitna vã càchí-ó sã ío càhnu cuu-o cuendá sá ñà túú-gã cuéchi-o ndècu núú Yã Ndiõxí, te ducaⁿ ñà túú-gã cuéchi-o ndècu núú-gã cuendá sá sàndáá iní-ó Xítoho Jesucristú, te ñà díú sã cuendá nchaa tnúhu ní cáháⁿ ndíi Moisés.

²⁸ Te cùtnuní iní-ó sã ndèda-ni càa ñáyiú vã cùndècu-gã cuéchi-yu núú Yã Ndiõxí te núu na quindáá iní-yu Xítoho Jesucristú cuèi ní quidé-yu nchaa nacuáa ní cáháⁿ ndíi Moisés àdi ñà túú ní quidé-yu.

²⁹ Te cùtnuní iní-ó sã Yã Ndiõxí cúú-gã Ndiõxí nchaandi túhú ñáyiú, te ñà díú mèe-ni Ndiõxí ñáyiú isràel cúú-gã.

³⁰ Te ìⁿdíi díí-gã cúú-gã Ndiõxí, te nchaa ñáyiú sàndáá iní ñáhã xii Xítoho Jesucristú te vã cùndècu-gã cuéchi-yu núú Yã Ndiõxí cuèi cùu-yu ñáyiú isràel àdi ñà túú cùu-yu.

³¹ Te ñà díú sã sàndáá iní-ó Xítoho Jesucristú te cachí-ó sã ñà túú nàndíhi nchaa tnúhu sá sánú ìchi ñaha xii-o nacuáa cada-o, te ñáhã chi sá dúhá sàndáá iní-ó-gã te xíãⁿ nchícúⁿ nihnu-o quide-o nacuáa cáháⁿ tnúhu-áⁿ.

4

Cuendá ndíi Àbrahám

¹ Te vitna na càchí tnúhu-í xii-ndo cuendá ndíi Àbrahám téé ní cuu ñaní tnáhã-ó ñi xíndecu ndéé sanaha.

² Te ndíi-áⁿ ñà túú ní xíndecu cuéchi ndíi núú Yã Ndiõxí, dico ñà díú cuendá ìⁿ chiuⁿ ní quide ndíi ducaⁿ ñà túú ní xíndecu cuéchi ndíi núú-gã. Chi núu cuendá ìⁿ chiuⁿ ní quide ndíi ducaⁿ ñà túú ní xíndecu cuéchi ndíi núú Yã Ndiõxí ñà, te cada càhnu ndíi mee ndíi ni cùu, dico ñà díú núú Yã Ndiõxí cada càhnu ndíi mee ndíi te núu ducaⁿ ñi quide ndíi.

³ Te chí dándàcu iní nacuáa càháⁿ-xi núú tütú Yã Ndiõxí núú càchí-xi: “Té Àbrahám ní sàndáá iní-dé Yã Ndiõxí, te xíãⁿ ní cachí-gá sá cùdú-dé núú-gã”, duha càchí-xi núú tütú-gá.

⁴ Te sá cùhúⁿ yãhu ìⁿ téé quide chiuⁿ, te vã càchí-ó sã xíãⁿ cúú-xí ìⁿ táhú sã cúú-xí-dé chí yáhu tnàhí-dé cúú-xí.

5 Te vá yõo ìⁿ ndàcu cada ìⁿ chiuⁿ nacuáa cudìu-xi núú Yá Ndiõxí. Te ñá túú nã chiuⁿ xini ñuhu-xi cada ñáyiu te cudìu-yu núú-gã, chi xini ñuhu-ni-xi sá quindáá-ni iní-yu-gá. Te ñu-gá càchí-gá sá ñáyiu ndècu ichi cuehé ichi duha vá cùndècu-gá cuéchi-yu núú-gã, te núu na quindáá iní ñáhã-yu xii-gá.

6 Te ñu-ni ducaⁿ ñí cáháⁿ ndíi Dàvíí, chi ní cachí ndíi sá ìo váha táhú nchaa ñáyiu ní cachí Yá Ndiõxí cudìu núú-gã, dico ñá díú cuendá ìⁿ chiúⁿ quidé-yu cudìu-yu núú-gã.

7 Te duha ní cachí ndíi:

Váha táhú nchaa ñáyiu quide cahnu iní Yá Ndiõxí nchaa cuéchi-xi, te ñá túú-gã quidé cuendá-gá nchaa sá cuéhé sá dúhá ñí quidé-yu.

8 Váha táhú-yu chi Yá Ndiõxí càchí-gá sá ñá túú-gã cuéchi-yu. Duha ní cachí ndíi Dàvíí.

9 Te ñá díú mèe-ni ñáyiu ngündecu seña ñí-xi ducaⁿ váha táhú-yu, chi tnáhá ñáyiu ñá túú ngündecu seña ñí-xi ducaⁿ váha táhú-yu. Te sa nàha-o sá Yá Ndiõxí ní cachí-gá sá cúdiu ndíi Àbrahám núú-gã cuendá sá ni sàndáá iní ñáhá ndíi xii-gá.

10 Te cunaha-ndo sã ñíhna-gá ní cachí Yá Ndiõxí sá cúdiu ndíi Àbrahám núú-gã te dàtnúni ngündecu seña ñí ndíi.

11 Te ní ngündecu seña ñí ndíi cuendá xíãⁿ cuu-xi ìⁿ seña sá cúdiu ndíi núú Yá Ndiõxí. Te ndéé cútnáhá vátá ngündecu-gá seña ñí ndíi, te sa cúdiu ndíi núú-gã chi ní sàndáá iní ñáhá ndíi xii-gá. Te sá dúcáⁿ ñá túú ndècu seña ñí ndíi cútnáhá ní sàndáá iní ndíi Yá Ndiõxí xíãⁿ ní cuu ndíi dàtná ìⁿ díhí dütú nchaa ñáyiu sàndáá iní ñáhá xii-gá, ñáyiu ñá túú ní ngündecu seña ñí-xi, te cudìu-yu núú-gã.

12 Te ndíi Àbrahám ní cuu tucu ndíi dàtná ìⁿ díhí dütú nchaa ñáyiu ní ngündecu seña ñí-xi, dico ñá díú cuendá-ni sá ñí ngündecu seña ñí-yu cuu ndíi díhí dütú-yu, chi cuendá sá sàndáá iní-yu Yá Ndiõxí nchìcúⁿ nihnú-yu nàcuáa ní quide ndíi ní sàndáá iní ñáhá ndíi xii-gá ndéé cútnáhá vátá ngündecu-gá seña ñí ndíi.

Yá Ndiõxí cada-gá nchaa nàcuáa ní cachí-gá te núu na quindáá iní-ó-gã

13 Te Yá Ndiõxí ní xáhaⁿ-gã xii ndíi Àbrahám sá ndúú táhú ndíi cunuu ndíi ñuyíú, ndíhí cue déhe ndíi, ndíhí nchaa dava-gá cue ñaní tnáhá ndíi vitna cacu túu. Te ducaⁿ ñí xáhaⁿ Yá Ndiõxí xii ndíi ndíhí cue ñaní tnáhá ndíi, chi ní sàndáá iní ñáhá ndíi xii-gá núu xíãⁿ ní cudìu ndíi núú-gã. Te ducaⁿ ñí xáhaⁿ-gã xii ndíi dico ñá díú cuendá sá ñí quide ndíi nàcuáa ní xáhaⁿ Yá Ndiõxí xii ndíi Moisés cada ñáyiu ndéé cuéé-gá.

14 Te núu mee-ni ñáyiu nchìcúⁿ nihnu quide nacuáa ní cáháⁿ ndíi Moisés ní ndúu táhú-yu cunúu-yu ñuyíú-a ní cuu ña, te ñá túú xini ñuhu-xi quindáá iní-ó Yá Ndiõxí, te ñá túú nàndíhí tnúhu ní xáhaⁿ Yá Ndiõxí xii ndíi Àbrahám ní cuu te núu ducaⁿ.

15 Te núu ìⁿ ñáyiu ñá túú quide nacuáa càháⁿ tnúhu sá sánú ìchi ñaha xii-o nacuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ní cuu ña, te ñá túú cuéchi-o ní cuu.

16 Te ducaⁿ ñí xáhaⁿ Yá Ndiõxí xii ndíi Àbrahám nàcuáa cada-gá, chi cuendá sá ní sàndáá iní ñáhá ndíi xii-gá. Te ducaⁿ ñí quide-gá chi ìo váha iní-gá, dico ñá díú sã ìⁿ chiuⁿ ní quide ndíi ducaⁿ ñí xáhaⁿ-gã. Te sá dúcáⁿ ñí cuu te cuu-xi ìⁿ tnúhu ndáá sá cúú-xí nchaa ñaní tnáhá ndíi, ñáyiu sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñaní tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ìⁿ díhí dütú cue ñáyiu sàndáá iní ñáhá xii Yá Ndiõxí.

17 Te núu tütú Yá Ndiõxí càháⁿ-xi nàcuáa ní xáhaⁿ-gã xii ndíi, te duha ní xáhaⁿ-gã: “Yòhó té Àbrahám ní quide ñaha-í xii-n dàtná ìⁿ díhí dütú cue ñáyiu xíndecu nihí ñuyíú.” Duha ní xáhaⁿ Yá Ndiõxí xii ndíi, càchí-xi núu tütú-gá. Te Yá Ndiõxí náhá ndáá-gá sá cadá-xí nàcuáa ní xáhaⁿ-gã xii ndíi Àbrahám, te ñu-ni-gá cúú Yàá ní sàndáá iní ndíi, te ñu-ni-gá dándòto-gá ñáyiu ní xíhí, te ñu-ni-gá quidé tá ngündecu nchaa sá vátá cùndècu-gá ñuyíú-a.

18 Te Yá Ndiõxí ní xáhaⁿ-gã xii ndíi Àbrahám sá ìo cuéhé dèhe ndíi coo, te ìo ní sàndáá iní ndíi nàcuáa ní xáhaⁿ-gã dico ñá

túú ní cùtnuní iní ndíi nása cada-gá, chi ío ní sahnú ndíi. Te cuendá sá dúcáⁿ ío ní sándáá iní ndíi tnúhu ní xáhaⁿ-gã nõu xiãⁿ ní cuu ndíi díhí dùtú vai ñáyiú xĩndecu nihíi ñuyúú.

19 Te ndíi Àbrahám ñúhu ndíi ñⁿ cièndú cuíá cùtnàhá ducaⁿ ñí xáhaⁿ Yá Ndiõxí xii ndíi, te ní cutnùní iní ndíi sá ñà túú tãhú ndíi sá cóó dẽhe ndíi ndíhi ñadíhí ndíi ndíi Sãrá, chi ndíi ndúú-yu sa ní sahnú vihí-yu, te cuẽi ducaⁿ dico ní sándáá-ni iní ndíi nàcuáa ní xáhaⁿ Yá Ndiõxí.

20 Te ñá túú ní sàni ñⁿ sani úú iní ndíi nàcuáa ní xáhaⁿ Yá Ndiõxí cada-gá sá cúú-xí ndíi, chi da uuⁿ-gá váha ní sándáá iní ndíi nàcuáa ní xáhaⁿ-gã, te ní cachí ndíi sá ío cãhnú cuu-gá.

21 Te ní cutnùní ndáá iní ndíi sá Yá Ndiõxí ndácú-gã quidé-gã nchaa sá cãháⁿ-gã.

22 Te sá ní sándáá iní ndíi nàcuáa ní cáhãⁿ Yá Ndiõxí, nõu xiãⁿ ní cachí-gá sá cúú ndíi ñⁿ tée ñá túú cuẽchi-xi núú-gã.

23 Te ní ngódó tnùní núú tütú Yá Ndiõxí cuendá ndíi Àbrahám sá ñí cachí-gá sá ñà túú cuẽchi ndíi núú-gã, te ñá díú-ní cuendá mée ndíi ni ngódó tnùní núú tütú-gã.

24 Chi tnàhá cuendá-ó nchaa-o ní ngódó tnùní núú tütú-gã. Te cãhí-gá sá ñà túú cuẽchi-o nõu-gã chi sándáá iní-ó-gã, te diu-gá cúú-gã Yaá ní dándótó ñàha xii Xítohó Jesucristú Yaá cúú Xítohó-ó.

25 Te Yá Ndiõxí ní cachí-gá sá díú Xítohó Jesucristú cuú-gá cuendá nacháhu-gá nchaa cuẽchi-o. Te ní xihí-gá te ní ndoto-gá cuendá nchaa-o vã cùndecu-gá cuẽchi-o nõú Yá Ndiõxí te nõu na quèndáá iní-ó-gã.

5

Ío váha tnàhá ñáyiú cãhí Yá Ndiõxí sá ñà túú cuẽchi-xi

1 Te vitna, ñá túú-gã cuẽchi-o ndècu núú Yá Ndiõxí chi sándáá iní-ó Xítohó Jesucristú, te ío váha ndècu ndíhi-o Yá Ndiõxí vitna sá cuendá Xítohó Jesucristú.

2 Te cuendá sá ní sándáá iní-ó Xítohó Jesucristú xiãⁿ diu-gá ní quide ní ngündecu váha-o nõú Yá Ndiõxí, te ducaⁿ-ni cùndecu-o, te ío cùdíí iní-ó chi ndècu ndíhi-o tnúhu ndee iní sá sáá nduu ngündecu-o nõú ío váha cãa ndecu Yá Ndiõxí.

3 Te ñá díú-ní sã cuendá sá ndúú tãhú-ó cùndecu-o núú ndécú-gã cùdíí iní-ó, chi cùdíí

iní-ó ndòho-o cuendá-gá, chi cùtnuní iní-ó sã nõu na ndòho-o cuendá-gá te cunduu cãhnú-gá iní-ó,

4 te nõu cùu-o ñáyiú ta quide cahnu-gá iní-xi te cùtnuní sá cúú-ó ñáyiú quide váha, te nõu cùu-o ñáyiú quide váha te uuⁿ-gá tá ngündecu ndíhi-o tnúhu ndee iní cuáhãⁿ sá cáda váha ñàha Yá Ndiõxí xii-o.

5 Te nõu ducaⁿ te vá ííⁿ ndúu ndixi cuẽchi iní-ó sã ndécú ndíhi-o tnúhu ndee iní ngündecu váha-o. Te Espiritú sá ní taxi Yá Ndiõxí ndécú ndíhi-o xiãⁿ quidé-xi cùtnuní iní-ó sã ío cùu iní ñáhã Yá Ndiõxí xii-o.

6 Te nchoo ñà túú vèdana ná ní ndàcu-o cada-o cuendá dàcácu nihnu-o mée-o, dico Xítohó Jesucristú ní xihí-gá cuendá-ó, ndíhi cuendá nchaa dava-gã ñáyiú ñá túú tnàhá tnúhu ndíhi Yá Ndiõxí, te ní xihí-gá mei ndúu taú-xi cuú-gã.

7 Te cudana-ni nõu xihí ñⁿ ñáyiú sá cuendá ñⁿ ñáyiú quide ndáá, te áma xihí tucu ñⁿ-yu sá cuendá ñáyiú quide váha tnàha ñáyiú-xi.

8 Te Yá Ndiõxí ní quide-gá sá nchóo cùtnuní iní-ó sã ío cùu iní ñáhã-gã xii-o, chi cùtnàhá ndécú-ó ìchi cuehé ichi duha te ní tendaha-gã Xítohó Jesucristú ní quixi-gã ñuyúú-a ní xihí-gá cuendá-ó.

9 Te sá cuendá sá ñí xihí Xítohó Jesucristú xiãⁿ ñá túú-gã cuẽchi-o ndècu núú Yá Ndiõxí, te vitna ní cutnùní ndáá iní-ó sã vã dáquihíⁿ ñáhã-gã Yá Ndiõxí xii-o nõú ùhú núú ndàhú sá cuendá Xítohó Jesucristú.

10 Te cùtnàhá ñá túú tnàhá tnúhu-o ndíhi Yá Ndiõxí ní cùu ní xihí Xítohó Jesucristú Yaá cúú Dẽhe-gã cuendá cuu váha iní ñáhã-gã xii-o, te ducaⁿ te nduu tãhú-ó cùndecu-o ndíhi-gá ñí caa ñí quihíⁿ cuendá sá ñí ndoto Xítohó Jesucristú.

11 Te ndètu-o sáá nduu ngündecu-o ndíhi-gá ñí caa ñí quihíⁿ, te ñá díú-ní xiãⁿ quidé-ó chi tnàhá cùdíí iní-ó Yá Ndiõxí, chi Xítohó Jesucristú ní quide-gá ducaⁿ cùdíí iní-ó-gã, te diu-ni Xítohó Jesucristú ní quide-gá ní nucùndecu váha-o ndíhi Yá Ndiõxí.

Nàcuáa ní quide ndíi Àdán ndíhi nàcuáa ní quide Xítohó Jesucristú

12 Te ndíi Àdán ñá túú ní quide ndáá ndíi núú Yá Ndiõxí nõu xiãⁿ ní ngündecu nchaa

sá cuèhé sá dúhá ñùyíú-a, te sá cuèndá nchaa sá cuèhé sá dúhá quide ñáyíu xiǎⁿ xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá.

13 Te sa quide-gá-yu nchaa sá cuèhé sá dúhá te dātnùní ní ngúndecu nchaa tnúhu sá ñí chídó tnùní ndíi Moisés nācuáa ní xáhaⁿ Yá Ndiǒxí cada ñáyíu, te nchoo cùtnuní iní-ó sá núu ñá túú tnúhu sá sánú ìchi ñaha xii-o nācuáa cada-o, te ñá túú cuèchi-o sànuu.

14 Te ndéé cùtnàhá ní xíndecu ndíi Adán ní quesaha-xi xihí ñáyíu, te ducaⁿ-ni xihí-yu ndéé ní sáá nduu ñí xíndecu ndíi Moisés. Te ducaⁿ ñí xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nācuáa ní quide ndíi Adán, chi ndíi-áⁿ ñà túú ní sàndáá iní ndíi nācuáa ní xáhaⁿ Yá Ndiǒxí cada ndíi. Te ndíi Adán ní cuu ndíi ìⁿ téé cùu cahnu ní xíndecu ñuyíú-a, te sá tá dúcáⁿ te ní quixi Xítohó Jesucristú te Yaá-áⁿ ìo-gá càhnu cuu-gá.

15 Te sá ñí quide ndíi Adán te vá càchí-ó sá ìⁿ-ní cùu-xi ndíi sá ñí cachí Yá Ndiǒxí nduu táhú-ó vitna. Te sá ñà túú ní quide ndáá ndíi xiǎⁿ nchaa ñáyíu xihí-yu, dico Yá Ndiǒxí ío váha iní-gá chi ío váha ní quide-gá sá cúu-xí nchaa nchoo ñáyíu ndècu ñuyíú-a, chi dicó ducaⁿ ñí cachí-gá sá nánìhí tàhú-ó, te ìⁿdii-ni téé tnàhá-dé ío váha ní quide-dé sá cúu-xí-ó, te téé-áⁿ cúu-dé Xítohó Jesucristú.

16 Te sá ñí quide ìⁿdii-ni ndíi Adán ñá túú ìⁿ-ni cuu-xi ndíi sá ñí quide Yá Ndiǒxí sá cúu-xí-ó, chi ndíi-áⁿ ñà túú ní quide ndáá ndíi núu-gă. Te sá dúcáⁿ ñí quide ndíi te xiǎⁿ ní cuu-xi cuèchi díhna nuu ñí quide ndíi, núu xiǎⁿ ní cachí Yá Ndiǒxí sá cuè ñáyíu quíhíⁿ-yu núu ùhú núu ndàhú nacháhu-yu nchaa sá cuèhé sá dúhá quidé-yu. Dico mee-gă ní quide sá cuè ñáyíu naníhí tàhú-yu dicó-ni ducaⁿ, te ducaⁿ te vá cùndècu-gá cuèchi-yu núu-gă cuèi ío vâi cuèchi-yu.

17 Te sá dúcáⁿ ñà túú ní quide ndáá ìⁿdii-ni ndíi Adán-áⁿ núu Yá Ndiǒxí, xiǎⁿ ní quide-xi xihí nchaa ñáyíu. Te sá cuèndá sá ñí quide ìⁿdii-ni Xítohó Jesucristú xiǎⁿ ío váha ní quide ñaha Yá Ndiǒxí xii ñáyíu, chi dicó-ni ducaⁿ ñí nduu táhú-yu cùdiú-yu núu-gă. Te nchaa ñáyíu ducaⁿ cùdiú núu-gă

nduu táhú-yu cunúú-yu ndíi Xítohó Jesucristú cuèndá sá ñí quide-gá sá vâha sá cúu-xí-yu.

18 Te sá dúcáⁿ ñí quide ndíi Adán ñá túú ní quide ndíi nācuáa ní xáhaⁿ Yá Ndiǒxí xii ndíi ìⁿ xito, núu xiǎⁿ ní cachí-gá sá ncháá ñáyíu tàú-yu nacháhu-yu nchaa cuèchi-yu, dico Xítohó Jesucristú ní quide-gá ìⁿ sá vâha cuèndá nchaa ñáyíu vá cùndècu-gá cuèchi-yu núu Yá Ndiǒxí te núu na quèndáá iní ñáhă-yu xii-gá, te ducaⁿ te cundecú-yu ndíi-gá ñi caa ñi quíhíⁿ.

19 Te sá ñà túú ní sàndáá iní ìⁿdii-ni ndíi Adán nācuáa ní xáhaⁿ Yá Ndiǒxí xii ndíi, xiǎⁿ ní nguínchicúⁿ nihnu nchaa ñáyíu quidé-yu nchaa sá cuèhé sá dúhá. Te ducaⁿ ìⁿdii-ni Xítohó Jesucristú ní quide-gá nācuáa ní xáhaⁿ Yá Ndiǒxí cuèndá sá Yá Ndiǒxí cachí-gá sá cúu-yu núu-gă.

20 Te Yá Ndiǒxí ní xáhaⁿ-gă xii ndíi Moisés nācuáa cada ñáyíu, te sá cuèndá tnúhu-áⁿ uuⁿ-gă ní nguíta nchaa ñáyíu quidé-yu nchaa sá cuèhé sá dúhá, te Yá Ndiǒxí uuⁿ-gă cùndàhú iní ñáhă-gă xii-yu tucu.

21 Te sá cuèndá nchaa cuèchi ñáyíu xiǎⁿ xihí-yu, dico Yá Ndiǒxí ío váha iní-gá chi diu-gá ní cachí-gá sá ncháá ñáyíu na tnàhá tnúhu ndíi ñaha xì-gá cùdiú-yu núu-gă, te cundecú-yu ndíi-gá ñi caa ñi quíhíⁿ, te ducaⁿ chi Xítohó Jesucristú ní quide-gá sá vâha sá cúu-xí-yu.

6

Ñáyíu ñá túú-gă ndécú ìchi cuèhé ichi duha ndécú-yu cuèndá Xítohó Jesucristú

1 Te sá dúcáⁿ quide Yá Ndiǒxí, te vá cání iní-ó cànchicúⁿ nihnu-ni-o ìchi cuèhé ichi duha, chi ñá díú sá cànchicúⁿ nihnu-o ìchi-áⁿ te ngóo cání iní-ó sá ìo-gá cundàhú iní ñáhă-gă xii-o.

2 Te vá cúu cànchicúⁿ nihnu-o ìchi cuèhé ichi duha, chi nchoo cùu-o datná cue ñáyíu sa ní xihí, núu xiǎⁿ vá cúu-gă canchicúⁿ nihnu-o ìchi-áⁿ.

3 Te sa nàha-o sá cuèndá sá ñí sandute-o quèe-xi sá tnàhá tnúhu-o ndíi Xítohó Jesucristú. Te sá ñí sandute-o quèe tucu-xi sá cúu-ó dàtná ñáyíu ní xihí ndíi-gă.

4 Te ñá díú-ní sã ní xíhí-ó ndíhi-gá chi quèe tucu-xi sá ní nguíndũxi-o ndíhi-gá te ní ndoto-o dàtná ní ndoto mee-gã ní dándótó ñàha Dútú Ndiõxí Yaá ío càhnu cuu, te ducaⁿ ní cuu cuèndá sá vã cùndècu-gá-ó dàtná ní xíndècu-o.

5 Te núu ìⁿ-ni cùu-o ndíhi Xítóhó Jesucristú cuèndá sá cúú-ó dàtná ñáyiu ní xíhí ndíhi-gá, te ndáá sá cúú-ó dàtná ñáyiu ní ndoto ní nguíndècu váha dàtná ní ndoto mee-gã ní nucúndècu váha-gá.

6 Te nchoo nàha-o sá cúú-ó ñáyiu ío ndècu cuèchi-xi ni cùu, dico sáta ní cuu-o dàtná ñáyiu ní xíhí dàtná ní xíhí Xítóhó Jesucristú núú cùrúxí, te ndéé dàvá-áⁿ ní dáñá-ó nchàa ichi cuehé ichi duha ndècu-o ni cuu, te ñá túú-gã cúnùu sá cuèhé sá dúhá ìní-ó.

7 Chi nchaa ñáyiu ní xíhí ñá túú-gã ndécũ-yu ichi cuehé ichi duha.

8 Te núu cùu-o datná ñáyiu ní xíhí dàtná ní xíhí Xítóhó Jesucristú ñá, te cùtnuní ndáá ìní-ó sá cùndècu-o ndíhi-gá ni caa ni quíhíⁿ.

9 Te sa nàha-o sá Xítóhó Jesucristú ní xíhí-gá te ní ndoto-gá te vá ìⁿ ndùu ìⁿ quíú-gã te cuú-gá, chi ñá túú nãgá sá cáda cùú-gá.

10 Te Xítóhó Jesucristú ní xíhí-gá ìⁿ xito-ni sá cuèndá nchaa cuèchi nchoo ñáyiu ñuyíú, te vá ìⁿ ndùu-gá cuú-gá, te ndècu-ni-gá sá cúú-xí Yã Ndiõxí.

11 Núu xíãⁿ nchòhó cada ìní-ndó sã dàtná sá ní xíhí-ndó vã cùndècu-gá-ndó sá cúú-xí ichi cuehé ichi duha, chi ndècu-ná-ndó sã cúú-xí Yã Ndiõxí, chi ní tnahá tnúhu-ndo ndíhi Xítóhó Jesucristú Yaá cúú Xítóhó-ó.

12 Te núu xíãⁿ vá dáñá-gã-ndó cùnùu ni ìⁿ sá cuèhé sá dúhá ìní-ndó cuèndá sá vã cáda-gã-ndó ni ìⁿ sá cuèhé sá dúhá sàni ìní-ndó.

13 Te vá dáñá-ndó tàxi tnuní ñáhá ni ìⁿ sá cuèhé sá dúhá-ãⁿ xii-ndo cuèndá sá vã cáda-gã-ndó, te chí dáñá ná tàxi tnuní ñáhá Yã Ndiõxí xii-ndo, te chí dáñá ná chindee ñaha-gá cada-ndo mèe-ni sá vãha, te ducaⁿ te cada ìní-ndó sã cúú-ndó dàtná ñáyiu ní xíhí te ní ndoto ndècu.

14 Te ducaⁿ càda-ndo chi vá ndácú-gã ni ìⁿ sá cuèhé sá dúhá tàxi tnuní ñáhá-xí xii-ndo, chi Yã Ndiõxí cùndàhú ìní ñáhá-gã chindee ñaha-gá xii-ndo. Te ducaⁿ chi ñá túú-gã

cúnùu nchaa tnúhu sá ní chídó tnùní ndíi Moisés cada ñáyiu.

Ñáyiu nchícúⁿ nihnu sá vãha

15 Te ñá díú sã cùndàhú ìní ñáhá Yã Ndiõxí xii-o chindee ñaha-gá ndíhi sá ñá túú-gã cúnùu nchaa tnúhu ní chídó tnùní ndíi Moisés, te cachí-ó sã cúú-ní cùndècu-o ichi cuehé ichi duha.

16 Te nchoo xíni-ó sã ñũu na cuãha-o tnúhu cunu cuechi-o ñũú ìⁿ ñáyiu cuíni cunu cuechi-o ñũú-xi, te cùu-ná-ó ñáyiu xínu cuechi núú-yu te quide-o nchaa chiúⁿ tahú-yu. Te ducaⁿ sãtnahá-xi cùu nchaa ñáyiu quide nchaa sá cuèhé sá dúhá chi tàxi tnuní ñáhá-nã-xi xii-yu, te ñũu nchaa xíãⁿ dácuíta nihnu ñaha-xi xii-yu, te ñũu-ni ducaⁿ sãtnahá-xi cùu nchaa ñáyiu sàndáá ìní ñáhá xii Yã Ndiõxí chi tàxi tnuní ñáhá-gã xii-yu, te quidé-yu nchaa sá vãha nàcuáa cuíni mée-gã cáda-yu.

17 Te nchòhó ducaⁿ ní xóo cada-ndo nchàa sá cuèhé sá dúhá ní cùu, dico táxãhu xii Yã Ndiõxí chi vitna ni yùhu ni ìní-ndó quide-ndo nchaa nacuáa càháⁿ tnúhu-gá sá ní nguíndècu ndíhi-ndo.

18 Te vitna ñá túú-gã táxi tnùní ñáhá ni ìⁿ sá cuèhé sá dúhá xii-ndo, te quide-ná-ndó nchàa sá vãha tàuchiuⁿ Yã Ndiõxí cada-ndo.

19 Te duha càháⁿ-í cuèndá cue ñáyiu xínu cuechi cuèndá sá nchòhó tecú tnùní-ndó nàcuáa ndùu tnúhu càháⁿ-í. Te nchòhó ní dáñá-ndó ní taxi tnùní ñáhá nchàa sá cuèhé sá dúhá xii-ndo, te ñá túú ní quide-ndo nacuáa ní càháⁿ Yã Ndiõxí cada-ndo chi da vèhi-gá ní quide-ndo, te ñũu-ni ducaⁿ chí dáñá ná tàxi tnuní ñáhá Yã Ndiõxí xii-ndo vitna cuèndá cada-ndo mèe-ni sá vãha nàcuáa cuíni mée-gã cada-ndo, te ducaⁿ te cuu-ndo ñáyiu quide ndáá cundècu núú-gã.

20 Te nchoo cùtnahá ní xóo cada-o nchàa sá cuèhé sá dúhá ñá túú ní xóo cada-o ni ìⁿ sá vãha cuíni Yã Ndiõxí cada-o.

21 Te dicó sácáⁿ-núú sãñaha nchàa sá cuèhé sá dúhá-ãⁿ te núu na càda-o, te ni ìⁿ sá vãha vá ñihí-ó te núu na càda-o nchaa xíãⁿ, te ñũu nchaa xíãⁿ dácuíta nihnu ñaha-xi xii-o.

22 Te vitna ñá túú-gã cúú-ó ñáyiu ndècu ichi cuehé ichi duha, chi cùu-ná-ó ñáyiu quide nchaa nacuáa càháⁿ Yã Ndiõxí. Te sá dúhá quide-o cuu ndisa-xi ìⁿ sá vãha sá cúú-xí-ó, te cùu-o ñáyiu quide ndáá ndécú-ó

núu-gã vitna, te sáá nduu cùndecu-o ndihí-gá ni caa ni quíhíⁿ.

²³ Te nchaa sá cuèhé sá dúhá dícó dácuíta nihnu ñaha-xi xii-o, dico Yá Ndiõxí ní quide-gá sá dícó-ni ducaⁿ ndùu táhú-ó cùndecu-o ndihí-gá ni caa ni quíhíⁿ, chi ní tnahá tnúhu-o ndihí Xítóhó Jesucristú Yaa cúu Xítóhó-ó.

7

Cuèndá ñáyiú tnãndaha

¹ Te nchaa nchòhó ñáyiú ndècu ndihí-í ichi Xítóhó Jesucristú sa naha-ndo nacuaá càháⁿ tnúhu sá dánèhé ñáhá xii-o nacuaá cada-o cùndecu-o, chi tnúhu-áⁿ càháⁿ-xi dóho nchaa ñáyiú xĩndecu vǐvú ñuyíú-a.

² Te nchaa ñáyiú dǐhí sa ndècu yǐ-xi, te dǐu tnúhu-áⁿ dánèhé ñáhá-xí xii-yu sá vǎ dáñǎ-yu yǐ-yu, dico núu na cúu yǐ-yu te ñá túú-gá ná càháⁿ tnúhu-áⁿ cuèndá-yu.

³ Dico núu vátá cúu-gá yǐ-yu te ñá túú ndùu váha-xi naquehéⁿ-yu ingá téé, dico núu na cúu yǐ-yu te quendóo mèé-yu, te ñá túú nǎgá càháⁿ tnúhu sá dánèhé ñáhá xii-yu nàcuáa cadá-yu te ducaⁿ te cuu naquehéⁿ-yu ingá téé, te ñá túú cúu-xi ìⁿ cuèchi.

⁴ Te nchòhó cue ñáyiú ndècu ndihí-í ichi Xítóhó Jesucristú cúu-ndó dàtná ñáyiú ní xíhí dàtná ní xíhí-gá. Te xǐáⁿ ñá túú-gá táxí tnùnǐ ñáhá nchaa tnúhu ní chídó tnùnǐ ndíi Moisés xii-ndo. Te ducaⁿ ní cuu cuèndá nchòhó ngúndecu-ndo ndihí Xítóhó Jesucristú Yaa ní xíhí ní cúu te ní ndoto-gá. Te ducaⁿ ní cuu cuèndá nchaa nchoo ñáyiú ndècu ichi-gá cada-o nchaa nacuaá càháⁿ Yá Ndiõxí.

⁵ Te nchoo ní xĩndecu-o ìchi cuehé ichi duha, te tnúhu sá sánú ìchi ñaha xii-o nacuaá cada-o cùndecu-o cachí-xi sá ñá túú váha cùndecu-o ìchi-áⁿ, te nchoo dà uuⁿ-gá ní quide-o nchaa sá cuèhé sá dúhá sá dúcáⁿ càháⁿ tnúhu-áⁿ, te sá dúcáⁿ ní quide-o te ta xíta nihnu-o cuáháⁿ ní cúu.

⁶ Te vitna cada iní-ó sá cúu-ó dàtná ñáyiú ní xíhí sá cúu-xí tnúhu sá dánèhé ñáhá xii-o nacuaá cada-o cùndecu-o, chi ñá túú-gá cúnùu-xi, te vitna mee-nǎ Espíritú Yá Ndiõxí chĩndèè ñaha-xi xii-o xinu cuechi-o núu-gã, te ñá díú cuèndá nchaa tnúhu sá

nǐ ngúndèé ndéé díhna cada ñáyiú xinu cuechi-o núu-gã vitna.

Nchaa sá cuèhé sá dúhá ñùhu iní-í

⁷ Te cuèj duha càháⁿ-í dico vá cúu tnàhí càháⁿ-ó sá tnúhu sá sánú ìchi ñaha xii-o nacuaá cada-o cùndecu-o ñá díú tnúhu váha cúu-xi. Te yúhú ñá túú cùtnuní iní-í ná cúu nchaa sá cuèhé sá dúhá ní cúu te núu ñá túú tnúhu-áⁿ ní cachí tnúhu-xi xii-í, te ní ñá túú cùtnuní tucu iní-í núu váha àdi ñá túú váha sá nchídó iní-í sá ndécú ndihí tnahá ñáyiú-o ní cúu te núu ñá túú tnúhu-áⁿ ní cachí-xi sá vǎ cúu cúu iní-í sá ndécú ndihí-yu.

⁸ Te tnúhu-áⁿ ní dánèhé ñáhá-xí xii-í sá vǎ cúu càda-í ni ìⁿ sá cuèhé sá dúhá, dico sá cuèndá tnúhu-áⁿ uuⁿ-gá ducaⁿ ní sani iní-í ní quide-í. Te núu ñá túú tnúhu sá sánú ìchi ñaha xii-o nacuaá cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cúu.

⁹ Te cùtnàhá vátá ñhí-gá-í tnúhu-áⁿ te ñá túú tnàhí ná sánú ìni-í ndécú-í ní cúu, dico sátá ní ñhí-í tnúhu-áⁿ te ní cutnùnǐ iní-í sá ndécú cuèchi-í, te ta xíta nihnu-í cuáháⁿ ní cúu.

¹⁰ Te núu ní quidè-í nchaa nàcuáa càháⁿ tnúhu-áⁿ te sa ndéé ama-gá naníhí tàhú-í ní cúu, dico ñá túú ní quide-í núu ní cutnùnǐ iní-í sá tá xíta nihnu-í cuáháⁿ ní cúu.

¹¹ Te sá xíi tnúhu-áⁿ xǐáⁿ uuⁿ-gá ní cunuu nchaa sá cuèhé sá dúhá ní dándàhú ñáhá-xí xii-í te ní quide-í, te ta dácuíta nihnu ñaha-xi xii-í cuáháⁿ ní cúu.

¹² Te tnúhu sá sánú ìchi ñaha xii-o nacuaá cada-o cùndecu-o cuu-xi tnúhu ío yǐñùhu ní taxi Yá Ndiõxí, te ìⁿ ìⁿ tnúhu-áⁿ cúu-xí mèe-ni tnúhu váha, te ní ìⁿ tnúhu cuèhé tnúhu duha ñá túú ñùhu tnahá.

¹³ Te vá cúu cachí-í sá tnúhu váha-áⁿ ní quide-xi ta xíta nihnu-í cuáháⁿ ní cúu, chi nchaa sá cuèhé sá dúhá ní quide-í, xǐáⁿ tá dácuíta nihnu ñaha-xi xii-í cuáháⁿ ní cúu, te sá cuèndá tnúhu váha-áⁿ ní cutnùnǐ iní-í sá quidè-í nchaa sá cuèhé sá dúhá, te xǐáⁿ tá xíta nihnu-í cuáháⁿ ní cúu. Te sá cuèndá nchaa nàcuáa càháⁿ tnúhu sá sánú ìchi ñaha xii-o nacuaá cada-o cùndecu-o ní cutnùnǐ iní-í sá xidó ndécú cuèchi-í ní cúu.

¹⁴ Te tnúhu-áⁿ ní taxi Espíritú Yá Ndiõxí ndécú ndihí-o cachí tnúhu-xi nàcuáa cada váha-o. Te nchoo cúu-o mee-ni ñáyiú yíca cuèchi, te tàxi tnuní ñáhá nchaa sá cuèhé sá dúhá xii-o ní cuu.

15 Dico nchoo tnàhá iní-ó càda-o nchaa sá vâha dico ñá túú quide-o, te da nchaa sá ñà túú tnàhá iní-ó càda-o quide-o, te ñá túú cùtnuní iní-ó ñà cuendá ducaⁿ quide-o.

16 Te sá dúcáⁿ quide-o nchaa sá ñà túú tnàhá iní-ó, te xiáⁿ ndíxí tũu iní-ó sá tnũhu sá dúcáⁿ sànu ichi ñaha xii-o nacuáa cada-o cùndecu-o cuu-xi tnũhu ío váha.

17 Te cùtnuní iní-ó sá nchaa sá cuèhé sá dúhá ñũhu iní-ó, xiáⁿ quidé-xí dùcaⁿ quide-o sá ñà túú vâha, te ñá díú sá cáhú iní mée-ó dùcaⁿ quide-o.

18 Te cùu-o cue ñáyiú sàni cuehé sání dùha iní-xi, te cuiní-ó càda-o nchaa sá vâha dico ñá túú nihí ndéé-ó càda-o.

19 Te cuiní-ó càda-o nchaa sá vâha dico ñá ndácú-ó, te ñá túú cuiní-ó càda-o datná quidé nchaa ñáyiú ndècu ichi cuehé ichi duha, chi ñáyiú-áⁿ mee-ni nchaa sá cuèhé sá dúhá quidé-yu, dico ñu-ni nchaa xiáⁿ quidé-ó tnàhá-ó.

20 Te sá dúcáⁿ quide-o nchaa sá ñà túú tnàhá iní-ó càda-o te ñá díú mée-o ducaⁿ cahu iní-ó quide-o, chi nchaa sá cuèhé sá dúhá ñũhu iní-ó xiáⁿ quidé-xí dùcaⁿ quide-o.

21 Te ducaⁿ tnàhí yâha-o òré cuiní-ó càda-o sá vâha, chi da mee-ni nchaa sá cuèhé sá dúhá quide-o.

22 Te ío cùdíí iní-ó càda-o nchaa nacuáa càháⁿ Yá Ndiõxí,

23 te dicó-ni sá ncháá sá cuèhé sá dúhá ñũhu iní-ó, xiáⁿ quidé-xí ngàni ñaha-xi xii-o ñá túú quide-o sá vâha sàni iní-ó càda-o, te ducaⁿ yâha-o chi nchaa sá cuèhé sá dúhá-áⁿ cùnũu-xi taxi tnuní ñáhá-xí xii-o.

24 ¡Te ndàhú ní cuu nchoo! Chi vá yõ ñⁿ ni ndàcu cada nacuáa vá táxí tnùní ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu.

25 Te táxáhu xii Yá Ndiõxí sá Xítóhó Jesucristú ní quide-gá cuendá sá vâ táxí tnùní ñáhá-gã ni ñⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuáa càháⁿ Yá Ndiõxí, dico núu nchaa sá cuèhé sá dúhá ná cùnũu-xi taxi tnuní ñáhá-xí xii-o, te ñu-ni nchaa xiáⁿ cada-o.

8

Ñáyiú quide nchaa nacuáa càháⁿ Espíritú Yá Ndiõxí

¹ Te vitna nchaa nchoo ñáyiú tnàhá tnũhu ndihí Xítóhó Jesucristú vá cuíta nihnu-gá-ó,

chi ñá túú-gã ndécú-ó ichi cuehé ichi duha, chi mee-ñà nchaa nacuáa càháⁿ Espíritú Yá Ndiõxí quidé-ó.

² Te Espíritú Yá Ndiõxí-áⁿ táxí tnùní ñáhá-xí xii-o, te ducaⁿ chi ndècu ndihí-o Xítóhó Jesucristú, te sá dúcáⁿ tàxi tnuní ñáhá Espíritú-gá xii-o núu xiáⁿ ñá túú-gã táxí tnùní ñáhá ni ñⁿ-gá sá cuèhé sá dúhá xii-o, te ducaⁿ quide Espíritú-gá cuendá sá vâ cuíta nihnu-o, te ñu-ni Espíritú-gá quidé-xí cuendá sá nchóó ndũu táhú-ó cùndecu-o ndihí-gá ni caa ni quíhíⁿ.

³ Te nchoo ñá ní ndàcu-o cada-o nchaa nacuáa càháⁿ tnũhu sá sánú ichi ñaha xii-o nacuáa cada-o cùndecu-o, núu xiáⁿ tnũhu-áⁿ ñà túú ní nihí ndéé-xí càda-xi cuendá sá nchóó vâ cuíta nihnu-o. Dico Yá Ndiõxí ní tendaha-gã Déhe mee-gã ní quixi ñuyú-a, te Yaá-áⁿ cúu-gã ñⁿ ñáyiú, te càa-gá datná cáá ñáyiú ndècu cuéchi-xi xĩndecu ñuyú-a, te sá cuendá nchaa cuéchi nchaa nchoo ñáyiú xĩndecu ñuyú-a ní quixi-gá, te ndéé dàvá-áⁿ ní quide-gá cuendá sá vâ táxí tnùní ñáhá-gã ni ñⁿ sá cuèhé sá dúhá xii-o.

⁴ Te ducaⁿ ní quide-gá cuendá nchoo nchícúⁿ nihnu-o quide-o nacuáa càháⁿ tnũhu sá sánú ichi ñaha xii-o nacuáa cada-o, chi ñá túú-gã cùnũu ni ñⁿ sá cuèhé sá dúhá iní-ó, chi Espíritú Yá Ndiõxí-ñá táxí tnùní ñáhá-xí xii-o.

⁵ Te nchaa ñáyiú cùnũu nchaa sá cuèhé sá dúhá iní-xi mee-ni xiáⁿ ñũhú iní-yu te quidé-yu. Dico nchoo ñáyiú quide nchaa nacuáa cuiní Espíritú Yá Ndiõxí ñũhú iní-ó mée-ni nacuáa càháⁿ Espíritú-gá-áⁿ te quide-o.

⁶ Te núu mee-ni nchaa sá cuèhé sá dúhá cùnũu iní-ó, te cuíta nihnu-o, dico núu mee-ni nchaa tnũhu càháⁿ Espíritú Yá Ndiõxí cùnũu iní-ó, te ío váha cuu iní-ó cùndecu-o ndihí-gá ni caa ni quíhíⁿ.

⁷ Te nchaa ñáyiú ñũhu iní mee-ni sá cuèhé sá dúhá cùu úhú iní-yu Yá Ndiõxí, te ñá túú cuiní-yu cadá-yu nacuáa càháⁿ-gá, te ni ñá ndácũ-yu cadá-yu.

⁸ Te nchaa ñáyiú ducaⁿ cùnũu nchaa sá cuèhé sá dúhá iní-xi-áⁿ ñà túú cùdíú-yu núu Yá Ndiõxí.

⁹ Te nchóhó chi ñá túú-gã cùnũu sá cuèhé sá dúhá iní-ndó, chi mee-ñà nacuáa càháⁿ Espíritú Yá Ndiõxí quidé-ndó, te ducaⁿ

quide-ndo chi ndècu ndihì-ndo Espiritú-gá, te diu-ni Espiritú-gá-áⁿ nǐ tendaha Xítóhó Jesucristú véxi ndècu ndihì-o, te nchaa ñáyiú ñá túú ndècu ndihì Espiritú sá nǐ tendaha Xítóhó Jesucristú véxi ndècu ndihì-o ñá túú ndècu ndihì ñahá-yu xii-gá.

10 Te núu ndècu ndihì-ndo Xítóhó Jesucristú, te cuèi na cùu yiqui cùñú-ndó sǎ cuendá nchaa sá cuèhé sá dúhá ió ñuyíú-a, dico iní-ndó chi cundecu ndihì-xi Yá Ndiöxí chi ñá túú-gá cuèchi-ndo ndècu núú-gá.

11 Te núu ndècu ndihì-ndo Espiritú Yá Ndiöxí Yaá ní dándótó ñàha xii Xítóhó Jesucristú, te diu-ni-gá cada te ndoto yiqui cùñú-ndó sǎ tá xíta nihnu cuáháⁿ núu na cùú-xi, te ducaⁿ chi ndècu ndihì-ndo Espiritú-gá.

12 Te nchòhó ñáyiú ndècu ndihì-í ichi Xítóhó Jesucristú, ñá túú-gá tàú-ndó cùnnu ni ìⁿ sá cuèhé sá dúhá iní-ndó nàcuáa vá cundècu-gá-ndó ichi cuehé ichi duha.

13 Chi núu na cùnnu sá cuèhé sá dúhá iní-ndó te cuíta nihnu-ndo, chi quíhíⁿ-ndó núú ùhú núú ndàhú. Dico núu daña-ndo mèe-ndo chindee ñaha Espiritú Yá Ndiöxí xii-ndo cuendá sá vǎ cùnnu-gá sá cuèhé sá dúhá iní-ndó ñá, te nduu táhú-ndó cundecu-ndo ndihì-gá ni caa ni quíhíⁿ te núu ducaⁿ na càda-ndo.

14 Chi nchaa ñáyiú quide nchaa nacuáa sànu ichi ñaha Espiritú Yá Ndiöxí cúú-yu déhe-gá.

15 Te Espiritú sá nǐ taxi Yá Ndiöxí ndécú ndihì-o ñá túú quide-xi sá nchóó yùhú-ó cùnnu cuechi-o núú-gá, chi Espiritú-áⁿ quidé-xi sǎ nchóó cùu-o déhe-gá, te diu-ni Espiritú-áⁿ quidé xǎhaⁿ-o xii Yá Ndiöxí: “yòhó Dútú Ndiöxí cúú-n Tǎtá méé-ndí!”, duha xǎhaⁿ-o xii-gá.

16 Te diu-ni Espiritú-gá-áⁿ tnàhá tnúhu-xi ndihì iní-ó, te cǎháⁿ ndáá-xi sá nchóó cùu-o déhe-gá.

17 Te sá dúcáⁿ cùu-o déhe Yá Ndiöxí xǎáⁿ ní cachí-gá sá tnàhá-ó nduu táhú-ó sǎ nǐ nduu táhú Xítóhó Jesucristú, te ducaⁿ nduu táhú-ó te núu na càda ndee iní-ó ndòho-o datná ní ndoho Xítóhó Jesucristú, te núu ducaⁿ te ío cuu cǎhnu-o ndihì-gá ni caa ni quíhíⁿ.

18 Te yúhú cǎchí-í sá ñà túú ñǎ cada-xi cuèi ndòho-o cuendá-gá ndécú-ó ñuyíú-a,

chi ío váha càa núú ndúú tǎhú-ó cundecu-o na saá nduu.

19 Te nchaandi túhú sá nǐ cadúha Yá Ndiöxí ní taxi ndecu-gá ñuyíú-a ndètu cǎhnu-ná-xi sáá nduu cǎchí-gá sá ío cǎhnu cuu nchaa déhe-gá.

20 Te nchaa sá nǐ cadúha Yá Ndiöxí ní taxi ndecu-gá ñuyíú-a ní sáá nduu ñà túú-gá cúú-xi sǎ vǎha sá cúú-xi-gǎ. Te ñá díú mèe sá nǐ taxi ndecu Yá Ndiöxí ñuyíú-a ducaⁿ ni sàni iní-xi cunduu, chi mee-gǎ ducaⁿ tnàhí ní cachí-gá cunduu sá sáá nduu vǎ cúú-xi sǎ vǎha sá cúú-xi-gǎ, dico sáá tucu nduu te nchaa xǎⁿ cuu tucu-xi sá vǎha sá cúú-xi-gǎ.

21 Te nchaa sá nǐ taxi ndecu-gá ñuyíú-a vá cundècu-gá-xi datná cáá-xi vitna te ni vǎ dánà-gá, chi nduu saa-xi te ngúndecu váha-xi datná ngúndecu váha nchaa cue déhe-gá.

22 Te nàha-o sá ncháándi túhú sá nchító nǐ cadúha Yá Ndiöxí ndécú ñuyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi.

23 Te ñá díú-ní nchàa sá dúcáⁿ nǐ cadúha-gá-áⁿ ducaⁿ ndòho-xi, chi tnàhá nchoo dùcaⁿ ndoho-o ndecu-o ñuyíú-a tucu, te nchoo sá ní nduu táhú-ó Espiritú Yá Ndiöxí Espiritú sá nǐ cachí méé-gǎ nduu táhú-ó dǐhnanuu. Te ío ndòho tnahá-ó ndècu-o ñuyíú-a te ndètu cǎhnu-ná-ó sáá nduu ndàda saa-gá yiqui cùñú-ó, te cǎháⁿ-gá sá cúú-ó déhe-gá.

24 Te Yá Ndiöxí ní quide-gá ní naníhí tǎhú-ó núu xǎáⁿ ní ngúndecu ndihì-o tnúhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndihì-o sá ndúú tǎhú-ó te vá cúú cǎháⁿ-ó sǎ cundètu-o sá ndúú tǎhú-ó chi sa ndècu ndihì-o.

25 Dico sá ndétú-ó nduu táhú-ó cùu-xi sá vǎtá cundècu ndihì-gá-ó, te xini ñuhu-ni-xi cada ndee-ni iní-ó cundètu-o ndéé sáá nduu nduu táhú-ó sǎ dúcáⁿ nǐ cachí Yá Ndiöxí nduu táhú-ó.

26 Te Espiritú-gá chindee ñaha-xi xii-o nacuáa níhí ndéé-ó cundecu-o, te nchoo ñà túú xini-ó cǎháⁿ ndihì-o Yá Ndiöxí nàcuáa tàú-xi cunduu dico Espiritú-gá cǎháⁿ ndàhú-xi núú-gǎ cuendá-ó cuèi òré ñá nihí-ó tnúhu cǎháⁿ-ó cuendá nchaa sá ío cuini-ó cǎcáⁿ-ó núú-gǎ.

27 Te Yá Ndiöxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá

nchaa nàcuáa sàni iní Espíritú-gá. Te Espíritú-gá càháⁿ ndàhú-xi núú-gá cuèndá nchoo ñáyiú yíndaha-gá, te càháⁿ ndàhú-xi núú-gá nàcuáa cuìní mée-gã cunduu.

Nchaa sá ná càda ñaha ñáyiú te vá ndácũ-yu nadatùhú-yu iní-ó chi ndacu nahi-ni-o yãha-o nchaa sá ná càdá ñàhá-yu

²⁸ Te sa nàha-o sá Yã Ndiõxí quidé-gã sá ncháá sã yãha-o ndècu-o ñuyíú-a cùu-xi sã vãha sá cúú-xí nchòo cue ñáyiú cùu iní ñáhá xii-gá, chi cùu-o ñáyiú ní càháⁿ-gá cundecu ndihí-gá dàtná ní cachí iní mée-gã.

²⁹ Te ndéé cùtnàhá vátá ngãva-gá ñuyíú, te Yã Ndiõxí sa nàha-gá nándi cùu ñáyiú cundecu ndihí-gá, te ñu-ni ndéé dàvã-áⁿ ñí cachí-gá sá ñáyiú-áⁿ cunduu vãha iní-yu dàtná vãha iní Déhe mee-gã, te ducaⁿ ñí cachí-gá cuèndá sá Déhe mee-gã-áⁿ cunuu-gã núú nchaa ñáyiú cundecu ndihí-gá.

³⁰ Te nchaa ñáyiú ducaⁿ ñí cachí-gá cundecu ndihí-gá ndéé cùtnàhá vátá ngãva-gá ñuyíú càháⁿ ñáhá-gã xii-yu vitna, te nchaa ñáyiú ducaⁿ càháⁿ-gá càchí-gá sá ñà túú-gã cuéchi-yu ndècu núú-gã, te ñu-ni ñáyiú-áⁿ cachí-gá sá ño càhnu cuú-yu.

³¹ Te vitna ní cùtnùní iní-ó, te ñà túú nãgá caní iní-ó, chi Yã Ndiõxí ndécú ndihí ñaha-gá xii-o, te vá yõo ñí-gã ndacu quehdé nihnu cuèndá sá vã chindèe ñaha-gá xii-o.

³² Te Yã Ndiõxí ñà túú ní cùdíi iní-gá Déhe-gá sá cúú-gá cuèndá nchaa nchoo ñáyiú xíndecu ñuyíú-a, te sá dúcáⁿ ndéé Déhe-gá ñà túú ní cùdíi iní-gá xíãⁿ cùtnùní iní-ó sã táxí-gã nchaandi túhú sá xíní ñùhu-o.

³³ Te vá yõo ñí ndacu cacáⁿ cuéchi núú Yã Ndiõxí cuèndá nchaa ñáyiú ní cachí-gá cundecu ndihí-gá te núú ná cúú cuéchi-yu ndècu. Chi mee-gã càchí-gá sá ñà túú ndècu cuéchi-yu núú-gã.

³⁴ Te vá yõo ñí ndacu daquihíⁿ ñáhá xii-o núú ùhú núú ndàhú, chi Xítohó Jesucristú ní xíhí-gá te ní ndoto-gá, te cuánda-gá núú ndécú Dütú Ndiõxí núcõo-gá xio cùha-gá, te ducaⁿ ño cùnuu-gá, te yàcáⁿ càháⁿ ndàhú-gá núú Dütú Ndiõxí cuèndá-ó.

³⁵ Te vá yõo ñí ndacu cada ñaha xii-o ñí sá ñà túú vãha cuèndá sá vã cúú iní ñáhá-gã

Xítohó Jesucristú xii-o, te ni tnúndòho tnúhu ndàhú, te ni sá ndihú iní-ó ñã cùtnùní iní-ó nãsa cada-o càcu nihnu-o ñí sá ná yãha-o, te ni nchaa sá càdá ñaha ñáyiú sá cuèndá-gá, te cuèi-ni sá vã ñihí-ó sã cóhó sã cãxí-ó, te cuèi-ni sá vã ñihí-ó dõo cuihnu-o, te cuèi ndècu-ná-ó sã yãha-o ñí sá yãha-o, te cuèi sa ndècu-ná-ó sã càhni ñáhá-yu, dico Xítohó Jesucristú vá dáñá ndèé-gá sá cúú iní ñáhá-gã xii-o.

³⁶ Te quee ndáá-xi nàcuáa ní càháⁿ ñí tée ní xóo càháⁿ tnúhu Yã Ndiõxí ndéé sanaha ñí ngódó tnùní núú tütú-gá núú càchí-xi:

Yòhó Dütú Ndiõxí nchaa-ni nduu nchaa-ni òré cuìní ñáyiú cahni ñáhá-yu xii-ndí sá cuèndá-n,

te càchí-yu sá cúú-ndí dàtná cue mbéé cue quití sa ndècu túha-ná cahni-yu.

Duha ní cachí tée ní xóo càháⁿ tnúhu-gã-áⁿ, te ducaⁿ ñí ngódó tnùní núú tütú-gá.

³⁷ Te cuèi ducaⁿ nãndi sá ná càda ñahá-yu xii-o, dico vá ndácũ-yu nadatùhú-yu iní-ó chi ndacu nahi-ni-o yãha-o nchaa sá dúcáⁿ ná càda ñahá-yu xii-o, te ducaⁿ chi Xítohó Jesucristú Yáá ío cùu iní ñáhá xii-o ndecu ndihí ñaha-gá chindèe ñaha-gá.

³⁸⁻³⁹ Te yúhú cùtnùní ndáá iní-í sá ñí ñí sá ío ñuyíú-a vá ndácú-xí càda-xi cuendá sá vã cúú iní ñáhá-gã Yã Ndiõxí xii-o, te ni sã cùú-ó, te ni sã cùndècu-o ñuyíú-a, te ni ñí espíritú sá ño cùnuu cundihí yucu ñávãha te ni ñí dava-gá cue espíritú cùndihí-xi vá ndácú-xí càda-xi cuendá sá vã cúú iní ñáhá Yã Ndiõxí xii-o. Te ni sã cúú ñuyíú-a vitna, te ni sã cúú ndéé cuéé-gá, te ni ñí sá ndécú àndiú, te ni ñí sá ndécú ñuyíú-a, te ni ñí sá ñí cadúha mee Yã Ndiõxí, ni ñí xíãⁿ vá ndácú-xí càda-xi cuendá sá vã cúú iní ñáhá-gã xii-o chi ndècu ndihí-o Xítohó Jesucristú Yáá cúú Xítohó-ó.

9

Yá Ndiõxí ní cachí-gá sá ñáyiú isràèl cuú-yu ñáyiú canchicúⁿ nihnu ñaha xii-gá

¹ Te yúhú càháⁿ ndáá-í chi cùu-í ñí tée ndècu ndihí Xítohó Jesucristú, te ndècu ndihí-í Espíritú Yã Ndiõxí nùu xíãⁿ cùtnùní iní-í sá càháⁿ ndáá-í.

² Te nchaa-ni nduu nchaa-ni òré ío ndihú iní-í, te ducaⁿ-ni ño quíde úhú-xi iní-í

³ sá cuendá nchaa ñáyiú cùu ndi mee-í. Te núu dícó cúú-xí ñⁿ sá chindèe ñaha xií-yu nucúndecu váha-yu núú Yă Ndiöxí ñá, te dàña-í méè-í dàcuíta nihnu ñaha Xítóhó Jesucristú núu dícó sá cúú.

⁴ Te nchaa ñáyiú cùu ndi mee-í-án cúú-yu ñáyiú isràél, te Yă Ndiöxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ïo càhnu cuu-gá, te ní cáháⁿ ndáá-gá núú-yu nàcuáa cada ñaha-gă xií-yu, te ní xáhaⁿ-gă xii ndíi Moisés ní chídó tnùní ndíi nàcuáa cada-yu cundecú-yu. Te ní xáhaⁿ-gă xií-yu nàcuáa cada-yu cada càhnu ñahá-yu xii-gá, te ní xáhaⁿ tùcu-gá xií-yu nchaa nàcuáa cada-gá ndéé cuèé-gá.

⁵ Te nchaa ñáyiú-án cúú-yu ñaní tnáhá nchaa cue téé ní cunuu ñí xindecu ndéé sanaha, te ñíu-ni ñaní tnáhá-yu cùu Xítóhó Jesucristú Yaá ní tendaha Dütú Ndiöxí ní quixi ñuyú-a, te tnáhá-gá cúú-gă Ndiöxí te ïo cùnuu-gá, te nchaa nduu nchaa quíú ïo càhnu cuu-gá. Te ducaⁿ na cùnduu.

⁶ Te vá càchí-ó să Yă Ndiöxí ñá túú ní quide-gá nchaa nàcuáa ní cachí-gá cada-gá cuendá sá ñà túú sàndáá iní ñáhá dàva ñáyiú isràél xii-gá. Te sá dúcáⁿ xíquide davá-yu te ñá túú quidé-yu nàcuáa tàú-xi cada-yu sá cúú-yu ñáyiú isràél. Te ñáyiú ducaⁿ xíquide-án cúú-yu ñáyiú ñá túú cùu cuendá ñáhá Yă Ndiöxí.

⁷ Te cuèi ncháá-yu cùu-yu ñaní tnáhá ndíi Àbrahám dico ñá túú quidé-yu nchaa nàcuáa tàú-xi cunduu cada-yu sá cúú-yu ñaní tnáhá ndíi. Te Yă Ndiöxí ní xáhaⁿ-gă xii ndíi Àbrahám: “Nchaa cue ñaní tnáhá tē Isàac téé cùu déhe ducuⁿ-n, mee-ni cuè ñáyiú-án cuu ñaní tnáhá-n”, duha ní xáhaⁿ-gă xii ndíi Àbrahám.

⁸ Te xiăⁿ cùtnùní iní-ó să ñă ncháá ñáyiú cùu ñaní tnáhá ndíi Àbrahám cúú-yu ñáyiú cùu cuendá Yă Ndiöxí, chi mee-ni ñáyiú sàndáá iní nàcuáa ní cáháⁿ-gá cada-gá, ñáyiú-án cúú cuendá-gá.

⁹ Te duha ndùu tnúhu ní xáhaⁿ Yă Ndiöxí xii ndíi Àbrahám: “Sáá nduu te yúhú cada-í te coo ñⁿ déhe-n ndíhi ñadihí-n tă Sărá”, duha ní xáhaⁿ-gă xii ndíi.

¹⁰ Te ñá díú-ní xiăⁿ ní quide Yă Ndiöxí, chi tnáhá ní ndatnúhu-gá ndíhi ndíi Rèbecá cùtnáhá vitna ñùhu úú déhe ndíi ndíhi ndíi

Isàac téé ní cuu ñaní tnáhá-ó ñí xindecu ndéé sanaha.

¹¹⁻¹³ Te cùtnáhá vitna ñùhu-gá déhe ndíi Rèbecá, cùtnáhá vátá cádá-gă-güexi ni ñⁿ sá cuèhé sá dúhá, te ni ñⁿ sá váha, ní xáhaⁿ Yă Ndiöxí xii ndíi: “Déhe-n tēe díhna na càcu te téé-án tní-dé nchaa tnúhu cáháⁿ déhe-n tēe cùu uú ná càcu”, duha ní xáhaⁿ-gă xii ndíi Rèbecá. Te ní quee ndáá-xi nàcuáa ní cáháⁿ Yă Ndiöxí núú tùtú-gá núú càchí-xi: “Té Jàcób ní cuu váha iní-í núú-dě, te té Esàú ñá túú ní cùu váha iní-í núú-dě”, duha càchí-gá núú tùtú-gá. Te ducaⁿ ñí cuu chi ducaⁿ ñí cachí méé-gă cunduu sá càháⁿ-gá nchaa ñáyiú cuení méé-gă, te ñá díú cuendá ñⁿ chiúⁿ quidé-yu càháⁿ ñáhá-gă xií-yu.

¹⁴ Te vá cúú tnáhí cáháⁿ-ó să Yă Ndiöxí ñá túú quide váha-gá sá dúcáⁿ quide-gá chi mee-gă ïo ndáá quidé-gă!

¹⁵ Te mee-gă ní xáhaⁿ-gă xii ndíi Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáhaⁿ-gă xii ndíi.

¹⁶ Te xiăⁿ cùtnùní iní-ó sá cùndàhú iní-gá ñáyiú chi ducaⁿ cuení méé-gă cunduu, dico ñá túú cùndahú iní ñáhá-gă xií-yu cuendá sá dúcáⁿ cuení-yu cada-gá, te ni ñà túú cùndahú iní ñáhá-gă xií-yu cuendá sá ïo ndùcu ndéé-yu quidé-yu ñⁿ sá quidè-yu.

¹⁷ Te núú tùtú Yă Ndiöxí càháⁿ-xi nàcuáa ní xáhaⁿ-gă xii téé ní cuu Faràón téé ní xindaha nacióⁿ Ègiptú, te duha ní xáhaⁿ-gă: “Yúhú ní quide-í yíndàha-n ñáyiú cuendá cada-í titní núú să cádá-í núú-n cuendá cutnùní iní-n să ïo càhnu cuu-í, te ducaⁿ nchaa ñáyiú ñuyú cutnùní iní-yu sá yúhú cùu-í Ndiöxí”, duha ní xáhaⁿ-gă xii téé ní cuu Faràón.

¹⁸ Te xiăⁿ cùtnùní iní-ó să Yă Ndiöxí cùndàhú iní-gá mee-ni cuè ñáyiú càchí iní méé-gă, te ducaⁿ ndàda díi-gá iní nchaa ñáyiú càchí iní méé-gă ducaⁿ càda-gá.

¹⁹ Te sá dúhá càháⁿ-í te dava-ndo quèsaha-ndo: “Ná cuendá Yă Ndiöxí dácàa-gá cuèchi díquí ñáyiú núu ni ñⁿ-yu ñá ndácü-yu quehndé nihnú-yu cuendá sá vă cádá Yă Ndiöxí nàcuáa cuení-gá”, quèsaha-ndo.

²⁰ Te chí cuăha cuendá sá dícó ñáyiú ñuyú-a cùu-ndo te ñá túú ndùu váha-xi sá nchòhó cáháⁿ-ndó ñⁿ tnúhu sá ñà túú ndùu váha sá cúú-xí Yă Ndiöxí. Te duha na

càháⁿ-í núú-ndó nàcuáa tecú tnùnì-gá-ndó nàcuáa ndùu tnúhu càháⁿ-í. Te ñá túú xìnì-ó sã ñⁿ quídi ñuhu cúñaha-xi xì ñáyiú ní cadúha ñaha xì-xi: “Ná cuèndá duha ní cadúha ñaha-n xì-í”, cúñaha-xi.

21 Chi ñáyiú cadúha nchaa quídi-áⁿ cuu-ni cadúha-yu ndihì ñuhu cuèi nása na cùnduu quídi cadúha-yu canehe chiùⁿ-yu, chi ñⁿ-ni ñuhu cadúha-yu quídi cánehe chiùⁿ-yu ndi tnahá nduu sácóo-yu vico ndihì quídi sá cánehe chiùⁿ-yu nduu cùtexínu.

22 Te ñiú-ni ducaⁿ quíde Yá Ndiöxí, chi cuìnì-gá dandòho-gá ñáyiú ñá túú quíde nchaa nacuáa nduu vétú iní-gá, te cada-gá nàcuáa cutnùnì iní-yu sá ño càhnu cuu-gá. Te sa ndècu túha-ná-yu sá quíhìⁿ-yu núú ùhú núú ndàhú, te cuèi ducaⁿ dico ío ta quíde cahnu iní-gá cuáháⁿ.

23 Te ducaⁿ quíde-gá cuèndá cutnùnì iní nchaa ñáyiú ñuyú sã ño váha quíde-gá sá cúú-xí nchàa nchoo ñáyiú cùndahú iní-gá, chi ní cachí-gá sá nchóo cuè ñáyiú cùndahú iní-gá nduu táhú-ó cùndecu-o ndihì-gá núú ño váha càa ndecu-gá.

24 Te dava nchoo ñáyiú ní cáháⁿ Yá Ndiöxí cúú-ó ñáyiú isràél, te dava-o cùu-o ñáyiú ñá túú cùu ñáyiú isràél.

25 Te ní quee ndáá-xi nàcuáa ní xáhaⁿ Yá Ndiöxí xii ndíi Òseás téé ní xóo cáháⁿ tnúhu-gá ndéé sanaha ñí chídó tnùnì ndíi núú tütú-gá núú càchí-xi:

Ñáyiú ñá túú cùu cuèndá-í ní cùu te nduu cuèndá-í-yu,

te ñiú-ni ñáyiú-áⁿ ñà túú cùu váha iní-í núú-yu ní cùu, dico vitna cùu váha iní-í núú-yu.

26 Te ñiú-ni ñuú núú dúcáⁿ ñí cachí-í sá ñà túú ñáyiú cùu cuèndá-í ñiú-ni ñuú-áⁿ coo ñáyiú cuu déhe yúhú Dútú Ndiöxí Yaá ndécú tũu andiú.

Duha ní xáhaⁿ Yá Ndiöxí xii ndíi Òseás ní chídó tnùnì ndíi núú tütú-gá.

27 Te ndíi Chàíá téé ní xóo cáháⁿ tucu tnúhu Yá Ndiöxí ndéé sanaha ñí cáháⁿ ndíi cuèndá ñáyiú isràél, te duha ní cachí ndíi: “Cuèi cuéhé víhí ñáyiú isràél dàtná cuéhé ñuhu cùchí lámár dico sacú-ni-yu vá quínì-yu tnúndòho tnúhu ndàhú.

28 Te Yá Ndiöxí ío ndihì cada-gá nchaa nàcuáa càháⁿ-gá ñuyú”, duha ní cachí ndíi.

29 Te ní cáháⁿ tucu ndíi nàcuáa cada-xi ndéé cuèe-gá, te ní cachí ndíi:

Yá Ndiöxí Yaá táxi tnùnì nchaandi túhú sá ío andiú ndihì ñuyú ñà túú ní dànaa-gá nchaa ñáyiú isràél, chi núu ni ndihì-yu danàa ñaha-gá, te nchoo cùu-o datná ní cuu nchaa ñáyiú ní xíndecu ñuú Sòdomá ndihì nchaa ñáyiú ní xíndecu ñuú Gòmorrá, te ndihì-o nàa datná ní naa nchaa ñáyiú-áⁿ ní cùu.

Duha ní cachí ndíi.

Ñáyiú isràél ñá túú sàndáá iní-yu tnúhu Xítoho Jesucristú

30 Te sá cuèndá xiáⁿ ñuú vitna càchí tnúhu-í xii-ndo sã cuè ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudíu-yu núú Yá Ndiöxí, dico vitna cudíu-yu núú-gá chi ní sàndáá iní-yu Xítoho Jesucristú.

31 Te ñáyiú isràél nchicúⁿ nihnú-yu tnúhu sá dánèhé ñáhá xii-yu nàcuáa cadá-yu cudíu-yu núú Yá Ndiöxí dico ñá túú cudíu-yu núú-gá chi ñá ndácũ-yu cadá-yu nchaa nàcuáa càháⁿ-xi.

32 Te ducaⁿ ñà túú cudíu-yu núú Yá Ndiöxí chi ñá túú sàndáá iní-yu Xítoho Jesucristú, te sàni iní-yu sá sã cuèndá mee-ni nchàa sá quíde mée-yu cudíu-yu núú-gá, te sá dúcáⁿ quíde-yu te cùu-yu dàtná ñⁿ ñáyiú nguñenu ñⁿ yúú te nduá-yu. Te ducaⁿ sàtnahá-xi cúú-yu chi ñá túú cùu váha iní-yu núú Xítoho Jesucristú.

33 Te quèe ndáá-xi nàcuáa ní cáháⁿ Yá Ndiöxí ñⁿ xichi núú tütú-gá núú càchí-xi: Yúhú táxi ndècu-í ñⁿ téé ñuú Siòn, te cuu-dé dàtná ñⁿ yúú, te yúú-áⁿ nguñenu ñáyiú te nduá-yu,

te nchaa ñáyiú na quíndáá iní ñáhá xii-dé, te vá ndíxí cuèchi iní-yu sá dúcáⁿ ñí sàndáá iní ñáhá-yu xii-dé.

Duha càchí-gá núú tütú-gá.

10

1 Te nchòhó ñáyiú ndècu ndihì-í ichi Xítoho Jesucristú càchí tnúhu-í xii-ndo sã cáháⁿ ndihì-í Yá Ndiöxí cuèndá ñáyiú isràél, chi ío cuìnì-í sá nánihí tàhú-yu.

2 Te na càháⁿ ndáá-í cuèndá-yu sá ño ndècu ndéé-yu xínu cuechí-yu núú Yá

Ndiöxí, te dicó-ni sá ñà túú quidé-yu nàcuáa cuíní méé-gã cada-yu.

³ Chi ñá túú quide cuendá-yu nàcuáa cuíní Yá Ndiöxí cada ñaha-gã xií-yu nàcuáa cudíú-yu núú-gã, te quide-ní-yu nàcuáa sàni iní méé-yu cudíú-yu núú-gã te ñá túú cuíní-yu tñí-yu tñuhu càháⁿ-gã nàcuáa cudíú-yu núú-gã.

⁴ Te Xítohó Jesucrístú ní quide-gá cuendá sá vã cúnù-gá nchaa tñuhu ní chídó tñuní ndíi Moisés, te nchaa ñáyíu na quíndáá iní ñáhá xii-gá te diu-gá cada te cudíú-yu núú Yá Ndiöxí.

⁵ Te ndíi Moisés càháⁿ ndíi núú tütú ndíi cuendá ñáyíu cuíní cudíu núú Yá Ndiöxí cuendá sá nchícúⁿ nihnú-yu nchaa nàcuáa ní càháⁿ ndíi. Te ní cachí ndíi sá ncháá ñáyíu na càda nchaa nàcuáa ní xáhaⁿ Yá Ndiöxí xii ndíi ní chídó tñuní ndíi te naníhí tãhú-yu, te núu dicó ndacú-yu cada-yu nchaa nàcuáa ní càháⁿ ndíi.

⁶ Dico vitna núu na quíndáá iní-ó Xítohó Jesucrístú, te cudíu-o núú Yá Ndiöxí. Te duha càchí tñuhu ní chídó tñuní ndíi núú tütú-gá: “Vá cání iní-ndó sã xíní ñuhu-xi cada-ndo ñⁿ sá vã yõo tñahí ndacu cada sá cáá tñu-ndo àndíu te cúñaha-ndo xii Cristú cuuⁿ-ndo ndíhí-gã núú ñùyíú-a.

⁷ Te ni vã cání tucu iní-ndó sã quíhíⁿ túu-ndo nñú xíndecu nchaa ñáyíu ní xíhí te cada-ndo sã Cristú ndoto-gá”, duha càchí tñuhu-áⁿ sã vã dúcáⁿ càni iní-ó.

⁸ Te càchí tucu tñuhu-áⁿ: “Tñuhu Yá Ndiöxí sá ndécú ndíhí ñaha-xi xii-ndo chi sàni iní-ndó cuendá tñuhu-áⁿ te càháⁿ-ndó”, duha càchí tñuhu-áⁿ. Te tñuhu sá ndécú ndíhí-ndo-áⁿ cúú-xí tñuhu càháⁿ-ndí núú ñáyíu, te xini ñuhu-xi sá quíndáá iní-yu tñuhu-áⁿ.

⁹ Te núu na nñuu-ndo càháⁿ-ndó sã Xítohó Jesucrístú cúú-gã Xítohó-ndó, te quíndáá iní-ndó ñè yuhu ni iní-ndó sã Yá Ndiöxí ní dándótó-gã Xítohó Jesucrístú, te naníhí tãhú-ndó te núu ducaⁿ na càda-ndo.

¹⁰ Te nchaa ñáyíu ducaⁿ sàndáá iní te càháⁿ-yu sá Xítohó Jesucrístú cúú-gã Xítohó-yu, ñáyíu-áⁿ cudíú-yu núú Yá Ndiöxí te naníhí tãhú-yu.

¹¹ Te núú tütú Yá Ndiöxí càchí-xi sá ni ñⁿ ñáyíu sàndáá iní ñáhá xii Xítohó Jesucrístú

vá ndíxí cuèchi iní-yu sá dúcáⁿ sàndáá iní ñáhã-yu xii-gá.

¹² Te sá cúú-xí Xítohó Jesucrístú chi ñⁿ-ni cùu ñáyíu isràél ndíhí ñáyíu ñá túú cùu ñáyíu isràél, chi diu-gá cúú-gã Yaá cúnù taxi tñuní-gá nchaa ñáyíu, te ío váha quide-gá sá cúú-xí nchaa ñáyíu càháⁿ ndíhí ñaha xii-gá.

¹³ Te quèe ndáá-xi nàcuáa càháⁿ-xi núú tütú Yá Ndiöxí núú càchí-xi: “Nchaa ñáyíu na càháⁿ ndàhú núú Xítohó Jesucrístú sá dácacu nihnu ñaha-gã xií-yu, te ñáyíu-áⁿ naníhí tãhú-yu”, duha càchí-xi núú tütú-gá.

¹⁴ Te ñáyíu-áⁿ vã nihí-yu nàcuáa càháⁿ ndàhú-yu núú-gã te núu ñá túú sàndáá iní ñáhã-yu xii-gá, te ni vã nihí-yu nàcuáa cada-yu quíndáá iní ñáhã-yu xii-gá te núu vátá cùndèdóho-gá-yu tñuhu-gá, te ni vã nihí-yu tñuhu-gá te núu vá yõo quíhíⁿ cùtñuhu ñaha xii-yu.

¹⁵ Te ni vã yõo quíhíⁿ ducaⁿ cùtñuhu ñaha xii-yu tñuhu-gá te núu Yá Ndiöxí vá téndàha-gá ñáyíu quíhíⁿ cùtñuhu ñaha xii-yu. Te núú tütú Yá Ndiöxí càchí-xi: “Ío vii ío váha cùu iní-ó vèxi ñáyíu dànehé ñáhá xii-o nàcuáa ndùu tñuhu sá càháⁿ nàcuáa naníhí tãhú-ó”, duha càháⁿ-xi núú tütú-gá.

¹⁶ Te ñá ncháá-yu cuíní-yu quíndáá iní-yu tñuhu-áⁿ. Te ní quee ndáá-xi nàcuáa ní xáhaⁿ ndíi Chàíá xii Yá Ndiöxí te duha ní xáhaⁿ ndíi xii-gá: “Yòhó Dútú Ndiöxí na nàcani tñuhu-í núú-n sã ío sacú-ni ñáyíu sàndáá iní-yu tñuhu càháⁿ-ndí”, duha ní xáhaⁿ ndíi xii-gá.

¹⁷ Te xini ñuhu-xi sá dñha-gá cund-edóho-yu tñuhu-áⁿ cuendá ducaⁿ te quíndáá iní-yu, te tñuhu-áⁿ cúú-xí tñuhu Xítohó Jesucrístú.

¹⁸ Te vá cúú càháⁿ-ó sã ñà túú ní ñíhí ñáyíu isràél tñuhu-gá, chi ncháá-yu ní ñíhí-yu tñuhu-gá, chi núú tütú Yá Ndiöxí càchí-xi:

Cue tée ní càháⁿ tñuhu Yá Ndiöxí ní càháⁿ-güedé tñuhu-gá núú ñáyíu,

te tñuhu-áⁿ ñè xité nuu-xi ñíhí ñuyíú.

Duha càchí-xi núú tütú-gá.

¹⁹ Te ni vã càháⁿ-ó sã ñáyíu isràél ñá túú ní cùu tñuní iní-yu nàcuáa ndùu tñuhu-gá chi ní tecú tñuní-yu. Te ndéé sanaha ñè chídó tñuní ndíi Moisés nàcuáa ní xáhaⁿ Yá Ndiöxí xii ñáyíu isràél, te duha ní xáhaⁿ-gã xií-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtnuní iní-xi nàcuáa cada váha cundecu núu-í,

te nchòhó cudééⁿ-ndó núu-yu te cuu cuédú ín-í-ndó-yu.

Duha ní xáhaⁿ Yá Ndiòxí xií-yu te ducaⁿ ní chídó tnùn-í ndí Moisés.

²⁰ Te ndí Chàiaá ñá túú tnàhí ní yùhú ndí ní quide ndí núú Yá Ndiòxí ní cáháⁿ ndí tnúhu-gá, te ní cachí ndí:

Ñáyiú ñá túú nànducu ñaha xii-í ní cùu ní naníhí ñáhá-yu xii-í,

te ní ñá túú ndùcu tnúhu ñáhá-yu xii-í ní cùu te ní xiní ñáhá-yu.

Duha ní cachí ndí Chàiaá ní cáháⁿ ndí tnúhu Yá Ndiòxí.

²¹ Te ní quide tucu ndí núú Yá Ndiòxí ní cáháⁿ ndí tnúhu-gá cuendá ñáyiú isràél, te ní cachí ndí: “Nchaa-ni nduu yìhi-í càháⁿ-í ñáyiú isràél te ñá túú cuín-í-yu quindáa ín-í-yu chí ío sàá ín-í-yu”, duha ní cachí ndí Chàiaá ní cáháⁿ ndí tnúhu Yá Ndiòxí.

11

Cuendá ñáyiú isràél ñáyiú naníhí tàhú

¹ Te cuèi ducaⁿ dico vá càháⁿ-ó sá Yá Ndiòxí dáquèe tíhú-gá ñáyiú isràél chí ñu-ni ñáyiú-áⁿ cúu cuendá-gá, chí yùhú tnàhá-í cúu-í mei tèe isràél, te ñani tnàhá-í ní cuu ndí Àbrahám tèe ní xindecu ndéé sanaha vèhi-gá, te ñu-ni ñani tnàhá-í ní cuu tucu ndí Benjamín.

² Te ndéé sanaha dùcaⁿ ní cachí Yá Ndiòxí sá nchùhú ñáyiú isràél cúu-ndí ñáyiú cùu cuendá-gá, te ñá túú dàquee tíhú ñáhá-gá xii-ndí, te nchòhó sa xini-ndó nàcuáa càháⁿ-xi núú tütú Yá Ndiòxí núú càhí-xi nàcuáa ní quide té Èliás ní ndacáⁿ cuéchi-dé núu-gá cuendá ñáyiú isràél.

³ Te duha ní xáhaⁿ-dè xii-gá: “Yòhó Dútú Ndiòxí, ná nàcani tnúhu-í núu-n sá ní sahní-yu cue tèe càháⁿ tnúhu-n, te ní dátanú-yu núú xihí quiti nduu táhú-n, te yùhú-ná ní cácu-í ndécù-í dico nànducu ñáhá-yu chí tnàhá-í cuín-í-yu cahni ñáhá-yu xii-í”, duha ní xáhaⁿ-dè xii Yá Ndiòxí.

⁴ Te Yá Ndiòxí ní xáhaⁿ-gá xii-dé: “Sa ní dáquèe dèⁿ-í úsá míl cue tèe cùu cuendá-í, te ñá túú nèhe-güedé sá yíñuhu núú Bàál sá

càhí-yu cùu ndiòxí-yu te ñá ndáá sá ndiòxí cúu-xi”, duha ní xáhaⁿ-gá xii té Èliás.

⁵ Te ducaⁿ sàtnahá-xi cùu vitna chí xindecu ñáyiú ní cáháⁿ-gá ní chitnahá ñáhá xii-gá, te ducaⁿ ní quide-gá chí ní cundàhú ín-í ñáhá-gá xií-yu.

⁶ Te ducaⁿ ní cáháⁿ ñáhá-gá xií-yu sá cundàhú ín-í ñáhá-gá, te ñá díú cuendá ñⁿ chiuⁿ quidé-yu ducaⁿ ní cáháⁿ ñáhá-gá xií-yu, chí núu dícó cuendá ñⁿ chiuⁿ quidé-yu ducaⁿ ní cáháⁿ ñáhá-gá xií-yu ña, te ñá díú-gá sá cúu ín-í méé-gá ducaⁿ ní cáháⁿ ñáhá-gá xií-yu te núu ducaⁿ.

⁷ Te na càhí tnúhu-í xii-ndo nàcuáa cùu vitna sá ñáyiú isràél cuín-í-yu cudíu-yu núú Yá Ndiòxí dico ñá ndácù-yu, dico dava ñáyiú ní cáháⁿ-gá ñáyiú-áⁿ cudíu-yu núu-gá, te ñáyiú ducaⁿ ñá túú cùdú núu-gá-áⁿ ío ní cuu sàá ín-í-yu núu-gá.

⁸ Te ní quee ndáá-xi nàcuáa càháⁿ-xi núú tütú Yá Ndiòxí núú càhí-xi: “Yá Ndiòxí ní cachí-gá sá cúu-yu ñáyiú ío ñi díquí-xi, chí cuèi ndèhé-yu nàcuáa càháⁿ tnúhu-gá dico ñá cùtnuní ín-í-yu nàcuáa càháⁿ-xi, te cuèi ndèdóho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càhí-xi núú tütú-gá.

⁹ Te ndí Dàvíí ní cachí ndí: Ñáyiú ío váha ndècu te cudíí ín-í-yu quidé-yu vico, dico yáha-yu dàtná yáha ñⁿ quiti ngáva trampá àdi ñⁿ quiti ñá cùtnuní ín-í-xi quèe xiti ñunu, chí cuíta nihnú-yu te nacháhu-yu nchaa sá quidè-yu.

¹⁰ Te cúu-yu ñáyiú ñá túú vèdana tècú tnùn-í, te cùu tucú-yu dàtná ñⁿ ñáyiú ío ndòho nchido ñⁿ sá vèe.

Duha ní cachí ndí Dàvíí.

Ñáyiú ñá túú cùu ñáyiú isràél naníhí tàhú-yu

¹¹ Te cuèi ducaⁿ dico vá càhí-ó sá sá dúcáⁿ ñá túú ní quide ndáá ñáyiú isràél te ní xita nihnu duúⁿ-yu, te ñáhá chí sá dúcáⁿ ní quidé-yu te ní ngúndecu ndíhi dava-gá ñáyiú tnúhu sá càháⁿ nàcuáa naníhí tàhú-yu, te ñáyiú isràél quín-í-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudíí ín-í-yu naníhí tàhú-yu.

12 Te sá dúcáⁿ ñí quide sàá iní-yu ñá túú ní quide ndáá-yu núú Yă Ndiöxí, te xíáⁿ ní cuu-xi ñí sá vâha sá cúú-xí ñâyiu ñihí ñuyúú, dico sáá nduu te cada ñâyiu isràél nchaa nâcuáa càháⁿ Yă Ndiöxí, te dâvâ-áⁿ ño-gá váha cuu xii nchaa ñâyiu ñihí ñuyúú.

13 Te nchòhó ñâyiu ñá túú cùu ñâyiu isràél càchí tñúhu-í xii-ndo sã Yă Ndiöxí ní cachí-gá sá càháⁿ-í tñúhu-gá núú-ndó, te yúhú càchí-í sá ño càhnu cuu chiuⁿ quide-í.

14 Te duha càháⁿ-í cuendá sá ñuu cudana ío dava ñâyiu cùu ndi mee-í cudí iní-yu cada váha ñaha Yă Ndiöxí xii-yu dàtná quidé váha ñaha-gã xii-ndo, te naníhí tàhú-yu.

15 Te sá cuendá sá ñí quee tíhú ñâyiu isràél ní nacáháⁿ càhnu iní tñáhá ñâyiu ñihí ñuyúú ndihí Yă Ndiöxí, dico na sàá nduu núcúndecu váha ñâyiu isràél ndihí Yă Ndiöxí, te ío-gá váha tñáhá ñâyiu ñihí ñuyúú, te ñâyiu-áⁿ cada iní-ó sã cúú-yu dàtná ñâyiu ní xíhí, dico dâvâ-áⁿ cada tucu iní-ó sã cúú-yu dàtná ñâyiu ní ndoto chi nucúndecu váha-yu ndihí-gá.

16 Te núu sá lúhá-ní ñí tílúlú yusaⁿ càvâha te ñuu-ñi ducaⁿ càvâha ñihí. Te núu càvâha yóho ñí yutnu te ñuu-ñi ducaⁿ càvâha-xi ñihí-xi. Te ñuu-ñi ducaⁿ sãtnahá-xi cùu ñâyiu isràél, chi ñaní tñáhá-yu ní xíndecu ndéé sanaha ñí cuú-yu ñâyiu ní cuu cuendá ñáhá Yă Ndiöxí, te ñuu-ñi ducaⁿ cùu cuendá ñáhá-gã xii mee-yu ndéé vitna.

17 Te ío ñí yutnu váha nàni olívú, te dava dité yutnu-áⁿ ñí téhndé te ní nucódó dité yutnu òlívú cùtexínu, te mee-ñá yutnu òlívú váha-áⁿ ño váha quide-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cúú-xí dàtná ñâyiu isràél, te nchaa dité-xi sá ñí téhndé-áⁿ cúú-xí ñuu-ñi ñâyiu isràél ñâyiu ñá túú tñáhá tñúhu ndihí Yă Ndiöxí. Te dité yutnu òlívú cùtexínu sá ñí nucódó tñáhá-áⁿ cúú-xí dàtná ñâyiu ñá túú cùu ñâyiu isràél tñáhá tñúhu ndihí Yă Ndiöxí.

18 Te vá cáni iní-ndó sã sà dúcáⁿ ndècu váha-ndo ndihí Yă Ndiöxí te ío cùnuu-ndo dacúxí ñâyiu isràél, te vá dúcáⁿ càni iní-ndó chi sá cuendá nchaa ñaní tñáhá ñâyiu isràél ní xíndecu ndéé sanaha ducaⁿ ndècu váha-ndo ndihí Yă Ndiöxí vitna, te ñá díú sã cuendá nchòhó ndécú ndihí váha ñâyiu-áⁿ Yă Ndiöxí vitna.

19 Te cudana sàni iní-ndó te càchí-ndó sã ñâyiu isràél ní quee tíhú-yu cuendá sá nchòhó nucuíñí-ndó núú-yu nucúndecu váha-ndo ndihí Yă Ndiöxí.

20 Te ndáá sá ñí quee tíhú-yu chi ñá túú ní sàndáá iní ñáhá-yu xii-gá, te nchòhó ío váha cùu ndecu-ndo ndihí-gá chi ní sàndáá iní-ndó-gã, dico vá càchí-ndó sã ño càhnu cuu-ndo, te ío váha chí cuâha cuendá nâcuáa cundecu-ndo.

21 Te cue ñâyiu isràél cúú-yu ñâyiu cùu cuendá-gá ní cùu te ní dáquée tíhú ñáhá-gã xii-yu cuendá sá ñá túú ní sàndáá iní ñáhá-yu xii-gá, te tñáhá nchòhó daquée tíhú ñáhá-gã xii-ndo te núu na càda-ndo datná ní quide ñâyiu-áⁿ.

22 Te chí cáda cuendá sá Yă Ndiöxí ío váha iní-gá, dico cùdééⁿ-gã núú nchaa ñâyiu ñá túú sàndáá iní ñáhá xii-gá, dico sá cúú-xí nchòhó cue ñâyiu sàndáá iní ñáhá xii-gá chí ío váha iní-gá. Te ducaⁿ-ni cùnduu váha iní-gá sá cúú-xí-ndó te núu vá dáñá ndèé-ndó càda-ndo nâcuáa càháⁿ-gã cuendá sá ño váha iní-gá, te núu ñáhá te tñáhá nchòhó quee tíhú-ndó dàtná ní quee tíhú ñâyiu isràél, ñâyiu ñá túú ní sàndáá iní ñáhá xii-gá.

23 Dico núu ñâyiu isràél ñâyiu ní dáquée tíhú ñáhá Yă Ndiöxí quíndáá iní ñáhá-yu xii-gá te nduu cuendá ñáhá tucu-gá xii-yu, te ñâyiu-áⁿ cúú-yu dàtná dava dité yutnu òlívú sá ñí téhndé te ní nucódó tñáhá tucu. Te ducaⁿ sãtnahá-xi cúú-yu te núu na quíndáá iní ñáhá-yu xii-gá.

24 Te nchòhó cúú-ndó dàtná nchaa dité yutnu òlívú cùtexínu, chí ñá díú ñâyiu isràél cúú-ndó, te dité nchaa yutnu òlívú cùtexínu-áⁿ ñí nucódó-xi núú dité yutnu òlívú váha-áⁿ. Te yáchí-gá nucúndecu váha ñâyiu isràél ndihí Yă Ndiöxí, chí cúú-yu dàtná nchaa dité yutnu òlívú váha sá ñí téhndé te ní nucódó tñáhá tucu. Te ducaⁿ sãtnahá-xi cúú-yu te núu na quíndáá iní ñáhá-yu xii-gá.

Sáá nduu te naníhí tàhú ñâyiu isràél

25 Te nchòhó ñâyiu ndècu ndihí-í ichi Xítoho Jesucristú, na càchí tñúhu-í xii-ndo ñí tñúhu nduu yuhu ni cuu, cuendá sá vá cáni iní-ndó sã ño-gá váha sàá díquí-ndó

dàcúxí ñáyiú isràél, chi dava ñáyiú isràél cúú sàá iní-yu núú Yá Ndiöxí ñini na ndìhi ñáyiú ní cachí Yá Ndiöxí ngúndecu váha ndìhi ñàhá-yu xii-gá, ñáyiú ñá túú cùu ñáyiú isràél.

26 Te nduu na ndìhi ñáyiú-áⁿ ngúndecu váha-yu ndìhi Yá Ndiöxí, te dàvá-áⁿ naníhí tàhú ñáyiú isràél chi quee ndáá-xi nàcuáa càháⁿ Yá Ndiöxí núú tütú-gá núú càchí-xi:

Ndàa ñuú Sìón quixi Yaá cada naníhí tàhú nchaa ñáyiú,

te ñu-ni Yaá-áⁿ cada-gá cuendá sá dáñá nchàa ñáyiú isràél ichi cuèhé ichi duha.

27 Te yúhú cada càhnu iní-í nchaa cuéchi ñáyiú isràél, chi cada-í dàtná ní cachí-í ndéé sanaha.

Duha càchí Yá Ndiöxí núú tütú-gá.

28 Te sá cuendá tnúhu sá càháⁿ nàcuáa naníhí tàhú-ó xíáⁿ cúú ùhú iní ñáyiú isràél Yá Ndiöxí, te sá dúcáⁿ quidé-yu xíáⁿ nchòhó ní níhí-ndó tnúhu sá càháⁿ nàcuáa naníhí tàhú-ndó. Te ní cachí Yá Ndiöxí sá ñáyiú isràél cuu cuendá-gá, te cùu iní ñàhá-ní-gá xií-yu, te ducaⁿ quide-gá chi ducaⁿ ñí xáhaⁿ-gá xii cue ñaní tnàhá-yu ní xíndecu ndéé sanaha.

29 Te Yá Ndiöxí ñá túú ndùu úhú iní-gá ñí sá táxí-gá, te ñí ñá túú ndìxi cuéchi iní-gá sá càháⁿ ñàhá-gá xii-o.

30 Te nchòhó chi ñá túú sàndáá iní-ndó Yá Ndiöxí ní cùu, dico vitna ñini ñá túú sàndáá iní ñàhá ñáyiú isràél xii-gá, te ní cundàhú iní ñàhá-gá ní dácäcu nihnu ñaha-gá xii-ndo núú ùhú núú ndàhú.

31 Te vitna quidé-yu dàtná ní xóo cada nchòhó cùtnàhá ñá túú ní xóo quindáá iní-ndó-gá. Dico sáá nduu te natuha ñàhá-yu xii-gá te dácäcu nihnu ñaha-gá xií-yu sá cundàhú iní ñàhá-gá dàtná ní quide ñaha-gá xii nchòhó.

32 Te Yá Ndiöxí ní dáñá-gá sá dúcáⁿ cùnduu saá iní nchaa ñáyiú cuendá cuíní-gá cundàhú iní ñàhá-gá xií-yu.

33 Te súúní váha quide ñaha Yá Ndiöxí xii-o, te ío váha xíní-gá nchaa cuéi sá ío andiu te cuéi sá ío ñuyíú-a, te ducaⁿ ío váha sáá nchaa sá xíní tnùní-gá. Te ñá ndácú-ó cùtnuní iní-ó ñá cúú nchàa sá sání iní-gá cada-gá, te ñí ñá ndácú-ó cùtnuní iní-ó nàcuáa ndùu cuendá nchaa sá quidé-gá.

34 Te núú tütú-gá càchí-xi: “Vá yóo ñí cùtnuní iní-xi nàcuáa sàni iní Yá Ndiöxí, te ñí vá yóo ñí ndàcu dachahu iní ñàhá xii-gá nàcuáa càháⁿ-gá.

35 Te Yá Ndiöxí ñá túú quide yica iní-gá cada-gá sá váha sá cúú-xí ñáyiú cuendá ñí sá sàñàhá-yu xii-gá chi ñá túú dùcaⁿ quide-gá”, duha càchí-xi núú tütú-gá.

36 Te ducaⁿ chi mee Yá Ndiöxí ní taxi ndecu-gá nchaandi túhú sá ío ñuyíú, te ñu-ni mee-gá táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sá ío càhnu cuu-gá ñí caa ñí quíhíⁿ. Te ducaⁿ na cùnduu.

12

Cada-o nàcuáa nduu vétú iní Yá Ndiöxí

1 Te vitna nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sá Yá Ndiöxí cundàhú iní ñàhá-gá xii-o chindee ñaha-gá, núu xíáⁿ càháⁿ ndàhú-í núú-ndó sá dáñá-ndó mèe-ndo núú ndàhá-gá, te cada iní-ndó sá cúú-ndó dàtná ñí tàhú sá nchító-ó ñí nduu tàhú-gá. Te cuu-ndo ñáyiú váha ñáyiú cada nchaa nàcuáa nduu vétú iní Yá Ndiöxí chi ducaⁿ tàú-ndó càda-ndo sá cúú-xí-gá.

2 Te vá cànchìcúⁿ nihnu-gá-ndó càda-ndo datná xíquide nchaa ñáyiú ndècu ichi cuèhé ichi duha ndècu ñuyíú-a, te vá cúhúⁿ-gá iní-ndó ìchi cuèhé ichi duha-án, chi mee-ñá sá váha cuhúⁿ iní-ndó, te ducaⁿ te cutnùní iní-ndó nchàa nàcuáa cuíní Yá Ndiöxí cada-ndo, te nchaa sá cuíní-gá cada-ndo cùu-xi mee-ñí sá váha, sá ío váha ndùu vétú iní-gá, te cùu-xi nchaa sá xíní ñùhu-xi cada-ndo núú-gá.

3 Te sá cuendá chiùⁿ ní cundàhú iní ñàhá Yá Ndiöxí ní taxi-gá xii-í xíáⁿ núu na càháⁿ-í dóho-ndo vitna: Vá cání ìní-ndó ñí sá ñá túú tàú-ndó càni iní-ndó te cucahaⁿ-ndo sá ío càhnu cuu-ndo. Te nchòhó ní sàndáá iní-ndó Yá Ndiöxí núu chindee ñaha-gá xii-ndo, te vitna chí cuàha cuendá núu ná daha núú chiùⁿ-gá ndacu-ndo càda-ndo.

4 Te nchoo tìtní xichi cùu yiqui cuñú-ó, te ndì dííⁿ ndì dííⁿ chiùⁿ quide-xi ñí ñí-xi.

5 Te ducaⁿ sàtnahá tucu-xi cùu nchoo ñáyiú ndècu ndìhi Xítohó Jesucristú chi cuéi ná daha tnàhá-ó dico ñí-ñí cùu-o ndìhi-gá, te ducaⁿ mèe-o tucu ñí-ñí cùu-o.

6 Te mee Yă Ndiöxí ní cundàhú iní ñáhá-gă xii-o nĩ taxi-gă chiuⁿ taú-ó càda-o ìⁿ ìⁿ-o te chindee ñaha-gă xii-o, te xini ñuhu-xi cada-o nacuaa nduu chiuⁿ ní taxi-gă cada-o. Te núu ní nduu táhú-ó nũú-gă sá cãháⁿ-ó tnũhu sá dácàhu iní ñáhá mèe-gă xii-o te cãháⁿ-ó nàcuáa sàndáá iní-ó chindee ñaha-gă xii-o,

7 àdi ní nduu táhú-ó nũú-gă sá ìo váha chindee-o tnàha ñáyiu-o te ñiu-ni ducaⁿ càda-o, àdi ní nduu táhú-ó d`nehé-ó ñáyiu tnũhu-gă te ñiu-ni ducaⁿ càda-o,

8 àdi ní nduu táhú-ó nũú-gă sá dácãháⁿ-ó ñáyiu canchicúⁿ nihnú-yu ichi-gă te ñiu-ni ducaⁿ càda-o, àdi ní nduu táhú-ó nũú-gă sá cuãñaha-o xii tnaha ñáyiu-o sã ñihí-ó ndècu ndihí-o te ñiu-ni ducaⁿ càda-o, dico ni yùhu ni iní-ó cuãñaha-o xii-yu, àdi ní nduu táhú-ó nũú-gă taxi tnùnì-ó te ñiu-ni ducaⁿ càda-o, te ni yùhu ni iní-ó càda-o, àdi ní nduu táhú-ó nũú-gă chindee-o cuè ñáyiu ndècu ndihí tnúndòho tnũhu ndàhú te ñiu-ni ducaⁿ càda-o, te ìo cudíí iní-ó càda-o chiuⁿ-áⁿ.

Nchaa nàcuáa tàú-xi cada nchaa ñáyiu ndècu ichi Xítóhó Jesucristú

9 Te cuu iní tnáhá ndisa-ndo ìⁿ ìⁿ-ndo, te dañà-ndo nchàa sá cuèhé sá dúhá te cada-ndo mèe-ni sá v`ha.

10 Te ìo cuu iní tnáhá-ndó, te cada-ndo cuèndá sá ìⁿ-ní ñáyiu cùu-ndo, te ìⁿ ìⁿ-ndo càni-gă iní-ndó cànehe yiñuhu núu tnáhá-ndó.

11 Te nducu ndèe-ndo cada-ndo nchaa chiuⁿ tahu Xítóhó Jesucristú vá t`hío-ndo, te cada-ndo n`yuhu ni iní-ndó sã cúú-xí-gă.

12 Te ìo cudíí iní-ndó cundecu-ndo chi ní ngúndecu ndihí-ndo tnũhu ndee iní sá cundècu ndihí-ndo Xítóhó Jesucristú, te cada càhnu iní-ndó cuèi nándi na càda ñaha ñáyiu xii-ndo sã cuèndá-gă, te vá dáñá ndèé-ndó cãháⁿ ndihí-ndo Yă Ndiöxí.

13 Te chindee tnàha-ndo te núu ìo daya nchòhó ñáyiu ndècu ichi-gă ìo ìⁿ sá cúm`ni xii-ndo, te ìo váha cuu iní-ndó còto-ndo ñáyiu véxi vehe-ndo.

14 Te c`cáⁿ táhú-ndó nũú Yă Ndiöxí cuèndá nchaa ñáyiu nándi quide ñaha xii-ndo, te c`cáⁿ táhú-ndó nũú-gă sá ná chindee ñaha-gă xii-yu te ñá díú dà c`cáⁿ táhú-ndó nũú-gă sá ná dàcuíta nihnu ñaha-gă xii-yu.

15 Te núu ìo ñáyiu cùdíí iní-xi te cudíí iní-ndó ndihí-yu, te núu ìo ñáyiu ndihú iní-xi te ndihú iní-ndó ndihí-yu.

16 Te cuu ìⁿnuu-ndo cundecu-ndo, te vá c`dá càhnu-ndo mee-ndo, te tnahá tnũhu-ndo ndihí nchaa ñáyiu ndàhú iní-xi, te vá c`ni iní-ndó sã ìo-gă túha-ndo.

17 Te vá n`nchòc`va-ndo n`chinaa-ndo ìⁿ sá quidé ñaha ñáyiu xii-ndo, te ìo nducu ndèe-ndo cada-ndo mee-ni sá váha nàcuáa cuu váha iní ñáyiu.

18 Te ìo nducu ndèe-ndo cada-ndo sá ndácú-ndó cundecu váha-ndo ndihí nchaa ñáyiu.

19 Te nchòhó ñáyiu ìo cùu iní-í, vá c`ni iní-ndó n`chinaa-ndo ìⁿ sá c`dá ñaha ñáyiu xii-ndo, chi cundetú-ndo sã mée Yă Ndiöxí ná n`chinaa-gă sá quidé ñáhá-yu xii-ndo, chi quee ndáá-xi nàcuáa càháⁿ Yă Ndiöxí núu t`tú-gă núu c`chí-xi: “Yúhú dandòho-í-yu chi nachinaa-í nchaa sá quidé-yu”, duha c`chí-gă núu t`tú-gă.

20 Te xini ñuhu tucu-xi cada-ndo nacuaa càháⁿ tucu-xi ingá xichi núu t`tú-gă núu c`chí-xi: “Te núu ñáyiu cùu úhú iní ñáhá xii-ndo ñá túú sã c`hó sã c`xí-yu te cuãñaha-ndo xii-yu, te núu ducaⁿ na càda-ndo te ìo cucahaⁿ núu-yu”, duha c`chí-xi núu t`tú-gă.

21 Te núu ìo ìⁿ sá quidé ñaha tnaha ñáyiu-ndo xii-ndo te vá n`nchòc`va-ndo n`chinaa-ndo sá quidé ñáhá-yu xii-ndo, chi cada-ndo sã váha sá cúú-xí-yu, te ducaⁿ te vá c`dá-ndó sã ñà túú tàú-ndó càda-ndo núu Yă Ndiöxí dàtná quidé-yu.

13

1 Te nchaa ñáyiu tàú-yu quindáá iní-yu nchaa cue tée c`chiuⁿ, chi Yá Ndiöxí ní cachí-gă sá cundècu tée c`chiuⁿ ñuyúú-a, núu xíáⁿ x`ndecu-güedé vitna.

2 Te nchaa ñáyiu ñá túú sàndáá iní ñáhá xii cue tée c`chiuⁿ ñá túú tnàhá iní Yă Ndiöxí sá dúcáⁿ quidé-yu, chi mee-gă ní cachí-gă sá cundècu-güedé. Te nchaa ñáyiu ducaⁿ ñà túú sàndáá iní ñáhá xii cue tée c`chiuⁿ nacháhu-yu sá dúcáⁿ quidé-yu.

3 Te nchaa ñáyiu quide váha ñá túú yùhú-yu cue tée c`chiuⁿ chi quide váha-yu, dico nchaa ñáyiu ñá túú quide váha chi xiyùhú-yu cue tée c`chiuⁿ. Te vitna núu

nchòhó cuení-ndó sã vã yùhú-ndó cuè téè cùchiuⁿ te chí cádá vãha, te ducaⁿ te cáháⁿ vãha-güedé cuendá-ndó.

4 Te Yá Ndiõxí ducaⁿ nĩ cachí-gá cundecu-güedé cuendá cada-güedé sá ñà túú nã cuu cundecu-ndo, te núu ñã túú quide váha-ndo ndècu-ndo te quiyùhú iní-ndó nũú-güedé, chí ñã túú àúⁿ nã cuu ndècu ndihí-güedé tnúhu ndee iní dandòho-güedé nchaa ñáyiú ñã túú quide váha, chí Yá Ndiõxí ducaⁿ nĩ cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñã túú quide váha.

5 Núu xíãⁿ ío xini ñuhu-xi sá quindáá iní-ndó nchàa cue téè cùchiuⁿ, te ñã díú sã yùhú-ndó dandòho ñaha-güedé xii-ndo, chí cada-ndo sã cùtnúni iní-ndó sã cúú-xí ñⁿ sã vãha.

6 Chí ñu cuendá xíãⁿ sàcáⁿ-ndó díhúⁿ nũú cuè téè cùchiuⁿ, te ducaⁿ chí Yá Ndiõxí ducaⁿ nĩ cachí-gá cundecu-güedé te ñu-ná chiúⁿ ndeé-güedé ñúhú iní-güedé.

7 Te nacháhu-ndo nchàa sá tàú-ndó nũú nchàa ñáyiú tàú-ndó nũú-xi, te cuè díhúⁿ tàú-ndó cuendá ñuhu-ndo nũú cuè téè cùchiuⁿ àdi nágá díhúⁿ tàú-ndó nũú-güedé te nacháhu-ndo nũú-güedé. Te ío-gá canehe-ndo sã yíñùhu núú nchàa ñáyiú cùnùu, te cáháⁿ váha-ndo ndihí-yu.

8 Te vã dácúidó-ndó ndùu nacháhu-ndo sã tàú-ndó nũú tnàha ñáyiú-ndo, te cuu iní tnáhá-ndó ñⁿ ñⁿ-ndo. Te núu ducaⁿ quide-ndo ndecu-ndo ñã, te quide-ndo nchaa nacúáa càháⁿ tnúhu sá sánú ichi ñaha xii-o nacúáa cada-o cundecu-o.

9 Te duha ndùu tnúhu càháⁿ Yá Ndiõxí cuendá nchaa sã vã cúú càda-o: “Nchaa nchòhó cue téè vã càháⁿ ndihí-ndo ñáyiú dìhí te núu ñã díú ñàdihí-ndó cùú-yu, te ducaⁿ-ni nchàa nchòhó cue ñáyiú dìhí tucu vã càháⁿ ndihí-ndo téè te núu ñã díú yí-ndo cuu-güedé, te vã cáhni-ndó tnàha ñáyiú-ndo, te vã dúhú-ndó sã ndécú ndihí-yu, te vã dácàcu-ndo cuèchi neñùú, te vã xíhó-ndó sã ndécú ndihí tnaha ñáyiú-ndo”, nchaa xéhé cãchí Yá Ndiõxí sã vã cúú càda-o. Te tnúhu-a quide-o ndihí nchaa dava-gá tnúhu sá sánú ichi ñaha xii-o nacúáa cada-o cundecu-o, te núu quide-o ingá tnúhu sã cãchí-xi: “Cuu iní-ndó nchàa tnaha ñáyiú-ndo dàtná cúú iní-ndó

mèe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacúáa càháⁿ tnúhu-a.

10 Te nchaa ñáyiú cùu iní tnàha ñáyiú-xi te ñã túú quide úhú iní-yu tnàha ñáyiú-yu, te núu ducaⁿ cùu iní-yu tnàha ñáyiú-yu te quide-yu nacúáa càháⁿ tnúhu sá sánú ichi ñaha xii-o nacúáa cada-o cundecu-o.

11 Te ducaⁿ xini ñuhu-xi cada-ndo chí sa ní cutnùni iní-ndó nacúáa ta xica nduu cuáháⁿ ñuyúú-a, te ní sáá nduu sá ío xini ñuhu-xi ndixi túu iní-ó càda-o nchaa nacúáa càháⁿ Yá Ndiõxí, chí vitna sa ní cuyatni-gá nduu nacúaca ñaha Xítohó Jesucristú xii-o dàcúxí ndeé cùtnàhá ní sándáá iní-ó tnúhu-gá.

12 Te cada iní-ndó sã dàtná ñⁿ niú sá sã ta cuyatni túndaá, ducaⁿ sãtnahá-xi cùu ñuyúú yíca cuèchi-a chí sa ta cùyatni nduu quixi tucu Xítohó Jesucristú, te núu xíãⁿ xini ñuhu-xi dañá-o nchaa sá cuèhé sá dúhá te cada-o mèe-ni sã vãha, te ducaⁿ te ní ñⁿ sã cuèhé sá dúhá vã cùnùu-xi taxi tnuní ñáhá-xi xii-o, te ducaⁿ te vã cúú-gã-ó dàtná ñáyiú ndècu núú néé chí cuu-ná-ó dàtná ñáyiú ndècu núú ditó.

13 Te cada-o nchàa nacúáa tàú-xi cunduu cundecu-o dàtná tàú-xi cada ñáyiú ndècu ichi Xítohó Jesucristú, te vã quíhíⁿ-ó vico cuèhé vico duha, te vã cúú-ó ñáyiú quíhu, te ní vã càháⁿ ndihí-o ñáyiú dìhí te núu ñã díú ñàdihí-ó cùú-yu, te ducaⁿ-ni cuè ñáyiú dìhí tucu vã càháⁿ ndihí-yu téè te núu ñã díú yí-yu cùu-güedé, te ní vã cundècu-o ichi díí iní, te ní vã nàá-ó ndihí tnaha ñáyiú-o, te ní vã cúú-ó ñáyiú cuédú iní.

14 Te vitna nchòhó dañá-ndo mèe-ndo sá Xítohó Jesucristú ná chindee ñaha-gá xii-ndo càda váha-ndo cundecu-ndo datná quidé mèe-gá ndécú-gã, te vã cãní-gã iní-ndó càda-ndo datná ní xóo cada-ndo cùtnàhá ní cunuu nchàa sã cuèhé sá dúhá iní-ndó.

14

Vã cuátnùhu tnaha-o nacúáa ndècu-o ichi Xítohó Jesucristú

1 Te núu ñⁿ ñáyiú ndècu ichi Xítohó Jesucristú ñã túú tècú tnùnì váha-yu nacúáa cuení Yá Ndiõxí cadá-yu, te queheⁿ cuendá-ni-ndó-yu te vã ténáá tnáhá-ndó ndihí-yu.

² Chi ió ñáiyu sàni iní sá cúú vǎha iní Yǎ Ndiǒxí sá cúú càxí-yu nání nìhí-yu, te dava ñáiyu ñá túú cùtnuní váha iní-yu nàcuáa càháⁿ Yǎ Ndiǒxí te mee-ni yǔcú xéxǐ-yu.

³ Te ñáiyu xèxi nchaa núú sǎ nìhí-yu te vá dáquèe tíhǔ-yu ñáiyu ñá túú xèxi, te ducaⁿ-ni ñáiyu ducaⁿ ñà túú xèxi-áⁿ vǎ cuátnùhú-yu nchaa ñáiyu ducaⁿ xèxi nchaa núú sǎ nìhí-xi-áⁿ, chí tnàhá ñáiyu ducaⁿ xèxi nchaa núú sǎ nìhí-xi-áⁿ quéhéⁿ cuèndá ñáhá Yǎ Ndiǒxí xií-yu.

⁴ Te ñá túú ndècu ndìhi-o tnúhu ndee iní cuatnúhu-o ñáiyu xínu cuechi, chí mee ñáiyu cùu patródⁿ-yu tàú-yu càháⁿ-yu te núu cùndáá ñáiyu xínu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáiyu xínu cuechi núú Yǎ Ndiǒxí, chí mee-gǎ càháⁿ-gǎ te núu nása quidé-yu, te ñu-ni mee-gǎ cada te cùndáá-yu cundécú-yu núú-gǎ.

⁵ Te ña càchí tnúhu tucu-í xii-ndo sǎ ió ñáiyu càchí sá ió dava nduu ío càhnu cuu-xi, te ió tucu dava ñáiyu càchí-yu sá ñⁿ-ni cuu-xi nchaa-ni nduu, te xini ñuhu-xi sá cùtnuní ndáá iní-yu sá ndáá cúú-xí nàcuáa càháⁿ-yu ñⁿ ñⁿ-yu.

⁶ Te ñáiyu cánehe íi dava nduu quidé-yu sá néhě-yu sá yíñùhu núú Yǎ Ndiǒxí, te ñáiyu càchí sá ñⁿ-ní cùu-xi nchaa-ni nduu quidé-yu sá néhě-yu sá yíñùhu núú Yǎ Ndiǒxí tnàhá-yu. Te ñu-ni ducaⁿ sǎtnahá-xi cùu nchaa ñáiyu xèxi nchaa nání nìhí-yu, chí quidé-yu sá néhě-yu sá yíñùhu núú Yǎ Ndiǒxí, chí ndàcáⁿ táhǔ-yu núú-gǎ cuèndá nchaa sá nìhí-yu. Te ñu-ni ducaⁿ sǎtnahá-xi cùu nchaa ñáiyu ñá túú xèxi nchaa núú sǎ nchító-ó chí quidé-yu sá néhě-yu sá yíñùhu núú Yǎ Ndiǒxí, te ndàcáⁿ táhǔ-yu núú-gǎ cuèndá nchaa sá nìhí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá ñá cuèndá mée-ó cùú-ó.

⁸ Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó ñu-ni sá cúú-xí-gǎ, núu xiǎⁿ cuèi vitna ndècu vívú-ó àdi cuèi na cùú-ó dico ñu-ni Xítóhó Jesucristú cúú cuèndá ñáhá-gǎ xii-o.

⁹ Chi Xítóhó Jesucristú ní xíhí-gǎ te ní ndoto-gǎ, te vitna cùu-gǎ Xítóhó nchaa

ñáiyu, cuèi ñáiyu xǐndecu vívú te cuèi ñáiyu ní xíhí.

¹⁰ Te nchòhó, ñá túú nduu váha-xi cuatnuhu tnàha-ndo nàcuáa ndècu-ndo ichi Xítóhó Jesucristú, te ní ñà túú nduu váha-xi daquèe tíhú tnàhá-ndó, chí nchaa-o sǎa nduu cùndecu-o núú Xítóhó Jesucristú, te mee-gǎ cachí-gǎ te núu ní quide ndáá-ó àdi ñá túú ní quide ndáá-ó.

¹¹ Te Yá Ndiǒxí càchí-gǎ núú tütú-gǎ: Yúhú Yǎ Ndiǒxí ndécú-í càchí tnúhu ndáá-í xii-ndo sǎ nchaa ñáiyu ngüñí xítí-yu núú-í,

te nchaa-yu càháⁿ-yu sá yǔhú cùú-í Ndiǒxí. Duha càchí Yǎ Ndiǒxí núú tütú-gǎ.

¹² Núu xiǎⁿ nchaa-o ndi ñⁿ nàcani tnúhu-o núú Yǎ Ndiǒxí nchaa sá ní quide-o.

Vá dácuíta nihnu tnàha-o

¹³ Núu xiǎⁿ vá cuátnùhu tnaha-gǎ-ndó, te cada yica-ndo càda-ndo mee-ni sá vǎha, te vá cáda-ndó ñⁿ sá ñà túú tàú-ndó càda-ndo cuèndá sá vǎ cuíta nihnu dava ñáiyu ndècu ndìhi-ndo ichi Xítóhó Jesucristú.

¹⁴ Te yúhú ndécú ndìhi-í Xítóhó Jesucristú te cùtnuní ndáá iní-í sá nchaa núú sǎ cúú càxi-o cuu-ni caxi-o te vá cúú cuèchi. Te ñáiyu sàni iní sá vá cúú càxí-yu te núu na càxí-yu te cuu cuèchi xií-yu.

¹⁵ Te nchòhó, te núu cuèndá sá xéxi-ndó nchaa núú sǎ cúú càxi-ndo, cuèndá xiǎⁿ ñá túú-gǎ cúú vǎha iní nchaa ñáiyu ndècu ndìhi-ndo ichi Xítóhó Jesucristú, te ñá túú-gǎ quidé-ndó sǎ cúú iní ndisa-ndó-yu te núu ducaⁿ na càda-ndo, te núu ñⁿ sá sání iní-ndó càxi-ndo te cùtnuní iní-ndó sǎ xiǎⁿ cada-xi cuíta nihnu ñáiyu ndècu ndìhi-ndo ichi Xítóhó Jesucristú te vá cáxi-ndó xiǎⁿ te núu ducaⁿ, chí Xítóhó Jesucristú ní xíhí-gǎ cuèndá-yu.

¹⁶ Te núu ñⁿ sá quidé-ndó sàni iní-ndó sǎ cúú-xí ñⁿ sá vǎha, te ñáiyu càchí-yu sá ñà túú vǎha te vá cáda-ndó cuèndá sá vǎ càháⁿ cuèhé-yu cuèndá-ndó.

¹⁷ Te sá yíndàha ñaha Yá Ndiǒxí xii-o xiǎⁿ ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudíi iní-ó cùndecu-o chí Espiritú-gǎ ndécú ndìhi ñaha-xi xii-o, te nchaa xéhé ño-gǎ cùnùu dacúxí sǎ cóhó sǎ cáxi-ó.

¹⁸ Te nchaa ñáiyu ducaⁿ quide nchaa sá ño-gǎ xini ñuhu-xi, xinu cuechí-yu núú

Xítóhó Jesucristú, te sá dúcáⁿ quidé-yu te ndùu vétú iní Yá Ndiöxí, te cùdiú-yu núu ñáiyu.

19 Te nchoo chí ná ndùcu-o nacuáa cada-o cùndecu ndihi váha tnàha-o, te nducu tùcu-o nacuáa cada-o chindee tnúhu tnàha-o nacuáa cuita cundáá-gá-ó núu Xítóhó Jesucristú quíhíⁿ.

20 Te ñá díú sá cuendá ìⁿ núu sá xéxí-ó, te dàquee tíhú-ó sá vâha ní quide ñaha Yá Ndiöxí xii tnàha ñáiyu-o. Te na cächí tnúhu ndáá-í xii-ndo sá ncháá-ní núu sá cúu càxi-o, te dicó-ni sá ñà túú ndùu váha-xi núu sá cuendá-ni sá cáxí-ó ìⁿ núu sá cúu càxi-o cuíta nihnu ìⁿ tnàha ñáiyu-o.

21 Te váha-gá sá vâ cáxí-ó cùnú te vá cóhó ndidí, te ni ñà túú nâgá cada-o te núu xito-o sá xiãⁿ cada te ngúita tnàha ñáiyu-o càdá-yu sá ñà túú vâha, àdi xito-o sá xiãⁿ cada te ngúita-yu cani ìⁿ cani úú iní-yu cundecú-yu ichi Xítóhó Jesucristú, te vá cundáá-gá-yu núu-gã te núu ducaⁿ na càda-o.

22 Te núu ìⁿ sá vâha sàni iní-ó càda-o, te vá dátúu-o núu ñáiyu chi mee-ni núu Yá Ndiöxí dátúu-o. Te nchoo cùu-o ñáiyu ío váha táhú-xi te núu cùtnuní ndáá iní-ó sá quidé ndáá-ó núu nándi cùu sá quidé-ó, te cùtnuní iní-ó sá ñà díú ìⁿ cuéchi cùu-xi sá quidé-ó.

23 Te núu nchoo sàni iní-ó sá quidé vâha-o àdi ñà túú quide váha-o òré xéxí-ó ìⁿ núu sá xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñà túú ìⁿ-ni sá sání iní-ó, chi nchaa núu sá quidé-ó sàni ìⁿ sàni úú iní-ó núu váha-ni àdi ñà túú vâha-ni, te cuu cuéchi xii-o sá dúcáⁿ quide-o.

15

Cada-o sá vâha sá cúu-xí tnàha ñáiyu-o

1 Te nchoo ñáiyu ío váha sàndáá iní ñáhá xii Xítóhó Jesucristú, xini ñuhu-xi cuáñaha-o tnúhu ndee iní xii ñáiyu ñà túú ñihí ndéé cùndecu ichi-gá, te vá cádá-ó mée-ni sá cúu-xí mée-o.

2 Te cada-o sá vâha nacuáa cuu váha iní tnàha ñáiyu-o cuendá cuu-xi sá vâha sá cúu-xí-yu, te ducaⁿ cuita níhí ndéé-gã-yu quindáá iní-yu Xítóhó Jesucristú.

3 Te Xítóhó Jesucristú ñà túú ní quide-gá mee-ni sá cúu vâha iní mée-gã, te ní quee

ndáá-xi nacuáa càháⁿ-xi núu tùtú Yá Ndiöxí nacuáa ní xáhaⁿ Xítóhó Jesucristú xii-gá, te cächí-xi: “Nchaa ñáiyu cùu úhú iní ñáhá xii-n ní xicuèhé ní xiduha ñáhá-yu xii-í”, duha càháⁿ-xi núu tùtú Yá Ndiöxí nacuáa ní xáhaⁿ Xítóhó Jesucristú xii-gá.

4 Te ndéé sanaha ñi ngúndéé nchaa tnúhu Yá Ndiöxí núu tùtú-gá, te ducaⁿ ñi ngúndéé cuendá dacuàha-o, te tnúhu-áⁿ dánèhé ñáhá-xi cùnduu cahnu iní-ó cuéi nándi nà yáha-o cùndecu-o ichi-gá, te sá xii tnúhu-áⁿ te vá ndihú-gá iní-ó cùndecu-o, te diu-ni sá xii tnúhu-áⁿ cundecu ndihi-o tnúhu ndee iní.

5 Te Yá Ndiöxí quidé-gã ndécú ndihi-o tnúhu cahnu iní, te diu-ni-gá quidé-gã ñà túú ndihú iní-ó ndecu-o. Te xicáⁿ táhú-í núu-gã sá díú-gã ná cádá te cuu ìⁿnuu-ndo cùndecu-ndo datná ní quide mee Xítóhó Jesucristú cùtnàhá ní xindecu-gá ñuyúú-a.

6 Te ducaⁿ nchaa-ndo cuu ìⁿnuu-ndo, te danihí tnáhá-ndó yóco táchi-ndó te cachí-ndó sá ío cahnu cuu Yá Ndiöxí Yaá cúu Tátá Xítóhó Jesucristú.

Ñáiyu ñà túú cùu ñáiyu isràél ní ñihí-yu tnúhu Xítóhó Jesucristú

7 Te núu xiãⁿ chí quéhéⁿ cuendá tnáhá datná ní quide Xítóhó Jesucristú ní queheⁿ cuendá ñáhá-gã xii-o, te núu ducaⁿ na càda-ndo te ío cuu cahnu Yá Ndiöxí.

8 Te na cächí tnúhu-í xii-ndo sá Xítóhó Jesucristú ní quixi-gá ní quide-gá sá vâha sá cúu-xí ñáiyu isràél, te sá dúcáⁿ ñi quide-gá xiãⁿ cùtnuní ndáá iní-ó sá Yá Ndiöxí quidé-gã ìⁿ sá càháⁿ-gá, chi Xítóhó Jesucristú ní quide-gá nchaa nacuáa ní xáhaⁿ Yá Ndiöxí xii cue ñaní tnáhá-ó ñi xindecu ndéé sanaha.

9 Te ducaⁿ ñi quide Xítóhó Jesucristú sá vâha sá cúu-xí ñáiyu isràél cuendá nchaa ñáiyu ñà túú cùu ñáiyu isràél cachí-yu sá ío cahnu cuu Yá Ndiöxí, te ducaⁿ quèsahá-yu chi ío cùndahú iní ñáhá-gã chindée ñaha-gá xii-yu, te quee ndáá-xi nacuáa càháⁿ-xi núu tùtú Yá Ndiöxí núu cächí-xi:

Yúhú cachí-í sá ío cahnu cuu-n núu nchaa ñáiyu ñà túú cùu ñáiyu isràél,

te cata-í ndudú chiñuhu ñaha-í xii-n. Duha cächí-xi núu tùtú-gá

10 Te cächí tucu-xi núu tùtú-gá:

Te nchòhó ñáyiú ñá túú cùu ñáyiú isràèl ío chí cudíí ìní ndìhi ñáyiú isràèl ñáyiú ndècu ndìhi-í.

Duha càchí-xi núú tütú-gá.

11 Te càchí tucu-xi ingá xichi núú tütú-gá:

Nchaa nchòhó ñáyiú ñá túú cùu ñáyiú isràèl chí càháⁿ sá ìo càhnu cuu Yá Ndiöxí, te nchaa ñáyiú na càháⁿ-yu sá ìo càhnu cuu-gá.

Duha càchí-xi núú tütú-gá.

12 Te ndíi Chàíá càchí tucu ndíi núú tütú Yá Ndiöxí:

Coo ñⁿ ñaní tnáhá ndíi Isàí téé ní xíndecu ndéé sanaha,

te téé-áⁿ taxi tnùní-dé cue ñáyiú ñá túú cùu ñáyiú isràèl,

te ñáyiú-áⁿ cundee cùu cahnu iní ñáhã-yu xii-dé.

Duha ní càháⁿ ndíi Chàíá càchí-xi núú tütú-gá.

13 Te xicáⁿ táhù-í núú Yá Ndiöxí Yaá ní taxi tnúhu ndee ìní ndécú ndìhi-o sá méé-gã ná càda ío cudíí ìní-ndó cùndecu-ndo, te ducaⁿ ìo váha cundecu iní-ndó núú-gã chí sándáá ìní-ndó-gã, te ducaⁿ Espíritú-gá ná càda te uuⁿ-gá uuⁿ-gá cuita ngúndecu ndìhi-ndo tnúhu ndee ìní quíhíⁿ sá cáda váha ñaha-gã xii-ndo.

14 Te nchòhó ñáyiú ndècu ndìhi-í ichi Xítohó Jesucristú cùtnuní ndáá ìní-í sá nchòhó ío váha ìní-ndó, te ducaⁿ ìo váha cùtnuní ìní-ndó nchàa tnúhu váha, te ducaⁿ ìo dāsahú tnáhá-ndó nàcuáa cundecu-ndo.

15 Te dava tnúhu ní chídó tnùní-í núú tütú-a cùu-xi tnúhu sá ìo càháⁿ-í dóho-ndo, te ducaⁿ ñí tee-í cuendá sá nchòhó dandàcu ìní-ndó tnúhu-áⁿ, te ní tee-í chí Yá Ndiöxí ní cundàhú ìní ñáhã-gã xii-í ní taxi-gá chiúⁿ quide-í

16 xínú cuèchi-í núú Xítohó Jesucristú càháⁿ-í tnúhu-gá núú ñáyiú ñá túú cùu ñáyiú isràèl. Te tnúhu-áⁿ cúú-xi tnúhu sá sánú ichi ñaha xii-o nacuáa naníhí tãhú-ó, te ducaⁿ dānehé-í ñáyiú ñá túú cùu ñáyiú isràèl tnúhu Yá Ndiöxí cuendá cúú-yu dātná ñⁿ sá ndúú tãhú-gã, te Espíritú-gá quidé-xi cúú-yu ñáyiú cùdiu núú-gã, te cùu váha ìní ñáhã-gã xii-yu.

17 Te ío váha cùu ìní-í cuendá nchaa chiúⁿ quide-í sá cúú-xi Yá Ndiöxí, chí Xítohó Jesucristú ndécú ndìhi ñaha-gá xii-í.

18 Te mee-ni nàcuáa quide Xítohó Jesucristú chindèe ñaha-gá xii-í xíãⁿ-ni càháⁿ-í, te sá dúcáⁿ quide-gá xíãⁿ ní sándáá ìní cue ñáyiú ñá túú cùu ñáyiú isràèl tnúhu-gá. Te ducaⁿ chí ní chindee ñaha-gá xii-í ní càháⁿ-í tnúhu-gá te ducaⁿ-ni ñí chindee ñaha-gá xii-í ní quide-í titní núú sã ñí quide-í núú-yu ní xiní-yu.

19 Te Espíritú Yá Ndiöxí ní quide-xi ní quide-í titní núú sã vã yõo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhãⁿ-í ní càháⁿ-í tnúhu Xítohó Jesucristú núú ñáyiú cuèi ndéé ñuú Jerusálén, te cuèi ndéé distritú Ilíricú, núu nchaa ñuú-áⁿ ñí sáhãⁿ-í ní càháⁿ-í núú-yu tnúhu sá càháⁿ nàcuáa naníhí tãhú-ó.

20 Te ducaⁿ ìo ndùcu ndee-í càháⁿ-í tnúhu sá càháⁿ nàcuáa naníhí tãhú-ó núú vátã ñihí-gá-yu tnúhu cuendá Xítohó Jesucristú, te ducaⁿ quide-í chí ñá túú cuíní-í quíhíⁿ-í càháⁿ-í tnúhu-gá núú sã xíndecu ñáyiú càháⁿ tnúhu-gá.

21 Te quide-í nàcuáa càháⁿ-xi núú tütú Yá Ndiöxí núú càchí-xi: Ñáyiú vátã ñihí-gá tnúhu cuendá Yaá quixi ñuyú te ñihí-yu, te ducaⁿ tècú tnùní-yu tnúhu-gá. Duha càchí-xi núú tütú-gá.

Té Pãblú cuíní-dé quíhíⁿ-dé ñuú Rómá

22 Te sá dúcáⁿ càháⁿ-í tnúhu-gá núu xíãⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni ìní-í quixi coto ñaha-í.

23 Te ní cuu titní cuía ducaⁿ-ni sàni ìní-í quixi coto ñaha-í xii-ndo, te vitna ní ndìhi-í nchaa iha ní càháⁿ-í tnúhu Xítohó Jesucristú núú nchàa ñáyiú.

24 Núu xíãⁿ sání ìní-í sá ndùu na quíhíⁿ-í nacióⁿ Èspañá te yáha càháⁿ-í quíní-í nása ndècu-ndo, te dāvã-áⁿ ìo cudíí ìní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee ìní-ndó chindee ñaha-ndo xii-í.

25 Te vitna quíhíⁿ-í ñuú Jerusálén quínehe-í sá ndúú tãhú ñáyiú ndècu ichi Xítohó Jesucristú xíndecu yacáⁿ.

26 Te ñáyiú xíndecu ichi Xítohó Jesucristú ndécú distritú Macèdoniá, ndìhi distritú Acãyá ní cuu ñⁿnúú-yu ní sacáⁿ tnáhá-yu sá ndúú tãhú ñáyiú ndàhú xíndecu ichi-gá ndécú ñuú Jerusálén.

27 Te ducaⁿ tnàhí ní cudíí iní-yu cadá-yu, te ducaⁿ tnàhí tàú-yu cadá-yu chindèé-yu ñáiyu xĩndecu ñuú Jerusàlén. Te ñáiyu Macèdoniá ndihí ñáiyu Acăyá-án ñà túú cùú-yu ñáiyu isràél. Te ñáiyu xĩndecu ñuú Jerusàlén cùú-yu mee-ni ñáiyu isràél, te ducaⁿ tàú-yu cadá-yu chi sá cuendá ñáiyu isràél-án ní níhí-yu tnúhu sá càháⁿ nàcuáa naníhí tãhú-yu, núu xĩánⁿ tàú-yu chindee ñàhá-yu ndihí nchaa sá ñihí-yu.

28 Te sátá ná yãha quínguáha cuendá-í-yu sá ndúú tãhú-yu, te ducaⁿ te dãtnùnì quee-í quíhíⁿ-í nacióⁿ Èspañá, te ichi yáha-í yáha cáháⁿ-í núú ndécú-ndó.

29 Te cùtnunì ndáá iní-í sá òré ná quèxio-í núú ndécú-ndó, te Xítohó Jesucristú ío chindee ñàha-gá xii-í cáháⁿ-í tnúhu-gá núú-ndó nàcuáa ío váha cundecu-ndo ìchi-gá.

30 Te nchòhó ñáiyu ndècu ndihí-í ichi Xítohó Jesucristú càháⁿ ndàhú-í núú-ndó sã ío chindee ñàha-ndo xii-í cáháⁿ ndihí-o Yã Ndiòxí cuendá-í, te ducaⁿ càda-ndo chi ndècu ndihí-ndo Xítohó Jesucristú. Te Espíritú Yã Ndiòxí quidé-xí cùu iní tnàhá-ó ñⁿ ñⁿ-o.

31 Te ío chí càcáⁿ táhú nùú Yã Ndiòxí sá ná còto ñàha-gá xii-í, te ñà túú ñà cada ñàha nchàa ñáiyu ñà túú sàndáá iní ñàhá xii-gá xĩndecu distritú Jùdeá. Te càcáⁿ táhú tùcu-ndo núú-gã sá ncháá sã cánèhe-í quíhíⁿ nduu táhú ñáiyu ndècu ichi-gá ndécú ñuú Jerusàlén ío váha cuu iní-yu queheⁿ cuendá-yu.

32 Te ducaⁿ càda-ndo cuendá sá nùu Yã Ndiòxí ná càchí-gá te ío cudíí iní-í òré quexìo-í núú ndécú-ndó, te ío váha cuu iní-í cundecu ndihí ñàha tnàì xii-ndo.

33 Te vitna xicáⁿ táhú-í núú Yã Ndiòxí Yaá quidé ío váha cùu iní-ó ndècu-o sá ná chindee chitúu ñàha-gã xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáiyu ndècu ñuú Ròmá

1 Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quide-xi chiuⁿ Yã Ndiòxí sá cùú-xí ñáiyu ndècu ichi Xítohó Jesucristú xĩndecu ñuú Cèncreá.

2 Te cuiní-í sá ío váha cuu iní-ndó quèheⁿ cuendá-ndó-xí, chi ndècu ndihí-xi Xítohó Jesucristú, te cada-ndo nàcuáa tàú-xi cunduu dãtná tàú-xi cada ñáiyu ndècu ichi-gá, te ío chindee-ndo-xi te núu ná cùú sã xíní ñùhu-xi, chi tnàhá-xi ío chindee-xi cue ñáiyu ndècu ichi Xítohó Jesucristú, te tnàhá yúhú ducaⁿ ío chindee-xi.

3 Te cúñaha-ndo ío na càda ndee iní té Àquilú ndihí ñadìhí-dé tá Priscilá, chi ñáiyu-án ní quide chiùⁿ-í ndihí-yu ní quide-ndí chiùⁿ Xítohó Jesucristú.

4 Chi mèe-yu ní cácu cuú-yu sá cuendá sá ñí dácãcu ñàhá-yu xii-í sá ñí yáha-í, núu xĩánⁿ ío ndacáⁿ táhú-í núú-yu, te ñà díú-ní yúhú ducaⁿ ío ndacáⁿ táhú-í núú-yu chi tnàhá nchaa ñáiyu ñà túú cùu ñáiyu isràél xĩndecu ichi-gá xĩndecu nchaa xichi ducaⁿ ío ndacáⁿ táhú-yu núú tè Àquilú ndihí núú ñadìhí-dé tá Priscilá.

5 Te cúñaha tùcu-ndo sá ío na càda ndee iní nchaa ñáiyu xĩndecu ichi Xítohó Jesucristú tàcá vehe té Àquilú ndihí tá Priscilá dácuahá-yu tnúhu-gá, te cúñaha tùcu-ndo sá ío na càda ndee iní té Epènetú chi tnàhá-dé ío ñùhu iní-í-dé, chi té-áⁿ cùú-dé tée díhna nuu ñí sàndáá iní tnúhu Xítohó Jesucristú distritú Acăyá.

6 Te cúñaha tùcu-ndo sá ío na càda ndee iní tá Màriá xíchí ndécú ndihí-ndo, xíchí ío ndècu ndee xinu cuechi núú Xítohó Jesucristú.

7 Te cúñaha tùcu-ndo sá ío na càda ndee iní cue tée cùu ndi mee-í té Àndrónicú ndihí té Jùniás, chi tnàhá-güedé ní xíhí ndihí ñàha-güedé xii-í vecáá, te ío cùdiu-güedé núú nchàa cue tée ní táuchíúⁿ Jèsús cáháⁿ tnúhu-gá. Te díhna-gá-güedé ní sàndáá iní-güedé tnúhu Xítohó Jesucristú dácúxí yúhú.

8 Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú.

9 Te cúñaha tùcu-ndo xii té Bãnú tée cùndihí ñàha xii-o quide-o chiuⁿ Xítohó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ío ñùhu iní-í-dé.

10 Te cúñaha tùcu-ndo xii té Àpelés sá ío na càda ndee iní-dé, chi té-áⁿ ío váha cùndáá-dé núú Xítohó Jesucristú, te

cúñaha tùcu-ndo xii ñáyiú xĩndecu vehe té Arístóbulú sá ïo na càda ndee iní-yu.

¹¹ Te cúñaha-ndo xii té Heròdiòn téè cùu ndi mee-í sá ïo na càda ndee iní-dé, te cúñaha-ndo xii ñáyiú ndècu ichi Xítohó Jesucristú xĩndecu vehe té Nàrcisú sá ïo na càda ndee iní-yu.

¹² Te cúñaha-ndo xii tnahá tá Trifená ndihí tá Trifosá sá ïo na càda ndee iní-yu, chi tnahá-yu quidé-yu chiúⁿ Xítohó Jesucristú. Te tnahá tá Pèrsidá xíchí ndécú ndihí-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnahá-xi ío ndùcu ndee-xi quide-xi chiúⁿ Xítohó Jesucristú.

¹³ Te cúñaha-ndo tnahá té Rűfú téè ío váha sàndáá iní tnúhu Xítohó Jesucristú sá ïo na càda ndee iní-dé ndihí náná-dě, chi ñaha-án quidé iní-í sá cúú-áⁿ dàtná náná-í.

¹⁴ Te cúñaha-ndo sá ïo na càda ndee iní té Àsíncritú, ndihí té Flègonté, ndihí té Hèrmás, ndihí té Pàtrobás, ndihí té Hèrmés, ndihí nchaa dava-gá cue ñáyiú ndècu ndihí-o ichi Xítohó Jesucristú xĩndecu ndihí-güedé.

¹⁵ Te cúñaha tùcu-ndo sá ïo na càda ndee iní té Filológó, ndihí tá Jűliá, ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáyiú sàndáá iní tnúhu Xítohó Jesucristú xĩndecu ndihí-yu.

¹⁶ Te ío yĩñùhu cada ndee iní tnahá-ndó ñⁿ ñⁿ-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhá-yu xii-ndo.

¹⁷ Te nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sá cáda cuèndá-ndó nùu ló ñáyiú quide nacúáa vá cúú ñⁿnuu-ndo cundecu-ndo, chi ñáyiú-án sánú ichi ñahá-yu ñⁿ ichi ñá túú váha, chi ñá túú ñⁿ-ni cuu-xi tnúhu càháⁿ-yu ndihí tnúhu sá ñí ñíhí-ndó ndècu ndihí-ndo, te ñáyiú ducaⁿ xĩquide vá ñíhí tnahá-gá-ndó ndihí-yu.

¹⁸ Chi ñáyiú-án ñà túú quidé-yu chiúⁿ sá cúú-xí Xítohó Jesucristú, chi mee-ni sá cúú-xí mèe-yu quidé-yu, te mee-ni nchàa tnúhu sá ïo vii ío váha cuáháⁿ càháⁿ-yu òré cuáháⁿ-yu dándahú-yu nchaa ñáyiú ío yáchí sàndáá iní-xi ñⁿ tnúhu.

¹⁹ Te nchaa ñáyiú ñíhí-yu tnúhu sá nchòhó sàndáá iní-ndó tnúhu Xítohó Jesucristú, núu xíáⁿ ío cùdíí iní-í. Te cùníní sá nchòhó ío váha cutnùní iní-ndó nàcuáa

cada-ndo mèe-ni sá váha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha.

²⁰ Te Yá Ndiòxí Yáá quidé ïo váha cùu iní-ó ndècu-o ío ndihí cada-gá cuèndá sá sàcuíhná ñà túú-gá ná cada ñaha-xi xii-ndo, te xicáⁿ táhù-í núú Xítohó Jesucristú sá ïo na chĩndee chitúu ñaha-gá xii-ndo.

²¹ Te té Timùteú téè quide ndihí-í chiúⁿ Xítohó Jesucristú iha quide ndee iní ñáhá-dě xii-ndo, te tnahá té Lùciú, ndihí té Jásón, ndihí té Sosipàtér cue téè cùu ndi mee-í quidé ndèe iní ñáhá-güedé xii-ndo.

²² Te tnahá yúhú té Tèrciú téè càdúha tutú-a cuèndá té Pàblú quidé ndèe iní ñáhá-í xii-ndo, chi ñⁿ-ni cùu-o ndihí Xítohó Jesucristú.

²³ Te tnahá té Gáyú téè dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítohó Jesucristú. Te tnahá té Èrastú téè yĩndaha díhúⁿ ñùú quidé ndèe iní ñáhá-dě xii-ndo, te tnahá té Cuártú téè ndècu ndihí-o ichi Xítohó Jesucristú quidé ndèe iní ñáhá-dě xii-ndo.

²⁴ Te xicáⁿ táhù-í núú Xítohó Jesucristú sá ïo na chĩndee chitúu ñaha-gá xii-ndo nchàa-ndo. Te ducaⁿ na cùnduu.

Cáháⁿ-ó sá ïo càhnu cuu Yá Ndiòxí

²⁵ Te vitna chí ná càchí-ó sá ïo càhnu cuu Yá Ndiòxí, chi mee-gá cada te ío-gá cuita ñíhí ndéé-gá-ndó cùndecu-ndo ichi Xítohó Jesucristú dàtná càchí tnúhu sá càháⁿ nàcuáa ñaníhí tàhú-ó, tnúhu sá dánèhé-í ñáyiú cuèndá Xítohó Jesucristú, te nchaa tnúhu-a ñⁿ-ni cùu-xi ndihí nchaa tnúhu sá ñí cachí Yá Ndiòxí cuu yuhu ndéé cùtnahá ní ngáva ñuyíú, te vitna ní quee túu-xi,

²⁶ chi mee Yá Ndiòxí ní dátüu-gá núú-ó vitna, te càháⁿ-ndí nàcuáa ní chídó tnùní cue téè ní xóo càháⁿ tnúhu Yá Ndiòxí ndéé sanaha. Te ducaⁿ tnúhu sá ndúú yuhu ní cuu ta xité nuu-xi ñíhí ñuyíú cuáháⁿ, chi ducaⁿ ñí cachí Yá Ndiòxí Yáá ndécú nchàa nduu nchaa quíú cunduu cuèndá sá quìndáá iní ñáhá ñáyiú xii-gá, te tñí-yu nchaa tnúhu càháⁿ-gá.

²⁷ ;Te ñⁿdii-ni Yá Ndiòxí cúú-gá Yáá ío sáá sá xíní tnùní-xi! ;Te nchaa-o chí ná càchí-ó sá ïo càhnu cuu-gá, chi ndècu ndihí-o Xítohó Jesucristú, te ducaⁿ-ni càda-o ni caa

ni quíhíⁿ! Te ducaⁿ na cùnduu. Te ío chí cádá
ndèe iní-nă vitna.

TUTÚ DÍHNA NUU NÍ CADÚHA TÉ PÄBLÚ QUIHⁿ NDAHA ÑÁYIU ÑUÚ CÒRINTÚ

Té Păblú cadúha-dé tutú quíhⁿ ndaha ñáyiú xĩndecu ichi Xítóhó Jesucristú ndécú ñúú Còrintú

¹ Yúhú té Păblú ní cáhán ñáhá Yă Ndiöxí xii-í cuendá sá cáhán-í tnúhu Xítóhó Jesucristú núú ñáyiú, chi ducaⁿ nĩ cachí Yă Ndiöxí cunduu. Te cadúha-í tutú-a ndihí té Sòstenés té ndècu ndihí-o ichi Xítóhó Jesucristú

² cuendá daquixi-í ndaha nchòhó ñáyiú xĩndecu ichi Yă Ndiöxí ndécú ñúú Còrintú, chi nchòhó cúú-ndó ñáyiú cùu cuendá Yă Ndiöxí cuendá sá ndécú ndihí-ndo Xítóhó Jesucristú. Te diu-ni-ndo cùu-ndo ñáyiú ní cáhán ñáhá Yă Ndiöxí cuendá cundecu yĩñùhu-ndo núú-gă, ndihí nchaa dava-gă ñáyiú ndècu nchaa xichi, ñáyiú cächí sá ïo càhnu cuu Xítóhó Jesucristú. Te Yaá-án cúú-gă Xítóhó-yu, te diu-ni-gă cúú-gă Xítóhó nchoo tùcu.

³ Te xicán táhù-í núú Tătá-ó Dütú Ndiöxí ndihí núú Xítóhó Jesucristú sá ndi nduú-gă ïo na chĩndee chitúu ñaha-gă xii-ndo, te ïo váha cuu iní-ndó cundecu-ndo.

Yă Ndiöxí ïo chĩndee ñaha-gă xii-o cuendá sá ndécú-ó ndihí Xítóhó Jesucristú

⁴ Te ducaⁿ-ni ïo ndacán táhù-í núú Yă Ndiöxí cuendá-ndó, chi mee-gă ïo chĩndee chitúu ñaha-gă xii-ndo sã cuendá Xítóhó Jesucristú.

⁵ Te cuendá sá ndécú-ndó ndihí Xítóhó Jesucristú, núu xián Yă Ndiöxí ïo chĩndee ñaha-gă xii-ndo sãá díquí-ndó nàcuáa cáhán-ndó, ndihí nàcuáa cùnnumí iní-ndó,

⁶ chi tnúhu sá ni ñihí-ndó cuendá Xítóhó Jesucristú ní quée-xi iní-ndó.

⁷ Te xián núu nchaa sá vãha ñá túú tnàhí cùmání xii-ndo chi Yă Ndiöxí ïo chĩndee ñaha-gă. Te ducaⁿ quide-gă ñini nchòhó ni yùhu ni iní-ndó ndètu-ndo sãá nduu quixi tucu Xítóhó Jesucristú.

⁸ Te Yă Ndiöxí ducaⁿ-ni ïo chĩndee ñaha-gă xii-ndo cuendá sá vã yõ teñaha cuèchi nduu na quixi tucu Xítóhó Jesucristú.

⁹ Te nchaa sá cáhán Yă Ndiöxí dacuítí quide-gă, te diu-gă cúú-gă Yaá ní cáhán ñáhá xii-ndo cuendá cuu ñnuu-ndo ndihí Déhe-gă Xítóhó Jesucristú Yaá cúú Xítóhó-ó.

Ñá túú cùu ñnuu ñáyiú ndècu ichi Xítóhó Jesucristú

¹⁰ Te nchòhó ñáyiú ndècu ndihí-í ichi Xítóhó Jesucristú cáhán-í dóho-ndo sã vã ndi díⁿ càni iní-ndó, te ïo cuu ñnuu-ndo cundecu-ndo, te ñni càni iní-ndó, te ñni càda-ndo chi ducaⁿ cuiní-gă cunduu.

¹¹ Te duha cáhán-í dóho nchòhó ñáyiú ndècu ndihí-í ichi Xítóhó Jesucristú, chi cue ñáyiú vehe té Clòé ní cachí tnúhu-yu xii-í sã ñá túú cùu ñnuu-ndo ndecu-ndo.

¹² Te duha nduu tnúhu ní ñihí-í nàcuáa cùu ndecu-ndo, chi dava-ndo cächí-ndó: “Yúhú cúú-í cuendá té Păblú.” Te dava-ndo cächí-ndó: “Yúhú cúú-í cuendá té Àpolós.” Te dava-ndo cächí-ndó: “Yúhú cúú-í cuendá té Pèlú.” Te dava tucu-ndo cächí-ndó: “Yúhú cúú-í cuendá Xítóhó Jesucristú”, duha cächí-ndó.

¹³ Te vá dúcán cáhán-ndó chi ñá túú nã daha Xítóhó Jesucristú ndécú chi ñndi-ni-gă. Te ñá díú yùhú té Păblú ní xihí-í núú cùrúxí sá cuendá-ndó, te ni ñá túú ní sàndute-ndo cuendá sá yùhú cuu cuendá ñhà-í xii-ndo.

¹⁴ Te táxãhu xii Yă Ndiöxí chi ñá díú nchaa-ndo ni dacuandute-í, chi té Crispú-ni ndihí té Gãyú-ni ní dácuanđute-í-güedé.

¹⁵ Te xián núu vá cúú tnàhí cáhán-ndó sã ñi sandute-ndo sã cúú cuendá ñhà-í xii-ndo.

¹⁶ Te ní ndacu tucu iní-í sá tnàhá tucu ñáyiú cùu ndi mee té Èstéfanás ní dácuanđute-í, te diu-ná ñáyiú-án te sànuu sã ñá túú-gă nágá ñáyiú ni dácuanđute-í.

¹⁷ Te Xítóhó Jesucristú ñá túú ní tendaha ñaha-gă xii-í sã dácuanđute-í ñáyiú, chi ní tendaha ñaha-gă xii-í sã cáhán-í tnúhu-gă núu-yu, tnúhu sá cáhán nàcuáa nanihí tàhú-ó. Te ñá túú cáhán-í dàtná cáhán ñáyiú túha. Te ducaⁿ quide-í cuendá sã nchòhó quĩndáá váha iní-ndó tnúhu sã cáhán nàcuáa ní xihí Xítóhó Jesucristú núú cùrúxí. Chi núu na cáhán-í dàtná cáhán ñáyiú

túha te nchòhó vá quìndáá iní-ndó tnùhu-án nàcuáa tàú-xi cunduú.

Sá cuèndá Xítohó Jesucristú cútnùnì iní-ó sã ïo càhnu cuu Yá Ndiöxí

18 Te nchaa ñáyiu ta xíta nihnu cuáhán càchí-yu sá ñà túú nàndíhi tnúhu sá càhán nàcuáa ní xíhí Xítohó Jesucristú núú cùrúxí, dico sá cúú-xí nchòo ñáyiu sa ní naníhí tàhú, chi tnúhu-án cúú-xí ìñ tnúhu sá ñí taxi Yá Ndiöxí ndécú ndíhi-o cuendá ndacu-gá cada-gá nchaa nàcuáa cuìní-gá iní-ó,

19 te quèe ndáá-xi nàcuáa càhán-gá núú tütú-gá núú càchí-xi:

Yúhú cada-í te nchaa ñáyiu túha vá nándíhi-gá nchaa sá xìnì tnùnì-yu, te nchaa ñáyiu ío váha sàá díquí-xi vá nándíhi-gá nchaa nàcuáa sàni iní-yu. Duha càchí Yá Ndiöxí núú tütú-gá.

20 Te xíã cútnùnì iní-ó sã ncháá ñáyiu sàni iní-xi sá ïo túha ndècu ñuyú-a, ndíhi nchaa cue tée dàcuaha ñaha xíi-yu nchaa tnúhu ní chídó tnùnì ndíi Moisés, ndíhi nchaa ñáyiu ío váha sàá díquí-xi càhán cuèndá nchaa sá ío ñuyú-a, te nchaa ñáyiu-án càchí Yá Ndiöxí sá ñà túú nàndíhi nchaa sá xìnì tnùnì-yu sá cúú-xí-gã.

21 Te Yá Ndiöxí ío váha cùtnunì iní-gá nàcuáa quide-gá, chi ñá túú dàña-gá cundecu ndíhi ñáhá-yu xii-gá sá cuèndá nchaa sá ñí sáá díquí méë-yu, te ducaⁿ quide-gá chi cuìní-gá sá cùndèdóho-yu tnúhu sá sánì iní-yu ñá túú nàndíhi. Te sá cuèndá tnúhu-án te naníhí tàhú-yu te núu na quìndáá iní ñáhã-yu xii-gá.

22 Te cue ñáyiu isràél cuìnì-yu quinì-yu sá vã yõo tnàhí ndàcu cada, te cue ñáyiu grìégú nchìcúⁿ nihnú-yu nchaa sá dácuàha ñáyiu ío túha.

23 Dico nchoo yíhi-o càhán-ó núú ñáyiu sá Xítohó Jesucristú ní xíhí-gá núú cùrúxí. Te cue ñáyiu isràél ñá túú tnàhí tnàhá iní-yu cundèdóho-yu tnúhu-án. Te cue ñáyiu ñá túú cùu ñáyiu isràél càchí-yu sá ñà túú vèdana nàndíhi tnúhu-án.

24 Dico sá cúú-xí ncháa ñáyiu ní càhán ñáhá Yá Ndiöxí chi cuèi cùú-yu ñáyiu isràél àdi ñá túú cùú-yu, dico ñáyiu-án càchí-yu sá sã cuèndá Xítohó Jesucristú cútnùnì iní-yu

sá ïo càhnu cuu Yá Ndiöxí te ndècu ndíhi-gá nchaa sá xìnì tnùnì-gá.

25 Te sá quidé Yá Ndiöxí càchí ñáyiu ñuyú-a sá ñà túú nàndíhi, dico xíã ío-gá nàndíhi dàcúúxí sã sánì iní méë-yu. Te sá ñí xíhí Xítohó Jesucristú núú cùrúxí, xíã càchí ñáyiu sá ñà túú ní ñíhí ndéé Yá Ndiöxí cada-gá sá ñí sani iní-gá cada-gá. Dico sá dúcáⁿ ñí quide Yá Ndiöxí, xíã cúú-xí sã ïo-gá ní ñíhí ndéé-gã ní quide-gá ìñ sá ñí sani iní-gá dàcúúxí sã sánì iní méé ñáyiu ñuyú-a.

26 Te nchòhó ñáyiu ndècu ndíhi-í ichi Xítohó Jesucristú, chí dándacu iní nàcuáa ndècu-ndo cútnàhá ní càhán ñáhá Yá Ndiöxí xii-ndo, chí sacú-ni-ndo túha dàcúúxí ñáyiu ñá túú ndècu ichi-gá. Te ducaⁿ sàcú-ni-ndo tàxi tnunì-ndó, te diu-ni ducaⁿ sàcú-ndó nèhe ñáyiu sá yíñuhu núú-ndó.

27 Te ñáyiu ñá túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyú-yu, dico dava ñáyiu ñá túú túha-án càhán ñáhá Yá Ndiöxí xii-yu cundecu-yu ichi-gá, te cundecu ndíhi ñaha-gã xii-yu, te ducaⁿ dándóo canúú-yu nchaa ñáyiu càchí sá ïo túha. Te càhán tucu-gá ñáyiu càchí dava-gá ñáyiu sá ñà túú tnàhí tàú cunuu cùndecu-yu ichi-gá, te ducaⁿ cùndecu ndíhi ñaha-gã xii-yu, te dándóo canúú-yu nchaa ñáyiu càchí sá táxí tnùnì.

28 Te ducaⁿ Yá Ndiöxí càhán-gá ñáyiu ñá túú tnàhí cùnuu cundecu ndíhi-gá, ndíhi ñáyiu quèe tíhú núú dàva-gá tnàha ñáyiu-xi, ndíhi ñáyiu càchí-yu sá ñà túú vèdana nàndíhi, nchaa ñáyiu-án càhán-gá cundecu ndíhi-gá, te ducaⁿ quide-gá cuèndá dándóo canúú-yu nchaa ñáyiu càchí sá ïo cùnuu.

29 Te núu xíã ní ìñ ñáyiu vá cúú càchí-yu sá ïo càhnu cuú-yu núú Yá Ndiöxí.

30 Dico nchòhó chí mee Yá Ndiöxí ní quide-gá ndécú-ndó ndíhi Xítohó Jesucristú, te Xítohó Jesucristú ní quide-gá ní cutnùnì iní-ó sã Yá Ndiöxí cúú-gã Yaá ndécú ndíhi nchaa sá xìnì tnùnì-gá. Te diu-ni Xítohó Jesucristú ní quide-gá cuèndá sá nchóo vã cùndècu-gá cuèchi-o núú Yá Ndiöxí, te ducaⁿ cùndecu yíñuhu-o núú-gã, te nduu tàhú-ó cùndecu-o ndíhi-gá ní caa ní quíhíⁿ.

31 Te sá dúcáⁿ quide-gá nõu xiãⁿ xini ñuhu-xi cada-o nacuaa cãháⁿ-xi núú tütú Yã Ndiõxí núú cãchí-xi: “Vã cãchí-ndó sã méé-ndó ïo cãhnu cuu-ndo, chi cachí-ndó sã Yãá cúú Xítohó-ndó ïo cãhnu cuu-gá”, duha cãchí-xi núú tütú-gá.

2

Tnúhu sá cãháⁿ nãcuáa ní cuu ní xihí Xítohó Jesucristú núú cùrúxí

1 Te nchòhó ñáyiú ndècu ndìhi-í ichi Xítohó Jesucristú sa nãha-ndo sá cùtnãhá ní quixi-í ní cãháⁿ-í tnúhu Yã Ndiõxí núú-ndó, te ñá túú ní cãháⁿ-í dàtnã cãháⁿ ìⁿ ñáyiú ío váha sãá díquí-xi, àdi datná cãháⁿ ìⁿ ñáyiú ío túha.

2 Chi cùtnãhá ní xíndecu ndìhi ñaha-í xii-ndo chi ní sani iní-í sá méé-ní cuendá Xítohó Jesucristú cãháⁿ-í núú-ndó ndìhi nacuaa ní cuu ní xihí-gá, te ñá ducaⁿ ñí quide-í.

3 Te cùtnãhá ní quexìo-í núú ndécú-ndó te ni ñã cùtnúni iní-í nása cada-í ní cùu, te ío ní quiyùhú iní-í ní cãháⁿ-í tnúhu-gá núú-ndó.

4 Te cùtnãhá ní cãháⁿ-í nãcuáa ndùu tnúhu Xítohó Jesucristú núú-ndó, te nãha-ndo sá Espiritú Yã Ndiõxí ní chindee ñaha-xi xii-í ní cãháⁿ-í tnúhu-gá núú-ndó, te tnúhu-áⁿ ñí quée-xi iní-ndó. Te ñá túú ní cãháⁿ-í ìⁿ tnúhu cãhnu núú-ndó tnúhu sá cãháⁿ cue ñáyiú ío váha sãá díquí-xi.

5 Te ducaⁿ ñí cuu cuendá sá nchòhó quíndáá iní-ndó tnúhu Yã Ndiõxí chi ní quide-gá sá váha sá cúú-xí iní-ndó, te ñá díú sã cuendá tnúhu sá cãháⁿ ñáyiú cãchí sá ïo túha ducaⁿ ñí sãndáá iní-ndó tnúhu-gá.

Espiritú Yã Ndiõxí quidé-xí cùtnuní iní-ó nãcuáa sãni iní-gá

6 Te nchoo cãháⁿ-ó tnúhu cãhnu núú ñáyiú sa ní níhí ndéé ndècu ichi Xítohó Jesucristú. Te tnúhu-áⁿ ñá túú cãháⁿ ñáyiú ñá túú ndècu ichi-gá, te ni cue téé yíndaha ñaha xii-yu ñá túú cãháⁿ-güedé tnúhu-áⁿ chi cue téé-áⁿ naa-güedé.

7 Te tnúhu cãhnu-áⁿ cúú-xí tnúhu Yã Ndiõxí, te mee-gã ní cachí-gá ndéé cùtnãhá vátã ngãva-gá ñuyíú sã ncháá ñáyiú na quíndáá iní tnúhu-áⁿ te nduu táhũ-yu cundécú-yu ndìhi-gá núú ïo váha cãa ndecu-gá

ni caa ni quíhíⁿ. Te tnúhu-áⁿ ndúú yùhu-xi ni cuu.

8 Te ni ìⁿ cue téé yíndaha cue ñáyiú ñuyíú-a ñá túú tècú tnúni-güedé tnúhu-áⁿ, chi núú dícó tècú tnúni-güedé tnúhu-áⁿ te vá cãtã cãa-güedé Xítohó Jesucristú núú cùrúxí cãhni ñaha-güedé xii-gá ní cùu. Te ñá ducaⁿ Yãá-áⁿ ïo cãhnu cuu-gá.

9 Dico ducaⁿ ñí cuu chi ní quee ndáá-xi nãcuáa cãháⁿ-xi núú tütú Yã Ndiõxí núú cãchí-xi:

Yã Ndiõxí sa ní sani iní-gá nchaa nãcuáa cada-gá sá cúú-xí cuendá nchaa ñáyiú cùu iní ñáhã xii-gá.

Te sá ñí sani iní-gá cada-gá cúú-xí sã vátã quíni-gã ñáyiú te ni vátã cùndèdóho-gã-yu,

te ni ñã túú tnãhí cùtnuní iní-yu nása cada-gá.

Duha cãchí-xi núú tütú-gá.

10 Te mee Yã Ndiõxí ní cachí-gã sã Espiritú-gã cada-xi te nchoo cùtnuní iní-ó nchaa nacuaa sãni iní-gã cada-gã, nõu xiãⁿ ducaⁿ tècú tnúni-ó vítã, chi Espiritú-gã xini-xi nchaandi túhú nãcuáa sãni iní-gã cada-gã.

11 Te ñã ìⁿ ñáyiú xini ndáá-yu nãcuáa sãni iní ingã ñáyiú, chi mee ñáyiú-áⁿ xini ndáá-yu nchaa nãcuáa sãni iní-yu. Te ducaⁿ sãtnãhá-xi cùu Yã Ndiõxí chi medì-ni Espiritú-gã xini-xi nchaa nãcuáa sãni iní-gã.

12 Te nchoo chi Yã Ndiõxí ní taxi-gã Espiritú-gã ndécú ndìhi-o, te ñá díú ñuyíú-a ducaⁿ ni quée espíritú ní ngúndecu ndìhi-o. Te ducaⁿ ñí taxi-gã Espiritú-gã ndécú ndìhi-o cuendá ducaⁿ cùtnuní iní-ó nãcuáa ndùu nchaa sã váha sã dícó ducaⁿ ñí taxi-gã ndécú ndìhi-o.

13 Te cuendá nchaa sã váha-áⁿ cãháⁿ-ndí, te cãháⁿ-ndí nãcuáa dàcãhu iní ñáhã Espiritú Yã Ndiõxí xii-ndí, te ñá túú cãháⁿ-ndí nãcuáa cãhu iní ñáyiú ñuyíú-a cãháⁿ-yu, te ñá ducaⁿ nchaa tnúhu dàcãhu iní ñáhã Espiritú-gã xii-ndí cãháⁿ-ndí, ñá ducaⁿ nchaa xiãⁿ dánèhé-ndí nchaa ñáyiú ndècu ndìhi tucu Espiritú-gã.

14 Te ñáyiú ñá túú ndècu ndìhi Espiritú Yã Ndiõxí ñá túú tnãhá iní-yu nãcuáa ndùu tnúhu dàtecú tnúhu ñaha Espiritú-gã xii-yu, te ni ñã túú tècú tnúni-yu, te cãchí-yu sã ñã

túú nàndíhi-xi. Te ducaⁿ chi mee-ni nchàa ñáyiu ndècu ndihi Espiritú-gá tècú tnùní-yu nàcuáa ndùu tnúhu-áⁿ.

¹⁵ Te cue ñáyiu ducaⁿ ndècu ndihi Espiritú Yá Ndiöxí cútñuní ndáá iní-yu ná cúú nchàa sá vâha, te vá yõo ñⁿ xìní nchaa nàcuáa sàni iní-yu.

¹⁶ Te núú tütú Yá Ndiöxí càchí-xi: “Vá yõo ñⁿ xìní nàcuáa sàni iní Yá Ndiöxí, núu xiáⁿ vá yõo ñⁿ ndacu ná danèhé ñáhá xii-gá”, duha càchí-xi núú tütú-gá. Te nchoo chi ñⁿ-ni sàni iní-ó ndihi Xítóhó Jesucrístú.

3

Cue téé xíquide chiùn Yá Ndiöxí

¹ Te nchòhó ñáyiu ndècu ndihi-í ichi Xítóhó Jesucrístú càchí tnúhu-í xii-ndo sã ñã ní nihí-í nàcuáa cada-í cáháⁿ-í tnúhu-gá núú-ndó dàtná càháⁿ-í núú nchàa ñáyiu quide nchaa nacuáa càháⁿ Espiritú Yá Ndiöxí, chi ní cáháⁿ-í núú-ndó dàtná càháⁿ-í núú nchàa ñáyiu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiu íchí ñã sándáá iní tnúhu Xítóhó Jesucrístú, núu xiáⁿ ducaⁿ ñã cáháⁿ-í núú-ndó.

² Te ní quide ñaha-í xii-ndo dàtná ñⁿ déhe yiquiⁿ vitna sadi camá, te ñã túú ní quide ñaha-í xii-ndo dàtná cue landú sa xèxi dítá, chi ní danèhé ñáhà-í xii-ndo ñⁿ sá ñà túú tnàhí úhú tecú tnùní-ndó, te ñã túú ní danèhé ñáhà-í xii-ndo ñⁿ sá xítò-í sá vã tècú tnùní-ndó. Te quide cuendá-í sá díú-ní dùcaⁿ vá tècú tnùní-ndó ndèé vitna te núu na danèhé ñáhà-í xii-ndo nchàa dava-gá tnúhu.

³ Te ducaⁿ chi quide-ni-ndo nacuáa sàni iní méé-ndó, chi ndècu-ni-ndo ichi cuédú iní, te nàá ndihi tnàha-ni-ndo, te ñã túú tnàhí cùu ñⁿnuu-ndo ndecu-ndo. Te xiáⁿ cútñuní sá méé-ní nchàa nacuáa sàni iní méé-ndó quide-ndo, te xíquide-ndo dàtná quidé nchàa ñáyiu ñã túú ndècu ichi Xítóhó Jesucrístú.

⁴ Te dava-ndo càchí-ndó: “Yúhú cùu-í cuendá té Páblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xiáⁿ cútñuní sá quidé-ní-ndó mée-ni nchaa nacuáa sàni iní méé-ndó.

⁵ Te yúhú té Páblú càchí tnúhu-í xii-ndo sã ñà túú cùnuu-í, te ni té Àpolós ñã túú

cùnuu-dé chi dícó cue téé xínu cuechi núú Yá Ndiöxí cúú-ndí, te ní cáháⁿ-ndí tnúhu-gá núú-ndó, núu xiáⁿ ní sándáá iní-ndó. Te ndí díⁿ ndí díⁿ ndùu chiuⁿ ní táhú Yá Ndiöxí cada-ndí.

⁶ Te yúhú cùu-í dàtná ñⁿ téé chihí tatá chi dàcaháⁿ ñáhà-í xii-ndo tùha-ndo ichi Yá Ndiöxí. Te té Àpolós cúú-dé dàtná ñⁿ téé nàcuhñu chi téé-áⁿ ndécú-dé danèhé ñáhà-dé xii-ndo tnúhu-gá. Te Yá Ndiöxí cúú-gã Yaá quidé sàhnu tatá ní chihí-í-áⁿ, te duha càháⁿ-í chi diu-gá quidé-gã tá nihí ndéé-ndó ndècu-ndo ichi-gá.

⁷ Te núu xiáⁿ ní téé chihí tatá te ní téé nàcuhñu ñã túú cùnuu-güedé, dico Yá Ndiöxí ío cùnuu-gá chi diu-gá quidé-gã xínu tatá-áⁿ te sàhnu-xi.

⁸ Te ñⁿ-ni cùu téé chihí tatá ndihi téé nàcuhñu. Te ducaⁿ sãtnahá-xi cùu nchúhú cue téé xíquide chiùn Yá Ndiöxí, te nàcuáa ndùu chiuⁿ ní quide-ndí te ducaⁿ cùnuu táhú taxi Yá Ndiöxí nduu táhú-ndí.

⁹ Te nchòhó cúú-ndó dàtná ñⁿ xichi núú ñã quée tatá, te nchúhú cúú ñⁿnuu-ndí quidé chiùn-ndí xiáⁿ. Te ducaⁿ sãtnahá-xi cùu-ndo chi cùu cuendá ñáhá Yá Ndiöxí xii-ndo, te nchúhú cúú ñⁿnuu-ndí quidé-ndí chiùn-gá.

Te cùu tucu-ndo datná ñⁿ vehe sá vítná sáá, te ducaⁿ sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáháⁿ.

¹⁰ Te yúhú cùu-í dàtná ñⁿ téé cùnuu dacia vehe te ní tava-í cimièntú-xi, te díⁿ cue téé véxi dàcaa-güedé ndóho, te ñⁿ ñⁿ cue téé-áⁿ ío xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yá Ndiöxí ní taxi-gá chiùn quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítóhó Jesucrístú núú-ndó, te díⁿ cue téé véxi dàcuaha ñaha-ná xii-ndo tnúhu-gá, te ñⁿ ñⁿ cue téé-áⁿ ío xini ñuhu-xi cada cuendá-güedé nàcuáa dacuaha ñaha-güedé xii-ndo tnúhu-gá.

¹¹ Te cimièntú vehe-áⁿ cada iní-ó sã cúú-xí mée Xítóhó Jesucrístú, te ducaⁿ chi yúhú ní danèhé ñáhà-í xii-ndo ñã ngúndecu ndihi-ndo Xítóhó Jesucrístú, te vá yõo-gá cundecu ndihi-ndo chi ñⁿdíi díí-ni-gã ndécú.

¹² Te dava cue téé dàcaa-güedé vehe váha te chihí-güedé díhúⁿ cuááⁿ, ndihi díhúⁿ cuixíⁿ, ndihi yúú sã ío vii càa.

Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ.

13 Te sáá nduu te nchaa vehe-áⁿ càyú-xi, te vehe vítú-áⁿ ndihi vehe ité-áⁿ ndihi vehe tnuvixiⁿ-áⁿ ndoo ndoo càyú, te nchaa vehe váha-áⁿ vǎ càyú-xi cuèi na yǎha ñuhú. Te nchaa cue téé ní dácáá vèhe váha-áⁿ cada iní-ó sǎ cúú-güedé ñáyiu ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndihi cue téé ní dácáá vèhe ité, ndihi cue téé ní dácáá vèhe tnuvixiⁿ cada iní-ó sǎ cúú-güedé ñáyiu ñá túú cuíni cada chiúⁿ Yá Ndiöxí nàcuáa tàú-xi cunduu. Te sáá nduu te cutnùni nàcuáa ndùu chiuⁿ ní quide ìⁿ ìⁿ ñáyiu, chi Yá Ndiöxí cáháⁿ-gǎ nàcuáa ndùu chiuⁿ ní quide ìⁿ ìⁿ ñáyiu ní quide chiúⁿ-gǎ.

14 Te cue ñáyiu ío váha xǐquide chiúⁿ Yá Ndiöxí te cùdí chiúⁿ quidé-yu, te ñáyiu-áⁿ ñihǐ-yu sǎ ndúú tǎhǐ-yu.

15 Te cue ñáyiu ñá túú quide chiuⁿ Yá Ndiöxí nàcuáa tàú-xi cunduu, te vá cùdí chiúⁿ ní quidé-yu chi cuíta te ndóo-ná-yu duha, dico mèé-yu chi naníhí tǎhǐ-yu.

16 Te yúhú cǎháⁿ-í dóho-ndo dǎndacu-í iní-ndó sǎ cúú-ndó dǎtná vehe Yá Ndiöxí, chi Espíritú-gǎ ndécú ndihi ñaha-xi xii-ndo.

17 Te núu yoo na dànaa ñaha xii nchohó ñáyiu cùu veñúhu-gǎ, te Yá Ndiöxí danàa ñaha-gǎ xii ñáyiu-áⁿ, te ducaⁿ càda-gǎ chi nchòhó cúú-ndó ñáyiu cùu cuendá-gǎ.

18 Te vá dǎndàhú-ndó mèe-ndo sǎ ìo túha-ndo. Te núu ío dava-ndo sàni iní-ndó sǎ túha-ndo dǎtná sání iní cue ñáyiu ñá túú ndècu ichi Yá Ndiöxí, te cada-ndo sǎ cúú-ndó dǎtná ñáyiu ñá túú tnàhí túha, te ducaⁿ te cuu ndisa-ndo ñáyiu túha sǎ cúú-xí Yá Ndiöxí.

19 Te nchaa sǎ xini tnùnì nchaa ñáyiu cǎchí sǎ ìo túha ñá túú ndècu ichi Yá Ndiöxí ñá túú nàndíhi-xi sǎ cúú-xí-gǎ. Te cǎchí-xi núu tütú-gǎ: “Nchaa ñáyiu cǎchí sǎ ìo túha te Yá Ndiöxí dandóo canúú ñáhá-gǎ xii-yu núu nchàa sǎ quidé-yu”, duha cǎchí-xi núu tütú-gǎ.

20 Te cǎchí tucu-xi ingá xichi: “Yá Ndiöxí cùtnùnì iní-gǎ nchaa nàcuáa sàni iní ñáyiu cǎchí sǎ ìo túha. Te nchaa nàcuáa sàni iní-yu-áⁿ cǎchí-gǎ sǎ ñà túú vèdana nàndíhi-xi”, duha cǎchí-xi núu tütú-gǎ.

21 Núu xǎⁿ cǎháⁿ-í dóho-ndo sǎ vǎ cǎchí-ndó sǎ nchǔhú cue téé dǎnehé ñáhá

xii-ndo tnúhu-gǎ ío cǎhnu cuu-ndí. Te nchaa sǎ ío ñuyíú-a cùu-xi sǎ vǎha sǎ cúú-xí-ndó.

22 Te cuèi yúhú ndihi té Àpolós ndihi té Pèlú ndécú-ndí sǎ cúú-xí-ndó, te cuèi nchaa sǎ ío ñuyíú-a te cuèi nchaa nduu ndècu-ndo te cuèi sǎ cùu-ndó dico nchaa cùu-xi sǎ vǎha sǎ cúú-xí-ndó. Te cuèi nchaa sǎ ndécú tnàvíí, te cuèi nchaa sǎ cóo ndèé cuèé-gǎ nchaa cùu-xi sǎ vǎha sǎ cúú-xí-ndó.

23 Te mee-ndo ndècu-ndo sǎ cúú-xí Xítóhó Jesucristú, te mee Xítóhó Jesucristú ndécú-gǎ sǎ cúú-xí Yá Ndiöxí.

4

Nàcuáa ndùu chiuⁿ quide cue téé ní tǎúchíúⁿ Xítóhó Jesucristú cáháⁿ tnúhu-gǎ

1 Te cada cuendá-ndó sǎ nchǔhú dícó-ni cue téé xinu cuechi núu Xítóhó Jesucristú cúú-ndí, te chiúⁿ-áⁿ ñí taxi Yá Ndiöxí quidé-ndí cǎháⁿ-ndí tnúhu sǎ ñí cachí-gǎ yíyùhu ni cuu.

2 Te xini ñuhu-xi sǎ ncháá ñáyiu ducaⁿ ñí sǎñaha Yá Ndiöxí chiúⁿ quidé-yu cada ndáa-yu cada-yu chiúⁿ-áⁿ.

3 Te yúhú ñá túú quide cuendá-í núu nása ndùu tnúhu cǎháⁿ-ndó cuendá-í núu cùu-í téé váha àdi ñá túú cùu-í. Te diu-ni ducaⁿ ñà túú quide cuendá-í núu nása-gǎ cǎháⁿ nchaa dava-gǎ ñáyiu cuendá-í. Te ni mèe-í ñá túú cǎháⁿ-í núu cùu-í téé váha àdi ñá túú cùu-í.

4 Te sànuu iní-í sǎ ñà túú nǎ cúmǎni-í núu Yá Ndiöxí, dico ñá díú sǎ xǎⁿ te cachí-í sǎ ñá túú cuèchi-í ndécú núu-gǎ, chi mee-gǎ náhá ndáa-gǎ te núu nása quide-í ndécú-í.

5 Te nchòhó vá cǎháⁿ-gǎ-ndó sǎ ñà túú cùndáá ñáyiu núu Yá Ndiöxí, chi vátá sǎá-gǎ nduu cùndáá cuèchi-yu. Te na sǎá nduu quixi tucu Xítóhó Jesucristú te dàvá-áⁿ dǎtúu-gǎ nchaa sǎ quidé-yu, nchaa sǎ ñà túú xini-ó quidé-yu vítna, te ducaⁿ dǎtúu-gǎ nchaa nàcuáa sàni iní-yu. Te Yá Ndiöxí cáháⁿ váha-gǎ cuendá nchaa ñáyiu ní quide váha.

6 Te nchòhó ñáyiu ndècu ndihi-í ichi Xítóhó Jesucristú, cǎcunehe-í té Àpolós ndihi yúhú núu-ndó dǎnehé ñáhà-í xii-ndo nàcuáa cada-ndo cuendá ducaⁿ cùu-xi ìⁿ sǎ vǎha sǎ cúú-xí-ndó, ndihi cuendá sǎ nchòhó canchicúⁿ nihnu-ndo càda-ndo mee-ni nchaa nàcuáa yòdo tnùnì núu tütú

Yă Ndiöxí. Te ducaⁿ te vá cächí-ndó sã ìⁿ tée cãháⁿ tnúhu Yă Ndiöxí ío-gá cãhnu cuu-dé dácúúxí ìngá-dé.

7 Te nchòhó vá cächí-ndó sã ìo-gá cúnùu-ndo dácúúxí dàva-gá ñáyiu chi Yă Ndiöxí ní quide-gá ní ngúndecu ndihí-ndo nchàa sá xìní tnùní-ndó. Te mee-gã ducaⁿ ñí quide-gá ¿Te ná cuendá nchòhó ducaⁿ quide cãhnu-ndo mee-ndo? Te quide-ndo datná tnúhu sá mée-ndó ñí quide-ndo dùcaⁿ ní ngúndecu ndihí-ndo nchàa sá xìní tnùní-ndó.

8 Te nchòhó quidé-ndó sã ñà túú tnàhí-gá ná cúmăní-ndó nùú Yă Ndiöxí, te quide-ndo sá ní ñihí-ndó nchàa sá cuìní-ndó nùú-gã ndécú ndihí-ndo, te sànuu sá cúú-nã-ndó dàtná cue tée yìndaha ñáyiu, te nchúhú ñá túú cùu ìⁿnuu ndihí ñaha-ndí xii-ndo quìndaha ndihí ñaha-ndí xii-ndo ñáyiu, ìte váha-ni te núu dìcò ndisa sá yìndaha-ndo ñáyiu chi tnàhá nchúhú ní tnahá ndihí ñaha-ndí xii-ndo quìndaha-ó-yu te núu dìcò cúú-xí ìⁿ sá ndàá dico ñáhá!

9 Te yúhú quidé cuendá-í sá nchúhú cue tée ní táuchíúⁿ Xítóhó Jesucristú cãháⁿ tnúhu-gá núú ñáyiu ní cachí Yă Ndiöxí sá cúú-ndí cue tée ñá túú nàndíhi sá cúú-xí dàva-gá ñáyiu. Te ní cachí tucu-gá sá cúú-ndí dàtná cue ñáyiu sa ní tnahá òré cuú-xi quíhíⁿ nacháhu cuéchi-xi, te nchaa ñáyiu cùnúhu ñàhá-yu xii-ndí sá dúcãⁿ ndòho-ndí, te tnàhá nchaa espíritú cùnúhu ñaha-xi xii-ndí.

10 Te cuendá sá xínú cuèchi-ndí núú Xítóhó Jesucristú, xíãⁿ cúú-ndí dàtná cue tée ñá túú vèdana nàndíhi sá cúú-xí ñáyiu. Te nchòhó quidé-ndó sã cúú-ndó ñáyiu ío túha ndècu ndihí Xítóhó Jesucristú. Te ñáyiu cächí-yu sá nchúhú cúú-ndí cue tée ñá túú ndàcu cada ìⁿ sá cãdá sã cúú-xí Yă Ndiöxí. Te nchòhó quidé-ndó sã cúú-ndó ñáyiu ío váha ndàcu quide ìⁿ sá sání ìní-ndó sã cúú-xí-gã. Te cue ñáyiu dàquee tihú ñáhã-yu xii-ndí, te nchòhó néhë-yu sá yíñùhu núú-ndó.

11 Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu

quide úhú ñáhã-yu xii-ndí, te ni vèhe-ndí ñá túú ndèé cãá cùndecu-ndí.

12 Te ío ndòho-ndí quidé chiuⁿ-ndí ñihí-ndí sá xéxi-ndí. Te cue ñáyiu xícuèhé ñáhã-yu xii-ndí dico xìcãⁿ táhú-ndí núú Yă Ndiöxí cuendá-yu, te ñá cúú tnàhí quini ndeé ñáhã-yu xii-ndí dico quide cãhnu iní-ndí nchaa sá quidé ñàhá-yu.

13 Te mee-ni tnúhu cuèhé tnúhu duha cãháⁿ-yu cuendá-ndí dico sãcãhnu iní-ndí te dāsahú-ndí-yu mee-ni tnúhu váha. Te cächí-yu sá cúú-ndí dàtná ìⁿ sá ñà túú-gã vèdana nàndíhi, te nchaa-ni nduu ducaⁿ cãháⁿ-yu xãháⁿ-yu xii-ndí.

14 Te yúhú duha cãháⁿ-í núú tütú-a dāsahú ñàhá-í xii-ndo, dico ñá díú tnúhu sá cúú cãháⁿ núú-ndó cãháⁿ-í. Te duha cãháⁿ-í dóho-ndo chi quide iní-í sá sùúni dàtná déhe mee-í cúú-ndó chi ío cùu iní ñàhá-í xii-ndo.

15 Te nchaa-o ndècu-o ichi Xítóhó Jesucristú vitna, dico yúhú cúú-í tée díhna nuu ñí dánèhé ñáhã xii-ndo nacuáa nduu tnúhu sá cãháⁿ nacuáa naníhí tàhú-ó, núu xíãⁿ cúú-í dàtná tãtã-ndó. Te cuèi vài vihi cue tée na quixi-güedé danèhé ñáhã-güedé xii-ndo tnúhu-gá dico ìⁿ dìi-ni yúhú cúú-í tée díhna nuu-gã ní dánèhé ñáhã xii-ndo tnúhu-gá.

16 Núu xíãⁿ cãháⁿ-í dóho-ndo sã cãncíçúⁿ nihnu-ndo càda-ndo nchaa nacuáa quide-í.

17 Te xíãⁿ nùu sa ní tendaha-ì té Timùteú véxi coto ñaha-dé xii-ndo, te tée-áⁿ ío cùu iní-í-dé te quide ndàá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te tée-áⁿ cachí tnúhu-dé xii-ndo nchàa nacuáa quide-í ndécú-í ichi-gá. Te ñiu-ni nacuáa na cächí tnúhu-dé-áⁿ ñiu-ni ducaⁿ quide-í nchaa xichi núú tàcã ñáyiu dàcuaha tnúhu Xítóhó Jesucristú.

18 Te dava nchòhó ío quide cãhnu-ndo mee-ndo chi sání iní-ndó sã vã quixí-gã-í quixi coto ñaha-í xii-ndo.

19 Dico núu mee Yă Ndiöxí ná cächí-gá te ío ndíhi quixi coto ñaha-í xii-ndo, te dàvã-áⁿ quini-í te núu nása quide nchaa ñáyiu ducaⁿ ío xíquide cãhnu mee-xi-áⁿ ndécú-yu ichi Xítóhó Jesucristú. Te vá cãdá cuendá-í tnúhu cãháⁿ-yu chi chiuⁿ quidé-yu cada cuendá-í.

20 Te vitna yìndaha ñaha Yă Ndiöxí xii-o, te chìndee ñaha-gá xii-o quide-o nchaa sá

vãha sàni iní-ó quide-o te ñá díú mèe-ni sá cãháⁿ-ó.

²¹ Te ío chí cání ìní nõu ndëdacàa sá vãha-gã cada-í òré ná quèxió-í nõú ndécú-ndó, nõu sá ténàá ñáhà-í xii-ndo àdi sá cãháⁿ ndìhi ñaha-í xii-ndo ndìhi tnúhu vii tnúhu vãha nàcuáa cutnùní iní-ndó sã cúú ìní ñáhà-í xii-ndo.

5

Íⁿ cuéchi cãhnu vihi

¹ Te yúhú sa ní níhi ndáá-í tnúhu nàcuáa cùu ndecu-ndo, chí ìⁿ tée ndècu ndìhi-ndo ndeca-dé nãná chàhá-dé. Te xíãⁿ cúú-xí ìⁿ cuéchi cãhnu vihi, chí ndéé nchaa ñáyiu ñá túú ndècu ichi Yá Ndiõxí cãchí-yu sá vã cúú tnàhí ducaⁿ càda-o.

² ¡Te nchòhó ío quide cahnu-ni-ndo mee-ndo xíndecu-ndo! ¡Te tàú-ndó sã cùndiyí-ndó ndìxi cuéchi iní-ndó sã dúcáⁿ cùu ndecu-ndo ní cuu! Te tée ducaⁿ quide-áⁿ xíní ñùhu-xí sá vã dáñá-gã-ndó ñìhí tnáhá ndìhi ñaha-dé xii-ndo ní cùu dico ñá túú dùcaⁿ quide-ndo.

³ Te yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chí ducaⁿ-ní ío ñùhu ìní ñáhà-í xii-ndo. Te yúhú cãchí-í sá nãchãhu tée-áⁿ cuéchi-dé sá dúcáⁿ quide-dé, te diu-ni ducaⁿ cãháⁿ-í nõú-ndó te nõu dicó ndécú ndìhi ñaha-í xii-ndo.

⁴ Te òré nãtácá-ndó cãháⁿ ndìhi-ndo Yá Ndiõxí te diu-ni Xítohó Jesucristú ñá túú dàña ndéé-gá chíndèe ñaha-gá xii-ndo, te òré-áⁿ cada-ndo nàcuáa cuíni Xítohó Jesucristú cada-ndo, te cada iní-ndó sã tnáhá-í ndécú ndìhi ñaha-í xii-ndo.

⁵ Chí tàú-xí sá tée ducaⁿ quide-áⁿ daqueèe tíhú-ndó-dě, te ducaⁿ te sãcuíhná dandòho ñaha-xí xii-dé cuèi na cùú-dé, dico na sàá nduu te nduu táhú-dě cundecu-dé ndìhi Xítohó Jesucristú.

⁶ Te nchòhó ñá túú ndùu vãha-xí sá cãchí-ndó sã ío cãhnu cuu-ndo. Te xíní-ndó sã cuèi luha-ni levadùrá ná quíhu yuchi cuáha pàá dándàa-xí cuéi luha-ni nã quíhu te ñìhí-ni yuchi sãháⁿ ndoho-xí. Te ducaⁿ sãtnahá-xí cùu nchohó chí nõu ndècu ndìhi-ndo ìⁿ ñáyiu quide sá ñá túú vãha te nchaa-ndo ñá túú-gã cúú vãha iní-ndó ndècu-ndo.

⁷ Te xíni ñùhu-xí sá cáda-ndó dàtná quidé cuè ñáyiu quide vico pascuá, chí ñá túú

chìhí-yu levadùrá yuchi cuáha pàá xéxí-yu nduu quidé-yu vico-áⁿ. Te sá quíhu pàá-áⁿ cada iní-ó sã cúú-xí nchaa sá cuèhé sá dúhá ní xóo cada-ndo. Te vã cáda-gã-ndó ní ìⁿ sá cuèhé sá dúhá, te ducaⁿ te cuu-ndo ñáyiu vãha chí sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sã cúú-güedi datná Xítohó Jesucristú nàcuáa ní xíhí-gá nõú cùrúxí.

⁸ Te nõu xíãⁿ xíní ñùhu-xí sá vã cáda-gã-ndó ní ìⁿ sá cuèhé sá dúhá sã ní xóo cada-ndo, te ní vã cúhúⁿ-gã iní-ndó te ní vã cáda-gã-ndó, te ní yùhu ní iní-ná-ndó càda-ndo mee-ni sá vãha.

⁹ Te tutú sá sà ní dáquixí-í ndaha-ndo ní cãchí-í sá vã ñìhí tnáhá-ndó ndìhi cue ñáyiu ndècu ichi díí ìní.

¹⁰ Te sá dúcáⁿ cãháⁿ-í nõú tutú ní dáquixí-í ndaha-ndo te vã cání ìní-ndó sã yúhú cãchí-í sá vã cúú-gã tnahá tnúhu-ndo ndìhi cue ñáyiu ndècu ichi cuehé ichi duha, ndìhi ñáyiu ndècu ichi díí ìní, ndìhi ñáyiu xìho nchaa sá ío ñuyíú, ndìhi ñáyiu dùhu sá ndécú ndìhi tnaha ñáyiu-xí, ndìhi ñáyiu quide cahnu sá cãchí-yu cùu ndiõxí te ñá ndàá sá ndiõxí cúú-xí chí dicó cue tée ñuyíú-a ní cadúha nchaa xíãⁿ, chí nõu ducaⁿ na càda-ndo vã tnahá tnúhu-gã-ndó ndìhi-yu te xíni ñùhu-xí sá vã cùndècu-gã-ndó nõú ndécú-yu.

¹¹ Te ñá túú dùcaⁿ quee-xí nacuáa cãháⁿ-í nõú tutú-í, chí yúhú cãchí-í sá vã cúú tnahá tnúhu-ndo ndìhi ñáyiu cãchí sá ndécú ìchi Xítohó Jesucristú te ñá ndàá sá ndécú-yu ichi-gá. Te nõu cùú-yu ñáyiu ndècu ichi díí ìní, àdi cuú-yu ñáyiu xìho nchaa sá ío ñuyíú-a, àdi cuú-yu ñáyiu quide cahnu nchaa sá cãchí-yu cùu ndiõxí te ñá ndàá chí dicó cue tée ñuyíú-a ní cadúha nchaa xíãⁿ, àdi cuú-yu ñáyiu yiti yùhu-xí, àdi cuú-yu ñáyiu quíhu, àdi cuú-yu ñáyiu dùhu sá ndécú ndìhi tnaha ñáyiu-xí, te nchaa ñáyiu ducaⁿ cãchí sá ndécú ìchi-gá te ñá ndàá te ducaⁿ xíquidé-yu, te ní vã cúú ñìhí tnáhá-ndó ndìhi-yu caxi-ndo ndìhi-yu.

¹²⁻¹³ Te ñá díú yúhú cùú-í tée cãháⁿ cuendá nchaa ñáyiu ñá túú ndècu ichi Xítohó Jesucristú nõu quide ndáá-yu àdi

ñá túú quide ndáá-yu ndècú-yu, chi mee Yă Ndiöxí cáháⁿ-gá te núu nása quide-yu ndècú-yu. Dico nchòhó chi tàú-ndó càda cuendá-ndó núu nása quide cue ñáiyu ndècu ndihí-ndo ichi Xítohó Jesucristú. Núu xíãⁿ xíní ñùhu-xi daquee tíhú-ndó tée ducaⁿ ñà túú quide váha ndècu ndihí-ndo-áⁿ, te vá dáñá-gă-ndó ñihí tnáhá ndihí ñaha-dé xii-ndo.

6

Nàcuáa tàú-xi cada ñáiyu ndècu ichi Xítohó Jesucristú te núu ñá túú ndècu ndihí váha tnáhá-yu

¹ Te dava nchòhó òré ñá túú ndècu ndihí váha tnàha-ndo te cùyii-ndo cuáháⁿ-ndó núú cuè tée cùchiuⁿ ñá túú ndècu ichi Xítohó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè tée ndècu ichi-gá ducaⁿ tàú-ndó quihíⁿ-ndó càcáⁿ cuéchi-ndo.

² Te nchòhó sa nàha-ndo sá ncháá ñáiyu cùu cuendá Yă Ndiöxí sáá nduu cãháⁿ-yu te núu ní quide ndáá nchaa dava-gá ñáiyu àdi ñá túú ní quide ndáá-yu, te nchòhó tnáhá-ndó cùu-ndo ñáiyu ducaⁿ cãháⁿ, te núu ducaⁿ te cutnùní iní-ndó sã ndácú-ndó càda ndáá-ndó nchàa cuéchi sá ñá túú ùhú cundáá vitna ndècu-ndo ñuyíú-a.

³ Te nchòhó sa nàha-ndo sá ncháá ndéé cue espíritú xínú cuèchi núú Yă Ndiöxí sáá nduu cãháⁿ-ó te núu nása quide-xi ndecu-xi. ¡Núu xíãⁿ cútnùní iní-ó sã úúⁿ-gă ndacu-o càda ndáá-ó nchàa cuéchi sá ió ñuyíú-a!

⁴ Te núu ió dava-ndo ió nása cùu ndecu-ndo te xínáa-ndó, te vá quihíⁿ-ndó càcáⁿ cuéchi-ndo núú cuè tée ndèhe-ndo sá ñà túú ndècu-güedé ichi Yă Ndiöxí, dico nchòhó chi da núú cuè tée-áⁿ cuáháⁿ-ndó sàcáⁿ cuéchi-ndo.

⁵ Te duha cãháⁿ-í cuendá cucahaⁿ núú-ndó chi ñá túú quide váha-ndo sã dúcáⁿ quide-ndo. ¿Te náa dicó-nã ñá túú tnáhí ìⁿ tée cùtnuní iní-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-ãⁿ?

⁶ Te nchòhó, ñá túú quide váha-ndo, chi dava-ndo cuáháⁿ-ndó núú cuè tée ñá túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáiyu ndècu ndihí-ndo ichi-gá.

⁷ Te ñá túú quide váha-ndo sã dúcáⁿ nàá ndihí tnàha-ndo te cuáháⁿ-ndó sàcáⁿ cuéchi-ndo, te váha-gá sá cadá càhnu iní-ndó cuèi nándi na càda ñaha tnaha ñáiyu-ndo xii-ndo cuèi dùhú-yu sá ndécú ndihí-ndo dico cada càhnu-ni iní-ndó.

⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xi tnàha ñáiyu-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáiyu ndècu ichi cuehé ichi duha vá ndúú tãhú-yu cundecú-yu núú ndécú Yă Ndiöxí táxi tnùní-gá, núu xíãⁿ vá cání iní-ndó sã ñáiyu-áⁿ nduu tãhú-yu cundecú-yu ndihí-gá. Te ni cuè ñáiyu ndècu ichi díí iní, te ni cuè ñáiyu quide cahnu nchaa sá càchí-yu cùu ndiöxí te ñá ndáa chi dicó cue tée ñuyíú-a ní cadúha nchaa xíãⁿ, te ni cuè tée càháⁿ ndihí ñadìhí te ñá díú ñàdihí-güedé cùú-yu, te ni cuè ñáiyu dìhí càháⁿ ndihí tée te ñá díú yíí-yu cùu-güedé, te ni cuè tée càháⁿ ndihí tnàha tée-xi,

¹⁰ te ni cuè ñáiyu dùhu, te ni cuè ñáiyu xihó sá ndécú ndihí tnaha ñáiyu-xi, te ni cuè ñáiyu quihu, te ni cuè ñáiyu càháⁿ úhú, te ni cuè ñáiyu dãnícuehé tnàha ñáiyu-xi te dùhu ñahá-yu, te ni ìⁿ cue ñáiyu duha xiquide vá ndúú tãhú-yu cundecú-yu núú ndécú Yă Ndiöxí táxi tnùní-gá.

¹¹ Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáiyu sa ní nduu ndoo ní nduu nine iní-xi, te ní cuu-ndo ñáiyu cùu cuendá Yă Ndiöxí, te ní cuu tucu-ndo ñáiyu ñá túú-gă cuéchi-xi ndècu núú-gă. Te ducaⁿ ñí quide ñaha Yă Ndiöxí xii-ndo sã váha sá cuendá Xítohó Jesucristú, te ní ngúndecu ndihí-ndo Espíritú Yă Ndiöxí.

Nàcuáa ndùu cuendá yiqui cùñú-ó

¹² Te càchí ñáiyu sá ncháá sã sání iní-ó cuu cada-o, te ndáá cãháⁿ-yu dicó-ni sá ñã ncháá cùu-xi sá váha sá cúú-xi-ó. Te núu culní nchaa sá sání iní-ó-ãⁿ taxi tnùní ñahá-xi te vá cadá-ó.

¹³ Te nchòhó sa xíní-ndó sã ncháá sã xéxí-ó cuãguee-xi xití-ó, te xití-ó ñí cuáha tnáhí-xi sá cúhúⁿ nchàa sá caxí-ó, dico xití-ó ndihí nchaa sá xéxí-ó chi naa-xi. Te Xítohó

Jesucristú néhé cuendá-gá yiqui cuñú-ó, te ducaⁿ yiqui cuñú-ó cùu-xi cuendá-gá, te ñá túú ní cuáha yiqui cuñú-ó sá cùndècu-xi ichi díí ìní.

14 Te dàtná ní quide Yá Ndiöxí ní dándótó-gã Xítohó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o nùu na cùú-ó, chi ndàcu-gá quidé-gã nchaa sá vãha.

15 Te nchòhó sa nàha-ndo sá yiqui cuñú-ó cùu-xi cuendá Xítohó Jesucristú chi ìⁿ-ni cùu-o ndihí-gá, núu xiãⁿ ñá túú tnàhí ndùu váha-xi cáháⁿ ndihí-o ñáyiú ndècu ichi díí ìní, chi yiqui cuñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sá cuendá-nã ñáyiú-áⁿ cúú yiqui cuñú-ó, núu xiãⁿ ñá túú tnàhí ndùu váha-xi ducaⁿ càda-o.

16 Te sa xíní-ndó sá nùu ìⁿ tée na càháⁿ ndihí-dé ìⁿ ñadìhí ndécú ìchi díí ìní te cada iní-ó sá ìⁿ-nã yiqui cuñú cúú-yu. Te ducaⁿ càháⁿ-xi núu tùtú Yá Ndiöxí núu càchí-xi: “Ìⁿ tée na càháⁿ ndihí-dé ìⁿ ñadìhí te ìⁿ-nã yiqui cuñú cúú-yu”, duha càchí-xi.

17 Te ducaⁿ sãtnahá-xi cùu nchaa ñáyiú tnàhá tnúhu ndihí Xítohó Jesucristú, chi ìⁿ-nã cúú-yu ndihí-gá.

18 Te núu xiãⁿ càháⁿ-í dóho-ndo sá vã cùndècu-ndo ichi díí ìní, chi núu ducaⁿ na càda-ndo te ñá túú tnàhí sá vãha cùu-xi sá cúú-xí yiqui cuñú-ndó chi ío dàcuíta ni-hnu-xi yiqui cuñú-ndó. Te nchaa dava-gá sá cuèhé sá dúhá ñà túú quide-xi yiqui cuñú-ndó dàtná quidé xiãⁿ.

19 Te nchòhó sa cùtnuní iní-ndó sá yiqui cuñú-ndó cùu-xi datná ìⁿ vehe núu ndécú Espíritú Yá Ndiöxí. Te ducaⁿ sãtnahá-xi cùu yiqui cuñú-ndó chi ndècu-ndo ndihí Espíritú-gá. Te mee-gã ní taxi-gá Espíritú-gá ndécú ndihí-ndo, te ñá díú mèe-ndo cuu cuendá-ndó mèe-ndo chi Yá Ndiöxí cúú cuendá ñáhá-gã xii-ndo.

20 Te ducaⁿ cùu-ndo ñáyiú cùu cuendá Yá Ndiöxí chi Xítohó Jesucristú ní nacháhu-gá nchaa yíca cuèchi-ndo. Te núu xiãⁿ xíní ñùhu-xi sá ñìhí ní ndúú-ndó càda-ndo nacúáa cuu càhnu Yá Ndiöxí, te ducaⁿ tàú-xi cada-ndo chi espíritú-ndó ndihí yiqui cuñú-ndó cùu-xi cuendá-gá.

7

Sáhú sã cúú-xí ñáyiú ní tnándaha

1 Te ní quexìo tutú sá ñí dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó nùú tùtú-ndó. Te váha cada-xi te núu vá càndèca tée ñadìhí, te ducaⁿ-ni vãha cada-xi te núu ñáyiú ñìhí vá càndècá-yu tée.

2 Te dìcò-ni sá nùu ducaⁿ na càda-ndo te dava-ndo càni iní-ndó cùndècu-ndo ichi díí ìní. Núu xiãⁿ xíní ñùhu-xi sá ncháá cuè tée ndi dííⁿ cùndècu ñadìhí-güedé, te ducaⁿ-ni tùcu nchaa cue ñáyiú ñìhí ndi dííⁿ cùndècu yí-yu.

3 Te càchí tnúhu-í xii-ndo sá ncháá cuè tée vá cúú càchí-güedé sá vã cúú càháⁿ ndihí-güedé ñadìhí-güedé, te ñìu-ni ducaⁿ cuè ñáyiú ñìhí tucu, vá cúú càchí-yu sá vã cúú càháⁿ ndihí-yu yí-yu.

4 Te nchaa cue ñáyiú ñìhí chi ñá díú mèe-ní-yu cùu cuendá-yu yiqui cuñú-yu chi tnàhá cúú cuendá yí-yu, te ducaⁿ-ni nchaa cue tée tucu chi ñá díú-ní mèe-güedé cúú cuendá-güedé yiqui cuñú-güedé chi tnàhá cúú cuendá cue ñadìhí-güedé.

5 Te cue tée vá cúú càchí-güedé sá vã cúú càháⁿ ndihí-güedé ñadìhí-güedé. Te ni cuè ñáyiú ñìhí vá cúú càchí-yu sá vã cúú càháⁿ ndihí-yu yí-yu. Àdi te núu ní ndatnúhu-yu sá vã dúcáⁿ càdá-yu ìⁿ ùú nduu cuendá sá cuíní-yu ío cáháⁿ ndihí-yu Yá Ndiöxí, dico nã yáha núu ná daha nduu ducaⁿ ñí ndatnúhu-yu sá vã dúcáⁿ càdá-yu te naníhí tnàhá tùcú-yu, chi núu ñáhá te cudana te vá cuácàhnu iní-yu te sácúíhná dacàháⁿ ñáhá-xi xii-yu cadá-yu sá ñà túú tàú-yu cadá-yu.

6 Te tnúhu càháⁿ-í-a quèe-xi sá tée ndihí ñadìhí cuu candeca tnàhá-yu dico ñá túú quide yica-í sá dúcáⁿ càdá-yu.

7 Te yúhú sání ìní-í sá nùu dìcò sá cúú te nchaa-ndo cùndècu-ndo datná ndécú-í, dico ñáhá chi mee Yá Ndiöxí ní cachí-gá nàcuáa nduu táhú-ó ìⁿ ìⁿ-o cùndècu-o, chi dava-o ñí cutáhú-ó nùú-gã sá cùndècu ñadìhí-ó te dava-o ñáhá.

8 Te càchí tnúhu-í xii nchòhó cue tée vátá ñìhí-gá ñadìhí-xi sá vãha-gá sá nùu

vá cùndècu ñadihí-ndó dàtná yúhú. Te ducaⁿ-ni nchòhó cue ñáyiu ñá yúhú vátá ñíhí-gá yí-xi sá vǎha-gá sá ñúu vá cùndècu yí-ndo. Te ñíu-ni duha càháⁿ-í sá cúu-xí nchàa nchòhó ñáyiu ñá yúhú ní quendóo quèé sá vǎha-gá sá ñúu vá càndèca-gá-ndó tèe.

⁹ Te càchí tñúhu-í xii nchaa-ndo sǎ ñúu xito-ndo sá vǎ cùndèe iní-ndó cùndècu mee-ndo te váha-gá sá ñúu tnándaha-ndo, te ñá díú sǎ mée-ní càni cuehé cani duha iní-ndó cùndècu-ndo.

¹⁰ Te nchaa nchòhó ñáyiu sa ní tnándaha càháⁿ-í dóho-ndo, te ñá díú mée-í duha càhu iní-í càháⁿ-í dóho-ndo chi Xítóhó Jesucristú ducaⁿ dàcahu iní ñáhá-gǎ xii-í, chi mee-gǎ cuíní-gá cada-ndo nàcuáa na càháⁿ-í-a. Te nchaa nchòhó cue ñáyiu ñá yúhú càháⁿ-í dóho-ndo sǎ vǎ dáñá-ndó yí-ndo.

¹¹ Te núu ío dava-ndo sǎ ní dáñá-ndó yí-ndo, te xini ñúhu-xi sá vǎ càndèca-gá-ndó tèe, chi cùndècu mee-ñá-ndó àdi núu ñáhá te naqueheⁿ tucu-ndo tèe ní cuu yí-ndo. Te nchaa nchòhó cue tèe ndècu ñadihí-xi càháⁿ-í dóho-ndo sǎ vǎ dáñá-ndó ñáyiu cùu ñadihí-ndó.

¹² Te tñúhu na càháⁿ-í-a cùu-xi sá ñí sani iní mée-í te ñá díú tñúhu sá ñí càchí Xítóhó Jesucristú càháⁿ-í cúu-xí. Te núu dava nchòhó cue tèe ndècu ichi Xítóhó Jesucristú ndécá-ndó ñáyiu ñá yúhú ñá túu ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo.

¹³ Te núu dava nchòhó cue ñáyiu ñá yúhú ndècu ichi Xítóhó Jesucristú ndécá-ndó cuè tèe ñá túu ndècu ichi-gá te vá dáñá-ndó-güedé te núu cùu váha iní-güedé ndécá ñáhá-güedé xii-ndo.

¹⁴ Te núu ñá yúhú sàndáa iní-dé Xítóhó Jesucristú te ñadihí-dé sàndáa iní ñáhá-áⁿ xii-gá, te tèe-áⁿ ní cuu-dé ñá yúhú sa ní cuyatni tnahá tñúhu ñá yúhú ñá yúhú xii-gá sá cuèndá ñá yúhú-dé. Te ducaⁿ sǎtnahá-xi cùu tucu ñadihí ñá túu sàndáa iní ñáhá xii Xítóhó Jesucristú te yí-aⁿ sàndáa iní ñáhá-dé xii-gá, te ñáhá-áⁿ sa ní cuyatni tnahá tñúhu-aⁿ ñá yúhú-gá sá cuèndá yí-aⁿ, te ñá yúhú-ni ducaⁿ sǎtnahá-xi cùu cue landú-yu chi sa ní cuyatni tnahá tñúhu-güexi ñá yúhú-gá. Te núu vá dúcáⁿ cùu te cue landú-yu-áⁿ ío xica cùndècu-güexi núu-gǎ.

¹⁵ Te núu ñá yúhú tèe ñá túu sàndáa iní ñáhá xii Xítóhó Jesucristú cuíní-dé dáña tñáhá-dé ñá yúhú ñá yúhú-dé ñáhá sàndáa iní ñáhá xii Xítóhó Jesucristú, te ñá yúhú-ni na càda-dé nàcuáa sàni iní-dé. Te ñá yúhú-ni ducaⁿ tucu te núu ñá yúhú ñáhá ñá túu sàndáa iní ñáhá xii Xítóhó Jesucristú cuíní-aⁿ dáña-aⁿ tèe sàndáa iní ñáhá xii-gá, tèe cùu yí-aⁿ te ñá yúhú-ni na càda-aⁿ nàcuáa sàni iní-aⁿ. Chi tèe sàndáa iní ñáhá xii Xítóhó Jesucristú ñá túu tñáhá-dé cada yica-dé ñá yúhú-dé cùndècu ñá yúhú ñáhá-aⁿ xii-dé te núu ñá túu cuíní-aⁿ. Te ñá yúhú-ni ducaⁿ ñá yúhú ñáhá sàndáa iní ñáhá xii-gá ñá túu tñáhá-aⁿ cada yica-aⁿ cùndècu ñá yúhú ñáhá yí-aⁿ xii-aⁿ te núu ñá túu cuíní-dé cùndècu ñá yúhú ñáhá-dé xii-aⁿ, chi Yá Ndióxi cuíní-gá sá nchàa nchòhó ñáyiu ndècu ichi-gá cùndècu váha-o vǎ nàá-ó.

¹⁶ Chi cue tèe sàndáa iní tñúhu Xítóhó Jesucristú ñá túu cùtnuní iní-güedé te núu ndacu-güedé canu ichi-güedé ñá yúhú-güedé ichi-gá àdi ñáhá te núu ñá túu sàndáa iní ñáhá-yu xii-gá, te ducaⁿ-ni cuè ñáyiu ñá yúhú sàndáa iní tñúhu Xítóhó Jesucristú ñá túu cùtnuní iní-yu te núu ndacú-yu canu ichi-yu yí-yu ichi-gá àdi ñáhá te núu ñá túu sàndáa iní ñáhá-güedé xii-gá.

¹⁷ Te duha na càchí tñúhu-í xii-ndo, nchaa chiúⁿ ní nduu táhú-ndó núu Yá Ndióxi quidé-ndó ndéé cùtnáhá ní càháⁿ ñáhá-gǎ xii-ndo ní natuha-ndo ichi-gá te ñá yúhú-ni chiúⁿ-áⁿ cada-ndo cùndècu-ndo. Te nchaa xichi núu tàcá ñáyiu dàcuaha tñúhu-gá ñá yúhú-ni duha càháⁿ-í dóho-yu.

¹⁸ Te nchaa cue tèe ndècu seña ñá yúhú-xi dàtná ní cachi ndíi Moisés, cue tèe ní càháⁿ Yá Ndióxi ndécú ichi-gá, te ñá yúhú-ni ducaⁿ cùnduu-güedé cùndècu-güedé, te nchaa cue tèe ñá túu ndècu seña ñá yúhú-xi ní càháⁿ-gá cùndècu ichi-gá, ñá yúhú-ni ducaⁿ cùnduu-güedé cùndècu-güedé vá cuǎha-güedé seña ñá yúhú-güedé.

¹⁹ Te ñá yúhú-ni cùu-xi cuéi na cuǎha-o seña ñá yúhú-o àdi vá cuǎha-o. Te sá ío-gá xini ñá yúhú-xi cada-o xíⁿ cúu-xí sǎ càdá-ó nchàa nàcuáa cuíní Yá Ndióxi.

²⁰ Chi xini ñá yúhú-xi sá cùndècu-ni-o dàtná ndécú-ó cùtnáhá ní càháⁿ ñáhá Yá Ndióxi xii-o ní ngùndècu-o ichi-gá.

²¹ Te núu cùu-ndo ñáyiu ñá túu tñáhá dáña quee núu chíuⁿ pàtróoⁿ-xi cùtnáhá ní càháⁿ ñáhá Yá Ndióxi xii-ndo, te ñá

túu nã cani iní-ndó, dico núu dàña ñaha patrón-ndó quèe-ndo núu chíuⁿ-ndó te váha-ni quee-ndo núu chíuⁿ-ndó.

22 Te sátá ñí cáháⁿ ñáhá Xítóhó Jesucristú xii nchòhó ñáyiú ducaⁿ ñà túú tnàhí dàña quee núu chíuⁿ patrón-xi-áⁿ, te ní cuu-ndo dàtná ñáyiú dàña quée núu chíuⁿ patrón-xi sá cúu-xí-gã, te ducaⁿ chi ñà túú-gã ndécú-ndó ichi cuehé ichi duha. Te nchòhó ñáyiú dàña quée núu chíuⁿ patrón-xi cùu-ndo datná ñáyiú ñà túú tnàhí dàña quee núu chíuⁿ patrón-xi sá cúu-xí Xítóhó Jesucristú, te ducaⁿ chi xínu cuechi-ná-ndó núu-gã.

23 Te Yá Ndiõxí ní nduu cuendá ñáhá-gã xii-o chi Xítóhó Jesucristú ní nacháhu-gã nchaa yíca cuèchi-o sã ndécú núu Yá Ndiõxí ní cùu, te vá dáña-ndó sã tnàha ñáyiú-ndo nàdatuhú iní ñáhã-yu xii-ndo vá cúnú cuèchi-ndo núu Xítóhó Jesucristú nàcuáa tàù-xi cunduu.

24 Te núu xiãⁿ càchí tnúhu-í xii nchaa nchòhó ñáyiú ndècu ndihí-í ichi Xítóhó Jesucristú sá cùndècu-ni-ndo datná-ni ndècu-ndo ndéé cùtnàhá ní cáháⁿ ñáhá-gã xii-ndo, te ñi-ni ducaⁿ cùndecu-ndo ichi-gã.

25 Te càchí tnúhu tucu-í xii-ndo sã Xítóhó Jesucristú ñà túú càchí tnúhu-gã xii-í núu nása cáháⁿ-í cuendá nchaa ñáyiú vátá tnãndaha-gã. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chi Xítóhó Jesucristú chindèe chitúu ñaha-gã xii-í.

26 Te yúhú càchí-í sá sã cuendá nchaa tnúndòho tnúhu ndáhú íó ñuyíú-a vitna, te váha-gã sá ncháá ñáyiú te núu nása xíndecú-yu te ducaⁿ-ni na cùndecú-yu.

27 Te nchaa cue téé ndècu ñadihí-xi te ducaⁿ-ni na cùndecu-güedé ndihí-yu, te nchaa cue téé ñà túú ñadihí-xi te ducaⁿ-ni na cùnduu-güedé vá ndúcú-güedé ñadihí-güedé.

28 Dico nchaa cue téé na ndècu ñadihí-xi te ñà díú ñíⁿ cuéchi cùu-xi sá dúcáⁿ ná ndècu-güedé ñadihí-güedé, te ñi-ni ducaⁿ cùu tucu cue ñáyiú ñihí te núu na ñihí-yu yí-yu chi ñà díú ñíⁿ cuéchi cùu-xi sá dúcáⁿ ñihí-yu yí-yu. Te núu cue téé na ñihí-güedé ñadihí-güedé te nándi ndohó-yu cun-

decú-yu ñuyíú-a, te núu xiãⁿ duha càháⁿ-í cuendá sá vá ndúcú-güedé ñadihí-güedé cuendá sá vá ndóhó-yu.

29 Te nchaa nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo sã ñà túú-gã vài nduu cumání te quixi tucu Xítóhó Jesucristú, núu xiãⁿ xíní ñùhu-xi sá ndéé vitna ngüíta nchaa cue téé ndècu ñadihí-xi cada-güedé chiúⁿ Xítóhó Jesucristú, te cada-güedé dàtná sá ñà túú ñadihí-güedé.

30 Te nchaa ñáyiú ndihú iní-xi te na càda-ní-yu sá ñà túú ndihú iní-yu cadá-yu chiúⁿ Yá Ndiõxí. Te nchaa ñáyiú cùdíí iní-xi te na càda-ní-yu sá ñà túú cùdíí iní-yu cadá-yu chiúⁿ-gã, te nchaa ñáyiú ndècu ndihí nándi sá ndécú ndihí te na càda-ní-yu sá ñà túú nã ndécú ndihí-yu cadá-yu chiúⁿ-gã.

31 Te nchaa ñáyiú nèhe chiúⁿ nchaa sá íó ñuyíú-a te na càda-ní-yu cuendá sá ñà túú nã néhé chiúⁿ-yu cadá-yu chiúⁿ Yá Ndiõxí, chi nchaa sá íó ñuyíú-a sa ñùhu-xi ichi cuáháⁿ-xi núu ndihí ñihnu-xi.

32 Te cuíní-í sá vá cúhúⁿ iní-ndó nándi sá íó ñuyíú-a, te ní ñà túú tnàhí ná cani iní-ndó cùndecu-ndo, chi nchaa cue téé ndècu ichi Xítóhó Jesucristú xíndecu mee íó ñùhu iní-güedé cada-güedé chiúⁿ-gã nàcuáa cudíu-güedé núu-gã.

33 Te nchaa cue téé sa ndècu ñadihí-xi cue téé ndècu ichi-gã ñùhu iní-güedé nàcuáa cada-güedé cùndecu-güedé ñuyíú-a cuendá ducaⁿ cùdíu-güedé núu ñadihí-güedé.

34 Te ñi-ni ducaⁿ cùu tucu cue ñáyiú ñihí chi ñà túú ñíⁿ-ni cuu ñáyiú sa ndècu yí-xi ndihí ñáyiú vátá cùndecu-gã yí-xi, chi ñáyiú ndècu ichi Xítóhó Jesucristú ñà túú ndèca téé íó ñùhu iní-yu cadá-yu chiúⁿ-gã nàcuáa ñihí ní ndúú-yu cùndecu yíñùhú-yu núu Yá Ndiõxí, dico cue ñáyiú ñihí ndécá téé ndècu ichi-gã íó ñùhu iní-yu nàcuáa cùndecú-yu ñuyíú-a cuendá cudíu-yu núu yí-yu.

35 Te duha càháⁿ-í cuendá cúu-xí ñíⁿ sá váha xii-ndo, te cudíu núu tnàhá-ndó, te cuu-ndo ñáyiú cada ndáá núu Xítóhó Jesucristú, te mee-ni-gã cuhuⁿ iní-ndó. Te

ñá díú sǎ dúhá càháⁿ-í te quide yica-í sǎ cádá-ndó nàcuáa càháⁿ-í.

³⁶ Te núu ío dava-ndo sàni iní-ndó sǎ ñà túú ndùu váha-xi sǎ ío cuu sacuéhé dèhe yoco-ndo cùndecú-yu ña, te núu sàni iní-ndó sǎ vǎha-gá candecá-yu téte te cada-ndo nàcuáa sàni iní-ndó, chi ñá díú ìⁿ cuéchi cùu-xi.

³⁷ Te núu dava-ndo ndècu déhe yoco-ndo, te vá yõ ìⁿ cada yica ñaha xii-ndo sǎ cándecá-yu téte. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó dèhe yoco-ndo càndeca ñaha téte te quide váha-ndo sǎ dúcáⁿ quide-ndo.

³⁸ Te nchaa ñáyiú dásaⁿ déhe yoco-xi càndeca ñaha téte te váha-ni quidé-yu, te nchaa ñáyiú ñá túú dásaⁿ déhe yoco-xi càndeca ñaha téte te váha-gá tucu quidé-yu sǎ dúcáⁿ quidé-yu.

³⁹ Te nchaa ñáyiú dìhí ndécú yì-xi xini ñuhu-xi sǎ cùndècu-ní-yu ndihí yí-yu ñini ndècu vívú-güedé chi ducaⁿ càháⁿ tnúhu sǎ dánèhé ñáhá xii-o nacuéa cada-o cùndecú-o, dico núu na cùú-güedé te cuu naquehéⁿ-yu ingá téte candecá-yu dicó-ni sǎ diu-ni téte ndècu ichi Xítoho Jesucristú.

⁴⁰ Te yúhú sání iní-í sǎ ío-gá váha cundecú-yu te núu vá nánducú-yu ingá téte candecá-yu, te duha càháⁿ-í chi Espíritú Yá Ndióxi ducaⁿ dàcahu iní ñáhá-xi xii-í càháⁿ-í.

8

Cuendá nchaa sǎ nchító-ó sǎñaha ñáyiú ndùu táhú nchaa sǎ càchí-yu cùu ndióxi

¹ Te vitna na càháⁿ-í cuendá nchaa sǎ nchító-ó sǎñaha ñáyiú ndùu táhú nchaa sǎ càchí-yu cùu ndióxi te ñá ndáa chi dicó ndaha cue tee ñuyíú-a ní cuáha nchaa xiáⁿ. Te nchoo sa cùtnuní váha iní-ó cuendá nchaa xiáⁿ, dicó-ni sǎ cuendá nchaa sǎ cùtnuní váha iní-ó xiáⁿ quidé cahnu-o mee-o, dico núu cùu iní-ó tnàha ñáyiú-o te canu ichi-õ-yu ichi váha.

² Te núu dava-ndo sàni iní-ndó sǎ túha-ndo dico cùu-ndo ñáyiú vátá cútúha-gá nàcuáa tàú-xi cunduu.

³ Te núu nchòhó cúú iní-ndó Yá Ndióxi te mee-gǎ cáháⁿ-gá sǎ cúú-ndó ñáyiú cùu cuendá-gá.

⁴ Te vitna na càchí tnúhu-í xii-ndo nàcuáa ndùu cuendá nchaa sǎ nchító-ó sǎñaha

ñáyiú ndùu táhú nchaa sǎ càchí-yu cùu ndióxi te ñá ndáa chi dicó ndaha cue tee ñuyíú-a ní cuáha nchaa xiáⁿ. Te nchoo cùtnuní iní-ó sǎ ncháa sǎ càchí ñáyiú cùu ndióxi cáduha-yu ñuyíú-a ñá túú cùu-xi ndióxi, chi ìⁿdií díí-ni Yá Ndióxi ndécú.

⁵ Te cue ñáyiú ñuyíú-a càchí-yu sǎ cuéi andiu te cuéi ñuyíú-a ndècu titní ndiöxi. Te ndáa sǎ ndèni ní cuu ndècu espíritú sǎ càchí ñáyiú cùu ndióxi te ñá ndáa sǎ ndiöxi cúú-xi, te nchaa xiáⁿ táxi tnùní ñáhá-xi xii-yu.

⁶ Te nchoo cùtnuní ndáa iní-ó sǎ ìⁿdii díí-ni Yá Ndióxi ndécú te diu-gá cúú-gá Tǎtá-ó, te nchoo cùu-o ñáyiú cùu cuendá-gá. Te diu-ni mee-gǎ ní táuchíúⁿ-gǎ ní cuáha nchaa sǎ ío ñuyíú-a, te cùtnuní tucu iní-ó sǎ ìⁿdii díí-ni Xítoho Jesucristú ndécú, te Yaá-áⁿ ní quide-gá nchaa chiúⁿ ní táhú Dütú Ndióxi ní cadúha-gá nchaandi túhú sǎ ío ñuyíú. Te diu-ni mee Xítoho Jesucristú quidé ndècu-o ichi-gá vitna.

⁷ Te ñá ncháa nchòhó ñáyiú ndècu ichi Xítoho Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sǎ càchí-yu cùu ndióxi ní cùu. Te cuendá xiáⁿ nùu nàqueheⁿ-ni-ndo nchaa sǎ nchító-ó ndùu táhú nchaa sǎ càchí-yu cùu ndióxi-áⁿ xéxi-ndó, te sàni-ni iní-ndó sǎ quidé cahnu-ndo nchaa sǎ càchí-yu cùu ndióxi-áⁿ te ñá ndáa sǎ ndiöxi cúú-xi. Te núu sàni iní-ndó sǎ ñà túú váha caxi-ndo sǎ dúcáⁿ ndùu táhú-xi-áⁿ te xéxi-ndo te xiáⁿ ñá túú cùu váha iní-ndó cuendá sǎ dúcáⁿ quide-ndo.

⁸ Te ñá díú nchàa sǎ xéxi-ó quide-xi cudiu-o núú Yá Ndióxi, chi ìⁿ-ni quide-xi cuéi na càxi-o àdi vá cáxi-ó chi ni ìⁿ sǎ cáxi-ó vǎ chindèe ñaha-xi cudiu-o núú Yá Ndióxi. Te cuéi vá cáxi-ó dico ñá díú xiáⁿ cada sǎ vǎ cúdiu-o núú-gǎ.

⁹ Te cuu-ni caxi-ndo nchàa nání ñihí-ndó. Te dicó-ni sǎ càda cuendá-ndó sǎ ñà díú cuendá sǎ xéxi-ndó-áⁿ cuíta nihnu dava ñáyiú ndècu ndihí-ndo ichi Xítoho Jesucristú cadá-yu nándi sǎ cadá-yu nàcuáa vá cúú váha iní Yá Ndióxi chi ñáyiú-áⁿ ñà túú cùtnuní iní-yu.

¹⁰ Te nchòhó ñáyiú xini váha cuendá nchaa sǎ càchí-yu cùu ndióxi, te núu

na quihíⁿ-ndó nǔú ndécú nchàa xíáⁿ te ngóo-ndo càxi-ndo nchaa sá nǐ cutáhú-xi, te quiní ñáyiú ndècu ndihí-ndo ichi Xítóhó Jesucristú, ñáyiú vátá cùtnùní-gá iní-xi nàcuáa ndùu cuendá nchaa sá dúcáⁿ càchí-yu cùu ndiòxí-áⁿ, te cuèi sàni iní-yu sá ñà túú quide váha-ndo sá dúcáⁿ quide-ndo te cudana te cada yicá-yu caxí-yu tnàhá-yu nchaa sá dúcáⁿ nǐ nduu táhú nchaa sá càchí-yu cùu ndiòxí-áⁿ te ñà ndáá sá ndiòxí cúú-xí.

11 Te núu ducaⁿ cùtnuní iní-ndó nàcuáa ndùu cuendá nchaa xíáⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dàva-gá ñáyiú ndècu ndihí-ndo ichi Xítóhó Jesucristú, ñáyiú vátá cùtnùní-gá iní-xi nàcuáa ndùu cuendá nchaa xíáⁿ, te ñà cuendá tnàhá ñáyiú-áⁿ nǐ xíhí Xítóhó Jesucristú.

12 Te sá dúcáⁿ quide-ndo-áⁿ cúú-xí ñⁿ cuèchi núu Xítóhó Jesucristú, chi quide-ndo nàcuáa xínu iní-yu cada-yu ñⁿ sá sání iní-yu ñà túú váha, núu xíáⁿ ñà túú quide váha-ndo sá cúú-xí-yu.

13 Te núu yúhú cùtnùní iní-í sá sá cuendá ñⁿ sá cáxi-í te ngóo ñⁿ ñáyiú ndècu ndihí-í ichi Xítóhó Jesucristú cada-yu ñⁿ sá vǎ cúú váha iní Yǎ Ndiòxí, te váha-gá sá vǎ cáxi-gǎ-í xíáⁿ cuendá sá vǎ cáxi-yu ñⁿ sá vǎ cúú váha iní-gá.

9

Nchaa sá cúú càda cue téé ní táuchíúⁿ Xítóhó Jesucristú cáháⁿ tnúhu-gá

1 Te yúhú chi cuu cada-í nchaa sá sání iní-í, chi tnàhá-í ní táuchíúⁿ Xítóhó Jesucristú cáháⁿ-í tnúhu-gá núu ñáyiú. Te yúhú ní xiní núu-í Xítóhó Jesucristú Yaá cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndihí-í-gá.

2 Te ió dava ñáyiú ñà túú sándáá iní-yu sá Xítóhó Jesucristú ní táuchíúⁿ-gǎ cáháⁿ-í tnúhu-gá, dico nchòhó chi cùtnuní ndáá iní-ndó sá díú-gǎ ní tendaha ñàha-gá xii-í xícá cùu-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núu-ndó te ní sándáá iní-ndó-gǎ te xíáⁿ cùtnùní sá díú-gǎ ní tendaha ñàha-gá xii-í xícá cùu-í càháⁿ-í tnúhu-gá núu ñáyiú.

3 Te duha ndùu tnúhu càháⁿ-í cuendá cundedóho nchaa ñáyiú sàtnuhu ñàha xii-í.

4 Chi yúhú cuu-ni caxi-í nchaa núu sǎ cúú càxi-o na taxi ñáyiú.

5 Te cuu-ni cundecu ñadhí-í te caca ndeca-í-yu nchaa núu xícá cùu-í càháⁿ-í tnúhu Yá Ndiòxí dàtná quidé dàva-gá cue téé càháⁿ tnúhu-gá, ndihí cue téé cùu ñàní Xítóhó Jesucristú, ndihí té Pèlú.

6 Te tnàhá yúhú ndihí té Bèé cuu dañà-ndǐ chiúⁿ quide-ndǐ te cada-ndǐ dàtná xǐquide dàva-gá-güedé càháⁿ-güedé tnúhu Xítóhó Jesucristú.

7 Te nchoo xíní-ó sǎ ncháá cuè sandadú dacuítí sǎ ñúhú yǎhu-güedé xínú cuèchi-güedé, te ñà túú dícó ducaⁿ xínu cuechi-güedé. Te ducaⁿ sǎtnahá-xi cùu tucu ñáyiú xítu ñⁿ sá xítú chi dacuítí nihí-yu ñⁿ sá xítú-yu xèxi-yu, te ñà díú dícó ducaⁿ xítú-yu. Te ducaⁿ cùu tucu cue téé cùu toli chi quihni-güedé dícu quiti xito-güedé xihí-güedé te ñà túú dícó ducaⁿ xito-güedé-di.

8 Te vǎ cání iní-ndó sǎ sǎ dúhá càháⁿ-í te càhu iní mée-í duha càháⁿ-í, chi tnúhu càháⁿ-í-a ñⁿ-ni quèe-xi ndihí tnúhu ní cáháⁿ ndíi Moisés.

9 Chi ndíi-áⁿ nǐ chídó tnùní ndíi núu tütú ndíi nàcuáa ní xáha Yá Ndiòxí xii ndíi, te càchí-xi: “Vǎ chíhí-ndó ñunu yuhu ndicutu oré dánchezí-di triú”, duha càchí-xi núu tütú ndíi. Te ñà díú sǎ dúcáⁿ nǐ cáháⁿ Yá Ndiòxí te càháⁿ-gǎ mee-ni cuendá ndicutu-áⁿ.

10 Chi ní cáháⁿ-gǎ cuendá nchoo cuè ñáyiú ndècu ichi-gá, te ndáá sá díú cuendá-ó dùcaⁿ ní cáháⁿ-gǎ. Te nchaa cue téé xítu chihi tatá sàni iní-güedé sá díú tátá chíhí-güedé-áⁿ cuu sá cáxi-güedé, te ñà-ni ducaⁿ cùu tucu cue téé xicani triú chi càni-güedé cuendá quee caxi-güedé.

11 Te ducaⁿ sǎtnahá-xi cùu nchúhú cue téé càháⁿ tnúhu Xítóhó Jesucristú, chi dānehé ñàhá-ndǐ xii-ndo cuendá nchaa sá váha quide ñàha Yá Ndiòxí xii-o, núu xíáⁿ dai tǎu-xi sá nchòhó chindee ñàha-ndo xii-ndǐ nǔu ná cúú sǎ xíní ñuhu-ndǐ.

12 Te núu dava cue téé càháⁿ tnúhu Yá Ndiòxí chindèe-ndo-güedé, te uuⁿ-gǎ ducaⁿ tǎu-ndó chindee-ndo nchúhú cue téé ní sanu ichi ñàha xii-ndo ichi-gá.

Te cuëi tàú ndisa-ndo sã chíndèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quíde cahnu iní-ndí cuëi nándi sá tá yãha-ndí véxi. Te ducaⁿ quíde-ndí cuëndá sá ñã túú ñã cani iní ñáyiu cuëndá-ndí te ducaⁿ cuíta cuténuu-gá tnúhu sá càháⁿ nàcuáa naníhí tãhú-ó quíhíⁿ.

13 Te nchòhó xìní-ndó sã ncháá cuè téé xínu cuechi veñúhu ñiu-ní xiáⁿ ñihí-güedé xéxi-güedé, te ñiu-ní cue téé-áⁿ xínú cuèchi-güedé núú xihí quiti ndùu tãhú Yã Ndiòxí, te ñiu-ní xiáⁿ ñihí tucu-güedé sá xéxi-güedé.

14 Te ñiu-ní ducaⁿ sãtnahá-xi cùu nchúhú cue téé càháⁿ tnúhu sá càháⁿ nàcuáa naníhí tãhú-ó, chi Xítóhó Jesucristú ní cachí-gá sá díú-ní cuëndá chiuⁿ quíde-ndí ñihí-ndí caxi-ndí.

15 Te ñá ñíⁿ ndùu càháⁿ-í núú-ndó càda-ndo nacuáa tàú-xi cunduu sá cúú-xi-í, te vá cání ñí-ndó sã sã dúhá càháⁿ-í te ñíⁿ sá xicáⁿ-í núú-ndó. ¡Chi cuëi na cùú-í sá ndòhò-í te ñá díú sã càháⁿ ñáyiu sá sã cuëndá sá càháⁿ-í tnúhu Xítóhó Jesucristú ñihí-í xéxi-í!

16 Te yúhú ñá túú quíde cahnú-í mée-í sá càháⁿ-í tnúhu sá càháⁿ nàcuáa naníhí tãhú-ó, chi tàú tnàhá-í sá cáda-í chi ducaⁿ ñí cachí Yã Ndiòxí cada-í. ¡Te ndàhú ní cuu yúhú te núu vá càháⁿ-í tnúhu-áⁿ!

17 Te ñá túú càháⁿ-í tnúhu-gá sá cúú ñí mée-í chi mee-gã ní táuchíúⁿ-gã càháⁿ-í tnúhu-gá. Te núu càháⁿ-í tnúhu-gá sá cúú ñí mée-í te tàú-í ñihí-í sá ndúú tãhú-í ní cùu.

18 Dico sá sã ní nduu tãhú-í cúú-xí sã ño cùdí ñí-í sá dícó ducaⁿ càháⁿ-í tnúhu sá càháⁿ nàcuáa naníhí tãhú-ó. Te cuëi tàú-í queheⁿ-í sá táxi-ndó ndùu tãhú-í sá cuëndá sá càháⁿ-í tnúhu Xítóhó Jesucristú, dico ñá túú dùcaⁿ quíde-í.

19 Te sá dúcáⁿ dícó ducaⁿ càháⁿ-í tnúhu sá càháⁿ nàcuáa naníhí tãhú-ó, xiáⁿ ní ñíⁿ ñáyiu ñuyíú-a vá cúú cãchí-yu sá táxi tnùní ñãhá-yu xii-í, te cuëi ducaⁿ dico mee-í ní saní iní-í sá cùú-í dàtná ñíⁿ téé xínu cuechi núú nchàa ñáyiu cuëndá ducaⁿ cuíta cuu vaí-yu tuhá-yu ichi Xítóhó Jesucristú quíhíⁿ.

20 Te òré ñúhú tnàhí tnuú cue ñáyiu isràél te quíde-í sá ñíⁿ-ní cùu-í ndihí-yu cuëi ñá túú nchícúⁿ ñihnu-í tnúhu ní càháⁿ ndí Moisés,

te ducaⁿ quíde-í cuëndá sá ñáyiu-áⁿ quíndáá iní-yu tnúhu càháⁿ-í te tuhá-yu ichi Xítóhó Jesucristú.

21 Te òré ñúhú tnàhí tnuú nchaa ñáyiu ñá túú nchícúⁿ ñihnu tnúhu ní càháⁿ ndí Moisés, te quíde-ñí-í sá quíde-í dàtná quíde mée-yu cuëndá quíndáá iní-yu tnúhu càháⁿ-í, te tuhá-yu ichi Xítóhó Jesucristú. Te cuëi ducaⁿ quíde-í dico ñá túú ñã ñdeé-í quíde-í nchaa nàcuáa cuíni Yã Ndiòxí cada-o, te ducaⁿ chi nchícúⁿ ñihnu-í quíde-í nchaa nàcuáa càháⁿ Xítóhó Jesucristú.

22 Te òré ndécú-í ndihí nchaa ñáyiu ñá túú cùtnuní váha iní-xi nàcuáa cundecu ichi Xítóhó Jesucristú, te tnàhá-í quíde-í dàtná quíde-yu cuëndá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiu quíde-í sá ñíⁿ-ni cuu-í ndihí-yu cuëndá ducaⁿ ñihí-í nàcuáa cada-í te cund-edóho-yu tnúhu càháⁿ-í te tníⁿ-yu ichi Xítóhó Jesucristú te naníhí tãhú-yu.

23 Te duha quíde-í cuëndá sá cuíta quíndáá iní-yu tnúhu sá càháⁿ nàcuáa naníhí tãhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

24 Te nchòhó sa xìní-ndó sã ncháá cuè téé xínu quíhu màrcúhyú nchaa-güedé xínu-güedé, dico ñíⁿ-ni-dé cúú tée ndàcu ngodó núú te téé-áⁿ cúú tée ñihí sá ndúú tãhú-xi, te ducaⁿ xini ñuhú-xi cada nchohó tucu chi cada-ndo nchàa nacuáa cuíni Yã Ndiòxí cada-ndo cuëndá ducaⁿ ñihí-ndó sã ndúú tãhú-ndó.

25 Te nchaa cue téé xini dadiqui te váha váha quíde cuëndá-güedé ñuu ná cúú sã cáda tnèñu te xòcani-güedé cuëndá sá ñã díú xiáⁿ cada te cuíta-güedé òré dadiqui-güedé. Te ducaⁿ quíde-güedé cuëndá cuíni-güedé ñihí-güedé sá ndúú tãhú-güedé, te sá ndúú tãhú-güedé-áⁿ cúú-xí ñíⁿ sá ndihí ñihnu ñuyíú-a. Dico nchoo ndùcu ndee-o quíde-o nacuáa ñihí-ó sã ndúú tãhú-ó, te xiáⁿ cudí-xi cundecu ndihí-o ñí caa ñí quíhíⁿ.

26 Te yúhú quíde-í dàtná quíde cuè téé xínu, chi cue téé-áⁿ xini-güedé núú quéxiò-güedé, te quíde tucu-í dàtná xíquide cue téé sa ní cutúha nãá, te ñá túú quíde-í dàtná quíde cuè téé vitna dàcuaha nãá. Te ducaⁿ chi yúhú quíde-í nchaa nàcuáa cuíni

Yă Ndiöxí cunduu.

²⁷ Te yúhú ñá túú dàña-í taxi tnùnì ñáhá nì ñá sá cuèhé sá dúhá xii-í chi yòtni-í mée-í. Te ducaⁿ quide-í chi yúhú càháⁿ-í tnúhu Xítohó Jesucristú núú ñáyiú, te cuini-í sá vǎ cuíta sá nǐ cachí Yă Ndiöxí nduu táhù-í.

10

Cuendá nchaa sá nǐ cadúha cue téé ñuyúú-a quide cahnu ñáyiú

¹ Te nchòhó ñáyiú ndècu ndihi-í ichi Xítohó Jesucristú na càchí tnúhu-í xii-ndo cuendá nchaa ñanì tnáhá-ndǐ ñáyiú isràèl ní xindecu ndéé sanaha, chi vitna tnàhá nchòhó cúú-ndó dàtná cue ñanì tnáhá nchàa ñáyiú-áⁿ chi ndècu-ndo ichi-gá. Te nchaa ñáyiú-áⁿ nǐ taxi ndecu Yă Ndiöxí ñⁿ vícò nǐ dánèhé ñáhá-xí xii-yu ichi quihíⁿ-yu, te ní quée dava ndute làmár nánì Mǎr Tícuèhé te nchaá-yu ní yáha-yu.

² Te sá dúcáⁿ nǐ cuu te nchaá-yu ñⁿ-ná ní cuú-yu ndihi ndíi Moisés, te ní xíhi ndaha ñàha ndíi xii-yu.

³ Te nchaá-yu ní xexí-yu sá nǐ sáñaha Yă Ndiöxí xii-yu.

⁴ Te ducaⁿ nchàa tucú-yu ní xihí-yu ndute sá nǐ sáñaha-gǎ xii-yu, ndute sá nǐ quee yiqui nàha cava. Te cava-áⁿ cada iní-ó sá cúú-xí dàtná Xítohó Jesucristú te ducaⁿ chi ndihi ñaha-gǎ xii-yu ichi cuáháⁿ-yu dàvá-áⁿ.

⁵ Dico ío vǎi-yu ñá túú ní quide-yu nàcuáa càháⁿ Yă Ndiöxí, te xǎⁿ ñá túú ní cùu váha iní ñáhá-gǎ xii-yu. Te sá dúcáⁿ nǐ quide-yu núu xǎⁿ òré ñúhǔ-yu ichi cuáháⁿ-yu xití yucu ío vǎi-yu ní xihí.

⁶ Te ducaⁿ nǐ cuu cuendá nchoo vǎ cǎnchícúⁿ nihnu-o càda-o nàcuáa ní quide-yu, chi ñáyiú-áⁿ mee-nǐ nchàa sá cuèhé sá dúhá nǐ sanì iní-yu ní quide-yu. Te nchoo xini ñuhu-xi sá vǎ dúcáⁿ càda-o.

⁷ Te yúhú càháⁿ-í dóho-ndo sǎ vǎ quindáá iní-ndó te nǐ vǎ cadá càhnu-ndo nǐ ñⁿ sá càchí-yu cùu ndiöxí ní cadúha cue téé ñuyúú-a dàtná ní quide cue ñanì tnáhá-ndǐ ní xindecu ndéé sanaha. Chi ñáyiú-áⁿ nǐ quide-yu dàtná càháⁿ-xi núú tütú Yă Ndiöxí núú càchí-xi: “Nchaa ñáyiú ní xexí-yu ní xihí-yu ní quide-yu vico, ní quide càhnú-yu sá càchí-yu cùu ndiöxí ní cadúha-yu te ñá

ndàá sá ndiöxí cúú-xí”, duha càchí-xi núú tütú-gá.

⁸ Te nǐ vǎ cùndècu-ndo ichi dǐi iní dàtná ní quide dava ñáyiú-áⁿ, chi sá dúcáⁿ nǐ quide-yu te ní xihí ócò únì mǐl-yu ñⁿ-ni ndùu.

⁹ Te vǎ cǎnì iní-ndó sǎ sá càhnú iní Yă Ndiöxí te nǎndi sá cuèhé sá dúhá càda-ndo cuendá cuini-ndó quini-ndó núu nàsa cada ñaha-gǎ xii-ndo, chi ñáyiú ní xindecu ndéé sanaha-áⁿ ducaⁿ nǐ xóo cadá-yu, te ní xihí-yu ní xexihaⁿ cǒó.

¹⁰ Te nǐ vǎ càháⁿ cuèhé-ndó cuendá Yă Ndiöxí, chi dava ñáyiú ní xindecu ndéé sanaha-áⁿ ducaⁿ nǐ quide-yu ní càháⁿ cuèhé-yu cuendá-gá te ní quixi espíritú xínú cuèchi núú-gǎ ní sahnì ñaha-xi xii-yu.

¹¹ Te ducaⁿ nǐ cuu te ducaⁿ nǐ ngundeé núú tütú Yă Ndiöxí cuendá dacuàha-o vitna ta cuyatni nduu naa ñuyúú-a. Te nchaa tnúhu sá nǐ ngódó tnùnì-áⁿ càháⁿ dóho ñaha-xi xii-o cuendá sá vǎ cadá-ó dàtná ní quide ñáyiú-áⁿ.

¹² Te xǎⁿ núu nchaa nchòhó ñáyiú sàni iní sá ío váha cùndáá ndécú ichi Xítohó Jesucristú cada cuendá-ndó sá dúcáⁿ-ní cùndáá-ndó núú-gǎ, te vǎ dáná cuendá-ndó càda-ndo sá ñá túú cùu váha iní Yă Ndiöxí.

¹³ Te diu-ni dàtná quide sàcuíhná dácàháⁿ-xi iní nchaa dava-gǎ ñáyiú nǎndi quide-yu, te diu-ni ducaⁿ quide ñaha-xi xii-ndo. Dico mee Yă Ndiöxí cúú-gǎ Yaá quide ndáá chi quide-gǎ nchaa sá càháⁿ-gǎ, te ñá dáñá-gǎ sá sǔúni cuídó sàcuíhná coto ndéé ñáhá-xí xii-ndo, chi není-ni nàcuáa cùndee iní-ndó dàña-gǎ ducaⁿ quide ñaha-xi xii-ndo. Te diu-ni-gǎ chindee ñaha-gǎ xii-ndo cùndee iní-ndó vǎ cadá-ndó cuèi nǎndi sá ná dàcahu iní ñáhá-xí xii-ndo.

¹⁴ Te xǎⁿ núu càháⁿ-í dóho nchòhó ñáyiú ío cùu iní-í sá vǎ quindáá iní-ndó nǐ ñⁿ sá càchí-yu cùu ndiöxí te ñá ndàá chi dícò ndaha cue téé ñuyúú-a ní cuáha nchaa xǎⁿ, te nǐ vǎ cadá càhnu-ndo.

¹⁵ Te duha càháⁿ-í chi cùu-ndo ñáyiú tècú tnùnì, te mee-ndo ío váha cuáha-ndo cuendá te núu váha-ni càháⁿ-í àdi ñá túú váha-ni.

¹⁶ Te nchoo ndácáⁿ táhú-ó núú Yă Ndiöxí cuendá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-áⁿ, te xǎⁿ ndácú iní-ó sǎ ñⁿ-ní cùu-o ndihi Xítohó Jesucristú cuendá sá nǐ

sati níñí-gã ní xíhí-gá núú cùrúxí, te ðiu-ni ducaⁿ sãtnahá tucu-xi cùu paá sá xéxí-ó òré xíhí-ó ndùdí ndéhé yoho yàha stilé-áⁿ, chi sá dúcáⁿ xèxi-o paá-áⁿ xíãⁿ ndácú ìní-ó sã ñⁿ-ní cùu-o ndìhi Xítóhó Jesucrìstú sá cuèndá yiqui cùñú-gá.

17 Te cuèi vâi vihi-o dico ñⁿdii-ni paá xéxí-ó, te sá dúcáⁿ ñⁿdii-ni paá xéxí-ó xíãⁿ ndácú ìní-ó sã ñⁿ-ní cùu-o ndìhi Xítóhó Jesucrìstú.

18 Te cada cuèndá-ndó nàcuáa quide ñáyiu israél, chi ñáyiu-áⁿ xéxí-yu sá ndúú tãhú Yã Ndiöxí. Te sá dúcáⁿ quidé-yu-áⁿ cùtnùní ìní-ó sã tnàhá tnúhu-yu ndìhi-gá.

19 Te vá cání ìní-ndó sã sá dúhá càháⁿ-í te cachí-ndó sã cùnuu nchaa sá càchí-yu cùu ndióxí ní cadúha cue téé ñuyú-a chi ñá túú nã cúú nì ñⁿ nchaa xíãⁿ. Te ðiu-ni ducaⁿ cùu tucu nchaa sá sãñaha ñáyiu ndùu tãhú-xi chi ñá túú cùnuu-xi, chi ñⁿ-ni cùu-xi ndìhi nchaa dava-gá sá xéxí-ó.

20 Te yúhú càchí-í sá sã dúcáⁿ quide nchaa ñáyiu ñá túú tnàhá tnúhu ndìhi Yã Ndiöxí, te ðicó nchaa espíritú cùndìhi yucu ñávãha sãñàhá-yu sá ndúú tãhú-xi sá dúcáⁿ quidé-yu. Te ñá díú Yã Ndiöxí sãñàhá-yu sá ndúú tãhú-gã. Te yúhú cùní-í sá vã tnàhá tnúhu-ndo ndìhi cue espíritú cùndìhi yucu ñávãha.

21 Te ducaⁿ chi vá cúú tnàhá tnúhu-o ndìhi cue espíritú cùndìhi yucu ñávãha te tnahá tnúhu-o ndìhi Xítóhó Jesucrìstú, te ñá túú ndùu váha-xi ngóo càxi-o coho-o sá ndúú tãhú cue espíritú cùndìhi yucu ñávãha-áⁿ, te ngóo càda-o nacuáa ní dándõo tnúhu Xítóhó Jesucrìstú coho-o ndùdí ndéhé yoho yàha stilé, te caxi-o paá cada-o sã ndácú ìní-ó sã ñí xíhí-gá núú cùrúxí.

22 Te vá cání ìní-ó dùcaⁿ cada-o cuendá sá vã cúdééⁿ Yã Ndiöxí, chi ñá túú nã càhnu cuu-o núu cada-o nãni véxi ìní mée-ó, chi mee-gã ío càhnu cuu-gá.

Cada-o nchaa nacuáa cuu càhnu Yã Ndiöxí

23 Te ndáá sá ncháá sã cùní-ó càda-o te cuu cada-o dico ñá ncháá cùu-xi sá vãha sá cúú-xí-ó, te ni ñã ncháá-xí chindee ñaha-xi nacuáa níhí ndéé-gã-ó cùndecu-o ichi Xítóhó Jesucrìstú.

24 Te xìni ñuhu-xi sá cáda-ó sã vãha sá cúú-xí tnàha ñáyiu-o te ñá díú mèe-ni sá cúú-xí mèe-o cada-o.

25 Te nchòhó cuu caxi-ndo nchàa cuñú sá cúyãhu cuñú sá xìní caxi-ndo, te vá ndúcú tnúhu-ndo te núu cùu-xi cuñú sá ñí nduu tãhú sã càchí-yu cùu ndióxí. Te ñá túú nã cani ìní-ndó càxi-ndo,

26 chi ñuyú-a ndìhi nchaa sá ío cúú-xí cuèndá Yã Ndiöxí.

27 Te núu ñⁿ ñáyiu ñá túú ndècu ichi Xítóhó Jesucrìstú càháⁿ ñáhã-yu xii-ndo quíhíⁿ-ndó càxi-ndo dítá vehé-yu, te núu sàni ìní-ndó sã quíhíⁿ-ndó te cuu quíhíⁿ-ndó te caxi-ndo cuèi nái cùu sá táxí-yu dico vá càcáⁿ tnúhú-ndó nũ-yu núu ndéé ní níhí-yu, te ducaⁿ te cuu váha ìní-ndó càxi-ndo.

28 Te núu ñⁿ ñáyiu càchí-yu sá xíãⁿ cúú-xí sã ñí nduu tãhú sã càchí-yu cùu ndióxí te vá cáxí-ndó cuèndá sã ñáyiu ducaⁿ càháⁿ-áⁿ cuu váha ìní-yu te ñá túú tnàhí ná cani ìní-yu.

29 Te yúhú càháⁿ-í cuèndá nàcuáa sàni ìní mée ñáyiu ducaⁿ càháⁿ-áⁿ te ñá díú sã nàcuáa sàni ìní mée-ndó quide-ndo.

Te dava-ndo càchí-ndó: “Cuu-ni cada-o nchàa nacuáa sàni ìní mée-ó cuèi dava-gá ñáyiu sàni ìní-yu sá ñá túú ndùu váha-xi sá dúcáⁿ càda-o”, duha càchí-ndó.

30 Te càchí tucu-ndo: “Ñá túú tàú-xi cáháⁿ cuèhé ñáyiu cuèndá-ó sã cuèndá nchaa sá xéxí-ó chí ndácáⁿ tãhú-ó nũ Yã Ndiöxí òré xéxí-ó”, duha càchí-ndó.

31 Te cuèi nándí sá xìní caxi-ndo níhí-ndó xèxi-ndo àdi quide-ndo, te cada-ndo nàcuáa cáháⁿ váha ñáyiu cuèndá Yã Ndiöxí.

32 Te vá cáda-ndó sã ñà túú tàú-ndó càda-ndo cuendá sá vã cáda ñáyiu ñⁿ sá ñà túú cùu váha ìní Yã Ndiöxí. Te ni sã cúú-xí cuè ñáyiu israél, te ni sã cúú-xí cuè ñáyiu ñá túú cùu ñáyiu israél, te ni sã cúú-xí cuè ñáyiu ndècu ichi-gá vá dúcáⁿ càda-ndo sá cúú-xí-yu.

33 Te yúhú ío ndùcu ndee-í quidè-í nàcuáa cudùu-í núu nchaa ñáyiu, te quide-í sá vãha sá cúú-xí-yu, te ñá túú quide-í mee-ni sã cúú-xí mèe-í. Te ducaⁿ quide-í cuèndá quíndáá ìní-yu tnúhu Xítóhó Jesucrìstú te naníhí tãhú-yu.

11

¹ Te chí cáncñicúⁿ nihnu cada-ndo nchaa nacuaa quide-í nchicúⁿ nihnu-í nchaa nacuáa quide Xítoho Jesucrístú.

Nacuáa tàú-xi cada nchaa ñáyiú dìhí núú tàcá-yu dàcuahá-yu tnúhu Yá Ndiöxí

² Te nchòhó ñáyiú ndècu ndihí-í ichi Xítoho Jesucrístú càchí tnúhu-í xii-ndo sã ïo cùdíí iní-í, chí ndàcu iní ñáhá-ndó xii-í, te quide-ndo nchaa nacuaa ní dánèhé ñáhà-í xii-ndo.

³ Te cuiní-í sá nchòhó cutnùní iní-ndó sã ñndii-ni Yá Ndiöxí cúú-gã Yaá cúnùu taxi tnuní ñáhá xii Xítoho Jesucrístú, te ducaⁿ Xítoho Jesucrístú ñndii-ni-gã cúnùu taxi tnuní-gã nchaa cue téé, te nchaa cue téé ñu-ni mee-güedé cúnùu-güedé táxi tnùní-güedé ñadìhí-güedé.

⁴ Te núu nchoo cuè téé na dàdáhu-o díquí-ó òré càháⁿ-ó núú ñáyiú tnúhu sá dácàhu iní ñáhá Yá Ndiöxí xii-o àdi òré càháⁿ ndihí-o-gã, te ñndii-sácáⁿ-núú cúú-xí te núu ducaⁿ na càda-o dadáhu-o díquí-ó.

⁵ Dico núu ñáyiú dìhí vá dadáhu-yu díquí-yu òré càháⁿ ndihí-yu Yá Ndiöxí, àdi òré càháⁿ-yu tnúhu sá dácàhu iní ñáhá-gã xií-yu núú tnàhá ñáyiú-yu, te sácáⁿ-núú cúú-xí te núu vá dadáhu-yu díquí-yu, chí ñndii-ni cùu-xi te núu na dèté ndii-yu díquí-yu.

⁶ Te núu ñá túú cuiní cue ñáyiú dìhí dàdáhu-yu díquí-yu te váha-gã sá ná dèté ndii-yu díquí-yu. Te núu cùcahaⁿ núu-yu sá dèté díquí-yu te váha-gã sá ná dàdáhu-yu díquí-yu.

⁷ Te nchoo cuè téé vá cúú dàdáhu-o díquí-ó òré càháⁿ ndihí-o Yá Ndiöxí ní òré càháⁿ-ó tnúhu sá dácàhu iní ñáhá-gã xii-o núú ñáyiú chí díhna-gã-ó ní cadúha ñaha Yá Ndiöxí xii-o, te ní taxi ndecu-gã nchaa sá xini tnùní-ó dàtná ndécú nchaa sá xini tnùní méé-gã. Te ducaⁿ ní quide-gã chí cuiní-gã sá nchóó càda-o nacuaa càháⁿ nchaa dava-gã ñáyiú sá ïo càhnu cuu-gã, te cue ñáyiú dìhí quidē-yu nacuaa cunuu nchòo cue téé.

⁸ Te Yá Ndiöxí ní cadúha-gã téé, dico ñá díú yiqui naha ñadìhí ní quenehe-gã

ní cadúha-gã téé chí yiqui naha téé ní quenehe-gã ní cadúha-gã ñadìhí.

⁹ Te sá cuendá téé ducaⁿ ní cadúha-gã ñadìhí-áⁿ te ñá díú sã cuendá ñadìhí ní cadúha-gã téé.

¹⁰ Núu xíáⁿ tàú-xi sá ncháá ñáyiú dìhí dàdáhu-yu díquí-yu cuendá ducaⁿ cùnùní sá ñá túú cúnùu-yu dàtná cúnùu nchoo cue téé. Te ducaⁿ xini ñuhu-xi cadá-yu sá cuendá nchaa espíritú xínú cuèchi núú Yá Ndiöxí.

¹¹ Te vitna nchoo ñáyiú ndècu ichi Xítoho Jesucrístú, vá càchí-ó sã cuè téé ñá túú xini ñuhu-güedé cue ñáyiú dìhí chindee ñáhá-yu, te ní vá càchí-ó sã cuè ñáyiú dìhí ñá túú xini ñuhú-yu cue téé chindee ñaha-güedé xií-yu.

¹² Te ñndii-yiqui naha téé ní queñuhu Yá Ndiöxí ní cadúha-gã ñadìhí, dico vitna chí ñáyiú dìhí dácàcu-yu téé. Te téé, ñadìhí ní cadúha Yá Ndiöxí, te ñu-ni ducaⁿ ní cadúha-gã nchaa dava-gã sá íó.

¹³ Te mee-ndo càda cuendá-ndó te núu ndùu váha-xi sá vá dadáhu cue ñáyiú dìhí díquí-yu òré càháⁿ ndihí-yu Yá Ndiöxí àdi ñáhá.

¹⁴ Te nchaa ñáyiú càháⁿ-yu sá ñá túú ndùu váha-xi sá cuè téé cunduu nàni idi díquí-güedé, chí ñndii-sácáⁿ-núú cúú-xí càchí-yu.

¹⁵ Te nchaa ñáyiú dìhí ñáyiú nàni idi díquí-xi càchí ñáyiú sá ñndii-sá váha cùu-xi sá cúú-xí-yu sá dúcáⁿ nàni idi díquí-yu. Te ducaⁿ chí Yá Ndiöxí ní cachí-gã sá dúcáⁿ cunduu-yu cuendá quidáhu-xi díquí-yu.

¹⁶ Te núu íó ñáyiú cuiní dacáa cuendú cuendá sá ní càháⁿ-í-a, te na cùnaha-yu sá ncháá nchùhú cue téé càháⁿ tnúhu Xítoho Jesucrístú ñu-ni ducaⁿ sàni iní-ndí cada nchaa ñáyiú dìhí. Te ñu-ni ducaⁿ sàni iní nchaa ñáyiú ndècu ichi-gã.

Cuendá ñáyiú ñá túú quide datná ní quide Xítoho Jesucrístú cùtnàhá ní cudini-gã ndihí cue téé ní xica cuu ndihí-gã

¹⁷ Te nchòhó ñá túú quide váha-ndo ndècu-ndo núu xíáⁿ duha na càháⁿ-í dóho-ndo, chí nchòhó òré tàcá-ndó ñá túú quide váha-ndo chí ñá túú chindee tnaha-ndo cada-ndo sá váha, chí da nàdatuhú iní tnáhá-ndó nacuaa ndècu-ndo.

18 Te díhna-gá na càchí tnúhu-í xii-ndo sã ñihí-í tnúhu sá òré tàcá-ndó quide-ndo nacuaá ní cáháⁿ Xítohó Jesucrístú, te ñá túú cùu ìⁿnuu-ndo oré ducaⁿ quide-ndo nacuaá ní cáháⁿ-gá. Te dava sá càháⁿ ñáyiu sàndáá iní-í te dava ñáhá.

19 ¡Te ndáá sá dúcáⁿ tnàhí cada-xi vá cúú ìⁿnuu-ndo cuendá ducaⁿ cùtnuní nũu ndèdacaá-ndo sandáá ndisa iní-ndó tnũhu Xítohó Jesucrístú te ndèdacaá-ndo ñáhá!

20 Te ndi tnahá òré tàcá-ndó quide-ndo datná ní quide Xítohó Jesucrístú cútnàhá ní cudìni-gá ndihí cue téé ní xica cuu ndihí-gá, te ñá túú quide-ndo nacuaá tàú-xi cunduu chí cùtexínu-ni quide-ndo.

21 Chi òré tàcá-ndó quide-ndo nacuaá ní cachí Xítohó Jesucrístú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sã cùndètu tnahá-ndo, te ñá túú càháⁿ tnàhá-ndó nũu xiãⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chí xini-ndo.

22 Te vá dúcáⁿ càda-ndo chí càa vehe-ndo núú dúcáⁿ caxi-ndo coho-ndo cada-ndo ndéé ndahá xití-ndó, chí sá dúcáⁿ quide-ndo te dàquee tihú-ndó nchàa dava-gá ñáyiu ndècu ndihí-ndo ichi Yá Ndiöxí, te dàndóo canúú-ndó nchàa ñáyiu ndàhú sá dúcáⁿ quide-ndo. ¡Núu xiãⁿ vá cúú càchí-í sá cúú-ndó ñáyiu quide váha chí ñá túú quide váha-ndo sã dúcáⁿ quide-ndo ndecu-ndo!

Xítohó Jesucrístú ní dàndóo tnúhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sã ñí xihí-gá

(Mt. 26:26-29; Mr. 14:22-25; Lc. 22:14-20)

23 Te dàtná-ni ní dánèhé ñáhá Xítohó Jesucrístú xii-í te ñi-ni ducaⁿ ñí dánèhé ñáhà-í xii-ndo, chí ñi-ni niú cútnàhá ní sáha cuendá ñáhá ndii Jùdás Iscarioté xii-gá núú cuè téé cùu úhú iní ñáhá ñí queheⁿ-gá pàá,

24 te ní ndacáⁿ táhú-gã núú Yá Ndiöxí, te ní táhú cuèchi-gá, te ní xáhaⁿ-gã xii cue téé xica cuu ndihí-gá: “Chí quéhéⁿ pàa-a caxi-ndo te cada iní-ndó sã cúú-xí dàtná yiqui cùñú-í, chí yúhú cuú-í sácùendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xãhaⁿ-gã xii-güedé.

25 Te sátá ñí yáha ní xexi-güedé pàa sá ñí sãñaha-gã, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tùcu-gá núú Yá Ndiöxí. Te ní xáhaⁿ-gã xii cue téé xica cuu ndihí-gá: “Chí cóhó ndùdí ndéhé yoho yàha stilé-a, te cada iní-ndó sã cúú-xí dàtná ñíñi-í, te cuendá ñíñi-í sá cáti òré cuú-í cutnùní ndáá sá Yá Ndiöxí cada-gá ingá núú sã váha sá cúú-xí ñáyiu. Te ndi tnahá òré coho-ndo ndùdí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xãhaⁿ-gã xii-güedé.

26 Te ndi tnahá òré xéxi-ndó pàa te xihí-ndo ndudí ndéhé yoho yàha stilé, te xiãⁿ dátũu-ndo nũu ñáyiu sá Xítohó Jesucrístú ní xihí-gá cuendá-yu, te ducaⁿ-ni càda-ndo cundecu-ndo ndéé ná sàá nduu quixi tucu Xítohó Jesucrístú.

Nàcuáa cada-o òré caxi-o pàa ndihí òré coho-o ndùdí ndéhé yoho yàha stilé dàtná ní cachí Xítohó Jesucrístú

27 Te dava-ndo ñà túú quide-ndo nacuaá cuini Yá Ndiöxí cada-ndo òré xéxi-ndó pàa ndihí òré xihí-ndó ndùdí ndéhé yoho yàha stilé, te sá dúcáⁿ quide-ndo-áⁿ te cucuéchi xii-ndo chí ñá túú nèhe-ndo sá yíñũhu sá cúú-xí yiqui cuñú Xítohó Jesucrístú, te ni ñà túú nèhe-ndo sá yíñũhu sá cúú-xí ñíñi-gã.

28 Te ío váha cada cuendá-ndó te núu ndècu váha iní-ndó nũu Xítohó Jesucrístú òré cùmãní-gã caxi-ndo pàa ndihí òré cùmãní-gã coho-ndo ndùdí ndéhé yoho yàha stilé. Te núu ndècu váha iní-ndó nũu-gã te caxi-ndo te coho-ndo.

29 Te dava nchòhó ñá túú sàni váha iní-ndó cuendá yiqui cùñú Xítohó Jesucrístú te xèxi-ndo paá te xihí-ndo ndudí ndéhé yoho yàha stilé, te nacháhu-ndo sã dúcáⁿ ñà túú sàni váha iní-ndó.

30 Te ñi sá dúcáⁿ quide-ndo núu xiãⁿ vãi-ndo cuhú, te ío ndàhú ndécú-ndó, te dava ñáyiu ndècu ndihí-ndo sa ní xihí-yu.

31 Dico núu ío váha sáha-o cuendá nàcuáa ndècu-o núu Yá Ndiöxí, te vá dúcáⁿ dàndóo ñaha-gã xii-o.

32 Te òré ndéhé Yá Ndiöxí sá ñà túú quide ndáá-ó ndècu-o te dàndóo ñaha-gã xii-o. Te ducaⁿ quide-gá cuendá sá vã cuíta nihnu-o,

chi núu ñáhá te cuíta nihnu-o ndìhi nchaa ñáyi ndècu ichi cuehé ichi duha.

³³ Te núu xiáⁿ càháⁿ-í dóho nchaa nchòhó ñáyi ndècu ndìhi-í ichi Xítohó Jesucristú sá òré tacá-ndó càda-ndo nacuáa ní quide Xítohó Jesucristú cútnàhá ní cudini-gá ndìhi cue téé ní xica cuu ndìhi-gá, te cundetu tnàha-ndo nduu nchaa-ndo te dàtnùni ducaⁿ càda-ndo.

³⁴ Te núu dava-ndo xihí-ndó dòcó te caxi duuⁿ-ndo vèhe-ndo te dàtnùni natacá-ndó, cuendá òré natacá-ndó te vá cáda-ndó ìⁿ sá ñà túú tàú-ndó càda-ndo cuendá sá vâ dándòho ñaha Yá Ndiöxí xii-ndo. Te òré quixi coto ñaha-í xii-ndo te dàvá-áⁿ cachí tnúhu-í xii-ndo nchaa dava-gá sá cúmáni.

12

Nàcuáa chindee ñaha Espiritú Yá Ndiöxí cada-o ìⁿ ìⁿ-o

¹ Te nchòhó ñáyi ndècu ndìhi-í ichi Xítohó Jesucristú cuini-í cachí tnúhu-í xii-ndo nàcuáa chindee ñaha Espiritú Yá Ndiöxí xii-o ìⁿ ìⁿ-o cuendá cutnùni iní-ndó.

² Te nchòhó sa nàha-ndo sá cùtnàhá vátá cùndècu-gá-ndó ichi Xítohó Jesucristú ní xóo dandàhú ñáhá yùcu ñávàha xii-ndo, te ní xóo quíndáa iní-ndó nchaa sá ní cadúha cue ñáyi ñuyú-a nchaa sá cachi-yu cùu ndiöxí te ñá ndáa sá ndiöxí cúu-xí, te nchaa xiáⁿ ñà túú càháⁿ-xi.

³ Te cuini-í sá nchòhó cutnùni iní-ndó sá Espiritú Yá Ndiöxí ñà túú chindee-xi ní ìⁿ ñáyi cuendá sá càháⁿ úhú-yu Xítohó Jesucristú. Te ní ìⁿ ñáyi ñà túú càhu iní-yu càháⁿ-yu sá Xítohó Jesucristú cúu-gá Xítohó-yu te núu ñà túú Espiritú Yá Ndiöxí dácàhu iní ñáhá-xí xii-yu.

⁴ Te ndi dííⁿ ndi dííⁿ ndùu chiuⁿ ní cachí Espiritú Yá Ndiöxí cada-o, te diu-ni ìⁿdi-ni Espiritú-gá ndécú.

⁵ Te ndi dííⁿ ndùu chiuⁿ quide-o xinu cuechi-o núu ìⁿdi-ni Xítohó Jesucristú.

⁶ Te ndi dííⁿ ndi dííⁿ chindee ñaha Yá Ndiöxí xii-o nàcuáa cada-o chiuⁿ-gá, te diu-ni ìⁿ di-gá ndécú chindee-gá nchaa ñáyi.

⁷ Te Espiritú Yá Ndiöxí quidé-xí sá nchóo càda-o sá vâha, te ducaⁿ chindee-o cue ñáyi ndècu ndìhi-o ichi Xítohó Jesucristú.

⁸ Te dava-o ní nduu táhú-ó núu Yá Ndiöxí sá Espiritú-gá cada te ndacu-o càháⁿ-ó tnúhu sá ìo càhnu cuu diu-ni tnúhu mee

Yá Ndiöxí, te dava tucu-o ní nduu táhú-ó cùtnùni iní-ó nàcuáa càháⁿ tnúhu-gá te càháⁿ-ó nàcuáa cuini Espiritú-gá.

⁹ Te dava tucu-o ní nduu táhú-ó sá ìo quíndáa iní-ó Xítohó Jesucristú cuendá cada-gá ìⁿ sá cuini-ó, te ducaⁿ chi Espiritú Yá Ndiöxí chindèe ñaha-xi xii-o. Te dava tucu-o ní nduu táhú-ó sá càcáⁿ táhú-ni-ó núu Xítohó Jesucristú cuendá ñáyi cùhú te ndúha-yu.

¹⁰ Te dava tucu-o ní nduu táhú-ó sá ndácú-ó càda-o nchaa sá vâ yòo tnàhí ndàcu cada, te dava tucu-o ní nduu táhú-ó núu Yá Ndiöxí sá càháⁿ-ó tnúhu sá dácàhu iní ñáhá-gá xii-o, te dava tucu-o ní nduu táhú-ó sá cùtnùni iní-ó núu diu Espiritú Yá Ndiöxí chindèe ñaha-xi xii ñáyi òré càháⁿ-yu tnúhu-gá àdi cue espíritú cùndìhi yucu ñávàha. Te dava tucu-o ní nduu táhú-ó càháⁿ-ó tnúhu sá dácàhu iní ñáhá Espiritú Yá Ndiöxí xii-o tnúhu sá ñà túú xini-ó, te dava tucu-o ní nduu táhú-ó càháⁿ-ó nàcuáa quèe-xi nchaa tnúhu-áⁿ.

¹¹ Te ìⁿdi díí-ni Espiritú Yá Ndiöxí ducaⁿ chindee ñaha-xi, te diu-ni Espiritú-gá dácàhñu ñaha-xi xii-o ndi dííⁿ núu chiuⁿ sá cuini méé-xí càda-o.

Nchaa-o ìⁿ-ni cuu-o ndìhi Xítohó Jesucristú

¹² Te nchoo ñáyi ndècu ñuyú-a titní xichi cùu yiqui cuñú-ó dico ìⁿ-ni cùu-xi, te diu-ni ducaⁿ sàtnahá-xi cùu-o vitna ndecu-o ichi Xítohó Jesucristú chi ìⁿ-ni cùu-o ndìhi-gá.

¹³ Te dava-o cùu-o ñáyi isràél, te dava-o ñà túú cùu-o ñáyi isràél, te dava-o cùu-o ñáyi ñà túú tnàhí dàñá quee núu chíúⁿ patróoⁿ-xi, te dava-o cùu-o ñáyi dàñá quée núu chíúⁿ patróoⁿ-xi. Te mee Espiritú Yá Ndiöxí ní quide-xi sá ncháá-ó ìⁿ-ná cúu-ó ndècu-o ndìhi Xítohó Jesucristú. Te Yá Ndiöxí ní cachí-gá sá ncháá-ó cùndecu ndìhi-o Espiritú-gá.

¹⁴ Te nchòhó xini-ndó sá titní xichi cùu yiqui cuñú-ó te ñà díú ìⁿ-ni xichi cuu-xi.

¹⁵ Te cuèi sáhá-ó ndìhi ndaha-o ñà túú ìⁿ-ni cuu-xi dico vá cúu cachi-ó sá sáhá-ó ñà túú cùu-xi yiqui cuñú-ó.

¹⁶ Te cuèi lóho-o ndìhi tinuu-o ñà túú ìⁿ-ni cuu-xi dico vá cachi-ó sá lóho-o ñà túú cùu-xi yiqui cuñú-ó.

17 Te núu nihíí ní ndúú yìqui cuñú-ó ní xĩndéé mee-ni tĩnuu-o, te ñá túú ndèé cundeé lóho-o cùndedóho ni cùu te núu ducaⁿ, àdi núu nihíí yìqui cùñú-ó ní xĩndéé mee-ni lóho-o te ñá túú ndèé cundeé dítní-ó ní cùu te núu ducaⁿ.

18 Dico mee Yă Ndiöxí ní taxi ndecu-gá ìⁿ ìⁿ xichi yìqui cùñú-ó nàcuáa ní cachí iní mée-gă.

19 Te núu ìⁿ-ni sã ní xĩndecu nihíí yìqui cùñú-ó, te vá cùndùu-xi nacuáa tàú-xi cunduu ni cùu te núu ducaⁿ.

20 Dico titní xichi cùu yìqui cuñú-ó, te ìⁿ-ni cùu-xi nihíí-xi.

21 Te sa naha-o sá vã cúú càchí-ó sã tĩnuu-o ñá túú xini ñuhu-xi ndaha-o, àdi díquí-ó ñá túú xini ñuhu-xi sáhá-ó.

22 Te nchoo sã naha-o sá dává xichi yìqui cuñú-ó sã càchí-ó sã ñá túú cùnuu ío-gá xini ñuhu-xi.

23 Te dava xichi yìqui cùñú-ó sã ñá túú quide cuendá cávihí-ó nchaa xĩⁿ sá quidáhu dóó sácũhnu-o, te dava xichi yìqui cùñú-ó ñá cúú cùtúu chi dacuití sá quidáhu.

24 Te nchaa xichi yìqui cùñú-ó sã cúú cùtúu ñá túú xini ñuhu-xi quidáhu. Te Yă Ndiöxí ní taxi ndecu-gá nchaa xichi yìqui cùñú-ó nàcuáa tàú-xi cunduu. Te ní cachí-gá sá dává-gă xichi yìqui cùñú-ó núú vã cúú cùtúu quidáhu.

25 Te ducaⁿ ñí quide-gá cuendá sá ìⁿ-ní cùu yìqui cuñú-ó. Te ducaⁿ ndì tnahá ìⁿ ìⁿ xichi yìqui cùñú-ó chĩndee tnahaxi. Te ducaⁿ sãtnahá-xi cùu nchoo vitna ndecu-o ichi Xítoho Jesucristú chi chĩndee tnahaxi.

26 Te núu ìⁿ xichi yìqui cùñú-ó ná tnahúhú te nihíí-ó quide úhú-xi, te núu ìⁿ xichi yìqui cùñú-ó ío váha ndècu-xi te ducaⁿ nihíí yìqui cùñú-ó cúú vãha-xi. Te ducaⁿ sãtnahá-xi cùu-o vitna ndecu-o ichi Xítoho Jesucristú.

27 Te nchoo ndècu ndihí-o Xítoho Jesucristú, te cùu-o datná yìqui cùñú-gá te ìⁿ ìⁿ-o cùu-o datná ìⁿ ìⁿ xichi yìqui cùñú-gá.

28 Te ducaⁿ sãtnahá-xi cùu-o chi Yă Ndiöxí ní taxi-gá ndí dĩⁿ ndí dĩⁿ chiⁿ quide-o sá cúú-xí nchaa ñáyiu ndècu ichi-gá. Te díhna-gá cue téé caca cuu cáháⁿ tnúhu-gá núú ñáyiu ní taxi ndecu-gá, te dătnùní

ní taxi ndecu-gá cue téé cáháⁿ tnúhu-gá nàcuáa dăcahu iní ñáhá mée-gá, te dătnùní ní taxi ndecu-gá cue téé dănehé ñáhá xii ñáyiu tnúhu-gá núú tàcá-yu, te dătnùní ní taxi ndecu tucu-gá cue téé ndăcu quide sá vã yôo tnahí ndăcu cada. Te ní taxi ndecu tucu-gá cue téé xicáⁿ táhú-ní núú Xítoho Jesucristú cuendá ñáyiu cùhú te ndúha-yu. Te ní taxi ndecu tucu-gá cue téé chĩndee cue ñáyiu ndècu ichi-gá. Te ní taxi ndecu tucu-gá cue téé yĩndaha ñaha xii ñáyiu ndècu ichi-gá, te ní taxi ndecu tucu-gá cue téé cáháⁿ tnúhu sá dăcàhu iní ñáhá Espiritú-gá tnúhu sá ñá túú xini-güedé.

29 Te ñá ncháá-ó cùu-o cue téé ní táuchíúⁿ Xítoho Jesucristú cáháⁿ tnúhu-gá núú ñáyiu, te ñá ncháá-ó cùu-o cue téé cáháⁿ tnúhu sá dăcàhu iní ñáhá Yă Ndiöxí xii-o. Te ñá ncháá-ó cùu-o cue téé dăcuaha ñaha xii-yu. Te ñá ncháá-ó cùu-o cue téé quide sá vã yôo tnahí ndăcu cada.

30 Te ñá ncháá-ó cùu-o cue téé dícó-ni cácáⁿ táhú núú Xítoho Jesucristú cuendá ñáyiu cùhú te ndúha-yu. Te ñá ncháá-ó cùu-o cue téé cáháⁿ tnúhu sá dăcàhu iní ñaha Espiritú Yă Ndiöxí tnúhu sá ñá túú xini-ó, te ñá ncháá-ó cùu-o cue téé cùtnuní iní-xi cáháⁿ nàcuáa ndùu tnúhu-áⁿ.

31 Te ío nducu ndèe-ndo cada-ndo nacuáa nduu táhú-ndó núú Yă Ndiöxí nchaa sá ío-gá cùnuu cada-ndo. Te vitna na dănehé ñáhá tucu-í xii-ndo nàcuáa cada-ndo, dico sá dănehé ñáhá-í-a ío-gá cùnuu-xi.

13

Cuu iní-ó tnahá ñáyiu-o

1 Te núu nchoo xini-ó cáháⁿ-ó tnúhu sá ío vii ío váha cuáháⁿ cáháⁿ ñáyiu ñuyú-a, àdi xini-ó cáháⁿ-ó tnúhu sá ío vii ío váha cuáháⁿ cáháⁿ cue espíritú xini cuèchi núú Yă Ndiöxí, te núu xini-ó cáháⁿ-ó nchaa tnúhu-áⁿ te ñá túú cùu iní-ó cuè tnahá ñáyiu-o ña, te ñá túú nandíhi-xi sá xini-ó cáháⁿ-ó tnúhu-áⁿ te cùu-o datná dava caá sá ío dusaⁿ quide.

2 Te núu cùu-o ñáyiu cáháⁿ tnúhu sá dăcàhu iní ñáhá Yă Ndiöxí, àdi cuu-o ñáyiu cùtnuní iní-xi nàcuáa cuáháⁿ nchaa tnúhu nduu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quide Yă Ndiöxí, àdi cuu-o ñáyiu ío váha sândáá iní ñáhá xii Yă Ndiöxí nàcuáa ndacu-o cùu-o ìⁿ yucu xocuiñí-xi núú ndécú-xí, te núu

nchaa xĩaⁿ xini-ó càda-o te ñá túú cùu iní-ó cuè tnahá ñáyiu-o ña, te ñá túú vèdana nàndíhi-xi te núu vá cúú iní-ó tnahá ñáyiu-o cuèi na càda-o nchaa xĩaⁿ.

³ Te cuèi nchaa sá ndécú ndíhi-o na dacáhñu-o, te cuèi na cuáha cuendá-ó mèe-o cáyú-ó sá cúú-xí Yá Ndiöxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu iní-ó cuè tnahá ñáyiu-o.

⁴ Dico núu cùu iní-ó cuè tnahá ñáyiu-o, te càhnu iní-ó, te quide váha-o, te ñá túú cùu-o ñáyiu cuédú íní, te ni ñà túú càháⁿ-ó nñu cùu cahnu-o, te ni ñà túú sàni iní-ó càda cahnu-o mee-o,

⁵ te ni ñà túú ññuhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gá cúdeéⁿ-ó cuendá ñá sá cúú, te ni ñà túú-gá sácùhuⁿ iní-ó sá quidé ñaha tnahá ñáyiu-o xii-o.

⁶ Te ni ñà túú-gá cúdeé iní-ó nchaa sá ñà túú váha quide ñáyiu, chi mee-ná cuendá nchaa sá váha cúdeé iní-ó.

⁷ Te nchaa sá yáha-o sàcahnu iní-ó, te sàni váha iní-ó cuendá nchaa ñáyiu, te sàni iní-ó sá díu-ní nchaa sá váha cuu xii nchaa tnahá ñáyiu-o ndèe cuèe-gá, te ío quide cahnu iní-ó cuèi nándi sá yáha-o, te nchaa xĩaⁿ quidé-ó te núu cùu iní-ó cuè tnahá ñáyiu-o.

⁸ Te ni caa ni quíhíⁿ duha-ni cuu iní-ó cuè tnahá ñáyiu-o. Dico sáá nduu te vá cóo-gá ñáyiu cáháⁿ tnúhu sá dácàhu iní ñáhá Yá Ndiöxí, te ni vá cóo-gá ñáyiu cáháⁿ tnúhu sá dácàhu iní ñáhá Espíritú Yá Ndiöxí tnúhu sá ñà túú xini-yu, te ni vá cóo-gá ñáyiu túha dàtná túha ñáyiu vitna.

⁹ Te vitna ñá túú cùtnuní iní-ó nchaa nacuaa sàni iní Yá Ndiöxí chi sacú-ni cùtnuní iní-ó, te ducaⁿ sàcú-ni càháⁿ-ó nacuaa ndùu tnúhu-gá, dico càháⁿ-ó tnúhu-gá nacuaa dácàhu iní ñáhá-gá xii-o.

¹⁰ Te na sáá nduu càda Yá Ndiöxí nchaa nacuaa tàú-xi cunduu, te dàvá-áⁿ te nchaa sá cachi-gá ñá túú ndècu-xi nacuaa tàú-xi cunduu vá dúcáⁿ-gá cundecu-xi.

¹¹ Te yúhú cùtnáhá ní cuu landú-í ní xoo cada-í sá cùu-í landú, ní xoo cáháⁿ-í, ní xoo caní iní-í, te ní xoo tecú tnùní-í dàtná quidé cuè landú xindecu vitna, dico sátá ñi cuu-í ñá tée cùu sacuéhé te ñá túú-gá quidé-í dàtná ní xoo cada-í cùtnáhá ní cuu landú-í.

¹² Te ducaⁿ sàtnahá-xi cùu-o vitna ndecu-o ichi Xítóhó Jesucrístú, chi ñá túú

cùtnuní váha iní-ó nacuaa cùu cuendá Yá Ndiöxí, te cùu-o datná ñáyiu ndèhe ñá núu yútátá sá ñà túú túu váha núu-xi, te ducaⁿ sàtnahá-xi cùu-o chi ñá túú cùtnuní váha iní-ó nãsa cùu cuendá-gá, dico sáá nduu quini núu-ó-gá. Te nchoo sàcú-ni cùtnuní iní-ó nacuaa ndùu-gá vitna dico na sáá nduu te quini ndáá-ó nacuaa càa nacuaa ndùu-gá dàtná xini ñáhá mèe-gá xii-o.

¹³ Te ni caa ni quíhíⁿ ducaⁿ-ni quindáá iní-ó Yá Ndiöxí, te ducaⁿ-ni cùndecu ndíhi-o tnúhu ndee iní cundecu-o ndíhi-gá, te ducaⁿ-ni ío cuu iní-ó-gá ndíhi tnahá ñáyiu-o. Te sá cúú iní-ó Yá Ndiöxí ndíhi sá cúú iní-ó tnahá ñáyiu-o xĩaⁿ ío-gá cùnùu-xi dacúúxí dàva-gá.

14

Ñáyiu càháⁿ tnúhu sá dácàhu iní ñáhá Espíritú Yá Ndiöxí

¹ Te vá dáñá ndèe-ndó cùu iní-ndó tnahá ñáyiu-ndo, te cuhuⁿ iní-ndó sá ndùu táhú-ndó núu Yá Ndiöxí tñí núu chiuⁿ cada-ndo nacuaa chindee ñaha Espíritú-gá xii-ndo, te ío cuhuⁿ iní-ndó sá ndúú táhú-ndó cáháⁿ-ndó tnúhu sá dácàhu iní ñáhá Yá Ndiöxí xii-ndo.

² Te cue ñáyiu càháⁿ tnúhu sá dácàhu iní ñáhá Espíritú Yá Ndiöxí tnúhu sá ñà túú xini-yu, te tnúhu càháⁿ-yu-áⁿ cúú-xí sá cúú-xí Yá Ndiöxí te ñá díu sá cúú-xí ñáyiu chi ñá túú tècú tnùní-yu, te mee Espíritú Yá Ndiöxí quidé-xí dùcaⁿ cáháⁿ-yu tnúhu yiyuhu.

³ Te cue ñáyiu ní nduu táhú núu Yá Ndiöxí cáháⁿ tnúhu sá dácàhu iní ñáhá-gá xii-yu, te ñáyiu-áⁿ dácàháⁿ-yu ñáyiu nacuaa cuita níhí ndéé-gá-yu cundecu-yu ichi-gá, te ducaⁿ cuañáhá-yu tnúhu ndee iní xii-yu òré ndíhú iní-yu.

⁴ Te ñáyiu càháⁿ tnúhu sá dácàhu iní ñáhá Espíritú Yá Ndiöxí xii-yu tnúhu sá ñà túú xini-yu-áⁿ, ñáyiu-áⁿ mee-ni-yu níhí ndéé-yu ndècú-yu ichi-gá. Dico ñáyiu càháⁿ tnúhu sá dácàhu iní ñáhá-gá xii-yu, càháⁿ-yu tnúhu-áⁿ nacuaa níhí ndéé dàva-gá ñáyiu nchicúⁿ nihnu ichi-gá.

⁵ Te yúhú ío cudí iní-í te núu nchaa-ndo cáháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xini-ndó.

Dico ío-gá cúdǐí iní-í te núu nchaa-ndo cǎháⁿ-ndó tnǎhu sá dácàhu iní ñáhá-gǎ, chi ío-gá xíní ñǎhu-xi sá cǎháⁿ-ndó tnǎhu-án dácúúxí sǎ cǎháⁿ-ndó tnǎhu sá dácàhu iní ñáhá Espíritú-gá cǎháⁿ-ndó tnǎhu sá ñà túú xíní-ndó. Dico ìⁿ-ni nǔtnahá-xi quide-ndo te núu nchòhó ñáyiu cǎháⁿ tnǎhu sá dácàhu iní ñáhá Espíritú-gá cǎháⁿ-ndó nàcuáa quèe-xi tnǎhu-án. Te ducaⁿ te nchaa ñáyiu ndècu ichi Yá Ndiǒxí cuita níhí ndéé-gǎ-yu quíhíⁿ cundecú-yu ichi-gá.

⁶ Te núu yúhú quexìo-í núu ndécú nchòhó ñáyiu ndècu ndìhí-í ichi Xítóhó Jesucristú, te ngüíta-í cǎháⁿ-í mee-ni tnǎhu sá dácàhu iní ñáhá Espíritú Yá Ndiǒxí xii-í tnǎhu sá ñà túú xíní-í, te ñà túú ñǎ sá vǎha cuu-xi sá cúú-xí-ndó. Dico cuu-xi sá vǎha xii-ndo te núu na cǎháⁿ-í núu-ndó nchàa tnǎhu sá dánèhé ñáhá Yá Ndiǒxí xii-í tnǎhu sá vǎtá dácúàha-gá-í, ndìhí nchaa tnǎhu sá sà xíní-í, ndìhí nchaa tnǎhu sá dácàhu iní ñáhá-gǎ xii-í cǎháⁿ-í, ndìhí nchaa dava-gá tnǎhu-gá.

⁷ Te na càda-o cuendá sá núu ìⁿ téé tiú-dé vǐlu àdi caní-dé àrpá te núu ñà túú sǎhnú-dé ndìhí-xi ìⁿ yaá, te ñà cútnùní iní-ó ñǎ yaá cání-dé àdi ná yaá tiú-dé te núu ducaⁿ na càda-dé.

⁸ Te ñiu-ni ducaⁿ sǎtnahá-xi cùu tucu téé cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dava-gá cue sandadú te núu ducaⁿ na càda-dé vá tiú váha-dé.

⁹ Te ducaⁿ sǎtnahá-xi cùu nchóhó te núu vá cǎháⁿ-ndó ìⁿ tnǎhu nàcuáa tàú-xi cunduu núu ñáyiu te vá tècú tnùní-yu tnǎhu cǎháⁿ-ndó. ¡Chi àúⁿ ñǎ cuu cǎháⁿ-ndó te núu ducaⁿ na càda-ndo!

¹⁰ Te ío titní núu tnǎhu ío ñuyú, te ìⁿ ìⁿ núu tnǎhu-án cútnùní iní ñáyiu nàcuáa quèe-xi.

¹¹ Te núu nchoo ñǎ tècú tnùní-ó ìⁿ tnǎhu cǎháⁿ ìⁿ ñáyiu, te quide-ó-yu ñáyiu ñuú xícá chi ñà túú cǎháⁿ-yu tnǎhu cǎháⁿ-ó, te ñiu-ni ducaⁿ quide ñáhá-yu xii nchoo tùcu.

¹² Te xǎⁿ núu cǎchí tnǎhu-í xii nchaa nchòhó ñáyiu ío cuíní nduu táhú núu Yá Ndiǒxí sá Espíritú-gá chindee ñaha-xi xii-ndo cada-ndo ná daha núu chùⁿ, te ío nducu ndèe-ndo cada-ndo chiuⁿ sá ñǎ nduu táhú-ndó nàcuáa cuita níhí ndéé-gǎ ñáyiu ndècu ichi-gá quíhíⁿ.

¹³ Te núu cǎháⁿ-ndó tnǎhu sá ñà túú xíní-ndó, tnǎhu sá dácàhu iní ñáhá Espíritú Yá Ndiǒxí xii-ndo, te xíní ñǎhu-xi sá càcáⁿ táhú-ndó núu Yá Ndiǒxí cuendá sá ná chindee ñaha-gá xii-ndo cǎháⁿ-ndó núu ñáyiu núu nása quèe-xi tnǎhu-án.

¹⁴ Chi núu nchoo na cǎháⁿ ndìhí-o Yá Ndiǒxí ndìhí tnǎhu sá ñà túú xíní-ó, te ñǎ yùhu ñǎ iní-ó cǎháⁿ ndìhí-o-gǎ dicó-ni sá ñǎ tècú tnùní-ó nàcuáa nduu tnǎhu cǎháⁿ-ó.

¹⁵ Te xǎⁿ núu xíní ñǎhu-xi cǎháⁿ ndìhí-o Yá Ndiǒxí ñǎ yùhu ñǎ iní-ó nàcuáa chindee ñaha Espíritú-gá xii-o te cǎháⁿ-ó nàcuáa tecú tnùní-ó, te ñiu-ni ducaⁿ càda-o oré xítá yùhu-o chiñuhu-o Yá Ndiǒxí, chi ñǎ yùhu ñǎ iní-ó dùcaⁿ cada-o nàcuáa chindee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnǎhu cǎháⁿ-ó xíta-o.

¹⁶ Chi núu nchoo na ndàcáⁿ táhú-ó núu Yá Ndiǒxí ndìhí mee-ni tnǎhu sá ñà túú xíní-ó tnǎhu sá dácàhu iní ñáhá Espíritú-gá xii-o, te ñáyiu ñà túú ní nduu táhú cǎháⁿ tnǎhu cǎháⁿ-ó ndèdóho ñáhá-yu xii-o, te ñáyiu-án vǎ ndácú-yu cǎháⁿ-yu tnǎhu cǎháⁿ-ó ndàcáⁿ táhú-ó ndìhí-yu núu Yá Ndiǒxí chi ñà túú tècú tnùní-yu tnǎhu cǎháⁿ-ó.

¹⁷ Te váha-ni quide-o sá dúcáⁿ cǎháⁿ-ó ndàcáⁿ táhú-ó núu Yá Ndiǒxí, te dicó-ni sá tnǎhu-án ñà túú chindee-xi ñáyiu nàcuáa cuita níhí ndéé-gǎ-yu cundecú-yu ichi-gá.

¹⁸ Te yúhú ío ndàcáⁿ táhú-í núu Yá Ndiǒxí chi cǎháⁿ-í tnǎhu sá ñà túú xíní-í tnǎhu sá dácàhu iní ñáhá Espíritú-gá xii-í, te cǎháⁿ-gá-í dácúúxí nchàa nchóhó.

¹⁹ Te òré tàcá ñáyiu ndècu ichi Yá Ndiǒxí dácúàhá-yu tnǎhu-gá, te cǎháⁿ-í tnǎhu-gá núu-yu sá sà ní cutnùní iní mée-í nàcuáa ducaⁿ cùtnuní iní-yu nàcuáa nduu tnǎhu cǎháⁿ-í. Te tnàhá-gá iní-í cǎháⁿ-í úhúⁿ-ni tnǎhu-án núu-yu dácúúxí sǎ cǎháⁿ-í úxí mǐl tnǎhu sá ñà túú xíní-í, tnǎhu sá dácàhu iní ñáhá Espíritú Yá Ndiǒxí xii-í cǎháⁿ-í.

²⁰ Te nchòhó ñáyiu ndècu ndìhí-í ichi Xítóhó Jesucristú, vá cání iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhí vá cündècu-ndo ichi cuehé ichi duha, chi cue landú-án ñà túú ndècu-güexi ichi-án.

²¹ Te núu tütú Yá Ndiǒxí cǎháⁿ-xi nàcuáa ní cǎháⁿ-gá, te cǎchí-xi: “Cue téé ñuú xícá cǎháⁿ ndi dǐíⁿ núu tnǎhu quíhíⁿ-güedé cǎháⁿ-güedé tnǎhu-í núu ñáyiu isràèl

cada-güedé núu-í, te cuèi ducaⁿ dico vá quíndáá iní-yu tnúhu-í”, duha ní cachí Yá Ndiöxí te ducaⁿ ní ngúndeé núú tütú-gá.

22 Te tnúhu sá dácàhu iní ñáhá Espíritú Yá Ndiöxí xii-o tnúhu sá ñà túú xìní-ó, xíáⁿ cúu-xí cuendá sá cútnùní iní cue ñáyiu ñá túú sàndáá iní tnúhu Yá Ndiöxí sá ñà túú cùu váha iní ñáhá-gã xii-yu. Dico sá cúu-xí cuè ñáyiu sàndáá iní tnúhu-gá ñá túú nã quidé-xí sã cúu-xí-yu. Te tnúhu sá dácàhu iní ñáhá Yá Ndiöxí xii-o, xíáⁿ cúu-xí cuendá sá cútnùní iní cue ñáyiu sàndáá iní tnúhu-gá sá ndécú ndìhi ñaha-gá xii-yu, dico ñá túú dùcaⁿ sani iní cue ñáyiu ñá túú sàndáá iní tnúhu-gá.

23 Te núu ní tacá nchaa nchòhó ñáyiu ndècu ichi Yá Ndiöxí, te nchaa-ndo ní ngúita-ndo càháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xìní-ndó, te mei òré-áⁿ quexìo cue ñáyiu ñá túú sàndáá iní tnúhu-gá, ndìhi cue ñáyiu vátá quíní dana-gá tnúhu-gá núú ndécú-ndó, te ñáyiu-áⁿ quesàhá-yu sá lúcú-ndó te núu ducaⁿ càháⁿ-ndó tnúhu sá dácàhu iní ñáhá Espíritú-gá xii-ndo òré quexìo-yu.

24 Dico núu nchaa-ndo càháⁿ-ndó tnúhu sá dácàhu iní ñáhá Yá Ndiöxí xii-ndo, te mei òré-áⁿ quexìo cue ñáyiu ducaⁿ ñà túú sàndáá iní-xi tnúhu-gá, ndìhi cue ñáyiu ducaⁿ ñà túú xìní dana tnúhu-gá-áⁿ, te ñáyiu-áⁿ cutnùní iní-yu sá ndécú cuèchi-yu núú-gã, te ngúita-yu cuáha-yu cuendá sá ñà túú quide váha-yu ndècú-yu cuendá sá càháⁿ-ndó tnúhu-gá ndèdóho-yu.

25 Te nchaa sá cuèhé sá dúhá ní quidé-yu sàni iní-yu yìyuhu ndacu iní-yu, te ngúita-yu náhmá-yu nchaa sá ñà túú váha ní quidé-yu núú Yá Ndiöxí, te cachí-yu sá ïo càhnu cuu-gá, te cachí tucú-yu sá ndàá ndécú ndìhi-ndo-gá.

Cada-o nàcuáa tàu-xi cunduu

26 Te vitna nchòhó ñáyiu ndècu ndìhi-í ichi Xítohó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dásahú-ndó ñáyiu tnúhu-gá, te dava-ndo càháⁿ-ndó nàcuáa dàquixi túu Yá Ndiöxí iní-ndó, te dava-ndo càháⁿ-ndó tnúhu sá dácàhu iní ñáhá Espíritú Yá

Ndiöxí xii-ndo tnúhu sá ñà túú xìní-ndó, te dava-ndo càháⁿ-ndó nàcuáa quèe-xi tnúhu-áⁿ. Te nchaa sá quidé-ndó ná cùu-xi nàcuáa chindee-xi ñáyiu nàcuáa cuita níhi ndéé-gã-yu cundecú-yu ichi-gá.

27 Te òré càháⁿ-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xìní-ndó, te úu-ni-ndo àdi úní-ni tnàhá-ndó càháⁿ-ndó tnúhu-áⁿ te vá úúⁿ ní càháⁿ-ndó chi ndéé ndìhi ìⁿ-ndo te dàtnùní ngúita ingá-ndó càháⁿ-ndó. Te xini ñuhu-xi sá ìⁿ ñáyiu càháⁿ-yu nàcuáa quèe-xi tnúhu càháⁿ-ndó-áⁿ.

28 Te núu ñá túú ñáyiu tècú tnùní nàcuáa quèe-xi tnúhu càháⁿ-ndó-áⁿ, te núú mée núú ìⁿ-ní-ndó càháⁿ-ndó tnúhu-áⁿ càháⁿ ndìhi-ndo Yá Ndiöxí te vá càháⁿ-ndó núú ñáyiu.

29 Te òré càháⁿ-ndó tnúhu sá dácàhu iní ñáhá Yá Ndiöxí xii-ndo te úu-ni-ndo àdi úní-ni tucu-ndo càháⁿ, te dava-gá-ndó cùndedóho-ndo tnúhu-áⁿ te càháⁿ-ndó núu váha-ni càháⁿ-güedé àdi ñá túú váha-ni.

30 Te núu ìⁿ-ndo ní dácáhu iní ñáhá Yá Ndiöxí xii-ndo ìⁿ tnúhu càháⁿ-ndó, te núu ìⁿ-ndo sá càháⁿ-ndó te ngúití-ndó te quihu tucu ingá-ndó càháⁿ-ndó nàcuáa ní dácáhu iní ñáhá Yá Ndiöxí xii-ndo.

31 Te nchaa nchòhó ñáyiu ní nduu táhu càháⁿ tnúhu sá dácàhu iní ñáhá Yá Ndiöxí, te vá úúⁿ-ní càháⁿ-ndó chi díhna-gá ìⁿ-ndo càháⁿ te dàtnùní càháⁿ tucu ingá-ndó. Te ducaⁿ càda-ndo cuendá nchaa-ndo tècú tnùní-ndó nàcuáa ndùu tnúhu càháⁿ ìⁿ ìⁿ-ndo, te ducaⁿ te cudíi-gã iní-ndó cànchicúⁿ nihnu-ndo ichi-gá.

32 Te nchaa ñáyiu càháⁿ tnúhu Yá Ndiöxí sa nàha-ná mée-yu nàcuáa quidé-yu càháⁿ-yu tnúhu-gá nàcuáa ñá túú quide cutexínu-yu.

33 Te Yá Ndiöxí cúu-gã Yaá quidé ïo váha cùu ìⁿnuu-ndo ndecu-ndo, te ñá túú dàticá nuu ñaha-gã xii-ndo.

Te na càchí tnúhu-í xii-ndo nàcuáa càháⁿ-í nchaa núú tàcá cue ñáyiu ndècu ndìhi-o ichi Xítohó Jesucristú.

34 Te yúhú càchí-í sá vã cúu càháⁿ cue ñáyiu dìhí òré tàcá-ndó dàcuaha-ndo tnúhu-gá, chi ñá túú dùcaⁿ cuiní-gá cadá-yu, te quíndáá-ni iní-yu cadá-yu nàcuáa tàu-xi cunduu.

35 Te núu ìⁿ sá cuiní-yu nducu tnúhu-yu

te ndéé òré nasáá-yu vehé-yu te nducu tnũhu-yu núú yí-yu, chi ñá túú ndùu váha-xi sá càháⁿ-yu núú tàcá nchaa ñáyiú dàcuáha ndihí-yu tnũhu-gá.

³⁶ Te chí dándàcu iní sá ñà díú nchòhó cúú-ndó ñáyiú ní ngúndecu ndihí tnũhu Yá Ndiòxí díhna nuu nàcuáa datècú tnũhu-ndo dàva-gá ñáyiú, te ni ñà díú mèe-ni nchohó sa ní ngúndecu ndihí-ndo tnũhu Yá Ndiòxí vitna, núú xiáⁿ vá càchí-ndó sã ïo cùnuu-ndo.

³⁷ Te núu dava nchòhó sání iní-ndó sã càháⁿ-ndó nàcuáa dàcahu iní ñáhá Yá Ndiòxí xii-ndo àdi sani iní-ndó sã quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sá ncháá tnũhu càháⁿ-í-a cùu-xi tnũhu sá ñi cachí tnũhu mee Xitohó Jesucristú cada-o.

³⁸ Te ndéda-ni càa ñáyiú ndècu ndihí-ndo te núu ñá túú sàndáá iní-yu tnũhu càháⁿ-í, te vá cadá cuendá-ndó tnũhu càháⁿ-yu.

³⁹ Te vitna nchòhó ñáyiú ndècu ndihí-í ichi Xitohó Jesucristú, ío caní iní-ndó càháⁿ-ndó tnũhu sá dácàhu iní ñáhá Yá Ndiòxí núú ñáyiú, te daña-ndo na càháⁿ cue ñáyiú ní nduu táhú núú Yá Ndiòxí sá càháⁿ-yu tnũhu sá dácàhu iní ñáhá Espíritú-gá xii-yu tnũhu sá ñà túú xini-yu.

⁴⁰ Te cada-ndo nchaa nacuáa tàú-xi cunduu nàcuáa ñá túú nã cuu cundecu-ndo.

15

Ní ndoto Xitohó Jesucristú

¹ Te vitna nchòhó ñáyiú ndècu ndihí-í ichi Xitohó Jesucristú cuini-í sá dándàcu iní-ndó nàcuáa ní dánèhé ñáhà-í xii-ndo tnũhu sá càháⁿ nàcuáa naníhí tàhú-ó, chi ñi tnũhu-án ñi sàndáá iní-ndó te nchicúⁿ nihnu-ndo.

² Te sá xii tnũhu-án níhnú-ndó ichi cuáháⁿ-ndó núú ndúú táhú-ndó cundecu-ndo ndihí Yá Ndiòxí ñi caa ñi quíhíⁿ, te ducaⁿ ndùu táhú-ndó núú cundècu-ndo ñi caa ñi quíhíⁿ ndihí Yá Ndiòxí te núu nchicúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchicúⁿ nihnu-ndo te ñá túú ní sàndáá iní-ndó nàcuáa tàú-xi cunduu.

³ Te yúhú sa ní cachí tnũhu-í xii-ndo ñi tnũhu sá ïo cùnuu ní níhí-í, chi ní cachí tnũhu-í xii-ndo sã Xitohó Jesucristú ní xihí-gá cuendá nchaa yicá cuèchi-o, te ducaⁿ ní cuu chi ducaⁿ càháⁿ-xi núú tùtú Yá Ndiòxí sá dúcáⁿ yàha-gá.

⁴ Te ní chindúxi ñaha-güedë xii-gá te nduu úní ní dándótó ñaha Yá Ndiòxí xii-gá, te ducaⁿ ñi cuu chi ducaⁿ càháⁿ-xi núú tùtú Yá Ndiòxí.

⁵ Te sátá ñi ndoto-gá te ní quee túu-gá núú tẽ Pèlú, te dàtnùní ní quee túu-gá núú dàva-gá cue téé ní táuchíúⁿ-gã càháⁿ tnũhu-gá.

⁶ Te sátá dúcáⁿ te dàtnùní ní quee túu-gá núú ùhúⁿ cièndú cue ñáyiú ndècu ichi-gá, te vai-yu xindecu-ni-yu vitna chi sacú-ni-yu ní xihí.

⁷ Te dàtnùní ní quee túu-gá núú tẽ Jàcobó, te sátá dúcáⁿ te dàtnùní ní quee túu-gá núú nchaa cue téé ní táuchíúⁿ-gã càháⁿ tnũhu-gá.

⁸ Te ndéé núú ñi ndihí-ná te ní quee túu-gá núú mèe-í, te òré ní quee túu-gá núu-í te cùu-í dàtná ñi déhe yiquiⁿ vátá sàá-gá nduu càcu chi cùu-í ñi téé ñá túú sàni váha iní-xi cuendá-gá ní cùu.

⁹ Te yúhú ñá túú cùnuu-í dàtná cùnuu cue téé ní táuchíúⁿ Xitohó Jesucristú càháⁿ tnũhu-gá. Te cùu-í ñi téé ní táuchíúⁿ-gã càháⁿ tnũhu-gá, cuèi ñá túú tàú-í sá càháⁿ-í tnũhu-gá, chi ní xóo cuu úhú iní-í cue ñáyiú ndècu ichi Yá Ndiòxí.

¹⁰ Dico Yá Ndiòxí ío váha iní-gá chi ní quide ñaha-gã xii-í ñi téé váha, chi ñá túú-gã quidè-í dàtná ní xóo cada-í. Te ío cùndahú iní ñáhá-gã chindèe ñaha-gá xii-í dico ñá túú àúⁿ nã cuu chindee ñaha-gá, chi ío-gá vai chiuⁿ-gá ní cuu sa ta quide-í cuáháⁿ dàcúxí dàva-gá cue téé ní táuchíúⁿ-gã càháⁿ tnũhu-gá te ñá díú mèe-í ducaⁿ quide-í chi mee Yá Ndiòxí ío cùndahú iní ñáhá-gã chindèe ñaha-gá xii-í quidè-í chiuⁿ-gá.

¹¹ Te ñá túú nã cada-xi cuèi dava-gá-güedë sa ní cuu vai-gá chiuⁿ-gá quidè-güedë àdi yúhú, chi ñi tnũhu càháⁿ-ndí te tnũhu-án cúú tnũhu ní sàndáá iní-ndó.

Cue ñáyiú ní xihí ndotó-yu

¹² Te nchúhú cue téé càháⁿ tnũhu Xitohó Jesucristú càháⁿ-ndí sá ñi xihí-gá te ní ndoto-gá, ¿te ná cuendá dava nchòhó càchí-ndó sã vã ndótó cuè ñáyiú ní xihí?

¹³ Te núu ducaⁿ sàni iní-ndó sã vã ndótó cuè ñáyiú ní xihí te ní Xitohó Jesucristú ñá túú ní ndòto-gá te núu ducaⁿ.

14 Te núu dìcò Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nàndíhi-xi te núu ducaⁿ, te àúⁿ nã cuu sàndáá iní-ndó-gá te núu ducaⁿ.

15 Te núu dìcò cúú-xí ìⁿ sá ndáá tnúhu sàni iní dava-ndo ñá, te dàcuandehnde-ndí sá càháⁿ-ndí tnúhu Yá Ndiöxí núú-ndó te núu ducaⁿ, te ñá túú càháⁿ ndáá-ndí núú-ndó sã Yá Ndiöxí ní dándótó-gá Xítóhó Jesucristú, te núu ndáá nàcuáa sàni iní dava-ndo sã vã ndótó cuè ñáyiu ní xíhí, dico ñá ndáá nàcuáa sàni iní-ndó.

16 Te núu vã ndótó cuè ñáyiu ní xíhí te ni Xítóhó Jesucristú ñá túú ní ndòto-gá.

17 Te núu Xítóhó Jesucristú ñá túú ní ndòto-gá ñá, te àúⁿ nã cuu sàndáá iní-ndó-gá te núu ducaⁿ, te ndècu-ni cuèchi-ndo nũú Yá Ndiöxí te núu ducaⁿ.

18 Te núu ndáá nàcuáa sàni iní-ndó ñá te cue ñáyiu ní sàndáá iní ñáhá xii Xítóhó Jesucristú ñáyiu ní xíhí ní xíta nihnú-yu te núu ducaⁿ.

19 Te núu nchoo ndècu ndíhi-o tnúhu ndee iní núú Xítóhó Jesucristú cuèndá-ni sá cùndècu-o ñuyúú-a ñá, te cùu-o ñáyiu ío-gá duuⁿ duuⁿ ndàhú sá cúú-xí dàva-gá ñáyiu te núu ducaⁿ.

20 Dico ndáá sá Xítóhó Jesucristú ní xíhí-gá te ní ndoto-gá nũu xíãⁿ cùtnùní iní dava-o sã ndótó cuè ñáyiu ní xíhí ñáyiu ní sàndáá iní tnúhu-gá.

21 Te sá cuèchi ìⁿdii-ni téé ní xíndecu ñuyúú-a xíãⁿ xíhí ñáyiu, te sá cuèndá ìⁿdii-ni tucu ingá téé te ndoto cuè ñáyiu ní xíhí.

22 Te nchaa ñáyiu xíhí-yu sá cuèchi ìⁿ téé, te téé-áⁿ cúú-dě ndíi Àdán téé díhna nuu nã cuu ñaní tnáhá cuè ñáyiu ñuyúú. Te ñu-ni ducaⁿ sã cuèndá ìⁿdii-ni téé te ndoto cuè ñáyiu ní xíhí, te téé-áⁿ cúú-dě Xítóhó Jesucristú chi nchaa ñáyiu ndècu ndíhi-gá ndotó-yu.

23 Te díhna-gá Xítóhó Jesucristú ní ndoto-gá xíãⁿ cùtnùní iní dava-o sã ndùu na quixi tucu-gá ñuyúú-a te dàvá-áⁿ ndoto nchaa ñáyiu ní xíhí ñáyiu ní sàndáá iní tnúhu-gá.

24 Te dàtnùní ducaⁿ te sáá nduu nàa nchaa sá ío ñuyúú, te Xítóhó Jesucristú danàa-gá nchaa ndí tũhú sá cùnùu ío ñuyúú-a, chi danàa-gá nchaa ñáyiu ío cùnùu, ndíhi yucu ñávãha, ndíhi nchaa espíritú

xínú cuèchi núú-xi. Te ducaⁿ te cúñaha-gá xii Tãtã-ó Dũtú Ndiöxí taxi tnùní-gá.

25 Chi Xítóhó Jesucristú dacuitíí tàxi tnuní-gá ndéé ná sàá nduu dànaa-gá nchaa sá cúú úhú iní ñáhá xii-gá.

26 Te ndéé núú nã ndíhi-ná te danàa-gá sá quidé xíhí ñáyiu.

27 Te ducaⁿ chi càháⁿ-xi núú tũtú Yá Ndiöxí sá mée-gá ní nachihi-gá nchaa sá ío ndaha Xítóhó Jesucristú cuèndá sá mée Xítóhó Jesucristú taxi tnùní-gá, te vã yõo ìⁿ tàxi tnuní ñáhá xii Yá Ndiöxí, chi mee Yá Ndiöxí cúú-gá Yaá ní nachihi-gá nchaa sá ío ndaha Xítóhó Jesucristú.

28 Te díhna-gá ní xáhaⁿ Yá Ndiöxí xii Xítóhó Jesucristú Yaá cúú Dèhe-gá sá quíndàha-gá nchaa sá ío, te òré ná quíndaha Xítóhó Jesucristú nchaa sá ío, te cúñaha-gá xii Yá Ndiöxí taxi tnùní ñáhá-gá xii-gá, te ducaⁿ te mee-nã Yá Ndiöxí taxi tnùní-gá nchaandi tũhú sá ío.

29 Te núu ñá túú ndáá càháⁿ-í, ¿te ná cuèndá dava ñáyiu sànduté-yu cuèndá ñáyiu ní xíhí nũu ñá túú ndáá sá ndótó ñáyiu ní xíhí?

30 Te nchúhú ducaⁿ-ni sàni iní ñáyiu cahni ñáhá-yu xii-ndí, te núu vã ndótó ñáyiu ní xíhí te àúⁿ nã cuu ducaⁿ quide cahnu iní-ndí ducaⁿ cuèni-yu cahni ñáhá-yu xii-ndí te núu ducaⁿ.

31 Te nchòhó ñáyiu ndècu ndíhi-í ichi Xítóhó Jesucristú ío váha sàni iní-í cuèndá-ndó, chi ndècu-o ichi-gá. Te na càchí tnúhu ndáá-í xii-ndo sã ìⁿ nduu ìⁿ nduu ndee iní ñáhá ñáyiu cahni ñáhá-yu xii-í.

32 Te núu dìcò ndáá sá vã ndótó ñáyiu ní xíhí dàtná càchí dava ñáyiu, te àúⁿ nã cuu ní xíndecu-í ñuú Éfesú ní cuu úhú iní ñáhá ñáyiu xii-í te núu ducaⁿ, chi ñáyiu-áⁿ nã quidé-yu dàtná quidé ìⁿ quiti dééⁿ sã cúú-xi-í. Te núu ndáá sá vã ndótó ñáyiu ní xíhí ñá, te váha-gá nũu cachí-ó dàtná càchí ñáyiu: “Vitna na còho-o te na càxi-o chi tneé idá cuú-ó”, duha càchí-yu.

33 Te vã dáñá-ndó mée-ndo dandahú ñáhá ñáyiu ndècu ichi cuehé ichi duha xii-ndo, te ngũíta-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyiu, chi càchí-yu sá

nũu ñáyiú quide váha na ñihí tnáhã-yu ndihí ñáyiú ndècu ichi cuehé ichi duha, te ngũta ñáyiú quide váha-án cadá-yu tnáhã-yu nchaa sá cuéhé sá dúhá dàtná quidé ñáyiú-án.

³⁴ Te ío váha cuáha-ndo cuendá nàcuáa cundecu-ndo, te vá cadá-gã-ndó dàtná quidé cué ñáyiú ndècu ichi cuehé ichi duha. Te dava-ndo quide-ndo datná quidé cué ñáyiú ndècu ichi cuehé ichi duha chi ñá túú sàndáá iní-ndó Yã Ndiõxí. Te duha càháⁿ-í cuendá sá cúcàhaⁿ núú-ndó cuendá nchaa sá ñà túú váha quide-ndo.

Nàcuáa ndoto ñáyiú ní xihí

³⁵ Te cudana dava-ndo ndècu tnúhu-ndo nũu nása ndoto ñáyiú ní xihí, te nása cunduu yiqui cùñú-yu òré ndotó-yu.

³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cùnuni iní-xi, te duha na càháⁿ-í nàcuáa tecú tnùní-ndó. Te núú ìⁿ tatá ná chíhí-ó te tèhyú mée-xí te xínu déhe-xi.

³⁷ Dico ñá díú sã sà ní xínu ta sàhnu cuáhãⁿ ní cùxi-o, te ñu-ni ducaⁿ quide-o cuéi triú ndihí nchaa dava-gá tatá xítú-ó.

³⁸ Te Yã Ndiõxí quidé-gã sácũnduu tatá xínu-án dàtná cuini mée-gã cunduu. Te ndéda-ni càa tatá te ñu-ni-gã quidé-gã sácũnduu-xi nàcuáa tàú-xi cunduu.

³⁹ Te ndi ñá ñá nchaa yiqui cùñú, chi tucu càa yiqui cuñú nchoo cué ñáyiú, te tucu càa yiqui cuñú nchaa quiti xica núú ñúhú, te tucu càa yiqui cuñú nchaa quiti ndàva, te tucu càa yiqui cuñú nchaa chácá.

⁴⁰ Te ducaⁿ ñà túú ñá-ni caa nchaa yiqui cuñú sá ío andiú ndihí nchaa yiqui cuñú ñáyiú ío ñuyíú-a, te ducaⁿ ñà túú ñá-ni ndáa vii nchaa sá ío andiú ndihí ñuyíú-a.

⁴¹ Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ñá-ni dayehé nchaa chódíní.

⁴² Te ducaⁿ sãtnahá-xi cùu ñáyiú ní xihí te ndoto, chi tucu càa yiqui cuñú-yu sá nguĩndũxi te tucu cunduu yiqui cùñú-yu òré ndotó-yu, te yiqui cùñú sá ndótó ndihí-yu-án vã ndihí ñihnu-gá-xi.

⁴³ Te yiqui cùñú ñáyiú xihí ñá túú nàndihí-xi, dico yiqui cùñú sá ndótó ndihí-yu te ío váha cunduu. Te nchaa yiqui

cùñú ñáyiú xihí ñá túú tnàhí-gá ndee-xi, dico yiqui cùñú ndoto ndihí-yu xíãⁿ ío cunduu ndee-xi.

⁴⁴ Te yiqui cùñú nchaa ñáyiú xihí cúú-xí cuendá ñuyíú-a, dico yiqui cùñú sá ndótó ndihí-yu xíãⁿ cundecu-ná-xi cuendá Espiritú Yã Ndiõxí. Te dàtná ío yiqui cùñú sá cúú-xí cuendá ñuyíú-a, te ducaⁿ ío yiqui cùñú sá cúú-xí cuendá mee-nã Espiritú Yã Ndiõxí.

⁴⁵ Te núú tütú Yã Ndiõxí càchí-xi: “Ndii Adán ndii ní xindecu ndéé díhna ní chihí Yã Ndiõxí iní ndii”, duha càchí-xi núú tütú-gá. Te ingá tucu téé cùu-dé dàtná ndii Adán te téé-án cúú-dé Xítóhó Jesucristú, te Yaa-án quidé-gã sá mée-ná Espiritú Yã Ndiõxí quidé-xí ndècu-o ichi-gá vitna.

⁴⁶ Te díhna-gá yiqui cùñú cuendá ñuyíú-a ní ngúndecu, te dàtnùni ngúndecu yiqui cùñú cundecu ndihí mee-nã Espiritú Yã Ndiõxí.

⁴⁷ Te téé díhna nuu ñi xindecu ñuyíú-a chi ñuhu ní cadúha ñaha Yã Ndiõxí xii-dé, te téé-án cúú-dé ndii Adán, te ingá tucu téé ní cuuⁿ-dé andiú te téé-án cúú-dé Xítóhó Jesucristú.

⁴⁸ Te nchaa ñáyiú càa yiqui cuñú-yu dàtná cáa yiqui cuñú té Adán téé ducaⁿ ñi cuáha ñuhu-án, te nchaa ñáyiú ní nduu táhú cundecu ndihí téé ducaⁿ vèxi cuuⁿ andiú-án, ñáyiú-án nduu yiqui cùñú-yu dàtná cáa yiqui cuñú ní nduu táhú-dé ndécú ndihí-dé vitna, te téé-án cúú-dé Xítóhó Jesucristú.

⁴⁹ Te nchaa ñáyiú ñuyíú-a càa-yu dàtná-ni càa datná-ni nduu téé ducaⁿ ñi cuáha ñuhu-án. Te nchaa nchoo ñáyiú ní nduu táhú cundecu ndihí téé ducaⁿ vèxi cuuⁿ andiú-án nduu-o dàtná-ni càa datná-ni nduu téé-án tucu.

⁵⁰ Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiú xindecu vitna vá sàá-xi cundecu-xi núú ndécú Yã Ndiõxí táxí tnùní-gá, chi ñuyíú-a ndihí ñihnu-xi. Dico sá tàú-xi sáá núú ndécú-gã táxí tnùní-gá xini ñuhu-xi cuu-xi sá cúdii cundecu.

⁵¹ Te na càchí tnúhu-í xii-ndo ñá tnúhu sá yiyùhu ni cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó.

52 Te uuⁿni ducaⁿ nàdáma yiqui cuñú-ó òré cáháⁿ ìⁿ cútú, te cútú-ǎⁿ cáháⁿ-xi òré sa ta cùyatni naa ñuyíú. Te òré cáháⁿ cútú-ǎⁿ te ndoto nchaa ñáyíu ní xihí ñáyíu ní xíndecu ichi Xítohó Jesucristú, te ducaⁿ te vá ìⁿ ndùu ìⁿ quíú-gǎ cuú-yu. Te nchaa ñáyíu ndècu vívú te nàdáma yiqui cuñú-yu tnahá-yu.

53 Te nchaa yiqui cuñú ndécú ndìhi nchaa ñáyíu ndècu ñuyíú-a vitna ñá túú cùdí-xi chí xihí-xi, dico yiqui cuñú nduu táhú nchoo ñáyíu ndècu ichi Xítohó Jesucristú chí cùdí-xi ni caa ni quíhíⁿ chí vá cùú-gǎ-xi.

54 Te òré ná ndùu táhú-ó yiqui cuñú sá dúcáⁿ cùdí ni caa ni quíhíⁿ-áⁿ, te vá cùndècu ndìhi-gǎ-ó yiqui cuñú sá ñà túú cùdí. Te dàvá-áⁿ te quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Vitna ñá túú-gǎ xihí ñáyíu chí mee-nǎ Yá Ndiöxí cùnù-gǎ táxi tnùnì ñáhá-gǎ xií-yu.

55 Te ñá túú tnahí-gǎ ná ndoho ñáyíu sá cuendá tnúhu xihí, chí vá cóó-gǎ tnúhu xihí”, duha càchí-xi núú tütú Yá Ndiöxí.

56 Te cue ñáyíu ndècu ndìhi-yu tnúhu sá sánú ichi ñaha xií-yu nàcuáa cadá-yu cundecú-yu dico uuⁿ-gǎ quidè-yu nchaa sá cuèhé sá dúhá. Te sá cuendá nchaa sá cuèhé sá dúhá quidè-yu-áⁿ, te xíáⁿ ní ngúndecu tnúhu xihí dándòho ñaha-xi xií-yu.

57 Dico táxǎhu xii Yá Ndiöxí chí ní taxi-gǎ tnúhu ndee iní ndécú ndìhi-o sá sàá nduu te vá quíní-gǎ-ó tnúhu xihí, te ducaⁿ chí ndècu ndìhi-o Xítohó Jesucristú.

58 Te xíáⁿ nùu càháⁿ-í dóho nchòhó cue ñáyíu ndècu ndìhi-í ichi Xítohó Jesucristú chí ío cùu iní ñáhà-í xii-ndo, te càháⁿ-í dóho-ndo sǎ cǎnchícúⁿ nihnu-ni-ndo ichi Xítohó Jesucristú cuèi nándi na càda ñaha ñáyíu xii-ndo sǎ cuendá-gǎ, te ío nducu ndèe-ni-ndo cada-ndo chiuⁿ-gǎ, chí sa nàha-ndo sá ncháá chiuⁿ quide-o cuendá-gǎ ñá túú àuⁿ nǎ cuu quide-o.

16

Nàcuáa sàcáⁿ tnahá ñáyíu díhúⁿ

1 Te na càchí tnúhu-í xii-ndo cuendá díhúⁿ sǎ sàcáⁿ tnahá-ndó sǎ cúú-xí ñáyíu ñúú Jerusalén, chí ñiu-ni duha ní dánèhé-í cue ñáyíu xíndecu ichi Xítohó Jesucristú ndécú ìⁿ ìⁿ xichi distritú Galaciá.

2 Te duha cada-ndo ndì tnahá nduu ndumíngú, te ìⁿ ìⁿ-ndo dàquee díⁿ-ndo sacú díhúⁿ nàcuáa chindee ñaha Yá Ndiöxí xii-ndo nihí-ndó cuendá òré quexìo-í te sa cundecu túha díhúⁿ-ǎⁿ.

3 Te òré quexìo-í te mee-ndo cǎxi-ndǒ-yu núu ndèdacàa-yu sàni iní-ndó càda ndáá canehe díhúⁿ-ǎⁿ quíhíⁿ ndaha ñáyíu xíndecu ichi Xítohó Jesucristú ndécú ñúú Jerusalén. Te cadúha-í ìⁿ úú tutú canehé-yu quíhíⁿ cuendá cutnùnì iní ñáyíu ñúú Jerusalén nàcuáa ndùu chiuⁿ cuáháⁿ-yu.

4 Te núu xini ñuhu-xi sá quíhíⁿ-í te candeca-í-yu quíhíⁿ.

Té Pǎblú sání iní-dé quíngoto-dé cue ñáyíu ndècu ichi Xítohó Jesucristú

5 Te yúhú sání iní-í yáha-í ìⁿ úú ñúú cáá distritú Macèdoniá, te dàtnùnì ducaⁿ te sáá-í núú ndécú-ndó.

6 Te òré quexìo-í te cudana cundecu ndìhi ñaha-í xii-ndo vǎi nduu, àdi cudana te cundecu ndìhi ñaha-í xii-ndo ndèé yáha nchaa yóo quidè vǐxiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nucúhuⁿ ichi-í te núu ndèé ichi na quíhíⁿ-í.

7 Te duha càháⁿ-í chí núu Yá Ndiöxí ná càchí-gǎ te cundecu ndìhi ñaha tnahá-í xii-ndo òré quexìo-í te ñá díú dicó-ni ichi yáha-í.

8 Te cundecu-ni-í ñúú Éfesú-a ndèé tnahá vico Pentecòstés.

9 Te ducaⁿ chí iha ío tédòho ñáyíu tnúhu Xítohó Jesucristú sá càháⁿ-í núú-yu. Núu xíáⁿ ío váha quèe cuendá cada-í chiuⁿ-gǎ cuèi ío vǎi ñáyíu ñá túú tnahá iní-yu sá càháⁿ-í tnúhu-gǎ.

10 Te núu na quixi coto ñaha té Timùteú xii-ndo, te ío váha cuu iní-ndó càháⁿ ndìhi-ndo-dè cuendá ducaⁿ ñà túú nǎ canì iní-dé cundecu ndìhi ñaha-dè xii-ndo, chí tnahá-dé cúú-dè téé quide chiuⁿ Xítohó Jesucristú dàtná quidè-í.

11 Te cuíní-í sá nì ìⁿ-ndo vá cánì cuèhé iní-ndó cuendá-dé, te chindee-ndo-dè nàcuáa cuu váha iní-dé òré quixi-dé quixi coto ñaha-dè xii-í, chí yúhú ndìhi ñaha-gǎ ñáyíu ndècu ichi Xítohó Jesucristú ndétú-ndí-dé quexìo-dé.

12 Te ío ní càháⁿ ndàhú-í núú tǎ Àpolós téé ndècu ndìhi-o ichi Xítohó Jesucristú

cuendá quixi-dé ndihi dava-gá cue té ndècu ndihi-o ichi-gá quixi coto ñaha-güedé xii-ndo dico ñá túú ní cuíní-dé quixi-dé vitna, dico quixi-dé ndéé cuéé-gá.

Tnúhu ndéé núú nĩ ndihi-ná

¹³ Te ío quihí iní-ndó cùndecu-ndo ichi Xítoho Jesucristú, te vá dáñá ndéé-ndó quíndáá iní-ndó-gă, te ío yĩ cùnduu iní-ndó cùndecu-ndo ichi-gá, te ío nducu ndèe-ndo canchicúⁿ nihnu-ndo ìchi-gá.

¹⁴ Te ío váha cuu iní tnáhá-ndó, te ducaⁿ ïo váha cada tnàha-ndo te núu nándi cùu sá vâha sâni iní-ndó càda-ndo.

¹⁵ Te nchòhó ñáyiú ndècu ndihi-í ichi Xítoho Jesucristú sa nàha-ndo sá dñhanuu cué ñáyiú cùu ndi mee té Èstéfanás ndécú dístítú Acăyá ní sándáá iní-yu tnúhu Xítoho Jesucristú. Te vitna ñá túú dàña ndéé-yu quidé-yu sá vâha sá cúú-xí dâva-gá ñáyiú sándáá iní tnúhu-gá.

¹⁶ Te càháⁿ ndàhú-í núú-ndó sã quíndáá iní-ndó nchàa ñáyiú ducaⁿ xĩquide, ndihi nchaa dava-gá ñáyiú ío ndùcu ndee quide chiuⁿ ndihi-ndo cuendá Xítoho Jesucristú.

¹⁷ Te ío cùdíí iní-í sá nĩ quexìo té Èstéfanás, ndihi té Fortunátú, ndihi té Acàicú, chi cue téé-áⁿ nĩ quide-güedé núú-ndó nĩ quide-güedé nchaa sá ñà túú ndàcu-ndo cada-ndo cuendá-í ní cùu.

¹⁸ Te ío tàxi-güedé tnúhu ndee ìní xii-í, te ñi-ni ducaⁿ tàxi-güedé tnúhu ndee ìní xii nchòhó tucu, te núu xíáⁿ xíní ñùhu-xi sá cànèhe-ndo sá yĩñùhu núú nchàa cue téé duha xĩquide váha.

¹⁹ Te nchaa ñáyiú xĩndecu ichi Xítoho Jesucristú ndécú dístítú Àsiá quide ndee iní ñáhă-yu xii-ndo, te ío cada ndee ìní-ndó càchí té Àquilú ndihi ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dâcuàha tnúhu Yá Ndiöxí vehé-yu xii nchaa nchòhó ñáyiú ndècu ichi-gá.

²⁰ Te cada ndee ìní tucu-ndo càchí cue dava-gá ñáyiú ndècu ndihi-o ichi Xítoho Jesucristú. Te ñi yùhu ñi iní-ndó càda ndee iní tnáhá-ndó ìñⁿ ìñⁿ-ndo.

²¹ Te vitna ndaha mee yùhú té Păblú tée-í tnúhu-a quide ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítoho Jesucristú te na cuíta nihnú-yu. Te

vitna nchaa-o chĩ ná càchí-ó sã Xítoho Jesucristú quixi tucu-gá.

²³ Te xicáⁿ tãhù-í núú Xítoho Jesucristú sá ná chĩndee chitúu ñaha-gă xii-ndo.

²⁴ Te ío cùu iní ñáhà-í xii-ndo nâcuáa ndècu-o ichi Xítoho Jesucristú, te ducaⁿ na cùnduu, te ío chí cãdá ndèe iní-nă vitna.

TUTÚ CÚÚ ÒÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ CÒRINTÚ

Té Päblú cādūha-dé tutú quíhíⁿ ndaha ñáyiú xĩndecu ichi Xítóhó Jesucristú ndécú ñúú Còrintú

¹ Yúhú té Päblú càháⁿ-í tnúhu Xítóhó Jesucristú chi ducaⁿ ñí cachí Yă Ndiöxí cunduu. Te cādúha-í tutú-a ndihi té Timùteú té ndècu ndihi-o ichi-gá cuendá daquixi-í ndaha nchòhó ñáyiú xĩndecu ichi Yă Ndiöxí ndécú ñúú Còrintú, te tutú-a cuu-xi tnàhá cuendá nchaa ñáyiú cùu cuendá Yă Ndiöxí xĩndecu nchaa ñúú yĩndèhu distritú Acáyá.

² Te xicáⁿ táhù-í núú Tătá-ó Dütú Ndiöxí ndihi núú Xítóhó Jesucristú sá ïo na chĩndee chitúu ñaha-gă xii-ndo, te ñu-ni ndi ndùú-gá ná càda te ïo váha cuu iní-ndó cundecu-ndo.

Té Päblú càháⁿ-dé nchaa nàcuáa ndòho-dé

³ Te chí ná càchí-ó sã ïo váha iní Dütú Ndiöxí Yaá cúú Tătá Xítóhó Jesucristú, te ñu-ni Dütú Ndiöxí cúú-gă Yaá ïo cundahú iní ñáhá xii-o, te ñu-ni-gá cúú-gă Yaá táxi tnúhu ndee iní.

⁴ Te cuèi nándi ndòho-o ndecu-o dico ñu-ni Dütú Ndiöxí táxi-gă tnúhu ndee iní xii-o, te ducaⁿ quide-gá cuendá sá nchóo cuãñaha-o tnúhu ndee iní xii nchaa ñáyiú nándi ndòho ndecu, te ñu-ni nchaa tnúhu ndee iní táxi-gă xii-o ñu-ni nchaa tnúhu ndee iní-áⁿ cuãñaha-o xii-yu.

⁵ Te Xítóhó Jesucristú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vâi tnúhu ndee iní ñihí-ó ndècu ndihi-o chi ndècu-o ndihi Xítóhó Jesucristú.

⁶ Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tãhú-ndó. Te Yă Ndiöxí táxi-gă tnúhu ndee iní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tãhú-ndó, te ducaⁿ càda ndee cada cahnu iní-ndó ndòho-ndo datná ndòhó nchúhú.

⁷ Te nchúhú ïo váha sãni ndáá iní-ndí cuendá-ndó chi ndòho-ndo datná

ndòhó-ndí, te ducaⁿ tàxi Yă Ndiöxí tnúhu ndee iní xii-ndo datná táxi-gă xii-ndí.

⁸ Te nchòhó ñáyiú ndècu ndihi-ndí ichi Xítóhó Jesucristú cuiní-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Àsiá chi dàvá-áⁿ ïo ní ndoho-ndí, te luha-ná te vá cundèe iní-ndí yáha-ndí nchaa tnúndòho-áⁿ ní cùu chi ní xehndé iní-ndí sá vã cãcu-ndí.

⁹ Chi ní sani iní-ndí sá ndiyi-ná cuu-ndí ní cùu, te ducaⁿ ñí yáha-ndí cuendá sá ïo-gá quĩndáá iní-ndí Yă Ndiöxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te ñu-gá cúú-gă Yaá dándòto cuèi ñáyiú sa ní xihí.

¹⁰ Te ñu-ni-gá ní taunihnu ñaha-gă ñá túú ní sãhni ñaha ñáyiú xii-ndí, te ñu-ni-gá táunihnu ñaha-gá xii-ndí cuèi vitna, te cùtnuní ndáá iní-ndí sá díú-ní-gă taunihnu ñaha-gă xii-ndí núú cuaháⁿ núú vëxi te vá càhni ñaha ñáyiú.

¹¹ Te nchòhó tnàhá-ndó chĩndee ñaha-ndo xii-ndí chi càháⁿ ndihi-ndo Yă Ndiöxí cuendá-ndí, te ïo vâi ñáyiú càháⁿ ndihi ñahá-yu xii-gá cuendá-ndí, te ducaⁿ ïo vâi ñáyiú ndàcáⁿ táhù-yu núú-gă cuendá nchaa sá váha quide ñaha-gá xii-ndí.

Té Päblú càháⁿ-dé ná cuendá ñá túú ní nâyáha-dé ñúú Còrintú

¹² Te ïo váha cùu iní-ndí chi cùtnuní iní-ndí sá cúú-ndí cue tée cùu ndáá datná cuiní Yă Ndiöxí cunduu ndècu-ndí ñuyú-a, te ñu-ni ducaⁿ quide-ndí sá cúú-xi-ndó chi mee-gă cundàhú iní ñáhá-gă xii-ndí chĩndèe ñaha-gá, te ñá túú quide-ndí datná sãni iní cue ñáyiú ñuyú-a.

¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuiní-ndí sá ïo-gá váha tecú tnùní-ndó cuendá sá òré ná quixi tucu Xítóhó Jesucristú, te dàvá-áⁿ ïo cada ñinu ñaha-ndo xii-ndí datná cada ñinu ñaha-ndí xii-ndo.

¹⁵ Te cuendá xiãⁿ ñúu ní sani iní-í yáha càháⁿ-í úú xito núú ndécú-ndó cuendá ïo cudí iní-ndó.

16 Chi ní sani iní-í sá òré quíhíⁿ-í distrítú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sá cúú ìchi-í cuèndá quíhíⁿ-í distrítú Jùdeá, duha ní sani iní-í ní cùu.

17 Te sá dúcáⁿ ñà túú ní quèxi coto ñaha-í xii-ndo te cudana sàni iní-ndó sá yùhú ñá túú ní sáha váha-í cuèndá nàcuáa ní sani iní-í cada-í, àdi cudana ñáyiú ndècu ìchi cuehé ìchi duha, chi cue ñáyiú-áⁿ tnaa càchí-yu sá cúú càdá-yu #ⁿ sá sání iní-yu cadá-yu te tnaa càchí-yu sá ñáhá.

18 Dico Yá Ndiòxí Yaa ío váha quide ndáá nàha ndáá nàhá càxi-gá sá nchùhú ñá túú dàma-ndí sá càháⁿ-ndí.

19 Te yùhú ndihí té Silvanú ndihí té Timùteú dánèhé ñáhá-ndí xii-ndo cuèndá Xítóhó Jesucristú Yaa cúú Dèhe Yá Ndiòxí, te Xítóhó Jesucristú cúú-gã Yaa ñá túú dàma-gá tnúhu càháⁿ-gá, chi cùu-gá Yaa càháⁿ mee-ni tnúhu ndáá tnúhu cuíti.

20 Te ñiú-ni Xítóhó Jesucristú cúú-gã Yaa quidé nchàa nacúaa ní cachí Yá Ndiòxí. Te sá cuèndá sá dúcáⁿ quide Xítóhó Jesucristú xiáⁿ càchí-ó sá ío càhnu cuu Yá Ndiòxí. Te nchaa-o na càchí-ó sá díú-ni dùcaⁿ na cada-gá.

21 Te mee Yá Ndiòxí quidé-gã ndécú-ní-ó ìchi Xítóhó Jesucristú. Te ñiú-ni mee-gã ní cáháⁿ ñáhá-gã xii-o cuèndá cunu cuechi-o núú-gã.

22 Te Yá Ndiòxí ní quide-gá sá nchóo cùu-o ñáyiú cùu cuèndá-gá, te ní taxi-gá Espiritú-gá ní ngúndecu ndihí-o cuèndá cutnùní iní-ó sá ndáa cada ñaha-gã xii-o nàcuáa ní cachí-gá cada-gá.

23 Te Yá Ndiòxí nàhá-gã sá yùhú càháⁿ ndáá-í ná cuèndá vátá quíxí-gã-í quixi coto ñaha-í xii-ndo, te vátá quíxí-gã-í chi ñá túú cuìní-í dandihú-í iní-ndó.

24 Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiòxí, chi sa sàndáá váha iní-ndó-gã, chi nchùhú cuìní-ndí chindee tnúhu ñaha-ndí xii-ndo nàcuáa ío-gá cudí iní-ndó cùndecu-ndo.

2

1 Te ní sani ndáá iní-í sá vã quíxí ndihí-ni-í quixi coto ñaha-í xii-ndo cuèndá

sá vã dandihú-í iní-ndó.

2 Te nchòhó cúú-ndó ñáyiú tàxi tnúhu ndee iní xii-í cudí iní-í ndécú-í, te xiáⁿ núú ñá túú cuìní-í dandihú-í iní-ndó, chi núú ducaⁿ na càda-í te vã cùndecu váha-gá iní-ndó nàcuáa taxi-ndo tnúhu ndee iní xii-í.

3 Te xiáⁿ núú ní tendaha-í tutú véxi ndaha-ndo cuèndá sá òré quixi coto ñaha-í xii-ndo, te dàvá-áⁿ quini-í sá quidé-ndó nàcuáa cudí iní-í te ñá díú dà dandihú-ndó iní-í òré quexìo-í, chi nchòhó tàú-ndó càda-ndo sá yùhú cudí iní-í. Te cùtnuní ndáá iní-í sá núú yùhú cudí iní-í te tnàhá nchòhó cudí iní-ndó cuèndá sá dúcáⁿ cudí iní-í.

4 Te ndàhyú-í sá ndihú iní-í òré ní cadúha-í tutú ní dáquixí-í ndaha-ndo, chi ío cuehé sá sání iní-í, te ñá túú ní dàquixí-í tutú-áⁿ ndaha-ndo cuèndá sá dandihú iní ñáhà-í xii-ndo, chi ní dáquixí-í cuèndá sá nchòhó cutnùní iní-ndó sá ío cùu iní ñáhà-í xii-ndo.

Nàcuáa tàú ñáyiú ñúú Còrintú cadá-yu cuèndá #ⁿ ñáyiú ñá túú quide ndáá

5 Te na càchí tnúhu-í xii-ndo cuèndá #ⁿ téé ní quide #ⁿ sá ñà túú tàú-dé cada-dé ndécú ndihí-ndo, te ní quide ndàhú-xi luha iní-í cuèndá sá ñí quide-dé-áⁿ dico nchòhó tnàhá-ndó ñí dandihú-dé luha iní-ndó, te duha càchí-í sá lúhá-ní ñí dandihú-dé iní-ndó cuèndá sá vã cuidó-gá-í ná tnúhu càháⁿ-í.

6 Te nàcuáa ní ndatnúhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dé.

7 Te vitna tàú-ndó càda cahnu iní-ndó sá ñí quide-dé, te cuáñaha-ndo tnúhu ndee iní xii-dé chi núú ñáhá te vã ñihí ndéé-gã-dé cada-dé sá váha cuèndá sá ndihú iní-dé.

8 Te xiáⁿ núú càháⁿ ndàhú-í núú-ndó sá cadá tucu-ndo sá cúú iní-ndó-dé.

9 Te ñiú-ni cuèndá iha càháⁿ-í #ⁿ núú tùtú sá sá ní dáquixí-í ndaha-ndo, te ducaⁿ ñí quide-í xító ndéè ñáhà-í xii-ndo núú ndisa cuìní-ndó càda-ndo nchaa nacúaa càháⁿ-í.

10 Te ndéda-ni càa ñáyiú na càda cahnu iní-ndó #ⁿ sá quidé-yu, te tnàhá yùhú cada cahnu iní-í sá quidé-yu tucu. Te núú ío #ⁿ sá xíní ñúhu-xi cada cahnu iní-í te quide cahnu iní-í, te mee Xítóhó Jesucristú

náhá-gă sá dúcáⁿ quide-í, te ducaⁿ quide-í cuendá sá nchòhó cuu-xi sá vâha xii-ndo.

¹¹ Te ducaⁿ te sácúhná vâ nihí-xi ná cada ñaha-xi xii-o, chi nchoo sá xiní-ó nâcuáa quide-xi.

Té Păblú ndihú iní-dé ndécú-dě ñuú Tròás

¹² Te ní xica-í cuáháⁿ-í ñuú Tròás cuendá yacáⁿ cáháⁿ-í tnúhu sá cáháⁿ nâcuáa naníhí tãhú-ó tnúhu Xítóhó Jesucristú, te òré ní quexio-í te ní níhí-í ìⁿ ichi cãhnu cáháⁿ-í tnúhu-gá.

¹³ Dico ñá túú ní cùu váha iní-í chi ñá túú ní naníhí-í té Títú té ndècu ndihí-o ichi Xítóhó Jesucristú, núu xiáⁿ ní quide ndee iní tnáhà-í ndihí cue ñáyiú ñuú-áⁿ, te ní xica-í cuáháⁿ-í distritú Macèdoniá.

Dàquetíhú-ó yùcu ñávâha chi ndècu ndihí-o Xítóhó Jesucristú

¹⁴ Te táxãhu xii Yá Ndiòxí chi ducaⁿ-ní sãnu ichi ñaha-gá xii-ndí nâcuáa cunuu-ndí núu yucu ñávâha chi ndècu ndihí-ndí Xítóhó Jesucristú, te mee Yá Ndiòxí sãchìuⁿ ñaha-gá xii-ndí cáháⁿ-ndí tnúhu-gá. Te cada iní-ó sã tnúhu-gá-áⁿ cúu-xí dàtná ìⁿ yúcu sã ìo váha sãháⁿ te ta xítènuu dicó-xi ndèni ní cuu cuáháⁿ. Te ducaⁿ sãtnahá-xi cùu tnúhu-gá chi nchúhú quidé-ndí nâcuáa ta xítènuu ndèni ní cuu cuáháⁿ.

¹⁵ Te cùu-ndí dàtná dicó ìⁿ yúcu sã ìo váha sãháⁿ, te nãcani cuendá Xítóhó Jesucristú núu Yá Ndiòxí, te dicó yúcu-áⁿ nchítá cuèi núu xíndecu cue ñáyiú sa ní naníhí tãhú, te cuèi núu xíndecu cue ñáyiú ta xíta nihnu cuáháⁿ.

¹⁶ Te sá cúu-xí cuè ñáyiú ta xíta nihnu cuáháⁿ-áⁿ, dicó yúcu-áⁿ cúu-xí dàtná ìⁿ sá sãhní ñaha xií-yu, dico sá cúu-xí cuè ñáyiú sa ní naníhí tãhú, dicó yúcu-áⁿ cúu-xí dàtná ìⁿ sá ndécá iní-yu, ducaⁿ sãtnahá-xi cùu nchúhú. Te vitna chí cuãha cuendá ñuú ná cúu ñáyiú sãni iní-ndó ndàcu cada nâcuáa ndùu tnúhu cáháⁿ-í-a.

¹⁷ Chi nchúhú cáháⁿ-ndí tnúhu Yá Ndiòxí dico ñá túú ndãhú quidé-ndí ndihí tnúhu-gá dàtná xíquide dava-gá-güedé, chi quide ndáá-ndí cáháⁿ-ndí tnúhu-gá, te mee-gã ní cachí-gá sá dúcáⁿ càda-ndí te ndèhe-gá sá nchúhú quidé-ndí nâcuáa ní cachí-gá, chi ndècu ndihí-ndí Xítóhó Jesucristú.

3

Cuendá ingá núú sã vâha ní cachí Yá Ndiòxí cada-gá ñáyiú

¹ Te cuèi duha cáháⁿ-ndí núu-ndó dico ñá túú xini ñuhu-xi sá cũñaha-ndí xii-ndo sã cúu-ndí cue té quide váha, te ni ñá túú xini ñuhu-xi caçanehe-ndí ìⁿ tutú núu cáháⁿ-xi sá cúu-ndí cue té váha danèhé ñáhá xii-ndo datná xíquide dava-gá-güedé, te ni ñá túú xini ñuhu-xi sá nchòhó taxi-ndo ìⁿ tutú núu cáháⁿ-ndó sã nchúhú cúu-ndí cue té quide váha.

² Te ñá túú xini ñuhu-xi ducaⁿ cada-ndí. Te cùtnuní ndáá iní-ndí sá nchòhó cúu-ndó dàtná ìⁿ tutú sã ìo váha cáháⁿ cuendá-ndí. Te ducaⁿ sãtnahá-xi cùu-ndo chi nchaa ñáyiú nihí-yu tnúhu nâcuáa quide-ndo ndecu-ndo, te xiáⁿ cùtnuní iní-yu sá nchúhú cúu-ndí cue té quide váha.

³ Te nchòhó cúu-ndó cuendá Xítóhó Jesucristú, te cùu-ndo datná tutú-gá te tutú-áⁿ ní táuchíúⁿ-gã xii-ndí ní cadúha-ndí, te mee-ni ndihí Espiritú Yá Ndiòxí ní ngúndéé tnúhu-áⁿ te ñá díú ndihí tindá ní ngúndéé. Te ñá díú ìⁿ núu yúú ní ngúndéé chi iní-ndó cùu-xi núu dúcáⁿ ní ngúndéé tnúhu-áⁿ te ducaⁿ sãtnahá-xi cùu-ndo.

⁴ Te duha cáháⁿ-ndí chi cùtnuní ndáá iní-ndí sá Yá Ndiòxí quidé vâha ñaha-gã xii-ndí, chi ndècu ndihí-ndí Xítóhó Jesucristú.

⁵ Te nchúhú chi ndàcu-ndí quidé-ndí sã vâha dico ñá díú mèe-ndí ducaⁿ ndàcu-ndí quidé-ndí, chi mee Yá Ndiòxí chindèe ñaha-gá xii-ndí ñuú ndàcu-ndí quidé-ndí sã vâha.

⁶ Te mee Yá Ndiòxí ní quide-gá sá nchúhú ndacu-ndí cunu cuechi-ndí núu-gã cáháⁿ-ndí núu ñáyiú cuendá ingá núú sã vâha ní cachí-gá cada ñaha-gã xií-yu. Te sã vâha ní cachí-gá cada ñaha-gã xií-yu-áⁿ ñá túú ìⁿ-ni cuu-xi ndihí nchaa tnúhu sá ñí xáhaⁿ-gã xii ndí Moisés ní chídó tnùní ndí, te ducaⁿ chi espíritú Yá Ndiòxí néhé chiuⁿ-xi nchaa tnúhu sá cáháⁿ cuendá nchaa sã vâha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiú ndècu ndihí tnúhu-áⁿ sã cuíta nihnú-yu cuendá nchaa cuéchi-yu, dico cue ñáyiú ndècu ndihí

Espiritú Yă Ndiöxí ñáyiu-áⁿ ndécú ndihí-yu tnúhu ndee iní sá cǎcu nihnú-yu.

7 Te tnúhu sá ñí cáháⁿ Yă Ndiöxí ndée díhna nàcuáa cada ñáyiu ní ngúndéé-xi ìⁿ núú yúú quèhéⁿ. Te òré ní dátúu ndíi Moisés nàcuáa cáháⁿ tnúhu sá ñí cáháⁿ Yă Ndiöxí ndée núú yúú-ǎⁿ núú cuè ñáyiu is-ràél, te súúni ñí tásaⁿ núú ndíi te ñá túú-gǎ ní cùu cundehé-yu núú ndíi, te ducaⁿ-gǎ ducaⁿ-gǎ quidé-xí dátásaⁿ-xi núú ndíi ní cùu ñá túú-gǎ ducaⁿ ní quide-xi. Te tnúhu ndèé núú yúú-ǎⁿ dándìxi túu-xi iní cue ñáyiu sá cuíta nihnú-yu sá cuèndá nchaa cuéchi-yu, te ío váha ní quide-xi cútnàhá ní ngúndecu ndíhi cue ñáyiu isràél tnúhu-áⁿ.

8 Te sá dúcáⁿ ñí quide-xi xiáⁿ cútnùní sá tnúhu cáháⁿ Espiritú Yă Ndiöxí vitna uuⁿ-gǎ ducaⁿ ìo-gǎ váha quide-xi.

9 Te núu ducaⁿ ìo váha ní quide-xi cútnàhá ní ngúndecu ndíhi cue ñáyiu isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gǎ ducaⁿ váha quide-xi vitna ní ngúndecu ndíhi-o tnúhu sá cáháⁿ nàcuáa quide Yă Ndiöxí cuèndá sá vǎ cùndecu-gǎ cuéchi ñáyiu núú-gǎ.

10 Te vá càchí-ó sǎ cùtnàhá ní ngúndecu ndíhi cue ñáyiu isràél tnúhu ndée núú yúú-ǎⁿ ìo-gǎ váha ní quide-xi, te ñáhá chi uuⁿ-gǎ váha quide-xi vitna cuèndá tnúhu sá cáháⁿ nàcuáa quide Yă Ndiöxí.

11 Te núu ducaⁿ ìo váha ní quide-xi cútnàhá ní ngúndecu ndíhi ñáyiu isràél tnúhu sá ñà túú ní cùdíi, te uuⁿ-gǎ ducaⁿ ìo váha quide-xi vitna ní ngúndecu ndíhi-o tnúhu sá vǎ ndíhi nihnu tnahí-gǎ.

12 Te cùtnùní iní-ndí sá vǎ ndíhi nihnu sá dúcáⁿ ìo váha quide-xi, núu xiáⁿ ìo vii ìo váha cùu iní-ndí cáháⁿ-ndí tnúhu sá ñí ngúndecu ndíhi-o.

13 Te ñá túú quide-ndí dàtná ní xóo cada ndíi Moisés, chí ndíi-áⁿ ñí xóo dàdáhu ndíi núú ndíi òré dátásaⁿ-xi núú ndíi cuèndá sá vǎ quini cue ñáyiu isràél òré ñá túú-gǎ dátásaⁿ-xi núú ndíi.

14 Te cue ñáyiu isràél ñá túú ní tècú tnùnì váha-yu nàcuáa ní xóo danèhé ñáhá ndíi Moisés xií-yu, te cuèi ndée vitna ñá túú tècú tnùnì-yu òré dǎcuàhá-yu tnúhu sá ñí cáháⁿ Yă Ndiöxí ndée díhna nàcuáa cada-gǎ, te

cada iní-ó sǎ dàtná sá ñí xídáhu núú ndíi Moisés yídáhu núú-yu cuèndá sá vǎ cútnùní núú-yu cundehé-yu te tecú tnùnì-yu, dico núu tnahá tnúhu-yu ndíhi Xítóhó Jesucristú te tecú tnùnì-yu.

15 Te cuèi ndée vitna òré dǎcuàhá-yu nchaa tnúhu sá ñí chídó tnùnì ndíi Moisés nchaa núú tùtú ndíi, te cada iní-ó sǎ dàtná sá ñí xídáhu núú ndíi yídáhu núú-yu chi ñá túú tècú tnùnì-yu.

16 Dico cue ñáyiu na tùha ñaha xii Xítóhó Jesucristú te tècú tnùnì-yu tnúhu-gǎ.

17 Te Xítóhó Jesucristú ìⁿ-ni cùu-gǎ ndíhi Espiritú Yă Ndiöxí, te nchaa ñáyiu ndècu ndíhi Espiritú-gǎ ñá túú-gǎ táxi tnùnì ñáhá ní ìⁿ sá ñà túú váha xií-yu.

18 Te dàtná cúú ìⁿ yutatá sǎ dánèhé núú ñáhá-xí xii ñáyiu ìⁿ sá váha, ducaⁿ sǎtnahá-xi cùu-o chi quide-o nacuáa cáháⁿ ñáyiu sá ìo càhnu cuu Xítóhó Jesucristú, te ducaⁿ ùuⁿ-gǎ uuⁿ-gǎ tá cùndáá-ó ndècu-o ichi-gǎ dàtná quidé mèe-gǎ quidé ndǎá-gǎ. Te Espiritú-gǎ quidé-xí dùcaⁿ ta cùndáá-ó núú-gǎ cuáháⁿ.

4

1 Te mee Yă Ndiöxí ní cundàhú iní ñáhá-gǎ xii-ndí ní taxi-gǎ chùuⁿ quide-ndí cáháⁿ-ndí tnúhu-gǎ, núu xiáⁿ ñá túú tnahí nàtúhú iní-ndí cáháⁿ-ndí tnúhu-gǎ.

2 Te nchúhú dàquee tíhú-ndí nchaandi túhú sá ñà túú váha quide dayuhu ñáyiu, chí nchaa xiáⁿ cúú-xi ìⁿ sácáⁿ-núú sǎ cúú-xi-yu, te nchúhú ñá túú sàni iní-ndí dandàhú-ndí ñáyiu te ní ñá túú sàni iní-ndí dama-ndí nàcuáa cáháⁿ tnúhu Yă Ndiöxí, chí cáháⁿ ndáá-ndí nàcuáa tàú-xi cáháⁿ-ndí, te mee Yă Ndiöxí náhá-gǎ nàcuáa ndùu tnúhu cáháⁿ-ndí núú ñáyiu, te ñáyiu-áⁿ cútnùní iní-yu sá nchúhú cáháⁿ váha-ndí.

3 Te cue ñáyiu ñá túú tècú tnùnì nàcuáa ndùu tnúhu sá cáháⁿ nàcuáa naníhí tàhú-ó cáháⁿ-ndí núú-yu, ñáyiu-áⁿ cúú-yu ñáyiu ta xíta nihnu cuáháⁿ.

4 Te cue ñáyiu-áⁿ cúú-yu ñáyiu ío sàà iní-xi chí ñá túú cuini-yu quíndáá iní-yu tnúhu Xítóhó Jesucristú, te xiáⁿ núu sácúhna cùnu-xi núú-yu te nihí-xi nàcuáa quide-xi dadáhu ndodo iní ñáhá-xí xií-yu cuèndá

sá vǎ təcú tnùnı-yu tnúhu sá cǎháⁿ nǎcuáa nanıhı tǎhú-yu, te tnúhu-ánⁿ cúú-xı tnúhu sá ıo váha chi cǎháⁿ-xi sá ıo cǎhnu cuu Xıtohó Jesucristú, te cùu-gǎ dàtná mée Tǎtá-gǎ Dútú Ndiöxı.

⁵ Te nchúhú ñǎ túú cǎháⁿ-ndı cuendá sá cúú-xı mée-ndı núú-ndó chi cǎháⁿ-ndı cuendá Xıtohó Jesucristú, te cǎchı-ndı xii-ndo sǎ díú-gǎ cúú-gǎ Yaá ıo cùnıuu, te cǎchı-ndı xii-ndo sǎ mée-ndı cúú-ndı dıcó-nı cue tée xınu cuechi sá cúú-xı-ndó, te ducaⁿ quide-ndı nǎcuáa cuu vii cuu váha inı Xıtohó Jesucristú.

⁶ Te Yá Ndiöxı Yaá ní dáyèhé ndée cúnàhá nee ñuyıú ní cùu, Yaá-ánⁿ nı cachı-gǎ sá Xıtohó Jesucristú cada-gǎ nǎcuáa tecú tnùnı-ó sǎ ıo cǎhnu cuu mee Yá Ndiöxı. Te sá dúcáⁿ nı quide-gǎ te cada inı-ó sǎ dàtná tnúhu sá nı dáyèhé-gǎ inı-ó.

İo quindáá inı-ó Yǎ Ndiöxı

⁷ Te nchúhú ndécú ndıhı-ndı tnúhu Xıtohó Jesucristú, te tnúhu-gǎ cúú-xı dàtná ııⁿ sá ıo váha ñuhu ııⁿ xıtı quıdı ñuhu, te nchúhú cúú-ndı dàtná quıdı-ánⁿ. Te ducaⁿ sǎtnahá-xı cùu-ndı chi tnúhu-gǎ ıo cǎhnu cuu-xı te mee-ndı ñáhá, te ducaⁿ cùu nǎcuáa cutnùnı sá mée Yǎ Ndiöxı quıde-gǎ nchaa sá váha te ñǎ díú mée-ndı.

⁸ Te cuėi ıo ndòho-ndı ndécú-ndı dico nıhı-ndı nǎcuáa quide-ndı tá yǎha-ndı nchaa tnúndòho-ánⁿ cuǎháⁿ, cuėi áma sa ndetu vii-ñǎ quehdé inı-ndı sá vǎ ndácú-ndı yǎha-ndı nchaa tnúndòho-ánⁿ, dico ndàcu-ndı yǎha-ndı.

⁹ Te cuėi nànducu ñaha ñayıu cùnı-yu ná cada ñáhá-yu xii-ndı dico ñǎ túú dàña ñaha Yá Ndiöxı xii-ndı, te cuėi cànıhá-yu xii-ndı dico cǎcu-ndı ñǎ túú sàhni ñáhá-yu.

¹⁰ Te ndėni ní cuu cuǎháⁿ-ndı xıcǎ cùu-ndı, te cǎcu cǎcu cahni ñáhá-yu xii-ndı dàtná ní quıde-yu Xıtohó Jesucristú, te ducaⁿ yǎha-ndı cuendá cutnùnı sá ndécú tıu Xıtohó Jesucristú andıu te chındee ñaha-gǎ xii-ndı.

¹¹ Te nchúhú nıni ndècu-ndı ñuyıú-a te nchaa-nı nduu cǎcu cǎcu cahni ñaha ñayıu xii-ndı sá cuendá Xıtohó Jesucristú, te ducaⁿ yǎha-ndı ndécú-ndı cuendá cutnùnı

sá Xıtohó Jesucristú ndécú ndıhı ñaha-gǎ xii-ndı cuėi vá cùdı yıqui cùñú-ndı cundecu-xı.

¹² Te sá dúcáⁿ cǎcu cǎcu cahni ñaha ñayıu xii-ndı xıǎⁿ nchòhó uuⁿ-gǎ tá nıhı ndée-ndó cuǎháⁿ ndécú-ndó ıchi Xıtohó Jesucristú.

¹³ Te ııⁿ tée ní xındecu ndée sanaha nı chıdó tnùnı-dé núú tütú Yǎ Ndiöxı núú cǎchı-xı: “Yúhú ní sándáá inı-ı Yǎ Ndiöxı nıu xıǎⁿ ní cǎháⁿ-ı”, duha ní cachı tée-ánⁿ. Te dàtná-nı ní sani inı tée-ánⁿ nı cǎháⁿ-dé te dıu-nı ducaⁿ sàni inı nchúhú tucu núu xıǎⁿ cǎchı-ndı: “Sándáá inı-ndı Yǎ Ndiöxı nıu xıǎⁿ cǎháⁿ-ndı”, duha cǎchı-ndı.

¹⁴ Te cùnıni inı-ndı sá nıu na cùu-ndı te Yá Ndiöxı dandòto ñaha-gǎ xii-ndı dàtná ní dándótó-gǎ Xıtohó Jesucristú, te tnàhá nchòhó ducaⁿ cǎda ñaha-gǎ xii-ndo, te dàvá-ánⁿ candeca ñaha-gǎ xii-o quıhıⁿ nucundecu-o núu-gǎ.

¹⁵ Te nchúhú nándı cùu sá tá yǎha-ndı véxi cuendá nchòhó ngúndecu váha-ndo, te ducaⁿ cuıta cǎyá-gǎ ñayıu ngúndecu váha sá xıı Yǎ Ndiöxı, te dıu-nı ducaⁿ cuıta cuu vai-gǎ ñayıu ndacáⁿ tǎhı-yu núu-gǎ te cachı-yu sá ıo cǎhnu cuu-gǎ.

¹⁶ Te xıǎⁿ nıu nchúhú ñǎ túú tnàhı nàtúhú inı-ndı ndécú-ndı ıchi Xıtohó Jesucristú, te cuėi yıqui cùñú-ndı tá xàú-xı cuǎháⁿ dico inı-ndı chi uuⁿ-gǎ uuⁿ-gǎ tá nıhı ndée-xı cuǎháⁿ.

¹⁷ Te nchaa sá ndóhó-ndı ñuyıú-a ñǎ túú cǎchı-ndı sá cúú-xı ııⁿ tnúndòho cahnu vihi, chi tnaa-nı duha ndòho-ndı, te sá dúhá ndòho-ndı nándı ndòho-ndı ndécú-ndı ñuyıú-a te Yá Ndiöxı ıo váha cada ñaha-gǎ xii-ndı nduu na sàá-ndı núú ndécú-gǎ, te dıu-nı ducaⁿ cǎda ñaha-gǎ xii-ndı nı caa nı quıhıⁿ.

¹⁸ Te nchúhú ñǎ túú nchıcúnⁿ nihnu-ndı sá tıu ndèhe-ndı ıo ñuyıú-a, chi nchıcúnⁿ nihnu-ndı sá vǎtá quıni-gǎ-ndı ndécú àndıu, te ducaⁿ quide-ndı chi nchaa sá tıu ndèhe-ndı ıo ñuyıú-a vá cùdı-xı cundecu-xı, te nchaa sá ñǎ túú tıu ndècu andıu xıǎⁿ cudı-xı cundecu-xı nı caa nı quıhıⁿ.

5

¹ Te yıqui cùñú-ó cùu-xı datná ııⁿ vehe, te vehe-ánⁿ ñǎ túú cùdı-xı, te ducaⁿ sǎtnahá-xı

cùu yiqui cuñú-ó chi vá cúdĩ-xi, te na sàa nduu vǎ cùndècu-gá-ó ndìhi yiqui cuñú-ó, te Yá Ndiõxí taxi-gá ìⁿ yiqui cuñú sáá sǎ cúú-xí-ó, te xǎⁿ cúú-xí dàtná ìⁿ vehe sá ñà túú ní cadúha cue ñáyiú ñuyíú-a, chi mee Yá Ndiõxí ní cadúha-gá vehe-áⁿ te vehe-áⁿ cudíi-xi cundecu-xi ní caa ní quíhíⁿ andíu. Te ducaⁿ sǎtnahá-xi cùu yiqui cuñú sá táxí Yá Ndiõxí xii-o chi cudíi-xi cundecu-xi ní caa ní quíhíⁿ.

2 Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuíní-ndí sá ìo ndìhi taxi Yá Ndiõxí yiqui cùñú sáá cundecu ndìhi-ndí.

3 Chi mee-gǎ vá dáñá-gǎ sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáá-áⁿ xii-ndí.

4 Te ñini ndècu-ndí ndìhi yiqui cùñú-ndí vitna ìo sàni iní-ndí te ndìhú iní-ndí, dico ñá díú sǎ dúhá quide-ndí te ñá túú-gǎ tnàhá iní-ndí cundecu-ndí ndìhi yiqui cùñú-ndí, chi cuíní-ndí sá Yá Ndiõxí ìo ndìhi taxi-gá yiqui cùñú sáá ndùu táhú-ndí, chi xǎⁿ cudíi-xi ní caa ní quíhíⁿ te yiqui cùñú-ndí sá tá ndìhi nihnu cuáháⁿ-a vá cúdĩ-xi cundecu-xi.

5 Te ducaⁿ tnàhí ní cachí Yá Ndiõxí cunduu sá dúcáⁿ ndùu táhú-ó yiqui cuñú sáá-áⁿ, te ní taxi-gá Espíritú-gá ní ngúndecu ndìhi-o cuendá cutnùní iní-ó sǎ ndàá taxi-gá yiqui cùñú sáá-áⁿ nduu táhú-ó.

6 Te xǎⁿ ñuu nchúhú ñihí ndéé-ndí ndécú-ndí, te cùtnuní iní-ndí sá ñini ndecu-ndí ndìhi yiqui cùñú-ndí sá ndécú ndìhi-ndí vitna te vátá sàá-gá-ndí cundecu-ndí mei ñúú ndécú Xítohó Jesucristú.

7 Te ducaⁿ cùtnuní iní-ndí chi sàndáá iní-ndí Yá Ndiõxí ndécú-ndí ñuyíú-a cuèi ñá túú xìní-ndí-gá.

8 Te ìo váha cùu iní-ndí ndécú-ndí, te sàni iní-ndí sá vǎha-gá sá ñuu vá cùndècu-gá-ndí ndìhi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei ñúú ndécú Xítohó Jesucristú.

9 Te ìo ndùcu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te díu-ni ducaⁿ càda-ndí

cuèi òré vá cùndècu-gá-ndí.

10 Te dacuítí sǎ ncháá-ó cùndecu-o núú Xítohó Jesucristú ìⁿ nduu, te dàvá-áⁿ mee-gǎ cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gǎ nduu táhú-ó.

Nàcuáa ní cuu ní ngúndecu váha-o ndìhi Yá Ndiõxí

11 Te nchúhú quíyùhú iní-ndí nàcuáa cada Xítohó Jesucristú, núu xǎⁿ cáháⁿ-ndí tnùhu-gá núú ñáyiú cuendá xínu iní-yu tuha ñàhá-yu xii-gá. Te mee Yá Ndiõxí sa nàha-gá nàcuáa quide-ndí ndécú-ndí, te sàni iní-ndí sǎ nchòhó cutnùní iní-ndó nàcuáa quide-ndí ndécú-ndí.

12 Te sá dúhá cáháⁿ-ndí te vá cání ìní-ndó sǎ nchúhú cáháⁿ váha-ndí cuendá-ndí nàcuáa nchòhó cuu váha iní ñàhá-gá-ndó xii-ndí te ñàhá, chi duha cáháⁿ-ndí cuendá sǎ nchòhó ñihí-ndó tnùhu cáháⁿ váha-gá-ndó cuendá-ndí núú ñáyiú. Te ducaⁿ ñihí-ndó tnùhu cúñaha-ndo xii cue ñáyiú quide nínu mee-xi, chi cue ñáyiú-áⁿ ñà túú quide cuendá-yu nása ndècu iní-yu.

13 Te núu nchòhó sání iní-ndó sǎ lúcú-ndí cuendá nàcuáa quide-ndí ndécú-ndí te cùu-xi cuendá Yá Ndiõxí, àdi núu sàni iní-ndó sǎ ñà túú lúcú-ndí cuendá nàcuáa quide-ndí ndécú-ndí te cùu-xi sá vǎha sá cúú-xí-ndó.

14 Te quide-ndí nàcuáa cuíní Xítohó Jesucristú chi cùtnuní iní-ndí sá ìo cùu iní-gá nchaa ñáyiú, te ducaⁿ xìní ndáá-ndí sá ñí xihí-gá cuendá ncháá-yu, te xǎⁿ ñuu cada iní-ó sǎ dàtná tnùhu sá ncháá ñáyiú ní xihí-yu ndìhi-gá.

15 Te ducaⁿ ñí xihí Xítohó Jesucristú cuendá nchaa ñáyiú chi cuíní-gá sá ncháá-yu cundécú-yu cadá-yu nàcuáa cuíní méé-gǎ te vá cadá-yu nàcuáa cuíní méé-yu, chi mee-gǎ ní xihí-gá te ní ndoto-gá cuendá cuu-xi sá vǎha sá cúú-xí-yu.

16 Te xǎⁿ ñuu nchúhú ñá túú-gǎ ná sání ìní-ndí cuendá tnàha ñáyiú-ndí ñuu nàndíhi-yu àdi ñá túú nàndíhi-yu dàtná ní xóo cani iní-ndí cùtnàhá ní xíndecu-ndí ichi

cuèhé ichi duha, te dàvá-áⁿ nǐ xóo cani iní-ndí cuendá Xítohó Jesucristú dàtná sání iní cue ñáyiú ndècu ichi cuehé ichi duha vitna.

17 Te nchaa nchoo ñáyiú ní tnahá tnúhu ndìhi Xítohó Jesucristú ní nduu-o dàtná ìⁿ ñáyiú saa, te ducaⁿ chi ñá túú-gã quidé-ó dàtná ní xóo cada-o cǔtnàhá ní xíndecu-o ichi cuehé ichi duha, chi ní ngüíta-o quide-o mee-ná sá vãha te nchaa xíãⁿ cúú-xí sã sáá sã cúú-xí-ó chi vátá quíní-gá-ó càda-o.

18 Te ducaⁿ quide-o ndecu-o chi mee Yã Ndiöxí quidé-gã sá dúcáⁿ càda-o cundecu-o. Te Xítohó Jesucristú ní quide-gã ní ngúndecu váha-o ndìhi Yã Ndiöxí vitna, te ducaⁿ chi mee Yã Ndiöxí ducaⁿ tnàhí ní cachí-gã cunduu, te diu-ni mee Yã Ndiöxí ní taxi-gã chiúⁿ quide-ndí càháⁿ-ndí tnúhu-gã nàcuáa ngúndecu váha cue ñáyiú ndìhi-gã.

19 Te ducaⁿ chi mee-gã ní cachí-gã sá Xítohó Jesucristú cada-gã nàcuáa nucúndecu váha nchaa nchoo cuè ñáyiú ndècu ñuyíú-a ndìhi Yã Ndiöxí. Te nchaa ñáyiú ní tuha ñaha xìi-gã ñá túú-gã sání iní-gã sá ñáyiú-áⁿ nacháhu-yu cuéchi-yu núú-gã. Te mee Yã Ndiöxí ní taxi-gã chiúⁿ quide-ndí càháⁿ-ndí tnúhu-gã núú ñáyiú nàcuáa ngúndecu ndìhi ñaha vãha-yu xii-gã.

20 Te Xítohó Jesucristú ní cachí-gã sá nchühú càháⁿ-ndí tnúhu-gã núú nchàa ñáyiú, te sá dúhá quide-ndí càháⁿ-ndí tnúhu-gã te quide-ndí núú Yã Ndiöxí càháⁿ-ndí yuhu-gã, te xíãⁿ nùu càháⁿ ndàhú-ndí núú-ndó sã tnàhá tnúhu-ndo ndìhi Yã Ndiöxí cuendá cundecu váha-ndo ndìhi-gã, te duha càháⁿ-ndí chi ducaⁿ càchí Xítohó Jesucristú cada-ndí.

21 Te Xítohó Jesucristú cúú-gã Yaá ñá túú tnàhí cuéchi-xi, dico Yã Ndiöxí ní quide ñaha-gã xii-gã dàtná ìⁿ ñáyiú ndècu cuéchi-xi, te ducaⁿ chi Xítohó Jesucristú ní xido-gã cuéchi nchaa nchoo ñáyiú ñuyíú-a, te ducaⁿ nǐ xido Xítohó Jesucristú nchaa cuéchi-o cuendá sá nùu na tnàhá tnúhu-o ndìhi-gã te cudíu-o núú Yã Ndiöxí, te ducaⁿ nǐ cuu chi mee Yã Ndiöxí ducaⁿ nǐ cachí-gã cunduu.

6

1 Te nchoo ìⁿ-ni cùu-o quide chiúⁿ-o

cuendá Yã Ndiöxí nùu xíãⁿ càháⁿ ndàhú-ndí núú-ndó sã vã dicó-ni ducaⁿ cùndedóho-ndo tnúhu Yã Ndiöxí, chi cada-ndo nàcuáa na chindee ñaha-ni-gã.

2 Chi mee-gã càchí-gã ìⁿ xichi núú tùtú-gã núú càchí-xi:

Sáá nduu te cundàhú iní ñàhá-í xii-ndo chindee ñaha-í cuendá naníhí tãhú-ndó,

te ní sáá nduu tàú-xi sá cùndàhú iní ñàhá-í xii-ndo chindee ñaha-í cuendá naníhí tãhú-ndó, núu xíãⁿ ní xíndedóho-í tnúhu ní càháⁿ-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gã núú tùtú-gã. Te vitna cùu-xi nduu cundahú iní ñàhá Yã Ndiöxí chíndee ñaha-gã, te cùu-xi nduu naníhí tãhú-ó.

3 Te nchühú ñá túú quide-ndí ìⁿ sá ñá túú tàú-ndí cada-ndí sá cúú-xí ñáyiú, chi cùiní-ndí sá vã càháⁿ cuèhé-yu cuendá chiúⁿ quide-ndí.

4 Te nchaa sá quidé-ndí cúú-xí nàcuáa cutnùní iní cue ñáyiú sá nchühú xínú cuéchi-ndí núú Yã Ndiöxí, te ío quide cahnu iní-ndí cuendá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gã nchaa sá tá yãha-ndí véxi.

5 Te duha ta yãha-ndí véxi, núú cánìha ñáyiú xii-ndí, núú chíhí ñàhá-yu vecaá, núú cuáá ndeé ñàhá ñáyiú xii-ndí xícuèhé ñàhá-yu, te ío ndòho-ndí quidé-ndí chiúⁿ Yã Ndiöxí, te áma xidí-ndí te áma ñá túú xidí-ndí, te áma nihí-ndí sá xéxi-ndí te áma ñá túú nihí-ndí.

6 Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yã Ndiöxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá vãha nàcuáa chindee ñaha Espíritú Yã Ndiöxí xii-ndí, te ío ndisa iní-ndí cúú iní-ndí cue tnàha ñáyiú-ndí.

7 Te dànehé-ndí ñáyiú mee-ni tnúhu ndáá, te nchaa chiúⁿ quide-ndí te quide-ndí nàcuáa chindee ñaha Yã Ndiöxí xii-ndí, te cuendá sá quidé ndáá-ndí ndécú-ndí nùu

xíãⁿ nihí ndéé-ndí dáquèe tíhú-ndí nchaa sá cuèhé sá dúhá.

⁸ Te dava ñáyiú quíde nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xǎhǎⁿ-yu xii-ndí, te davá-yu xǐcáháⁿ váha-yu cuèndá-ndí te davá-yu xǐcáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càháⁿ ndáá-ndí.

⁹ Te davá-yu càchí-yu sá ñá túú xini-yu ná ñáyiú cùu-ndí, te davá-yu càchí-yu sá xini-yu yoo cùu-ndí, te davá-yu cuini-yu cahni ñàhá-yu xii-ndí dico vátá cáhni ñàhá-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí dico ñá túú cùu-xi sá cùu-ndí.

¹⁰ Te cuèi ndíhú iní-ndí dico ñá túú dàña ndéé-ndí sá cúdí iní-ndí, te cùu-ndí cue téé ndàhú dico sànu ichi-ndí vài ñáyiú ichi Yá Ndiòxí cuèndá ngúndecu váha-yu sá cuèndá-gá, te cuèi ñá túú ñá ndécú ndíhi-ndí dico ñá túú ñá cúmǎní xii-ndí.

¹¹ Te nchòhó ñáyiú ndècu ndíhi-í ichi Xítohó Jesucristú ndécú ñúú Còrintú ío cùu iní ñàhá-ndí xii-ndo, te ni yùhu ni iní-ndí càháⁿ-ndí nchaa tnúhu càháⁿ-ndí sá cúú-xí-ndó.

¹² Te nchúhú chi ni yùhu ni iní-ndí cúú iní ñàhá-ndí xii-ndo, dico nchòhó chi ñá túú dùcaⁿ quíde-ndo sá cúú-xí-ndí.

¹³ Te yúhú càháⁿ ndàhú-í núú-ndó dàtná quíde ñá téé cùu tátá òré càháⁿ ndíhi-dé cue déhe-dé sá ñá yuhu ni iní-ndó cùu iní ñàhá-ndó xii-ndí dàtná quíde mèe-ndí cúú iní ñàhá-ndí xii-ndo.

Nchoo cùu-o datná ñá vehe Yá Ndiòxí

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cúú ñánuu-ndo ndíhi-yu cada-ndo dàtná xǐquidé-yu, chi dǐⁿ cuu nchaa sá váha te dǐⁿ cuu nchaa sá cuèhé sá dúhá, te ñúmí nchǐcanchii ndíhi níú chi ñá túú ñá-ni cuu-xi. Te ducaⁿ sǎtnahá-xi cùu nchaa sá váha ndíhi nchaa sá cuèhé sá dúhá chi ñá túú ñá-ni cuu-xi.

¹⁵ Te ñá-ni ducaⁿ ñá túú ñá-ni cuu Xítohó Jesucristú ndíhi sácúhna, te ñá-ni ducaⁿ ñá túú ñá-ni cuu ñáyiú sàndáá iní ñàhá xii

Xítohó Jesucristú ndíhi ñáyiú ñá túú sàndáá iní ñàhá xii-gá.

¹⁶ Te ñá-ni ducaⁿ sǎtnahá tucu-xi cùu vehe Yá Ndiòxí ndíhi nchaa sá càchí ñáyiú cùu ndiòxí ní cadúha cue téé ñuyíú-a, chi vá cúú quíhi ni ñá xíãⁿ xití vehe-gá. Te nchoo cùu-o datná vehe Yá Ndiòxí Yáá ndécú tùu andíu, chi mee-gǎ càchí-gá núú tütú-gá núú càchí-xi:

Yúhú vá cúmǎní cundecu-í ndíhi-yu ndèni ní cuu na cùndecú-yu,

te ñá-ni yúhú cuu-í Ndiòxí-yu,

te mèe-yu cuú-yu ñáyiú cùu cuèndá-í.

Duha càchí-gá núú tütú-gá.

¹⁷ Te xíãⁿ núu càchí tucu-gá ñá xichi núú tütú-gá núú càchí-xi:

Chí tá quèe tnuú nchaa ñáyiú ñá túú sàndáá iní ñàhá xii-í,

te vá cáni iní-ndó càda-ndo ni ñá sá cuèhé sá dúhá,

te ducaⁿ te queheⁿ cuèndá ñàhá-í xii-ndo,

¹⁸ te yúhú cuu-í Tátá-ndó,

te nchòhó cuu-ndo cuè déhe ducuⁿ-í, ndíhi cue déhe yoco-í,

duha càháⁿ yúhú Yáá ío càhnu cuu.

Duha càchí-gá núú tütú-gá.

7

¹ Te sá dúcáⁿ ío váha càháⁿ Yá Ndiòxí sá cúú-xi-ó núu xíãⁿ càháⁿ-í dóho nchòhó ñáyiú ío cùu iní-í sá dùuⁿ duuⁿ dàña-o nchaa sá cuèhé sá dúhá, chi nchaa xíãⁿ ñá túú cùu-xi sá váha sá cúú-xi iní-ó ndíhi yiqui cuñú-ó, te cada-o ñácuáa tàú-xi cunduu ñácuáa cundáá-ó núú Yá Ndiòxí, te cada-o sá néhé-ó sá yíñuhu núú-gǎ.

Cue ñáyiú ñá Còrintú quíde váha-yu

² Te ni yùhu ni iní-ndó chì cúú iní ñàhá xii-ndí, chi nchúhú vá yóo ñá quíde úhú iní-ndí, te ni vá yóo ñá dàcuíta nihnu-ndí, te ni vá yóo ñá dándahú-ndí.

³ Te sá dúhá càháⁿ-í te vá cáni iní-ndó sá ñá cuéchi dàcaa-í díquí-ndó, chi dàtná sa ní cachí-í xii-ndo sá yúhú ío cùu iní ñàhá-í xii-ndo, te cuèi vitna ndècu-gá-ó ñuyíú-a àdi cuéi na cùu-ó dico ñá-ni ducaⁿ cùu iní ñàhá-í xii-ndo.

⁴ Te yúhú ío váha sàni iní-í cuèndá-ndó, te ducaⁿ ío váha càháⁿ-í cuèndá-ndó, te ío ndècu ndíhi-í tnúhu ndee iní cuèndá-ndó,

te ío cùdíí ìní-í sá cuendá-ndó cuèi nándi ndòho-í ndìhi dava-gá-güedé ndécú-ndí.

⁵ Te nchúhú cùtnàhá ní sáháⁿ-ndí distritú Macèdoniá, te ñá túú tñahí ní ndètátú-ndí cuendá nchaa sá ní yáhandi chi ío ní ndòho-ndí cuendá nchaa sá ní quidé-yu, chi ío ní cuándeé ñáhã-yu xii-ndí, te ío ní sani iní-ndí nõu nása-gá yáha-ndí ní cùu.

⁶ Dico Yá Ndiõxí ní taxi-gá tñúhu ndee ìní xii-ndí òré ní quexìo té Títú núú ndécú-ndí, te òre-ni Yaá-áⁿ cúú-gã Yaá sãñaha-gã tñúhu ndee ìní xii cue ñáyiú ndìhú iní-xi.

⁷ Te ducaⁿ ní taxi Yá Ndiõxí tñúhu ndee ìní xii-ndí cuendá sá ní quexìo té Títú núú ndécú-ndí, te ñá díú-ní sã cuendá ní quexìo-dé chi ní níhí tucu-ndí tñúhu ndee ìní cuendá ní cani-dé cuendú núú-ndí sá nchòhó ní sãñaha-ndo tñúhu ndee ìní xii-dé, te ní cachí tñúhu-dé xii-ndí sá nchòhó ío cuení-ndó cãháⁿ ndìhi ñaha-ndo xii-ndí, te ní cachí tñúhu tucu-dé xii-ndí sá nchòhó ío ndìhú iní-ndó cuendá nacuáa cùu ndecu-ndo ní cuu, ndìhi cuendá sá ío sãni iní-ndó cuendá-í, te sá dúcáⁿ ndùu cuendú ní cani-dé núú-ndí nõu xíãⁿ ío ní cudíí ìní-í.

⁸ Te nchòhó ní ndìhú iní-ndó cuendá tñúhu cãháⁿ-í núú tutú sá ní dáquíxì-í ndaha-ndo, te òré ní níhí-í tñúhu sá ndìhú iní-ndó te tnaa-ni ní ndixi cuéchi iní-í sá dúcáⁿ ní quidé-í te dàtnùní ñá túú-gã ní ndixi cuéchi iní-í.

⁹ Te vitna ní ndìhú iní-ndó, te xíãⁿ ní quidé-xi ní ndixi cuéchi iní-ndó sã ñà túú quide váha-ndo ndècu-ndo ní cuu, te ní cudíí ìní-í dico ñá díú cuendá sá ní ndìhú iní-ndó ní cudíí ìní-í chi cuendá sá ní ndixi cuéchi iní-ndó, te ní ndìhú iní-ndó nacuáa ní cuu váha iní Yá Ndiõxí, te xíãⁿ nõu ní cuu-xi ñⁿ sá váha sá cúú-xí-ndó cuendá tñúhu ní cãháⁿ-í te ñá túú ní cùu-xi ñⁿ sá cuéhé sá cúú-xí-ndó.

¹⁰ Te nchoo nõu na ndìhú iní-ó nacuáa cuu váha iní Yá Ndiõxí, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nãníhí tãhú-ó, te vá ndìhú iní-ó sã dúcáⁿ ní quide-o, te dava ñáyiú xĩndecu ichi cuéhé ichi duha ndìhú iní-yu dico ñá túú ndixi cuéchi iní-yu cuendá nchaa sá ñà túú váha quidé-yu, te sá dúcáⁿ quidé-yu te cuíta nihnú-yu.

¹¹ Te sá dúcáⁿ ní ndìhú iní-ndó nacuáa ní cuu váha iní Yá Ndiõxí, te xíãⁿ nõu ndècu ndee-ndo quide-ndo nchaa nacuáa tàú-xi cunduu, te vitna ní yùhu ní iní-ndó cãháⁿ-ndó sã quidé váha-ndo, te ío cùdééⁿ-ndó nõú méé-ndó sã ñà túú quide váha-ndo ndècu-ndo ní cuu, te yùhú-ndó ndècu-ndo cuendá sá ñà túú quide váha-ndo ní cùu, te ío ní xúhuⁿ iní ñáhã-ndó xii-í, te ní ndúcú ndéé-ndó ní quide ndáá-ndó cuendá té ndècuéchi ndècu ndìhi-ndo, te sá dúcáⁿ ní quide-ndo te xíãⁿ ní cutnùní sá méé-ndó ñà túú cuéchi-ndo.

¹² Te ní cadúha-í tutú ní dáquíxì-í ndaha-ndo, te ní quide-ndo nacuáa ní cãháⁿ-í, te sá dúcáⁿ ní quide-ndo xíãⁿ ní cutnùní iní-ndó sã ío cùu iní ñáhã-ndó xii-í. Te Yá Ndiõxí nãhá-gã sá díú cuendá xíãⁿ ní dáquíxì-í tutú ndaha-ndo, te ñá díú-ní cuendá sá sãni iní-í cuendá té ndècuéchi ndècu ndìhi-ndo, te ní ñà díú-ní cuendá ñáyiú ní dãndìhú té ndècuéchi-áⁿ iní-xi ní cadúha-í tutú ní dáquíxì-í ndaha-ndo.

¹³ Te cuendá sá quidé váha-ndo ndècu-ndo xíãⁿ cúú-xí tñúhu ndee ìní ndécú ndìhi-ndí.

Dico ñá díú-ní xíãⁿ chi tñahá ío cùdíí ìní-ndí cuendá sá ío cùdíí ìní té Títú, te ducaⁿ cùdíí ìní-dé chi nchòhó ní sãñaha-ndo tñúhu ndee ìní xii-dé.

¹⁴ Te yúhú ñá túú cùcahaⁿ núu-í sá ní cãháⁿ váha-í cuendá-ndó nõú tẽ Títú cùtnàhá vátá quíxì-gã-dé núú ndécú-ndó, chi ní cutnùní iní-dé sá ndáá cãháⁿ váha-í nacuáa quide-ndo datná cúú-xí sã ndáá nchaa tñúhu dàcuaha ñaha-í xii-ndo.

¹⁵ Te vitna ío-gã váha cùu iní té Títú cuendá-ndó, chi ndàcu iní-dé sá ncháá-ndó ío váha ní tñⁿ-ndo nchaa tñúhu ní cãháⁿ-dé núú-ndó, te ndàcu tucu iní-dé sá ní queheⁿ cuendá váha-ndo-dẽ, te ní dátúu-ndo nõú-dẽ sá ío ní quíyùhú iní-ndó sã vã ndácú-ndó càda-ndo nchaa nacuáa tàú-xi cunduu.

¹⁶ Te ío cùdíí ìní-í cuendá-ndó chi cùtnuní ndáá iní-í sá ñà túú dàña ndéé-ndó quide-ndo nchaa nacuáa tàú-xi cunduu.

8

Ío váha cuu iní-ó chĩndee tñaha-o

1 Te nchòhó ñáiyu ndècu ndìhi-ndí ichi Xítohó Jesucristú cächí tnúhu-ndí xii-ndo nàcuáa quide ñaha Yá Ndiöxí xii cue ñáiyu xĩndecu ichi-gá ndécú dìstrítú Macèdoniá, chi ío chĩndee ñaha-gá xií-yu cuendá sá quidé vâha-yu ndécú-yu.

2 Te cuëi ndòho vihi-yu ndécú-yu dico ío-ni cùdíí iní-yu, te cuendá xiáⁿ nõu ni yùhu ni iní-yu ní sacáⁿ tnáhã-yu díhúⁿ sã cúú-xí tnàha ñáiyú-yu, te ñã túú tnàhí ni xĩnduu díi-yu cuëi ío ndàhú-yu.

3 Te ñã díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yíca iní-yu ní sacáⁿ tnáhã-gã-yu, te yúhú cächí tnúhu ndáá-í xii-ndo sã ñi yuhu ni iní-yu ducaⁿ ñi quidé-yu.

4 Te ío ní cáháⁿ ndàhú-yu núú-ndí cuendá sá cuãha-ndí tnúhu sá tnáhã-yu chindèé-yu dava-gá cue ñáiyu cùu cuendá Yá Ndiöxí.

5 Te ñã díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te ducaⁿ chi mée-yu ní sani iní-yu sá cádá-yu nchaa nàcuáa cuení Yá Ndiöxí, te dãtnúni ducaⁿ te ní cachí-yu sá cúú càdá-yu nchaa nàcuáa na cũñaha-ndí xií-yu. Te ducaⁿ ñi quidé-yu chi ducaⁿ ñi cuini mée Yá Ndiöxí cunduu.

6 Te sá dúcáⁿ ñi quide ñáiyu-áⁿ nõu xiáⁿ càháⁿ ndàhú-ndí núú tẽ Titú sá quíxí tùcu-dé núú ndécú-ndó cuendá dàxínu cava-dé chiúⁿ sá sã ní ngüíta-dé quidé-dẽ dátacá-dé díhúⁿ sã sã ní ngüíta-ndo sácáⁿ tnáhã-ndó, te ducaⁿ quide-ndo chi cùndahú iní-ndó tnàha ñáiyu-ndo.

7 Te nchòhó cúú-ndó ñáiyu ío ngòdónúú quide nchaa sá vâha, te ío váha sãndáá iní-ndó Xítohó Jesucristú, te ío váha cùtnuní iní-ndó nàcuáa càháⁿ tnúhu-gá, te ío váha dàcuaha-ndo ñáiyu tnúhu-gá, te ío ndùcu ndee-ndo quide-ndo mee-ni sá vâha, te ducaⁿ ío cùu iní ñáhã-ndó xii-ndí, te sá dúcáⁿ quide-ndo núú xiáⁿ càháⁿ ndàhú-í núú-ndó sã ngòdó núú-gã-ndó càda-ndo sá cúú-xí tnàha ñáiyu-ndo.

8 Dico yúhú ñã túú tàuchiuⁿ-í sá dúcáⁿ càda-ndo, chi cuendá-ni sá cächí tnúhu-í xii-ndo nàcuáa quide dava-gá cue ñáiyu ndècu ichi Xítohó Jesucristú, chi cue ñáiyu-áⁿ ni yùhu ni iní-yu quidé-yu sá vâha

sá cúú-xí tnàha ñáiyú-yu, te cächí tnúhu-í xii-ndo nàcuáa quidé-yu cuendá cutnùni nõu nása cada-ndo nõu ndisa sá cúú iní-ndó cuè tnàha ñáiyu-ndo.

9 Te nchòhó sa xini-ndó sã Xítohó Jesucristú ío cùndahú iní ñáhã-gã xii-o, te ío váha ndècu-gá ní cùu te ní quixi-gã ñuyíú-a ní quide váha ñaha-gã xii-o, te ñuyíú-a ñã túú ní xĩndecu váha-gá, te ducaⁿ ñi quixi-gã ñuyíú-a cuëi ñã túú ní xĩndecu váha-gã cuendá sá nchóó ngũndecu váha-o nõu ndécú-gã.

10 Te na cächí tnúhu-í xii-ndo nàcuáa sãni iní-í. Chiúⁿ sá ñi yuhu ni iní-ndó ñi ngüíta-ndo quide-ndo cuíá ñi yáha chi cùu-xi sá vâha sá cúú-xí-ndó nõu na dàxínu cava-ndo.

11 Te dàtnã-ni ni yùhu ni iní-ndó ñi tausaha-ndo chiúⁿ-áⁿ te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhã-ndó sã ndécú ndìhi-ndo nàcuáa xito mee-ndo ndacu-ndo.

12 Te núu nchòhó ñi yùhu ni iní-ndó càcáⁿ tnáhã-ndó sã xító mée-ndo ndacu-ndo ñã, te cùu váha iní Yá Ndiöxí, chi mee-gã sa ñaha-gá nása ndècu-o te ndùu vétú-ni iní-gá.

13 Te sá dúhá ndùu tnúhu càháⁿ-í te vá cáni iní-ndó sã yúhú cuini-í sá nchòhó ndoho-ndo cùndecu-ndo te dava-gã-yu ngũndecu váha-yu sá cuendá-ndó.

14 Te vitna ndècu ndee iní-ndó nàcuáa ndacu-ndo chĩndee-ndo cue ñáiyu xini ñuhu, te nduu ñã túú ndècu ndee iní-ndó te cue ñáiyu-áⁿ chĩndee ñáhã-yu xii-ndo te núu ndècu ndee iní-yu, te ducaⁿ te ni nchòhó ñã túú ñã cumání xii-ndo te ni cuè ñáiyu-ãⁿ ñã túú ñã cumání xií-yu.

15 Te ducaⁿ te quee ndáá-xi nàcuáa càháⁿ-xi núú tütú Yá Ndiöxí núú cächí-xi: “Cue ñáiyu ío vai sã ñi ñihí ñã túú ní cùu sobrá xií-yu, te cue ñáiyu sacú ní ñihí ñã túú ní cùmání xií-yu”, duha cächí-xi núú tütú-gá.

Té Titú ndìhi cue té cùndìhi-dé

16 Te ndácáⁿ táhù-í núú Yá Ndiöxí chi mee-gã ní quide sá tẽ Titú ío ñuhu iní ñáhã-dẽ xii-ndo dàtnã ñuhú iní ñáhã-í xii-ndo.

17 Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñã díú mée-ni sá dúcáⁿ ñi xáhaⁿ-í xii-dé quixi

coto ñaha-dě xii-ndo, chi mee-dě cúdǎ tñàhí iní-dé quixi coto ñaha-dě xii-ndo.

18 Te tendaha-ndǎ ñí tée ndècu ndihí-o ichi Xítoho Jesucristú quixi-dé ndihí té Títú, te tée quixi ndihí té Títú-án cúú-dě ñí tée ío váha càháⁿ cue ñáyiú xǐndecu ichi Xítoho Jesucristú cuendá-dé cuendá sá ño váha quide-dé chiúⁿ Xítoho Jesucristú càháⁿ-dé tñúhu-gá tñúhu sá càháⁿ nàcuáa naníhí tǎhú-ó.

19 Te cue ñáyiú xǐndecu ichi Xítoho Jesucristú ñá díú-ní sǎ càháⁿ váha-yu cuendá-dé, chi tñàhá ní cáxi ñàhá-yu xii-dé cuendá sá cáca cùu ndihí ñaha-dé xii-ndí chindee ñaha-dé tacá sá cúú-xí ñáyiú ndàhú, te quide-ndí chiúⁿ-a cuendá ío cuu càhnu Yá Ndióxi, te cue ñáyiú cutnùní iní-yu sá nchòhó ñi yùhu ñi iní-ndó quide-ndo nchaa sá vǎha sá cúú-xí cuè tñaha ñáyiú-ndo.

20 Te cuiní-ndí sá vǎ càháⁿ cuèhé ñáyiú cuendá nàcuáa quide-ndí ndihí sá ngǎutñaha sá cúú-xí cuè tñaha ñáyiú-o, te ío vai cuu-xi.

21 Chi ndùcu ndee-ndí quidé-ndǎ nàcuáa càháⁿ váha Xítoho Jesucristú cuendá-ndí, te quide tucu-ndí nàcuáa càháⁿ váha ñáyiú sá quidé vǎha-ndí.

22 Te tendaha tucu-ndí ñngá tucu tée ndècu ndihí-o ichi Xítoho Jesucristú quixi-dé ndihí cue tée úú quixi coto ñaha xii-ndo, te tée quixi ndihí-güedé-án ñi cuu vai xito quide-dé nàcuáa cutnùní iní-ndí sá ño ndùcu ndee-dé quidé-dě sá vǎha, te vitna ío-gá cuiní-dé cada-dé sá vǎha vitna quixi-dé núú ndécú-ndó, chi cùtnuní ndáá iní-dé sá cúú-ndó cuè ñáyiú quide váha.

23 Te càhí tñúhu-í xii-ndo sǎ tǎ Títú cúú-dě ñí tée cùndihí-í quidé-ndǎ chiúⁿ Xítoho Jesucristú, te tñàhá-dé cúú-dě ñí tée xínu cuechi núú-ndó càháⁿ-dé tñúhu-gá. Te càhí tñúhu tucu-í xii-ndo cuendá cue tée úú quixi ndihí-dé, chi cue tée-án cúú-güedé cue tée tendaha cuè ñáyiú xǐndecu ichi Xítoho Jesucristú quixi coto ñaha xii-ndo. Te cue tée-án quidé-güedé nàcuáa càhí ñáyiú sá ño càhnu cuu Xítoho Jesucristú.

24 Te chí cáda sá cúú ñi ndisa-ndo-güedé cuendá ducaⁿ na cùtnuní iní nchaa dava-gá ñáyiú xǐndecu ichi Xítoho Jesucristú sá ndáá ndisa ducaⁿ quide-ndo, te ducaⁿ cùtnuní

iní-yu sá ndáá ndisa quide váha-ndo dàtná càháⁿ-ndí cuendá-ndó sǎ quidé vǎha-ndo.

9

Cuendá sá ngǎutñaha sá cúú-xí cuè ñáyiú xǐndecu ichi Xítoho Jesucristú

1 Te cuendá sá ngǎutñaha sá cúú-xí cuè ñáyiú ndècu ichi Xítoho Jesucristú ñá túú-gǎ xíní ñúhu-xi càhí tñúhu-í xii-ndo núú tütú-a nàcuáa cada-ndo,

2 chi sa cùtnuní iní-í sá ño cuiní-ndó chindee-ndó-yu. Te ducaⁿ-ni ño váha càháⁿ-í cuendá-ndó núú ñáyiú xǐndecu ichi Xítoho Jesucristú ndécú dístítú Macèdoniá, te xǎhaⁿ-í xii-yu sá nchòhó ñáyiú xǐndecu ichi Xítoho Jesucristú ndécú dístítú Acáyá sa ní cuu ñí cuíá ducaⁿ cuiní-ndó càcáⁿ tñàhá-ndó sǎ cúú-xí cuè ñáyiú ndàhú ndécú ìchi-gá. Te vai cue ñáyiú dístítú Macèdoniá cuiní-yu cacáⁿ tñàhá-yu sá cúú-xí cuè ñáyiú ndàhú ndécú ìchi Xítoho Jesucristú cuendá sá ñi ñíhí-yu tñúhu sá nchòhó ío cuiní-ndó dùcaⁿ cada-ndo.

3 Te cuendá sá sání iní-ndó càda-ndo xǎⁿ tendaha-í cue tée ndècu ndihí-o ichi Xítoho Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sá vǎ quée ndèhnde-í núú ñáyiú sá ñi càháⁿ váha-í cuendá-ndó, te ducaⁿ cùndecu túha ndisa-ndo dàtná sa ní càháⁿ-í núú-yu.

4 Chi na cuáháⁿ ndéè quixi-í ndihí ñí úú cue ñáyiú dístítú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá ñi càháⁿ váha-í cuendá-ndó te núú ñá túú ndècu túha-ndo, te tñàhá-ndó cùcahaⁿ núú-ndó.

5 Te xǎⁿ núú ní sani iní-í sá vǎha-gá codonùu cue tée ndècu ndihí-o ichi Xítoho Jesucristú quixi coto ñaha-güedé xii-ndo cuendá chindee ñaha-güedé tacá sá ñi sani iní-ndó càcáⁿ tñàhá-ndó cuendá sá cùndecu túha-xi, te cuu-xi dàtná ñí tǎhú sǎ ñi quene cuu iní méé-ndó càcáⁿ tñàhá-ndó sǎ cúú-xí cuè tñaha ñáyiú-ndo. Te ducaⁿ te vá yóo caní iní-xi quesàhá-yu sá nchùhú ní quide yica-ndǎ ducaⁿ ñi sacáⁿ tñàhá-ndó.

6 Te nchòhó sa xíní-ndó sǎ ñáyiú na chihí vai tatá te vai ñíhí-yu cùu, te cue ñáyiú na chihí sacú tatá te sacú ñíhí-yu cùu. Ducaⁿ

sătnahá-xi cùu ñáyiú sàcáⁿ tnáhá sã cúú-xí tnàha ñáyiú-yu.

7 Te ìⁿ ìⁿ-ndo càcáⁿ tnáhá-ndó nàcuáa quène cuu iní mée-ndó, te ío váha cuu iní-ndó dùcaⁿ cada-ndo te vá cáda-ndó cuendá-ni sá quidé yìca ñaha ñáyiú xii-ndo, chi Yá Ndiòxí cúú váha iní-gá núú nchàa ñáyiú cùdí ìní sàcáⁿ tnáhá sã cúú-xí cuè tnaha ñáyiú-xi.

8 Te Yá Ndiòxí ndacu-gá chindee ñaha-gá xii-ndo nàcuáa cundecu váha-ndo, chi ñu-gá cada te níhí-ndó nchàa núú sã xíní ñùhu-ndo cundecu ndìhi-ndo, te ñá túú tnàhí-gá ná cumání xii-ndo, te mee-gã chindee ñaha-gá xii-ndo ñhí-ndó ïo vâi cundecu ndìhi-ndo cuendá ducaⁿ chindee-ndo cue tnaha ñáyiú-ndo.

9 Te núú tùtú Yá Ndiòxí càchí-xi ìⁿ xichi: ìⁿ ñáyiú ío vâi sá ñi sãñàhá-yu xii ñáyiú ndàhú,

te sá ñi quide ñáyiú-áⁿ ñi cuu-xi sá váha sá vã yõo cùnaa.

Duha càchí-xi núú tùtú-gá.

10 Te mee Yá Ndiòxí táxí-gã nchaa sá cúú tàtá nchaa nchòhó ñáyiú xitu nándi sá xítú cuendá cuu sá cúú nchìto-ndo, te ñu-gá cada te ío vâi sá níhí-ndó cundecu ndìhi-ndo, te ducaⁿ ïo-gá vâi sá váha cada-ndo sã cúú-xí cuè tnaha ñáyiú-ndo.

11 Te Yá Ndiòxí taxi-gá vâi núú sã cùndècu ndìhi-ndo cuendá ducaⁿ ñi yuhu ñi iní-ndó vâi cuãñaha-ndo sã cúú-xí tnàha ñáyiú-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii tnàha ñáyiú-ndo, te cue ñáyiú-áⁿ ïo ndacáⁿ táhũ-yu núú Yá Ndiòxí cuendá sá dúcáⁿ sàcáⁿ tnáhá-ndó sã cúú-xí-yu.

12 Te sá dúcáⁿ quide-ndo sacáⁿ tnáhá-ndó sã cúú-xí cuè ñáyiú cùu cuendá Yá Ndiòxí, te ñáyiú-áⁿ ñà túú-gã ná cumání xii-yu, te ío ndacáⁿ táhũ-yu núú Yá Ndiòxí sá dúcáⁿ quide-ndo.

13 Te ñáyiú-áⁿ cutnùní iní-yu sá nchòhó quidé-ndó sã sàndáá ndisa iní-ndó tnùhu Xítóhó Jesucristú, te cuendá xíãⁿ te ñáyiú-áⁿ chiñùhú-yu Yá Ndiòxí, te cuendá sá dúcáⁿ ñi yuhu ñi iní-ndó sàcáⁿ tnáhá-ndó sã cúú-xí-yu ndìhi sá cúú-xí nchàa dava-gá ñáyiú, te cachí-yu sá ïo càhnu cuu Yá Ndiòxí.

14 Te ñáyiú-áⁿ càháⁿ ndìhí-yu Yá Ndiòxí

cuendá-ndó, te ío cuu váha iní ñáhã-yu xii-ndo cuendá sá Yá Ndiòxí chindèe ñaha-gá xii-ndo quide-ndo sá váha sá cúú-xí-yu ndìhi dava-gá ñáyiú.

15 Te ío ndacáⁿ táhũ-ó núú Yá Ndiòxí cuendá sá ñi taxi-gá sá ïo váha ndècu ndìhi-o, te ñi ñã cùtnùní iní-ó ñãsa cunduu tnùhu càháⁿ-ó cuendá sá váha ñi taxi-gá.

10

Té Pãblú ndécú ndìhi-dé tnùhu ndee iní sá càháⁿ-dé tnùhu Xítóhó Jesucristú

1 Te Xítóhó Jesucristú ío càhnu iní-gá, te cùndahú iní ñáhã-gã xii-o chindee ñaha-gá, núu xíãⁿ yúhú té Pãblú ducaⁿ quide-í càháⁿ ndàhú-í núú-ndó nàcuáa cada-ndo. Te dava-ndo càchí-ndó sã yúhú ío ndàhú iní-í òré ndécú ndìhi ñaha-í xii-ndo, te òré ñá túú ndècu ndìhi ñaha-í xii-ndo te ío ñhí càà-í.

2 Te càháⁿ ndàhú-í núú-ndó sã cáda-ndó nàcuáa vá càháⁿ ñhí-í núú-ndó òré quixi-í quixi coto ñaha-í xii-ndo. Te cuíní-í sá ndìhi tnùhu ñhí iní-xi càháⁿ ndìhi-í cue ñáyiú càchí sá ìⁿ-ni cuu-í ndìhi cue ñáyiú ñá túú sàndáá iní tnùhu Xítóhó Jesucristú.

3 Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí,

4 te ñi ìⁿ sá ío ñuyú-a ñá túú chindee ñaha-xi, chi mee Yá Ndiòxí chindèe ñaha-gá xii-ndí dáquèe tíhú duuⁿ-ndí nchaa núú sã cuèhé sá dúhá.

5 Te xíãⁿ núu ñhí-ndí tnùhu càháⁿ-ndí sàdí-ndí yuhu cue ñáyiú càháⁿ tnùhu sá ñà túú cùu váha iní Yá Ndiòxí, ñáyiú xíquide nínu mee-xi càchí sá ñà túú nàndíhi tnùhu-gá. Te quide-ndí sá ñáyiú-áⁿ quindáá iní-yu tnùhu Xítóhó Jesucristú.

6 Te nchúhú sa ndècu túha-ndí sá dáquètíhú-ndí cue ñáyiú ñá túú cuíní cada nàcuáa cuíní Xítóhó Jesucristú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

7 Te nchòhó nàcuáa ndècu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núu cùtnùní ndáá

iní-ndó sã cúú-ndó cuèndá Xítóhó Jesucristú, te ñi-ndó ducaⁿ tàú-ndó càni iní-ndó cuèndá-ndí tucu.

⁸ Te Xítóhó Jesucristú ní taxi-gá tnúhu ndee ìní ndécú ndìhi-ndí sá dánèhé ñáhà-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sã dánèhé ñáhà-ndí xii-ndo nàcuáa cuita nihnu-ndo, te cuèi na chido-gá-í cãháⁿ-í cada nínu-í mée-í cuèndá tnúhu ndee ìní ní taxi Xítóhó Jesucristú ndécú ndìhi-ndí, dico vá cúcãháⁿ núú-í chi cãháⁿ ndáá-í.

⁹ Te ñá túú cuèni-í sá nchòhó caní iní-ndó sã yùhú dáyùhú ñáhà-í xii-ndo nàcuáa ndùu tnúhu cãháⁿ-í núú tütú-í.

¹⁰ Te ñá túú cuèni-í sá cãháⁿ-ndó sã ténàá ñáhà-í xii-ndo núú tütú-í, te mee-ní tnúhu cãhnu sã ño cùnnu cuu-xi, te cãchí tucu-ndo sã òré ndécú ndìhi ñáhà-í xii-ndo te ñá túú cãá-í sã cúú-í ñⁿ tée cùu váha cùu dico iní-ndó, te cãchí tucu-ndo sã ñá túú tnàhá iní-ndó nàcuáa quide-í òré dácúhá ñáhà-í xii-ndo.

¹¹ Te nchòhó ñá yiu ducaⁿ cãháⁿ cada cuèndá váha-ndo sã dàtná-ní cãháⁿ-ndí núú tütú-ndí ñi-ndó ducaⁿ quide-ndí òré ndécú ndìhi ñáhà-ndí xii-ndo.

¹² Te nchúhú, vá cúú tnàhí cãháⁿ-ndí sã ñⁿ-ní cuu-ndí ndìhi cue ñá yiu cãháⁿ váha cuèndá mée-xí, chi ñá yiu-áⁿ sání iní-yu ná cúú sã váha te quide-yu te xíã cãchí-yu sã ño váha quide-yu, te cãchí-yu sã quide váha-gá-yu dácúxí tnàhá ñá yiu-yu, te sã dúcãⁿ cãháⁿ-yu te quide-yu dàtná quide cue ñá yiu ñá túú tnàhí cùnuni iní-xi.

¹³ Te dico nchúhú ñá túú xidó-ndí cãháⁿ váha-ndí cuèndá-ndí, chi cãháⁿ váha-ndí cuèndá-ndí dico nàcuáa ndùu chiúⁿ ní taxi Yá Ndióxi cãháⁿ-ndí, chi mee-gã ní cachí-gá ndèe není sáá-ndí cãháⁿ-ndí tnúhu-gá, te ní sáá-ndí ndéé ñúú-ndó cãháⁿ-ndí tnúhu-gá.

¹⁴ Te vitna ndècu ndìhi-ndí tnúhu ndee ìní sã tnàhá nchòhó cuu cãháⁿ ndìhi ñáhà-ndí xii-ndo, chi díhna-gá nchúhú ní quixi-ndí ní cãháⁿ-ndí tnúhu Xítóhó Jesucristú ñúú-ndó, tnúhu sã cãháⁿ nàcuáa naníhí tãhú-ó.

¹⁵ Te nchúhú ñá túú quide cãhnu-ndí mée-ndí cuèndá chiúⁿ quide dava-gá-güedé quesaha-ndí sã chíúⁿ mée-ndí cúú-xí. Te cuèni-ndí sã nchòhó cuita quindáá-gá iní-ndó Xítóhó Jesucristú, te ducaⁿ te

níhí-gã-ndí nàcuáa cada-ndí chiúⁿ-gá nchaa dava-gá xichi núú ní cachí-gá cada-ndí chiúⁿ-gá.

¹⁶ Chi cãháⁿ-ndí tnúhu-gá tnúhu sã cãháⁿ nàcuáa naníhí tãhú-ó, te yáha-gã-ndí ñúú-ndó quíhíⁿ-ndí nchaa dava-gá xichi cãháⁿ-ndí, te vá cãdá cãhnu-ndí mée-ndí cuèndá chiúⁿ sã sã ní quide dava-gá-güedé.

¹⁷ Te cue ñá yiu cuèni cada cãhnu mee-xi te vá dúcãⁿ cãdá-yu, chi mee Xítóhó Jesucristú ná cãda cãhnu-yu-gá.

¹⁸ Te nchaa ñá yiu na cãháⁿ váha Xítóhó Jesucristú cuèndá-yu, ñá yiu-áⁿ cúú-yu núú-gã, te ñá túú cùdíu-yu núú-gã cuèndá sã cãháⁿ váha-yu cuèndá mée-yu.

11

Cuèndá té Pãblú ndìhi cuèndá cue tée cãchí sã cãháⁿ tnúhu Yá Ndióxi te ñá ndáá

¹ Te cuèni-í sã nchòhó cada ndee ìní-ndó cùndedóho-ndo tnúhu na cãháⁿ-í, chi cãháⁿ-í dàtná cãháⁿ cue ñá yiu ñá túú cùnuni iní-xi, te cuèi nása-gá ná cùnndu tnúhu cãháⁿ-í dico chí cãdá ndèe iní cùndedóho-ndo.

² Chi yùhú ño ñúhu iní ñáhà-í xii-ndo dàtná ñúhú iní ñáhà mée Yá Ndióxi xii-o, te ní cãháⁿ-í tnúhu Xítóhó Jesucristú núú-ndó ñúu xíã ní tnàhá tnúhu-ndo ndìhi-gá vitna, te sã dúcãⁿ ní quide-í te cada iní-ndó sã yùhú cúú-í dàtná ñⁿ tée xica ndáhú te nchòhó cúú-ndó dàtná ñⁿ xichí cuéchi, te Xítóhó Jesucristú cúú-gã dàtná ñⁿ tée tnándaha ndìhi xichí cuéchi-ãⁿ. Te ducaⁿ cãda iní-ndó chí na sãá nduu te yùhú na càni cuèndá ñáhà-í xii-ndo núú Xítóhó Jesucristú, te cuu-ndo ñá yiu vá cùndècu tnàhí-gá cuéchi-xi.

³ Te yùhú-í sã sàcúíhna dandàhú ñáhà-xí xii-ndo vá cãní-gã iní-ndó cãchicúⁿ nihnu-ndo ní yuhu ní iní-ndó ìchi Xítóhó Jesucristú dàtná nchicúⁿ nihnu-ndo vitna. Te yùhú-í ná yáha-ndo dàtná ní yáha tá Èvá, chi sàcúíhna ní nduu-xi cóó ní dandàhú ñáhà-xí xii-xi, chi sàcúíhna-ãⁿ ño váha ní xito-xi nàcuáa ní quide-xi ní dandàhú-xi tá Èvá-áⁿ.

⁴ Te nchòhó, quide ndèe iní-ndó sàcùndedóho-ndo nchaa tnúhu cãháⁿ cue tée cãháⁿ ingá núú tnúhu cuèndá Jèsus tnúhu sã ñá túú dènehé ñáhà-ndí xii-ndo, te quide ndee tucu iní-ndó ndèdóho-ndo

dànehé ñáhá-güedë xii-ndo cuendá ingá espíritú, te ñá díú cuendá Espíritú Yá Ndiöxí sá ñí ngúndecu ndihí-ndo dànehé ñáhá-güedë xii-ndo, te quide ndee tucu iní-ndó ndèdóho-ndo dànehé ñáhá-güedë xii-ndo ingá núú tnúhu sá cächí-güedé cáháⁿ nàcuáa naníhí tǎhú-ndó, te ñá díú nàcuáa ndùu tnúhu sá ñí sàndáá iní-ndó cuendá naníhí tǎhú-ndó cáháⁿ-güedé.

⁵ Te cue téé ducaⁿ cáháⁿ-áⁿ cächí-güedé sá Yá Ndiöxí ní tendaha ñàha-gá xii-güedé xícá cùu-güedé cáháⁿ-güedé tnúhu-gá te ío cùnuu-güedé, dico ñá ndàá sá cáháⁿ-güedé tnúhu-gá. Te yúhú cùtnùní iní-í sá cuè téé-áⁿ ñá túú cùnuu-güedé dàtná cùnùu yúhú.

⁶ Te cuèi ñá túú cáháⁿ-í dàtná cáháⁿ cue téé ío váha sàá díquí-xi dico ío váha cùtnuní iní-í cuendá nchaa sá dácuàha-í, te yúhú sa quide-í nàcuáa cùtnùní iní-ndó sǎ ìo váha cùtnuní iní-í nàcuáa ndùu nchaa tnúhu cáháⁿ-í.

⁷ Te cudana te sàni iní-ndó sǎ yúhú ñá túú ní quide váha-í sá ñí quide-í mée-í dàtná ìⁿ téé ío ndàhú iní-xi, chi ñá túú ní xicáⁿ-í yáhu-í núú-ndó cuendá sá ñí cáháⁿ-í tnúhu Yá Ndiöxí tnúhu sá cáháⁿ nàcuáa naníhí tǎhú-ó núú-ndó.

⁸ Te ní queheⁿ-í díhúⁿ ñí taxi dava-gá cue ñáyíu ndècu ichi Xítohó Jesucristú, te díhúⁿ-áⁿ ñí dándóñùhu-í ní saaⁿ-í nchaa sá ñí xini ñùhu-í cùtnàhá ní cáháⁿ-í tnúhu Xítohó Jesucristú núú-ndó.

⁹ Te cùtnàhá ní xíndecu ndihí ñàha-í xii-ndo te áma ní xóo cumání sǎ xíní ñùhu-í, te ñá túú nǎ ní xicáⁿ-í núú ni ìⁿ-ndo. Chi cue ñáyíu xíndecu ichi Xítohó Jesucristú ndécú dístítú Macèdoniá ní quixí-yu ní taxí-yu sá cúmǎní xii-í, te ñá túú tnàhí ní dàsatú iní ñáhà-í xii-ndo cǎcáⁿ-í núú-ndó núu ná cúú sǎ xíní ñùhu-í, te ñíu-ni ducaⁿ càda-í.

¹⁰ Te ñíu-ni duha cáháⁿ váha-í cuendá-í te ni ìⁿ cue ñáyíu dístítú Acáyá vá ñihí-yu tnúhu cùñàhá-yu xii-í cuendá cadí-yu yuhu-í. Te mee Xítohó Jesucristú nàhá-gǎ sá ndàá cáháⁿ-í dàtná cáháⁿ ndáá mée-gǎ.

¹¹ Te cudana te sàni iní-ndó sǎ sá dúhá cáháⁿ-í te ñá túú cùu iní ñáhà-í xii-ndo, dico ñáhá chi mee Yá Ndiöxí nàhá-gǎ sá yúhú ío cùu iní ñáhà-í xii-ndo.

¹² Te nàcuáa-ni ta quide-í véxi te ñíu-ni ducaⁿ càda-í cuendá sá cuè téé cùiní

cada nínu mee-xi cächí sá ìⁿ-ni cuu ndihí ñàha-güedé xii-í vá ñihí-güedé tnúhu cáháⁿ-güedé cachí-güedé sá ìⁿ-ni chiuⁿ quide ndihí ñàha-güedé xii-í.

¹³ Te cue téé-áⁿ cächí-güedé sá Yá Ndiöxí ní tendaha ñàha-gá xii-güedé xícá cùu-güedé cáháⁿ-güedé tnúhu-gá dico ñá ndàá, chi mee-ni dándahú-güedé ñáyíu ndihí tnúhu cáháⁿ-güedé, te quide-güedé dàtná quidé cuè téé cáháⁿ tnúhu Xítohó Jesucristú dico ñá ndàá sá cúu-güedé cue téé cáháⁿ tnúhu-gá.

¹⁴ Te vá cùñùhu-o sǎ dúcáⁿ quide cue téé-áⁿ, chi mee sàcuíhná quidé-xí sǎ cúu-xí dàtná ìⁿ espíritú xínú cuèchi núú ìo váha càa ndecu Yá Ndiöxí dico ñá ndàá sá xínú cuèchi-xí xíaⁿ.

¹⁵ Te xíaⁿ vá cùñùhu-o sǎ cuè téé xínu cuechi núu-xi quide-güedé sá cúu-güedé cue téé quide váha chi ñá ndàá sá quidé váha-güedé chi dándahú-güedé ñáyíu. Te nàcuáa ndùu nchaa sá quidé-güedé te ducaⁿ nàcháhu-güedé núú Yá Ndiöxí.

Té Pǎblú ío ndòho-dé cuendá sá cúu-dé téé cáháⁿ tnúhu Xítohó Jesucristú

¹⁶ Te yúhú cáháⁿ tucu-í dóho-ndo sǎ vǎ cání iní-ndó sǎ yúhú cùu-í ìⁿ téé cáháⁿ lùcú cáháⁿ duha, te núu dava-ndo dùcaⁿ saní iní-ndó dico chí cǎdá ndèe iní cundèdóho-ndo tnúhu na cáháⁿ-í cuendá ducaⁿ tnàhá-í cada nínu-í mée-í.

¹⁷ Te vitna na cáháⁿ-í dàtná cáháⁿ ìⁿ téé ñá túú cùtnuní iní-xi, chi tnúhu cáháⁿ-í ñá túú ìⁿ-ni cuu-xi ndihí tnúhu Xítohó Jesucristú, chi vitna cáháⁿ-í nàcuáa cada nínu-í mée-í.

¹⁸ Te ío cuéhé ñáyíu quide nínu mee-xi cuendá nchaa sá ìo ñuyíú-a te xíaⁿ núu tnàhá-í cùiní-í cada nínu-í mée-í.

¹⁹ Chi cùtnuní sá nchòhó quidé ndèe iní-ndó sàcúndedóho-ndo nchaa tnúhu cáháⁿ cue téé cáháⁿ lùcú cáháⁿ duha, te ducaⁿ quide ndee iní-ndó sàcúndedóho-ndo tnúhu cáháⁿ-güedé chi cächí-ndó sǎ ìo túha-ndo.

²⁰ Te nchòhó, quide ndee iní-ndó tnè-ndo nchaa tnúhu cáháⁿ cue téé quide yica ñàha xii-ndo sá cùnú cuèchi-ndo núu-güedé, te xicáⁿ-güedé nándí sá xicáⁿ-güedé núu-ndó, te tǎxi tnuní ñáhá-güedé xii-ndo, te quide-güedé sá ìo cùnuu-güedé ndécú ndihí ñàha-güedé xii-ndo, te càniha-güedé xii-ndo,

te cuèi nchaá xǎⁿ quidé ñàha-güedé xii-ndo dico quide ndee-ni iní-ndó.

21 Te nchòhó càchí-ndó sǎ cúu-ndǐ cue tée ñá túú ní cùy^ñ cada nándi sá cáda, te ndáa chi ñá túú ñⁿ-ni cuu-ndí ndihí cue tée ducaⁿ xǐquide.

Dico núu cue tée-áⁿ cùy^ñ-güedé quidé ñnu-güedé méé-güedě, te tnàhá-í cùy^ñ-í ducaⁿ càda-í. Te sá dúhá càháⁿ-í te càháⁿ-í dàtná ñⁿ tée ñá túú cùtnuní iní-xi.

22 Te núu quide cahnu-güedé méé-güedě cuendá sá càháⁿ-güedé tnúhu hèbreú, te yúhú tucu ñu-ñi tée càháⁿ tnúhu hèbreú cúu-í, àdi quide cahnu-güedé méé-güedě cuendá sá cúu-güedě cue tée isràél, te yúhú tucu tnàhá-í cúu-í tée isràél, àdi quide cahnu-güedé méé-güedě cuendá sá cúu-güedě ñaní tnàhá ndǐ Àbrahám, te tnàhá yúhú cúu-í ñaní tnàhá ndǐ Àbrahám tucu.

23 Àdi quide cahnu-güedé méé-güedě cuendá sá sání iní-güedé sá díú núú Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núú-gǎ. Te sá dúhá quide cahnu-í méé-í te càháⁿ-í dàtná ñⁿ tée ñá túú cùtnuní iní-xi, te yúhú cúu-í ñⁿ tée ío-gá quidé chiúⁿ-gá dàcúúxí cuè tée-áⁿ, te vai xito ní cuu càniha ñáyíu xii-í, te vai xito ní cuu chihi ñahá-yu vecaá xii-í, te vai xito ní cuu cǎcu cǎcu cahni ñaha ñáyíu xii-í.

24 Te cue ñáyíu isràél ní canihá-yu xii-í úhúⁿ xito, te ndí tnahá ñⁿ ñⁿ xito ní canihá-yu ní dáquée-yu ócò sáhúⁿ cúmí ñ^ñ sàtà-í.

25 Te úní xito ní caniha tucu ñáyíu xii-í ndihí carrutí, te ñⁿ xito ní sáha yúú ñáhá-yu xii-í, te ní cuu úní xito quée naa bàrcú xití ndute òré sácúhuⁿ-í, te ñⁿ xito ío ní ndoho-í ní xíndecu-í ñⁿ nduu ñⁿ niú núú ndute làmár.

26 Te ío tǐtní xichi ní cuu xica cuu-í, te dava xichi ní cǎcu cuido ñaha ndute ñuhu xii-í, te dava xichi ní cǎcu duhu ñadúhú nchaá ndachíuⁿ-í, te dava xichi ní cǎcu cada ñaha cuè ñáyíu cùu ndí mee-í ñⁿ sá cáda ñahá-yu xii-í, te ñu-ñi ducaⁿ ñí cǎcu cada ñaha tucu cue ñáyíu ñá túú cùu ndí mee-í ñⁿ sá cáda ñahá-yu xii-í ní cùu, te cuèi xití ñuú te cuèi xití yucu cǎcu cǎcu cada ñaha ñáyíu xii-í ñⁿ sá cáda ñahá-yu, te ñu-ñi ducaⁿ cǎcu cǎcu quini-í tnúndòho òré ñúhù-í bàrcú cuáháⁿ

núu ndute làmár. Te cue ñáyíu càchí sá ndécú ìchi Xítóhó Jesucristú te ñá ndáa cǎcu cǎcu cada ñahá-yu xii-í ñⁿ sá cáda ñahá-yu.

27 Te ío ndòho-í cuendá chiúⁿ quide-í chi ío xàú-í, te ní cuu vai xito ñá túú xidí-í, te tǐtní xito ní cuu xihí víhí-í docó, te tǐtní xito ní cuu yìchí-í ndute, te tǐtní xito ní cuu ñá túú tnàhí ná xéxi-í cuendá chiúⁿ quide-í, te tǐtní xito ní cuu ndòho-í sá vǐxiⁿ, te tǐtní xito ní cuu ñá túú ñihí-í dóó cuihnu-í.

28 Te ñá díú-ñi xǎⁿ chi ñⁿ nduu ñⁿ nduu ío sání iní-í cuendá nchaá ñáyíu ndecu ìchi Xítóhó Jesucristú xíndecu nchaá xichi.

29 Te ndèda-ni cà ñáyíu ñá túú ñihí ndée cùndecu ìchi Xítóhó Jesucristú, te ío cùndahú iní-í chi sànuu sá tnàhá-í ñá túú ñihí ndée-í cùndecu-í ìchi-gá sá dúcáⁿ quidé-yu. Te núu ñⁿ ñáyíu quidé-yu sá ñⁿ nchòhó ñáyíu ndecu ìchi Xítóhó Jesucristú quidé-ndó ñⁿ sá ñá túú tàú-ndó càda-ndo te vá cúu vǎha iní-í chi cudéèⁿ-í.

30 Te núu xini ñuhu-xi sá cáda càhnu-í méé-í, te cuu ducaⁿ càda-í te càháⁿ-í mee-ni cuendá nchaá sá quidé nàcuáa ñá túú ñihí ndée yiqui cuñú-í.

31 Te Dútú Ndiõxí Yaá cúu Tǎtá Xítóhó Jesucristú nàhá-gǎ sá yúhú càháⁿ ndáa-í núú-ndó, te ñu-ñi gá tàú-gá cachí-ó sǎ ío càhnu cuu-gá ñi caa ñi quíhíⁿ.

32 Te cùtnàhá ní xíndecu-í ñuú Dàmascú te tée cùu gobiernú tée cùndihí tée yíndaha ñáyíu nani Aretás ní taxi ndecu-dé cue tée ní xíndedí yuyèhe sá ñúhú dòco ñuú cuendá òré quee-í te tñ^ñ ñaha-güedě xii-í ní cùu.

33 Dico yúhú ní quée-í ñⁿ xití tǐdihí, te cue ñáyíu cùndihí ñaha xii-í ní queñuhu ñahá-yu ndáa ventaná nchíi yiqui naha sǎ ñúhú dòco ñuú-áⁿ, te ducaⁿ te ní cǎcu-í ñá túú ní ndàcu-güedé tñ^ñ ñaha-güedě xii-í.

12

Té Pǎblú càháⁿ-dé sá ío vii càa sá ñí dánèhé núú ñahá Xítóhó Jesucristú xii-dé

1 Te ñá túú ndée nándihí-xi sá càháⁿ váha-o cuendá méé-ó, dico vitna xini ñuhu-xi ducaⁿ càda-í chi càháⁿ-í nàcuáa ní quide ñaha Xítóhó Jesucristú xii-í, chi ní quide-gá sá ñí cutnùní iní-í nàcuáa nduu tnúhu-gá, te vai núú sǎ ñí dánèhé núú ñahá-gǎ xii-í.

² Te yúhú xìní-í ìḡⁿ téé sàndáá iní ñáhá xì Xítóhó Jesucrìstú, te sa ní cuu úxícúmí cuíá sǎ tée-áⁿ ñí sáá-dé ndéé andiú cùu uní, te ñá túú xìní-í te núu ndihí yìquì cuñú-dé ní sáá-dé àdi ñáhá, chi ìḡⁿdìi díi-ni Yá Ndiöxí náhá-gǎ te núu nása càa-dé ní sáá-dé.

³ Te yúhú càháⁿ ndáá-í cuendá téé-áⁿ, dico dàtná ní cachí-í sá ñà túú xìní-í te núu ndihí yìquì cuñú-dé ní sáá-dé andiú àdi ñáhá, chi mee Yá Ndiöxí náhá-gǎ te núu nása càa-dé ní sáá-dé.

⁴ Te téé-áⁿ ñí sáá-dé ìḡⁿ xichi núú ìo váha càa andiú, te yàcáⁿ ní xíndedóho-dé tnúhu mee-ni sǎ cúú-xí cuendá méé-dě, te tnúhu-áⁿ vǎ cúú tnàhí cáháⁿ-dé núú ñí ìḡⁿ ñáyíu.

⁵ Te yúhú quidé ññu-í téé-áⁿ, dico mee-í ñá túú càháⁿ váha-í cuendá-í cuendá cada ññu-í méé-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yìquì cuñú-í.

⁶ Te núu dìcò yúhú cuìní-í te cuu cáháⁿ váha-í cuendá-í cuendá cada ññu-í méé-í, te núu ducaⁿ na càháⁿ-í te ñá túú cùu-xi ìḡⁿ tnúhu neñúú cáháⁿ-í, chi cùu-xi ìḡⁿ sá càháⁿ ndáá-í te núu na càháⁿ-í. Dico vǎ dúcáⁿ càda-í chi cuìní-í sá nchòhó cada cuendá-ndó nàcuáa ndùu tnúhu càháⁿ-í ndihí nàcuáa quide-í, te ducaⁿ mée-ndo cáháⁿ-ndó te núu ná téé cùu-í, te ñá díú sǎ yúhú cáháⁿ váha-í cuendá méé-í cuendá nchòhó cachí-ndó sǎ ìo cùnùu-í.

⁷ Te sá ñí dánèhé núú ñáhá Xítóhó Jesucrìstú xii-í cúú-xí sǎ xidó ìo váha, te cuendá sá vǎ cadá càhnu-í méé-í ññu xǎⁿ Xítóhó Jesucrìstú ní quide-gǎ duha ndòho yìquì cuñú-í vitna. Te sá dúcáⁿ quide ñaha-gǎ xii-í te xǎⁿ sácúíhná ñí ñihí-xi ichi càhnu dandoho ñaha-xi xii-í.

⁸ Te ní cuu úní xito càháⁿ ndàhú-í núú Xítóhó Jesucrìstú sá ná cadá-gǎ nàcuáa vǎ ndóhó-gǎ yìquì cuñú-í.

⁹ Dico mee-gǎ càchí-gǎ xii-í: “Yúhú ìo cùndahú iní ñáhà-í xii-n chindee ñaha-í, te ñá túú nǎ cùmǎní xii-n, te cùtnuní sá ìo-gǎ chindèe-í cue ñáyíu ñá túú ñihí ndéé cùndecu”, duha ní cachí-gǎ xii-í. Te xǎⁿ ññu yúhú ìo cùdǎí ìní-í sá ñà túú ñihí ndéé-í ndécù-í, chi ññu cuendá xǎⁿ Xítóhó Jesucrìstú ñá túú dàña ñihnu ñaha-gǎ xii-í chindèe ñaha-gǎ.

¹⁰ Te xǎⁿ ññu cùdǎí ìní-í sá dúhá ñá túú ñihí ndéé-í ndécù-í, te cùdǎí tucu iní-í cuendá

nchaa tnúhu cuèhé tnúhu duha càháⁿ ñáyíu cuendá-í, te cùdǎí ìní-í cuendá nchaa sá ndóhò-í, te cùdǎí tucu iní-í cuendá sá quidé ñaha ñáyíu xii-í, te cùdǎí tucu iní-í cuendá nchaa dava-gǎ sá ndóhò-í cuendá Xítóhó Jesucrìstú. Te òré ñá túú ñihí ndéé-í te Xítóhó Jesucrìstú chindèe ñaha-gǎ xii-í ñihí ndéé-í.

Té Pǎblú ìo sàni iní-dé cuendá cue ñáyíu xǎndecu ichi Xítóhó Jesucrìstú ndécú ññu Còrintú

¹¹ Te cùu-í dàtná ìḡⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuendá-í ní cùu. Te dava cue téé ìo quide càhnu-güedé méé-güedé, te càchí-güedé sá Xítóhó Jesucrìstú ní táuchíúⁿ-gǎ sá càháⁿ-güedé tnúhu-gǎ, dico yúhú cùnùu-gǎ-í dàcúúxí cuè téé-áⁿ cuèí ñá túú vèdana ná cùu-í ndécù-í ññuyíú-a.

¹² Te cùtnàhá ní xǎndecu ndihí ñaha-í xii-ndo ìo ní quide càhnu iní-í nándi sá ñí yáha-í ní quide-í chiúⁿ Xítóhó Jesucrìstú sá cúú-xí-ndó. Te ní chindee ñaha-gǎ xii-í ní quide-í tǎtní núú sǎ vǎ yòo tnàhí ndàcu cada te ní cuñúhu-ndo, te sá dúcáⁿ ñí chindee ñaha-gǎ xii-í ní cùtnuní iní-ndó sǎ yúhú cúú ndísa-í ìḡⁿ téé ní cachí Xítóhó Jesucrìstú sá càháⁿ-í tnúhu-gǎ.

¹³ Te yúhú ìḡⁿ-ni quide ndihí ñaha-í xii-ndo ndihí nchaa dava-gǎ cue ñáyíu ndécù ichi Xítóhó Jesucrìstú, te dìcò-ni sá yúhú ñá túú ní cuìní-í taxi-ndo sǎ xíní ññu-í dàtná ní quide-í dava-gǎ-yu. Te núu ñá túú ní quide váha-í sá dúcáⁿ ñí quide-í ñá túú ní cuìní-í chindee ñaha-ndo te chí cadá càhnu iní ñáhá xii-í.

¹⁴ Te vitna sa ndécù túha-í sá quíxì-í núú ndécù-ndó, te sá quíxí còto ñaha tucu-í xii-ndo cùu-xi xito cuu úní sá quíxì-í, te cuìní-í sá vǎ dándíhú-ndó ìní-ndó ndécù-ndo sá táxì-ndó cùu xii-í, chi ñá díú xǎⁿ ndéé iní-í chi mee-ndo ndéé iní-í quixi-í. Te duha càháⁿ-í chi nchòhó xìní-ndó sǎ cuè téé cùu tátá sǎñaha-güedé sá cúú-xí cuè déhe-güedé te ñá díú cuè déhe-güedé sǎñaha-güedé sá cúú-xí mée-güedé.

¹⁵ Te yúhú ìo váha cùu iní-í dandòñuhu-í sá ndécù ndihí-í nàcuáa ndacu-í chindee

ñaha-í xii-ndo cùndecu váha-ndo sã cúu-xí Yã Ndiõxí chi ío cùdíí iní-í, te cuéi na cùu-í sã cuendá-ndó, chi ío cùu iní ñáhà-í xii-ndo, te sã dúcáⁿ cùu iní ñáhà-í xii-ndo, te sànuu sã nchòhó ñá túú cùu iní ñáhá càvihi-ndo xii-í.

16 Te naha-ndo sã ñà túú ní dándihú-í iní-ndó nã taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa ní dándahú ñáhà-í xii-ndo.

17 Te chí càháⁿ te núu yúhú ní dándahú ñáhà-í xii-ndo ndìhi cue téé ní tendaha-í ní quixi coto ñaha xii-ndo.

18 Te ní càháⁿ ndàhú-í núu tẽ Titú ndìhi núu ìngá tucu téé ndècu ndìhi-o ichi Xítohó Jesucristú ní quixi coto ñaha-güedẽ xii-ndo. Te nchòhó cutnùní iní-ndó sã tẽ Titú ñá túú ní dándahú ñáhà-dẽ xii-ndo, te ducaⁿ chí ñⁿ-ni sàni iní-ndí te ñⁿ-ni quide-ndí.

19 Te cudana te sàni iní-ndó sã sã dúhá càháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi càháⁿ-ndí chi ndècu ndìhi-ndí Xítohó Jesucristú, te mee Yã Ndiõxí nãhá ndáá-gá nàcuáa ndùu tnúhu càháⁿ-ndí, te nchaa sã càháⁿ-ndí cúu-xí cuendá nchòhó cue ñáyiu ío cùu iní-ndí, te càháⁿ-ndí nàcuáa cundecu váha-ndo ichi Xítohó Jesucristú.

20 Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sã dúcáⁿ te yúhú càháⁿ-í nàcuáa vá cúu váha iní-ndó, te ducaⁿ ío sàni iní-í cuendá-ndó chi na cuáháⁿ òré quexìo-í te nã-ndó, àdi ndecu-ndo ichi cuédú iní, àdi cudééⁿ núu tnáhá-ndó, àdi ñá túú cùu ñⁿnuu-ndo ndecu-ndo, àdi càháⁿ cuèhé-ndó cuendá tnàha ñáyiu-ndo núu chítú núu tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo.

21 Te ío sàni iní-í cuendá-ndó chi na cuáháⁿ òré quixi-í, te Yã Ndiõxí cada-gá te cucahaⁿ núu-í sã cuendá-ndó, te ío ndíhú iní-í cuendá-ndó te núu vátá dáñá-gã-ndó nchaa sã cuèhé sã dúhá ní ngüíta-ndo quide-ndo ndéé sanduu, te vãi-ndo ní ngüíta-ndo dùcaⁿ quide-ndo, chi ndècu-ndo ichi díí iní te nãndi-gá nchaa sã cuèhé sã dúhá quide-ndo, te ducaⁿ ío ndíhú iní-í te núu vátá dáñá-gã-ndó nchaa xiãⁿ.

13

Tnúhu ndéé núu ní ndìhi-ná

1 Te sã quixì-í vitna núu ndécú-ndó cùu-xi xito cuu úní sã quixí coto ñaha-í xii-ndo. Te càchí tnúhu-í xii-ndo sã òré cundáá cuéchi-ndo te canehe núu úú àdi úní ñáyiu càháⁿ ndáá nàcuáa ndùu cuéchi-ndo.

2 Te yúhú sa ní càháⁿ-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te díu-ni ducaⁿ càháⁿ tucu-í dóho-ndo vitna vátá quixí tùcu-gá-í quixi coto ñaha-í xii-ndo. Te nchòhó ñáyiu ní cunduú ní ngüíta quide nchaa sã cuèhé sã dúhá, tenáá ñáhà-í xii-ndo òré quexìo-í te núu vátá dáñá-gã-ndó nchaa sã cuèhé sã dúhá quide-ndo te tnàhá nchaa dava-gã-ndó tènáá ñáhà-í xii-ndo.

3 Te nchòhó cuìní-ndó quìní-ndó núu ndáá sã quidè-í núu Xítohó Jesucristú càháⁿ-í yuhu-gá, dico dàvá-áⁿ cutnùní ndáá iní-ndó. Te Xítohó Jesucristú quidè-gã nàcuáa cutnùní iní-ndó sã ío càhnu cuu-gá te ñá túú quide-gá dàtná quidè ñⁿ ñáyiu ñá túú ñìhí ndéé cùndecu.

4 Te Xítohó Jesucristú ní ndoho-gá dàtná ñⁿ ñáyiu ñá túú ñìhí ndéé cùndecu, chi ní sahní ñaha-güedẽ xii-gá núu cùrúxí dico mee Yã Ndiõxí ní quide-gá ní ñìhí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñá túú ñìhí ndéé-ndí cundecu-ndí, dico mee Yã Ndiõxí chindèe ñaha-gá xii-ndí ñìhí ndéé-ndí ndécú-ndí cuendá sã ndécú ndìhi-ndí Xítohó Jesucristú, te xiãⁿ núu ndàcu-ndí quidè-ndí nàcuáa tàú-xi cunduu sã cúu-xí-ndó.

5 Te chí cádá cuendá váha te núu ndisa sã sàndáá iní-ndó tnúhu Xítohó Jesucristú, te núu ndáá sã ndécú-ndó ichi-gá te cutnùní iní-ndó sã ndécú-ndó ndìhi-gá.

6 Te cuìní-ndí sã nchòhó cutnùní ndáá iní-ndó sã nchúhú ndécú ndìhi ndisa-ndí Xítohó Jesucristú.

7 Te nchúhú càháⁿ ndìhi-ndí Yã Ndiõxí cuendá-ndó cuendá sã vã cádá-ndó ní ñⁿ sã cuèhé sã dúhá, te vá cání iní-ndó sã sã dúcáⁿ càháⁿ ndìhi-ndí-gá cuendá-ndó, te cuìní-ndí sã nchòhó cutnùní iní-ndó sã nchúhú ío ndècu yiñuhu-ndí núu-gã, te ñáhá chi càháⁿ

ndihí-ndí-gá cuendá-ndó chi cuení-ndí sá nchòhó cada váha-ndo cùndecu-ndo cuéi sàni iní-ndó sã nchùhú cúú-ndí cue téé ñá túú ndècu yĩñuhu núú-gã.

⁸ Te nchùhú mee-ni càháⁿ váha-ndí cuendá tnúhu ndáá tnúhu Yá Ndiöxí, te ñá túú càháⁿ-ndí ìⁿ tnúhu sá ñà túú tàú-xi càháⁿ-ndí cuendá tnúhu-áⁿ.

⁹ Te cùdí ìní-ndí sá ñà túú-gã xíní ñùhu-xi cada-ndí nàcuáa níhí ndéé-ndí tenàá ñáhá-ndí xii-ndo càháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchùhú càháⁿ ndihí-ndí Yá Ndiöxí cuendá-ndó cuendá sá nchòhó cundáá-ndó cùndecu-ndo ñá túú-gã ná cumání-ndó núú-gã.

¹⁰ Te xíãⁿ núu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cùndecu ndihí ñaha-í xii-ndo te vá ïo níhí càháⁿ-í dóho-ndo nàcuáa ndùu tnúhu ndee iní ní taxi Xítohó Jesucristú ndécú ndihí-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndihí-ndí ichi Xítohó Jesucristú ío quíde ndee iní ñáhá-ndí xii-ndo, te ío chí ndúcú nàcuáa cada-ndo cùndáá-ndó núú Yá Ndiöxí cuendá sá ñà túú tnáhí-gá ná cùmání-ndó núú-gã, te ndee ndèe cada iní-ndó cùndecu-ndo, te chí cúú ìⁿnuu cundecu ndihí tnaha, te ducaⁿ te Yá Ndiöxí cundecu ndihí ñaha-gã xii-ndo chí ío cùu iní ñáhá-gã xii-o, te díu-gá quíde-gã ío váha cùu iní-ó ndècu-o.

¹² Te ndihí tnúhu yĩñuhu chí cáda ndèe iní tnáhá.

¹³ Te nchaa ñáyiu cùu cuendá Yá Ndiöxí ndécú ìha quíde ndee iní ñáhã-yu xii-ndo.

¹⁴ Te xícáⁿ táhú-ndí núú Xítohó Jesucristú sá ïo na chíndee chítúu ñaha-gã xii-ndo. Te mee Yá Ndiöxí ná cáda-gã nàcuáa cutnùní iní-ndó sã ïo cùu iní ñáhá-gã xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ NÍ CADÚHA TÉ PÄBLÚ QUIHⁿ NDAHA ÑÁYIU DISTRITÚ GÀLACIÁ

Té Păblú cādŭha-dé tutú quíhⁿ ndaha nchaa ñáyiú sândáá iní ñáhá xii Xítohó Jesucristú ndécú dīstritú Gălaciá

¹ Te yúhú té Păblú ní tendaha ñaha Xítohó Jesucristú, ndihí Dútú Ndiöxí véxi-í cāháⁿ-í tnúhu-gá. Te diu Yá Ndiöxí ní dándótó-gă Xítohó Jesucristú Yáá ní xihí ní cūu. Te cāchí tnúhu-í xii-ndo sã ñà díú ñăyiú ñuyíú-a ni tendaha ñaha xii-í véxi-í, te ní Yă Ndiöxí te ni Xítohó Jesucristú ñá túú ní xāhaⁿ-gă xii ñⁿ ñáyiú quixí-yu cachí tnúhu-yu nācuāa cada-í.

² Te yúhú té Păblú cādŭha-í tutú-a ndihí nchaa dava-gá ñáyiú ndēcu ichi Yá Ndiöxí ndécú ndihí-í iha cuendá daquixi-í ndaha nchòhó ñáyiú sândáá iní ñáhá xii Xítohó Jesucristú ndécú dīstritú Gălaciá.

³ Te xicáⁿ táhù-í núú Dútú Ndiöxí, ndihí núú Xítohó Jesucristú sá ïo na chindee chitúu ñaha-gá xii-ndo, te ducaⁿ ndi nduú-gá ná cādá te ío váha cuu iní-ndó cūndecu-ndo.

⁴ Te Xítohó Jesucristú ní xihí-gá sá cuendá nchaa cuéchi nchoo cué ñáyiú ndēcu ñuyíú-a. Te ducaⁿ ñi quide-gá, chí cuiní-gá sá vã cūndēcu-o ichi cuehé ichi duha. Te ducaⁿ ñi cuu, chí Dútú Ndiöxí ducaⁿ ñi cuiní-gá cunduu.

⁵ Te ío chí ná ndacáⁿ táhù-ó núú Yă Ndiöxí cuendá sá ïo cāhnu cuu-gá, te diu-ni ducaⁿ cāda-o ni caa ni quíhⁿ! Te ducaⁿ na cūnduu.

Mee-ni tnúhu Xítohó Jesucristú cúu-xi tnúhu sá cāháⁿ nācuāa naníhí tãhú-ó

⁶ Te ío cūñúhu-í cúu chí ío ndihí ní dáñá-ndó ichi Yá Ndiöxí. Te Yáá-áⁿ ñi cāháⁿ ñáhá-gă xii-ndo, chí Xítohó Jesucristú ío ní cundàhú iní ñáhá-gă ní quide váha ñaha-gă xii-ndo, te vitna dācuaha tucu-ndo ingá tnúhu, te cāchí-ndó sã xǎⁿ dācācu nihnu ñaha-xi xii-ndo núú ùhú núú ndàhú.

⁷ Dico ñáhá, chí ñá túú-gă tnúhu sá dācācu nihnu ñaha xii-o núú ùhú núú ndàhú. Te dicó-ni sá ío ñáyiú véxi dāticá nuu ñahá-yu

xii-ndo dānehé ñáhá-yu tnúhu sá dācuíta nihnu ñaha xii-ndo, chí tnúhu-áⁿ ñà túú cūu-xi tnúhu Xítohó Jesucristú.

⁸ Te yúhú cāháⁿ-í tnúhu Xítohó Jesucristú, dico núú ío ñáyiú véxi dānehé ñáhá xii-ndo ingá tnúhu sá ñà túú ní dānehé ñáhá-í xii-ndo, te nchòhó cachí-ndó sã ñăyiú-áⁿ nacháhu-yu núú Yă Ndiöxí sá dúcáⁿ quidé-yu. Te cuéi yúhú, te núu na dāma-í tnúhu danèhé ñáhá-í xii-ndo, te diu-ni ducaⁿ cāháⁿ-ndó sã nāchāhu-í núú-gă te núu ducaⁿ na cāda-í. Àdi te núu ñⁿ espíritú xínú cuéchi núú-gă véxi-xi cāháⁿ-xi ingá tnúhu sá ñà túú ní dānehé ñáhá-í xii-ndo nācuāa naníhí tãhú-ndó ñá, te diu-ni ducaⁿ cāháⁿ-ndó sã nāchāhu-xi núú Yă Ndiöxí te núu ducaⁿ na cāda-xi.

⁹ Te diu-ni duha sa ní dānehé ñáhá-í xii-ndo sã núu véxi ñáyiú dānehé ñáhá ingá tnúhu sá ñà túú ní dānehé ñáhá-í xii-ndo nācuāa naníhí tãhú-ndó ñá, te cachí-ndó sã ñăyiú-áⁿ nacháhu-yu núú Yă Ndiöxí sá dúcáⁿ quidé-yu, duha ní cachí-í xii-ndo.

¹⁰ Te duha ndūu tnúhu cāháⁿ-í chí nchòhó sa xíní-ndó sã yúhú cuiní-í sá Yă Ndiöxí cāháⁿ-gá sá quidé vāha-í ndécú-í, te ñá díú sã ñăyiú ñuyíú-a cachí-yu sá quidé vāha-í, àdi sá ïo cūdíí iní-yu nchaa nācuāa quide-í ndécú-í. Te núu na cāni iní-í cūdiu-í núú ñăyiú ñuyíú-a, te ñá túú cūu-í téé xīnu cuechi núú Xítohó Jesucristú te núu ducaⁿ na cāda-í.

Nācuāa ní cuu ní ngūíta té Păblú cāháⁿ-dé tnúhu Yá Ndiöxí

¹¹⁻¹² Te nchòhó ñáyiú ndēcu ndihí-í ichi Xítohó Jesucristú cāchí tnúhu-í xii-ndo sã tnúhu sá dānehé ñáhá-í xii-ndo nācuāa naníhí tãhú-ndó cūu-xi tnúhu sá ñi cachí tnúhu mee Xítohó Jesucristú xii-í, te ñá díú ñⁿ ñáyiú ñuyíú-a ni cāhu iní-yu tnúhu-áⁿ, àdi danèhé ñáhá-yu xii-í, chí mee Xítohó Jesucristú ní dānehé ñáhá-gă.

¹³ Te nchòhó sa ñihí-ndó tnúhu nācuāa ní xóo cada-í cūtnáhá nchicúⁿ nihnu-í nchaa nācuāa dācuaha ñáyiú cūu ndi mee-í ñáyiú isràel ní cūu. Te dāvá-áⁿ ío ní xóo cuu úhú iní-í nchaa ñáyiú ndēcu ichi Yá Ndiöxí, te nāndi sá ñi xóo cada-í-yu, te ní cuiní-í danāa-í-yu ni cūu.

¹⁴ Te yúhú ío-gá ní xóo quene cáva-í ní xóo dacuāha-í nchaa sá dācuāha ñáyiú

cùu ndi mee-í dàcúxí ñǎyiu ñⁿ-ni cuà-í ndihí-yu ni cùu, te ío-gá ní xóo cuini-í cada ndáá-í canchicúⁿ nihnu-í nchaa nàcuáa ní dánèhé ñáhá cuè ñani tnáhà-í ní xíndecu ndéé sanaha ni cùu.

¹⁵ Te ndéé cútnàhá vátá cáciu-gǎ-í Yǎ Ndiöxí sa nèhe váha ñaha-gǎ xii-í cuendá sá càháⁿ-í tnúhu-gá, núu xíǎⁿ ní cáháⁿ ñáhá-gǎ xii-í quidè-í chiúⁿ-gá vitna, te sá dúcáⁿ ní quide-gá te ío váha ní quide ñaha-gǎ xii-í.

¹⁶ Te òré ní cáháⁿ ñáhá Yǎ Ndiöxí xii-í te ní cachí tnúhu-gá cuendá Déhe-gá Xítohó Jesucristú. Te ducaⁿ ní quide Yǎ Ndiöxí cuendá sá cuini-gá sá cǎñaha-í xii ñáyiu ñá túú cùu ñáyiu isràél cuendá Yaá cúú Dèhe-gá. Te cútnàhá ní cáháⁿ ñáhá Yǎ Ndiöxí xii-í, te vá yóo ñⁿ dìi núú-xi ni ndùcu tnúhu-í nàcuáa cada-í.

¹⁷ Te ni ñà túú ní sáháⁿ-í ñuú Jerusalén nducu tnúhu-í núú cuè téé díhna nuu ní tendaha Xítohó Jesucristú càháⁿ tnúhu-gá núu nása cada-í, chi ndihí-ni ní sáháⁿ-í distritú Àrabiá ní xíndecu tnaa-í te dàtnùní cuánuhú tucu-í ñuú Dámascú.

¹⁸ Te núú ùní cuíá sǎ ní cáháⁿ ñáhá Yǎ Ndiöxí xii-í, te ní sáháⁿ tucu-í ñuú Jerusalén ní cáháⁿ ndihí-í té Pèlú, te ní xíndecu-í ndihí-dé sáhúⁿ nduu.

¹⁹ Te tnáhá té Jàcobó ñani Xítohó Jesucristú ní cáháⁿ ndihí-í. Te ñá túú ní xini-í dava-gá cue téé ní tendaha Xítohó Jesucristú càháⁿ tnúhu-gá.

²⁰ Te Yǎ Ndiöxí ndéhé ndèi ndehe caxi-gá sá ncháá tnúhu tèe-í núú tütú-a sá cúú-xí-ndó cùu-xi ñⁿ sá ndáá.

²¹ Te sátá ní sáháⁿ-í ñuú Jerusalén, te dàtnùní ní sáháⁿ-í distritú Sìriá, ndihí distritú Ciliciá.

²² Te nchaa ñáyiu xíndecu ichi Xítohó Jesucristú ndécú distritú Júdeá ñá túú xini ñáhá-yu xii-í ní cùu.

²³ Dico ní xóo níhí-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiu ndècu ichi Xítohó Jesucristú càháⁿ-dé tnúhu-gá núú ñáyiu cuendá quíndáá iní ñáhá-yu xii-gá, te diu-dé nándi sá quidé ñàha-dé, te cuini-dé danàa ñaha-dé cuendá sá vǎ cóo-gǎ ñáyiu quíndáá iní ñáhá xii-gá ní cùu”, duha ní cachí-yu cuendá-í.

²⁴ Te ní ngúita-yu ní cachí-yu sá ío cǎhnu cuu Yǎ Ndiöxí cuendá sá ñà túú-gǎ quidè-í

dàtná ní xóo cada-í.

2

Té Pǎblú ní níhí tnáhá-dé ndihí dava-gá cue téé càháⁿ tnúhu Yǎ Ndiöxí

¹ Te ní nútahá úxícúmí cuíá sǎ ní sáháⁿ-í ñuú Jerusalén ní cáháⁿ ndihí-í té Pèlú, te dàtnùní ndécà-í té Bèé ní sáháⁿ, te tnáhá té Títú ní sáháⁿ ndihí-ndí-dé.

² Te ní sáháⁿ-í chi mee Yǎ Ndiöxí ní cachí-gá sá quihíⁿ-í. Te yàcáⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa ndùu tnúhu dànehé-í ñáyiu ñà túú cùu ñáyiu isràél cuendá naníhí tǎhú-yu. Te ducaⁿ ní quide-í cuendá cuini-í quini-güedé nàcuáa ndùu chiúⁿ quide-í, chi nacuáháⁿ cachí-güedé sá ñà túú nàndihí-xi.

³ Te té Títú téé ndècu ndihí-í chi ñá díú téé isràél cúú-dé, dico ñá túú ní quide yica-güedé cuáha-güedé seña ñⁿ-dé.

⁴ Te ñáyiu cǎhí sá ndécú ìchi Xítohó Jesucristú te ñà ndáá sá ndécú-yu ichi-gá, ñáyiu-áⁿ ní chitnahá ñáhá-yu xii-ndí cuendá cuini-yu quini-yu nása quide-ndí ndécú-ndí ichi Xítohó Jesucristú. Te ducaⁿ ní quide-yu cuendá sá nchúhú sa ní cáciu nihnu-ndí ñá túú-gǎ quidé-ndí nchaa nàcuáa ní cáháⁿ ndii Moisés. Te cuini-yu sá núcuíta saa tucu-ndí cada-ndí nchaa nàcuáa ní cáháⁿ ndii núcúndecu-ndí dàtná ní xíndecu-ndí cútnàhá vátá cǎcu nihnu-gá-ndí núú tnúhu-áⁿ ni cùu.

⁵ Te nchúhú ñá túú tnáhí ni dàña-ndí méé-ndí dandáhú ñáhá-yu xii-ndí. Te ducaⁿ ní quide-ndí, chi cuini-ndí sá ñà túú nǎgá tnúhu dácánuu ndihí tnúhu sá càháⁿ nàcuáa naníhí tǎhú-ó ndècu ndihí-ndo.

⁶ Te ni ñⁿ tnúhu sá vátá quini-gá-í ñá túú ní cǎhí tnúhu cue téé cùnuu núú ñáyiu cada-í. Dico yúhú chi ñá túú ní quide cuendá-í núu cùnuu-güedé àdi ñá túú cùnuu-güedé, chi núú Yǎ Ndiöxí ñⁿ-ni cùu-o nchaa-o.

⁷ Te ní cutnùní iní-güedé sá Yǎ Ndiöxí ní cachí-gá xii-í sá càháⁿ-í tnúhu-gá núú ñáyiu ñá túú cùu ñáyiu isràél dàtná ní quide-gá té Pèlú ní xáhaⁿ-gǎ càháⁿ-dé tnúhu-gá núú ñáyiu isràél.

⁸ Te ducaⁿ ní cutnùní iní-güedé, chi diu-ni Yǎ Ndiöxí Yaá chíndèe ñaha xii té

Pèlú càháⁿ-dé tnúhu-gá núú ñáyiú isràél, diu-ni Yaá-áⁿ chindèe ñaha-gá xii-í càháⁿ-í tnúhu-gá núú ñáyiú ñá túú cùu ñáyiú isràél.

9 Te té Jàcobó, ndihí té Pèlú, ndihí té Juàá, cue téé ío cùnuu-gá ní cutnùní iní-güedé sá Yá Ndiöxí ío chindee ñaha-gá xii-í quidè-í chiúⁿ-gá. Te ío váha ní cáháⁿ ndihí ñaha-güedé xii-í, ndihí té Bèé, te ní cuu ñⁿnuu-ndí sá nchúhú quíhíⁿ-ndí cáháⁿ-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedé cáháⁿ-güedé tnúhu-gá núú ñáyiú isràél.

10 Te ñⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chindèe-ndí cue ñáyiú ndàhú, te sa ducaⁿ tnàhí sàni iní-ndí cada-ndí.

Té Pàblú càháⁿ-dé dóho té Pèlú ñuú Antiòquiá

11 Te cùnàhá ní sáháⁿ té Pèlú ñuú Antiòquiá yàcáⁿ ní cáháⁿ-í dóho-dé, chi quidè-dé ñⁿ sá ñà túú tàú-dé cada-dé ní cùu.

12 Te quidè váha-dé ní cùu chi xèxi-dé ndihí ñáyiú ñá túú cùu ñáyiú isràél, dico òré ní sáá ñⁿ úú ñáyiú cùndihí té Jàcobó, te òré-áⁿ ñà túú-gã ní cuíní-dé caxi-dé ndihí ñáyiú-áⁿ. Te ducaⁿ ñí quidè-dé chi ní yùhú-dé cue ñáyiú nchìcúⁿ nihnu quidè nchaa nacuaá ní cáháⁿ ndí Moisés sá vã càháⁿ váha-yu cuèndá-dé.

13 Te tnàhá dava-gá ñáyiú isràél xĩndecu ichi Yá Ndiöxí ñá túú quidè váha-yu, chi quidè-yu dàtná quidè té Pèlú ní cùu, te ndéé tnàhá té Bèé ní ngüíta-dé ducaⁿ quidè-dé ní cùu.

14 Te òré ní xiní-í sá ñà túú quidè-güedé ndihí-yu nàcuáa càháⁿ tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáhaⁿ-í xii té Pèlú: “Yòhó cúú-n tée isràél, te ñá túú quidè-n nchaa nacuaá quidè ñáyiú isràél, chi quidè-ni-n datná quidè nchàa ñáyiú ñá túú cùu ñáyiú isràél. Te núú ducaⁿ quidè-n, ¿te ná cuèndá dánèhé-n ñáyiú ñá túú cùu ñáyiú isràél sá cádá-yu nchaa nàcuáa quidè ñáyiú isràél?”, duha ní xáhaⁿ-í xii té Pèlú.

Íⁿ-ni nàníhí tàhú-ó ndihí ñáyiú isràél núu na quèndáá iní-ó Xítohó Jesucristú ndihí-yu

15 Te yùhú ndihí té Pèlú cúú-ndí ñaní tnàhá ñáyiú isràél, te ñá túú ndècu-ndí ichi

cuèhé ichi duha dàtná ndécú nchàa ñáyiú ñá túú cùu ñáyiú isràél.

16 Te xiní-ó sá vã cùndècu-gá cuéchi-o núú Yá Ndiöxí te núu na quèndáá iní-ó Xítohó Jesucristú, te ñá díú sá cáncchícúⁿ nihnu-o càda-o nchaa nacuaá ní cáháⁿ ndí Moisés. Te tnàhá dava nchúhú ñáyiú isràél sàndáá iní-ndí Xítohó Jesucristú, te xíáⁿ cùtnùní iní-ndí sá ñà túú-gã cuéchi-ndí ndécú núú-gã, dico ñá díú sá ñí cáncchícúⁿ nihnu-ndí ní quidè-ndí nàcuáa ní cáháⁿ ndí Moisés, chi cuèndá sá sàndáá iní-ndí Xítohó Jesucristú. Te vá yòo ñⁿ cachí-ó sá ñà túú ndècu cuéchi-xi núú Yá Ndiöxí cuèndá sá nchìcúⁿ nihnú-yu nchaa nàcuáa ní cáháⁿ ndí Moisés.

17 Te núu cuíní-ó sá vã cùndècu cuéchi-o núú Yá Ndiöxí cuèndá sá sàndáá iní-ó Xítohó Jesucristú, te xíáⁿ cùtnùní iní-ó sá ñà túú quidè váha-o. ¿Te vá cúú tnàhí cani iní-ó sá Xítohó Jesucristú dánèhé ñàhá-gã xii-o sá vã cádá váha-o cùndecu-o!

18 Te yùhú càchí-í sá vã cáncchícúⁿ nihnu-gá-ó nchàa nacuaá ní cáháⁿ ndí Moisés, dico núu vitna càchí-í sá xiní ñùhu-xi cada-o nchaa nacuaá ní cáháⁿ ndí ña, te ñá túú quidè váha-í núú Yá Ndiöxí te núu ducaⁿ na càda-í.

19 Te yùhú duuⁿ duuⁿ ní cutnùní iní-í sá vã ndácù-í cada-í nchaa nàcuáa ní cáháⁿ ndí Moisés núu xíáⁿ ní dáñà-í ñá túú-gã nchìcúⁿ nihnu-í nchaa nàcuáa ní cáháⁿ ndí cuèndá sá cuíní-í cùndecu-í sá cúú-xi Yá Ndiöxí.

20 Te Xítohó Jesucristú ní xíhí-gá cuèndá-í, dico dàtná tnúhu sá tnàhá-í ní xíhí ndihí-gá, chi ñá cúú-gã cada-í nchaa nàcuáa sàni iní mée-í, chi Xítohó Jesucristú-nã ndécú ndihí ñaha-gá xii-í táxí tnùní ñàhá-gã. Te vitna ndècu-í ñuyíú-a, te ío sàndáá iní-í Xítohó Jesucristú Déhe Yá Ndiöxí, te chindee ñaha-gá xii-í. Te diu-ni Xítohó Jesucristú ío cùu iní ñàhá-gã xii-í núu ní xíhí-gá núú cùrúxí sá cuèndá-í.

21 Te vitna ñá túú dàquee tíhù-í sá váha ní quidè ñaha Yá Ndiöxí xii-í, chi núu ní ndàcu-o vá cùndècu cuéchi-o núú Yá Ndiöxí cuèndá sá nchìcúⁿ nihnu-o quidè-o nchaa nacuaá ní cáháⁿ ndí Moisés ní cùu ña, te àúⁿ nã cuu ní xíhí Xítohó Jesucristú ní cùu te núu ducaⁿ.

3

Vá dáńá ndèé-ó quíndáá iní-ó tnũhu Xítohó Jesucristú

¹ Te nchòhó ñáyiú distritú Gàlaciá, ñáyiú sa xĩndecu ichi Xítohó Jesucristú, ¿ná cuèndá ío ñí iní-ndó ñă cuení-ndó tnĩ-ndo nchaa tnũhu càháⁿ-gá?, ¿te yoo ní dádãhu ndodo iní ñáhá xii-ndo núu ducaⁿ quide-ndo? Te ñaha-ndo sá ïo váha ní dánèhé ñáhá-ndĩ xii-ndo nàcuáa ní cuu ní xihí Xítohó Jesucristú.

² Te vitna càháⁿ-ndó núu sá nchicúⁿ nihnu-ndo nchaa nacuáa ní càháⁿ ndĩ Moisés ní níhí-ndó Espíritú Yá Ndiõxí ndécú ndĩhi-ndo, àdi sá ni sàndáá iní-ndó tnũhu Xítohó Jesucristú sá ñí dánèhé ñáhá-ndĩ xii-ndo ñí níhí-ndó Espíritú-gá ndécú ndĩhi-ndo.

³ Te nchòhó ío ñí dĩquí-ndó chi Espíritú Yá Ndiõxí tá quide váha ñaha-xi xii-ndo cuáháⁿ ní cùu. ¿Te náa vitna mee-ñă-ndó cuení-ndó càda-ndo nacuáa ta quide ñaha Espíritú-gá cuáháⁿ xii-ndo ni cùu-áⁿ?

⁴ Te sàni ñⁿ sàni úú iní-í cuèndá-ndó sá àuⁿ ñă cuu nándi yáha-ndo ndècu-ndo ichi Yá Ndiõxí.

⁵ Te xini-ndó sá Yá Ndiõxí ní taxi-gá Espíritú-gá ní ngúndecu ndĩhi-ndo, te ní quide-gá sá vã yõo tnáhí ndacu cada núu-ndó ñí xini-ndó. Te ducaⁿ ñí quide-gá, chi ní sàndáá iní-ndó-gã, dico ñá díú cuèndá nchaa nacuáa ní cachí ndĩ Moisés cada ñáyiú ducaⁿ ñí quide-gá.

⁶ Te ndĩ Abrahám ducaⁿ ïo ní sàndáá iní ndĩ Yá Ndiõxí, núu xiãⁿ ní cachí-gá sá ñí cudũ ndĩ núu-gã sá dúcáⁿ ñí quide ndĩ.

⁷ Te càchí tnũhu ndáá-í xii-ndo sá ncháá ñáyiú sàndáá iní ñáhá xii Yá Ndiõxí dàtná ní sàndáá iní ñáhá ndĩ Abrahám xii-gá, ñáyiú-áⁿ ñⁿ-ni cùu-yu ndĩhi ndĩ núu-gã.

⁸ Te núu tùtú Yá Ndiõxí ní ngódó tnùnĩ tnũhu váha, tnũhu sá ñí xáhaⁿ Yá Ndiõxí xii ndĩ Abrahám, te duha ní xáhaⁿ-gã xii ndĩ: “Nchaa ñáyiú nihĩ ñuyú cada váha-í-yu sá cuèndá-n”, duha ní xáhaⁿ-gã xii ndĩ. Te sá dúcáⁿ ñí ngódó tnùnĩ núu tùtú Yá Ndiõxí ndéé dàvá-áⁿ, te xiãⁿ cùtnùnĩ sá sàa nduu, te cue ñáyiú ñá túú cùu ñáyiú isràel vá cùndècu-gá cuéchi-yu núu-gã te núu na quíndáá iní ñáhã-yu xii-gá.

⁹ Te xiãⁿ núu nchaa ñáyiú sàndáá iní ñáhá xii Yá Ndiõxí cada váha ñaha-gã xií-yu dàtná ní quide váha-gá ndĩ Abrahám, chi ndĩ-áⁿ ducaⁿ ñí sàndáá iní ñáhá ndĩ xii-gá.

¹⁰ Te nchaa ñáyiú cuení cada nchaa nacuáa ní càháⁿ ndĩ Moisés cuèndá sá cuení-yu sá vã cùndècu-gá cuéchi-yu núu Yá Ndiõxí, ñáyiú-áⁿ dáña nihnu ñaha-gá xií-yu, chi vá ndácũ-yu cadá-yu nacuáa sàni iní-yu, te ducaⁿ càda-gá chi quèe ndáá-xi nacuáa càháⁿ-xi núu tùtú-gá núu càchí-xi sá ncháá ñáyiú ñá túú quide nchaandi tùhú nacuáa ní càháⁿ ndĩ Moisés te dáña nihnu ñaha-gá xií-yu.

¹¹ Te núu na cànchicúⁿ nihnu-ni-o càda-o nacuáa ní càháⁿ ndĩ Moisés, te ñá túú vèdana chĩndee ñaha-xi xii-o nacuáa vá cùndècu-gá cuéchi-o núu Yá Ndiõxí. Te ndáá chi núu tùtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gã cuéchi-xi ndècu ío váha ndècú-yu núu-gã.

¹² Te núu dícó ío ñáyiú quide nchaandi tùhú nacuáa ní càháⁿ ndĩ Moisés ñá, te ñá túú xini ñuhu-xi quíndáá iní-yu tnũhu Xítohó Jesucristú, chi núu tùtú Yá Ndiõxí càchí-xi sá núu dícó ío ñáyiú ndacu cada nchaa nacuáa ní càháⁿ ndĩ Moisés ñá, te cundecu váha-yu núu Yá Ndiõxí.

¹³ Te tnũhu ní chídó tnùnĩ ndĩ Moisés càchí-xi sá ïo ndècu cuéchi-o núu Yá Ndiõxí cuèndá sá ñă ndácú-ó càda-o nchaa nacuáa ní càháⁿ ndĩ, te cuèndá xiãⁿ tá dáña nihnu ñaha-gá xii-o cuáháⁿ. Dico Xítohó Jesucristú ní xido-gá nchaa cuéchi-o cuèndá sá vã dáńá nihnu ñaha-gá Yá Ndiõxí xii-o. Te càchí-xi núu tùtú Yá Ndiõxí: “Íⁿ tée na càta caa-güedé ñⁿ yutnu, te tée-áⁿ cùú-dě tée dàña nihnu ñaha Yá Ndiõxí”, duha càchí-xi núu tùtú-gã.

¹⁴ Te ducaⁿ ñí yáha Xítohó Jesucristú, chi cuení Yá Ndiõxí sá ndùu táhú nchaa ñáyiú ñá túú cùu ñáyiú isràel cundecu váha-yu dàtná ní nduu táhú ndĩ Abrahám ndécú váha ndĩ. Te ducaⁿ ñí yáha-gã cuèndá nchaa nchoo ñáyiú sàndáá iní ñáhá xii-gá ngúndecu ndĩhi-o Espíritú Yá Ndiõxí sá ñí cachí mée-gã taxi-gá.

Nacuáa ní cachí Yá Ndiõxí cada-gá

¹⁵ Te nchòhó cue ñáyiú ndècu ndĩhi-í ichi Yá Ndiõxí na càchí tnũhu-í xii-ndo nacuáa quide cue ñáyiú ñuyú-a cuèndá

tecú tnùnì-gá-ndó nàcuáa quìde Yá Ndiòxí. Chi ñáyiù-áⁿ òré cuìnì-yu cadá-yu ìⁿ sá cadá-yu, te díhna-gá ndátnùhu-yu te òré cúú ìⁿnuú-yu, te sáha fìrmá-yu ìⁿ tutú te tutú-áⁿ vǎ yǒo ìⁿ ndacu cáháⁿ sá vǎ nándìhi-gá-xi, te ni vǎ yǒo-gá ndacu nágá tnúhu chido tnùnì núú-xí.

16 Te ducaⁿ ñí quide Yá Ndiòxí ndìhi ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-áⁿ cúú-xí cuendá méé ndíi ndìhi cuendá ìⁿ ñaní tnáhá ndíi cundecu ñuyíú-a ndéé cuèé-gá. Te núú tütú-gá càchí-xi sá tnùhu-áⁿ cúú-xí cuendá ìⁿ-ni ñaní tnáhá ndíi te ñá díú cuendá nchaá-yu. Te ñaní tnáhá ndíi téé cùu cuendá tnúhu-áⁿ cúú Xítohó Jesucristú.

17 Te na càchí tnúhu-í xii-ndo sǎ Yá Ndiòxí ní quide ndáá duuⁿ-gá ndìhi ndíi Àbrahám nàcuáa cada-gá. Te sa ní cuu cúmí ciendú ócò úxí cuía sǎ dúcáⁿ ñí xáhaⁿ Yá Ndiòxí xii ndíi Àbrahám, te dàtnùnì ní xáhaⁿ-gǎ xii ndíi Moisés chido tnùnì ndíi nàcuáa cada ñáyiù, te nchaa tnúhu ní chídó tnùnì ndíi Moisés ñá túú dàquee tíhú-xi tnúhu sá ñí xáhaⁿ Yá Ndiòxí xii ndíi Àbrahám nàcuáa cada-gá.

18 Te núú dicó cuendá nchaa tnúhu sá ñí chídó tnùnì ndíi Moisés ní náníhí tàhú-ó ñá, te ñá túú-gǎ xíní ñùhu-xi cada cuendá-ó tnùhu ní xáhaⁿ Yá Ndiòxí xii ndíi Àbrahám cada-gá ní cùu te núu ducaⁿ. Te ndíi-áⁿ ñí naníhí tàhú ndíi chi ducaⁿ ñí cachí Yá Ndiòxí cada ñaha-gǎ xii ndíi.

19 Te nchaa tnúhu ní cáháⁿ ndíi Moisés ní ngódó núú-xí nchìcúⁿ nihnu ñáyiù cuendá ducaⁿ cùtnunì iní-yu sá ndécú cuèchi-yu, te nchìcúⁿ nihnu-ní-yu ndéé ní sáá nduu ñí quexìo Yaá cúú ñaní tnáhá ndíi Àbrahám, chi Yaá-áⁿ ducaⁿ ñí xáhaⁿ Yá Ndiòxí quixi-gá cada váha-gá nchaa ñáyiù. Te nchaa tnúhu ní chídó tnùnì ndíi Moisés, chi Yá Ndiòxí ní tendaha-gǎ cue espíritú xínú cuèchi núú-gǎ ní sáháⁿ-xi ní xítñùhu ñaha-xi xii ndíi nàcuáa danèhé ndíi ñáyiù.

20 Te Yá Ndiòxí ñá túú ní cáháⁿ-gá núú méé ñáyiù, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndìhi-gá ndíi Àbrahám chi núú méé núú ìⁿ ndíi ndìhi-gá ní xáhaⁿ-gǎ xii ndíi nàcuáa cada-gá.

ndíi Moisés

21 Te nchaa nàcuáa ní chídó tnùnì ndíi Moisés, ndìhi nchaa nàcuáa ní xáhaⁿ Yá Ndiòxí xii ndíi Àbrahám cada-gá, ñá túú dàquee tíhú tnáhá-xí. Te núu dicó náníhí tàhú ñáyiù nchìcúⁿ nihnu nchaa nàcuáa ní cáháⁿ ndíi Moisés ñá te cudiú-yu núú-gǎ cuendá-ni sá nchìcúⁿ nihnú-yu nchaa nàcuáa ní cáháⁿ ndíi ni cùu.

22 Te núú tütú Yá Ndiòxí càchí-xi: “Nchaa nchòhó ñáyiù ndècu ñuyíú ndécú cuèchi-ndo”, duha càchí-xi. Te ducaⁿ càháⁿ-xi cuendá quíndáá iní-ó Xítohó Jesucristú, te naníhí tàhú-ó chi ducaⁿ ñí cachí Yá Ndiòxí cada-gá.

23 Te cùtnáhá vátá cùndècu ndìhi-gá-ó tnùhu Xítohó Jesucristú, te nchìcúⁿ nihnu-o nchaa nàcuáa ní cáháⁿ ndíi Moisés, te ní cutnùnì iní-ó sǎ ìo ndècu cuèchi-o ni cùu. Te ducaⁿ-ni nchìcúⁿ nihnu-o ndéé ní sáá nduu ñí quexìo Xítohó Jesucristú ñuyíú-a, te ní sándáá iní-ó-gǎ.

24 Te nchaa tnúhu sá ñí chídó tnùnì ndíi Moisés ní sanu ichi ñaha-xi xii-o nàcuáa cada-o cùndecu-o, te ducaⁿ-ni sanu ichi ñaha-xi xii-o ndéé ní sáá nduu ní quexìo Xítohó Jesucristú ñuyíú-a. Te ducaⁿ ñí cuu cuendá quíndáá iní-ó-gǎ, te vá cùndècu-gá cuèchi-o núú Yá Ndiòxí.

25 Te vitna ní ngúndecu ndìhi-o tnùhu Xítohó Jesucristú, te ñá túú-gǎ xíní ñùhu-xi canu ichi ñaha nchaa tnúhu ní chídó tnùnì ndíi Moisés.

26 Te vitna tnáhá nchaa nchòhó cúú-ndó dèhe Yá Ndiòxí, chi ní sándáá iní-ndó Xítohó Jesucristú.

27 Te nchòhó ní sandute-ndo dàtná càchí-gá, te ndècu-ndo ndìhi-gá, te quìde-ndo nchaa nàcuáa ní cáháⁿ-gá ndécú-ndó, te ìo ndècu yìñuhu-ndo núú Yá Ndiòxí dàtná ndécú yìñuhu mee Xítohó Jesucristú.

28 Te vitna ìⁿ-ni cùu-o nchaa-o ndècu-o ndìhi Xítohó Jesucristú cuèi cùu-o ñáyiù israhél àdi ñá túú cùu-o, te cuèi cùu-o ñáyiù ñá túú tnáhí dàñá quee núú chíúⁿ pàtróoⁿ-xi àdi cuu-o ñáyiù dàñá queé núú chíúⁿ pàtróoⁿ-xi, te cuèi téé te cuèi ñadíhí ìⁿ-ni cùu-o nchaa-o ndècu-o ndìhi Xítohó Jesucristú.

29 Te nchòhó ndécú ndìhi-ndo Xítohó Jesucristú, te cùu-ndo datná cue ñaní tnáhá

Nàcuáa ndíi nchaa tnúhu ní chídó tnùnì

ndíi Àbrahám, chi ní nduu táhú-ndó cùndecu váha-ndo núú Yá Ndiöxí dàtná ní nduu táhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ nĩ cachí-gã cunduu.

4

¹ Te nchòhó xìní-ndó sã ìⁿ té lìhli chi vátá nãgã cuãñaha tãtã-dě cuu cuendá-dě chi lìhli-dě, te ìⁿ-ni cùu-dě ndíhi téé xínu cuechi, dico na sàá nduu cuèhnu-dě, te nduu táhú-dě nchaa sã ndécú ndíhi tãtã-dě.

² Te xitó-yu té lìhli-áⁿ sáhnú-dě ndéé sàá nduu nĩ cachí tãtã-dě sã cuãñaha-dě sã ndúú táhú-dě.

³ Te ducaⁿ sãtnahá-xi cùu nchoo, chi nchicúⁿ nihnu-o nchàa nacuáa ní cáháⁿ cue téé ní xíndecu ndéé sanaha ní cùu.

⁴ Te ní sáá nduu nĩ quide Yá Ndiöxí dàtná ní cachí-gã, te ní tendaha-gã Déhe-gã Xítohó Jesucristú ní quixi-gã ñuyíú-a, ní dácácú ñaha ìⁿ ñadihí te ní cuu-gã ñáyiu, te ní quide-gã nchaa nacuáa ní cáháⁿ ndíi Moisés.

⁵ Te ducaⁿ nĩ tendaha Yá Ndiöxí Déhe-gã cuendá sã vã cãchicúⁿ nihnu-gã-ó nchàa nacuáa ní chídó tñuní ndíi Moisés cuendá ducaⁿ te cuu-o dèhe Yá Ndiöxí.

⁶ Te Yá Ndiöxí ní taxi-gã Espiritú Déhe-gã Xítohó Jesucristú ndécú ndíhi-ndo chi cùu-ndo déhe-gã, te Espiritú-áⁿ chíndèe ñaha-xi xii-ndo te cãchí-ndó: “Yòhó Dútú Ndiöxí cúú-n Tãtã méé-ndí”, duha cãchí-ndó.

⁷ Te xiãⁿ cútnùní iní-ndó sã cúú-ndó dèhe Yá Ndiöxí vitna, te ñá túú-gã cúú-ndó dàtná cue ñáyiu ñá túú tñahí dàñá quee núú chíúⁿ pàtróóⁿ-xi. Te sã dúcáⁿ cùu-ndo déhe-gã, te Xítohó Jesucristú taxi-gã nchaa sã váha ní cachí Yá Ndiöxí nduu táhú-ndó.

Té Pãblú ío sàni iní-dé cuendá nchaa ñáyiu ndècu ichi Xítohó Jesucristú

⁸ Te cútnahá vátá quíndáá-gã iní-ndó tñuhu Yá Ndiöxí ní xínu cuechi-ndo núú nchàa sã cãchí-yu cùu ndiöxí te ñá ndáá sã ndiöxí cúú-xí.

⁹ Te vitna nchòhó cãháⁿ ndíhi-ndo Yá Ndiöxí, te mee-gã xìní ñáhã-gã xii-ndo, te ñá túú nduu váha-xi nanchòcãva iní-ndó càda tucu-ndo nacuáa ní xóo cada-ndo dñhna, chi nchaa xiãⁿ ñá túú vèdana nãndíhi-xi.

¹⁰ Te nchòhó cãnehe íi-ni-ndo ndùu cachí-ndó íi, te diu-ni ducaⁿ quide-ndo

dava yoó ndíhi dava cuíá, te ndi tnahá nduu sàcáo vico diu-ni ducaⁿ quide-ndo cãnehe íi-ndó ndùu-áⁿ.

¹¹ Te ío sàni iní-í cuendá-ndó, chi na cuáhãⁿ àúⁿ nã cuu ní dãnèhé ñáhã-í xii-ndo tñuhu Yá Ndiöxí.

¹² Te cãháⁿ ndáhú-í núú nchòhó ñáyiu ndècu ndíhi-í ichi Xítohó Jesucristú sã cadá-ndó dàtná quidè-í ñá túú nchicúⁿ nihnu-í nchaa tñuhu ní cáháⁿ ndíi Moisés, chi yúhú quidè-í vitna dàtná ní quide nchòhó ñá túú ní cãchicúⁿ nihnu-ndo nacuáa ní cáháⁿ ndíi. Te cútnahá ní xíndecu ndíhi ñaha-í xii-ndo nĩ quide váha ñaha-ndo xii-í.

¹³ Te sa ñaha-ndo sã cùtnahá ní cáháⁿ-í tñuhu Xítohó Jesucristú núú-ndó ndéé dñhna ní huhú-í, núu xiãⁿ ní xíndecu ndíhi ñaha-í xii-ndo nĩ cáháⁿ-í tñuhu-gã núú-ndó.

¹⁴ Te cuéhé sã nĩ tnahá-í-áⁿ cúú-xí ìⁿ cuéhé sã vã yóo tñahí cundee iní-xi cundecu ndíhi ñaha xii-í ní cùu, dico nchòhó chi ío váha ní cáháⁿ ndíhi ñaha-ndo xii-í, te ñá túú ní sàni cuéhé ní sàni duha iní-ndó cuendá-í, te ní cáháⁿ ndíhi ñaha-ndo xii-í dàtná tñuhu sã yúhú cúú-í ìⁿ espíritú xínú cuèchi núú Yá Ndiöxí àdi datná méé Xítohó Jesucristú.

¹⁵ ¿Te ná ní tnahá-ndó núu ñá túú-gã sání váha iní-ndó cuendá-í dàtná ní xóo cada-ndo ndéé dñhna ío váha ní xóo caní iní-ndó cuendá-í? Te na cãchí tñuhu ndáá-í xii-ndo sã ío ní cuu iní ñáhã-ndó xii-í cútnahá ní xíndecu ndíhi ñaha-í xii-ndo, te nãndí sã ndécú ndíhi-ndo taxi-ndo xii-í ní cùu, te núu dícó sã cúú te ndéé tñuhu-ndo tava-ndo te taxi-ndo xii-í ní cùu.

¹⁶ ¿Te náa cùu úhú iní ñáhã-ndó xii-í vitna cuendá sã cãháⁿ-í tñuhu ndáá tñuhu Yá Ndiöxí núú-ndó-ãⁿ?

¹⁷ Te ío ñáyiu ío váha cãháⁿ ndíhi ñaha xii-ndo, dico ñáyiu-áⁿ ñúhú cuéhé iní-yu, chi cuíní-yu sã vã cúú-gã cáháⁿ ndíhi tñaha-o, chi mee-nã-yu cundecu ndíhi-ndo cuíní-yu.

¹⁸ Te váha quide ñáyiu cãháⁿ ndíhi ñaha xii-ndo ndíhi tñuhu yíñuhu, te núu cuíní-yu cadá-yu ìⁿ sã váha sã cúú-xí-ndó. Te ducaⁿ-ni na càdá-yu cuèi òré ñá túú ndècu ndíhi ñaha-í xii-ndo.

¹⁹ Te nchòhó ñáyiu ní sanu ichi-í ichi Xítohó Jesucristú cãchí tñuhu-í xii-ndo sã quidè-xí iní-í dàtná quidè-xí iní ìⁿ ñadihí ñaha sa ní tnahá òré cacu déhe-xi, te

ducaⁿ quìde-xi iní-í, chi ío vài sani iní-í cuendá-ndó dàtná ní xóo cada-í ndéé díhna, te ducaⁿ-ni càda-í ndéé ná sàa nduu càda-ndo nchaa nacuaá càháⁿ Xítóhó Jesucristú.

²⁰ ¡Te ío váha cada-xi te núu dìcò tnavíi sa ndècu ndihí ñaha-í xii-ndo cuendá càháⁿ-í núu-ndó nàcuáa cada-ndo, te ñá cùtnùnì iní-í nása cada-í cuendá-ndó!

Cuendá ndíi Àgár ndihí ndíi Sără

²¹ Te nchòhó ñáyiú cuèni canchicúⁿ nihnu nchaa tnúhu ní càháⁿ ndíi Moisés, ¿náa ñá túú tècú tnùnì-ndó nàcuáa càháⁿ-xi tnúhu ní chídó tnùnì ndíi?

²² Chi càchí tnúhu ní chídó tnùnì ndíi-áⁿ sã ndíi Abrahám ní xíndecu úú déhe ducuⁿ ndíi, te ñⁿ-dé ní cuu déhe ndíi ndihí ñadhí méé ndíi ndíi Sără, te íngá-dé ní cuu-dé déhe ndíi ndihí ñⁿ ndíi ní xinu cuechi nũ-yu ní xínani Àgár.

²³ Te sá dúcáⁿ ñí cacu déhe ndíi Sără, chi mee Yã Ndiõxí ní cundàhú iní ñáhá-gã xii-aⁿ, chi ducaⁿ ñí cachí-gá cada-gá. Dico ndíi ní xinu cuechi-ãⁿ chi ducaⁿ tnàhí ní nduu táhú ndíi-áⁿ sã cóo dèhe ndíi.

²⁴ Te na càchí tnúhu-í xii-ndo nã cúú sã nánèhé ndí ndúú cue ndíi dñí-áⁿ. Te úú xito ní càháⁿ Yã Ndiõxí nàcuáa cada-gá, te ñⁿ ndíi-áⁿ nánèhé ndíi nàcuáa ní càháⁿ Yã Ndiõxí xito díhna nuu, te íngá tucu ndíi-áⁿ nánèhé ndíi nàcuáa ní càháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yã Ndiõxí xii ndíi Moisés yucu Sinái cada ñáyiú, te nchaa ñáyiú nchicúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñà túú tnàhí ní dàñá-dé quee-dé núú chíúⁿ pàtróón-dé, te ducaⁿ sãtnahá-xi cùú-yu chi nchicúⁿ nihnú-yu nchaa nàcuáa ní xáhaⁿ Yã Ndiõxí xii ndíi Moisés.

²⁵ Te tnúhu Àgár quée-xi: Yucu Sinái, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáyiú ndècu ñuu Jerusálén, chi ñáyiú-áⁿ ndécú-ñi-yu dàtná ní xíndecu ndíi Àgár ndihí déhe ndíi, chi cue ndíi-áⁿ ñí cuu cue ndíi ñáyiú ñá túú tnàhí ní dàñá quee núú chíúⁿ pàtróón-xi, te ducaⁿ sãtnahá-xi cùu ñáyiú-áⁿ chi nchicúⁿ nihnu-ní-yu nchaa nàcuáa ní càháⁿ ndíi Moisés.

²⁶ Dico nchoo ñí nduu táhú-ó cùndecu-o ñuu Jerusálén sáa nũú ndécú Yã Ndiõxí, te vitna chi ñá túú-gã nchicúⁿ nihnu-o nchaa nacuaá ní càháⁿ ndíi Moisés.

²⁷ Te duha càháⁿ-í, chi núú tütú Yã Ndiõxí càchí-xi:

Yòhó ñaha ní nduu táhú vã cóo dèhe-xi ní cùu, vitna cana saa-n sã cúú ñí-n cuèi vátá quíni-gá-n nása càcu ñⁿ landú.

Te cuèi ní cuu táhú-n sã vã cóo dèhe-n ní cùu dico ío-gá titní dèhe-n cóo dacúúxí xíchí ñí cuu táhú tnàhí sã cóo dèhe-xi.

Duha càchí-xi núú tütú-gá.

²⁸ Te nchoo cuè ñáyiú ndècu ichi Xítóhó Jesucristú vitna cùu-o datná ndíi Isàác, chi ndíi-áⁿ ñí cacu ndíi, chi mee Yã Ndiõxí ní cachí-gá sã cacú ndíi. Te ducaⁿ sãtnahá-xi cùu nchoo chi ní nduu-o dèhe-gá vitna chi ducaⁿ ñí cachí tucu-gá cunduu.

²⁹ Te déhe ndíi Àgár ní nduu táhú tnàhí ndíi sã cacú ndíi ñuyú-a, te ndíi-áⁿ ñí cuu úhú iní ndíi ndíi Isàác, te ndíi Isàác-áⁿ chi Espíritú Yã Ndiõxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñáyiú ndècu ndihí Espíritú Yã Ndiõxí cúú úhú iní ñáhá ñáyiú xii-o.

³⁰ Te núú tütú Yã Ndiõxí càchí-xi: “Chí nàcuáa xíchí xínú cuèchi ndihí dèhe-xi na nùhú-yu, chi déhe xíchí xínú cuèchi-áⁿ ñá túú nã níhí-dé nduu táhú-dé, chi mee-ñi dèhe ñaha ndècu vehe-xi nduu táhú-dé sã cuãhaha tãtá-dé”, duha càchí-xi núú tütú-gá.

³¹ Te nchoo cuè ñáyiú ndècu ichi Xítóhó Jesucristú ñá túú-gã cúú-ó dàtná cúú dèhe ndíi ní xinu cuechi-ãⁿ, chi ní cuu-o vitna datná cúú ndíi ní nduu táhú nchaa sã ñí sãhaha tãtá-xi-áⁿ. Te ducaⁿ ñí cuu, chi Yã Ndiõxí ní dácacu ñaha-gã xii-o cuendá sã vã canchicúⁿ nihnu-gá-ó nchaa nacuaá ní càháⁿ ndíi Moisés.

5

Canchicúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nàcuáa vá cáni iní-ó sã nánihí tãhú-ó te núu na canchicúⁿ nihnu-o nàcuáa ní càháⁿ ndíi Moisés, te ñi-ni ducaⁿ càni iní-ó cùndecu-o te vá ngõo càni iní-ó sã nánihí tãhú-ó te núu na canchicúⁿ nihnu-o càda-o nacuaá

ní cáháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cùtnàhá vátá cùndècu-gá-ó ìchi-a.

² Te yúhú té Páblú cuíní-í sá cùndedóho-ndo ìⁿ tnúhu na càháⁿ-í-a. Te núu nchòhó cuáha-ndo seña ñⁱⁱ-ndo cuendá sá sàndáá iní-ndó nàcuáa ní cachí ndíi Moisés cada-ndo, te núu ducaⁿ na càda-ndo ña, te áúⁿ nã cuu ndècu-ndo ichi Xítohó Jesucristú te núu ducaⁿ.

³ Te datná ní cachí-í xii-ndo, te ñu-ni ducaⁿ càháⁿ tucu-í vitna sá núu ndèda-ni càa ìⁿ tée na cuáha-dé seña ñⁱⁱ-dé, te xini ñuhu-xi sá dàcuítí tãú-dé cada-dé nchaa nàcuáa ní cáháⁿ ndíi Moisés.

⁴ Te nchaa nchòhó ñáyiú sàni iní sá ñã túú-gã cuéchi-xi ndècu núú Yã Ndiòxí cuendá sá nchicúⁿ nihnu-ndo nchaa nàcuáa ní cáháⁿ ndíi Moisés, ñã túú-gã ndécú-ndó ndíi Xítohó Jesucristú, te ni Yã Ndiòxí ñã túú-gã cùndàhú iní ñáhã-gã xii-ndo càda váha ñaha-gã.

⁵ Dico nchaa nchoo ñáyiú sàndáá iní ñáhã xì-gã cùñu-o núú-gã, chi chindee ñaha Espiritú-gã xii-o, te ndètu cahnu-ná-ó sàá nduu cùñaha núú Yã Ndiòxí xii-o sã cùñu-o núú-gã.

⁶ Te nchoo cuè ñáyiú ndècu ndíi Xítohó Jesucristú ìⁿ-ni quide-xi cuéi na cuáha-o seña ñⁱⁱ-o àdi vá cuáha-o, chi ñã túú chindee ñaha-xi xii-o nàcuáa cundecu váha-o ndíi-gã. Te ìⁿ-ni díi-ni sá xini ñuhu-xi quindáá iní-ó Xítohó Jesucristú, te núu ducaⁿ na càda-o te cuu iní-ó cuè taha ñáyiú-o.

⁷ Te nchòhó ío váha quide-ndo ndècu-ndo ichi Yã Ndiòxí ní cùu, te vitna cùñuhu-í sá ñã túú-gã sàndáá váha iní-ndó tñuhu-gã, te ducaⁿ quide-ndo chi ndècu ñáyiú sànu ichi ñaha xii-ndo ingá ichi.

⁸ Te ñã díú Yã Ndiòxí Yaá ní cáháⁿ ñáhã xì-ndo ducaⁿ ni cachí-gã cada-ndo sã vá quindáá-gã iní-ndó tñuhu-gã.

⁹ Te nchòhó xini-ndó sã núu luha lev-adurá ná quíhu yuchi te dàndaa-xi. Ducaⁿ sãtnahã-xi cùu ñáyiú dàndahú ñáhã xì-ndo, chi cuíní-yu dàcuíta nihnu ñáhã-yu xii-ndo nchaa-ndo.

¹⁰ Te yúhú cùtnùní ndáá iní-í sá Xítohó Jesucristú chindee ñaha-gã xii-ndo cuendá sá ñã túú nãgã tñuhu quindáá iní-ndó, dico nchaa ñáyiú ducaⁿ dàndahú ñáhã

xii-ndo nacháhu-yu núú Yã Ndiòxí nchaa sá quidè-yu cuéi ná-gã ñáyiú cùu-yu.

¹¹ Te càchí tñuhu-í xii nchòhó ñáyiú ndècu ndíi-í ichi Yã Ndiòxí sá núu díco dànehé-ni-í ñáyiú sá cuáha-yu seña ñⁱⁱ-yu datná ní cachí ndíi Moisés ñã, te vá yóo cuu úhú iní ñáhã xì-í ní cùu, te ni vá túu úhú iní-yu cuendá sá ní xihí Xítohó Jesucristú núú cùrúxí ní cùu.

¹² Te nchaa ñáyiú dàsatú iní ñáhã xii-ndo sã cuáha-ndo seña ñⁱⁱ-ndo, te váha-gã sã ná càdã-yu mèé-yu ìⁿ tñundòho, te ñã díú sã dúcãⁿ cànuichi ñáhã-yu xii-ndo cùndècu-ndo.

¹³ Te nchòhó ñáyiú ndècu ndíi-í ichi Xítohó Jesucristú ñu-ni gã ní taunihnu ñaha-gã xii-ndo cuendá sã vá cànchicúⁿ nihnu-gã-ndó nchaa nàcuáa ní cáháⁿ ndíi Moisés, dico vá cãní iní-ndó sã sã dúcãⁿ ní taunihnu ñaha-gã xii-ndo, te cuu-ni cada-ndo nãndi sã cuèhé sã dúhá vèxi iní-ndó, dico cuu iní tñáhã-ndó ìⁿ ìⁿ-ndo te chindee tñaha-ndo.

¹⁴ Chi ducaⁿ càháⁿ Yã Ndiòxí sá cúú iní-ó cuè taha ñáyiú datná cúú iní-ó mèe-o. Te núu ducaⁿ na càda-o, te quide-o nchaa nàcuáa tãú-xi cada-o datná càháⁿ nchaa tñuhu ní chídó tñùní ndíi Moisés.

¹⁵ Te núu nchòhó cúú úhú iní tñáhã-ndó ndècu-ndo, te ñã túú quide váha-ndo te núu ducaⁿ quide-ndo, dico yúhú càchí-í sã vá dúcãⁿ-gã cada-ndo cùndècu-ndo cuendá sã vá dàcuíta nihnu tñaha-ndo.

Nàcuáa sàni iní ñáyiú ndècu ichi cuèhé ichi duha ndíi nàcuáa sàni iní ñáyiú ndècu ndíi Espiritú Yã Ndiòxí

¹⁶ Te na càchí tñuhu-í xii-ndo sã càdã-ndó nchaa nàcuáa cuíní mèé Espiritú Yã Ndiòxí cada-ndo, te ducaⁿ te vá cãní-gã iní-ndó càda-ndo nãndi nchaa sã cuèhé sã dúhá sàni iní mèé-ndó.

¹⁷ Chi nchaa xíãⁿ ñã túú tñáhã tñuhu-xi ndíi Espiritú Yã Ndiòxí. Te ñu-ni ducaⁿ quide Espiritú Yã Ndiòxí, chi ñã túú tñáhã iní-xi nchaa sã cuèhé sã dúhá sàni iní-ndó. Te sã dúcãⁿ ñã túú tñáhã tñuhu tñaha-xi xíãⁿ ñã túú nihí ndéé-ndó càda-ndo ìⁿ sã váha sàni iní-ndó càda-ndo.

¹⁸ Te núu quide-ndo nchaa nàcuáa sànu ichi ñaha Espiritú Yã Ndiòxí, te ñã túú-gã táxi tñùní ñáhã nchaa tñuhu ní chídó tñùní ndíi Moisés xii-ndo.

19 Te nchaa ñáyiú xìní-yu nchaa nàcuáa quíde ñáyiú quíde cuehé quíde dùha. Te dùha quíde-yu: Cue téé càháⁿ ndíhi-güedé ñáyiú dîhí te ñá díú ñàdîhí-güedé cúú-yu, te diu-ni ducaⁿ xíquide cue ñáyiú dîhí, te nándi-gá nchaa sá cuéhé sá dúhá cuáháⁿ véxi-yu quíde-yu.

20 Te quíde cahnú-yu nchaa sá càchí-yu cùu ndiòxí te ñá ndàá sá ndiòxí cúú-xí, te quíde nduu tnahá-yu, te cùu úhú iní tnahá-yu, te nàá-yu, te cùu cuiñú tnahá-yu, te ío yáchí cúdeéⁿ-yu, te ndúcú-yu mee-ni sá cúú-xí mèe-yu, te ñá túú cùu ñⁿnuú-yu cundecú-yu, te quíde d^ñ tnahá-yu.

21 Te cùu cuedú ín-yu nchaa sá ndécú ndîhi dava-gá-yu, te sàhni tnahá-yu, te ío quíhú-yu, te ndì cuu ndi cuú-yu quíde-yu nchaa sá cuéhé sá dúhá, te nándi-gá nchaa sá cuéhé sá dúhá quíde-yu. Te sa càchí tnúhu-í xii-ndo sá ncháá ñáyiú ducaⁿ xíquide vá ndúú tãhú-yu cundecú-yu núú ndécú Yá Ndiòxí táxí tnùní-gá.

22 Dico Espíritú Yá Ndiòxí chíndèe ñaha-xi xii-o cuu iní tnahá-ó, te cúdeí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnahá-ó, te quíde ndáá-ó ndècu-o.

23 Te ndàhú iní-ó, te quíde-o nchaa nacuaá tàú-ó càda-o, te nchaa xíáⁿ chíndèe ñaha Espíritú Yá Ndiòxí quíde-ó, te núu ducaⁿ quíde-o, te vá yõ ñⁿ-gá càháⁿ sá ñá túú quíde váha-o ndècu-o.

24 Te nchoo cué ñáyiú ndècu ndîhi Xítóhó Jesucristú, sa ñaha-o sá ñí xíhí-gá núú cùrúxí sá cuendá-ó, núu xíáⁿ duuⁿ duuⁿ ní dáñá-ó ncháa ichi cuehé ichi duha, te ñá túú-gá táxí tnùní ñáhá ñí ñⁿ sá cuéhé sá dúhá sá ñí xóo caní iní-ó ní cùu.

25 Te vitna ní ngúndecu ndîhi-o Espíritú Yá Ndiòxí chíndèe ñaha-xi, te xìni ñuhu-xi sá càdá-ó nàcuáa sànu ichi ñaha Espíritú-gá cada-o.

26 Te vá càdá càhnu-o mee-o, te vá ndúcú-ó plètú, te ñí vá cúú cuedú iní-ó sá ndécú ndîhi tnahá ñáyiú-o.

6

Chíndee tnàha-o ñⁿ ñⁿ-o

1 Te nchòhó ñáyiú ndècu ndîhi-í ichi Xítóhó Jesucristú càchí tnúhu-í xii-ndo sá

núu ñⁿ ñáyiú ndècu ndîhi-ndo ichi-gá ní quíde-yu ñⁿ sá ñá túú tàú-yu càdá-yu núú-gá, te nchòhó ñáyiú quíde váha ndècu ndîhi Espíritú Yá Ndiòxí càháⁿ-ndó dôho cue ñáyiú ducaⁿ xíquide-áⁿ cuendá nucúnu ichí-yu, te vii vii càháⁿ ndîhi-ndõ-yu, te ío coto-ndo mèe-ndo cuendá sá vã càdá-ndó ñⁿ sá ñá túú tàú-ndó càda-ndo núú-gá.

2 Te ío chindee tnàha-ndo, te cuáha tnàha-ndo tnúhu ndee iní cundecu-ndo cuendá nchaa sá yãha-ndo. Te núu ducaⁿ na càda-ndo, te quíde-ndo nchaa nacuaá ní càháⁿ Xítóhó Jesucristú cada-o.

3 Te núu ío ñⁿ-ndo càchí-ndó sã ño váha quíde-ndo ndecu-ndo ichi Yá Ndiòxí te ñá ndàá ñá, te dícó dándàhú-ndó mèe-ndo sá dúcáⁿ quíde-ndo.

4 Te ndi d^ñ ndi d^ñ càda cuendá-ndó núu quíde váha-ndo ndècu-ndo àdi ñá túú quíde váha-ndo. Te núu quíde váha-ndo ndècu-ndo ña, te cudíí iní-ndó sã cúú-xí mèe-ndo, te vá caní iní-ndó sã quíde váha-gá-ndó dácúxí dàva-gá-yu.

5 Chi tàú-ó sã ndi d^ñ ndi d^ñ càda cuendá-ó nàcuáa ndècu-o.

6 Te nchaa nchòhó ñáyiú dàcuaha tnúhu Yá Ndiòxí chindee-ndo cué téé dàcuaha ñaha xii-ndo tnúhu-gá cuáñaha-ndo nándi sá xìní ñuhu-güedé.

7 Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndiòxí, chi nchòhó xìní-ndó sã núu na càda váha-o cùndecu-o, te cùu-xi ñⁿ sá vãha sá cúú-xí-ó, dico núu vá càdá vãha-o ña, te ío ndoho-o te núu ducaⁿ na càda-o.

8 Te núu quíde-o nchaa sá cuéhé sá dúhá sàni iní-ó, te diu-ni xíáⁿ dàcuíta ñihu ñaha-xi xii-o, dico núu quíde-o nchaa nacuaá sànu ichi ñaha Espíritú Yá Ndiòxí xii-o, te cundecu ndîhi-o Yá Ndiòxí ñí caa ñí quíhíⁿ.

9 Te xìni ñuhu-xi vá dáñá ndèé-ó càda váha-o cùndecu-o, te ducaⁿ te sáá nduu càda váha ñaha Yá Ndiòxí xii-o, te núu vá ná túhú iní-ó càda váha-o cùndecu-o.

10 Te cada-o sã vãha sá cúú-xí ncháa tnahá ñáyiú-o vitna ndecu-o ñuyíú-a, te ío-gá tàú-ó chindee-o cue ñáyiú ndècu ndîhi-o ichi Xítóhó Jesucristú.

Tnúhu ndéé núú ñí ndîhi-ná

11 Te cundehe-ndo sã ndãa ndãa lètrá tèe-í núú tütú-a sá cúú-xí-ndó.

12 Te nchaa ñáyiú quide yicá sá cuãha-ndo sèñá ñii-ndo dàtná ní cachí ndí Moisés, ñáyiú-áⁿ cúu-yu ñáyiú cuini cudíu núú tnàha ñáyiú-xi. Te ducaⁿ quidé-yu cuendá sá vã ndóhó-yu cuendá nchaa tnúhu sá dánèhé ñáhá sã ní xíhí Xítóhó Jesucristú núú cùrúxí.

13 Te ni ñáyiú sa ní ngúndecu ndihi sèñá ñii-xi ñá túú quidé-yu nchaa nãcuáa ní cáháⁿ ndí Moisés, dico mée-yu cuini-yu sá cuãha-ndo sèñá ñii-ndo. Te ducaⁿ quidé-yu chi quide cahnú-yu mée-yu núú nchàa dava-gá ñáyiú.

14 Te yúhú chi ñá túú quide cahnu-í mée-í cuendá nchaa sá quidé-í, chi mee-ni sã ïo cùu váha iní-í sá Xítóhó Jesucristú ní xíhí-gá núú cùrúxí cuendá-ó. Te diu cuendá sá ní xíhí-gá ñá túú-gã ndécù-í ichi cuèhé ichi duha, te ni ñà túú-gã táxí tnùní ñáhá nì ñⁿ sá cuèhé sá dúhá xì-í.

15 Te ñá túú ñã chindèe ñaha-xi xii-o cuéi na cuãha-o sèñá ñii-o àdi vá cuãha-o, chi ndècu ndihi-o Xítóhó Jesucristú, te ní nduu-o dàtná ñⁿ ñáyiú saa, te xíãⁿ cúú-xí sã ïo-gá xíní ñùhu-xi.

16 Te xicáⁿ táhù-í núú Yã Ndiõxí sá ncháá nchòhó ñáyiú quide nchaa nacuáa càháⁿ-í-a cundecu nahi-ndo, nchòhó ñáyiú cùu cuendá Yã Ndiõxí dàtná ñáyiú isràél chi ñáyiú-áⁿ ní cachí-gá sá cúú cuendá-gá. Te mee-gã ïo cundàhú iní ñáhá-gã xii-ndo chindee ñaha-gá.

17 Te neni vitna cuini-í sá vã yõo ñⁿ-gá chidácá nihnu ñaha xì-í cuendá chiúⁿ quide-í, chi yayacáⁿ sa ní nduu tilòhó ñii-í cuendá sá ndóhò-í cuendá Xítóhó Jesucristú.

18 Te nchòhó ñáyiú ndècu ndihi-í ichi Xítóhó Jesucristú xicáⁿ táhù-í núú-gã sá ïo na chindee ñaha-gá xii-ndo nchàa-ndo. Te ducaⁿ na cùnduu. Te ïo chí cádá ndèe iní-ñã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

Té Pāblú cādūha-dé tutú quíhíⁿ ndaha ñáyiú xīndecu ichi Xítohó Jesucristú ndécú ñuú Éfesú

1 Yúhú té Pāblú ní tendaha ñàha Yá Ndiöxí càháⁿ-í tnúhu Xítohó Jesucristú núú ñáyiú, chi ducaⁿ ñí cachí Yá Ndiöxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xīndecu ñuú Éfesú, te ñuú-ñi nchòhó cúú-ndó ñáyiú sàndáá iní ñáhá xii Xítohó Jesucristú.

2 Te xicáⁿ táhù-í núú Dütú Ndiöxí Yaá cúú Tātá-ó, ndihí núú Xítohó Jesucristú sá ná chindee chitúu ñaha-gã xii-ndo, te ducaⁿ ndi nduú-gá ná cádá te ío váha cuu iní-ndó cūndecu-ndo.

Espiritú Yá Ndiöxí chindèe ñaha-xi xii-o chi ndècu ndihí-o Xítohó Jesucristú

3 Te cachí-ó sã ño càhnu cuu Yá Ndiöxí Yaá cúú Tātá Xítohó Jesucristú, te ndéé andiú quide Yá Ndiöxí nchaa sá váha sá cúú-xí-ó cuendá sá ndécú ndihí-o Espiritú-gá, te ducaⁿ quide-gá chi ndècu ndihí-o Xítohó Jesucristú.

4 Te ndéé cútnàhá vátá ngáva-gá ñuyíú ñí cachí Yá Ndiöxí sá nchóó cùu-o ñáyiú cùu cuendá-gá, te ducaⁿ ñí cachí-gá sá cuendá Xítohó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gã, te ducaⁿ te vá cūndècu cuéchi-o.

5 Te Yá Ndiöxí ío cùu iní ñáhá-gã xii-o ñuú xiáⁿ ducaⁿ ñí cachí-gá ndéé cútnàhá vátá ngáva-gá ñuyíú sã nchóó nduú-o déhe-gá. Te sá cuendá nchaa sá cádá Xítohó Jesucristú sá cúú-xí-ó, xiáⁿ ducaⁿ ñí cachí Yá Ndiöxí, te ducaⁿ ñí cachí-gá chi ducaⁿ tnàhí ní sani iní-gá cunduu.

6 Te xiáⁿ ñuú xini ñuhu-xi sá nchóó càchí-ó sã ño càhnu cuu Yá Ndiöxí, chi ío cūndahú iní ñáhá-gã chindèe ñaha-gã xii-o. Te ducaⁿ quide-gá chi ndècu ndihí-o Xítohó Jesucristú Yaá ío cùu iní-gá.

7 Te Yá Ndiöxí ío cùu iní ñáhá-gã xii-o ñuú xiáⁿ Xítohó Jesucristú ní sati ñíhí-gã te ní xihí-gá cuendá dacăcu nihnu ñaha-gã xii-o núú ùhú núú ndàhú, te ducaⁿ càda cahnu iní-gá nchaa yicá cuéchi-o.

8 Te Yá Ndiöxí ío cūndahú iní ñáhá-gã chindèe ñaha-gã xii-o, nàcuáa ngūndecu ndihí-o nchaa sá xini tnùní-ó te ducaⁿ te cuu-o ñáyiú tēcú tnùní.

9 Te Yá Ndiöxí ní dánèhé ñáhá-gã xii-o nchaa sá ndúú yùhu, nchaa sá ñí sani iní-gá cada-gá. Te ducaⁿ ñí quide-gá chi ducaⁿ ñí sani iní-gá cunduu.

10 Te sá ñí sani iní-gá cada-gá te dacuitíí sã cádá-gã ná sãá nduu, te na sãá nduu-áⁿ te mee-gã cada sá Xítohó Jesucristú quindaha-gã nchaa sá ío andiú, ndihí nchaa sá ío ñuyíú-a.

11 Te nchoo ñí nduu táhú-ó ñí nduu-o ñáyiú cùu cuendá Yá Ndiöxí chi ndècu ndihí-o Xítohó Jesucristú. Te ducaⁿ ñí cuu chi ducaⁿ tnàhí ní sani iní Yá Ndiöxí cunduu. Te nchaandi túhú sá quide-gã, quide-gá nàcuáa sãni iní mée-gã cunduu.

12 Te ducaⁿ ñí cuu cuendá sá nchūhú ñáyiú díhna nuu ñí sàndáá iní tnúhu Xítohó Jesucristú càháⁿ-ndí sá ño càhnu cuu mee Yá Ndiöxí cuendá nchaa sá váha quide-gá.

13 Te nchòhó tucu cútnàhá ní xīndedóho-ndo tnúhu ndáá tnúhu sá càháⁿ nàcuáa naníhí táhú-ó ní cuu ñí nuu-ndo ndihí Xítohó Jesucristú chi ní sàndáá iní-ndó-gã. Te xiáⁿ cútnùní sá nchòhó ní nduu-ndo ñáyiú cùu cuendá Yá Ndiöxí, chi ní ngūndecu ndihí-ndo Espiritú-gá sá ñí cachí-gá taxi-gá.

14 Te sá ndécú ndihí-o Espiritú Yá Ndiöxí xiáⁿ cútnùní sá ndáá nduu táhú-ó cūndecu-o ndihí-gá ná sãá nduu nàcuaca ñaha-gã xii nchaa nchoo ñáyiú cùu cuendá-gá, te sá dúcáⁿ càda-gá ñuú xiáⁿ tàú-ó càchí-ó sã ño càhnu cuu-gá.

Té Pāblú xicáⁿ táhú-dé núú Yá Ndiöxí cuendá cue ñáyiú ndècu ichi-gá

15 Te yúhú nihí-í tnúhu sá nchòhó ío váha sàndáá iní-ndó Xítohó Jesucristú, te nchaa ñáyiú cùu cuendá Yá Ndiöxí ío cùu iní-ndó-yu.

16 Te xiáⁿ ñuú ñá túú dàña ndéé-í ndacáⁿ táhú-í núú-gã cuendá-ndó, te ío xicáⁿ táhú-í

17 núú Yá Ndiöxí Yaá cúú Tātá Xítohó Jesucristú cuendá-ndó. Te ñuú-ñi Yá Ndiöxí

cúu-gã Yaá ío càhnu cuu. Te xicáⁿ táhù-í núú Yă Ndiöxí sá méé-gã ná cáda sã Espiritú-gá chindee ñaha-xi xii-ndo cuendá cuu-ndo ñáyiu tècú tnùní, te na càda-xi sá cútñuní iní-ndó nàcuáa sàni iní Yă Ndiöxí.

¹⁸ Te ducaⁿ xicáⁿ táhù-í núú Yă Ndiöxí cuendá-ndó, cuendá sá nchòhó tecú tnùní-ndó nàcuáa ndùu tnúhu ndee iní ní taxi-gá ní ngúndecu ndìhi-ndo cútñahá ní cáháⁿ ñáhá-gã xii-ndo. Te ducaⁿ cútñuní tucu iní-ndó sã ncháá sã ñí cachí-gá taxi-gá nduu táhú nchoo cuè ñáyiu cùu cuendá-gá cúu-xí mèe cuií-ni sá ìo-gá vaha.

¹⁹ Te cútñuní tucu iní-ndó sã Yă Ndiöxí ío càhnu cuu-gá quidé-gã nchaa núú sã vaha sá cúu-xí nchòo ñáyiu sàndáá iní ñáhá xii-gá, chi quide-gá sá vã yòo tnàhí ndàcu cada sá cúu-xí-ó dàtná ní quide-gá

²⁰ ní dándótó-gã Xítóhó Jesucristú cútñahá ní xihí-gá. Te ní taxinucóo-gá Xítóhó Jesucristú xio cùha-gá táxi tnùní-gá.

²¹ Te Xítóhó Jesucristú ío-gá cùnùu-gá dàcúúxí nchàa núú cuè espíritú, ndìhi dàcúúxí nchàa cue tée yìndaha ñáyiu, ndìhi dàcúúxí nchàa dava-gá cue tée cùnùu. Te cuèi vitna te cuèi ndéé núú cuàháⁿ núú vèxi ducaⁿ-ni ìo cùnùu-gá taxi tnùní-gá.

²² Te mee Yă Ndiöxí ní quide-gá sá Xítóhó Jesucristú taxi tnùní-gá nchaandi túhú sá ío, te ñiu-ni mee Yă Ndiöxí ní cachí-gá sá ncháá ñáyiu cùu cuendá-gá quindaha ñaha Xítóhó Jesucristú.

²³ Te cada iní-ó sã ncháá ñáyiu cùu cuendá Yă Ndiöxí cúu-yu yiqui cùnùú Xítóhó Jesucristú, chi ñí-ni cùu-yu ndìhi-gá, te mee-gã táxi tnùní-gá nchaandi túhú sá ío.

2

Yă Ndiöxí ío cùndahú iní ñáhá-gã xii-o nùu xíãⁿ ní dácãcu nihnu ñaha-gã

¹ Te nchòhó cúu-ndó dàtná ñáyiu ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndìhi Yă Ndiöxí ñí caa ní quíhíⁿ.

² Te ducaⁿ ñí xíndecu-ndo ìchi cuehé ichi duha, chi ní cáncicúⁿ nihnu-ndo nchàa sá cuèhé sá dúhá ío ñuyú-a, te ní xóo cada-ndo nchàa nacuáa càháⁿ sácúíhná, te ñiu-ni sácúíhná-ãⁿ táxi tnùní-xi nchaa dava-gá espíritú cùndìhi-xi, te ñiu-ni-xi

ndècu ndìhi-xi nchaa ñáyiu ñá túú cuení tníi tnúhu càháⁿ Yă Ndiöxí, te dàcáháⁿ ñáhá-xí xii-yu cuendá cundecu-ni-yu ichi cuèhé ichi duha.

³ Te nchaa-o dùcaⁿ ní xóo cada-o dàtná quidé cuè ñáyiu-áⁿ, chi ní xóo cada-o nchàa sá cuèhé sá dúhá ñí xóo caní iní-ó, te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xíãⁿ tàú-ó sã dándòho ñaha Yă Ndiöxí xii-o ní cùu datná tàú-xi dándòho-gá nchaa ñáyiu ducaⁿ ndècu ichi cuehé ichi duha-áⁿ.

⁴ Te Yă Ndiöxí ío cùu iní ñáhá-gã xii-o nùu xíãⁿ ní cùndahú iní ñáhá-gã xii-o

⁵ cuèi cùu-o datná ñáyiu ní xihí sá cuendá nchaa sá cuèhé sá dúhá quide-o ni cuu. Te ducaⁿ ñí quide-gá ní cùndahú iní ñáhá-gã xii-o cuendá cundecu-o ndìhi Xítóhó Jesucristú vitna, te cuu ñí nuu-o ndìhi-gá. Te sá cuendá-ñí sá cùndahú iní ñáhá Yă Ndiöxí xii-o xíãⁿ ní quide-gá nàcuáa nchoo naníhí tàhú-ó.

⁶ Te cada iní-ó sã dàtná ní quide Yă Ndiöxí cútñahá ní dándótó-gã Xítóhó Jesucristú cútñahá ní xihí-gá ducaⁿ ñí quide ñaha-gã xii-o chi ndècu-o ndìhi-gá vitna. Te Xítóhó Jesucristú sa ndècu-gá andìu nùú ndécú Yă Ndiöxí. Te cada iní-ó sã Yă Ndiöxí sa ní quide-gá sá nchóo ñí ngúndecu túu-o ndìhi Xítóhó Jesucristú, chi ío vaha ndècu-o vitna.

⁷ Te Yă Ndiöxí quidé vaha ñaha-gã xii-o vitna cuendá sá ná sàá nduu, te ñiu-ni mee-gã cada te cútñuní iní nchaa ñáyiu sá ìo cùu iní ñáhá-gã xii-o, te ducaⁿ ìo chindee chítúu ñaha-gã xii-o cuendá sá ndécú ndìhi-o Xítóhó Jesucristú.

⁸ Te Yă Ndiöxí ío cùndahú iní ñáhá-gã xii-ndo nùu xíãⁿ ní quide-gá sá nchòhó naníhí tàhú-ndó. Te ducaⁿ ñí quide-gá chi ní sàndáá iní-ndó-gã. Te ñá díú sã cuendá ñí chiuⁿ ni quide-ndo ducaⁿ ní naníhí tàhú-ndó, chi mee Yă Ndiöxí ní cuení-gá sá dícó-ni ducaⁿ naníhí tàhú-ndó.

⁹ Te mee Yă Ndiöxí ní cachí-gá sá ñá díú cuendá ñí chiuⁿ quide-o naníhí tàhú-ó, te ducaⁿ ñí cachí-gá cuendá sá vã cáda càhnu-o mee-o.

¹⁰ Te Yă Ndiöxí ní quide ñaha-gã xii-o dàtná ñí ñáyiu saa cuendá sá ñí tnahá tnúhu-o ndìhi Xítóhó Jesucristú, te ducaⁿ ñí quide-gá cuendá sá cáda-ó mèe-ni sá vaha.

Te Yá Ndiöxí ducaⁿ tnàhí ní sani iní-gá cundu sá nchóó cùu-o ñáyiú cada mee-ni sã vâha.

Xítóhó Jesucristú quidé-gã ío váha cùu iní-ó ndècu-o

11 Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiú isràél, te ni ñá túú quide-ndo datná quidé ñáyiú-áⁿ, chí ñáyiú-áⁿ sãha-yu seña ñí-yu, te dàquee tíhũ-yu nchaa ñáyiú ñá túú ndècu seña ñí-xi.

12 Te chí dándàcu iní nàcuáa ní xíndecu-ndo, chí dàvã-áⁿ ñá túú ní xíndecu-ndo ndihí Xítóhó Jesucristú, te ni ñá túú ní xõ cuu tnahá tnúhu-ndo ndihí ñáyiú isràél, te ni ñá túú ní xini tnùní-ndó nàcuáa ndúu tnúhu sá ní cáháⁿ ndáá Yã Ndiöxí nàcuáa cada váha-gã ñáyiú, te ni ñá túú ní cùu-ndo ñáyiú quindaha-gã, te ni ñá túú ní xõ níhí-ndó tnúhu ndee iní sá cùndècu-ndo ndihí-gã.

13 Te cuèi ní cuu-ndo ñáyiú ñá túú tnàhá tnúhu ndihí Yá Ndiöxí ní cùu, dico vitna ní tnahá tnúhu-ndo ndihí-gã chí cùu ñínuu-ndo ndihí Xítóhó Jesucristú, cuendá sá ní sati níñí-gã te ní xihí-gã te xíãⁿ ducaⁿ tnàhá tnúhu-ndo ndihí Yá Ndiöxí vitna.

14 Te Xítóhó Jesucristú ní quide-gã sá nchóó ío váha cuu iní-ó cùndecu-o, te ñíu-ni-gã ní quide cuendá sá vã dáquèe tíhũ ñáhã ñáyiú isràél xii ñáyiú ñá túú cùu ñáyiú isràél, te ducaⁿ ñí-nã cuú-yu cundecú-yu.

15 Te sá ní xihí Xítóhó Jesucristú, xíãⁿ ñá túú-gã cùnùu nchaa tnúhu sá sánú ìchi ñaha xii ñáyiú nàcuáa cadã-yu cundecú-yu ni cùu. Te ducaⁿ ní xihí Xítóhó Jesucristú cuendá sá cuè ñáyiú isràél ndihí cue ñáyiú ñá túú cùu ñáyiú isràél ñí-nã cuú-yu cundecú-yu ichi-gã, te ducaⁿ te vá dáquèe tíhũ tnáhã-gã-yu, te ío váha cundecu ndihí tnàhá-yu.

16 Te ducaⁿ ní quide Xítóhó Jesucristú ní xihí-gã núú cùrúxí cuendá sá cuè ñáyiú cùu ñáyiú isràél ndihí cue ñáyiú ñá túú cùu ñáyiú isràél vá dáquèe tíhũ tnáhã-gã-yu. Te ducaⁿ ní xihí-gã cuendá ñí-nã cuú-yu tnahá tnúhu-yu ndihí Yá Ndiöxí nàcuáa cuu váha iní ñáhã-gã xii-yu.

17 Te cuèi cùu-ndo ñáyiú ñá túú tnàhí xini ndáá cuendá Yã Ndiöxí ní cùu, dico Xítóhó

Jesucristú ní quixi-gã ñuyú-a ní cáháⁿ-gã tnúhu váha nàcuáa ío váha cuu iní-ndó cùndecu-ndo ndihí Yá Ndiöxí. Te ñíu-ni ducaⁿ ní quide-gã sá cúú-xí nchaa ñáyiú sa xini cuendá Yã Ndiöxí, ñíu-ni ñáyiú isràél.

18 Te cuèi cùu-o ñáyiú isràél àdi ñá túú cùu-o dico ñíu-ni mee Xítóhó Jesucristú ní quide-gã sá ncháá-ó tnàhá tnúhu-o ndihí Dútú Ndiöxí Yáá cúú Tãtã-ó. Te ducaⁿ ní tnahá tnúhu-o ndihí Yá Ndiöxí chí ní ngúndecu ndihí-o Espíritú-gã.

19 Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndihí Yá Ndiöxí ní cùu, dico vitna chí ñí-nã ní cuu-ndo ndihí nchaa dava-gã ñáyiú cùu cuendã-gã chí cùu-ndo déhe-gã.

20 Te cada iní-ó sã cuè téé ní táuchíúⁿ Xítóhó Jesucristú cáháⁿ tnúhu-gã, ndihí cue téé ní xõ cáháⁿ tnúhu Yá Ndiöxí ndéé sanaha cùu-güedé dàtnã cimientú ñí vehe, te nchòhó cúú-ndó dàtnã ndóho sá sã vehe-áⁿ, te cada tucu iní-ó sã Xítóhó Jesucristú cúú-gã ñí yúú cùnùu cuu cimientú vehe-áⁿ.

21 Te ducaⁿ ío váha cùu ñínuu nchaa ndóho-áⁿ ndihí yúú cùnùu-áⁿ, te ducaⁿ tucu ío váha ta quèe tnàha nchaa ndóho-áⁿ cuãsaá. Te xíãⁿ cada iní-ó sã cúú-xí vehe Yá Ndiöxí, vehe sá ío ní cuu íí. Te ducaⁿ sãtnahã-xi cùu nchaa ñáyiú ndècu ichi Xítóhó Jesucristú chí ní tnahá tnúhu-yu ndihí-gã, te ñí nduu ñí nduu ta cùu vii cuu váha-gã-yu núú Yã Ndiöxí cuáhãⁿ.

22 Te tnàhá nchòhó ducaⁿ sãtnahã-xi cùu-ndo chí ní ngúndecu ndihí-ndo Xítóhó Jesucristú, te ducaⁿ ta cùu vii cuu váha tucu-ndo núú Yã Ndiöxí cuáhãⁿ, te cùu-ndo datná vehe Yá Ndiöxí chí ndècu ndihí-ndo Espíritú-gã.

3

Té Pãblú yíhí ñíquí-dẽ cáháⁿ-dẽ tnúhu Xítóhó Jesucristú núú ñáyiú ñá túú cùu ñáyiú isràél

1 Te yúhú té Pãblú yíhí-í vecaá sá cuendá sá cáháⁿ-í tnúhu Xítóhó Jesucristú núú nchòhó ñáyiú ñá túú cùu ñáyiú isràél, núú xíãⁿ ñíu cuendã-gã duha yíhí-í vecaá vitna.

2 Te nchòhó sa nàha-ndo sá Yã Ndiöxí ní cundãhú iní ñáhã-gã xii-í, te ní cachí-gã sá yúhú quíhí ñíquí-í cáháⁿ-í tnúhu Xítóhó Jesucristú núú-ndó, te cuendá sá cáháⁿ-í

tnúhu-gá núú-ndó te cuu-xi sá vâha sá cúú-xí-ndó.

³ Te yúhú sa ní cachí tnúhu-í xii-ndo lùha nacuáa ndùu tnúhu ndùu yuhu ni cuu, sá ní cachí tnúhu Yá Ndiöxí xii-í.

⁴ Te òré dàcuaha-ndo tnúhu ndùu yuhu-án ní cùu te quiní-ndó sã yúhú tècú tnùn-í nàcuáa ndùu tnúhu-án, te tnúhu-án càháⁿ-xi cuendá Xítóhó Jesucristú.

⁵ Te tnúhu-án cúú-xí tnúhu sá vã yõo tnàhí xìní ní cùu, dico cue téé ní táuchíúⁿ Xítóhó Jesucristú càháⁿ tnúhu-gá, ndìhi cue téé càháⁿ nàcuáa dàcahu iní ñáhá Yá Ndiöxí ní níhí-güedé tnúhu ndùu yuhu-án, chí Espíritú Yá Ndiöxí ní xáhaⁿ-xi xì-güedé.

⁶ Te duha càháⁿ tnúhu ndùu yuhu-án ní cùu: “Cuèi ñáyiu ñã túú cùu ñáyiu is-ràél te cuèi ñáyiu cùu ñáyiu is-ràél dico ìⁿ-ni ndùu tãhú-yu sá vâha núú Yá Ndiöxí, te núu na quèndáá iní-yu tnúhu sá càháⁿ nàcuáa naníhí tãhú-yu, te ìⁿ-nã cúú-yu cundecú-yu, te ducaⁿ ìⁿ-ni cada váha ñaha Yá Ndiöxí xii-yu te núu na cùndecu ndìhí-yu Xítóhó Jesucristú”, duha ndùu tnúhu ndùu yuhu-án ní cùu.

⁷ Te Yá Ndiöxí ní cundàhú iní ñáhá-gã xii-í ní taxi-gá chiuⁿ quide-í càháⁿ-í tnúhu-gá, te mee-gã quidé-gã sá yúhú ndacu-í càháⁿ-í tnúhu-gá.

⁸ Te nchaa ñáyiu cùu cuendá Yá Ndiöxí cúú-yu ñáyiu ío-gá cúnùu cadá-yu chiuⁿ-gã dàcúxí yúhú, te cuèi ducaⁿ dico Yá Ndiöxí ní cundàhú iní ñáhá-gã xii-í ní taxi-gá chiuⁿ quide-í càháⁿ-í tnúhu-gá núú cuè ñáyiu ñã túú cùu ñáyiu is-ràél. Te tnúhu-gá-án càháⁿ-xi sá sùúni ío váha cada ñaha Xítóhó Jesucristú xii-o.

⁹ Te ducaⁿ ní cachí Yá Ndiöxí sá càháⁿ-í tnúhu-gá cuendá danèhé-í nchaa ñáyiu. Te sá dánèhé-í-yu-án cúú-xí tnúhu ndùu yuhu sá ní sani iní-gá ndéé sanaha nàcuáa cada váha-gá cue ñáyiu. Te ndéé dàvá-án ní quesaha ndùu yuhu tnúhu-án ní cùu. Te ñu-ni-gá cúú-gã Yaá ní cadúha nchaandi túhú sá ío.

¹⁰ Te ducaⁿ ndùu yuhu tnúhu-án ní cùu cuendá sá ncháá espíritú cúnùu ndecu andiú quiní-xi vitna nàcuáa quide nchaa ñáyiu ní tuha ñaha xii Yá Ndiöxí cuendá ducaⁿ cùtnuní iní-xi sá ío váha cùtnuní iní-gá nàcuáa cada-gã.

¹¹ Te Yá Ndiöxí ní sani iní-gá ndéé sanaha nàcuáa ní cuiní-gá cada Xítóhó Jesucristú, te ní sáá nduu ní quide Xítóhó Jesucristú nàcuáa ní cuiní Yá Ndiöxí cada-gã.

¹² Te vitna cùyii-o càháⁿ ndìhi-o Yá Ndiöxí cuendá sá ndécú ndìhi-o Xítóhó Jesucristú, te sàndáá iní-ó-gã.

¹³ Te núu xiãⁿ càháⁿ-í dóho-ndo sã cuèi duha ndòho-í vitna dico vá ná túhú iní-ndó càchicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá vâha sá cúú-xí-ndó, chí cuu-ndo ñáyiu cùu cahnu núú Yá Ndiöxí.

Xítóhó Jesucristú ío cùu iní ñáhá-gã xii-o

¹⁴ Te sá cuendá nchaa sá ní sani iní Dútú Ndiöxí quidé-gã xiãⁿ yúhú ngüñí xiti-í núú-gã càháⁿ ndìhi-í-gã, te ñu-ni-gá cúú Yáá cúú Tãtá Xítóhó Jesucristú.

¹⁵ Te mee Yá Ndiöxí ní cachí-gá sá ncháá espíritú ndécú andiú cunduu-xi datná ní cachí méé-gã cunduu-xi. Te ní cachí tucu-gá sá nchóó cùu-o ñáyiu, te cunduu-o datná cuiní méé-gã cunduu-o.

¹⁶ Te xicáⁿ tãhú-í núú Dútú Ndiöxí sá Espíritú-gá ná cadá nàcuáa cuita níhí ndéé-gã-ndó quihíⁿ cundecu-ndo ìchi-gã, te ducaⁿ xicáⁿ tãhú-í núú-gã cada Espíritú-gá chí ío càhnu cuu-gã.

¹⁷ Te xicáⁿ tãhú tucu-í núú Yá Ndiöxí sá Xítóhó Jesucristú ná cùndecu ndìhi ñaha-ni-gã xii-ndo chí sàndáá iní-ndó-gã, te ducaⁿ te vá dáñá ndéé-ndó ío cuu iní tnáhá-ndó.

¹⁸ Te xicáⁿ tãhú tucu-í núú Yá Ndiöxí cuendá-ndó ndìhi cuendá dava-gã ñáyiu cùu cuendá-gã, cuendá sá cùtnuní iní-ndó sã sùúni cùu iní ñáhá Xítóhó Jesucristú xii-o.

¹⁹ Te duha xicáⁿ tãhú-í núú Yá Ndiöxí chí cuiní-í sá ncháá-ndó tècú tnùn-í-ndó sã ío cùu iní ñáhá Xítóhó Jesucristú xii-o cuèi vá ndácú càva-o quiní-ó nàcuáa cùu iní ñáhá-gã xii-o. Te xicáⁿ tãhú tucu-í núú Yá Ndiöxí sá ío na cùndecu ndìhi ñaha-gã xii-ndo, te ducaⁿ càchicúⁿ nihnu-ndo càda-ndo nchaa nacuáa quide mee-gã.

²⁰ Te Yá Ndiöxí ío-gá vai sá ndácú-gã táxi-gã dàcúxí sã xicáⁿ-ó núú-gã, te cuèi ndéé nchaa sá ñã túú sàni iní-ó níhí-ó te tàxi-gã, te ducaⁿ chí mee-gã ndécú ndìhi

ñaha-gá xii-o, te ndàcu-gá quidé-gă nándi sá vâha sá cúú-xí-ó.

²¹ Te vitna nchaa nchoo ñăyiu ndècu ichi Xítohó Jesucristú chí ná cächí-ó sã ïo cãhnu cuu Yá Ndiöxí, te ducaⁿ-ni cãháⁿ-ó sã ïo cãhnu cuu-gá ni caa ni quíhíⁿ chi ndècu ndíhi-o Xítohó Jesucristú. Te ducaⁿ na cùnduu.

4

Espíritú Yă Ndiöxí quidé-xí cùu ñⁿnuu-o ndecu-o

¹ Te yúhú té Păblú yíhí-í vecaá sá cuendá Xítohó Jesucristú, te cãháⁿ ndàhú-í núú-ndó sã cáda vâha-ndo cùndecu-ndo datná tàú-xi cada cue ñăyiu ní cãháⁿ Yă Ndiöxí cundecu ndíhi-gá. Te nchòhó tnàhá-ndó cùu-ndo ñăyiu ní cãháⁿ ñáhá Yă Ndiöxí cundecu ndíhi-gá.

² Te vá cáda cãhnu-ndo mee-ndo, cunduu váha iní-ndó, cunduu cãhnu iní-ndó, te cuu iní tnàhá-ndó nàcuáa ducaⁿ cùndee iní-ndó nũu ná cúú sã cùmání nũú tnàhá-ndó.

³ Te ïo nducu ndèe-ndo cuu ñⁿnuu-ndo cundecu-ndo, chi Espíritú Yă Ndiöxí chindee ñàha-xi xii-ndo, te ducaⁿ ïo váha cuu iní-ndó cùndecu-ndo chi cùu ñⁿnuu-ndo.

⁴ Te nchoo ñăyiu ndècu ichi Xítohó Jesucristú ñⁿ-ni cùu-o, te ducaⁿ ñⁿ-ni Espíritú Yă Ndiöxí ndécú, te ðiu-ni ducaⁿ ñⁿ-ni tnúhu ndee iní ní ngúndecu ndíhi-o cùtnàhá ní cãháⁿ ñáhá Yă Ndiöxí xii-o.

⁵ Te ñⁿ-ni Xítohó Jesucristú ndécú tàxi tnuní ñáhá-gă xii-o, te ñⁿ-ni cùu-o sandáa iní-ó tnúhu-gá, te ñⁿ-ni nĩ sandute-o.

⁶ Te ñⁿ-ni Dütú Ndiöxí cúú Yáa cúú Tătá-ó nchàa-o, te ðiu-gá cùnũu-gá yíndàha ñaha-gá xii-o nchàa-o. Te Yá Ndiöxí dácãháⁿ-gá iní-ó quíde-o chiuⁿ-gá, te ducaⁿ ndècu ndíhi ñaha-gá xii-o nchàa-o.

⁷ Te nchoo ndí díⁿ ndí díⁿ chindee ñaha Yă Ndiöxí xii-o quíde-o nacúaa ndũu chiuⁿ ní cachí Xítohó Jesucristú cada-o.

⁸ Te quèe ndáa-xi nàcuáa cãháⁿ-xi núú tütú Yă Ndiöxí núú cächí-xi: Xítohó Jesucristú cuándaa-gá andiu te ïo cùnũu-gá,

chi nchaa cue espíritú cúú ũhú iní ñáhá xii-gá ñá túú ní ndàcu-xi naá ndíhi ñaha-xi xii-gá,

te mee-gă ní cachí-gá nàcuáa ndũu chiuⁿ nduu táhú ñⁿ ñăyiu cadá-yu.

Duha cächí-xi núú tütú-gá.

⁹ Te sá dúcáⁿ cãháⁿ-xi sá cuándaa-gá andiu xíáⁿ cùtnuní iní-ó sã nĩ cuuⁿ-gá ñuyíú-a.

¹⁰ Te Xítohó Jesucristú ní cuuⁿ-gá ñuyíú-a, te ðiu-ni-gá cuándaa-gá andiu cuendá ïo cunuu-gă taxi tnuní-gá nchaandi túhú sá ïo.

¹¹ Te ní dácãhñu-gá cue tée xinu cuechi núú-gă ñⁿ ñⁿ núú chiuⁿ cada-güedé. Te ní cachí-gá sá dâva-güedé cãháⁿ-güedé tnúhu-gá, te dava-güedé ní cachí-gá sá cãháⁿ-güedé nàcuáa dàcahu iní ñáhá Yă Ndiöxí xii-güedé. Te dava-güedé ní cachí-gá sá cúú-güedé cue tée datécú tnúhu cue ñăyiu nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue tée quíndaha ñàha xii ñăyiu dacuàha ñaha-güedé xii-yu tnúhu-gá.

¹² Te ducaⁿ nĩ cachí-gá cada cue tée-áⁿ cuendá canu ichi-güedé cue ñăyiu cùu cuendá Yă Ndiöxí cuendá ducaⁿ ñăyiu-áⁿ nĩhí-yu nàcuáa cadá-yu chiuⁿ-gá, te ducaⁿ cuíta níhí ndéé-gă-yu cundecú-yu ichi Xítohó Jesucristú.

¹³ Te ducaⁿ nĩ cachí Xítohó Jesucristú cunduu ndéé sáa nduu cùu ñⁿnuu-o quíndáa iní-ó tnúhu-gá, te ducaⁿ cùu ñⁿnuu-o tecú tnuní-ó nàcuáa ndũu cuendá-gá chi ðiu-gá cúú-gă Déhe Yă Ndiöxí, te cuu-o ñăyiu ïo quíde ndáa dàtná quíde mèe Xítohó Jesucristú. Te ducaⁿ te ñá túú tnàhí-gá ná cùmání-ó nũú Yă Ndiöxí.

¹⁴ Te ducaⁿ te vá cúú-gă-ó dàtná cue landú vátá cùtnuní váha-gá iní-xi, te ni vã cáda-gă-ó dàtná quíde ndũte lamár, chi ndute-áⁿ òré quéné tächí te cuáháⁿ-xi duha cuáháⁿ-xi dácáⁿ, te ducaⁿ chi vá quíndáa-gá iní-ó tnúhu cãháⁿ nchaa ñăyiu dândahú ñáhá xii-o, chi ñăyiu-áⁿ ïo váha xitó-yu nàcuáa dândahú ñáhá-yu xii-o chi cächí-yu sá cãháⁿ-yu tnúhu Yă Ndiöxí dico ñá ndáa.

¹⁵ Te nchoo ïo cuu iní tnàhá-ó, te vá dândahú tnàhá-ó, chi cãháⁿ-ó mèe-ni sá ndáa. Te xini ñuhu-xi sá ñⁿ nduu ñⁿ nduu cuíta cada ndáa-gá-ó quíhíⁿ dàtná quíde ndáa méé-gă, te ðiu-ni-gá cúú-gă Yáa cùnũu cuu díhna tàxi tnuní ñáhá-gă xii-o.

¹⁶ Te ðiu-ni Xítohó Jesucristú quíde ñàha-gá xii nchaa nchoo ñăyiu ndècu

ichi-gá dàtná yiqui cùñú méé-gă, chi ìñ yiqui cùñú ío vâha ní quée tnàha ìñ ìñ xichi, te ducaⁿ yìhi túchi yiqui cùñú-ăⁿ yótnî-xi nchaa nacuáa ní quée tnàha. Te ducaⁿ sâtnahá-xi cùu nchoo chi ìñ-ni cùu-o ndecu-o ichi Xítóhó Jesucristú táxí tnùní ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta nihí ndéé-gă-ó cuáháⁿ ndécú-ó ichi-gá.

Vá cáda-gă-ó dàtná ní xóo cada-o cùtnàhá ní xindecu-o ichi cuehé ichi duha

17 Te vitna yúhú càháⁿ-í dóho-ndo quide-í núu Xítóhó Jesucristú sá vâ cundècu-gă-ndó dàtná xindecu ñáyiú ñá túú sàndáá iní ñáhá xii Yá Ndiòxí, chi nchaa ñáyiú-áⁿ ñà túú vèdana nàndíhi nchaa sá sání iní-yu.

18 Te ni ñà túú vèdana cùtnuní iní-yu nàcuáa ndùu tnúhu ndáá tnúhu Yá Ndiòxí. Te ñáyiú-áⁿ ñà túú ndùu táhù-yu cundécú-yu nàcuáa cuení Yá Ndiòxí, chi ñá túú vèdana tècú tnùní-yu te ducaⁿ chi ío sàá iní-yu.

19 Te ñá túú tnàhí-gá ná sání iní-yu ndécú-yu ichi cuèhé ichi duha, te ío cùdí iní-yu ndécú-yu ichi dí iní, te ñá díú-ní xǎⁿ chi nándi-gă nchaa sá cuèhé sá dúhá quidé-yu ndécú-yu.

20 Dico tnúhu Xítóhó Jesucristú sá ñí sàndáá iní-ndó chi ñá túú dùcaⁿ sanu ichi ñaha-xi xii-ndo cada-ndo.

21 Te nchòhó ní cutnùní iní-ndó nàcuáa ndùu cuendá Xítóhó Jesucristú, te dàcuaha-ndo tnúhu ndáá ðiu-ni tnúhu-gá nàcuáa ndècu-ndo ichi-gá.

22 Te vitna vá cáni-gă iní-ndó càda-ndo datná ní xóo cada-ndo cùtnàhá ní xindecu-ndo ichi cuehé ichi duha, chi núu nchaa-ni sá cuèhé sá dúhá-ăⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ăⁿ ná cùhuⁿ-ni iní-ndó te dàticá nuu ñaha-xi xii-ndo.

23 Te nchòhó, xìni ñuhu-xi sá vâ dúcáⁿ-gă caní iní-ndó càda-ndo te tàú-ndó ndùu-ndo datná ìñ ñáyiú ní cacu túu saa.

24 Te nduu iní-ndó dàtná cuení méé Yá Ndiòxí cunduu, chi nduu-xi nàcuáa càa iní méé-gă, te ducaⁿ te cuu-ndo ñáyiú ío vâha

cada ndáá, te cuu ndisa-ndo ñáyiú ñá túú tnàhí ná cumání cundecu núú-gă.

25 Te cuendá xǎⁿ núu càháⁿ-í dóho-ndo sǎ nchòhó vá dâcuàndehnde-gă-ndó dàtná ní xóo cada-ndo, te mee-nǎ sá ndáá càháⁿ ndíhi tnàha-ndo, chi ìñ-ni cùu-o ndecu-o ichi Xítóhó Jesucristú.

26 Te núu cùdééⁿ-ndó te cada cuendá-ndó sǎ vâ cáda-ndó ìñ cuéchi sá dúcáⁿ cùdééⁿ-ndó, te vá dúcáⁿ-ní cùhuⁿ iní-ndó tnúhu sàtú iní-áⁿ.

27 Te vá dáñá-ndó mèe-ndo dandahú ñáhá sàcuíhná xii-ndo.

28 Te núu dava-ndo cùu-ndo ñadúhú te vá dúcáⁿ-gă cada-ndo, chi nducu-nǎ-ndó ìñ chiuⁿ vâha cada-ndo nàcuáa ducaⁿ ñíhí-ndó sǎ chindèe-ndo cue ñáyiú ndáhú ñáyiú ñá túú nǎ ndécú ndíhi.

29 Te vá càháⁿ-gă-ndó ñí ìñ tnúhu cuèhé, chi mee-nǎ tnúhu vii tnúhu vâha càháⁿ-ndó nàcuáa ducaⁿ ngúnu ichi cue ñáyiú ndédóho ñaha xii-ndo, te núu ducaⁿ na càda-ndo te cuu-xi sá vâha sá cúú-xí ñáyiú ducaⁿ ndédóho ñaha xii-ndo-áⁿ.

30 Te vá cáda-gă-ndó ñí ìñ sá ñà túú tàú-ndó càda-ndo cuendá sá vâ dándíhú-ndó iní Espíritú Yá Ndiòxí, chi ðiu Espíritú-gă ndécú ndíhi-ndo, te xǎⁿ cútnuní iní-ndó sǎ sàá nduu nàcuaca ñaha-gă xii-ndo cùndecu-ndo ndíhi-gă ñí caa ñí quíhíⁿ.

31 Te vá dásàtú-gă-ndó iní tnàha ñáyiú-ndo, te ni vâ cùhúⁿ iní-ndó tnúhu sàtú iní, te ni vâ cùdèéⁿ-gă-ndó, te cuèi núú chítú núú tàcá vá càháⁿ cana-ndo cùcuèhé-ndó tnàha ñáyiú-ndo, te ni vâ cuátnúhu-ndo tnàha ñáyiú-ndo, te ni vâ cáni cuèhé caní duha iní-ndó cuendá tnàha ñáyiú-ndo.

32 Te cundáhú iní tnáhá-ndó, te cada tnàha-ndo sá vâha, te cada càhnu iní tnáhá-ndó núu ná cúú sǎ cúmání núú tnáhá-ndó dàtná ní quide Yá Ndiòxí ní quide càhnu iní-gă nchaa yíca cuèchi-ndo sǎ cuendá Xítóhó Jesucristú.

5

Nàcuáa tàú-xi cundecu nchaa ñáyiú cùu déhe Yá Ndiòxí

1 Te nchòhó cúú-ndó ñáyiú ío cùu iní ñáhá Yá Ndiòxí, te ðiu déhe-gă cúú-ndó núu xǎⁿ xíní ñuhu-xi canchicúⁿ nihnu-ndo càda-ndo datná quidé mèe-gă.

2 Te ío cuu iní tnáhá-ndó cùndecu-ndo datná cúú iní ñáhá Xítohó Jesucristú xii-ndo, chi ñu-gá ní cachí-gá sá cùú-gá cuendá nchaa cuéchi-o te ní xihí-gá, te sá dúcáⁿ ñí xihí-gá te ní cuu-gá datná ñⁿ táhú sá cúú-xí Yá Ndióxi, te ío váha ní cuu iní Yá Ndióxi sá dúcáⁿ ñí quide-gá.

3 Te sá cuendá sá nchòhó cúú-ndó ñáyiu cùu cuendá Yá Ndióxi ñúu xiáⁿ nchaa nchòhó cue téé vá càháⁿ ndihí-ndo ñáyiu ñí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñáyiu ñí tucu vá càháⁿ ndihí-ndo cuè téé te núu ñá díú yí-ndo cuu-güedé, te ni vâ cáni tnàhí iní-ndó cùndecu-ndo ichi díí iní, te ni vâ xihó-ndó ñⁿ sá ndécú ndihí tnaha ñáyiu-ndo, te ni ñⁿ nchaa xiáⁿ vá cáni iní-ndó càda-ndo, te ni vâ cacú nèhe-ndo.

4 Te ni vâ càháⁿ-ndó ñⁿ tnúhu sá ni vâ cúú cùndedóho ñáyiu, te ni vâ càháⁿ-ndó ñⁿ tnúhu cùtexínu, te ni dàva-gá nchaa tnúhu sá ñà túú vèdana nàndihí vá càháⁿ-ndó, chi nchaa tnúhu-áⁿ ñà túú tàú-xi càháⁿ-ndó, te xìni ñuhu-xi sá vâha-gá sá ndàcáⁿ táhú-ndó ñúú Yá Ndióxi cuendá nchaa sá vâha quide-gá.

5 Te nchòhó sa xìni ndáá-ndó sá ncháá cuè téé càháⁿ ndihí ñáyiu ñí te ñá díú ñàdihí-güedé cúú-yu, ndihí cue ñáyiu ñí càháⁿ ndihí cue téé te ñá díú yí-yu cùu-güedé, nchaa ñáyiu-áⁿ vá ndúú táhú-yu cundécú-yu núú ndécú Yá Ndióxi ndihí Xítohó Jesucristú táxi tnùnigá. Te ni cuè ñáyiu xindecu ichi díí iní, te ni cuè ñáyiu xihó nchaa sá ndécú ndihí tnaha ñáyiu-xi vá ndúú táhú-yu cundécú-yu ndihí-gá núú ndécú-gá táxi tnùnigá. Te tnúhu sá càchí-ó xihó-o nchaa sá ndécú ndihí tnaha ñáyiu-o, ñⁿ-ni cùu-xi ndihí tnúhu sá càchí ñáyiu quide cahnú-yu nchaa sá càchí-yu cùu ndiósí te ñá ndáá sá ndiósí cúú-xí.

6 Te vá quindáá iní-ndó ñⁿ tnúhu sá ñà túú nàndihí càháⁿ ñáyiu, chi ñáyiu-áⁿ ío dandòho ñaha Yá Ndióxi xií-yu cuendá nchaa sá cuèhé sá dúhá quide-yu chi ñá túú sàndáá iní ñáhá-yu xii-gá.

7 Núu xiáⁿ càháⁿ-í dóho-ndo sá vâ ñíhí tnáhá-ndó ndihí cue ñáyiu-áⁿ.

8 Te nchòhó ní cuu-ndo datná cue ñáyiu

ní xindecu núú néé chi ní xindecu-ndo ichi cuehé ichi duha, dico vitna ní ngúndecu-ndo ichi Xítohó Jesucristú, te ñá túú-gá ndécú-ndó ñúú néé datná ní xindecu-ndo ni cùu. Te vitna cada-ndo nchàa nacuáa tàú-xi cunduu chi ndècu-ndo ichi-gá.

9 Te sá cuendá sá ndécú-ndó ichi-gá ñúu xiáⁿ cúú-ndó ñáyiu váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá.

10 Te ío váha cada cuendá-ndó nchàa sá cúú váha iní Xítohó Jesucristú, te xiáⁿ cada-ndo.

11 Te vá cáncícúⁿ nihnu-ndo tnáhá-ndó càda-ndo datná quidé cuè ñáyiu ndècu ichi cuehé ichi duha, chi nchòhó tàú-ndó càháⁿ-ndó dôho nchaa ñáyiu ducaⁿ ndècu ichi cuehé ichi duha-áⁿ cuendá nchaa sá quidè-yu.

12 Te cucahaⁿ núú-ndó vâ càháⁿ-ndó cuendá ñⁿ sá cuèhé sá dúhá quide dayuhu nchaa ñáyiu-áⁿ.

13 Dico òré dándixi túu tnúhu Yá Ndióxi iní-yu nàcuáa quidé-yu te cùtnuní iní-yu sá ñá túú quide váha-yu, te ducaⁿ ndixi cuéchi iní-yu cuendá nchaa sá cuèhé sá dúhá quidé-yu.

14 Te núú tütú Yá Ndióxi càchí-xi: Nchòhó cúú-ndó datná ñáyiu xidí, te vitna ndiquíú iní-ndó, te cùu tucu-ndo datná ñáyiu ní xihí, te vitna ndoto-ndo, te Xítohó Jesucristú chindee ñàha-gá xii-ndo nàcuáa vá cùndecu-gá-ndó ichi cuehé ichi duha. Duha càháⁿ-xi núú tütú-gá.

15 Te ío váha cada cuendá-ndó nàcuáa cada-ndo cùndecu-ndo, te vá càdá-ndó datná xíquide cue ñáyiu ñá túú tècú tnùní, chi cada-ndo datná xíquide ñáyiu ío váha sáá díquí-xi.

16 Te ñⁿ nduu ñⁿ nduu caní iní-ndó càda-ndo nchaa nacuáa tàú-xi cunduu, chi vitna ío cùnuu nchaa sá cuèhé sá dúhá.

17 Te cuu-ndo ñáyiu tècú tnùní cuendá ducaⁿ cùtnuní iní-ndó nàcuáa cuíní Yá Ndióxi cada-ndo, te vá càdá-ndó datná xíquide cue ñáyiu ñá túú tnàhí cùtnuní iní-xi nàcuáa cuíní Yá Ndióxi cadá-yu.

18 Te vá cúú-ndó ñáyiu quihu chi núu ducaⁿ na càda-ndo te dàcuíta nihnu-ndo

mèe-ndo, te dañá-ndo mèe-ndo sá Espiritú Yá Ndiöxí ná tàxi tnuní ñáhá-xí xii-ndo.

¹⁹ Te cáháⁿ-ndó nàcuáa-ni cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhú-yu Yá Ndiöxí. Te cáháⁿ-ndó nàcuáa cuáháⁿ ndudú sá chíñuhu-ndo Yá Ndiöxí, te cata-ndo. Te cuèi nchaa dava-gá ndudú ñu-ni ducaⁿ cáháⁿ-ndó te cata-ndo. Te ní yùhu ní iní-ndó càta-ndo nchaa ndudú-áⁿ chiñuhu-ndo Yá Ndiöxí.

²⁰ Te vá dáñá ndéé-ndó ndàcáⁿ táhú-ndó nùú Tátá-ó Dütú Ndiöxí cuèi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihi-ndo Xítóhó Jesucristú.

Tàú-xi sá quindáá iní tnáhá cuè ñáyiú ndècu ichi Xítóhó Jesucristú

²¹ Te nchòhó ñáyiú ndècu ichi Xítóhó Jesucristú tàú-xi sá quindáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndiöxí.

²² Te nchaa nchòhó ñáyiú ñíhí ndécú yíhí-xi, xini ñuhu-xi sá quindáá iní-ndó yíhí-ndo datná sàndáá iní-ndó Xítóhó Jesucristú.

²³ Chi yíhí-ndo tàxi tnuní ñáhá-güedé xii-ndo datná quidé Xítóhó Jesucristú táxi tnuní ñáhá-gá xii nchoo cuè ñáyiú ndècu ichi-gá. Te ñu-gá cúú-gá Yá ní dácácu nihnu ñaha xii-o núú ùhú núú ndàhú, te cùu-o datná yíqui cùñú-gá.

²⁴ Te datná quidé nchòo ñáyiú ndècu ichi Xítóhó Jesucristú sàndáá iní-ó tní-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú ñíhí quindáá iní-ndó tní-ndo nchaa tnúhu càháⁿ yíhí-ndo.

²⁵ Te tnáhá nchaa nchòhó cue téé tucu tàú-xi sá ío cuu iní-ndó ñàdihí-ndó datná quidé Xítóhó Jesucristú cúú iní ñáhá-gá xii nchaa nchoo ñáyiú ndècu ichi-gá, chi mee-gá ní xíhí-gá sá cuèndá-ó sá cúú iní ñáhá-gá xii-o.

²⁶ Te ducaⁿ ní quide-gá cuèndá sá ncháá ñáyiú vitna ngündecu ichi-gá cuu yíñuhú-yu núú Yá Ndiöxí, te ducaⁿ ndàda ndoo ndada nine-gá iní-yu sá cuèndá sá quindáá iní-yu tnúhu Yá Ndiöxí, te cuanduté-yu.

²⁷ Te ducaⁿ ní quide-gá cuèndá sá ncháá ñáyiú na ngündecu ichi-gá ío váha cundécú-yu núú-gá, te ducaⁿ vâ cündècu-gá

ní ñíⁿ cuéchi-yu núú-gá, te ní ñíⁿ-gá sá ñà túú-gá ná cumání-yu núú-gá chí ío cundecu yíñuhú-yu.

²⁸ Te sá dúcáⁿ quide Xítóhó Jesucristú sá cúú-xí cuè ñáyiú ndècu ichi-gá, xiáⁿ tàú-xi sá nchòhó cue téé xíndecu ñàdihí-xi cuu iní-ndó ñàdihí-ndó, te coto-ndó-yu datná xító-ndó yíqui cùñú méé-ndó, te cada iní-ndó sá ncháá cuè téé ío cùu iní ñàdihí-xi cùu iní-güedé méé-güedé chí ñíⁿ-ná cúú-yu.

²⁹ Te nchoo sá naha-o sá ní ñíⁿ ñáyiú ñá túú dàquee tíhú-yu yíqui cùñú-yu, chí da uuⁿ-gá chíndéé-yu te xító-yu. Te ñu-ni ducaⁿ quide Xítóhó Jesucristú ndihi nchaa ñáyiú ndècu ichi-gá,

³⁰ chí cùu-o datná yíqui cùñú méé-gá, te ducaⁿ chí ñíⁿ-ni cùu-o ndihi-gá.

³¹ Te tnúhu Yá Ndiöxí càchí-xi: “Sá cuèndá xiáⁿ nùu nchaa cue téé na ñíhí ñàdihí-xi te ñíⁿ-ná cada-güedé tátá-güedé ndihi náná-güedé, te ñàdihí-ná-güedé cuu cuu ndihi-güedé, te ducaⁿ ñíⁿ-ná cuu-güedé ndihi-yu”, duha càchí-xi.

³² Te tnúhu-a cùu-xi ñíⁿ tnúhu càhnu vihi, te ducaⁿ sá tnáhá-xi cùu Xítóhó Jesucristú ndihi cue ñáyiú ndècu ichi-gá.

³³ Te càháⁿ-ni tucu-í dóho nchaa nchòhó cue téé xíndecu ñàdihí-xi sá ío cuu iní-ndó ñàdihí-ndó te coto-ndó-yu datná xító-ndó mèe-ndo, te ducaⁿ-ni ncháa nchòhó ñáyiú ñíhí tucu canehe-ndo sá yíñuhu núú yíhí-ndo.

6

¹ Te nchaa nchòhó cue landú, quindáá iní-ndó tátá-ndó ndihi náná-ndó chí ducaⁿ cuíni Yá Ndiöxí cunduu, te ñu ducaⁿ tnáhí tàú-xi cada-ndo.

² Te Yá Ndiöxí ní cachí-gá sá cánèhe-ndo sá yíñuhu núú tátá-ndó ndihi núú náná-ndó. Te tnúhu-áⁿ cúú-xí tnúhu cùnuu ní cáháⁿ-gá cada cue ñáyiú cuèndá cada váha ñaha-gá xii-yu.

³ Te ní cachí-gá sá nùu ducaⁿ na càda-ndo te ío váha cundecu-ndo, te ducaⁿ ío naha cùdí-ndo cündecu-ndo ñuyíú-a.

⁴ Te nchaa nchòhó cue téé cùu tátá, vá dásatú-ndó iní cue déhe-ndo chí canu ichi-ndo-güèxi nacúáa tàú-xi cunduu,

te dacuàha-ndo-güexi nchaa tnúhu váha nàcuáa cuíni Yá Ndiöxí cunduu.

⁵ Te nchaa nchòhó cue ñáyiú xìnu cuechi, quindáá iní-ndó cuè ñáyiú dii chiúⁿ-xi quide-ndo, te canehe-ndo sã yíñùhu núŷ-yu, te ío váha cuu iní-ndó càda-ndo chiúⁿ-yu, te ducaⁿ nì yuhu ni iní-ndó càda-ndo. Te cada iní-ndó sã dàtná tnúhu sá chíúⁿ Xìtohó Jesucristú quidé-ndó.

⁶ Te dava ñáyiú xìnu cuechi, mee-ni òré ndéhé ñáyiú dii chiúⁿ-xi quidé-yu ío ndùcu ndeé-yu quide chiuⁿ váha-yu cuèndá cuíni-yu cudíú-yu. Dico nchòhó vá dúcáⁿ càda-ndo, chi cuèi ndècu ñáyiú dii chiúⁿ-xi quide-ndo àdi ñá túŷ-yu dico cada chiúⁿ váha-ni-ndo, te cada iní-ndó sã dàtná tnúhu sá chíúⁿ Xìtohó Jesucristú quidé-ndó, te cada-ndo nì yuhu ni iní-ndó nàcuáa cuíni Yá Ndiöxí cunduu.

⁷ Te ío váha cuu iní-ndó càda-ndo chiúⁿ-áⁿ, chi cada iní-ndó sã dàtná tnúhu sá chíúⁿ Xìtohó Jesucristú quidé-ndó te ñá díú chiúⁿ cue ñáyiú ñuyíú-a.

⁸ Te nchòhó sa cùnuni iní-ndó sã nàcuáa ndùu chiuⁿ váha ní quide-ndo ìⁿ ìⁿ-ndo, te ducaⁿ cunduu sá táxí Xìtohó Jesucristú nduu táhú-ndó cuèi cùu-ndo ñáyiú dàñá queé núú chíúⁿ pàtróóⁿ-xi àdi cuu-ndo ñáyiú ñá túú tnàhí dàñá quee núú chíúⁿ pàtróóⁿ-xi.

⁹ Te nchaa nchòhó ñáyiú xìndecu ndìhi ñáyiú xìnu cuechi, tnàhá-ndó tàú-ndó càda váha-ndo sã cúú-xí cuè ñáyiú xìnu cuechi núú-ndó, te vá cùndùu nínu iní-ndó núŷ-yu, te chí cuàha cuèndá sá díú-ní Xìtohó Jesucristú Yaá ndécú àndiú taxi tnuni ñáhá-gã xii-ndo ndìhí-yu, te sá cúú-xí mèe-gá chi ìⁿ-ni cùu-ndo núú-gã, te ìⁿ-ni càda ñaha-gã xii-ndo.

Yá Ndiöxí chindèe-gá cue ñáyiú ndècu ichi-gá cuèndá sã vã ndácú sàcuíhná nàa ndìhi ñaha-xi xí-yu

¹⁰ Te vitna nchaa nchòhó ñáyiú ndècu ndìhi-í ichi Xìtohó Jesucristú càchí tnúhu-í xii-ndo sã ìo nducu-ndo nàcuáa cada-ndo ñíhí ndéé-ndó cùu ìⁿnuu-ndo ndìhi Xìtohó Jesucristú, chi mee-gã ío càhnu cuu-gá, te chindee ñàha-gã xii-ndo.

¹¹ Te diu-ni nchaa sá ñí nduu táhú-ndó núú Yá Ndiöxí diu-ni nchaa xíⁿ cuhuⁿ iní-ndó, chi xíⁿ chindee ñàha-xi xii-ndo

ñíhí ndéé-ndó cùndecu-ndo cuèndá sã vã dándàhú ñáhá sàcuíhná xii-ndo.

¹² Chi nchoo ñà díú cuè ñáyiú ñuyíú-a nàa ndìhi-o, chi ndìhi cue espíritú cùndìhi yucu ñávãha, te diu-ni nchaa espíritú-áⁿ cùnùu-xi cuèi núú ñínu quide-xi nchaa sá cuèhé sá dúhá, te diu-ni-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá.

¹³ Te ío cuhuⁿ iní-ndó nchaa sá ñí nduu táhú-ndó núú Yá Ndiöxí cuèndá ducaⁿ ñíhí ndéé-ndó cùndecu-ndo, te vá ndácú yùcu ñávãha ná cada ñaha-xi xii-ndo òré cuíni-xi coto ndeé ñáhá-xí. Te sáta ná dàquee tíhú-ndó yùcu ñávãha te ñí-ni cunduu-ndo cùndecu-ndo ichi Yá Ndiöxí.

¹⁴ Te ducaⁿ cùndecu-ni-ndo ichi Yá Ndiöxí cada-ndo dàtná xíquide cue sandàdú, chi cue tée-áⁿ ìo ñí xíndáa-güedé. Te càháⁿ-ndó mèe-ni tnúhu ndáá tnúhu Yá Ndiöxí, te cuu-ndo dàtná cue sandàdú cue tée ndàda tí xití-xi òré quíhíⁿ-güedé nàá-güedé. Te ducaⁿ sãtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yá Ndiöxí. Te cada ndáa-ndó cùndecu-ndo ichi-gá, te cuu-ndo dàtná cue sandàdú cue tée xíxíhnu sá yídãhu ñaha xii-güedé òré nàá-güedé cuèndá sã vã ñícuèhé-güedé. Te ducaⁿ sãtnahá-xi cuu-ndo te núu na càda ndáa-ndó cùndecu-ndo ichi-gá.

¹⁵ Te cundecu túha-ndo càháⁿ-ndó tnúhu Xìtohó Jesucristú, tnúhu sá càháⁿ nàcuáa cuu váha iní ñáyiú cundecú-yu, te cuu-ndo dàtná cue sandàdú cue tée ndìhu zapátú-xi quíhíⁿ-güedé nàá-güedé. Te ducaⁿ sãtnahá-xi cuu-ndo te núu na cùndecu túha-ndo càháⁿ-ndó tnúhu Xìtohó Jesucristú núú ñáyiú.

¹⁶ Te càchí tnúhu tucu-í xii-ndo sã ìo quindáá iní-ndó Yá Ndiöxí cuèndá sã vã ndácú sàcuíhná nã cada ñaha-xi xii-ndo, te ducaⁿ te cuu-ndo dàtná cue sandàdú cue tée xínehe vítú chinèe-güedé sáquidáhu ñaha-xi xii-güedé cuèndá sã vã cuícúⁿ-güedé sá nchìcúⁿ ñuhú téé ñàha cue téé nàa ndìhi-güedé. Te ducaⁿ sãtnahá-xi cuu-ndo te núu na quindáá iní-ndó Yá Ndiöxí.

¹⁷ Te ío cuhuⁿ iní-ndó sã ñí naníhí táhú-ndó, te cuu-ndo dàtná cue sandàdú cue téé ñùhu mbelú cáxíⁿ. Te ducaⁿ sãtnahá-xi cuu-ndo te núu na cùhuⁿ iní-ndó sã ñí naníhí táhú-ndó. Te ío cuhuⁿ iní-ndó tnúhu Yá Ndiöxí, chi tnúhu-áⁿ

nĩ taxi Espiritú-gá ndécú ndìhi-ndo chindee ñaha-xi xii-ndo, te cuu-ndo dàtná cue sandàdú cue téé xĩnehe machítí cuáháⁿ-güedé nàá-güedé. Te ducaⁿ sãtnahá-xi cuu-ndo te núu na cùhuⁿ iní-ndó tnũhu Yá Ndiõxí.

¹⁸ Te vá dàña ndéé-ndó cãháⁿ ndìhi-ndo Yá Ndiõxí nàcuáa chindee ñaha Espiritú-gá xii-ndo, te cácaⁿ táhú-ndó nũú-gã nũu ná cuíní-ndó, te ío cundecu túha-ndo cãháⁿ ndìhi-ndo-gã, te vá nátùhú iní-ndó cácaⁿ táhú-ndó nũú-gã cuendá nchaa dava-gá cue ñáyiú cùu cuendá-gá.

¹⁹ Te tnàhá cuendá-í cácaⁿ táhú-ndó nũú Yá Ndiõxí cuendá sá ná chindee ñaha-gá xii-í níhì-í tnũhu cáháⁿ-í òré cãháⁿ-í tnũhu-gá, te ducaⁿ vã yùhú-í cáháⁿ-í nàcuáa ndũu tnũhu sá cãháⁿ nàcuáa naníhí tàhú-ó nũú ñáyiú tnũhu sá vátá cùndèdóho-gá-yu.

²⁰ Te Yá Ndiõxí ní cachí-gá sá yùhú cuu-í ìⁿ téé cada-í núú-gã cáháⁿ-í tnũhu-gá núú ñáyiú, te òⁿ cuendá tnũhu-áⁿ yíhì-í vecaá vitna. Te ío cácaⁿ táhú-ndó nũú Yá Ndiõxí cuendá-í cuendá sá yùhú cuyì-í nì yùhu nì iní-í cáháⁿ-í tnũhu-gá núú ñáyiú nàcuáa tàú-xi cunduu.

Tnũhu ndéé núú nĩ ndìhi-ná

²¹ Te té Tìquicú téé ío cùu iní-í ndécú ndìhi-o ichi Xítóhó Jesucristú cúú-dě ìⁿ téé ío váha quide ndáá xínú cuèchi-dé núú Xítóhó Jesucristú, téé-áⁿ cachí tnũhu-dé xii-ndo nàcuáa cùu ndecu-í ndìhi nchaa nàcuáa quide-í cuendá ducaⁿ cùtnuní iní-ndó.

²² Te cuendá xíáⁿ nũu cuíní-í tendaha-í-dé quixi-dé núú ndécú-ndó cuendá cachí tnũhu-dé xii-ndo nchàa nacuáa cùu ndecu-ndí iha, te ducaⁿ tàxi-gá-dé tnũhu ndee iní cundecu ndìhi-ndo.

²³ Te xicáⁿ táhú-í núú Tãtá-ó Dütú Ndiõxí ndìhi núú Xítóhó Jesucristú sá ncháá nchòhó ñáyiú ndècu ndìhi-í ichi-gá sá òⁿ-gá ná cádá te ío váha cuu iní-ndó cùndecu-ndo, te ducaⁿ ío cuu iní tnàhá-ndó, te ío quindáá iní-ndó-gã.

²⁴ Te nchòhó ío cùu iní-ndó Xítóhó Jesucristú, te ñá túú dàña ndéé-ndó cùu iní-ndó-gã. Te mee Yá Ndiõxí ío na chindee chitúu ñaha-gã xii-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ NÍ CADÚHA TĒ PĀBLÚ QUIHĪⁿ NDAHA ÑÁYIU ÑUÚ FÌLIPÚ

Té Pāblú cadúha-dé tutú quihĭⁿ ndaha ñáyiú quide ndáá xĩndecu ichi Xítóhó Jesucristú ndécú ñuú Fìlipú

¹ Yúhú té Pāblú ndihĭ té Timùteú cúú-ndĭ cue téé xĩnu cuechi núú Xítóhó Jesucristú, te tēndaha-ndĭ tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndihĭ cue téé chĩndee ñaha xii-ndo, ndihĭ nchaa dava-gá ñáyiú xĩquide ndáá ndécú ichi-gá ñuú Fìlipú.

² Te xicáⁿ táhù-í núú Tātá-ó Dütú Ndiöxí ndihĭ núú Xítóhó Jesucristú sá ná chĩndee chitúú ñaha-gá xii-ndo, te ducaⁿ ndĭ nduú-gá ná cáda te ío váha cuu iní-ndó cūndecu-ndo.

Té Pāblú cāháⁿ ndihĭ-dé Yă Ndiöxí cuendá nchaa ñáyiú ndècu ichi-gá

³ Te ndi tnahá òré ndácú ìní ñáhà-í xii-ndo, te ndácáⁿ táhù-í núú Tātá-ó Dütú Ndiöxí sá ndécú-ndó ichi-gá.

⁴ Te ndi tnahá òré ducaⁿ quide-í te ío cūdí^í ìní-í cāháⁿ ndihĭ-í-gá cuendá-ndó.

⁵ Chi ndéé cútnáhá ní sándáá iní-ndó-gă ní ngüita-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú.

⁶ Te yúhú sàni ndáá iní-í sá Yă Ndiöxí Yaá ní quesaha chĩndee ñaha xii-ndo quide váha-ndo ndècu-ndo, te ðiu-ni-gá chĩndee ñaha-gá xii-ndo cáda váha-ndo cūndecu-ndo ndéé ná sàá nduu quixi tucu Xítóhó Jesucristú.

⁷ Te ducaⁿ tnàhí tàú-xi cani iní-í sá cúú-xí-ndó, chi ío cūu iní ñáhà-í xii-ndo. Te tnàhà-ndó ío chĩndee chitúú ñaha Yă Ndiöxí xii-ndo ndècu-ndo, te ðiu-ni ducaⁿ chĩndee ñaha-gá xii-ndo tnàhà-ndó cuēi vitna yĭhĭ-í vecaá, te ðiu-ni ducaⁿ chĩndee ñaha-gá xii-í cuēi òré cuáháⁿ-í núú cuē ñáyiú ñá túú tnàhà iní tnúhu-gá, chi ñihĭ-í tnúhu nādanchocáva-í nūu ná tnúhu cāháⁿ-yu cuendá-gá, te nchaa ñáyiú xăháⁿ-ĩ xii-yu sá tnúhu-gá cúú-xí tnúhu ndáá cuiti.

⁸ Te mee Yă Ndiöxí nánhá ndáá-gá sá yúhú ío cūu iní ñáhà-í xii-ndo dàtná cúú iní ñáhà mèe Xítóhó Jesucristú xii-o.

⁹ Te xicáⁿ táhù-í núú Yă Ndiöxí sá ðiú-gă ná chĩndee ñaha-gá xii-ndo te uuⁿ-gá cuita cuu iní tnàhà-gă-ndó quihĭⁿ, te ducaⁿ ío váha cuita cutnūnĭ iní-ndó nchaa nacúáa sàni iní-gá cada-ndo, te ducaⁿ ío váha cuita cutnūnĭ tucu iní-ndó nàcúáa cūndecu-ndo.

¹⁰ Te ducaⁿ cūtnūnĭ tucu iní-ndó nchaa sá ío-gá váha xĩni ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñà túú tnàhí ná cūmánĭ-ndó nūú Yă Ndiöxí ndéé ná sàá nduu quixi tucu Xítóhó Jesucristú.

¹¹ Te ðiu-ni Xítóhó Jesucristú chĩndee ñaha-gá xii-ndo cáda-ni-ndo nchaa núú sá váha nàcúáa cuĩní Yă Ndiöxí. Te sá dúcáⁿ ná cáda-ndo te ío cada cāhnu-ndo-gá, te nchaa dava-gá ñáyiú cāháⁿ váha-yu cuendá-gá.

Xítóhó Jesucristú ío cūnuu-gá ndécú ndihĭ-gá té Pāblú

¹² Te nchaa nchòhó ñáyiú ndècu ndihĭ-í ichi Xítóhó Jesucristú na cāchĭ tnúhu-í xii-ndo sá úúⁿ-gă tá xité nuu tnúhu-gá vitna yĭhĭ-í vecaá.

¹³ Te nchaa cue téé cūu sandadú xĩndecu vechiūⁿ núú ndécú téé cūnuu xinĭ-güedé sá sá cuendá sá cāháⁿ-í tnúhu Xítóhó Jesucristú duha yĭhĭ-í vecaá, te ðiu-ni ducaⁿ sá xinĭ nchaa dava-gá ñáyiú sá sá cāháⁿ-í tnúhu-gá duha yĭhĭ-í vecaá.

¹⁴ Te cuendá sá dúhá yĭhĭ-í vecaá xĭáⁿ ío-gá vāi ñáyiú ndècu ichi Yă Ndiöxí ta cūtnūnĭ-gá iní-yu sá cúú-gă ĩⁿ Yaá ío quide ndáá, te uuⁿ-gá tá cūyĭ^í-yu cāháⁿ-yu tnúhu-gá, te ñá túú tnàhí-gá yúhú-yu cāháⁿ-yu.

¹⁵ Te na cāchĭ-í tnúhu ndáá-í xii-ndo sá dàva ñáyiú cāháⁿ-yu tnúhu Xítóhó Jesucristú cuendá-ni sá cúú cuedú iní ñáhă-yu xii-í sá ío chĩndee ñaha-gá xii-í cāháⁿ-í tnúhu-gá. Te ducaⁿ quide-yu chi cuĩní-yu nāá ndihĭ ñáhă-yu xii-í, dico davá-yu chi ío váha sàni iní-yu cāháⁿ-yu tnúhu-gá.

¹⁶⁻¹⁷ Te ñáyiú-áⁿ cāháⁿ-yu tnúhu-gá chi cūu iní ñáhă-yu xii-í, te sa nàhá-yu sá sá cuendá sá cāháⁿ váha-í cuendá tnúhu-gá núú ñáyiú ñá túú tnàhà iní tnúhu-gá, cuendá xĭáⁿ yĭhĭ-í vecaá. Te dava-gá-yu

càháⁿ-yu tnúhu Xítóhó Jesucristú cuendá-ni sá cuíní-yu cuu sá vâha xii mée-yu, te ñá díú sá càháⁿ-yu cuendá sá sání vâha iní-yu. Te ducaⁿ quidé-yu chi cuendá cuíní-yu sá nãndi-gá cada ñaha-güedë xii-í.

18 Dico ío cudíí iní-í sá càháⁿ-yu tnúhu Xítóhó Jesucristú cuëi cùu váha iní-yu àdi ñá túú cùu váha iní-yu càháⁿ-yu.

Te diu-ni ducaⁿ cudíí iní-í núu cuaháⁿ núu véxi.

19 Te cùtnuní iní-í sá sã cuendá nchaa sá quidé ñaha-güedë xii-í, cuendá xiãⁿ cada váha ñaha Yã Ndiöxí xii-í, chi nchòhó ío càháⁿ ndihi-ndo-gã cuendá-í, te Espiritú ní taxi Xítóhó Jesucristú ndécú ndihi-o ío chindee ñaha-xi xii-í.

20 Te cuíní-í sá ñá túú tnàhí ná cumànì-í núu Yã Ndiöxí cuendá sá vã cúu càhaⁿ núu-í, te cùtnuní iní-í sá díú-gã chindee ñaha-gã xii-í. Te cuíní tucu-í sá ío cuyii-í càháⁿ-í tnúhu-gã vitna dàtná tá quide-í véxi, te ducaⁿ ío cada nínu-í Xítóhó Jesucristú cuëi vitna nini ndècu-í ñuyíú-a te cuëi na cùú-í ducaⁿ-ni càda nínu-í-gã.

21 Te nini ndècu-í ñuyíú-a te Xítóhó Jesucristú ío cùnuu-gã ndécú ndihi ñaha-gã xii-í, te na sàà nduu cùú-í te ío-gã váha tnahá-í chi nucúndecu-í ndihi-gã.

22 Te núu na cùndecu-gã-í ñuyíú-a te cada-gã-í chiúⁿ sá cúu-xí Yã Ndiöxí, te ñá cùtnuní iní-í nása cada-í nõu sá cùndècu-í àdi sá cùú-í.

23 Te ío vai sani iní-í te cuíní-í cuú-í chi ío-gã váha cundecu-í núu ndécú Xítóhó Jesucristú.

24 Dico sá cúu-xí nchòhó chi ío xìni ñuhu-xi cundecu-í.

25 Te cùtnuní ndáá iní-í sá ñⁿ tnúhu ndáá càháⁿ-í, te cùtnuní tucu iní-í sá cùndècu-ni-í cundecu ndihi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gã iní-ndó Xítóhó Jesucristú quíhíⁿ, te ducaⁿ ío cudíí iní-ndó cùndecu-ndo.

26 Te ducaⁿ te uuⁿ-gã cachí-ndó sã ío càhnu cuu Xítóhó Jesucristú cuendá sá ñí dácãcu ñaha-gã xii-í ndécú ndihi ñaha-í xii-ndo.

27 Te xìni ñuhu-xi cada-ndo nchaa nacuaá càháⁿ tnúhu Xítóhó Jesucristú. Te núu ní ndacu-í véxi coto ñaha-í xii-ndo, te dàvá-án quini ndáá-í sá ndécú-ni-ndó ìchi Xítóhó

Jesucristú. Dico núu ñá túú ní ndàcu-í quixi coto ñaha-í xii-ndo ña, te diu-ni níhì-í tnúhu sá ndécú-ni-ndó ìchi-gã, te níhí tucu-í tnúhu sá ñⁿ-ní cùu-ndo ndecu-ndo, te níhí tucu-í tnúhu sá ñⁿnuu nducu ndee-ndo caháⁿ-ndó tnúhu Yã Ndiöxí núu ñáyu, tnúhu sá sãndáá iní-ndó.

28 Te ñá túú yùhú-ndó nchàa sá quidé ñaha ñáyu cùu úhú iní ñáhá xì-ndo, te sá dúcáⁿ quide-ndo ñá túú yùhú-ndó nchàa sá quidé ñáhá-yu xii-ndo, te ndixi túu iní-yu sá nchòhó ndécú-ndó ñⁿ ichi núu nánihí tãhú-ndó, te ñáyu-án cuíta nihnú-yu, chi ducaⁿ ñí cachí Yã Ndiöxí cunduu.

29 Te mee Yã Ndiöxí ní taxi-gã tnúhu ndee iní sá quindáá iní-ó Xítóhó Jesucristú, te ñá díú-ní sã quindáá iní-ó-gã chi tnàhá ndoho-o cuendá-gã.

30 Te tnàhá nchòhó ndóhó-ndó cuendá-gã vitna, te nchòhó ní xiní núu-ndó nàcuáa ní ndoho-í, te vitna níhí-ndó tnúhu nchaa nàcuáa ndòho tucu-í.

2

Xítóhó Jesucristú ñá túú ní quide nínu-gã mée-gã dico Yã Ndiöxí ní quide nínu ñaha xì-gã

1 Te Xítóhó Jesucristú dácàhu iní ñáhá-gã xii-ndo nàcuáa cundecu-ndo, te cùu iní ñáhá-gã xii-ndo nàcuáa cuu váha iní-ndó cùndecu-ndo, te ndècu ndihi-ndo Espiritú Yã Ndiöxí, te ío cùndahú iní tnàhá-ndó.

2 Te xiãⁿ nõu càháⁿ-í dóho-ndo sã ío cuu ñⁿnuu-ni-ndo cùndecu-ndo nacuaá ío-gã cudíí iní-í, te ñⁿ-ni cùu iní tnàhá-ndó, te ñⁿ-ni càni iní-ndó, te ñⁿ-ni càda-ndo.

3 Te vá cáda ññu-ndo mée-ndo nducu-ndo mee-ni sá cúu-xí mée-ndo, chi cunduu ndàhú iní-ndó, te cani iní-ndó sã tnàha ñáyu-ndo ío-gã cùnùú-yu dácúxí mée-ndo.

4 Te ni vã cáni iní-ndó ndùcu-ndo mee-ni sá váha sá cúu-xí mée-ndo, chi nducu-ndo sã cúu-xí tnàhá cuendá tnàha ñáyu-ndo.

5 Te ío váha cani iní-ndó nàcuáa cundecu-ndo dàtná quidé mée Xítóhó Jesucristú.

6 Te ñⁿ-ni cùu Xítóhó Jesucristú ndihi Yã Ndiöxí. Te cuëi ducaⁿ dico mee Xítóhó Jesucristú ní sani iní-gã sã ñá túú cùyica cundecu-gã taxi tnùnì-gã ndihi Yã Ndiöxí.

7 Te ní dáñá-gã sá cúnù-gá andiu te ní quixi-gá ñuyú-a ní cuu-gá ìⁿ ñáyiu, te ní quide-gá dàtná quidé ìⁿ téé xínu cuechi.

8 Te ní cuu-gá ìⁿ téé dàtná ndăa cue téé xĩndecu ñuyú-a, te ní cuu-gá ìⁿ téé ío ndàhú iní-xi chi ñá túú ní quide nínu-gá méé-gã, te ní sándáá iní-gá ní quide-gá nchaa năcuáa ní xáhaⁿ Yă Ndiôxí xii-gá cútnàhá ní quixi-gá ñuyú-a. Te sá dúcáⁿ ñi sándáá iní-gá xíáⁿ ní xíhí-gá núú cùrúxí.

9 Te xíáⁿ ío ní quide nínu ñaha Yă Ndiôxí xii Xítóhó Jesucristú cuendá ío cunuu-gã. Te ní xáhaⁿ Yă Ndiôxí xii Xítóhó Jesucristú sá cúú-gã Xítóhó nchaa ñáyiu ndècu ñuyú-a.

10 Te ducaⁿ ñi quide Yă Ndiôxí cuendá nchaa Espíritú ndécú andiu, ndihí nchaa ñáyiu ndècu ñuyú-a, ndihí nchaa ñáyiu ní xíhí ngüíñí xítí-yu ndihí nchaa espíritú-áⁿ te cachí-yu ndihí-xi sá ío cànnu cuu Xítóhó Jesucristú.

11 Te ncháa-yu cachí-yu sá Xítóhó Jesucristú cúú-gã Yaá táxí tnùní. Te sá dúcáⁿ càdá-yu, te quide cahnú-yu Dútú Ndiôxí.

Ñáyiu ndècu ichi Xítóhó Jesucristú cúú-yu dàtná ìⁿ ñuhú

12 Te xíáⁿ nũu nchaa nchòhó ñáyiu ío cùu iní-í cuíní-í sá quíndáá iní ñáhá-ndó xii-í dàtná ní quide-ndo cùtnàhá ní xĩndecu ndihí ñaha-í xii-ndo, chi dàvá-áⁿ ñà túú tnàhí ní dàña ndeé-ndó ñi sándáá iní ñáhá-ndó xii-í. Te cuíní-í sá úúⁿ-gã quíndáá iní ñáhá-ndó xii-í vitna ñá túú ndècu ndihí ñaha-í xii-ndo. Te ío nducu ndèe-ndo cada-ndo nchaa năcuáa táu-xi cunduu ndéé ná sáá nduu nduu táhú-ndó cùndecu-ndo ndihí Xítóhó Jesucristú, te ío canehe-ndo sá yíñùhu núú-gã.

13 Te Yă Ndiôxí ío váha dàcahu iní ñáhá-gã xii-ndo càda-ndo nchaa năcuáa cuíní méé-gã, te ñu-ni mee-gã chíndèe ñaha-gã xii-ndo dùcaⁿ quide-ndo.

14 Te vá cání iní-ndó ñá tnúhu cáháⁿ-ndó cuendá ñáyiu, te ñi ñà túú năndí tnúhu cútnàha-ndo ndihí-yu,

15 te ducaⁿ te cuu-ndo ñáyiu ñá túú cuèchi-xi núú Yă Ndiôxí. Te nchòhó ñáyiu cùu déhe Yă Ndiôxí, ñá túú tnàhí-gá ná cumání-ndó nũú-gã ñini ndècu-ndo tnuú nchaa ñáyiu ndècu ichi cuehé ichi duha

ñuyú-a, ñáyiu cuihna iní-xi. Te cuu-ndo dàtná chódíní sá dáyèhé niú nee,

16 te ducaⁿ chi dàcuaha-ndo ñáyiu tnúhu Yă Ndiôxí tnúhu sá càháⁿ năcuáa naníhí tãhú-yu. Te núu ducaⁿ-ni na càda-ndo te òré ná sáá nduu càda ndáá Xítóhó Jesucristú nchaa yíca cuèchi ñáyiu, te dàvá-áⁿ vã cúú càháⁿ núú-í, chi ñá túú dió ducaⁿ ni sàhni iní-í cada-í nchaa chùⁿ ní táhú-gã.

17 Te nchòhó ío váha quide-ndo ndècu-ndo ichi Yă Ndiôxí chi sándáá iní-ndó-gã, te yúhú cahni ñaha-güedé xii-í cuendá nchaa sá váha quide-ó. Te xíáⁿ ío cùdí^í iní-í te cùdí^í tucu iní-í dàtná cùdí^í iní-ndó cuendá nchaa sá váha quide-ndo.

18 Te ñu-ni ducaⁿ ío chí cùdí^í iní dàtná cùdí^í iní méé-í cuendá nchaa sá yãha-í ndécú-í.

Té Timùteú ndihí té Epafròditú

19 Te núu Xítóhó Jesucristú ná càchí-gá te ndihí-ni tendaha-í té Timùteú quixi-dé quixi coto ñaha-dě xii-ndo năcuáa cudí^í iní-ndó. Te òré ndixi-dé canaha-dě tnúhu ndixi núu nása cùu ndècu-ndo, te tnàhá yúhú ío cudí^í iní-í tucu.

20 Te núu ncháá cuè téé ndècu ndihí-í te ìⁿ ñuhú-ni té Timùteú-a cùu-dé téé ío váha sàni iní-xi dàtná sání iní-í, chi ñu tnàhí-ni-dé ío sàni iní-dé nũu nása ndècu-ndo.

21 Chi dăva-gã-güedé mee-ni sá cúú-xí mèe-güedé ío sàni iní-güedé, te ñá túú sàni iní-güedé cada-güedé chùⁿ tahu Xítóhó Jesucristú.

22 Te nchòhó sa xíní-ndó sã tẽ Timùteú-a cùu-dé ìⁿ téé quide váha chi năndí sá tá yãha-dé véxi te quide ndee iní-dé. Te cùu-dé dàtná ìⁿ déhe-í ndécú ndihí ñaha-dé xii-í xínú cuèchi-ndí núú Xítóhó Jesucristú càháⁿ-ndí tnúhu-gá núú ñáyiu.

23 Te òré ná cùtnuní nũu nása cada ñaha-güedé xii-í te ndihí-ni tendaha-í-dé quixi coto ñaha-dě xii-ndo.

24 Te sàni iní-í sá Xítóhó Jesucristú cada-gá te tnàhá méé-í ío ndihí quixi coto ñaha-í xii-ndo.

25 Te tnàhá sání iní-í sá ío xíni ñuhu-xi tendaha-í té Epafròditú téé ndècu ndihí-o ichi Xítóhó Jesucristú ndixi coto ñaha-dě xii-ndo, chi tnàhá-dé quidé-dě chùⁿ-gã te quide ndee iní-dé tnàhá-dé năndí yãha-dé

sá cuendá-gá, te diu mee-ndo ñi tendaha-ndo-dě véxi-dé cuendá coto ñaha-dě xii-í.

²⁶ Te ducaⁿ cuini-í tendaha-í-dé ndixi-dé chi mee-dě ío sàni iní-dé ndixi cáháⁿ ndihi ñaha-dě xii-ndo, te ío ndihú iní-dé sá ni ñihí-ndó tñuhu sá cùhú-dé ní cùu.

²⁷ Te ndáá sá ñi cùhú-dé chi luha ndiquiⁿ-ná cuú-dé ní cùu, dico Yá Ndiöxí ní cundahú iní ñáhá-gã xii-dé ní quide tátna ñaha-gã te ní ndúha-dé. Te ñá díu-ní mèe-dé ducaⁿ ní cundahú iní ñáhá-gã xii-dé chi tñahá yúhú ío ní cundahú iní ñáhá-gã xii-í, chi núu ni xihí-dé te ío-gá ndihú iní-í ní cùu.

²⁸ Te xiáⁿ ío ndihi cuini-í tendaha-í-dé ndixi-dé cuendá òré nasáá-dé núu-ndó te ío cudíí iní-ndó, te ducaⁿ yúhú ñá túú-gã ná caní iní-í.

²⁹ Te òré nasáá-dé te ío cudíí iní-ndó nàqueheⁿ cuendá-ndó-dě, te ducaⁿ ío ndacáⁿ táhú-ndó núu Xítohó Jesucristú cuendá-dé. Te ío canehe-ndo sã yíñuhu núu nchaa cue tée quide datná quidé-dě.

³⁰ Chi téa sa luha ndiquiⁿ-ná cuú-dé ní cùu sá xínú cuèchi-dé núu Xítohó Jesucristú, te ní sani iní-dé sá ñà túú ñà cada-xi cuèi na cùú-dé ní quide-dé nchaa chiúⁿ sá cúmăni cada-ndo cuendá-í ní cùu.

3

Ñáyiu cundáá núu Yá Ndiöxí

¹ Te vitna nchaa nchòhó ñáyiu ndècu ndihi-í ichi Xítohó Jesucristú cáháⁿ ndahú-í núu-ndó sã ío cudíí iní-ndó sã yíndaha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tñuhu sá sã ní dánèhé ñáhà-í xii-ndo, chi cùu-xi tñuhu sá ío chindee ñaha-xi xii-ndo.

² Te ío quihí iní-ndó vã cádá cuendá-ndó ñi ñⁿ tñuhu cáháⁿ cue téa ío cuihna iní-xi ñá túú tñahí cuini cada sá vãha, chi cue téa-áⁿ néhé-güedě iní iná chi càchí-güedé sá ncháá cuè téa xini ñuhu-xi cuáha-güedé sèñá ñi-güedé cuendá ducaⁿ cùdiu-güedé núu Yá Ndiöxí.

³ Dico nchoo chi cùdiu-o núu Yá Ndiöxí cuèi dava-o sã ní ngúndecu sèñá ñi-o te dava-o ñáhá, chi Espiritú-gá chindèe ñaha-xi xii-o quide-o nchaa nacúáa tàú-xi cunduu cuendá cuu càhnu-gá. Te ío cudíí iní-ó càchí-ó sã ío càhnu cuu Xítohó Jesucristú, te

ñá túú sàni iní-ó sã sã cuendá nchaa sá vãha quide-o cùdiu-o núu Yá Ndiöxí.

⁴ Te núu dicó cuendá nchaa sá vãha quide-o cùdiu-o núu Yá Ndiöxí, te yúhú sa ama-gá cùdiu-í núu-gã cuendá nchaa sá ñi quide-í ní cùu te núu dicó ducaⁿ. Te ío cue téa càchí-güedé sá cùdiu-güedé núu Yá Ndiöxí cuendá nchaa sá vãha quide-güedé. Te yúhú uuⁿ-gá ducaⁿ cáháⁿ-í núu dicó sá cùu chi yúhú ní xidó-gã-í ní quide-í dàcúxí dáva-gã-güedé.

⁵ Te núu ùná-ni nduu sá ñi cacu-í te ní sáha-güedé sèñá ñi-í, te yúhú cùu-í téa isràel, te mei ñani tñahá ndii Benjamín téa ní xíndecu ndéé sanaha cùu-í. Te cáháⁿ-í tñuhu hèbreú tñuhu cáháⁿ tãtà-í ndihi ñànà-í, te ní cundihí-í nchaa cue téa cùu fariséu, te ní cãncicúⁿ nihnu-í nchaa nàcuáa ní cáháⁿ ndii Moisés dàtná xíquide mee-güedé.

⁶ Te yúhú ní sani iní-í sá ñⁿ ichi ndáá ndécù-í ní cùu, te ío ní cuini-í cunu cuechi-í núu Yá Ndiöxí, núu xiáⁿ nándi sá ñi quide-í nchaa ñáyiu ndècu ichi Xítohó Jesucristú, te vã yóo ñⁿ ni xóo cùñaha ñⁿ tñuhu xii-í cachí-yu sá ñà túú quide-í nàcuáa ní cáháⁿ ndii Moisés ní cùu.

⁷ Te nchaa sá sání iní-í sá ío nándihi nchicúⁿ nihnu-í ní cùu, ní cutnùni iní-í sá ñà túú tñahí chindee ñaha-xi nacúáa cundáá-í núu Yá Ndiöxí, núu xiáⁿ duuⁿ duuⁿ ní xehndé iní-í sá vã chindèe ñaha-xi cuendá sá ñi cuini-í cundecu ndihi-í Xítohó Jesucristú.

⁸ Te nchaa sá càchí ñáyiu chindee ñaha cundáá-ó núu Yá Ndiöxí ní cutnùni iní-í sá ñà túú chindee ñaha-xi. Te yúhú ní cutnùni iní-í sá ío-gá vãha tñahá tñuhu-o ndihi Xítohó Jesucristú. Te nchaa sá sání iní-í chindèe ñaha xii-í ní cùu, ñá túú-gã sàndáá iní-í sá chindèe ñaha-xi vitna chi ní cutnùni iní-í sá ñà túú nándihi-xi. Te ducaⁿ quide-í ñá túú-gã sàndáá iní-í nchaa xiáⁿ sá chindèe ñaha-xi, chi cuini-í sá úúⁿ-gã cuita tñahá tñuhu-í ndihi Xítohó Jesucristú quihíⁿ,

⁹ te cuu ñⁿnuu-í ndihi-gá, te ducaⁿ-ni cundáá-í núu Yá Ndiöxí dàtná cundáá-í vitna, dico ñá díu cuendá sá nchicúⁿ nihnu-í nàcuáa ní cáháⁿ ndii Moisés ní cùu, chi cuendá sá sàndáá iní-í Xítohó Jesucristú. Te Yá Ndiöxí ní quide-gá cundáá-í núu-gã, te ducaⁿ chi ní sàndáá iní-í Xítohó Jesucristú.

10 Te cuìní-í cutnùnì iní-í nchaa nàcuáa sàni iní Xítóhó Jesucristú, te cuìní-í sá ìo chindee ñàha-gá, te ñi-í-gá cúu-gá Yaá ní xíhí te ní ndoto-gá, te ducaⁿ cuìní-í cada-gá cuèndá cada-í nchaa nàcuáa cuìní-gá. Te cuìní-í tñàhá-í ndoho-í dàtná ní ndoho-gá. Te yúhú cuìní-í sá vǎ cáda-í ní ñiⁿ sá ñà túu tñàhá iní Yǎ Ndiǒxí, chi ñi-í cuèndá-áⁿ ní xíhí Xítóhó Jesucristú.

11 Te cuìní-í sá Yǎ Ndiǒxí cachí-gá te tñàhá-í ndoto na sáá nduu ndòto nchaa ñáyiú sa ní xíhí ní xíndecu ichi-gá.

Cada-o nchaa nacuáa tǎu-xi cunduu cuèndá ñíhí-ó sǎ ndúú tǎhú-ó

12 Te cumání-gǎ cada-í nchaa nàcuáa càháⁿ-í-a, te cumání-gǎ cada-í nchaa nàcuáa càháⁿ Yǎ Ndiǒxí cuèndá sá ñà túu-gǎ ná cumání-í núu-gǎ. Te ío ndùcu ndee-í nchícúⁿ nihnu-í quidè-í nàcuáa ducaⁿ ñà túu-gǎ ná cumání-í núu-gǎ, chi ñi-í cuèndá-áⁿ ní càháⁿ ñàhá Xítóhó Jesucristú xii-í.

13 Te nchaa nchòhó ñáyiú ndècu ndíhí-í ichi Xítóhó Jesucristú càhí tñúhu-í xii-ndo sǎ cùtnuní ndáá iní-í sá vǐtná cumání-gǎ cada-í nchaa nàcuáa ñà túu-gǎ ná cumání-í núu-gǎ. Te ní ñíhí-í ñiⁿ sá ìo xíni ñúhu-xi cada-í te xǎⁿ quidè-í, te ñà túu-gǎ quidè cuèndá-í nchaa sá ní xóo cada-í, te ío ndùcu ndee-í quidè-í nchaa nàcuáa càháⁿ Yǎ Ndiǒxí.

14 Te ndùcu ndee vihi-í nchícúⁿ nihnu-í quidè-í nchaa nàcuáa càháⁿ-gǎ, te ñi-í-gá ducaⁿ càda-í ndéé ná sáá nduu sǎá-í núu ndécú-gǎ taxi-gǎ sá ndúú tǎhú-í. Te ducaⁿ tñàhí sa ní càháⁿ ñàhá-gǎ xii-o cùndecu-o ndíhí-gǎ, te ducaⁿ ní càháⁿ ñàhá-gǎ xii-o sǎ cuèndá Xítóhó Jesucristú chi tñàhá tñúhu-o ndíhí-gǎ.

15 Te nchaa nchòhó ñáyiú quide váha ndècu ichi Yǎ Ndiǒxí xíni ñúhu-xi cani iní-ndó dàtná sání iní-í-a, àdi núu dava-ndo ñà túu sàni iní-ndó dàtná sání iní-í-a, dico mee Yǎ Ndiǒxí dandixi túu-gǎ iní-ndó te cutnùnì iní-ndó nàcuáa cada-ndo.

16 Te xíni ñúhu-ni-xi cada-o nchaa nacuáa ta quide-o véxi.

17 Te nchaa nchòhó ñáyiú ndècu ndíhí-í ichi Xítóhó Jesucristú càháⁿ-í dóho-ndo sǎ cǎnchícúⁿ nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchícúⁿ nihnu nchaa

nàcuáa dànehé ñàhá-í xii-ndo cuèndá ducaⁿ càda-ndo tñàhá-ndó.

18 Te sa ní cuu vǎi xito cachí tñúhu-í xii-ndo sǎ ìo ñáyiú ñà túu tñàhí cùu váha iní-xi sá ní xíhí Xítóhó Jesucristú núu cùrúxí cuèndá sá nánihí tǎhú-ó. Te ndíhí ndute núu-í dándacu iní ñàhá-í xii-ndo cuèndá-yu.

19 Te sáá nduu te nchaa ñáyiú ducaⁿ xǐquide-áⁿ cuíta nihnú-yu, chi mee-ni nchaa sá cuèhé sá dúhá ñúhu iní-yu te ñi-í-gá nchaa xǎⁿ cùnùu quidè-yu, te cucahaⁿ núu-yu cuèndá nchaa sá quidè-yu núu dícó sá cúu, dico ñàhá chi da quide cahnú-yu mèe-yu cuèndá nchaa xǎⁿ. Te mee-ni nchaa sá ìo ñúyú-a ñúhu iní-yu.

20 Dico nchoo chi andíu ndècu núu cúu ñúu-ó, te ndètu cahnu-o sáá nduu quixi tucu Xítóhó Jesucristú nacuaca ñàha-gǎ xii-o. Te ñi-í-gá cúu-gǎ Yaá ní dácacu nihnu ñàha xii-o núu ùhú núu ndàhú.

21 Te yǐqui cùñú-ó chi vá cùdǐ-xi cundecu-xi dàtná cáá-xí vǐtna, dico mee Xítóhó Jesucristú nadama-gǎ yǐqui cùñú-ó te ndada-gǎ dàtná ní nduu yǐqui cùñú mée-gǎ cùtnàhá ní ndoto-gǎ. Te ducaⁿ càda-gǎ chi ndàcu-gǎ quidè-gǎ nchaa sá vǎha càhí iní-gǎ, te ducaⁿ tǎxi tñuní-gǎ nchaandi túhú sá ìo.

4

Ío cudǐ iní-ó sǎ ndécú-ó ichi Xítóhó Jesucristú

1 Te nchaa nchòhó ñáyiú ío cùu iní-í ndécú ndíhí-í ichi Xítóhó Jesucristú ío cuìní-í càháⁿ ndíhí ñàha-í xii-ndo. Te ío cudǐ iní-í cuèndá nchaa sá vǎha quide-ndo chi ñà túu ní xíta chiuⁿ Yǎ Ndiǒxí ní quide-í sá cúu-xí-ndó, te ñi-í-gá nchòhó ñáyiú ío cùu iní-í càháⁿ-í dóho-ndo sǎ cǎnchícúⁿ nihnu-ni-ndo ichi Xítóhó Jesucristú.

2 Te yòhó tá Vòdiá ndíhí yòhó tá Sǐntiqué càháⁿ ndàhú-í núu-ndó sǎ cúu ñiⁿnuu-ndo cundecu-ndo ichi Xítóhó Jesucristú.

3 Te yòhó té cùndíhí-í quide ndáá quidè nchaa chiuⁿ quide-í, càháⁿ ndàhú-í núu-n sǎ chǐndèe tñúhu-n úú ñáyiú dǐhí-áⁿ cuèndá sá ná cùu ñiⁿnuu-yu cundecú-yu, chi cùtnàhá ní xíndecu ndíhí ñàhá-yu xii-í ío ní chindee ñàhá-yu xii-í, ndíhí té Clémenté, ndíhí nchaa dava-gǎ-yu ní quide-ndí chiuⁿ Xítóhó Jesucristú, te nchaa ñáyiú-áⁿ sa

yòdo tnuní-yu núú tùtú Yă Ndiöxí sá ndúú tǎhũ-yu cundecú-yu ndihí-gá nì caa nì quíhíⁿ.

⁴ Te nchaa-ni nduu ío cudíí ìní-ndó sǎ ndécú-ndó ichi Xítóhó Jesucristú. ¡Te cǎháⁿ-ni tucu-í dóho-ndo sǎ cudíí ndìsa ìní-ndó!

⁵ Te ío váha cuu ìní-ndó cǎháⁿ ndihí-ndo ñáyiú cuèndá ná cùtnuní ìní-yu sá cúú-ndó ñáyiú váha ìní-xi, chí sa ta cùyatni nduu quixi tucu Xítóhó Jesucristú.

⁶ Te ñá túú tnàhí ná cani ìní-ndó te núú nása cùu ndecu-ndo, chí cǎháⁿ ndihí-ndo Yă Ndiöxí cuèndá sǎ ná chìndee ñaha-gá xii-ndo. Te ío ndacáⁿ tǎhú-ndó núú-gǎ.

⁷ Te núú ducaⁿ na càda-ndo te Yă Ndiöxí cada-gá te ío váha cuu ìní-ndó cùndecu-ndo. Te nchoo ñáyiú ñá túú cùtnuní ìní-ó nása quide-gá ndéé ducaⁿ ío váha cùu ìní-ó, te ducaⁿ ío váha cùu ìní-ó chí cùu ìⁿnuu-o ndihí Xítóhó Jesucristú.

Mee-ni sǎ vǎha cuhuⁿ ìní-ó

⁸ Te cǎháⁿ ndàhú tucu-í núú nchàa nchohó ñáyiú ndècu ndihí-í ichi Xítóhó Jesucristú sǎ méé-ní sǎ vǎha cuhuⁿ ìní-ndó. Te xìni ñuhu-xi cuhuⁿ ìní-ndó mèe-ni nchaa tnúhu ndáá, ndihí nchaa tnúhu yíñuhu, ndihí nchaa tnúhu sǎ ío cudíí ìní-ó, ndihí nchaa tnúhu sǎ ío víi ío váha cuáháⁿ, ndihí nchaa tnúhu sǎ ñà túú ñuhu tnahá tnúhu cuèhé, ndihí nchaa tnúhu sǎ cǎchí ñáyiú váha, ndihí nchaa dava-gá tnúhu sǎ sání ìní méé-ndó sǎ ío váha te diu-ni nchaa xíáⁿ cuhuⁿ ìní-ndó.

⁹ Te cùtnahá ní xíndecu ndihí ñaha-í xii-ndo ní dánèhé ñahá-í nàcuáa cada-ndo te ní sándáá ìní-ndó. Te xíáⁿ cǎháⁿ-í dóho-ndo sǎ vǎ dáñá ndèé-ndó càda-ndo, te diu-ni ducaⁿ vǎ dáñá ndèé-ndó càda-ndo nchaa nacuáa ní quide-í ní xìní-ndó. Te núú ducaⁿ na càda-ndo te Yă Ndiöxí Yaá quidé ío váha cùu ìní-ó ndècu-o cundecu ndihí ñaha-gá xii-ndo.

Ñáyiú ñuú Filipú ndécú ichi Xítóhó Jesucristú sǎñahá-yu sǎ ndúú tǎhú tǎ Pǎblú

¹⁰ Te cudíí víhí ìní-í ndàcáⁿ tǎhú-í núú Xítóhó Jesucristú sǎ ní ndacu ìní ñahá-ndó xii-í, dico ñá díú sǎ ñà túú ñuhu ìní ñahá-ndó xii-í chí dicó sǎ ñǎ nihí-ndó nàcuáa cada-ndo chìndee ñaha-ndo xii-í ní cùu.

¹¹ Te ñá díú sǎ dúhá cǎháⁿ-í te cani ìní-ndó sǎ cǎchí tnúhu-í xii-ndo sǎ ío ìⁿ sǎ cúmání xii-í, chí yúhú cùu váha-ni ìní-í núu ío xii-í àdi ñá túú ío.

¹² Te xìní-í cunduu ndàhú-í, te xìní-í cunduu cuica-í, te xìní-í caxi-í ndahá xití-í, te xìní-í cuú-í docó, te xìní-í nàcuáa quide-xi oré ñá túú vèdana ná ndécú ndihí-o, te xìní-í nàcuáa quide-xi oré xidó ndécú ndihí-o. Te ducaⁿ ní cutúha-í quidè-í cuèndá nchaa nàcuáa ta yǎha-í véxi.

¹³ Te nchaa ndàcu-í quidè-í chí Xítóhó Jesucristú chìndee ñaha-gá xii-í.

¹⁴ Te nchòhó ío váha ní quide-ndo ní cundàhú ìní ñahá-ndó xii-í ní chìndee ñaha-ndo vitna ndecu ndihí-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cùtnahá ní ngúita-í cǎháⁿ-í tnúhu Xítóhó Jesucristú distritú Macèdoniá, te cùtnahá ní ndee-í distritú-áⁿ te diu tnàhí-ni nchòhó ní taxi-ndo sǎ ndúú tǎhú-í, te nchaa ñáyiú ndècu ichi Xítóhó Jesucristú dava-gá xichi ñá túú tnàhí ní chìndee ñahá-yu xii-í.

¹⁶ Te cuéi cùtnahá ní xíndecu-í ñuú Tesalónica títní xito ní tendaha-ndo sǎ ndúú tǎhú-í sǎ ní cutnùní ìní méé-ndó ní xini ñuhu-í.

¹⁷ Te vǎ cání ìní-ndó sǎ sǎ dúhá cǎháⁿ-í te cuìní-í nándi-gá taxi tǎhú-ndó, te duha cǎháⁿ-í chí Yă Ndiöxí ío-gá vǎi sǎ vǎha cada ñaha-gǎ xii-ndo sǎ dúcáⁿ quide-ndo.

¹⁸ Te ní xidó vǎi nchaa sǎ xìní ñuhu-í ndécú ndihí-í vitna, te ducaⁿ ío vǎi sǎ ndécú ndihí-í ní cuu chí ní tendaha tùcu-ndo sǎ ndúú tǎhú-í véxi ndihí té Epafròditú. Te tǎhú-a cùu-xi datná ìⁿ tǎhú sǎ ní sǎha-ndo mèe Yă Ndiöxí, te cùu víi cuu váha ìní-gá sǎ dúcáⁿ ní quide-ndo.

¹⁹ Te núú ná cúú sǎ xìní ñuhu-ndo, te mee Yă Ndiöxí ío vǎi taxi-gá chí ío vǎi sǎ ndécú ndihí-gá, te ducaⁿ càda-gá chí ndècu ndihí-o Xítóhó Jesucristú.

²⁰ Te vitna nchaa-o chí ná cǎchí-ó sǎ ío cǎhnu cuu Tátá-ó Dútú Ndiöxí ní caa ní quíhíⁿ. Te ducaⁿ na cùnduu.

Tnúhu ndéé núú ní ndihí-ná

²¹ Te cúñaha-ndo sǎ ío na càda ndee ìní nchaa ñáyiú ndècu ichi Xítóhó Jesucristú, ñáyiú cùu cuèndá Yă Ndiöxí. Te

tnàhá nchaa ñáyiú xĩndecu ichi Xítóhó Jesucristú ndécú ndìhi-í quidé ndèe iní ñáhă-yu xii-ndo.

²² Te nchaa ñáyiú cùu cuendá Yă Ndiöxí xínú cuèchi vehe té Cèsár té yìndaha cuéhé nàcióⁿ quidé ndèe iní ñáhă-yu xii-ndo, ndìhi nchaa dava-gá ñáyiú cùu cuendá-gá.

²³ Te Xítóhó Jesucristú ío na chĩndee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.

TUTÚ NÍ CADÚHA TĒ PĀBLŪ QUIHĪⁿ NDAHA ÑÁYIU ÑUÚ CÒLOSÁ

Té Pāblū cādūha-dé tutú quíhĪⁿ ndaha ñáyiū xīndecu ichi Xítohó Jesucristú ndécú ñuú Còlosá

¹ Yúhú té Pāblū ní tendaha ñaha Yá Ndiöxí cāháⁿ-í tnúhu Xítohó Jesucristú núú ñáyiū chi ducaⁿ cuíní méé Yá Ndiöxí cunduu, te cādúha-í tutú-a ndihĪ té Timùteú

² cuendá daquixi-í ndaha nchòhó ñáyiū ñuú Còlosá, ñáyiū cùu cuendá Yá Ndiöxí, ñáyiū quide ndáá ndécú ichi Xítohó Jesucristú, te xicáⁿ táhù-í núú Tātá-ó Dütú Ndiöxí sá ïo na chindee chitúu ñaha-gá xii-ndo, te ducaⁿ ndì nduú-gá ná cādá te ïo váha cuu iní-ndó cūndecu-ndo.

Té Pāblū cāháⁿ ndihĪ-dé Yá Ndiöxí cuendá ñáyiū sàndáá iní ñáhá xī Xítohó Jesucristú

³ Te ducaⁿ-ni cāháⁿ ndihĪ-ndí Yá Ndiöxí Yaá cúú Tātá Xítohó Jesucristú ndácáⁿ táhú-ndĪ núú-gá cuendá nchaa nācuáa quide-ndo ndecu-ndo,

⁴ chi nihĪ-ndĪ tnúhu sá ïo sàndáá iní-ndó Xítohó Jesucristú, te ducaⁿ ïo cùu iní-ndó nchaa ñáyiū cùu cuendá Yá Ndiöxí.

⁵ Te ducaⁿ quide-ndo chi sàndáá iní-ndó sá ndúú táhú-ndó cūndecu-ndo núú ndécú Xítohó Jesucristú, te tnúhu-áⁿ ñí nihĪ-ndó cūtnàhá ní xīndedóho-ndo tnúhu ndáá tnúhu Xítohó Jesucristú.

⁶ Te tnúhu Xítohó Jesucristú tá xité nuu-xi nihĪ ñuyúú cuáháⁿ. Te vai ñáyiū ta sàndáá iní-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhó chi ndéé cūtnàhá ní tecú dóho-ndo tnúhu-gá ní quesaha-xi ta cùu vai ñáyiū ñuú-ndó tá quide ndáá-yu núú-gá cuáháⁿ. Te dàvá-áⁿ ñí cutnùnĪ ndáá ndisa iní-ndó sá Yá Ndiöxí ïo chindee chitúu ñaha-gá xii-ndo.

⁷ Te ducaⁿ ñí dánèhé ñáhá tē Ēpafrás téé ïo cùu iní-ndĪ, chi tnàhá-dé ïo quide ndáá-dé xínú cuèchi-dé núú Xítohó Jesucristú quidé-dē núú-ndĪ dācuàha ñaha-dé xii-ndo tnúhu-gá.

⁸ Te cāchĪ tnúhu-dé xii-ndĪ sá ïo cùu iní ñáhá-ndó xii-ndĪ, te ducaⁿ quide-ndo chi Espiritú Yá Ndiöxí chīndèe ñaha-xi xii-ndo.

⁹ Te ndéé cūtnàhá ní nihĪ-ndĪ tnúhu nācuáa quide-ndo ndecu-ndo ndéé dàvá-áⁿ ñí ngūita-ndĪ ñá túú dàña ndee-ndĪ xicáⁿ táhú-ndĪ núú Yá Ndiöxí cuendá-ndó sá Espiritú-gá ná tàxi-xi nchaa-gá sá cūmānĪ quini tnùnĪ-ndó, te ducaⁿ te cutnùnĪ váha-gá iní-ndó nācuáa cuínĪ Yá Ndiöxí cada-ndo.

¹⁰ Te sá dúcáⁿ te ndacu-ndo càda-ndo mee-ni sá váha dàtná cuínĪ Xítohó Jesucristú cada nchaa ñáyiū ndècu ichi-gá. Te ducaⁿ ïo nduu vétú iní-gá te núu na càda-ndo nchaa núú sá váha. Te ducaⁿ ïo-gá cuita cutnùnĪ iní-ndó nchaa nācuáa cuínĪ Yá Ndiöxí cada-ndo.

¹¹ Te mee-gá cúú-gá Yaá ïo cūnuu, te ñuú-gá ïo chindee ñaha-gá xii-ndo, te cudĪ iní-ndó cuèi nāndĪ na càda ñaha ñáyiū xii-ndo sá cuendá-gá, te ducaⁿ ïo cunduu càhnu iní-ndó.

¹² Te ndacáⁿ táhú-ó núú Dütú Ndiöxí chi ní quide túha ñaha-gá xii-o cuendá nduu táhú-ó cūndecu-o ndihĪ nchaa dava-gá ñáyiū yīndaha-gá xīndecu núú cāndò canine ñá túú tnàhĪ-gá ñí ñíⁿ cuèchi ïó.

¹³ Te ñuú-gá ní quide ní dáñá-ó nchaa ichi cuehé ichi duha núú táxi tnùnĪ yucu ñávàha, te ní nachihĪ ñaha-gá xii-o ndàha Déhe-gá Yaá ïo cùu iní-gá.

¹⁴ Te Déhe-gá ní xīhĪ-gá cuendá sá nchóó cācu nihnu-o núú ùhú núú ndàhú, te ní quide càhnu iní-gá nchaa sá cuèhé sá dúhá ñí quide-o.

Ñáyiū cùu ñíⁿ nuu ndihĪ Yá Ndiöxí cuendá sá ñí xīhĪ Xítohó Jesucristú

¹⁵ Te Yá Ndiöxí cúú-gá Yaá vá cúú quini-ó dico Xítohó Jesucristú chi ní quixi túu-gá ñuyúú-a, te ní quide-gá nchaa nācuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndècu-gá ndéé cūtnàhá vátá ngáva-gá ñuyúú.

¹⁶ Te Xítohó Jesucristú ní quide-gá núú Yá Ndiöxí ní cadúha-gá nchaa sá ïó andĪu ndihĪ nchaa sá ïó ñuyúú-a, te ní cadúha-gá nchaa sá cúú quini núú-ó cūndehe-o, ndihĪ nchaa sá vá quini tnàhĪ-o, ndihĪ nchaa espíritú cūnū vihi xinu cuechi núú Yá Ndiöxí,

ndihi nchaa dava-gá espíritú xínú cuèchi. Te nchaa ní cadúha Xítóhó Jesucristú chi ducaⁿ ní cachí Yă Ndiöxí cunduu. Te ducaⁿ ní cachí Yă Ndiöxí cunduu cuendá nchaa cuu-xi mee-ni sá vâha sá cúu-xí Xítóhó Jesucristú.

¹⁷ Te Xítóhó Jesucristú ducaⁿ-ni ndècu-gá ndéé cútñahá vátá ngăva-gá ñuyíú-a, te ðiu núú ndáhá-gă cándòdo ñuyíú-a, ndihi andiu, ndihi nchaandi túhú sá íó.

¹⁸ Te ðiu Xítóhó Jesucristú cúnúu-gá yíndàha ñaha-gá xii nchaa nchoo ñáyiu ndècu ichi-gá, te ðiu-gá quidé-gă ndécú vâha-o núú-gă. Te núú ncháá ñáyiu ndoto ðiu-gá cúu-gă Yaá ío càhnu cuu sa ní ndoto, te sá dúcáⁿ ní ndoto-gá te xiăⁿ cúu-gă Yaá ío tàxi tnuní nchaandi túhú sá íó ñuyíú-a ndihi andiu.

¹⁹ Te ducaⁿ ío cúnúu-gá táxi tnuní-gá chi ndáá sá ìⁿ-ni cuu-gá ndihi Yă Ndiöxí.

²⁰ Te Xítóhó Jesucristú ní xíhí-gá núú cùrúxí, chi ducaⁿ ní cuiní Yă Ndiöxí cunduu cuendá sá vâ yôo ìⁿ-gá cuu úhú iní ñáhá xii-gá cuèi ñáyiu xíndecu ñuyíú-a, te cuèi cue espíritú ndécú àndiu.

²¹ Te nchòhó cútñahá vátá cúndècu-gá-ndó ichi Xítóhó Jesucristú ñá túú tnàhí ni xôo cáháⁿ ndihi-ndo-gă, chi mee-ni ní xóo cuu úhú iní-ndó-gă, te mee-ni ncháa sá cuèhé sá dúhá ní xóo cunuu ní xóo cada-ndo ni cùu, dico Xítóhó Jesucristú ní quide-gá ní tnahá tnúhu-ndo ndihi Yă Ndiöxí vitna.

²² Chi ðiu cuendá-áⁿ ní xíhí Xítóhó Jesucristú núú cùrúxí cuendá sá nchóó ndùu ndoo nduu nine iní-ó ngündecu-o núú Yă Ndiöxí, te ducaⁿ te ñá túú tnàhí-gá ná cumání-ó núú-gă, te vá yôo ìⁿ-gá cachí sá nchóó ndècu cuèchi-o.

²³ Te núú vá dáñá ndèé-ndó quíndáá iní-ndó Xítóhó Jesucristú, te cundecu-ni-ndo ichi-gá, te vá cání iní-ndó dàña-ndo tnúhu ndee iní ní taxi-gá ndécú ndihi-o. Te nchaa tnúhu-gá-áⁿ tá xité nuu-xi nihíi ñuyíú cuáháⁿ, te ðiu-ni tnúhu-áⁿ càháⁿ yúhú té Păblú dánèhé-í ñáyiu.

Té Păblú yíhí ðiquí-dě cáháⁿ-dé tnúhu Xítóhó Jesucristú núú ñáyiu ndècu ichi-gá

²⁴ Te vitna ío cùdúú iní-í ndóhò-í cuendá-ndó, chi Xítóhó Jesucristú ío ní

ndoho-gá cuendá-ó, te tnàhá yúhú ndóhò-í cuendá nchaa ñáyiu ndècu ichi-gá, dico vitna cùmání-gă ndoho-í cuendá-yu.

²⁵ Te Yă Ndiöxí ní cachí-gá sá yúhú quíhí ðiquí ñáhà-í xii nchaa nchòhó ñáyiu ndècu ichi-gá cuendá danèhé ñáhá vâha-í xii-ndo tnúhu-gá cuendá cuu-xi sá vâha sá cúu-xí-ndó.

²⁶ Te nchaa tnúhu sá dánèhé ñáhà-í xii-ndo ñá túú ní təcú dóho nchaa ñáyiu ní xíndecu ndéé sanaha, te mee-gă ní cuiní-gá sá ncháá nchòo ñáyiu yíndaha-gá vitna cundecu ndihi-o tnúhu-áⁿ.

²⁷ Te mee-gă ní cachí-gá sá dátúu-gá nchaa tnúhu sá ío vii ío vâha cuáháⁿ núú ncháa ñáyiu yíndaha-gá. Te tnúhu-áⁿ cúu-xí cuendá tnàhá nchaa nchòhó ñáyiu ñá túú cùu ñáyiu isràél. Te tnúhu-áⁿ dánèhé ñáhá-xí xii-ndo sá Xítóhó Jesucristú ndécú ndihi ñaha-gá xii-ndo. Te cuendá xiăⁿ ní ngündecu ndihi-ndo tnúhu ndee iní cundecu-ndo ndihi-gá ni caa ni quíhíⁿ.

²⁸ Te nchúhú mee-ni cuendá Xítóhó Jesucristú càháⁿ vâha-ndí, te dāsahú-ndí ñáyiu nàcuáa cadá-yu. Te vâha vîhi danèhé-ndí nchaa ñáyiu nàcuáa tecú tnuní-yu tnúhu-gá, te ducaⁿ dánèhé-ndí-yu nàcuáa cundáá-yu núú Yă Ndiöxí, te ducaⁿ chi tnàhá tnúhu-yu ndihi Xítóhó Jesucristú.

²⁹ Te cuendá xiăⁿ ío ndùcu ndee-í quidé-í chiúⁿ Xítóhó Jesucristú, te mee-gă ío chindee ñaha-gá xii-í núu xiăⁿ ndácù-í quidé-í chiúⁿ-gá.

2

¹ Te cuiní-í sá nchòhó cutnùní iní-ndó sá ío sàni iní-í cuendá-ndó, ndihi cuendá nchaa ñáyiu ndècu ñuú Laodiceá, ñáyiu xíndecu ichi Xítóhó Jesucristú. Te ducaⁿ-ni ío sàni iní-í cuendá nchaa ñáyiu vátá quíní ñáhá-gă xii-í.

² Te cuiní-í sá nchòhó ndihi nchaa ñáyiu-áⁿ ío nducu ndèe-ndo canchícúⁿ nihnu-ndo ichi Xítóhó Jesucristú, te ío cuu iní tnáhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndihi dava-gá ñáyiu-áⁿ ío vâha sáá sá xíní tnuní-ndó cuendá tecú tnuní-ndó ncháa nacúáa ndùu cuendá Xítóhó Jesucristú chi ío ndùu yuhu ni cuu, dico vitna ní dátúu-gá núú-ó.

³ Te Xítoho Jesucristú néhé vâha-gá nchaa tnúhu sá ïo xini ñuhu-xi tecú tnùn-í.

⁴ Te duha càháⁿ-í chi cuiní-í sá vâ quindáá iní-ndó ni ñⁿ tnúhu càháⁿ nchaa ñáyi cuiní dandàhú ñáhá xii-ndo cuéi ío vâha càháⁿ-yu.

⁵ Te cuéi ñá túú ndècu ndihí ñaha-í xii-ndo dico ducaⁿ-ni ïo ñuhu iní ñáhà-í, te ío cùdí iní-í chi nihí-í tnúhu sá ïo cù ñⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítoho Jesucristú.

⁶ Te dàtná-ni ní sàndáá iní-ndó Xítoho Jesucristú, te ducaⁿ-ni quindáá iní-ndó-gã canchicúⁿ nihnu-ndo ìchi-gá.

⁷ Te ni yùhu ni iní-ndó cànchicúⁿ nihnu-ndo ìchi-gá, te ducaⁿ cuíta cutnuni-gá iní-ndó nchàa nacuaá càháⁿ-gá quíhíⁿ. Te vá dáña ndeé tnahí-ndo quindáá iní-ndó nchàa tnúhu sá ñí dánèhé ñáhá cué téè càháⁿ tnúhu-gá xii-ndo. Te xini ñuhu-xi ndacáⁿ táhú vihi-ndo núú Yá Ndióxi cuèndá nchaa tnúhu-áⁿ.

Ñáyi ío vâha tnahá tnúhu ndihí Xítoho Jesucristú

⁸ Te ío quihí iní-ndó cùndecu-ndo chi xica cuu ñáyi cuiní dandàhú ñáhá xii-ndo, te ñáyi-áⁿ càháⁿ-yu mee-ni nchàa tnúhu ní cahu iní nchaa cue téè ñuyú-a, te nchaa tnúhu-áⁿ ñá túú vèdana nàndihí-xi. Te ducaⁿ quidé-yu chi nchicúⁿ nihnu-ni-yu nchaa nàcuáa ní xóo cada ñáyi ní xíndecu ndeé sanaha. Te càháⁿ-yu nàcuáa sàni iní yucu ñávâha, te ñá túú càháⁿ-yu nàcuáa cuiní meé Xítoho Jesucristú.

⁹ Te Xítoho Jesucristú cúú-gã ñⁿ ñáyi dico ñⁿ-ni cùu-gá ndihí Dútú Ndióxi.

¹⁰ Te nchòhó chi ñá túú tnahí-gá ná cúmãní-ndó núú-gã chi ndècu ndihí-ndo Xítoho Jesucristú. Te ío cùnuu-gá te tàxi tnuní-gá nchaa núú cué espíritú cùnùu.

¹¹ Te mee-gã ní ndada ndoo ní ndada nine-gá iní-ndó chi ní ngúndecu ndihí-ndo-gã te ducaⁿ ñá túú-gã ndécú-ndó ìchi cuehé ìchi duha, te cada iní-ndó sã ñí ngúndecu ndihí-ndo ñⁿ seña, chi ní ndada ndoo ní ndada nine-gá iní-ndó, dico ñá díú ñⁿ-ni cuu-xi ndihí seña sá sãha cue téè isràèl ñí-güedé.

¹² Te nchòhó sa ní sandute-ndo te cada iní-ndó sã dàtná tnúhu sá ñí xihí-ndó ndihí Xítoho Jesucristú, te ní nguindüxi-ndo

ndihí-gá, te ní ndoto-ndo ndihí-gá, te ducaⁿ càda iní-ndó chi ñá túú-gã ndécú-ndó ìchi cuehé ìchi duha. Te ducaⁿ chi sàndáá iní-ndó nchàa nacuaá quide Yá Ndióxi, te diu-gá ní dándótó-gã Xítoho Jesucristú.

¹³ Te nchòhó cùtnhá ndécú-ndó ìchi cuehé ìchi duha cùu-ndo datná ñáyi ní xihí, chi ñá túú tnahá tnúhu-ndo ndihí Yá Ndióxi ní cùu, te ni ñá díú ñáyi isràèl cúú-ndó. Te Yá Ndióxi ní cachí-gá sá nchóo ïo vâha tnahá tnúhu-o ndihí Xítoho Jesucristú vitna. Te ducaⁿ ñí quide-gá chi sa ní quide càhu iní-gá nchaa sá cuéhé sá dúhá ñí xóo cada-o.

¹⁴ Te vitna duuⁿ duuⁿ ñá túú-gã cuéchi-o ndècu núú-gã. Te nchoo ñá túú cuiní-ó càda-o nacuaá càháⁿ-gã, te cuèndá xíãⁿ ío ndècuéchi-o, te vâi nacháhu-o núú-gã ní cùu. Te vitna ñá túú-gã ni ñⁿ cuéchi-o ndècu núú-gã, chi diu cuèndá-áⁿ ñí xihí Xítoho Jesucristú núú cùrúxi.

¹⁵ Te sá dúcáⁿ ñí xihí Xítoho Jesucristú núú cùrúxi, te duuⁿ duuⁿ ní dáqueé tñhú-gã sácúhna ndihí nchaa espíritú cùndihí-xi, te ní quendóo canúú-xi, te mee-gã ío cùnuu-gá táxi tnùn-í-gá.

Nanducu nihnu-o mee-ni sá vâha càchí Xítoho Jesucristú

¹⁶ Te núu dava ñáyi xícuèhé ñáhã-yu xii-ndo cuèndá sá ñá túú xèxi-ndo xihí-ndo datná quidé mèe-yu te vá cáda cuèndá-ndó, te ni vâ cáda cuèndá-ndó te núu xícuèhé ñáhã-yu xii-ndo cuèndá sá ñá túú cànehe íí-ndó vico quide meé-yu núú cuiá núú cuiá, ndihí vico quidé-yu ndi tnahá yóo, ndihí cuèndá sá ñá túú cànehe íí-ndó nduu ndetatú-yu.

¹⁷ Te nàcuáa quidé-yu ndi tnahá òré quidè-yu nchaa vico-áⁿ, ndihí nàcuáa quidé-yu ndi tnahá nchaa nduu cànehe íí-yu-áⁿ, te cada iní-ó sã sá quidè-yu-áⁿ dánèhé núú ñáhá-xí nàcuáa cada Xítoho Jesucristú núú cuáhãⁿ núú vèxi.

¹⁸ Te vá quindáá iní-ndó ni ñⁿ tnúhu càháⁿ ñáyi càchí sá cuíta nihnu-ndo cuèndá sá ñá túú tñi-ndo tnúhu càháⁿ-yu, chi càchí-yu sá ïo xini ñuhu-xi cada cahnu-o nchaa cue espíritú xínú cuèchi núú Yá Ndióxi, te ni yùhu ni iní-ó cànehe-o sá yíñuhu núú-xi. Te ñáyi-áⁿ càchí-yu sá ndàà càháⁿ-yu chi

dàcoto ñaha saní-yu nàcuáa cáháⁿ-yu, te ío quide cahnú-yu mée-yu cuendá nchaa sá sání iní mée-yu quidé-yu, te ñá túú vèdana nàndíhi nchaa sá quidě-yu.

¹⁹ Te nchaa ñáyiu ducaⁿ xíquide-áⁿ ñà túú tnàhá tnúhu-yu ndíhi Xítóhó Jesucrístú. Te mee-gã cúu-gã Yaá cúnùu taxi tnuní ñáhá-gã xii nchaa nchoo ñáyiu ndècu ichi-gá, te chindee ñaha-gá xii-o ndècu-o ichi-gá, te mee-gã quidé-gã cúu ñⁿnuu-o ndecu-o, te ta quide-o nchaa nacuáa cuiní Yá Ndióxí cuáháⁿ.

²⁰ Te nchòhó cúu-ndó dàtná ñáyiu ní xíhi ndíhi Xítóhó Jesucrístú cuendá sá vã cáncícúⁿ nihnu-gá-ndó nàcuáa càháⁿ ñáyiu ñá túú ndècu ichi-gá. Te núu ducaⁿ ña, ¿te ná cuendá tníⁿ-ní-ndó tnúhu càháⁿ ñáyiu-áⁿ te quide-ni-ndo datná quidě-yu?

²¹ Chi ñáyiu-áⁿ càchí-yu sá ío sá ni vã cúu tèe ndaha-o, te dava ni vã cúu càxi-o, te dava ni vã cúu tníⁿ-o.

²² Te nchaa xíáⁿ, núu néhé chiⁿ-ni-o ndíhi nihnu-xi. Te nchaa sá dúcáⁿ càháⁿ-yu-áⁿ cúu-xí mée-ni sá ní cahu iní méé nchàa ñáyiu ñuyíú-a nàcuáa cada-yu cundecú-yu.

²³ Te nchaa tnúhu càháⁿ-yu-áⁿ sánùu sá cúu-xí ñⁿ tnúhu càháⁿ ñⁿ tée ío váha sàá díquí-xi, chi càchí-yu sá cáda càhnu-o Yá Ndióxí nàcuáa véxi iní méé-ó, te cunduu ndàhú iní-ó dico ñá túú dànehé ñáhã-yu nàcuáa tàú-xi cunduu. Te càchí tucú-yu sá cáda ùhú-ó mée-o, chi ducaⁿ cuiní Yá Ndióxí cada-o càchí-yu. Te nchaa xíáⁿ ñá túú vèdana chindee ñaha-xi xii-o cuendá sá vã táxi tnuní ñáhá ni ñⁿ sá cuèhé sá dúhá sàni iní-ó.

3

¹ Te nchòhó cada iní-ndó sã ní xíhi-ndó ndíhi Xítóhó Jesucrístú te ní ndoto-ndo ndíhi-gá, núu xíáⁿ tàú-ndó càda-ndo nchaa sá váha dàtná cuiní méé-gã chi mee-gã núcòo-gá xio cùha Dútú Ndióxí chi tnàhá-gá ío cùnùu-gá.

² Te ío cuhuⁿ iní-ndó nchàa sá váha càchí Xítóhó Jesucrístú nduu táhú-ndó cundecu ndíhi-ndo, te vã cúhúⁿ iní-ndó mée-ni nchaa sá ío ñuyíú-a.

³ Te ducaⁿ càda-ndo chi cùu-ndo datná ñáyiu ní xíhi ndíhi Xítóhó Jesucrístú, chi ñá

túu-gã ndécú-ndó ìchi cuehé ichi duha. Te Yá Ndióxí néhé cuendá ñáhá-gã xii-ndo chi tnàhá tnúhu-ndo ndíhi Xítóhó Jesucrístú.

⁴ Te Xítóhó Jesucrístú cúu-gã Yaá ndécú ndíhi ñaha xii-o vitna, te sáá nduu quèe túu ndíhi ñaha-gã xii-o àndiu, te tnàhá-ó ío cunuu-o ndíhi-gá.

Duuⁿ duuⁿ dañà-o nchàa sá cuèhé sá dúhá ñùhu iní-ó te cada-o mée-ni sá váha

⁵ Te duuⁿ duuⁿ dañà-ndo nchàa sá cuèhé sá dúhá ñùhu iní-ndó. Te nchaa nchòhó cue tée vã càháⁿ ndíhi-ndo ñáyiu díhi te núu ñá díú ñàdihí-ndó cùu-yu, te ducaⁿ-ni nchàa nchòhó cue ñáyiu díhi tucu vã càháⁿ ndíhi-ndo cuè tée te núu ñá díú yíⁿ-ndo cuu-güedé, te nchaa-ndo vã cáni-gã iní-ndó càda-ndo ni ñⁿ sá cuèhé sá dúhá ndíhi tnaha ñáyiu-ndo. Te vã cáni cuèhé caní duha-gá iní-ndó sã cúu-xí-ndó ndíhi-yu, te vã cáni-gã iní-ndó ni ñⁿ sá cuèhé sá dúhá, te ni vã xíhó-ndó ñⁿ sá ndécú ndíhi tnaha ñáyiu-ndo, chi núu ducaⁿ na càda-ndo xiho-ndo sá ndécú ndíhi-yu te ñⁿ-ni cùu-ndo ndíhi ñáyiu chĩñuhu nchaa sá càchí-yu cùu ndióxí te ñá ndàá sá ndióxí cúu nchàa xíáⁿ.

⁶ Te nchaa ñáyiu ducaⁿ xíquide ío dandòho ñaha Yá Ndióxí xii-yu na sàá nduu tnúndòho tnúhu ndàhú, chi ñá túú sàndáá iní ñáhã-yu xii-gá.

⁷ Te nchòhó cùtnàhá ní xíndecu-ndo ìchi cuehé ichi duha, te tnàhá-ndó ni xóo cada-ndo dàtná quidě nchàa ñáyiu-áⁿ.

⁸ Te vitna duuⁿ duuⁿ dañà-ndo nchàa sá ná càchí tnúhu-í-a: Vã cúdéeⁿ-gã-ndó, te ni vã cùndùu líhli-gá iní-ndó, te ni vã cúu ùhú-gá iní-ndó tnàha ñáyiu-ndo, te ni vã cùcuèhé-gã-ndó-yu, te ni ñⁿ-gã tnúhu cuèhé vã càháⁿ-ndó.

⁹ Te ni vã dácuàndehnde-gã-ndó, chi nchòhó sa ní dáñá-ndó nchàa ichi cuehé ichi duha, te ñá túu-gã sání cuèhé sání dùha iní-ndó nã cada-ndo vitna datná ní xóo cada-ndo.

¹⁰ Te vitna nchòhó ní nduu-ndo ñáyiu váha, te uuⁿ-gá tá cùtnuní iní-ndó nchàa nacuáa cuiní Yá Ndióxí cada-ndo, te ducaⁿ ta ndùcu ndee-ndo quide-ndo mee-ni sá váha dàtná quidě mée-gá.

11 Te vitna ní ngúndecu ndihí-ndo Xítoho Jesucristú, te vá cáda cuendá-gá-ndó nõu cùu-ndo ñáyiú israhél àdi ñá túú cùu-ndo, te ni vâ cáda cuendá-ndó nõu cùu-ndo ñáyiú ní ngúndecu sèñá ñi-xi àdi ñáhá, te ni vâ cáda cuendá-ndó nõu cùu-ndo ñáyiú véxi ñuú xicá, te ni vâ cáda cuendá-ndó nõu cùu-ndo ñáyiú cùu neñuú, te ni vâ cáda cuendá-ndó nõu cùu-ndo ñáyiú ñá túú tnàhí dàñá quee núú chíúⁿ patróóⁿ-xi, te ni vâ cáda cuendá-ndó nõu cùu-ndo ñáyiú dàñá queé nõú chíúⁿ patróóⁿ-xi, chi Xítoho Jesucristú cúnũu-gá ndécú ndihí ñaha-gá xii-o nchàa-o.

12 Te Yá Ndiõxí ní dáqueé dèⁿ ñaha-gá xii-ndo cuendá cundecu-ndo ndihí-gá, te vitna cùu-ndo ñáyiú quide ndáá ndécú ichi-gá. Te mee-gã ío cùu iní ñáhá-gã xii-ndo nõu xiãⁿ tau-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiú ndahú iní-xi, te ío vii ío váha cuu iní-ndó cùndecu ndihí tnaha-ndo, te ío cãhnu cunduu iní-ndó cuendá nchaa sá quidé ñaha ñáyiú xii-ndo.

13 Te ducaⁿ cànehe-ndo tnúhu cãhnu iní núú ndi mée-ndo nacuaá ndècu-ndo ichi-gá, te cada cãhnu tucu iní-ndó nõu ná cúú sã cúmãní nõú tnáhá-ndó. Te dàtná ní quide cãhnu iní Xítoho Jesucristú nchaa sá ñà túú váha ní xóo cada-ndo ducaⁿ cada-ndo cada cãhnu iní-ndó nchàa sá cúmãní nõú tnáhá-ndó ndècu-ndo.

14 Te xìni ñuhu vihi-xi sá ío cuu iní tnáhá-ndó cùndecu-ndo, chi núú ducaⁿ na càda-ndo, te quide-ndo nchaa dava-gá sá cãháⁿ-í, te ñá túú tnàhí-gá ná cúmãní-ndó.

15 Te daña-ndo sã Yá Ndiõxí ná chindee ñaha-gá nãcuáa ío váha cuu iní-ndó cùndecu-ndo, chi ñi cuendá-áⁿ ñi cãháⁿ ñáhá Yá Ndiõxí xii-ndo cuendá cuu ñⁿnuu-ndo ndihí nchaa dava-gá ñáyiú ndècu ichi-gá, te ducaⁿ-ni ío ndacáⁿ táhú-ndó nõú-gã.

16 Te ío cuhuⁿ iní-ndó tnúhu Xítoho Jesucristú, te ío váha cuáha-ndo cuendá nãcuáa cãháⁿ tnúhu-gá te ducaⁿ dànehé tnáhá-ndó. Te ío cãháⁿ dóho tnàha-ndo nacuaá cada-ndo cãchicúⁿ nihnu-ndo càda-ndo nchaa nacuaá cãháⁿ tnúhu-gá, te cata-ndo ndùdú ndèé núú tùtú Yá Ndiõxí, ndihí nchaa dava-gá ndudú sá xìní mée-ndó xita-ndo te nchaa xiãⁿ cata-ndo

chíñuhu-ndo Yá Ndiõxí. Te òré xitá-ndó te ni yùhu ni iní-ndó ndacáⁿ táhú-ndó nõú-gã.

17 Te cuhuⁿ iní-ndó Xítoho Jesucristú òré sání iní-ndó càda-ndo ñⁿ chiuⁿ àdi ná tnúhu cuiní-ndó cãháⁿ-ndó, te ñi ni-gá cuhuⁿ iní-ndó. Te xìni ñuhu-xi ndacáⁿ táhú-ndó nõú Yá Ndiõxí, te ñi ni Xítoho Jesucristú chindee ñaha-gá xii-ndo ndacáⁿ táhú-ndó nõú Tãtã-ó Dütú Ndiõxí.

Nãcuáa tau ñáyiú ndècu ichi Xítoho Jesucristú cada-yu sá cúú-xi ndi mée-yu

18 Te nchaa nchòhó ñáyiú ñi ñáyiú ndècu yí-xi quindáa iní-ndó yè-ndo, chi ducaⁿ tau-xi cada nchaa ñáyiú ñi ndécú ichi Xítoho Jesucristú.

19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu.

20 Te nchaa nchòhó ñáyiú ndècu tátá-xi ndihí nãná-xi quindáa iní-ndó-yu, chi núú ducaⁿ na càda-ndo te ndùu vétú iní Yá Ndiõxí.

21 Te nchaa nchòhó ñáyiú cùu tátá ndihí nãná vá dásatú-ndó iní cue déhe-ndo, chi núú ducaⁿ na càda-ndo te ni vâ quixí-gã iní-güexi cada-güexi sá váha.

22 Te nchaa nchòhó ñáyiú xìnu cuechi quindáa iní-ndó nchàa ñáyiú cùu patróóⁿ-ndó, te ni yùhu ni iní-ndó càda-ndo nchaa chiuⁿ táhú-yu cuèi òré ndécú-yu àdi òré ñá túú-yu, te ñá ñi òré-ni ndèhé-yu cada-ndo cuendá-ni sá cuiní-ndó cùñi-ndo nõú-yu, chi cada-ndo sã néhé-ndó sã yíñuhu núú Xítoho Jesucristú.

23 Te nchaa chiuⁿ saní iní-ndó càda-ndo te cada-ndo ni yuhu ni iní-ndó, te sá dúcáⁿ càda-ndo-áⁿ te cada-ndo cuendá sá xìnú cuèchi-ndo núú Xítoho Jesucristú te ñá ñi nõú ñáyiú ñuyíú-a xìnu cuechi-ndo.

24 Te nchòhó sa nàha-ndo sá Xítoho Jesucristú taxi-gá sá ndúú táhú-ndó te núú ducaⁿ na càda-ndo, chi cùu-ndo ñáyiú xìnu cuechi núú-gã.

25 Te nchaa ñáyiú quide nchaa sá cuèhé sá dúhá nãchãhu-yu núú Yá Ndiõxí cuendá nchaa sá quidè-yu, te mee-gã vá cáda cuendá-gá cuèi ná ñáyiú cúú-yu, chi nchaa-yu nachãhu-yu nchaa sá ñà túú váha quidé-yu núú-gã.

4

1 Te nchaa nchòhó ñáiyu cùu patrónⁿ cuu-ndo ñáiyu váha, te cada-ndo nchaa nacuaa tàú-xi cunduu ndihi nchaa ñáiyu xínu cuechi núú-ndó, te cunaha-ndo sã àndiu ndecu Yaá cúú Xítohó-ndó tàxi tñuní ñáhá-gã xii-ndo.

2 Te nchaa nchòhó ñáiyu ndècu ichi Xítohó Jesucristú, vá dáñá ndèé-ndó cãháⁿ ndihi-ndo Yã Ndiöxí, te ío cuhuⁿ iní-ndó-gã òré cãháⁿ ndihi-ndo-gã, te òré-áⁿ ío ndacáⁿ táhú-ndó núú-gã.

3 Te cacáⁿ táhú-ndó tñahá cuendá-ndí núú-gã cuendá sá díú-gã ná cádá te ndacu-ndí cãháⁿ-ndí tñuhu-gá núú nchaa dava-gá ñáiyu, te ducaⁿ cãháⁿ-ndí tñuhu Xítohó Jesucristú sá ñã túú ní xíndecu ndihi nchaa ñáiyu ní xíndecu ndéé sanaha, te ñi cuendá tñuhu-áⁿ yíhí-í vecaá vitna.

4 Te cãháⁿ ndihi-ndo Yã Ndiöxí cuendá cãháⁿ-í nacuáa tàú-xi cunduu te tecú tñuní-yu.

5 Te cada-ndo nchaa nacuaa tàú-xi cunduu sá cúú-xí nchaa ñáiyu ñã túú ndècu ichi-gá, te ducaⁿ-ni ío nducu ndèe-ndo cada-ndo nchaa nacuaa tàú-xi cunduu.

6 Te cada cuendá-ndó sã ío vii ío váha cunduu tñuhu cãháⁿ ndihi-ndó-yu, te cãháⁿ-ndó ñⁿ tñuhu nacuáa cuu váha iní-yu, te ío váha cundehe-ndo nacuáa cunduu tñuhu cúñaha-ndo xii ñⁿ ñⁿ-yu.

Tñuhu ndéé núú ñí ndihi-ná

7 Te té Tiquicú téé ío cùu iní-ó ndècu ndihi-o ichi Xítohó Jesucristú, téé-áⁿ cachí tñuhu-dé nchaa nacuáa cùu ndecu-í. Te tñahá-dé xínú cuèchi-dé núú Xítohó Jesucristú te ío váha quide ndáá-dé.

8 Te tendaha-í-dé quixi-dé cachí tñuhu-dé nchaa nacuáa cùu ndecu-ndí iha, te taxi-dé tñuhu ndee iní cundecu ndihi-ndo.

9 Te tñahá tucu té Ònésimú téé ío cùu iní-ó ndècu ndihi-o ichi Xítohó Jesucristú quixi ndihi-dé, te ñi-ni téé ñuú-ndó cùu-dé te tñahá-dé ío váha quide ndáá-dé. Te ndí ndúú-güedé cachí tñuhu-güedé nchaa nacuáa cùu iha.

10 Te té Arístarcú téé yíhí ndihi-í vecaá quidé ndèe iní ñáhá-dé xii-ndo ndihi té Măcú ñaní pñimú tē Bèé. Te sa naha-ndo nchaa nacuaa ní cãháⁿ-í cada-ndo quèheⁿ

cuendá-ndó tē Măcú, te núu na quixi-dé quixi coto ñaha-dé xii-ndo, te ío váha cuu iní-ndó quèheⁿ cuendá-ndó-dé.

11 Te tñahá téé ñani Jesús, àdi Bustú chí úú ñiú-dé, quidé ndèe iní ñáhá-dé xii-ndo. Te cue téé-a cùu-güedé cue téé isràél ní chitnahá ñáhá-güedé xii-í cãháⁿ-ndí núú ñáiyu nacuaa ndihu ndaha ñaha Yã Ndiöxí xii-yu, te ni ñⁿ-gá ñáiyu isràél ñã túú quide datná quidé-güedé. Te ío váha tàxi-güedé tñuhu ndee iní xii-í.

12 Te tñahá téé ñuú-ndó tē Ępafrás quidé ndèe iní ñáhá-dé xii-ndo, te cùu-dé tñahá-dé téé xínu cuechi núú Xítohó Jesucristú. Te ducaⁿ-ni ñi yuhu ñi iní-dé xicáⁿ táhú-dé núú Yã Ndiöxí cuendá-ndó cuendá sá cãchicúⁿ nihnu-ni-ndo ichi-gá, te ducaⁿ te ío váha tecú tñuní-ndó nchaa nacuaa cuñí Yã Ndiöxí cada-ndo, te ñi-ni ducaⁿ cãchicúⁿ nihnu-ndo cada-ndo.

13 Te yúhú cãchí tñuhu ndáá-í xii-ndo sã sũúni sãni iní-dé sá mée-ní sã váha cuu xii-ndo cundecu-ndo ndihi nchaa ñáiyu xíndecu ichi Xítohó Jesucristú ndécú ñuú Laodiceá, ndihi nchaa ñáiyu xíndecu tucu ichi-gá ndécú ñuú Hiérápolis.

14 Te tñahá té Lúca téé xíní nchaa núú yúcú sã quidé tátna quide ndee iní ñáhá-dé xii-ndo téé ío cùu iní-ó, te tñahá tucu té Dêmás quidé ndèe iní ñáhá-dé xii-ndo.

15 Te cúñaha-ndo na cada ndee iní nchaa ñáiyu ndècu ndihi-o ichi Xítohó Jesucristú ndécú ñuú Laodiceá, ndihi tá Mĩnfás, ndihi nchaa ñáiyu ndècu ichi-gá tàcá vehe-xi dàcuahá-yu tñuhu-gá.

16 Te tutú cãdũha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáiyu xíndecu ichi-gá ndécú ñuú Laodiceá cuendá dacuahá-yu tñahá-yu. Te ñi-ni ducaⁿ dàcuaha-ndo tutú tendaha-í quíhíⁿ ndaha ñáiyu ñuú Laodiceá òré ná dándixí-yu ndaha-ndo.

17 Te na cãchí tñuhu-í xii-ndo nacuáa cúñaha-ndo xii té Ārquipú, te duha cúñaha-ndo xii-dé: “Yã Ndiöxí ní taxi-gá chiuⁿ quide-n, te ío váha cada cuendá-n cada-n nchaa nacuaa ní cachí-gá”, duha cúñaha-ndo xii-dé.

18 Te yúhú té Păblú ndihi ndaha mee-í tē-í ñⁿ úú tñuhu-a quide ndee iní ñáhá-í

xii-ndo, te cunaha-ndo sã yǔhú yíhì-í ve-
caá. Te Yá Ndiǒxí ío na chìndee chitúu
ñaha-gǎ xii-ndo. Te ducaⁿ na cùnduu. Te ío
chí cádá ndèe iní-nǎ vitna.

TUTÚ DÍHNA NUU NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ TESALÓNICÁ

*Té Páblú ndihi cue té cùndihi-dé
cádúha-güedé tutú quihíⁿ ndaha ñáyiú xíndecu
ichi Xítoho Jesucristú ndécú ñuú Tesalónicá*

¹ Yúhú té Páblú cádúha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítoho Jesucristú ndécú ñuú Tesalónicá, chi cùu ñnuu-ndo ndihi Tátá-ó Dütú Ndiöxí, ndihi Xítoho Jesucristú. Te xicáⁿ táhú-í núú Dütú Ndiöxí, ndihi núú Xítoho Jesucristú sá ïo na chindee chítúu ñaha-gă xii-ndo, te ducaⁿ ndí nduú-gá ná càda te ío váha cuu iní-ndó cùndecu-ndo.

*Ñáyiú ñuú Tesalónicá ío váha sàndáá iní-yu
Yá Ndiöxí*

² Te ndí tnahá òré càháⁿ ndihi-ndí Yá Ndiöxí ndàcáⁿ táhú-ndí núú-gă sá ïo quide váha-ndo ndècu-ndo, te ducaⁿ xicáⁿ táhú-ndí núú-gă sá ná còto ñaha-gă xii-ndo.

³ Te ío ndàcáⁿ táhú-ndí núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xínu cuechi-ndo núú-gă, te cùu iní tnahá-ndó nàcuáa ndècu-ndo ichi-gá nñu xíáⁿ ío xitò tnahá-ndo. Te cùtnuní ndáá iní-ndó sá quixí tucu Xítoho Jesucristú nñu xíáⁿ ñá túú dàña ndeé-ndó ndètu-ndo-gă.

⁴ Te nchòhó ñáyiú ndècu ndihi-ndí ichi Xítoho Jesucristú sa nàha-ndí sá Yá Ndiöxí ío cùu iní ñáhá-gă xii-ndo, te diu-gá ní cáháⁿ ñáhá-gă xii-ndo cuendá cundecu-ndo ichi-gá.

⁵ Te cùtnàhá ní dánhé ñáhá-ndí xii-ndo tnùhu-gá, chi ñá díú sá cúú ìní mée-ndí ducaⁿ ñi dánhé ñáhá-ndí xii-ndo, chi mee Espiritú Yá Ndiöxí ní chindee ñaha-xi ní cáháⁿ-ndí ñi yuhu ñi iní-ndí tnùhu-gá núú-ndó. Te nàha-ndo sá cùtnàhá ní xíndecu ndihi ñaha-ndí xii-ndo ñi quide-ndí nàcuáa càháⁿ Yá Ndiöxí cuendá sá cúú-xí sá váha sá cúú-xí-ndó.

⁶ Te nchòhó nchícúⁿ nihnu-ndo quide-ndo vitna datná quidé-ndí, chi quide váha-ndo datná quidé mée Xítoho Jesucristú, te díí ìní ní tñi-ndo ìchi-gá cuéi ní ndoho ní tnahá-ndó, chi mee Espiritú-gá ní chindee ñaha-xi xii-ndo.

⁷ Te sá dúcáⁿ quide váha-ndo nñu Yá Ndiöxí, xíáⁿ yínchícúⁿ nihnu ñáyiú distritú Macèdoniá, ndihi ñáyiú distritú Acăyá xíquide váha-yu tnahá-yu, ñáyiú xíndecu ichi-gá.

⁸ Te diu-ndo ñi sanu ichi-ndo ñáyiú distritú Macèdoniá, ndihi ñáyiú distritú Acăyá, te ñá díú-ní ñáyiú nchaa ñuú-áⁿ chi nchaa ñáyiú dava-gá ñuú ñihí-yu tnùhu sá ïo sàndáá iní-ndó Yá Ndiöxí. Te ñá túú-gă ná tnùhu cáháⁿ-ndí cuendá-ndó, chi nchaa-yu sa ñihí-yu tnùhu sá ïo váha quide-ndo ndecu-ndo.

⁹ Te mée-yu xicáháⁿ váha-yu cuendá-ndó sá ïo váha ní queheⁿ cuendá ñáhá-ndó xii-ndí cùtnàhá ní quixi-ndí díhna nuu. Te ní dáñá-ndó nchaa sá càchí-ndó cùu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yaá ndécú tñu andiú chi diu-gá cúú-gă Ndiöxí ndisa, te xínu cuechi-ndo núú-gă vitna,

¹⁰ te ndètu-ndo quixi tucu Xítoho Jesucristú Déhe Yá Ndiöxí Yaá ndécú àndiú, chi diu-ni-gá ní quixi-gá ñuyíú-a ní xíhí-gá, te ní ndoto-gá ní dándótó ñaha Yá Ndiöxí xii-gá. Te diu-ni Xítoho Jesucristú dácăcu nihnu ñaha-gă xii-o nñu ùhú núú ndàhú, chi sàndáá iní-ó-gă.

2

*Nàcuáa ndiú chiuⁿ ní quide té Páblú ñuú
Tesalónicá*

¹ Te nchòhó ñáyiú ndècu ndihi-ndí ichi Xítoho Jesucristú nàha-ndo sá ñá díú àúⁿ ná cuu ní quixi coto ñaha-ndí xii-ndo, chi ní sàndáá iní-ndó tnùhu Yá Ndiöxí.

² Te nàha-ndo sá cùtnàhá ní xíndecu-ndí ñuú Filipú ío ní xúhuⁿ tnùhu cuéhé tnùhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnùhu Yá Ndiöxí núú-ndó, chi mee-gă ní chindee

ñaha-gá xii-ndí cuèi ío chitu ñáyiú ní cuu úhú iní ñáhá xii-ndí.

³ Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñá tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí.

⁴ Te mee Yá Ndiöxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní méé-gă, chi sa nàha-gá nàcuáa càa iní-ndí, te ñá túú cáháⁿ-ndí nàcuáa cùu iní ñáyiú.

⁵ Te nàha-ndo sá ñà díú ñá tnúhu cudí iní-ndó cùndecu-ndo ichi ñuyíú ní cáháⁿ-ndí núú-ndó cuèndá taxi-ndo díhúⁿ. Te Yá Ndiöxí sa nàha-gá sá cáháⁿ ndáá-ndí.

⁶ Te ñá ñáⁿ ndùu ni quide-ndí ñá sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyiú, te cuèi tàú ndisa-ndí sá cádá càhnu ñaha-ndo xii-ndí ní cùu, chi chiuⁿ Xítohó Jesucristú quidé-ndí, te dícó-ni sá nchúhú ñá túú ní cuíní-ndí sá dúcáⁿ càda-ndo.

⁷ Te ío vii ío váha ní cáháⁿ-ndí núú-ndó, dàtná quidé ñá ñaha cuu náná vii vii cáháⁿ ndíhi cue déhe-aⁿ dàcuehnu ñaha-aⁿ xii-güexi.

⁸ Te ducaⁿ ío cùu iní ñáhá-ndí xii-ndo, dico ñá díú-ni sá ñá cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dícó ní cùu-xi sá cúu, cuèndá sá ío cùu iní ñáhá-ndí xii-ndo.

⁹ Te nchòhó ñáyiú ndècu ndíhi-ndí ichi Xítohó Jesucristú nàha-ndo sá ío ní quide chiuⁿ-ndí cuèndá ní níhí-ndí sá ñá xexi-ndí. Te cuèi nduu cuèi níu ní quide chiuⁿ-ndí ní níhí-ndí sá ñá xexi-ndí ní cáháⁿ-ndí tnúhu Yá Ndiöxí núú-ndó cuèndá sá ñà túú ní cuíní-ndí chichiuⁿ ñaha-ndí xii-ndo.

¹⁰ Te nchòhó ñáyiú sándáá iní tnúhu Yá Ndiöxí xini ndáá-ndó sá cúu-ndí cue téé váha te ducaⁿ sá naha Yá Ndiöxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te díu-ni ducaⁿ quide-ndí vitna. Te vá yòo ñá cáháⁿ sá ñà túú quide ndáá-ndí ndécú-ndí.

¹¹ Te nàha tucu-ndo sá ñá dácáháⁿ ñáhá-ndí xii-ndo, te ní taxi-ndí tnúhu ndee

iní xii-ndo nchàa-ndo, te dàtná quidé ñá tátá ndíhi cue déhe-dé ní quide-ndí.

¹² Te ní cachí-ndí xii-ndo sá cádá ndáá-ndó cùndecu-ndo nacuáa tàú-xi cada nchaa ñáyiú tnàhá tnúhu ndíhi Yá Ndiöxí, chi mee-gă ní cáháⁿ ñáhá-gă xii-o cuèndá nduu táhú-ó cùndecu-o ndíhi-gá núú ío váha càa ndecu-gá táxi tnúní-gá.

¹³ Te xiáⁿ ío ndàcáⁿ táhú-ndí núú Yá Ndiöxí sá nchòhó òré ní tedòho-ndo tnúhu-gá ní cáháⁿ-ndí, te ní sándáá iní-ndó chi ní cutnúní iní-ndó sá díú tnúhu Yá Ndiöxí cúu-xi, te ñá díú tnúhu ñáyiú ñuyíú-a cùu-xi. Te ndáá sá cúu-xi ñá sá ío váha sá cúu-xi nchòo cue ñáyiú ní sándáá iní tnúhu-gá.

¹⁴ Te nchòhó ñáyiú ndècu ndíhi-í ichi Xítohó Jesucristú, ío ní ndoho ní tnàhá-ndó sá ñá quide ñaha ñáyiú ñúú-ndó. Te nchòhó ní ndoho-ndo dàtná ní ndoho nchaa ñáyiú tàcá dácùaha tnúhu Xítohó Jesucristú ndécú distritú Jùdeá, chi tnàhá-yu ío ní dándóhó ñaha ñáyiú ñúú-yu.

¹⁵ Te díu-ni ñáyiú distritú Jùdeá-áⁿ ní sahní-yu cue téé ní xóo cáháⁿ tnúhu Yá Ndiöxí ndéé sanaha. Te díu-ni ñaní tnàhá-yu cùu cue ñáyiú ní sahní ñaha xii Xítohó Jesucristú, te sátá xiáⁿ te ní ngüíta-yu ní cuu úhú iní ñáhá-yu xii-ndí, núu xiáⁿ ñá túú tnàhá iní Yá Ndiöxí nchaa sá quidé-yu, te ndéé nchaa dava-gá ñaní tnàhá-yu cùu úhú iní-yu.

¹⁶ Te ío chidácá nihnu ñàhá-yu xii-ndí òré cáháⁿ-ndí tnúhu Yá Ndiöxí núú ñáyiú ñá túú cùu ñáyiú isràél, te ducaⁿ quide ñáyiú-áⁿ cuèndá cuíní-yu sá vă cáháⁿ-ndí tnúhu-gá, sá cádá cuèndá naníhí tàhú ñáyiú ñá túú cùu ñáyiú isràél-áⁿ, te sá dúcáⁿ quidé-yu te ío ta cùu vai-gá cuéchi-yu cuáháⁿ. Te Yá Ndiöxí ío cùdééⁿ-gă núú-yu, te tendaha-gă ñá tnúndòho quixi sá cúu-xi-yu te ío ndohó-yu.

Té Păblú cuíní-dé quíngoto-dé ñáyiú xíndecu ichi Xítohó Jesucristú ndécú ñúú Tesalónica

¹⁷ Te nchòhó ñáyiú ndècu ndíhi-ndí ichi Xítohó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñúhu iní

ñáhá-ndí xii-ndo, te ío ñùhu iní-ndí sá quíxí còto ñaha tucu-ndí xii-ndo.

¹⁸ Te yúhú té Páblú ducaⁿ-ni ñùhu iní-í sá cuèdicó méè-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xii-í.

¹⁹ Te nchoo ñáyiú ndècu ichi Xítóhó Jesucristú ndètu-ni-gá-ó quèxio-gá can-deca ñaha-gã xii-o ndàa andiú cundecu-o ndihi-gá. Te cùdíí víhí iní-ndí sá cuèndá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vãi ñáyiú cáháⁿ váha-yu cuèndá-ndí ná sáá nduu quíxi tucu-gá.

²⁰ Te ducaⁿ ío vãi ñáyiú cáháⁿ váha-yu cuèndá-ndí cuèndá sá ní sanu ichi ñaha-ndí xii-ndo ìchi-gá, te quide váha-ndo. Te xíãⁿ ío cùdíí iní-ndí.

3

¹⁻² Te sa ní cunduu ñá túú-gã cáháⁿ ndihi tnàha-o, núu xíãⁿ ñá ní cùndee-gá iní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñuú Àtenás, chi tnàhá-dé xínú cuèchi-dé núú Yã Ndiõxí, ndihi núú Xítóhó Jesucristú cáháⁿ-dé tnúhu-gá núú ñáyiú. Te ní quixi-dé ní taxi-dé tnúhu ndee iní xii-ndo cuèndá sá ío quindáá-ni iní-ndó Xítóhó Jesucristú, te canchicúⁿ nihnu-ni-ndo ñi yuhu ñi iní-ndó ìchi-gá.

³ Te vá nátùhú iní-ndó càncchicúⁿ nihnu-ndo ìchi-gá sá dúhá cùu úhú iní ñáhá ñáyiú xii-o, te nchòhó sa nàha-ndo sá dàcuítíí sã ndóhó vîhi-o cuèndá-gá.

⁴ Te ndéé cútnàhá ndécú ndihi ñaha-gá-ndí xii-ndo ñi cachí tnúhu ndáá-ndí sá ío ndoho-o, te ducaⁿ ndisa quide-xi.

⁵ Te xíãⁿ nõu ñá ní cùu váha-gá iní-í chi cuèndá ñá túú-gã ní ñhì-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núú-ndó nõu ndècu-ni-ndo ichi Xítóhó Jesucristú, chi ní sani ñi ní sani úú iní-í sá cúú-xí-ndó, chi ná ndéé chidácá nihnu ñaha yúcu ñávãha xii-ndo te cuíta chiúⁿ ní quide-ndí sá cúú-xí-ndó ñi cáháⁿ-í.

⁶ Te ñáhá, chi ní ndexìo té Timùteú sá ñi quixi-dé ñuú-ndó, te nàha-dé tnúhu

ní nasáá sá ñi yuhu ñi iní-ni-ndo sàndáá iní-ndó Yã Ndiõxí, te cùu iní-ndó cuè tnaha ñáyiú-ndo. Te càchí-dé sá ío ñùhu iní ñáhá-ndó xii-ndí, te ío cuíní-ndó cáháⁿ ndihi ñaha-ndo, te ñiú-ni ducaⁿ ío cuíní nchúhú cáháⁿ ndihi ñaha-ndí xii-ndo tucu.

⁷ Te ío ndòho-ndí chi ío cùu úhú iní ñáhá ñáyiú xii-ndí, dico sá ñi níhí-ndí tnúhu sá nchòhó ñáyiú ndècu ndihi-ndí ichi Xítóhó Jesucristú ñá túú dàña ndéé-ndó sàndáá iní-ndó Yã Ndiõxí, te xíãⁿ cúú-xí ñi tnúhu càhnu iní ní níhí-ndí chi ní naníhí ndéé-ndí.

⁸ Te ní nduu vétú iní-ndí sá ñi níhí-ndí tnúhu ndècu-ni-ndo ichi-gá.

⁹ Te òré cáháⁿ ndihi-ndí Yã Ndiõxí, te ío ndàcáⁿ táhú-ndí núú-gã cuèndá sá ñá túú dàña nihnu-ndo ichi-gá, núu xíãⁿ ío cùdíí iní-ndí.

¹⁰ Te cuèi nduu cuèi niú xicáⁿ táhú-ndí núú Yã Ndiõxí sá méè-gã ná càda te sáá ñi nduu naníhí tnàhá-ó cuèndá danèhé ñáhá vãha-gá-ndí tnúhu-gá sá cúmãní-gã xii-ndo.

¹¹ Te mee Tãtá-ó Dütú Ndiõxí, ndihi Xítóhó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo.

¹² Te mee Xítóhó Jesucristú ná chindee ñaha-gá xii-ndo, te ío-gá cuíta cuu iní tnàhá-gã-ndó nàcuáa ndècu-ndo ichi-gá ndihi nchaa dava-gá ñáyiú dàtná cúú iní ñáhá-ndí xii-ndo.

¹³ Te xicáⁿ táhú tucu-ndí núú Tãtá-ó Dütú Ndiõxí sá ñi yuhu ñi iní-ndó càncchicúⁿ nihnu-ni-ndo ìchi-gá, te ducaⁿ te cundáá-ndó nõú-gã, te ñá túú-gã ná cumání-ndó òré ná sáá nduu quíxi tucu Xítóhó Jesucristú ndihi nchaa ñáyiú sa ndècu ndihi-gá.

4

Nàcuáa cuíní Yã Ndiõxí cada-o

¹ Te nchòhó ñáyiú ndècu ndihi-í ichi Xítóhó Jesucristú cáháⁿ ndàhú-í núú-ndó sã cùndedóho-ndo na cáháⁿ-í nàcuáa nduu tnúhu cáháⁿ Xítóhó Jesucristú, chi mee-gã cuíní-gá sá cádá-ndó nàcuáa ní dánèhé ñáhá-ndí xii-ndo cuèndá cuu váha iní Yã Ndiõxí núú-ndó, te ducaⁿ-ni càda-ndo ndéé núú cuaháⁿ núú vèxi.

² Te nchòhó sa nàha-ndo nàcuáa ní cáháⁿ-ndí núú-ndó, chi ní cáháⁿ-ndí nàcuáa

ní táuchíúⁿ Xítóhó Jesucristú te ní cachí-gá sá

³ Yá Ndiöxí cuení-gá sá cádá ndää-ó cùndecu-o ichi-gá. Te nchoo cuè téé vá càháⁿ ndihí-o ñáyiú dñí te núú ñá díú ñàdihí-ó cùú-yu, te ni cuè ñáyiú dñí vá càháⁿ ndihí-yu téé núú ñá díú yí-yu cùu-güedé.

⁴ Te núú xiãⁿ nchaa nchòhó tnàha téé-í ndi dííⁿ cùndecu ñadihí-ndó, te diu-ni ducaⁿ nchòhó cue ñáyiú dñí tucu ndi dííⁿ cùndecu yí-ndo, te mee-ni tnúhu yíñùhu cáháⁿ ndihí tnàha-ndo.

⁵ Te vá cání cuèhé cani duha iní-ndó dàtná quidé cuè ñáyiú ñá túú sàndáá iní tnúhu Yá Ndiöxí.

⁶ Te ni ìⁿ-ndo vá cání iní-ndó dàndahú-ndó tnàha téé-ndo càháⁿ ndihí-ndo ñàdihí-güedé. Te ducaⁿ-ni nchòhó cue ñáyiú dñí tucu vá cání iní-ndó dàndahú-ndó tnàha dñí-ndó càháⁿ ndihí-ndo yí-yu. Chi núú ducaⁿ na càda-ndo, te Yá Ndiöxí ío dandòho ñaha-gá xii-ndo dàtná ní cachí-ndí ndéé díhna.

⁷ Chi Yá Ndiöxí ní cáháⁿ ñáhá-gã xii-o cuendá sá cádá-ó mèe-ni sá vãha, te ñá díú sã cuèhé sá dúhá.

⁸ Te nchaa ñáyiú na càda sáá iní-xi tnúhu càháⁿ-ndí, te quide sáá iní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yaá ní taxi Espiritú-gá ndécú ndihí-o cuu-xi.

⁹ Te nchòhó ñáyiú ndècu ndihí-í ichi Xítóhó Jesucristú, ñá túú-gã xíní ñùhu-xi cachí tnúhu-í xii-ndo sã cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndihí nàcuáa cuu iní-ndó dàva-gá tnàha ñáyiú-ndo.

¹⁰ Te ducaⁿ xíquide-ndo ndihí nchaa ñáyiú ndècu ndihí-ndo ichi Xítóhó Jesucristú ndécú distritú Macèdoniá. Te càháⁿ ndàhú-ndí núú-ndó sã cádá ndää-gá-ndó, te cuita cuu iní-gá-ndó cuè tnaha ñáyiú-ndo quíhíⁿ.

¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chiúⁿ mee-ndo, te xiãⁿ cada-ndo dàtná ní dánèhé ñáhá-ndí xii-ndo.

¹² Te ducaⁿ te tnàhá nchaa ñáyiú ñá túú sàndáá iní tnúhu Yá Ndiöxí cáháⁿ vãha-yu cuendá-ndó, te ducaⁿ te ñá túú tnàhí-gá ná cùmání xii-ndo.

Nàcuáa cada-xi òré quixi tucu Xítóhó Jesucristú

¹³ Te vitna na càchí tnúhu-ndí xii nchòhó ñáyiú ndècu ndihí-ndí ichi Xítóhó Jesucristú cuendá nchaa ñáyiú sa ní xíhí, ñáyiú ní sàndáá iní tnúhu Yá Ndiöxí cuendá sá vã ndihú iní-ndó cuendá-yu dàtná xíquide nchaa ñáyiú ñá túú yíhí iní-xi sá quixí tucu Xítóhó Jesucristú ñuyíú-a.

¹⁴ Te nchoo sàndáá iní-ó sã ñí xíhí Xítóhó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítóhó Jesucristú, ducaⁿ dándoto-gá nchaa ñáyiú ní xíhí ñáyiú ní sàndáá iní ñáhá xii-gá.

¹⁵ Te na càchí tnúhu tucu-ndí ingá tnúhu nàcuáa ní cáháⁿ Xítóhó Jesucristú, chi ní cachí-gá sá ná sàá nduu quixi tucu-gá te nchaa ñáyiú sàndáá iní tnúhu-gá ndécú vívú ñuyíú-a vá códó nùú-yu núú ñáyiú ní xíhí ndaa andiú, chi jùndú candeca ñaha-gã xii-yu ndaa.

¹⁶ Chi Xítóhó Jesucristú quee túu-gá andiú, te cana-gá nchaa ñáyiú ní sàndáá iní tnúhu-gá, te òré-áⁿ Yá Ndiöxí cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaa ñáyiú ní xíhí, ñáyiú ní sàndáá iní tnúhu-gá.

¹⁷ Te dàtnùní nchaa nchoo ñáyiú xíndecu vívú ñuyíú-a naníhí tnáhá-ó ndihí-yu, te ndanchiṭa-o ndihí-o xítí vícò naníhí tnáhá-ó ndihí Xítóhó Jesucristú, te candeca ñaha-gã xii-o ndàa andiú cundecu ndihí-o-gá ni caa ni quíhíⁿ.

¹⁸ Núú xiãⁿ chí cuãha tnàha tnúhu ndee iní, te vá ndihú iní-ndó chi naníhí tàhú-ndó nùú-gã.

5

¹ Te nchòhó ñáyiú ndècu ndihí-í ichi Xítóhó Jesucristú ñá túú-gã xíní ñùhu-xi sã càchí tnúhu-í xii-ndo sã quixí tucu-gá, te ni ñá túú-gã xíní ñùhu-xi sã càchí tnúhu-í xii-ndo nãsa cada-xi òré quixi-gá.

² Chi nchòhó sa nàha ndáá-ndó sã Xítóhó Jesucristú quixi-gá nduu ñá túú yíhí iní-ó, chi dàtná quidé ìⁿ ñadúhú cada-gá òré quixi-gá, chi nduu ñá túú nã yíhí iní-ó quixi tucu-gá.

³ Te sáá nduu te cachí nchaa ñáyi ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cúmání xii-o”, duha quesàhá-yu. Te ñáyi-áⁿ òré ñá túú ñá yíhí iní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ñá ñáyi dñí ní tnahá òré cacu déhe-xi, chi na iní-yu ní dátñuhú ñáhá-xí te vá cãcu-yu núú tnúndòhó-yu, te ducaⁿ sã tnahá-xi yáha nchaa ñáyi ñá túú ndècu ichi-gá, chi na iní-yu quexìo tnúndòho sá cúú-xí-yu te vá cãcu-yu núú tnúndòho-áⁿ.

⁴ Te nchòhó ñáyi ndècu ndihí-í ichi Xítóhó Jesucristú, ñá túú-gã ndécú-ndó ichi cuehé ichi duha, núu xíãⁿ sa yíhí-ná iní-ndó ndúu quixi-gá te vá yáha-ndo dàtná yáha nchaa ñáyi ñá túú ndècu ichi-gá, chi ñáyi-áⁿ ñá túú ñá yíhí iní-yu sá quíxí-gã. Te na iní-yu quexìo-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá.

⁵ Te nchoo ñá túú-gã ndécú-ó ichi cuehé ichi duha, te ichi-áⁿ cúú-xí dàtná ñá ichi nee ndècu-o ní cuu, te vitna sa ní ngúndecu-o ichi váha, te ducaⁿ chi Yá Ndiöxí ní dándíxí túu-gá iní-ó cuendá cutnùní iní-ó nàcuáa ndúu cuendá-gá.

⁶ Te xìni ñuhu-xi dandixi túu-o iní-ó, te cada váha-o cùndecu-o ichi-gá, te vá cadá-ó dàtná quidé nchaa ñáyi ñá túú sàndáá iní ñáhá xii-gá, chi ñáyi-áⁿ ñá túú-gã quidé cuendá-yu te núu quide váha-yu àdi ñá túú quide váha-yu ndécú-yu.

⁷ Te nchaa ñáyi quide cuehé quidé dùha cuú-yu dàtná ñá ñáyi xidí àdi xíni, chi ñá túú quide cuendá-yu nàcuáa cadá-yu ñá sá váha dàtná cuíni Yá Ndiöxí.

⁸ Te nchòhó ñáyi sa ní cutnùní iní-xi nàcuáa ndúu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yá Ndiöxí, te cuu iní-ndó cuè tnahá ñáyi-ndo te ducaⁿ te vá táxi tnùní ñáhá ní ñá sá cuèhé sá dúhá xii-ndo. Te ío cuhuⁿ iní-ndó sã cùndecu-ndo ndihí-gá ní caa ní quíhíⁿ.

⁹ Chi Yá Ndiöxí ní cachí-gá sá vã quíhíⁿ-ó núú ùhú núú ndàhú, chi mee-gã nacuaca ñaha-gã xii-o cùndecu-o ndihí-gá, chi ní sàndáá iní-ó Xítóhó Jesucristú.

¹⁰ Te mee Xítóhó Jesucristú ní xíhí-gá sá

cuendá nchaa yíca cuèchi-o, te ní ndoto-gá cuendá nduu táhú-ó cùndecu-o ndihí-gá andíu na sáá nduu cuèi sa ní xíhí-ó, àdi vátá cùú-gá-ó.

¹¹ Núu xíãⁿ chí cuãha tñaha tnúhu ndee iní, te chindee tñaha-ndo cùndecu-ndo ichi-gá dàtná tá quide-ndo véxi.

Té Pãblú dáquini sàhú-dé ñáyi ndècu ichi Xítóhó Jesucristú

¹² Te nchòhó ñáyi ndècu ndihí-ndí ichi Xítóhó Jesucristú, càháⁿ ndàhú-ndí núú-ndó sã cánèhe-ndo sá yíñuhu núú cuè téé cùnuu xinu cuechi núú Yá Ndiöxí, cue téé dñehé ñáhá xii-ndo nàcuáa cùndecu-ndo ichi-gá.

¹³ Te càháⁿ váha-ndo ndihí-güedé, te cuu iní-ndó-güedé, chi nàha-ndo sá chíuⁿ Yá Ndiöxí quidé-güedé. Te cùndecu ndihí váha tñaha-ndo nchaa-ndo.

¹⁴ Te càháⁿ ndàhú tucu-ndí núú-ndó sã càháⁿ-ndó dôho nchaa ñáyi ñá túú cuíni cada chìuⁿ, te ducaⁿ cuãñaha-ndo tnúhu ndee iní xii nchaa ñáyi quíyuhu iní-xi canchicúⁿ nihnu ichi-gá, te chindee tucu-ndo nchaa ñáyi vátá ngùnu ichi váha-gá, te cunduu càhnu iní-ndó núu-yu nchaa-yu.

¹⁵ Te cada ndee iní-ndó te núu ndècu tnahá ñáyi-ndo cùu úhú iní ñáhá-yu xii-ndo, te vá tnahá-ni-ndo cùu úhú iní-ndó-yu. Te mee-ni sã váha cada-ndo sã cúú-xí nchaa tnahá ñáyi-ndo.

¹⁶ Te nchaa nduu ío cudíⁿ iní-ndó cùndecu-ndo.

¹⁷ Te ñá nduu ñá nduu càháⁿ ndihí-ndo Yá Ndiöxí.

¹⁸ Te ndacáⁿ táhú-ndó núú-gã te núu nándi cùu sá yáha-ndo ndècu-ndo, chi ducaⁿ cuíni-gá cada-o, te dñu ducaⁿ ndúu tnúhu càháⁿ Xítóhó Jesucristú.

¹⁹ Te vá quèhndé nihnu-ndo chìuⁿ quide Espiritú Yá Ndiöxí iní-ndó.

²⁰ Te vá cadá sáá iní-ndó núú cuè téé càháⁿ tnúhu Yá Ndiöxí nàcuáa dàcahu iní ñáhá-gã xii-güedé.

²¹ Te cada cuendá váha-ndo nàcuáa càháⁿ-güedé, te tñi-ndo nchaa tnúhu váha càháⁿ-güedé.

²² Te dañá-ndo nchaa ichi cuehé ichi duha.

²³ Te mee Yá Ndiöxí quidé-gã ío váha cùu iní-ó ndècu-o ichi-gá. Te xicáⁿ táhú-í

núú-gă sá ná càda íí ñáhá-gă xii-ndo, te na còto ñaha-gá xii-ndo ndìhi iní-ndó cuèndá sá vǎ cáda-gă-ndó nì ìíⁿ sá cuèhé sá dúhá, te òu-ni ducaⁿ na càda-gá sá cúú-xí-ndó nděé ná sàá nduu quìxi tucu Xítóhó Jesucristú ñuyíú-a.

²⁴ Chì Yá Ndiǒxí Yaá ní cáháⁿ ñáhá xii-o cada-gá nàcuáa ní cáháⁿ-gá, te chindee ñaha-gá xii-ndo.

Té Pǎblú quidé ndèe iní-dé ñáyiu xǐndecu ichi Xítóhó Jesucristú ndécú ñúú Tesalónicá

²⁵ Te nchòhó ñáyiu ndècu ndìhi-í ichi Xítóhó Jesucristú, cácaⁿ táhú-ndó nǔú Yá Ndiǒxí sá ná chindee ñaha-gá xii-ndí.

²⁶ Te cúñaha-ndo xii nchaa ñáyiu ndècu ndìhi-o ichi Xítóhó Jesucristú sá nì yuhu nì iní-ndí quidé ndèe iní ñáhá-ndí xii-ndo ndìhí-yu.

²⁷ Te vitna mee Yá Ndiǒxí ndéhé-gă sá cáháⁿ ndàhú-í núú-ndó sǎ dácuàha-ndo tutú-a núú nchàa ñáyiu ndècu ndìhi-o ichi-gá.

²⁸ Te Xítóhó Jesucristú ío na chindee chitúu ñaha-gă xii-ndo nǔú cuàháⁿ núú vǎxi. Te ducaⁿ na cùnduu. Te ío chí cáda ndèe iní-nǎ vitna.

TUTÚ CÚÚ ÒÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Päblú ndihi cue té cùndihi-dé cádúha-güedé tutú quíhíⁿ ndaha ñáyiú xñdecu ichi Xítoho Jesucristú ndécú ñúú Tesàlónicá

1 Yúhú té Päblú cádúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiú ndècu ndihi-ndí ichi Xítoho Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítoho Jesucristú.

2 Te xicáⁿ táhú-ndí núú Dütú Ndiöxí, ndihi núú Xítoho Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Yá Ndiöxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítoho Jesucristú

3 Te nchòhó ñáyiú ndècu ndihi-ndí ichi Xítoho Jesucristú, cächí tnúhu-í xii-ndo sá cúnaha-ndo sá ñà túú dàña ndee-ndí ndácáⁿ táhú-ndí núú Yá Ndiöxí cuendá-ndó, chi dacuítí dùcaⁿ taú-xi cunduu chi ío-gá tá sàndáá iní-ndó-gã cuáháⁿ, te ducaⁿ ùuⁿ-gá tá cùu iní tnáhá-ndó nàcuáa ndècu-ndo ichi Yá Ndiöxí.

4 Núu xiáⁿ nchúhú ío váha cáháⁿ-ndí cuendá-ndó núú nchàa ñáyiú sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchicúⁿ nihnu-ndo ìchi-gá, te quide cahnu-ni iní-ndó cuèi nándí sá yáha-ndo ndècu-ndo ichi-gá.

5 Te sá dúcáⁿ quide váha-ndo ndècu-ndo xiáⁿ cùnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxi tnùnigá, te ducaⁿ càda-gá chi cùu-gá Yaá quidé ndáá cuíti. Te vitna ndòho-ndo nacuáa ndíhu ndaha-gã dava-gá ñáyiú.

6 Te Yá Ndiöxí ío váha ndáá quidé-gã, chi mee-gã nachinaa-gá nchaa sá quidé ñaha ñáyiú cùu úhú iní ñáhá xii-ndo,

7 te nchoo ñáyiú ndòho cuendá Xítoho Jesucristú nucúndecu váha-o na sàá nduu núu túu-gá andíu, te tnàhá cue espíritú xínú cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xi nchàa núu chiúⁿ tahu-gá. Te òré nuu túu-gá andíu ndihi cue espíritú-áⁿ, te ío dátásaⁿ-xi andíu.

8 Te dandòho-gá nchaa ñáyiú ñá túú tnàhá tnúhu ndihi Yá Ndiöxí, ñáyiú ñá túú sàndáá iní tnúhu Xítoho Jesucristú tnúhu sá cáháⁿ nàcuáa naníhí tãhú-yu.

9 Te nchaa ñáyiú-áⁿ ío dandòho ñaha-gá xii-yu, chi ndohó-yu ni caa ni quíhíⁿ, te vá cùndécú-yu núú ío váha càa ndecu-gá táxi tnùnigá.

10 Te ducaⁿ càda ñaha-gá xii-yu na sàá nduu, te dàvá-áⁿ ío cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ío cuñúhu-o-gã dàvá-áⁿ.

11 Te cuendá xiáⁿ núu ío xicáⁿ táhú-ndí núú Dütú Ndiöxí sá ná chindee ñaha-gá xii-ndo cùndecu váha-ndo ìchi-gá dàtná cùní méé-gã cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tucu-ndí núú-gã sá ío na chindee ñaha-gá xii-ndo càda-ndo nchaa sá vãha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gã.

12 Te núu ducaⁿ na càda-ndo, te cáháⁿ váha ñáyiú cuendá Xítoho Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiöxí ndihi Xítoho Jesucristú cùndàhú iní ñáhá-gã chindèe ñaha-gá xii-ndo.

2

Té quixi dandàhú ñáyiú

1 Te nchòhó ñáyiú ndècu ndihi-ndí ichi Xítoho Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaca ñaha-gã xii-o, núu xiáⁿ cáháⁿ-ndí dóho-ndo.

2 Te ñá díú sã ííⁿ tnúhu tecú dóho-ndo te ngüita-ndo càni ííⁿ cani úú iní-ndó, te ni vá yùhú-ndó te núu véxi ííⁿ té cächí-dé sá cáháⁿ-dé tnúhu Yá Ndiöxí, te cächí-dé sá sà véxi Xítoho Jesucristú, te vá quindáá iní-ndó tnúhu cáháⁿ-dé chi ñá ndáá, àdi

véxi ìⁿ téé nèhe ìⁿ tutú núú-ndó te càchí-dé sá yùhú ní tendaha-í véxi, te núú tutú-áⁿ càháⁿ-xi sá sà véxi Xítóhó Jesucristú, te ñu-ni vá quíndáá iní-ndó nàcuáa càháⁿ-xi, te ndèda-ni càa ñáyiu càháⁿ-yu dàvá-áⁿ sá sà véxi-gá dico vá quíndáá tnàhí iní-ndó.

³ Núu xíáⁿ dátúha ñaha-í xii-ndo cuèndá sá vǎ dáñá tnàhí-ndo mèe-ndo dandahú ñáhá ñáyiu. Chi cùmání-gǎ sáá nduu quìxi tucu Xítóhó Jesucristú, te ngúíta nchaa ñáyiu cuu úhú iní-yu Yá Ndiöxí, te dàvá-áⁿ quíni-yu ìⁿ téé xidó quidé nchaa sá cuèhé sá dúhá, te téé-áⁿ quíhíⁿ-dé núú ùhú núú ndàhú ni caa ni quíhíⁿ.

⁴ Te ñu-ni téé-áⁿ vǎ ndèe iní-dé nchaa sá càchí ñáyiu cuu ndiöxí-yu ndihí nchaa dava-gá sá quidé càhnú-yu, te cachí-dé sá ò cuu-ndé, te quíhu-dé ndéé xití veñúhu núú ndécú cuè ñáyiu chiñuhu ñaha xii Yá Ndiöxí coo-dé, te cúñaha-dé xii-yu sá cúú-dé Yá Ndiöxí.

⁵ Te dandacu iní-ndó chi nchaa tnúhu-a sa ní cachí tnúhu-í xii-ndo cǔtnàhá ní xíndecu ndihí ñaha-í.

⁶ Te nchòhó sa cǔtnuní iní-ndó nǎ cúú sǎ ngání ñaha xii téé-áⁿ núu ñá túú-dé vitna, dico na sáá nduu tàú-xi quee-dé caca cuu-dé te dàvá-áⁿ quíni ñáhá nchaa ñáyiu.

⁷ Te ò titní núú sǎ cuèhé sá dúhá quide yucu ñávǎha dicó-ni sá vǎtá quíni-gá ñáyiu, dico ndècu ìⁿ sá ñǎ dáñá càda-xi nchaandi túhú nàcuáa càchí iní-xi, dico sáá nduu xòcuíñí sá ñǎ dáñá-áⁿ te dàvá-áⁿ cada-xi nchaa nàcuáa càchí iní-xi.

⁸ Te sáá nduu quíni-yu téé quide nchaa sá cuèhé sá dúhá-áⁿ ñuyú-a. Te òré ná quìxi túu Xítóhó Jesucristú, te mee-ni sǎ dátǎsaⁿ-xi, ndihí yóco yuhu-gá cuú téé-áⁿ.

⁹ Te sácuíhná tendaha-xi téé-áⁿ quixi-dé, te cuáñaha-xi tnúhu ndee iní cada-dé nándí sá cáda-dé. Te cada-dé sá ñǎ túú tnàhí ndàcu ni ìⁿ ñáyiu ñuyú-a cada-yu, dico mee-ni dandahú ñáhá-dé xii-yu caca cuu-dé.

¹⁰ Te nchaa núú sǎ cuèhé sá dúhá càda-dé dandahú-dé nchaa ñáyiu sa ñúhu ichi cuáháⁿ núú ùhú núú ndàhú, chi ñá túú ní cuíni-yu quíndáá iní-yu tnúhu ndáá tnúhu Yá Ndiöxí cuèndá naníhí tàhú-yu.

¹¹ Te sá dúcáⁿ ñǎ túú ní cuíni-yu quíndáá iní-yu tnúhu ndáá, núu xíáⁿ daña Yá Ndiöxí dacáháⁿ yucu ñávǎha iní-yu quíndáá iní-yu

nchaa tnúhu ndehnde

¹² cuèndá cuíta nihnú-yu, te ducaⁿ yǎha-yu chi ñǎ túú sàndáá iní-yu tnúhu ndáá càháⁿ Yá Ndiöxí, chi mee-ni nchaa sá cuèhé sá dúhá cùdí iní-yu quidé-yu, te cuíta nihnú-yu chi ducaⁿ ní cachí Yá Ndiöxí cunduu.

Ñáyiu ní cachí Yá Ndiöxí naníhí tàhú

¹³ Te nchòhó ñáyiu ndècu ndihí-ndí ichi Xítóhó Jesucristú, ñáyiu ò cuu iní-gá càchí tnúhu-ndí xii-ndo sǎ ñǎ túú dáña ndee-ndí ndàcáⁿ tàhú-ndí núú Yá Ndiöxí cuèndá-ndó, chi ducaⁿ tàú-xi cunduu, chi Yá Ndiöxí ní cachí-gá ndéé cǔtnàhá vǎtá ngǎva-gá ñuyúú sǎ naníhí tàhú-ndó, te ñu Espíritú-gá dácáháⁿ-xi iní-ndó ndècu yíñuhu-ndo núú-gǎ, te sàndáá iní-ndó tnúhu ndáá càháⁿ-gá núu xíáⁿ ní naníhí tàhú-ndó.

¹⁴ Chi cuèndá tnàhí-a ní càháⁿ ñáhá Yá Ndiöxí xii-ndo, te ducaⁿ ní naníhí tàhú-ndó chi ní sàndáá iní-ndó tnúhu Xítóhó Jesucristú ní càháⁿ-ndí núú-ndó, te sáá nduu te cundecu-ndo tnàhá-ndó núú ò váha càa ní nduu tàhú Xítóhó Jesucristú ndécú-gǎ.

¹⁵ Núu xíáⁿ nchòhó ñáyiu ndècu ndihí-ndí ichi Xítóhó Jesucristú ò càháⁿ-ndí dóho-ndo sǎ vǎ dáñá nihnu-ndo ichi-gá, te ni vǎ nàcuànaa-ndo nchaa tnúhu ní càháⁿ-ndí núú-ndó cǔtnàhá ní xíndecu ndihí ñaha-ndí xii-ndo, te ñu-ni ducaⁿ càda-ndo nchaa tnúhu tèndaha-ndí véxi.

¹⁶⁻¹⁷ Te xicáⁿ tàhú-ndí núú-gǎ sá ná dàcáháⁿ-gá iní-ndó cǔndecu-ni-ndo ichi-gá, te ducaⁿ ò na chíndee ñaha-gá xii-ndo càháⁿ-ndó mèe-ni tnúhu váha, te cada váha-ndo cǔndecu-ndo nàcuáa cuu váha iní-gá, chi mee Dútú Ndiöxí ò cuu iní ñáhá-gǎ xii-o, te ñu-gá ní taxi-gá tnúhu ndee iní cundecu ndihí-o ní caa ni quíhíⁿ, te ní cachí tnúhu tucu-gá ingá tnúhu váha sá cǔndètu-o Xítóhó Jesucristú.

3

Cáháⁿ ndihí-ndo Yá Ndiöxí cuèndá-ndí

¹ Te nchòhó ñáyiu ndècu ndihí-ndí ichi Xítóhó Jesucristú, ndéé núú ndíhí-ñǎ càchí tnúhu-í xii-ndo sǎ càháⁿ ndihí-ndo Yá Ndiöxí cuèndá-ndí cuèndá sá ná chíndee ñaha-gá xii-ndí, te ducaⁿ ndihí-ni cutènuu

tnúhu Xítohó Jesucristú nchaa xichi, te cudíí iní-yu tnúhu-gá dàtná quidé nchòhó.

² Te cáháⁿ ndihí tucu-ndo Yă Ndiöxí cuendá sá ná còto ñaha-gá xii-ndí, te ñá túú nă cada ñaha ñăyiu cuihna iní-xi ndècu ichi cuehé ichi duha xii-ndí, chi ñá ncháă-yu sàndáá iní-yu tnúhu-gá.

³ Dico Xítohó Jesucristú quidé-gă nchaa sá cáháⁿ-gá, te diu-gá cada te nchòhó cundecu-ni-ndo ichi-gá, te coto ñaha-gă xii-ndo cuendá sá ñà túú nă cada ñaha yùcu ñávăha.

⁴ Te Xítohó Jesucristú quidé-gă cútnùní iní-ndí sá nchòhó quidé-ndó nchàa nacuáa ní dánèhé ñáhá-ndí xii-ndo, te diu-ni ducaⁿ càda-ndo cundecu-ndo.

⁵ Te xicáⁿ táhú-ndí núú Yă Ndiöxí sá ná chindee ñaha-gá xii-ndo cùu iní-ndó-gă, te diu-ni-gá ná chindee ñaha-gá xii-ndo cùnduu cahnu iní-ndó, chi Xítohó Jesucristú ducaⁿ ïo càhnu iní-gá.

Tàú-ó càda chiuⁿ-o

⁶ Te nchòhó ñăyiu ndècu ndihí-í ichi Xítohó Jesucristú, cáháⁿ-í dóho-ndo să mée-gă cuiní-gá sá vă ñihí tnáhá-gă-ndó ndihí ndéda-ni càa ñăyiu cächí sá sàndáá iní tnúhu-gá, ñăyiu ñá túú cuiní cada chiuⁿ, chi ñăyiu ducaⁿ xiquide ñá túú cuiní-yu tnií-yu tnúhu sá ñí dánèhé ñáhá-ndí xii-ndo.

⁷ Te nchòhó sa xini-ndó năcuáa cada-ndo cùndecu-ndo canchicúⁿ nihnu-ndo năcuáa quide-ndí. Te cútnàhá ní xindecu ndihí ñaha-ndí xii-ndo chi ni ìⁿ nduu ñá túú ní tühío-ndí.

⁸ Te ni ñà túú dìcò ducaⁿ ni quèheⁿ-ndí sá ndécú ndihí ñăyiu caxi-ndí àdi canehe-ndí, chi cuèi nduu cuèi niú ío ní quide chiuⁿ-ndí ní ñihí-ndí díhúⁿ ñí saaⁿ-ndí nchaa sá ñí nàndíhí-ndí cuendá sá ñà túú ní cuiní-ndí chichiuⁿ ñaha-ndí xii-ndo.

⁹ Te cuèi tàú ndisa-ndí cachí tnúhu-ndí xii-ndo să chindèe ñaha-ndo xii-ndí ní cùu, dico ní quide chiuⁿ-ndí cuendá ní cuiní-ndí danèhé ñáhá-ndí xii-ndo năcuáa cada-ndo cùndecu-ndo.

¹⁰ Te cútnàhá ní xindecu ndihí ñaha-ndí xii-ndo ñí cachí-ndí sá ncháá ñăyiu ñá túú cuiní cada chiuⁿ te vă cuăha-ndö-yu sá caxí-yu.

¹¹ Te vitna ñihí-ndí tnúhu sá ïo dava nchòhó ñá túú tnàhí quide chiuⁿ-ndo, chi

àúⁿ nă cuu ndí cuu ndí cuu-ni-ndo núú ndécú dăva-gá tnàha ñăyiu-ndo.

¹² Te yúhú cáháⁿ-í dóho nchaa nchòhó ñăyiu ducaⁿ ñà túú cuiní cada chiuⁿ sá cadá chiuⁿ-ndo cuendá ñihí-ndó nchàa sá cóhó să caxí-ndó, te duha cáháⁿ-í dóho-ndo, chi ducaⁿ cuiní Xítohó Jesucristú Yáá táxí tnùní ñáhá xii-o cada-ndo, te òré cada chiuⁿ-ndo te vă ïo cada dusaⁿ-ndo.

¹³ Te nchòhó ñăyiu ndècu ndihí-í ichi Xítohó Jesucristú, vă dáñá ndèe-ndó càda-ndo mee-ni sá văha.

¹⁴ Te núu ìⁿ ñăyiu ndècu ndihí-ndo ñá túú cuiní-yu tnií-yu tnúhu cáháⁿ-ndí núú tütú-a, te cundehe-ni-ndo nùu ndéda càá-yu, te vă ñihí tnáhá-gă-ndó ndihí-yu cuendá sá ná cùcahaⁿ núú-yu,

¹⁵ dico vă cúú ũhú iní-ndö-yu, chi cáháⁿ-ndó dóho-yu cada-ndo să ndécú-ndó ichi Xítohó Jesucristú ndihí-yu.

Tnúhu ndéé núú ñí ndihí-ná

¹⁶ Te mee Xítohó Jesucristú ío văha cùu iní-gá ndécú-gă, te xicáⁿ táhú-í núú-gă sá mée-gă ná cadá te ío văha cuu iní-ndó tnàhá-ndó cùndecu-ndo cuéi nása-gá ná cùndecu-ndo. Te mee-gă ná cùndecu ndihí ñaha-gá xii-ndo nchàa-ndo.

¹⁷ Te vitna yúhú té Păblú tée-í tnúhu-a quide ndee iní ñáhá-í xii-ndo, te diu-ni duha càa nchaa letrá-í nchaa núú tütú cadúha-í.

¹⁸ Te xicáⁿ táhú-í núú Xítohó Jesucristú sá ïo na chindee chitúu ñaha-gá xii-ndo nchàa-ndo. Te ducaⁿ na cùnduu. Te ío chí cadá ndèe iní-nă vitna.

TUTÚ DÍHNA NUU NÍ CADÚHA TÉ PÁBLÚ QUIHÍⁿ NDAHA TÉ TIMÛTEÚ

Té Páblú cadúha-dé tutú quíhíⁿ ndaha té Timùteú

¹ Yúhú té Páblú ní tendaha ñaha Yá Ndióxi cáháⁿ-í tnúhu Xítoho Jesucristú núú ñáyiú chi ducaⁿ ní cachí Yá Ndióxi cunduú, te diu-gá cúú-gã Yaá ní dácãcu ni-hnu ñaha xii-o núú ùhú núú ndàhú. Te tnàhá Xítoho Jesucristú ducaⁿ ní cachí-gá sá cáháⁿ-í tnúhu-gá, te diu-gá ní taxi-gá tnúhu ndee iní xii-o sã cùndecu-o ndihí-gá ni caa ni quíhíⁿ.

² Te yòhó té Timùteú cúú-n ìⁿ tée ní sanu ichi ndisa-í ichi Xítoho Jesucristú chi ío váha ní sándáá iní-n-gã. Te càdúha-í ìⁿ tutú daquixi-í ndaha-n. Te xicáⁿ táhù-í núú Tátá-ó Dütú Ndióxi ndihí núú Xítoho Jesucristú sá ío na chindee chitúu ñaha-gã xii-n, te ducaⁿ ndi nduú-gá ná cádá te ío váha cuu iní-n cùndecu-n.

Cuèndá nchaá ñáyiú dándahú tnàha ñáyiú-xi

³ Te nàha-n nacuáa ní cáháⁿ-í cùtnàhá ní quee-í ñuú Éfesú véxi-í distritú Macèdoniá, chi ní cachí-í sá quèndõo-n ñuú-án cáháⁿ-n dõho nchaá ñáyiú dándahú ñáhá càchí sá cáháⁿ tnúhu Yá Ndióxi te ñá ndáá sá cáháⁿ-yu tnúhu-gá, te diu-ni ducaⁿ cáháⁿ-í vitna cada-n cùndecu-n.

⁴ Te cùñaha-n xii-yu sá vã cádá cuèndá-yu nchaá cuèndú nihí-yu nacuáa ní xóo cada ñáyiú ní xíndecu ndéé sanaha, te nchaá cuèndú-án dìcò chínàá ñáhá-xí chi ñá túú vèdana nàndihí-xi, te ni ñà túú chindee ñaha-xi cada-o nacuáa cuiní Yá Ndióxi, chi mee-ni sã quèndáá iní-ó-gã quídé-xí quide-o nchaá nacuáa cuiní-gá.

⁵ Te duha cáháⁿ-í cùñaha-n xii-yu cuèndá sá ná cùu iní-yu tnàha ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quèndáá iní-yu Yá Ndióxi, te vá cání ìⁿ caní úú iní-yu, te núu ducaⁿ na cádá-yu te cuu iní ndisá-yu nchaá tnàha ñáyiú-yu.

⁶ Chi dava ñáyiú ñá túú-gã quídé-yu nchaá nacuáa cáháⁿ-í-a, chi mee-ñá nchaá cuèndá sá ñá túú vèdana nàndihí xicáháⁿ-yu.

⁷ Te cuiní-yu cáháⁿ-yu nchaá tnúhu ní cáháⁿ ndíi Moisés dico ñá ndácũ-yu, chi cuèi ni yùhu ni iní-yu cáháⁿ-yu dico ñá tècú tnùnì-yu nacuáa ní cáháⁿ ndíi, te ni tnúhu cáháⁿ mèè-yu ñá cùtnùnì iní-yu nacuáa ndùu-xi.

⁸ Te sa nàha-o sá ncháá tnúhu ní cáháⁿ ndíi Moisés váha, te núu na tècú tnùnì-ó ná cuèndá ducaⁿ ní ngúndecu nchaá tnúhu-án.

⁹ Te cùtnunì iní-ó sã ñà díú sã cúú-xí nchàa ñáyiú quide váha ndècu ñuyíú-a ni ngúndecu nchaá tnúhu-án, chi ní ngúndecu-xi sá cúú-xí nchàa ñáyiú ñá túú quide váha, ndihí cuèndá nchaá ñáyiú ío sáa iní-xi, ndihí cuèndá nchaá ñáyiú quide cuehé quídé dùha, ndihí cuèndá nchaá ñáyiú ío ndècu cuéchi-xi, ndihí cuèndá nchaá ñáyiú ñá túú nèhe vèdana sá yíñùhu núú Yá Ndióxi, ndihí cuèndá nchaá ñáyiú ñá túú cáháⁿ váha cuèndá ichi Yá Ndióxi, ndihí cuèndá nchaá ñáyiú sàhni tátá-xi ndihí náná-xi, ndihí cuèndá nchaá dava-gá ñáyiú sàhni tnaha,

¹⁰ ndihí cuèndá nchaá cue tée cáháⁿ ndihí ñáyiú dihi te ñá díú ñàndihí-güedé cúú-yu, ndihí cuèndá tucu nchaá ñáyiú dihi cáháⁿ ndihí cue tée te ñá díú yí-yu cùu-güedé, ndihí cuèndá nchaá cue tée cáháⁿ ndihí tnàha ndi mee tée-xi, ndihí cuèndá nchaá ñáyiú chiváha tnàha ñáyiú-xi cuèndá sá cuiní-yu nihí-yu díhúⁿ, ndihí cuèndá nchaá ñáyiú ndehnde, ndihí cuèndá nchaá ñáyiú càcunehe ndéé Yá Ndióxi cuèndá cuiní-yu cutnùnì iní tnàha ñáyiú-yu sá cáháⁿ ndáá-yu, te ñá ndáá sá cáháⁿ ndáá-yu, ndihí cuèndá nchaá ñáyiú quide nchaá dava-gá sá ñá túú tàuchiuⁿ Yá Ndióxi cádá-yu. Cuèndá nchaá ñáyiú ducaⁿ xiquide ní ngúndecu nchaá tnúhu-án.

¹¹ Te nchaá tnúhu-án ìⁿ-ni cùu-xi ndihí nchaá tnúhu sá ni cachí Yá Ndióxi cáháⁿ-í, te tnúhu-án cúú-xí tnúhu váha vèhi, chi mee-gã ío váha iní-gá.

Té Páblú ndàcáⁿ táhú-dé núú Yá Ndióxi sá ní cundàhú iní ñáhá-gã xii-dé

¹² Te Xítoho Jesucristú ní cutnùnì iní-gá sá cádá ndáá-í cada-í nchaá chùⁿ tahu-gá. Te

ndacáⁿ táhù-í núú-gǎ sá nǐ taxi-gá chiúⁿ-gá quidè-í, te ío chindee ñaha-gá xii-í.

13 Te ní taxi-gá chiúⁿ-gá quidè-í cuèi ní xóo cáháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá nǐ xóo cada-í-yu dico ní cundàhú iní ñáhá Yǎ Ndiöxí xii-í, chi vátá quindáá-gá iní-í Xítóhó Jesucristú cútnàhá ducaⁿ nǐ xóo cada-í, te ni ñǎ cútnùní iní-í nchaa sá quidè-í ní cùu, te cuèi ducaⁿ nǐ xóo cada-í,

14 dico Yá Ndiöxí ío ní cundàhú iní ñáhá-gǎ xii-í te chindee ñaha-gá. Te mee Xítóhó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

15 Te nihí-ó tnùhu sá Xítóhó Jesucristú ní quixi-gá ñuyiú-a cuendá sá dácăcu nihnu-gá nchaa ñáyiú ndècu ichi cuehé ichi duha. Te tnùhu-áⁿ cúú-xí ñⁿ tnùhu ndáá, te xini ñuhu-xi quindáá iní nchaa nchoo ñáyiú ndècu ñuyiú-a. Te yúhú cúú-í tée ío-gá ndécú cuèchi-xi núú Yǎ Ndiöxí ní cùu.

16 Te Yá Ndiöxí ní cundàhú iní ñáhá-gǎ ní dácăcu nihnu ñaha-gǎ xii yúhú tée xidó ndécú cuèchi-xi ní cùu, cuendá cutnùní iní nchaa ñáyiú sá Xítóhó Jesucristú ío càhnu iní-gá. Te sá dúcáⁿ nǐ quide ñaha-gǎ xii-í, te xiǎⁿ cutnùní iní-yu sá nǐ na quindáá iní ñáhǎ-yu xii-gá te cundecú-yu ndihí-gá ní caa ní quíhíⁿ.

17 Te nchaa-o chí ná càchí-ó sǎ ío càhnu cuu Yá Ndiöxí, te canehe-o sǎ yíñùhu núú-gǎ ní caa ní quíhíⁿ, chi mee-gǎ cúú-gǎ Yaá táxí tnùní nchaa nduu nchaa quíú. Te cùu-gá ñⁿ Yaá ñá túú xini núú-ó, te ñⁿdi díí-ní-gǎ ío ndècu ndihí-gá nchaa sá xini tnùní-gá.

18 Te yòhó té Timùteú tée cùu datná ñⁿ déhe mee-í sa nàha-n nacuaá ní cáháⁿ dava-gá cue tée càháⁿ tnùhu Yá Ndiöxí cuendá-n, te diu-ni ducaⁿ càháⁿ-ú tucu, te cada-n nchaa nacuaá càháⁿ tnùhu-áⁿ chi diu nchaa tnùhu-áⁿ canu ichi ñaha-xi xii-n cada-n nchaa nacuaá cuini Yǎ Ndiöxí.

19 Te ío quindáá iní-n Xítóhó Jesucristú, te cada váha-n cundecu-n nacuaá cundecu váha iní-n, chi dava ñáyiú ñá túú-gǎ ducaⁿ quidé-yu núu xiǎⁿ ñá túú-gǎ sàndáá iní-yu nacuaá càháⁿ tnùhu-gá.

20 Te diu-ni ducaⁿ nǐ quide té Himèneú ndihí té Lijandrú ní dáñá ndèe-güedé ñá túú-gǎ sàndáá iní-güedé nacuaá càháⁿ tnùhu Xítóhó Jesucristú, te ní xáhaⁿ-í xii-güedé sá ná cündoho-ná-güedé nǐu nása cada ñaha sàcuíhná xii-güedé, te ducaⁿ nǐ xáhaⁿ-í cuendá sá vǎ càháⁿ cuèhé-gá-güedé cuendá Yǎ Ndiöxí.

2

Nacuáa cáháⁿ ndihí-o Yǎ Ndiöxí

1 Te na càchí tnùhu-í xii-n nchaa nacuaá cada-n. Te díhna-gá càchí tnùhu-í sá cáháⁿ ndihí-n Yǎ Ndiöxí cuendá nchaa ñáyiú te núu nása cùu xindecú-yu, te cǎcáⁿ táhú-n nǐú-gǎ cuendá-yu, te ducaⁿ ío ndacáⁿ táhú-n nǐú-gǎ cuendá nchaa sá vǎha quide ñaha-gá xií-yu.

2 Te ducaⁿ cáháⁿ ndihí-n Yǎ Ndiöxí cuendá nchaa cue tée cùnuu ndihí cuendá nchaa dava-gá cue tée cùchiuⁿ cuendá cada váha-güedé, te ducaⁿ nchòo ñá túú nǎ cuu cundecu-o, te ñá túú tnàhí ná cani iní-ó cundecu-o, te ío cundecu yíñùhu-o núú Yǎ Ndiöxí, te cada-o nchaa nacuaá tàú-xi cunduu.

3 Te núu ducaⁿ na càda-o cáháⁿ ndihí-o Yǎ Ndiöxí cuendá nchaa ñáyiú te quide váha-o, te ndùu vétú iní Yǎ Ndiöxí Yaá ní dácăcu nihnu ñaha xii-o núú ùhú núú ndàhú.

4 Te mee-gǎ cuini-gá sá ncháá ñáyiú tecú tnùní-yu nchaa tnùhu càháⁿ-gá, chi cuini-gá sá nánihí tàhú-yu.

5 Te ñⁿ-ni Dútú Ndiöxí ndécú, te ñⁿ-ni Xítóhó Jesucristú, te medii-ni Xítóhó Jesucristú quidé-gǎ tnàhá tnùhu-o ndihí Yá Ndiöxí.

6 Te Xítóhó Jesucristú ní dáñá-gǎ méé-gǎ ní sahani ñaha-güedé xii-gá cuendá sá cuini-gá sá cǎcu nihnu nchaa ñáyiú ndècu ñuyiú nǐú ùhú núú ndàhú. Te Yá Ndiöxí cuini-gá sá ncháá ñáyiú ñuyiú ndécú vitna níhí-yu tnùhu nacuaá ní cuu ní xihí Xítóhó Jesucristú.

7 Te Yá Ndiöxí ní cachí-gá sá càháⁿ-í tnùhu-áⁿ ndèni ní cuu núú xindecu ñáyiú ñá túú cùu ñáyiú isràél, te mee-ni tnùhu ndáá dánèhé-í-yu nacuaá quindáá iní ñáhǎ-yu xii-gá, te yúhú càháⁿ ndáá-í sá Yǎ Ndiöxí ní cachí-gá sá càháⁿ-í tnùhu-gá chi ndècu ndihí-í Xítóhó Jesucristú, te ñá túú dandahú ñáhà-í xii-n.

⁸ Te yúhú cuení-í sá ncháá xìchi cáhán ndihí cue téé Yá Ndiöxí, te na cundu ndoo cundu nine iní-güedé òré ndonehe-güedé ndaha-güedé cáhán ndihí ñaha-güedé xii-gá, chi vá cúú cùdééⁿ-güedé cuendá nchaa sá quidé ñaha ñáyiú xii-güedé, te ni vǎ cání iní-güedé cúcuèhé tnáhá-güedé ndihí-yu.

⁹ Te cächí tnúhu-í xii-n sǎ ncháá ñáyiú ðihí ná cundu díó-yu nàcuáa tàú-xi cundu, te vá cundu cuehé cundu duha dàtná cáá ðio nchaa ñáyiú ndècu ichi cuehé ichi duha, te na ndádá-yu díquǎ-yu nàcuáa tàú-xi cundu, te vá ndádá cuèhé ndada duhá-yu, te vá cání iní-yu cundu vií-yu ndihí sá ïo ndèyáhu, te ni vǎ cání iní-yu cuihnú-yu dóó sǎ ïo ndèyáhu.

¹⁰ Te mee-ni sǎ vǎha cadá-yu, chi ducaⁿ tàú-xi cada nchaa ñáyiú ðihí ndécú ichi Yá Ndiöxí.

¹¹ Te òré tàcá-yu núú dácuahá-yu tnúhu Yá Ndiöxí, te cue ñáyiú ðihí-áⁿ na nàhi dacuahá-yu tnúhu-gá, te cadá-yu nchaa nàcuáa cáhán cue téé dàcuaha ñaha xií-yu tnúhu-gá.

¹² Te yúhú cächí-í sá vǎ cúú dàcuaha ñáyiú ðihí cue téé, te ni vǎ cúú tàxi tnuní ñáhǎ-yu xii-güedé chi cundu tnáví-ni yuhú-yu cundedóho-yu.

¹³ Te ducaⁿ xini ñuhu-xi cadá-yu, chi Yá Ndiöxí ní cadúha-gá ðihna-gá té Ádán te dàtnùní ní cadúha-gá tá Èvá.

¹⁴ Te ñá díú mèe té Ádán ní dàndahú ñáhá sàcuíhná xii-dé, chi tá Èvá ní dándahú-xi, te ñá túú ní quide váha-xi núú Yá Ndiöxí sá dúcáⁿ ñǎ sándáá iní-xi tnúhu ní cáhán sàcuíhná-ǎⁿ.

¹⁵ Dico ñáyiú ðihí ní nduu táhǎ-yu sá cóó ðehe-yu, te naníhí tàhú-yu te núú vá dáñá ndèé-yu canchicúⁿ nihnú-yu ichi Yá Ndiöxí, te cundecu yíñuhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cundu cundecú-yu.

3

Nàcuáa tàú cue téé yìndaha ñaha xii ñáyiú ndècu ichi Yá Ndiöxí cada-güedé

¹ Te ío ïⁿ tnúhu cáhán ñáyiú sá nüú ïⁿ téé cuení quindaha ñaha xii ñáyiú ndècu ichi

Yá Ndiöxí, te ïⁿ sá vǎha cuení-dé cada-dé cächí-yu, te ndáá quée-xi tnúhu cáhán-yu.

² Te yúhú cächí-í sá cuè téé ducaⁿ na quindaha ñaha xii ñáyiú te xini ñuhu-xi cuu-güedé cue téé quide ndáá cuendá sá vǎ cáhán ñáyiú cuendá-güedé sá ñà túú quide ndáá-güedé. Te na cuu-güedé cue téé ndèca ïⁿ caa-ni ñadihí, te na cuu-güedé cue téé ñá túú quide cutexínu ndècu, te na cuu-güedé cue téé quide nchaa nàcuáa tàú-xi cundu, te na cuu-güedé cue téé sǎñaha nüú vehe ndetatú nchaa ñáyiú ñuhu ichi, te na cuu-güedé cue téé dànehé ñáhá vǎha xii ñáyiú tnúhu Yá Ndiöxí.

³ Te vá cúú-güedé cue téé quihu, te ni vǎ cúú-güedé cue téé ndècu pletú, te ni vǎ cúú-güedé cue téé ðicó-ni ducaⁿ nihí ðihúⁿ, te ni vǎ cúú-güedé cue téé sàni iní nàá, te ni vǎ cúú-güedé cue téé ñuhu iní mee-ni ðihúⁿ. Chi na cuu-güedé cue téé váha iní-xi te cundu cǎhnu iní-güedé.

⁴ Te na cuu-güedé cue téé ío váha sànu ichi ñadihí-xi ndihí landú-xi, te na cuu-güedé cue téé quide nàcuáa sándáá iní ñáhá landú-xi cuendá canehè-güexi sá yíñuhu núú-güedé.

⁵ Chi núú cuu-güedé cue téé ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiú ndècu ichi Yá Ndiöxí.

⁶ Te vá cúú-güedé cue téé íchí ni sándáá iní-xi tnúhu Yá Ndiöxí, chi na cuáhán te cada nínu-güedé méé-güedé te cuíta nihnu-güedé dàtná ní xíta nihnu sàcuíhná.

⁷ Te xini ñuhu-xi cuu-güedé cue téé cáhán váha ñáyiú cuendá-xi, cuèi ñá díú ñáyiú ndècu ichi Yá Ndiöxí cuendá sá vǎ cuátnúhu ñaha ñáyiú xii-güedé, chi núú ñáhá te cudana te sàcuíhná quesaha-xi tàxi tnuní ñáhá-xi xii-güedé.

Cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí

⁸ Te tnáhá cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí xini ñuhu-xi cuu-güedé cue téé quide nchaa nàcuáa tàú-xi cundu, te vá cúú-güedé cue téé cächí sá cáhán ndáá te ñá ndáá, te ni vǎ cúú-güedé cue téé quihu, te ni vǎ cúú-güedé cue téé sàni iní-xi ðicó-ni ducaⁿ nihí ðihúⁿ.

⁹ Te xìni ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá váha quide-güedé.

¹⁰ Te xìni ñuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedé cue téé yìndaha ñaha xii ñáyiú ndècu ichi Yá Ndiöxí.

¹¹ Te tnàhá tucu nchaa ñáyiú dìhí ná càdá-yu nchaa nàcuáa tàú-xi cunduu, te vá cúnduu yiti yuhú-yu, te ni vǎ cúú-yu ñáyiú quide cutexínu ndècu, te na cùú-yu ñáyiú ío váha quide ndáá.

¹² Te nchaa cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí, xìni ñuhu-xi cuu-güedé cue téé ndècu ìⁿ caa-ni ñadihí-xi, te na cùu-güedé cue téé sànu ichi váha ñadihí-xi ndihi landú-xi.

¹³ Te núu na càda ndáá-güedé chindee-güedé cue téé yìndaha ñaha xii ñáyiú ndècu ichi Yá Ndiöxí, te canehé-yu sá yíñuhu núu-güedé, te ducaⁿ te vá cúú càháⁿ núu-güedé cáháⁿ-güedé núu ñáyiú tnúhu Xítohó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuíní-í ndihi-ni quixi coto ñaha-í xii-n dico díhna-gá cadúha-í tutú-a daquixi-í ndaha-n

¹⁵ Chi na cuáháⁿ cuyaa-í. Te xíáⁿ núu cadúha-í tutú-a daquixi-í ndaha-n cuendá cutnùní iní-n nása cada-n cùndecu-n ndihi nchaa ñáyiú ndècu ichi Yá Ndiöxí. Te ñáyiú-áⁿ cúú-yu dàtná ìⁿ vehe cùu cuendá Yá Ndiöxí Yaá ndécú nchaa nduu nchaa quíú, chi ndècu ndihi ñaha-gá xii-yu, te cùú-yu ñáyiú càháⁿ váha cuendá tnúhu-gá.

¹⁶ Te cùtnuní ndáá iní-ó sǎ ío càhnu cuu tnúhu càháⁿ Xítohó Jesucristú, tnúhu sá càháⁿ nàcuáa nduu ichi ndecu-o, te duha càháⁿ tnúhu-áⁿ:

Te ní quixi Yá cúú Ndiöxí ñuyú-a ní cuu-gá ìⁿ ñáyiú,

te Espíritú Yá Ndiöxí ní cáháⁿ ndáá-xi sá cúú-gǎ ìⁿ Yaá ío váha quide ndáá,

te cue espíritú xínú cuèchi núú Yá Ndiöxí ní xíní ndáá-xi nchaa nàcuáa ní quide Yaá ní quixi ñuyú-a.

Te ní xité nuu tnúhu-gá ñhí ñuyú-a,

te ndèni ní cuu ní ngüíta-yu sàndáá iní ñáhá-yu xii-gá,

te mee-gǎ cuándaa-gá andiu.

Duha càchí tnúhu-áⁿ.

4

Ñáyiú dàña ñhnu vá quèndáá-gá iní-yu Yá Ndiöxí

¹ Te Espíritú Yá Ndiöxí càháⁿ ndáá-xi sá sáa nduu dàña ñhnu dava ñáyiú ndècu ichi-gá vá quèndáá iní ñáhá-gǎ-yu xii-gá, te ducaⁿ chi cue espíritú cúndihi yucu ñávǎha dandáhú ñáhá-xí xii-yu, te mee-nǎ nchaa tnúhu càháⁿ nchaa ñáyiú cùndihi nchaa espíritú-áⁿ cuhuⁿ iní-yu.

² Te nchaa ñáyiú ducaⁿ cùndihi cue espíritú cúndihi yucu ñávǎha-áⁿ cúú-yu ñáyiú ío dandáhú méé-xí chi càchí-yu sá càháⁿ ndáá-yu te ñá ndáá, te ñá túú tnàhí-gá ná quidé-xí iní-yu cuendá nchaa sá cuèhé sá dúhá quidé-yu.

³ Te ñáyiú-áⁿ quesáhá-yu sá vǎ cúú càndeca tnaha ñáyiú, te ni vǎ cúú càxí-yu dava núú sǎ xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuíní-gá sá ncháá nchò ñáyiú sàndáá iní tnúhu-gá ndacáⁿ táhú-ó núú-gǎ òré caxi-o.

⁴ Te nchaa sá ní cadúha Yá Ndiöxí cúú-xí sǎ váha te vá dáquèe tíhú-ó, te xìni ñuhu-xi ndacáⁿ táhú-ó núú-gǎ cuendá nchaa xíáⁿ.

⁵ Te Yá Ndiöxí càchí-gá sá méé-gǎ quidé-gǎ cúú-xí sǎ váha sá cúú-xí-ó te núu na ndacáⁿ táhú-ó núú-gǎ.

Téé quide ndáá xínú cuèchi núú Xítohó Jesucristú

⁶ Te núu na dàcuaha-n ñáyiú ndècu ndihi-o ichi Xítohó Jesucristú nchaa nàcuáa càháⁿ-í-a ña, te cuu-n ìⁿ téé quide ndáá xínú cuèchi núú-gǎ, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicúⁿ ñhnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá.

⁷ Te vá càdá cuendá-n nchaa cuendú cuèhé cuendú duha càháⁿ ñáyiú, ndihi nchaa dava-gá cuendú sá ña túú nàndihi cuendá sá ña túú nǎ cumání-n cùndecu-n núú Yá Ndiöxí.

8 Te núu ñⁿ chiúⁿ cada-o te nàcaá luha yiqui-o te nándihí-xi luha, dico ío-gá nándihí-xi te núu cada-o sã cùndècu yíñuhu-o núú Yá Ndiòxí. Te núu ducaⁿ na càda-o te cùu-xi ñⁿ sá vâha sá cúú-xí-ó vitna, te ni caa ni quíhíⁿ ducaⁿ cùu-xi ñⁿ sá vâha sá cúú-xí-ó.

9 Te xini ñuhu-xi sá ncháá-ndó quindáá iní-ndó ncháa tnúhu càháⁿ-í-a chí cùu-xi tnúhu ndáá.

10 Te vitna ío ndùcu ndee-o quide-o chiuⁿ Yá Ndiòxí Yaá ndécú ncháa nduu ncháa quíú te quide ndee iní-ó cuendá ncháa sá quidé ñaha ñáyiú xii-o, chí sàndáá iní-ó sã díú-gã chindèe ñaha-gá xii-o. Te ncháa ñáyiú cùndahú iní ñáhá-gã te chindee ñaha-gá xii-yu, dico ñáyiú sàndáá iní ñáhá xii-gá ío-gá cùnùú-yu chindee ñaha-gá xii-yu, chí dácácu nihnu ñaha-gã núú ùhú núú ndàhú.

11 Te ncháa tnúhu-áⁿ cùñaha-n xii-yu, te cáháⁿ-n dôho-yu sá ná càdá-yu ncháa nàcuáa càháⁿ-xi.

12 Te ío cada vâha-n cùndecu-n cuendá sá vã yõ daquèe tíhú ñáhá xii-n cuendá sá cúú-n tée cuechi, te ío vâha cada-n ncháa sá tàú-n càda-n cuendá ducaⁿ cànchicúⁿ nihnu ncháa ñáyiú ndècu ichi Yá Ndiòxí, te vii vii cáháⁿ ndihí-n-yu, te cuu iní-n-yu, te ío quindáá iní-n Yá Ndiòxí, te mee-ni sã vâha cani iní-n, te ducaⁿ càda-n cuendá canchicúⁿ nihnú-yu.

13 Te nini cùyaa-í quixi-í, te ío nducu ndèe-n cáháⁿ ndodo-n tnúhu Yá Ndiòxí núú-yu, te dacuàhá-n-yu nàcuáa càháⁿ tnúhu-gá, te cáháⁿ-n dôho-yu nàcuáa cuu vii cuu vâha iní-yu cundecú-yu ichi Yá Ndiòxí.

14 Te vá dáñá ndèe-n càda-n nacuáa nduu táhú ní taxi Yá Ndiòxí ní ngúndecu ndihí-n cùtnàhá ní sacáⁿ ndodo cue tée yíndaha ñaha xii ñáyiú ndècu ichi Yá Ndiòxí ndaha-güedé díquí-n, te ní cachí tnúhu-güedé sá dúcáⁿ ní cuiní Yá Ndiòxí cunduu.

15 Te ni yùhu ni iní-n càda-n ncháa nacuáa càháⁿ-í-a cuendá sá ná quini ñáyiú sá ío-gá vâha ta quide-n cuáháⁿ.

16 Te ío vâha cundehe-n ncháa nacuáa quide-n, ndihí ncháa nàcuáa dānehé-n-yu, te vá dáñá ndèe-n dùcaⁿ cada-n. Te núu ducaⁿ na càda-n te nduu táhú-n cùndecu vâha-n núú Yá Ndiòxí ni caa ni quíhíⁿ

ndihí ncháa ñáyiú na tédóho ncháa tnúhu càháⁿ-n.

5

Nàcuáa tàú-xi cada-o cùndecu-o ndihí ñáyiú sàndáá iní tnúhu Yá Ndiòxí

1 Te vá ténáá-n ncháa cue tée cùu sacuéhé chí vii vii cáháⁿ-n dôho-güedé, te cada iní-n sã dàtná tátá-n cùu-güedé, te diu-ni ducaⁿ vii vii cáháⁿ-n dôho ncháa cue tée cuechi, te cada iní-n sã dàtná cue ñani-n cùu-güedé.

2 Te diu-ni ducaⁿ vii vii cáháⁿ tucu-n dôho ncháa ñáyiú dihí ñáyiú cùu sacuéhé, te cada iní-n sã dàtná náná-n cùú-yu, te diu-ni ducaⁿ vii vii cáháⁿ tucu-n dôho ncháa ñáyiú dihí ñáyiú cuechi, te cada iní-n sã dàtná cue cúha-n cùú-yu, te ío cuu vâha iní-n òré ducaⁿ cáháⁿ-n dôho ncháa ñáyiú cuechi-ãⁿ.

3 Te canehe-n sã yíñuhu núú ñáyiú dihí ní quendóo quèé, te chindèe-n-yu núu ndàhú-yu.

4 Te núu ñⁿ ñaha quèé ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi ncháa nacuáa tàú-xi cunduu núú-aⁿ chí ducaⁿ cuiní Yá Ndiòxí cada-güexi. Te núu ducaⁿ na càda-güexi te nanchocáva-güexi quide-güexi sá vâha sá cúú-xí ñáyiú ní dácuéhnú ñaha xii-güexi. Te núu ducaⁿ na càda-güexi te quide vâha-güexi te ío nduu vétú iní Yá Ndiòxí.

5 Te ñáyiú quèé ñáyiú ndàhú ndécú ichi Yá Ndiòxí sàndáá iní-yu sá díú-gã chindèe ñaha-gá xii-yu, te cuèi nduu cuèi niú ñá túú dàña ndeé-yu cáháⁿ ndihí ñáhá-yu xii-gá.

6 Te ncháa ñáyiú quèé cúdíⁿ iní quidé ncháa sá cuèhé sá dúhá cùú-yu dàtná ñáyiú ní xihí cuèi ndècu vívü-yu.

7 Te cùñaha-n xii ncháa ñáyiú sá ná cádá-yu ncháa tnúhu càháⁿ-í-a cuendá sá ñá túú nã cumánⁿ-yu cundecú-yu, te ducaⁿ vã yõ cáháⁿ cuèhé cuendá-yu.

8 Te ío xini ñuhu-xi chindee-yu cue tnàha ñáyiú-yu, dico ío-gá xini ñuhu-xi chindee-yu cue ñáyiú cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gã sàndáá iní-yu cadá-yu nacuáa càháⁿ Yá Ndiòxí. Te sá dúcáⁿ ná càdá-yu te vîhi-gá quidé-yu dácúxí ñáyiú ndècu ichi cuèhé ichi duha.

9 Te chido tnùnì-n mèe-ni ñáyiú quèé ñáyiú sa ndècu únídico cuíá-xi àdi vihi-gá cuendá ñáyiú-áⁿ cadá-yu nchaa nàcuáa cuínì Yá Ndiöxí núú nchàa ñáyiú ndècu ichi-gá, te ñáyiú-áⁿ xínì ñùhu-xi cuú-yu mee-ni ñáyiú ní quide ndáá ní xíndecu ndìhi yíi-xi.

10 Te na cùú-yu ñáyiú quèé quidé vâha cùdiu núú nchàa ñáyiú, te na cùú-yu ñáyiú quèé xínì canu ichi váha cue landú-xi, te na cùú-yu ñáyiú sãñaha nùu vehe ndetatú cue ñáyiú ñùhu ichi, te na cùú-yu ñáyiú ndècu túha quide nání chiúⁿ cuendá cue ñáyiú ndècu ichi Yá Ndiöxí, te na cùú-yu ñáyiú chindee nchaa ñáyiú ndècu ndìhi tnúndòho tnúhu ndàhú, te na cùú-yu ñáyiú ñá túú dàña ndeé quidé nchàa núú sã vâha.

11 Te vá chídó tnùnì-n ñáyiú quèé ñáyiú ñá túú ndècu únídico cuíá-xi cada chiúⁿ Yá Ndiöxí, chi núú cuechi-gã-yu ña, te vá cundáa-yu cadá-yu chiúⁿ-gá, chi quesàhá-yu natnándaha tucú-yu.

12 Te sá cuendá xíãⁿ te nacháhu-yu núú Yá Ndiöxí, chi vá cadá-gã-yu nàcuáa ní cuu tnúhu cadá-yu ni cùu.

13 Te nguíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñáyiú ducaⁿ quide ío cùu cuhndú-yu, te cùyiti yuhú-yu, te ndëni ní cuu cuáháⁿ-yu chinee díquíⁿ-yu vehe tnàha ñáyiú-yu ndèhé-yu núú nása ndécú-yu, te ñá túú taú-yu ducaⁿ cadá-yu, te càháⁿ-yu mee-ni tnúhu sá ñà túú nàndìhi.

14 Núú xíãⁿ cuínì-í sá ncháá ñáyiú quèé ñáyiú cuechi na natnándaha tucú-yu cuendá cuú-yu nãná, te ducaⁿ cadá-yu nchaa sá xínì ñùhu-xi cadá-yu vehé-yu, te núú ducaⁿ na cadá-yu, te nchaa ñáyiú cùu úhú iní ñáhá xii-o vá nihí-gá-yu tnúhu cáháⁿ cuèhé-yu cuendá tnúhu Yá Ndiöxí.

15 Te dava ñáyiú quèé ndécú ichi Yá Ndiöxí ní cùu ní dáñã-yu te ní tñíⁿ-yu tnúhu càháⁿ sácúíhã.

16 Te núú dava ñáyiú ndècu ichi Yá Ndiöxí ndécú ndìhí-yu ñⁿ ñaha quèé cúú ndì meé-yu ña, te taú-yu chindee ñáhá-yu xii-aⁿ cuendá sá vã ío chi chiúⁿ-aⁿ nchaa ñáyiú ndècu ichi Yá Ndiöxí, te ducaⁿ te nchaa ñáyiú ndècu ichi-gá-áⁿ ñíhí

ndéé-gã-yu chindèé-yu dava-gá ñáyiú quèé ñá túú vèdana ndècu ndìhi.

17 Te nchaa cue téé ío váha quide yíndaha ñaha xii ñáyiú ndècu ichi Yá Ndiöxí ío xínì ñùhu-xi canehe sá yíhí ñùhu núú-güedë, te chindee ñàha xii-güedë. Te uuⁿ-gá taú ñáyiú ducaⁿ cadá-yu sá cúú-xí nchàa cue téé ni yùhu ni iní càháⁿ tnúhu-gá.

18 Te núú tütú Yá Ndiöxí càchí-xi: “Vá chíhí-ndó ñùnu yuhu ndicutu oré dánchezí-di triú”, duha càchí-xi. Te càchí tucu-xi ingá xichi: “Íⁿ téé quide chiúⁿ dacuítí taú-xi sá cúhúⁿ yãhu-dé”, duha càchí-xi núú tütú-gá.

19 Te núú ío ñáyiú véxi sàcáⁿ cuéchi núú-n cuendá ñⁿ téé yíndaha ñaha xii ñáyiú ndècu ichi Yá Ndiöxí ñá, te cada cuendá-n tnúhu càháⁿ-yu te núú véxi-yu ndìhi úú àdi únì ñáyiú càháⁿ ndáá nàcuáa ní cuu, áⁿ núú ñáhá te vá cadá cuendá-n tnúhu càháⁿ-yu.

20 Te núú cue téé yíndaha ñaha xii ñáyiú-áⁿ ndécú cuèchi-güedë, te càháⁿ-n dôho-güedë núú nchàa ñáyiú ndècu ichi-gá cuendá sá dává-gã-yu vá cúyíⁿ-yu ducaⁿ cadá-yu.

21 Te Yá Ndiöxí ndìhi Xítohó Jesucristú náhá-gã ndìhi cue espíritú xínú cuèchi núú-gã sá yùhú càháⁿ-í dôho-n sã cadá-n nchàa nacuáa càháⁿ-í-a, te ñⁿ-ni càháⁿ ndìhi-n cuè téé xínì tnáhá ndìhi-n, ndìhi cue téé ñá túú xínì tnáhá ndìhi-n.

22 Te vá ío cundíhí iní-n tàxi ndecu-n ñⁿ téé quíndaha ñàha xii ñáyiú, chi díhna-gá cada cuendá-n te núú cùu-dé ñⁿ téé quide ndáá, chi núú cuendá-ni na tàxi ndecu-n-dé te vá cadá ndáá-dé, te yòhó ndaa díquíⁿ cuendá nchaa sá cuèhé sá dúhá cada-dé, te ío coto-n mèe-n vá cadá-n ni ñⁿ sá cuèhé sá dúhá.

23 Te ducaⁿ ío mee-ni cùhú xítí-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

24 Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sãá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sãá nduu cundáa cuéchi-yu te dàvá-áⁿ cutnùnì.

25 Te ducaⁿ sãtnahá-xi cùu nchaa sá vâha quide davá-yu chi cùtnuní, te cuèi ñá túú

cùtnuní òré-ni dico dacuítíi sã sàá nduu cùtnuní.

6

¹ Te nchaa ñáyiú ndècu tnuú quidé chiúⁿ ndihí ñⁿ patróóⁿ xìni ñuhu-xi ío canehé-yu sá yíñùhu núú-dě cuendá sá vã cãháⁿ cuèhé ñáyiú cuendá Yã Ndiöxí, te ni vã cãháⁿ cuèhé-yu cuendá tnúhu-gá.

² Te núu pàtróóⁿ cue ñáyiú xìnu cuechi-áⁿ sàndáá iní-dé Yã Ndiöxí, te ñá díú sã dúcáⁿ sàndáá iní-dé Yã Ndiöxí te vá cãnehé-yu sá yíñùhu núú-dě, chi uuⁿ-gá tàú-yu cada váha-yu cunu cuèchí-yu núú-dě, te ducaⁿ na càdá-yu chi xìnu cuechí-yu núú tẽ sàndáá iní ndihí-yu tnúhu Yã Ndiöxí. Te vá dáñá ndèe-n dãnehé-n-yu nchaa nãcuáa cãháⁿ-í-a, te cúñaha-n xìi-yu sá ná càdá-yu.

Nduu vétú iní-ó cùndecu-o

³ Te ío cue tée ñá túú tñi-güedé nãcuáa cãháⁿ tnúhu Xítóhó Jesucristú, te cue tée-áⁿ cãchí-güedé sá cãháⁿ ndáá-güedé dico ñá ndáá, chi ñá túú cãháⁿ-güedé nãcuáa cuáháⁿ tnúhu-gá. Te nchaa tnúhu Xítóhó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá.

⁴ Te nchaa cue tée ducaⁿ xiquide quide cahnu-güedé méé-güedé dico ñá túú vèdana xìni-güedé, te cue tée-áⁿ ñà túú ndècu váha iní-güedé chi nándi tnúhu sá ñà túú nãndíhi cuíní-güedé cútnãha-güedé. Te ngüita-güedé cúú cuèdú iní tnáhá-güedé, te nãá ndihí tnáhá-güedé, te xicuehé tnáhá-güedé, te ñá túú-gã cúú váha iní núú tnáhá-güedé.

⁵ Te cue tée-áⁿ mee-ni nãa-güedé chi ñá túú sãni váha iní-güedé, te ni ñà túú xìni-güedé nãcuáa cuáháⁿ tnúhu ndáá tnúhu Yã Ndiöxí, te cãchí-güedé sá ío váha cundecu-güedé ichi-gá chi sãni iní-güedé sá ío vãi díhúⁿ ñíhí-güedé cundecu ndihí-güedé. Te yúhú cãháⁿ-í dóho-n sã vã ñíhí tnáhá-n ndihí nchaa cue tée ducaⁿ xiquide.

⁶ Te ndáá sá ichi Yã Ndiöxí cúu-xí ñⁿ ichi sá ío váha cundecu-o, dico xìni ñuhu-xi nduu vétú iní-ó nãcuáa ndècu-o ñuyíú-a.

⁷ Te nchoo cuè ñáyiú chi ñá túú vèdana nèhe-o ní quexío ñuyíú-a, te ñiú-ni ducaⁿ ñà túú vèdana canehé-o quíhíⁿ òré ná cùú-ó.

⁸ Te ío xìni ñuhu-xi nduu vétú iní-ó te núu ndècu-ni sá cúnchito-o ndihí dóó cuíhnu-o.

⁹ Te ío ñáyiú ío cuíní-yu cuu cuicá-yu, te ñáyiú-áⁿ dácãhu iní ñáhá yùcu ñávãha xií-yu cadã-yu nándi sá cuèhé sá dúhá, te nándi-gã nchaa sá cuèhé sá dúhá càhu iní-yu quidé-yu, te nchaa sá quidẽ-yu-áⁿ ñà túú vèdana nãndíhi-xi chi uuⁿ-gã ndádã ndàhú ñáhá-xí xií-yu, te dàcuíta nihnu ñaha-xi.

¹⁰ Chi nchaa ñáyiú ñuhu iní mee-ni díhúⁿ, te xiãⁿ quidé-xí ngüita-yu sãni iní-yu cadã-yu nándi sá cuèhé sá dúhá. Te ío ñáyiú ndècu ichi Yã Ndiöxí te sã tnúhu ducaⁿ ñuhu iní mee-ni díhúⁿ ñí dáñã-yu ñà túú-gã sàndáá iní ñáhã-yu xii-gã, te vitna ñá túú tnãhí-gã ndécú váha iní-yu.

Cahni iní-ó càda-o nchaa nacuáa cãháⁿ Yã Ndiöxí chi sàndáá iní-ó-gã

¹¹ Te yòhó tée quide chiuⁿ Yã Ndiöxí xìni ñuhu-xi vá cadã-n dàtnã quidé nchãa ñáyiú ní cachí-í sá ñà túú quide ndáá, te vá dáñá ndèe-n càda ndáá-n cùndecu-n, te cada-n nãcuáa nduu vétú iní Yã Ndiöxí, te ío quindáá iní-n-gã, te cuu iní-n nchãa tnaha ñáyiú-n, te cada càhnu iní-n nchãa sá ná yãha-n cùndecu-n ichi-gã, te cunduu ndàhú iní-n.

¹² Te cahni iní-n càda-n nchaa nacuáa cuíní Yã Ndiöxí chi sàndáá iní-n-gã, te ío cuhuⁿ iní-n sã cùndecu-n ndihí Yã Ndiöxí ni caa ni quíhíⁿ, chi ñiú cuendá tnãhí-áⁿ ñí cãháⁿ ñáhã-gã xii-n, te ní cãháⁿ ndáá-n núú vãi ñáyiú sá ío váha sàndáá iní-n-gã.

¹³ Te Yã Ndiöxí Yaá quidé nchito nchaandi túhú sá ío ñuyíú ñaha-gã sá cãháⁿ-í dóho-n vitna, te ñiú-ni ducaⁿ ñaha tucu Xítóhó Jesucristú Yaá ní cãháⁿ tnúhu ndáá núú tẽ Pilatú

¹⁴ sã quindáá iní-n càda-n nchaa nacuáa cãháⁿ Yã Ndiöxí, te nchaa tnúhu cãháⁿ-gã cada-n nãcuáa vá dáquèe tíhú ñáhã ñáyiú xii-n, te ducaⁿ-ni càda-n ndèe ná sàá nduu quixi tucu Xítóhó Jesucristú.

¹⁵ Te quixi tucu-gã chi ducaⁿ ñí cachí Yã Ndiöxí cunduu, te mee Yã Ndiöxí ñáhã-gã ná nduu quixi tucu Xítóhó Jesucristú. Te Yã Ndiöxí ío váha cùu iní-gã te ñⁿ dñi díi-ni-gã ío-gã cùnùu-gã dàcúúxí cuè tée tàxi tnuní ñⁿ ñⁿ nãcióⁿ ndihí nchaa dava-gã cue tée cùnùu, chi tàxi tnuní ñáhã-gã xii-güedé, te nchaa ñáyiú ndècu ñuyíú-a tàxi tnuní-gã.

16 Te diu-gá cúú-gă Yaá ndécú nchàa nduu nchaa quiú, te ío càhnu cuu-gá chi dàtná dáyèhé nchíanchii dáyèhé-xi núú ndécú-gă, te vá yõo ìⁿ cùyì dayatni núú ndécú-gă, te ni ñă túú nì ìⁿ ñáyiu xìní ñáhá xii-gá te ni vă ndácũ-yu quini ñáhă-yu xii-gá. Te ío na cànehe nchaa ñáyiu sá yĩñùhu núú-gă ni caa ni quihíⁿ, te ducaⁿ ìo na tàxi tnuní-gá ni caa ni quihíⁿ. Te ducaⁿ na cùnduu.

17 Te cáháⁿ-n dõho nchaa ñáyiu cuica ndècu ndìhi nchaa sá ío ñuyíú-a cuendá sá vă cádá càhnú-yu mèé-yu, te duuⁿ duuⁿ vá cùndèé iní-yu ni ìⁿ sá ndécú ndìhí-yu chi vá cúdĩ-xi, te cáháⁿ-n dõho-yu sá ná cùndeé iní-yu Yá Ndiõxí chi diu-gá cúú-gă Yaá ndécú nchàa nduu nchaa quiú, te chitu nũú ndáhá tàxi-gá nchaa sá xíní ñùhu-o, chi cuiní-gá sá ìo cuu váha iní-ó cùndecu-o.

18 Te cáháⁿ tucu-n dõho-yu sá ná càdá-yu mee-ni sã vãha, te cuendá nchaa sá vãha cadá-yu-áⁿ te cuú-yu ìⁿ ñáyiu cuica sã cúú-xí Yá Ndiõxí, te na cùndecu túha-yu chindèé-yu cue ñáyiu ndàhú cuañàhá-yu sá xíní ñùhú-yu.

19 Te núu ducaⁿ na càdá-yu te Yá Ndiõxí cuañaha-gă sá ndúú tãhũ-yu na sàá nduu, te ngúndecu váha-yu ndìhi-gá ni caa ni quihíⁿ.

Tnúhu ndéé núú nĩ ndìhi-ná

20 Te yòhó té Timùteú càháⁿ-í dóho-n sã ìo cada cuendá-n vă dãma tnúhu ní taxi Yá Ndiõxí danèhé-n ñáyiu, te vá cádá cuendá-n nchàa cuendú cuèhé cuendú duha ío ñuyíú-a chi ñă túú nàndìhi-xi, te ni vă cádá cuendá-n nchàa tnúhu xĩtnàha ñáyiu càchí sá xícá nàha tnúhu cue téé túha chi ñă díú ìⁿ tnúhu ndáá cúú-xí.

21 Te ío ñáyiu ñă túú-gă sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiu-áⁿ.

Te Yá Ndiõxí ná chìndee chitúu ñaha-gă xii-n. Te ducaⁿ na cùnduu. Te ío cada ndee ìní-nã vitna.

TUTÚ CÚÚ ÒÚ NÍ CADÚHA TÉ PÄBLÚ QUIHÍⁿ NDAHA TÉ TIMÛTEÚ

Té Páblú cádũha-dé tutú quíhíⁿ ndaha té Timùteú

¹ Yúhú té Páblú ní tendaha ñaha Yá Ndiõxí cãháⁿ-í tnúhu Xítohó Jesucristú núú ñáyiú, chi ducaⁿ ñí cachí Yá Ndiõxí cunduu. Te cãháⁿ-í dàtná ní cachí Yá Ndiõxí sá ncháá nchòo ñáyiú ndècu ndihí Xítohó Jesucristú naníhí tãhú-ó.

² Te yúhú té Páblú cádũha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ichi Xítohó Jesucristú, te xicáⁿ táhù-í núú Dütú Ndiõxí ndihí núú Xítohó Jesucristú sá ío na chindee chítúu ñaha-gã xii-n, te cundàhú iní ñáhà-gã, te ducaⁿ ndì nduú-gá ná cádá te ío váha cuu iní-n cùndecu-n.

Cáháⁿ váha-o cuendá Xítohó Jesucristú

³ Te cuèi nduu cuèi niú ducaⁿ-ni cãháⁿ ndihí-í Yá Ndiõxí cuendá-n, te ndacáⁿ táhù-í núú-gã, te xínu cuechi-í núú-gã dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gã dàtná ní xóo cada-güedé.

⁴ Te ío sàni iní-í naníhí tnáhà-ó cuendá ío cudí iní-í, chi ndàcu iní-í sá ío ní ndáhyú-n sã ndìhú iní-n cùtnàhá ní quide ndee iní-í tnáhà-ó.

⁵ Te nàha-í sá sàndáá ndisa iní-n Yá Ndiõxí dàtná ní ngúíta díhna-gá xítná-n tã Lòidá ndihí náná-n tã Eùnicé quidè-yu, te cùtnuní ndáá iní-í sá díú tnáhà-n ío váha sàndáá iní-n-gã.

⁶ Te xíãⁿ dándàcu iní ñáhà-í xii-n cuendá sá ío-gá nducu ndèe-n cada-n chiuⁿ ní nduu táhù-n núú Yá Ndiõxí cada-n, chi ní taxi-gá tnúhu ndee iní ní ngúndecu ndihí-n cùtnàhá ní sacáⁿ ndodo-í ndaha-í díquí-n sã díú chiuⁿ-gá cada-n.

⁷ Te Espiritú sá ñí taxi Yá Ndiõxí ndécú ndihí-o ñá túú cùu-xi ìⁿ Espiritú sá cádá nàcuáa yùhú-ó, chi cùu-xi ìⁿ Espiritú sá táxí tnúhu ndee iní cada-o chiuⁿ-gá, te diu-xi quide cuu iní tnáhà-ó ìⁿ ìⁿ-o, te diu-ni

tucu-xi quide cutnuní iní-ó nàcuáa cada-o cùndecu-o.

⁸ Te xíãⁿ núu vá cùcàhaⁿ núú-n cãháⁿ váha-n cuendá Xítohó Jesucristú, te ní vã cùcàhaⁿ núú-n sã dúhá yìhi-í vecaá sá cuendá-gá, te xìni ñuhu-xi sá tnáhà-n ndòho-n sá cuendá tnúhu-gá, te cundee iní-n ndòho-n, chi Yá Ndiõxí chindee ñaha-gá xii-n.

⁹ Te Yá Ndiõxí ní dácàcu nihnu ñaha-gã xii-o núú ùhú núú ndàhú, te ní cachí-gá sá cádá-ó nchàa nacuáa cuíni méé-gã cunduu, te ducaⁿ ñí quide-gá chi ducaⁿ ñí sani iní méé-gã cunduu sá cádá váha ñaha-gã xii-o, te ñá díú sã ío váha quide-o ndecu-o ducaⁿ ní quide-gá. Te ndéé cùtnàhá vátá ngáva-gá ñuyíú ñí cachí-gá sá cádá váha ñaha-gã xii nchaa nchoo ñáyiú ní ngúndecu ndihí Xítohó Jesucristú vitna.

¹⁰ Te vitna cùtnuní iní-ó sã ío váha quide ñaha-gã xii-o, chi ní quixi Xítohó Jesucristú ñuyíú-a ní dácàcu nihnu ñaha-gã xii-o núú ùhú núú ndàhú, te Yaá-áⁿ ñí quide-gá cuendá sá vã cùú-gá-ó cùú dúcáⁿ-ó, chi ní cachí-gá sá cùndècu-o ni caa ni quíhíⁿ te núu na quíndáá iní-ó tnúhu-gá.

¹¹ Te ní cachí-gá sá cãháⁿ-í tnúhu-gá núú ñáyiú ñá túú cùu ñáyiú isràel te dacuàha váha-í-yu tnúhu-gá, te cuèi ndèni ní cuu ndécú-yu te quíhíⁿ-í cãháⁿ-í tnúhu-gá núú-yu chi ducaⁿ ñí cachí-gá cunduu.

¹² Te cuendá xíãⁿ nándi sá ndóhò-í vitna cuendá-gá, dico ñá túú cùcahaⁿ núú-í chi cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dáñà-í méè-í núú ndáhà-gã, te cùtnuní ndáá iní-í sá cótó ñaha-gá xii-í ndéé ná sáá nduu nàcuaca ñaha-gá.

¹³ Te vá dáñá ndèe-n càda-n nchaa nacuáa cãháⁿ tnúhu váha ní dánèhé ñáhà-í xii-n, te ío quíndáá iní-n Yá Ndiõxí, te nchaa-o nàcuáa ndècu-o ndihí Xítohó Jesucristú ío cuu iní tnáhà-ó ìⁿ ìⁿ-o.

¹⁴ Te cada cuendá váha-n sã vã dãma tnúhu Yá Ndiõxí sá ñí taxi-gá ndécú ndihí-n, te Espiritú-gá sá ñí taxi-gá ndécú ndihí-o chindee ñaha-xi xii-n.

¹⁵ Te yòhó sa xíní-n sã nchàa ñáyiú ndècu distritú Àsiá, ñáyiú ní sàndáá iní tnúhu Xítohó Jesucristú ní dáñá ñáhà-yu xii-í, te

tnàhá té Fígeló ndihí té Hèrmógenés ní dáñá ñàha-güedé xii-í.

16 Te xicáⁿ táhù-í núú Xítóhó Jesucristú sá ná chindee-gá cue ñáyiú cùu ndi mee té Onèsiforó, chi ñiú-dé ío vài xito ní quixi-dé ní quide cuendá ñáhá-dě xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhì-í vecaá.

17 Te cùtnàhá ní xindecu-dé ñuú Rómá ducaⁿ-ni ní xóo nanducu ñàha-dé xii-í ndèe ndéé naníhí ñáhá-dě.

18 Te xicáⁿ táhú tucu-í núú Xítóhó Jesucristú sá ná cùndahú iní ñáhá-gă xii-dé nduu na sàá cundáá cuéchi nchaa ñáyiú. Te yòhó sa xini ndáá-n sã ío ní chindee ñàha-dé xii-o cùtnàhá ní xindecu-o ñuú Efesú.

2

Tée quide ndáá xínú cuèchi núú Xítóhó Jesucristú

1 Te yòhó té cùu datná ìⁿ déhe mee-í ío nducu ndèe-n cada-n nacuaá níhí ndéé-gă-n cùndecu-n ichi Xítóhó Jesucristú chi ñiú-gá chindee ñàha-gá xii-n.

2 Te nchaa tnúhu sá ñí dánèhé ñàhà-í xii-n ndihí nchaa dava-gá ñáyiú, xiãⁿ danèhé-n dàva-gá cue téé quide ndáá cuendá danèhé-güedé dava-gá ñáyiú.

3 Te cahni iní-n ndòho-n cunu cuechi-n núú Xítóhó Jesucristú datná cuini-n ndòho ìⁿ sandadú sàhni iní-dé xínú cuèchi-dé.

4 Chi ni ìⁿ sandadú ñá túú ñăgá sání iní-dé cada-dé òré xínú cuèchi-dé cuendá cudíu-dé núú tée taxi tnuní ñáhá.

5 Te ñiú-ni ducaⁿ sãtnahá-xi cùu tucu ìⁿ téé dàdiqui, chi núú vá dádiqui-dé ñàcuáa tàú-xi cunduu te vá ñihí-dé sá ndúú táhú-dě.

6 Te núú ìⁿ téé xinu cuechi ío ndùcu ndee-dé quidé chiúⁿ-dé chíhí-dě tatá, te ñiú-dé tàú-dé díhna-gá-dé níhí-dě sá cùhúⁿ yáhu-dé.

7 Te cani iní-n nchaa tnúhu cãháⁿ-í-a, te Xítóhó Jesucristú chindee ñàha-gá xii-n te tecú tnuní-n nchaa.

8 Te ndacu iní-n sã Xítóhó Jesucristú ní cuu-gá ñani tnáhá ndíi Dáví, te ní xihí-gá te ní ndoto-gá, te ñiú ducaⁿ nduu tnúhu dànèhé-í ñáyiú.

9 Te ío dândoho ñaha ñáyiú xii-í cuendá sá cãháⁿ-í tnúhu-gá, te quide ñahá-yu xii-í

datná quidě-yu ìⁿ téé ní quide ìⁿ cuéchi cãhnu, chi ní chihi ñàhá-yu vecaá xii-í, dico tnúhu Yá Ndiõxí chi vá ndácũ-yu nganí-yu.

10 Te xiãⁿ núu cuéi nándi cùu nchaa sá quidé ñàhá-yu xii-í, dico quide cahnu iní-í cuendá sá naníhí tãhú tnàhá nchaa dava-gá ñáyiú cuini Yá Ndiõxí cundecu ndihí-gá, chi nchaa ñáyiú na tnàhá tnúhu ndihí Xítóhó Jesucristú nduu táhũ-yu cundecú-yu ndihí-gá núú ío váha càa ndecu-gá ni caa ni quíhíⁿ.

11 Te xéhé cúú-xí ìⁿ tnúhu ndáá cuiti: Nchoo cùu-o datná ñáyiú ní xihí ndihí Xítóhó Jesucristú chi ñá túú-gă ndécú-ó ichi cuehé ichi duha, te xiãⁿ núu cuéi na sàá nduu cùú-ó ñuúyú-a, dico ñiú-ni cundecu-o ndihí-gá.

12 Te núu na cùndee iní-ó ndòho-o nándi sá ndóhó-ó sã cuendá-gá, te sáá nduu te cunuu-o ndihí-gá.

Te núu na cãháⁿ-ó sã ñà túú xini-ó-gă, te ñiú-ni ducaⁿ cũñaha-gă xii-o sã ñà túú xini ñáhá-gă ná sàá nduu càda ndáá-gá cuéchi nchaa ñáyiú.

13 Te núu nchoo ñà túú quide ndáá-ó ndècu-o núú-gă ñá, dico mee-gă chi ío ndáá quidé-gă, chi Yá Ndiõxí nchaa sá sání iní-gá quidé-gă.

Tée quide nacuaá nduu vétú iní Yá Ndiõxí

14 Te dandacu iní-n nchaa ñáyiú ndècu ndihí-o ichi Xítóhó Jesucristú nchaa tnúhu cãháⁿ-í-a, te cũñaha-n xiú-yu sá Xítóhó Jesucristú cuini-gá sá ñà túú-gă nándi tnúhu cùtnàhá-yu, chi nchaa tnúhu cãháⁿ-yu-áⁿ dácuíta nihnu-xi ñáyiú ndèdóho ñaha xiú-yu, chi ñá túú vèdana nándihí nchaa tnúhu-áⁿ.

15 Te ío nducu ndèe-n cada ndáá-n cùndecu-n núú Yá Ndiõxí, te cada-n chiúⁿ-gá ñàcuáa nduu vétú iní-gá, te cãháⁿ ndáá-n tnúhu-gá, cuendá sá vá cùcãhaⁿ núú-n núú-gă.

16 Te vá cádá cuendá-n nchaa tnúhu sá ñà túú vèdana nándihí cãháⁿ ñáyiú cuendá Yá Ndiõxí, chi nchaa ñáyiú cãháⁿ tnúhu-áⁿ ndihí nchaa ñáyiú sácúndedóho ñaha xiú-yu uuⁿ-gá quidě-yu nchaa sá cuéhé sá dúhá.

17 Te nchaa tnúhu-áⁿ cùténuu-xi datná quidé ìⁿ cuéhé sã ñani ñaha xiú ñáyiú xité nuu-xi ñihí yiqui cùñú-yu. Te tnàhá

té Himèneú ndihí té Fìletú càháⁿ-güedé tnúhu-án quidé-güedé dàtná quidé ñáyiú-án.

18 Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiöxí, chi càchí-güedé sá ncháá nchò ñáyiú ndècu ichi Yá Ndiöxí cúú-ó dàtná cue ñáyiú sa ní ndoto, dico na cùú ndisa-o te vá ndótó-gã-ó càchí-güedé. Te dava ñáyiú ní dáñá-yu sá sàndáá iní-yu tnúhu Yá Ndiöxí sá dúcáⁿ càháⁿ-güedé.

19 Te cuèi ducaⁿ quide davá-yu, dico Yá Ndiöxí ní taxi ndecu-gá cue ñáyiú ni yùhu ni iní ndécú ichi-gá, te cùnuni sá ndécú ndihí ñaha-gá xií-yu, chi ìⁿ xichi núú tütú-gá càchí-xi sá méé-gã xini-gá cue ñáyiú cùu cuendá-gá. Te ingá tucu xichi núú tütú-gá càchí-xi sá ncháá ñáyiú sàndáá iní ñáhá xii Xítohó Jesucristú xini ñùhu-xi sá vã cùndècu-gá-yu ichi cuèhé ichi duha.

20 Te ñáyiú cuica chi ndècu ndihí-yu vehé-yu cóhó sã ñi cuáha mee-ni dñhúⁿ cuááⁿ, ndihí cóhó sã ñi cuáha mee-ni dñhúⁿ cuixíⁿ, te nchaa cóhó-ãⁿ cúú-xi dàtná cue ñáyiú ñá túú ñã cúmání núú Yá Ndiöxí. Te ndècu ndihí tucú-yu cóhó sã ñi cuáha mee-ni ñùhu, ndihí cóhó sã ñi cuáha mee-ni yùtnu, te nchaa cóhó-ãⁿ cúú-xi dàtná cue ñáyiú ñá túú quide ndáá núú Yá Ndiöxí.

21 Te nchaa ñáyiú ío ndècu yíñuhu núú Yá Ndiöxí cúú-yu ñáyiú ñá túú ñihí tnáhá ndihí cue ñáyiú ñá túú quide ndáá núú-gã, te cue ñáyiú ndècu yíñuhu núú-gã-áⁿ ñà túú tnáhí quée cáva-yu quidé-yu nchaa chiúⁿ tahu-gá.

22 Te ío cada cuendá-n vã cádá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gã, te cuu iní-n nchàa tnaha ñáyiú-n, te cundecu nahi-n, chi ducaⁿ tàú-xi cada-n ndihí nchaa dava-gá ñáyiú sa ní nduu ndoo ní nduu nine iní-xi ñáyiú càháⁿ ndihí ñaha xii Yá Ndiöxí.

23 Te vá cádá cuendá-n ni ìⁿ tnúhu xítnàha ñáyiú chi ñá túú vèdana nàndihí-xi, chi núu na càda cuendá-ó te dícó dánáá ñáhá-xí.

24 Chi nchaa cue téé xinu cuechi núú Yá Ndiöxí xini ñùhu-xi càháⁿ váha-güedé ndihí nchaa ñáyiú, te danèhé ñáhá vãha-güedé tnúhu-gá, te cunduu càhnu iní-güedé te vá nàá-güedé.

25 Te vii vii càháⁿ-güedé dóho nchaa ñáyiú sàá iní-xi, ñáyiú ñá túú tnáhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndècú-yu te quindáá iní-yu tnúhu-gá.

26 Te ducaⁿ te cutnùnì iní-yu sá sàcuíhna cùnù-xi taxi tnunì ñáhá-xí xii-yu, chi dàcahu iní ñáhá-xí xii-yu quidé-yu nchaa nàcuáa cùu iní-xi ni cùu.

3

Nàcuáa cada ñáyiú òré sa ta cùyatni sáá nduu quixi tucu Xítohó Jesucristú

1 Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítohó Jesucristú, chi dàvá-áⁿ ío cada úhú-xi.

2 Chi ngüíta ñáyiú cuhuⁿ iní-yu mee-ni sã cúú-xi mèé-yu, te cuhuⁿ iní-yu mee-ni dñhúⁿ, te ío cada càhnú-yu mèé-yu, te cunduu yíchí iní-yu, te càháⁿ cuèhé-yu cuendá Yá Ndiöxí, te vá quindáá-gá iní-yu ni tãtã-yu ni ñãñã-yu, te ni vã ndacáⁿ táhú núú tnáhã-yu cuendá nchaa sá vãha cada tnáhá-yu, te cadá-yu mee-ni sã ñà túú tnáhá iní Yá Ndiöxí.

3 Te vá cúú iní tnáhá ndì meé-yu, te nàá-yu te vá cuánàá-yu, te tee tnáhá-yu cuèchi neñúú, te vá cuánàá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnáhá iní-yu nchaa sá vãha.

4 Te dayuhu cuáha cuendá tnáhã-yu núú cuè téé cùchiuⁿ, te ío cunduu yí iní-yu cadá-yu nándi sá ñà túú vãha, te ío cada nínu-yu mèé-yu, te mee-ni nchàa sá cúdí iní-yu cadá-yu, te vá cúdí iní-yu nanducu ñihnú-yu Yá Ndiöxí.

5 Te quesàhá-yu sá tnáhá-yu ndècú-yu ichi Yá Ndiöxí dico vá cádá-yu nchaa nàcuáa càháⁿ-gá.

Te yúhú càchí tnúhu-í xii-n sã vã ñihí tnáhá-n ndihí nchaa ñáyiú ducaⁿ quide.

6 Te dava ñáyiú-án quíhíⁿ-yu dava vehe núú xíndecu ñáyiú, te ngüíta-yu dandáhú-yu ñáyiú dñhí ñá túú xini dana cuendá Yá Ndiöxí, te ñáyiú dñhí-án cúú-yu ñáyiú ndècu vihi cuèchi-xi, chi ío cùdí iní-yu

quidé-yu nchaa náni sá cuèhé sá dúhá sàni iní-yu.

⁷ Te cuèi ío dàcuahá-yu, dico ñá túú cùtnuní iní-yu nása cuáháⁿ tnúhu ndáá tnúhu Yá Ndiöxí.

⁸ Te ñáyiú ducaⁿ dándahú ñáhá xii cue ñáyiú ðíhí-áⁿ ñà túú càháⁿ váha-yu cuendá tnúhu Yá Ndiöxí, chi quidé-yu dàtná ní quide ndíi Jánés ndíhi ndíi Jámbrés chi cue ndíi-áⁿ ñà túú ní cùu váha iní cue ndíi núú ndíi Moisés cuendá tnúhu ní càháⁿ ndíi. Te ñáyiú-áⁿ cùu-yu ñáyiú sàni iní mee ñine-ni nchaa sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñá ndáá sá sàndáá iní ñáhá-yu xii-gá.

⁹ Dico vá ndácú-gã-yu dandàhú-yu vài ñáyiú, chi nchaa ñáyiú cutnùní iní-yu sá ïo ñi ðiquí-yu, te ñá túú càháⁿ ndáá-yu dàtná ní quide cue téé úú ñá túú ní tnàhá iní tnúhu ní càháⁿ ndíi Moisés.

Té Pãblú dásàhú-dé té Timùteú

¹⁰ Te yòhó quidé-n nchàa nacuáa ní dánèhé ñáhá-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíú-a, te xiní-n sá ïo sàndáá iní-í Yá Ndiöxí, te ío càhnu iní-í, te cùu iní-í nchaa ñáyiú, te xiní tucu-n sá ïo quide cahnu iní-í cuèi nándi sá yáha-í ndécù-í dico ñá túú ðaña ndeé-í ichi-gá.

¹¹ Te ío vài sá quidé ñàha ñáyiú xii-í dándòho ñahá-yu sá ndécù-í ichi Xítohó Jesucristú, te sa nàha tucu-n datná ní quide ñahá-yu xii-í cùtnàhá ní xindecu-í ñuú Antiòquia, ndíhi ñuú Ìconiú, ndíhi ñuú Lìstrá, chi ío ní dándóhó ñahá-yu xii-í sá cuendá-gá. Dico Xítohó Jesucristú ío ní xito ñaha-gã xii-í te ní chindee ñaha-gá cuèi nándi cùu sá ñi yáha-í.

¹² Te na càchí tnúhu ndáá-í xii-n sá ïo vài sá ñà túú váha cada ñaha ñáyiú xii nchaa ñáyiú cuení sá ñà túú ñà cumání núú Yá Ndiöxí cuendá sá ndécú ndíhi-yu Xítohó Jesucristú.

¹³ Dico dava ñáyiú càchí-yu sá càháⁿ-yu tnúhu Yá Ndiöxí te ñá ndáá sá càháⁿ-yu tnúhu-gá, ñáyiú-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandàhú tnáhá-yu.

¹⁴ Te yòhó chi ío váha ní sàndáá iní-n tnúhu Yá Ndiöxí sá dàcuàha-n, te vitna

càháⁿ-í dóho-n sá vã ðaña ndeé-n quindáá iní-n tnúhu-áⁿ, te yòhó sa nàha-n ná cúú ñáyiú ní dánèhé ñáhá xii-n tnúhu-gá.

¹⁵ Te yòhó chi ndeé cùtnàhá cúú làndú-n ñi ngüíta-n dàcuaha-n tnúhu ndeé núú tùtú Yá Ndiöxí, te ðiu-ni nchaa tnúhu-gá canu ichi ñaha-xi xii-n te naníhí tàhú-n, chi sàndáá iní-n Xítohó Jesucristú.

¹⁶ Te nchaa cue téé ní tee tnúhu Yá Ndiöxí, chi ðiu-ni mee-gã ní dácáhu iní ñáhá-gã xii-güedé nàcuáa tee-güedé, te tnúhu-gá ío váha dacuàha-o nchaa dava-gã ñáyiú, te càháⁿ-xi dóho-o sá vã cùndecu-gá-ó ichi cuehé ichi duha, te núú ñá túú quide ndáá-ó ndecu-o te nàcanu ichi ñaha-xi, te dènehé ñáhá-xi nàcuáa cada-o cùndáá-ó núú Yá Ndiöxí.

¹⁷ Te ðiu-ni tnúhu-gá dátüha ñaha váha-xi xii nchoo cuè ñáyiú ndecu ndíhi-gá cuendá cada-o nchàa núú sá váha.

4

¹ Te Xítohó Jesucristú quixi-gá taxi tnùní-gá ñuyíú-a, te cada ndáá-gá cuèchi nchaa ñáyiú sa ní xihí, ndíhi cuèchi nchaa ñáyiú xindecu vïvú. Te mee-gã ndíhi Yá Ndiöxí náhá-gã sá ïo càháⁿ-í dóho-n vitna

² sá ïo dacuàha-n ñáyiú tnúhu-gá, te vá ðaña ndeé-n dàcuahá-n-yu ndeéda-ni càa oré cuèi ñá túú cuení-yu cundedóho-yu, te nchaa ñáyiú ñá túú cuení cada ndáá cúñaha ndáá-n nchàa nacuáa quidé-yu. Te cúñaha tùcu-n xií-yu sá vã dúcáⁿ-gã cada-yu, te càháⁿ-n dóho-yu cuendá cada ndáá-yu cundecú-yu. Te ío cunduu càhnu iní-n òré càháⁿ-n dóho-yu, te ío dacuàhá-n-yu tnúhu-gá.

³ Chi sáá nduu te vá càchí-gá-yu cundedóho-yu nchaa tnúhu sá sánú ichi ñaha cundecu váha-o núú Yá Ndiöxí, chi mee-ñá nchaa sá cúðí iní mée-yu cundedóho-yu, te ndúcú-yu cue téé danèhé ñáhá xii-yu nchaa tnúhu cùu iní-yu-áⁿ.

⁴ Te vá cáda cuendá tnàhí-gá-yu tnúhu ndáá tnúhu Yá Ndiöxí, chi mee-ñá tnúhu sá ñà túú nàndíhi cada cuendá-yu.

⁵ Dico yòhó ío quíhi iní-n cùndecu-n, te cahni iní-n cuèi nándi na ndòho-n, te dacuàha-ni-n ñáyiú tnúhu Yá Ndiöxí, ñáyiú vátá quindáá iní ñáhá-gã xii-gá, te cada-ni-n nchàa chiuⁿ ní táhú-gã cada-n.

⁶ Te yúhú sa ñùhu ichi-ná-í quíhíⁿ-í núú ndécú Yă Ndiöxí cundecu-í, chí sa ní cuyatni cahni ñaha-güedě xii-í cuendá sá xínú cuèchi-í núú-gă.

⁷ Te ní quide-í nchaa chiuⁿ ní táhú Yă Ndiöxí cada-í te vitna ní xínu cava nchaa chiuⁿ ní táhú-gă-áⁿ ñí quide-í, te ñá túú ní dàña ndeé-í ní sándáá iní-í-gă, te ducaⁿ-ni sándáá iní-í-gă ndeé vitna.

⁸ Te vitna sa ndècu túha-ná sá ndúú tǎhù-í cuendá sá quidè ndáá-í núú Yă Ndiöxí, te Xítohó Jesucristú taxi-gă táhú-ǎⁿ nduu táhù-í ná sáá nduu, chí cùu-gă ìⁿ Yaá quidè ndáá cuiti, te ñá díú-ní yúhú taxi-gă táhú-ǎⁿ cuu cuendá-í, chí tnàhá nchaa ñáyiu ndètu cahnu-ná sáá nduu quixi tucu-gă ñuyú-a cuáñaha-gă táhú-ǎⁿ nduu táhù-yu.

Chiuⁿ tahu té Păblú cada té Timùteú

⁹ Te cuñí-í sá ïo ndìhi quixi-n quixi coto ñaha-n xii-í.

¹⁰ Chí té Dëmás ñá túú-gă quidè cuendá ñáhá-dě xii-í, chí mee-nă nchaa sá ïo ñuyú-a ïo cùdí iní-dé. Te ní dándõo ñaha-dě cuáháⁿ-dé ñúú Tesalónica, te té Crèscenté cuáháⁿ-dé cundecu-dé distritú Gálaciá, te té Títú cuáháⁿ-dé cundecu-dé distritú Dàlmaciá.

¹¹ Te ìⁿ dli-ná té Lùcá ndécú ndìhi ñaha-dé xii-í, te cúñaha-n xii té Măcú quixi-n ndìhi-dé, chí téé-áⁿ ndacu-dé cada-dé ìⁿ chiuⁿ-í.

¹² Te té Tìquicú ní tendaha-ï-dé cuáháⁿ-dé ñúú Éfesú.

¹³ Te òré quixi-n te yáha-n vèhe té Càrpú cáá ñúú Tròás canehe-n ìⁿ dóó tǎcachi ní dándõo-í vehe-dé quixi, ndìhi nchaa librú-í, te tnàhá nchaa dava-gă tutú-í ndécú vèhe-dé canehe-n quixi chí xíáⁿ ïo-gă xíní ñùhu-í.

¹⁴ Te té Lìjandrú téé cùu rerú ïo vai sá ñá túú vǎha ní cuu quide ñaha-dé xii-í, dico mee Yă Ndiöxí náhá-gă nása cada ñaha-gă xii-dé cuendá sá dúcáⁿ quide-dé.

¹⁵ Te vá ñihí tnàhá-n ndìhi-dé chí ïo càháⁿ cuèhé-dé cuendá nchaa tnúhu càháⁿ-ó.

¹⁶ Te cútnàhá ndécá ñaha-güedé xii-í ní sáháⁿ núú cuè téé cùchiuⁿ xito díhna nuu, chí mee dìi ní sáháⁿ te ñá túú ní sáháⁿ ni ìⁿ cue téé cùndìhi-í, chí nchaa-güedé ní dándõo ñaha-güedě xii-í, te yúhú xicáⁿ táhù-í núú

Yă Ndiöxí sá vǎ cadá cuendá-gă sá dúcáⁿ ñí quide-güedé.

¹⁷ Dico Xítohó Jesucristú ní chindee ñaha-gă xii-í, chí ní taxi-gă tnúhu ndee iní ní cáháⁿ-í tnúhu-gă năcuáa tàú-xi cunduu núú cuè téé-áⁿ ndìhi núú nchaa ñáyiu, dico ñá díú ñáyiu isràél cùu-yu, te diu-gă ní dácăcu nihnu ñaha-gă xii-í ñá túú ní sàhni ñaha-güedé.

¹⁸ Te mee Xítohó Jesucristú coto ñaha-gă xii-í te ñá túú nă cuu cuèi nándi sá ná cadá ñaha ñáyiu xii-í te diu-ni-gă coto ñaha-gă xii-í ndeé ná sáá nduu sáá-í andiu núú ndécú-gă táxi tnùn-í-gă. Te nchaa-o chí ná càhí-ó sǎ ïo càhnu cuu-gă ni caa ni quíhíⁿ. Te ducaⁿ na cùnduu.

Tnúhu ndeé núú ñí ndìhi-ná

¹⁹ Te ïo cúñaha-n na cada ndee iní tá Priscá, ndìhi té Àquilú, ndìhi cue ñáyiu cùu ndi mee té Onèsiforó.

²⁰ Te té Èrastú ní quendóo-dé ñúú Còrintú, te té Tröfimú ní dándõo-í-dé ñúú Miletú chí cùhú-dé.

²¹ Te ïo cundìhí iní-n quixi-n oré vátá sáá-gă yóó quidè vǐxiⁿ-xi. Te ïo cada ndee iní-n càhí té Èúbulú, ndìhi té Pùdenté, ndìhi té Lǐnú, ndìhi tá Claudiá, ndìhi nchaa dava-gă ñáyiu sándáá iní tnúhu Xítohó Jesucristú.

²² Te xicáⁿ táhù-í núú Xítohó Jesucristú sá ná cùndecu ndìhi ñaha-gă xii-n ndìhi nchaa dava-gă-yu. Te ducaⁿ ïo na chindee chitúu ñaha-gă xii-ndo nchaa-ndo. Te ducaⁿ na cùnduu. Te ïo chí cadá ndèe iní-nă vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ TÌTÚ

Té Păblú cădũha-dé tutú quihíⁿ ndaha té Títú

¹ Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í cãháⁿ-í tnúhu Xítóhó Jesucristú núú ñáyiu cuendá quíndáá iní nchaa ñáyiu ní cachí Yă Ndiöxí naníhí tãhú, ndíhi cuendá sá təcú tnúní váha-yu tnúhu-gá, te ñáyiu na quíndáá iní tnúhu-gá cada ndáá-yu cundecú-yu ichi-gá.

² Te yúhú dácuaaha-í-yu tnúhu-gá cuendá cundecu ndíhí-yu tnúhu ndee iní sá cundecu ndíhí-yu Yă Ndiöxí ní caa ní quihíⁿ, chi ndéé cúnahá vátá ngãva-gá ñuyú-a ní cachí-gá sá cundecu ndíhi ñaha-gá xii-yu, te ñá túú dándahú ñáhá-gã, chi quide-gá ìⁿ sá cãháⁿ-gá.

³ Te ní sáá nduu ní cachí-gá sá nihí-yu tnúhu nãcuáa cuáháⁿ tnúhu-gá, te diu-ni tnúhu-áⁿ ní cachí Yă Ndiöxí Yaá dácacu nihnu ñaha xii-o núú ùhú núú ndàhú sá dácuaaha-í ñáyiu.

⁴ Te tutú-a cadúha-í cuendá daquixi-í ndaha yòhó té Títú, té ní sanu ichi ndisa-í ichi Xítóhó Jesucristú, chi ìⁿ-ni tnúhu sãndáá iní-ó. Te xicáⁿ tãhú-í núú Tãtá-ó Dútú Ndiöxí sá ìo na chindee chitúu ñaha-gã xii-n, te diu-ni-gá ná cada te ìo váha cuu iní-n cundecu-n. Te xicáⁿ tãhú tucu-í núú Xítóhó Jesucristú Yaá dácacu nihnu ñaha xii-o núú ùhú núú ndàhú sá díú-ní ducaⁿ na cada ñaha-gá xii-n.

Chìuⁿ quide té Títú distritú Crětá

⁵ Te yúhú ní dándõo ñaha-í xii-n distritú Crětá, chi cuiní-í cada-n nchaa chiuⁿ cumání, te cuiní-í taxi ndecu-n cuè téé quíndaha ñaha xii cue ñáyiu sãndáá iní tnúhu Yă Ndiöxí xíndecu ìⁿ ìⁿ ñuú yíndèhu distritú-áⁿ, te cada-n nãcuáa ní cachí-í cada-n.

⁶ Te cue téé cada chìuⁿ-áⁿ xíní ñuhu-xi cuu-güedé mee-ni cuè téé ìo váha quide ndáá nãcuáa vá yõ cãháⁿ dóho-güedé, te na

cùu-güedé cue téé ndècu ìⁿ dii-ni ñadihí-xi. Te ducaⁿ nchaa landú-güedé ná cùu-güexi landú sãndáá iní ñáhá xii Yă Ndiöxí cuendá sá vá yõ cuatnuñaha xii-güexi quesahá-yu sá ìo sáá iní-güexi te quide-güexi nãndí sá ñà túú tàú-güexi cada-güexi.

⁷ Chi xini ñuhu-xi sá ncháá cuè téé quíndaha ñaha xii ñáyiu sãndáá iní tnúhu Yă Ndiöxí ìo cundecu yíñuhu-güedé, chi ducaⁿ tàú-xi cada nchaa cue téé quide chiuⁿ Yă Ndiöxí, te xini ñuhu tucu-xi sá vá cúu-güedé cue téé ñí iní-xi, te ní vá cúu-güedé cue téé lĩhli iní-xi, te ní vá cúu-güedé cue téé quihu, te ní vá cúu-güedé cue téé plètú, te ní vá cúu-güedé cue téé dicó-ni ducaⁿ ñíhí díhúⁿ.

⁸ Te xini ñuhu-xi cuu-güedé cue téé sãñaha nùu vehe ndetatú cue ñáyiu ñuhu ichi, cue téé quide váha sá cúu-xi tnàha ñáyiu-xi, cue téé ìo váha cùnuni iní-xi nãcuáa cada cundecu ñuyú-a, cue téé quide ndáá xíndecu, cue téé quide nchaa nãcuáa ndùu vétú iní Yă Ndiöxí, cue téé xito mee-xi ñá túú quide cutexínu.

⁹ Te na cùu-güedé cue téé ìo váha sãndáá iní tnúhu váha tnúhu Yă Ndiöxí sá ní dãnèhé ñáhá-í xii-ndo cuendá ducaⁿ te cue téé-áⁿ ndacu-güedé cãháⁿ-güedé dóho ñáyiu cuendá cadá-yu nchaa nãcuáa cãháⁿ Yă Ndiöxí, te nihí-güedé tnúhu cãháⁿ váha-güedé núú nchaa ñáyiu dàquee tíhú tnúhu Yă Ndiöxí, te mee-ni cuè téé ducaⁿ quide váha taxi ndecu-n quíndaha-güedé ñáyiu sãndáá iní tnúhu-gá.

¹⁰ Te na cãhí tnúhu-í xii-n sã vái ñáyiu sáá iní-xi ìo, te cãháⁿ-yu mee-ni tnúhu sá ñà túú nãndíhi, te dándahú-yu tnàhá ñáyiu-yu, te ñáyiu isràèl ìo-gá vãi-yu ducaⁿ xíquide.

¹¹ Te nchaa ñáyiu ducaⁿ xíquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dãnèhé-yu dava-gá ñáyiu ìⁿ sá ñà túú tàú-yu dacuahá-yu, te ducaⁿ quidé-yu cuendá-ni sá nihí-yu díhúⁿ, te ìo títní xichi ní cuu dándahú-yu nchaa ñáyiu xíndecu ìⁿ-ni vèhe.

¹² Te ní cachí ìⁿ téé ìo váha sáá díquí-xi ndècu mei ñuú distritú Crětá sá ncháá ñáyiu ñuú-dé-áⁿ ìo ndèhndé-yu, te ìo cuihna iní-yu, te ìo vãi xexí-yu, te cùhndú-yu.

¹³ Te ndáá ní cãháⁿ-dé chi ducaⁿ quidé-yu, te xíãⁿ ìo cãháⁿ-n dóho-yu cuendá sá ná

quìndáá váha iní-yu tnúhu Yá Ndiöxí.

¹⁴ Te cúñaha-n xii-yu sá vǎ cáda cuendá-yu nchaa tnúhu ndehnde cǎháⁿ ñáyiú isrǎél, te ni vǎ cáda cuendá-yu nchaa tnúhu cǎháⁿ ñáyiú ñá túú cuení quìndáá iní tnúhu Yá Ndiöxí.

¹⁵ Te nchaa sá ñí cadúha Yá Ndiöxí ío ñuyíú-a cùu-xi mee nine-ni sá vǎha sá cúú-xí nchaa ñáyiú sa ní nduu ndoo ní nduu nine iní-xi ndècu ichi Yá Ndiöxí, Dico nchaa sá ñí cadúha-gǎ ñá túú cùu-xi sá vǎha sá cúú-xí nchaa ñáyiú ndècu ichi cuehé ichi duha, chi ñá túú sǎndáá iní-yu tnúhu-gǎ, chi mee-ni sǎ cuèhé sá dúhá ñúhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu.

¹⁶ Te cǎchí-yu sá sǎndáá iní-yu Yá Ndiöxí, dico nchaa sá quidè-yu-áⁿ cǎchí tnùní-xi sá ñǎ ndáá. Te Yá Ndiöxí chi duuⁿ duuⁿ ñá túú tnàhá iní-gǎ nchaa nàcuáa quidè-yu, chi ío sǎá iní-yu, te ñá túú quidè-yu ni ìⁿ sá vǎha.

2

Tnúhu váha tnúhu Yá Ndiöxí

¹ Te yòhó òré dánèhé-n ñáyiú, te danèhé-n-yu mee-ni nàcuáa cǎháⁿ tnúhu váha tnúhu Yá Ndiöxí.

² Te nchaa cue téé cùu sacuéhé ná càda cuendá-güedé vǎ cáda cùtexínu-güedé cundecu-güedé, te na cùndecu yiñuhu-güedé, te na cuǎha váha-güedé cuendá nàcuáa cada-güedé cundecu-güedé, te na quìndáá váha iní-güedé Yǎ Ndiöxí, te na cùu iní-güedé tnàha ñáyiú-güedé, te na cùnduu cahnu iní-güedé cuèi nándi sá ná yǎha-güedé.

³ Te vitna cǎháⁿ tucu-í sá cúú-xí nchaa ñáyiú dìhí ñáyiú cùu sacuéhé sǎ ná cùndecu yiñuhú-yu, te vǎ cúú-yu ñáyiú yiti yùhu-xi, te ni vǎ cúú-yu ñáyiú quihu, te na dànèhé-yu nchaa dava-gǎ ñáyiú cada váha-yu.

⁴ Te na dǎsahú-yu nchaa ñáyiú dìhí ñáyiú cuechi cuendá ná cùu iní-yu yí-yu, ndihi cue landú-yu,

⁵ ndihi cuendá sá ná cǎni váha iní-yu nàcuáa cundecú-yu, ndihi cuendá sá vǎ cǎní iní-yu cadá-yu ni ìⁿ sá cuèhé sá dúhá, ndihi cuendá sá ná càdá-yu nchaa chiuⁿ ñúhu vehé-yu, ndihi cuendá sá cáda vǎha-yu nchaa tnàha ñáyiú-yu, ndihi cuendá sá

ná cáda-yu nchaa nàcuáa cǎháⁿ yí-yu, te ducaⁿ xini ñúhu-xi cadá-yu cuendá sá vǎ yò cǎháⁿ cuèhé cuendá tnúhu Yá Ndiöxí. Duha cúñaha-n xii cue ñáyiú dìhí ñáyiú cùu sacuéhé cuendá ducaⁿ dǎsahú-yu nchaa ñáyiú dìhí ñáyiú cuechi.

⁶ Te yòhó cǎháⁿ-n dǎho nchaa cue téé cuechi cuendá sá ná cǎni váha iní-güedé nàcuáa cundecu-güedé,

⁷ te cada-n mèe-ni sá vǎha cuendá ducaⁿ cǎnchicúⁿ nihnu-güedé cada-güedé, te òré danèhé-n-güedé te ío váha cuu iní-n dànèhé-n-güedé, te ndihi tnúhu yiñuhu cǎháⁿ ndihi-n-güedé.

⁸ Te cǎháⁿ-n mèe-ni tnúhu váha, te ducaⁿ te vǎ yò ìⁿ cǎháⁿ cuèhé cuendá tnúhu cǎháⁿ-n, te nchaa ñáyiú cùu úhú iní ñáhá xii-o cucahaⁿ núú-yu, te vǎ nihí-yu tnúhu cǎháⁿ cuèhé-yu cuendá-ó.

⁹ Te ío cǎháⁿ-n dǎho nchaa cue téé xinu cuechi sá ná quìndáá iní-güedé cada-güedé nchaa chiuⁿ tahu patróoⁿ-güedé nàcuáa cudüu-güedé núú cuè téé-áⁿ, te vǎ cǎháⁿ sǎá iní-güedé.

¹⁰ Te vǎ cǎní iní-güedé duhu-güedé, te cada ndáá-güedé cuendá sá ñá túú ñǎ cani iní ñáhá cuè patróoⁿ-güedé, te ducaⁿ te cutnùní iní ñáyiú sá tnúhu Yá Ndiöxí ío váha dànèhé ñáhá-xi nàcuáa cada-o cùndecu-o, te diu-gǎ cúú-gǎ Yaá dǎcǎcu nihnu ñaha xii-o núú úhú núú ndáhú.

¹¹ Te nchoo ñí cutnùní iní-ó sǎ Yǎ Ndiöxí ío cùndahú iní-gǎ nchaa nchoo ñáyiú ndècu ñuyíú-a, te ní taxi-gǎ tnúhu ndee iní sá nánihí tàhú nchaandi túhú ñáyiú te núu na quìndáá iní ñáhá-yu xii-gǎ.

¹² Te ní cǎchí-gǎ sá dǎñá-ó nchaa ichi cuehé ichi duha chi ñá tnàhá iní-gǎ cundecu-o ìchi-áⁿ, te vǎ ío cuhuⁿ iní-ó nchaa sá ío ñuyíú-a, te ní cǎchí tucu-gǎ sá ío cani iní-ó nàcuáa cundecu-o vitna ndecu-o ñuyíú-a te cada ndáá-ó cùndecu-o cuendá nduu vétú iní-gǎ.

¹³ Te cundetú-o sǎá nduu cǎhnu vihi, nduu quixi tucu Xítohó Jesucristú Yaá cúú Ndiöxí-ó, te diu-gǎ ní dǎcǎcu nihnu ñaha-gǎ xii-o núú úhú núú ndáhú. Te nduu-ǎⁿ ío cudíí iní-ó.

¹⁴ Te mee-gǎ ní xihí-gǎ chi ducaⁿ ñí cuení-gǎ cunduu, te ducaⁿ ñí quide-gǎ cuendá nchoo vǎ cùndècu-gǎ-ó ìchi cuehé

ichi duha, te nduu ndoo nduu nine iní-ó, te ducaⁿ te cuu-o cuè ñáyu quindaha-gã, te ni yùhu ni iní-ó càda-o mee-ni sá vãha.

15 Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cáháⁿ-n dôho-yu te núu ñá túu quide ndáá-yu. Te cada-n sã cúu-n ìⁿ téé xinu cuechi núú Yá Ndióxí, te vá dáñá-n mèe-n daquee tíhú ñáhá ñáyu xii-n.

3

Nchaa sá tàú ñáyu ndècu ichi Yá Ndióxí cadá-yu

1 Te cúñaha-n xii-yu sá ná quindáa iní-yu cadá-yu nchaa nàcuáa càháⁿ nchaa cue téé cùchiuⁿ, te tàú-yu chindee ñáhá-yu xii-güedé nchaa chiúⁿ váha quide-güedé.

2 Te vá càháⁿ cuèhé-yu cuendá ñáyu, te vá cündüu pletú-yu, te na cùu-yu ñáyu ndàhú iní-xi, te na cündahú iní-yu nchaa tnàha ñáyu-yu.

3 Te tnàhá-ó ñi xóo cada-o dàtná quidé ñáyu-áⁿ vitna, chi ío ñi ñáquí-ó chi ñá tècú tnùní-ó nàcuáa càháⁿ tnúhu Yá Ndióxí ní cùu, te ío ní xínduu sáa iní-ó núu-gã, te ní xíndecu-o ìⁿ ichi sá ñà túu tàú-ó cündecu-o ni cuu, te nándi sá cuèhé sá dúhá ío ñuyíú-a ní xóo cudíí iní-ó ñi xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o ìchi cuedú iní, te cuendá nchaa sá ñi xóo cada-o-ãⁿ xiáⁿ ío ní xóo cuu úhú iní ñáhá ñáyu xii-o, te ducaⁿ-ni nchòo tucu ní xóo cuu úhú iní-ó-yu.

4 Te Yá Ndióxí Yaá ní dácãcu nihnu ñaha xii-o núu ùhú núu ndàhú ní dándixí túu-gã iní-ó nàcuáa cutnùní iní-ó sã ío váha iní-gã, te cùu iní ñáhá-gã xii nchaa nchoo ñáyu ndècu ñuyíú-a.

5 Te Yá Ndióxí ní dácãcu nihnu ñaha-gã xii-o núu ùhú núu ndàhú, dico ñá díú cuendá ìⁿ sá vãha quide-o ndecu-o ñuyíú-a ducaⁿ ñi quide-gã, chi mee-gã ducaⁿ tnàhí ní cündahú iní ñáhá-gã xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyu saa, chi Espíritú Yá Ndióxí ducaⁿ ñi quide ñaha-xi xii-o.

6 Te Espíritú-gã ní taxi-gã ñi yùhu ñi iní-gã ndécú ndíhi-o, te ducaⁿ ñi quide-gã chi ní

sándáa iní-ó Xítohó Jesucrístú Yaá ní dácãcu nihnu ñaha xii-o núu ùhú núu ndàhú.

7 Te ío cündahú iní ñáhá-gã xii-o núu sa ní quide ndáa-gã cuèchi-o te ní cuu-o ðehe-gã, núu xiáⁿ vitna ndètu-ná-ó sáa nduu ndüu táhú-ó cündecu-o ndíhi-gã ñi caa ñi quíhíⁿ.

8 Te tnúhu ní cáháⁿ-í-a cùu-xi tnúhu ndáa cuíti, te cuíní-í sá ñi yuhu ñi iní-n càháⁿ-n tnúhu-gã núu-yu cuendá sá ncháa ñáyu sándáa iní ñáhá xii Yá Ndióxí nducu ndèé-yu cadá-yu mee-ni sã vãha, te tnúhu-áⁿ cúu-xí mèe-ni tnúhu váha, te ío váha sá cúu-xí-yu.

9 Te vá cadá cuendá-n ncháa tnúhu sá ñà túu nándíhi xítnàha ñáyu, te vá cadá cuendá-n ñáyu nándi càháⁿ cuendá nchaa sá ñi xóo cada cue ñáyu ní xíndecu ndéé sanaha, te vá cadá cuendá-n ncháa tnúhu xítnàha ñáyu xícuèhé tnàhá cuendá tnúhu ní chídó tnùní ndíi Moisés, chi nchaa tnúhu xítnàhá-yu-áⁿ ñà túu tnàhí nándíhi-xi, te dàcuíta ñaha-xi xii-o.

10 Te núu ío ñáyu ní ngúíta-yu nándi tnúhu càháⁿ-yu cuendá sá vã cúu ìⁿnuu cue ñáyu ndècu ichi Yá Ndióxí ñá, te ñáyu-áⁿ càháⁿ sàhú-n dôho-yu ìⁿ úú xito, te núu vá tníⁿ-yu tnúhu càháⁿ-n ñá, te vá ñihí tnàhá-gã-n ndíhi-yu.

11 Te ducaⁿ càda-n, chi ñáyu-áⁿ duuⁿ duuⁿ ñá túu-gã cuíní-yu cadá-yu sá vãha, chi mee-nã sá cuèhé sá dúhá tnàhá iní-yu cadá-yu, te cùtnuní iní mèe-yu sá ñà túu quide ndáa-yu, te sáa nduu te nacháhu-yu nchaa sá quidé-yu.

Nàcuáa cada té Titú

12 Te cuíní-í tendaha-í té Artemás quixi-dé núu ndécú-n àdi té Tiquicú, te òré ná quèxio ndéda-ni càa ìⁿ cue téé-a núu ndécú-n, te ío nducu ndèe-n quíhíⁿ-n ñúú Nìcópolis núu quíhíⁿ-í cundecu-í, chi yacáⁿ cuíní-í quíhíⁿ-í cundecu-í yóo quidé víxiⁿ-xi.

13 Te ío cuáñaha-n ncháa sá xíní ñùhu té Zénás téé ío váha xíní nchaa nàcuáa càháⁿ lèí, ndíhi té Àpolós cuendá sá ñà túu ñà cumání xii-güedé ichi.

14 Te cuíní-í sá ncháa ñáyu ndècu ndíhi-o ichi Yá Ndióxí cada váha-yu, te cuáñahá-yu ìⁿ sá xíní ñùhu ñáyu, te ío váha chiúⁿ cadá-yu te núu ducaⁿ na càdá-yu.

Tnúhu ndée núú nǐ ndihí-ná

¹⁵ Te vitna ío cada ndee iní-n cǎchí nchaa ñáyiú ndècu ndihí-í iha, te cúñaha-n sǎ ío na cǎda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiǒxí. Te Yá Ndiǒxí ío na chìndee chitúu ñaha-gǎ xii-ndo nchàa-ndo. Te ñucaⁿ na cùnduu. Te ío chí cǎdá ndèe iní-nǎ vitna.

TUTÚ NÍ CADÚHA TÉ PĀBLÚ QUIHÍⁿ NDAHA TÉ FILEMÓN

*Té Pāblú cādūha-dé tutú quíhíⁿ ndaha té
Filémón*

¹ Te yúhú té Pāblú téee yìhi vecaá sá cuendá Xítohó Jesucristú cādūha-í ìⁿ tutú ndihí té Timùteú cuendá daquixi-í ndaha yòhó té Filémón, te ío cùu iní ñáhà-í xii-n chi tñàhá-n quide-n chiuⁿ Yá Ndiòxí. Te tutú-a tëndaha-í quixi ndaha-n

² ndihí ndaha ñaha nàni Apiá ñaha ndècu ndihí-o ichi Xítohó Jesucristú, ndihí ndaha té Àrquipú, chi tñàhá-dé quidé-dě chiuⁿ Yá Ndiòxí, ndihí ndaha nchaa ñáyiú tàcá vehe-n dàcuahá-yu tñúhu-gá.

³ Te xicáⁿ táhù-í núú Tātá-ó Dütú Ndiòxí ndihí núú Xítohó Jesucristú sá ìo na chindee chitúu ñaha-gã xii-ndo, te ducaⁿ ndè nduú-gá ná cādá te ío váha cuu iní-ndó cùndecu-ndo.

*Té Filémón ío sàndáá iní-dé Xítohó Jesu-
cristú te cùu iní-dé tñàha ñáyiú-dé*

⁴ Te ndi tñahá òré càháⁿ ndihí-í Yá Ndiòxí cuendá-n ndàcáⁿ táhù-í núú-gã.

⁵ Chi nihí-í tñúhu sá ìo sàndáá iní-n Xítohó Jesucristú, te cùu iní-n cuè ñáyiú ndècu ichi-gá.

⁶ Te xicáⁿ táhù-í núú Yá Ndiòxí sá dàtná-ni sàndáá iní-n-gã ducaⁿ-ni dànehé-n ñáyiú cuendá ducaⁿ ngũnu ichí-yu tñàhá-yu, te cutnùní iní-yu nàcuáa ndùu nchaa sá vǎha tàxi Xítohó Jesucristú xii-o, te tñàhá-yu nduu táhũ-yu nchaa sá vǎha-áⁿ.

⁷ Te yòhó té Filémón cúu-n tēe ndècu ndihí-í ichi Xítohó Jesucristú càchí tñúhu-í xii-n sǎ ìo cùdí iní-í cuendá sá ìo váha quide-n ndecu-n, chi cùu iní-n nchaa ñáyiú ndècu ichi Yá Ndiòxí, te uuⁿ-gá nihí ndéè-í sá dúcáⁿ quide-n, te diu-n ìo sáhǎ-n-yu tñúhu ndee iní ndécú ndihí-yu.

Té Pāblú chíndèe tñúhu-dé té Ònésimú

⁸ Te yúhú té Pāblú ní taxi Xítohó Jesu-
cristú tñúhu ndee iní ndécú ndihí-í sá táxi

tñúní ñáhà-í xii-n te tahu-í chiuⁿ cada-n, dico vá táxi tñúní ñáhà-í xii-n,

⁹ chi váha-gá sá càháⁿ ndàhú-í núú-n sǎ cādá-n nchaa nacuáa càháⁿ-í chi ío cùu iní ñáhà-í xii-n. Chi yúhú sa ta yì-í cuáháⁿ, te yìhi-í vecaá cuendá sá càháⁿ-í tñúhu Xítohó Jesucristú.

¹⁰ Te càháⁿ ndàhú-í núú-n sǎ ñà túú ñǎ cani iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tñúhu Yá Ndiòxí ní xáhaⁿ-í xii-dé vitna yìhi-í vecaá.

¹¹ Te nàha-n sá cùtnàhá ní xíndecu ndihí-n-dě ñǎ túú ní quide ndáá-dé, dico vitna ío váha quide-dé ndécú ndihí-í-dé, te diu-ni ducaⁿ càda-dé òré cundecu ndihí tucu-n-dě.

¹² Te vitna tendaha-í-dé ndixi-dé cun-
decu tucu-n ndihí-dé, te òré queheⁿ cuendá-n-dě, te cada iní-n sǎ yúhú ní queheⁿ cuendá-n.

¹³ Te vitna yìhi-í vecaá sá cuendá tñúhu Xítohó Jesucristú, te cuìní-í ngani-í-dé cunu cuechi-dě núú-í cuendá cada-dé núú-n ní cùu.

¹⁴ Dico ñǎ túú ní ngàni-í-dé, chi vátá ndátnùhu ndihí ñaha-gã-í xii-n nũu nása cachí-n cùnduu. Te ñǎ cùndèe iní-í cada yica-í cada-n ìⁿ sá vǎha sá cúu-xi-í, chi cuìní-í sá méé-n càni iní-n nũu cuu àdi sá vǎ cúu.

¹⁵ Te ní cunduu ñǎ quee té Ònésimú vehe-n, te cudana te mee Yá Ndiòxí ducaⁿ ñǎ cachí-gá cunduu cuendá dacuàha-dé cada váha-dé. Te ndixi tucu-dé cundecu ndihí ducaⁿ-nǎ-n-dě.

¹⁶ Te vá cúu-gã-dé dàtná ìⁿ tēe xínu cuechi chi ní cuu-dé dàtná ìⁿ ñaní-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uuⁿ-gá cuu iní-n-dě, chi cùu-dé ìⁿ tñàha ñáyiú-o, te ndècu-dé ichi Yá Ndiòxí.

¹⁷ Te ìⁿ-ni cùu-o ndecu-o ichi Yá Ndiòxí nũu xiǎⁿ càháⁿ ndàhú-í núú-n sǎ quéhéⁿ cuendá-n-dě dàtná quéhéⁿ cuendá-n yúhú òré quéxió-í vehe-n.

¹⁸ Te núu ío ìⁿ sá ñǎ cumání-dě núú-n ñǎ túú ní quide ndáá-dé cùtnàhá ní xíndecu-n ndihí-dé, àdi ío ìⁿ sá tàú-dé te vá ndàcáⁿ cuendá-n nũú-dě, chi yúhú ndacáⁿ cuendá-n nũú-í.

¹⁹ Te ndaha mee yúhú té Pāblú cādūha-í tutú-a càchí tñúhu-í xii-n sǎ ná chǎhu-í

nchaa sá nǐ quide-dé. Dico dandàcu saú iní-n sǎ yǎhú ní sanu ichi ñaha-í xii-n ichi Xítóhó Jesucristú.

²⁰ Dico yòhó té ndècu ndihí-í ichi Xítóhó Jesucristú cada ndee iní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuáa cuu-xi dàtná ìⁿ tnúhu ndee iní sá cúú-xì-í, chi ndi ndùú-ó ndècu-o ichi-gá.

²¹ Te cùtnuní iní-í sá cádá-n nchàa nacuáa càháⁿ-í, te cùtnuní tucu iní-í sá ìo-gá vǎi sá vǎha cada-n dàcúúxí tnúhu ndàhú càháⁿ-í núú-n, núu xǎⁿ tëndaha-í tutú-a véxi ndaha-n.

²² Te vitna cuìní-í cada túha-n ìⁿ vehe cundecu-í, chi sǎni iní-í sá quíxí còto ñaha-í xii-ndo, te ndètu-í sáá nduu-ǎⁿ chi nchòhó xìcáⁿ táhú-ndó núú Yǎ Ndiòxí cuèndá-í.

Tnúhu ndée núú nǐ ndihí-ná

²³ Te ío cada ndee iní-n càchí té Ēpafrás té yǎhi ndihí-í vecaá sá cuèndá tnúhu Xítóhó Jesucristú.

²⁴ Te ío cada ndee iní tucu-n càchí té Mǎcú, ndihí té Arístarcú, ndihí té Dēmás, ndihí té Lùcá, chi tnàhá cue té-ǎⁿ quide-güedé chiúⁿ Xítóhó Jesucristú.

²⁵ Te Xítóhó Jesucristú ío na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cádá ndèe iní-nǎ vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dēhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú ncháa ñani tnáhá-ó ní xíndecu ndéé dāvá-áⁿ te diu ducaⁿ ní quide-güedé. Te títñi xito ducaⁿ ní xáhaⁿ-gă xii-güedé ní cáháⁿ-güedé tnúhu-gá. Te ndi dííⁿ ndi dííⁿ ní xítñúhu ñaha-gă xii-güedé nàcuáa cáháⁿ-güedé tnúhu-gá núú-yu.

² Te sátá ní cuu vâi nduu ta yáha cuáhánⁿ, te ní sáá nduu ní cachí Yá Ndiöxí sá Dēhe-gá cada núú-gă cáháⁿ tnúhu-gá núú-ó. Te diu-ni mee-gă ní táuchíúⁿ ní cadúha Dēhe-gá ñuyíú ndihí ncháa sá íó, te ní cachí-gá sá ncháá cùu-xi cuendá Dēhe-gá.

³ Te Dēhe Yá Ndiöxí ío càhnu cuu-gá dàtná càhnu cuu mee-gá, te dàtná-ni sàni iní méé-gă diu-ni ducaⁿ sàni iní Dēhe-gá chi tnàhá-gá cúú-gă Ndiöxí, te sá cuendá tnúhu càháⁿ Dēhe-gá xiáⁿ ndécú-ni ncháa sá íó ñuyíú, te ducaⁿ chi ío càhnu cuu Dēhe-gá, te diu-ni Dēhe-gá ní quide nàcuáa vá cündècu-gá cuèchi-o. Te sátá dúcáⁿ te ní ngóo-gá xio cùha Tátá-gă Dútú Ndiöxí Yáá ío cùnuu ndecu andiu.

Dēhe Dútú Ndiöxí ío-gá cúnúu-gá dàcúúxi cuè espíritú xínú cuèchi núú-gă

⁴ Te Dēhe Yá Ndiöxí ío-gá cúnúu-gá dàcúúxi cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiöxí sá ío-gá cùnúu-gă dàcúúxi cuè espíritú-áⁿ.

⁵ Chi Yá Ndiöxí ñá túú ní xáhaⁿ-gă xii ni ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ-gă: Yòhó cúú-n Dēhe mee-í, te ducaⁿ-ni cündècu-n núú ndécú-í. Duha ní xáhaⁿ-gă. Te ní cachí tucu Yá Ndiöxí: Yúhú cúú-í Tátá Yáá-áⁿ, te mee-gă cúú-gă Dēhe-í. Duha ní cachí-gá.

⁶ Te cútnàhá ní tendaha-gă Dēhe-gá Yáá ío cùnúu ní quixi-gă ñuyíú-a, te ní cachí-gá: Táu-xi sá ncháá cuè espíritú xínú cuèchi núú-í chiñuhu-xi Dēhe-í.

Duha ní cachí-gá.

⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gă, te ní cachí-gá: Yúhú quidè-í sá ncháá cuè espíritú xínú cuèchi núú-í cúú-xí dàtná táchí, te diu-ni cue espíritú-áⁿ quidè-í sá cúú-xí dàtná itá ñuhú.

Duha cächí-gá.

⁸ Dico Dēhe-gá chi ñá túú dùcaⁿ ni xáhaⁿ-gă, chi duha ní xáhaⁿ-gă:

Yòhó tnàhá-n cùu-n Ndiöxí dàtná cúú yúhú Yáá cúú Tátá-n,

te ducaⁿ-ni tàxi tnuní-n ni caa ni quíhíⁿ, te ío váha ndáá quidé-n tàxi tnuní-n.

⁹ Te dàquee tihú-n ncháa sá cuèhé sá dúhá, te cùu iní-n ncháa sá vâha, núu xiáⁿ yúhú Yáá cúú Tátá-n ní quide-í sá ío-gá vii ío-gá váha cuu iní-n, dàcúúxi ncháa dava-gă ñáyiu ndècu ndihí-n.

Duha ní xáhaⁿ-gă xii Dēhe-gá.

¹⁰ Te ní xáhaⁿ tucu Yá Ndiöxí xii Dēhe-gá:

Yòhó cúú-n Yáá ío cùnúu, chi ndéé cútnàhá ñá túú vèdana ná íó te ní cadúha-n ñuyíú ndihí andiu.

¹¹ Te andiu ndihí ñuyíú chi naa-xi, dico yòhó chi cundecu-ni-n ni caa ni quíhíⁿ.

Te andiu ndihí ñuyíú chi ndihí-xi dàtná ndihí ñⁿ dóó,

¹² te dàtná cuiní-n quide ñáyiu ndihí ñⁿ dóó òré ndàcáⁿ tnáhnú-yu tàxi ndécú-yu ñⁿ xio, ducaⁿ càda-n ñuyíú ndihí andiu,

te dàtná nádăma dóó ñáyiu ducaⁿ càda tucu-n ñuyíú ndihí andiu.

Te yòhó dàtná-ni càa-n ndecu-n vitna ducaⁿ-ni cünduu-n cundecu-n ni caa ni quíhíⁿ, chi vá yíí tnàhí-n.

Duha ní xáhaⁿ Yá Ndiöxí xii Dēhe-gá.

¹³ Te Yá Ndiöxí ñá túú ní xáhaⁿ-gă xii ni ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ tucu-gá:

Ngóo xio cùha-í taxi tnuní-n,

te yúhú cada-í te ncháa sá cúú úhú iní ñáhá xii-n canehe-xi sá yíñuhu núú-n.

Duha ní xáhaⁿ-gǎ xii Déhe-gǎ.

¹⁴ Te nchaa espíritú xínú cuèchi núú Yǎ Ndiǒxí mee-ni chiùⁿ-gǎ quidé-xí, chi tëndaha-gǎ cue espíritú-án cuáháⁿ-xi nchaa núú ndécú cuè ñáyiú ní nduu táhú cundecu ndihi-gǎ chindee ñàha-xi xií-yu.

2

Vá dáñá ndèé-ó tñùhu sá càháⁿ nàcuáa naníhí tàhú-ó

¹ Te sá cuendá sá ìo cùnūu Xítóhó Jesucristú, núu xiǎⁿ ío xini ñuhu-xi cada cuendá-ó nchàa tñùhu càháⁿ-gǎ sá sà ní xíndedóho-o cuendá sá vǎ dáñá ñihnu-o.

² Te cue espíritú xínú cuèchi núú Yǎ Ndiǒxí ní càháⁿ-xi tñùhu-gǎ ndéé sanaha, te tñùhu ní càháⁿ cue espíritú-án cúu-xí sǎ ndáá cuiti. Te nchaa ñáyiú ñá túú ní cuini tñi nchaa tñùhu ní càháⁿ cue espíritú-án, te ni ñà túú ní cuini-yu cundedóho-yu, nchaa ñáyiú-án ñi nacháhu-yu nàcuáa ndùu nchaa cuèchi ní quidé-yu ñiⁿ ñiⁿ-yu.

³ Te sá dúcáⁿ ñi yáha cue ñáyiú-án, xiǎⁿ cútnùní ndáá iní-ó sǎ vǎ càcu ñihnu-o te núu na dàña ñihnu-o tñùhu sá càháⁿ nàcuáa naníhí tàhú-ó, tñùhu sá ìo cùnūu, chi nacháhu-o te núu ducaⁿ na càda-o. Te díhna-gǎ Xítóhó Jesucristú ní càháⁿ-gǎ tñùhu-án te nchaa ñáyiú ní xíndedóho nchaa nàcuáa ndùu tñùhu-án ñi càháⁿ ndáá-yu tñùhu-án nùú-ó.

⁴ Te tñàhá Yǎ Ndiǒxí cúndihi-gǎ nchaa ñáyiú-án quidé-gǎ nàcuáa cutnùní iní-ó sǎ tñùhu-án cúu-xí tñùhu ndáá, chi quide-gǎ titní núú sǎ vǎ yǒo tñàhí ndàcu cada te ío cùñùhu-o. Te Espíritú Yǎ Ndiǒxí quidé-xí nàcuáa nduu táhú-ó ndi díⁿ nùú chiùⁿ cada-o nàcuáa cuini méé-gǎ. Te sá dúcáⁿ quide Yǎ Ndiǒxí nchaa xiǎⁿ, xiǎⁿ cútnùní iní-ó sǎ tñàhá-gǎ càháⁿ-gǎ sá tñùhu-án cúu-xí tñùhu ndáá.

Xítóhó Jesucristú ní xínduu yiqui cùñù-gǎ dàtná cáa yiqui cuñù nchoo cuè ñáyiú ñuyiú-a

⁵ Te Yǎ Ndiǒxí vá táxi ndècu-gǎ cue espíritú xínú cuèchi núú-gǎ taxi tñùní-xi ñuyiú sáá sǎ vǎtá quini-gǎ-ó, te diu cuendá xiǎⁿ càháⁿ-í.

⁶ Te núú tütú Yǎ Ndiǒxí càchí-xi: Yòhó Dútú Ndiǒxí ñá túú ñá cúu cuè ñáyiú ñuyiú ñu ndacu iní-n-yu, àdi chin-deé-n-yu.

⁷ Te yòhó ní cachí-n sǎ nchàa ñáyiú ñuyiú-a vá cùnùú-yu dàtná cùnùu cue espíritú xínú cuèchi núú-n,

dico ní cachí-n sǎ sàá nduu te ío cùnùú-yu tñàhá-yu, te mee-n càháⁿ-n sǎ ìo càhnu cuú-yu,

te ní cachí tucu-n sǎ táxi tñùní-yu nchaa sá ñi cadúha-n.

⁸ Te ducaⁿ nchàandi túhú sá ìo quindàhá-yu. Duha càchí-xi núú tütú-gǎ. Te sá dúcáⁿ ñi cachí Yǎ Ndiǒxí sá quindàha ñáyiú ñuyiú nchaa sá ìo, xiǎⁿ cútnùní sá ncháandi túhú sá ìo taxi tñùní-yu, dico vǎtá sàá-gǎ nduu dùcaⁿ quini-ó càda-xi.

⁹ Te nchoo sa nàha-o sá tñáá-ni ñi quide Yǎ Ndiǒxí cuendá sá vǎ cùnùu Xítóhó Jesucristú dàtná cùnùu cue espíritú xínú cuèchi núú-gǎ. Te ducaⁿ ñi quide Yǎ Ndiǒxí chi ní cundàhú iní-gǎ nchaa ñáyiú ñuyiú-a, chi ní cachí-gǎ sá Déhe-gǎ cuú cuendá nchaá-yu, te Xítóhó Jesucristú ío ní ndoho-gǎ òré ní xihí-gǎ, núu xiǎⁿ ní nduu táhú-gǎ cùnùu vihi-gǎ vitna. Te mee Yǎ Ndiǒxí càchí-gǎ sá ìo càhnu cuu Déhe-gǎ.

¹⁰ Te Yǎ Ndiǒxí ní cadúha-gǎ nchàandi túhú sá ìo nàcuáa ní cachí iní méé-gǎ, te sá dúcáⁿ ñi quide-gǎ ñu xiǎⁿ váha-ni sá ñi cachí-gǎ sá Xítóhó Jesucristú nàndi ndoho-gǎ te cuú-gǎ cuendá ducaⁿ ñà túú tñàhí-gǎ ná cùmání-gǎ núú Yǎ Ndiǒxí. Te sá dúcáⁿ ñi cuu núu xiǎⁿ ní ñihí Yǎ Ndiǒxí nàcuáa cada-gǎ càndeca-gǎ nchaa ñáyiú cùu déhe-gǎ quihíⁿ núú ìo váha càa cundecú-yu ndihi-gǎ ni caa ni quihíⁿ. Te Xítóhó Jesucristú cúu-gǎ Yaá ní quide nàcuáa nduu táhú cue ñáyiú cundecú-yu ndihi Yǎ Ndiǒxí.

¹¹ Te Xítóhó Jesucristú cúu-gǎ Yaá quidé ndècu yihuhu ñáyiú núú Yǎ Ndiǒxí ñáyiú sàndáá iní ñáhá xii-gǎ, te Xítóhó Jesucristú ndihi cue ñáyiú-án ñi-ni Yáá cúu Tǎtǎ-yu ndihi-gǎ, núu xiǎⁿ Xítóhó Jesucristú Yaá cúu Déhe Dútú Ndiǒxí ñá túú cùcahⁿ núú-gǎ càháⁿ-gǎ sá ñàní-gǎ ndihi cúha-gǎ cúu nchàa ñáyiú-án.

¹² Te quèe ndáá-xi nàcuáa càháⁿ-xi núú tütú Yǎ Ndiǒxí núú càchí-xi nàcuáa ní xáhaⁿ Xítóhó Jesucristú xii Tǎtǎ-gǎ Dútú Ndiǒxí, te duha ní xáhaⁿ-gǎ:

Càháⁿ váha-í cuendá-n nùú nchàa cue téé cùu datná ñani-í ndihi núú nchàa cue

ñáyiú ðíhí cúú ðàtná cúha-í,
te cata-í ndudú chiñuhu ñaha-í xii-n núú
tàcá-yu.

Duha yòdo tnuní núú tùtú-gá nàcuáa ní
xáhaⁿ Dèhe-gá xii-gá.

¹³ Te ìngá tucu xichi núú tùtú Yă Ndiöxí
càháⁿ-xi nàcuáa ní cáháⁿ Xítóhó Jesucristú
cuendá-gá, te duha ní cachí-gá:

Yúhú nchaa-ni nduu quindáá iní-í Tătà-í
Dútú Ndiöxí.

Duha càchí-xi núú tùtú Yă Ndiöxí nàcuáa ní
cáháⁿ Xítóhó Jesucristú. Te ìngá tucu xichi
núú tùtú Yă Ndiöxí càháⁿ-xi nàcuáa ní cáháⁿ
tucu Xítóhó Jesucristú, te duha ní cachí-gá:

Iha ndècu ndíhí-í nchaa ñáyiú cùu déhe
Tătà-í Dútú Ndiöxí, te ðiu-ni ñáyiú-áⁿ
ní taxi cuendá Tătà-í cuu cuendá-í.

Duha càchí-xi núú tùtú-gá nàcuáa ní cáháⁿ
Xítóhó Jesucristú.

¹⁴ Te sá cuendá nchaa ñáyiú cùu déhe Yă
Ndiöxí cúú-yu yiqui cùñú, núú xiáⁿ ducaⁿ
tnàhá Xítóhó Jesucristú ní cuu-gá yiqui
cùñú, te ducaⁿ ní cuu-gá yiqui cùñú cuendá
cuú-gá, te sá dúcáⁿ cùú-gá te ndacu-gá
daquèe tíhú-gă sácúíhná, te ðiu sácúíhná-áⁿ
quidé-xí xihí ñáyiú.

¹⁵ Te ducaⁿ ní quide-gá cuendá sá cuè
ñáyiú ñuyíú-a vá yúhú-gá-yu sá cùú-yu, chi
nchaa-ni nduu yúhú-yu sá cùú-yu.

¹⁶ Te na càchí tnúhu ndáá-í sá Xítóhó Je-
sucristú ní quixi-gá cuendá chindee-gă cue
ñáyiú cùu ñaní tnàhá ndíi Àbrahám, te ñá
díú cuendá sá chindèe-gá cue espíritú xínú
cuèchi núú Yă Ndiöxí.

¹⁷ Te cuendá xiáⁿ núu dai ní xini ñuhu-xi
sá cúú-gă ñáyiú cuendá yăha-gá nándi sá
yăha-gá ðàtná yăha cue ñáyiú cùu ndi
mee-gá cuendá ducaⁿ cùu-gá dútú ïo cùnuu
te cuu ndáá-gá núú Yă Ndiöxí, te cundàhú
iní-gá nchaa ñáyiú te cuú-gá cuendá sá vă
cúndècu-gá cuèchi-yu núú Yă Ndiöxí.

¹⁸ Te mei òré ndóhó Xítóhó Jesucristú ní
xito ndéé ñáhá sácúíhná xii-gá te núu ndisa
sá vă cáda-gă ní ïⁿ sá ñà túú tàú-gá cada-gá,
te sá dúcáⁿ ní ndoho-gá xiáⁿ núu ndácú-gă
chindèe-gá nchaa ñáyiú ducaⁿ yăha.

3

*Xítóhó Jesucristú ïo-gá cùnuu-gá dàcúúxí
ndíi Moisés*

¹ Te nchòhó cúú-ndó ñáyiú ndècu ndíhí-í
ichi Xítóhó Jesucristú ñáyiú cùu cuendá Yă
Ndiöxí, te tnàhá-ndó cùu-ndo ñáyiú ní cáháⁿ
ñáhá-gă cuendá cundecu-ndo ndíhí-gá. Te
yúhú càchí tnúhu-í xii-ndo sá ïo váha cada
cuendá-ndó nàcuáa nduu cuendá Xítóhó Je-
sucristú, chi ðiu-gá cúú-gă Yaá ní tendaha
ñàha Dútú Ndiöxí ní quixi-gá ñuyíú-a, te
ðiu-gá cúú-gă Dútú ïo cùnuu chi quide-gá
núú Yă Ndiöxí. Te ðiu-ni cuendá Xítóhó
Jesucristú càháⁿ tnúhu sá ní sàndáá iní-ó.

² Te mee Yă Ndiöxí ní sáha chiuⁿ-gá Xítóhó
Jesucristú, te ïo ndáá quidé-gă chiuⁿ-áⁿ sá
cúú-xí Yă Ndiöxí, te ðiu-ni ducaⁿ ní quide
ndíi Moisés ní quide ndíi chiuⁿ ní táhú Yă
Ndiöxí, te ïo ndáá ní quide ndíi chiuⁿ-gá sá
cúú-xí nchaa ñáyiú cùu cuendá-gá, te cue
ñáyiú-áⁿ cúú-yu ðàtná vehe mee-gă.

³ Te ïⁿ tée dàcaa ïⁿ vehe váha ïo càhnu-gá
cúú-dé dàcúúxí vehe dacao-dé. Te ducaⁿ
sàtnahá-xi cùu Xítóhó Jesucristú chi ïo-gá
càhnu cuu-gá dàcúúxí ndíi Moisés.

⁴ Te nchoo sá naha-o sá ncháá vèhe
dacuítí ndècu cue tée ní dácáá, dico sa nàha
tucu-o sá Yă Ndiöxí quidé-gă ndécú nchaa
sá ïo ñuyíú-a.

⁵ Te ndíi Moisés-áⁿ ïo ndáá ní quide ndíi
chiuⁿ ní táhú Yă Ndiöxí ní quide ndíi sá
cúú-xí nchaa ñáyiú cùu cuendá-gá. Te sá
dúcáⁿ ní quide ndíi xiáⁿ ní cuu ndíi ïⁿ tée
ní xinu cuechi núú Yă Ndiöxí. Te ní xáhaⁿ
ndíi xii nchaa ñáyiú cùu cuendá-gá nàcuáa
cáháⁿ-gá ndéé cuéé-gá.

⁶ Dico Xítóhó Jesucristú cúú-gă Déhe
mee Yă Ndiöxí, te cùu-gá Yaá ïo quide
ndáá yíndàha-gá nchaa ñáyiú cùu cuendá
Yă Ndiöxí. Te tnàhá-ó cùu-o ñáyiú cùu
cuendá-gá, te ðiu-ni ducaⁿ cùu cuendá
ñáhá-gă xii-o te núu na càncicúⁿ ni-
hnu-ni-o càni ndáá iní-ó cuendá-gá ndéé
ná sàá nduu ngündecu-o ndíhí-gá.

*Cue ñáyiú cùu cuendá Yă Ndiöxí ïo váha
cùu iní-yu ndécú-yu ndíhí-gá*

⁷ Te núú tùtú Yă Ndiöxí yódó tnùní nàcuáa
ní cáháⁿ Espíritú-gá, te duha ní cachí-xi:
Te núu nchòhó ndédóho-ndo nchaa tnúhu
cáháⁿ Yă Ndiöxí vitna,

⁸ te vá cúnduu sáá iní-ndó ðàtná ní xínduu
sáá iní ñáyiú ní dáquèe tíhú tnúhu Yă
Ndiöxí, ñáyiú ní xíndecu xití yucu,

chi ñáyi-u-áⁿ ñi xito ndeé-yu Yá Ndiöxí ñu
nása cada ñaha-gã xií-yu.

Duha ní cachí Espíritú-gá.

⁹ Te cächí tucu Espíritú Yá Ndiöxí ñacuáa ní
cáháⁿ méé-gã, te duha ní cachí-gá:

Xití yucu ní xito ndeé ñáhá cuè ñani
tnáhá-ndó ñi xíndecu ndeé sanaha
xii-í,

te ducaⁿ ñi quide ñáhá-yu cuèi ní xiní-yu
nchaa sá ñi quide-í ndi ùdico cuíá ñi
xíndecú-yu xití yucu-áⁿ.

¹⁰ Te sá dúcáⁿ ñi quidé-yu núu xíáⁿ ní
cudéèⁿ-í núu-yu,

núu xíáⁿ ní cáháⁿ-í cuèndá-yu, te ní cachí-í:

“Ñáyi-u-a quide-ní-yu nchaa sá ñà túú
tàú-yu cadá-yu te ni ñà túú cuèni-yu
cadá-yu nchaa ñacuáa sàni iní-í,

te ni ñà túú cuèni-yu cadá-yu ñacuáa
cáháⁿ-í”,

duha ní cáháⁿ-í cuèndá-yu.

¹¹ Te xíáⁿ ñu ní cudéèⁿ-í núu-yu te ní xáhaⁿ
ndáá-í xií-yu sá vã ndúú tãhü-yu
cundecu váha-yu núu ndécú-í.

Duha ní cachí Yá Ndiöxí cächí Espíritú-gá.

¹² Te nchòhó ñáyi-u ndècu ndihí-í ichi
Xítóhó Jesucristú, cáháⁿ-í dóho-ndo sã ño
cada cuèndá-ndó vã cáni cuèhé iní-ndó te
ngóo-ndo vã quíndáá-gá iní-ndó Yá Ndiöxí
te dañá-ndo ìchi-gá, te ñi-gá cúu-gã Yaá
ndécú nchaa nduu nchaa quíú.

¹³ Te ñⁿ nduu ñⁿ nduu ío chí cuãha
tnàha tnúhu ndeé ñi cundecu-ndo ñi
ndecu-ndo ñuyíú-a cuèndá sá vã xínu
iní-ndó càda-ndo nándi sá cuèhé sá dúhá, te
ducaⁿ te vã cúu sáa iní-ndó núu Yá Ndiöxí.

¹⁴ Te vã dáñá ndèé-ó càni ndáá iní-ó
ñacuáa cada ñaha Yá Ndiöxí xii-o, te
dàtná-ñi ní sani iní-ó ndeé cútnáhá ní
tuha-o ìchi Yá Ndiöxí, te ñi-ñi ducaⁿ càni
iní-ó ndeé ná sáa nduu vã cúndecu-gá-ó
ñuyíú-a, te núu ducaⁿ na càda-o te cúu
ñⁿnduu-o ndihí Xítóhó Jesucristú.

¹⁵ Te duha cáháⁿ-xi ñⁿ xichi núu tütú Yá
Ndiöxí:

Te núu nchòhó ndèdóho-ndo ñacuáa cáháⁿ
Yá Ndiöxí vitna,

te vã cúnduu sáa iní-ndó dàtná ní xínduu sáa
iní cue ñáyi-u ní dáquée tñú tnúhu-gã
ndeé sanaha.

Duha cächí-xi núu tütú-gá.

¹⁶ Te cue ñáyi-u ducaⁿ ñi xínduu sáa iní-xi
cúu-yu ñáyi-u ní ndèñuhu ndí Moisés ñacióⁿ

Ègiptú, te ñáyi-u-áⁿ ñi xíndedóho-yu tnúhu ní
cáháⁿ Yá Ndiöxí te ní quide sáa iní-yu ní
dáquée tñú-yu tnúhu-gá.

¹⁷ Te ndi ùdico cuíá ñi xúhuⁿ-yu ichi ío
ní cudéèⁿ Yá Ndiöxí núu-yu cuèndá sá ñi
quidé-yu nándi nchaa sá cuèhé sá dúhá, te
ñáyi-u-áⁿ ñi xíhí-yu xití yucu.

¹⁸ Te nchaa ñáyi-u-áⁿ ñà túú ní cuèni-yu
tní-yu tnúhu ní cáháⁿ Yá Ndiöxí ñu xíáⁿ
ní cáháⁿ ndáá-gá sá vã ndúú tãhü-yu cun-
decú-yu núu ño váha càa ndecu-gá.

¹⁹ Te xíáⁿ ñu nchoo cùnuni iní-ó sã nchaa
ñáyi-u-áⁿ ñà túú ní nduu tãhü-yu cundecu
váha-yu núu ndécú-gã, chi ñà túú ní sàndáá
iní-yu tnúhu ní cáháⁿ-gá.

4

¹ Te vitna ndècu ndihí-gá-ó tnúhu Yá
Ndiöxí tnúhu sá dãnèhé ñáhá xii-o sá cúu
cúndecu váha-o núu ndécú-gã, te tàú-xi
quíyuhú iní-ó chí na cuáháⁿ te vã ndúú
tãhü-ó cundecu váha-o núu ndécú-gã.

² Te tnáhá nchoo ñi ngúndecu ndihí-o
tnúhu sá cáháⁿ ñacuáa naníhí tãhü-ó dàtná
ní xíndecu ndihí cue ñáyi-u ndeé sanaha,
dico ñáyi-u-áⁿ chí ñà túú vèdana ni nàndihí-xi
cuèi ní xíndedóho-yu tnúhu-áⁿ chí ñà túú ní
sàndáá iní ñáhá-yu xii-gá.

³ Dico nchoo cúu-o ñáyi-u ní sàndáá iní
tnúhu Yá Ndiöxí, núu xíáⁿ nduu tãhü-ó
cúndecu váha-o núu ndécú-gã, te ní quee
ndáá-xi ñacuáa cáháⁿ-gá núu tütú-gá núu
cächí-xi:

Yúhú ní cudéèⁿ-í núu-yu, te ní cáháⁿ ndáá-í
sá vã ndúú tãhü-yu cundecu váha-yu
núu ndécú-í.

Duha ní cachí-gá. Te cuu nduu tãhü-yu
cundecu váha-yu núu ndécú Yá Ndiöxí ní
cúu, chí sa ní xínu cava nchaa chiuⁿ ní
quide-gá sá ñi cadúha-gã ñuyíú.

⁴ Te núu tütú Yá Ndiöxí cáháⁿ-xi ñacuáa ní
quide-gá nduu úsá, te duha cächí-xi:

Yá Ndiöxí ní quide chiuⁿ-gá íñú nduu ní
quide-gá nchaa chiuⁿ-gá te ní nde-
tatú-gá nduu úsá.

Duha cächí-xi núu tütú-gá.

⁵ Te cächí tucu-xi núu tütú Yá Ndiöxí ñacuáa
ní cáháⁿ-gá cuèndá cue ñáyi-u ndeé sanaha,
te duha ní cachí-gá:

Cue ñáyi-u-a vã ndúú tãhü-yu cundecu
váha-yu núu ndécú-í ndètátú-í.

Duha ní cachí-gá.

6 Te ñáyiú ní xíndedóho tnúhu sá cáháⁿ nàcuáa naníhí tǎhú-ó ndéé sanaha, ñá túú ní ndúu tǎhú-yu cundecu váha-yu núú ndécú Yǎ Ndiǒxí ndétátú-gá, te ducaⁿ chí ñá túú ní sàndáá iní ñáhǎ-yu xii-gá, dico ió-gá ñáyiú nduu tǎhú cundecu váha núú ndécú-gǎ ndétátú-gá.

7 Te ní xica cuéhé nduu sá dúcáⁿ ñà túú ní sàndáá iní ñáhǎ ñáyiú-áⁿ xii-gá, te dàtnúni ní cáháⁿ ndíi Dávií yuhu-gá nàcuáa cada-gá vitna, te diu-ni nàcuáa sa yòdo tnuní diu-ni ducaⁿ chido tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndédóho-ndo tnúhu cáháⁿ-í te vá cáda sáá iní-ndó.

Duha ní cachí-gá.

8 Te ndíi Jòsué ní sanu ichi ndíi ñáyiú núú quíhíⁿ-yu cundecu váha-yu, dico ñá díú cuendá xǎⁿ ní cáháⁿ Yǎ Ndiǒxí, chí cuendá nàcuáa cada-gá vitna ní cáháⁿ-gá.

9 Núu xǎⁿ sáá nduu ndúu tǎhú nchaa ñáyiú cùu cuendá Yǎ Ndiǒxí ngúndecu váha-yu núú ndécú-gǎ ndétátú-gá.

10 Te nchaa ñáyiú ducaⁿ na ndúu tǎhú cundecu váha núú ndécú Yǎ Ndiǒxí ndétátú-gá, te tnàhá-yu ndetátú-yu cuendá nchaa sá váha ní quidé-yu dàtná ndétátú méé-gǎ.

11 Te xini ñuhu-xi sá nchóó ïo nducu ndéè-o nducu-o nàcuáa cada-o cuendá nduu tǎhú-ó ngúndecu váha-o núú ndécú Yǎ Ndiǒxí ndétátú-gá, chí na cuáháⁿ dava-ndo càda-ndo datná ní quide cue ñáyiú ñá túú ní sàndáá iní ñáhǎ xii-gá, te vá ndúú tǎhú-ndó cundecu váha-ndo núú ndécú-gǎ te núu ducaⁿ na càda-ndo.

12 Te tnúhu Yá Ndiǒxí cúu-xí dàtná ñⁿ sá nchító-ó chí quide-xi nándi sá quidé-xí, te cùu-xi datná ñⁿ sá dǎéⁿ víhí-gǎ dàcúxí ñⁿ yuchí sá ndéé úú xio núu-xi. Te ducaⁿ sǎtnahá-xi cùu tnúhu-gá chí quée-xi iní-ó, te dàndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndéu-o.

13 Te ni ñⁿ sá ní cadúha Yá Ndiǒxí vá cáni iní-ó sǎ ndácú-xí nguǎváha-xi núú-gǎ, chí nchaandi túhú sá sání iní-ó ndéu túu-xi núú-gǎ, te diu núu Yáá-áⁿ na càni cuendá-ó nchaa sá quidé-ó.

14 Te Xítohó Jesucrístú cúu-gǎ Dútú ïo cùnuu ndecu ndíhi-o, te diu-gá cúu-gǎ Déhe Dútú Ndiǒxí, te Yáá-áⁿ cuánda-gá andiu ní nucúndecu-gá núú Yǎ Ndiǒxí, núu xǎⁿ tàú-xi sá cànchícúⁿ nihnu-ni-o quíndáá iní-ó-gǎ.

15 Te mee Yáá-áⁿ ïo cùnuu-gá cúu-gǎ dútú-ó ndéu ndíhi-o, te ío na cùndahú iní ñáhǎ-gǎ xii-o cuendá sá ñǎ níhí ndéé-ó cundecu-o. Te ducaⁿ càda-gá chí ní yáha-gá dàtná yǎha mee-o, chí nchaa sá ní yáha-gá-áⁿ ní cuu-xi sá cáda-gǎ nándi nchaa sá cuéhé sá dúhá ní cùu dico ni ñⁿ ñá túú ní quide-gǎ.

16 Núu xǎⁿ tàú-ó sǎ nchóó ní yuhu ni iní-ó cáháⁿ ndíhi-o Yǎ Ndiǒxí Yáá ío cùndahú iní ñáhǎ xii-o chindee ñaha-gá, te ducaⁿ càda-o te cùndahú iní ñáhǎ-gǎ chindee ñaha-gá xii-o ndéda-ni càa oré xini ñuhu-o-gá.

5

1 Te nchaa cue dútú cùnùu núú ñáyiú isràel diu-ni ñáyiú cùu-güedé, te ducaⁿ ní ngúndecu-güedé cuendá cada-güedé chiuⁿ sá cúu-xí Yǎ Ndiǒxí cuendá-yu, chí diu cue téé-áⁿ ní xóo nacani cuendá-güedé núu-gǎ quiti ní xóo cahni-güedé ní xóo nduu tǎhú-gǎ, te ducaⁿ ní xóo cada-güedé cuendá sá cáda càhnu iní Yǎ Ndiǒxí cuéchi-yu, te ducaⁿ ní xóo nacani cuendá tucu-güedé núu-gǎ nchaa dava-gá sá ní xóo níhí-güedé ní xóo nduu tǎhú-gǎ.

2 Te nchaa cue dútú-áⁿ ní xóo cundee iní-güedé nchaa sá ní xóo cada nchaa ñáyiú ñá túú ní quide ndáá ñáyiú ñá túú cùtnuní iní-xi, te ducaⁿ ní xóo cada cue dútú-áⁿ chí tnàhá-güedé ñá túú ní xóo níhí ndéé-güedé cundecu-güedé cuendá nchaa sá ní xóo yáha-güedé.

3 Te sá cuendá sá dúcáⁿ ñà túú ní xóo níhí ndéé-güedé núu xǎⁿ dai ní xini ñuhu-xi sá tnàhá-güedé cuáha-güedé Yǎ Ndiǒxí sá ndúú tǎhú-gǎ cuendá méé-güedé dàtná quidé-güedé cuendá ñáyiú.

4 Te ni ñⁿ téé vá ndácú-dǎ cuu-dé dútú cùnùu cuendá-ni sá càchí iní méé-dǎ te núu ñá díú mèe Yá Ndiǒxí ducaⁿ cuíni-gá sá cúu-dǎ dútú cùnùu datná ní quide-gá ndíi Àrón.

5 Te cuéi Xítohó Jesucrístú chí ñá díú mèe-gá ní quide-gá méé-gǎ ñⁿ dútú cùnùu

nacuáa cada nínu-gá méé-gă, chi mee Tătá-gă Dútú Ndiöxí ducaⁿ ní cachí-gá sá cúu-gă Dútú cúnùu, te ducaⁿ chi Yá Ndiöxí ní xáhaⁿ-gă:

Yòhó cúu-n Dēhe-í,
te cuiní-í sá dúhá-ní cùndecu-n núu ndécù-í.
Duha ní xáhaⁿ-gă xii Xítohó Jesucristú.

⁶ Te núu tütú Yá Ndiöxí yódó tnùnì nàcuáa ní xáhaⁿ tucu-gá xii Xítohó Jesucristú, te duha ní xáhaⁿ-gă:

Yòhó cúu-n dütú cundecu ni caa ni quíhíⁿ,
te cùu-n datná ní cuu ndíi Melquisèdec.
Duha ní xáhaⁿ-gă xii Xítohó Jesucristú.

⁷ Te cútnàhá ní xíndecu Xítohó Jesucristú ñuyíú-a te níhi ní xóo cáháⁿ ndihí-gá Yá Ndiöxí te ní xóo cáháⁿ ndàhú-gá núu-gă, te ní xóo ndáhyú-gá òré ducaⁿ ní xóo cáháⁿ ndihí-gá Yá Ndiöxí, te ducaⁿ ní quide-gá chi nàha-gá sá Yá Ndiöxí cúu-gă Yaá ndacu dàcácu nihnu ñaha xì-gá cuendá sá vă cùú dúcáⁿ-gă. Te Yá Ndiöxí ní xíndedóho-gá nchaa tnúhu ní cáháⁿ Xítohó Jesucristú cuendá sá ní quide-gá nchaa nàcuáa ní xáhaⁿ Yá Ndiöxí cada-gá.

⁸ Te sá cuendá nchaa sá ní ndoho Xítohó Jesucristú xiáⁿ ní cutnùnì iní-gá cada-gá nchaa dava-gá sá vâha nàcuáa cuiní méé Yá Ndiöxí cada-gá. Te ducaⁿ ní cuu cuèi cùu-gá Déhe Yá Ndiöxí.

⁹ Te sá dúcáⁿ ní quide-gá nchaa nàcuáa cuiní méé Yá Ndiöxí, xiáⁿ núu vitna cùu-gá Yaá dácácu nihnu nchaa ñáyiu sàndáá iní ñáhá xì-gá núu ùhú núu ndàhú.

¹⁰ Te mee Yá Ndiöxí ní cachí-gá sá Xítohó Jesucristú cúu-gă dütú cúnùu datná ní cunu ndíi Melquisèdec cútnàhá ní cuu ndíi dütú ñuyíú-a.

Cuendá ñáyiu cuiní dañà nihnu ichi Yá Ndiöxí

¹¹ Te vâi-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihí ndíi Melquisèdec, te dicó-ni sá nchòhó ío cuèé tècú tnùnì-ndó, te yúhú ío úhú nihí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dānehé-ndó cuè ñáyiu ndècu ichi-gá tnúhu-gá núu dicó sá cúu, dico xìni ñuhu-ni-xi sá cùndecu ñáyiu danèhé ñáhá tnúhu-gá xii-ndo, tnúhu sá ní dácúáhá-ndó ndèé díhna sá ñà túú ùhú tecú tnùnì-ndó.

Te sá dúcáⁿ quide-ndo núu xiáⁿ cúu-ndó dàtná cue landú vitna sàdi camá, landú vátá cúu-gă caxi dítá.

¹³ Chi nchaa ñáyiu cùu datná landú vitna sàdi, ñáyiu-áⁿ cúu nēñuú-yu ñà túú cùtnunì iní-yu nàcuáa càháⁿ tnúhu sá càháⁿ nàcuáa cada ndáá-yu cundecú-yu.

¹⁴ Te nchaa sá vátá cúu-gă caxi cue landú yíquíⁿ xiáⁿ cúu-xí cuendá cue ñáyiu sacuéhé, te xiáⁿ cúu-xí dàtná tnúhu sá dácúàha ñáyiu sa ní níhí ndéé ndècu ichi-gá, ñáyiu sa ní cutnùnì váha iní-xi nándi cùu nchaa sá cuèhé sá dúhá, ndihí nándi cùu nchaa sá vâha.

6

¹ Te xiáⁿ núu vitna xìni ñuhu-xi dacuaha-o dava-gá tnúhu Yá Ndiöxí cuendá ducaⁿ te cuu-o ñáyiu tècú tnùnì nchaa tnúhu-gá. Te xìni ñuhu-xi sá ncháá tnúhu Xítohó Jesucristú sá ní dácúáhá-ó ndèé díhna vâ dácúàha-gá-ó dàtná ní dácúáhá-ó chi sa tècú tnùnì-ó. Te ñà túú-gă xìni ñuhu-xi dacuaha-o datná ní dácúáhá-ó ndèé díhna nàcuáa cada-o ndixi cuéchi iní-ó cuendá nchaa sá cuèhé sá dúhá quide-o, sá tá dàcuíta nihnu ñaha xì-o cuáháⁿ ní cùu. Te ducaⁿ vâ dácúàha-gá tucu-o dàtná ní dácúáhá-ó ndèé díhna nàcuáa cada-o quindáá iní-ó Yá Ndiöxí,

² ndihí cuendá nàcuáa ní dácúáhá-ó nàcuáa cuandute-o, ndihí cuendá nàcuáa cada-o càcáⁿ ndodo-o ndàha-o díquí ñáyiu ní sàndáá iní ñáhá xì-gá. Te ducaⁿ ñà túú-gă xìni ñuhu tucu-xi dacuaha-o datná ní dácúáhá-ó ndèé díhna cuendá nàcuáa ndoto cue ñáyiu ní xíhí, ndihí cuendá nàcuáa ní dácúáhá-ó sã Yá Ndiöxí daquihíⁿ-gá ñáyiu núu ùhú núu ndàhú ni caa ni quíhíⁿ.

³ Te núu Yá Ndiöxí ná càchí-gá, te cuita dacuàha-gá-ó nchàa dava-gá tnúhu sá cúmāní quíhíⁿ.

⁴ Te cue ñáyiu sa tècú tnùnì tnúhu Yá Ndiöxí, ñáyiu sa xìni nchaa nàcuáa ndùu nchaa sá vâha quide ñaha Yá Ndiöxí xii-o ndihí-yu, ñáyiu sa chìndee ñaha Espiritú Yá Ndiöxí,

⁵ ñáyiu sa cùtnunì iní-xi sá ïo váha tnúhu Yá Ndiöxí, ñáyiu sa xìni nàcuáa ta quide Yá Ndiöxí véxi nchaa sá vâ yõ tnàhí ndàcu cada,

6 te núu ñáyiú-áⁿ ná ngüíta tucú-yu daquèe tìhú duúⁿ-yu tnúhu Yá Ndiöxí, te vá ndácú-gã-ó nà canu ichi-ó-yu nàcuáa ndixi cuèchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahani ñaha xì Xítohó Jesucristú Déhe Yá Ndiöxí núú cùrúxí. Te sá dúcáⁿ ná càdá-yu te ngóo dava-gá ñáyiú cáháⁿ cuèhé-yu cuendá Xítohó Jesucristú.

7 Te nchaa ñáyiú cùú-yu dàtná ñuhu, chi ñuhu-áⁿ ndi tnahá òré cúúⁿ dàú te xìhi-xi ndute, te dava ñuhu váha cùu sá xítú ñáyiú, te sá cúú núú ñuhu-áⁿ ïo nàndíhi-xi, te mee Yá Ndiöxí quidé-gã cúú sã vâha núú ñúhú-ãⁿ.

8 Dico núu da ñu na ndaa núú ñuhu-áⁿ te ñá túú vèdana nàndíhi-xi te núu ducaⁿ, te Yá Ndiöxí vá cúú vâha iní-gá cuendá ñuhu-áⁿ sá dúcáⁿ dà ñu ndaa núú-xi, te ñu-áⁿ ndihí-xi cáyú. Te ducaⁿ sãtnahá-xi cùu ñáyiú dàquee tìhú tnúhu Yá Ndiöxí chi ñá túú cùu váha iní-gá núú-yu.

Níhí-ó sã ndétú-ó ndiúu táhú-ó

9 Te cuèi duha càháⁿ-í dico nchòhó cue ñáyiú ïo cùu iní-í, chi cùtnuní ndáá iní-í sã vã càdá-ndó dàtná xiquide dava-gá ñáyiú, te mee-ni sã vâha cùu xii-ndo chi cùu-ndo ñáyiú sa ní naníhí tãhú.

10 Te ducaⁿ chi Yá Ndiöxí cúú-gã Yaá ïo váha quide ndáá, te vá dáná ndòdo iní-gá nchaa sã vâha quide-ndo, te ni vã dáná ndòdo iní-gá nàcuáa quide-ndo cuu iní-ndó-gã, te sá dúcáⁿ quide-ndo cuu iní-ndó-gã xiãⁿ chindèe-ndo cue ñáyiú ndècu ndihí-ndo ichi Xítohó Jesucristú, te ducaⁿ-ni ta quide-ndo véxi ndéé vitna.

11 Te cuiní-í sá ïⁿ ïⁿ-ndo nducu ndee-ndo cada-ndo nacuáa cuiní Yá Ndiöxí dàtná tá quide-ndo véxi, te ñu-ni ducaⁿ càda-ndo ndéé ná sãá nduu ndùu táhú-ndó cùndecu-ndo ndihí-gá núú ndécú-gã, te ducaⁿ te níhí-ndó nchàandi tühú sá ndétú-ndó ndùu táhú-ndó cùndecu ndihí-ndo ni caa ni quíhíⁿ.

12 Te yúhú cuiní-í sá nchòhó vá tühío-ndo càda-ndo nchaa nacuáa cuiní Yá Ndiöxí, te cada-ndo dàtná quidé ñáyiú sãndáá iní tnúhu-gá, ñáyiú càhnu iní-xi. Te sá dúcáⁿ quidé-yu xiãⁿ níhí-yu nchaa sã ní cachí Yá Ndiöxí nduu táhú-yu.

13 Te cútnàhá ní xáhaⁿ Yá Ndiöxí xii ndíi Àbrahám nàcuáa cada-gá, te ní cacunehe-gá mée-gã nàcuáa cutnùní iní ndíi sá ndáa cada-gá nàcuáa ní xáhaⁿ-gã xii ndíi, te vá yõo ïⁿ ni càcunehe-gá cuendá sá quindáá iní ndíi tnúhu ní cáháⁿ-gã. Te ducaⁿ ñi quide-gá chi ïⁿ dîi díi-ni mee-gã ïo cùnuu-gá.

14 Te duha ní xáhaⁿ-gã xii ndíi Àbrahám: “Yòhó té Àbrahám na càchí tnúhu ndáá-í xii-n sã ïo chindee ñàhá-í xii-n, te cáyá cuèhé víhí ñàní tnáhá-n”, duha ní xáhaⁿ-gã xii ndíi.

15 Te ndíi Àbrahám ïo ní quide ndee ïn iní ndíi ní xíndetu ndíi, te ducaⁿ te Yá Ndiöxí ní quide-gá nàcuáa ní xáhaⁿ-gã cada-gá sá cúú-xí ndíi.

16 Te núu ïⁿ ñáyiú càháⁿ ïⁿ tnúhu ndáa cuiti te càcu nehé-yu Yá Ndiöxí cuendá quindáá iní tnàhá ñáyiú-yu tnúhu càháⁿ-yu, te òré ducaⁿ na càháⁿ-yu te ñá túú-gã sã dácãá ñáyiú càháⁿ ndihí-yu cuendú.

17 Te ducaⁿ ñi quide Yá Ndiöxí ní cáháⁿ ndáá-gá sá càdá-gã nàcuáa ní cachí-gá, te ducaⁿ ñi cáháⁿ-gã cuendá nchaa ñáyiú ní cachí-gá nduu táhú sã càdá-gã nàcuáa cutnùní iní-yu sá quidé-gã ïⁿ sã càháⁿ-gã, te ni ñà túú nàdáma-gã ïⁿ sã càháⁿ-gã.

18 Te nchoo ñi natuha-o Yá Ndiöxí cuendá dàcácu nihnu ñaha-gã xii-o núú ùhú núú ndàhú, te ní níhí-ó tnúhu ndee ïn ndécú ndihí-o cuendá sã vã dáñá ndéé-ó cùndetu-o sãá nduu ndùu táhú-ó cùndecu-o ndihí-gá. Te ducaⁿ ñi níhí-ó tnúhu ndee ïn chi Yá Ndiöxí ní cáháⁿ ndáá-gá sá càdá-gã nàcuáa ní cachí-gá, te ñá túú dandahú ñáhá-gã, te ni ñà túú nàdáma-gã ïⁿ sã ñi cachí-gá cada-gá.

19 Te tnúhu ndee ïn ndécú ndihí-o xiãⁿ quidé-xí cùtnuní ndáá iní-ó sã ndúú táhú-ó cùndecu-o ndihí Yá Ndiöxí núú ndécú-gã, te ducaⁿ cùtnuní ndáá ndisa iní-ó sã cuendá Xítohó Jesucristú Yaá ndécú núú Yá Ndiöxí.

20 Te ducaⁿ ñi nucúndecu Xítohó Jesucristú núú Yá Ndiöxí cuendá ducaⁿ càncicúⁿ nihnu-o càda-o, te ducaⁿ ñi nucúndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyú-a, te ducaⁿ-ni cùu-gá dútú cùnùu ni caa ni quíhíⁿ.

7

Xítoho Jesucristú cúu-gã dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiú ñuú Sàlém, te ní cuu ndíi dútú ní xinu cuechi ndíi núú Dütú Ndiöxí Yaá ío cùnuu. Te ndíi Melquisèdec-án ñí xícáⁿ táhú ndíi núú Yã Ndiöxí cuendá ndíi Àbrahám cútnàhá ní sáháⁿ ndíi Àbrahám-án ñí nàá ndíi ndihí cue dava-gá cue téé yíndaha ñáyiú. Te cue téé-án ñà túú ní ndàcu-güedé nàá-güedé ndihí ndíi Àbrahám-án chi ní xíta-güedé.

² Te nchaa sá ñí níhí ndíi Àbrahám-án núú ñí nàá ndíi, te ní quide ndíi úxí xichi te ñí xichi núú ùxí-án ñí sáñaha ndíi xii ndíi Melquisèdec. Te ñí ndíi Melquisèdec-án quéé-xí: Téé ío váha quide ndáá yíndaha ñaha xii ñáyiú, duha quèe-xi. Te ní xóo danàni ñahá-yu xii ndíi Téé yíndaha ñuú Sàlém, duha ní xóo danàni ñahá-yu. Te tnúhu Sàlém-án quéé-xí: Ñuú ndécú nàhi, duha quèe-xi tnúhu-án. Núu xíáⁿ quéé tucu-xi nacuaa nàni ndíi Téé yíndaha ñuú ndécú nàhi, duha quèe tucu-xi ñí ndíi.

³ Te ñá túú tnúhu núu yoo cùu tátá ndíi ndihí náná ndíi, te ni ñà túú tnúhu núu yoo cùu xíí ndíi ndihí xítná ndíi, te ni ñà túú tnúhu núu nándí cùu ñáyiú ní cuu ñaní tnáhá ndíi ní xíndecu ndéé sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-án ducaⁿ-ni ñí cuu ndíi dútú ní xíndecu ndíi, te ducaⁿ sàtnahá-xi cùu Xítoho Jesucristú déhe Yã Ndiöxí chi cuu-gã dútú ni caa ni quíhíⁿ.

⁴ Te vitna chí cuãha váha cuendá sá ndíi Melquisèdec ní cuu ndíi ñí téé ío ní cuu càhnu ní xíndecu ñuyíú-a, chi ndíi Àbrahám téé ní cuu ñaní tnáhá-ó ñí xíndecu ndéé sanaha ñí quide ndíi úxí xichi nchaa sá ñí níhí ndíi núú ñí nàá ndíi. Te ñí xichi núú ùxí-án ñí sáñaha ndíi xii ndíi Melquisèdec.

⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñaní tnáhá ndíi Lèví sá cuè téé-án queheⁿ-güedé ñí xichi núú ùxí xichi sá níhí cue ñáyiú isràél ñáyiú cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndihí-yu ní cuu ndíi Àbrahám.

⁶ Te cuèi ñá díú ñaní tnáhá ndíi Melquisèdec cúu ndíi Àbrahám dico ní queheⁿ ndíi Melquisèdec-án ñí xichi núú ùxí xichi nchaa sá ñí níhí ndíi Àbrahám. Te ndíi Melquisèdec-án ñí xícáⁿ táhú ndíi núú Yã Ndiöxí cuendá ndíi Àbrahám. Te ñí ndíi Àbrahám-án ñí xáhaⁿ Yã Ndiöxí xii ndíi sá cáda váha ñaha-gã xii ndíi.

⁷ Te sa cùtnuní iní-ó sá núu ñí téé na càcáⁿ táhú-dé núú Yã Ndiöxí cuendá ñí ñáyiú, te téé-án cùnùu-gá-dé.

⁸ Te cue dútú ñáyiú isràél quèhéⁿ-güedé ñí xichi núú ùxí xichi nchaa sá níhí-yu cùu cuendá-güedé, te cue téé-án cuú-güedé. Te núú tütú Yã Ndiöxí càchí-xi sá ndíi Melquisèdec ndécú-ní ndíi, te ducaⁿ càháⁿ-xi chi ñá túú tnúhu sá ñí xíhí ndíi.

⁹⁻¹⁰ Te sá dúcáⁿ ñí sáñaha ndíi Àbrahám sá ñí nduu táhú ndíi Melquisèdec, te xíáⁿ cada iní-ó sá sá ndecu ndihí ndíi Àbrahám cue ñaní tnáhá ndíi Lèví cue téé cùu dútú, cue téé queheⁿ ñí xichi núú ùxí xichi nchaa sá níhí ñáyiú isràél cuèi vátá càcú-gã-güedé. Te cada iní-ó sá tnáhá-güedé ní sáha-güedé ndíi Melquisèdec ñí xichi núú ùxí xichi nchaa sá ñí níhí ndíi Àbrahám núú ñí nàá ndíi. Te ducaⁿ càda iní-ó chi cue téé-án cúu-güedé ñaní tnáhá ndíi Àbrahám cuèi vátá càcú-gã-güedé dàvá-án.

¹¹ Te sá cuendá cue dútú cue téé cùu ñaní tnáhá ndíi Lèví ní ngúndecu ndihí cue ñáyiú isràél tnúhu sá sánú ìchi ñaha xíí-yu nàcuáa cada-yu cundecú-yu. Te ñaní tnáhá ndíi Àrón cúu cuè dútú-án. Te núu dícó cue dútú-án ní ndàcu-güedé cada-güedé nàcuáa cudùu ñáyiú isràél núú Yã Ndiöxí, te ñá túú-gã xíí ñí ñuú-xi ngúndecu ingá dútú dàtná ndíi Melquisèdec ní cùu. Te dútú-án ñà túú ní cùu-dé dàtná ní cuu cue ñaní tnáhá ndíi Àrón.

¹² Te núú cuè dútú cue téé cùu ñaní tnáhá ndíi Lèví-án ní ngúndecu ingá dútú. Te sá dúcáⁿ ñí ngúndecu ingá dútú xíáⁿ dacuítíí ñí xini ñuhu-xi sá dãma nàcuáa ndùu tnúhu sá sánú ìchi ñaha xíí-yu nàcuáa cada-yu cundecú-yu.

¹³⁻¹⁴ Te ñí ndíi cuendá dútú-án sa níhí-ó tnúhu, te dútú-án cúu Xítoho Jesucristú, te ñá díú ñaní tnáhá ndíi Àrón cúu-gã chi ñaní tnáhá ndíi Jüdá cúu-gã. Te nchaa-o tà xini ndáá-ó sá ñaní tnáhá ndíi Jüdá cúu-gã,

te ndii Moisés ñá túú tnàhí ná ní càchí ndii cuendá cue ñaní tnáhá ndii Jùdá sá cúu-güedé dútú, chi ní ñⁿ-güedé ñá túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chi Xítohó Jesucristú cúu-gã ingá dútú dàtná ní cuu ndii Melquisèdec.

16 Te ñá díú cuendá tnúhu sá sánú ìchi ñaha xii ñáyiú nàcuáa cada-yu cundecú-yu ducaⁿ ní cùu-gá dútú, chi ní cuu-gá dútú cuendá sá cúu-gã Yaá cundecu ni caa ni quíhíⁿ chi vá ñⁿ ndùu te ndihi nihnu-gá.

17 Te duha ní xáhaⁿ Yã Ndiõxí xii-gá: Yòhó cúu-n dütú dàtná ní cuu ndii Melquisèdec,

te cundecu-n nchàa nduu nchaa quíú. Duha ní xáhaⁿ Yã Ndiõxí xii-gá.

18 Te xiãⁿ nùu nchaa tnúhu ndéé díhna, tnúhu sá ní xíndecu ndihi cue dútú ñá túú-gã cúnùu-xi vitna chi ñá túú-gã xini ñùhu-xi te ní ñá túú nã chindèe ñaha-xi.

19 Te diu-ni tnúhu-áⁿ cúu-xí tnúhu sá ní chídó tnùní ndii Moisés canu ìchi ñaha xii ñáyiú nàcuáa cada-yu cundecú-yu. Te tnúhu-áⁿ ñá túú vèdana ni quide-xi nacuáa chindee-xi ñáyiú cudiú-yu núu Yã Ndiõxí. Dico vitna ní ngúndecu ndihi-o tnúhu ndee ìní sá ïo-gá váha dàcúúxí tnúhu ndéé díhna, chi ndècu ndihi-o Xítohó Jesucristú Yaá cúu dütú-ó. Te Yaá-áⁿ quidé-gã tnáhá tnúhu-o ndihi Yá Ndiõxí vitna.

20 Te Yá Ndiõxí ní cáháⁿ ndáá cuiti-gá sá Xítohó Jesucristú cuu-gá dútú.

21 Dico ñá túú dùcaⁿ ní cáháⁿ-gá cuendá cue ñaní tnáhá ndii Lèví cue téé ní cuu dútú, cuèi mei òré ní chisaha-güedé ní cuu-güedé dútú. Te cùtnàhá ní chisaha Xítohó Jesucristú cúu-gã dútú, te Yá Ndiõxí ní xáhaⁿ ndáá cuiti-gá xii-gá, te duha ní xáhaⁿ-gã:

Yúhú Dütú Ndiõxí càháⁿ ndáá cuiti-í te vá dàmà-í tnúhu càháⁿ-í:

“Yòhó cúu-n dütú dàtná ndii Melquisèdec, te cundecu-n nì caa ni quíhíⁿ.”

Duha ní xáhaⁿ Yã Ndiõxí xii Xítohó Jesucristú.

22 Te Xítohó Jesucristú quidé-gã nàcuáa cutnùní ndáá iní-ó sã Yã Ndiõxí cada-gá ingá núu sã váha sá cúu-xí-ó dàtná ní cachí-gá, te xiãⁿ cúu-xí sã ïo-gá váha dàcúúxí tnúhu ní cáháⁿ-gá ndéé díhna.

23 Te ío cuéhé cue ñaní tnáhá ndii Lèví ní cuu-güedé dútú, te ducaⁿ cuendá sá ñá túú ní cùdí-güedé cundecu-güedé chi ní ndihi-güedé ní xíhí.

24 Dico Xítohó Jesucristú chi vá cùu-gá, chi cundecu-gá ni caa ni quíhíⁿ nùu xiãⁿ diu-ni-gá cuu-gá dútú, te vá yòo ñⁿ-gá cuu dútú cada núu-gã.

25 Te núu xiãⁿ Xítohó Jesucristú dácäcu nihnu ñaha-gã xii nchoo ñáyiú núu ùhú núu ndàhú, nchoo ñáyiú sàndáá iní ñáhá xii-gá, te diu-ni nchoo cùu-o ñáyiú tnáhá tnúhu ndihi Yá Ndiõxí, te vá ñⁿ ndùu-gá te cuíta nihnu-o. Te ducaⁿ chi Xítohó Jesucristú ñá túú xòcuñí-gá núu Yã Ndiõxí càháⁿ ndàhú-gá cuendá-ó.

26 Te Xítohó Jesucristú cúu-gã Yaá cúu dütú cúnùu xini ñuhu-o cundecu ndihi-o, te diu-gá cúu-gã Yaá chindèe chitúu ñaha xii-o, te cùu-gá Yaá ío quide ndáá núu Yã Ndiõxí, te cùu-gá Yaá cándòo canine chi ñá túú tnàhí cuéchi-gá. Te ñá túú tnàhí quide-gá dàtná quidé nchàa cue ñáyiú ndècu ìchi cuehé ìchi duha, te cùu-gá Yaá ní nucúndecu andiú nùu ndécú Yã Ndiõxí te yacáⁿ táxí tnùní-gá.

27 Te ñá túú quide-gá dàtná ní quide cue dütú ní cunuu ní xíndecu, chi cue dütú-ãⁿ ñⁿ nduu ñⁿ nduu ní xóo cahni-güedé quiti ní xóo nduu táhú Yã Ndiõxí, te díhna-gá cuendá nchaa cuéchi mee-güedé ducaⁿ ní xóo cada-güedé te dàtnùní ducaⁿ ní xóo cada tucu-güedé cuendá nchaa cuéchi ñáyiú. Dico Xítohó Jesucristú chi ñⁿ xito-ni ní xíhí-gá sá cúu-xí nchàa ñáyiú chi ducaⁿ ní sani iní-gá, te vá ñⁿ ndùu-gá ducaⁿ càda tucu-gá.

28 Te sá cuendá nchaa tnúhu ní chídó tnùní ndii Moisés xiãⁿ ní xíndecu cue téé ní cuu dütú cúnùu, te cue téé-áⁿ ní cuu-güedé cue téé yíca cuéchi-xi. Te sátá dúcáⁿ ní chídó tnùní ndii Moisés nàcuáa cada ñáyiú, te ní xica cuéhé víhí ndùu te dàtnùní ní cáháⁿ ndáá cuiti Yá Ndiõxí sá Dèhe-gá cuu-gá dütú cúnùu. Te Yaá cúu Dèhe-gá-áⁿ ní quide-gá nchaa nàcuáa tàú-xi cunduu, te diu-ni ducaⁿ càda-gá ni caa ni quíhíⁿ.

8

Xítohó Jesucristú cúu-gã dütú cúnùu

¹ Te Xítoho Jesucristú Yaá cúú dütú cúnùu ndecu ndihi-o cuánda-gá andiu, te ní ngóo-gá xio cùha Dütú Ndiöxí Yaá ío cúnuu, te tnáhá-gá cúnuu-gá. Te diu cuendá-a cùu-xi sá ío-gá cúnùu ta cáháⁿ-ndí véxi.

² Te núú ndécú Yă Ndiöxí cúú-xí núú lí víhí. Te cada iní-ó sá cúú-xí ìⁿ vehe te xíaⁿ ndécú Xítoho Jesucristú cúú-gă dütú, te vehe-áⁿ nĩ dácáá mèe Yá Ndiöxí te ñá díú cuè tée ñuyíú-a.

³ Te sá cuendá nchaa tnúhu ní chídó tnùní ndíi Moisés xíaⁿ ní xíndecu cue dütú cúnùu cuendá sá cáhni-güedé quiti nduu táhú Yă Ndiöxí, te nacani cuendá-güedé núú-gă nchaa dava-gá sá nihí-güedé nduu táhú-gă. Te xíaⁿ núu dai ní xini ñuhu-xi sá tnáhá Xítoho Jesucristú cuáñaha-gă ìⁿ sá ndúú táhú Yă Ndiöxí, te táhú-ăⁿ cúú-xí mèe-gá chi ní xihí-gá ní cuu-gá dàtná ìⁿ táhú sá cúú-xí Yă Ndiöxí.

⁴ Te núu nĩ xíndecu-ni Xítoho Jesucristú ñuyíú-a te vá cúú-gă dütú ní cùu, chi sa ndècu cue dütú sãñaha nchàa sá ndúú táhú Yă Ndiöxí dàtná cáháⁿ nchaa tnúhu ní chídó tnùní ndíi Moisés.

⁵ Te nchaa sá quidé cuè dütú ñáyiú isràél nũtnahá-xi luha nchaa sá quidé Xítoho Jesucristú Yaá cúú dütú cúnùu ndecu andiu. Te quèe ndáá-xi nàcuáa ní xáhaⁿ Yă Ndiöxí xii ndíi Moisés cútnahá tá cùyatni ngüita ndíi dacàa ndíi vehe-gá, te duha ní xáhaⁿ-gă: “Ío váha cada cuendá-n nàcuáa dacàa-n vehe-í dàtná cáá sá nĩ dánèhé ñáhà-í xii-n xití yucu”, duha ní xáhaⁿ-gă xii ndíi.

⁶ Dico vitna chi Xítoho Jesucristú cúú-gă dütú cúnùu, te ío-gá càhnu nduu chiuⁿ quide-gá dácúúxí cuè dütú cue ñáyiú isràél. Te diu Xítoho Jesucristú cúú-gă Yaá quidé tnáhá tnúhu-o ndíhi Yá Ndiöxí, te ducaⁿ chi Yá Ndiöxí ío-gá váha ndùu tnúhu ní cáháⁿ-gá xito cùu uú dácúúxí tnúhu ní cáháⁿ-gá ndéé díhna, te ducaⁿ ío váha ndùu tnúhu ní cáháⁿ-gá xito cùu uú chi ní cachí-gá sá ìngá núú sá ío-gá váha cada ñaha-gă xii-o vitna.

⁷ Te núu nàcuáa ní cachí Yă Ndiöxí cada ñaha-gă xii-o ndéé díhna nĩ quide-xi nchaa nacuáa tàú-xi cunduu nàcuáa nduu táhú-ó cùndecu váha-o núú-gă ñá, te ñá túú xini ñuhu-xi cáháⁿ tucu-gá sá cádá-gă ìngá núú sá váha sá cúú-xí-ó vitna nĩ cuu.

⁸ Te Yá Ndiöxí ñá túú ní cùu váha iní-gá núú ñáyiú isràél núu xíaⁿ ní cáháⁿ-gá

cuendá-yu, te duha ní cachí-gá:

Yúhú cúú-í Dütú Ndiöxí, te duha ndùu tnúhu na cáháⁿ-í: Sáá nduu te cada-í ìngá núú sá váha sá cúú-xí cuè ñani tnáhá ñáyiú isràél, ndíhi cue ñani tnáhá ndíi Jüdá diu-ni ñáyiú isràél.

⁹ Te tnúhu sá cáháⁿ-í-a ñá túú ìⁿ-ni cuu-xi ndíhi tnúhu sá nĩ xáhaⁿ-í xii cue ñáyiú ní cuu ñani tnáhá-yu ní xíndecu ndéé sanaha càda-í-yu,

te diu-ni dàvá-áⁿ nĩ quide yica-í ní ndeñuhu-í-yu nacióⁿ Ègiptú,

te ñá túú ní cuiní-yu tníⁿ-yu tnúhu ní xáhaⁿ-í xii-yu cuendá ducaⁿ càda váha-í-yu, te xíaⁿ núu ní dáñá nihnu-í-yu ñá túú-gă ní quide cuendá-í-yu.

¹⁰ Te na sáá nduu te duha ndùu tucu ìngá núú sá váha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuiní-í cadá-yu,

te ducaⁿ nĩ yuhu nĩ iní-yu cadá-yu.

Te yúhú Yă Ndiöxí quindaha-í-yu,

te mèe-yu cuú-yu ñáyiú cùu cuendá-í.

¹¹ Te dàvá-áⁿ chi nĩ ñáyiú cùu ndí meé-yu, te nĩ cuè dava-gá ñáyiú vá cùtnúhu tnáhá-yu sá nátùha ñahá-yu xii-í, chi dàvá-áⁿ nchaa ñáyiú cundecu ndíhi ñahá-yu xii-í,

cuèi ñáyiú cúnuu te cuèi ñáyiú ñá túú cúnuu.

¹² Te dàvá-áⁿ cada càhnu iní-í nchaa sá cuèhé sá dúhá quidé-yu,

te vá ìⁿ ndùu-gá ndacu iní-í nchaa sá quidé-yu.

Duha ní cachí Yă Ndiöxí cuendá ñáyiú isràél.

¹³ Te sá dúcáⁿ nĩ cáháⁿ Yă Ndiöxí sá cádá-gă ìngá núú sá váha sá cúú-xí ñáyiú xíaⁿ cútnùní sá tnúhu sá nĩ cáháⁿ-gá díhna ñá túú-gă xini ñuhu-xi. Te cada iní-ó sá tnúhu-áⁿ cúú-xí ìⁿ sá nĩ cunaha ndècu te ñá túú-gă nándíhi-xi te cuíta-ná-xi, ducaⁿ sãtnahá-xi cùu tnúhu sá nĩ cáháⁿ-gá ndéé díhna.

9

Cuendá vehe Yá Ndiöxí

¹ Te tnúhu sá nĩ cáháⁿ Yă Ndiöxí ndéé díhna cùu-xi cuendá nàcuáa cada ñáyiú isràél chiñuhu ñahá-yu xii-gá, ndíhi cuendá vehe-gá caa ñuyíú-a.

2 Te ñáyiú isràél ní dácáã-yu vehe Yá Ndiöxí, te vehe-án nǐ cuu-xi vehe dóó te ní xúhuⁿ nehu xití-xi. Te cuàrtú díhna ní xínani-xi cuàrtú ní cuu íí, te xiáⁿ nǐ xíndecu ñⁿ sá ndèé dité-xi sá nǐ cándodó ñⁿ caa candíl núú dité-xi, te ní xínutnǐ ñⁿ mèsá ní xóo códó pàá ní xóo nduu táhú Yá Ndiöxí.

3 Te cuàrtú cúú ùú ní xínani-xi cuàrtú ní cuu íí víhí-gã.

4 Te xití cuàrtú-án nǐ xínutnǐ ñⁿ sá nǐ cuáha mee-ni díhúⁿ cuááⁿ te núú xiáⁿ ní xóo cahmí-güedé dúsa sá sàháⁿ tnámí. Te ñⁿ xíáⁿ nǐ xíndecu tucu ñⁿ càjá ní cuu mee-ni díhúⁿ cuááⁿ te xití càjá-án nǐ xúhuⁿ ñⁿ lítu ní cuáha mee-ni díhúⁿ cuááⁿ, te xití lítu-án nǐ xúhuⁿ mànáá sá nǐ xóo caxí-yu dàvá-án. Te ñⁿ xíáⁿ nǐ xíndecu càjá-án nǐ xúhuⁿ tnudì ndí Àrón sá nǐ saa itá-xi, ndíhí yúú sá nǐ xíndéé tnúhu ní cáháⁿ Yá Ndiöxí nàcuáa cada ñáyiú. Te duha ní xínani càjá-án: Càjá sá ñúhú tnúhu ní cáháⁿ Yá Ndiöxí sá cúú-xí ñáyiú, duha ní xínani-xi.

5 Te núú càjá-án nǐ cándodó ùú tnàhá sá nǐ cadúha-yu, te xiáⁿ cáá-xí dàtná cáá espíritú xínú cuèchi núú Yá Ndiöxí. Te cuèndá úú xiáⁿ ní cutnùnì iní-yu sá ïo càhnu cuu Yá Ndiöxí, te sá nǐ cadúha-yu-án ndèé ndíxíⁿ-xi, te ndíxíⁿ-xi-án dàhu-xi xio xio núú quidé càhnu iní Yá Ndiöxí nchaa yíca cuèchi ñáyiú, dico vá cúú-gã cáháⁿ-í cuèndá nchaa dava-gá xiáⁿ vitna.

6 Te nchaa xiáⁿ ní xíndecu xití vehe Yá Ndiöxí, te cue dútú nǐ xóo quíhu-güedé ñⁿ nduu ñⁿ nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yá Ndiöxí.

7 Te cuàrtú cúú ùú-án chi mee-ni dútú cúnùu ní xóo quíhu-dé ñⁿ xito-ni ndi tnahá cuíá. Te ndi tnahá òré ducaⁿ nǐ xóo quíhu dútú cúnùu-án te ní xóo canehe-dé ñíñí nǐ xóo quíhu ní xóo nduu táhú Yá Ndiöxí. Te ducaⁿ nǐ xóo cada dútú-án cuèndá sá Yá Ndiöxí cada càhnu iní-gá nchaa yíca cuèchi mee-dé, ndíhí nchaa yíca cuèchi ñáyiú.

8 Te sá dúcáⁿ mée-ni dútú cúnùu ní xóo quíhu-dé xití cuàrtú ní cuu íí-gã-án, xiáⁿ Espíritú Yá Ndiöxí quidé-xí cutnùnì iní-ó sá ñìni ducaⁿ ní xíndecu vehe-án nǐ xóo cada-yu nàcuáa ní xóo cúnaha Yá Ndiöxí cada-yu. Te xiáⁿ cutnùnì sá vátá sàá-gá

nduu cãháⁿ ndíhí-yu Yá Ndiöxí nàcuáa tàú-xi cunduu.

9 Te sá dúcáⁿ nǐ xíndecu vehe-án, ndíhí sá dúcáⁿ nǐ xóo cada nchaa cue dútú-án, xiáⁿ cutnùnì iní-ó nàcuáa quíde Yá Ndiöxí vitna, chi nchaa quití ní xóo cahni cue dútú-án nǐ xóo nduu táhú Yá Ndiöxí, ndíhí nchaa dava-gá sá nǐ xóo nduu táhú-gã ñá túú ní quíde-xi nàcuáa nduu ndoo nduu nine iní cue ñáyiú nàcuáa cutnùnì iní-yu sá ñá túú-gã cuèchi-yu ndècu núú Yá Ndiöxí.

10 Te sá dúcáⁿ nǐ xóo cada nchaa dútú-án nǐ níhí tnàhá-xí ndíhí nchaa tnúhu sá dánèhé ñáhá xì ñáyiú ná cúú sá caxí-yu ndíhí ná cúú sá cúú còhó-yu ndíhí nàcuáa ndàhá-yu. Te tnúhu-án nǐ cuu-xi mee-ni sá nǐ sanu ichi ñaha xì-yu nàcuáa cundecú-yu ñuyú-a. Te tnúhu-án nǐ nándíhí-xi ndéé ní sáá nduu nǐ nadama Yá Ndiöxí tnúhu-án cuèndá sá vã dúcáⁿ-gã cada-yu cundecú-yu.

11 Te Xítohó Jesucrìstú ní quixi-gá ñuyú-a, te ñⁿ xíáⁿ cúú-gã Yaá cúú dútú cúnùu, te xiáⁿ núu quíde-gã nchaa sá vãha sá cúú-xí-ó. Te vitna ní nucúndecu-gá núú ïo vii ïo váha càa, te núú ndécú-gã-án ñá túú cùu-xi ñⁿ vehe sá nǐ dácáá cuè téé ñuyú-a.

12 Te cada iní-ó sá Xítohó Jesucrìstú cuánguihu-gá xití cuàrtú núú nǐ cuu íí víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gá núú ndécú Yá Ndiöxí. Dico ñá túú ní quíde-gã dàtná ní xóo cada dútú cúnùu ní xíndecu ndéé sanaha, chi dútú-án òré ní xóo quíhu-dé xití cuàrtú ní cuu íí-gã-án, te ní xóo canehe-dé ñíñí chivá ndíhí ñíñí chēhlu ní xóo quíhu. Dico Xítohó Jesucrìstú chi ñíñí mée-gã ní sati ní xíhí-gá núú cùrúxí, te xiáⁿ duuⁿ duuⁿ cuáháⁿ-gá ní nucúndecu-gá núú ndécú Yá Ndiöxí. Te sá dúcáⁿ nǐ quíde-gã xiáⁿ ní naníhí tàhú-ó.

13 Te nchaa ñáyiú ní xóo cada nàcuáa vá cúú-gã-yu ñáyiú ní cuu íí, ñáyiú-án nǐ xóo códó ñáhá cuè dútú ñíñí ndicutu, ndíhí ñíñí chivá, ndíhí yáá cúnú chēhlu quití sàhni-güedé cuèndá nduu íí tucú-yu.

14 ¡Dico ñíñí Xítohó Jesucrìstú chi ío-gá nándíhí-xi sá cúú-xí nchòo ñáyiú xíndecu vitna! Te cuèndá ñíñí-gã-án, chi Espíritú Yá Ndiöxí sá ndécú nchaa nduu nchaa quíú nǐ cuu ñⁿnuu-xi ndíhí Xítohó Jesucrìstú sá

cúu cùu-gá cuendá cuu-gá dàtná ìⁿ táhú sã cúu-xí Yã Ndiöxí cuéi cùu-gá Yaá ñá túú tnàhí cuéchi-xi, te ní sati níñí-gã te ní xíhí-gá. Te cuendá xiãⁿ ní cutnùnì iní-ó sã Yã Ndiöxí ní quide càhnu iní-gá nchaa sã ñá túú vãha ní quide-o, te ní nduu ndoo ní nduu nine iní-ó. Te ducaⁿ ñí nduu ndoo ní nduu nine iní-ó cuendá sã ndácú-ó cùnu cuechi-o núú Yã Ndiöxí Yaá ndécú nchaa nduu nchaa quiú.

15 Te Xítohó Jesucristú ní quide ndáá-gá núú Yã Ndiöxí cuendá cue ñáyiú ndècu ñuyíú-a. Te cuendá xiãⁿ Yã Ndiöxí cada-gá ingá núú sã vãha sã cúu-xí-yu dàtná ní cachí-gá, te ducaⁿ càda-gá sã cuendá nchaa ñáyiú ní cáháⁿ-gá cundecu ndíhí-gá, chi ñáyiú-áⁿ nduu táhú-yu cundecu ndíhí vãha ñàhá-yu xii-gá ní caa ní quihíⁿ chi ducaⁿ ñí cachí-gá, te ducaⁿ chi Xítohó Jesucristú ní xíhí-gá núú cùrúxí cuendá sã Yã Ndiöxí cada càhnu iní-gá nchaa yíca cuéchi-yu, nchaa cuéchi sã ñí quidé-yu cùtnàhá ní cunuu tnúhu sã ñí cáháⁿ-gá díhna.

16 Te nchoo xíní-ó sã núú ìⁿ téé na càdúha ìⁿ tutú nàcuáa cada ñáyiú dàcáhñu-yu nchaa sã ndécú ndíhí-dé, te tutú-áⁿ xíní ñùhu-xi ndéé ná yãha nduu cùu-dé.

17 Te ñá túú tàu-xi cada ñáyiú nàcuáa càháⁿ-xi núú tütú-áⁿ ñini ndècu téé ní cadúha, dico sátá ná yãha cuú-dé te cadá-yu nàcuáa càháⁿ-xi.

18 Te cuéi tnúhu ní cáháⁿ Yã Ndiöxí ndéé díhna nàcuáa cada vãha-gá ñáyiú, te ñu-ni ndíhí níñí ñí cundáá-xi chi ní sahani-güedé quiú te ní sati níñí-güedi.

19 Te ndí Moisés ní cáháⁿ ndodo ndí núú nchaa ñáyiú nàcuáa ní cachí Yã Ndiöxí cadá-yu, te nàcuáa-ni ndúu tnúhu ní chídó tnùnì ndí núú tütú ndí ní cáháⁿ ndí, te ní dácá ndí ndute níñí chëhlu ndíhí níñí chívá líhli, te ní queheⁿ ndí ìⁿ dité yutnu nàni hisópó ndíhí luha idi ticuèhé, te ní chindóyo ndí níñí-ãⁿ. Te ní sódo ndí núú tütú ndéé tnúhu Yã Ndiöxí sã ní chídó tnùnì ndí-áⁿ, te tnàhá cue ñáyiú xíndecu-áⁿ ñí chúcú ndí.

20 Te ní xáhaⁿ ndí Moisés xií-yu: “Cuendá níñí-a ní cundáá sã Yã Ndiöxí cada ñaha-gã xii-ndo sã vãha chi ducaⁿ ñí cachí-gá cada-gá sã cúu-xí-ndó”, duha ní xáhaⁿ ndí xií-yu.

21 Te ñu-ni ducaⁿ ñí quide tucu ndí ní

chúcú ndí níñí vehe-gá ndíhí nchaa sã nándíhí-güedé òré chíñùhu-güedé Yã Ndiöxí ndécú xítí vehe-gá-áⁿ.

22 Te tnúhu ní chídó tnùnì ndí Moisés càchí-xi sã méé-ní níñí chucu-güedé nchaa sã cànehe chiúⁿ-güedé òré chíñùhu-güedé Yã Ndiöxí, te sacú-nã te ndíhí ndoo nchaa xiãⁿ chucu-güedé níñí ní cùu. Te dacuítí ñí xini ñuhu-xi sã cáti níñí cuendá ducaⁿ càda càhnu iní Yã Ndiöxí nchaa yíca cuéchi ñáyiú.

Xítohó Jesucristú ní xíhí-gá núú cùrúxí cuendá sã vã cùndècu-gá cuéchi-o núú Yã Ndiöxí

23 Te sã cuendá sã ní xíhí Xítohó Jesucristú núú cùrúxí, xiãⁿ ñá túú-gã cuéchi-o ndècu núú Yã Ndiöxí. Te cuendá nchaa sã ñí xíhí xítí vehe-gá sã ñí dácáá ñáyiú isràél xiãⁿ cùtnùnì iní-ó nàcuáa quide-xi núú ndécú-gã. Te dacuítí ñí xini ñuhu-xi sã cáhí-güedé cue quiú ní cachí Yã Ndiöxí cuendá nduu íí nchaa sã ñí xíhí xítí vehe-gá-áⁿ. Te cuéi ducaⁿ ñí sahani-güedé cue quiú-áⁿ dico ñá túú ní quide-xi nàcuáa ngúndecu vãha-o núú Yã Ndiöxí. Dico Xítohó Jesucristú ní xíhí-gá, te sã ñí xíhí-gá xiãⁿ ní quide-gá nàcuáa ngúndecu vãha-o núú Yã Ndiöxí.

24 Te Xítohó Jesucristú cuándaa-gá andíu núú ndécú Yã Ndiöxí càháⁿ ndàhú-gá cuendá-ó, te Xítohó Jesucristú chi ñá díú ìⁿ vehe ní dácáá cué téé ñuyíú-a cuánguihu-gá. Te vehe Yã Ndiöxí sã ñí dácáá cué ñáyiú isràél ñuyíú-a ndéé sanaha, ndíhí nchaa nàcuáa ní xóo cada-güedé xítí vehe-gá-áⁿ xiãⁿ cùtnùnì iní-ó nàcuáa quide-xi núú ndécú-gã.

25 Te dútu cùnùu núú ñáyiú isràél ní xóo quiú-dé núú cuiá núú cuiá xítí cuàrtú ní cuu íí víhí-gã-áⁿ, te ní xóo canehe-dé níñí ñí xóo quiú xítí cuàrtú-áⁿ dico ñá díú níñí méé-dé. Dico Xítohó Jesucristú chi ñá túú dùcaⁿ ní quide-gá chi ìⁿ xito-ni ní sati níñí-gã te ní xíhí-gá.

26 Chi núu ní xíhí-gá nuu núu te ndéé cùtnàhá ní ngáva ñuyíú ducaⁿ ngüíta-gá cada-gá ní cùu, te vitna ta ndíhí nduu cuáháⁿ ní quixi-gá ñuyíú-a ní xíhí-gá ìⁿ xito-ni cuendá cuu-gá dàtná ìⁿ táhú sã

cúu-xí Yă Ndiöxí, te ducaⁿ ñi quide-gá cuendá sá vă cündecu-gá cuéchi ñáyiu núu Yă Ndiöxí.

²⁷ Te nchoo cuè ñáyiu ñuyú-a chi #ⁿ xito-ni cuú-ó te dătnùní ducaⁿ te cada ndáá Yă Ndiöxí cuéchi-o.

²⁸ Te ducaⁿ săt nahá-xi cùu Xítóhó Jesucristú chi #ⁿ xito-ni ní xíhí-gá cuendá sá vă cündecu-gá cuéchi ñáyiu núu Yă Ndiöxí, te ducaⁿ ñi cuu ní xíhí-gá chi mee-gă ducaⁿ ñi cachí-gá cunduu. Te quixi tucu Xítóhó Jesucristú ñuyú-a dico ñá díú-gă sá cáda-gă cuendá sá vă cündecu-gá cuéchi ñáyiu núu Yă Ndiöxí, chi quixi-gá nacuaca-gă nchaa ñáyiu ndètu ñaha xii-gă cuendá cundecú-yu ndihí-gá ni caa ni quihíⁿ.

10

¹ Te nchaa tnúhu ní xáhaⁿ ndíi Moisés xii ñáyiu israél cada-yu, nchaa tnúhu-áⁿ ñi quide-xi ní cutnùní luha iní-yu năcuáa cada Yă Ndiöxí cada váha ñaha-gă xii-o vitna. Dico ñá díú mèi nacuáa ní xáhaⁿ ndíi Moisés xii ñáyiu quide Yă Ndiöxí vitna chi dăma quide-gá. Te nchaa tnúhu ní cáháⁿ ndíi Moisés ñá túú ní ndăcu-xi cada-xi nacuáa cundáa nchaa ñáyiu túha ñaha xii Yă Ndiöxí cuèi ní xóo cahni-güedé quiti ní xóo nduu táhú-gă núu cuíá núu cuíá.

² Te núu dícó sá ñi xóo cahni-güedé quiti ní xóo nduu táhú Yă Ndiöxí ní quide-xi nacuáa nduu ndoo nduu nine iní cue ñáyiu, te vá cáhni-gă-güedé cue quiti-áⁿ nduu táhú-gă ní cùu, te ducaⁿ te cutnùní iní-yu sá ñà túú-gă cuéchi-yu ndècu núu Yă Ndiöxí ní cùu.

³ Te sá dúcáⁿ ñi xóo cahni-güedé quiti ní xóo nduu táhú Yă Ndiöxí núu cuíá núu cuíá, xíáⁿ ní xóo ndacu iní cue ñáyiu nchaa sá cuèhé sá dúhá ñi xóo cada-yu.

⁴ Te ducaⁿ chi níñi ndicutu-áⁿ ndihí níñi chivá-áⁿ ñà túú ní xóo ndacu-xi cada-xi năcuáa vá cündecu cuéchi-yu núu Yă Ndiöxí.

⁵ Te xíáⁿ núu cúnahá ní quexio Xítóhó Jesucristú ñuyú-a ní xáhaⁿ-gă xii Yă Ndiöxí: Yòhó Tătà-í, ñá túú ndùu vétú váha iní-n să sáhni-güedé quiti ndùu táhú-n,

te ni ñà túú ndùu vétú váha tucu iní-n cuendá nchaa dava-gá sá táxi-güedé ndúú táhú-n,

núu xíáⁿ ní quide túha-n yiqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñà túú ndùu vétú váha iní-n cuendá quiti sáhmi-güedé ndúú táhú-n te ni ñà túú ndùu vétú váha iní-n cuendá nchaa dava-gá sá táxi-güedé ndúú táhú-n cuendá sá vă cündecu-gá cuéchi ñáyiu núu-n.

⁷ Núu xíáⁿ yúhú ní cachí-í xii yòhó Tătà-í Dútú Ndiöxí sá yúhú véxi-í ñuyú-a cada-í nchaa sá cuini-n cada-í dătná yódó tnùní cuendá-í núu tütú-n.

Duha ní xáhaⁿ Xítóhó Jesucristú xii Tătá-gă Dútú Ndiöxí.

⁸ Te Xítóhó Jesucristú díhna-gá ní xíi-gá Yă Ndiöxí Yaá cúu Tătá-gă: “Yòhó Tătà-í ñà túú ndùu vétú váha iní-n cuendá quiti sáhmi-güedé ndúú táhú-n, ndihí cuendá quiti sáhmi-güedé ndúú táhú tucu-n cuendá sá vă cündecu-gá cuéchi ñáyiu núu-n, ndihí cuendá nchaa dava-gá táhú să táxi-güedé xii-n ñà túú ndùu vétú váha iní-n cuendá nchaa xíáⁿ”, duha ní xáhaⁿ Xítóhó Jesucristú xii Tătá-gă Dútú Ndiöxí. Te ducaⁿ ñi xáhaⁿ-gă cuèi núu tütú ndíi Moisés yódó tnùní sá dúcáⁿ cada-güedé.

⁹ Te sá tá dúcáⁿ te ní xáhaⁿ tucu-gá xii Tătá-gă Dútú Ndiöxí: “Yòhó Tătà-í Dútú Ndiöxí, mee-í véxi-í ñuyú-a cuendá cada-í nchaa năcuáa cuini-n”, duha ní xáhaⁿ-gă xii Tătá-gă. Te sá dúcáⁿ ni cáháⁿ Xítóhó Jesucristú xíáⁿ ní cutnùní sá ñà túú-gă xini ñuhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xíhí-gá ní cuu-gá dătná #ⁿ táhú să cúu-xí Yă Ndiöxí, te ducaⁿ ñi cuu chi ducaⁿ tnàhí ní cachí Yă Ndiöxí cunduu.

¹⁰ Te Xítóhó Jesucristú ní quide-gá năcuáa ní cuini Yă Ndiöxí cada-gă, chi ní xíhí-gá núu cùrúxí chi ducaⁿ ñi cuini méé-gă cunduu, te #ⁿ xito-ni ní xíhí-gá sá cuendá nchaa ñáyiu, te cuendá xíáⁿ núu ndècu yíñuhu-o núu-gă vitna.

¹¹ Te cue dútú ñáyiu israél chi #ⁿ nduu #ⁿ nduu ní xóo cahni-güedé quiti ní xóo nduu táhú-gă, te ñà túú ní dăma-güedé năcuáa ní xóo cada-güedé. Te nchaa sá ñi xóo cada-güedé-áⁿ ñà túú ní quide-xi nacuáa vá cündecu-gá cuéchi ñáyiu núu Yă Ndiöxí.

¹² Dico Xítóhó Jesucristú ní cachí-gá sá cúu cùú-gă, te ní xíhí-gá núu cùrúxí cuendá

nchaa yíca cuèchi nchaa nchoo ñâyiu ndècu ñuyíú-a. Te sátá dúcáⁿ te dàtnùnì ní ngóo-gá xio cùha Dútú Ndiöxí táxi tnùnì-gá, te vá ñⁿ ndùu ñⁿ quiú-gã te cuú-gá.

13 Te diu-ni xiáⁿ cundecu-gá cundetu-gá ndéé sáá nduu cànehe nchaa sá cuú ùhú iní ñáhá xì-gá sá yíñùhu núú-gã.

14 Te cuendá sá ñí xíhí Xítohó Jesucristú ñⁿ xito-ni xiáⁿ ní cuu-gá dàtná ñⁿ táhú sã cuú-xí Yã Ndiöxí, xiáⁿ ní quide-xi sá ncháá ñâyiu cùu cuendá-gá ñá túú-gã ná cumánñ-yu núú-gã ni caa ni quihíⁿ.

15 Te mee Espíritú Yã Ndiöxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

16 Sáá nduu te cada-í nchaa ñâyiu nàcuáa na càháⁿ-í-a,
te cada-í nàcuáa cutnùnì iní-yu tnúhu sá dánèhé-í-yu tnúhu sá cánùichi ñaha xií-yu nàcuáa cada-yu cundecú-yu,

te cada tucu-í sá tníⁿ-yu nchaa tnúhu-áⁿ.

Duha ní cachí-gá.

17 Te ní cachí tucu-gá:

Te vá ñⁿ ndùu ñⁿ quiú-gã ndacu iní-í sá quidé sáá iní-yu tnúhu-í,

te ni vã ñⁿ ndùu ñⁿ quiú-gã te ndacu iní-í nchaa sá cuèhé sá dúhá quidé-yu.

Duha ní cáháⁿ Yã Ndiöxí càhí Espíritú-gá.

18 Te sá dúcáⁿ quide cahnu iní Yã Ndiöxí nchaa cuèchi-o, núu xiáⁿ ñá túú-gã xíní ñùhu-xi cuú quiⁿ nduu táhú-gã cuendá nchaa sá cuèhé sá dúhá quide-o.

Tàú-ó sã tnàhá tnúhu-o ndìhi Yã Ndiöxí

19 Te cue dútú ñí xóo cunuu núú ñâyiu israhél cue té-áⁿ ñí xóo quihu-güedé xití cuartú ní cuu íí víhí-gã. Dico nchoo cue ñâyiu ndècu ichi Xítohó Jesucristú vitna tàú-ó sã ñí yuhu ñí iní-ó tnàhá tnúhu-o ndìhi Yã Ndiöxí. Te cuu tnahá tnúhu-o ndìhi-gá chi Xítohó Jesucristú ní sati ñíñí-gã te ní xíhí-gá núú cùrúxí.

20 Te cada iní-ó sã dõó sã ñí xíndedí nàcuáa ní xóo quihu-güedé xití cuartú ní cuu íí víhí-gã-áⁿ ñí xócuñí, te ducaⁿ càda iní-ó chi Xítohó Jesucristú ní xíhí-gá cuendá nchoo ñíhí-ó nàcuáa cada-o ngündecu váha-o sã cuú-xí-gã.

21 Te diu-gá cuú-gã Yaá cuú dütú-ó, te diu-gá cuú-gã Dútú cùnùu ndecu-gá núú ndécú Yã Ndiöxí.

22 Núu xiáⁿ xíní ñùhu-xi sá ño tnahá tnúhu-o ndìhi Yã Ndiöxí, te vá cání ñⁿ caní úú iní-ó, te ño váha quindáá iní-ó-gã chi diu-gá ní ndada ndoo ní ndada nine-gá iní-ó cuendá nchoo cùtnùnì iní-ó sã ñà túú-gã cuèchi-o ndècu núú-gã. Te ní sandute-o cuendá sá dúcáⁿ ñí nduu ndoo ní nduu nine iní-ó.

23 Te nchoo càháⁿ ndáá-ó sã ndécú ndìhi-o tnúhu ndee iní sá ndúú táhú-ó cündecu ndìhi-o Yã Ndiöxí, te xíní ñùhu-xi sá vã dáñá ndéé-ó càncicúⁿ nihnu-o tnúhu ndee iní-áⁿ chi Yã Ndiöxí cada-gá nàcuáa ní cachí-gá sá cuú-xí-ó.

24 Te xíní ñùhu-xi cuhuⁿ iní tnàhá-ó te chindee tnàha-o nàcuáa ducaⁿ cùu iní tnàhá-gã-ó, te cada-o mée-ñí sá váha.

25 Te nchoo vã dáñá ndéé-ó nàtacá-ó núú dácuàha-o tnúhu Yã Ndiöxí, te vá cadá-ó dàtná xiquide davá-yu ñá túú-gã cuíní-yu quixí-yu núú dácuàha-o tnúhu-gã. Chi xíní ñùhu-xi sá cuàha tnàha-o tnúhu ndee iní canchicúⁿ nihnu-o ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítohó Jesucristú ñuyíú-a.

26 Te cue ñâyiu sa ní tecú tnùnì nàcuáa càháⁿ tnúhu Yã Ndiöxí te núu na ngüta-yu ñucùuⁿ cada-yu nándi sá cuèhé sá dúhá, te àúⁿ nã cuu ní xíhí Xítohó Jesucristú cuendá-yu, te ni vã yõo ñⁿ-gá cuú cuendá sá vã cündècu-gá cuèchi-yu núú Yã Ndiöxí.

27 Te núu ducaⁿ na càdá-yu nándi sá cuèhé sá dúhá, te ño quiyùhú iní-yu nàcuáa cada ñaha Yã Ndiöxí xií-yu. Chi nchaa ñâyiu cùu úhú iní ñáhá xì-gá daquihíⁿ ñáhá-gã xií-yu núú ñùhú núú càyú núú ño ndohó-yu.

28 Te nchaa ñâyiu ní xóo daquèe tíhú tnúhu ní cáháⁿ ndíi Moisés, te núu ndècu úú àdi úní ñâyiu càháⁿ ndáá sá dúcáⁿ ñí dáquée tíhú-yu tnúhu ní cáháⁿ ndíi, te vá yõo ñí xóo cundàhú iní ñáhá xì nchaa ñâyiu ducaⁿ ñí xóo cada chi ní xóo cahni ñaha-güedé.

29 Te núu ducaⁿ ñí ndoho cue ñâyiu ducaⁿ ñí dáquée tíhú tnúhu ní cáháⁿ ndíi Moisés-áⁿ, te uuⁿ-gá ndoho cue ñâyiu dàquèe tíhú ñáhá xì Xítohó Jesucristú Yaá cuú Déhe Yã Ndiöxí diu-ni ñâyiu càhí sá ñà túú nàndìhi ñíñí-gã. Te ñíñí-gã-áⁿ ñí sati, te

ní xíhí-gá, te ducaⁿ nǐ cuu cuendá cada Yá Ndiöxí ingá núú sǎ vǎha sá cúú-xí nchòo ñáyiú ndècu ñuyíú-a dàtná ní cachí-gá cada-gá. Te diu-ni cuendá níñí-gǎ-án nǐ nduu ndoo ní nduu nine iní cue ñáyiú-án ní cùu, te diu-ni ñáyiú-án càháⁿ úhú-yu Espiritú Yá Ndiöxí sá chindèe chitúu ñaha xii-o.

³⁰ Te nchoo sà naha-o sá Yá Ndiöxí càchí-gá ñⁿ xichi núú tütú-gá: “Yúhú cada-í te nacháhu ñáyiú nchaa sá quidé-yu, te duha càháⁿ-í chi nachinaa-í cuendá nchaa sá quidé-yu-án”, duha càchí-gá. Te sa naha tucu-o nacuaá càháⁿ-xí núú tütú-gá núú càchí-xi: “Yá Ndiöxí cada ndáá-gá cuendá nchaa sá quidé ñáyiú cùu cuendá-gá”, duha càchí-xi núú tütú-gá.

³¹ Te ío ndàhú ndoho cue ñáyiú na dàndoho ñaha Yá Ndiöxí, te diu-gá cúú-gǎ Yaá cúnùu nchaa nduu nchaa quíú!

³² Te chí dándàcu iní nàcuáa ní quide-ndo cùtnàhá vitna cuu saa ní tecú tnùnín-dó tnúhu Yá Ndiöxí, chi dàvá-án nǐ quide càhnu iní-ndó cuèi nándi sá nǐ yáha-ndo cuendá-gá.

³³ Te dava-ndo nǐ quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáhǎⁿ-yu xii-ndo. Te dava-ndo nǐ cuyí-ni-ndo nǐ xíndecu ndíhi tnàha-ndo cuèi nándi ní ndoho dava-gá-ndó.

³⁴ Te ní cundàhú iní-ndó cuè ñáyiú yíhi vecaá, te cuèi ní quendé ñáyiú sá ndécú ndíhi-ndo dico ñá túú ní ndíhú iní-ndó chi ní cudí-ni iní-ndó. Te ducaⁿ nǐ quide-ndo chi sa nàha-ndo sá ndúú tǎhú-ndó sǎ ío-gá vǎha, te xǎⁿ cundecu ndíhi-ndo nǐ caa ni quíhíⁿ.

³⁵ Te xǎⁿ vá dáñá ndèé-ndó quíndáa iní-ndó nàcuáa ní cachí Yá Ndiöxí cada ñaha-gǎ xii-ndo, chi sáá nduu te ío vǎha cada ñaha-gǎ xii-ndo.

³⁶ Te nchòhó xíní ñúhu-xi ío cada ndee iní-ndó càda-ndo nchaa nacuaá càháⁿ Yá Ndiöxí, te ducaⁿ te nduu tǎhú-ndó sǎ ní cachí-gá nduu tǎhú-ndó cundecu ndíhi-ndo ni caa ni quíhíⁿ.

³⁷ Te Yá Ndiöxí càchí-gá núú tütú-gá:

Ta cùyatni vií-nǎ nduu quíxi Yaá quíxi ñuyíú-a, te vá cùyàa-gá.

³⁸ Te nchaa ñáyiú cundáa núú-í ñá túú dàña ndeé-yu sàndáa iní ñáhǎ-yu xii-í, te cuendá xǎⁿ cundecu-ni-yu ichi-í, dico núu na dàña-yu ichi-í te vá cúú vǎha iní-í núú-yu.

Duha càchí Yá Ndiöxí núú tütú-gá.

³⁹ Dico nchoo chi ñá túú cùu-o ñáyiú ducaⁿ xíquide dàña-ó ichi Yá Ndiöxí, chi cùu-o ñáyiú nchicúⁿ nihnu-ni sàndáa iní-ó-gǎ, te sá dúcáⁿ te nduu tǎhú-ó cundecu-o ndíhi-gá ni caa ni quíhíⁿ, te ñá túú cùu-o ñáyiú dàña nihnu ichi-gá te xíta nihnú-yu.

11

Ñáyiú sàndáa iní ñáhá xii Yá Ndiöxí

¹ Te núu sàndáa ndisa iní-ó Yá Ndiöxí te ducaⁿ cùtnuní ndáa iní-ó sǎ ñíhí-ó sǎ cùnín-ó núú-gǎ. Te núu sàndáa iní-ó-gǎ te ducaⁿ cùtnuní ndáa tucu iní-ó sǎ càháⁿ ndáa-gá cuendá nchaa sá ñá túú xíní-ó.

² Te ducaⁿ nǐ quide ñáyiú ní xíndecu ndéé sanaha ío ní sàndáa iní-yu Yá Ndiöxí te xǎⁿ núu ío vǎha ní cuu iní ñáhá-gǎ xii-yu.

³ Te núu nchoo sàndáa ndisa iní-ó Yá Ndiöxí te cùtnuní ndáa iní-ó sǎ sǎ cuendá tnúhu ní càháⁿ-gá ní cuáha andíu ndíhi ñuyíú-a. Te cùtnuní iní-ó sǎ ñá díú sǎ cuendá ñⁿ sá tǔu ndèhe-o ío ñuyíú-a ní cuáha andíu ndíhi ñuyíú-a.

⁴ Te ndíi Àbél ío ní sàndáa iní ndíi Yá Ndiöxí núu xǎⁿ ío-gá ní cuu iní-gá sá nǐ sáñaha ndíi ní nduu tǎhú-gǎ dàcúxí sǎ nǐ sáñaha ndíi Càn xii-gá ní nduu tǎhú-gǎ. Te ndíi Àbél-án nǐ cùtnuní iní ndíi sá nǐ cudíu ndíi núú Yá Ndiöxí cuendá sá nǐ queheⁿ cuendá-gá sá nǐ sáñaha ndíi ní nduu tǎhú-gǎ. Te cuèi ñá túú-gǎ ndíi ndècu ñuyíú-a dico yòdo tnuní sá ní sàndáa iní ndíi Yá Ndiöxí cuendá ducaⁿ càda-o canchicúⁿ nihnu-o.

⁵ Te té Ènóc téé ní xíndecu ndéé sanaha ñá túú ní xíhí-dé chi ní nacuaça ñaha túu Yá Ndiöxí xii-dé cuendá sá ní sàndáa iní ñáhá-dé xii-gá. Te vá yòo ní nànihí ñáhá xii-dé chi mee-gǎ ní nacuaça ñaha-gǎ xii-dé. Te núú tütú Yá Ndiöxí càchí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu vǎha iní ñáhá-gǎ xii-dé.

6 Te nchaa ñáyiú ñá túú sándáá iní ñáhá xii Yá Ndiöxí ñá ndácú-yu cada-yu nàcuáa cudíú-yu núú-gã, chi nchaa ñáyiú cuini tuha ñaha xii-gã xini ñuhu-xi sá quindáá iní-yu sá ndécú-gã, te quindáá iní-yu sá nõu na nànducu nihnu ñahá-yu xii-gã te cuañaha-gã xii-yu sá ndúú tãhũ-yu.

7 Te Yá Ndiöxí ní dátũha-gã ndíi Nõe nchaa nàcuáa cada-gã. Te ní quide ndíi nchaa nàcuáa ní xáhaⁿ Yá Ndiöxí cada ndíi, te ní cadúha ndíi ñⁿ bàrcú cuendá xití bàrcú-áⁿ quee ndíi ndíi nchaa ñáyiú vehe ndíi cuendá cácu nihnú-yu. Te ducaⁿ ñi quide ndíi chi ní sándáá iní ndíi Yá Ndiöxí. Te sá dúcáⁿ ñi sándáá iní ndíi-áⁿ Yá Ndiöxí xiãⁿ ní cutnùní sá ncháá ñáyiú ío ndècu cuéchi-yu, chi ñá túú ní cãchicúⁿ nihnú-yu cada-yu nàcuáa ní quide ndíi. Te sá dúcáⁿ ñi quide ndíi ní sándáá iní ndíi Yá Ndiöxí xiãⁿ ío ní cundáá ndíi núú-gã.

8 Te Yá Ndiöxí ní xáhaⁿ-gã xii ndíi Àbrahám sá quee ndíi ñuú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nàcuáa ní xáhaⁿ Yá Ndiöxí chi ní quee ndíi cuáháⁿ ndíi núú cuañaha Yá Ndiöxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndèe cúu nõú cuáháⁿ ndíi cundecu ndíi. Te ducaⁿ ñi quide ndíi chi ní sándáá iní ndíi Yá Ndiöxí.

9 Te sá dúcáⁿ ñi sándáá iní ndíi Yá Ndiöxí nõu xiãⁿ ní xíndecu ndíi núú ñi sãñaha-gã cundecu ndíi, te cuèi ducaⁿ dico ñá túú ní quide ñuú ndíi xiãⁿ. Te ní xóo cundecu ndíi vehe cùtexínu vehe dóo. Te ñu-ni ducaⁿ ñi quide ndíi Isàac ndíi ndíi Jácób chi tñahá cue ndíi-áⁿ ñi cachí Yá Ndiöxí sá ndúú tãhũ cue ndíi xiãⁿ cundecu cue ndíi.

10 Te ducaⁿ ñi quide ndíi Àbrahám chi ní xíndetu ndíi ndèe ní sáá nduu ndúu tãhũ ndíi cundecu ndíi núú ndécú Yá Ndiöxí. Te núú ndécú-gã-áⁿ cúu-xí ñuú ní cadúha mee-gã, te ñuú-áⁿ cudíi-xi ñi caa ñi quíhíⁿ.

11 Te ndíi Sãrá, sa ní xidó cuíá ndíi sá cóo déhe ndíi chi sa ní sahnu vñhi ndíi, dico Yá Ndiöxí ní quide-gã te ní xóo ñⁿ déhe ndíi. Te ducaⁿ chi ní sándáá iní ndíi Yá Ndiöxí te ní cutnùní ndáá iní ndíi sá cada-gã nàcuáa ní xáhaⁿ-gã xii ndíi.

12 Te cuèi ío ní sahnu ndíi Àbrahám ndíi ñadìhí ndíi, ndíi Sãrá dico dacuítíi ñi nduu tãhũ-yu ní xóo ñⁿ déhe-yu. Te xiãⁿ nõu ío

cuéhe ndíi quíⁿ yãvá ndíi Àbrahám ní cáya dàtná cuéhe chòdíní ndèe andíu, ndíi dàtná cuéhe ñuhu cúchí làmár, chi ní vã yõo ñⁿ ndacu cahu ñaha xii-yu sá cuèhẽ-yu.

13 Te cue ndíi-áⁿ ducaⁿ-ni ñi sándáá iní cue ndíi Yá Ndiöxí ndèe ní sáá nduu ñi xíhí cue ndíi. Te cue ndíi-áⁿ ñá túú ní ndúu tãhũ cue ndíi quini cue ndíi nchaa nàcuáa ní cachí Yá Ndiöxí cada-gã, dico ní cutnùní ndáá iní cue ndíi-áⁿ nàcuáa cada-gã núú cuáháⁿ núú vëxi. Te ío ní cudíi iní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chi ñá díú ñuyíú-a cundecu ducaⁿ cuè ndíi.

14 Te sá dúcáⁿ ndúu tñuhu ní cáháⁿ cue ndíi-áⁿ, xiãⁿ ní cutnùní sá cuini cue ndíi ñngá xichi núú cundecu cue ndíi.

15 Te ní ñá díú ñuú núú ñi quee cue ndíi ní cuini cue ndíi núhú cue ndíi. Chi núu ducaⁿ ní sãni iní cue ndíi te núhú cue ndíi ní cùu.

16 Dico ñáhá chi cuini cue ndíi quíhíⁿ cue ndíi ñⁿ xichi núú vãha-gã cáá cundecu cue ndíi. Te núú dúcáⁿ ío-gã vãha càa-áⁿ cúu-xí ñuú núú ndécú Yá Ndiöxí, te sá dúcáⁿ ñi sãni iní cue ndíi xiãⁿ nõu ío vãha cùu iní Yá Ndiöxí càchí-gã sá ñá túú cùcahaⁿ núú-gã cúu-gã Ndiöxí cue ndíi-áⁿ, te cùtnuní iní-ó sã ndáá sá dúcáⁿ càháⁿ-gã chi ní quide túha-gã ñⁿ xichi núú cundecu cue ndíi-áⁿ.

17 Te ndíi Àbrahám ní xíndecu ñⁿ ñi-ni déhe ndíi ndíi ñadìhí ndíi, te cùtnahá ní xito ndèe ñáhá Yá Ndiöxí xii ndíi ní xicáⁿ-gã déhe ndíi, ndíi Isàac cuendá nduu tãhũ ñáhá-gã xii ndíi. Te ní xáhaⁿ ndíi sá cúu ndúu tãhũ-gã déhe ndíi, te ducaⁿ ñi quide ndíi chi ní sándáá iní ñáhá ndíi xii-gã. Te sa ndècu túha ndíi sá cuañaha ndíi déhe ndíi xii-gã cuèi mee Yá Ndiöxí ní xáhaⁿ ndáá-gã xii ndíi

18 sá sã cuendá ndíi Isàac te ngúndecu cue ñani tñahá ndíi.

19 Te ducaⁿ ñi quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gã dándòto-gã cuèi ñáyiú sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúu ndúu tãhũ-gã déhe ndíi, te xiãⁿ cada iní-ó sã sã ní xíhí ndíi Isàac te ní ndoto tucu ndíi ní nucundecu ndíi ndíi tãtá ndíi, ndíi Àbrahám.

20 Te ndíi Isàac ní xicáⁿ tãhũ ndíi núú Yá Ndiöxí cuendá sá cada vãha-gã cue déhe ndíi, ndíi Jácób ndíi ndíi Esàu núú cuáháⁿ

núú vëxi. Te ducaⁿ ñ quide ndíi chi ní sándáá iní ndíi Yá Ndiöxí.

21 Te sa ta cùyatni-ná nduu cùú ndíi Jàcób, te ní xicáⁿ táhú ndíi núú Yá Ndiöxí cuendá cue déhe ñaní ndíi déhe ndíi Chèé. Te yítuu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñ quide ndíi chi ní sándáá iní ñáhá ndíi xii-gá.

22 Te cútnàhá sa ta cùyatni vií-nã nduu cùú ndíi Chèé, te ní cachí ndíi sá cuè ñáyiú isràél sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sáá nduu quèé-yu núú ndécú-yu-áⁿ. Te ducaⁿ ñ quide ndíi chi ní sándáá iní ndíi Yá Ndiöxí.

23 Te cútnàhá ní cacu ndíi Moisés te ní chiváha ñaha nãná ndíi ndíi tãtã ndíi úní yóó. Te ducaⁿ ñ quide cue ndíi-áⁿ chi ní sándáá iní cue ndíi Yá Ndiöxí. Te ní quide cuendá cue ndíi-áⁿ sã ïo váha càa ndíi Moisés déhe cue ndíi, te ñá túú ní yùhú cue ndíi nàcuáa ní cáháⁿ téè cùu Faraón sá cáhni-dë cue landú.

24 Te sátá ñ sáhu ndíi Moisés te duuⁿ duuⁿ ní cachí ndíi sá vã cáháⁿ ñáyiú sá déhe yoco téè cùu Faraón cúú nãná ndíi. Te ducaⁿ ñ quide ndíi chi ní sándáá iní ndíi Yá Ndiöxí.

25 Te ducaⁿ ñ quide tucu ndíi chi ní tnahá-gá iní ndíi ndoho ndíi ndíi nchaa ñáyiú cùu cuendá Yá Ndiöxí dàcúxí sã cúdíi iní ndíi cundecu tnaa ndíi ichi cuèhé ichi duha.

26 Chi ní sani iní ndíi sá vãha-gá ndoho ndíi cúcuèhé ñáhá cuè ñáyiú xii ndíi sá cuendá Yaá quixi ñuyíú-a dàcúxí sã cùndecu ndíi ndíi nchaa sá ïo Ègiptú. Te ducaⁿ ñ quide ndíi chi ní xúhuⁿ iní ndíi sá Yá Ndiöxí cuãñaha-gã sá ndúú táhú ndíi.

27 Te ndíi Moisés ní quee ndíi nacióⁿ Ègiptú te ñá túú ní quide cuendá ndíi sá ïo cùdéeⁿ tée cùu Faraón núú ndíi. Te ducaⁿ ñ quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñ yáha ndíi, te ní quide iní ndíi sá Yá Ndiöxí ndécú ndíi ñaha túu-gá xii ndíi cuèi ñá túú ní xini núú ñáhá ndíi xii-gá. Te ducaⁿ ñ sani iní ndíi chi Yá Ndiöxí ndécú ndíi ñaha-gá xii ndíi.

28 Te ndíi Moisés cúú ndíi téè ní tausaha ñ quide vico pascuá ndíi cue ñáyiú isràél, te dàvá-áⁿ ñ táuchíúⁿ ndíi ní sahní-yu mbéé te

ñíñí quiti-áⁿ ñ dácánúú-yu yuyèhé-yu. Te ducaⁿ ñ quide ndíi chi ní sándáá iní ndíi Yá Ndiöxí. Te ducaⁿ ñ quide tucu ndíi cuendá sá espíritú sá ñ tendaha Yá Ndiöxí cahni-xi mee-ni déhe téè déhe díhna cue ñáyiú Ègiptú, te vá cáhni-xí ñi ñⁿ déhe cue ñáyiú isràél.

29 Te ndute làmár sá nání Mår Tícuèhé ní quèe dava-xi ní natúu ñuhu yìchí ní níhí ñ yáha cue ñáyiú isràél. Te ducaⁿ ñ cuu chi ní sándáá iní-yu Yá Ndiöxí. Te cue téè Ègiptú tnahá-güedé nchicúⁿ-güedé cuáháⁿ dico ñá túú ní ndàcu-güedé yáha-güedé chi ní ndíi-güedé ní cáhá.

30 Te cue ñáyiú isràél ní dúcúⁿ ndèé-yu úsá nduu ñúú Jericó te ní ngoyo nchaa sá ñúdòco. Te ducaⁿ ñ cuu chi ní sándáá iní-yu Yá Ndiöxí.

31 Te ñⁿ ñaha ní xíndecu ichi díi iní ní xínani-aⁿ Ràháb, ñaha-áⁿ ñá túú ní xihí-aⁿ dàtná ní xihí nchaa ñáyiú ïo ní cuu sáá iní-xi núú Yá Ndiöxí, chi ní cuu váha iní-aⁿ núú cuè téè ní tendaha cuè ñáyiú isràél ní sángoto dayuhu ñúú-aⁿ. Te ducaⁿ ñ quide-aⁿ chi ní sándáá iní-aⁿ Yá Ndiöxí.

32 Te núu dícó sá cúú te cáháⁿ-í cuendá ndíi Gedèón, ndíi cuendá ndíi Bàrác, ndíi cuendá ndíi Sànsón, ndíi cuendá ndíi Jèfté, ndíi cuendá ndíi Dàvií, ndíi cuendá ndíi Sàmúel, ndíi cuendá nchaa cue téè ní xóo cáháⁿ tnúhu Yá Ndiöxí ndéé sanaha, te nchaa cuendá cue téè-áⁿ cáháⁿ-í te núu dícó cùyáchí-í dico ñá túú cùyáchí-í.

33 Te nchaa cue ndíi-áⁿ ñi sándáá iní cue ndíi Yá Ndiöxí núu xíⁿ ní xóo ndacu cue ndíi ní xóo nàa cue ndíi ndíi nchaa ñáyiú dava-gá ñúú. Te nchaa ñáyiú-áⁿ ñá túú ní xóo ndacú-yu nàa-yu ndíi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gã xii cue ndíi. Te cuèi nchaa cue quiti dééⁿ ñá túú ní ndàcu-güedé ná cada ñaha-güedé xii cue ndíi.

34 Te ní xóo ndacu cue ndíi ní xóo ndahvá cue ndíi ñuhú sá vã yóo tnahí ndàcu ndahvá, te ní cacu cue ndíi vá yóo ñi ndàcu cahni ñaha xii cue ndíi. Te cue ndíi-áⁿ ñá túú níhí ndéé cuè ndíi ñi cùu, dico ní níhí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-áⁿ ïo ní níhí ndéé cuè ndíi ní nàa cue ndíi ndíi nchaa ñáyiú ní cuu úhú iní ñáhá xii cue ndíi,

te nchaa ñáyiú ducaⁿ ñí xóo nàá ndihí cue ndíi-áⁿ ñà túú ní xóo ndacú-yu nàá ndihí ñàhá-yu xii cue ndíi chí ní xóo cunú-yu. Te ducaⁿ ñí cuu chí ní sándáá iní cue ndíi Yá Ndiöxí.

³⁵ Te dava ñáyiú ðihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tùcú-yu.

Te dava ñáyiú ío ní dándóhó ñàha tnahá ñáyiú-yu te ní xihí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te ducaⁿ chí ní cuiní-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiöxí.

³⁶ Te dava cue ndíi ío ní ndoho cue ndíi chí ío ní cudíquí ndéé ñàhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihi ñàhá-yu xii cue ndíi vecaá.

³⁷ Te dava cue ndíi ní sahani ñàhá-yu ndihí yúú. Te dava cue ndíi ní chidava ndáá ñáhã-yu ní xehndé ñáhã-yu ndihí sierrá. Te dava cue ndíi ní xito ndéé ñáhã-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñàhá-yu ndihí machití. Te mee-ni ñí mbéé ndihí ñí chivá, ní xóo cuu dóo cue ndíi. Te mee-ni ñí cue quití-áⁿ ñí xóo cuu dóo cue ndíi cuèi ndëni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ñí xóo cada ñàhá-yu xii cue ndíi ní xóo dandòho ñàhá-yu.

³⁸ Te cue ndíi-áⁿ ío-gá ní xínduu váha iní cue ndíi dàcúxí nchàa dava-gá ñáyiú. Te nchaa cue ndíi-áⁿ ñí xica cuu cue ndíi cuèi nchaa núú ñà túú vã yóo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndëni ní cuu nchí yaú ní xóo cundecu cue ndíi.

³⁹ Te ío ní cudíu cue ndíi núú Yá Ndiöxí cuendá sá ní sándáá iní ñàhá cuè ndíi xii-gá. Te cuèi ducaⁿ ñí quide cue ndíi dico ñá túú ní xini cue ndíi nchaa sá ñí cachí Yá Ndiöxí cada-gá.

⁴⁰ Te ducaⁿ ñí cuu chí ñí sá ío-gá váha ní cachí Yá Ndiöxí cada-gá. Te sá dúcáⁿ ío-gá váha ní cachí-gá cada-gá cúu-xí cuendá nchoo ndihí cuendá cue ndíi-áⁿ cuendá sá ñà díú mèe-ni cue ndíi-áⁿ cundáá cue ndíi

núú-gã, chí tnàhá nchoo cundáá-ó núú-gã.

12

Ío cuhuⁿ iní-ó Xítohó Jesucristú

¹ Te cue ñáyiú ní xíndecu ndéé sanaha ñí quidé-yu nàcuáa ní cutnùní sá ñí sándáá iní-yu Yá Ndiöxí. Te cada iní-ó sã ncháá ñáyiú-áⁿ xíndéhé ñàhá-yu xii-o vitna. Núu xiãⁿ xini ñùhu-xi sá vã cáda-ó ñí ñí sá cuèhé sá dúhá chí ðiu nchaa xiãⁿ quidé-xí ñà túú cundáá-ó núú Yá Ndiöxí. Te vã cáda cuendá-ó nchàa sá quidé tneñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càncichúⁿ nihnu-o càda-o nchaa nacuáa ní cachí-gá cada-o cundecu-o ñuyíú-a.

² Te ío cuhuⁿ iní-ó Xítohó Jesucristú, chí ðiu-gá ní quide ní sándáá iní-ó Yá Ndiöxí, te ðiu-ni ducaⁿ quide-gá cuèi vitna te cuèi ndéé núú cuàháⁿ núú vëxi ðiu-ni ducaⁿ càda-gá sá quíndáá iní-ó Yá Ndiöxí. Te Xítohó Jesucristú ío ní quide ndee iní-gá ní ndoho-gá te ní xihí-gá núú cùrúxí, te ñá túú ní quide cuendá-gá cuèi ñí sácáⁿ núú cúu-xí sã dúcáⁿ ñí ndoho-gá. Te ducaⁿ ñí quide-gá chí sa nàha-gá sá ná yãha sá dúcáⁿ ndòho-gá te ío cudíí iní-gá. Te vitna núcóo-gá xio cùha núú núcóo Yá Ndiöxí te tàxi tnuní-gá.

³ Te xini ñùhu-xi sá ío cada cuendá-ndó nàcuáa ní quide Xítohó Jesucristú chí Yaá-áⁿ ío ní quide càhnu iní-gá nchaa sá ñí ndoho-gá ní quide ñaha nchàa ñáyiú ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vã túu dusaⁿ-ndo, te ní vã nátùhú iní-ndó càda-ndo nchaa nacuáa càháⁿ-gá.

⁴ Te nchòhó dáquèe tihú-ndó nchàa sá cuèhé sá dúhá dico vátá cáhni ñàha-gá-yu xii-ndo sã dúcáⁿ quide-ndo.

⁵ Te ndacu iní-ndó nàcuáa càháⁿ Tãtá-ó Dütú Ndiöxí dásàhú ñàhá-gã xii nchoo cuè ñáyiú cùu déhe-gá. Te duha càchí-gá núú tùtú-gá:

Nchòhó cue déhe mee-í, vá cání iní-ndó sã áúⁿ ná cuu dándoho ñaha-í xii-ndo, te ní vã nátùhú iní-ndó òré càháⁿ-í dóho-ndo nàcuáa cada-ndo cundecu-ndo.

⁶ Chí mee-í dándòho-í nchaa ñáyiú cùu iní-í cuendá sá cundáá-yu núú-í, te quide úhú-í-yu, te ðiu-ni-yu cùu-yu ñáyiú càchí-í cúu dëhe-í.

Duha cächí-gá núú tütú-gá.

⁷ Te ío cada ndee ìní-ndó sǎ dúcáⁿ dándoho ñaha Yá Ndiöxí xii-ndo, chi quide-gá sá cúú-gǎ Tǎtá-ó. Te ñá túú ñi ñⁿ tée cùu tǎtá te cachí-ó sǎ ñà túú sǎnu ichi-dé cue déhe-dé nàcuáa tǎu-xi cunduu.

⁸ Te núu Yá Ndiöxí ñá túú dándoho ñaha-gá xii-ndo datná dándoho-gá cue ñáyiú cächí-gá cúú dēhe-gá, te ñá díú dēhe mee-gǎ cúú-ndó te núu ducaⁿ, chi cùu-ndo datná cue ñáyiú ñá túú cùtnuní yoo cùu tǎtá-xi.

⁹ Te nchoo sà naha-o sá cùtnàhá ní cuu landú-ó ñi sanu ichi ñaha tǎtá-ó nàcuáa tǎu-xi cunduu, te ducaⁿ ñi xóo canehe-o sǎ yíñùhu núú-güedē te ñi-ñi ducaⁿ ñehe-o sá yíñùhu núú-güedē vitna. Te núu ducaⁿ ñi sándáá ìní-ó tǎtá-ó, te ío-gá xíní ñùhu-xi quíndáá ìní-ó Tǎtá-ó Dütú Ndiöxí cuendá ducaⁿ nduu tǎhú-ó cùndecu-o ndihí-gá ñi caa ñi quíhíⁿ, chi ñi-ñi-gá cúú-gǎ Yaá ní chihi ìní-ó.

¹⁰ Te cùtnàhá ní cuu landú-ó, ñá túú tìtní nduu ñi càniha tǎtá-ó ñi sanu ichi ñaha-güedē xii-o nàcuáa ní cuu ìní mée-güedē. Te Yá Ndiöxí ducaⁿ dándoho ñaha-gá xii-o sǎnu ichi ñaha-gá cuendá cúú-xí sǎ vǎha sá cúú-xí-ó, te ducaⁿ quide-gá cuendá nchoo càda ndáá-ó datná quidé mēe-gá.

¹¹ Te òré véxi ñⁿ tnúndòho sá cúú-xí-ó te ñá túú cùdí ìní-ó chi dándihú ìní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-áⁿ te ngüita-yu quide ndáá-yu, te ío vǎha cùu ìní-yu ndécú-yu.

Vá dáquèe tìhú-ó tnùhu Yá Ndiöxí

¹² Te núu xíáⁿ ío chí ndúcú ndèe-gá canchicúⁿ nihnu-ndo ìchi Xítóhó Jesucristú, te vá dícó yica cùu ìní-ndó cànchicúⁿ nihnu-ndo ìchi-gá.

¹³ Te cada vǎha-ndo cùndecu-ndo ichi-gá cuendá nchaa ñáyiú sǎni ñⁿ saní úú ìní-xi níhí ndéè-yu cundecú-yu ichi-gá te vá ná tǎhú ìní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu vǎha-ndo ndihí cue tñaha ñáyiú-ndo, te ío cada vǎha-ndo cùndecu-ndo nàcuáa cundáá-ndó núú Yá Ndiöxí chi núu vá dúcáⁿ càda-ndo te vá ndúú tǎhú-ndó cùndecu-ndo ndihí-gá.

¹⁵ Te ío vǎha cada cuendá-ndó nàcuáa cada-ndo cùndecu-ndo, chi núu ñáhá te vá

chíndèe ñaha-gá Yá Ndiöxí xii-ndo. Te ío vǎha cada cuendá tucu-ndo nàcuáa cundecu-ndo vǎ cání cuèhé ìní-ndó cuendá Yá Ndiöxí, chi núu ducaⁿ na càda-ndo te dava-gá ñáyiú ndècu ndihí-ndo ichi-gá tñahá-yu ngüita-yu ducaⁿ càdá-yu, te vá cùndecu vǎha-gá-ndó ndihí-yu ichi-gá.

¹⁶ Te cada cuendá tucu-ndo sǎ vǎ cùndecu-ndo ichi díí ìní, te ñi vǎ dáquèe tìhú-ndó ñi ñⁿ sá cúú cuendá Yá Ndiöxí datná ní quide ndíi Esàú, chi sá cuñaha tǎtá ndíi-áⁿ nduu tǎhú ndíi ñi cùu ní dama ndíi ñⁿ cóhó comidá.

¹⁷ Te nchòhó sa nàha-ndo sá cùtnàhá ní cuiní ndíi Esàú cácaⁿ tǎhú tǎtá ndíi núú Yá Ndiöxí cuendá nchaa sá ndúú tǎhú ndíi ñi cùu, te ñá túú ní xicáⁿ tǎhú tǎtá ndíi núú Yá Ndiöxí nàcuáa cuiní mée ndíi ñi cùu. Te ní ndáhyú víhí ndíi, te cuèi ducaⁿ ñi quide ndíi dico ñá túú ní ndàcu-gá ndíi nàníhí ndíi tǎhú sǎ ñi dama ndíi comidá.

¹⁸ Te cue ñáyiú isràél ní sátuhá-yu ñⁿ yucu núú càyú ñuhú, te nchòhó ñá túú ndèe ducaⁿ sàháⁿ tuha-ndo ñⁿ yucu núú càyú ñuhú datná ní quide cue ñáyiú-áⁿ. Te cùtnàhá ducaⁿ ñi sátuhá-yu yucu-áⁿ te ní cunee víhí níhí yucu-áⁿ, te ní quene tǎchí ñíhi.

¹⁹ Te ní tecú dóho-yu ní cáháⁿ ñⁿ cútú, te ní tecú tucu dóho-yu ní cáháⁿ Yá Ndiöxí ní cáháⁿ ndihí ñaha-gá xii-yu. Te nchaa ñáyiú ní tecú dóho-xi ní cáháⁿ-gá te ní cuiní-yu sá vǎ càháⁿ-gá.

²⁰ Te ducaⁿ ñi quidé-yu chi ñá túú ní cùndee ìní-yu nàcuáa ní cáháⁿ-gá, te duha ní cachí-gá: “Te cuèi ñⁿ quiti nà yáha xití yucu-a, te cahni-ndo-di ndihí yúú àdi ndihí ñⁿ yutnu puyá”, duha ní cachí-gá.

²¹ Te sá dúcáⁿ ñi quide-xi ní xiní-yu xíáⁿ ío ní dáyùhú ñáhá-xí xii-yu. Te tñahá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

²² Te nchòhó, ñá túú quide-ndo datná ní quide cue ñáyiú-áⁿ ñi sáháⁿ tuhá-yu yucu-áⁿ, dico cada ìní-ndó sǎ sà ní tuha-ndo yùcu Sión sá ndécú núú ndécú Yá Ndiöxí, ndihí ñuú-gá ñuú Jerusàlén sá cáá àndiú te ñi-ñi-gá cúú-gǎ Yaá ndécú nchàa nduu nchaa quíú. Te ñi-ñi xíáⁿ xíndecu cuèhé víhí cuè espíritú xínú cuèchi núú-gǎ

²³ chíñùhu ñaha-xi xii-gá. Te nchòhó

cúu-ndó cuè ñáyiú cùu cuendá Yă Ndiôxí, te ní tnahá tnúhu-ndo ndihí nchaa dava-gá ñáyiú cùu cuendá-gá, ñáyiú yòdo tnuní núú tütú-gá ndécú àndiú, te ñiú-ni ñáyiú-án cuañaha-gă xii-yu sá ndúú tãhũ-yu. Te nchòhó ní tuha-ndo Yă Ndiôxí Yaá cada ndáá yíca cuèchi nchaa ñáyiú. Te cada iní-ndó sã ñi tnahá tnúhu-ndo ndihí cue ñáyiú ní quide ndáá ní xindecu ichi Yă Ndiôxí ñuyíú-a. Te ñáyiú-án ñà túú tnahí-gá ná cúmãñi-yu vitna ndécú-yu núú-gă.

24 Te ní tnahá tnúhu-ndo ndihí Xítóhó Jesucristú Yaá ní quide nàcuáa cada Yă Ndiôxí ñngá núú sã vãha sá cúu-xí nchaa nchoo ñáyiú ndècu ñuyíú-a, chi ní sati níñi-gă te ní xihí-gá núú cùrúxí. Te níñi Xítóhó Jesucristú ñà túú ñi-ni cuu-xi ndihí níñi ndií Àbél, chi ñiú cuendá níñi-gă-án ñi quide càhnu iní Yă Ndiôxí nchaa cuèchi-o.

25 Núú xiãⁿ ío cada cuendá-ndó vã dáquèe tihú-ndó tnúhu càháⁿ Yă Ndiôxí, chi nchaa ñáyiú ní xindecu ndéé sanaha dùcaⁿ ní quidé-yu ní dáquée tihũ-yu tnúhu ní cáháⁿ-gá ñuyíú-a sá cúu-xí-yu. Te ñà túú ní cãcu-yu chi ní nacháhu-yu sá dúcáⁿ ñi quidé-yu. Te uuⁿ-gá tucu nchoo chi vã cãcu-o te núú ducaⁿ na dàquee tihú-ó tnúhu càháⁿ Yă Ndiôxí ndéé àndiú sã cúu-xí-ó.

26 Te cútnahá ní cáháⁿ Yă Ndiôxí ndéé sanaha te ní quidi-xí ñuyíú. Te vitna càchí-gá: “Yúhú quidi tucu-í ñngá xito ñuyíú, te ñà díú mèe-ni ñuyíú ducaⁿ quidi-í chi tnahá àndiú quidi-í”, càchí-gá.

27 Te sá dúcáⁿ càháⁿ-gá sá ñngá xito tucu ducaⁿ càda-gá xiãⁿ cútnuní sá ncháándi túhú sá tũu ndèhe-o danaa-gá. Te nchaa sã ñà túú ndéé tũu quini-ó ñuyíú-a xiãⁿ vã quidi-xí te ni vã náá-xí.

28 Te núú ñi cachí Yă Ndiôxí nduu táhú-ó cùndecu-o chi mee-gă táxi tnuní-gá xiãⁿ, te ni vã quidi-xí te ni vã náá-xí. Te xiãⁿ ío xini ñuhu-xi ndacáⁿ táhú-ó núú-gă, te yĩñuhu yĩñuhu cunu cuechi-o núú-gă nàcuáa cuu váha iní-gá, te ducaⁿ cùhuⁿ iní-ó sã ño càhnu cuu-gá.

29 Te Tãtá-ó Dütú Ndiôxí cúu-gă dàtná ñi ñuhú chi danàa-gá nchaa sã ñà túú quide nacuáa cuu váha iní-gá.

13

Nàcuáa tàú-xi cada-o cuendá cuu váha iní Yă Ndiôxí

1 Te nchaa nchòhó ñáyiú ndècu ichi Xítóhó Jesucristú, vã dáñá ndéé-ndó cùu iní tnahá-ndó nàcuáa ndècu-ndo ichi-gá.

2 Te cunaha-ndo sã núu ío ñáyiú ñuhu ichi ní quexió-yu vehe-ndo te cuañaha-ndo vèhe ndetatú-yu, te cuañaha-ndo sã cáxi-yu. Chi dáva-yu ndéé espíritú xínú cuèchi núú Yă Ndiôxí ní sáháⁿ vehé-yu ní queheⁿ cuendá-yu te ñà túú ní cùtnuní iní-yu sá díú espíritú xínú cuèchi núú-gă cúu-xí.

3 Te ndacu tucu iní-ndó cuè ñáyiú xixihí vecaá, te cada iní-ndó sã tnahá-ndó yihí-ndo vecaá ndihí-yu. Te ndacu tucu iní-ndó nchaa ñáyiú ío ndòho, te cada iní-ndó sã tnahá-ndó ndòho-ndo ndihí-yu.

4 Te nchaa ñáyiú na càchí-yu sá ñiⁿ sã vãha cùu-xi sá ñiⁿ tée ndihí ñiⁿ ñadihí ná ñihí tnahá-yu candeca tnahá-yu. Te nchòhó cue tée vã cáni iní-ndó cãháⁿ ndihí-ndo ñadihí te núu ñà díú ñadihí-ndó cùu-yu. Te ducaⁿ-ni nchòhó cue ñáyiú ñihí tucu vã cáni iní-ndó cãháⁿ ndihí-ndo tée te núu ñà díú yĩ-ndo cuu-güedé, chi Yă Ndiôxí dandòho-gá nchaa ñáyiú ndècu ichi díi iní.

5 Te vã cúhúⁿ iní-ndó mèe-ni díhúⁿ. Te núu nándi cùu nchaa sá ndécú ndihí-ndo te ñiú-ni nchaa xiãⁿ sa nduu vétú iní-ndó, chi Yă Ndiôxí ní cachí-gá: “Ni ñiⁿ nduu vã dáñá ñihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

6 Te xiãⁿ núu nchoo ñi yuhu ni iní-ó cãháⁿ-ó ñiⁿ ñiⁿ-o, te cachí-ó:

Yă Ndiôxí cúu-gă Yaá chindèe ñaha xii-í, núu xiãⁿ ñà túú yùhú-í cuèi nándi càháⁿ ñáyiú cada ñahá-yu xii-í.

Duha cachí-ó.

7 Chí ndácú iní cue tée ní sanu ichi ñaha xii-ndo ichi Xítóhó Jesucristú cue tée ní cáháⁿ tnúhu Yă Ndiôxí núú-ndó, te ío váha chí nàcuáa cuendá nàcuáa ní quide nchaa cue tée-án ñi xindecu-güedé ndéé ní sáá nduu ñi xihí-güedé. Te ío quindáá iní-ndó Yă Ndiôxí dàtná ní xóo cada cue tée-án.

8 Te dàtná-ni ní quide Xítóhó Jesucristú ndéé sanaha ñiú-ni ducaⁿ quide-gá vitna, te

diu-ni ducaⁿ càda-gá ndéé núú cuàháⁿ núú vëxi.

⁹ Te vá dáñá-ndó mèe-ndo dandahú ñáhá ñáyiú dacàháⁿ ñáhá xii-ndo natuha-ndo ingá ichi, ñáyiú dànehé tnàha ñáyiú-xi nándi sá ñi cutúha-yu, te nchaa xíãⁿ ñá túú ñⁿ-ni caháⁿ-xi ndihí tnúhu sá ndécú ndihí-ndo. Te Yá Ndiöxí chindèe ñaha-gá xii-o nàcuáa níhí ndéé-ó cundecu-o ichi-gá, te ducaⁿ te cuu-xi sá vâha sá cúú-xí-ó, te ñá díú cuendá ñⁿ sá xéxi-ó níhí ndéé-ó ndècu-o ichi-gá. Te dava ñáyiú cächí-yu sá dává núú comidá cuu caxi-o te dava ñáhá nàcuáa níhí ndéé-ó cundecu-o ichi-gá, dico ñá ndáá sá sá dúcáⁿ vâ cáxi-ó nchàa núú comidá níhí ndéé-ó cundecu-o ichi-gá.

¹⁰ Chi Xítohó Jesucristú ní xíhí-gá cuendá-ó núú cùrúxí, te nchaa ñáyiú nchícúⁿ nihnu-ni quide nchaa nacuáa ní quide nchaa dútú ñi xinu cuechi núú Yá Ndiöxí ndéé sanaha, ñáyiú-áⁿ vâ cúú tnàhá tnúhu-yu ndihí Xítohó Jesucristú Yaá ní xíhí núú cùrúxí sá dúcáⁿ quidé-yu.

¹¹ Chi dútú cùnù-gá ní xindecu ndihí cue ñáyiú isràél, téé-áⁿ ñi xóo canehe-dé níñi nchaa quiti ní xóo cahni-dé ní xóo quíhu ndéé xítí cuartú ní cuu íí-gá. Te ducaⁿ ñi xóo cada dútú-ãⁿ cuendá cada càhnu iní Yá Ndiöxí nchaa yícá cuèchi ñáyiú, te cuñú nchaa quiti-áⁿ ñi xóo cahmi-güedé ñⁿ xio yuhu ñúú.

¹² Te ducaⁿ ñi yáha Xítohó Jesucristú chi ndéé ñⁿ xio yuhu ñúú ní sahani ñaha-güedé xii-gá. Te cuendá níñi-gá sá ñi sati núú cùrúxí núú ñi xíhí-gá, ní nduu ndoo ní nduu nine iní cue ñáyiú sàndáá iní ñáhá xii-gá.

¹³ Te vitna chí ná tùha-o Xítohó Jesucristú te cada ndee iní-ó ndòho-o datná ní ndoho-gá.

¹⁴ Te ñuyíú-a ni ñⁿ xichi ñá túú ndéé cáá ñⁿ ñúú cudíi ni caa ni quíhíⁿ cuendá cundecu-o, dico ducaⁿ-ni ñùhu iní-ó ñⁿ xichi núú ndúú tãhú-ó cundecu-o ni caa ni quíhíⁿ.

¹⁵ Te núú xíãⁿ xíní ñùhu-xi sá vâ dáñá ndéé-ó chiñuhu-o Dútú Ndiöxí chi Xítohó Jesucristú ní quide-gá nàcuáa ndacu-o tnàhá tnúhu-o ndihí Yá Ndiöxí, te òré càháⁿ ndihí-o-gã te nuu núú ndacáⁿ tãhú-ó núú-gã. Te nchaa tnúhu càháⁿ-ó òré

càháⁿ ndihí-o-gã cúú-xi dàtná ñⁿ tãhú sã cúú-xí-gã.

¹⁶ Te vá dáñá ndéé-ndó càda-ndo mee-ni sá vâha cundecu-ndo, te ducaⁿ chindee tnaha-ndo ñⁿ ñⁿ-ndo ndihí sá ndécú ndihí-ndo. Te núú ducaⁿ na càda-ndo te cani iní-ndó sã cúú-xí dàtná ñⁿ tãhú sã ño vâha cùu iní Yá Ndiöxí.

¹⁷ Te quindáá iní-ndó càda-ndo nchaa nacuáa càháⁿ cue téé yíndaha ñaha xii-ndo nacuáa ndècu-ndo ichi Xítohó Jesucristú, chi diu cue téé-áⁿ quidé cuendá ñáhá-güedé xii-ndo nàcuáa cundecu váha-ndo núú-gã. Te sáá nduu nàceni tnúhu-güedé núú-gã núú ní quide váha-güedé àdi ñá túú ní quide váha-güedé ní xindecu ndihí ñaha-güedé xii-ndo. Te núú ducaⁿ na càda-ndo quindáá iní-ndó-güedé te cudíi iní-güedé cundecu ndihí ñaha-güedé xii-ndo, te vá ndihú iní-güedé. Te núú vá dúcáⁿ càda-ndo te vá cúú-xí sã vâha xii-ndo nchàa sá quidé-güedé sá cúú-xí-ndó.

¹⁸ Te càháⁿ ndàhú-í núú-ndó sã càháⁿ ndihí-ndo Yá Ndiöxí cuendá-ndí. Te nchúhú cùtnùní ndáá iní-ndí sá ñá túú ñá cùmání-ndí núú Yá Ndiöxí, te ducaⁿ chi ndùcu-ndí nàcuáa quide-ndí cundáá-ndí núú-gã.

¹⁹ Te càháⁿ ndàhú tucu-í núú-ndó sã ño cácaⁿ tãhú-ndó núú Yá Ndiöxí cuendá sá mée-gã ná cádá te ío ndihí quixi coto ñaha tucu-í xii-ndo.

Tnúhu ndéé núú ñi ndihí-ná

²⁰ Te Yá Ndiöxí Yaá quidé cùu váha iní-ó ndècu-o, Yaá-áⁿ ñi dándótó-gã Xítohó Jesucristú. Te Xítohó Jesucristú-áⁿ cúú-gã dàtná ñⁿ toli ío-gã quéné cáva xito mbéé. Te ducaⁿ sãtnahá-xi cùu-gá cuendá sá ñi sati níñi-gã te ní xíhí-gá, te ducaⁿ ñi cuu cuendá sá ñi quide ndáá-gá ndihí Yá Ndiöxí sá cádá-gã ingá núú sã vâha sá cúú-xí nchòo cue ñáyiú ndècu ñuyíú-a. Te nàcuáa ní quide ndáá-gá ndihí Yá Ndiöxí te diu-ni ducaⁿ càda-xi núú cuàháⁿ núú vëxi.

²¹ Te xicáⁿ tãhú-í núú Yá Ndiöxí sá mée-gã ná chindee ñaha-gá xii-ndo cuendá cada-ndo mèe-ni sá vâha nàcuáa cuini mée-gã, te mee-gã ná cádá ñaha-gá xii-o nchàa sá vâha sá sání iní-gá. Te diu-ni ducaⁿ na tàuchiú-gá cada Xítohó Jesucristú sá cúú-xí-ó, duha xicáⁿ tãhú-í núú-gã. Te

vitna nchaa-o chǐ ná cǎchí-ó sǎ ǐo cǎhnu cuu Xítohó Jesucrístú nǐ caa nǐ quíhíⁿ. Te ducaⁿ na cùnduu.

²² Te cǎháⁿ ndàhú-í núú nchòhó ñáyiu ndècu ndíhi-í ichi Xítohó Jesucrístú sá cǎdá cǎhnu iní-ndó nǎcuáa ndùu nchaa tnúhu cǎháⁿ-í dásàhú ñàhà-í xii-ndo, chí ñá túú vǎi tnúhu chìdo tnuní-í núú tütú-a sá cúú-xí-ndó.

²³ Te cǎchí tnúhu-í xii-ndo sǎ tǎ Timùteú téé ndècu ndíhi-o ichi Xítohó Jesucrístú ní cácu-dé ñá túú-gǎ yíhí-dě vecaá. Te núú na quèxio ndíhi-dé núú ndécù-í te quixi-í ndíhi-dé núú ndécú-ndó quìxi coto ñaha-ndí.

²⁴ Te cúñaha-ndo sǎ ǐo na cǎda ndee iní nchaa cue téé yìndaha ñaha xii-ndo nǎcuáa ndècu-ndo ichi Yá Ndiǒxí. Te ducaⁿ cúñaha tucu-ndo xii nchaa dava-gǎ ñáyiu cùu cuendá-gǎ sǎ ǐo na cǎda ndee iní-yu. Te cue ñáyiu nǎcióⁿ Itàliá ñáyiu ndècu ndíhi-o ichi-gǎ cǎchí-yu sǎ ǐo cada ndee ìní-ndó.

²⁵ Te Yá Ndiǒxí ǐo na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ǐo chí cǎdá ndèe iní-nǎ vitna.

TUTÚ NÍ CADÚHA TĒ SÀNTIAÚ

Té Sàntiaú cádũha-dé tutú quíhíⁿ ndaha ñáiyu isràél nchíté nuu nihí ñuyúú

¹ Yúhú té Sàntiaú xínú cuèchi-í núú Yá Ndiöxí ndihí núú Xítóhó Jesucristú, te tē-í tnúhu-a quide ndee iní ñáhà-í xii nchòhó ñáiyu isràél nchíté nuu nihí ñuyúú-a.

Yá Ndiöxí táxí-gã sá xini tnùn-ó

² Te nchòhó ñáiyu ndècu ndihí-í ichi Xítóhó Jesucristú, ío cudíí ìní-ndó cùndecu-ndo cuéi náí cùu sá ùhú véxi cuèndá-ndó,

³ chi ducaⁿ te cutnùn-í iní-ndó sã sàndáá ndisa iní-ndó-gã, te cunduu càhnu iní-ndó cuéi náí ná yáha-ndo.

⁴ Te cunduu càhnu-ni iní-ndó te ducaⁿ te cuu-ndo ñáiyu váha, te cundáá-ndó nũú Yá Ndiöxí, te ducaⁿ te ñá túú-gã ná cumání-ndó nũú-gã.

⁵ Te núu cùmání sã xini tnùn-ó, te cãcãⁿ-ó nũú Yá Ndiöxí te mee-gã taxi-gã, chi ío váha iní-gã, te ñá túú cùnini iní-gã nũú-ó.

⁶ Te ni yùhu ni iní-ó cãcãⁿ-ó nũú-gã, te quindáá ndisa iní-ó sã táxí-gã sá cùmání quini tnùn-ó, te vá cání ìⁿ caní úú iní-ó. Chi nchaa ñáiyu sàni ìⁿ sani úú iní-xi cùu-yu dàtná ndute làmár cuáhãⁿ-xi duha cuáhãⁿ-xi dàcãⁿ nàá-xi òré quéné tãchí.

⁷ Te nchaa ñáiyu ducaⁿ sàni iní-xi, te vá cání ìní-yu sá nihí-yu sá xicãⁿ-yu nũú-gã.

⁸ Chi nchaa ñáiyu sàni ìⁿ sani úú iní-xi ñá cùnùn-í iní-yu ndèdacã sá sání ìní-yu cadã-yu.

⁹ Te nchaa ñáiyu ndàhú ñáiyu ndècu ichi-gã, xini ñuhu-xi ñá túú-gã ná caní iní-yu, mee-nã cudíí ìní-yu, chi Yá Ndiöxí chindèe ñaha-gã xií-yu.

¹⁰ Te nchaa ñáiyu cuica xini ñuhu-xi cundecu váha iní-yu nũú Yá Ndiöxí cuéi náí ná yáha-yu. Chi ñáiyu-ãⁿ cúu-yu dàtná itã nchaa cúhú sã ñá túú cùdí naha.

¹¹ Chi òré ní cuu níhi cahni nchíanchii, te ní dádí-ni-xi nchaa cúhú cuíí-ãⁿ te ní cóyo-ni nchaa itã-xi, te ñá túú-gã cáá vì. Te ducaⁿ sãtnahã-xi cùu ñáiyu cuica chi núu chíúⁿ-ní-yu xihí-yu.

Nchaa ñáiyu quide cahnu iní-xi nchaa sá yãha-yu

¹² Te váha táhú nchaa ñáiyu quide cahnu-ni iní-xi cuéi nándi sá yãha-yu ndècú-yu ichi Yá Ndiöxí, chi òré ná ndihí nchãa xíãⁿ yãha-yu, te cuãñaha Yá Ndiöxí ìⁿ corónã váha vìhi cundecu ndihí-yu, te ndáá chi ducaⁿ càháⁿ Yá Ndiöxí sá táxí-gã xii nchaa nchoo ñáiyu ñuhu iní ñáhã xii-gã.

¹³ Te nchaa ñáiyu sàni iní-xi cada nándi sá cuèhé sá dúhá, te vá cání ìní-yu sá Yá Ndiöxí táuchiuⁿ-gã ducaⁿ cadã-yu, chi Yá Ndiöxí ñá quíu te caní iní-gã cada-gã ìⁿ sá cuèhé sá dúhá, te ni ñá túú tàuchiuⁿ-gã sá dúcãⁿ cadã-yu.

¹⁴ Te cuini-yu cadã-yu nchaa sá cuèhé sá dúhá chi ducaⁿ vèxi iní-yu.

¹⁵ Te nchaa ñáiyu ío ñuhu iní nchaa sá cuèhé sá dúhá te quidè-yu, te núu na cada-ní-yu te cuíta nihnú-yu.

¹⁶ Te nchòhó ñáiyu ío cùu iní-í ndécú ndihí-í ichi Xítóhó Jesucristú, vá dáñã-ndó mèe-ndo dandahú ñáhã ñáiyu xii-ndo.

¹⁷ Chi nchaa sá vãha véxi-xi núu Yá Ndiöxí Yáã ndécú àndiu, chi diu mee-gã ní cadúha-gã andiu ndihí nchaa chódíní, ndihí yóó, ndihí nchíanchii. Te Yá Ndiöxí ñá túú ndi queheⁿ ndi queheⁿ-gã sá cání ìní-gã, te ni ñá túú cùu-gã dàtnã ìⁿ cuándáhú cuáhãⁿ-xi duha cuáhãⁿ-xi dàcãⁿ, chi ìⁿ-ni sã sání ìní-gã.

¹⁸ Te Yá Ndiöxí ní cuini-gã sá cúú-ó dèhe-gã, te ndáá sá cúú-ó dèhe-gã chi sàndáá iní-ó tnúhu-gã. Te nchoo ñáiyu sàndáá iní-xi tnúhu-gã cùnùu-gã-ó chi ní nduu-o dèhe-gã.

Ichi ndáá cuíi

¹⁹ Te nchòhó ñáiyu ío cùu iní-í ndécú ndihí-í ichi Xítóhó Jesucristú, cund-edóho-ndo ìⁿ tnúhu na càháⁿ-í-a. Te cuini-í sá cùndecu túha-ndo cùndedóho-ndo tnúhu Yá Ndiöxí, te caní váha iní-ndó nãcuãã càháⁿ-ndó, te cunduu càhnu iní-ndó te vá cùdèèⁿ-ndó.

²⁰ Chi núu na cùdèèⁿ-ó te ñá túú quide váha-o nũú Yá Ndiöxí.

²¹ Te daña-ndo nchãa sá cuèhé sá dúhá ío ñuyúú-a. Te quindáá iní-ndó tnúhu Yá Ndiöxí ndécú ndihí-ndo, te vá cùnduu sáá iní-ndó, te ducaⁿ te naníhí tàhú-ndó.

22 Te quindáá iní-ndó tnúhu-gá te vá cuendá-ni cundedóho-ndo, chí núu na cundedóho-ndo te vá tníí-ndó ñá, te ñí-có-ni dándahú-ndó mée-ndo te vá nánihí tãhú-ndó.

23 Chí nchaa ñáyiú ñí-có-ni sácúndedóho tnúhu-gá te ñá túú sándáá iní-yu, ñáyiú-án cúú-yu ñátná ñí ñáyiú sácúndéhé-ní núú-xi núú yútátá.

24 Chí nini ndèhé-yu ní xiní-yu núú-yu, te ní xócání-yu te ní nacuaná-ní-yu nàcuáa càa núú-yu. Te ducaⁿ sãtnahá-xi cùu ñáyiú sácúndedóho tnúhu Yá Ndiõxí, te ñá túú tníí-yu.

25 Te nchaa ñáyiú ñácuaha ndisa tnúhu ní dándõ Yá Ndiõxí ñihnu-ní-yu ichi-gá, chí ñá díú ñí sá vëe cùu-xi. Te ñáyiú-án ñá túú ñí-có-ni sácúndedóho-yu chí quide ndáá-yu núú-gã, te cùdí iní-yu xíndecú-yu.

26 Te nchaa ñáyiú càchí sá ndécú ichi ndáá te cùtexínu-ni càháⁿ-yu, te xíãⁿ ñí-có-ni dándahú-yu mée-yu sá ndécú-yu ichi ndáá.

27 Te núu ndècu-o ichi ndáá cuíti ichi Dútú Ndiõxí, te chindee-o nchaa ñáyiú ní ndóo ndàhú, ndihí ñáyiú quèe ndécú ndihí tnúndòho tnúhu ndàhú, te vá cádá-ó ñandi sá cuèhé sá dúhá ío ñuyíú-a.

2

Ñí-nuu-ni cùu iní-ó nchaa tnahá ñáyiú-o

1 Te nchòhó ñáyiú ndècu ndihí-í ichi Xítohó Jesucristú Yá cúnúu, ñí-nuu-ni càháⁿ ndihí váha-ndo nchaa tnahá ñáyiú-ndo.

2 Te núu núú nátàcá-ndó chíñuhu-ndo Yá Ndiõxí ní sáá ñí tée ío váha càa dóo ñíhnú-dě, te ní sáá tucu ñí tée ñihnu dóo ndàhú,

3 te núu tée ñihnu dóo váha-ni-án néhé-ndó sã yíñùhu núú-dě, te taxinucóo-ndo-dě ñí núú xilé váha, te tée ndàhú-án daxòcáo-ndo-dě ñí xio àdi canucóo-ndo-dě núú ñíhú,

4 te núu ducaⁿ na càda-ndo te ñá túú quide váha-ndo. Chí ñí-ni-dé cúú iní-ndó, te ñí-dé ñá túú cùu iní-ndó.

5 Te nchòhó ñáyiú ío cùu iní-í ndécú ndihí-í ichi Xítohó Jesucristú, chí cùndedóho tucu tnúhu na càháⁿ-í-a. Yá Ndiõxí càháⁿ-gá vãi ñáyiú ndàhú cuendá tnahá tnúhu ndihí ñàhá-yu xii-gá, te ndècu váha-gá-yu ñá-cúxí ñáyiú cuica ñáyiú ñá túú sándáá

iní tnúhu-gá, chí ní cachí-gá sá ncháá ñáyiú na cùu iní ñàhá xii-gá nduu tãhú-yu cundecú-yu ndihí-gá ní caa ní quíhíⁿ.

6 Te nchòhó, ñá túú nèhe-ndo sá yíñùhu núú ñáyiú ndàhú, chí núú ñáyiú cuica-ni nèhe-ndo sá yíñùhu. ¿Te náa ñá cùtnúni iní-ndó sã ñáyiú cuica dándòho ñaha-gá-yu xii-ndo, te càndeca ñàhá-yu sàháⁿ núú cuè tée cùchiúⁿ-án?

7 Te ñíu-ní-yu ío càháⁿ cuèhé-yu cuendá Xítohó Jesucristú, te nchòhó sa ní nduu-ndo ñèhe-gá.

8 Te ñí ndudú cúnúu-gá ní càháⁿ Yá Ndiõxí ní ngódó tnúni núú tütú-gá càchí-xi sá cúú iní-ó tñaha ñáyiú-o ñátná cúú iní-ó mée-o. Te núu ducaⁿ na càda-o te quide váha-o.

9 Dico núu ñá túú cùu iní ñí-nuu-o cuè tñaha ñáyiú-o, te cuu cuèchi xii-o chí ñá túú quide-o nacúáa càháⁿ Yá Ndiõxí.

10 Te núu ñí ñáyiú ndàunihnu ñí sá càháⁿ Yá Ndiõxí, te ñava-ni quide-yu ña, te ñáyiú-án ñá túú quide-yu nàcuáa càháⁿ ndudú Yá Ndiõxí.

11 Te Yá Ndiõxí ní cachí-gá sá tée ndècu ñádhí-xi vá càháⁿ ndihí-dé ñngá ñádhí. Te ñíu-ni-gá ní cachí-gá sá vá càhí-ó tñaha ñáyiú-o. Te cuèi ñá túú càháⁿ ndihí-o ñngá ñádhí, te núu sàhni-o tñaha ñáyiú-o te ñá túú quide-o nacúáa càháⁿ ndudú Yá Ndiõxí.

12 Te nchòo xini ñihu-xi càháⁿ-ó tnúhu váha te cada ndáá-ó, chí ñá díú ñí sá vëe cùu-xi sá ñí cachí Yá Ndiõxí cada-o. Te mee-gã ní cachí-gá sá cádá ndáá-gá cuèchi-o na sáá nduu.

13 Te nchaa ñáyiú ñá túú cùndahú iní tñaha ñáyiú-xi, te vá cùndahú iní ñàhá-gã xii-yu na sáá nduu càda ndáá-gá cuèchi-yu. Te nchaa ñáyiú cùndahú iní tñaha ñáyiú-xi te Yá Ndiõxí cùndahú iní ñàhá-gã xii-yu na sáá nduu-ãⁿ.

Quindáá iní-ó Yá Ndiõxí te cada váha-o

14 Te nchòhó ñáyiú ndècu ndihí-í ichi Xítohó Jesucristú, te núu càchí-ó sã sándáá iní-ó Yá Ndiõxí te ñá túú quide-o sá váha, te ñá túú ndèe nándihí-xi, chí vá nánihí tãhú-ó te núu ducaⁿ na càda-o.

15 Te núu ndèhe-o ñí tñaha ñáyiú-o ñá túú dõ-yu àdi ñá túú sã cùchító-yu,

16 te xãhaⁿ-o: “Núhú-n te nducu-n dõ cuihnu-n te nducu-n sã cáxí-n”, xãhaⁿ-o, te

ñá túú nã sãñaha-o, te sá dúcáⁿ quide-o te ñá túú quide váha-o.

17 Te núu cãchí-ó sã sãndáá iní-ó Yã Ndiõxí te ñá túú quide váha-o ndècu-o, te vèdana nãndíhi-xi.

18 Te ío ñáyíu cãchí-yu sá sãndáá iní-yu Yá Ndiõxí, te ío ñáyíu cãchí-yu sá mée-ní sã váha quidé-yu. Te yúhú cãchí-í sá núu ñá túú quide-o sá váha, te ñá túú sãndáá iní-ó Yã Ndiõxí. Te nchoo quide-o sá váha núu xíáⁿ cútnùní iní-ó sã sãndáá iní-ó-gã.

19 Te ío ñáyíu cãchí sá ìndii-ni Yá Ndiõxí ndécú, te váha-ni cãháⁿ-yu. Te tnàhá yucu ñãvãha ndíhi nchaa espíritú cúndíhi-xi xiní-xi sá ndécú ìndii-ni Yá Ndiõxí, te yùhú-xi dico ñá túú tní-xi tnúhu-gá.

20 Te ío ñí dǐquí-ó te núu na cãchí-ó sã sãndáá iní-ó Yã Ndiõxí, te vá cádá-ó sã váha.

21 Te ñaní tnáhá-ó ndíi Àbrahám téé ní xíndecu ndéé sanaha ñí ngúndecu váha ndíi núú Yã Ndiõxí, chi ní xito ndéé ñáhá-gã xii ndíi núu ndísa sá cáhní ndíi déhe ndíi té Isàác nduu táhú-gã ní cùu, te dàvá-áⁿ ñí cutnùní iní-gá sá ío sãndáá iní ñáhá ndíi xii-gá, núu ñá ní dàña-gá cahni ndíi déhe ndíi.

22 Te nàha-o sá ndíi Àbrahám ñá díú-ní sã mée-ní sã ñí sãndáá iní ñáhá ndíi xii-gá, chi ní tní ndíi tnúhu-gá.

23 Te ducaⁿ ñí quee ndáá-xi nàcuáa cãháⁿ-xi núú tütú Yã Ndiõxí núú cãchí-xi: “Ndíi Àbrahám ñí sãndáá iní ndíi ní quide ndíi nchaa nàcuáa ní xáhaⁿ Yã Ndiõxí, te ní ngúndecu váha ndíi núú-gã, te ní cachí-gá sá cúú ndíi ìndii-ó téé ío váha tnàhá tnúhu ndíhi-gá”, duha cãchí-xi núú tütú-gá.

24 Te xíáⁿ cútnùní iní-ó sã ñá díú mée-ni sá quèndáá iní-ó Yã Ndiõxí, chi núu na càda-o nacuáa cuu váha iní-gá te ngúndecu váha-o núú-gã.

25 dàtná ní quide-gá tá Ràháb ìndii-ó ñadíhi ní xíndecu ndéé sanaha, chi xíchí-áⁿ ñí xíndecu-xi ichi díi iní, dico ní tuha-xi ichi Yá Ndiõxí te ní ngúndecu váha-xi núú-gã, chi ní chindee-xi cuè téé israhél cue téé ní xica chiúⁿ-gá, te ní sanu ichi ñaha-xi xii-güedé ìndii-ó ichi núú vã náníhi ñáhá cuè téé cùu úhú iní ñáhá xii-güedé.

26 Te nchaa ñáyíu cãchí sá sãndáá iní Yã Ndiõxí, te ñá túú quidé-yu nàcuáa cãháⁿ-gá ñáyíu-áⁿ cúú-yu dàtná ìndii-ó ñáyíu ní xíhi. Chi

ñá túú-gã ndíxí tũu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáyíu ñá túú cuíni tní tnúhu cãháⁿ Yã Ndiõxí.

3

Nàcuáa quide yaa-o

1 Te nchòhó ñáyíu ndècu ndíhi-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáyíu tnúhu Yá Ndiõxí chi íi cáá-xí. Chi na quítnahá nduu nàcuáha-o cuèndá núú-gã, te núu ñá túú ní quide ndáá-ó ñá, te vá cúú váha iní-gá núú-ó.

2 Te nchaa-o ío cuèhé sã ñá túú váha quide-o. Te nchaa ñáyíu ñá túú cãháⁿ tnúhu cuèhé tnúhu duha cúú-yu ñáyíu ñá túú nã cúmãní chi ío ndáá quídě-yu. Te xíní-yu cotní-yu mée-yu, te quide váha-yu núú Yã Ndiõxí.

3 Te dàtná cuíni-ndó cùu ìndii-ó quiti te núu na chíhi-o frenú yuhu-di, te cotní-o-di te ngúnu ichi-di, te ducaⁿ sãtnahá-xi cùu ñáyíu sãcòtní mee-xi, chi ñá túú cãháⁿ-yu tnúhu cuèhé tnúhu duha.

4 Te dàtná cuíni-ndó cùu barcú cuèi nàhnu vihi-xi, dico òré quéné ñíhi táchí te tündaha-xi ìndii-ó xio, dico téé dàcaca ndacu-dé dáquihíⁿ-dé-xi ndíhi ìndii-ó yutnu sá dánani-güedé tímú ndàa núú cãchí iní-dé quíhiⁿ-xi.

5 Te ducaⁿ cùu tucu yaa-o chi ío líhli-xi dico ío cuèhé tnúhu cãháⁿ-ó ndíhi-xi. Te ducaⁿ-ni sãtnahá-xi cùu tucu sá lúhá ñùhú chi sãhmi-xi ìndii-ó yucu.

6 Te díu-ni ducaⁿ sãtnahá-xi cùu yaa-o chi ío cuèhé tnúhu cuèhé tnúhu duha cãháⁿ-ó ndíhi-xi, te dàcuíta nihnu ñaha-xi xii-o. Te ío cuèhé cuèchi quide-o ndíhi-xi cuèndá sá ñùyíú-a ñùhu tnàhá ñùhú tní yucu ñãvãha dàticá nihnu ñaha-xi.

7 Te ndacu-o càda masú-ó nchàa núú quiti ío ñùyíú cuèi quiti dééⁿ quiti xica núú ñùhú, te cuèi quiti ndàva, te cuèi cóo, te cuèi quiti ñùhu xiti ndute làmár, chi ducaⁿ quide dava cue téé ñùyíú-a.

8 Dico yàa-o chi vá yõo ìndii-ó ndàcu cada masú ñáhá xii-xi nacuáa cãháⁿ-ó mée-ni tnúhu váha ndíhi-xi, chi mee-ni tnúhu cuèhé tnúhu duha cùnuu-gá cãháⁿ-ó

ndìhi-xi. Te cùu-xi datná ìⁿ venènú chi dātìu-xi iní-ó.

⁹ Te ðiu-ni ndìhi yàa-o quide cahnu-o Dútú Ndiòxí Yáa cúú Tātá-ó, te ðiu-ni ndìhi yàa-o caháⁿ úhú-ó cuè tnaħa ñáyiu-o. Te xìni ñuhu-xi vá dúcáⁿ càda-o, chi mee-gǎ ní chihi-gá sá xìní tnùní-ó ndìhi iní-ó, dātá cáá mèe-gá ñúhú iní-gá.

¹⁰ Te ðiu-ni yuhu-o quèe tnúhu váħa càháⁿ-ó, te ðiu-ni yuhu-o quèe tnúhu cuèhé tnúhu duħa. Te nchòhó ñáyiu ndècu ndìhi-í ichi Xítóhó Jesucristú cunaħa-ndo sǎ ñà túú ndùu váħa-xi ducaⁿ càda-o.

¹¹ Te ñá túú xìní-ndó sǎ ìⁿ núú quée ñihni ndute, te quèe ndute váħa te quèe ndute úá-ǎⁿ.

¹² Te nchòhó ñáyiu ndècu ndìhi-í ichi Xítóhó Jesucristú, te ñá túú xìní-ndó sǎ ìⁿ yutnu ngúxí, te cùuⁿ aceitúná, àdi xìní-ndó sǎ ìⁿ yoho yaha stilé te cùuⁿ ngúxí. Te ducaⁿ cuèi ìⁿ núú quée ñihni ndute, vá cúú quèe ndute váħa te quee ndute úhá. Te ducaⁿ sǎtnahá-xi cùu yuhu-o chi vá cúú càháⁿ-ó tnúhu váħa te càháⁿ-ó tnúhu cuèhé tnúhu duħa.

Nchaa sá váħa xìní tnùní-ó tàxi Yá Ndiòxí

¹³ Te núú ndècu ñáyiu túħa tnuú-ndó ñáyiu cùtnuní iní-xi, te xìni ñuhu-xi mee-ni sá váħa cadá-yu, ducaⁿ te cutnùní iní-ó sǎ túħa ndisá-yu, te vá cadá càhnú-yu mèe-yu.

¹⁴ Te núú nchoo cuédú iní-ó te cuìní-ó cùnuu-o núú tnàħa ñáyiu-o, te vá càchí-ó sǎ túħa-o, chi ñá túú quide ndáá-ó te núú ducaⁿ na càda-o.

¹⁵ Chi ñá díú xǎⁿ ní dànehé ñáhá Yá Ndiòxí, chi ñuyíú iħa ní cacu ñihnu-xi cuèndá sá yùcu ñáváħa dàcaħu iní ñáhá-xí.

¹⁶ Te núú ndécú ñáyiu cuédú iní ñáyiu cuìní cunu, te yàcáⁿ mee-ni ndǎhú nàá xǎndécú-yu, te ñá túú quide váħa-yu, chi mee-ni nchàa sá cuèhé sá dúhá quidé-yu.

¹⁷ Te núú ní taxi Yá Ndiòxí sá xìní tnùní-ó, te cada váħa-o, te càháⁿ ndìhi váħa-o nchàa tnaħa ñáyiu-o, te tñi-o tnúhu váħa càháⁿ-yu, te cundǎhú iní-ó-güè-yu te chindee-ò-yu, te vá cání ìⁿ caní úú iní-ó, te ío cunduu ndáá iní-ó.

¹⁸ Te núú cuìní-ó ñà túú ñà cuu cundecu-o ñúyíú-a, te cada váħa-o sǎ cúú-xí

tnàħa ñáyiu-o cuèndá sá ñà túú ñà cuu cundecu-o ndìhi-yu. Te ducaⁿ te nguínchicúⁿ dava-gá tnàħa ñáyiu-o càda váħa-yu.

4

Vá cúú cùndecu-o ichi Yá Ndiòxí te cada-o nǎndi sá cuèhé sá dúhá

¹ ¿Te xìní-ndó ñà cuèndá nàá ñáyiu te xǎsahni tnàħá-yu-ǎⁿ? Te nàá-yu sá tnúhu cuédú iní, chi ðiu-ni xǎⁿ ñúhú iní-yu, te ñá túú ndècu váħa iní-yu.

² Chi cuìní-yu cundecu ndìhi-yu ìⁿ sá ñà túú ndècu ndìhi-yu, te ñá túú ñihí-yu núu xǎⁿ xǎcuu cuédú iní tnáhǎ-yu, te xǎcuèhé tnáhǎ-yu, te càni tnahá-yu, te xǎsahni tnàħá-yu. Te ñá túú ñihí-yu sá cuìní-yu chi ñá túú xìcáⁿ-yu núú Yá Ndiòxí.

³ Te cuèi xìcáⁿ-yu ìⁿ sá cuìní-yu núú-gǎ te ñá túú sǎñaha-gǎ, chi ñá túú xìcáⁿ-yu ìⁿ sá cúú xii-yu sá váħa, chi ìⁿ sá ná ndìhi-yu núú cáďǎ-yu nchaa sá cuèhé sá dúhá xìcáⁿ-yu, núu xǎⁿ ñá ñihí-yu.

⁴ Te nchaa ñáyiu ducaⁿ xǎquide ío cùu sáá iní-yu núú Yá Ndiòxí. Te nàħa-ndo sá ncháá ñáyiu cùďđi iní-xi cundecu ichi cuèhé ichi duħa cùu úhú iní-yu Yá Ndiòxí, chi vá cúú cùndecu-o ichi cuèhé ichi duħa, te cundecu-o ichi-gá.

⁵ Te ñá túú díó ducaⁿ càháⁿ-xi núú tütú Yá Ndiòxí núú càchí-xi: “Yá Ndiòxí ní taxi-gá Espíritú-gá ndécú ndìhi-o. Te Espíritú-gá-áⁿ cuìní-xi sá méé-ní-gǎ cuħuⁿ iní-ó”, duħa càchí-xi núú tütú-gá.

⁶ Te Yá Ndiòxí ío chindee ñaha-gá cuèndá cada ndáá-ó núú-gǎ dātá càchí tucu-xi núú tütú-gá núú càchí-xi: “Yá Ndiòxí ñá túú cùu váħa iní-gá núú nchàa ñáyiu quide cahnu mee-xi, dico chindee-gá cue ñáyiu ndǎhú iní-xi”, duħa càháⁿ-xi núú tütú-gá.

⁷ Te cada-ndo nàcuáa càháⁿ Yá Ndiòxí. Te vá cadá-ndó nàcuáa cuìní yucu ñáváħa, ducaⁿ te xóo cóo ndée ñáhá-xí xii-ndo.

⁸ Te tñi-ndo tnúhu càháⁿ Yá Ndiòxí te cundecu ndìhi ñaha-gǎ xii-ndo. Te nchaa nchòhó ñáyiu ndècu ichi cuèhé ichi duħa daña-ndo ichi-áⁿ te cada váħa-ndo. Te nchaa nchòhó ñáyiu sàni iní cunu cuechí núú Yá Ndiòxí te quide-ni-ndo nchaa sá cuèhé sá dúhá, te ñá túú quide váħa-ndo núu ducaⁿ, chi xìni ñuhu-xi sá càcáⁿ-ndó

núú Yă Ndiöxí sá ná ndádá ndòo ndada nine-gá iní-ndó.

⁹ Te ndixi cuéchi iní-ndó nchàa sá quidé-ndó ndèé ndáhyú ndisa-ndo sã ndihú iní-ndó, te ñá díú dà cudí iní-ndó.

¹⁰ Te náhmá-ndó núú Yă Ndiöxí nchaa sá ní quide-ndo, te ngúndecu váha-ndo núú-gã.

Vá càháⁿ-ó nchàa sá quidé tnàha ñáyiu-o

¹¹ Te nchòhó ñáyiu ndècu ndihí-í ichi Xítohó Jesucristú, vá cuátnùhu tnahá-ndo, chi nchaa ñáyiu sãtnuhu tnahá dícó-ni ndàa nuú-yu ndèhe tnahá-yu, te ñá túú càháⁿ váha-yu cuendá tnúhu Yá Ndiöxí sá sánú ichi ñaha xii-yu nàcuáa cundecú-yu, chi dàquee tíhú-yu tnúhu-áⁿ. Te núu càchí-ndó sã ñá túú càháⁿ váha tnúhu Yá Ndiöxí, te xíáⁿ quéé-xí sã ñá túú sàndáá iní-ndó tnúhu càháⁿ-gá, te cuení-ndó cùnuu tnúhu-ndo núú tnúhu-gá.

¹² Te mee Yă Ndiöxí ní cachí-gá nàcuáa cada-o, te ñu-ni mee-gã càháⁿ-gá te núu ní quide váha-o, àdi ñá túú ní quide váha-o. Te ñu-ni mee-gã dàcácu nihnu ñaha-gã xii-o núú ùhú núú ndàhú, te ñu-ni-gá daquihíⁿ ñáhá-gã xii-o núú ùhú núú ndàhú-áⁿ te núu vá cáda váha-o. Te nchoo ñá túú nã cúú-ó, te núu mee-ni nchàa sá quidé tnàha ñáyiu-o cùndehe-o.

Ñá túú cùnuni iní-ó nãsa túndaá-ó ìngá nduu

¹³ Te dava nchòhó càchí-ndó sã vítná àdi tneé quihíⁿ-ndó ñⁿ ñuú, te yácáⁿ cundecu-ndo ñⁿ cuía cada-ndo ñⁿ ndáhu te níhí-ndó díhúⁿ.

¹⁴ Te ní ñá xini-ndó nã cúú sã yáha-ndo vitna àdi tneé. Te nchoo cùu-o datná ñⁿ vícò núhú, chi vícò-ãⁿ tnávíí ndéhé-ó te tna tnaa-gá sa ní ndóñúhú-xí. Ducaⁿ sãtnahá-xi cùu nchoo chi ñⁿ úú nduu duha vëxi-o ñuyú-a te ndoñuhu-o.

¹⁵ Te núu sàndáá iní-ó Yă Ndiöxí te duha càháⁿ-ó: “Te núu Ndiöxí ná càchí-gá sá cùndecu tnaa-o ñuyú-a te cada chiúⁿ-o”, duha cachí-ó.

¹⁶ Dico mee-ndo chi ío ñí iní-ndó cuení-ndó cùnuu tnúhu-ndo núú Yă Ndiöxí, te ñá túú ndùu váha-xi sá dúcáⁿ quide-ndo.

¹⁷ Te núu xini-ó càda-o sá váha te ñá túú quide-o, te cùu-xi ñⁿ cuéchi núú-gã.

5

Tnúhu sá dátúha ñaha xii nchaa ñáyiu cuica ñá túú sàndáá iní tnúhu Yá Ndiöxí

¹ Te nchòhó ñáyiu cuica ñáyiu cuihna iní-xi cundedóho-ndo tnúhu na càháⁿ-í-a. Vitna ngúita-ndo ndihú iní-ndó, te ndáhyú víhí-ndó, chi quixi ñⁿ tnúndòho cuendá-ndó te ndoho víhi-ndo.

² Te nchaa sá ndécú ndihí-ndo ndihí cuita tiu quihíⁿ, te quee tíquidi dóó-ndó,

³ te díhúⁿ-ndó caxi cudi ñùhu. Te xíáⁿ cuita naquiní ndeé-ndó tnúndòho sá ñá túú quide váha-ndo. Te ndihí-ndo ndihí díhúⁿ-ndó sã ní taxúha-ndo, chi vitna sa ta cùyatni sáá nduu ndihí ñuyú-a.

⁴ Te nchaa cue téé ní quide chiúⁿ núú chíúⁿ-ndó ní ndatnúhu-ndo ndihí-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núu xíáⁿ ío ndècuéchi-ndo. Te Yá Ndiöxí Yaá ndécú àndu ní tecú dóho-gá nàcuáa càháⁿ-güedé sá ní dándàhú-ndó-güedé.

⁵ Te nchòhó ñáyiu cuica, sá ndécú váha-ni-ndo cùndee iní-ndó, núu quide-ni-ndo nchaa sá vëxi iní-ndó. Te cùu-ndo datná ñⁿ quiti nùcuíhnu mee-ni xèxi-dí, te sáá nduu sãhni-güedé-dí. Te ducaⁿ sãtnahá-xi cùu nchohó chi ndècu váha-ndo vitna, te sáá ñⁿ nduu nàcháhu-ndo nchàa sá quidé-ndó núú Yă Ndiöxí te núu vá quíndaá iní-ndó-gã.

⁶ Te quide úhú iní-ndó sãhni-ndo cue ñáyiu quide ndáá núú Yă Ndiöxí, te ñá túú nã quidé-yu.

Cunduu càhnu iní-ó te càháⁿ ndihí-o Yă Ndiöxí

⁷ Te nchòhó ñáyiu ndècu ndihí-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyú-a, te cada-ndo dàtná quidé nchàa ñáyiu chihi tatá chi sàcùndetú-yu ndéé cúúⁿ dáú te chihí-yu. Te cùndee-ni iní-yu sàcùndetú-yu ndéé cúúⁿ-gã dáú te cùu itú-yu, te ndúdí iní-yu.

⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú.

⁹ Te duha ndùu tnúhu càháⁿ-í núú nchòhó ñáyiu ndècu ndihí-í ichi Xítohó Jesucristú, vá ndàcáⁿ cuéchi núú tnáhá-ndó te núu

nása cùu ndecu-ndo, chi ñá cuèhé-gá nduu cùmání te quixi Crìstú nacuaca ñaha-gã xii-o cùndecu-o núu Yã Ndiõxí, te mee-gã cada ndáá-gá cuéchi-o.

10 Te nchòhó ñáyiú ndècu ndihí-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndiõxí ndéé sanaha sá ío càhnu ní xínduu iní-güedé cuéi nándi ní ndoho-güedé.

11 Te cùtnuní iní-ó sã cúú-ó ñáyiú ío váha táhú-xi te núu na càda cahnu iní-ó nchàa sá ná yáha-o cuendá Yá Ndiõxí. Te nàha-ndo sá ndíi Jõb ducaⁿ ñí quide ndíi, chi nándi sá ñí yáha ndíi te ní quide càhnu iní ndíi. Te sátá ñí yáha ní ndoho ndíi, te ío cuéhé sã ñí sáñaha Yá Ndiõxí xii ndíi. Chi ío váha iní-gá te ío cùndahú iní-gá nchaa ñáyiú ío càhnu iní-xi.

12 Te nchòhó ñáyiú ndècu ndihí-í ichi Xítohó Jesucristú, chí cùndèdóho tucu tnúhu na cáháⁿ-í-a, chí ío xini ñuhu-xi. Vá cácu nèhe-ndo Yá Ndiõxí òré cuíní-ndó sã cùtnuní iní ñáyiú sá ndáá cada-ndo ñⁿ sá cáháⁿ-ndó. Te ñí vá cácu nèhe-ndo sá cáchí-yu cùu ndiõxí cáduha cue téé ñuyíú-a. Te núu ñⁿ sá xicáⁿ tnàha ñáyiú-ndo nũú-ndó te cúñaha-ni-ndo te núu cuu àdi sá vã cúú. Te vá cácu nèhe-ndo Yá Ndiõxí, ducaⁿ te vá dándòho ñaha-gá xii-ndo.

13 Te núu ndòho-ndo te cáháⁿ ndihí-ndo Yá Ndiõxí, àdi te núu ndècu váha-ndo te cudíí iní-ndó te chiñuhu-ndo-gã,

14 àdi núu cùhú-ndó te cana-ndo cuè téé yìndaha ñaha xii-ndo nacuáa ndècu-ndo ichi Yá Ndiõxí cuendá tee-güedé acití díquí-ndó, te cácaⁿ táhú-güedé núú-gã cuendá-ndó dàtná ní cachí méé-gã cunduu.

15 Te núu quíndáá ndisa iní-ndó sã ndũha-ndo, te ndúha-ndo chí Yá Ndiõxí cada tátna ñaha-gã xii-ndo, àdi núu ní quide-ndo ñⁿ sá ñà túú tàú-ndó càda-ndo núú-gã te cada càhnu iní-gá cuéchi-ndo.

16 Te xini ñuhu-xi cùtnũhu tnàha-ndo oré ñá túú cùndáá-ndó núú Yá Ndiõxí cuendá chindee tnúhu tnàha-ndo cáháⁿ ndihí-ndo-gã te xocàni-gá cuéhé-ndó, te cada càhnu iní-gá nchaa sá ñà túú váha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndiõxí na càcáⁿ-yu ñⁿ sá cuíní-yu núú-gã te nìhí-yu, chí sàá tnúhu-yu núú-gã.

17 Te té Èliás, téé ní xíndecu ndéé sanaha ñí cáa-dé dàtná cáá nchòo. Te ní cáháⁿ ndihí-dé Yá Ndiõxí ñí yùhu ñí iní-dé ní xáhaⁿ-dẽ xii-gá sá vã dácùuⁿ-gá dáú, te ní tñi-gá tnúhu ní cáháⁿ-dé, te ñá ní dàcuuⁿ-gá dáú ùní cuíá dava.

18 Te dàtnuní ducaⁿ te ní cáháⁿ ndihí tucu té Èliás-áⁿ Yá Ndiõxí sá dácùuⁿ-gá dáú te ní cuuⁿ, te ní cuu tucu nchaa sá ñí xitu-güedé.

19 Te nchòhó ñáyiú ndècu ndihí-í ichi Xítohó Jesucristú, te núu dava-ndo sã ndecu-ndo ichi Yá Ndiõxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcùndecu tucu-ndo ìchi-gá,

20 te núu ducaⁿ na càda-ndo te dàcácu ñíhnu tnàha-ndo núú ùhú núú ndàhú, te mee Yá Ndiõxí cada càhnu iní ñáhá-gã xii-ndo cuéi ío cuéhé cuéchi ní quide-ndo.

TUTÚ DÍHNA NUU NĪ CADÚHA TÉ PÈLÚ

Té Pèlú cáduha-dé tutú sá cúú-xí cuè ñáyiú sàndáá iní ñáhá xii Yá Ndiöxí

¹ Yúhú té Pèlú ní tendaha ñaha Xítoho Jesucristú xicá cùu-í càháⁿ-í tnúhu-gá, te càduha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndihí distritú Gàlaciá, ndihí distritú Capadociá, ndihí distritú Àsiá, ndihí distritú Bìtiniá.

² Chi Dútú Ndiöxí ní cachí-gá sá cúú-ndó dèhe-gá ndéé cútnàhá vátá ngáva-gá ñuyíú, te Espiritú-gá ní quide-xi ndècu yiñuhu-ndo núú-gã vitna. Te ní cachí-gá sá cúú-ndó dèhe-gá cuendá tñi-ndo nchàa tnúhu càháⁿ Xítoho Jesucristú, ndihí cuendá nduu ndoo nduu nine iní-ndó, chi ñi cuendá-án ñi xíhí Xítoho Jesucristú. Te xicáⁿ táhù-í núú Yá Ndiöxí sá ño na chindee chitúu ñaha-gã xii-ndo cuèi vitna te cuèi núú cuáháⁿ núú vèxi, te ñi-ni-gá ná cádá te ío váha cuu iní-ndó cùndecu-ndo.

Tnúhu ndee iní sá ndécú ndihí ñáyiú sàndáá iní ñáhá xii Yá Ndiöxí

³ Te vitna chí ná càchí-ó sá ño càhnu cuu Yá Ndiöxí Yaá cúú Tátá Xítoho Jesucristú, chi ñi-gá ío ní cundàhú iní ñáhá-gã xii-o ñu xíáⁿ ní quide-gá sá nchóó ñi nduu-o dàtná ñi ñáyiú saa vitna. Te ducaⁿ ñi quide ñaha-gã xii-o cuendá sá Xítoho Jesucristú ní xíhí-gá te ní ndoto-gá. Te cuendá sá ñi nduu-o dàtná ñi ñáyiú saa, xíáⁿ ní ngúndecu ndihí-o tnúhu ndee iní

⁴ sá cùndecu ndihí-o-gá ñi caa ñi quíhíⁿ, chi ducaⁿ ñi cachí-gá cunduu. Te yàcáⁿ vá quíní-gá-ó ñi ñi sá cuèhé sá dúhá, te ío cudíí iní-ó cùndecu-o ndihí-gá ñi caa ñi quíhíⁿ.

⁵ Te sá sàndáá iní-ó Yá Ndiöxí, núú xíáⁿ coto ñaha-gã xii-o ndèé ná sàá nduu nàqueheⁿ cuendá ñáhá-gã chi ío càhnu cuu-gá.

⁶ Te xíáⁿ ío cudíí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo.

⁷ Te òré ná cádá càhnu iní-ndó yáha-ndo nchàa sá ná cáda ñaha ñáyiú xii-ndo, te ducaⁿ te cutnùní sàndáá ndisa iní-ndó Yá

Ndiöxí, te sá dúcáⁿ sàndáá iní-ndó Yá Ndiöxí ío-gá váha dàcúxí díhúⁿ cuááⁿ chí xíáⁿ ñá túú cùdí-xi. Te cuèi ducaⁿ dico xito ndéé náhí-ní-güedé ñu ndisa cùu-xi díhúⁿ cuááⁿ. Te ducaⁿ sàtnahá-xi cùu nchohó cuendá nchaa sá ndóhó-ndó, te na sàá nduu quixi tucu Xítoho Jesucristú te cúñaha-gã xii-ndo: “Ío váha ní quide-ndo, te vitna ío càhnu cuu-ndo, te tàú-ndó nùcùndecu váha-ndo”, duha cúñaha-gã xii-ndo.

⁸ Te vitna ío cùu iní-ndó Xítoho Jesucristú cuèi vátá quíní-gá-ndó-gã, te ducaⁿ ño sàndáá iní-ndó-gã, te ío cudíí iní-ndó te súúní ñi ñá cútnùní iní-ndó ñáa cunduu tnúhu càháⁿ-ndó sá dúcáⁿ ño cudíí iní-ndó

⁹ cuendá sá ñi naníhí tàhú-ndó, chí ní sàndáá iní-ndó-gã.

¹⁰ Te cue téé ní xóo càháⁿ tnúhu Yá Ndiöxí ndéé sanaha ní cachí-güedé nàcuáa cada-gá cundàhú iní ñáhá-gã xii-o vitna. Te cue téé-án ño váha ní dácuáhá-güedé nàcuáa cada Yá Ndiöxí dàcácu nihnu ñaha-gã xii-o vitna.

¹¹ Te Espiritú Xítoho Jesucristú ní ngúndecu ndihí cue téé-án ñi xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sàtá ná yáha ndoho-gá te ío cunuu-gã ndihí Yá Ndiöxí. Te ío ní sani iní-güedé ñu ná nduu sáa ducaⁿ càda-xi, ndihí nchaa nándi-gá cúú sá cádá-xi.

¹² Te Yá Ndiöxí ní xáhaⁿ-gã xii-güedé sá ncháá tnúhu váha càháⁿ-güedé vá cúú-xí cuendá méé-güedé, chí cuendá nchoo cuè ñáyiú ndècu ñuyíú-a vitna cùu-xi. Te ñi-ni tnúhu-án cúú tnúhu càháⁿ nchúhú cue téé càháⁿ tnúhu Yá Ndiöxí núú-ndó. Te Espiritú sá ñi taxi Yá Ndiöxí ndécú ndihí-o chindee ñaha-xi xii-ndí càháⁿ-ndí tnúhu-gá. Te cue espíritú xínú cuèchi núú Yá Ndiöxí ío cuíní-xi quíní ndáá-xi nchaa nàcuáa cuáháⁿ tnúhu-án.

Yá Ndiöxí càchí-gá sá cádá-ó mèe-ni sá váha

¹³ Te sá dúcáⁿ ño váha ní quide ñaha Yá Ndiöxí xii-ndo xíáⁿ xíní ñuhu-xi ío váha cuáha-ndo cuendá nàcuáa cundecu-ndo te vá cáni iní-ndó càda-ndo ñi ñi sá cuèhé sá dúhá, te ío quíndáá iní-ndó sá Yá Ndiöxí cada váha ñaha-gã nduu na quixi tucu Xítoho Jesucristú.

¹⁴ Te ío tñi-ndo nchàa tnúhu càháⁿ Yá Ndiöxí, te vá cúhúⁿ-gã iní-ndó nándi

sá cuèhé sá dúhá sã ñĩ xúhuⁿ iní-ndó cùtnàhá vátá cùndècu-gá-ndó ìchi-gá te ni vã cádá-ndó.

15 Te cada-ndo mèe-ni sá vãha cundecu-ndo dàtná quidé mèe Yá Ndiöxí Yaá ní cáháⁿ ñáhá xii-o cundecu-o ndihí-gá.

16 Te cächí-gá núú tütú-gá: “Cada-ndo mèe-ni sá vãha cundecu-ndo, chi ducaⁿ quide yúhú”, duha cächí-gá núú tütú-gá.

17 Te Yá Ndiöxí cada ndáá-gá cuéchi nchaa ñáyiú, te vã cádá cuèndá-gá cuèi náí ñáyiú cùú-yu, te nchòhó cächí-ndó sã díú Tãtã-ndó cùu-gá te ndáá, núu xíãⁿ xíní ñùhu-xi canehe-ndo sá yíñùhu núú-gã ndi nchaa nduu cundecu-ndo ñuyíú-a.

18 Te ñu-gá ní dácãcu nihnu ñaha-gã xii-ndo ñⁿ ichi sá ñà túú nàndíhi ní sanu ichi ñaha cuè ñaní tnáhá-ndó ñĩ xíndecu ndéé sanaha ni cùu, te nchòhó sa ñaha-ndo sá sã dúcãⁿ ñĩ quide ñaha Yá Ndiöxí ní dácãcu nihnu ñaha-gã xii-ndo ìchi-áⁿ ñà túú ní chãhu-gá ni ñⁿ díhúⁿ cuàáⁿ, te ni ñⁿ díhúⁿ cuixíⁿ sá ndíhí nihnu ñuyíú-a cuèndá-ndó.

19 Chi Xítóhó Jesucristú ní quixi-gá ní sati níñí-gã, te ní xíhí-gá núú cùrúxí cuèndá sá nchóó nàníhí tàhú-ó, te cùu-gá dàtná ñⁿ mbéé quiti ío váha iní-xi, quiti càndoo canine.

20 Te ducaⁿ ñĩ ndoho Xítóhó Jesucristú, chi ducaⁿ tnáhí ndéé tnuní ndoho-gá ndéé cùtnàhá vátá ngãva-gá ñuyíú. Te ducaⁿ ñĩ yáha-gá cùtnàhá ní quixi-gá òré vitna cùmání sáá nduu nàa ñuyíú-a cuèndá nchoo cùu-xi sá vãha xii-o vitna.

21 Te nchòhó sa ñihí-ndó tnùhu nàcuáa ní yáha Xítóhó Jesucristú cùtnàhá ní quixi-gá ñuyíú-a, núu xíãⁿ sàndáá iní-ndó Yá Ndiöxí. Te Yá Ndiöxí ní dándótó-gã Xítóhó Jesucristú, te sátá ñĩ dándótó ñaha-gá te ní cachí-gá sá ño càhnu cuu Xítóhó Jesucristú. Te sá dúcãⁿ ñĩ cuu, xíãⁿ ío sàndáá iní-ndó Yá Ndiöxí, te ní taxi-gá tnúhu ndee ñni ndécú ndihí-ndo sá sãá nduu cùndecu-ndo ndihí-gá ni caa ni quíhíⁿ.

22 Te Espíritú Yá Ndiöxí ní quide-xi te ní sàndáá iní-ndó tnùhu-gá, te xíãⁿ ní nduu ndoo ní nduu nine iní-ndó, te cùu iní tnáhá ndisa-ndo nacuáa ndècu-ndo ichi Yá Ndiöxí, te xini ñuhu ndisa-xi sá ño ni yùhu ni iní-ndó cùu iní tnáhá-ndó ñⁿ ñⁿ-ndo.

23 Te nchòhó ní nduu-ndo dàtná ñⁿ ñáyiú saa sá cuèndá tnúhu Yá Ndiöxí, te tnúhu-áⁿ candeca-xi iní-ndó ñi caa ni quíhíⁿ, te vã ñⁿ ndùu ndihí nihnu-xi, te ñá díú cuèndá ñáyiú ñuyíú-a ni ndùu-ndo ñⁿ ñáyiú saa chi cuèndá tnúhu-gá.

24 Chi núú tütú Yá Ndiöxí cächí-xi: Nchaa ñáyiú ndècu ñuyíú-a cùú-yu dàtná cùhú, chi cùhú-ãⁿ tnaa-ni cùdí-xi te xihí-xi, ducaⁿ sãtnahá-xi cùú-yu.

Te nchaa sá ndécú ndihí-yu cùu-xi datná ñⁿ itá cùhú-ãⁿ, chi itá-áⁿ tnaa-ni tucu cùdí-xi te ndàhvã-xi, ducaⁿ sãtnahá-xi cùu nchaa sá ndécú ndihí-yu.

25 Dico tnúhu Yá Ndiöxí chi vã náá tnàhí-xi, chi duha-ni ndècu-xi, te ñu-ni duha cundecu-xi ni caa ni quíhíⁿ.

Duha cächí-xi núú tütú-gá. Te ñu tnúhu-áⁿ ñĩ dánèhé ñáhá nchùhú cue téé càháⁿ tnúhu Yá Ndiöxí xii-ndo.

2

1 Te xíãⁿ xíní ñùhu-xi dañà-ndo nchaa núú sá cuèhé sá dúhá, te dañà-ndo ìchi tnúhu ndehnde, te dañà-ndo vã dándàhú-gá-ndó mèe-ndo sá quidé vãha-ndo, te dañà-ndo ìchi cuèdú ñni, te dañà-ndo nchaa tnúhu yiti.

2 Te cada-ndo cuèndá sá cùú-ndó dàtná cue landú yíquíⁿ vitna sadi camá, chi landú-áⁿ mee-ni sàdi-güexi te sàhnu-güexi. Te cada iní-ndó sã dúcãⁿ càda-ndo chi xini ñuhu-xi sá ño cuhuⁿ iní-ndó dàcuaha-ndo tnúhu Yá Ndiöxí, chi xíãⁿ cùú-xi mèe-ni tnúhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sàá nduu cùndecu-ndo núú ndécú-gã.

3 Te ducaⁿ xini ñuhu-xi cada-ndo, chi nchòhó sa ní cutnùní ndisa iní-ndó sã Yá Ndiöxí ío váha iní-gá.

Xítóhó Jesucristú cùú-gã dàtná ñⁿ yúú

4 Te ío nanducu nihnu-ni-ndo Xítóhó Jesucristú Yaá quidé nàcuáa naníhí tàhú-ó. Te ñu-gá ní cuu-gá dàtná ñⁿ yúú sã ñà túú nàndihí sá cùú-xi ñáyiú ñuyíú-a, chi ní dáquée tíhú ñáhã-yu xii-gá. Dico Yá Ndiöxí ní cachí-gá sá Xítóhó Jesucristú cùú-gã dàtná ñⁿ yúú sã ño-gã váha, chi ío cùnuu-gá.

5 Te nchòhó sa ní naníhí tàhú-ndó, te ío-gá chí nánducu nihnu Yá Ndiöxí cuèndá cuu

ñⁿnuu-ndo cùndecu-ndo ndihi Espiritú-gá. Te núu ducaⁿ na càda-ndo te cuu-ndo dàtná yúú vâha dàcaa-güedé dava vehe, te cuu tucu-ndo dàtná cue dútú ñⁿ xinu cuechi núú Yă Ndiöxí ndéé sanaha, nâcuáa ñá túú ñă cumání-ndó núú-gă, chi nchaa cue téé-áⁿ ñⁿ xóo cuáha ñaha-güedé sá ñⁿ xóo nduu táhú-gă. Te nchòhó vitna táu-ndó càda-ndo nchaa nacuáa càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndihi Xítóhó Jesucristú.

⁶ Te Yă Ndiöxí càchí-gá núú tütú-gá: Yúhú taxi ndecu-í ñⁿ Yaá ñuú Sìón, te cuu-gá dàtná ñⁿ yúú vâha sá sánútnî-güedé xíquí cimièntú ñⁿ vehe, chi yúhú ní cachí-í sá Yàá-áⁿ ño cunuu-gă.

Te nchaa ñáyiu quindáá iní ñáhá xî-gá vá ñⁿ nduu ndixi cuéchi iní-yu sá dúcáⁿ sàndáá iní ñáhă-yu xii-gá.

Duha càchí-gá núú tütú-gá.

⁷ Te nchòhó ñáyiu sàndáá iní ñáhá xî Xítóhó Jesucristú ño cùu iní-ndó-gă, te nchaa ñáyiu ñá túú sàndáá iní ñáhá xî-gá quidè-yu dàtná càháⁿ-xi núú tütú Yă Ndiöxí núú càchí-xi:

Yúú sá ñⁿ dáquéé tîhú cue téé dàcaa vehe, xîáⁿ cúú-xí yúú sá ño-gá nándîhi vitna.

Duha càchí-xi núú tütú-gá. Te yúú-áⁿ cada iní-ó sá cúú-xí Xítóhó Jesucristú, chi ní dáquéé tîhú ñáhá-güedé xii-gá.

⁸ Te càchí tucu-xi ingá xichi núú tütú Yă Ndiöxí:

Yúú-áⁿ nguñenu ñáyiu te ndúá-yu.

Duha càchí-xi núú tütú-gá. Te tnúhu-áⁿ quéé-xí sá ño quide sáá iní ñáyiu núú-gă, chi ñá túú cuíní-yu tnî-yu tnúhu càháⁿ-gá, te ducaⁿ tnâhí ndéé tnuní sá ncháá ñáyiu ñá túú cuíní tnî tnúhu càháⁿ-gá, te ño cùu sáá iní-yu núú-gă.

Ñáyiu ndècu ndihi Yă Ndiöxí

⁹ Te nchoo cùu-o ñáyiu sa ní dáquéé dîñⁿ ñaha Yă Ndiöxí xii-o cuèndá cundecu-o ndîhi-gá, te cùu-o dútú xínú cuèchi-o núú-gă, te mee-gă cúú-gă Yaá ño cùnuu, te cùu-o ñáyiu quide ndáá xîndecu ichi-gá te cùu tucu-o ñáyiu yîndaha-gá. Te ducaⁿ ñⁿ quide ñaha-gă xii-o cuèndá sá cñaha-o xîi nchaa ñáyiu sá ño càhnu cuu-gá, te ño vai

núú sá vâha quide-gá, te diu-gá ní quide ní dáñá-ó nchâa ichi cuehé ichi duha ndècu-o ní cuu, te ní sanu ichi ñaha-gă xii-o ñⁿ ichi vâha, te vitna cùtnuní iní-ó sá ño càhnu cuu-gă.

¹⁰ Te nchoo cùu-o ñáyiu ñá túú ndècu ndîhi Yă Ndiöxí ní cùu, dico vitna ní ngúndecu ndîhi-o-gă, te dàvá-áⁿ vâtá sàá-gá nduu càda vâha ñaha-gă xii-o, dico vitna sa ní sáá nduu quide vâha ñaha-gă xii-o, chi ño cùndahú iní ñáhá-gă.

Cada vâha-o cùndecu-o cunu cuechi-o núú Yă Ndiöxí

¹¹ Te nchòhó ño cùu iní ñáhà-í xii-ndo, te càchí tnúhu-í xii-ndo sá nchóó cùu-o datná cue ñáyiu ndècu tnaduha ñⁿ ñuú, te ducaⁿ sâtnahá-xi cùu-o chi tnaa-ni ndècu-o ñuyú-a, te sáá nduu nduu táhú-ó cùndecu-o núú ndécú Yă Ndiöxí táxi tnùnî-gá, te xîáⁿ càháⁿ ndàhú-í núú-ndó sá vâ cadá-ndó ñⁿ ñⁿ sá cuèhé sá dúhá sàni iní-ndó, chi nchaa xîáⁿ ñá túú cùu-xi sá vâha sá cúú-xí-ndó.

¹² Te cada vâha-ndo cùndecu-ndo núú nchâa ñáyiu ñá túú ndècu ichi Yă Ndiöxí, te cuèi na càháⁿ ñáyiu sá nchòhó nchícúⁿ nihnu-ndo ichi cuehé ichi duha, dico quiní-yu nchaa sá vâha quide-ndo, dico na sáá nduu dândixi túu Yă Ndiöxí iní-yu sá ñá túú quide vâha-yu ndécú-yu, te dàvá-áⁿ cachí-yu sá quidé vâha-ndo ndècu-ndo, te cada càhnú-yu Yă Ndiöxí.

¹³ Te Xítóhó Jesucristú cuíní-gá sá nchòhó ño quindáá iní-ndó nchâa cue téé cùchiuⁿ taxi tnuní ñáhá xî-ndo, te ducaⁿ-ni quindáá iní-ndó cuèi mee tēe cùnuu vihi-gá yîndaha ñaha xii ñáyiu.

¹⁴ Te ducaⁿ-ni quindáá iní-ndó nchâa dava-gá cue téé cùnuu, chi Yă Ndiöxí ducaⁿ ñⁿ cachí-gá cunduu sá cuè téé-áⁿ cada ndáá-güedé nchaa cuéchi ñáyiu quide cuehé quidé dùha ndecu, te càháⁿ vâha-güedé cuèndá nchaa ñáyiu xîquide vâha ndècu.

¹⁵ Te Yă Ndiöxí cuíní-gá sá cadá vâha-ndo cùndecu-ndo cuèndá nchaa ñáyiu ño ñⁿ dîquí-xi càháⁿ cuèhé cuèndá-ndó sá ndécú-ndó ichi Yă Ndiöxí vá nihí-gá-yu tnúhu càháⁿ-yu.

¹⁶ Te nchòhó, Yă Ndiöxí ní quide-gá sá cúú-ndó ñáyiu cuu cada nacuáa véxi iní mée-xí, dico ñá díú sá dúcáⁿ ñⁿ quide ñaha-gă xii-ndo, te ngóo-ndo càni iní-ndó

càda-ndo nándi sá cuèhé sá dúhá, chi cada-ndo sá cúu-ndó ñáyiú xínu cuechi núú Yá Ndiöxí.

¹⁷ Te canehe-ndo sá yíñùhu núú nchàa ñáyiú, ndihi núú tée cùnuu vihi yindaha ñaha xii-yu, te cuu iní tnáhá ndì mee-ndo nacuaá ndècu-ndo ichi Yá Ndiöxí, te ío canehe-ndo sá yíñùhu núú-gã.

Nchaa nàcuáa ndoho-o cùndecu-o ichi Xítohó Jesucristú

¹⁸ Te nchaa nchòhó ñáyiú xínu cuechi canehe-ndo sá yíñùhu núú cuè patróo-ndó, te quindáá iní-ndó càda-ndo nchaa chiu tahu-güedé. Te ñni càda-ndo núú cuè tée váha iní-xi, ndihi núú cuè tée ío cuihna iní-xi.

¹⁹ Te núú nchòhó ná càda ndee iní-ndó ndòho-ndo nchaa sá ñà túú tàú-ndó ndòho-ndo cuendá sá cuini-ndó cùndáá-ndó núú Yá Ndiöxí ñá, te ío nduu vétú iní-gá.

²⁰ Te núú nchòhó ní quide-ndo ñni cuéchi, te sàhni iní-ndó dándoho ñaha ñáyiú xii-ndo, ¿te ná sá váha cùu xiá-i? Dico núú nchòhó ná cáda ndèe iní-ndó ndòho-ndo nchaa sá cáda ñaha ñáyiú xii-ndo sá cuendá sá quidé-ndó sá váha ña, te núú duca na càda-ndo te cùu-xi ñni sá váha núú Yá Ndiöxí.

²¹ Te Yá Ndiöxí ní cachí-gá sá cáda ndèe iní-ó ndòho-o nándi ndoho-o sá cuendá sá quidé-ó sá váha, chi ío ní ndoho Xítohó Jesucristú cuendá-ó, te duca tàú-ó càncicúu nihnu-o càda ndee iní-ó ndòho-o nándi ndoho-o, chi duca ñni quide-gá.

²² Te mee-gã ñà túú quide-gá ni ñni sá cuèhé sá dúhá, te ni ñni tnúhu ndehnde ñà túú càhá-gá.

²³ Te òré ní xóo cúcuèhé ñáhá-güedé xii-gá, te ñà túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñà túú ní xáha-gã xii-güedé sá ío ná cada ñaha-gã, chi núú ndáhá Yá Ndiöxí ní xóo nachihi-gá méé-gã, ndihi nchaa sá sání iní-güedé cada ñaha-güedé xii-gá. Te Yá Ndiöxí cúu-gã Yaá ío váha cada ndáá cuéchi nchaa ñáyiú na sàa nduu.

²⁴ Te Xítohó Jesucristú cúu-gã Yaá ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te duca ñni xíhí-gá cuendá nchoo dùu duu daña-o nchaa ichi cuehé ichi duha, te cada ndáá-ó cùndecu-o

ichi-gá. Te ní dánícuèhé ñáhá-güedé xii-gá, te sá dúcá ñni ndoho-gá xiá ñni ngündecu váha nchoo vitna.

²⁵ Te nchoo cùu-o datná cue mbéé cue quití ní xíta ni cùu, dico vitna ní tuha-o Xítohó Jesucristú, te Yaá-á cúu-gã datná ñni toli xito ñaha-gá xii-o vitna cuendá sá vá cuíta nihnu-o.

3

Nàcuáa tàú ñáyiú tnándaha cada-yu cùndecu-yu

¹ Te nchaa nchòhó ñáyiú ñni ní tnandaha ío quindáá iní-ndó yí-ndo cuendá sá núú ñà túú sàndáá iní-güedé tnúhu Yá Ndiöxí te quindáá iní-güedé cuendá sá ndéhé-güedé quidé ndáá-ndó ndècu-ndo, te ni ñà túú xini ñuhu-xi cáhá-ndó tnúhu-gá núú-güedé.

² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñùhu núú Yá Ndiöxí.

³ Te vá cání iní-ndó mèe-ñi cunduu vii-ndo, te ndada-ndo ñni-ndó nàcuáa tàú-xi cunduu, te vá cání iní-ndó nándi canehe-ndo, te ni vá cání iní-ndó cuihnu-ndo mee-ñi dóo váha sá ío vii ndáa.

⁴ Chi iní-ndó xini ñuhu-xi cunduu vii cunduu váha-xi núú Yá Ndiöxí cuéi vitna te cuéi núú cuáhá núú véxi, te cuu-ndo ñáyiú ío càhnu iní-xi, te núú duca na càda-ndo te ío cuu váha iní Yá Ndiöxí.

⁵ Te duca ío vii ío váha ní xínduu iní nchaa ñáyiú ñni ní xíndecu ndéé sanaha, te ñáyiú-á ío ní sàndáá iní-yu Yá Ndiöxí te ní cudíu-yu núú-gã, te ní tní-yu nchaa tnúhu ní cáhá yí-yu.

⁶ Te duca ñni xóo cada ndíi Sàrá ní xóo quindáá iní ndíi yí ndíi, ndíi Abrahám, te ní cánehe ndíi ñni-á sá yíñùhu núú yí ndíi. Te núú nchòhó quidé váha-ndo ndècu-ndo te ñà túú yùhú-ndó ñà cada ñaha tnàha ñáyiú-ndo xii-ndo, te núú duca quide váha-ndo ndècu-ndo te quide-ndo datná ní quide ndíi Sàrá.

⁷ Te nchòhó cue tée ndècu ñadihí-xi ío váha cuáha-ndo cuendá nàcuáa cùndecu váha-ndo ndíi-yu, te ío vii cáhá ndíi-ndó-yu, chi ñáyiú-á íi-gã-yu dàcúxí nchòo cue tée, te duca càda-ndo chi ndí ndíu-ndó ndúu táhú-ndó cùndecu-ndo ndíi Yá Ndiöxí, te núú duca na càda-ndo

te òré cǎháⁿ ndihî-ndo Yǎ Ndiǒxí te tedóho ñaha-gǎ xii-ndo.

Ñáyiú quide sá vǎha ndòhó-yu

8 Te cǎchí tnúhu tucu-í xii-ndo sǎ ïo cuu ìⁿnuu-ndo cùndecu-ndo, te cundáhú iní tnáhá-ndó ìⁿ ìⁿ-ndo, te cuu iní tnáhá tucu-ndo nacúaa ndècu-ndo ichi Yá Ndiǒxí, te cuu-ndo ñáyiú ndàhú iní-xi.

9 Te núu ìⁿ sá ñà túú vǎha quide ñaha ñáyiú xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhǎ-yu xii-ndo, te vá ná dǎnchocáva-ndo òⁿni tnúhu cuèhé, chí cǎcáⁿ tǎhú-ndó núú Yǎ Ndiǒxí cuèndá sá ná cǎdá vǎha ñaha-gǎ xii-yu, te ducaⁿ càda-ndo chí Yá Ndiǒxí ní cǎháⁿ ñáhǎ-gǎ xii-ndo cuèndá sá cǎdá vǎha ñaha-gǎ xii-ndo tnáhá-ndó.

10 Te núú tùtú Yǎ Ndiǒxí cǎchí-xi: Nchaa ñáyiú cuìní cundecu vǎha ndi nchàa nduu nini cundecú-yu ñuyíú-a, xìni ñuhu-xi sá vǎ càháⁿ-yu tnúhu cùtexínu, te ni vǎ dǎcuàndehndé-yu.

11 Te xìni ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sǎ vǎha, te ïo ndúcú-yu nàcuáa cadá-yu cundecu vǎha-yu ndihî tnàha ñáyiú-yu te òⁿni ducaⁿ cànchicúⁿ nihnú-yu cadá-yu.

12 Te Yá Ndiǒxí xító-gǎ nchaa ñáyiú quide ndáa núú-gǎ te tedóho-gǎ nchaa tnúhu càháⁿ-yu, dico nchaa ñáyiú ñá túú cuìní cada ndáa, ñáyiú-áⁿ ñà túú cùu vǎha iní-gǎ núú-yu.

Duha cǎchí-xi núú tùtú-gǎ.

13 Te vá yǒo níhí ndéé càda ñaha xii-o ìⁿ sá ñà túú vǎha te núu mee-ni sǎ vǎha na càda-o cundecu-o.

14 Àdi núu ná cúú sǎ ná cǎdá ñàha ñáyiú xii-o sǎ cuèndá sá quidé vǎha-o ndècu-o ña, te sá dúcáⁿ ná cǎdá ñáhǎ-yu xii-o cùu-xi ìⁿ sá vǎha sá cúú-xí-ó núú Yǎ Ndiǒxí. Te na cǎchí tnúhu-í xii-ndo sǎ vǎ yùhú-ndó-yu, te ni vǎ cúndiyí-ndó cuèndá nchaa sá ná càda ñáhǎ-yu xii-ndo.

15 Te nèhe-ndo sá yíñùhu núú Xítóhó Jesucristú. Te ïo cundecu túha-ndo dǎnehé-ndó ñáyiú véxi ndùcu tnúhu núú-ndó nàcuáa ndùu tnúhu ndee iní ní taxi Xítóhó Jesucristú ndécú ndihî-ndo, te cuu vii cuu vǎha

iní-ndó cǎháⁿ ndihî-ndó-yu, te cǎháⁿ-ndó núú-yu mee-ni tnúhu yíñùhu nacúaa cùu vǎha iní Yǎ Ndiǒxí.

16 Te ïo cada vǎha-ndo cùndecu-ndo cuendá sá vǎ cúndiyí-ndó, te núu ducaⁿ na càda-ndo, te nchaa ñáyiú xícuèhé ñáhǎ xii-ndo cuendá sá quidé vǎha-ndo ndècu-ndo ichi Xítóhó Jesucristú quendóo canúú-yu ndihî nchaa tnúhu càháⁿ-yu, chí nchòhó quidé vǎha-ndo ndècu-ndo.

17 Te vǎha-gǎ sá ndóhó-ó cuèndá sá quidé-ó sǎ vǎha te núu mee Yǎ Ndiǒxí ducaⁿ cuìní-gǎ cunduu, te ñá díú sǎ ndóhó-ó cuèndá sá ñà túú quide-o sá vǎha.

18 Te Xítóhó Jesucristú ní xíhí-gǎ sá cuèndá nchaa cuéchi nchaa nchoo ñáyiú ndècu ñuyíú-a, te ìⁿ xito-ni ducaⁿ ní xíhí-gǎ te ducaⁿ te vá cùú tnáhí-gǎ, te mee-gǎ cúú-gǎ Yá ñá túú tnáhí cuéchi-xi, te ducaⁿ ní ndoho-gǎ cuèndá nchaa cuéchi ñáyiú ndècu ñuyíú-a ñáyiú ñá túú cuìní cada ndáa núú Yǎ Ndiǒxí, te ducaⁿ ní cuu cuèndá sá núcùndecu vǎha-yu núú Yǎ Ndiǒxí te núu na quìndáa iní ñáhǎ-yu xii-gǎ. Te mee-gǎ ní xíhí-gǎ dico Espiritú-gǎ chí ní xíndecu-ni-xi,

19 te Espiritú-gǎ ní sáháⁿ-xi ní cǎháⁿ-xi tnúhu Yá Ndiǒxí núú nchàa espíritú ñáyiú ndècu núú ùhú núú ndàhú.

20 Te ñáyiú-áⁿ cúú ñáyiú ní xíndecu ndéé sanaha cùtnáhǎ ní xíndecu ndíi Nǒé, chí ñáyiú-áⁿ ïo ní quide sáa iní-yu núú Yǎ Ndiǒxí. Te Yá Ndiǒxí ïo vǎha iní-gǎ, chí ní dǎcǎcá-gǎ nduu ní xíndecuu ndíi Nǒé ní cadúha ndíi bàrcú cuèndá ndétú-gǎ ndixi cuéchi iní-yu sá ñà túú quide vǎha-yu ndècú-yu ni cùu. Te dàvá-áⁿ ní ndaa ndute ñuyíú te ní cǎcu úná duha ná tnáhǎ ñáyiú, chí ní quée-yu xití bàrcú-áⁿ, te ñá túú ní cǎháⁿ-yu.

21 Te sá dúcáⁿ ní cǎcu ñáyiú úná-áⁿ ñà túú ní cǎháⁿ-yu ndute ní ndaa ñuyíú dàvá-áⁿ. Te xǎⁿ quée-xí sǎ cuándute ñáyiú vitna, te naníhí tǎhú-yu te núu na quìndáa iní-yu tnúhu ndáa tnúhu Yá Ndiǒxí. Te ñá díú sǎ cuándute-o te nduu ndoo nduu nine yíqui cùñú-ó te naníhí tǎhú-ó, chí xìni ñuhu-xi nǎhmá-ó núú Yǎ Ndiǒxí nchaa yíca cuéchi-o, te nduu ndoo nduu nine iní-ó, te ducaⁿ te naníhí tǎhú-ó, chí Xítóhó Jesucristú ní xíhí-gǎ cuèndá-ó te ní ndoto-gǎ.

22 Te Yaá-án cuãndaa-gá andiu, te ní ngóo-gá xio cùha Yá Ndiöxí, te tàxi tñuní-gá nchaa espíritú cúnùu ndihi nchaa dava-gá cue espíritú xínú cuèchi.

4

Cada-o nàcuáa cuìní méé Yă Ndiöxí

1 Te Xítoho Jesucristú ní ndoho-gá cútnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dàñá-yu nchaa sá cuèhé sá dúhá.

2 Te ducaⁿ ñà túú-gă ndécú-yu ichi cuèhé ichi duha, chi mee-nă nàcuáa cãháⁿ Yă Ndiöxí quidě-yu ndécú-yu ñuyíú-a.

3 Te nchòhó sa nàha-ndo sá ïo cuèhé nùú sã cuèhé sá dúhá ní xóo cada-o cùtnàhá vátá cùndecu-gá-ó ichi Yá Ndiöxí, chi ní xóo cada-o nchàa sá cuèhé sá dúhá cùdíí iní nchaa ñáyiú ñà túú sàndáá iní tñuhu-gá, te dàvá-ánⁿ ní xóo cada-o nchàa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cue ñáyiú quihu, te ní xóo cundecu-o víco núú ní xóo cada-o nchàa sá ñà túú vãha, te ní xóo níhí tnáhá-ó ndihi nchaa tnaha quihu-o, te ní xóo chiñuhu-o nchàa sá cãchí-yu cùu ndiöxí te ñà ndàá sá ndiöxí cúú nchàa xíãⁿ, te nándi-gá nchaa sá cuèhé sá dúhá ní xóo cada-o dàvá-ánⁿ.

4 Te ñáyiú-ánⁿ cúññuhu-yu vitna sá ñà túú-gă níhí tnáhá-ó ndihí-yu cada-o nchàa sá cuèhé sá dúhá quidě-yu, te xíãⁿ cãháⁿ cuèhé-yu cuendá-ó vitna.

5 Dico sáá nduu te ñáyiú-ánⁿ nãhmá-yu nchaa sá quidě-yu núú Xítoho Jesucristú, chi diu-gá sa ndècu túha-gá sá cadá ndãá-gá cuèchi nchaa ñáyiú sa ní xíhí, ndihi cuèchi nchaa ñáyiú xíndecu vívú.

6 Te cue ñáyiú sa ní xíhí ní xíndedóho tñuhu Xítoho Jesucristú, te cuèi ní xíhí-yu dàtná xíhí dava-gá ñáyiú, dico espíritú-yu chi ní nduu táhú-xi ndècu váha-xi dàtná ndécú Yă Ndiöxí.

7 Te vitna ta cùyatni danaa Yá Ndiöxí ñuyíú-a núú xíãⁿ ío váha cuáha-ndo cuendá nàcuáa cundecu-ndo, te cãháⁿ ndihi-ndo-gă.

8 Te xini ñuhu-xi sá ïo cuu iní tnáhá-ndó ñⁿ ñⁿ-ndo, chi núú ducaⁿ na cùu iní tnáhá-ndó ñⁿ ñⁿ-ndo, te vá caní-gă iní-ndó càda

cuendá-ndó nchàa sá ñà túú vãha quide ñaha ñáyiú xii-ndo,

9 te nchòhó ñáyiú xíndecu vehe-xi cuáha nùu-ndo vehe xii cue ñáyiú ñuhu ichi na ndetatú-yu, te ío váha cuu iní-ndó dùcaⁿ cada-ndo.

10 Te Yá Ndiöxí ní taxi-gá ndí dííⁿ nùú tãhú ndécú ndihi-ndo ñⁿ ñⁿ-ndo, te nàcuáa ndùu táhú ní nduu táhú-ndó ñⁿ ñⁿ-ndo te ducaⁿ chindee tnaha-ndo, te vá dàñá ndèé-ndó càda-ndo nchaa nacuáa tàuchiuⁿ Yá Ndiöxí cada-ndo, te chindee ñaha-gá xii-ndo.

11 Te dava nchòhó ñáyiú cãháⁿ tñuhu Yá Ndiöxí núú ñáyiú, xini ñuhu-xi cãháⁿ-ndó nàcuáa ndùu tñuhu-gá núú-yu, te dava nchòhó ñáyiú quide nchaa núú chiúⁿ chindee tnaha ñáyiú-xi, xini ñuhu-xi cada-ndo sá Yă Ndiöxí chindèe ñaha-gá xii-ndo, te ducaⁿ càda-ndo nchaa núú sã vãha, chi Xítoho Jesucristú tnáhá-gá chindèe ñaha-gá xii-ndo, te ducaⁿ ïo cuu cãhnu Yá Ndiöxí. Te vitna tàú-ó cãháⁿ-ó sã ïo cãhnu cuu Xítoho Jesucristú, chi diu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnahá-ó cùndecu-o ichi Xítoho Jesucristú

12 Te nchòhó ñáyiú ío cùu iní-í, vá cúññuhu-ndo sã ïo ndòho-ndo ndecu-ndo ichi Xítoho Jesucristú, chi sá dúcãⁿ ndòho-ndo-ánⁿ cútnùní ndisa sá sàndáá iní-ndó-gă, te vá caní iní-ndó nã cuendá ducaⁿ ndòho-ndo.

13 Chi da cudíí iní-ndó te núu ndòho-ndo datná ní ndoho Xítoho Jesucristú, te ducaⁿ sùúní cùdíí iní-ndó òré ná quixi tucu-gá ñuyíú-a te dàvá-ánⁿ quiní-ndó sã ïo cãhnu cuu-gá.

14 Te núu xícuèhé ñáhá ñáyiú ndècu ichi cuèhé ichi duha xii-ndo cuendá sá ndécú-ndó ichi Xítoho Jesucristú, te xíãⁿ cúú-xi ñⁿ sá vãha sá cúú-xi-ndó nùú-gă, te ducaⁿ chi Espíritú Yă Ndiöxí sá ïo cùnùu ndecu ndihi ñaha-xi xii-ndo, te nchaa ñáyiú ndècu ichi cuèhé ichi duha-ãⁿ cãháⁿ cuèhé-yu cuendá Xítoho Jesucristú, dico nchòhó cãchí-ndó sã ïo cãhnu cuu-gá.

15-16 Te núu nchòhó dándòho ñaha ñáyiú xii-ndo sã cuendá sá ndécú-ndó ichi Xítoho Jesucristú ñã, te vá cúú cãháⁿ núú-ndó, chi ndacãⁿ táhú-ndó nùú Yă Ndiöxí cuendá

sá ndécú-ndó ìchi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ìⁿ sá ñà túú tàú-ndó càda-ndo.

17 Te vitna sa quèsaha Yá Ndiòxí cada ndáá-gá nchaa sá quidé nchòo ñáyiú ndècu ndìhi-gá, te núu ducaⁿ te ndéé-gá cada-gá nchaa ñáyiú ñá túú sàndáá iní ñáhá xii-gá òré ná sàá nduu dùcaⁿ cada ñaha-gá xií-yu.

18 Te nchòhó xini-ndó sá ñáyiú quide váha ndècu ichi Xítohó Jesucristú ndòho tnahá-yu ndécú-yu, dico sáá nduu te nduu táhü-yu cundecú-yu ndìhi-gá. Te núu ducaⁿ ndòho nchaa ñáyiú quide váha ña, ¿te nása-gá yáha nchaa ñáyiú ndècu ichi cuehé ichi duha ña sàá nduu càda ndáá Yá Ndiòxí cuéchi-yu-i?

19 Te nchaa nchòhó ñáyiú ndòho nacuaá cuiní Yá Ndiòxí xini ñuhu-xi sá vǎ dáñá ndéé-ndó càda váha-ndo cundecu-ndo, te ío quindáá iní-ndó sá xító ñàha-gá xii-ndo. Te ñu-gá cúú-gǎ Yaá ní cadúha ñaha xii-o, te quide-gá ìⁿ sá càháⁿ-gá.

5

Nacuáa tàú-xi cada ñáyiú ndècu ichi Xítohó Jesucristú

1 Te yúhú càháⁿ-í dóho nchaa nchòhó cue téé yíndaha nchaa dava-gá ñáyiú ndècu ichi Xítohó Jesucristú, chi tnàhá yúhú yíndàha-í ñáyiú ndècu ichi-gá, te sàndáá iní-í tnúhu-gá, te ní xini-í nchaa nacuaá ní ndoho-gá, te sáá nduu te tnàhá-í cunuu-í ndìhi-gá.

2 Te ío canehe cuendá-ndó nchaa ñáyiú ndècu ichi Yá Ndiòxí yíndàha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sǎ ío ìⁿ ñáyiú cada yica ñàha xii-ndo, te ni ñà díú sǎ cuiní-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuiní Yá Ndiòxí cunduu.

3 Te vá cáda-ndó sǎ ío cunuu-ndo núü-yu, chi cada-ndo mée-ni sá vǎha cuendá ducaⁿ càncicúⁿ nihnú-yu cáda-yu tnàhá-yu.

4 Te òré ná quíxí tùcu Xítohó Jesucristú Yaá néhé cuendá ñáhá xii-o nchaa-o ñuyíú-a, te taxi-gá sá ío váha nduu táhü-ó, te cunuu-o ndìhi-gá ni caa ni quíhíⁿ.

5 Te nchòhó ñáyiú ndècu ichi Xítohó Jesucristú càháⁿ-í dóho-ndo sǎ ío quindáá iní-ndó cuè téé yíndaha ñaha xii-ndo nacuaá ndècu-ndo ichi-gá, te nchaa-ndo tàú-ndó quindáá iní tnàhá-ndó ìⁿ ìⁿ-ndo, chi núú tütú Yá Ndiòxí càchí-xi ìⁿ xichi: Nchaa ñáyiú quide cahnu mee-xi ñá túú cùu

váha iní Yá Ndiòxí núü-yu,

dico nchaa ñáyiú ndàhú iní-xi te chindee ñaha-gá xií-yu.

Duha càchí-xi núú tütú-gá.

6 Te daña-ndo mée-ndo núú ndáhá Yá Ndiòxí, chi mee-gǎ ío cunuu-gá. Te núu ducaⁿ na càda-ndo, te sáá nduu te cada nínu ñaha-gǎ xii-ndo.

7 Te nchaa sá yǎha-ndo ndècu-ndo te nachihi-ndo ndàha Yá Ndiòxí, chi mee-gǎ xító ñàha-gá xii-ndo.

8 Te ío váha cuáha-ndo cuendá cundecu-ndo, te quíhi iní-ndó chi sácuihná xicá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ìⁿ quiti dééⁿ xicá ndùcu sá cáxí-xí.

9 Te ío quindáá iní-ndó Xítohó Jesucristú, te vá dáñá-ndó mée-ndo dandahú ñáhá sácuihná xii-ndo càda-ndo nacuaá cuiní-xi, chi ñaha-ndo sá ncháá ñáyiú ndècu ichi Xítohó Jesucristú xíndecu nihíí ñuyíú ndóhó-yu dàtná ndóhó nchòo ndecu-o ichi-gá.

10 Dico sacú-ni nduu duha cundoho-o te dàtnúni ñá túú-gǎ ná cumání-ó cundecu-o núú Yá Ndiòxí, te dàvá-áⁿ vǎ cání ìⁿ caní úú iní-ó cundecu-o ichi-gá. Te ío-gá ngúndecu ndìhi-o tnúhu ndee iní cada-o nchaa nacuaá càháⁿ-gá, te ducaⁿ càda-o chi mee Yá Ndiòxí ío chindee ñàha-gá xii-o, te ñu-ni Yaá-áⁿ ío cùu iní ñáhá-gǎ xii-o, chi ní cáháⁿ ñáhá-gǎ xii-o cundecu-o núú ío váha càa ndecu-gá cundecu-o ní caa ni quíhíⁿ, te ducaⁿ ní quide-gá chi ní sàndáá iní-ó Xítohó Jesucristú.

11 Te ío ndacáⁿ táhü-ó núú Yá Ndiòxí chi ío cahnu cuu-gá, te cunuu-gá nchaa nduu nchaa quíú. Te ducaⁿ na cunduu.

Tnúhu ndéé núú ní ndìhi-ná

¹² Te té Sîlvanú xìní-í sá cúú-dě ìⁿ tée quède ndáá ndécú ìchi Xítóhó Jesucrístú, te ðiu-dé ní cáháⁿ ndàhú-í núú-dě ní tee-dé ìⁿ úú tnúhu sá ñí xáhaⁿ-í xii-dé núú tütú-a cuendá daquixi-í ndaha-ndo, te núú tütú-a càchí tnúhu ndáá-í xii-ndo sã Yă Ndiöxí ío cùu iní ñáhá-gã, te chîndee ñaha-gá xii-ndo ndècu-ndo, te càchí tnúhu tucu-í xii-ndo sã ío quindáá iní-ndó sã ndàá ducaⁿ quède ñaha-gá xii-ndo.

¹³ Te cue ñáyiú ndècu ñuú Babiloniá, ñáyiú ndècu ichi Yă Ndiöxí, ðiu-ni ñáyiú ní cachí Yă Ndiöxí sá nánihí tàhú dàtná cúú nchòhó, ío quède ndee iní ñáhá-yu xii-ndo, te tnàhá té Măcú tée cùu datná ìⁿ déhe-í quidé ndèe iní ñáhá-dě xii-ndo.

¹⁴ Te ndihí tnúhu yíñùhu cada ndee iní tnáhá-ndó ìⁿ ìⁿ-ndo, te xìcáⁿ táhù-í núú Yă Ndiöxí sá ío na cùndecu nahi nchaa nchohó ñáyiú ndècu ndihí Xítóhó Jesucrístú. Te ducaⁿ na cùnduu. Te ío chí cádá ndèe iní-nă vitna.

TUTÚ CÚÚ ÒÚ NÍ CADÚHA TÉ PÈLÚ

Té Pèlú cadúha-dé tutú quíhíⁿ ndaha ñáyiú sàndáá iní tnúhu Yá Ndiöxí

¹ Yúhú té Xímú, àdi Pelú chi úú òú-í, xínú cuèchi núú Xítohó Jesucristú, chi mee-gá ní tendaha ñàha-gá xii-í xícá cùu-í càháⁿ-í tnúhu-gá. Te cadúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tátá-ó Dütú Ndiöxí ní dácàháⁿ-gá iní-ó ñí sàndáá iní-ó-gá, chi cùu-gá Yáá ío váha quide ndáá ndíhi Xítohó Jesucristú Yáá dácácu nihnu ñaha xii-o núú ùhú núú ndàhú.

² Te xicáⁿ táhú-í núú Yá Ndiöxí sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuáa ndùu cuendá Xítohó Jesucristú Yáá cúú Xítohó-ó.

Nàcuáa quide ñáyiú ndècu ichi Xítohó Jesucristú

³ Te Yá Ndiöxí ío càhnu cuu-gá chi chindee ñaha-gá xii-o quide ndáá-ó ndècu-o datná cuení méé-gá, te ducaⁿ chi cùtnuní iní-ó nàcuáa sàni iní Xítohó Jesucristú Yáá ní cáháⁿ ñáhá xii-o. Te òré ní cáháⁿ ñáhá-gá xii-o te ní cutnùní iní-ó sá ío càhnu cuu-gá te ío váha quide-gá.

⁴ Te ducaⁿ ñí cutnùní tucu iní-ó nàcuáa ní cáháⁿ-gá cada ñaha-gá xii-o, te tnúhu ní cáháⁿ-gá-áⁿ ío càhnu cuu-xi te ío váha, te nchoo ñí sàndáá iní-ó tnúhu-áⁿ núu xíáⁿ ñá túú-gá ndécú-ó ìchi cuehé ichi duha te ní ñà túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna.

⁵ Te sá dúcáⁿ quide-gá te xíáⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gá dico ñá díú mèe-ni xíáⁿ chi tnàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini ñúhu-xi tecú tnùní-ndó tnúhu-gá.

⁶ Te núu tècú tnùní-ndó te cùu-ndo ñáyiú xíní cotnì mee-xi, te núu cùu-ndo ñáyiú sàcòo tni mee-xi te xini ñúhu-xi cunduu

cahnu iní-ndó cuèi nándi sá ná yàha-ndo cùndecu-ndo, te núu càhnu iní-ndó te xini ñúhu-xi cada ndáá-ndó cùndecu-ndo datná cuení méé Yá Ndiöxí cada-ndo.

⁷ Te núu quide ndáá-ndó ndècu-ndo, te xini ñúhu-xi ío cuu iní tnàhá ndí mee-ndo nacuáa ndècu-ndo ichi-gá, te núu cùu iní tnàhá ndí mee-ndo te xini ñúhu-xi cuu iní-ndó nchàa dava-gá tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núú cuàháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacuáa sàni iní Xítohó Jesucristú quíhíⁿ.

⁹ Te nchaa ñáyiú ñá túú cuení ducaⁿ càda cuú-yu ñáyiú ñá túú tnàhí ndíxi túu iní-xi sá Yá Ndiöxí sa ní ndada ndoo ní ndada nine-gá iní-yu cuendá nchaa sá cuèhé sá dúhá ñí xóo cadá-yu, te ñáyiú-áⁿ cúú-yu dàtná ñí ñáyiú cuàá àdi datná ñí ñáyiú ñá túú cùtnuní váha núú-xi, te ducaⁿ sàtnahá-xi cùu-yu cuendá sá dúcáⁿ quide-yu.

¹⁰ Te xíáⁿ núu yúhú càháⁿ-í dóho nchaa nchòhó ñáyiú ndècu ichi Xítohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndiöxí ní cáháⁿ ñáhá-gá xii-ndo, te ducaⁿ ñí quide-gá chi ducaⁿ ñí cachí-gá cada-gá. Te vá ñí ndùu cani iní-ndó dàña-ndo ichi-gá, te núu vá dáña ndèe-ndó càda-ndo nchaa nacuáa càháⁿ-í-a.

¹¹ Te núu ducaⁿ na càda-ndo cundecu-ndo, te ío vii ío váha cada Yá Ndiöxí queheⁿ cuendá ñáhá-gá xii-ndo òré ná sàá-ndó núú ndécú Xítohó Jesucristú táxi tnùní-gá nchaa nduu nchaa quíú, te òú-ni Yáá-áⁿ cúú Xítohó-ó te ní dácácu nihnu ñaha-gá xii-o núú ùhú núú ndàhú.

¹² Te ducaⁿ-ni quíhí-í dandácu iní ñáhá-í xii-ndo nchàa tnúhu càháⁿ-í-a cuèi sa xíní-ndó tnúhu-áⁿ, te cuèi sàndáá váha iní-ndó nchàa tnúhu ndáá dácùàha-ndo.

¹³ Te yúhú quide cuendá-í sá ío tàú-xi càháⁿ-í dóho-ndo ñini ndecu-í ñuyíú-a cuendá sá vǎ nàcuànaa-ndo nacuáa cada-ndo cùndecu-ndo.

¹⁴ Chi Xítohó Jesucristú ní cachí-gá sá ñà túú-gá vǎi nduu cundecu-í ñuyíú-a te cuú-í.

¹⁵ Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càháⁿ-í-a, te cuèi na yàha cuú-í dico

vá nácuànaa-ndo cada-ndo nchaa nacuaá cãháⁿ tnúhu sá dánèhé ñáhà-í xii-ndo vitna.

Cue téé ní xiní núú sã ïo cãhnu cuu Xítohó Jesucrístú

16 Te sa ní dánèhé ñáhà-ndí xii-ndo sã ïo cãhnu cuu Xítohó Jesucrístú. Te ní cachí tnúhu tucu-ndí nãcuáa cada-gá òré quixi tucu-gá, te tnúhu-án cúú-xí tnúhu ndáá cui^{ti} te ñá díú tnúhu sá ní sani iní cue ñáyiú ñuyíú-a cùu-xi, chi nchúhú ní xiní núú-ndí nãcuáa ní quide-xi cútnàhá ní cutnùní iní-ndí sá ïo cãhnu cuu Xítohó Jesucrístú.

17 Chi dàvá-án ïo váha ní quide Tãtá-ó Dútú Ndiöxí ní quide cãhnu-gá Xítohó Jesucrístú, te ñu-ni dàvá-án ní cãháⁿ Dútú Ndiöxí ndéé andíu ñí xáhaⁿ-gã xii Xítohó Jesucrístú: “Yòhó cúú-n Dèhe-í téé ío cùu iní-í, te ío cùdí^í iní ñáhà-í xii-n”, duha ní xáhaⁿ Yã Ndiöxí xii Xítohó Jesucrístú.

18 Te nchúhú ní tecú dóho-ndí ní cãháⁿ Yã Ndiöxí ndéé andíu cùtnàhá ducaⁿ ñí xáhaⁿ-gã xii Xítohó Jesucrístú, chi tnàhá-ndí ndécú-ndí ndíhi-gá yucu núú dúcáⁿ ñí quide cãhnu ñaha Yã Ndiöxí xii-gá.

19 Te ndècu ndíhi-o nchaa tnúhu ní cãháⁿ cue téé ní xóo cãháⁿ tnúhu Yã Ndiöxí ndéé sanaha te nchaa tnúhu-án cãháⁿ-xi nchaa nãcuáa cada-xi vitna, te cùtnuní iní-ó sã tnúhu ndáá cúú-xí, te xini ñuhu-xi cada cuendá váha-ndo nchaa nacuaá cãháⁿ tnúhu-án, chi tnúhu-án cúú-xí dàtná ñí ñuhú dáyéhé-xi ndéé òré véxi túndaá quéné chòdíní cáhnú dàyehé-di. Te ducaⁿ sãtnahá-xi cùu tnúhu-án chi quide-xi nacuaá cutnùní iní-ó cuendá Xítohó Jesucrístú.

20 Te xini ñuhu-xi sá ïo-gá cada cuendá-ndó sã ñà túú ñáyiú tecú tnùní ní ñíⁿ tnúhu sá ñí chídó tnùní cue téé ní cãháⁿ tnúhu Yã Ndiöxí ndéé sanaha, te núu Yã Ndiöxí vá cádá-gã nãcuáa cutnùní iní-yu nãcuáa cãháⁿ nchaa tnúhu-án.

21 Te cue téé-án ïo ní xíndecu yíñuhu-güedé núú Yã Ndiöxí, te nchaa tnúhu sá ñí cãháⁿ-güedé-án ñà túú cùu-xi tnúhu sá ñí cahu iní méé-güedé, chi Espíritú Yã Ndiöxí ní dácáhu iní ñáhà-xí xii-güedé nãcuáa cunduu tnúhu cãháⁿ-güedé.

2

Cue téé cãchí sã cãháⁿ tnúhu Yã Ndiöxí te ñá ndáá

1 Te ndéé sanduu chi ní xíndecu cue téé ní xóo dandàhú ñáhà xii ñáyiú isràél cãchí sã cãháⁿ tnúhu Yã Ndiöxí te ñá ndáá sã cãháⁿ-güedé tnúhu-gá, te ñu-ni ducaⁿ tucu cundecu cue téé dandàhú ñáhà xii-ndo vitna, chi cachí-güedé sã cãháⁿ-güedé tnúhu Yã Ndiöxí te ñá ndáá. Te cue téé-án ïo yídáhu cãháⁿ-güedé, te nchaa tnúhu cãháⁿ-güedé-án dacuíta nihnu ñaha-xi xii-ndo te núu na tédóho-ndo, chi cue téé-án vã ñunuu-güedé sã Xítohó Jesucrístú ní xíhí-gá cuendá-güedé. Te sá dúcáⁿ càda-güedé ío-gá ndíhi dacuíta nihnu-güedé méé-güedé.

2 Te vãi ñáyiú xínu iní-yu cadá-yu nándí sã cuèhé sã dúhá cuendá sã dúcáⁿ càda cue téé-án, te cuendá xíãⁿ ngóo ñáyiú cãháⁿ úhú-yu cuendá ichi Yã Ndiöxí.

3 Te mee-ni tnúhu sá ñí cahu iní cue ñáyiú ñuyíú-a danèhé ñáhà-güedé xii-ndo, te que-saha-güedé sã cúú-xí tnúhu ndáá te ñá ndáá cuendá-ni sã cuãñaha-ndo díhúⁿ xii-güedé, chi ñu-ni xíãⁿ tnàhí cuhuⁿ iní-güedé, dico Yã Ndiöxí sa ní cunaha ndècu túha-gá cuendá cada ndáá-gá cuéchi-güedé, te na sàá nduu te cuíta nihnu duuⁿ-güedé, chi Yã Ndiöxí vá nácuànaa-gá ñíⁿ sá ñí cachí-gá cada-gá.

4 Te Yã Ndiöxí ñá túú ní quide cahnu iní-gá sá ñí quide cue espíritú ñá túú ní cuíní cada ndáá xínú cuéchi núú-gã ní cùu, chi ní dáquihíⁿ ñáhà-gã xii-xi ñíⁿ xichi núú ïo ndòho-xi ndecu-xi, te xíãⁿ cundedí nihnu-xi ndéé sáá nduu cuíta nihnu duuⁿ-ná-xi.

5 Te Yã Ndiöxí ñá túú ní quide cahnu tucu iní-gá nchaa sá ñí quide ñáyiú ñuyíú díhna, chi dàvá-án ñí dándáá-gã ndute ñuyíú ñí cãhá nchaa ñáyiú ndècu ichi cuèhé ichi duha te ñíⁿ dli-ni té Nòé ndíhi úsá-gá tucu cue ñáyiú cùu ndí mee-dé ní dácãcu nihnu-gá. Te té Nòé-ãⁿ cúú-dé téé ní cãháⁿ dóho-yu nãcuáa cada váha-yu cundecú-yu ni cùu te ñá túú ní cuíní-yu.

6 Te Yã Ndiöxí ní dãngávã-gã ñuhú ní dánáá-gã ñáyiú ñuú Sòdomá ndíhi ñáyiú ñuú Gòmorrá te mee-ñã yáá ñí nduu ñuú-án. Te sá dúcáⁿ ñí cuu xíãⁿ cútnùní iní-ó nãcuáa

cada ñaha Yă Ndiöxí xii nchaa ñáyiu ñá túú quide váha.

7 Dico té Löt téé ní quide ndáá ní xíndecu ññú-áⁿ dāvá-áⁿ chi ní dácăcu nihnu ñaha-gă xii-dé. Te nchaa ñáyiu ñúú núú ní xíndecu-dé-áⁿ ïo ní xínduu cuihna ìní-yu, te mee-ni ìchi díí ìní ní xíndecú-yu, te sá dúcáⁿ nĩ xóo cadá-yu xíăⁿ ïo ní ndíhú ìní té Löt.

8 Te ññú nduu ññú nduu ní xóo cada ndàhú-xi ìní té Löt-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndíhi cuendá nchaa sá cuèhé sá dúhá nĩ xóo cadá-yu ní xóo quiní-dé, te mee-dě ní cuu-dé ññú téé ní xínduu vii ní xínduu váha ìní-xi núú Yă Ndiöxí.

9 Te sá dúcáⁿ nĩ yáha té Nöe ndíhi té Löt, xíăⁿ cúnùní ìní-ó să Yă Ndiöxí ïo chíndee-gă cue ñáyiu quide ndáá ndécú ìchi-gă cuendá sá vă cadă-yu nândi sá cuèhé sá dúhá cuèi nândi na ndòhó-yu cundecú-yu. Te Yă Ndiöxí cächí-gă sá ncháá ñáyiu ndècu ìchi cuèhé ìchi duha sa ndècu túha-yu sá quíhíⁿ-yu núú ùhú núú ndàhú nduu nà yáha cundáá cuèchi-yu.

10 Te uuⁿ-gă cada ñaha Yă Ndiöxí xii nchaa cue téé ndècu ìchi díí ìní, te dàquee tíhú-güedě nchaa tnúhu sá sánú ìchi ñaha xii-o nacuáa cada-o cùndecu-o, te cùu-güedé cue téé ññú ìní-xi, te yñ ìní-güedé, te ñá túú yùhú-güedé cáháⁿ úhú-güedé cuendá nchaa espíritú cúnúu.

11 Te cue espíritú xínú cuèchi núú Yă Ndiöxí ïo cúnúu-xi dácúxí cuè téé-áⁿ, dico ñá túú cùyñ-xi cáháⁿ-xi dàtná càháⁿ cue téé-áⁿ òré ndàcáⁿ cuèchi-xi núú Yă Ndiöxí cuendá nchaa sá quidé cuè espíritú cùndíhi yucu ñáváha.

12 Te nchaa cue téé dandàhú ñáhá xii-ndo-áⁿ cúu-güedě dàtná cue quiti, chi cue quiti-áⁿ ñá túú ndècu sá xini tnùní-güedi, chi cue quiti-áⁿ nĩ cacu-güedi sá tníí-ó-güedi te cahni-o-güedi. Te ducaⁿ sàtnahá-xi cùu nchaa cue téé-áⁿ, chi càháⁿ cuèhé-güedé cuendá ndédani cãa espíritú cuèi ñá túú xini-güedé ná espíritú cúu-xi, te diu-ni mee-güedě dăcuíta nihnu-güedé méé-güedě sá dúcáⁿ quide-güedé,

13 te sáá nduu te nacháhu-güedé nchaa sá quidé-güedě-áⁿ, te cuèi nduu cuèi niú cúdíí ìní-güedé quidé-güedě nchaa núú să cuèhé

sá dúhá sàni ìní-güedé. Te òré nàtacá-ndó càda-ndo ññú vico chiñuhu-ndo Yă Ndiöxí te chitnahá ñáhá-güedě xii-ndo, te cada dusaⁿ-güedě sá cúdíí ìní-güedé sá dándàhú ñáhá-güedě xii-ndo, te dicó sácáⁿ-núú cuăha ñaha-güedě xii-ndo dùcaⁿ na cada-güedé.

14 Te nchaa cue téé-áⁿ òré xini-güedé ññú ñáyiu dñí te ndíhi-ni sàni ìní-güedé cáháⁿ ndíhi ñaha-güedě xií-yu, te ñá túú nduu vétú ìní-güedé cuendá nchaa sá cuèhé sá dúhá quide-güedé chi uuⁿ-gă uuⁿ-gă sání ìní-güedé cada-güedé. Te cuáháⁿ-güedé dándàhú-güedé nchaa ñáyiu ñá túú nihí ndéé càda ndáá cuendá canchicúⁿ nihnú-yu nchaa tnúhu càháⁿ-güedé. Te mee-ni ncháa sá ndécú ndíhi tnaha ñáyiu-güedé cúu ìní-güedé, te cue téé-áⁿ cúu-güedě cue téé duuⁿ duuⁿ sa ní xíta nihnu núú Yă Ndiöxí.

15 Chi cùu-güedé cue téé vă cání-gă ìní-xi cada ndáá, te nchícúⁿ nihnu-ná-güedé quidé-güedě năcuáa ní xóo cada ndíi Balaám déhe ndíi Bèór, chi ndíi Balaám-áⁿ nĩ xóo tnahá ìní ndíi cada ndíi chiúⁿ cuèhé năcuáa ní xóo nihí ndíi díhúⁿ.

16 Te Yă Ndiöxí ní quide-gă ní cáháⁿ búrru ndíi ní tenàà ñáhá-dí xii ndíi cuendá sá vă cadá ndíi ññú cuèchi sàni ìní ndíi cada ndíi ní cùu. Te sá dúcáⁿ nĩ cuu xíăⁿ ní nguítuu ndíi ñá túú ní quide ndíi ññú sá ñá túú nândíhi sàni ìní ndíi ní cùu.

17 Te nchaa cue téé ducaⁿ xíquide cùu-güedé dàtná ññú doco yichí, te cùu tucu-güedé dàtná ññú vícô să xídó tăchí te ñá túú dău nchídó-xí, te sa ndècu túha ññú xichi núú ïo nee quíhíⁿ-güedé cundecu-güedé nĩ caa nĩ quíhíⁿ.

18 Te cue téé-áⁿ càháⁿ-güedé dàtná càháⁿ ññú téé ïo cùu cahnu dico ñá túú vėdana nândíhi nchaa tnúhu càháⁿ-güedé, te cue téé-áⁿ dándàhú-güedé nchaa ñáyiu íchí nĩ dăná ìchi cuèhé ìchi duha, te xăhaⁿ-güedě xií-yu sá cúu-ní cadă-yu nchaa sá cuèhé sá dúhá quide nchaa ñáyiu ndècu ìchi díí ìní,

19 te xăhaⁿ tucu-güedé sá cúu-ní cadă-yu nání véxi ìní-yu cuèi sá văha te cuèi sá cuèhé, dico mee-güedě chi mee-ni să cuèhé sá dúhá cúnúu quide-güedé. Te nchaa ñáyiu ñá ndácú dăña nândi sá cuèhé sá dúhá cúu-yu dàtná ññú ñáyiu xinu cuèchi ñá túú tnàhí dăná quee núú chíúⁿ patróón-xi. Te

ducaⁿ sãtnahá-xi cùú-yu chi ñá ndácü-yu dàñá-yu nãndi sá cuèhé sá dúhá quidé-yu.

20 Te núu ñáyiú sa ní dáñá nchàa ichi cuèhé ichi duha cuendá sá ñi cutnùní iní-yu nãcuáa ndùu tnúhu Xítohó Jesucristú, Yaá ní dácãcu nihnu ñaha xii-o núu ùhú núu ndàhú ná nãchocáva iní-yu cundecu tucú-yu ichi cuèhé ichi duha, te mee-nã sá cuèhé sá dúhá tàxi tnuní ñáhá-xí xii-yu, te núu ducaⁿ te vãa-gá tucu cadá-yu dàcúúxí dàtná ní xóo cadá-yu cùtnàhá vátá cùtnùní-gá iní-yu nãcuáa ndùu tnúhu-gá.

21 Te váha-gá sá vã ngũnu ichí-yu ichi ndáá ní cùu te ñá díú sã sà ní ngũnu ichí-yu te ní dáñá-yu nchaa tnúhu-gá sá sà ní níhí-yu ndècu ndihí-yu sãnu ichi ñaha-xi nacuáa cundecú-yu ni cùu.

22 Te ñáyiú ducaⁿ xiquide quèe ndáá-xi nãcuáa cuáháⁿ ñi cuendú sá cãchí-xi: “Iná ní nacaxi-di sá ñi ndusaⁿ-di, te cùchí quiti íchí ñi xichi ndute cãndoo cuáháⁿ-ni tucu-di cuchi ñuhu-di núu ndèhyú”, duha cuáháⁿ cuendú-áⁿ.

3

Xítohó Jesucristú quixi tucu-gá

1 Te nchaa nchòhó ñáyiú ío cùu iní-í cùtnuní iní-í sá ío váha sãni iní-ndó, te xéhé cúú-xí tütú cúú úú cãdúha-í sá cúú-xí-ndó, te ñi-ni cãháⁿ-í dãndãcu iní ñáhá-í xii-ndo nchàa tnúhu sá sã ní xíndedóho-ndo.

2 Chi cuiní-í sá vã nãcuànaa-ndo nchaa tnúhu ní cãháⁿ nchaa cue tée ní xóo cãháⁿ tnúhu Yá Ndiöxí ndéé sanaha, te ni vã nãcuànaa-ndo nchaa tnúhu ní cãháⁿ cue tée ní cãháⁿ tnúhu Xítohó Jesucristú Yaá ní dácãcu nihnu ñaha xii-o núu ùhú núu ndàhú, chi ñi nchaa tnúhu-áⁿ sãnú ichi ñaha-xi xii-o nacuáa cada-o cundecu-o.

3 Te ío-gá xini ñuhu-xi cutnuní iní-ndó nãcuáa cada-xi òré vátá sãá-gá nduu quixi tucu Xítohó Jesucristú ñuyíú-a, te cãchí tnúhu-í xii-ndo sã cundècu ñáyiú cuhuⁿ iní mee-ni nchàa sá cuèhé sá dúhá te mee-ni xiãⁿ cadá-yu, te cãháⁿ cuèhé cãháⁿ duhá-yu cuendá tnúhu Yá Ndiöxí.

4 Te cachí-yu: “Ñá ndáá sá quixí Xítohó Jesucristú ñuyíú-a, chi núu quixi-gá te sã ndéé ama-gá sa ní quexio-gá ní cùu. Te dàtná-ni quide-xi vitna ñi-ni duha ní quesaha-xi quide-xi ndéé cùtnàhá ní ngáva ñuyíú, te ñi-ni duha quide-xi ndéé cùtnàhá

ní xíndecu cue ñani tnáhá-ó ndéé sanaha, te ñi-ni duha quide-xi ndéé ní sãá nduu ní xihí-güedé, te ñi-ni duha quide-xi ndéé vitna”, duha cãháⁿ-yu.

5 Te ñucùuⁿ cadá-yu vá cadá cuendá-yu sá Yá Ndiöxí ní cãháⁿ-gá te ní ngúndecu andiú ndihí ñuyíú-a, te ñi-gá ní quide ní quene ñuhu yìchí xiti ndute ní ngúndecu-xi ñi xio.

6 Te ñi xito ní dãndáá Yá Ndiöxí ndute ñuyíú-a ní dãndáá-gã nchaa sá ío.

7 Te Yá Ndiöxí ní cachí-gá sá cundècu-ni ñuyíú-a ndihí andiú ndéé ná sãá nduu càda-gá nchaa nãcuáa ní cãháⁿ-gá sá cúú-xí nchàa ñáyiú ndècu ichi cuèhé ichi duha, te dàvá-áⁿ danàa-gá nchaa ñáyiú-áⁿ chi cáyú andiú ndihí ñuyíú-a.

8 Te nchaa nchòhó ñáyiú ío cùu iní-í, ío cuhuⁿ iní-ndó tnúhu na cãháⁿ-í-a, chi Yá Ndiöxí ñá túú sãni iní-gá dàtná sãni iní mée-ó, te ñi nduu cùu-xi datná úxí ciendú cuíá, te úxí ciendú cuíá-ãⁿ cúú-xí dàtná ñi nduu sá cúú-xí-gã.

9 Te Yá Ndiöxí ñá túú dàna ndodo iní-gá vá cadá-gã ñi sã cãháⁿ-gá dàtná cãchí cue ñáyiú sá dãná ndòdo iní-gá cada-gá ñi sã cãháⁿ-gá, chi ñucùuⁿ tnahí dàcaca-gá nduu cuendá sá ío cundahú iní ñáhá-gã xii-o, te cuiní-gá sá nchãá ñáyiú ndixi túu iní-yu sá ña túú quide váha-yu ndècú-yu te tuhá-yu ichi-gá, te ducaⁿ quide-gá chi cuiní-gá sá vã cuíta nihnu ni ñi-yu.

10 Te dàtná quidé cue ñadúhú quihu-güedé ñi vehe dùhu-güedé òré ñá túú yìhi iní xítohó vehe-áⁿ, te ducaⁿ càda Xítohó Jesucristú chi nduu ña túú yìhi iní ñáyiú ñuyíú-a quixi tucu-gá, te dàvá-áⁿ cada-xi andiú dàtná quidé-xí òré níhi vihi cãháⁿ ñuhu, te ñi-ni òré-áⁿ ndoñuhu àndiú, te cáyú nchaa chódini, te cáyú tucu tnàhá ñuyíú-a ndihí nchaa sá ío.

11 Te vitna nchòhó sa xini-ndó sã nãá ñuyíú-a te xiãⁿ ío xini ñuhu-xi cada váha-ndo cundecu-ndo, te cada-ndo nãcuáa cuiní mée Yá Ndiöxí cunduu.

12 Te ío nducu ndèe-ndo ducaⁿ cada-ndo cuendá ducaⁿ ndihí-ni sãá nduu càda-gá nchaa nãcuáa cãháⁿ-gá, te ducaⁿ nchòhó cundecu túha-ndo sãá nduu-ãⁿ. Te ñi-ni nduu-ãⁿ ndoñuhu àndiú chi cáyú-xi, te ñi-ni ducaⁿ ndoñuhu tucu nchaa chódini chi ndihí-di cáyú.

13 Te nchoo ndètu-o sáá nduu cùndecu-o ìí ñuyú sáá, te quini-ó ìí andiu saa datná ní cachí Yá Ndióxi, te yacáⁿ chi mee-nă cue ñáyiú quide váha cundecu.

14 Te nchòhó ñáyiú ío cùu iní-í, ñini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndióxi, te cundecu nahi-ndo, te cada-ndo nchàa nacuáa vá cùndecu cuéchi-ndo núú-gă.

15 Te ío cada cuendá-ndó sã dăcaca-gă nduu dùcaⁿ cada-gă chi cuini-gă sá nchăá ñáyiú naníhí tãhú-yu. Te té Păblú tée ío cùu iní-ó ndècu ndihi-o ichi Xítóhó Jesucristú diu-ni năcuáa cãháⁿ-í-a diu-ni ducaⁿ ñi tee-dé ìí núú tütú ní dăquixí-dě ndaha-ndo, te ní tee-dé năcuáa ní dăcãhú ìní ñáhá Yá Ndióxi xii-dé.

16 Te diu-ni ducaⁿ cãháⁿ-dé nchaa dava-gă núú tütú cãdũha-dé, te dava tnúhu cãháⁿ-dé ío úhú tecú tnùní-ó, núú xiãⁿ ñáyiú ñá túú cùtnuní váha iní-xi, ñáyiú ío yáchí sãndáá iní-xi ìí tnúhu, ñáyiú-áⁿ təcú tnùní dătni-yu nchaa tnúhu ní chídó tnùní-dé, ndihi nchaa dava-gă tnúhu yòdo tnuní núú tütú Yá Ndióxi, te sá dúcãⁿ quidè-yu te dacuíta nihnú-yu mée-yu.

17 Te nchòhó ñáyiú ío cùu iní-í, sa cùtnuní iní-ndó năcuáa quide dava ñáyiú, núú xiãⁿ ío xini ñuhu-xi quihí iní-ndó cùndecu-ndo cuendá ducaⁿ cùndecu-ni-ndo ichi-gă, te vá dăñã-ndó mée-ndo dandahú ñáhá nchàa cue tée ndècu ichi cuehé ichi duha, chi cue tée-áⁿ ñà túú sãni váha iní-güedé cuendá tnúhu Yá Ndióxi. Te núú na dăña-ndo mee-ndo dandahú ñáhá-güedé xii-ndo te vá cùndecu váha-gă-ndó ichi-gă dătná ndécú-ndó vitna.

18 Te nchòhó uuⁿ-gă uuⁿ-gă cuita cutnùní-gă iní-ndó quihíⁿ nchaa năcuáa ta chindee ñaha Xítóhó Jesucristú xii-ndo cuãháⁿ. Te ducaⁿ ío-gă cuita cutnùní iní-ndó nchàa nacuáa sãni iní-gă, te diu-gă cúú-gă Yaá ní dăcãcu nihnu ñaha xii-o núú úhú núú ndàhú. Te chí ná cãchí-ó sã ìo cãhnu cuu-gă cuèi vitna té cuèi ndée núú cuãháⁿ núú vèxi. Te ducaⁿ na cùnduu. Te ío chí cãdá ndèe iní-nă vitna.

TUTÚ DÍHNA NÍ CADÚHA TÉ JUÀÁ

Tnúhu sá càháⁿ nàcuáa naníhí tàhú-ó

¹ Te yúhú té Juàá càchí tnúhu-í xii-ndo cuendá Crístú Yaá càháⁿ nàcuáa cundecu ndíhi-o Yá Ndiöxí. Te Crístú-áⁿ sa ndècu-gá ndéé cútnàhá ní ngáva ñuyú. Te yúhú ní xiní núu-í ndíhi cue téé ní xica cuu ndíhi-í nàcuáa càa nacuáa ndúu-gá. Te ní xíndedóho-ndí tnúhu ní càháⁿ-gá, te ní tenda-ní-gá te ní cutnùní ndáá iní-ndí sá ñⁿ yiqui cuñú cúu-gá.

² Te ní quixi túu-gá ñuyú-a, te ní xiní-ndí-gá, te xiáⁿ càchí tnúhu ndáá-ndí xii-ndo. Te càchí tnúhu tucu-ndí sá ndécú-gá ndíhi Tátá-gá Dútú Ndiöxí ní cùu, te ní quixi-gá ñuyú-a ní xíndecu-ndí ndíhi-gá. Te ní cachí tnúhu-gá xii-ndí sá ndúú tãhú-ó cundecu ndíhi-o Yá Ndiöxí ní caa ní quíhíⁿ te núu na quíndáá iní-ó-gá.

³ Te xiáⁿ dátúu-ndí núu-ndó nchàa sá ñí xiní-ndí, ndíhi nchaa sá ñí xíndedóho-ndí cuendá cuu ñⁿnuu-o nchàa-o datná nchúhú cúu ñⁿnuu-ndí ndíhi Tátá-ó Dútú Ndiöxí, ndíhi Déhe-gá Xítohó Jesucrístú.

⁴ Te xiáⁿ núu tèe-í nchaa tnúhu-a cuendá cudí iní-ó nchàa-o.

Yá Ndiöxí cúu-gá datná ñⁿ ñuhú

⁵ Te nchaa tnúhu ní dánèhé ñáhá Xítohó Jesucrístú xii-ndí, xiáⁿ dánèhé ñáhà-í xii-ndo. Te ní cachí-gá sá Yá Ndiöxí cúu-gá datná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túu quide-gá ní ñⁿ sá cuèhé sá dúhá.

⁶ Te núu càchí-ó sá ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túu quide ndáá-ó núu-gá.

⁷ Te núu na càda váha-o datná quidé mèe-gá, te cuu ñⁿnuu-o nchàa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi ñⁿ cuendá-áⁿ ñí xíhí Déhe-gá Xítohó Jesucrístú núu cùrúxí.

⁸ Te núu càchí-ó sá ñá túu quide-o ní ñⁿ sá cuèhé sá dúhá, te dándahú-ó mèe-o, te ñá túu quide ndáá-ó núu Yá Ndiöxí.

⁹ Te núu na nàhmá-ó nchàa yíca cuèchi-o núu-gá, te mee-gá cada càhnu iní-gá, te ndada ndoo-gá iní-ó, cuendá cada ndáá-ó cundecu-o ichi-gá, chi mee-gá ío váha quide-gá te ío ndáá quidé-gá, ducaⁿ ní càháⁿ-gá te ducaⁿ quide-gá.

¹⁰ Te núu na càchí-ó sá ñá túu quide-o ní ñⁿ sá cuèhé sá dúhá, te quide-o Yá Ndiöxí ñⁿ ñándéhdé, dico ñá túu ndèhnde-gá. Te ñá túu ndècu tnúhu-gá iní-ó te núu ducaⁿ na càda-o.

2

Xítohó Jesucrístú càháⁿ ndàhú-gá cuendá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vã cadá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nándí sá cuèhé sá dúhá, te ndècu ñⁿ Yaá càháⁿ ndàhú cuendá-ó núu Yá Ndiöxí. Te Yaá-áⁿ cúu-gá Xítohó Jesucrístú Yaá quidé ndáá.

² Te ní xíhí-gá sá cuendá nchaa yíca cuèchi-o cuendá ngúndecu váha-o núu-gá te núu na quíndáá iní-ó-gá. Te ñá díu-ní sá cuendá yíca cuèchi nchoo ní xíhí-gá, chi tnàhá cuendá nchaa yíca cuèchi ñáyiu ní càa xico ñuyú.

³ Te núu cada-o nchaa nacuáa càháⁿ Yá Ndiöxí, te cutnùní iní-ó sá ndécú-ó ìchi-gá.

⁴ Te núu càchí-ó sá ndécú-ó ìchi-gá te ñá túu quide-o nacuáa càháⁿ-gá, te dàcuandehnde-o, te ñá túu quide ndáá-ó núu-gá.

⁵ Te núu sàndáá ndisa iní-ó tnúhu-gá, te quide-o nchaa nacuáa càháⁿ-gá, te ducaⁿ te cùu iní ndisa-o-gá, te cùtnuní ndáá iní-ó sá ndécú-ó ìchi-gá.

⁶ Te núu càchí-ó sá ndécú-ó ìchi Yá Ndiöxí, te xini ñuhu-xi cada ndáá-ó cundecu-o ñuyú-a datná ní quide ndáá Xítohó Jesucrístú cútnàhá ní xíndecu-gá ñuyú-a.

Ndudú sáá

⁷ Te nchòhó ñáyiu ndècu ndíhi-í ichi Xítohó Jesucrístú, ñá túu chido tnuní-í ñⁿ tnúhu saa sá cúu-xí-ndó, chi ñⁿ ni tnúhu sá ñí ngúndecu ndíhi-ndo ndéé díhna, tnúhu

ní xíndedóho-ndo ndëé cútnàhá ní sándáá iní-ndó-gã, xiãⁿ chídó tnùní-í.

8 Te tnúhu-a cùu-xi datná ìⁿ tnúhu saa tèe-í dándàcu iní ñàhá-í xii-ndo nàcuáa ní quide Xítohó Jesucristú cútnàhá ní quixi-gá ñuyíú-a ní quide váha-gá, te tnàhá nchòhó ní tñi-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiu ta dàña nchaa sá cuèhé sá dúhá cuáháⁿ, chi Xítohó Jesucristú tá dándixi túu-gá iní-yu cuendá cutnùní iní-yu nàcuáa nduu cuendá Yã Ndiöxí.

9 Te núu càchí-ó sã quidé vãha-o, te cùu úhú iní-ó tnàha ñáyiu-o, te xiãⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o.

10 Te núu na cùu iní-ó tnàha ñáyiu-o datná cúú iní ñàhá mèe Yá Ndiöxí xii-o ña, te quide ndáá-ó nùú-gã, te vá cánúichi-o tnaha ñáyiu-o ìⁿ ichi cuehé ichi duha.

11 Te núu cùu úhú iní-ó tnàha ñáyiu-o, te ñá túú quide váha-o nùú Yã Ndiöxí, chi ndècu-ni-o ichi cuehé ichi duha, te ñá túú cutnùní iní-ó sã quidé-ó. Chi cùu-o datná ìⁿ tée ndècu núú nées chi ñá cutnùní núú-dé ndéé ichi quíhíⁿ-dé. Ducaⁿ sãtnahá-xi cùu nchoo chi ñá cutnùní iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàha ñáyiu-o.

12 Te nchòhó ñáyiu cùu datná déhe-í, yúhú chídó tnùní-í tnúhu-a ìⁿ núú tütú càchí tnúhu-í xii-ndo sã ní quide càhnu iní Yã Ndiöxí nchaa cuéchi-ndo, chi ñu cuendá-án ní xíhí Xítohó Jesucristú.

13 Te nchòhó ñáyiu sacuéhé, yúhú téè-í tnúhu-a sá cúú-xí-ndó chi càháⁿ ndihi-ndo Jèsús, te Yaá-án sa ndècu-gá ndéé cútnàhá ní ngáva ñuyíú. Te nchòhó ñáyiu nchìcúⁿ-gá téé tucu-í tnúhu-a sá cúú-xí-ndó chi ñá túú sándáá iní-ndó tnúhu càháⁿ yucu ñávãha.

Te nchaa nchòhó ñáyiu cùu datná déhe-í, tèe tucu-í tnúhu-a sá cúú-xí-ndó, chi sa càháⁿ ndihi-ndo Tãtã-ó Dütú Ndiöxí.

14 Te nchòhó ñáyiu ní sãhnu, yúhú chídó tnùní-í tnúhu-a ìⁿ núú tütú chi càháⁿ ndihi-ndo Jèsús, te Yaá-án sa ndècu-gá ndéé cútnàhá ní ngáva ñuyíú. Te nchòhó ñáyiu nchìcúⁿ-gá, yúhú chídó tnùní-í tnúhu-a chi ío ñihí ndéé-ndó ndècu-ndo, chi tñi-ndo tnúhu càháⁿ Yã Ndiöxí. Te ñá túú sándáá iní-ndó tnúhu càháⁿ yucu ñávãha.

15 Te vá cúhúⁿ iní-ndó ñi ìⁿ sá cuèhé sá dúhá ío ñuyíú-a, te ni vã cání iní-ndó càda-ndo. Chi núu na cùhuⁿ iní-ó nchaa sá cuèhé sá dúhá ío ñuyíú-a ña, te ñá túú Tãtã-ó Dütú Ndiöxí ñúhú iní-ó te núu ducaⁿ na càni iní-ó.

16 Te nchaa ñáyiu ñuyíú-a quidé-yu nchaa sá cuèhé sá dúhá, chi ñu nchaa xiãⁿ cúdí iní-yu cadá-yu. Te nchaa sá cuèhé sá dúhá sàni iní-yu, ndihi nchaa sá xini-yu quidé-yu. Te xiquide nínu-yu mèe-yu cuendá nchaa sá ndécú ndihi-yu. Te nchaa sá ñà túú vãha ní cacu nihnu-xi ñuyíú-a.

17 Te nchaa sá ñà túú vãha ío ñuyíú-a, ndihi nchaa sá sání cuèhé sání duha iní-yu cuita ndihi nihnu-xi quíhíⁿ. Te nchaa ñáyiu tñi tnúhu càháⁿ Yã Ndiöxí cundecú-yu ndihi-gá ni caa ni quíhíⁿ.

Tnúhu ndáá tnúhu Yá Ndiöxí ndihi tnúhu ndehnde

18 Te nchòhó ñáyiu cùu datná déhe-í, sa ñihí-ndó tnúhu sá quíxí ìⁿ tée cunuu-gã-dé cuu úhú iní-dé Crístú. Te sa xíndecu-gá ñáyiu cùu úhú iní ñàhá xii-gá, núu xiãⁿ cutnùní iní-ó sã sã ta cuyatni nduu naa ñuyíú-a.

19 Te ñáyiu-án ní xíndecu ndihi ñàhá-yu xii-o, te ní queé-yu cuáháⁿ-yu chi ñá túú ní cùu ìⁿnuu-o ndihi-yu. Chi núu dìcò ní cùu ìⁿnuu-o ndihi-yu te cundecu ndihi ñàhá-yu xii-o ní cùu. Te duha ní cuu cuendá cutnùní ndáá iní-ó nchaa-o sá ñà túú cùu ìⁿnuu-o ndihi-yu, chi ñá túú sándáá iní-yu Yá Ndiöxí.

20 Te Xítohó Jesucristú ní taxi-gá Espíritú Yã Ndiöxí ndécú ndihi-o, núu xiãⁿ tècú tnùní-ó tnúhu-gá.

21 Te cuendá sá xini-ndó tnúhu ndáá tnúhu Yá Ndiöxí nùu xiãⁿ téè-í tnúhu-a, te ñá díú ìⁿ sá ñá cutnùní iní-ndó cùu-xi. Te sa naha-ndo sá ñi ìⁿ tnúhu ndehnde ñá túú ñútnahá-xi núú tnúhu Yá Ndiöxí, chi mee ñine-ni tnúhu ndáá cúú-xí.

22 Te nchaa ñáyiu càchí sá ñà díú Jèsús cúú Crístú Yaá ní tendaha Yã Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ni-yu càchí-yu sá ñà díú Déhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndihi Déhe-gá Jèsús.

23 Te nchaa ñáyiú ñá túú sàndáá iní sá Dèhe Yá Ndiòxí cúú Jèsús, ñáyiú-áⁿ ñà túú ndècú-yu ichi Tàtá-ó Dütú Ndiòxí. Te nchaa ñáyiú càháⁿ sá Dèhe Yá Ndiòxí cúú Jèsús, ñáyiú-áⁿ ndècú-yu ichi Tàtá-ó Dütú Ndiòxí.

24 Te nchaa tnúhu Yá Ndiòxí ní tecú dóho-ndo ndèé díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndìhi-ndo Yá Ndiòxí ndìhi Déhe-gá cuèi vá cùndecu túu-ndo ndìhi-gá ñuyíú-a.

25 Te Jèsús ní cachí-gá sá ndúú tǎhú-ó cùndecu ndìhi-o-gá ni caa ni quíhíⁿ andíu.

26 Te cuèndá nchaa ñáyiú dándahú ñáhá xii-ndo ní chídó tnùní-í tnúhu-a,

27 dico nchòhó chi ndècu ndìhi-ndo Espíritú Yá Ndiòxí sá ñí taxi Xítohó Jesucristú. Núu xǎⁿ ñá túú xìní ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xí nchaa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ñíⁿ tnúhu ndehnde. Te vitna chí cáncñícúⁿ nihnu-ni ichi Yá Ndiòxí dàtná ní sanu ichi ñaha mée Espíritú-gá xii-ndo.

28 Te nchòhó ñáyiú cùu datná déhe-í, chí cáncñícúⁿ nihnu-ni ichi Xítohó Jesucristú, chí cuèndá òré ná quíxí tucu-gá ñuyíú-a te vá yùhú-ndó te ñí vá cúú càhaⁿ núú-ndó núú-gǎ.

29 Te nchòhó sa nàha-ndo sá mée-gǎ quidé ndáá-gá, te sa xìní-ndó sǎ ncháá ñáyiú quide ndáá cúú-yu déhe Yá Ndiòxí.

3

Ñáyiú cùu déhe Yá Ndiòxí

1 Te chí cuǎha cuèndá sá ïo cùu iní ñáhá Tàtá-ó Dütú Ndiòxí xii-o cuèndá sá cúú-ó déhe-gá, chí ducaⁿ ñí cachí-gá, te déhe ndisa-gá cúú-ó. Te núu xǎⁿ ñáyiú ndècu ichi cuehé ichi duha ñá cúú quíni ñáhá-yu xii-o, chí ñá túú xìní-yu nàcuáa ndùu cuèndá Yá Ndiòxí.

2 Te nchòhó ñáyiú ío cùu iní-í, vitna cùu-o déhe Yá Ndiòxí, te vátá cùtnùní váha-gá iní-ó nǎsa cunduu-o ndèé núú cuáháⁿ núú vǎxi. Dico sa cùtnuní iní-ó sǎ òré ná quíxi tucu Xítohó Jesucristú te nduu-o dàtná cáá mée-gá, chí quíni-ó-gǎ nàcuáa-ni càa nàcuáa-ni ndùu-gá.

3 Te nchaa ñáyiú sa ndètu ñaha xii-gá sa ta ngùndecu túha-yu cuáháⁿ, chí ta ndùu ndoo

nduu nine iní-yu cuáháⁿ dàtná cáá ndòo caa nine mee-gá.

4 Te nchaa ñáyiú quide nándi sá cuèhé sá dúhá ñà túú quide váha-yu núú Yá Ndiòxí, chí ní cachí-gá sá vǎ dúcáⁿ càda-o.

5 Te sa nàha-ndo sá ñí quixi túu Xítohó Jesucristú ñuyíú-a cuèndá cada càhnu iní-gá nchaa sá cuèhé sá dúhá quide-o, chí mee-gǎ ñá túú quide-gá ní ñíⁿ sá cuèhé sá dúhá.

6 Te nchaa ñáyiú ndècu ichi Yá Ndiòxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xìní-yu nàcuáa ndùu cuèndá Xítohó Jesucristú te ñí ñá túú xìní-yu nàsa càa-gá.

7 Te nchòhó ñáyiú cùu datná déhe-í, vá dáñá-ndó mée-ndo dándahú ñáhá ñáyiú ndècu ichi cuehé ichi duha, chí cáncñí-yu sá cúú cùndecu-o ichi Yá Ndiòxí te cada-o nándi sá cuèhé sá dúhá dico ñá ndáá. Te nchaa ñáyiú quide váha quide ndáá-yu dàtná quidé mée Jesús.

8 Te nchaa ñáyiú ndècu ichi cuehé ichi duha ndècu ndìhi-yu yucu ñávǎha, chí ducaⁿ quide mee-xi ndèé cùtnàhá vátá ngǎva-gá ñuyíú. Te xǎⁿ ní quixi Jèsús Déhe Yá Ndiòxí ní dáquéeé tǎhú-gǎ nchaa sá quidé yùcu ñávǎha.

9 Te nchaa ñáyiú ní natuha ichi Yá Ndiòxí ní nduú-yu déhe-gá, te ñá túú-gǎ quidé-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xǎⁿ ñá túú-gǎ quidé-yu nándi sá cuèhé sá dúhá, chí ní ngùndecu ndìhi ñaha-gǎ xii-yu.

10 Te cùtnuní iní-ó nándi cùu ñáyiú cùu déhe Yá Ndiòxí, te cùtnuní iní-ó nándi cùu ñáyiú cùu déhe yucu ñávǎha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-áⁿ ñà díú déhe Yá Ndiòxí cúú-yu.

Cuu iní tnáhá-ó ñíⁿ ñíⁿ-o

11 Te ndèé òré ní natuha-o ichi Yá Ndiòxí ní tecú dóho-o sǎ cúú iní-ó tnàha ñáyiú-o.

12 Te vá cùndùu úhú iní-ó dàtná ní quide ndíi Càin, chí ndíi-áⁿ ñí xíndecu ndíi ndìhi yucu ñávǎha núu xǎⁿ ní sahani ndíi ñaní ndíi. Te ducaⁿ ñí quide ndíi chí ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

13 Te nchòhó ñáyiú ndècu ndìhi-í ichi Xítohó Jesucristú, vá cáda cuèndá-ndó sǎ

cúu úhú iní ñáhá nchàa ñáyiú ndècu ichi cuehé ichi duha xii-ndo.

¹⁴ Te cunaha-ndo na càchí tnúhu-í xii-ndo sã núu na cùu iní-ó tnàha ñáyiú-o, te cùtnuní iní-ó sã sà ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tñi-o ìchi váha. Te nchaa ñáyiú ñá túú cùu iní tnàha ñáyiú-xi ñùhu-ní-yu ichi cuáháⁿ-yu núú úhú núú ndàhú.

¹⁵ Te nchaa ñáyiú ñá cúu quèní ndeé tnàha ñáyiú-xi cùu-yu dàtná ìⁿ ñáyiú sàhni ndíyi. Te nchòhó sa nàha-ndo sá nì ìⁿ ñáyiú sàhni ndíyi ñá túú ndècu ndìhí-yu tnúhu ndee iní sá nánihí tàhú-yu.

¹⁶ Te Xítohó Jesucristú ní xíhí-gá cuendá nchaa yíca cuèchi-o, núu xiáⁿ cùtnuní iní-ó sã ìo cùu iní ñáhá-gã xii-o. Te xiáⁿ cùtnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuendá sá cúu-xí ìⁿ-yu, cuendá-nã sá ná dàcácu nihnu-ò-yu núú tnùndòho ndecú-yu.

¹⁷ Te núu ndècu ndìhi-o sá cóhó sã cáxí-ó ndìhi nchaa sá nándìhi-o, te ndècu ñáyiú ndàhú ñá túú vèdana ná ndécú ndìhi, te ñá túú chindee-ó-yu, te ñá túú cùu iní-ó Yã Ndiòxí te núu ducaⁿ na càda-o.

¹⁸ Te nchòhó ñáyiú cùu datná déhe-í vá cuendá-ni cùnàha cáhán-ndó sã cúu iní tnáhá-ndó, chi cuu iní tnáhá ndisa-ndo te coto tnàha-ndo.

Vá yùhú-ó núú Yã Ndiòxí

¹⁹ Te núu ducaⁿ na càda-o, te cùtnuní iní-ó sã ndécú-ó ìchi ndáá ichi Yã Ndiòxí, te ñá túú-gã ná quíhi iní-ó núú-gã.

²⁰ Te núu ndìhú iní-ó cuendá ìⁿ sá nì quide-o, te sa nàha Yã Ndiòxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó.

²¹ Te nchòhó ñáyiú ío cùu iní-í, na càchí tnúhu-í xii-ndo, te núu ñá túú nã sání iní-ó te ñá túú nã quidé-ó, te vá yùhú-ó núú Yã Ndiòxí.

²² Te nchaa sá vãha na càcáⁿ-ó núú Yã Ndiòxí, te mee-gã taxi-gá chi tñi-o tnúhu càhán-gá, te quide-o nchaa nàcuáa cùu iní-gá.

²³ Te ní cachí Yã Ndiòxí sá quèndáá iní-ó Dèhe-gá Xítohó Jesucristú, te cuu iní-ó tnàha ñáyiú-o dàtná ní cachí-gá.

²⁴ Te nchaa ñáyiú tñi tnúhu-gá ndécú-yu ichi-gá, te ndècu ndìhi ñaha-gã xií-yu. Te

cùtnuní iní-ó sã ndécú-ó ndìhi-gá chi ní taxi-gá Espiritú-gá ndécú ndìhi-o.

4

Ñáyiú ndècu ndìhi Espiritú Yã Ndiòxí ndìhi ñáyiú cùu úhú iní ñáhá xii Xítohó Jesucristú

¹ Te nchòhó ñáyiú ío cùu iní-í, vá cùtexínu quèndáá iní-ndó tnúhu càhán nchaa ñáyiú càchí sá ndécú ndìhi Espiritú Yã Ndiòxí. Chi díhna-gá cada cuendá váha-ndo te núu càhán ndáá-yu nàcuáa càhán tnúhu Yã Ndiòxí, chi ío vãi ñáyiú ñuyíú-a cachí-yu sá càhán-yu tnúhu-gá dico ñá ndáá.

² Te duha cùtnuní iní-ó nãndi cùu ñáyiú ndècu ndìhi Espiritú Yã Ndiòxí. Nchaa ñáyiú càhán ndáá sá Xítohó Jesucristú ní quixi-gá ñuyíú-a te ní cuu-gá ìⁿ yiqui cùñú, ñáyiú-án cúu-yu ñáyiú cùu cuendá Yã Ndiòxí.

³ Te nchaa ñáyiú ñá túú càhán nàcuáa càa Jesús cùtnàhá ní quixi-gá ñuyíú-a ñáyiú-án dándahú ñáhá-yu, chi ñá túú cùu-yu ñáyiú cùu cuendá Yã Ndiòxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiú cuu úhú iní ñáhá xii-gá, dico yúhú càchí tnúhu-í xii-ndo sã sã ndecú-yu.

⁴ Te nchòhó ñáyiú cùu datná déhe-í, ndècu ndìhi-ndo Yã Ndiòxí, te ñá dáñá-ndó dándahú ñáhá nchàa ñáyiú càchí sá càhán tnúhu-gá te ñá ndáá. Te ñá túú sàndáá iní-ndó chi Yã Ndiòxí Yaá ndécú ndìhi-ndo taxi tnuní víhí-gã dàcúxí yùcu ñávãha ndècu ndìhi nchaa ñáyiú ñùhu ichi cuehé ichi duha.

⁵ Te nchaa ñáyiú dándahú ñáhá sã càhán tnúhu Yã Ndiòxí ndécú-yu ichi cuèhé ichi duha, te mee-ni cuendá nchaa sá ìo ñuyíú-a càhán-yu. Te tédóho ñaha nchàa dava-gá ñáyiú ndècu diu-ni ichi cuehé ichi duha.

⁶ Te nchoo cùu-o ñáyiú cùu cuendá Yã Ndiòxí. Te nchaa ñáyiú xíndecu ichi-gá tñi-yu tnúhu càhán-ó, te nchaa ñáyiú ñá túú ndècu ichi-gá ñá túú tñi-yu tnúhu càhán-ó. Te duha te cùtnuní iní-ó nãndi cùu ñáyiú càhán ndáá, te cùtnuní tucu iní-ó nãndi cùu ñáyiú dándahú ñáhá.

Cuu iní-ó tnàha ñáyiú-o dàtná cúu iní ñáhá mèe Yã Ndiòxí xii-o

⁷ Te nchòhó ñáyiú ío cùu iní-í, xini ñuhu-xi cuu iní tnáhá-ó dàtná cúu iní ñáhá mèe

Yá Ndiöxí xii-o, chi mee-gă táxí-gă sá xìní tnùní-ó cuendá cuu iní-ó tnàha ñáyíu-o. Te nchaa ñáyíu cùu iní tnàha ñáyíu-xi cùu-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gá xii-yu.

⁸ Te nchaa ñáyíu ñá túú cùu iní tnàha ñáyíu-xi ñá túú ndècu ndìhi-yu Yá Ndiöxí. Te nchaa ñáyíu ndècu ndìhi Yá Ndiöxí, ñáyíu-án sãñaha-gă sá xìní tnùní-yu cuendá cuu iní-yu tnàha ñáyíu-yu.

⁹ Te cùtnuní iní-ó sã cúú ìní ñáhá Yá Ndiöxí xii-o nchaa-o, chi ní tendaha-gă ìndì dîi-ni Déhe-gá Xítohó Jesucristú ní quixi-gá ñuyíú-a cuendá sá díú-gă cada te naníhi tãhú-ó, te núu na quindáá iní-ó tnùhu-gá.

¹⁰ Te ío cùu iní ñáhá Yá Ndiöxí xii-o nchaa-o. Te ñá díú sã méé-ó cùu iní-ó-gă, chi díhna-gá méé-gă sa cùu iní ñáhá tnàhí-gá xii-o, núu xíãⁿ ní tendaha-gă Déhe-gá ní quixi-gá ñuyíú-a ní xíhí-gá sá cuendá nchaa yíca cuèchi-o.

¹¹ Te nchòhó ñáyíu ío cùu iní-í, xìní ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gă xii-o.

¹² Te ní ìⁿ nchoo ñáyíu ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyíu ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíãⁿ cúú ìní tnáhá-ó ìⁿ ìⁿ-o, te cùtnuní iní-ó sã cúú ìní ndisa-o-gă.

¹³ Te cùtnuní iní-ó sã ndécú-ó ichi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o.

¹⁴ Te yúhú ndìhi dava-gá cue téé ní xica cuu ndìhi-gá càháⁿ-ndí sá ñí xìní-ndí Jèsús Déhe Yá Ndiöxí ní quixi-gá ñuyíú-a, chi Tãtá-ó Dütú Ndiöxí ní tendaha ñàha xii-gá ní quixi-gá cuendá dàcácu nihnu-gá nchaa nchoo ñáyíu ndècu ñuyíú-a núu ùhú núu ndàhú.

¹⁵ Te nchaa ñáyíu càháⁿ ní yùhu ní iní-xi sá Dèhe Yá Ndiöxí cúú Jèsús, ñáyíu-án ndécú-yu ichi-gá te ndècu ndìhi ñaha-gá xii-yu.

¹⁶ Te sàndáá iní-ó ñè yuhu ní iní-ó sã Yá Ndiöxí cúú ìní ñáhá-gă xii-o, chi ducaⁿ ìní-gá. Te nchaa ñáyíu cùu iní ñáhá xii Yá Ndiöxí ndécú ndìhi ñaha-gá xii-yu.

¹⁷ Te núu ndisa cùu iní-ó Yá Ndiöxí te vá yùhú-ó òré ná sàá nduu tàudìⁿ ñaha-gá xii-o tnùú nchaa ñáyíu ndècu ichi cuehé ichi duha, chi quide ndáá-ó ndècu-o núú-gă ñuyíú-a dàtná ní quide mee Jèsús.

¹⁸ Chi nchaa ñáyíu cùu iní ñáhá xii Yá Ndiöxí ñá túú-gă yùhú-yu, te núu cùu iní ndisá-yu-gá. Te núu yùhú-yu te xíãⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyíu yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gă ndéé cùtnáhá vátá quindáá-gá iní-ó tnùhu-gá sa cùu iní ñáhá-gă xii-o.

²⁰ Te nchaa ñáyíu càchí sá cúú ìní-yu Yá Ndiöxí, te cùu ùhú iní-yu tnàha ñáyíu-yu, ñáyíu-án dácuaⁿndehndé-yu. Te núu ñá túú cùu iní-yu tnàha ñáyíu-yu ndècu ñuyíú-a ña, te uuⁿ-gá quidè-yu Yá Ndiöxí Yaa ñá túú xìní núú-yu.

²¹ Te càchí-gá núú tnùhu-gá sá ñáyíu na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyíu-yu.

5

Nchaa ñáyíu ní ndacu ní dáñá ichi cuehé ichi duha

¹ Te nchaa ñáyíu sàndáá iní sá Jèsús cúú-gă Crístú Yaa ní quixi ñuyíú-a, ñáyíu-án cúú-yu déhe Yá Ndiöxí. Te cùu iní-yu Tãtá-ó Dütú Ndiöxí, te cùu iní-yu Déhe-gá.

² Te núu cùu iní-ó Yá Ndiöxí te quide-o nacuaá càháⁿ-gá, te cùtnuní iní-ó sã cúú ìní tnáhá ndisa-o nacuaá ndècu-o ichi-gá.

³ Te núu cùu iní-ó Yá Ndiöxí te tnè-o tnùhu càháⁿ-gá, chi cùtnuní iní-ó sã ñà díú ìⁿ sá ùhú cúú-xí dàtná càchí ñáyíu.

⁴ Te nchaa nchoo ñáyíu cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xíãⁿ ní ndacu-o ní dáñá-ó ichi-án.

⁵ Te nchaa ñáyíu sàndáá iní sá Dèhe Yá Ndiöxí cúú Jèsús ní ndacú-yu ní queé-yu ichi cuèhé ichi duha.

Nàcuáa ní càháⁿ Yá Ndiöxí cuendá Jèsús

⁶ Te Xítohó Jesucristú ní quixi-gá ñuyíú-a, te ní sandute-gá. Te ñá díú-ní xíãⁿ, chi ní xíhí-gá sá cuendá nchaa yíca cuèchi-o. Te Espiritú Yá Ndiöxí càháⁿ-xi mee-ni sã ndáá,

chi càháⁿ Espíritú-gá-áⁿ sã Jèsús cúú-gã Crìstú Yaá ní quixi ñuyíú-a.

7 Te úní testíú ndécú àndíu, Tãtá-ó Dütú Ndiöxí, ndíhi Déhe-gá Xítóhó Jesucristú, ndíhi Espíritú-gá. Te ìⁿ-ni tnúhu càháⁿ ndi nùní testíú-áⁿ.

8 Te ducaⁿ cùu-xi ñuyíú-a tucu, chi càháⁿ Espíritú Yã Ndiöxí sã Jèsús cúú-gã Crìstú. Te ní sandute-gá, te ní xíhí-gá sã cuendá nchaa yíca cuèchi-o. Te xíãⁿ cútnùní ndáá iní-ó sã díú Jèsús cúú-gã Crìstú.

9 Te núu tñi-o tnúhu váha càháⁿ ñáyíu, te váha-gá tñi-o tnúhu càháⁿ Yã Ndiöxí, chi càháⁿ ndáá-gá sã Déhe-gá cúú Jèsús.

10 Te nchaa ñáyíu sàndáá iní sã Jèsús cúú-gã Déhe Yã Ndiöxí, ñáyíu-áⁿ cútnùní iní-yu sã cúú-xí ìⁿ sã ndáá. Te nchaa ñáyíu ñá túú sàndáá iní tnúhu càháⁿ Yã Ndiöxí quidé-yu-gá ìⁿ ñándéhdé, dico ñá túú ndèhnde-gá, chi mée-yu ñá túú sàndáá iní-yu sã Déhe-gá cúú Jèsús dàtná càchí mée-gã.

11 Te Yã Ndiöxí càchí tnúhu ndáá-gá sã cùndècu-o ndíhi-gá ni caa ni quíhíⁿ. Te duha càháⁿ-gá chi sàndáá iní-ó Déhe-gá.

12 Te nchaa ñáyíu na quíndáá iní ñáhá xì Déhe-gá cundécú-yu ndíhi-gá ni caa ni quíhíⁿ. Te nchaa ñáyíu ñá túú sàndáá iní ñáhá xì Déhe-gá vá cùndècu-yu ndíhí-gá.

Sáhu ndèé núú nĩ ndíhi-ná

13 Te cuendá sã sàndáá iní-ndó Déhe Yã Ndiöxí nũu xíãⁿ chídó tnùní-í tnúhu-a cuendá cutnùní iní-ndó sã cùndècu ndíhi-o-gá ni caa ni quíhíⁿ.

14 Te ñá túú tnúhu yùhú cáháⁿ ndíhi-o Yã Ndiöxí, chi tedóho ñaha-gã xii-o nũu ìⁿ-ná sã ná càcáⁿ-ó nũú-gã dàtná cuíní mée-gã.

15 Te cùtnuní iní-ó sã táxí-gã sã xìcáⁿ-ó nũú-gã, chi nàha-o sã tedóho ñaha-gã xii-o nũu na càcáⁿ-ó nàcuáa cùu iní-gá.

16 Te núu xìní-ó ñáyíu ndècu ichi Yã Ndiöxí te quidé-yu sã ñá túú vãha núú-gã, te ndèhe-o sã ñá túú ní xíta nihnu duúⁿ-yu, te cáháⁿ ndíhi-o Yã Ndiöxí cuendá-yu, te dàcácu nihnu ñaha-gã xii-yu te núu na nùcúnu ichi váha-yu. Chi ió ñáyíu xidó quidé nãndí sã ñá túú vãha te xíta nihnu duúⁿ-yu, te vá càháⁿ ndíhi-gá-ó Yã Ndiöxí cuendá-yu.

17 Te nchaa sã cuèhé sã dúhá cùu-xi yíca cuèchi, dico ñá ncháá-xí cùu-xi sã dácuíta nihnu ñaha dùuⁿ.

18 Te nàha-o sã nchóó ñáyíu cùu déhe Yã Ndiöxí ñá túú-gã sání iní-ó càda-o nãndí sã cuèhé sã dúhá. Te ducaⁿ chi mee Jèsús déhe Yã Ndiöxí xító ñaha-gã xii-o, núu xíãⁿ ñá ndácú-gã yucu ñávãha dàxínu iní ñáhá-xí xii-o cada-o sã ñá túú vãha.

19 Te nchoo nàha-o sã ndécú ndíhi-o Yã Ndiöxí. Te nchaa ñáyíu ndècu ichi cuehé ichi duha tàxi tnuní ñáhá-nã yucu ñávãha xii-yu.

20 Te nàha tucu-o sã ñuyíú-a ní quixi Jèsús Déhe Yã Ndiöxí ní taxi-gá sã xìní tnùní-ó cuendá cutnùní iní-ó sã mée-gã cúú-gã Ndiöxí-ó. Te ndècu ndíhi-o mee-gã ndíhi Déhe-gá Jèsús, te ìⁿdii díí-ni mee-gã cúú-gã Yã Ndiöxí, te ndècu dava-gá sã nàcuàca ñaha-gã xii-o cùndècu-o ndíhi-gá ni caa ni quíhíⁿ.

21 Te nchóhó ñáyíu cùu datná déhe-í, vá quíndáá iní-ndó nchaa sã càchí-yu cùu ndiöxí, chi dicó ndaha cue téé ñuyíú-a ní cuáha nchaa xíãⁿ. Te ducaⁿ na cùnduu. Te ío chí cadá ndèe iní-nã vitna.

TUTÚ CÚÚ ÙÚ NÍ CADÚHA TÉ JUÀÁ

Tnúhu Yá Ndiöxí ndihí nàcuáa cuu iní tnàhá-ó

¹ Te yúhú té Juàá téé yìndaha ñaha xii ñáyiú sàndáá iní tnúhu Jèsús, tèe-í tnúhu-a ñⁿ núú tütú daquìxi-í ndaha yòhó ñaha ní cáháⁿ ñáhá Yá Ndiöxí, te nchaa tnúhu-a cùu-xi tnahá cuendá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo.

² Te cùu iní ñáhá-ndí xii-ndo chi ndècu ndihí-ndo tnúhu ndáá tnúhu Yá Ndiöxí, te ducaⁿ-ni cùndecu-o ndihí tnúhu-áⁿ ni caa ni quíhíⁿ.

³ Te xicáⁿ táhù-í núú Tátá-ó Dütú Ndiöxí, ndihí núú Déhe-gá Xítohó Jesucristú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicáⁿ táhù-í núú-gá chi ndècu ndihí-o tnúhu ndáá tnúhu Yá Ndiöxí, te cùu iní-ó-gá.

⁴ Te ío cùdí iní-í, chi ní naníhí-í ñⁿ ùú déhe-n, te quidé-yu nàcuáa sànu ichi ñaha tnúhu ndáá dàtná ní táúchíúⁿ mèe Tátá-ó Dütú Ndiöxí.

⁵ Te vítna yòhó ñaha ní cáháⁿ ñáhá Yá Ndiöxí, cächí tnúhu-í xii-n sá xíní ñùhu-xi cuu iní-ó tnàha ñáyiú-o. Te ñá díú ñⁿ tnúhu saa cùu-xi, chi díu-ni tnúhu sá ñí ngúndecu ndihí-o ndèe cútnàhá ní tuha-o ichi Yá Ndiöxí.

⁶ Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí méé-gá, te tnè-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ichi-gá.

Cue téé dándahú tnàha ñáyiú-xi

⁷ Te ío vai ñáyiú dándahú ñáhá xica cuú-yu ñuyíú-a, te cächí-yu sá ñá ndáá sá Xítohó Jesucristú ní cuu-gá ñⁿ ñáyiú ndisa. Te nchaa ñáyiú duha càháⁿ dácuàndehndé-yu, te cùu úhú iní-yu Jèsús.

⁸ Te quíhí iní-ndó sá vǎ dándahú ñáhá ñáyiú-áⁿ xii-ndo cuendá sá vǎ cuíta chiúⁿ Yá Ndiöxí ní quide-o. Te òré ná quíxí tucu Jèsús ñuyíú-a te taxi-gá nchaa sá váha cùu iní méé-gá cundecu ndihí-o.

⁹ Te nchaa ñáyiú dàña tnúhu Xítohó Jesucristú, te nàtní-yu ingá ichi, ñáyiú-áⁿ ñá túú ndècu ndihí-yu Yá Ndiöxí. Te nchaa ñáyiú ñá túú dàña tnúhu Xítohó Jesucristú ndècu ndihí-yu Yá Ndiöxí ndihí Déhe-gá Xítohó Jesucristú.

¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiöxí te ñá ndáá, te vá cuáha-ndo tnúhu danèhé ñáhá-yu xii-ndo, te ní vǎ cuáha-ndó-yu tnúhu ndee iní cuendá chiúⁿ quidé-yu.

¹¹ Chi núu na càháⁿ ndihí váha-ndó-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

Tnúhu ndéé núú ñí ndihí-ná

¹² Te ío vai-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuendá cudíí víhí iní-ó nchàa-o.

¹³ Te nchaa cue déhe cúhú-n, ñáyiú ní cáháⁿ ñáhá Yá Ndiöxí quidé ndèe iní ñáhá-yu xii-n.

TUTÚ CÚÚ ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

¹ Te yúhú té Juáá té yìndaha ñaha xii ñáyiu sàndáá iní tnúhu Jèsús, chido tnuní-í tnúhu-a ñⁿ núú tútú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiǒxí.

² Te yòhó téé ío cùu iní-í, xìcáⁿ táhù-í núú Yá Ndiǒxí sá cùndècu váha-n ñà túú nǎ cumání xii-n, te vá cùhú-n, chi sa nàha-í sá ndécú váha-n núú Yá Ndiǒxí.

³ Te ío ní cudíí iní-í òré ní sáá ñáyiu ndècu ichi Yá Ndiǒxí, te ní cachí tnúhu-yu sá sàndáá ndisá iní-n tnúhu ndáá ñⁿ tnúhu-gá te tnì-n nchaa nacúáa càháⁿ tnúhu-áⁿ.

⁴ Te ío cùdíí iní-í ní níhì-í tnúhu sá ncháá-ní ñáyiu ní sanu ichi-í ichi Yá Ndiǒxí ndécú-ní-yu ichi-gá, te quide-ní-yu nchaa nacúáa càháⁿ-gá.

⁵ Te yòhó téé ío cùu iní-í, ío váha quide-n núú Yá Ndiǒxí, chi chìndee-n nchaa ñáyiu véxi dava-gá ñuú xìcá, ñáyiu sàndáá iní tnúhu Yá Ndiǒxí.

⁶ Te nchaa ñáyiu-áⁿ càháⁿ-yu núú tàcá ñáyiu càháⁿ ndìhi Yá Ndiǒxí iha sá ío cùu iní-n nchaa tnaha ñáyiu-n dàtná càháⁿ Yá Ndiǒxí. Te yúhú càháⁿ ndàhú-í núú-n sǎ cádá ndè-ní iní-n chìndee-n nchaa ñáyiu-áⁿ nchaa sá xíní ñùhú-yu ichi. Te núu ducaⁿ na càda-n te quide-n nacúáa cùu iní Yá Ndiǒxí, te xìnu cuechi-n tnahá-n núú-gǎ.

⁷ Chi nchaa ñáyiu-áⁿ nǎ tnì-yu ichi cuáháⁿ-yu càháⁿ-yu tnúhu Jèsús. Te ñá túú tnì-yu ní ñⁿ sá sǎñaha ñáyiu ñá túú ndècu ichi Yá Ndiǒxí.

⁸ Te núu xǎⁿ nchoo xìni ñuhu-xi chindee-o nchaa ñáyiu xìnu cuechi núú-gǎ ñáyiu càháⁿ tnúhu-gá, te ducaⁿ te cutnùní iní-ó sǎ tnahá-ó xìnu cuechi-o ndìhí-yu núú-gǎ.

Ñá túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáyiu chìñuhú-yu Yá Ndiǒxí, dico ñⁿ téé ndècu-áⁿ nání-dě Diótrefés, te ñá sàndáá

iní-dé nchaa tnúhu càháⁿ-í, chi cuíní-dé cunuu-dě núú-yu.

¹⁰ Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñá díú-ní xǎⁿ quidé-dě, chi nchaa ñáyiu véxi ingá ñuú càháⁿ tnúhu Yá Ndiǒxí ñá túú càháⁿ ñáhá-dě vehe-dé, te ní ñá dáñá-dě càháⁿ ndìhi ñaha dàva-gá ñáyiu xii-yu. Te nchaa ñáyiu cuíní càháⁿ ndìhi ñaha xii-yu, te quèñuhu ñaha duuⁿ-ní-dé ñá dáñá-gǎ-dé níhí tnáhá-yu ndìhi nchaa ñáyiu tàcá dácúàha tnúhu Yá Ndiǒxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quidé nchaa dava-gá ñáyiu, cada-n mèe-ní sá váha. Chi nchaa ñáyiu quide váha ndécú-yu ichi Yá Ndiǒxí. Te nchaa ñáyiu quide nchaa sá cuèhé sá dúhá ñà túú ndécú-yu ichi Yá Ndiǒxí.

Nchaa ñáyiu càháⁿ váha-yu cuèndá té Demètriú

¹² Te nchaa ñáyiu càháⁿ váha-yu cuèndá té Demètriú, chi quide ndáá-dé dàtná càháⁿ Yá Ndiǒxí. Te tnahá yúhú càháⁿ-í cuèndá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndéé núú nǎ ndìhi-ná

¹³ Te vǎi-gá tnúhu cuíní-í cachí tnúhu-í xii-n ní cùu, dico ñá ní tèe-gá-í,

¹⁴ chi cuíní-í quixi ndìhi-í, te càháⁿ-ó núú núú-ó.

¹⁵ Te ío cada ndee iní, te xìcáⁿ táhù-í núú Yá Ndiǒxí sá ná cùndècu váha-n ñà túú nǎ cuu cundècu-n. Te nchaa cue ñáyiu xíní tnáhá ndìhi-o ndècu iha quide ndee iní ñáhá-yu xii-n. Te yòhó cúñaha-n nchaa ñáyiu xíní tnáhá ndìhi-í ndécú xǎⁿ ná càda ndee iní-yu. Te ío cada ndee iní-nǎ vitna.

TUTÚ NÍ CADÚHA TÉ JUDÁS

Té Jùdás càdúha-dé tutú quíhíⁿ ndaha ñáyiu ní cachí Yă Ndiöxí nduu cuendá-gá

¹ Yúhú té Jùdás ñaní té Jàcobó xínú cuèchi-í núú Xítóhó Jesucristú, te càdúha-í tutú-a sá cúú-xí nchòhó ñáyiu ní cachí Yă Ndiöxí Yaá cúú Tàtá-ó ndùu cuendá-gá, ñáyiu ío cùu iní-gá. Te dàtná-ni xító ñaha-gá xii-ndo vitna ñu-ni ducaⁿ còto ñaha-gá xii-ndo ndèé ná sàá nduu quíxi tucu Xítóhó Jesucristú ñuyíú-a.

² Te xicáⁿ táhù-í núú Yă Ndiöxí sá ïo-gá ná chindee chitúu ñaha-gă xii-ndo, te na cùtnuní-gá iní-ndó sã ïo cùu iní ñáhá-gă xii-ndo, te ducaⁿ ïo váha cuu iní-ndó cùndecu-ndo.

Ñáyiu ñá túú càháⁿ tnúhu ndáá tnúhu Yá Ndiöxí
(2 Pedro 2:1-17)

³ Te nchòhó ñáyiu ío cùu iní-í, ducaⁿ-ni ïo sàni iní-í cadúha-í ñⁿ tutú sá cúú-xí-ndó cuendá danèhé ñáhà-í xii-ndo nàcuáa ní cuu ní naníhí táhú-ó dico ñá túú càdúha-í, dico vitna quide cuendá-í sá xíní ñùhu-gá-xi cáháⁿ-í núú tütú-í sá nchòhó ío cundehe-ndo tnúhu cáháⁿ-ndó ndíhi ñáyiu, te cáháⁿ-ndó nàcuáa ndùu tnúhu sàndáá iní méé-ndó, chi ñu-ni tnúhu-áⁿ ñí cáháⁿ Yă Ndiöxí sá cúú-xí nchàa ñáyiu ndècu ichi-gá. Te vitna ñá túú-gă ná tnúhu càháⁿ-gá sá cúú-xí-yu, chi sa ní cáháⁿ duuⁿ-gá.

⁴ Te duha càháⁿ-í núú tütú-a sá cúú-xí-ndó, chi ñíhí-í tnúhu sá xicá cùu ñáyiu chìtnahá ñáhá xii-ndo, te ni ñà túú xíní-ndó ñá ñáyiu cùú-yu, te ñáyiu-áⁿ cúú-yu ñáyiu cùu úhú iní ñáhá xii Yă Ndiöxí. Te ñⁿ xichí núú tütú Yă Ndiöxí càchí-xi sá ñáyiu-áⁿ quíhíⁿ-yu núú ùhú núú ndàhú, te ñu-ni ñáyiu-áⁿ càchí-yu sá ïo váha iní Yă Ndiöxí nùu xíáⁿ cuu-ni cadá-yu nchaa sá cuèhé sá dúhá. Te dàquee tíhù-yu Yă Ndiöxí Yaá ío cùnuu, ndíhi Xítóhó Jesucristú.

⁵ Te nchòhó sa xíní váha-ndo nàcuáa ní quide Yă Ndiöxí ndèé sanaha dico dàndacu iní ñáhà-í xii-ndo, chi dàvá-áⁿ ñí queñuhu-gá ñáyiu isràèl nàcióⁿ Ègíptú, te

dava ñáyiu-áⁿ ñà túú ní sàndáá iní ñáhá-yu xii-gá te ní dánáá ñaha-gá xii-yu.

⁶ Te nchaa espíritú ñá túú ní cuíní cada ndáá cunu cuechi nùú Yă Ndiöxí ní quee-xi núú ndécú-xí, te mee-gă ní sadí nihnu ñaha-gă xii-xi ñⁿ xichí núú néé te vá cãcu-xi, chi sáá nduu te nayáha-xi cundecu-xi núú ùhú núú ndàhú ni caa ni quíhíⁿ.

⁷ Te dàndacu iní ñáhá tucu-í xii-ndo nàcuáa ní yáha ñáyiu ñuú Sòdomá, ndíhi ñáyiu ñuú Gòmorrá, ndíhi nchaa ñáyiu ñuú ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo cáháⁿ ndíhi tnàha ndi mee-güedé, te ñu-ni ducaⁿ ñí xóo cada cue ñáyiu ñíhí tucu. Te sá dúcáⁿ ñí quidé-yu núú ní dánhóyó Yă Ndiöxí ñuhú ñuú-yu ní dánáá ñaha-gá xii-yu. Te xíáⁿ cùtnuní iní-ó sã nchàa ñáyiu ñá túú cuíní cada váha núú-gă quíhíⁿ-yu núú ùhú núú ndàhú ni caa ni quíhíⁿ.

⁸ Te ñu-ni ducaⁿ quide ñáyiu chìtnahá ñáhá xii-ndo cuíní-yu dàndàhú ñáhá-yu, chi càchí-yu sá dácòto ñaha saní-yu nàcuáa cadá-yu, núu xíáⁿ nándi nchaa sá cuèhé sá dúhá quidé-yu sá cúú-xí yìqui cuñú-yu, te dàquee tíhù-yu nchaa nàcuáa càháⁿ Yă Ndiöxí cada-o, te càháⁿ úhú-yu cuendá nchaa espíritú cùnùu.

⁹ Te mee espíritú cùnùu-gá xínú cuèchi núú Yă Ndiöxí nání Mìguél ní nàá-xi ndíhi sácúíhná cuendá yìqui cuñú ndíi Moisés. Te espíritú-áⁿ ñà túú ní cùyí-xi cáháⁿ úhú-xi sácúíhná-áⁿ, chi ní xáhaⁿ-ni-xi: “Mee Yă Ndiöxí náhá-gă te nùu nása cada ñaha-gă xii-n”, duha ní xáhaⁿ-xi.

¹⁰ Te nchaa ñáyiu ducaⁿ dàndahú ñáhá xii-ndo-áⁿ càháⁿ cuèhé-yu cuendá nchaa sá vátá cùtnuní-gá iní-yu nása ndùu, te quidé-yu dàtná quidé cuè quiti chi cue quiti-áⁿ quidé-güedi nání véxi iní-güedi, te ni ñà túú cùtnuní iní-güedi nchaa sá quidé-güedi. Te ducaⁿ sà tnàhá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xíáⁿ tá xita nihnú-yu cuáháⁿ.

¹¹ ;Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidé-yu cuendá sá cuíní-yu díhúⁿ

dàtná ní xóo cada ndí Balaám. Te ío cùu sáá iní-yu núú Yá Ndiöxí dàtná ní xóo cada ndí Còré, núu xiáⁿ tá xíta nihnú-yu cuáháⁿ.

12 Te dicó sácáⁿnúú sáha ñáhá-yu xii-ndo òré nátácá-ndó quide-ndo vico chiñuhu-ndo Yá Ndiöxí. Te òré xéxí ndíhi ñáhá-yu xii-ndo te mee-ni sá cúu-xí mèe-yu quide cuendá-yu, te ñá túú nèhé-yu sá yíñuhu núú Yá Ndiöxí. Te cùu-yu dàtná ìⁿ vícò sá cuáháⁿ-xí duha cuáháⁿ-xí dàcáⁿ te ñá túú dáu nchídó-xí, ducaⁿ sá tnahá-xí cúu-yu. Te cùu tucú-yu dàtná ìⁿ yutnu vídí sá ñà túú tnahí cùuⁿ sávídí-xí, te nchaa yutnu ducaⁿ ñà túú cùuⁿ sávídí-xí te tnùhu-güedé ndéé yóho-xí te xíhí duuⁿ-xí. Te ducaⁿ sätnahá-xí cúu-yu, chi ñá túú quide váha-yu.

13 Te cùu tucú-yu dàtná ndute lámár, chi ndute-áⁿ òré càndá-xí te quecòo tíñú-xí ìⁿ xio. Te cùu tucú-yu dàtná ìⁿ chódíní cuáháⁿ-dì duha cuáháⁿ-dì dàcáⁿ. Te ducaⁿ sätnahá-xí cúu-yu, chi ñá túú cuíní-yu cada váha-yu. Te ñáyíu-áⁿ daquihíⁿ ñáhá Yá Ndiöxí xii-yu ìⁿ xichi núú néé núú sà ndecu túha cundecú-yu ni caa ni quihíⁿ.

14 Te ndíquíⁿ yává ndí Ádán téé cùu usá ní xínani Ènóc ní dácáhú iní ñáhá Yá Ndiöxí xii-dé ní cáháⁿ-dé ñu-ni cuendá nchaa ñáyíu-áⁿ. Te ní cachí-dé: “Na càhí tnúhu-í xii-ndo sá Yá Ndiöxí quixi-gá ndíhi cuéhé víhí espíritú xínú cuèchi núú-gá.

15 Te dàvá-áⁿ cada ndáá-gá cuèchi nchaa ñáyíu te daquihíⁿ-gá nchaa ñáyíu ndècu ichi cuéhé ichi duha núú ùhú núú ndàhú, te ducaⁿ càda ñaha-gá xii-yu, chi mee-ni sá cuéhé sá dúhá quidé-yu, te càháⁿ úhú ñáhá-yu xii-gá”, duha ní cachí te Ènóc.

16 Te ñáyíu-áⁿ ìo yica iní-yu chi ñá túú ndùu vétú iní-yu nàcuáa ndècú-yu ñuyíu-a, te sätnuhú-yu tnàha ñáyíu-yu te mee-ni sá cuéhé sá dúhá sàni iní-yu quidé-yu, te quide cahnú-yu mèe-yu, te mee-ni càháⁿ váha-yu núú tnàha ñáyíu-yu cuendá cuíní-yu sá cáda váha ñaha ñáyíu-áⁿ xii-yu.

Té Judás càháⁿ-dé dóho ñáyíu ndècu ichi Yá Ndiöxí

17 Te nchòhó ñáyíu ío cùu iní-í, càháⁿ ndàhú-í núú-ndó sá ìo cuhuⁿ iní-ndó tnùhu sá sá ní dánèhé ñáhá cuè téé ní tendaha Xítohó Jesucristú càháⁿ tnúhu-gá núú ñáyíu.

18 Te sa nàha-ndo sá ñí cachí-güedé sá cùmání-gá quixi tucu Xítohó Jesucristú ñuyíu-a, te coo ñáyíu cáháⁿ cuéhé cáháⁿ duha cuendá tnúhu-gá. Te ñáyíu-áⁿ cadá-yu mee-ni sá cuéhé sá dúhá vèxi iní mèe-yu.

19 Te ñáyíu-áⁿ cúu-yu ñáyíu càháⁿ nándi tnúhu sá ñà túú nándíhi cuendá sá vã cúú ìⁿnuu-ndo cundecu-ndo, te mee-ni sá cuéhé sá dúhá ñùhu iní-yu, te ñá túú ndècu ndíhi-yu Espíritú Yá Ndiöxí.

20 Te nchòhó ñáyíu ío cùu iní-í, ío dacuàha-ndo tnúhu Yá Ndiöxí sá ñí sándáá iní-ndó cuendá ducaⁿ cuíta cuehnu ni-hnu-ndo ichi-gá quihíⁿ, te cáháⁿ ndíhi-ndo Yá Ndiöxí nàcuáa dàcahu iní ñáhá Espíritú-gá xii-ndo.

21 Te ío coto-ndo mèe-ndo cundecu-ndo cuendá cuu váha iní ñáhá Yá Ndiöxí xii-ndo, te cundetú-ndo sáá nduu quixi Xítohó Jesucristú ñuyíu-a nacuaca ñaha-gá xii-ndo cundecu-ndo ndíhi-gá ni caa ni quihíⁿ, chi Yaá-áⁿ ìo cundahú iní ñáhá-gá xii-o.

22 Te ñáyíu sàni ìⁿ sani úú iní-xi cúñaha-ndo xii-yu nàcuáa cadá-yu cundecú-yu ichi Yá Ndiöxí.

23 Te nchaa ñáyíu ta xíta nihnu ñùhu ichi cuáháⁿ núú ùhú núú ndàhú, ío cundíhi iní-ndó cúñaha-ndo xii-yu tnúhu Yá Ndiöxí cuendá sá ná càcu nihnú-yu, te cundàhú iní-ndó-yu, te quihí iní-ndó vã cáda-ndó tnàhá-ndó nàcuáa quidé-yu, chi daquèe tíhú-ndó nchaa sá cuéhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiöxí

24 Te Yá Ndiöxí chindee ñàha-gá xii-ndo cuendá sá vã cundècu-ndo ichi cuéhé ichi duha, te cunduu ndoo cunduu nine iní-ndó càndeca ñaha-gá xii-ndo quihíⁿ cundecu-ndo núú ìo váha càa ndecu-gá, te ío cudíí iní-ndó.

25 Te Yá Ndiöxí ío ndècu ndíhi-gá nchaa sá xíní tnùní-gá te ñu-gá ní dácàcu nihnu ñaha-gá xii-o núú ùhú núú ndàhú, te ducaⁿ ñí quide ñaha-gá xii-o chi ndècu ndíhi-o Xítohó Jesucristú. Te ío ndacáⁿ táhú-ó núú Yá Ndiöxí, chi ío càhnu cuu-gá ndècú-gá táxí tnùní-gá, te súúní váha iní-gá, te ndàcu-gá quidé-gá nchaa sá váha, te ducaⁿ-ni ìo càhnu cuu-gá ndéé cùnàhá vátá ngáva-gá ñuyíu,

te ducaⁿ-ni ǎ cǎhnu cuu-gá ndéé vitna,
te dǎu-ni ducaⁿ ǎ cǎhnu cuu-gá ni caa ni
quíhíⁿ, duha xìni ñuhu-xi ndacáⁿ táhú-ó
nǎú-gǎ. Te ducaⁿ na cùnduu. Te ío chí cádá
ndèe iní-nǎ vitna.

NCHAA SÁ NĬ XINÍ TĒ JUÁÁ NDIHI NCHAA SÁ NĬ TECÚ DÓHO-DÉ

Xítohó Jesucristú xáhaⁿ-gă xii té Juáá nchaa nàcuáa cada-xi ñuyúú

¹ Te Yá Ndiöxí ní xáhaⁿ-gă xii Xítohó Jesucristú nchaa sá tá cùyatni vií-nă cada-xi ñuyúú-a cuendá sá cùñaha-gă xii cue tée xínu cuechi núú-gă, te Xítohó Jesucristú ní tendaha-gă ìⁿ espíritú xínu cuèchi núú-gă ní quixi-xi ní cachí tnúhu-xi nchaa tnúhu-áⁿ xii yúhú té Juáá tée xínu cuechi núú-gă, te nchaa tnúhu-áⁿ ndéé núú tütú-a.

² Te yúhú cächí tnúhu ndáá-í xii-ndo nàcuáa ní cáháⁿ Yă Ndiöxí, te cäháⁿ ndáá tucu-í cuendá Xítohó Jesucristú, ndihi cuendá nchaa sá nĬ xiní-í.

³ Te váha táhú ñáyiú dăcuaha nchaa tnúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tnĭ năcuáa cäháⁿ-xi, chi sa ta cùyatni vií-nă nduu cãda-xi nchaa năcuáa cäháⁿ-xi.

Té Juáá cãdũha-dé tutú quíhíⁿ ndaha ndi ùsá xichi cue ñáyiú ndècu ichi Yá Ndiöxí

⁴ Te yúhú té Juáá cãdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú dĭstrítú Àsiá. Te mee-gă ná chĭndee chitúu ñaha-gă xii-ndo, te ío váha cuu iní-ndó cùndecu-ndo. Te cuèi ndéé sanaha ñu-í-gă ndécú, te ñu-í-gă ndécú cuèi vitna, te ducaⁿ-ni cùndecu-gă cuèi ndéé núú cuáháⁿ núú vĕxi, te ñu-í-gă ducaⁿ ño na chĭndee chitúu ñaha ndi ùsá cue espíritú ndécú ñúú-gă xii-ndo, te ío váha cuu iní-ndó cùndecu-ndo.

⁵ Te ñu-í-gă ducaⁿ na cãda tucu Xítohó Jesucristú, te ñu-í-gă cúú-gă Yá cäháⁿ ndáá, te ñu-í-gă ní xihí-gă te díhna-gă ní ndoto, te dătnùní ndéé cuèe-gă te ndoto cue ñáyiú ní xihí, te ñu-í-gă táxí tnùnĭ-gă nchaa cue tée yĭndaha ñaha xii ñáyiú ndècu ñuyúú-a. Te ío cùu iní ñáhá-gă xii-o, te mee-gă ní sati níñĭ-gă te ní xihí-gă núú cùrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gă iní-ó,

⁶ te vitna ní quide ñaha-gă xii-o dătná cue tée yĭndaha ñáyiú, te ní quide ñaha tucu-gă xii-o dătná cue dútú xínu cuèchi-o núú Tătá-gă Dútú Ndiöxí. Te vitna nchaa-o chí ná cächí-ó sã ño cãhnu cuu Xítohó Jesucristú, te ío cùnuu-gă, te ducaⁿ-ni na cùnuu-gă ni caa ni quíhíⁿ. Te ducaⁿ na cùnduu.

⁷ ¡Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiú ndècu ñuyúú-a quini ñáhă-yu xii-gă, te tnàhá nchaa ñáyiú ìⁿ-ni cùu ndihi ñáyiú ní dănícuèhé ñáhá xii-gă quini ñáhă-yu, te nchaa ñáyiú xĭndecu nihi ñuyúú, ñáyiú ñá túú cùu váha iní ñáhá xii-gă ndihú iní-yu òré quini ñáhă-yu xii-gă, te ndáá sá dúcáⁿ cãda-xi.

⁸ Te Yá Ndiöxí cächí-gă: “Yúhú ío cùnuu-í chi ñu-í sa ndècu ndéé cùtnàhá ní ngáva ñuyúú, te ñu-í-í cundecu ndéé ná sã nduu năa-xi ndihi nchaa sá ío, chi yúhú cundecu-í ni caa ni quíhíⁿ”, duha cächí Yă Ndiöxí Yá ndácú quide nchaandi túhú sá váha. Chi ñu-í-gă sa ndècu ndéé cùtnàhá ní ngáva ñuyúú, te ñu-í-gă ndécú-gă vitna, te ducaⁿ-ni cùndecu-gă ni caa ni quíhíⁿ.

Té Juáá ní xiní-dé Xítohó Jesucristú Yá ío cùnuu

⁹ Te yúhú té Juáá tée ndècu ndihi-ndo ichi Xítohó Jesucristú, tnàhá-í ndòhò-í cuendá-gă dătná ndòhò-ndó, te tnàhá-í nduu táhú-í cundecu ndihi ñaha-í xii-ndo núú ndécú Yă Ndiöxí táxí tnùnĭ-gă. Te ío quide cãhnu iní-ó cuèi năndi yáha-o ndècu-o sá cuendá Xítohó Jesucristú. Te yúhú ní ngava-í vecaá ìⁿ ñuú nánĭ Pătmós, te ñuú-áⁿ cáá xití ndute lámár. Te ducaⁿ ñi cuu cuendá sá cäháⁿ-í tnúhu Yá Ndiöxí, te cäháⁿ váha-í cuendá Xítohó Jesucristú.

¹⁰ Te ìⁿ nduu ndumĭngú nduu nàtacá-ó chĭñuhu-o Yá Ndiöxí ní quide ñaha Espíritú-gă xii-í năcuáa cächí iní-xi, te ní tecú dóho-í níhi ní cáháⁿ ìⁿ sá ñi cáháⁿ ndăa sãtã-í te dătná níhi cäháⁿ ìⁿ cútú ducaⁿ níhi ní cáháⁿ-xi.

¹¹ Te cächí sá cäháⁿ-áⁿ:

—Yúhú sa ndècu-í ndéé cùtnàhá ní ngáva ñuyúú, te ñu-í-í cundecu-í ndéé ná sã nduu năa-xi ndihi nchaa sá ío, te chido tnùnĭ-n ìⁿ núú tütú sá ná dănehé núú ñáhă-í xii-n, te daquihíⁿ-n tütú-áⁿ ndi ùsá

xichi núú xĩndecu cue ñáyiú ndècu ichi Yá Ndiõxí xĩndecu distritú Àsiá, ndaha ñáyiú ñuú Éfesú, ndaha ñáyiú ñuú Èsmirná, ndaha ñáyiú ñuú Përgamú, ndaha ñáyiú ñuú Tiàtirá, ndaha ñáyiú ñuú Sãrdís, ndaha ñáyiú ñuú Filàdelfiá, ndaha ñáyiú ñuú Laodiceá, nchaa ñáyiú ñuú-án daquihín-tútú-án ndahá-yu —càchí sá càhá-án.

12 Te ní nchócuñhu-í ndéhè-í nõu ná cúú sã càhá-án, te ní xiní-í xĩnutñi úsá tnàhá sá ñi cuáha mee-ni dĩhúⁿ cuàáⁿ sá ndèè dité-xi, te núú dité-xi-án yĩndodo ñi caa candíl.

13 Te cuádava tnuú nchaa xiáⁿ ní xiní-í nútni Yaa cáá dàtná cáá nchaa nchoo ñáyiú ndècu ñuyú-a, te ñihnu-gá ñi dóó cáni càa-xi ndéé núú sàhá-gá, te yidúcunnu ñi sìnchú ní cuáha mee-ni dĩhúⁿ cuàáⁿ pèchú-gá.

14 Te idi díquí-gã cuixín quiyí dàtná cuixín idi dava mbéé, àdi yúhá sã quée òré quidé vixi-xi, te tinùu-gá quidé-xi dàtná quidé-xi òré sàá itá ñuhú.

15 Te sàhá-gã súúni dàtása-xi dàtná dàtása sá nání bròncé òré càyú-xi ducaⁿ dàtása-xi sàhá-gã, te dõndaha tñuhu càháⁿ-gá quidé-xi dàtná quidé-xi dõndaha titní víhí yũte.

16 Te xio ndaha cùha-gá núndàha-gá úsá tnàhá chódíní, te mei yùhu-gá quéné ñi yuchí cáhnú ndèè úú xio núú-xi, te núú-gã quidé-xi dàtná quidé-xi nõú nchĩcanchii òré súúni ngòyo cahni.

17 Te sá dúcáⁿ càa Yaa-án ñi xiní-í nõu xiáⁿ ní yùhú-í ní nduá-í núú-gã, te ní cuu-í dàtná ñi tée ní xihí sá dúcáⁿ ño ní yùhú-í, dico mee-gã ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñi-ni yùhú sa ndècu-í ndéé cùtnàhá ní ngáva ñuyú, te ñi-ni yùhú cundecu-í ndéé ná sàá nduu nàa-xi ñihni nchaa sá ño.

18 Te yùhú cúú-í Yaa ní xihí te ní ndoto-í, te vitna ndècu vívù-í, te ducaⁿ-ni cundecu-í ñi caa ñi quihín. Te yùhú cùnùu-í núú nchaa ñáyiú ní xihí te ñi-ni-í cùnùu-í núú ndécũ-yu.

19 Te chido tñuní-n nchaa sá ñi xiní-n-án ñi núú tütú, ñihni nchaa nàcuáa cùu vitna, ñihni nchaa sá cádá-xi ndèè núú cuáháⁿ núú vèxi-gá.

20 Te na càchí tñuhu-í xii-n nàcuáa quèe-xi ñi usá chódíní ñi xiní-n yòtni-í xio ndaha cùha-í, ñihni nàcuáa quèe-xi ñi usá sá ñi cuáha mee-ni dĩhúⁿ cuàáⁿ, sá ndèè dité-xi te yĩndodo ñi caa candíl núú dité-xi-án. Te ñi usá chódíní-án, xiáⁿ cúú-xi sã cùtnuní iní-ó sã ndécú úsá cue tée xinu cuechi núú Yá Ndiõxí, te ñi usá cue tée-án ndécú-güedé ñi usá xichi núú ndécú ñáyiú ndècu ichi Yá Ndiõxí. Te cuendá ñi usá sá ndèè dité-xi-án, xiáⁿ cúú-xi sã cùtnuní iní-ó sã ndécú úsá xichi ñáyiú ndècu ichi Yá Ndiõxí —duha càchí Yaa càhá-án.

2

Tñuhu sá cúú-xi ñáyiú xĩndecu ichi Yá Ndiõxí ndécú ñuú Éfesú

1 Te ní cachí tucu Yaa càháⁿ-án xii-í sá chídó tñuní-í nchaa tñuhu sá vítná càháⁿ-gá ñi núú tütú, te tendaha-í quihín ndaha tée xinu cuechi núú Yá Ndiõxí ndécú ñuú Éfesú sá cúú-xi cue ñáyiú xĩndecu ichi-gá ndécú ñuú-án, te duha ní cachí-gá: “Yùhú cúú-í Yaa núndàha úsá chódíní xio ndaha cùha-í, te xica cuu-í núú ndécú ñi usá sá ñi cuáha mee-ni dĩhúⁿ cuàáⁿ, sá ndèè dité-xi te yĩndodo ñi caa candíl núú dité-xi.

2 Te yùhú xiní-í nchaa nàcuáa quide nchohó ñáyiú xĩndecu ichi Yá Ndiõxí ndécú ñuú Éfesú, te xiní-í sá ño ndècu ndee-ndo quide chiuⁿ-ndo cuendá-gá, te ño quide cahnu iní-ndó ndècu-ndo quide-ndo chiuⁿ-gá. Te xiní-í sá ña túú tnàhí tnàhá iní-ndó nàcuáa quide nchaa ñáyiú ndècu ichi cuehé ichi duha. Te xiní tucu-í sá xító ndéè-ndó cue tée càchí sá ñi tendaha-í véxi càháⁿ tñuhu-í te ña ndaa sá càháⁿ-güedé tñuhu-í, te ducaⁿ te cùtnuní iní-ndó sã ña ndaa sá càháⁿ-güedé tñuhu-í.

3 Te xiní tucu-í sá ño ndòho-ndo quide-ndo chiuⁿ cuendá-í, te ducaⁿ ño quide cahnu iní-ndó cuèi nándi yàha-ndo, te ña túú cùu dusaⁿ-ndo quide-ndo chiuⁿ-án.

4 Dico ña túú cùu váha iní-í chi nchòhó ña túú-gã quidé-ndó dàtná ní xóo cada-ndo cùtnàhá vitna cùu vii-ni ní sándáá iní ñahá-ndó xii-í, chi vitna ña túú-gã cúú iní ñahá vèhi-ndo datná ní xóo cada-ndo dàvá-án.

5 Te chí dándacu iní nàcuáa ní xóo cada-ndo cùtnàhá vitna cùu saa ní sándáá iní ñahá-ndó xii-í, te ndixi cuéchi iní-ndó sã

ñà túú-gã quidé vâha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndíhi-ndo ìñ sã ñi cuáha mee-ni díhúⁿ cuááⁿ, sã ndéé dité-xi te yìndodo ìñ caa candíl núú dité-xi. Te núú vá ndíxí cuèchi iní-ndó nàcuáa quide-ndo ndecu-ndo ña, te quixi-í xocàni-í xíáⁿ, te ducaⁿ sãtnahá-xi cada ñaha-í xii-ndo te núú vá ndíxí cuèchi iní-ndó nàcuáa quide-ndo ndecu-ndo, te ducaⁿ te vá yõo-gá nàtacá chiñuhu ñaha xii-í ñuú-ndó.

⁶ Dico quide váha-ndo ìñ xichi chi dàquee tíhú-ndó nchàa sã quidé cuè ñáyiu cùu nicolaitás, te yúhú tnàhá-í dáquèe tíhú-í nchaa sã quidé ñáyiu-áⁿ.

⁷ Te nchòhó cada cuendá váha-ndo nàcuáa xãhaⁿ-í xii Espíritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cúñaha-n xii nchaa ñáyiu sã núu na càda ndee iní-yu yáha-yu nándi sã ná yãha-yu sã cuendá-í, te yúhú cada-í te nduu táhú-yu cundecu váha-yu núú ndécú Yã Ndiõxí, duha xãhaⁿ-í xii Espíritú-gá cúu-xi ñáyiu”, duha càchí Yaá càháⁿ-áⁿ. Te nchaa tnúhu-áⁿ ñi chídó tnùn-í sã cúu-xi ñáyiu xĩndecu ichi Yã Ndiõxí ndécú ñuú Éfesú.

Tnúhu sã cúu-xi ñáyiu xĩndecu ichi Yã Ndiõxí ndécú ñuú Èsmirná

⁸ Te ní cachí tucu Yaá càháⁿ-áⁿ xii-í sã chídó tnùn-í nchaa tnúhu sã vítná càháⁿ-gá ìñ núú tütú, te tendaha-í quíhíⁿ ndaha tée xĩnu cuechi núú Yã Ndiõxí ndécú ñuú Èsmirná sã cúu-xi cuè ñáyiu xĩndecu ichi-gá ndécú ñuú-áⁿ, te duha càchí-gá: “Yúhú ndécú-í ndéé cútñahá ní ngáva ñuyíú, te díu-ni-í cundecu-í ndéé ná sãá nduu nàa-xi ndíhi nchaa sã íó, te díu-ni-í ní xíhí te ní ndoto-í ndécú-í vitna.

⁹ Te yúhú xini-í nchaa nàcuáa quide nchohó ñáyiu ndècu ichi Yã Ndiõxí ndécú ñuú Èsmirná. Te xini-í sã ïo ndòho-ndo ndecu-ndo sã cuendá-í, te xini tucu-í sã ïo ndàhú-ndó dico cùu-ndo ñáyiu xĩndecu váha núú Yã Ndiõxí. Te xini tucu-í sã ïo càháⁿ cuèhé ñáyiu israél cuendá-ndó, dico ñá túú quidé-yu nàcuáa tàú-yu cadá-yu sã cúu-yu ñáyiu israél, chi cùu-yu ñáyiu xĩnu cuechi mee-ni núú sàcuíhná.

¹⁰ Dico nchòhó vá yúhú-ndó cuèi nándi cùu nchaa sã ná ndòho-ndo cuendá-í, chi sàcuíhná cada-xi te ngava dava-ndo vècaá, te ducaⁿ càda-xi chi cuini-xi coto ndeé ñáhá-xi xii-ndo núu ndisa sã vã ná túhú iní-ndó sã nchicúⁿ nihnu-ndo ichi Yã Ndiõxí. Te ndòho-ndo úxí nduu dico vá dáñá ndéé-ndó cànchicúⁿ nihnu-ni-ndo ichi-gá cuèi na cùu-ndó sã cuendá-gá, te yúhú cada-í te nduu táhú-ndó cundecu-ndo ndíhi-gá ni caa ni quíhíⁿ.

¹¹ Te nchaa nchòhó cada cuendá váha-ndo nàcuáa xãhaⁿ-í xii Espíritú Yã Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi, te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cúñaha-n xii nchaa ñáyiu sã núu na cundee iní-yu yáha-yu nándi sã ná yãha-yu sã cuendá-í te vá cuíta nihnú-yu na sãá nduu cuíta nihnu nchaa dava-gá ñáyiu, duha xãhaⁿ-í xii Espíritú-gá cúu-xi ñáyiu”, duha ní cachí Yaá càháⁿ-áⁿ. Te nchaa tnúhu-áⁿ ñi chídó tnùn-í sã cúu-xi ñáyiu xĩndecu ichi Yã Ndiõxí ndécú ñuú Èsmirná.

Tnúhu sã cúu-xi ñáyiu xĩndecu ichi Yã Ndiõxí ndécú ñuú Pèrgamú

¹² Te ní cachí tucu Yaá càháⁿ-áⁿ xii-í sã chídó tnùn-í nchaa tnúhu sã vítná càháⁿ-gá ìñ núú tütú, te tendaha-í quíhíⁿ ndaha tée xĩnu cuechi núú Yã Ndiõxí ndécú ñuú Pèrgamú sã cúu-xi cuè ñáyiu xĩndecu ichi-gá ndécú ñuú-áⁿ, te duha càchí-gá: “Yúhú cùu-í Yaá néhé ìñ yuchí cáni te ndéé úu xio núu-xi.

¹³ Te yúhú xini-í nchaa nàcuáa quide nchohó cue ñáyiu xĩndecu ichi Yã Ndiõxí ndécú ñuú Pèrgamú, te xini tucu-í sã ndécú-ndó núú ïo cùnuu yucu ñávãha, te ñá túú dàña ndeé-ndó nchicúⁿ nihnu-ndo ichi-í, te ducaⁿ ïo sàndáá iní ñáhá-ni-ndó xii-í, te díu-ni ducaⁿ ñi quide-ndo cútñahá ní sahani-güedé té Àntipás núú ndécú-ndó díu-ni núú dúcáⁿ ïo cùnuu yucu ñávãha. Te ndí-áⁿ ñi quide ndáá ndí ní xĩndecu ndíi ichi-í chi ní càháⁿ váha ndíi cuendá-í.

¹⁴ Dico ñá túú cùu váha iní-í cuendá ìñ úú sã quidé-ndó, chi ndècu ndíhi-ndo ñáyiu nchicúⁿ nihnu-ni nchaa nàcuáa ní càháⁿ ndíi Bàlaám. Chi ndí-áⁿ ñá túú ní quide váha ndíi chi ní dácáhú ìní ndíi ìngá tée ní xĩnani Bàlác nàcuáa cada-dé canu ichi-dé cue ñáyiu israél ìngá ichi sã ñá túú váha,

chi ní xáhaⁿ tẽ Bàlác-áⁿ xií-yu sá caxí-yu nchaa sá ndúú tǎhú nchaa sá nǐ cadúha cue tée ñuyíú-a dānani ñáyíu ndiǒxí te ñá ndàá sá ndiǒxí cúú-xí, te ní dácáhú ìní ñáhá-dẽ xií-yu sá cùndécú-yu ichi díí ìní.

15 Te ndècu ndihì tucu-ndo ñáyíu nchìcúⁿ nihnu sá dácuaⁿha cue ñáyíu cùu nicolaitás. Te nchaa sá dácuaⁿha ñáyíu-áⁿ dáquèe tíhù-í,

16 te nchòhó chí dándìxi cuéchi ìní sá ñà túú quide váha-ndo ndècu-ndo, chi núu ñáhá te quixi-í nàá-í ndihì cue ñáyíu-áⁿ ndihì yuchí cání sǎ quéné yùhu-í.

17 Te nchaa nchòhó cada cuèndá váha-ndo nàcuáa xǎhaⁿ-í xii Espíritú Yá Ndiǒxí xǎhaⁿ-xi xii cue ñáyíu ndècu ichi-gá xǐndecu nchaa xichi. Te duha ndùu tnúhu xǎhaⁿ-í xii Espíritú-gá xǎhaⁿ-xi xií-yu: Cúñaha-n xii nchaa ñáyíu sá núu na càda ndee ìní-yu yáha-yu nándi sá ná yáha-yu sá cuèndá-í, te yúhú cuáñaha-í sá ndúú yùhu xií-yu caxí-yu ñⁿ sá vǎtá quìní-gá-yu caxí-yu. Te xǎn cúú-xí mànáá sá nǐ xóo caxi cue ñáyíu ní xǐndecu ndéé sanaha, te cuáñaha tucu-í ñⁿ caa yúú cuìxíⁿ xií-yu, te núu yúú-ǎⁿ cundeé ñⁿ òu saa. Te òu-áⁿ vǎ yóo tnàhí xìní chi ñⁿdì díí-ni ñáyíu na quèheⁿ cuèndá òu-áⁿ quìní-yu, duha xǎhaⁿ-í xii Espíritú-gá cúú-xi ñáyíu”, duha càchí Yá cáhàⁿ-áⁿ. Te nchaa tnúhu-áⁿ nǐ chídó tnùn-í sá cúú-xí ñáyíu xǐndecu ichi Yá Ndiǒxí ndécú ñùú Pèrgamú.

Tnúhu sá cúú-xí cuè ñáyíu xǐndecu ichi Yá Ndiǒxí ndécú ñùú Tiàtirá

18 Te ní cachí tucu Yá cáhàⁿ-áⁿ xii-í sá chídó tnùn-í nchaa tnúhu sá vítná cáhàⁿ-gá ñⁿ núu tütú, te tendaha-í quíhíⁿ ndaha tée xínu cuechi núú Yá Ndiǒxí ndécú ñùú Tiàtirá sá cúú-xí cuè ñáyíu xǐndecu ichi-gá ndécú ñùú-áⁿ, te duha càchí-gá: “Yúhú cúú-í Déhe Yá Ndiǒxí, te càa tñuu-í dàtná cáá itá ñuhú, te sáhà-í cáá dàtná cáá sǎ nání bròncé òré ñuhú-xí núú ñuhú càyú-xi.

19 Te yúhú xìn-í nchaa nàcuáa quide nchòhó ñáyíu xǐndecu ichi Yá Ndiǒxí ndécú ñùú Tiàtirá. Te xìn-í tucu-í sá òo cùu ìní-ndó Yá Ndiǒxí te sàndáá ìní-ndó-gǎ. Te xìn-í tucu-í nàcuáa ndùu chiuⁿ quide-ndo sá cúú-xí-gǎ. Te xìn-í tucu-í sá òo quide cahnu ìní-ndó cuèi nándi cùu sá yáha-ndo ndècu-ndo. Te xìn-í tucu-í sá òo-gá ndúcú ndèe-ndo quide váha-ndo vitna dacúxí

cùtnàhá vitna cùu saa ní sàndáá ìní-ndó Yá Ndiǒxí.

20 Dico ñá túú cùu váha ìní-í cuèndá ñⁿ sá quidé-ndó, chi ñá túú tnàhí ná sání ìní-ndó ndècu ndihì-ni-ndo ñáyíu nchìcúⁿ nihnu nchaa nàcuáa dānehé ñáhá ñàha nani Jezabél. Te ñaha-áⁿ càchí-áⁿ sá cáhàⁿ-áⁿ tnúhu Yá Ndiǒxí dico ñá ndàá sá cáhàⁿ-áⁿ tnúhu-gá, te cuáhàⁿ-áⁿ dāndahú-áⁿ nchaa ñáyíu xínu cuechi núú-í ndihì nchaa sá dānehé ñáhá-áⁿ cuèndá cundecú-yu ichi díí ìní, te caxí-yu nchaa sá ndúú tǎhú nchaa sá nǐ cadúha cue tée ñuyíú-a dānani ñáyíu ndiǒxí te ñá ndàá sá ndiǒxí cúú nchaa xǎn.

21 Te ní cuu vǎi nduu ta dacaca-í ndécú-áⁿ cuèndá ndixi cuéchi ìní-áⁿ sá ñà túú quide váha-áⁿ ndècu-áⁿ, te cuèi ducaⁿ quide-í dico ñá túú cuìní-áⁿ dañ-aⁿ nǐ ñⁿ sá cuèhé sá dúhá quide-áⁿ.

22 Te vitna yúhú òo dandòho-í-áⁿ chi tñi ñaha cuèhé xii-áⁿ, te òu-ni ducaⁿ òo dandòho-í nchaa ñáyíu quide datná quidé-áⁿ te núu vá ndíxí cuèchi ìní-yu sá ñà túú quide váha-yu ndécú-yu, te dàñá-yu nchaa sá cuèhé sá dúhá quidé-yu.

23 Te nchaa ñáyíu cùndihì ñaha xii ñaha-áⁿ cahni-í-yu, te ducaⁿ te nchòhó ndihì dava-gá nchaa ñáyíu xǐndecu ichi Yá Ndiǒxí ndécú nchaa xichi cutnuní ìní-ndó ndihì-yu sá yúhú cúú-í Yá xìn-í ndáá nchaa nàcuáa sàni ìní ñáyíu, ndihì nchaa nàcuáa quide-xi ìní-yu. Te nchòhó nàcuáa ndùu sá quidé-ndó ñⁿ ñⁿ-ndo te ducaⁿ cùnduu sá táxi-í nduu táhú-ndó.

24 Te dava nchòhó ñáyíu ndècu ñuu Tiàtirá, ñáyíu ñá túú nchìcúⁿ nihnu nàcuáa dānehé ñáhá ñàha nani Jezabél-áⁿ ñà túú xìn-í-ndó nǎ cúú sǎ càchí ñáyíu ndùu yuhu dacahu ìní ñáhá yùcu ñávàha. Te nchòhó, ñá túú nǎgá cachí tnúhu-í xii-ndo càda-ndo

25 òu-ná sá òo nducu ndèe-ndo cada-ndo nchaa nàcuáa cáhàⁿ tnúhu sá ndécú ndihì-ndo, te ducaⁿ-ni càda-ndo ndéé òré quixi tucu-í.

26 Te nchaa nchòhó ñáyíu na càda ndee ìní yáha nándi sá ná yáha sá cuèndá-í, te núu na càda-ni-ndo nchaa nàcuáa cuìní-í cada-ndo ndéé nduu vǎ cùndecu-gá-ndó ñuyíú-a, te yúhú taxi-í tnúhu ndee ìní xii-ndo sǎ táxi tnùn-í-ndó nchaa ñáyíu ñuyíú

27 dàtná ní quide mee Tǎtà-í Dútú Ndiǒxí ní taxi-gá tnúhu ndee ìní ndécú ndihì-í,

te ducaⁿ càda ñaha-í xii-ndo tàxi-í tnúhu ndee iní xii-ndo cuendá ío taxi tnùn-í-ndó, te cada iní-ndó sã cáda-ndó cuè ñáyiú dàtná quidé-xí ñⁿ quídi òré tãhú-xi càchi duuⁿ-xi, te ducaⁿ chi nchòhó cada-ndo sã ncháá ñáyiú ñá túú quide váha cuíta nihnú-yu.

28 Te cada iní-ndó sã dàtná dáyèhé chódíní quiti quène oré sa ta tũndaá-nã cuáháⁿ ducaⁿ càda-xi oré ná sãá nduu ngũita-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndihi ñaha-ndo xii-í núú ío váha càa ndecu-í.

29 Te nchaa nchòhó cada cuendá váha-ndo nàcuáa xãhaⁿ-í xii Espíritú Yá Ndiòxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñi chídó tnùn-í-í sá cúú-xí ñáyiú xĩndecu ichi Yá Ndiòxí ndécú ñúú Tiàtirá.

3

Tnúhu sá cúú-xí ñáyiú xĩndecu ichi Yá Ndiòxí ndécú ñúú Sãrdís

1 Te ní cachí tucu Yaá càháⁿ-áⁿ xii-í sá chídó tnùn-í-í nchaa tnúhu sá vítná càháⁿ-gá ñⁿ núú tùtú, te tendaha-í quíhíⁿ ndaha téé xĩnu cuechi núú Yá Ndiòxí ndécú ñúú Sãrdís sá cúú-xí cuè ñáyiú xĩndecu ichi-gá ndécú ñúú-áⁿ te duha càchí-gá: “Yúhú cúú-í Yaá ndécú ndihi ndi usá espíritú cúú cuendá Yá Ndiòxí, te diu-ni-í cúú-í Yaá ndécú ndihi ndi usá chódíní. Te yúhú xìn-í-í nchaa nàcuáa quide nchòhó ñáyiú xĩndecu ichi Yá Ndiòxí ndécú ñúú Sãrdís, te xìn-í-í sá cúú-ndó dàtná ñáyiú ní xihí cuèi càchí ñáyiú sá ñãhá.

2 Te chí cuãha cuendá nàcuáa quide-ndo ndecu-ndo vitna, te nducu ndèe-ndo cada-ndo ñⁿ úú-gá nchaa sá váha nchicúⁿ nihnu-ndo vitna, chi sa ndètu vií-nã dañã-ndo nchãa-ndi túhú sá váha quide-ndo ni cuu, te quide cuendá-í sá ñã túú quide-ndo nchaa nàcuáa cuíni Yá Ndiòxí cada-ndo.

3 Te chí dándacu iní nàcuáa càháⁿ tnúhu sá ñi xĩndého-ndo cùtnãhá ní tuha-ndo ichi Yá Ndiòxí, te canchicúⁿ nihnu-ndo càda-ndo nàcuáa càháⁿ tnúhu-áⁿ, te ndixi cuèchi iní-ndó sã ñã túú quide váha-ndo ndècu-ndo, te núu vá nàcuãha-ndo cuendá nàcuáa quide-ndo ndecu-ndo ñã, te cada-í dàtná quidé ñãdúhú, chi òré ñã túú ñã yíhí iní-ndó quèxio-í núú ndécú-ndó.

4 Dico ndècu ndihi-ndo ñⁿ úú ñáyiú càndoo caa nine iní-xi, chi ñáyiú-áⁿ ñi nduu táhú-yu cuihnú-yu dóó cuixíⁿ cuendá cundecu ndihi-í-yu, te ducaⁿ chi cùdú-yu núú-í.

5 Te nchaa ñáyiú na càda ndee iní-xi yáha nándi sá ná yãha sá cuendá-í, te ñáyiú-áⁿ nduu táhú-yu cuihnú-yu dóó cuixíⁿ, te vá náquète-í diú-yu núú tùtú núú yódó tnùn-í cue ñáyiú ní nduu táhú cundecu ndihi-í ñi caa ñi quíhíⁿ, te cúñaha-í xii Tãtà-í Dútú Ndiòxí ndihi cue espíritú xínú cuèchi núú-í sá ñáyiú-áⁿ cúú-yu ñáyiú cùu cuendá-í.

6 Te nchaa nchòhó cada cuendá váha-ndo nàcuáa xãhaⁿ-í xii Espíritú Yá Ndiòxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ñi chídó tnùn-í-í sá cúú-xí ñáyiú xĩndecu ichi Yá Ndiòxí ndécú ñúú Sãrdís.

Tnúhu sá cúú-xí cuè ñáyiú xĩndecu ichi Yá Ndiòxí ndécú ñúú Filãdelfiá

7 Te ní cachí tucu Yaá càháⁿ-áⁿ xii-í sá chídó tnùn-í-í nchaa tnúhu sá vítná càháⁿ-gá ñⁿ núú tùtú, te tendaha-í quíhíⁿ ndaha téé xĩnu cuechi núú Yá Ndiòxí ndécú ñúú Filãdelfiá sá cúú-xí cuè ñáyiú xĩndecu ichi-gá ndécú ñúú-áⁿ, te duha càchí-gá: “Yúhú cúú-í Yaá ío váha quide ndáá te ñã túú tnãhí cuèchi-í. Te díhna-gá ndíi Dãvíi ní taxi tnùn-í ndíi ñáyiú, te vitna yúhú táxi tnùn-í-yu, te yúhú càháⁿ-í te núu ndèndida càa ñáyiú ndíhu ndaha-í te ndèndida càa ñáyiú vá ndíhu ndaha-í.

8 Te yúhú xìn-í-í nchaa nàcuáa quide nchòhó ñáyiú xĩndecu ichi Yá Ndiòxí ndécú ñúú Filãdelfiá, te yúhú ní quide-í nàcuáa ní ñihí-ndó ñⁿ ichi cahnu quide-ndo chiuⁿ-í, te vá yõ ñⁿ cada nàcuáa vá ñihí-gá-ndó nàcuáa cada-ndo chiuⁿ-í. Te cuèi ñã túú ío ñihí ndéé-ndó cùndecu-ndo ichi Yá Ndiòxí dico tñi-ndo nchaa tnúhu càháⁿ-í, te ñi ñⁿ xito ñã túú càháⁿ-ndó sã ñã túú ndècu ndihi ñaha-ndo xii-í.

9 Te nchaa ñáyiú quide nchaa nàcuáa cuíni yucu ñãvãha, ñáyiú-áⁿ cúú-yu ñáyiú isràel, te cuèi cùú-yu ñáyiú isràel dico ñã túú quidé-yu nàcuáa tàú-yu cadá-yu, te yúhú cada-í sá ncháá ñáyiú-áⁿ canehé-yu sá yíñuhu núú-ndó, te cutnùn-í iní-yu sá yúhú ío cùu iní ñãhá-í xii-ndo.

10 Te ío quíde ndee-ni iní-ndó nchícúⁿ nihnu-ndo quíde-ndo nchaa nacuaá ní cáháⁿ-í, te xǎⁿ coto ñaha-í xii-ndo ñà túú ñà tnahá-ndó ndùu na quixi nchaa tnúndòho tnúhu ndàhú ñuyú-a. Te òré quexio nchaa tnúndòho-áⁿ ñuyú-a te dàvá-áⁿ cutnùní nàcuáa ndùu sá quidé ìⁿ ìⁿ ñáyiu.

11 Te ío ndǎhi quixi tucu-í. Te vá dáñá ndèé-ndó càda-ndo nchaa sá vǎha nchícúⁿ nihnu-ndo quíde-ndo cuendá sá vǎ cuíta sá ñǎ cachí Yǎ Ndiǒxí nduu táhú-ndó.

12 Te nchaa nchòhó ñáyiu na càda ndee iní yáha nándi sá ná yǎha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tǎtà-í Dútú Ndiǒxí, te vá ìⁿ ndùu-gá xocuiñí-ndó núú ndécú-gǎ. Te cada iní-ndó sǎ dàtná sá chídó tnùn-í díu Tǎtà-í Dútú Ndiǒxí ñǎ-ndo chi ducaⁿ-ni cundecu-ndo ndǎhi-gá, te cada tucu iní-ndó sǎ dàtná sá chídó tnùn-í nàcuáa nàni ñuú-gá ñǎ-ndo, chi díu ñuú-gá-áⁿ cundecu-ndo, te ñuú-áⁿ nán-í-xí Jèrusalén Sáa, duha nàni ñuú-gá. Te ñuú-áⁿ quee-xi andiu núú ndécú Yǎ Ndiǒxí Yaá cúú Tǎtà-í quée-xi ñuyú. Te cada tucu iní-ndó sǎ dàtná sá chídó tnùn-í díu mee-í ñǎ-ndo, te xǎⁿ cúú-xí ìⁿ díu saa, te ducaⁿ càda iní-ndó chi cundecu ndǎhi ñaha-ndo xǎ-í.

13 Te nchaa nchòhó cada cuendá váha-ndo nàcuáa xǎhaⁿ-í xii Espiritú Yǎ Ndiǒxí xǎhaⁿ-xi xǎi cue ñáyiu ndècu ichi-gá xǎndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ nì chídó tnùn-í sá cúú-xí ñáyiu xǎndecu ichi Yǎ Ndiǒxí ndécú ñùú Filàdelfíá.

Tnúhu sá cúú-xí ñáyiu xǎndecu ichi Yǎ Ndiǒxí ndécú ñùú Laodiceá

14 Te càchí tucu Yaá càháⁿ-áⁿ xii-í sá chídó tnùn-í nchaa tnúhu sá vítná cǎháⁿ-gá ìⁿ núú tütú, te tendaha-í quíhíⁿ ndaha téé xǎnu cuechi núú Yǎ Ndiǒxí ndécú ñùú Laodiceá sá cúú-xí cuè ñáyiu xǎndecu ichi-gá ndécú ñùú-áⁿ, te duha càchí-gá: “Yúhú cúú-í Yaá quidé núú Yǎ Ndiǒxí, te cúu-í Yaá quidé ndáá chi càháⁿ ndáá cuí-í nàcuáa càháⁿ Yǎ Ndiǒxí. Te yúhú cúú-í Yaá ní quide ní ngúndecu nchaa sá ñǎ cadúha Yǎ Ndiǒxí.

15 Te yúhú xǎn-í nchaa nàcuáa quíde nchòhó ñáyiu xǎndecu ichi Yǎ Ndiǒxí ndécú ñùú Laodiceá, te xǎn-í sá ñà túú cuín-ndó càncicúⁿ nihnu-ndo nchaa nacuaá càháⁿ-í,

te ní ñà túú cuín-ndó dàña duuⁿ-ndo. Te váha-gá sá dúúⁿ dùuⁿ cada-ndo nchaa nacuaá càháⁿ-í àdi núu ñáhá te duuⁿ duuⁿ dàña-ndo.

16 Te sá dúcáⁿ quíde-ndo ñà túú cuín-ndó dùuⁿ duuⁿ-ni cada-ndo nàcuáa càháⁿ-í, te ní ñà túú cuín-ndó dùuⁿ duuⁿ-ni dàña-ndo te sáa nduu vǎ cùndèe-gá iní-í cuendá nchaa sá quidé-ndó-ǎⁿ, te daquèe tíhú ñáhà-í xii-ndo.

17 Te càchí-ndó sǎ cuicá-ndó, te ío váha ta yǎha-ndo nchaa nduu cuáháⁿ, te ñà túú tnàhí ná cùmǎni xii-ndo, te ñà túú cùtnuní iní-ndó sǎ cúú-ndó dàtná cue ñáyiu ío ndàhú yǎha, te cúu-ndo datná ñáyiu ndàhú, ñáyiu ío cùndahú iní ñáhá tnàha ñáyiu-xi, te cúu-ndo datná cue ñáyiu cuáá, te cúu tucu-ndo datná cue ñáyiu ndàhú ñà túú tnàhí dóo-xi.

18 Te ña càchí tnúhu-í xii-ndo sǎ cáda-ndó dàtná xǎquide cue ñáyiu sàaⁿ ìⁿ sá ñǎ cuáha mee-ni díhúⁿ cuááⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xǎquide cue ñáyiu sàaⁿ dóo cuixíⁿ sácuñhu-yu cuendá sá vǎ cúu-yu dàtná ñáyiu ndàhú ñà túú dóo-xi, te cada tucu-ndo dàtná quidé cue ñáyiu sàaⁿ yúcu quée núú-xi nàcuáa cutnùní váha núú-yu, te duha càháⁿ-í xǎhaⁿ-í xii-ndo chi cuín-í sá nàtuha ñaha-ndo xii-í, te ío váha cundecu-ndo sǎ cúú-xí Yǎ Ndiǒxí.

19 Te càháⁿ-í dóho nchaa ñáyiu cúu iní-í òré ñà túú quíde ndáá-yu, te dàndoho-í-yu, núu xǎⁿ cuín-í sá nchòhó ndixi cuéchi iní-ndó sǎ ñà túú quíde váha-ndo ndècu-ndo.

20 Te na càchí tnúhu-í xii-ndo sǎ yúhú cúu-í dàtná ìⁿ téé nùtnǎi yuyèhe ndaa quehé te càháⁿ-í ñáyiu yǎhi xǎí vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xǎí vehe cudini-í ndǎhi-yu, te duha càháⁿ-í chi cuín-í cundecu ndǎhi ñaha-í xii-ndo.

21 Te nchaa nchòhó ñáyiu na càda ndee iní-xi yáha nándi sá ná yǎha sá cuendá-í, te yúhú taxi-í xii-ndo ìⁿ xichi núú ndécú-í cundecu-ndo te cunuu-ndo tnàhá-ndó dàtná cùnùu-í, chi yúhú ducaⁿ ní quíde ndee iní-í ní yáha-í nándi sá ñǎ yáha-í te vitna ní nduu táhú-í ndécú-í núú ndécú Tǎtà-í Dútú Ndiǒxí cùnùu-í.

22 Te nchaa nchòhó cada cuendá váha-ndo nàcuáa càháⁿ Espiritú Yǎ Ndiǒxí

xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ. Te nchaa tnùhu-áⁿ ñí chídó tnùnì-í sá cúú-xí ñáyiú xĩndecu ichi Yá Ndiöxí ndécú ñúú Laodiceá.

4

Nàcuáa chíñuhu ñáyiú Yá Ndiöxí andiú

1 Te sátá ñí yáha ducaⁿ ñí cuu te ní xiní-í nchii andiú, te ní cáháⁿ tucu Yaá ní cáháⁿ ndihi ñaha xii-í díhna, te Yaá-áⁿ ñí cáháⁿ níhi-gá dàtná càháⁿ níhi ñⁿ cútú, te ní cachí-gá xii-í:

—Taquène iha te na dànehé ñáhà-í xii-n nchaa nacuáa cada-xi ndéé núú cuaháⁿ núú vèxi —càchí-gá.

2 Te òré-ni-áⁿ ñí quide ñaha tùcu Espiritú Yá Ndiöxí xii-í nàcuáa càchí iní-xi, te diu-ni òré-áⁿ ñí xiní-í nútñí ñⁿ xilé váha andiú te càa datná cáá xilé sácõo nchihí cue ñáyiú ío cùnnuu, te núú xilé váha-áⁿ núcõo Yaá táxí tnùnì.

3 Te Yaá-áⁿ cáá-gá dàtná cáá yúú chànchí yúú váha sá nání jãspé, te càa tucu-gá dàtná cáá yúú váha sá nání cõrnalíná, te ñuhu doco ñaha ñⁿ cóo yáhnchí xii-gá, te tàsaⁿ-di dàtná tàsaⁿ ñⁿ yúú váha sá nání èsmeraldá.

4 Te ní xiní tucu-í nútñí ócò cùmí xilé váha ní càndéé núú núcõo-gá, te núú xilé-áⁿ xĩnucóo ócò cùmí cue tée cùu sacuéhé te xixĩnu-güedé mee-ni dóo cuixíⁿ, te ñⁿ caa coróná sá ñí cuáha mee-ni díhúⁿ cuáaⁿ xixúhuⁿ díquí-güedé.

5 Te núú núcõo Yaá táxí tnùnì-áⁿ sàà ndúté, te càháⁿ ñuhu te xica chíhí-xi dõndaha, te càyú úsá iti núú núcõo-gá, te sá úsá iti-áⁿ xĩáⁿ cútñùnì sá ndécú úsá espíritú cúú cuendá-gá.

6 Te ndècu ñⁿ sá ndécú ndàa núú-gá te xĩáⁿ cáá dàtná cáá làmár, te dàtná cáá vídriú cáá ñihí.

Te ní càndéé díñi Yaá núcõo-áⁿ xĩnutñí cùmí quiti te titní víhí tĩnuu-güedi ndèé ndàa sátá-güedi ndihi ndàa núú-güedi.

7 Te quiti díhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tée, te quiti cùu cumí cáá-dí dàtná cáá yàcolo oré cuaháⁿ-di núú tàchí.

8 Te ndi cùmí quiti-áⁿ ndèé íñú ndíxíⁿ-güedi ñⁿ ñⁿ-güedi, te ñihí xití

ndíxíⁿ-güedi ndihi ndàa sátá ndíxíⁿ-güedi ndèé tĩnuu-güedi, te nduu niú chíñuhu-güedi Yá Ndiöxí, te xãhaⁿ-güedi xii-gá:

Yòhó Dútú Ndiöxí ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te diu-ni ducaⁿ càda ndáá-n núú cuaháⁿ núú vèxi,

te cùu-n Yaá quidé nchàa-ndi túhú sá váha, te diu-ni-n sà ndecu-n ndéé cútñhá ní cuáha ñuyúú,

te diu-ni-n ndècu-n cuéi vitna, te diu-ni-n cùndecu-n cuéi ndéé núú cuaháⁿ núú vèxi.

Duha xãhaⁿ cué quiti-áⁿ xii Yaá núcõo núú xilé váha-áⁿ chíñuhu ñaha-güedi.

9 Te cue quiti-áⁿ ío ndacáⁿ táhú-güedi núú Yáá núcõo núú xilé váha-áⁿ cuendá nchaa sá quidé-gá. Te Yaá-áⁿ cúú-gá Yaá ndécú nchàa nduu nchaa quíú. Te cue quiti-áⁿ càchí-güedi sá ío càhnu cuu-gá te nèhe-güedi sá yĩñuhu núú-gá. Te ndi tnahá òré ducaⁿ càháⁿ-güedi,

10 te ndi òcò cùmí cue tée cùu sacuéhé xĩnucóo-áⁿ ngüñí xití-güedé núú Yáá núcõo-áⁿ, chi diu-gá cúú-gá Yaá ndécú nchàa nduu nchaa quíú te chíñuhu ñaha-güedé xii-gá, te tàva-güedé coróná ñuhú díquí-güedé te tàxi ndecu-güedé núú-gá, te xãhaⁿ-güedé xii-gá:

11 Yòhó cúú-n Dútú Ndiöxí Yaá cúú cuendá ñáhá xii-ndí,

te ío càhnu cuu-n, te ío váha quide-n, te nèhe-ndí sá yĩñuhu núú-n, chi ducaⁿ tàú-xi cada-ndí,

chi yòhó cúú-n Yáá ní cadúha nchaandi túhú sá ío,

te ducaⁿ ñí ngúndecu nchaa xĩáⁿ chi mee-n dùcaⁿ ní sani iní-n càda-n.

5

Cuendá Yaá cáá dàtná cáá ñⁿ mbéé quiti ní dánçuehé-güedé ndihi cuendá ñⁿ tutú

1 Te ní xiní tucu-í sá Yáá núcõo núú xilé váha-áⁿ nùndàha-gá ñⁿ tutú ní nacaúnnu xio ndaha cùha-gá, te ndèé lètrá ndàa sátá-xi ndihi ndàa xití-xi, te úsá tnahá tutú líhli ñuhu seyú ndèé sátá tütú-áⁿ cuendá sá vã dáñá-xí nàcaá.

2 Te ní xiní-í ñⁿ espíritú xínú cuèchi núú Yá Ndiöxí, te ndee víhi-xi te níhi càháⁿ-xi, te càchí-xi:

—¿Yoo tàú-xi xocàni nchaa tutú líhli ñùhu seyú ndèé sàtá tütú-a te nadacàá-xi? —càchí espíritú-án.

³ Dico ni àndi, te ni nùú ñùyíú-a, te ni ndàa xití ñuhu ñá túú ñá ñáyíu tàú-xi nadacàá tutú-án te cundèhé-yu.

⁴ Te yúhú ní ngüíta-í ndàhyú víhì-í cuèndá sá ñà túú ñá ñáyíu tàú-xi nadacàá tutú-án cundèhé-yu.

⁵ Te ñá cue téé cùu sacuéhé xñucóo xiáⁿ ñí cachí-güedé xii-í:

—Vá ndàhyú-gá-n, te cada cuèndá-n chi Yaá ío cùnūu cuu ndi mee cue ñáyíu cùu ñaní tnáhá ndí Jùdá, ñi-ni Yaá cúú ñaní tnáhá ndí Dàví, Yaá-án cúú-gã Yaá ní ndacu ní yáha nchaa nándi sá ñí yáha, núu xiáⁿ ñi-ni gá tàú-gá xocàni-gá nchaa tutú líhli ñùhu seyú ndèé sàtá tütú-án te nadacàá-gá —duha càchí téé cùu sacuéhé-án.

⁶ Te tnuú ndi ócò cùmí cue téé cùu sacuéhé xñucóo-án, ndi tnuú ndi cùmí quiti xñutñi-án, ndi núú núcõo Yaá táxi tnùn-án ñí xiní-í nùtni ñá Yaá cáá dàtná cáá ñá mbéé quiti ní dánicuéhé-güedé te ní xihí-di ñí cùu te ní ndoto-di, te ndèé úsá ndiqui-di, te ndèé úsá tinùu-di, te sá úsá tinùu-di-án cùnùn-í sá ndécú úsá espíritú cúú cuèndá Yá Ndiõxí, ducaⁿ caa Yaá-án ñí xiní-í. Te cue espíritú-án ñí tendaha-gã xicá cùu-xi ñí caa xico ñuyíú.

⁷ Te Yaá cáá dàtná cáá ñá mbéé quiti ní dánicuéhé-güedé-án ñí sáhá-gá núú Yáa núcõo núú xilé váha-án.

⁸ Te òré ní queheⁿ-gá tutú-án te ndi cùmí quiti xñutñi xiáⁿ ñí ngüíñi xití-güedi núú-gã, te ducaⁿ ñí ngüíñi xití tucu ndi ócò cùmí cue téé cùu sacuéhé xñucóo-án, te ndi dñi núú-güedé xñehe-güedé yaá sá nání àrpá, te xñehe tucu-güedé ndi dñi núú-güedé ñá caa tìcùú ní cuáha mee-ni dñiⁿ cuááⁿ, te chitu dñsa sá sáháⁿ tnámí. Te ñíhⁿ má dñsa sá sáháⁿ tnámí-án cúú-xí dàtná nchaa tnúhu càháⁿ nchaa ñáyíu ndècu íchi Yá Ndiõxí òré càháⁿ ndi ñáhá-yu xii-gá.

⁹ Te xita-güedé ñá ndudú sáá ndi cue quiti-án chíñuhu ñaha-güedé xii-gá, te càchí-güedé ndi cue quiti-án:

Yòhó tàú-n queheⁿ-n tutú-a te xocàni-n nchaa tutú líhli ñùhu seyú ndèé sàtá-xi,

chi yòhó ní sati níñi-n te ní xihí-n, te cuèndá xiáⁿ ní nduu cuèndá Yá Ndiõxí cue ñáyíu ñá ñá nacióⁿ, ndi ñáyíu xñdecu ñá ñá ñuú, ndi ñáyíu càháⁿ ndi dñi ndi dñi núú tnúhu, ndi ñáyíu xñdecu ñá ñá xichi.

¹⁰ Te ní quidé-n-yu dàtná cue téé yindaha ñáyíu, te ní quide tucú-n-yu dàtná cue dütú sã cúú-xí Yá Ndiõxí.

Te sáá nduu te taxi tnùn-í-yu ñuyíú-a. Duha càháⁿ cue téé-án ndi cue quiti-án chíñuhu-güedé ndi-güedi Yaá-án.

¹¹ Te sàtá dúcáⁿ te ní tecú dóho-í ní càháⁿ cuéhé víhí espíritú xñucóo cuèchi ñí candéé núú núcõo Yaá táxi tnùn-án, ndi núú xñutñi ndi cùmí cue quiti-án, ndi núú xñucóo cue téé cùu sacuéhé-án, te ní xiní-í sá sùn-í cuéhé víhí espíritú-án xñdecu xiáⁿ,

¹² te níhi ní càháⁿ cue espíritú-án, te càchí-xi:

Yòhó Yaá cáá dàtná cáá ñá mbéé quiti ní dánicuéhé-güedé te ní xihí ní cùu te ní ndoto,

te yòhó ío càhnu cuu-n, te ndècu ndi-n nchaandi túhú,

te ío ndècu ndi-n sá xiní tnùn-í-n,

te ndacu-n quide-n nchaa sá cùn-í-n,

te nèhe-ndí sá yíñuhu núú-n, te ío váha quide-n,

te chíñuhu ñaha-ndí xii-n, chi ducaⁿ tàú-ndí cada-ndí chi ío càhnu cuu-n.

Duha càchí nchaa cue espíritú-án xáhaⁿ-xi xii-gá chíñuhu ñaha-xi.

¹³ Te ní tecú dóho-í ní càháⁿ nchaandi túhú sá ñí cadúha Yá Ndiõxí ndécú àndi, ndi nchaa sá ndécú ñuyíú, ndi nchaa sá ndécú xití ñuhu, ndi nchaa sá ñúhú xití ndute làmár, te xicachí-xi:

Yòhó Yaá núcõo núú xilé váha, ndi yòhó Yaá cáá dàtná cáá ñá mbéé quiti ní dánicuéhé-güedé táxi tnùn-ndó, te nèhe-ndí sá yíñuhu núú-ndó,

te ducaⁿ ío ndàcáⁿ táhú-ndí núú-ndó, chi ío váha quide-ndo te ío cùnūu-ndo,

te ñi-ni duha càháⁿ váha-ndí cuèndá-ndó ñí caa ñí quíñi.

Duha càchí nchaa sá ñí cadúha Yá Ndiõxí.

¹⁴ Te ndi cùmí cue quiti xñutñi-án càchí-güedi:

—¡Ducaⁿ na cùnūu! —cachí-güedi.

Te ndi òcò cùmí cue tée cùu sacuéhé cáháⁿ tucu ingá quitì cùu cumí x̄nutn̄í-áⁿ, te x̄ndecu-áⁿ n̄í ngüíñí x̄ití-güedē chíñùhu-güedē cāchí-di:
Yaá ndécú nchàa nduu nchaa quíú.

6

Cuendá úsá tutú l̄hli ñùhu seyú

¹ Te sátá dúcáⁿ te ní xiní-í sá Yàá cáá dàtná cáá ñⁿ mbéé quitì ní dán̄cuèhé-güedé-áⁿ n̄í xócání-gǎ ñⁿ tutú l̄hli ñùhu seyú ndéé sátá tütú sá n̄í nadúcúⁿ nuu-áⁿ, te ní tecú dóho-í ní cáháⁿ ñⁿ quitì cùmí x̄nutn̄í-áⁿ, te níhi ní cáháⁿ-di dàtná cáháⁿ ñùhu, te cāchí-di:

—¡Taquìxi cundehe-n! —cachí-di.

² Te òré-ni-áⁿ n̄í xiní-í ñⁿ cuàyú cuixíⁿ yódó ñàha ñⁿ sá yódó ñàha xii-di, te sá yódó ñàha xii-di-áⁿ néhé-xí ñⁿ arcú sá cúu tnùxií-xi, te ní nduu táhú-xi ñⁿ coróná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xócání-gǎ tutú l̄hli cùu uú ñùhú sèyú ndéé sátá tütú sá n̄í nadúcúⁿ nuu-áⁿ, te ní tecú dóho-í ní cáháⁿ tucu ingá quitì cùu uú x̄nutn̄í-áⁿ, te cāchí-di:

—¡Taquìxi cundehe-n! —cachí-di.

⁴ Te òré-ni-áⁿ n̄í xiní tucu-í ñⁿ cuàyú tícuèhé ní quee-di cuáháⁿ-di, te yòdo ñàha ñⁿ sá yódó ñàha xii-di, te sá yódó ñàha xii-di-áⁿ n̄í níhi-xi tnúhu ndee ìní sá dáticanuu-xi ñáyiu vá cündècu ndihí tñaha váha-gá-yu, te ngüíta ñáyiu cahni tñahá-yu, te ní nduu táhú-xi ñⁿ yuchí cáhnú v̄hi.

⁵ Te òré ní xócání tucu Yàá-áⁿ ingá tutú l̄hli cùu uní ñùhú sèyú ndéé sátá tütú sá n̄í nadúcúⁿ nuu-áⁿ, te ní tecú dóho-í ní cáháⁿ quitì cùu uní x̄nutn̄í xíáⁿ, te cāchí-di:

—¡Taquìxi cundehe-n! —cachí-di.

Te òré-ni-áⁿ n̄í xiní tucu-í ñⁿ cuàyú tnúú te yòdo ñàha tucu ñⁿ sá yódó ñàha xii-di, te sá yódó ñàha-áⁿ nundàha-xi úú yaxiⁿ libré.

⁶ Te ní tecú dóho-í ní cáháⁿ ñⁿ sá n̄í cáháⁿ tnuú cue quitì x̄nutn̄í-áⁿ, te cāchí-xi:

—Ñⁿ cuàrtú-nǎ triú níhi-ndó sǎ ñⁿ d̄ihúⁿ denàriú, te úní cuàrtú-nǎ cebàdá níhi-ndó sǎ ñⁿ tucu d̄ihúⁿ denàriú, dico acití ndihí ndudí ndéhé yoho yàha stilé chí vá ndihí ñhnu —duha cāchí sá cáháⁿ-áⁿ.

⁷ Te òré ní xócání tucu Yàá-áⁿ tutú l̄hli cùu cumí ñùhú sèyú ndéé sátá tütú sá n̄í nadúcúⁿ nuu-áⁿ, te ní tecú tucu dóho-í ní

cáháⁿ tucu ingá quitì cùu cumí x̄nutn̄í-áⁿ, te cāchí-di:

—¡Taquìxi cundehe-n! —cachí-di.

⁸ Te òré-ni-áⁿ n̄í xiní tucu-í ñⁿ cuàyú yàhá, te yòdo ñàha tucu ñⁿ sá yódó ñàha xii-di, te sá yódó ñàha xii-di-áⁿ nání-xí Sǎ xihí, te xíáⁿ sáhní-xí ñáyiu, te sátá xíáⁿ nchicúⁿ sá nèhé núú ndécú ñáyiu ní xihí. Te cùmí xichi cùu ñuyíú, te sá sáhní ñàha xii ñáyiu-áⁿ n̄í níhi-xi tnúhu ndee ìní danàa-xi ñáyiu ñⁿ xichi ñuyíú, te davá-yu cahni ñàha-xi ndihí yuchí, te cada-xi sá cóo tñamá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quitì dééⁿ cahni-di ñáyiu.

⁹ Te òré ní xócání tucu Yàá-áⁿ tutú l̄hli cùu uhúⁿ ñùhú sèyú ndéé sátá tütú sá n̄í nadúcúⁿ nuu-áⁿ, te òré-áⁿ n̄í xiní-í n̄utn̄í ñⁿ núú sácódó sǎ ndúú táhú Yǎ Ndiöxí, te ndàa caha xíáⁿ ní xiní-í x̄ndecu nchaa àlmá ñáyiu ní sahní-güedé núú ñuyíú sǎ cuendá tnúhu Yá Ndiöxí, ndihí sá cuendá sá n̄í cáháⁿ váha-yu cuendá-gá.

¹⁰ Te nchaa àlmá-áⁿ ñhí xícáháⁿ-xi, te xǎhaⁿ-xi x̄i Yá Ndiöxí:

—Yòhó Dútú Ndiöxí cúu-n Yàá ñá túú tñahí cuéchi-xi, te ñá túú tñahí quee cáva-n quide-n ñⁿ sá cáháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá n̄í quide ñahá-yu xii-ndí-i? —cāchí cue àlmá-áⁿ xǎhaⁿ-xi x̄i-gá.

¹¹ Te sátá dúcáⁿ te nchaa cue àlmá ñáyiu-áⁿ n̄í níhi-xi dóo cuixíⁿ ní quee cuíhnu-xi, te ní xitn̄hu ñàha xii-xi sá ná ndètatú-xi te cundetú tñaa-xi ndéé ná x̄nu cava cuú ñáyiu n̄acuáa ndéé tñuní dàtná ní xihí cue ñáyiu dii àlmá-xi cùu-xi. Te ñáyiu sa ní xihí-áⁿ ñⁿ-ni cùu-yu ndihí ñáyiu vitna cuú-áⁿ chi mee-ni chiúⁿ Xitohó Jesucristú quidè-yu, te diu-ni ichi-gá ndécü-yu.

¹² Te òré ní xócání tucu Yàá-áⁿ tutú l̄hli cùu ñhú ñùhú sèyú ndéé sátá tütú sá n̄í nadúcúⁿ nuu-áⁿ, te ní xiní-í súúni ñhí ní quidi-xi ñuyíú, te ní cutnuu ñhíi núú nchicanhii dàtná ñⁿ dóo tnúú, te ní cuu tícuèhé níñí ñhíi núú yóo.

¹³ Te ní xiní-í ní ngoyo chódini ñuyíú-a dàtná ngóyó ngüxí yihí òré quéné tǎchí ñhí.

¹⁴ Te ní xiní-í ní nadúcúⁿ nuu andiú dàtná nádúcúⁿ nuu ñⁿ tutú te ní ndóñhú-xí, te nchaa t̄ndúú n̄í xica ndehe-xi núú

ndécú-xí, te ducaⁿ ñi xica ndehe tucu nchaa tindúú yìchí ndécú xítí ndute làmár.

15 Te nchaa cue téé yindaha ñáyiú ñi nguívãha-güedé, ndihí nchaa dava-gá cue téé ío tàxi tnuní, ndihí nchaa ñáyiú cuica, ndihí nchaa cue téé tàxi tnuní sandádú, ndihí cue sandádú cue téé ío váha sàá díquí-xi nàcuáa cada-güedé nàá-güedé, ndihí nchaa ñáyiú ñá túú tnàhí dàñá quee núú chíúⁿ pàtróóⁿ-xi, ndihí nchaa ñáyiú dàñá queé núú chìuⁿ patróóⁿ-xi. Te dava ñáyiú-áⁿ ñi nguívãha-yu xítí yaú, te davá-yu ñi nguívãha-yu nchaa tnuú cava.

16 Te xãhãⁿ-yu nchaa tindúú ndihí nchaa cava:

—Chí tácuⁿ chivãha ñaha-ndo xì-ndí cuendá sá vã quíní ñáhá Yáá ío tàxi tnuní núcõo núú xilé váha, ndihí cuendá sá vã dándõho ñaha Yáá cáá dàtná cáá ñⁿ mbéé quití ní dánícuèhé-güedé, chí Yáá-áⁿ ío cùdééⁿ-gã núú-ndí —duha càchí nchaa ñáyiú-áⁿ xãhãⁿ-yu xii nchaa tindúú-ãⁿ ndihí nchaa cava-áⁿ.

17 Te vitna ñi sáá nduu ío cùu cahnu nduu tnúndõho tnúhu ndàhú, te vã yõo ñⁿ cundee ñi-xi yáha nchaa tnúndõho-a.

7

Ñáyiú israhél ñáyiú naníhí tàhú

1 Te sátá xãⁿ te ní xiní-í cùmí tnàhá espíritú xínú cuèchi núú Yã Ndiõxí xñutnã-xi ndí cùmí xio ñuyúú, te cue espíritú-áⁿ ñi ngani-xi táchí cuendá sá vã cuícó-gã-xi ni làmár, te ni díquí yutnu, te ni ñⁿ xichi ñuyúú vã cuícó-gã-xi.

2 Te cue espíritú-áⁿ ndécú ndihí-xi tnúhu ndee ñi danàa-xi sá ío làmár ndihí sá ío ñuhu yìchí, te ní xiní tucu-í ñgá espíritú xínú cuèchi núú Yã Ndiõxí ní quee nchita-xi ndàa nacuáa quène nchícanhii, te nundaha-xi seyú Yã Ndiõxí Yáá ndécú nchaa nduu nchaa quíú, te níhi ní cáháⁿ-xi xãháⁿ-xi xì ndí cumí cue espíritú-áⁿ:

3 —Vã dánàa-ndo sá ío làmár, te ni vã dánàa-ndo yutnu, te ni ñⁿ sá ío ñuyúú vã dánàa-ndo, chí cundetú-ndo ndèé ná tàxi ndecu-ndí ñⁿ sèñá tneé nchaa ñáyiú xínu cuechi núú Tãtá-ó Dütú Ndiõxí —duha càchí espíritú-áⁿ xãháⁿ-xi xì ndí cumí espíritú xñutnã ndí cùmí xichi ñuyúú.

4 Te ní tecú dóho-í ní cáháⁿ ñⁿ sá ñi cáháⁿ, te ní cachí-xi sá núú ndí ùxúú xichi cue ñáyiú israhél te ní xínu ñⁿ ciendú údico cùmí mñl-yu ní ngúndecu sèñá tneé-yu.

5 Te núú ñⁿ ciendú údico cùmí mñl ñáyiú-áⁿ, te ní xínu ùxúú mñl cue ñani tnáhá ndí Jùdá ní ngúndecu sèñá tneé-yu, te ùxúú mñl cue ñani tnáhá ndí Rùbén, te ùxúú mñl cue ñani tnáhá ndí Gàd,

6 te ùxúú mñl cue ñani tnáhá ndí Àsér, te ùxúú mñl cue ñani tnáhá ndí Neftalí, te ùxúú mñl cue ñani tnáhá ndí Manàsés,

7 te ùxúú mñl cue ñani tnáhá ndí Míó, te ùxúú mñl cue ñani tnáhá ndí Lèví, te ùxúú mñl cue ñani tnáhá ndí Isàcár,

8 te ùxúú mñl cue ñani tnáhá ndí Zabulón, te ùxúú mñl cue ñani tnáhá ndí Chèé, te ùxúú mñl cue ñani tnáhá ndí Benjamín, nchaandi túhú ñáyiú-áⁿ ñi ngúndecu sèñá tneé-yu.

Cuéhé víhí ñáyiú ñihnu dóo cuixíⁿ

9 Te sátá xãⁿ te ní xiní-í cuéhé víhí ñáyiú, ñáyiú ñⁿ ñⁿ nacióⁿ, ndihí ñáyiú ñⁿ ñⁿ ñuú, ndihí ñáyiú cáháⁿ ndí dííⁿ ndí dííⁿ núú tnúhu, ndihí ñáyiú ní xíndecu ñⁿ ñⁿ xichi, te nchaa ñáyiú-áⁿ xñutnã-yu ndàa núú Yáá táxi tnuní núcõo núú xilé váha, ndihí núú Yáá cáá dàtná cáá ñⁿ mbéé quití ní dánícuèhé-güedé, te vã yõo ñⁿ ndacu cahu ñaha xii-yu chí cuéhé víhí-yu, te ncháa-yu xixíhnu-yu mee-ni dóo cuixíⁿ, te nundahá-yu ncháa-yu ñⁿ caa ndàha yutnu ñúú.

10 Te ncháa-yu níhi xicáháⁿ-yu, te càchí-yu:

Yáá táxi tnuní núcõo núú xilé váha cùu-gá Ndiõxí-ó,

te ñi-gá ndihí Yáá cáá dàtná cáá ñⁿ mbéé quití ní dánícuèhé-güedé ní dácacu ñihnu ñaha-gã xii-o núú ùhú núú ndàhú.

Duha càchí nchaa ñáyiú-áⁿ.

11 Te nchaa espíritú xínú cuèchi núú Yã Ndiõxí ní nadúcúⁿndèé-xi xñutnã-xi ní càndéé núú núcõo Yáá núcõo núú xilé váha, ndihí núú xñucóo cue téé cùu sacuéhé, ndihí cue ndí cùmí quití xñutnã-áⁿ, te nchaa-xi ní ngüñí xítí-xí te ní ngúnu ndeyi-xi núú Yáá núcõo núú xilé váha-áⁿ,

te nchaa-xi ní ngüíta-xi chiñuhu ñaha-xi xii-gá,

12 te cächí-xi:

Na cãháⁿ ndáá-ndí núú yòhó Tãtã-ndí Dútú Ndiöxí sá ïo cãhnu cuu-n, te ndàcu-n quide-n nchaa sá vãha cuìní-n, te ío vãha quide-n, te ndècu ndihí-n nchaa sá xìní tnùní-n,

te chiñuhu ñaha-ndí xii-n, te ducaⁿ ndàcãⁿ táhú-ndí núú-n cuendá nchaa sá quidé-n, te nèhe-ndí sá yíñuhu núú-n,

te tnúhu cãháⁿ-ndí-a cùu-xi tnúhu ndáá, te ñu-ni duha cãháⁿ-ndí ndéé núú cuahãⁿ núú vëxi.

Duha cächí nchaa cue espíritú-áⁿ xãhaⁿ-xi xii Yaá núcõo núú xilé vãha-áⁿ.

13 Te ñⁿ cue tée cùu sacuéhé xĩndecu-áⁿ ñí xicãⁿ tnúhú-dë núú-í, te cächí-dé:

—¿Yóndi cùu ñáyiu dàcãⁿ xĩxĩhnu dóo cuixíⁿ-ãⁿ, te ndéé véxi-yu núú dàcãⁿ xĩndãã-yu-i? —cächí-dé.

14 Te yúhú ní xãhaⁿ-í:

—Tãtã, ñã túú xìní-í, dico mee-n xìní-n — duha ní xãhaⁿ-í xii-dé.

Te dãtnùní ní cachí tnúhu-dé xii-í ná cúú ñáyiu-áⁿ, te cächí-dé:

—Nchaa ñáyiu-a cùú-yu ñáyiu ní quee núú ío víhí tnúhu ndòho tnúhu ndàhú sá vã cùndèe iní-ó te véxi-yu iha, te cùú-yu ñáyiu sa ní nduu ndoo ní nduu nine iní-xi cuendá sá ñí satí ñíñí Yã cáá dàtnã cáá ñⁿ mbéé quiti ní dãnícuehé-güedé, cuendá xíãⁿ vitna ní ndihí-yu ní nduu cuixíⁿ dóo xĩxĩhnu-yu.

15 Te núú xíãⁿ vitna ní nduu táhú-yu ndècú-yu núú ndécú Yã Ndiöxí Yaá táxí tnùní núcõo núú xilé vãha, te cuèi nduu cuèi niú xínú cuèhí-yu núú-gã vitna, te ñu-gã xító ñàha-gã xii-yu.

16 Te vitna ní sáá-yu núú-gã cundecú-yu te vá ndóhó-gã-yu docó, te ni vã quíní-gá-yu ndohó-yu yíchí-yu ndute, te ni vã quíní-gá-yu ndohó-yu cahni nchícanhii, te ñã túú-gã ná cahni ndohó-yu.

17 Te ducaⁿ chi Yaá cáá dàtnã cáá ñⁿ mbéé quiti ní dãnícuehé-güedé ndécú-gã núú nùtní xilé vãha núcõo Yã Ndiöxí Yaá táxí tnùní, Yaá-áⁿ coto ñaha-gã xii-yu dàtnã quidé ñⁿ toli oré xító-dë mbéé-dë, te candeca ñaha-gã xii-yu quíhíⁿ núú tõo ndute, te ndute-áⁿ cúú-xí ndùte candeca iní-yu,

te Yã Ndiöxí cada-gá sá vã quíní-gá-yu tnúhu ndàhyú —duha ní cachí tnúhu tée cùu sacuéhé-ãⁿ xii-í.

8

Cuendá tícùú sá ñí cuáha mee-ni dñhúⁿ cuããⁿ

1 Te sátá dúcãⁿ te Yaá cáá dàtnã cáá ñⁿ mbéé quiti ní dãnícuehé-güedé ní xócãní-gã tutú líhli cùu usá ñúhú sèyú ndéé sátá tütú sá ñí nadúcúⁿnuu-áⁿ, te òré-áⁿ ñí cunahi sũúní nãvíí-nã ní cuu andiu dàtnã cuádava òré.

2 Te ní xìní-í úsã tnàhá espíritú xínú cuèchi núú Yã Ndiöxí xĩnùtní-xi núú núcõo-gã, te ní níhí-xi ñⁿ caa cütú xĩnehe-xi.

3 Te dãtnùní ní xìní tucu-í ingá espíritú xínú cuèchi núú-gã ní quexìo-xi nehe-xi ñⁿ tícùú ní cuáha mee-ni dñhúⁿ cuããⁿ te ñúhu vai dusa sá sãháⁿ tnámí, te ní ngúnutnii espíritú-áⁿ núú ndécú sã ñí cuáha mee-ni dñhúⁿ cuããⁿ núú sãcõdó sã ndúú táhú Yã Ndiöxí, te xíãⁿ nùtní-xi ndãa núú-gã, te dusa sã sãháⁿ tnámí-áⁿ cahmi espíritú-áⁿ núú sãcõdó sã ndúú táhú-gã-áⁿ cuendá ñúhmã dusa-áⁿ cundihí-xi nchaa tnúhu cãháⁿ ñáyiu cãháⁿ ndihí ñaha xii-gã, nchaa ñáyiu cùu cuendá-gã.

4 Te nundaha espíritú-áⁿ tícùú ñúhú dusa sã sãháⁿ tnámí càyú, te quène ñúhmã nùtní-xi núú Yã Ndiöxí, te ñúhmã-ãⁿ cundihí-xi nchaa tnúhu cãháⁿ ñáyiu cãháⁿ ndihí ñaha xii-gã, nchaa ñáyiu cùu cuendá-gã.

5 Te ní queheⁿ espíritú-áⁿ tícùú te ní dächítú-xi ñúhú yódó núú sãcõdó sã ndúú táhú Yã Ndiöxí, te ní xítenuu-xi ñuyíú, te òré ducaⁿ ñí quide-xi te ní cãháⁿ víhí ñúhu, te ío dusaⁿ ñí quide-xi ñuyíú, te ní sáá ndúté, te níhi víhi ní tnãa.

Ndi ùsã espíritú ní tíú-xi ñⁿ caa cütú xĩnehe-xi

6 Te ndi ùsã cue espíritú xĩnehe ñⁿ caa cütú-ãⁿ ñí ngúndecu túha-xi cuendá tíú-xi.

7 Te espíritú dñhna nuu ñí tíú-xi cütú néhé-xí, te ñuyíú-a ní ngoyo ñíñí dàcãnuu-xi ndihí ñúhú ndihí níñí, te luha-ná te cuu dava ñuyíú ñí càyú, te luha-ná te cuu dava tucu nchaa yutnu ío ñuyíú ñí càyú, te

luha-ná te cuu dava tucu nchaa cùhú ìò ñuyíú nǐ cáyú.

⁸ Te espíritú cúú ùú ní tíú-xi cútú néhé-xí, te dàtná cáá ìⁿ tindúú cáá ìⁿ sá nǐ ngava xítí làmár te nchícúⁿ ñuhú, te luha-ná te cuu dava ndute làmár-áⁿ nǐ nduu-xi níñí.

⁹ Te luha-ná te cuu dava nchaa quití xǐxúhuⁿ xítí làmár-áⁿ nǐ xíhí-güedi, te luha-ná te cuu dava nchaa bàrcú ní queé naa-xi xítí ndute.

¹⁰ Te espíritú cúú ùní ní tíú-xi cútú néhé-xí, te ní ngava ìⁿ chódíní cáhnú ndèé andiu ñuyíú te nchícúⁿ ñuhú-di, te ñuhú-áⁿ cáá dàtná cáá ñuhú ití. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quènihni ndute ní ngava-di.

¹¹ Te chódíní-áⁿ nání-dí; Yǔcú Ùá. Te ndute xìca nchaa yúte-áⁿ ndihí nchaa ndute quènihni-áⁿ nǐ cuu úa-xi dàtná yúcú ùá, te ío cuéhé ñáyiú ní xíhí sá dúcáⁿ nǐ cuu úa ndute-áⁿ.

¹² Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchícanhii ñá túú ní dàyehé-xi, te ducaⁿ lùha-ná tucu cuu dava yóó ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchícanhii, te ducaⁿ lùha-ná te cuu dava niú ñá túú ní dàyehé yóó ndihí nchaa chódíní.

¹³ Te sáta dúcáⁿ te ní xiní-í xícó ìⁿ espíritú xínú cuèchi núú Yǎ Ndiǒxí núú tàchí, te ní tecú dóho-í níhi càháⁿ-xi, te càchí-xi:

—jÍo ndàhú ndoho nchaa ñáyiú xǐndecu ñuyíú òré ná dàcàháⁿ úní-gá cue espíritú cùmání cútú xǐnehe-xi, chi sa xǐndecu túha-ná-xi sá dácàháⁿ-xi!— duha càchí espíritú-áⁿ.

9

¹ Te espíritú cúú ùhúⁿ ní tíú-xi cútú néhé-xí, te òré-áⁿ nǐ xiní-í ní quee ìⁿ espíritú andiu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí.

² Te ní nacaáⁿ-xi yaú-áⁿ te ní ngüíta-xi ní quene ñúhmá dàtná quéné ñúhmá ìⁿ xítnú cáhnú víhi, te ní quene tàchí nǐ xítenuu-xi

ñúhmá-áⁿ te ní sadí-xi núú nchícanhii, te ní cunee ñuyíú.

³ Te xítí ñúhmá-áⁿ nǐ quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua.

⁴ Te ní ngúndecu ndihí-güedi tnúhu ndee ìní cuendá sá dándòho-güedi mee-ni ñáyiú ñá túú ndèé sèñá Yǎ Ndiǒxí tneé-xi, te ñá túú nǎ cada-di nchaa yutnu ndihí nchaa cùhú.

⁵ Te ñá túú tnúhu ndee ìní ndécú ndihí-güedi sá cáhní-güedi ñáyiú, chi mee-ni sǎ dándòho ñaha-güedi xíi-yu úhúⁿ yóó. Te òré ní ngüíta-güedi dándòho ñaha-güedi xíi-yu te tàhú tnúhú núú dáquèe-güedi ìñu-güedi dàtná quidé-xí núú dáquèe nchacua ìñu-güedi.

⁶ Te ñáyiú-áⁿ xìcáⁿ tàhú-yu sá ndíhi cuú-yu cuendá sá ío ndòhó-yu dàquèe ñaha nchaa quití-áⁿ ìñu-di xíi-yu te ñá cuìní-xi cuú-yu, te ìⁿ nduu ìⁿ nduu sàni ìní-yu cuú-yu te ñá túú cuìní-xi cuú-yu chi ñá túú tnúhu xíhí sá cúú-xí-yu.

⁷ Te nchaa tíca làngóstá-áⁿ xǐndáa-güedi dàtná ndaa nchaa cuáyú cue téé cuáháⁿ nàá, te díquí-güedi ñuhu ìⁿ sá cáá dàtná cáá còroná ní cuáha mee-ni díhúⁿ cuááⁿ, te núú-güedi càa datná cáá núú cuè téé.

⁸ Te idi díquí-güedi càa datná cáá ìdi díquí ñáyiú díhí, te núhu-güedi càa datná cáá ñuhu ndícaha.

⁹ Te yídúcúⁿnuu-güedi ìⁿ sá cáá dàtná cáá càa, te ndíxíⁿ-güedi quide-xi datná quidé-xí núú vèxi cuéhé víhí càrretá sá táñuhu cuáyú cuáháⁿ-güedé ndihí-güedi núú nàa-güedé.

¹⁰ Te ndèé ìñu núú lùhmá-güedi dàtná ndèé ìñu núú lùhmá nchacua, te ìñu núú lùhmá-güedi-áⁿ dáquèe-güedi ñáyiú dándòho ñaha-güedi xíi-yu, te ducaⁿ-ni càda-güedi dándòho ñaha-güedi xíi-yu ndèé xínu úhúⁿ yóó.

¹¹ Te nchaa tíca làngóstá-áⁿ táxí tnùnì ñáhá espíritú sá táxí tnùnì yaú cùnú víhí, te espíritú-áⁿ nání-xí Àbadón tnúhu hèbreú, te tnúhu grìégú nání-xí Àpolión, te ndi ndùú tnúhu-áⁿ quèé-xí: Sá dánàa ñáyiú.

¹² Te tnúndòho-a cuu-xi tnúndòho díhna nuu, te vitna cùmání úú-gá.

¹³ Te espíritú cúú ìñú ní tíú-xi cútú néhé-xí. Te núú Yǎ Ndiǒxí nùtní ìⁿ sá nǐ

cuáha mee-ni dǐhúⁿ cuàáⁿ núú sácǒdó sǎ ndúú tǎhú-gǎ, te ndi cùmí xǐquí-xi xǐndecu ìⁿ caa ndìqui, te ní tecú dóho-í ní cáháⁿ ìⁿ sá nǐ cáháⁿ nihnu ndi cùmí ndìqui-áⁿ.

14 Te sá cáháⁿ nihnu ndìqui-áⁿ xǎhaⁿ-xi xìi espíritú cúú ìⁿ sá nǐ tiú cútú-ǎⁿ:

—Cuàháⁿ nandaxi-n ndi cumí espíritú ndútú ndècu yúte càhnu nani Eúfratés — càchí sá cáháⁿ-áⁿ xǎhaⁿ-xi xìi espíritú-áⁿ.

15 Te sá tá dúcáⁿ te ní nandáxí ndi cùmí cue espíritú-áⁿ cuendá cahni-xi cuéhé víhí ñǎyiu, te sa yatni dàtná cuádava ñáyiu xǐndecu ñuyíú cahni-xi, te ducaⁿ chi sa ndècu túha tǎhí cue espíritú-áⁿ ndétú-xi sáà òré, àdi nduu, àdi yóó, àdi cuía ducaⁿ càda-xi cahni-xi ñáyiu.

16 Te ní xiní-í nchaa cue sandàdú cùndìhi-xi xixódó-güedě cuàyú, te ní níhì-í tnúhu sá xǐnu úú ciendú millón-güedě.

17 Te duha xǐndáa cue cuàyú-áⁿ ndihí cue téé yòdo ñaha-áⁿ nǐ xiní-í: Te cue téé-áⁿ yídúcúⁿ nuu ìⁿ sá yídúcúⁿ nuu pèchú-güedé, te luha tìcuéhé te luha cuìi datná cuìi andiu, te luha cuàáⁿ, te nchaa cuàyú-áⁿ cáá dǐquí-güedi dàtná cáá dǐquí ndicaha, te yuhu-güedi quène ñuhú ndihí ñúhmá, ndihí àzufre nchìcúⁿ ñuhú.

18 Te ío cuéhé ñáyiu ñuyíú nǐ xǐhí chi luha-ná te cudavá-yu ní xǐhí sá cuendá ñuhú-áⁿ ndihí ñúhmá-ǎⁿ ndihí àzufre-áⁿ.

19 Te ndihí núú lùhmá-güedi ndihí yuhu-güedi dándoho-güedi ñáyiu, te núú lùhmá-güedi nèhe-xi dǐquí cǒó, te dǐu-ni dàtná cáá cǒó cáá nǐhí lùhmá-güedi.

20 Te nchaa dava-gá ñáyiu ní cácu ñá túú ní xǐhí núú nchaa tǎndòho-áⁿ ñà túú ní cuìni-yu dàñá-yu ichi cuéhé ichi duha ndécú-yu, chi quide cahnu-ni-yu nchaa espíritú cùndìhi yucu ñávǎha, ndihí nchaa sá càchí-yu cùu ndióxí ní cadúha cue téé ñuyíú-a, te dava xǐǎⁿ ní cuáha mee-ni dǐhúⁿ cuàáⁿ, te dava ní cuáha mee-ni dǐhúⁿ cuìxíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xǐǎⁿ ñá túú cùtnuní núú-xi, te ní ñà túú tècú dóho-xi, te ní ñǎ ndácú-xi càca-xi.

21 Te ní sǎ sǎhí tǎhá-yu, te ní sǎ sǎhí ndùu tǎhá-yu, te ní sǎ ndécú-yu ichi dǐí ìⁿ,

te ní sǎ dúhú ndàchiuⁿ tǎhá-yu ñá túú ní cuìni-yu dàñá-yu.

10

Èⁿ espíritú xǐnú cuèchi núú Yǎ Ndiǒxí néhé-xí ìⁿ librú

1 Te sá tá dúcáⁿ te ní xiní tucu-í ìⁿ espíritú cùnùu xinu cuechi núú Yǎ Ndiǒxí ní quee-xi andiu, te yǐhi-xi xití vícò cuǎnguee-xi ñuyíú te ndàa dǐquí-xi ndècu ìⁿ cǒó yǎhncí, te núú-xi súúní chàhncí dàtná chàhncí núú nchìcanchii, te ndi ndùú dǐhíⁿ-xi càa datná cáá ìⁿ tǎhú.

2 Te nùndaha-xi ìⁿ librú lìhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí.

3 Te espíritú-áⁿ nǐhi vìhi ní cáháⁿ-xi, te ní quide-xi dàtná quidé ìⁿ ndicaha oré cánásàa-di, te òré ducaⁿ nǐhi vìhi ní cáháⁿ-xi te úsá xito ní cáháⁿ ñúhu.

4 Te sá tá nǐ yáha ní cáháⁿ ñúhu-áⁿ úsá xito, te chido tǎnì-í ìⁿ núú tǎtú nàcuáa ní cáháⁿ-xi ní cùu, te meì òré-áⁿ nǐ tecú dóho-í ní cáháⁿ ìⁿ sá nǐ cáháⁿ andiu te càchí-xi:

—Vá chídó tǎnì-n nàcuáa ní cáháⁿ ñúhu-áⁿ, ìⁿ mée-ní-n ná cùhuⁿ —duha càchí sá nǐ cáháⁿ-áⁿ.

5 Te espíritú sá nútnǐ ìⁿ xio sáhá-xi núú ndute làmár-áⁿ ndihí ìngá xio sáhá-xi núú ñuhu yìchí-áⁿ nǐ xiní-í ní ndonehe-xi ndaha cùha-xi,

6 te càchí-xi:

—Yǎ Ndiǒxí Yáá ndécú nchaa nduu nchaa quíú Yáá ní cadúha ñuyíú, ndihí andiu, ndihí làmár, ndihí nchaa sá ío, Yáá-áⁿ náhá ndǎá-gá sá yùhú càháⁿ ndáá-í, te vá cùyàa vìhi

7 te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gǎ xii cue téé ní xinu cuechi núú-gǎ, cue téé ní xóo cáháⁿ tnúhu-gá ndéé sanaha, chí òré ná tǐú espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá nǐ xáhaⁿ-gǎ xii nchaa cue téé-áⁿ —duha càchí espíritú-áⁿ.

8 Te sá tá dúcáⁿ te ní tecú tucu dóho-í ní cáháⁿ tucu sá nǐ cáháⁿ andiu-áⁿ, te càchí-xi xii-í:

—Cuàháⁿ te queheⁿ-n librú lìhli sá nǐ nandicá nùndaha espíritú-áⁿ, espíritú sá nútnǐ ìⁿ xio sáhá-xi núú ndute làmár, te ìⁿ

xio sáhá-xi núu ñuhu yìchí —duha càchí sá nǐ cáháⁿ-áⁿ.

⁹ Te yúhú ní sáháⁿ-í núu ndécú espíritú-áⁿ xicáⁿ-í lìbrú lìhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cuvídí òré xihí-n ndudí ñúñú, dico xití-n chi cada úá-xi —càchí-xi.

¹⁰ Te ní queheⁿ-í lìbrú lìhli nùndaha espíritú-áⁿ nǐ xexi-í, te yuhu-í ní quide vídí-xi dàtná vídí ndudí ñúñú, dico sátá nǐ ngava-xi xití-í te ní quide úá-xi.

¹¹ Te ní cachí tucu espíritú-áⁿ xii-í:

—Dacuití cáháⁿ tucu-ñ nàcuáa càchí Yá Ndiöxí cuendá ñáyiú titní víhí nàcióⁿ, ndihí cuendá ñáyiú titní víhí ñúú, ndihí cuendá ñáyiú càháⁿ ndí dííⁿ ndí dííⁿ núú tnùhu, ndihí cuendá cue téé yìndaha ñáyiú.

11

Cuendá úú cue téé càháⁿ nàcuáa càchí Yá Ndiöxí

¹ Te ní níhí-í ñⁿ tnuyoo nàcuáa chicùhá-í ñⁿ sá chicùhá-í, te ní cáháⁿ ñⁿ sá nǐ cáháⁿ, te càchí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácódó sǎ ndúú tǎhú-gǎ, te cahu-n nǎ daha tnàhá ñáyiú chĩñuhu ñaha xii-gǎ xĩndecu.

² Dico vá chicùhá-n ndàa quehé vehe-gá, chi xíaⁿ nǐ nduu cuendá cue ñáyiú ñá túú cùu ñáyiú israhél, te ñáyiú-áⁿ nduu nuu-nǎ-yu núú nǐ cuu ñuu-gá, te cadá-yu dàtná càchí iní méè-yu, te údico úú yóo ducaⁿ cadá-yu.

³ Te yúhú tendaha-í úú tnàhá cue téé cáháⁿ yuhu-í nàcuáa càchí Yá Ndiöxí, te úxúú cièndú únídico nduu ducaⁿ cáháⁿ-güedé yuhu-í cada-güedé núu-í, te cuihnu-güedé dóó tnúú sǎ sácuihnu cue ñáyiú ndihú iní-xi —duha càchí sá cáháⁿ-áⁿ.

⁴ Te ndi ndúú cue téé-áⁿ cúu-güedé dàtná úú yutnu òlívú sá xĩnutnǐ núú Yá Ndiöxí, ndihí dàtná úú sá ndèé dité-xi, sá yìndòdo ñⁿ caa candíl núú dité-xi ndècu tucu núú-gǎ, te diu-gǎ cúu-gǎ Yaá yìndàha ñuyíú.

⁵ Te ñáyiú na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyiú na cùu úhú iní ñáhá xì-güedé.

⁶ Te ndi ndúú-güedé ndécú ndihí-güedé tnùhu ndee iní cada-güedé sá vǎ cúúⁿ dǎú, te ducaⁿ càda-güedé nini cáháⁿ-güedé nàcuáa càchí Yá Ndiöxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnùhu ndòho, te ducaⁿ càda-güedé ná daha xito càchí iní méé-güedé.

⁷ Te nà yáha sá cáháⁿ-güedé nàcuáa ní cachí Yá Ndiöxí, te dàvá-áⁿ quene ñⁿ quití dééⁿ yàú cùnú víhí sǎ ïo nèhé cáá, te quití-áⁿ ngüita-di nàá-di ndihí ndi ndúú cue téé-áⁿ te cahni ñaha-di xì-güedé.

⁸ Te yiqui cùñú cue téé-áⁿ cautùu-xi ñⁿ tnuú ñuu cahnú núu ní sahani-güedé Xitohó Jesucristú núú cùrúxí, te diu Yaá-áⁿ cúú Xitohó-ó ndihí-güedé, te càchí ñáyiú sá ñúú-áⁿ cúu-xí dàtná ñuu Sòdomá ndihí nàcióⁿ Ègiptú.

⁹ Te úní nduu dava cautùu yiqui cuñú-güedé xíaⁿ, te ñáyiú nchaa nàcióⁿ, ndihí ñáyiú nchaa ñuu, ndihí ñáyiú càháⁿ ndí dííⁿ ndí dííⁿ núú tnùhu, ndihí ñáyiú xĩndecu nchaa xichi quiní-yu yiqui cùñú-güedé, te vá dáñǎ-yu nguìndüxi.

¹⁰ Te nchaa ñáyiú-áⁿ nduu vétú iní-yu sá dúcáⁿ cùú cue téé cáháⁿ nàcuáa càchí Yá Ndiöxí-áⁿ, te ío cudí iní-yu, te nándi sá cuǎha tǎhú tnáhǎ-yu sá cúdí iní-yu sá dúcáⁿ nǐ xihí-güedé, te ducaⁿ chi diu-güedé ní quide ío ní ndohó-yu.

¹¹ Te sátá ná yáhá úní nduu dava sá dúcáⁿ cùu-güedé te Yá Ndiöxí dandòto ñaha-gǎ xii-güedé, te ndacóo-güedé, te nchaa ñáyiú na quiní sá ndótó-güedé te yùhú víhí-yu.

¹² Te ndi ndúú cue téé-áⁿ tecú dóho-güedé cáháⁿ ñⁿ sá càháⁿ ndéé andiú, te cúñaha-xi xì-güedé:

—Chí táquene iha —duha cúñaha sǎ càháⁿ-áⁿ xii-güedé.

Te cue téé-áⁿ quihu-güedé ñⁿ xití vícò caa-güedé andiú, te nchaa ñáyiú cùu úhú iní ñáhá xì-güedé quiní ñáhǎ-yu xii-güedé caa-güedé andiú.

¹³ Te òré-áⁿ ñihí víhi tnáa ñuyíú, te úxí xichi cùu-xi ñuu núú cùndècu-güedé-áⁿ te ñⁿ xichi ñuu-áⁿ naa, te cuú úsá mǐl ñáyiú, te nchaa dava-gǎ ñáyiú cácu vá cùu yùhú

víhí-yu, te cachí-yu sá ïo càhnu cuu Yá Ndiöxí Yaá ndécú àndü.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víí-nã tucu sáá tnúndòho cuu uní.

Espíritú cúú ùsá tíú-xi cútú néhé-xí

¹⁵ Te espíritú cúú ùsá ní tíú-xi cútú néhé-xí, te òré-án ní tecú níhi ní cáháⁿ títní sá ní cáháⁿ andü, te càchí-xi:

Nchaa sá cúú cuèndá nchaa ñáyiú ñuyíú táxi tnùní-yu ni cùu ní nduu cuèndá Tãtá-ó Dütú Ndiöxí táxi tnùní-gá, Te tnàhá Yaá ní tendaha-gã ní sáháⁿ ñuyíú táxi tnùní-gá nchaa xíãⁿ,

te ñu-gá taxi tnùní-gá ni caa ni quíhíⁿ.

Duha ní cáháⁿ nchaa sá ní cáháⁿ-án.

¹⁶ Te ndi òcò cúmí cue té sacuéhé xñucóo núú xilé váha ní ngüíñi xítí-güedé núú Yá Ndiöxí, te ní nuu núú-güedé ndàa núú ñúhu te ní ngüíta-güedé chíñúhu ñaha-güedé xii-gá,

¹⁷ te càchí-güedé:

Ío ndàcáⁿ táhú-ndí núú yòhó Dütú Ndiöxí, Yaá ndácú quide nchaandi túhú sá váha, te ñu-ni-n ndècu-n ndéé cútñàhá ní ngáva ñuyíú, te ñu-ni-n ndècu-n vitna, te ñu-ni-n cùndecu-n ndéé núú cuàháⁿ núú vèxi,

te ío càhnu cuu-n te ní ngüíta-n ïo-gá táxi tnùní-n.

¹⁸ Te nchaa ñáyiú xñdecu ñuyíú xñcudéⁿ-yu núú-n,

te vitna ní sáá nduu dàndohó-n-yu chi ñá túú cùu váha iní-n núú-yu,

te cada ndáá-n cuèchi nchaa ñáyiú sa ní xíhí,

te ní sáá tucu nduu cuãñaha-n sã ndúú táhú nchaa ñáyiú ní xinu cuechi núú-n ní cáháⁿ-yu tnúhu-n, ndihí nchaa dava-gá ñáyiú cùu cuèndá-n, chi ñáyiú-án néhè-yu sá yíñúhu núú-n,

te cuèi ñáyiú cùnuu ndihí ñáyiú ñá túú cùnuu cuãñaha-n sã ndúú táhú-yu,

te ní sáá tucu nduu dànaa-n nchaa ñáyiú sàhni tnaha ñáyiú-xi.

Duha càchí ndi òcò cúmí cue té sacuéhé-ãⁿ xãháⁿ-güedé xii Yá Ndiöxí.

¹⁹ Te ní xiní-í ní nacaáⁿ yuyèhe vehe Yá Ndiöxí andü, te xítí vehe-gá-án ní xiní-í ndécú càjá ñúhu sã yódó tnùní nàcuáa ní cundáa cada-gá sá cúú-xí ñáyiú, te òré-án

ní xiní-í ní sáá nduté, te ní cáháⁿ ñúhu te ío dusaⁿ ní quide-xi, te níhi víhi ní tnáa, te súúni càhnu dáú ñíñí ní cuuⁿ.

12

Cuèndá ñⁿ ñadìhí ndihí cuèndá ñⁿ quiti dééⁿ nání dràgón

¹ Te ío víhi ní quide-xi ñⁿ sá ní quide-xi andü, te ní xiní-í ñⁿ ñadìhí te dóo níhnú-án quide-xi datná quidé-xí núú nchícanhii, te ndàa núú sàhá-aⁿ quide-xi datná quidé-xí núú yóó, te ñúhu ñⁿ coroná díquí-aⁿ te ndéé úxúú chódíní.

² Te ñúhu déhe-aⁿ te càna saa-aⁿ sá quidé ùhú ñáhá-xí xii-aⁿ chi sa ndètu víí-nã cacu déhe-aⁿ.

³ Te dàtnùní ní quide tucu-xi sá ní quide-xi andü, te ní xiní-í ñⁿ quiti càhnu quiti ticuehé, quiti dééⁿ nání dràgón, te ndéé úsá díquí-di ndihí úxí ndiqui-di, te ñⁿ caa coroná ñúhú ñⁿ caa díquí-di-án.

⁴ Te quiti-án luha-ná te cuu dava nchaa chódíní dãngòyo-di ñuyíú ndihí lúhmá-di, te quiti-án ní ngúnu tní-di núú ñaha ndètu víí-nã cacu déhe-xi-án cuèndá caxi-di déhe-aⁿ òré cacu ni cùu.

⁵ Te ñaha-án ní cacu déhe-aⁿ te té cùu-dé, te té líhli-án ïo cunuu-dé taxi tnùní-dé nchaa ñáyiú ñuyíú, te mee Yá Ndiöxí ní nacuaca ñaha-gã xii té líhli-án cuèndá cundecu ndihí ñaha-dé xii-gá núú ndécú-gã táxi tnùní-gá.

⁶ Te ñadìhí-án ní xinu-aⁿ cuáháⁿ-aⁿ xítí yucu núú ní quide túha Yá Ndiöxí cundecu-aⁿ cuèndá xíáⁿ níhí-aⁿ caxi-aⁿ, te ducaⁿ níhí-aⁿ sá cáxí-án úxúú cièndú únídico nduu chí ducaⁿ ndùu cundecu-aⁿ xíáⁿ.

⁷ Te sátá dúcáⁿ te andü ní xiní-í espíritú cùnùu xinu cuechi núú Yá Ndiöxí nání Miguél, ndihí nchaa dava-gá espíritú cùndìhí-xi, te nchaa espíritú-án nàá-xi ndihí quiti dééⁿ nání dràgón ndihí nchaa espíritú cùndìhí-di.

⁸ Te quiti-án ñà túú ní ndàcu-di ndihí nchaa espíritú cùndìhí-di, te ñá túú ní níhí-gã-di núú cùndècu-di andü ndihí nchaa espíritú cùndìhí-di-án.

⁹ Te cue espíritú xínú cuèchi núú Yá Ndiöxí-án ní dãngává-xí quiti dééⁿ nání dràgón-án ndihí nchaa espíritú cùndìhí-di ñuyíú, te quiti-án cúú-dí mèi sácúíhná àdi

sá cãchí-ó cùu yucu ñávãha, te ðiu xíãⁿ ní dándàhú-xi ñáyiu ñihí ñuyúú, te ðiu-ni xíãⁿ ní nduu-xi cóó ñí dándàhú-xi ñáyiu ndéé sanaha.

¹⁰ Te ní tecú dóho-í ñihí ní cáháⁿ tucu ñíⁿ sá ñí cáháⁿ andiu, te cãchí-xi:

—Vitna te Yá Ndiõxí ní quide-gá ní ngúndecu ñáyiu ndihí-gá, te ío cãhnu cuu-gá, te ío tàxi tnuní-gá, te tnàhá Crìstú Yaa ní tendaha Yã Ndiõxí ní quixi ñuyúú-a ío tàxi tnuní-gá, te ducaⁿ chi sa ní xócuíñí sãcuíhná sã sũúni ñunúu sacáⁿ cuéchi núú Tãtã-ó Dútú Ndiõxí cuendá nchaa ñáyiu ndècu ndihí-o ichi-gá, te nduu niú ducaⁿ sãcáⁿ cuéchi-xi núú-gã cuendá-yu ni cùu.

¹¹ Dico ní ndacú-yu ní cunúú-yu núú sãcuíhná sã dúcãⁿ sãcãⁿ cuéchi cuendá-yu-ãⁿ ní cùu, te ducaⁿ ñí cunúú-yu sá cuendá Yaa cáá dàtná cáá ñíⁿ mbéé quiti ní dánícuèhé-güedé, chi Yaa-ãⁿ ñí sati níñí-gã te ní xihí-gá sá cuendá-yu, te ducaⁿ ñí cunuu tucú-yu sá cuendá sá sãndáá iní ñãhá-yu xii Yaa-ãⁿ, te ñã túú ní yuhú-yu cuú-yu sá cuendá-gá.

¹² Te vitna ío chí cúdñí iní nchaa nchòhó espíritú xínú cuèchi núú Yã Ndiõxí, ndihí nchaa nchòhó ñáyiu ndècu andiu, dico ñndàhú ní cuu nchaa ñáyiu xíndecu ñihí ñuyúú! Chi sũúni cùdééⁿ sãcuíhná ñí ngava-xi te nãndi cada ñaha-xi xii-yu, te ducaⁿ chi cùtnuní iní-xi sá sãcú duha-ná nduu cudí-xi cundecu-xi —duha cãchí sá ñí cáháⁿ andiu.

¹³ Te sátá ñí quee quiti dééⁿ nání dràgón-ãⁿ andiu ñí ngava-di ñuyúú quiti cùu meí sãcuíhná-ãⁿ, te quiti-ãⁿ ñí chinchícúⁿ-di ñadìhí ñaha ní cacu déhe téé-xi-ãⁿ.

¹⁴ Te ñadìhí-ãⁿ ñí nduu táhú-aⁿ ní quene úú ndíxí-aⁿ, te càa datná cáá ndíxíⁿ ñíⁿ yacòlo cahnu vihi cuendá ndava-aⁿ núhú-aⁿ yucu núú ñí cachí Yã Ndiõxí cundecu-aⁿ, te yacãⁿ cundecu-aⁿ úní cuíá dava cuendá sá vã ñihí ñãhá quiti dééⁿ quiti nani dragón-ãⁿ te xíãⁿ ñihí-aⁿ sá cáxí-ãⁿ, te quiti-ãⁿ cúú tucu-di datná ñíⁿ cóó dèéⁿ.

¹⁵ Te quiti-ãⁿ ñí quene cuéhé ndute yuhu-di, te ndute ní quene yuhu-di-ãⁿ ñí cuu-xi ñíⁿ yúte, te ducaⁿ ñí quide-di cuendá ndute-ãⁿ cuido-xi ñadìhí-ãⁿ ní cùu.

¹⁶ Te ñuhu yìchí ní chindee-xi ñadìhí-ãⁿ, chi ní ndátá te ní quée naa-ni ndute ní

quene yuhu quiti-ãⁿ.

¹⁷ Te sá dúcãⁿ ñí quide-xi xíãⁿ ní cudééⁿ víhí quiti-ãⁿ núú ñadìhí-ãⁿ, te ní xica-di cuáhãⁿ-di núú xíndecu nchaa dava-gá cue déhe ñadìhí-ãⁿ cuendá nàá ndihí ñaha-di, te ñáyiu-ãⁿ cúú-yu ñáyiu tnìⁿ nchaa tnúhu cãháⁿ Yã Ndiõxí, te nchìcúⁿ ñihnú-yu nchaa tnúhu sá cãháⁿ váha cuendá Xítóhó Jesu-crìstú.

13

Cuendá úú quiti

¹ Te yuhú ní ngúnu tnìⁿ-í yuhu làmár, te ní xiní-í ní quene ñíⁿ quiti te ndéé úsá díquí-di te úxí ndiqui-di, te núú ñíⁿ ñíⁿ ndiqui-di-ãⁿ ndécú ñíⁿ caa coroná. Te ñíⁿ ñíⁿ díquí-di-ãⁿ ndéé tnúhu sá cãháⁿ úhú-xi cuendá Yã Ndiõxí.

² Te quiti-ãⁿ cáá-dí dàtná cáá cuíñí, te sãhá-di càa datná cáá sãhá òso, te yuhu-di càa datná cáá yùhu ndicaha. Te quiti dééⁿ nání dràgón ní sãñaha-di tnúhu ndee iní xii quiti-ãⁿ cuendá taxi tnùnì víhí-dí, te dràgón-ãⁿ ñí sãñaha-di núú ndécú-dí tàxi tnuní-di xii quiti ní quene xití làmár-ãⁿ, te ducaⁿ ñí quide-di cuendá sá ñihí ndéé quiti-ãⁿ cunuu-di.

³ Te ñíⁿ díquí quiti ní quene xití làmár-ãⁿ cãhú víhí càa ní nícuèhé, te sa ndètu víí-nã cuú-di sãnuu dico ní ndúha-di, te ñihí ñuyúú ñí ñihí ñáyiu tnúhu sá dúcãⁿ ñí cuu, te ío ní cuñúhu-yu te ní tuhá-yu quiti-ãⁿ.

⁴ Te nchaa ñáyiu-ãⁿ ñí cachí-yu sá ño cãhnu cuu quiti dééⁿ quiti nani dragón-ãⁿ cuendá sá ñí sãñaha-di tnúhu ndee iní sá táxi tnùnì quiti ní quene xití làmár-ãⁿ, te ní ngúita-yu ní chiñuhú-yu quiti ní quene xití làmár-ãⁿ, te cãchí-yu:

—Vã yõo ñíⁿ nùtnahá ñãhá xii quiti-a, te ni vã yõo ñíⁿ ndacu nàá ndihí ñaha xii-di —cachí-yu.

⁵ Te ní ñihí-di tnúhu ndee iní sá cãháⁿ úhú-di Yã Ndiõxí, te cada cãhnu-di mee-di, te údico úú yóo ducaⁿ ñí ñihí-di tnúhu ndee iní-ãⁿ cunuu-di.

⁶ Te ducaⁿ ñí quide-di ní cáháⁿ úhú-di Yã Ndiõxí ndihí cuendá nchaa sá quidé-gã, te ðiu-ni ducaⁿ ñí cáháⁿ úhú-di núú ndécú-gã,

te ní cáháⁿ úhú tucu-di nchaa ñáyiú ndècu ndihí-gá andiú.

7 Te ducaⁿ ñí níhí-di tnúhu ndee ìní sá nàá-di ndihí nchaa ñáyiú cùu cuendá Yá Ndiòxí, te ducaⁿ nàá ndihí ñaha-di xii-yu ndéé òré vá ndácú-gã-yu nàá ndihí ñàhá-yu xii-di, te tnàhá ní ngúndecu ndihí-di tnúhu ndee ìní sá táxí tnùní-di ñáyiú nchaa nàcióⁿ, ndihí ñáyiú nchaa ñuú, ndihí nchaa ñáyiú càháⁿ ndí dííⁿ ndí dííⁿ núú tnúhu, ndihí ñáyiú xíndecu nchaa xichi.

8 Te cue ñáyiú ñihí ñuyúú ñí cachí-yu sá ïo càhnu cuu quití-áⁿ, te ñáyiú-áⁿ cúú-yu ñáyiú ñá túú yòdo tnuní núú tütú Yáá cáá dàtná cáá ñí mbéé quití ní dánícuèhé-güedé Yáá ní xihí ní cùu te ní ndoto. Te ndéé cùtnàhá ní ngáva ñuyúú sa yòdo tnuní ñáyiú naníhí tàhú, dico ñáyiú càchí sá ïo càhnu cuu quití-áⁿ ñà túú yòdo tnuní-yu núú tütú-gá.

9 Te nchaa nchòhó ñáyiú xíndedóho chí cùndedóho váha nchaa nàcuáa cuáháⁿ tnúhu-áⁿ.

10 Te nchaa ñáyiú na chihí tnaha ñáyiú-xi vecaá te sáá nduu te quíhíⁿ-yu tnàhá-yu vecaá, te nchaa ñáyiú sàhni tnaha ñáyiú-xi ndihí yuchí te ñu-ni ndihí yuchí cúú-yu tnàhá-yu, te xíáⁿ núú ío xini ñuhu-xi sá ncháá ñáyiú cùu cuendá Yá Ndiòxí cunduu càhnu iní-yu, te quíndáá iní ñáhã-yu xii-gá.

11 Te ní xiní tucu-í ingá quití ní quene-di núú ñuhu yìchí, te ndèé úú ndiqui-di te càa datná cáá ndiqui canerú, te càháⁿ-di dàtná càháⁿ quití dééⁿ nání dràgón.

12 Te dàtná ndécú ndihí quití ní quene xití làmár-áⁿ tnúhu ndee ìní sá táxí tnùní-di ducaⁿ ndècu ndihí quití ní quene ñuhu yìchí-áⁿ tnúhu ndee ìní taxi tnùní-di cada-di núú quití ní quene xití làmár-áⁿ, te quití ní quene ñuhu yìchí-áⁿ ñí quide yica-di sá ncháá ñáyiú xíndecu ñihí ñuyúú chiñuhú-yu quití ní quene xití làmár-áⁿ, quití càhú víhí ñí tnàhá ní nícuèhé te ní ndúha-di.

13 Te quití ní quene xití ñuhu yìchí-áⁿ ñí quide-di titní núú sá vã yòo tnàhí ndàcu cada, te nchaa ñáyiú ní xiní-yu sá ndèé andiú ñí dányóyó-dí ñùhú ñuyúú.

14 Te sá dúcáⁿ ñí ngúndecu ndihí-di tnúhu ndee ìní ní quide-di nchaa xíáⁿ ní quide-di núú quití ní quene xití làmár-áⁿ, te sá

dúcáⁿ ñí quide-di te xíáⁿ ní dándàhú-di nchaa ñáyiú xíndecu ñihí ñuyúú, te ní xáhaⁿ-di xii-yu sá ndúcú-yu ñí sá cáduha-yu nàcuáa-ni càa nacuáa-ni nduu quití ní quene xití làmár-áⁿ, quití càhú víhí ñí tnàhá ní nícuèhé díquí-xi-áⁿ ñí quée machití te ñá túú ní xihí-di chí ní xíndecu-ni-di.

15 Te quití ní quene xití ñuhu yìchí ní ngúndecu ndihí tucu-di tnúhu ndee ìní sá chíhí-dí ìní sá ñí cadúha-yu-áⁿ, sá ñí natavá-yu dàtná cáá quití ní quene xití làmár-áⁿ, te ducaⁿ ñí quide quití-áⁿ cuendá cáháⁿ sá ñí cadúha-yu-áⁿ, te xíáⁿ cada-xi cúú nchaa ñáyiú ñá túú ní cuíni chiñuhu ñaha xii-di.

16 Te quití ní quene xití ñuhu-áⁿ quidé-dí sá ncháá ñáyiú ngúndéé ñí tnuní ndaha cùhá-yu àdi tneé-yu, te ducaⁿ ñí quide-di cuèi ñáyiú cùnuu te cuèi ñáyiú ñá túú cùnuu, te cuèi ñáyiú cuica te cuèi ñáyiú ndàhú, te cuèi ñáyiú ñá túú dàñá quee núú chíúⁿ pàtróóⁿ-xi, te cuèi nchaa ñáyiú dàñá quée núú chíúⁿ pàtróóⁿ-xi ncháá-yu ducaⁿ ñí ngúndéé tnuní ñí-yu.

17 Te ní quide-di sá ncháá ñáyiú ñá túú ndéé tnuní ñí-xi vá cúú cuááⁿ-yu sá càchí iní-yu te ni vã cúú dicó-yu ñí sá cuíni-yu dicó-yu, te tnuní-áⁿ cúú-xí ñíu quití ní quene xití làmár-áⁿ àdi número-di.

18 Te xini ñuhu-xi sá ncháá ñáyiú ío váha cùtnuní iní-xi ío váha cuáha-yu cuendá nàcuáa quèe-xi número quití-áⁿ, te número-áⁿ cúú-xí ñíu cièndú únídico ñíu, te cùu-xi cuendá ñí ñáyiú ñuyúú.

14

Cuendá ñí cièndú údico cúmí mĩ ñáyiú

1 Te sátá dúcáⁿ te ní xiní-í Yáá cáá dàtná cáá ñí mbéé quití ní dánícuèhé-güedé nútní-gá ñí yucu ñuú nání Sión ndécú àndiú, te nutní-gá ndihí ñí cièndú údico cúmí mĩ ñáyiú, te tneé-yu ndèé ñí-gá ndihí ñíu tátá-gã Dútú Ndiòxí.

2 Te ní tecú dóho-í ní quide-xi andiú dàtná quidé-xi núú xicá cuèhé víhí ndùte, te quide tucu-xi datná quidé-xi òré níhi víhi cáháⁿ ñúhu, te quide tucu-xi datná quidé-xi òré cuèhé víhí ñáyiú càní-yu àrpá.

³ Te ní tecú dóho-í xǐxita yuhu sǎ xítá yùhu núú Yàá núcõo núú xilé váha, ndihí núú ndi cùmí cue quití xǐnutnǐ-án, ndihí núú nchaa cue tée cùu sacuéhé xǐnucóo-án, te xǐxita-xi ìⁿ ndudú sáá. Te mee-ni cuè ñáyiú ìⁿ cièndú údico cùmí ml-án quèe díquǐ-yu ndudú-án, te ñáyiú-án cúŷ-yu ñáyiú ní dácäcu nihnu ñaha Yàá cáá dàtná cáá ìⁿ mbéé quití ní dánicuéhé-güedé núú ñáyiú ndècu ichi cuehé ichi duha xǐndecu ñuyíú, te vá yõo ìⁿ-gá quèe díquǐ-xi ndudú sáá-ǎⁿ chi mee-ni ñáyiú ní cácu nihnu-án quèe díquǐ-yu.

⁴ Te ñáyiú ní cácu nihnu-án cúŷ-yu ñáyiú ñá túú ní xǐndecu ichi díí ìní, te cùu-yu ñáyiú càndoo canine iní-xi, te ndèni ní cuu cuáháⁿ Yaá cáá dàtná cáá ìⁿ mbéé quití ní nícuéhé-án, te ducaⁿ-ni ndèndaha ñahá-yu xii-gá cuáháⁿ, te ñáyiú-án ní cácu nihnú-yu núú nchaa ñáyiú ñuyíú, ñáyiú ndècu ichi cuehé ichi duha, te ñáyiú ní cácu nihnu-án cúŷ-yu ñáyiú díhna nuu ní nduu táhú Yǎ Ndiõxí cuu cuèndá-gá ndihí Yaá cáá dàtná cáá ìⁿ mbéé quití ní dánicuéhé-güedé.

⁵ Te cùu-yu ñáyiú ñá túú càháⁿ ni ìⁿ tnúhu ndehnde, te càndoo canine iní-yu ndècú-yu núú núcõo Yǎ Ndiõxí táxi tnùnì-gá.

Cuèndá úní cue espíritú xínú cuèchi núú Yǎ Ndiõxí

⁶ Te sátá dúcáⁿ te ní xiní-í ìⁿ espíritú xínú cuèchi núú Yǎ Ndiõxí xícó-xí cuǎdava andiu, te ndècu ndihí-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihí nihnu te tnúhu-án danèhé espíritú-aⁿ nchaa ñáyiú ndècu ñuyíú, ñáyiú nchaa nàcióⁿ, ndihí ñáyiú nchaa ñuú, ndihí nchaa ñáyiú càháⁿ ndí dííⁿ ndí dííⁿ núú tnúhu, ndihí ñáyiú xǐndecu nchaa xichi.

⁷ Te níhi ní cáháⁿ-xi te càchí-xi:

—Nchaa nchòhó ñáyiú ndècu ñuyíú canehe-ndo sǎ yǐñuhu núú Yǎ Ndiõxí, te cachí-ndó sǎ ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gǎ chi diu-gá ní cadúha-gá andiu, ndihí ñuhu yìchí, ndihí làmár, ndihí nchaa ndóhoyo —duha càchí espíritú-án.

⁸ Te nchìcúⁿ tucu ingá espíritú xínú cuèchi núú Yǎ Ndiõxí, te càchí-xi:

—Vitna ní naa ñuú Babiloniá ñuú ío cùnuu, te ducaⁿ ñí naa chi cue ñáyiú ñuú-án ñí quidé-yu ní xítá nihnu nchaa ñáyiú nihí ñuyíú, chi ní sanu ichi ñahá-yu ichi cuèhé ichi duha —duha càchí espíritú-án.

⁹ Te nchìcúⁿ tucu ingá espíritú xínú cuèchi núú Yǎ Ndiõxí te níhi càháⁿ-xi, te càchí-xi:

—Nchaa ñáyiú chiñuhu ñaha xii quití ní quene xití làmár, ndihí sá ñí natava ñahá-yu nàcuáa càa-di-án, ñáyiú ní dáñá mèe-xi ní ngúndeé tnuní ndahá-yu àdi tneé-yu,

¹⁰ ñáyiú-án sùúnì dàndoho ñaha Yǎ Ndiõxí xii-yu chi ío cùdèéⁿ-gǎ, te ducaⁿ ìo dandòho ñaha-gá xii-yu chi daquihíⁿ ñahá-gǎ xii-yu núú ñuhú núú ñuhú àzufre càyú-xi, te núú cuè espíritú xínú cuèchi núú-gǎ ducaⁿ dàndoho ñaha-gá xii-yu, ndihí núú Yàá cáá dàtná cáá ìⁿ mbéé quití ní dánicuéhé-güedé.

¹¹ Te ni caa ni quíhíⁿ quene ñúhmá núú dúcáⁿ cùndecú-yu ndohó-yu-án, te cuèi nduu cuèi niú ducaⁿ ndohó-yu. Te ducaⁿ ndòho nchaa ñáyiú chiñuhu ñaha xii quití ní quene xití làmár, ndihí sá ñí natava ñahá-yu nàcuáa càa-di-án, te diu-ni ñáyiú-án cúŷ-yu ñáyiú ní ngúndeé tnuní ndaha-xi àdi tneé-xi —duha càchí espíritú-án.

¹² Te xǐǎⁿ xínì ñuhu-xi sá ncháá ñáyiú cùu cuendá Yǎ Ndiõxí cunduu càhnu iní-yu, chi diu-ni-yu cùu-yu ñáyiú tnè nchaa tnúhu càháⁿ-gá, te ni yùhu ni iní-yu sàndáá iní-yu Xítóhó Jesucristú.

¹³ Te sátá dúcáⁿ te ní tecú dóho-í ní cáháⁿ ìⁿ sá ñí cáháⁿ andiu, te càchí-xi:

—Chido tnùnì-n ìⁿ núú tütú nàcuáa na càháⁿ-í-a. “Není vitna ío váha táhú nchaa ñáyiú sàndáá iní tnúhu Xítóhó Jesucristú te xihí-yu” —duha càchí sá ñí cáháⁿ-án.

Te Espíritú Yǎ Ndiõxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gǎ nágá chiúⁿ ndohó-yu cadá-yu, te Yǎ Ndiõxí sa ñaha-gá nchaa nàcuáa nduu chiúⁿ ní quidé-yu —duha càchí Espíritú-gá.

Nchaa sá cúú núú ñuhú

¹⁴ Te sátá dúcáⁿ te dàtnùnì ní xiní-í ìⁿ vícò cuixíⁿ, te núú vícò-ǎⁿ ñí xiní-í núcõo ìⁿ Yaá, te càa-gá dàtná cáá ìⁿ téé ñuyíú, te díquǐ-gǎ ñuhú ìⁿ coroná ní cuáha mee-ni

dǐhúⁿ cuàáⁿ, te nùndaha-gá ìⁿ yuchí ndíquí te súúni dǐéⁿ.

15 Te ní xiní-í ìⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní cáháⁿ-xi xǎhaⁿ-xi xìi Yaá núcõo núú vǐcõ-ǎⁿ:
—Sa ní cuu nàquehndé-n nchàa sá ñì cuu ñuyíú ndìhi yuchí ndíquí-n, chi sa ní cuu nucóo tnàha-xi —duha càchí espíritú-áⁿ xǎhaⁿ-xi xìi Yaá-áⁿ.

16 Te Yaá núcõo núú vǐcõ-ǎⁿ ñì dáyàha ndodo-gá yuchí ndíquí-gǎ núú ñuyíú ñì nataxi tnàha-gá nchaa sá ñì cuu.

17 Te ní xiní tucu-í ingá espíritú xínú cuèchi núú Yá Ndiöxí ní quee-xi xití vehe-gá sá cáá àndiu, te nùndaha-xi tnahá-xi ìⁿ yuchí ndíquí dǐéⁿ.

18 Te ní xiní tucu-í ní quee tucu ingá espíritú xínú cuèchi núú Yá Ndiöxí núú nútnǐ núú sácõdó sǎ ndúú tǎhú-gǎ, te ndècu ndìhi-xi tnúhu ndee ìní táxi tnùnì-xi ñuhú, te espíritú-áⁿ ñìhi ní cáháⁿ-xi xǎhaⁿ-xi xìi espíritú néhé yùchí ndíquí dǐéⁿ-áⁿ:

—Ngüíta naquehndé-n ndìhi yuchí ndíquí-n ndéhé yoho yàha stilé sá ió ñuyíú chi sa ní cuu nàtehndé —duha càchí espíritú-áⁿ xǎhaⁿ-xi xìi espíritú néhé yùchí ndíquí-ǎⁿ.

19 Te espíritú néhé yùchí ndíquí-ǎⁿ ñì dáyàha ndodo-xi yuchí ndíquí-xi núú ñuyíú ñì nàquehndé-xi nchaa ndéhé yoho yàha stilé, te ní chihi-xi ìⁿ xichi núú ñì chihi-xi cuèndá xíáⁿ quihni-xi quee ndudí-xi, te sá dúcáⁿ ñì quide-xi xíáⁿ cútnùnì ìní-ó sǎ ìo cùdǐéⁿ Yá Ndiöxí núú ñáyiu ñuyíú.

20 Te ndéhé yoho yàha stilé-áⁿ ñì quihni-xi ìⁿ xio yuhu ñúú, te ndudí ndéhé yoho yàha stilé-áⁿ ñì nduu-xi ñìñì te ní quee-xi núú quíhni ñìhnu espíritú-áⁿ. Te únì cièndú mǐl mǐtrú ní xica ñìñì-ǎⁿ, te dàtná ìⁿ mǐtrú dava ní sáá cuehnu ñìñì-ǎⁿ ñì xica-xi.

15

Úsá tnúndòho

1 Te ió vǐhi ní quide-xi ìⁿ sá ñì quide-xi àndiu te ní cuñúhu vǐhi-í, te ní xiní-í úsá tnàhá espíritú xínú cuèchi núú Yá Ndiöxí, te ìⁿ ìⁿ cue espíritú-áⁿ ndécú ndìhi-xi tnúhu ndee ìní dandòho-xi ñáyiu ñuyíú, te nà

yáha nchaa tnúndòho-áⁿ, te vá cùdǐéⁿ-gǎ Yá Ndiöxí núú-yu dándòho ñaha-gá xii-yu.

2 Te ní xiní-í ìⁿ làmár te ndute làmár-áⁿ cáá dàtná cáá vǐdriú, te dàcànúu-xi ndìhi ñuhú, te yuhu làmár-áⁿ xǐnutnǐ nchaa ñáyiu ní ndacu ní dáquée tǐhú ñáhá xìi quiti ní quene xití làmár-áⁿ, te ducaⁿ ñì ndacú-yu ní dáquée tǐhú-yu sá ñì natava ñáhá-yu nàcuáa càa-di-áⁿ, te ducaⁿ ñì ndacu tucú-yu ní dáquée tǐhú tucú-yu númerú-di sá cúú dàtná diu-di, te nchaa ñáyiu-áⁿ ñì nduu tǎhú-yu núú Yá Ndiöxí àrpá xǐnehé-yu cuèndá caní-yu.

3 Te xǐxitá-yu ndudú sá ñì xita ndíi Moisés ndíi ní xinú cuechi núú Yá Ndiöxí ndéé sanaha, te xita tucú-yu ndudú Yaá cáá dàtná cáá ìⁿ mbéé quiti ní dǎncuèhé-güedé, te càchí-yu:

Yòhó Dútú Ndiöxí ió càhnu cuu-n, chi quide-n nchaa sá vǎ yõ tnàhí ndàcu cada,

te cùu-n Yaá ndácú quide nchaandi túhú sá vǎha,

te ió ndáá quidé-n te ió ndáá càháⁿ-n, te yǐndaha-n nchaa ñáyiu ñìhì ñuyíú.

4 Te nchaa ñáyiu nèhé-yu sá yǐñùhu núú-n, te ncháa-yu càchí-yu sá ìo càhnu cuu-n, chi ìⁿ dǐi dǐi-ni yòhó cúú-n Yáá ió váha quide ndáá,

te nchaa ñáyiu ñìhì ñuyíú natacá-yu chiñuhu ñáhá-yu xii-n,

te ducaⁿ càdá-yu chi ndéhé-yu nchaa sá vǎha quide-n.

Duha càchí ñáyiu-áⁿ xǐxitá-yu.

5 Te sátá dúcáⁿ te ní xiní-í ní nacaáⁿ yuyèhe vehe Yá Ndiöxí àndiu, te xití vehe-gá-áⁿ ndécú sǎ ndéè tnúhu-gá.

6 Te xití vehe-gá-áⁿ ñì quee úsá tnàhá espíritú xínú cuèchi núú-gǎ, te ìⁿ ìⁿ-xì ndècu ndìhi-xi tnúhu ndee ìní dandòho-xi ñáyiu, te xǐxǐhnu-xi mee-ni dǐó vǎha, te súúni vǎha càndoo, te chàhnhí, te yǐdúcúⁿ nuu cínchú ní cuáha mee-ni dǐhúⁿ cuàáⁿ pèchú ndi úsá cue espíritú-áⁿ.

7 Te ìⁿ quiti cúmí xǐnutnǐ núú nútnǐ xǐlé váha ní sǎñaha-di ìⁿ caa sá nàhá tǐcúú ní cuáha mee-ni dǐhúⁿ cuàáⁿ xii ìⁿ ìⁿ espíritú-áⁿ, te xití nchaa tǐcúú-áⁿ ñuhú ìⁿ sá ñuhú te xíáⁿ cútnùnì sá Yá Ndiöxí

dandòho-gá ñáyiú ñuyíú, te ñu-gá cúu-gá Yaá ndécú nchàa nduu nchaa quíú.

⁸ Te xití vehe-gá-áⁿ ñí chítú ñúhmá, te ducaⁿ ñí quide-gá cuendá cutnùní iní ñáyiú sá ïo càhnu cuu-gá táxí tnùnigá, te vá yóo ñⁿ cuu quíhu xití vehe-gá-áⁿ ndèé ndihí ndi ùsá tnúndòho cada ndi usá cue espíritú-áⁿ ñuyíú.

16

Tnúndòho cada-xi ñuyíú

¹ Te sátá dúcáⁿ te ní tecú dóho-í níhi ní cáháⁿ ñⁿ sá ñí cáháⁿ xití vehe Yá Ndiòxí, te xàhaⁿ-xi xii ndi usá cue espíritú-áⁿ:

—Chí cuaháⁿ coyo-ndo sá ñúhú xití nchaa tícúú néhé-ndó-áⁿ núú ñuyíú, chi sá ñúhú-áⁿ cúu-xí tnúndòho tendaha Yá Ndiòxí sá cúu-xí nchàa ñáyiú ñuyíú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xití tícúú néhé-xí-áⁿ ñuyíú, te nchaa ñáyiú ñuhu tnuní quití ní quene xití làmár ñáyiú ní chiñuhu sá ñí natava ñàhá-yu xii-di, nchaa ñáyiú-áⁿ ñí quené-yu ndihyi tèhyú te súúni dàndòho ñaha-xi xii-yu.

³ Te espíritú cúu ùú ní coyo-xi sá ñúhú xití tícúú néhé-xí núú làmár, te ndute làmár-áⁿ ñí nduu-xi níñí te càa-xi datná cáá níñí ñáyiú sa ní xihí, te nchaa quití ñuhu xití làmár-áⁿ ñí xihí-güedi.

⁴ Te espíritú cúu ùní ní coyo-xi sá ñúhú xití tícúú néhé-xí nchàa yúte ndihí nchaa núú quèñhni ndute, te ndute nchaa yúte-áⁿ ndihí nchaa ndute quèñhni-áⁿ ñí nduu-xi níñí.

⁵ Te sátá dúcáⁿ te ní tecú dóho-í ní cáháⁿ ñⁿ espíritú xínú cuèchi núú Yá Ndiòxí, espíritú yíndàha ndute, te xàhaⁿ-xi xii Yá Ndiòxí:

—Yòhó Dútú Ndiòxí cúu-n Yàá quidé ndáá cuítí núu duha quide-n tendaha-n tnúndòho-a, te ñu-ni-n cùu-n Yaá ndécú ndèé cútnàhá ní ngáva ñuyíú, te ñu-ni-n cùu-n Yaá ndécú vitna te ñá túú tnàhí cuèchi-n.

⁶ Chi cue ñáyiú ñuyíú ñí dácácä-yu níñí nchaa ñáyiú ní cáháⁿ tnúhu-n ndihí nchaa dava-gá ñáyiú cùu cuendá-n, te ní sahní-yu nchaa ñáyiú-áⁿ, te vitna ní dátíú-n ndute ní nduu-xi níñí te ducaⁿ-ni càa ndute-áⁿ

xihí-yu, te ducaⁿ tàú-xi ndohó-yu cuendá sá ñí sahní-yu cue ñáyiú cùu cuendá-n —duha càchí espíritú-áⁿ xàhaⁿ-xi xii-gá.

⁷ Te ní tecú tucu dóho-í ní cáháⁿ ñⁿ sá ñí cáháⁿ núú nútní núú sácódó sá ndúú tãhú Yá Ndiòxí, te xàhaⁿ-xi xii-gá:

—Ndáá sá yòhó Dútú Ndiòxí Yaá ndácú quide nchaandi túhú sá vãha dàndòho-n ñáyiú nàcuáa tàú-xi cunduu —duha càchí sá càháⁿ-áⁿ xàhaⁿ-xi xii-gá.

⁸ Te espíritú cúu cùmí ní coyo-xi sá ñúhú xití tícúú néhé-xí núú nchíanchii cuendá nchíanchii-áⁿ cahmi-xi nchaa ñáyiú ñuyíú.

⁹ Te nchaá-yu ní ndoho vñí-yu ní cáyú-yu, te cuèi ducaⁿ ñí ndohó-yu díco ñá túú ní cuíní-yu ndixi cuèchi iní-yu cuendá nchaa sá ñà túú vãha quidé-yu, te ní ñà túú ní càchí-yu sá ïo càhnu cuu Yá Ndiòxí chi da ní cáháⁿ úhú-yu cuendá-gá, te ñu-gá cúu-gá Yaá ducaⁿ ñí tendaha tnúndòho-áⁿ sá cúu-xí-yu.

¹⁰ Te espíritú cúu ùhú ní coyo-xi sá ñúhú xití tícúú néhé-xí núú ndécú quití ní quene xití làmár-áⁿ táxí tnùní-di, te nchaa núú táxí tnùní-di ní cuu nee, te nchaa ñáyiú ñuyíú ndéé yàa-ná-yu nàcaxi nihnú-yu sá ndóhó-yu.

¹¹ Dico ní dùcaⁿ ñá túú ní cuíní-yu dàñá-yu ní ñⁿ sá cuèhé sá dúhá quidé-yu, chi da ní cáháⁿ úhú-yu cuendá Yá Ndiòxí Yaá ndécú àndíu sá cuendá sá dàndòho ñaha ndihyi tèhyú ndèé-yu-áⁿ ndihí nchaa dava-gá sá yãha-yu.

¹² Te espíritú cúu ìñú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-áⁿ ñí yíchí cuendá yãha cue tée yíndaha ñáyiú xíndecu ndàa xio nacuáa quène nchíanchii.

¹³ Te ní xiní-í ní quee ñⁿ espíritú cùndihí yucu ñávãha yuhu quití dééⁿ nání drágón, te ní xiní tucu-í ní quee tucu ñngá espíritú cùndihí yucu ñávãha yuhu quití ní quene xití làmár, te ní xiní tucu-í ní quee tucu ñngá espíritú cùndihí yucu ñávãha yuhu tée dàndahú ñáyiú càchí sá càháⁿ tnúhu Yá Ndiòxí te ñá ndáá, te ndi nùní espíritú-áⁿ xíndáa-xi datná cáá làhvã.

14 Te ndi nùní espíritú-áⁿ quidé-xí sǎ vǎ yõo tnàhí ndàcu cada, te xìca dat-acá-xi nchaa cue téé yìndaha ñaha xii ñáyiu xĩndecu nihíí ñuyíú cuendá nàá-güedé mei ndùu cachí Yǎ Ndiõxí coo tnúndòho cahnu vihi-gá, te ðiu mee Yǎ Ndiõxí cúú-gǎ Yaá ío càhnu cuu.

15 Te Yaá cúú Xìtohó-ó nǐ cachí-gá: “Cu-naha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiu xĩndecu túha, chi cùu-ndo datná cue ñáyiu xĩndecu túha xixĩhnu-ni dóó-xi cuendá sá vǎ cúcàhaⁿ núú-yu dàtná cúcàhaⁿ núú cué ñáyiu ñá túú nihnu dóó-xi, te duha càháⁿ-í cuendá sá nchòhó cundecu túha-ndo òrè quexio-í”, duha càchí-gá.

16 Te ndi nùní cue espíritú cùndìhi yucu ñávǎha-áⁿ nǐ dátàcá-xi nchaa cue téé yìndaha ñaha xii ñáyiu, te ní taxi ndecu ñaha-xi ñⁿ xichi núú nání Àrmagedón, duha nàni xíáⁿ tnùhu hèbreú.

17 Te espíritú cúú úsá ní coyo-xi sá ñúhú xití tícùú néhé-xí núú tàchí, te ní tecú dóho-í níhi ní cáháⁿ Yaá núcõo núú xilé váha xití vehe-gá, te càchí-gá:

—Xéhé-nǎ cúmǎní te xínu cava nchaa tnúndòho tnùhu ndàhú —duha càchí-gá.

18 Te sátá dúcáⁿ te ní sáá ndúté te ní cáháⁿ ñúhu, te súúni dùsaⁿ ní quide-xi, te níhi vihi ní tnáa ñuyíú, te ndéé cùtnàhá ní ngúndecu ñáyiu ñuyíú te vátá ñⁿ xitò-gá níhi tnáa dàtná ní quide-xi.

19 Te ñuú cáhnú ïo cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihíí ñuyíú nǐ ngoyo nchaa vehe, chi Yǎ Ndiõxí ní ndacu iní-gá nchaa sá cuèhé sá dúhá quide nchaa ñáyiu ñuú Babiloniá-áⁿ, te ducaⁿ nǐ quide ñaha-gǎ xii-yu chi ío cùdééⁿ-gǎ núú-yu.

20 Te nchaa tindúú nǐ ndóñúhú-xí cuéi nchaa tindúú ñuhu yìchí ndécú xití làmár.

21 Te ní xiní-í ní cuuⁿ ñiñi nàhnu vihi ní ngaundodo-xi cue ñáyiu ñuyíú, te nchaa ñiñi-áⁿ vée-xi dàtná údico kílú, te cue ñáyiu ñuyíú nǐ cáháⁿ úhú-yu cuendá Yǎ Ndiõxí sá dúcáⁿ nǐ dácúúⁿ-gǎ ñiñi nàhnu vihi-áⁿ, chi ní cuu-xi ñⁿ tnúndòho cahnu vihi sá cúú-xí-yu.

Ñadìhí ndécú ichi dǐí iní

1 Te núú úsá espíritú néhé tícùú-áⁿ, te ñⁿ-xi ní quixi-xi núú ndécú-í, te càchí-xi xii-í:

—Néhé ná quèhíⁿ-ó dànehé ñáhà-í xii-n nchaa tnúndòho sá ndóhó ñadìhí ñaha ndècu ichi dǐí iní, te ñaha-áⁿ cùnùu-aⁿ nucóo-aⁿ núú ñúhú vihi ndute.

2 Te ñaha-áⁿ ndécú dǐí iní-aⁿ ndìhi nchaa cue téé yìndaha ñaha xii ñáyiu xĩndecu nihíí ñuyíú, te nchaa dava-gá ñáyiu ñuyíú ío iní-yu nchìcúⁿ nihnú-yu quidé-yu nchaa nàcuáa quide ñaha-áⁿ —duha càchí espíritú-áⁿ.

3 Te òrè ducaⁿ quide ñaha Espíritú Yǎ Ndiõxí xii-í nàcuáa càchí iní-xi, te ñⁿ espíritú xínú cuèchi núú-gǎ ndécá ñaha-xi xii-í cuáháⁿ ñⁿ xití yucu, te xití yucu-áⁿ nǐ xiní-í ñⁿ ñadìhí yódó-áⁿ ñⁿ quití ticuehé, te ndéé úsá díquí-ði te úxí ndiqui-ði, te nihí-ði ndéé tnuní-ði mee-ni tnùhu sá càháⁿ úhú cuendá Yǎ Ndiõxí.

4 Te ñadìhí-áⁿ nihnú-áⁿ dõó muràdú ndìhi dóó tícuèhé, te mee-ni sǎ nǐ cuáha díhúⁿ cuáaⁿ, ndìhi yúú vǎha sá nání pèrlá, ndìhi nchaa dava-gá núú yúú vǎha, mee-ni nchaa xíáⁿ ní cuáha sá yíhí lõho-aⁿ, ndìhi sá ñúhú dǐcúⁿ-aⁿ, ndìhi sá ñúhú dǐcúⁿ ndáhá-áⁿ, te nùndaha-aⁿ ñⁿ tícùú ní cuáha mee-ni dǐhúⁿ cuáaⁿ te ñùhu mee-ni sá cuèhé sá dúhá, te xíáⁿ cùtnùní iní-ó sǎ cúú-áⁿ ñⁿ ñadìhí ñaha ndècu ichi cuehé ichi duha.

5 Te tneé-aⁿ ndéé tnuní ñⁿ tnùhu, te càchí-xi: “Ñuú Babiloniá ñuú ío cùnuu, cada iní-ndó sá cúú-xí mèi ñadìhí-a, te ðiu ñadìhí-a cùu-aⁿ ñaha sanu ichi ñaha xii nchaa ñáyiu dǐhí ñáyiu ndècu ichi dǐí iní, te nándi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnùhu ndéé tnuní tneé ñadìhí-áⁿ. Te vá yõo tècú tnùní ná cuendá ducaⁿ càháⁿ tnùhu-áⁿ.

6 Te ní cùtnùní iní-í sá díú ñaha-áⁿ nǐ dácáca-áⁿ ñiñi ñáyiu cùu cuendá Yǎ Ndiõxí ní sahani ñaha-aⁿ xii-yu, te ñáyiu ní xíhí-áⁿ cúú-yu ñáyiu ní cáháⁿ váha cuendá Xìtohó Jesucristú, te sá dúcáⁿ nǐ quide-aⁿ te ní nduu-aⁿ dàtná ñⁿ ñáyiu quihu. Te ío ní cuñúhu-í sá dúcáⁿ nǐ cuu ní xiní-í.

7 Te sátá dúcáⁿ te espíritú xínú cuèchi núú Yǎ Ndiõxí-áⁿ càchí tucu-xi xii-í:

—Vá ndéé dúcáⁿ cùñúhu-n, chi vitna na càchí tnúhu-í xii-n nàcuáa quèe-xi cuendá quití ndéé úsá díquí-xi ndíhi úxí ndíquí-xi-áⁿ, ndíhi nàcuáa quèe-xi cuendá ñadìhí ñaha yòdo ñaha xii-di-áⁿ.

8 Te quití ní xiní-n-áⁿ cúú-dí ìⁿ quití sa ní xíndecu te vitna ñá túú-gă-di ndècu, te sáá nduu te quene-di yaú cùnú víhí sã ïo nèhé cáá, te dàtnùní sáá nduu te quíhíⁿ-di núú ùhú núú ndàhú ni caa ni quíhíⁿ, te cue ñáyíu xíndecu ñuyúú cuñúhu vîhí-yu quití-áⁿ chí cùu-di ìⁿ quití sa ní xíndecu ni cùu te sáá nduu cùndecu tucu-di, te ñáyíu ducaⁿ cùñúhu ñaha xii-di-áⁿ ñà túú yòdo tnuní-yu núú tûtú núú yódó tnùní cue ñáyíu naníhí tàhú, chí ndéé cùtnàhá vátá ngăva-gá ñuyúú ducaⁿ sa yòdo tnuní cue ñáyíu naníhí tàhú.

9 Te nchaa ñáyíu tècú tnùní xini ñuhu-xi cani váha iní-yu cuendá tnúhu-a. Te ndí úsá díquí quití-áⁿ cada iní-ó sã cúú-xí úsá tîndúú núú núcõ ñadìhí-áⁿ.

10 Te ndí úsá díquí quití-áⁿ cada iní-ó sã cúú-xí úsá tnàhá cue téé yîndaha ñaha xii ñáyíu, te úhúⁿ cue téé-áⁿ ñà túú-gă cùnùu-güedé vitna, te ìⁿ téé-áⁿ cùnùu-dé vitna te ìngá-dé vátá sáá-gá nduu cùnùu-dé, te na sáá nduu dùcaⁿ cunuu-dé te sacú-ni nduu cunuu-dé.

11 Te quití ní xíndecu ni cùu te ñá túú-gă-di ndècu vitna, cùu-di datná téé cùu uná yîndaha ñaha xii ñáyíu, te ìⁿ-ni cùu-di ndíhi cue téé úsá yîndaha ñáyíu-áⁿ, te quití-áⁿ sáá nduu cuíta nihnu-di quíhíⁿ-di núú ùhú núú ndàhú ni caa ni quíhíⁿ.

12 Te ndí ùxí ndíquí quití-áⁿ cada iní-n sã cúú-xí úxí tnàhá cue téé quîndaha ñaha xii ñáyíu, dico vátá sáá-gá nduu cùnùu-güedé quîndaha ñaha-güedé xii-yu. Te cue téé-áⁿ ñíhí-güedé tnúhu ndee ìní taxi tnùní-güedé ndíhi quití-áⁿ, dico tnaa-ni taxi tnùní-güedé ndíhi quití-áⁿ.

13 Te ndí ùxí cue téé-áⁿ cuu ìⁿnuu-güedé taxi tnùní-güedé, te chindee-güedé quití-áⁿ cuendá cuu ìⁿnuu-güedé ndíhi-di cuendá taxi tnùní-gă-di.

14 Te cue téé-áⁿ nàá-güedé ndíhi Yaá cáá dàtná cáá ìⁿ mbéé quití ní dánícüehé-güedé dico vá ndácú-güedé nàá-güedé ndíhi-gá chí cuíta-güedé. Te diu-gá cúú-gă Yaá ïo

cùnùu taxi tnuní cuèi nchaa téé yîndaha ñaha xii ñáyíu, te ducaⁿ-ni tàxi tnuní-gă cuèi nchaa dava-gă-yu. Te mee Yă Ndiõxí ní cachí-gă nândi cùu nchaa ñáyíu cundecu ndíhi Yaá cáá dàtná cáá ìⁿ mbéé quití ní dánícüehé-güedé-áⁿ, te diu-ni ñáyíu-áⁿ cúú-yu ñáyíu ní cáháⁿ-gă te cùu-yu ñáyíu quide ndáá ndécú ìchi-gă —duha càchí espíritú xínú cuèchi núú-gă.

15 Te ní cachí tucu espíritú-áⁿ xii-í:

—Ndute ñùhu núú núcõ ñadìhí ñaha ndècu ichi díí ìní-áⁿ, ndute-áⁿ cada iní-n sã cúú-xí ñáyíu nchaa nàcióⁿ, ndíhi ñáyíu nchaa ñuú, ndíhi ñáyíu xíndecu nchaa xichi, ndíhi ñáyíu càháⁿ ndí dííⁿ ndí dííⁿ núú tñùhu.

16 Te dàtná ní cachí-í sá ndí ùxí ndíquí quití ní xiní-n-áⁿ cúú-xí úxí tnàhá cue téé quîndaha ñaha xii ñáyíu, te cue téé-áⁿ cuu úhú iní-güedé ñadìhí ñaha ndècu ichi díí ìní-áⁿ, te ni vã cádá cuendá ñáhá-gă-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé.

17 Te mee Yă Ndiõxí ducaⁿ dàcaháⁿ-gă iní cue téé-áⁿ cuendá cada-güedé nàcuáa cuíní méé-gă, te xíáⁿ núu cuu ìⁿnuu-güedé cuendá cúñaha-güedé xii quití-áⁿ cada-di núú-güedé taxi tnùní-di, te ducaⁿ-ni càda-di núú-güedé taxi tnùní-di ndéé ná sáá nduu càda Yă Ndiõxí nàcuáa ní cachí-gă.

18 Te ñadìhí ñaha ní xiní-n-áⁿ cada iní-n sã cúú-áⁿ ñuú cáhnú ñuú ïo cùnùu, te ñuú-áⁿ ndécú tèe ïo-gă cùnùu taxi tnuní nchaa cue téé yîndaha ñaha xii ñáyíu xíndecu ñuyúú —duha ní cachí espíritú xínú cuèchi núú Yă Ndiõxí xii-í.

18

Ní naa ñuú Babiloniá

1 Te ducaⁿ te dàtnùní ní xiní tucu-í ìngá espíritú xínú cuèchi núú Yă Ndiõxí, te ndéé andíu nì dátăsaⁿ-xi te ní dáýehé-xi ñuyúú, te espíritú-áⁿ ïo cùnùu-xi.

2 Te níhi ní cáháⁿ-xi, te càchí-xi:

—Ní sáá nduu nàa ñuú cáhnú ñuú cùnùu nani Babiloniá, te xíáⁿ-nà nataká nchaa núú espíritú cùndíhi yucu ñávàha cundecu-xi, te vá quée-gă-xi xíáⁿ, te diu-ni xíáⁿ nataká nchaa quití ndàva núú tàchí nchaa

quiti ndehe quide, quiti ñá túú tnàhá iní ñáiyu te xíáⁿ-nă cundecu-güedi.

3 Te ducaⁿ chi ñáiyu ñuú-áⁿ sánú ichi-yu nchaa ñáiyu ñihí ñuyú ichi cuèhé ichi duha, te ducaⁿ-ni xinchícúⁿ nihnu nchaa ñáiyu ñuyú xíquidé-yu, te nchaa cue tée cùnuu yindaha ñaha xii ñáiyu, cue tée-áⁿ cúú ñnuu-güedé ndihí nchaa ñáiyu ñuú-áⁿ quidé-güedé ndihí-yu nándi sá cuèhé sá dúhá. Te nchaa ñáiyu dìco nándi sá díco quèheⁿ ñáiyu ñuú-áⁿ ïo cùu cuicá-yu, te ducaⁿ quèheⁿ nchaa ñáiyu ñuú Babiloniá-áⁿ nchaa sá díco ñáiyu-áⁿ cuendá xíáⁿ cãnehé-yu ndécú-yu ichi cuèhé ichi duha —duha càchí espíritú-áⁿ.

4 Te sátá dúcáⁿ te ní tecú dóho-í ní cáháⁿ ñⁿ sá ñí cáháⁿ andi, te càchí-xi:

—Nchaa nchòhó ñáiyu cùu cuendá-í quee-ndo ñuú Babiloniá cuendá sá vă cundècu-ndo tnàhá-ndó ichi cuèhé ichi duha dàtná ndécú ñáiyu ñuú-áⁿ, te ducaⁿ te vă quini-ndó tnúndòho tnúhu ndàhú sá quixí cùu xii ñáiyu-áⁿ.

5 Chi ío cuèhé cuèchi-yu ní cuu ndècu núú Yă Ndiöxí, te mee-gă nãhá-gă năcuáa ndùu nchaa sá quidé-yu.

6 Te nchòhó ñáiyu cùu cuendá-í, chí nanchòcáva dandòho-ndo ñáiyu-áⁿ dàtná quidé mèe-yu dandohó-yu cue ñáiyu, te úu xito nanchòcáva-ndo dandohó-ndó-yu, te ducaⁿ càda-ndo cuendá ío-gá ndohó-yu.

7 Te ío quide cahnú-yu mèe-yu, te ío cùdí iní-yu quidé-yu nchaa núú sã cuèhé sá dúhá, te sá dúcáⁿ xidó-yu quidé-yu nchaa sá cuèhé sá dúhá ñuú xíáⁿ nchòhó ío dandòho-ndó-yu, te ducaⁿ chi ñáiyu ñuú-áⁿ sání iní-yu, te càchí-yu: “Nchúhú cúú-ndí dàtná ñⁿ ñadihí ñá túú quèé, ñaha ío cùnuu yindaha ñaha xii ñáiyu. Te ducaⁿ sãtnahá-xi cùu-ndí chi nchaa-ni nduu ío váha cùu iní-ndí ndécú-ndí, te ní vă sáá ñⁿ nduu te ndihú iní-ndí”, duha càchí ñáiyu ñuú-áⁿ.

8 Te sá cuendá nchaa sá quidé-yu-áⁿ ñuú xíáⁿ ñⁿ-ni ndùu sáá tnúndòho sá cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xi xii-yu, te ío ndihú iní-yu, te cáyú ñuú-yu, te ducaⁿ ndòhó-yu chi Dútú Ndiöxí ío cùnuu-gá, te diu-gá ducaⁿ dandohó ñaha-gá xií-yu —duha càchí sá ñí cáháⁿ àndi-áⁿ.

9 Te nchaa cue tée cùnuu yindaha ñaha xii ñáiyu ío ndáhyú-güedé sá ndihú iní-güedé òré ná quini-güedé quene ñuhmá cáyú ñuú cue ñáiyu Babiloniá, chi diu cue tée-áⁿ cúú-güedé cue tée cùu ñnuu ndihí-yu quide-güedé nchaa núú sã cuèhé sá dúhá ndihí-yu, te ducaⁿ chi ío tnàhá iní-güedé cundecu-güedé ndihí-yu ichi dí iní.

10 Te cue tée-áⁿ xica-nă cundecu-güedé cundehe-güedé năcuáa ndoho nchaa ñáiyu ñuú-áⁿ sã yùhú-güedé nchaa tnúndòho-áⁿ, te cachí-güedé:

—Ndàhú nchòhó ñáiyu ñuú cahnú ñuú cùnuu nani Babiloniá! Chi uuⁿ ní sáá nchaa tnúndòho tnúhu ndàhú sá cúú-xí-ndó —duha cachí-güedé.

11 Te nchaa ñáiyu dìco nchaa sá nándihí ñáiyu ñuú Babiloniá tnàhá-yu ío ndáhyú-yu sá ndihú iní-yu chi vă yõo-gá cuaaⁿ nchaa sá díco-yu.

12 Te díco-yu nchaa sá ñí cuáha mee-ni díhúⁿ cuááⁿ, ndihí nchaa sá ñí cuáha mee-ni díhúⁿ cuixíⁿ, te dìco tucú-yu sá ñí cuáha mee-ni yúú vãha yúú nání pèrlá, ndihí nchaa dava-gá sá ñí cuáha dava-gá yúú vãha, te díco-yu tnàhá dóo sèdá, ndihí ingá núú dõo vãha sá nání línú, ndihí dóo muradú, ndihí dóo tícuèhé te mee-ni dõo vãha cùu-xi, te dìco tucú-yu tnàhá yutnu sá sàháⁿ tnámí, te dìco tucú-yu sá ñí cuáha sá nání màrfíl, te dìco tucú-yu sá ñí cuáha mee-ni yutnu váha sá ïo ndèyáhu, te dìco tucú-yu sá ñí cuáha mee-ni càá, ndihí sá ñí cuáha mee-ni sá nání bròncé, ndihí sá ñí cuáha mee-ni yúú vãha yúú nání màrmól.

13 Te dìco tucú-yu canelá, ndihí yúcú sá sàháⁿ tnámí, ndihí dúsa sá sàháⁿ tnámí, ndihí yúcú sá nání mirrá, te dìco tucú-yu ingá núú dúsa sá sàháⁿ tnámí nani olivánú, te dìco tucú-yu ndudí ndéhé yoho yàha stilé, ndihí acití yutnu nani olívú, ndihí yuchi triú váha, te dìco tucú-yu nchaa dava-gá núú triú, te díco-yu tnàhá mbèé, ndihí cuáyú, ndihí nchaa dava-gá quiti tatá, te dìco tucú-yu tnàhá carrètá, te dìco tucú-yu tnàhá ñáiyu xinu cuechi, ñáiyu ñá túú tnàhí dàñá quee núú chíúⁿ patróoⁿ-xi.

14 Te nchaa ñáiyu dìco-áⁿ cñhàhá-yu xii ñáiyu ñuú Babiloniá:

—¡Nchaa sá ïo cùdíí ìní-ndó cùndecu ndìhi-ndo ni cuu vá ndácú-gã-ndó ñìhí-ndó vitna, te nchaa sá sání ìní-ndó sã ïo váha càa ndecu ndìhi-ndo ndìhi nchaa dava-gá sá ndécú ndìhi-ndo ní ndìhi nihnu-xi vitna, te ni ìñ nduu-gá vá ñìhí-ndó ñi ìñ xíã cundecu ndìhi-ndo! —duha cúñaha ñáyiu-án xii-yu.

15 Te nchaa ñáyiu ní cuu cuica ñi xóo dico nándi nchaa sá ñi xóo dico ñi queheⁿ cue ñáyiu ñuu Babiloniá, nchaa ñáyiu-án xica-ñã cundecú-yu cundèhé-yu sá yùhú-yu cuendá nchaa tnúndòho sá yãha cue ñáyiu ñuu-án, te ío ndáhyú-yu sá ndìhú iní-yu sá dúcáⁿ ndòho ñáyiu-án.

16 Te cúñaha tùcú-yu:

—¡Ndàhú nchòhó ñáyiu xíndecu ñuu cáhnú ñuu nání Babiloniá! Chi nchòhó cúú-ndó dàtná ìñ ñadhí ñaha nihnu dóo vãha dóo murádú, ndìhi dóo tícuèhé, te mee-ni sã ñi cuáha díhúⁿ cuááⁿ, ndìhi mee-ni sã ñi cuáha yúú vãha yúú nání pèrlá, ndìhi sá ñi cuáha dava-gá yúú vãha sá ïo vii ndãa mee-ni nchaa xíã ní cuáha sá yíhí lõho-aⁿ, ndìhi sá ñúhú dùcúⁿ-aⁿ, ndìhi sá ñúhú dùcúⁿ ndáhá-án.

17 ¡Te uuⁿni ní ndìhi nihnu nchaandi túhú sá ndécú ndìhi ñadhí-án, te ducaⁿ sãtnahá-xi cùu nchòhó ní cùu! —duha cúñahá-yu xii cue ñáyiu ñuu Babiloniá.

Te nchaa cue téé dàcaca barcú ndìhi nchaa cue téé tàxi tnuni bàrcú-án, ndìhi nchaa ñáyiu ñuhu xití bàrcú-án, ndìhi nchaa dava-gá cue téé nándi chiúⁿ quide ndecu lamár, nchaa ñáyiu-án xica cùndecú-yu

18 te quiní-yu òré quene ñúhmá cãyú ñuu cue ñáyiu Babiloniá, te ñihi cáháⁿ-yu, te cachí-yu:

—Ni ìñ ñuu ñá túú nñtnahá-xi ñuu Babiloniá —duha cáháⁿ-yu.

19 Te nchaa ñáyiu-án chidó-yu ñuhu díquĩ-yu, te ngüita-yu ndáhí-yu sá ndìhú iní-yu, te ñihi cáháⁿ-yu, te cachí tucú-yu:

—¡Ndàhú nchòhó ñáyiu xíndecu ñuu cáhnú ñuu nání Babiloniá! Chi ío cuica-ndo ni cùu, te ñu-ndo ñi quide ní cuu cuica nchaa ñáyiu ndècu ndìhi barcú, te vitna uuⁿni ní naa-ndo ndìhi ñuu-ndó —duha cachí-yu.

20 Te nchaa nchòhó ñáyiu ndècu andiu ío chí cùdíí ìní sá dúcáⁿ dândòho Yá Ndiõxí

nchaa ñáyiu ñuu Babiloniá-án, te ñu-ni ducaⁿ chí cùdíí ìní nchaa nchòhó cue téé ní cachí Xitohó Jesucristú cáháⁿ tnúhu-gá, te ñu-ni ducaⁿ chí cùdíí ìní nchaa nchòhó cue téé cáháⁿ tnúhu Yá Ndiõxí nãcuáa dàcahu iní ñáhá-gã xii-ndo, te ñu-ni ducaⁿ chí cùdíí ìní nchaa dava-gá nchòhó ñáyiu cùu cuendá-gá cuendá sá dúcáⁿ dândòho-gá nchaa ñáyiu ñuu-án. Te ducaⁿ càda ñaha-gá xii cue ñáyiu-án cuendá nchaa sá quidé ñáhá-yu xii-ndo.

21 Te sátá dúcáⁿ te ní xiní-í ìñ espíritú xínú cuèchi núú Yá Ndiõxí, te espíritú-án ïo ndee-xi te ní queheⁿ-xi ìñ yúú cáhnú dàtná càhnu yódó te ní dáquẽe-xi xití ndute lamár, te càhí-xi:

—Dàtná ní guide-í ní dáquẽe-í yúú xití ndute ducaⁿ càda-xi ñuu cáhnú ñuu Babiloniá, chi ñáyiu ñuu-án ïo ndìhi naá-yu ndìhi ñuu-yu, te vá ìñ nduu ìñ quíú-gã quiní ñáhá ñáyiu xii-yu.

22 Te ni ìñ-gá ñáyiu càni arpá, te ni ìñ-gá ñáyiu tíú vĩlu, te ni ìñ-gá ñáyiu tíú cútú, te ni ìñ-gá yaá vá cóo ñuu-án, te ni ìñ-gá cue ñáyiu xiní cada ìñ núú chiúⁿ vá cóo-gã, te ni vã yõo-gã canehe chiúⁿ yúú cúú yódó mulínú.

23 Te ni ìñ-gá ñuhú vá cùndècu ñuu-án, te ni ìñ nduu-gá vá cóo vico tnándaha, te ñáyiu ñuu-án ñáyiu quide ndáhú cúú-yu ñáyiu ío-gá cuicá-yu dàcúxí ñáyiu quide ndáhú xíndecu ñihi ñuyíú, dico nchaa-yu naá-yu chi quide nduú-yu te ío dândahú-yu cue ñáyiu ñuyíú sã dúcáⁿ quidé-yu.

24 Te ñu-ni ñuu-án ñi dácacã-yu ñihi cue téé ní cáháⁿ tnúhu Yá Ndiõxí, te ñu-ni ducaⁿ ñi quidé-yu nchaa dava-gá cue ñáyiu cùu cuendá-gá, te ñu-ni-yu quide xisahní tnaha ñáyiu ñuyíú —duha càhí espíritú-án.

19

1 Te sátá dúcáⁿ te ní tecú dóho-í ñihi ní cáháⁿ cuéhé víhí ñáyiu andiu, te càhí-yu:

¡Ío càhnu cuu Yá Ndiõxí!, chi ñu-gá cúú-gã Yaá ní dácacu nihnu ñaha xii-o núú ùhú núú ndàhú, te ío cùnuu-gá, te mee-ni sã vãha quide-gá,

2 te mee-gã ío váha ndáá quidé-gã quidé ndáá-gá cuèchi nchaa ñáyiu,

chi diu-gá ní dáquihíⁿ-gá ñadìhí ñaha ndècu
 ichi díí ínì núú ùhú núú ndàhú,
 chi diu-aⁿ ní sanu ichi-aⁿ ñáyíu ñuyíú ichi
 cuèhé ichi duha,
 te ducaⁿ ní dáquihíⁿ ñáhá-gă xii-aⁿ núú
 ùhú núú ndàhú chi nàchinaa-gá sá
 ní sahní-aⁿ cue ñáyíu ní xinu cuechi
 núú-gă.

Duha cächí-yu.

³ Te cächí tucú-yu:

—Ío cànnu cuu Yá Ndiöxí!, chi nchaa
 nduu nchaa quíú ducaⁿ-ni quène ñúhmá
 núú ñúhú ñaha-án càyú-aⁿ —duha cächí-yu.

⁴ Te ndì òcò cùmí cue téé cùu sacuéhé
 xĩndecu-án ní ngüíñí xítí-güedé núú Yá
 Ndiöxí núú núcòo-gá táxí tnùnì-gá, te
 tnàhá cue quitì cùmí xĩnutnì-án ní ngüíñí
 xítí-güedé núú-gă, te cue téé-án cächí-güedé
 ndìhi cue quitì-án:

—Sá ndáá sá ïo cànnu cuu Yá Ndiöxí —
 duha cächí-güedé ndìhi cue quitì-án.

⁵ Te sá tá dúcáⁿ te ní tecú dóho-í ní cáhán ñⁿ
 sá ní cáhán meí núú nútñí xilé váha núcóo
 Yá Ndiöxí, te cächí sá cáhán-án:

Nchaa nchòhó ñáyíu xĩnu cuechi núú Yá
 Ndiöxí, diu-ni nchòhó ñáyíu nèhe sá
 yíñùhu núú-gă,

cáhán-ndó sã ïo cànnu cuu-gá cuèi
 cùnnu-ndo àdi ñá túú cùnnu-ndo.

Duha cächí sá cáhán-án.

Íⁿ vico cùu datná vico tnãndaha

⁶ Te sá tá dúcáⁿ te ní tecú dóho-í ní cáhán
 cuèhé víhí ñáyíu andíu, te òré ducaⁿ ní
 cáhán-yu te ní quide-xi dàtná quidé-xi núú
 xícá cuèhé víhí ndùte, te ní quide tucu-xi
 dàtná quidé-xi òré cáhán níhi víhi ñúhu, te
 cächí-yu:

Ío cànnu cuu Dútú Ndiöxí Yaá cúú Tátá-ó!
 Te ío cùnnu-gá táxí tnùnì-gá, te
 quide-gá nchaandi túhú sá vãha.

⁷ Te ío chí ná cùdíí ínì-ó, te chí ná cächí-ó sã
 ío cànnu cuu Yá Ndiöxí,
 chi vitna ní sáá nduu càda Yaá cáá dàtná
 cáá ñⁿ mbéé quitì ní dánícuèhé-güedé
 ñⁿ vico, te cùu-xi datná vico tnãndaha.

Te nchaa ñáyíu cùu cuendá-gá sa ní
 ndìhí-yu sa ndècu túha-yu cun-
 decú-yu vico-án, te cada ínì-ó sã
 ñáyíu-án cúú-yu dàtná ñⁿ ñadìhí xíchí
 tnãndaha ndìhi-gá,

⁸ te ñáyíu-án ní nduu táhù-yu cuihnú-yu
 dóo vãha dóo chàhnchí sá ïo váha
 càndoo.

Duha cächí-yu.

Te sá dúcáⁿ ní nduu táhú ñáyíu cùu
 cuendá Yá Ndiöxí dóo vãha nìhnú-yu, xíáⁿ
 cùtnùnì ínì-ó sã cúú-yu ñáyíu quide ndáá
 núú-gă.

⁹ Te ñⁿ espíritú xínú cuèchi núú Yá Ndiöxí
 ní cachí tnúhu-xi xii-í, te cächí-xi:

—Chido tnùnì-n ñⁿ núú tütú nàcuáa
 na cáhán-í-a: “Váha táhú nchaa ñáyíu ní
 cáhán ñáhá Yá cáá dàtná cáá ñⁿ mbéé
 quitì ní dánícuèhé-güedé cundecú-yu vico,
 te vico-án cúú-xi dàtná vico tnãndaha
 cada-gá”, te duha chido tnùnì-n chi tnúhu-a
 cùu-xi tnúhu ndáá tnúhu Yá Ndiöxí —duha
 cächí espíritú-án.

¹⁰ Te ní ngüíñí xítì-í núú espíritú-án
 cuendá chiñuhu-í-xi ní cùu, te ní cachí-xi:

—Vá dúcáⁿ càda-n, chi tnàhá-í dícó xínú
 cuèchi-í núú Yá Ndiöxí dàtná quidé-n xĩnu
 cuechi-n núú-gă ndìhi nchaa dava-gá ñáyíu
 ndècu ndìhi-n ichi-gá, ñáyíu nchìcúⁿ nihnu
 quide ní yuhu ní ínì nchaa nàcuáa cáhán
 Xítóhó Jesucristú, te núu xíáⁿ cächí-í sá vã
 dúcáⁿ càda-n, chi mee Yá Ndiöxí chiñuhu-n
 —duha cächí espíritú-án.

Te nchaa cue téé cáhán tnúhu Yá Ndiöxí
 cáhán-güedé nàcuáa ndùu tnúhu cáhán
 Xítóhó Jesucristú.

Cuendá Yaá yódó ñⁿ cuayú cuixíⁿ

¹¹ Te ní xiní-í nchìi andíu, te ní xiní-í ní
 queue ñⁿ Yaá yódó-gă ñⁿ cuayú cuixíⁿ. Te
 Yaá-án nání-gă Yaá quidé ndáá cuiⁿ, duha
 nani-gá. Te quide-gá nchaa sá cáhán-gá, te
 ío váha quide ndáá-gá cuèchi nchaa ñáyíu,
 te nchaa ñáyíu nàá ndìhi ñaha xì-gá ío váha
 xiní-gá nàcuáa cada ñaha-gă xií-yu chi ío
 ndáá quidé-gă.

¹² Te tinùu-gá dáyèhé-xi dàtná dáyèhé
 ñuhú, te titní coróná ñuhú díquí-gă, te
 nèhe-gá ñⁿ sá ndèè diu-gá, te vá yõ
 ñⁿ cùtnùnì ínì-xi nása cuáhán tnúhu-án,
 chi ñⁿ dìi díí-ni mee-gă náhá-gă nàcuáa
 cáhán-xi.

¹³ Te Yaá-án níhnú-gă ñⁿ dóo ní cuu
 mee-ni níñí, te Yaá-án cächí tnúhu-gá nchaa
 nàcuáa sàni ínì Yá Ndiöxí, núu xíáⁿ nání-gă
 Tnúhu Yá Ndiöxí.

14 Te sáta-gã nchìcúⁿ nchaa espíritú xínú cuèchi núú Yã Ndiõxí, te cue espíritú-áⁿ cúú-xí dàtná sandadú, te xíxíhnu-xi dóo cuìxíⁿ dóo vãha sá cándoo, te xíxódó-xi cuàyú cuìxíⁿ.

15 Te yuhu Yaá yódónùu-áⁿ quéné ìⁿ yuchí cáhnú, te ndihi yuchí-áⁿ dànícuehégá nchaa ñáyiú xíndecu ñuyíú, te ío dandòho ñaha-gá xii-yu, te dàtná quidé tée quìhni ndéhé yoho yàha stilé ducaⁿ sãtnahá-xi cada ñaha-gá xii-yu, chi ío dandòho ñaha-gá xii-yu cuèndá sá ío cùdééⁿ-gã. Te mee-gã ío cùnnu-gá táxí tnùnì-gá, te quide-gá nchaandi túhú sá vãha.

16 Te sáta dóo níhnú Yàá-áⁿ ndihi núú ticácáⁿ-gã yódó tnùnì nàcuáa nàni-gá, te duha càháⁿ-xi: “Tée ío cùnnu taxi tnuní ñáhá xii nchaa cue tée yíndaha ñaha xii ñáyiú ndihi nchaa dava-gá ñáyiú”, duha ndéé tnuní sáta dóo-gã-áⁿ ndihi ticácáⁿ-gã-áⁿ.

17 Te dàtnùnì ní xiní-í ìⁿ espíritú xínú cuèchi núú Yã Ndiõxí nùtní-xi núú nchìcanchii, te níhi ní càháⁿ-xi, te xãhaⁿ-xi xii nchaa quiti ndava núú tàchí:

—Nchaa nchòhó quiti ndava, chí táquixi chi caxi-ndo nchàa sá ñí quide túha Yã Ndiõxí,

18 chi caxi-ndo cuñú nchaa cue tée yíndaha ñaha xii ñáyiú, ndihi cuñú nchaa cue tée tàxi tnuní ñáhá xii cue sandadú, ndihi cuñú nchaa cue tée ío ñí xíndáa, ndihi cuñú nchaa cuàyú, ndihi cuñú nchaa cue tée ní xódó ñaha xii-güedi, ndihi cuñú nchaa dava-gá ñáyiú, ñáyiú ñá túú tnàhí ni dàñá quee núú chíúⁿ pàtróóⁿ-xi, ndihi cuñú nchaa ñáyiú ní dàñá ñí quee núú chíúⁿ pàtróóⁿ-xi, ndihi cuñú nchaa ñáyiú cùnnuu, ndihi cuñú nchaa ñáyiú ñá túú cùnnuu, te nchaa cuñú-áⁿ caxi-ndo —càchí espíritú-áⁿ xãhaⁿ-xi xii nchaa quiti-áⁿ.

19 Te sáta dúcáⁿ te ní xiní tucu-í quiti ní quene xítí làmár, ndihi nchaa cue tée yíndaha ñaha xii ñáyiú, ndihi nchaa cue tée cùu sandadú-güedé ní naníhí tnáhá-güedé ndihi quiti-áⁿ cuèndá cuu ìⁿnuu-güedé ndihi-di nàá-güedé ndihi Yaá yódó cuàyú-áⁿ, ndihi nchaa cue espíritú cúú sandadú ndihi-gá.

20 Te cue espíritú cúú sandadú ndihi Yaá-áⁿ ñí tní-xi quiti-áⁿ, ndihi tée ío dándahú ñáhá xii ñáyiú càchí sá càháⁿ tnúhu Yã Ndiõxí te ñá ndáá sá càháⁿ-dé tnúhu-gá, te diu-ni tée-áⁿ ñí quide-dé titní núú sã vã yõo tnàhí ndàcu cada núú quiti-áⁿ. Te sá dúcáⁿ ñí quide tée-áⁿ xiãⁿ ní dándahú-dé ñáyiú ní sándáá iní-yu ní quèé-yu tnuní quiti-áⁿ, te ní chiñuhú-yu sá ñí dándacú ñáhá-yu xii-di, te cue espíritú-áⁿ ñí dáquèe-xi quiti-áⁿ núú ñúhú núú ñúhú àzufre càyú-xi, ndihi tée ducaⁿ dándahú ñáhá xii ñáyiú-áⁿ, te xiãⁿ cuhuⁿ tée-áⁿ ndihi quiti-áⁿ, te ío ndoho-dé ndihi-di.

21 Te ndihi yuchí cáhnú sã quéné yuhu Yaá yódó cuàyú-áⁿ ñí sahani-gá nchaa dava-gá cue tée cùndihi quiti-áⁿ, te nchaa cue quiti ndava ní chítú xítí-güedi ní xexi-güedi cuñú nchaa cue tée-áⁿ.

20

Úxí cièndú cuía

1 Te sáta dúcáⁿ te ní xiní-í ìⁿ espíritú xínú cuèchi núú Yã Ndiõxí ní quee-xi andíu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sàcuíhna, te nùndaha tucu-xi ìⁿ cadená cáhnú.

2 Te espíritú-áⁿ ñí tní-xi quiti dééⁿ nání dràgón, te diu-ni quiti-áⁿ cúú-dí mèi yucu ñávãha sá nání sàcuíhna, te diu xiãⁿ ní nduu-xi cóo ndéé sanaha. Te espíritú-áⁿ ñí dácútú ñaha-xi xii-di, te ducaⁿ-ni cùndutu-di ndéé xínu úxí cièndú cuía.

3 Te sáta ñí dácútú ñaha espíritú-áⁿ xii-di te ní dáquèe ñaha-xi xii-di yaú-áⁿ chi diu yaú-áⁿ tàú-di quèe-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá vã quéné-gã-di dándahú-di cue ñáyiú ñuyíú, te xiãⁿ cundedí nihnu-di ndéé xínu úxí cièndú cuía. Te sáta ná yãha úxí cièndú cuía-áⁿ te nandáxí-di te quene-di yaú núú ñúhú-dí-áⁿ caca cuu tnaa-di ìⁿ úú nduu.

4 Te dàtnùnì ní xiní-í xínutní titní xilè váha, te xiãⁿ xínucóo nchaa ñáyiú ní ngúndecu ndihi tnúhu ndee iní cada ndáá cuèchi nchaa ñáyiú, te ní xiní-í xíndecu tnáhá cue ñáyiú ní xehndé-güedé dúcúⁿ-xi cuèndá sá ñí càháⁿ-yu tnúhu Yã Ndiõxí, ndihi cuèndá sá ñí càháⁿ váha-yu cuèndá Xítohó Jesucristú. Te diu-ni ñáyiú-áⁿ cúú-yu

ñáiyu ñá túú ní chĩñuhú-yu quiti ní quene xití làmár-án, te ni ñà túú ní chĩñuhú-yu sá ñĩ dándácú ñáiyu ní natava ñàhá-yu xii-di, te ni ñà túú ní dàñá-yu mèe-yu quée-yu tnuní quiti-án chi ni tněe-yu te ni ndàhá-yu ñá túú ní dàñá-yu quée tnuní-di. Te ní xiní-í ní ndoto cue ñáiyu-án cuendá tnàhá-yu cunúu-yu taxi tnuní-yu ndihĩ Xítohó Jesucristú úxí ciendú cuía.

⁵ Te dava ñáiyu ní xihí ñá túú ní ndotó-yu, chi ndée yáha úxí ciendú cuía te dàtnuní ndotó-yu. Te ñáiyu ní xiní-í ní ndoto-án cúu-yu ñáiyu ní ndoto díhna nuu.

⁶ Te ío váha ní tnahá nchaa ñáiyu ní nduu táhú ñĩ ndoto díhna nuu!, chi cue ñáiyu-án ío cùdiú-yu núú Yá Ndiòxí, te nchaa ñáiyu-án vǎ quihíⁿ-yu núú ùhú núú ndàhú, te ñáiyu-án cúu-yu dútu ndécú-yu núú Yá Ndiòxí ndihĩ núú Xítohó Jesucristú, te ñáiyu-án cunúu-yu dàtná cunúu Xítohó Jesucristú, te cunuu ndihĩ ñàhá-yu xii-gá úxí ciendú cuía.

⁷ Te sátá ná yáha úxí ciendú cuía-án te sácuíhná quee-xi núú yíndedí nihnu-xi-án,

⁸ te ngúita tucu-xi dandàhú-xi nchaa ñáiyu xíndecu nihĩ ñuyú, te cuéi ñáiyu ñuu Gõg, te cuéi ñáiyu ñuu Màgóg ducaⁿ quihíⁿ-xi dandàhú ñàhá-xí xii-yu, te datàcá-xi nchaa ñáiyu cuendá nàa-yu, te cuéhé víhĩ-yu dàtná cuéhé ñuhu cúchí làmár.

⁹ Te nchaa ñáiyu-án tñí-yu ichi quihíⁿ-yu ñĩ ichi sá cùháⁿ núú cáá ñĩ yodo cahnu vihi, te sáa-yu núú xíndecu ñáiyu cùu cuendá Yá Ndiòxí, te ñáiyu-án chidòcò-yu cue ñáiyu cùu cuendá-gá-án ndihĩ ñuu-yu, te ñuu-án ío cùu iní-gá, dico mee Yá Ndiòxí dangòyo-gá ñuhu cahmi-gá nchaa ñáiyu ducaⁿ chidoco ñaha xii ñáiyu cùu cuendá-gá-án, te nchaa ñáiyu-án cuú.

¹⁰ Te sácuíhná sǎ dúcáⁿ dandahú ñàhá xii ñáiyu chidoco ñaha xii ñáiyu cùu cuendá Yá Ndiòxí-án dàquée ñaha-gǎ xii-xi núú ñuhú núú ñuhú àzufre càyú-xi, te diu-ni xíaⁿ sa ñuhu quiti ní quene xití làmár, ndihĩ téé ní dandàhú ñáiyu ní xáhaⁿ-dè xii-yu sá cùháⁿ-dè tnúhu Yá Ndiòxí te ñà ndàá sá cùháⁿ-dè tnúhu-gá, te xíaⁿ cuhuⁿ-xi ndoho-xi ni caa ni quihíⁿ ndihĩ quiti ní quene xití làmár, ndihĩ téé cǎchí sá cùháⁿ

tnúhu Yá Ndiòxí te ñà ndàá sá cùháⁿ-dè tnúhu-gá.

Cùndáá cuéchi ñáiyu

¹¹ Te ní xiní-í núnúⁿ xilé váha xilé cuixíⁿ, te núú xilé-án núcò ñĩⁿ Yaá. Te ndèhe Yaá-án ñĩ ndóñuhú àndiu ndihĩ ñuyú-a, te ducaⁿ ñĩ ndóñuhú-xi chi vá cùndecu-gá-xi.

¹² Te sátá dúcáⁿ te ní xiní-í nchaa ñáiyu ní xihí ní cùu, ñáiyu cunuu ndihĩ ñáiyu ñá túú cunuu xínutñíⁿ-yu núú Yá núcò núú xilé váha-án, te Yaá-án cúu-gǎ Yá Ndiòxí, te òré-án ñĩ nandicá nchaa tutú núú yódó tnuní nchaa nàcuáa nduu sá ñĩ quide ñĩⁿ ñáiyu-án, te ní nandicá tucu ingá tutú núú yódó tnuní nchaa ñáiyu ní naníhí tǎhú, te nchaa ñáiyu ní xihí ní cùu xínutñíⁿ-yu núú Yá Ndiòxí cundáá cuéchi-yu, te nchaa nàcuáa nduu nchaa cuéchi-yu yòdo tnuní núú nchaa tutú-án ducaⁿ cùndáá.

¹³ Te nchaa ñáiyu ní xihí xití ndute làmár, ndihĩ nchaa ñáiyu ní xihí núú ñuhu yìchí nchaa ñáiyu-án cundáá cuéchi-yu nàcuáa ní quide-yu ñĩⁿ ñĩⁿ-yu.

¹⁴ Te vitna te vá cùu-gá ñáiyu chi ñá túú-gǎ tnúhu xihí, te nchaa ñáiyu ñuhu núú ñuhú núú càyú ñáiyu-án cúu-yu ñáiyu ní xita nihnu ni caa ni quihíⁿ.

¹⁵ Te ducaⁿ chi nchaa ñáiyu ñá túú yòdo tnuní núú tütú núú yódó tnuní nchaa ñáiyu naníhí tǎhú ní dáquée ñaha Yá Ndiòxí xii-yu núú ñuhú núú càyú.

21

Andiu sàa ndihĩ ñuyú sáa

¹ Te sátá dúcáⁿ te ní xiní-í andiu sàa ndihĩ ñuyú sáa, te andiu sǎ ndécú díhna ndihĩ ñuyú sà ndécú díhna ní ndóñuhú-xi, te tnàhá làmár ní ndóñuhú-xi.

² Te yúhú té Juáá ní xiní-í ñuu Jerusàlén sáa ñĩ quee-xi núú ndécú Yá Ndiòxí, te ñuu-án cúu-xi ñuu méé-gǎ, te ío vii cǎa chi cǎa datná cáá ñĩⁿ ñadihí xichí tǎndaha.

³ Te ní tecú dóho-í níhi ní cùháⁿ ñĩⁿ sá ñĩ cùháⁿ andiu, te cǎchí-xi:

—Chí cùndedóho ñĩⁿ tnúhu na cùháⁿ-í-a: Yá Ndiòxí ndécú ndihĩ-gá cue ñáiyu vitna, te ducaⁿ-nǎ cundecu ndihĩ ñaha-gǎ xii-yu, te diú-yu cùu-yu ñáiyu cùu cuendá-gá, te vá ñĩⁿ nduu ñĩⁿ quíu-gǎ te dañá ñaha-gá xii-yu.

4 Te mee Yă Ndiöxí cada-gá sá ñà túú tnàhí-gá ná cani iní-yu cundecú-yu, te ni vă quíní-gá-yu tnúhu xihí, te ni vă quíní-gá-yu tnúhu ndàhyú, te ni vă quíní-gá-yu tnúhu ndihú iní-xi, te ni vă quíní-gá-yu tnúhu cùhú, chi nchaa sá ñi xini-yu ñuyú dïhna vá quíní-gá-yu vitna —duha cächí sá ñi cáháⁿ-áⁿ.

5 Te Yaá núcõo núú xilé váha-áⁿ ñi cachí tnúhu-gá xii-í, te cächí-gá:

—Yúhú quidé-í nàcuáa nduu saa nchàa sá cùndecu vitna. Te vitna chido tnùnín-ñ ñi núú tütú nchaa tnúhu sá ñi cáháⁿ-í-a, chi nchaa tnúhu-a cùu-xi tnúhu ndáa cuiti —duha cächí-gá.

6 Te dàtnùníní ní cachí tnúhu tucu-gá xii-í:

—Sa ní xínu cava nchaa chiúⁿ ní sani iní-í cada-í, te diu-ñi yúhú cùu-í Yaá sa ndècu ndéé cùtnàhá ní ngáva ñuyú, te diu-ñi-í cundecu-í ñi caa ñi quíhíⁿ. Te nchaa ñáyiú cuíní tuha ñaha xii-í te cada iní-yu sá dàtná ndute cùu-xi sá cuãñaha tãhù-í xii-yu candeca-xi iní-yu ñi caa ñi quíhíⁿ.

7 Te nchaa ñáyiú na cùndee iní yáha nándi sá ná yãha-yu sá cuendá-í, te ñáyiú-áⁿ nduu táhù-yu cundecu váha-yu, te yúhú cuu-í Ndiöxí-yu, te ducaⁿ mée-yu cuú-yu déhe-í.

8 Te nchaa ñáyiú na yúhú ndoho cuendá-í quíhíⁿ-yu núú ñùhú núú càyú ndihí ñáyiú ñá túú sàndáa iní ñáhá xii-í, ndihí ñáyiú quide nándi nchaa sá cuèhé sá dúhá, ndihí ñáyiú sàhni tnaha, ndihí ñáyiú ndècu ichi díí ñi, ndihí ñáyiú quide nduu, ndihí ñáyiú chihuhu nchaa sá cächí-yu cùu ndiöxí ní cadúha cue téé ñuyú-a, ndihí ñáyiú dàcuandehnde, nchaa ñáyiú ducaⁿ xiquide-áⁿ cuíta nihnú-yu chi quíhíⁿ-yu núú ñùhú núú ñùhú àzufre càyú-xi —duha ní cáháⁿ Yă Ndiöxí ní cachí tnúhu-gá xii-í.

Ñúú Jerusàlén sáa

9 Te núú ùsá espíritú xïnehe tícuú ñùhú tnúhu ndòho, te ñi-xi ní quixi-xi te cächí-xi:

—Taquixi, te na dànehé ñáhà-í xii-n nchàa ñáyiú cùu cuendá Yaá cáa dàtná cáa ñi mbéé quiti ní dánicuèhé-güedé, ñáyiú-áⁿ cada iní-n sá cùu-yu dàtná ñi xíchí cuéchi vitna tnándaha, te ducaⁿ càda iní-n sá cùu-yu chi cundecú-yu ndihí-gá —duha ní cachí tnúhu espíritú-áⁿ xii-í.

10 Te òré quidé ñàha espíritú Yă Ndiöxí xii-í nàcuáa cächí iní-xi, te espíritú néhé tícuú-áⁿ ndéca ñàha-xi xii-í cuáaá ñi tindúú dùcúⁿ, te xiáⁿ ñi dánèhé núú ñáhá-xi xii-í ñúú Jerusàlén te ñúú-áⁿ ñi quee-xi núú ndécú Yă Ndiöxí, te ñúú-áⁿ cùu-xi ñúú mée-gá.

11 Te ñúú-áⁿ ño càhnu cuu-xi chi ducaⁿ ño càhnu cuu mee-gá, te dàtása-xi dàtná dàtásaⁿ yúú vãha sá nání jãspé yúú cáa dàtná cáa vidiú sá túu ingá xio ndàa sátá-xi.

12 Te ñi càndéé yuhu ñúú-áⁿ sùúni dùcúⁿ nchaa sá ñùhú dòco, te nchií úxúú yuyèhe-xi, te ndi tnahá ñi ñi yuyèhe-áⁿ xïndecu ñi caa espíritú xínu cuèchi núú Yă Ndiöxí. Te ndi tnahá ñi ñi yuyèhe-áⁿ yódó tnùníní diú ñi caa xichi cue ñáyiú isràél.

13 Te úní yuyèhe-xi nchií ndàa xio nacuáa quène nchíanchii, te úní tucu yuyèhe-xi nchií ndàa nacuáa quèe nchíanchii, te úní tucu yuyèhe-xi nchií ndàa xio cuha nacuáa quène nchíanchii, te úní tucu yuyèhe-xi nchií ndàa xio datni nacuáa quène tucu nchíanchii.

14 Te sá ñùhú dòco-áⁿ chi úxúú tnàhá yúú cùú cìmentú-xi, te ndi tnahá ñi ñi yúú-áⁿ ndéé ñi caa diú cue téé ní cáháⁿ tnúhu Yaá cáa dàtná cáa ñi mbéé quiti ní dánicuèhé-güedé, te diu mee-gá ní táuchíúⁿ-gá ní cáháⁿ-güedé tnúhu-gá.

15 Te espíritú sá càháⁿ ndihí ñaha xii-í-áⁿ néhé-xi ñi sá cání ñi cuáha mee-ñi díhúⁿ cuáaⁿ, te ndihí xiáⁿ chíchùhá-xi ñúú-áⁿ, ndihí sá ñùhú dòco ñúú-áⁿ, ndihí nchaa yuyèhe-xi.

16 Te ñúú-áⁿ ñi-ni nèhe-xi cuendá quèhéⁿ-xi ndihí cuendá càni-xi, te espíritú-áⁿ ní chíchùhá-xi ndihí sá néhé-xi-áⁿ ñúú-áⁿ, te nèhe-xi ócò úú ciendú míl mètrú sá cání te diu-ñi ducaⁿ nèhe-xi cuendá quèhéⁿ-xi, te diu-ñi ducaⁿ nèhe-xi sá dùcúⁿ nchaa vehe càa ñúú-áⁿ.

17 Te dàtnùníní ní chíchùhá-xi sá ñùhú dòco ñúú-áⁿ, te xiáⁿ néhé-xi únídico cúmí mètrú sá dùcúⁿ, te ní chíchùhá-xi dàtná chíchùhá cue ñáyiú ñuyú-a.

18 Te sá ñùhú dòco-áⁿ ñi cuáha mee-ñi yúú vãha yúú sá nání jãspé, te nihií ñúú-áⁿ cùu-xi mèe-ñi díhúⁿ cuáaⁿ, te càa datná cáa vidiú sá ño váha càndoo te túu ndàa ingá xio.

19 Te ndi úxúú yúú cùú cìmentú sá ñùhú dòco-áⁿ ndéé ndí dííⁿ núú yúú vii càa

sátá-xi, te yúú díhna ndèé mee-ni yúú vâha sá nání jâspé sátá-xi, te yúú cúú ùú ndèé tucu ingá núú yúú vâha sá nání zâfirú sátá-xi, te yúú cúú ùní ndèé tucu ingá núú yúú vâha sá nání ägatá sátá-xi, te yúú cúú cùmí ndèé ingá núú yúú vâha sá nání èsméraldá sátá-xi.

²⁰ Te yúú cúú ùhúⁿ ndèé tucu ingá núú yúú vâha sá nání ònicé sátá-xi, te yúú cúú ìnú ndèé tucu ingá núú yúú vâha sá nání còrnalíná sátá-xi, te yúú cúú ùsá ndèé tucu ingá núú yúú vâha sá nání crìsòlitú sátá-xi, te yúú cúú ùná ndèé tucu ingá núú yúú vâha sá nání bèrilú sátá-xi, te yúú cúú ìⁿ ndèé tucu ingá núú yúú vâha sá nání tòpacíú sátá-xi, te yúú cúú ùxí ndèé tucu ingá núú yúú vâha sá nání crìsopásá sátá-xi, te yúú cúú ùxí ìⁿ ndèé tucu ingá núú yúú vâha sá nání jâcintú sátá-xi, te yúú cúú ùxúú ndèé tucu ingá núú yúú vâha sá nání àmatístá sátá-xi.

²¹ Te ndi ùxúú yuyèhe sá ñúhú dòco-áⁿ cúú-xí mèe-ni yúú vâha sá nání pèrlá, te ndúu ni yúú cúú ìⁿ ìⁿ yuyehe-áⁿ. Te tnuú cáhnú ndècu xití ñúú-áⁿ cúú-xí mèe-ni díhúⁿ cuááⁿ, te càa-xi datná cáá vídriú sá túu ndàa ingá xio.

²² Te ní xiní-í sá ñà túú vèhe núú chíñùhu ñáyiú Dútú Ndiöxí cáá ñúú-áⁿ, chi mee-ná Dútú Ndiöxí Yáa quidé nchàa-ndi túhú sá vâha ndècu ñúú-áⁿ, ndihí Yáa cáá datná cáá ìⁿ mbéé quití ní dánícuèhé-güedé.

²³ Te ñúú-áⁿ ñà túú-gã xíní ñùhu-xi nchíanchii dayèhé-xi, te ni yóó ñà túú-gã xíní ñùhu-xi, chi mee-ná Yá Ndiöxí dáyéhé-gá ñúú-áⁿ ndihí Yáa cáá datná cáá ìⁿ mbéé quití ní dánícuèhé-güedé.

²⁴ Te cue ñáyiú nchaa ñúú cáá ñùyíú, ñáyiú ní naníhí tàhú xíndecu ñúú-áⁿ dáyéhé-gá núú-yu, te nchaa cue téé yíndaha ñaha xii-yu nèhe-güedé sá yíñùhu sá cúú-xí ñúú-áⁿ, te quide cahnu ñaha-güedé xii-gá.

²⁵ Te yuyèhe ñúú-áⁿ ñà túú tnàhí nàndedí, te ñúú-áⁿ ñà túú tnàhí cùndiquíⁿ.

²⁶ Te nchaa ñáyiú nèhé-yu sá yíñùhu sá cúú-xí ñúú-áⁿ te quide cahnú-yu Yá Ndiöxí.

²⁷ Te ñúú-áⁿ vâ cúú cùndecu ni ìⁿ ñáyiú ndècu ichi cuehé ichi duha, te ni ìⁿ ñáyiú

ndehnde, te ni ìⁿ ñáyiú quide sá ñà túú cùu vâha iní Yá Ndiöxí vá cúú cùndecu-yu ñúú-áⁿ, chi mee-ni ñáyiú naníhí tàhú ñáyiú yòdo tnuní núú tütú Yáa cáá datná cáá ìⁿ mbéé quití ní dánícuèhé-güedé, mee-ni ñáyiú-áⁿ cundecu-yu ñúú-áⁿ.

22

¹ Te sátá dúcáⁿ te díu-ni espíritú-áⁿ ní dánèhé núú ñáhá-xí xii-í yúte núú ñúhú ndúte candoo canine, te ndute-áⁿ candeca-xi iní ñáyiú ni caa ni quíhíⁿ, te ndute-áⁿ quée-xí mèi núú núcòo Yá Ndiöxí ndihí Yáa cáá datná cáá ìⁿ mbéé quití ní dánícuèhé-güedé.

² Te cuádava tnuú cáhnú yâha xití ñúú-áⁿ cáá yúte-áⁿ, te xio xio yuhu yúte-áⁿ níhnú yútnu cuuⁿ sávidí-xi, te sávidí nchaa yutnu-áⁿ cúú tucu-xi sá cándeca iní ñáyiú ni caa ni quíhíⁿ, te nchaa yutnu-áⁿ cúúⁿ sávidí-xi úxúú xito ìⁿ cuíá chi ndi tnahá yóó cúúⁿ sávidí-xi, te nchaa ndaha-xi cùu-xi tátna sá cúú-xí nchaa ñáyiú.

³ Te vá yóo ìⁿ-gá cada ìⁿ sá ñà túú cùu vâha iní Yá Ndiöxí ñúú-áⁿ. Chi ñúú-áⁿ núcòo mee Yá Ndiöxí ndihí Yáa cáá datná cáá ìⁿ mbéé quití ní dánícuèhé-güedé xítaxi tnùnigá, te nchaa ñáyiú xínu cuechi núú-gã cada cáhnu ñahá-yu xii-gá.

⁴ Te nchaa ñáyiú-áⁿ cundehe núú-yu Dútú Ndiöxí, te tneé-yu cundeé díu-gá.

⁵ Te ñúú-áⁿ vâ quínigá-yu níú, te ni vâ cánèhe chiuⁿ-gá-yu ñúhú cutnùní núú-yu, te ni nchíanchii ñà túú-gã xíní ñùhu-xi dayèhé ñúú-áⁿ chi mee Dútú Ndiöxí dáyéhé-gá, te ni caa ni quíhíⁿ cunúú-yu cundecu-yu ñúú-áⁿ.

Sa ta cùyatni nduu quixi tucu Xítoho Jesu cristú

⁶ Te sátá dúcáⁿ te ní cachí tnúhu espíritú xínú cuèchi núú Yá Ndiöxí-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yá Ndiöxí Yáa dácàhu iní nchaa cue téé càháⁿ tnúhu-gá nàcuáa cáháⁿ-güedé ní tendaha-gã ìⁿ espíritú xínú cuèchi núú-gã ní quixi-xi ní dánèhé-xi nchaa ñáyiú xínu cuechi núú-gã nchaa nàcuáa cada-gá, te vá cùyaa-gá ducaⁿ cada-gá —duha càchí espíritú-áⁿ.

⁷ Te ní cáháⁿ Xítoho Jesucristú, te càchí-gá:

—¡Ío ndíhi quixi tucu-í!

¡Te ío váha tnahá nchaa ñáyiú tñi nchaa tnúhu càháⁿ Yá Ndiöxí yódó tnùní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xiní núú-í nchaa nàcuáa cada-xi ndéé cuèé-gá. Te sáta dúcáⁿ ñi cuu te ní ngüíñí xítí-í núú espíritú sá ñi dánèhé núú ñáhá nchaa xíáⁿ cuèndá chiñuhu-í-xi ni cuu.

⁹ Te ní cachí-xi:

—Vá dúcáⁿ càda-n, chi yúhú dícó xínú cuèchi-í núú Yá Ndiöxí dàtná cúú yòhó ndíhi nchaa dava-gá ñáyiú ndècu ndíhi-n ichi-gá càháⁿ-ndó tnúhu-gá, ndíhi nchaa ñáyiú tñi nchaa tnúhu ndéé núú tütú-a, te xíáⁿ càchí-í sá vā dúcáⁿ càda-n, chi mee Yá Ndiöxí ducaⁿ chiñuhu-n-gá —càchí espíritú-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chidáhu-n ni ñiⁿ tnúhu Yá Ndiöxí ndéé núú tütú-a, chi sa ní cuyatni cada-xi nchaa nàcuáa ndéé tnuní.

¹¹ Te daña sã ncháá ñáyiú ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te ducaⁿ-ni na càda váha-yu cundecú-yu, te nchaa ñáyiú quide nchaa nàcuáa cùú váha iní Yá Ndiöxí te ñiⁿ-ni ducaⁿ na càdá-yu cundecú-yu —duha càchí espíritú-áⁿ.

¹² Te ní cachí Xítoho Jesucristú:

—Cundedóho-n tnúhu na càháⁿ-í-a. Ío ndíhi quixi tucu-í, te canehe-í nchaa sá ndúú tãhú ñáyiú quixi, te nàcuáa ndúú chiúⁿ ní quidé-yu ñiⁿ ñiⁿ-yu te ducaⁿ cùnduu sá cuñaha-í nduu tãhú-yu.

¹³ Te yúhú cúú-í Yaá sa ndècu ndéé cútnahá ní ngáva ñuyúú, te ñiⁿ-ni-í cundecu-í ni caa ni quíhíⁿ —duha càchí-gá.

¹⁴ Te váha tãhú nchaa ñáyiú sa ní nduu ndoo ní nduu nine iní-xi, chi ñáyiú-áⁿ ñi nduu tãhú-yu quíhu-yu xítí ñuú-áⁿ, te caxí-yu sávidí yutnu nùtní-áⁿ te xíáⁿ can-deca-xi iní-yu ni caa ni quíhíⁿ.

¹⁵ Te ñuú-áⁿ vā cúú quíhu ni ñiⁿ ñáyiú ndècu ichi cuehé ichi duha, ni cuè ñáyiú

quide nduu, te ni cuè ñáyiú ndècu ichi dñí iní, te ni cuè ñáyiú sãhni tnahá ñáyiú-xi, te ni cuè ñáyiú chiñuhu nchaa sá ñi cadúha cue téé ñuyúú-a càchí-yu cùú ndiöxí, te ni cuè ñáyiú tnahá iní dacuàndehnde, te ni ñiⁿ ñáyiú ducaⁿ xíquide vá ndúú tãhú-yu quíhu-yu xítí ñuú-áⁿ.

¹⁶ Te ní cáháⁿ tucu Xítoho Jesucristú, te càchí-gá:

—Yúhú Xítoho Jesucristú ní tendaha-í espíritú xínú cuèchi núú-í cuèndá cachí tnúhu-xi xii-n nàcuáa ndúú tnúhu cúñaha-n xii nchaa ñáyiú ndècu ndíhi-n ichi-í dácuaha tnúhu-í ñiⁿ ñiⁿ ñuú. Te yúhú cúú-í mei ñàní tnahá ndí Dávíí, te cada iní-n sã cúú-í dàtná ñiⁿ chódíní quiti quène datneé —duha càchí-gá.

¹⁷ Te nchaa ñáyiú cùú cuèndá Xítoho Jesucristú Yaá cáá dàtná cáá ñiⁿ mbéé quiti ní dánicuèhé-güedé, ñiⁿ-ni ñáyiú-áⁿ cúú-yu ñáyiú cada iní-ó sã cúú-yu ñiⁿ ñadíhí xíchí tñandaha ndíhi ñaha xii-gá, te ñáyiú-áⁿ ñiⁿ-ni càháⁿ-yu ndíhi Espíritú Yá Ndiöxí, te xãhãⁿ-yu ndíhi Espíritú-gá xii nchaa dava-gá ñáyiú:

—Chí táquixi —cachí-yu xãhãⁿ-yu ndíhi Espíritú Yá Ndiöxí.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnahá-yu cúñahá-yu xii nchaa dava-gá ñáyiú-áⁿ, te nchaa ñáyiú cùní tuha ichi-gá te na quixí-yu, te dícó ducaⁿ cùú tãhú-yu sá cándeca iní-yu ni caa ni quíhíⁿ.

¹⁸ Te nchaa nchóho ñáyiú ndèdóho nchaa nàcuáa càháⁿ tnúhu Yá Ndiöxí ndéé núú tütú-a càháⁿ-í dóho-ndo. Te núú ñiⁿ ñáyiú na còdo-gá tnúhu chido tnùní-yu núú tütú-a, te Yá Ndiöxí ío dandóho ñaha-gá xii-yu chi yáha-yu nchaa tnúndóho yodo tnuní núú tütú-a te núú ducaⁿ na càdá-yu.

¹⁹ Te núú ñiⁿ ñáyiú na chidáhu dava tnúhu Yá Ndiöxí ndéé núú tütú-a te ñáyiú-áⁿ vā ndúú tãhú-yu cundecú-yu ñuú-gá, te ni vā ndúú tãhú-yu sá cándeca iní-yu ni caa ni quíhíⁿ dàtná yódó tnùní núú tütú-a.

²⁰ Te Xítoho Jesucristú Yaá càháⁿ sá ncháá tnúhu-a cùú-xi tnúhu ndáá ní cáháⁿ-gá ní tecú dóho-í, te càchí-gá:

—Ndáá sá ïo ndĩhi quixi tucu-í —duha Jesucrìstú —duha ní xáhaⁿ-ĩ xii-gá.
 càchí-gá. ²¹ Te Xítóhó Jesucrìstú ío na chìndee
 Te yúhú ní xáhaⁿ-ĩ xii-gá: chitúu ñaha-gă xii-ndo nchàa-ndo. Te ducaⁿ
 —Ducaⁿ na cùnduu, taquìxi yohó Xítóhó na cùnduu. Te ío chí cádá ndèe iní-nă vitna.